


Lologena Wo Kienane
Yesu Kristo Kome
Kewo



The New Testament in the Lewo Language of Epi Island,
Vanuatu

Lologena Wo Kienane Yesu Kristo Kome Kewo
The New Testament in the Lewo Language of Epi Island, Vanuatu
Le Nouveau Testament en Lewo langue de l'île d'Epi au Vanuatu — Niutestamen long Lewo
lanwis, blong Epi Aelan, Vanuatu

copyright © 2016 Wycliffe Bible Translators, Inc.

Language: Lewo

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents.

For other uses, please contact the respective copyright owners.

2022-03-11

PDF generated using Haiola and XeLaTeX on 18 Apr 2025 from source files dated 31 Aug 2023
ee028e1c-7e53-571d-8041-681daaf580e8

Contents

INT	1
Matiu	2
Mak	72
Luk	114
Yoane	190
Yunãena Lala	244
Rom	319
1 Koren	355
2 Koren	387
Kalesia	410
Episas	423
Pilipãe	434
Kolosi	443
1 Tesalonaika	451
2 Tesalonaika	458
1 Timote	462
2 Timote	472
Taetas	479
Pilimon	484
Le Yu Lala	487
James	513
1 Pita	522
2 Pita	532
1 Yoane	538
2 Yoane	546
3 Yoane	548
Sut	550
Nakilologianega	553

Preface

This publication is the New Testament in the Lewo language. The 3,500 speakers of Lewo live on the east coast of Epi, an island in the Shefa province of central Vanuatu. It was translated over the years 1982 to 2015 by the Lewo Translation and Literacy Project, which operated under the Epi Council of Chiefs and the churches on the island. The translators were Kapiapo Melio, Andrew Avio, and John Sethy. The translation advisor and editor was Robert Early. Numerous Lewo speakers assisted as committee members and reviewers, and the support provided by many overseas donors is acknowledged.

Visena Pesa

Visena lala e Naviranarena Viyu naga molue susumo kome visena na Krik. Sir- aunia, apilopu pim kome visena tařena la moki talivi viora e yomerava. Mis lala nařa apim Vanuatu asiar navilopuena kome kieta visena.

Mis Graham Horwell amio elta lařas apilopu tusi lařas sumo, ana pe punu re poli. Asiar si na siriena kome Lewo e 1982 pog nařa Maltarwo Robert Early myuřae amio Elta Kapiapo Melio sumo, řisna Andrew Avio mila towe yuřaena, řisna John Sethy naga řena mila yuřaena nawuloveveena namaro.

Yuřaena nene pa řaga tol kasi nini 2016 nařa yuřaena keviu pimi řisi, ana tusi kiena ne Ntewa pimi pani yeririna lala nařa apisin visena na Lewo. Potena keviyu pan ita punuga nae Epi, sane suře lala, suřare lala, la nařa akoan kilavaru a la nařa amila yuřaena sane asike loyuřa e komiti na vilopuen visena pona amiyuřae sane yaru na vilopuen visena, pona lala na wuloveveena visena.

Po pon telavia sane pe nalaena wo tanea nařa Ntewa na mava mla pan ita, ve teligan lua re, ana teuloia, tesuřalu ea, telelaga ea nařa naga pisawali ke Suře Yesu pan ita, vena ilaen kieta maliena lala e yomarava nini, a e řena e legiena maro.

Nono nařa teke ea kulus nen tusi wa naga kinas sanini

Tusi Wa řeke e wosnen klavaru ana kapi tego ke ea.

Klavaru - toutouena na suřalu řareraena ve kulul re pogos tai

Tusi Wa - Visena kiena ne Ntewa

Kapi - Ninuna ne Ntewa tego li yo punuga

Lologena Wo Kiena Ne Yesu Kristo Naña MATIU Siriyuia Visayuena Na Tusi Nene

Kompasnen suniena plas na tusi nini

Tusi nini, “*Lologena Wo Kiena Ne Yesu Kristo Naña Matiu Siriyuia*”, naga pisawal lologena wo sape Yesu, naga yaru naña Ntewa pisaar pa kiena yeririna la nanua sumo rui sape yoko naga imi vena tamalia la. A e Yesu, navisaarena la naña Ntewa pisaar pa kiena yeririna lala e Tusi Pesa ana pimi m̄alivi narui. Yesu paeme e yo kiena lus nae Israel lala, a kiena lologena wo nene, naga pe kiela re ga poli, naga pe kiena yeririna punuga na yomarava nini.

Matiu mligan ruru kompasnen tusi la nene sum̄aga sanene. Naga pisayu p̄esania, naña Yesu paeme, a naga pisayu m̄enaga naña Yoane kea, a naña Yermare kilalia. A siraunia, naga pisayu naña Yesu siari kiena yum̄aena e yo naña Kalele sum̄a pisawal ke lologena wo pa yaru lala, pian la, a kila ruru kiela inanena lala. Siraun nene, naga pisayu m̄ena naña Yesu pa ma Yerusalem, amio suri la naña Yesu kila maron e kiena legiena na olua maro. A naga pisayu maron naña Yesu mare, a yoko mal sina.

Matiu pisayu naña Yesu naga pe navianiena tai naña po taulu navianiena tañena lala a nam̄areraena na visawalen kinasnen navisaluaena kiena Ntewa sike e naga, a pisayu p̄elaga naña Ntewa pimi pe Parin Suñe kiena ne kiena yeririna lala.

Suri la moki naña Yesu pian la ea, Matiu miliḗpere kompas lima, sanene:

Yesu pian kiena yeririna lala metava e kunusa. E kiena vianiena nena, naga pisawal p̄elaga naña yaru la monar akila, vena aimi naña Ntewa ve kiela Parin Suñe. A naga pisawal kiela yum̄aena lala, ana taman pan la vena ayum̄aenia, a pisayu sur la naña yoko atolia e luwasnen kiela maliena

e yomarava viu naña Ntewa imi ve Parin Suñenia. Kiena vianena la nene sike e marana na keviu lima vito tol marana na keviu olua.

Yesu pian kiena yeririna lualima taaga pa lua. A mila m̄areraena pan la vena ava avisawal kiena lologena wo va yaru tañena lala. Navianena la nene sike e marana na keviu lualima.

Pakaiwa la naña Yesu pisa vena visayuen yaru la naña Ntewa pe kiela Parin Suñe, e yomarava viu naña yoko ava asike ea. Pakaiwa la nene sike e marana na keviu lualima taaga pa telu.

Yesu pian kiena yeririna lala e p̄elaga naña yaru monar kila vena tavevea. Navianena la nene sike e marana nakeviu lualima taaga pa orelu.

Yesu pian kiena yeririna lala, pisayu suri la naña yoko imi m̄alivi e legiena maro, a e yomarava viu naña Ntewa ve Parin Suñenia. Navianena la nene sike e marana na keviu lualima lua pa vari a lualima lua pa lima.

Kompasnen tus la nini

Repinane Yesu lala a Yesu paeme 1:1—2:23

Yum̄aena kiena Yoane Nakeena 3:1-12
Yoane kee Yesu, a Yermare tañalia 3:13—4:11

Yesu kila kiena yum̄aena e lepas naña Kalele 4:12—18:35

Yesu moluwe Kalele pa ma Yerusalem 19:1—20:34

Legiena na maro kiena Yesu naña kila kiena yum̄aena garu Yerusalem a yo la naña lavisin ga Yerusalem 21:1—27:66

Yesu mal sina a kiena nalogena lala apisu naga 28:1-20

Repina ne Yesu lala

Luk 3:23-38

¹ Yesu Kristo naga molue kome lus na yermarua keviu lalua kiena ne repina ne le Yu lala, nane Epraam naga sumo, amio Tepet naña naga sirau. Repina ne Yesu la punu ga, la kiela kia sanini:

² Epraam naga narina naña Aisak. Aisak naga narina naña Sekop.

Sekop naga narina naþa Suta, amio wenla taþena lala.

³ Suta naga narina lua, Peres amio wenla Saera, naþa lalua na ape kaora, naþa lalua na anela naþa Tamã.

Peres naga narina naþa Ebron.

Ebron naga narina naþa Ram.

⁴ Ram naga narina naþa Aminatap.

Aminatap naga narina naþa Nason.

Nason naga narina naþa Salom.

⁵ Salom naga narina naþa Poas, a Poas nene naþa naga anena Reap.

Poas naga narina naþa Opet, a Opet nene naþa naga anena Rut.

Opet naga narina naþa Sese.

⁶ Sese naga narina naþa Tepet, a Tepet nene naþa naga pe þarin suþe kiena ne le Israel lala.

Tepet naga narina naþa Solomon, a Solomon nene naþa anena, naga wona ne Uraea na sumo.

⁷ Solomon naga narina naþa Reopoam.

Reopoam naga narina naþa Apia.

Apia naga narina naþa Asa.

⁸ Asa naga narina naþa Seosepat.

Seosepat naga narina naþa Soram.

Soram naga narina naþa Usaea.

⁹ Usaea naga narina naþa Sotam.

Sotam naga narina naþa Eas.

Eas naga narina naþa Isakaea.

¹⁰ Isakaea naga narina naþa Manasa.

Manasa naga narina naþa Amon.

Amon naga narina naþa Sosaea.

¹¹ Sosaea naga narina naþa Sekonaea, amio wenla lala. Ana e pogos kiena ne

la nene narui, yaru lala na purvanua taþena naþa Papilon apanon aþure plan le Israel lala ava ayumãe korena garu Papilon.

¹² Sekonaea naga narina naþa Seltiel,

nane pogos naþa le Israel lala amiyumãe korena ke garu Papilon wa.

Seltiel naga narina naþa Seruþapel.

¹³ Seruþapel naga narina naþa Apiut.

Apiut naga narina naþa Eliakim.

Eliakim naga narina naþa Aso.

¹⁴ Aso naga narina naþa Satok.

Satok naga narina naþa Akim.

Akim naga narina naþa Eliut.

¹⁵ Eliut naga narina naþa Eliesa.

Eliesa naga narina naþa Matan.

Matan naga narina naþa Sekop.

¹⁶ Sekop naga narina naþa Yosop, naþa wona ne Maria. Maria nene, naga anenane Yesu, naþa apisape naga pe Navisaarena.

¹⁷ Siar e Epraam, teras lelei lala pimi tol Tepet, teras la nene tol lualima taaga pa vari. A siar e Tepet pimi tol pogos naþa le Papilon lala aþure plan le Israel lala avanon ayumãe korena garu Papilon, teras lelei lala tol mïena ga lualima taaga pa vari, a siar e pogos naþa la asike garu Papilon, pimi tol Kristo, teras lelei lala tol ke sina ga lualima taaga pa vari.

Yesu paeme

Luk 2:1-7

¹⁸ Suniena nini kiena ne Yesu Kristo, naþa naga paeme sanape, naga sanini: naga anena, sira naþa Maria, naþa la apisaaria sumo asape yokorena talopa amio yaru tai, kiena kia Yosop. Ana pogos naþa lalua pe atalopa re poli wa, Maria naga mlogekilale naþa naga mïeþena, na pimi kome Ninuna Wa.

¹⁹ A Yosop naþa la apisaaria apisape yokorena naga talopa amio Maria nene, naga pe yaru wo tai, a naga pe pisa pe pisape Maria naga kila suri tai piowa poli. Ana naga pisu sane þisi na lalua na monar akilaro kiela navisaarena nene, ana naga sitom ke pisape kila ga e þelaga tai naþa malumu ga, vanon naþa naga yepen mavin kilaen Maria memawa manenea vanon suri nene.

²⁰ A pogos naþa naga sitom ke sape kila sanene, naga mïenia, pisu navisi tai kiena ne Ntewa mïalivin naga, ana navisi nene pisa pania, pisape "Yosop, ko lus kiena ne Tepet, ko na ve ologe re viowagan naþa oure Maria ve womã, vanon sisi naþa teke e naga, naga pimi ga kome Ninuna Wa.

²¹ Yokorena Maria war narina yermïene, a monar osikia kiena kia Yesu Natamali-aena, vanon yokorena naga warplan mla-mulena viowa lala vetan kiena yeririna lala."

²² Ana suri la nene pimi kakate sanene, vena kila visena kiena ne Ntewa tai vim

ve lelaga, sa naña Navisawalena Aisea naga pisawal sumo,

²³ naña naga pisape

*“Yokorena sira m̄ee tai naña yerm̄ene pe
pisu re poli wa, naga m̄eņena,
ņisi na war narina tai ve yerm̄ene,
ana ŋisi na asikia kiena kia ve
'Emanuel.' ”* *Ais 7:14*

Kia naña “Emanuel” naga kana kinas sane “Ntewa sike amio ita.”

²⁴ Pogos naña Yosop tavolo sina, kila sa naña navisi kiena ne Ntewa pisa pania, ana naga talopa amio Maria, ŋere pe wona.

²⁵ Ana pe pa pisu re Maria tol pogos naña Maria ŋarlua narina nene. A pogos naña Maria ŋarlua sisi nene, ana Yosop sikia kiena kia “Yesu.”

2

Yaru la naña akilia ruru ŋelaga kiena ne verue lala apimin asape avisu Yesu

¹ Yesu naga paeme e pulkumali tai, kiena kia Petleem, lepas nae Yutea. E pogos naña Yesu paeme, Erot naga pe ŋarin suņe kiena ne le Yu ke lala. A siraunia, pe piavi re nena poli, ana yaru la ŋasia naña la akilia ruru ŋelaga kiena ne verue la po paņisi, apimi atol garu Yerusalem. Susumo la nene amolue e kiela purvanua, e lepas naña mrae molue ke komea, ana apimi.

² Ana la apiun tan yaru lala, asape “?Sisi naña paeme mare ga na wa, naña asape ŋisi na naga vim ve ŋarin suņe kiena ne le Yu lala, naga m̄eke pe? Imimi moņal kiena verue rui, molue ke e yo naña mrae molue ea, ana imimi mepimin ke mesape meieluar naga.”

³ Ana pogos naña ŋarin Suņe Erot tol visena la nene, amio yaru taņena laņasia nae Yerusalem, amloge, ana la pe akekaran re nena ga.

⁴ Ana Erot pio yerkawa kiena ne yaru wa lala amio navianena navisaluaena lala apimi apisuia, ana naga piun tan la, pisape “?Navisaarena naña apisape ŋisi na naga imi, la apisa ke asape ŋisi na naga vaeme pe?”

⁵ La naņani apisataņea, asape “Yokorena Navisaarena naga vaeme garu lepas nae Yutea, e pulkumali naña Petleem.

⁶ Nanene vanon naña sumo na, navisawalena tai siriyuia, pisape

‘Ntewa naga pisa sanini, pisape

“Amiu nae kumali naña Petleem, amiu taņatete avisavenua,

yerkawa taņena nae Yutea lala, la atola metavan amiu, ana amiu na ato ga tano, peraga,

vanon yokorena nasumonena keviu tai molue nenaga kom pun amiu,

ana naga visuar ruru kiau yeririna lala nae Israel.” ’ ’ *Maika 5:2*

⁷ Pisi na ŋarin Suņe Erot naga pio vinaun ga yaru na kilia ruruen ŋelaga kiena ne verue la nene, vena aimi avis ga amio naga taaga, vena naga loge ruru tan la, pisape la apisu verue naņani kate na pogwai.

⁸ Ana naga pisa pan la, pisape “Amiu na monar ava akale sisi nene vano-o alualia, ana awasuņe si aimi avisawal van inu, vena inu m̄ena ga nevano neieluar naga,” ana naga mligan la apa garu Petleem. Ana kiena visena nene naña naga pisa ana pisokan ga, naga sinenan pisape visae lual sisi tomtom nene, ana wem̄aria.

⁹⁻¹⁰ Ana yaru la nene la amloge visena kiena ne ŋarin suņe nene ŋisi, ana apa sina ga e kiela mrapplepa, ana apisu sina verue nene naña tego ŋesia e lepas naña mrae molue ke komea. Pogos naña la apisu si verue nene, akekara paņisi, ana verue naña naga sumon la m̄a ga pano-o atol e naña sisi nene m̄eke ea.

¹¹ Ana la apa loyuņa e yuņa nene, apisu sisi nene, amio anena naña Maria. Ana la akinai, amieluar naga. A la apikeņa kiela karo lala, aņar plan kiena nalaena la pania, suri tai naña kol, amio suri lalua naña ponos taninu po paņisi sa naña m̄aņes, naña kiela kia prakensis, amio mer, naña mer nene naga kana kilavaru keviu paņisi.

¹² Ana kolemallo, Ntewa pisi pan la e m̄eniena tai, pisaluņar la pisape “Ve ava akom re si lepas naña puna ne Erot.” Ana

la amligan yo nene, aḗsasupela ke sina ga, akome mrapa taḗena apa kiela.

Aḗurelua Yesu, aḗure apa Isip

¹³ Pogos naḗa yaru la nene amial rui, ana Yosop mēnia m̄a navisi kiena ne Ntewa tai pimi puna, pisa pania pisape “Yosop, osuḗalu, owar ninis nene amio anena, amiu aure ava garu Isip, vanon lavisi ke Parin Suḗe Erot kale ninis tomtom nene vena weḗar narui. Aya asuḗa garu Isip vano-o tol pogos naḗa nevisa van ko, ana awasuḗe amiu si aimi.”

¹⁴ Ana Yosop mlogear visena kiena navisi naḗani, ana suḗalu ḗarlua ninis tomtom nene amio anena, ana amligan plan ke e yemalo nene, ana amialin ke ava garu Isip.

¹⁵ Ana la apa asuḗa garu Isip yam piavi li m̄a ga, pano-o tol pogos naḗa Parin Suḗe Erot mare.

Suri la nene pimi kakate sanene, vena kila visena kiena ne Ntewa tai naḗa Navisawalena Osea naga pisawal nanua sumo vena vim ve lelaga, naḗa naga sapenua “Naruu na yermēne sike garu Isip, ana nevio naga wasuḗe imi.” *Ose 11:1*

Yaru nakilaen mara lala aḗe moḗar ninis lala

¹⁶ Pogos naḗa Parin Suḗe Erot naga kilia sape yaru nakilia ruruen ḗelaga kiena ne verue lala pe akila re sa naḗa naga pisa poli, pe apimi akom re si puna poli, ana naga sinena mimi paḗisi, ana naga pisa pan kiena yaru na mara lala, pisape “Ava akale ninis la punu ga naḗa ape yermēne asike Petleem, a la m̄ena ga naḗa asike lavisinia, la naḗa pe kiela kas lua re poli wa, ana awe moḗar la make ga amarmare.” Parin Suḗe nene naga polo pogos nene sanini, vanon mloge visena tan yaru la nene, naḗa apisawal mesmesun pania nanua e pogos naḗa verue nene kateḗesia.

¹⁷ Suri la nene kila visena naḗa Navisawalena Serem̄aea naga pisa sumo pimi pe lelaga, naḗa naga pisape

¹⁸ “*Le Raḗa lala amloge sira nae pula tai tagi na tagi, naga mloge piowa paḗisi,*

2:23 Mak 1:24; Luk 2:39; Yoan 1:45

sira nene naga Resel, naḗa naga tagin ke mapina lala.

Ana naga yepena mavin yaru tai kila luḗeluḗeena vena loge wo sina, vanon mapina la akokovio make ḗisi rui.” *Ser 31:15*

Yosop ḗar Yesu nene molue Isip, ḗasuḗe si pa Nasaret

¹⁹ Ana pogos naḗa Yosop lala asike garu Isip wa, ana Parin Suḗe Erot naga mare. Ana Yosop mēnia, pisu sina navisi kiena ne Ntewa tai pimi puna,

²⁰ ana navisi nene pisa pania, pisape “Yosop, osuḗalu, oure ninis nene amio anena, awasuḗe amiu si, ava garu kiamiu purvanua naḗa Israel, vanon Parin Suḗe Erot nene naḗa naga sape weḗar ninis nene, naga mare rui.”

²¹ Ana Yosop naga mlogear visena nene, naga suḗalu, ḗar ninis nene amio anena, aḗsasupela ke sina ga apa e kiela purvanua naḗa Israel.

²² Pogos naḗa la amialin ke asape ava tol garu Yutea, ana Yosop mloge asape Akaleas kus ke lelana ne arimana naḗa Erot, pe ḗarin suḗe ke garu Yutea. Ana Yosop maraun si vaen garu Yutea, ana naga mēni si tai, m̄al Ntewa naga pisi pania, pialuḗar pisape “Ve ova re si garu Yutea,” ana Yosop lala apalein e yo taḗena tai, kiena kia Kalele.

²³ Ana la apa asike e kumali tai e lepas nene, kiena kia Nasaret.

Suri nene pimi kate sanene vena kila visena kiena ne navisawalena lala vim ve lelaga, naḗa la apisayu Navisaarena nanua sumo rui, naḗa la apisa apisa apenua

“Yokorena, lala avisave naga ve yaru nae Nasaret tai.”

3

Yoane Nakeena sike ga e yokorena, mlologon ke navilopuena

Mak 1:1-8; Luk 3:1-8; Yoane 1:1-28

¹ Yesu naga kapuru pimi keviu, gar ga Nasaret, ana e pogos ke nene narui, Yoane Nakeena naga pimi ḗarpoyo e yokorena e

lepas nae Yutea, ana naga sumña mlologon ke, pisapenua

² “Amiu na monar avilopu amiu, vanon Nasuþenena kiena ne Ntewa pimi ke narui.”

³ Yoane Nakeena nene naga pe yaru naþa Navisawalena Aisea pisawal nanua sumo rui, naþa naga pisa, pisapenua

“Pulgon yaru tai sumña pio ke e yokorena, pisape

‘Amiu akila ruru make mrapa kiena ne Ntewa, vena naga kilia imi mñalivi e kiamiu malena lala.’ ” *Ais 40:3*

⁴ Yoane Nakeena nene naga sane Navisawalena Elaisa nene nanua sumo, sa naþa naga pe miyen re kulsota naþa po poli, mñana kulsota na ape ga e vilulus nen kamel, a kiena kilika na kararen mēþena na amiyumñan ga e kulus nen puluk. A kana kinanena e yokorena, kan ga narin suri la naþa asape kurpo ne, amio suri kiki naþa sukapak tetan la amiyumñanena.

⁵ Naga sumña e yokorena nene pano pano-o, ana yeririna nae Yerusalem lala amio mñana ga pulkumali taþena lala nae lepas naþa Yutea, a pulkumali mñana ga la naþa lavisin wii nae Yortan, la apanon apisu naga.

⁶ La amiyagogon kiena lologena lala, a la apisa plan kiela mlamulena viowa lala pania, ana Yoane kela e wii nae Yortan.

⁷ Ana e pogos tai, Yoane pisu naþa yeririna la moki na þegas nalotena lua nene kiena ne le Yu lala, naþa Varasi lala amio Satusi lala, la apimin ke naþa naga ke la, ana naga pisi mñarera pan la, pisape “?Amiu na sane lomñara lala, naþa la amaraun kapi tai ana la aþure, ana amiu na asitom asape akilia aurmatan kapi naþa Ntewa naga þisi na ligan imi, naþa pe amiu apilon amiu re poli wa?

⁸ Ana visae ve lelaga kemua naþa amiu amaraun nakoana nene, ana kiamiu malena naga monar war mras la naþa powo, naþa torokin kiamiu navilopuena nene.

⁹ Ana avisuar amiu, popon amiu na ve awarwar amiu re sina, sa naþa asumña akila ke rui, naþa apisa ke asape ‘A, ita

na poga ga rui, okilakan ita na tepe lus ruru kemua kiena ne yermarua Epraam.’ Ana nanene na pe suri re tai nene poli, vanon visae Ntewa naga sinenania, naga kilia la ga kilavaru la nene, kila la aimi ave lus kiena ne Epraam la ve moki, vena akus lelemiu.

¹⁰ Nevisa van amiu, nesape mñekiavi mon ruru rui pisape teroro purlaki la naþa pe þar re mras wo poli, ana yokorena ateroro la ana akoven la ava e kapi.

¹¹ In na nepimi sumo, ana nekee amiu ke ga e wii, vena kila merarava sa naþa amiu apilopu amiu rui, ana yaru taþena tai naga pimi ke siraun inu wa. Yaru nene, naga to laa metavan inu, a in na nepiowa ga, netorokin re nowar plan kiena kulus nen lana poli, pona nekilia nekila kiena yumñana taþena lala. Ana naga ke narui, naga kilia kee amiu e Ninuna Wa, amio kana kapi nena, vena kekan plan kororaki lala e kiamiu malena lala.

¹² Naga na sane mlarar ke koruak nayuraren wit e limana, ana sisilin plan mrasa la akekapil vito lele taþena, a vinus vito lele taþena, ana war plan mrasa va umña mñana, a yokorena naga kilia kuan vinusa va e kapi naþa taþatete mare pogos tai.”

Yoane ke Yesu

Mak 1:9-11; Luk 3:21-22

¹³ Ana Yesu mligan lepas naþa garo Kalele, pam e wii nae Yortan vena Yoane ke naga.

¹⁴ Ana Yoane pisape visaluþaria, pisapenua “?Sanape na ko opamin osape nekee ko? Suri nene na pe mesmesu re poli. Popon ga ko na okee inu.”

¹⁵ Ana Yesu pisatamñea, pisape “Peraga, þisi na ve ve sa re nene, popon ita na tetamñan ga tetaveve suri wo la naþa Ntewa naga sinenania sape tekila.”

Ana Yoane tamñan Yesu pimi puna, ana kea.

¹⁶ Ana pogos naþa naga ke þisi, Yesu naga molue e wii pa metava, ana veraga ma e peni pietava pania, ana naga mñal Ninuna ne Ntewa pitomi ke tano sa naþa lomñe, pitomi tol Yesu.

¹⁷ Ana la amloge Ntewa nae ma e peni pisi pitomi tano, pisape “Nene na naruu ne, naña nesitom naga pañisi. Kiau sitomena teke ga e naga, a nekekarana naga pañisi.”

4

Parin suñe kiena ne yermare lala tañali Yesu

Mak 1:12-13; Luk 4:1-13

¹ Suraun naña Yoane Nakeena kee Yesu ñisi, ana Ninuna Wa naga sumon Yesu pa e yokorena tai, vena Yermare tañali naga.

² Ana e pogos nene, Yesu monsilun leniena tol legiena lualima vari a lemalo mña ga lualima vari, a siraunia naga viso kari pañisi.

³ Ana Yermare, yaru na tañalien yeririna lala, pimi pisa pania, pisape “Visae ko na ope narina ne Ntewa kemua lelaga, ko ovisali van kilavaru la nene aimi ave kilaparavi, vena okan tai.”

⁴ Ana Yesu pisa pania, pisape “Peraga, vanon Visena Wa pisa sanini pisape

‘Kinanena ga tañatete kila yaru mali, ana visena punu ga naña Ntewa pisa, naga ga nene kilia kila yaru mali.’ ”

Naw 8:3

⁵ Ana Yermare pisape wereli sina ga sitomena kiena Yesu va garu e Yuña Wa naña garu Yerusalem, ana mligan naga sike e yo tai naña pa manene metava pañisi e wosoyuña Mana Ntewa.

⁶ Ana naga pisa pania, pisape “Visae ko ope narina ne Ntewa kemua lelaga, ko oula, oto tano e nene. Ana yoko ko okila woga ga ne, vanon Visena Wa pisayu Ntewa, pisape

‘Naga yoko ligan kiena navisi lala aimi avisuar ko mña,

ana la ayukop yaun ko ga omñeke metava e limala, vena ve owan re laña e kilavaru tai.’ ” *Yauena 91:11,12*

⁷ Ana Yesu pisatamñe ke sina ga Yermare, pisa pisape “Peraga, vanon Visena Wa pisa mña ga sanini, pisape

‘Ko na tañatete otañali kioña Suñe Ntewa, naña otañali omñareran osape naga kila kioña suri tai.’ ” *Naw 6:16*

⁸ Naga na, Yermare ñere ke sina ga sitomena kiena Yesu pa metava e pupia kunus tai, pisape “Visae ova ose kunus nene, okira vito tano ovisu purvanua kerkeviu la ne sike e yomarava nini, amio kala suri wo la naña asike ea.”

⁹ Ana tañali ke sina ga Yesu yam telu narui, pisa pania, pisape “Suri punu la nene na yokorena netamñan van ko, visae okinai olotun inu.”

¹⁰ Ana Yesu pisatamñea, pisa pisape “Ko oure, Yermare. Visena Wa pisa sanini, pisape

‘Pisi na monar olotun ga Ntewa naga taaga, naña pe kioña Suñe, a okila ga kiena yuñena naga taaga.’ ”

¹¹ Ana Yermare purmatan Yesu, ana navisi la apitomi, apisuar ke naga.

Yesu siar kiena yuñena garu lepas nae Kalele

Mak 1:14-15; Luk 4:14-15

¹² Ana e pogos nene, li na mara lala kiena Parin Suñe Erot la atarar Yoane Nakeena, amligan naga pa e yuña nakoena. Ana pogos naña Yesu mloge nalogeena nene, naga sitom sape wasuñe si vito garo Kalele.

¹³ A pogos naña naga ñasuñe si pito garo Kalele, ana naga pe pa re si garo Nasaret poli, naga pito la garo Kapeneam rui, pulkumali naña mñeke lavisin lapa nae Kalele. Yo la naña siar Kalele pito tol yo losi, yo la nene porotano kiena ne lus lalua kiena yermarua lalua na nanua sumo, Sepulan amio Naptali.

¹⁴ Suri nene pimi mñalivi vena kila visena kiena ne Ntewa nene vim ve lelaga, sa naña Navisawalena Aisea naga pisawal sumo rui, naña pisape

15 “Amiu yaru lala nae yo kiena ne Sepulan amio yaru lala nae yo kiena ne Naptali,

naña asike likan wii nae Yortan amio pupia sive, amiu yaru la nae garo Kalele, e lelen yaru la moki naña pe ape le Yu re poli asike ea, amiu aloge visena nini:

16 Yeririna la naña asike e yemalolo, ñisi na alual pupia yomerarava tai.

La nene asuke ga e yemalolo silaga, naña la na ape namarena ga, ana pupia yomerarava tai tego pañisi pimi tegoli la.” Ais 9:1,2

¹⁷ Ana siar e pogos nene, Yesu sumã ga mlologon ke, pisapenua “Amiu na monar avilopu kiamiu sitomena vetan kiamiu mlamulena viowa lala, vanon naña nasuñenena nae ma e peni pimi ke lavisi narui.”

Yesu pio yaru na wereen ika la vari
Mak 1:16-24; Luk 5:1-11

¹⁸ Ana Yesu sumã ga miyaloro ke e isinen pupia lapa nae Kalele, ana mñal yaru la lua, Saemon Pita amio wenla naña Antru. Lalua asumã ga akuan ke lilivi, vanon lalua na ape yaru na wereen ika.

¹⁹ Ana naga pisa pan lalua, pisape “Amiu lua ataveve inu, ave kiau yaru lala, vena nevian amiu ana ave yaru na wereen yaru lala.”

²⁰ Ana lalua nene amligan kiela lilivi nañani veraga ga, lalua ataveve Yesu.

²¹ Ana Yesu mial li ga pa laa sane, mñal si yaru la lua Semes amio wenla naña Yoane, la lua na la narina ne Sepeti. Lalua asike e kiela los nen wa tai amio arimala, lala asumã ga akila ruru ke kiela lilivi. Ana Yesu pio lalua pisape lalua atavevea,

²² ana la lua asumãlu veraga, amligan arimala mñeke e wa, ana ataveve Yesu apano.

Yesu mlologo, pian ke yaru lala, a kila ruru ke namaiena lala
Luk 6:17-19

²³ Ana Yesu miyaloro ke pa e yo punu ga garu Kalele, pian ke le Yu lala e loyumã e kiela yumã na lotuena lala. Ana naga pisawal ke nalologena wo nene nasuñenena kiena ne Ntewa, a kila ruru ke yaru la naña maiena sike e yepela, a kila yaru la naña yepela lañas malmalumu, apimi amloge po sina.

²⁴ Ana la asunyu kia kiena Yesu pa kalo mñena yo punu ga e lepas naña Kalele na vito tano, naña apio asape Seria. Ana la aþure yaru la naña amai e yo punu ga nene apimi puna Yesu. La nene, lañasia naña amai, lañasia naña

magka kar kare la amloge piowa pañisi, lañas naña yermare la asike e la, lañas naña amarmarelu ke lala, a lañasia naña yepela lañasia marmare, ana Yesu kila ruru punu ga namaiena la nene amloge po sina.

²⁵ A yaru la moki pañisi naña ataveve Yesu e pogos nene. La nene apimi garu Kalele, a e mñena e lepas naña pulkumali lualima sike ea, a garu Yerusalem, a garu lepas taþena lala nae Yutea, a ma mñena e lepas nen þalu nae Yortan lepas þasia na vano. Ana la nae yo la nene apimi ataveve Yesu e pogos nene.

5

Yesu pian yeririna lala
Luk 6:20-23

¹ Ana e pogos tai, Yesu pisu yeririna la moki, ana naga pa metava e kunus tai. Sane kiela navianena tai, naga totano ana kiena yeririna lala apimi atovivia,

² ana naga pian la.

³ Navianena kerkeviu lañasia kiena ne Yesu sanini: naga pisape

“La naña apisu kilale naña pe añal re Ntewa e kiela malena poli wa, ana þisi na navisa ruruena vim van la, vanon Ntewa naga pe Parin Suþe kiena ne yeririna la ne sanene.

⁴ La naña suri viowa lala akila kare la ke pañisi, a amloge piowa, atagi ke na, ana navisa ruruena vim van la, e nakila luþeluþeena lala.

⁵ La naña ape yaru malumu ga, navisa ruruena vim van la, vanon naña Ntewa pisaar pan la rui pisape la suri wo la naña sike e yomarava nini van la.

⁶ La naña sinelan manene þelaga mesmesu lala sa naña Ntewa naga sinenania, ana navisa ruruena vim van la, naña þisi na avisu kiela malena ulen namesmesuena la nene.

⁷ La naña asumã sinela miye ke yaru taþena lala, navisa ruruena vim van la, naña yokorena Ntewa naga sinena ye manene la vaþisi.

⁸ La naþa sinela mekiki po, navisa ruruena vim van la, naþa yokorena la avisu Ntewa.

⁹ La naþa ape yaru na kilaen sumare, ana navisa ruruena vim van la, naþa Ntewa naga vio yaru la nene ave narina lala.

¹⁰ La naþa amlalaga e Ntewa, ana yaru taþena lala akila kare la vanon kiela nalelagaena nene, navisa ruruena vim van la, naþa yokorena Ntewa ure la ava loyuma e kiena nasuþenena.

¹¹ “Amiu la naþa yaru la akila kare ke kiamiu kia, a la aþene amiu ke na, a la apisa kare amiu, a apisa kotalia amiu, vanon naþa amiu na ape kiau yeririna lala, ana þisi na navisa ruruena vim mēna ga van amiu.

¹² Ana ve sinemiu viowa re, akilia akekara ga, vanon kiamiu pupia suri wo tanea lala sike ma e peni. Pisi na yaru la akila kare amiu vaþisi, ana visae ve sanene, la akila ve sa ke naþa yaru na sumo lala akila kare navisawalena lala.”

*Kururu sive amio kapi viaga
Mak 9:50; Luk 14:34-35*

¹³ Ana Yesu pisa mēna ga, pisapenua “Amiu na sane sive na e yaru na yomarava lala. Ana visae sive ve melkalka re sina, ana pe suri re si tai naþa kilia kila melkalka si poli. Ana sive nene na pe popon re si suri tai poli, popon ga akuan va narui.

¹⁴ “Amiu na sane kapi viaga na yomarava. Pogos naþa yaru la akila kiela pulkumali metava e kunus tai, kolemalu yaru la naþa asike perina akilia avisu kapi nena, ana taþatete akilawan kiela pulkumali nene.

¹⁵ Ana pe yaru re tai poli naþa silan kiena kapi, ana kalo si kapi nene e piaki tai. Pogos na yaru silan kapi, ana monar ligana to metava e lēna, ana yaru punu ga naþa asike loyuma ana kapi vivaga nene tegoli la.

¹⁶ Ana e þelaga ne na nene, amiu na monar ataman kapi na kiamiu malena

tegoli yaru la punu ga vena akilia avisu kiamiu yumaena wo la naþa amiu akila ke na. Ana pogos naþa la avisu kiamiu yumaena wo la nene, ana la akilia ayeluar kia kiena Arimamiu naþa sike ma e peni.”

Yesu pisayu navisaluaena kiena Mosis

¹⁷ Ana Yesu pisa mēna ga, pisapenua “Pe sineun re nenaga, naþa amiu asitom ke asape inu nepimin nesape nekuan plan navisaluaena kiena Mosis, amio visena kiena ne yaru navisawalena la poli. Peraga, pe sa re nene poli. In na nepimin nesape nevian ruru amiu e kinas nen visena punu ga la nene van amiu.

¹⁸ Suri na ne nepisa ke pan amiu ne, ana lelaga paþisi monar asitomalia, þisi na taþatete navisaluaena nene kovio, vanon sinapane amio yomarava nini lalua akovio. Ana taþatete narin mras nen visena tai, pona ya sina naþa teke e navisaluaena nene, kilia kovio, taþatete ga, vano-o tol pogos naþa suri na navisaluaena la nene vim kakate make ga.

¹⁹ Vanon suri ne na nene, visae yaru tai kila pal narin suri tai e navisaluaena nene, pona vian yaru taþena tai kila sanene, yaru nene na ve to re e yo wo tai e nasuþenena kiena ne Ntewa. Ana yaru naþa taveve ruru visena na navisaluaena la nene, a pian ke yaru taþena lala akila sanene, ana naga yoko kiena kia wo e nasuþenena kiena ne Ntewa.

²⁰ Inu nevisa van amiu, visae sine miun asape ava e nasuþenena kiena ne Ntewa, ana monar kiamiu þelaga la wo a mesmesu, taulu navianena navisaluaena lala, amio Varasi lala, visae peraga, taþatete ava ea.”

*Yesu pisayu nasinekarena
Luk 12:57-59*

²¹ Ana Yesu pisa mēne ga, pisapenua “Amiu amloge ma naþa navianena la apian ke kieta yermarua la nanua sumo rui, apisape ‘Ve awenar re yaru, a visae yaru na wemar yaru mare, mesmesun ga naþa aure naga va kumali ana avis vania.’

²² Ana nevisa van amiu sanini: Yaru naþa sinena kari wenla, yaru nene mesmesun aure va kumali avis vania. A yaru naþa visi viowa van wenla, visavenua 'Ko na yaru viowa tai nene wa,' yaru nene mesmesun aure va e kieta viorena keviu ana aliþere naga. A yaru naþa þisi na la sinemimiena van wenla, pisape 'Ko na þarumã pe wowe,' naga mesmesun va e kapi naþa e lele na loge viowaena.

²³ Vanon suri ne na nene, visae oimi e wonta kiena ne Ntewa vena ola nalaena vania, ana ositomãl si naþa okila suri tai pa womla piowa teke na,

²⁴ ana oligan nalaena nene toũa e lepas nen wonta nene sumo wa, ana monar omolue sina, ova okila ke ne marawo wa, ana siraunia okilia oimi ola si kioũa nalaena naþani va Ntewa.

²⁵ "Visae okila suri piowa pa yaru tai, ana naga sinenan pisape were ko ova kumali avis van ko, ana popon okoskosin ovisi ruru omio yaru nene, e pogos naþa pe aþure ko re opa kumali poli wa. Visae peraga, pona ligan ko e limana yaru na liþereena la yo, ana la nene aligan ko e limana yaru na taren yaru lala, ana la akilia aligan ko e yuũa nakoena.

²⁶ Suri na nepisa ke pan ko ne naga lelaga, ana visae sanene, taþatete si omolue e yuũa na koena, vano-o tol pogos naþa oul make kioũa nakoena."

Yesu pisayu kolau

²⁷ Ana Yesu pisa mēna ga, pisapenua "Amiu amloge m̃a naþa navianena lala apisalua sumo rui, asape 'Ve okila re kolau.'

²⁸ Ana inu, nevisa van amiu sanini: Yaru naþa yepen kawē ke sira taþena tai, naþa naga sinenania sape werea, ana naga sane kila kolau amio sira nene þisi rui e kiena sitomena.

²⁹⁻³⁰ "Visae kilamaramã na þamarua kila ko ke omloru e mlamulena viowa sanene, popon osilua kilamaramã nene vano. A visae lumomã na þamarua kila ko ke oloru e mlamulena viowa, popon otelua, okuan vano. Ana popon narin

lepasnemã ga tai kovio, a visae peraga, akoven punu ga tasnemã va e lele na loge viowaena."

Yesu pisayu nakuwanluaen sira

Matiu 19:9; Mak 10:11-12; Luk 16:18

³¹ Ana Yesu pisa mēna ga, pisapenua "Nanua sumo na apisa sanini, apisape 'Yaru naþa koanlua wona, ana naga monar kila m̃aki tai vania, naþa pisa meraravan pania pisape koanlua rui, pe pe wona re si poli.'

³² A in ne nanini, nevisa van amiu, sanini: Pe mesmesun re nena ga naþa yaru tai mēnelua wona poli, visae naþa wona nene naga pe kila re kolau sumo poli. Visae yaru tai mēnelua wona, naga kila kare wona nowo nene sa ga naþa wona nene naga pe sira na taþaen ga kolau rui. A yaru taþena naþa naga were sira tai naþa wona nasumo naga mēnelua naga rui, yaru taþena nene, naga sumã kila ke kolau narui."

Yesu pisayu sanape naþa akila navisaarena

³³ Ana Yesu pisa mēna ga, pisapenua "Amiu na amloge m̃a naþa navianena lala apisa pan kieta yermarua la sumo rui, apisape 'Visae ovisa kia kiena ne Ntewa vena kila kioũa visena m̃arera, siraunia ko taþatete okilaro sina visena nene. Visae ovisa kia kiena ne Ntewa, monar okila mesmesu sa naþa ko opisa.'

³⁴ Ana nanagane, inu nevisa van amiu, sanini "Taþatete ovisa kia kiena ne suri taþena vena kila kioũa visena m̃arera.' Taþatete ovisavenua 'Lelaga metava,' vanon naþa ma e peni na lelana ne Ntewa naþa totano ke ea, na pe yo wa paþisi.

³⁵ A taþatete mēna ga ovisa kia kiena yomarava nini, vanon yomarava nini lelen lana ne Ntewa naþa naga piawa ke ea. Taþatete ovisa Yerusalem, vanon Yerusalem na lelana ne kieta Parin Suþe Wa.

³⁶ A taþatete mēna ga ovisa þarumã, vanon taþatete ovilon viluũa tai imi yuwowo pona imi malolo.

³⁷ Visae avisa suri na lelaga, monar avisa ga 'Lelaga,' a visae avisa suri naña peraga, monar avisa ga 'Peraga.' A visena tañena la naña akilia avisa, naga molue ga kome Yermare."

Yesu pisayu yaru naña kila maran si piowa pan yaru naña kila piowa pania

Luk 6:29-30

³⁸ Ana Yesu pisa mēna ga, pisapenua "Amiu amloge mā naña navianena lala apisa nanua sumo, apisape 'Visae yaru tai kito kilamaramā tai, ana ko okilia okito mēna ga kilamarana. A visae yaru tai sulua maluemā tai, ko mēna ga okilia osulua maluena tai.'

³⁹ Ana nanagane, inu nevisa van amiu sanini: Amiu ve akilamaran re si suri van yaru naña kila viowa van amiu. Visae yaru tai lipa pipimā e lepas na pamarua, ana monar otamān mēna ga lipa pipimā lepas na pamēli.

⁴⁰ Ana visae yaru tai visave were ko ova avis van ko kumali, ana naga māraran visave owar momā kulsota vania, ana ko owar mēna ga momā kulsaket vania.

⁴¹ A visae yerka wa tai māraran visave owar kiena karo amio ayal va tol mrae ve taaga, ana monar okekaran owar va tol si maran mrae ve taaga.

⁴² Visae yaru tai viun suri tan ko, monar ola vania, a visae yaru sinenan visave la kio mā suri tai yu mā enia, monar otamān vania vena lavia, ve ovisaluṣar re vania."

Yesu pisayu nisape monar akekaran nasinekar lala

Luk 6:27-28,32-36

⁴³ Ana Yesu pisa mēna ga, pisapenua "Amiu amloge mā naña navianena pisa sumo rui pisape 'Monar ositom nalavis pu mā, a monar okila viowa va kio mā nasinekar lala.'

⁴⁴ A nanagane, inu nevisa van amiu sanini: Monar asitom kiamiu nasinekar lala, a monar alen wo mēna yaru la naña akila ke piowa pan amiu,

⁴⁵ vena amiu ataveve ruru pēlaga kiena ne Arimamiu naña sike ma e peni, vanon naña naga kekaran yaru punu ga maran taaga. Vanon suri ne nanene, naga kila kiena mrae tego, a kila kiena yua powo

pitomi pun yaru punu ga, la naña apo a la naña apiowa.

⁴⁶ ?Visae akekaran ke ga yaru la naña asitom amiu ke na, amiu na asitom ke asape yokorena atol kiamiu nalaena tai? A yaru na takis lala, naña yaru tañena la asape la ape yaru viowa ga, la akilia akila sanene.

⁴⁷ Visae otalopan ga kio mā yeririna lala, nanene na pe otaulu re pēlaga kiena ne yaru viowa la poli. A yaru la naña pe amlelaga re e Ntewa poli, la mēna ga akekaran kiela namratava lala.

⁴⁸ A kiamiu malena monar mesmesu ruru wo, sa naña pēlaga kiena ne Arimamiu naña sike ma e peni naga mesmesu ruru paṣisi, a naga po pan yaru la punu ga."

6

Yesu pisayu nalaena lala

¹ Ana Yesu sumā pisi pan la, pisa pisape "Suri la naña kieta nalotena pisa pisape popon teyu mā enia, amiu na ve akila re sa naña amiu akila na vena yaru ve moki akilia avisu kilale naña amiu akila ke suri wo. Visae amiu asu mā akila mā sanene, ṣisi na Arimamiu naña sike ma e peni, naga taṣatete la nalaena van amiu vanon kiamiu yu mā enia la nene.

² "Visae ve sanene, pogos naña ko ola nalaena va yeririna la naña pe kiela suri re poli, vena oiila la, ana pe pon re owarwar ko vanon poli, sane li navilavenen viskorenena. Yaru la nene apisawal ke kiela yu mā enia wo lala e loyu mā na leniena, a e yepesinas la vanua, vena yaru la ayeluar la. Ana nevisa suri na lelaga van amiu, yaru la ne sanene amla kiela nalaena ṣisi rui e nayeluarena naña yaru tañena la amla pan la, a taṣatete si ala suri tai.

³ A pogos naña ko ola nalaena va yaru la naña pe kiela suri re poli, vena oiila la, monar okila ga e pēlaga na tapolouena, yaru ve visu re, a ve kio mā sitomena yeluar ko re e nalaena nene.

⁴ A visae okila tapoloun ga kio mā yu mā enia wo la ne sanene, ana Arimo mā naña pisu ke suri la naña yaru la pe apisu

re poli, naga kilia la nalaena van ko vanon kioṃa yuṃaena wo la nene.”

Yesu pisayu leniena

Luk 11:2-4

⁵ A Yesu pisa ṃena ga, pisapenua “Ana pogos naṓa amiu alen, pe pon re ataveve ṓelaga kiena ne li navilavenen viskore-nena la poli. La nene na sinelan manene asape asuṃalu vena alen loyuṃa e yuṃa na leniena, a vanua e yometava lala, ana yaru la akilia avisu la. Ana inu nevisa suri na lelaga van amiu, yaru la ne sanene amla kiela nalaena ṓisi rui e nayeluarena naṓa yaru taṓena la amla pan la, a taṓatete si ala suri tai.

⁶ Ana pogos naṓa visae okila leniena, ana ova loyuṃa e moṃa yuṃa ko ga taaga, okotava ana okila leniena va Arimoṃa naṓa sike na, ana pe yaru pisu re naga poli. Ana Arimoṃa naṓa kilia visu suri la naṓa pe yaru pisu re poli, naga kilia la kioṃa nalaena van ko, vanon kioṃa suri wo naṓa okila.

⁷ “A pogos naṓa alenia, ana pe pon re avisa visena ve moki poli, ve sa yaru la naṓa pe amlelaga re e Arimata lelaga poli. Yaru la nene aṃape yokorena na alual suri naṓa la amlen ke vanonia, komin la apisa ke visena la moki manenea, ana peraga.

⁸ Ana amiu na ve ataveve re kiela ṓelaga lala, vanon Arimamiu, naga kilia ke suri la naṓa limamiu plasan rui, pogos naṓa amiu pe apiun re suri la nene tan naga poli wa.

⁹ “Vanon suri ne nanene, mesmesun naṓa amiu alen sane leniena nini, naṓa pisa pisape

‘Arimamimi naṓa ko osike ma e peni, mesmesun ga naṓa yaru la asu vatanon kioṃa kia wa.

¹⁰ Memlen mesape kioṃa nasuṓenena imi suṃalu ṃarera se yomarava nini, vena yeririna la akila sa naṓa ko sinomānia, sa naṓa la ne ma e peni akila ṃaga.

¹¹ Awis, ola kinanena van imimi ṓane, a e legiena punu ga.

¹² A oviewo imimi e kiamimi mlamulena viowa lala, sa naṓa imimi ṃena mepiewo ke yaru taṓena la naṓa akila ke piowa pan imimi.

¹³ Ko ve oligan manene re suri viowa lala aimi ataṓali imimi, okila wo Yermare ve imi kila kare imimi re.’

¹⁴ “Vanon naṓa visae amiu aviewo ke yaru la naṓa akila ke piowa pan amiu, ana Arimamiu naṓa sike ma e peni viewo amiu ṃena ga.

¹⁵ A visae ve aviewo re yaru taṓena la naṓa akila ke suri piowa pan amiu, ana Arimamiu taṓatete viewo kiamiu mlamu-lena viowa lala.”

Yesu pisayu monsilena

¹⁶ A Yesu pisa ṃena ga, pisapenua “A visae pogos naṓa amiu amonsilu ke sina ga, ve akinan re vena amiu asitoṃali Ntewa a alen vania, amiu ve akila re sa naṓa pe ake re maramiu poli, pona amiu akila maramiu la viowa, a kulugomiu la miyopiop sa naṓa viso kar amiu paṓisi, vena yaru lala avisu kilia ya naṓa akila ke na. Nanene na yuṃaena kiena ne li navilavenen viskore-nena. Ana visae akila sanene, ana yeririna laṓasia sinela ye la, naga ga nene kiela naulena naṓa la akilia alavia vanon kiela monsilena, ṓisi na taṓatete si Ntewa naga la sina ga suri tai van la.

¹⁷ Ana ko, pogos naṓa amonsilu ga sanene, popon okee maramā, okila ruru viluṃa, oyowau ruru wo sa naṓa ko okila ke silaga,

¹⁸ vena yaru la aninue ya naṓa ko okila ke ne. Arimoṃa ga naṓa naga sike na, pe yaru la aṃa re naga poli, ana naga ga ṓisi na kilia pisu ke suri la naṓa pe yaru la apisu re poli, ṓisi na naga la nalaena van ko vanonia.”

Yesu pisayu kilavaru

Luk 12:33-34

¹⁹ Ana Yesu pisa ṃena ga, pisapenua “Pe pon re amiu akilapolo kiamiu suri wo na yomarava la nini poli, vena avim ave yaru keviu na suri moki manenea. E

yomarava nini na kirara lala akilia akar suri la nene, a suri la nene akilia avililua a amenunu mēna ga, a amio mēna ga yaru na vinauena naŋa kilia kilapo yuñā, vena vinaun suri la naŋa amiu aŋionia.

²⁰ Ana amiu na monar awarpolo kiamiu suri wo lala ma e peni, vanon naŋa e nene na yo tai naŋa pe kirara re e poli, a suri tai taŋatete vililua a menunu, a yaru na vinauena lala taŋatete akila kare kiamiu suri nowo la naŋa amiu amligan ruru sike ea.

²¹ Popon vena amiu na kiamiu suri wo la ve moki sike ma e peni, vanon e naŋa kionā suri wo la sike ea, ana kionā sitomena mēna ga sike e nene silaga.”

Yesu suñā pisayu naŋa yaru la ve ave puluvis re

Luk 11:34-36

²² A Yesu pisa mēna ga, pisapenua “Kilamarana yaru naga pe yo taaga ga naŋa kapi vivaga pimi loyūñā e tasnena. Visae kilamaramā merarava ruruia, okilia ovisu kilale yaru taŋena, vena oiila naga. Visae okila sanene, losinēñā pulen ruru kapi pivaga paŋisi.

²³ A visae kilamaramā ve merarava ruru re, yoko taŋatete ovisu kilale ruru yaru taŋena, yoko osumā ovisu ga kionā suri lala ove puluvisin ga. Visae okila sanene, losinēñā pulen manene la yemalolo, a visae yemalolo naga sike e naŋa mesmesun kapi vivaga naga se ea, nanene sane ko na osike e yemalolo naŋa pe pupumalo paŋisi.”

Yaru taŋatete yuñāe kiena suŋe ve lua veraga

Luk 16:13

²⁴ A Yesu pisa mēna ga, pisapenua “Yaru tai taŋatete kilia yuñāe kiena suŋe ve lua veraga. Visae sanene ana naga kekaran tai, a yepena mavin tai, pona naga logear tai, aligan tai. Amiu na taŋatete akila sane ave yaru kiena ne Ntewa, ana ave yaru kiena kilavaru mēna ga.”

Sanapen yaru naŋa sitom manene kiena malena

Luk 12:22-31

²⁵ Ana Yesu pisa mēna ga, pisapenua “Vanon suri ne na nene, inu nevisa van

amiu sanini: Pe pon re kiamiu sitomena ulen manene ga kiamiu yuñāena na visuar amiuen la poli, naŋa amiu asuñā apiuviun ke, asapenua ‘?Añā e nape naŋa yoko ita telual kata kinanena a mñata namunena?’ pona ‘?Pisi na ita tetol mñata kulsota na yenwo e sanape ne?’ Sitomena la ne sanene na pe po re nenaga, komin kiamiu malena naga po taulu kinanena, a tasnemiun naga po taulu kulsota.

²⁶ Asitomli manu la ne akaka ke ne. Manu la nene pe amapla re kala lokove poli, a pe apa aŋar re kinanena pitomin naŋa aligan ruru sike loyūñā poli. Ana Arimamiu ga naŋa sike ma e peni, naga ga mla ke kinanena pan la, ana e kiena navisuena, naga pisu amiu na sane ato metavan manu lala, ŋisi na naga kilia visuar amiu taulu la.

²⁷ ?Amiu na asitom asape yaru kilia kila kiena malena naŋa plas ga ne vim ve piavi li laa sane wo ga, vanon sitom manene la kiena malena? Peraga, pe sa re nene poli, ana amiu na popon ve asitom manene re kiamiu malena.

²⁸ “?A komin ya ne asitom manene ke mñamiu kulsota la vanonia? Amiu asitomli vinas nen purmeme la ne pitotovi ke e yo punu la ne. Vinas la nene na pe amiyuñāe re poli, a pe asulu re mñala kulsota la poli.

²⁹ Ana inu nevisa van amiu, ŋarin Suŋe Solomon nene nanua sumo, naga pe yaru na suri moki, ana naga mñana kulsota la naŋa naga miyenia na pe miyowau ruru re sane meme la nene poli.

³⁰ A meme la nene na la ape na legiena taaga ga, peni narui asikapi la e kapi, ana Ntewa ga naga paia ruru la ke apo sanene. ?Ana amiu na asitom asape ŋisi na Ntewa naga taŋatete la kulsota van amiu? !Aulai, amiu na pe apiawa re nena mñarera e Ntewa poli!

³¹ “Komin suri ne la nene, pe pon re sinemiun la ulen sitomena la nene poli naŋa sape ‘?Yoko takan ya ne, a tomun ya ne, a telual mñata kulsota sanape ne?’

³² Lelaga, yaru la naŋa pe amlelaga re e Ntewa poli la asitom manene suri la ne sanene silaga, ana amiu, Arimamiu naŋa sike ma e peni, naga kilia mñā ga

naþa pisape yokorena monar kiamiu suri la nene na wa.

³³ Suri naþa amiu monar asitom þesan ve keviu e kiamiu malena, nane nasuþenena kiena ne Ntewa, amio kana namesmesuena nena lala. Visae ve sanene, þisi na naga la mēna ga suri taþena la nene van amiu.”

³⁴ “Ve sanene, pe pon re sane þane na, asitom manene suri la na legiena na peni poli. Peni ga, akilia asitom suri la na peni, komin legiena na þane, ana suri viowa la moki pimi e rui.”

7

Yesu pisayu naliþere kareen yaru taþena

Luk 6:37-38,41-42

¹ Ana Yesu pisi ke pan la na wa, pisape “Amiu na monar ve aliþere kare re yaru taþena lala. Ve sanene, Ntewa mēna ga ve liþere amiu manene re,

² komin sitomena naþa teke e amiu pogos naþa amiu aliþere yaru taþena, þisi na sitomena na sanene teke mēna ga e Ntewa e pogos naþa naga liþere amiu. Pisi na Ntewa naga liþere amiu, ve sa ke naþa amiu amlipere yaru taþena lala.

³ Pe pon re naþa ko osumā ovisasawal ke narin kororaki naþa teke e kilamarana ne womla poli, ana ko pe opisu kilale re pupia mora laki na mēke e kilamaramā poli.

⁴ ?Sanape narui ko ositom ke osape okilia ovisi va womla nene, ovisave ‘Pisi na nelalua ke ne kororaki na teke e kilamaramā ne sumo wa?’

⁵ !Visae sanene, na ko na pe opisu kilale re kionā mlamulena viowa poli, ana ko osumā omliþere ke ga mlamulena kiena ne yaru taþena lala! !Ko na ope yaru navilavenen viskorenena paþisi wa! Okilalua ke ne pupia miasin laki naþa mēke kilamaramā sumo wa, siraunia ana okilia ovisuveve narin kororaki naþa teke e kilamaran yaru taþena.

⁶ “Pe pon re amiu akilali naþa avisawal Visena Wa kiena ne Ntewa va yeririna la naþa la pe akekaran re ala poli. Nanene sa naþa amiu asumā apagan ruru ke lokul

tetan lala e kinanena naþa po, ana pogos naþa akinana þisi, þisi na avilon þarila ana akar amiu ke sina ga. Sa ke mēna ga naþa visae awar nalaena wo lala va nompui lala, þisi na la avie neno ga vitove sike e pulkene.”

Yesu pisayu naviunena suri tan Ntewa Luk 11:9-13

⁷⁻⁸ A Yesu pisape “Yaru naþa sumā piun ke suria, silaga naga mlavia, a yaru naþa sumā kale suria, silaga naga mālialia, a yaru naþa sumā sigariga ke mratava, silaga pulutava pietava pania. Visae sanene, þisi na amiu awar ya naþa amiu asumā apiun ke tan Ntewa, a þisi na amiu alual ya naþa amiu asumā akale ke tania, a mratava naþa amiu asumā asigariga ke ne, þisi na Ntewa naga vietava van amiu.

⁹ Visae narumā tai viso karia, viun narin kilaparavi naþa teke ne, þisi na taþatete ola kilavaru tai vania,

¹⁰ pona visae naga viun ruru ika naþa teke rui, ana taþatete ola lomāra van kania.

¹¹ A lelaga naþa amiu na ape yaru viowa ga lala, ana taþatete amiu yaru tai kilia kila sanene, amiu na akekaran ga silaga naþa amla suri wo lala pan narimiu lala. Sanene, pogos naþa amiu aviun suri tai va Arimamiu nae ma e peni, naga kekaran ga naþa la suri wo la van amiu narina lala, va ve keviu la sane wa.

¹² “Amiu na monar akila wo va yaru taþena la silaga e suri wo ga lala, sa naþa amiu sinemiun asape yaru taþena lala, la monar akila wo van amiu. Visena ke nene narui naga purþes nen visena kiena ne navisaluaena la nene naþa Mosis naga siriyuia, amio mēna ga ya naþa navisawalena na sumo lala la apisa.”

Mrapa lua la Luk 13:24

¹³⁻¹⁴ Ana Yesu pisa mēna ga, pisapenua “Pupia pulutava tai naþa keviu mon māga, ana mrapa naþa pa þarpoyo komea ana lepalepasa a pe yotop ruru po paþisi. Yeririna la mokliu naþa ataveve ke mrapa nene, ana mrapa nene naga va e yo natolen koaena. A amiu na monar ava

loyuñã e pulutava taþena tai, naþa naga ve tokak la ga. Naga kana mrapa nena m̃arera paþisi, a pe yeririna moki re naþa akom ke e poli, ana mrapa nene naga mrapa na malena.”

Purlaki amio kana mrasa

Luk 6:43-44

¹⁵ Ana Yesu pisa m̃ena ga, pisapenua “Amiu na monar avisuar ruru yaru la naþa la apisape la ape yaru navisawalena lala, ana apian ke suri navisokanena lala. Pogos naþa la sinelan asape avian amiu, la apimi sa naþa ape erau wo amio amiu, naþa la yepela mom̃au ruru nenaga, sa naþa sipsip lala, ana e losinela lala la sa ga lokul tetan lala, naþa la visokarlan suri punu ga.

¹⁶ Ana þisi na amiu avisu kilale la e mras nen kiela malena lala. Vilum̃ini la naþa pe nenosa, amio kilika la naþa pe nenosa, la pe aþar re kinanena wo poli pona mras naþa kiki ruru poli.

¹⁷ Purlaki naþa kapuru ruru po, naga monar war mras naþa po, a purlaki naþa kapuru piowa ga, naga monar war mras naþa piowa ga.

¹⁸ Ana purlaki naþa kapuru po, ana taþatete war mras naþa viowa, a purlaki naþa kapuru piowa ga, ana taþatete war mras naþa po.

¹⁹ Naga sa ga nene narui, visae purlaki viowa la nene naþa la taþatete awar mras napo, þisi na monar ate plan la ga vena akuan la ava e kapi.

²⁰ Visae ve sanene narui, mras naþa naga molue e malena kiena ne yaru kila meraravan pisape yaru nene naga pe yaru na sanape, ana þisi na amiu akilia avisu kilale navisawalena viowa la nene e mras viowa la naþa molue e kiela malena lala.”

“Pe nekilia amiu re nenaga”

Luk 13:25-27

²¹ Ana Yesu pisa m̃ena ga, pisapenua “Yaru la mokliu asum̃a apio inu ke asape ‘!Kiau Suþe, kiau Suþe o!’ ana taþatete la punu ga nene naþa þisi na akilia ava loyuñã e nasuþenena kiena ne Ntewa ma e peni. Yeririna naþa kilia va loyuñã,

naga yeririna ga naþa naga sum̃a kila ke suri la naþa Ata naga sinenania.

²² E pogos naþa þisi na Ntewa naga liþere yeririna lala, yeririna la ve moki naþa þisi na avio inu ve sanene, avisave in na nepe kiela Suþe. Þisi na la avisa avisave ‘?Suþe, sanapen imimi? Imimi na memiyum̃aen suri wo la mokliu e kionã kia, a imimi mepisawal m̃ena ga kionã visena, a imimi mem̃ene plan m̃ena ga yermare lala, a mekila ke m̃ena ga kile la mokliu. ?Pona ko pe ositom̃al re kiamimi yuñãena wo la nene poli, yo?’

²³ “Ana yokorena inu nevisawal mesmesun van la, nevisave: Inu na pe nekilia amiu re nenaga pogos tai, naþa amiu na ape kiau. Amiu na ape yaru na mlamulena viowa ga la ne. !Amiu aurmatan inu nagane!”

Yuñã lua

Luk 6:47-49

²⁴ A Yesu pisa m̃ena ga, pisapenua “Visae ve sanene, la naþa ataveve ruru sa naþa nepian amiu rui, la sane yaru tai naþa pe manmaruan naþa kila m̃ana yuñã, naþa naga mapila kana kemraþe pito tano tol yo m̃arera tano.

²⁵ Ana siraunia, yua pimi, a womie la mlau keviu, a lagi miyui, m̃e yuñã nene, ana yuñã nene pe mloru re poli, komin naþa yaru nene pisirlua ruru m̃ana yuñã nene e yo m̃arera naþa.

²⁶ “Ana la naþa pe ataveve ruru re sa naþa nepian amiun rui, la sane yaru tai naþa kiena sitomena piowa ga, ana pogos naþa kila m̃ana yuñã, kililinnaria kana kemraþe lala su ga metava e none.

²⁷ A siraunia, pupia yua kove, a womie la mlau keviu, a lagi miyui, m̃e yuñã nene, ana yuñã nene mloru. A pogos naþa mloru, yuñãena kiena ne yar nene pimi piowa make nenaga.”

Amilan manene Yesu kiena visena nene þan wa

²⁸ Siraun naþa Yesu þisin kiena visena la nene, yeririna la amilan paþisi,

²⁹ komin naþa la apisuvevea sane kiena visena na pe sa re visena kiena ne kiela

navianena navisaluaen la poli, ana kiena visena la urmi pañisi, a naga sumã miur ke kiela sitomena lala, a naga pisawal visena sane yaru tai naña namãreraena teke e naga.

8

Yesu kila ruru yaru tai naña leperosi se yepena, miania

Mak 1:40-45; Luk 15:12-16

¹ Yesu mligan kunus keviu naña naga pian ke yaru la ea, naga pitomi tano, ana yaru la mokliu naña atavevea.

² Ana yaru tai naña leperosi sike e yepena pimi puna, ana kinai tano pania piunia, pisape “!Suñe! In na nemlelaga e ko nesape ko na okilia okila ruru inu wo ga, ana visae ko okekara, sineun nesape neviun tan ko vena okila van inu ve sanene.”

³ Ana Yesu pe maraun re yaru naña poli vanon kiena maiena nene, ana ãruarar naga e limana, pisape “Ee, inu sineunia. Poga ga, nesape yepenã ikiki.” Ana veraga ga yepena miania, leperosi nene ãisi ea.

⁴ Ana Yesu pisa pania, pisape “Omloge ke ne, ovano ve ovisawal re suri nene va yaru lala wa, ana nanagane ga ne ova okom puna yaru wa vena naga kilia visuvelu yepenã. Pisi na, monar ova okila lotuena va Ntewa, a okila mñena kuããaena nene naña Mosis pisa sape yaru monar kila vanon suri na sanene, ana siraun naga nene, yaru wa nene naga kilia visawal visave leperosi nene ãisi rui.”

Yesu kila yaru naña yepena komãasia mare pimi po

Luk 7:1-10

⁵ Ana pogos naña Yesu pa loyumã garu pulkumali naña Kapeneam, yaru keviu tai kiena ne li na mara lala nae Rom pimi puna, tagi pania,

⁶ pisape “Suñe, yaru na kilaen kiau yumãena tai mloru mñeke e mñana tog nanagane garu mñau. Tasnena lepas komãas mare, ana naga mloge ke piowa pañisi.”

⁷ Ana Yesu pisa pania, pisape “Ita, tevano. Pisi na inu nekila ruru si naga loge wo.”

⁸ Ana yerkawa na kilaen mara naña pisatamãea, pisape “Suñe, in na pe nepe yaru wo re tai naña netorokin naña ko oimi mñau loyumã poli, sane in na pe nepe yere Yu re poli, ana visae okilia ovisa ga visena tai, nekilia nesape ãisi na kiau yaru nene kilia loge wo narui.

⁹ In na nekilia naña nesape ãisi na monar ve sanene, vanon nekilia nesape kiomã visena namãreraena keviu sike ea. Naga sane yaru na mara la naña asike vatanon inu, naña monar alogear kiau visena. Visae nevisavenua ‘Ovano,’ monar tai vano, pona nevisave ‘Oimi,’ monar naga imi, pona nevisave ‘Okila ve sa nene,’ ana naga monar kila. A inu mñena ga monar nekila ya naña kiau yaru keviu pisa pan inu. Ana nemlelaga naña visae ko ovisa ga suri tai, ana monar ve sa nene.”

¹⁰ Ana pogos naña Yesu mloge kiena visena nene, kila naga milan pañisi a kekara mñena ga pañisi. Ana pisa pan ãina la naña ataveve ke ne, pisape “Nevisa suri na lelaga van amiu, in na pe nomãal re nena ga yaru nae Israel tai naña naga piawa mãrera e inu sane yaru nene poli.

¹¹ Inu nevisawal van amiu sanini, ve le Yu re ga la naña akilia aimi loyumã e ãããagena keviu na legiena maro nene. Peraga, ana yokorena yaru la ve moki ve sa yaru nene e yo tañena lala na yomarava nini, naña aimi atotano lele taaga vena akinana amio Epraam, Aisak, a Sekop. Pisi na la nene na asu ruru silaga ve sanene e nasuñenena kiena ne Ntewa ma e peni.

¹² Ana le Yu la nene naña Ntewa pio la sumo vena ava loyumã, nanagane la pe amlelaga re e inu poli, ana ãisi na Ntewa koven plan la ava e yemalolo vanua, e yo naña yaru la asumã atagi ke ea, akar ke maluela ea.”

¹³ Ana Yesu pisa pa yerkawa na kilaen mara nañani, pisape “Ko, okilia ova umã. Pisi na vim van ko ve sa naña kiomã

nalelagaena piawa ke m̄arera ea.” A e ke e pog nene narui, ana yepen yaru na yum̄aena nene pimi po sina.

*Yesu kila riru anenane wona Pita
Mak 1:29-34; Luk 4:38-41*

¹⁴ Ana pogos naḡa Yesu sike garu Kape-neam wa, ana naga pa loyum̄a m̄ana Pita, naga pisu anenane wona Pita naga miava karia, m̄eke e m̄ana tog.

¹⁵ Ana Yesu mligan limana te limana ne sira nene, ana miava naḡa ḡisi, ana naga sum̄alu, mla kinanena pa Yesu.

¹⁶ A yepekilavi e legiena nene, yaru la aḡure yaru la moki naḡa apimi puna Yesu, yaru la naḡa yermare lala asike e la. Ana naga m̄ene plan yermare la nene e ga e kiena visena, a naga kila ruru m̄ena ga namaiena lala apimi apo sina.

¹⁷ Suri la nene pimi kakate vena kila visena kiena ne Navisawalena Aisea imi ve lelaga, naḡa naga pisape

*“Naga lalua kieta maiena lala,
a naga kuslua kieta yepe lalaea lala.”
Ais 53:4*

*Yaru la lua sinelan asape ataveve Yesu
Luk 9:57-62*

¹⁸ E legiena taḡena sina ga tai, Yesu sum̄a amio yaru la mokliu naḡa la amier-vivi naga telivi piora, ana naga sinenan pisape yali vetan la, ana naga pisa pan kiena nalogena lala, pisape “!Aulai! Ita, teva e lepas nen lapa nene lepas ḡasa.”

¹⁹ Ana asun ke asape avano, ana navianena navisaluaena tai naga pimi, pisaar pa Yesu, pisape “Navianena, ḡisi na netaveve ko, e nape naḡa ko okom ea ana inu netaveve ko teva ea.”

²⁰ Ana Yesu pisatam̄ea, pisape “Lokul tetan lala, la m̄ala pulus na monena la asum̄a ga, a manu m̄ena ga lala m̄ala ponovi la asum̄a ga. Ana inu, Narina ne Yeririna na, pe m̄au yo re tai naḡa neva nomomalio e poli. Visae ko okekaran m̄ena ga malena na sanene, ko okilia oimi.”

²¹ E ke e pogos nene, ana nalogena taḡena kiena ne Yesu tai pisa pania, pisape “Awis Mara, otam̄an inu neva nevisuar ke ne ata sumo wa, a visae pogos

naḡa mare pae, ḡisi na neimi netaveve ko ga na wa.”

²² Ana Yesu pisa pania, pisape “Ko oimi otaveve inu ga. Ko oligan yeririna la naḡa ninula mare rui, vena la asin kiela yaru la naḡa la amare.”

*Yesu pisi pa lagi amio sive
Mak 5:1-20; Luk 8:26-39*

²³ Ana Yesu amio kiena nalogena lala apitomi atol lapa nene narui, ana aḡiyu apa e waa tai e yo nene.

²⁴ Ana apa li ga metava pe piavi re poli, pupia lagi tai molue, miyui kila pupia lapa naḡani kululu keviu paḡisi, ana kila waa naḡani siar sape talilu. Ana Yesu m̄eke e waa, naga momalio ruru ga m̄eke na,

²⁵ ana la apito akilaḡeḡea, apisape “!Suḡe, opisu ke ne! Lavisi tetalilu narui, monar otamalia ita.”

²⁶ Ana Yesu pisa pan la, pisape “!Ei! ?Amaraun ke ya ne sanene? Aa, amiu na pe apiawa re nena m̄arera e kiau nam̄areraena poli.” Ana naga sum̄alu, pialuḡar lagi, pisape ve yui re sina, a pialuḡar sive, pisape malumu. Ana pog pimi po, amalumu.

²⁷ Ana pogos naḡa nalogena la apisu yo pimi pa ruru make nenaga po sanene, ana amilan paḡisi, apisape “!Suwala! Yaru nene na pisa ga sanene, ana lagi amio sive lalua amlogear naga. !Yaru nene na pe yaru re nene poli yo!”

*Yesu pile plan yermare lala petan yaru
lua
Mak 5:1-20; Luk 8:26-39*

²⁸ Ana pogos naḡa Yesu pimi tol lapa nene lepas ḡasa, naga pa gare yo kiena ne le Katara lala. E yo nene, yaru la lua amolue e puluve m̄ana ne yaru mare lala, ana la lua am̄al Yesu. Ana la lua nene na yermare lala asike e la, ana la lua ape wowe asirag paḡisi, ana kila yaru la amaraun vaen e mrapa nene paḡisi.

²⁹ Ana pogos naḡa apisu Yesu, lalua apio manene paḡisi, apisape “?Ko Narina ne Ntewa, kiom̄a ya naḡa teke e imimi? ? Ko opimin osape ola nakoena van imimi naḡa pe kana pog re poli wa, ne?”

³⁰ Ana e yo nene, na ḡegas nen nompui tai asum̄a akolkol m̄a porotano lavis ga,

³¹ ana yermare la nene atagi, apisa pa Yesu, asape “Visae om̄ene plan imimi, awis oligan imimi mava e los nen nompui la ne asike ne.”

³² Ana naga pisa pan la, pisape “Avano.” Ana la amolue petan lalua nene, apa e los nen nompui la naḡani. Ana pogos ke nene, nompui la naḡani akiriri apano, apitove e yeparpasa tai, amloloru apito tano e pupia lapa nene, atalilu apito akokovio ea.

³³ Ana yaru na visuaren nompui lala apureure apa e kiela pulkumali, apisawal suri la naḡa kakate, a ya naḡa tol lalua naḡa yermare la ase lalua sumo.

³⁴ Ana pogos ke nene, yeririna la punu ga naḡa e kiela pulkumali nene apimi apisu Yesu. A pogos naḡa apisu naga, apisi m̄arera pania apisape naga ure vetan kiela yo.

9

Yesu kilia viewo mlamulena viowa Mak 2:1-12; Luk 5:17-26

¹ Ana Yesu ḡasuḡe sina amio kiena nalogena lala, amiyai ke ga e waa naḡani, ana akusro si lapa keviu naḡani, ana aḡasuḡe apimi e kiena pulkumali naḡa Kapeneam.

² Ana yaru laḡasia akus namaiena tai pimi puna naḡa naga tasnena komḡas mare, naga mloru ga m̄eke e m̄ana tog. Ana pogos naḡa Yesu pisu kiela nalelagaena m̄arera asape Ntewa naga ḡisi na iila namaiena nene, naga pisa pania pisape “Naruu, ve sinem̄a kona re. Kiom̄a mlamulena piowa lala, nepiewo ḡisi rui.”

³ Ana e pogos nene navianena navisaluaen laḡasia asum̄a ga, ana amloge ke visena kiena ne Yesu nene. Ana verakorena la apismumunia, apisape “Yaru nene naga ḡarnena kare kia wa kiena ne Ntewa rui. Naga pisa ke sanene sa ga naga Ntewa rui.”

⁴ Ana Yesu kilia m̄a kiela sitomena lala, ana pisape “?Vanon ya ne kiamiu sitomena la pulen sitomena viowa sanene?”

⁵ Visae nevisa sanini va yaru nene, nevisavenua ‘Inu nepiewo kiom̄a mlamulena viowa,’ pona nevisa nevisavenua ‘Osum̄alu oyali,’ e visena lua nene, tai m̄areran na visaena, a tai meme ga navisaena. Visena naḡa pisapenua ‘Osum̄alu oyali,’ naga m̄arera, vanon naḡa yaru la apisu kilale asape yaru nene sum̄alu pona ve sum̄alu re.

⁶ Ana ḡisi na nekila suri tai naḡa amiu asitom sane Ntewa naga ga taaga kilia kila, komin naḡa sineun nesape nekila merarava van amiu naḡa sane Narina ne Yeririna naga torokin naḡa viewo mlamulena viowa lala e yomarava nini.” Ana Yesu pisa pan namaiena nene, pisa pisape “Osum̄alu osilowar mom̄a tog, oyali, ova mom̄a.”

⁷ Ana yaru naḡani sum̄alu, mial pa m̄ana.

⁸ Ana ḡina na yeririna la naḡa apisu suri nene amarau, a amieluar m̄ena ga Ntewa vanon naḡa naga tam̄an nam̄areraena nene pisape yaru tai kilia kila ve sanene.

Yesu pio Matiu pimi taveve naga Mak 2:13-17; Luk 5:27-32

⁹ Ana Yesu mligan yo nene, naga mial ga pa m̄a sane. Naga pa m̄aga, ana m̄al inu neteke tano e lelen kiau yum̄aena. Kiau yum̄aena e pogos nene, nawarpoloen kilavaru na takis. Ana Yesu pio inu, pisape “Matiu, oimi otaveve inu.” Ana nesum̄alu veraga, netaveve Yesu.

¹⁰ Siraunia, Yesu pimi kinana e m̄au yum̄a, ana e pogos nene nepure li nawarpoloen takis la moki, amio yaru viowa taḡena lala, apimi atotano, vena akilia akinana veraga amio Yesu a kiena nalogena lala.

¹¹ Ana le Varasi laḡasa asike e pogos nene, ana apisu naḡa Yesu teke veraga amio yaru la ne sanene, ana apiun tan kiena nalogena lala, asape “?Komin ya ne kiamiu navianena kinana ke veraga amio yaru viowa la ne sanene?”

¹² Ana Yesu mloge kiela visena nene, ana naga pisatam̄e la, pisape “Yaru la naḡa yepela poga ga, pe sinelan re yaru

na kilaruruen maiena poli, ana la ga naña añar maiena, ana la sinelania.

¹³ Popon ami asitomyuli kinas nen visena tai naña teke e Visena Wa, naña Ntewa pisa, pisape

'In na pe sineun re kiamiu kuñañaena la poli,

ana sineun ga nasineyeena se kiamiu malena lala.'

In na pe nepimin re naña nevio yaru la naña asitom asape la amesmesu pisi rui, peraga, inu na nepimin ga nesape nevio yaru viowa lala vena ataveve inu."

Naviunena tai e lepas na monsilena

Mak 2:18-22; Luk 5:33-39

¹⁴ Siraun suri nene, ana nalogena lañasia kiena ne Yoane Nakeena apimi pu Yesu, apiun tania, asape "Sinemimin mesape ovisawal suri nene van imimi. ?Imimi na memonsilu ga silaga vena mekila leniena, a Varasi mēna ga lala akila ke sanene, ana vanon ya ne kionā nalogena lala pe akila re poli?"

¹⁵ Ana Yesu pisatamē la, pisayu naga amio kiena nalogena lala, sane la akekara pañisi pogos naña naga sike amio la, ana pisi na sinela monar viowa siraun pogos naña naga ure matan la, ana pisape "? Pogos naña yaru naña talopa naga sike e pañagenā amio kiena erau lala wa, ami asitom asape akilia ataginia? Peraga. Ana e pogos tai, visae nasinekar kiena ne yaru nene lañasia aimi aurelua naga vetan kiena erau lala, e pogos nene narui pisi na kiena erau lala la akilia amonsilu ga vanon nasineyeena."

Sur viu amio sur marua

¹⁶ Pelaga na monsilena nene, naga pelaga marua na lotuena kiena ne le Yu lala, ana Yesu sinenan pisape kila meraravan van la sape pelaga marua la ne sanene, la tañatete akilia asikolia amio suri viu la naña naga pian la ke ea, ana naga pisa pañakaiwa tai e lepas nene pan la, pisape "Tañatete ola kinakina kulmrae tai naña pe urviu ana osuluwo ruru pulus naña teke e kulsota marua. Vanon naña kinakina kulmrae viu nene kilia kilaroro kulsota marua nene kompaasa, ana kana pulus kilia vim ve keviu la sane.

¹⁷ "Ana tañatete okonkonia kuruta na munena naña sirpup pava ke ea wa, vito e kulus nen nani naña pe urmarua, naña akonkonia kuruta na munena pito ea yam moki rui. Ana visae akila sanene, kuruta na munena nene lapa e kulus nen nani nene, ana yukuswinia na mēpoa, ana kuruta namunena nañani lau, ana pias nene naga mēna viowa. Ana kuruta viu monar okonkonia va e pias viu, naña mārera ruru po, ana okilia oligan ruru momā kuruta na munena nene momā ga."

Yesu kila ruru sira kawa tai amio nin sira mēe tai

Mak 5:21-43; Luk 8:40-56

¹⁸ Ana pogos naña Yesu pisayu ke pa nalogena kiena ne Yoane la sanene, ana yaru keviu nalotena kiena ne le Yu lala pimi lavisi, kinai pito tanon Yesu, tagi pania, pisape "!Awee! Kiau lomēaru mare ga na wa, ana sineun nesape oimi, oligan lumomā towar naga, vena naga kiena malena imi sina."

¹⁹ Ana Yesu sumālu, taveve yaru nene, naga amio kiena nalogena lala apano.

²⁰⁻²¹ Ana pogos naña Yesu pa ke sanene, ana sira tai sumā ga naña maiena na kupario teke e naga legiena punu ga pano-o pimi tol kas lualima taaga pa lua rui. Ana naga pisu naña Yesu mial pimi, naga sitom sape "Visae netol ga mēna kulsaket, vena kiau maiena pisi." Ana naga kom rana Yesu, pimi tol ga mēna isinen kulsaket.

²² Ana Yesu pilon veraga, pisu sira nañani, pisa pania, pisape "Auia, ve sinemā kona re. Kionā naviawaena e inu kila ko owo sina." Ana e ke e pogos nene, maiena nañani pisi e sira nene.

²³ Ana pogos naña Yesu pa tol yuñā mēna yerka nene, naga pisu yaru la sinela mie manene la sira mēe naña mare mēke ne, ana asumā atagi a amiyaun ke yauena na marena lala.

²⁴ Ana naga pisi pan la, pisape "Amiu amolue, ayal tetai sina. Sira mēe nene na pe mare re nene poli, naga momalio ga ne." Ana la nañani apitalia kare ga naga.

²⁵ Ana amligan plan yaru la nene apa vanua, ana Yesu pa loyūñā. Naga pa

tarar limana sira m̄ee nene, ana naga sum̄alu, mali sina.

²⁶ Ana amlologon suri nene pa e yo make ga, kalo make yo punu ga e lepas nene.

Yesu kila ruru kilamaraḗala lua

²⁷ Ana Yesu molue petan yum̄a m̄ana yerka nene, a pogos naḗa naga mial ke pano, ana kilamara ḗala la lua atavevea, la asum̄a apio ke, asapenua “Ko lus kiena ne Tepet, ko Navisaarena, awis ko sinem̄a ye imimi lua nini ka.”

²⁸ Ana Yesu mial pano, pa pa loyum̄a e yum̄a tai, ana kilamara ḗala la lua naḗani apimi puna. Ana Yesu piun tan la luoka, pisape “?Amiu luoka ga amlelaga e inu, asape nekilia nekila ruru amiu sanene?”

Lalua apisatamea, apisape “Ee Suḗe, imimi memlelaga.”

²⁹ Ana Yesu mligan limana te kilamara, pisape “Pisi na ve sa naḗa nalelagaena kiamiu amlua.”

³⁰ Ana lalua kilamarala pimi po ke e pogos nene. Ana Yesu pialuḗar m̄arera pan la luoka, pisape “Pisi na amiu lua ve avisawal re suri nene va yaru lala.”

³¹ Ana lalua amolue petania, ana lalua amlologon suri naḗa Yesu kila pan la ne, pano-o kalo make yo la punu ga e lepas nene.

Yesu pilelua yermare petan puru tai

³² Ana pogos naḗa lalua nene amligan Yesu apano, yaru taḗena lala aḗure yaru tai pimi puna. Yaru nene pe puru, vanon yermare sike e naga.

³³ Ana Yesu pilelua yermare nene, ana puru naḗa pisi ruru narui, ana yeririna lala sinela kurkur paḗisi, apisape “Suwala, pe tepisuli re suri tai e Israel sanene poli wa, ḗane ga.”

³⁴ Ana Varasi lala apisayu Yesu, apismunia, apisape “Yeririna nene pile plan ke ga yermare lala e nam̄areraena naḗa suḗe kiena ne yermare lala naga mla pania.”

Yesu sinen mie yeririna lala

³⁵ Ana Yesu sum̄a mialili ke pulkumali lala, a pian ke yeririna lala e kiela yum̄a na lotuena lala. Naga pisawal ke nalologena wo nasuḗenena kiena ne Ntewa, a naga sum̄a kila ruru ke namaiena lala a la naḗa tasnela la piowa.

³⁶ Ana pogos naḗa sum̄a mialili ke yaru la sanene, naga sum̄a pisu ḗina lala, naga pisu la sa naḗa kiela sitomena la pule paḗisi, a suri la piowa pan la e kiela malena lala, ana naga sinena mie la paḗisi, komin naḗa asum̄a ga sa ga nene sane sipsip la naḗa pe yaru navisuar laen re poli, la aminue asape ḗisi na la ave sanape narui.

³⁷ Ana naga pisa pan kiena nalologena lala, pisape “Lelaga, kinanena moki paḗisi naḗa marua sike lokove, ana yaru la lua la ga naḗa asum̄a aḗar ke pitomi um̄a.

³⁸ Ana amiu na, monar aviun manene tan suḗe na lokove nene, vena naga ligan plan re si yaru laḗasia la avano vena awar kana kinanena la nene vim.”

10

Li nalogena kiena ne Yesu lala Mak 3:13-19; Luk 6:12-16

¹ Ana Yesu pio kiena nalogena la lualima taaga pa lua pisape aimi puna. Ana la apimi, ana naga pisi ruru pan la ḗisi, a naga mligan plan la apano vena akilia am̄ene plan ninuna viowa e yeririna lala, a vena akilia akila ruru namaiena lala a nainanena viowa taḗena lala. ² Ana kia kiena ne li nalologena ne la nanini narui:

nasumo, Saemon, naḗa apio asape Pita, naḗa naga pe kiela yerka nene, amio wenla, naḗa Antru, Semes, naḗa narina ne Sepeti, amio wenla naḗa Yoane,

³ Pilip, Patalomiu, Tom̄as, inu Matiu, in na nepe yaru na warentakis, Semes, naḗa naga narina ne Alpeas, Tateas,

⁴ Saemon, naþa naga kila manene politik sape kuan plan le Rom lala, a Sutas nae Kariot, naþa siraunia, naga pielua Yesu.

Yesu mligan plan kiena li nalologena lala

Mak 6:7-13; Luk 9:1-6

⁵ Ana Yesu pisi ruru pa la lualima taaga pa lua nene, a siraunia naga mligan plan la apano. Visena wo la nene naþa naga pisa pan la nanini, naþa naga pisape “Amiu na ve ava re puna ne la naþa pe ape le Yu re la poli, a amiu ve ava re e pulkumali nae Samaria lala wa.

⁶ Amiu na avanon ga sipsip nae Israel la naþa akilalu mrapa.

⁷ Ana pogos naþa avanon la nene, ana monar alologon, avisave ‘!Nasuþenena kiena ne Ntewa pimi ke pun ita narui!’

⁸ Ana amiu monar akila ruru namaiena lala, a monar akila namarena lala aimi amal sina. A la naþa leperosi sike e yepela, monar akila yepela la imi ikiki sina, a amiu monar aþene plan yermare e yaru lala. Ana yumãena la nene, þisi na ayumãen e namãreraena tai naþa amla korenan ga, ana amiu monar ala korenan lein ga va yaru lala.

⁹ A amiu na ve awar re kiamiu kilavaru laþasia e kiamiu pultaga lala,

¹⁰ a ve awar re mēna kiamiu karo tai, naþa akon mãmiamiu kulgota taþena lala, a kiamiu kulus nen lamiu taþena lala se ea, a ve awar re mēna kiamiu plaspai vano. Yaru la naþa akila yumãena wo la ne sane amiu, þisi yaru taþena la naþa la amiyumãae pan la, monar avisuar ruru la vanonia.”

¹¹ Ana Yesu pisa mēna ga, pisape “Pogos naþa amiu avano-o atol pulkumali tai, ana monar akale yaru tai naþa kekarana naþa were amiu ava mēna, ana asumãa ga mēna, vano vano-o tol pogos naþa amiu avatani si pulkumali naþani.

¹² Ana pogos naþa avano asike mratava mēna yaru nene, ana monar atalopan ruru la, avisavenua ‘Sumãare sike amio amiu.’

¹³ A visae mratava nene kila wo van amiu, ana sumãare naþa apisa ana þisi na sike amio la, a visae la akila viowa ga van amiu, þisi na sumãare nene wasuþe ke sina ga, vim van amiu.

¹⁴ Ana visae yaru laþasia yepela mavin were amiuena ava mēla umã, pona yepela mavin loge amiuena, ana popon aligan ruru mratava nene pona pulkumali nene mēke na. Ana pogos naþa amolue e yo nene, amiu atanvan puluyavi nae e yo nene naþa sike e lamiu, sane kiamiu visena mãrera tai ne pan la ne, pisape þisi na la akus nakoena naþa mesmesun ga kiela þelaga viowa la nene.

¹⁵ Lelaga naþa nevisa meraravan van amiu, e legiena na liþereena, ana la nene na mãrera la van la, taulu naþa Ntewa mliþere le Sotom amio le Komora lala nanua sumo.”

Pisi na yaru la aþene nalogena kiena ne Yesu lala

Mak 13:9-13; Luk 21:12-17

¹⁶ Ana Yesu pisa pan la, pisape “Amiu asitom ruru wo. Inu neligan plan amiu avano, a amiu ala limamiu ga ava sanene, amiu na sa ga sipsip la naþa asike likan þegas nen lokul tetan lala. Visae sanene, ana monar ave manmarua ruru wo, a amiu monar amomãu ruruia.

¹⁷ Ana monar avisuar ruru amiu, vanon naþa saþisi yaru lala aure amiu ava kiela kumali, a e kiela yumãa na leniena lala, vena avis van amiu, ana þisi na ala nakoena van amiu, a avisuaria saþisi awe amiu.

¹⁸ Ana þisi na aligan amiu ava asumãalu ase marana ne yerkaawa na purvanua vanon ga naþa amiu ape kiau nalogena lala, a e pogos nene amiu akilia avisawal kiamiu nalelagaena e inu e maran la nene a e marana ne la naþa pe amlelaga re e Ntewa poli.

¹⁹ Ana pogos naþa la nene aimi aure amiu, ana amiu na ve asitom manene re avisave ‘?Þisi na nevisa sanape ne, a nevisa ya ne van la ne?’ vanon naþa þisi na Ninuna Wa naga la visena na

visawalena van amiu naþa avisa, mesmesun e pogos na visena.

²⁰ A pogos naþa amiu avis, ana pe kiamiu visena re nene poli, ana visena kiena ne Ninuna ne Arimamiu naþa naga visi e amiu.

²¹ “E pogos m̄arera nene, þisi na yaru kilia tam̄an yaru viowa taþena la nene la aimi aurelua wenla ruru naapo pona narina ruru naapo, vena awe mom̄ar la amarmare, nanene komin naþa la nene amlelaga e inu. A nisisi lala la m̄ena ga akilia asum̄alu avisawal anela lala a arimala lala naþa la amlelaga e inu, vena la m̄ena ga amare sanene.

²² Ana þisi na yaru lala ve sinelan amiu re sina, akawe kiamiu visena silaga, vanon kiau kia teke e amiu, a yaru naþa sum̄alar m̄arera sum̄a ga vano-o pog m̄arera nene þisi, þisi na Ntewa tamalia naga.

²³ Ana pogos naþa la asum̄a am̄ene manene amiu la e pulkumali tai, amiu monar aure ava e pulkumali taþena, a visae am̄ene amiu ke sina ga e yo nene, amiu monar aure sina. Ana nevisa ruru van amiu, nesape kiamiu yum̄aena nene e pulkumali nae Israel lala, þisi na ve þisi ruru re wa ana Narina ne Yeririna vim warpoyo ke sina ga.”

²⁴ Ana Yesu pisa, pisape “Nalogenaga, naga pe to re metavan kiena navianena poli, a yaru na yum̄aena, naga pe to re m̄ena metavan kiena suþe poli. Ve sanene, amiu na ve asitom re avisave þisi na taþatete m̄arera van amiu pogos tai,

²⁵ komin þelaga m̄arera naþa la akila va navianena, þisi na la akila ke m̄ena ga va nalogenaga, a suri m̄arera la naþa suþe naga kusia, þisi na kiena yeririna naga m̄ena ga monar tolia. Sa naþa yaru la apio kare inu, naþa in na nepe yerkawa e m̄au mratava, apisape in na Pielsipel, naþa naga pe suþe kiena ne yermare lala, þisi na la akilia avio kare amiu la sane na wa, amiu la naþa ape kiau e mratava taaga.”

Nalogenaga kiena ne Yesu taþatete maraun yaru lala

Luk 12:2-7

²⁶ Ana Yesu pisape “Vanon naþa þisi na avis viowa van amiu ve sa ke ga naþa apisi piowa pan inu, ana amiu ve amaraun la re. Suri viowa la punu ga naþa yaru lala akila vinaunia, pona apisawaniga, þisi na vim kakate e yometava na wa, vena yaru la punu ga akilia.

²⁷ A amiu m̄ena ga, suri wo la naþa nesum̄a nepisa ke pan amiu e yemalolo, amiu monar avisawal ke sina ga e yomerarava, a suri la naþa nesum̄a nepragagon ke ga e kiligamiu, amiu na monar avion manene va metava e maran yeririna lala, vena yar punu ga akilia aloge.

²⁸ “Ana amiu na ve amaraun re yaru la naþa akilia aweþar tasnemi mare, komin naþa la taþatete aweþar ninumi mare. Ana amiu na monar amaraun ga Ntewa, naþa naga kilia kilalele kare tasnemi amio ninumi luwoka e lele naloge viowaena.

²⁹ Amiu asitom̄alia. Ninlaea la ne akaka ke la ne, la moki paþisi, sa ga kororaki ga, a la asum̄a ap̄iliwilin ke lua e narin kilavaru ga tai, ana visae tai loru vitove tano e porotano, ana Arimamiu naga kilia m̄a ga.

³⁰ A vilþarimiu m̄ena ga moki paþisi, ana Ntewa naga poloar make ga peve taaga, naga kilia la m̄aga.

³¹ Sanene, ana amiu ve amarau re, vanon naþa Ntewa pisa amiu na po manene taulu ninlaea la nene, ana þisi na naga kilia visuar ruru amiu e suri punu ga e kiamiu malena.”

Yaru naþa naga pisawal pisape naga pe kiena ne Yesu

Luk 12:8-9

³² Ana Yesu pisa pisape “Yaru naþa naga visawal e marana ne yaru lala visave naga pe kiau yeririna tai, þisi na inu m̄ena ga, nevisawal naga e marana ne Ata naþa ma e peni, nevisave yaru nene pe kiau.

³³ Ana yaru naþa visawal e marana ne yaru lala visave naga pe pe kiau yeririna

re poli, ana inu mēna ga nevisawal e marana ne Ata naŕa ma e peni, nevisave yaru nene naga pe pe kiau yeririna re poli.”

*Yesu naga pe purŕes nen kaween visena
Luk 12:51-53*

³⁴ Ana Yesu pisape “Amiu na ve asitom re avisave inu nepimin naŕa nekila sane pupia suŕare pimi sike e yomarava nini. Peraga, inu pe nepimin re ga neligan suŕare e poli, ana inu nepimi nemio playu na kilaen mara tai, naŕa ŕisi na yaru la aveveyu la, a akila mara van la vanon inu.

³⁵ In na nepimin nesape nekila sane ŕisi na yaru mēe lala akawe visena kiena ne arimala lala, a sira mēe lala akawe visena kiena ne anela lala, a sira la naŕa atalopa ga na wa, ŕisi na akawe visena kiena ne anela simem lala.

³⁶ Pisi na la naŕa sinela kari manene kiau nalogena lala, naga pe yaru taŕena re la poli, yaru na mratava ga mēala lala.”

*Yesu naga sumo e malena kiena ne
kiena nalogena lala*

Luk 14:26-27

³⁷ Ana Yesu pisa, pisape “Yaru naŕa sitom manene la arimana, pona anena, pona narina, taulu naŕa naga sitom inu, yaru nene naga mesmesun re imi sane ve kiau nalogena poli.

³⁸ Ana visae yaru tai naŕa ve kus re kiena laktorovia taveve inu, sane naga pe taŕan re naga loge viowa vanon inu poli, yaru nene taŕatete imi ve kiau nalogena.

³⁹ Visae yaru tai naŕa naga sitom manene la kiena malena, yaru nene naga ŕisi na kilalu kiena malena nene. A visae kiau nalogena tai naga kilalu kiena malena vanon inu, ŕisi na naga tol malena naŕa taŕatete ŕisi.”

*La naŕa avisuar ruru nalogena lala,
ŕisi na la atol kiela nalaena*

Mak 9:41

⁴⁰ A Yesu pisa, pisape “Visae yaru tai naŕa were amiu ava mēna loyuma, nanene sa ga naŕa ŕere inu ke ga nepa mēna loyuma ne. A visae yaru tai were

inu neva mēna loyuma, ana nanene sa ga naŕa pere ke ga naga naŕa naga mligan inu nepimi, pa ke mēna loyuma.

⁴¹ Visae yaru tai were navisawalena tai pona yaru mesmesu tai ne sanene va mēna loyuma, komin naga kilia ke sape yerkawa nene naga pe yaru wa nayumaena kiena ne Ntewa, yoko naga kus ke ga nalaena torokin naŕa yoko Ntewa la va kiena yerkawa la nene.

⁴² A inu nevisa ruru van amiu sanini, visae yaru tai naga la piala na wii manini ve taaga va kiau nalogena tai, naŕa naga pe sitom re pisape nalogena nene naga pe yerkawa tai poli, pona yaru tai naŕa naga to ga tano, ŕisi na yaru nene la kiena nalaena tai komin suri wo nene naŕa naga kila pa kiau yeririna tai.”

11

¹ Ana pogos naŕa Yesu pisa ruru pa kiena nalogena la lualima taaga pa lua nene ŕisi, naga mligan yo nene, ana naga pa e pulkumali nae Kalele lala, vena vian la a lologon van la.

*Nalogena kiena ne Yoane Nakeena lala
apimi*

Luk 7:18-23

² E pogos nene, Yoane Nakeena sike e yuma nakoena, a naga mloge ke yumaena la naŕa Kristo kila ke ne, ana naga mligan kiena nalogena laŕasia,

³ apanon apiun tan Yesu, apisape “? Sanape? ?Ko na yaru nanua apisa ke sumo asape ŕisi na yaru keviu tai imin vena ve kieta nasumonena, pona pe naga re nane ko poli, ana imimi na monar mesumate laa na wa, ŕisi na yaru nene imi?”

⁴ Ana Yesu pisataŕe la, pisape “Awasuŕe amiu sina, ava ke ga puna ne Yoane, a avisawal vania e suri la naŕa amiu apisuia naŕa nemiyumaen ke e yo nini, a suri la naŕa apisayu inu ke pan amiu, sane suri la naŕa Navisawalena Aisea naga pisayu sumo rui, naŕa naga pisape:

⁵ *Kilamarapala lala, nanagane akirava si
rui,*

a yaru la naña ape lapele a ape laulu,
 nanagane akilia amial po si narui,
 a yaru la naña leperosi sike e yepela,
 nanagane yepela pimi mian ruru si
 narui,
 a yaru la naña ape kiligapoŕe, nanagane
 amloge si suri narui,
 a yaru la naña amare, nanagane amal si
 rui,
 a yaru la naña limala korena ga, nanagane
 nemlologon ke Nalologena Wo pan
 la rui.' *Ais 35:5,6*

6 "A amiu avano avisa mēna va Yoane,
 avisave 'Yaru naña pe kiena sitomena pe
 pepe lua li re e inu pogos tai poli, p̄isi na
 navisa ruruena sike e naga.' "

Yesu pisayu Yoane Nakeena

Luk 7:24-30

7 Ana pogos naña nalogena kiena ne
 Yoane Nakeena lala amolue vena awa-
 suŕe sina, Yesu pisayu Yoane nene pa
 yaru la naña asike ne, pisape "?Nanua
 sumo na, pogos naña amiu apa e yoko-
 rena nene, amiu na apanon apisu ya? !
 In na pe nesitom re naña nesape amiu
 apanon apisu kiai na yokorena la naña
 lagi miyuia ana kulkulul luen ga poli!

8 A pe nesitom re mēna ga nesape amiu
 avanon vena avisu yerkawa tai naña naga
 miyowau ruru po poli, komin yaru la ne
 sanene ana taŕatete ase lele viowa tai
 sane yokorena nene, ana silaga asike ga
 e pupia yumā wo mēna ne suŕe kerkeviu
 lala.

9 ?Peraga, ana in na nesitom ke nesape
 amiu apanon ke vena avisu navisawalena
 tai, ne? Ee, ana naga nene na poga ga ne,
 ana inu nevisa van amiu, yaru nene naña
 amiu amoluen apa apisu naga, naga to laa
 metava, taulu navisawalena nasumo lala,

10 komin Ntewa naga pisayu Yoane nene
 sumo rui e kiena Visena Wa, naña naga
 pisape

'In na nemligan kiau navisi pimi sumon ko,
 vena kila ruru kioṁa mrapa.' *Mal*
 3:1

11 "Lelaga nevisa van amiu sanini, e
 yomarava nini, Yoane Nakeena naga to
 la metavan yaru taŕena la punu ga. Ana
 yeririna la punu ga naña p̄isi na la ava

loyumā e nasuŕenena kiena ne Ntewa,
 vano-o tol kiela yaru naña su maro la garo
 tano, la punu ga nene la apa la metavan
 Yoane, naña la awar kiela navisa ruruena
 kiena ne Ntewa pa laa taulu naga.

12 A siar e pogos naña Yoane Nakeena
 siar mlologo, pimi tol nanagane, yaru
 lala asumā akawe ke nasuŕenena kiena
 ne Ntewa, a nasinekar mārera na ki-
 laen mara lala la mēna ga akilali naña
 atauluia.

13 Nanua sumo manene la, pimi tol
 pogos kiena ne Yoane, navisawalena lala,
 a navisaluaena naña Mosis siria, ana la
 apisayu suri la moki naña kilia kakate
 sirau.

14 A visae amiu akekaran alelaga e
 suri la nene naña p̄isi na aṁalivi sirau,
 ana p̄isi na amiu akilia avisu kilale naña
 Yoane Nakeena naga pe Elaisa nene, naña
 la apisaaria sumo rui apisape p̄isi na naga
 monar wasuŕe sina ga imi.

15 A visae kiligamiu toṁa ga, popon
 ayagogon ruru kiau visena la nene."

Yesu pisi mārera pan kiena teras lala

Luk 7:31-35

16-19 A Yesu pisi pa laa sane, pisa pisape
 "?Ana p̄isi na nevisawal visena ya naña
 kilia tol ŕelaga kiena ne yeririna na
 nanagane lala? E lepas punu ga naña
 Ntewa naga kila vena kilali wo van amiu,
 ana amiu yepemiu mavin ga, amiu apisa
 kare ga naga vanonia. Komin pogos naña
 Yoane naga pimi sike ga wa, ana monsilu
 ga pe kinana re poli vena len, a naga palia
 mēna ga kuruta na munena, pe mun re
 poli, ana yaru la apisu naga sanene, la
 apismumun naga, apisape 'Yaru nene yer-
 mare pa e naga.' A pogos naña Narina ne
 Yeririna naga pimi sike na, naga kinana
 ruru ga a mun ruru ga, sa ke ga yaru
 taŕena lala, ana yaru la apismumun naga,
 apisa apisape 'Opisu ke ne, yaru nene
 naga pe yaru na kinan merorolen paŕisi,
 a pe yaru na munena mēna kuruta na
 munena paŕisi, a naña naga kiena erau
 lala na, la ape yaru nawarpoloen ga takis,
 a ape yaru viowa ga lala.'

“Komin suri ne nanene narui, inu nepisu amiu yeririna na nanagane lala naña amiu na sa ga sisi lala naña visae asumã akirakirai e yometava na kumali, ðisi na la asumã aviovion va kiela erau lala, avisave ‘!E, amiu na apiowa nene! Visae imimi mesumã mowe plaþe, ana amiu ve awol re amio imimi, a visae imimi meyaun yauena na marena, ana amiu ve atagi re amio imimi.’

“Ana suri punu ga naña la amolmolue e namanmaruaena kiena ne Ntewa, sumonia yaru la mokliu naña apisu sane piowa ga, ana siraunia ðisi na Ntewa naga kila imi merarava sane kiena manmaruaena nene naga mesmesu a naga pe lelaga ruru nenaga.”

Yesu pisaar ruru pa la naña pe amlelaga re e naga poli

Luk 10:13-15

²⁰ Ana Yesu pisaar ruru pa yeririna lala na pulkumali la punu ga naña naga kila kile la moki pan la, komin naña apisu kiena suri la nene rui, ana pe apilon la re poli.

²¹ Naga pisa pisape “Yaru nae Korasin lala, amio yaru nae Petsaeta lala, amiu na akila kare amiu keviu paþisi wa! Visae le Taea amio le Saeton la nanua sumo, ana la avisuli ga kile la naña amiu apisu ðisi rui, pona avilopu la nanua sumo yo rui. La pe ape le Yu re poli, ana ðisi na vera na ayen ðililis nen karo, a pona la akuwani posnoyavi e þarila yo rui, vena yaru la avisu kilale sane amloge kemua piowa lelaga vanon kiela mlamulena piowa lala.

²² Inu nevisa mesmesun van amiu, e legiena na liþereena, ðisi na kiamiu nakoena naña van amiu taulu naña van la nene.

²³ !Ana amiu le Kapeneam lala, naña amiu asumã aþarwar amiu, a naña sine-miun asape amiu ato manene metava, ana amiu avisuar amiu! Pisi na Ntewa koven plan amiu ato tano, ato tano vaþisi e pulukapi. Visae le Sotom lala la avisuli ga kile la nene naña amiu apisuia, vera na la apilopu la rui, a vera na pupia kapi nae ma e peni nene taþatete kekan kiela

yo nene kovio. Ana amiu apisu pa kile la nene rui, amiu pe apilopu amiu re nena poli,

²⁴ nane nevisa van amiu, e legiena na liþereena, ðisi na Ntewa naga sinena ye la manenea taulu amiu.”

Yesu pisa potena pa Arimana

Luk 10:21-22

²⁵ Ana e pogos nene, Yesu mlen, pisa pisape “!Ata-o, ko ope Suþe nae ma e peni a Suþe nae yomarava nini! Nevisa potena van ko, Ata, vanon naña ko opian suri la naña e inu pan la naña kiela sitomena sa ga nisisi lala, ana yaru la naña asitom asape ape manmarua a la naña asitom asape akilia ruru suria, ko okilawan suri la nene van la.

²⁶ Lelaga, Ata, nanene ve sa ga naña ko sinoñania.”

²⁷ Ana Yesu pisa mñena ga, pisape “Arimau naga mligan make suri la punu ga e lumãu ðisi rui. A Arimau naga taaga naga kilia ruru inu, a inu naña nepe narina, in ga taaga ga nekilia ruru naga. Inu nemio la naña nemligan la vena nekilogia Arimau van la vena awasinea, ana imimi ga nene mekilia ruru naga naña naga pe Arimamimi.”

“Amiu aimi pun inu vena ava ruru amiu”

²⁸ Ana Yesu pisa mñena ga, pisape “Amiu punu ga naña amiu sinemiu mare paþisi vanon naña amiu asumã aþar ke suri urmi lala e kiamiu malena lala, amiu aimi, amiu aimi pun inu, vena nekilia nekila amiu ava ruru amiu.

²⁹ Amiu alarar kiau visena lala ve sa naña þeligas tai e kiamiu malena, a amiu alarar kiau þelaga lala, vanon naña inu na nepe yaru moñau tai, a kiau sitomena to ga tano. Sanene, ðisi na amiu alual naña kiamiu sitomena lala varuruia,

³⁰ vanon naña kiau vianena lala ameme ga a amelala ga, a suri la naña ðisi na inu nowar van amiu vena amiu awaria, ðisi na naga taþatete urmi manene van amiu.”

12

*Yesu naga pe suŕen Legiena Wa
Mak 2:23-28; Luk 6:1-5*

¹ Ana e legiena taŕena si tai, naŕa naga pe Legiena Wa, Yesu amio kiena nalogena lala amial apano, ana kiela mrapa pa ga likan lokove na wit lala. Amial ke sanene, ana kiena nalogena lala viso kar la, ana apeve plan mras nen wit laŕasia vena akania.

² Asiar akila ke sanene, ana Varasi la ŕasia asike e yo nene, ana apisula mŕaga, ana la apisi pa Yesu, asape “!Ei, opisus ke ne! Kioŕna nalogena lala la asuŕna aŕar ke kinanena e lokove sanene, la asuŕna amiyuŕnae ke e Legiena Wa ne, a visae ve sanene, la asu mŕa akilaro ke kieta navisaluaena ne.”

³ Ana Yesu pisataŕne la, pisape “?Ana, sanene yo, pona amiu pe apuloli re Tusi Wa pogos tai poli yo, e suri la naŕa Parin Suŕe Tepet naga kila sumo? Naga amio kiena yeririna lala viso kar la paŕisi,

⁴ ana naga pa loyuŕna e silparpara wa mŕana Ntewa, ana naga mla kilaparavi wa nene naŕa Navisaluaena pisape yaru wa ga lala, la akilia akania, ana Tepet mŕena ga la akania.

⁵ ?Pona amiu na pe apulo re mŕena Navisaluaena kiena ne Mosis poli yo, naŕa e Legiena Wa punu ga, yaru wa lala, la monar ava loyuŕna e Yuŕna Wa mŕana Ntewa vena akila kiela yuŕnaena la ea? Sanene na, la akilaro ke Navisaluaena naŕa pialuŕar ke sape yaru ve yuŕnae re e Legiena Wa ne, ana Ntewa naga pisu suri nene ana pe sitom re pisape suri viowa tai nene poli.

⁶ Inu nevisa van amiu, nesape nasuŕenena viu tai sike nanagane, naŕa naga to laa metava taulu navisaluaena na Yuŕna Wa mŕana ne Ntewa,

⁷ ana naga sa naŕa e Tusi Wa, Ntewa pisa pisape

‘Inu na pe sineun re kiamiu kuŕaŕaena la poli, ana in na sineun ga ŕelaga na sineyeena.’ *Ose 6:6*

?Pona amiu na aminue ke kinas nen visena nene wa? Visae amiu akilia, a ŕisi na amiu taŕatete asuŕna aliŕere kare kiau

nalogena la nene naŕa pe akila re ŕelaga viowa tai poli.

⁸ Narina ne Yeririna, naga ke naŕa pe suŕen Legiena Wa narui.”

*Yesu miyuŕnaen ruru limana yaru tai
Mak 3:1-6; Luk 6:6-11*

⁹ Ana Yesu molue e yo nene, mial pano, ana pa loyuŕna e kiela yuŕna na lotuena tai.

¹⁰ E yo nene, yaru tai sike ea ana naga limana ve tokak, a pe lima mare, ana yaru mŕena ga laŕasia naŕa asuŕna ga sinelan asape alual li suri laŕasia naŕa Yesu naga kila na pe mesmesu re poli yo. Ana yaru la nene apiun tan Yesu, asape “?Sanape, kieta navisaluaena pialuŕar yuŕnaena na kilaruruen tas nen yaru e Legiena Wa, pona pe pialuŕar re poli? !Ovisali suri nene!”

¹¹ Ana Yesu pisataŕnea, pisape “Visae yaru tai kiena sipsip ve taaga ga, ana e Legiena Wa tai, kiena sipsip nene va loru vitove e ŕiliŕili tai, amiu asitom asape ŕisi na yaru nene taŕatete va werelua sina? !Ee, ŕisi na ita punu ga monar tekila sanene va kieta suri mali lala!

¹² Ana visae mesmesu ga ve sanene e kieta navisaluaena vena teiila kieta sipsip tai sanene e Legiena Wa, ana sanene ita tekilia tekila mŕena ga yuŕnaena naiilaen yaru taŕena e Legiena Wa, komin yaru naga po taulu sipsip.”

¹³ Ana Yesu pisa pa yaru naŕa limana mare, pisape “Okian mesmesun lumoŕna.” Ana yaru naŕa kila sane Yesu pisa, kian mesmesun limana, ana limana pimi po sina, sa ke ga limana komŕas.

¹⁴ Ana Varasi la naŕa asike e pogos nene apielue, ana amolue apa vanua, vena avisayu sanape naŕa akilia aweŕar Yesu mare.

*Yesu naga pe yaru nayuŕnaena kiena ne
Ntewa*

¹⁵ Ana Yesu kilia mŕa naŕa Varasi lala asape awe naga, ana naga molue e yo nene, amio yeririna la moki naŕa atavevea. Ana naga suŕna kila ruru ke namaiena lala,

16 ana naga pisi m̄arera pan la, naga p̄isalup̄ar la pisape la ve avisayu re naga va yaru tāpena lala.

17 Naga kila sanene vena visena kiena ne Ntewa tai vim ve lelaga, nāpa Navisawalena Aisea pisawal sumo rui, a visena nene pisa sanini, pisape

18 “Nanene yaru nāpa naga miyumūae kiau, nāpa in na nemligan lua naga.

In na nesitom naga pāpisi, a kiau sitomena kekaran naga pāpisi.

Pisi na inu neligan Ninuu van naga, vena naga visawal p̄elaga mesmesu lala va yolai lala na yomarava nini.

19 *Pisi na naga tāpatete visin sinekar van yaru, pona visi molmolue va p̄isi, a naga tāpatete koven visena ve moki e yo metava.*

20 *Ana naga tāpatete telua kiai nāpa poroli p̄isi rui, a naga tāpatete vilonm̄ar kapi vivaga nāpa lavis mare rui.*

Naga p̄isi na yumūae m̄a sanene vano vano-o, tol nāpa p̄elaga mesmesu sum̄alu m̄arera taulu nena p̄elaga viowa.

21 *Ana p̄isi na yolai lala na yomarava nini, la alelaga m̄arera e naga, avisave p̄isi na naga tamalia la.” Ais 42:1-4*

Apisa apisape Yesu myumūae e nam̄areraena kiena ne Yermare

Mak 3:20-30; Luk 11:14-23, 12:10

22 Ana yaru lala asumon yaru tai nāpa yermare pa e naga pimi puna Yesu. Yermare nene kila naga pe kilamara p̄ala, a pe puru m̄ena ga, ana Yesu kila ruru si kilamarana amio pulgona apimi apo sina.

23 Ana yeririna la nāpa apisu suri nene amilania, a sinela kurkuru pāpisi, ana apiun ke sina ga tan la, apisape “!E! ?Yaru nene naga narina ne Tepet nāpa tesumūate ke yo, pona peraga?”

24 Ana pogos nāpa Varasi lala amloge visena kiena ne yeririna la nene, ana apielue pāpisi, nāpa apisape “Yaru nene m̄ene plan yermare lala e ga e nam̄areraena kiena ne sūpe kiena yermare lala, nāpa Pielsipel, naga tam̄an pania.”

25 Ana Yesu mlogekilale m̄a kiela sito-mena nene, ana naga pisa pan la, pisape “Visae sūpe tai, kiena yeririna lala alīperela, nāpa lāpasia akawe si visena kiena ne lala kom̄pasia, p̄isi na sūpe nene kiena yumūaena lala monar loloru ga vito sike na; a visae pulkumali tai pona mratava tai, kiela yeririna lala alīperela, nāpa sane lāpasia sinelan asape am̄ene plan si lāpasia, p̄isi na yeririna la nene tāpatete asu ruru pogos tai.

26 ?A sa m̄ena ga nini, visae yermare lala kiena ne Yermare Lego, lāpasia am̄ene plan ke sina ga lala p̄asia, nanene na kana kinasia sane amlīpere la p̄isi narui, ana nasūpenena kiena ne Yermare Lego naga yoko sum̄alu ve sanape ne?

27 !Ana amiu na apisa ke asape sanene narui, asape in na nesumūa nem̄ene plan ke yermare tāpena lala e nam̄areraena kiena ne pupia yermare nāpa Pelsepel, ana pe sa re nena nene poli! Ana visae ve sa nāpa amiu apisa, sanape na amiu m̄ena lāpasia nāpa am̄ene plan ke yermare lala? ?Ane mla nam̄areraena nene pan la, pona Yermare Lego m̄ena yo? A popon visae kiamiu nalogena la nāpa am̄ene plan ke yermare lala, la alogeveveruruli kiamiu visena la nene.

28 Ana peraga, amiu apisa suri nene na pe mesmesu re poli. Inu na nem̄ene plan ke ga yermare lala e nam̄areraena kiena ne Ninuna Ntewa, ana suri nene na sane nasūpenena kiena ne Ntewa sike likan amiu p̄isi rui.

29 “!Amiu na apisu ke ne! Visae yaru tai sinenan ke pisape va loyumūa m̄ana ne yaru m̄arera tai, vena vinaun kiena suria, naga monar war kilika viar ke ne yaru nene sumo wa, p̄isi na naga kilia va loyumūa ana war plan make kiena suria. Ana in na nekila ke sanene pa yaru m̄arera nene nāpa Yermare Lego.

30 “Yaru nāpa pe taveve inu re poli, naga suwo inu ke ne, a yaru nāpa pe miyumūae re amio inu poli vena moure kiau yeririna lala aimi lele taaga, naga sane sum̄a m̄enetetain la ke ne.

31-32 Ana sanene narui, in na nevisa van amiu, mlamulena viowa lala, a visena viowa lala, a visena naña kila kare Narina ne Yeririna, Ntewa naga kilia viewo yaru vanonia, ana yaru naña pisayu kare Ninuna Wa, naña pisa pisape kiena yunãaena naga Yermare Lego ga miyumaena, yaru na sanene, Ntewa tañatete viewo naga pogos tai, e pogos na tesike e ne, a e pogos naña pimi ke sirau.”

Purlaki amio kana mrasnena
Luk 6:43-45

33 A Yesu pisa mēna ga, pisape “Ita tekilia tevisu kilale purlaki lala e mrasnela naña añaria. Purlaki naña kapuru po, naga mrasa mēna ga po, ana purlaki naña piowa ga, ãar mēna ga mrasa naña piowa ga.

34 A malena kiena ne yeririna naga sa ke mēna ga nene, naña e losinena naga sane pe purpēs tai, a visena la naña amolmolue e kiena malena, la sane mras la naña amolmolue ke e purpēs nene. ? A inu nepisu kiamiu purpēsia menunu ãisi rui, ana sanape naña yoko mras wo lañasia kilia molue kome kiamiu visena lala? !Amiu na ape lus kiena ne lomāra kemua lelaga narui!

35 Yaru naña po, ãarpolo suri wo lala sike e losinena, ana silaga naga kiena sitomena wo tomā ga naña kilia lalua va yaru. Ana yaru viowa, naga sumā ãarpolo suri viowa lala sike e losinena, ana naga tañatete kilia lalua kiena sitomena wo tai pogos tai.

36 “Inu sineun nesape amiu akilia naña e legiena na liñereena, ana yaru la punu ga monar akila navisawalena tai vanon kiela visena viowa la veve taaga naña apisa e kiela malena lala,

37 vanon naña ãisi na Ntewa naga liñere kioñā malena e ga e kioñā visena lala. Nanene, vanon naña kioñā visena lala akilia akila ko vena omal, pona akila ko vena owar nakoena.”

Yerkawa lañasia la sinelan asape avisu kile

Mak 8:11-12; Luk 11:29-32

38 Ana navianena na navisaluaena lañasia, amio Varasi lañasia, apisa pa Yesu, apisape “!Ei, ko naña apio ko ke asape Navianena, imimi sinemimin mesape okila kile tai van imimi vena imimi mevisu kioñā namāraena.”

39 Ana Yesu pisatamē la, pisape “Yaru la naña sinelan ga asape avisu kile la sanene, la ape yaru viowa la pañisi, akila ke wowe pa Ntewa sane la naña akila ke kolau. Peraga, ãisi na tañatete amiu avisu kile tai, ana kile naña kiena ne Navisawalena Sona sumo, naga ga nene na akilia avisuia.

40 Sona nene mēke e lomēñen pupia ika lesumsum nene pano-o tol legiena telu a lemalo telu, ana ãisi na ve sa ke mēna ga nene e Narina ne Yeririna, naña ãisi na naga mēke e los nen porotano vano-o tol legiena ve telu a lemalo ve telu.

41 Ana la nae Ninive nanua sumo amloge visena kiena ne Sona narui, ana apilopu la, a e legiena na liñereena, ãisi na la nene asuñalu avisa lologia kiamiu naviowaena lala, komin naña yaru tai naña naga to laa metavan Sona naga sike amio amiu nanagane, ana amiu na pe apilopu amiu re nenaga.

42 “Nanua mēna ga sumo, ana sira kawa tai naga pe ãarin suñe tai, naña naga mli-gan kiena purvanua naña sike koperina pañisi, ana pitomi tano vena loge visena namanmaruaena kiena ne ãarin Suñe Solomon. Ana sira kawa mēna ga nene ãisi na suñalu e legiena naliñereena, naga visa lologia kiamiu naviowaena lala, komin naña yaru tai naga pe manmarua to laa metavan Solomon sane, naga sike amio amiu nanagane, ana amiu na pe sinemiun re nenaga.”

Ninuna viowa naga kilia wasuñe sina
Luk 11:24-26

43 Ana Yesu pisa mēna ga, pisapenua “Pogos tai, pogos naña visae añenelua yermare e yaru tai, yermare nene kilia va yomārua vena kaleli yo tai naña va se ea vena ve māna umā. Ana visae ve lual re,

⁴⁴ ĩisi na naga visavenua, ‘A, ĩisi na nevito li si e māu umā marua na sumo wa.’ Ana pogos naĵa naga wasuĵe vitomi, ĩisi na naga vitomi wal yumā naĵa mon korena ga, ana merarava po paĵisi, a akila ruru make suri la e yumā naĵa ĩisi rui.

⁴⁵ Ana naga kilia wasuĵe sina va were si yermare taĵena lala ve olua, naĵa la apiowa manene la taulu naga sane, atomi amio naga, ana akilia ava si asike e los nen yaru nene. Ana yaru nene, nanua sumo kiena malena piowa, ana siraunia kiena malena viowa la sane. A ĩisi na ve sa ke mēna ga nene e malena kiena ne yaru viowa nanagane lala.”

*Yesu, anena amio wenla lala
Mak 3:31-35; Luk 8:19-21*

⁴⁶ Pogos naĵa Yesu ĩisi ke amio yaru la nene wa, ana anena amio wenla lala apimi aporu e yo nene, asumālu asumā ga vanua, la sinelan asape avis amio Yesu.

⁴⁷ Ana yaru la tai nene pisa pa Yesu, pisape “Ei, anomā amio womla lala asumālu asike vanua, la sinelan asape avis re amio ko wa.”

⁴⁸ Ana Yesu pisatamea, pisape “?Ana ane pe aneu, a ane pe wolai lala?”

⁴⁹ Ana naga kiar kiena nalogena lala, pisapenua “?Aĩisu ke yaru la ne asike ne? Aneu a wolai lala, yaru ne la nane asike ne.

⁵⁰ Komin visae yaru naĵa kila ke ya naĵa Ata nae ma e peni naga sinenania, yaru na sanene naga pe wolai, a pe vineu, a pe aneu.”

13

Pakaiwa na kurus nen wit la naĵa akekapil apa e porotano la naĵa ape taĵena la vari

Mak 4:1-9; Luk 8:4-8

¹ E ke e legiena nene, Yesu molue umā, pito totano e yepas nen pupia lapa nene vena vian yeririna lala.

² Ana yeririna la moki paĵisi apitomi puna e pogos nene narui, ana kila naga ĩiyu pa to meta e waa tai, ana yeririna la punu ga yo pule ga asike ura,

³ ana naga pian suri moki pan la e ga e ĩakaiwa lala.

Ana naga pisa pan la, pisape “Yaru tai pa peven kurusa e kana lokove.

⁴ Pogos naĵa naga sumā sisilin ke kurus la nene, ana kurus laĵasia kekapil pa e mrapa, ana siraunia manu lala apimi ate plan make ga.

⁵ Ana kurus laĵasia akekapili pa e naĵa kilavaru mēke tano, ana pe porotano po re teke meta poli. Ana akakapur vilaga, vanon porotano meninivi ga.

⁶ Ana pogos naĵa mrae pa mārera, kekan kurus nen suri la naĵa pitotovi memeu veraga, vanon ĩeligas lala pe pito ruru re tano poli wa.

⁷ Ana kurus laĵasia akekapili apa e naĵa sumo pe ate plan ruru re kilika viowa la e poli, ana ĩisi na kilika viowa naĵa pitovi ĩimi keviu sina, ana piwo kare kurus nen suri la naĵa pitotovi ne ana amarmare.

⁸ A kurus taĵena si laĵasia akekapil apa e porotano tai naĵa po, ana akapuru po, ana aĵar mrasnela, naĵa laĵas aĵar mras tol ponotia taaga, laĵasia aĵar mras tol lualima orai, a laĵasia lualima telu.”

⁹ Ana Yesu pisa, pisape “Yaru naĵa kiligana teke ea naga monar yagogon ruru visena nene.”

*?Vanon ya ne Yesu ĩis e ĩakaiwa lala?
Mak 4:10-12; Luk 8:9-10*

¹⁰ Ana siraunia, nalogena lala apimi puna ne Yesu apiunia, asape “?Vanon ya ne ko osumā opian ke yeririna lala e ĩakaiwa la sanene?”

¹¹ Ana Yesu pisatamea, pisape “Ntewa naga kila ke sape ĩisi na amiu akilia alual nakilia wanena kiena ne kiena nasuĵenena, ana naga taĵatete la kiliaena ne va yeririna taĵena la nene.

¹² Nevisa sanini van amiu, visae yaru naĵa kiena suri moki rui, ĩisi na war va la sane vena ve moki va ĩisi, a yaru naĵa pe kiena suri re poli, ĩisi na naga kilalu narin suri ya naĵa naga kiena.

¹³ Sanene, nepian la e ĩakaiwa lala, vanon naĵa la asumā apisuia, ana apisu

kilale ĩele ga, ana asuġa amloge, ana amloge kilale ĩele ga.

¹⁴ Yaru suri la ne sanene, akila narui ana Ntewa pisayu la nanua sumo rui e visena lelaga naġa Navisawalena Aisea pisawal sumo, naġa pisa pisape

'Ana ĩisi na amiu aloge vano-o, ana taġatete alogakilale pogos tai.

A ĩisi na amiu avisu vano-o, ana taġatete avisu kilale pogos tai,

¹⁵ *vanon naġa amiu na sane yaru la naġa kiela sitomena la amarmare ĩisi rui, sa naġa aġiwo pulkiligala, a sane aġelawa rui.*

Visae ve akila re sanene, pona vera na akilia avisu kilale suria, a vera na akilia alogakilale suria, a vera na kiela sitomena akilia asitomkilale suria, ana sanene, akilia avilopu la aimi pun inu vena nekila ruru la.'
Ais 6:9,10

¹⁶ "Ana nevisa van amiu, kiau nalogena lala, navisa ruruena sike e amiu komin naġa kilamaramiu la asuġa apisu ke suri la naġa amiu apisuia, a kiligamiu la amloge ġa suri la naġa nesuġa nepian amiu ke ea.

¹⁷ Inu nevisa van amiu, navisawalena la moki amio yeririna kiena ne Ntewa lala la moki liu nanua sumo, naġa sinelan manene paġisi naġa asape avisu suri la naġa amiu apisu ke nanagane, ana pe apisu re poli, a la akilayon manene naġa aloge suri la naġa amiu amloge ke nanagane, ana pe amloge re nenaga."

Yesu pisawal kinas nen ġakaiwa na kurus nen wit

Mak 4:13-20; Luk 8:11-15

¹⁸ Ana Yesu pisa pan la, pisape "Amiu, ayagogo ruruia, ĩisi na nevisayu kinas nen ġakaiwa nene, naġa naga pisayu yaru nene naġa pa peven kurusa e kana lokove.

¹⁹ "Suri nasumo, naga kurus la naġa kekapili e mrapa, naga sa naġa yaru la ne amloge nalogena wo nasuġenena nene ana pe amloge kilale re poli. Kurus wo lala kekapil e kiela sitomena lala, ana yaru viowa nene naġa Yermare, naga

pimi ġar plan ke sina ga nalogena wo nene e losinela.

²⁰ "Taġena, naga nene na kurus la naġa kekapili e yo naġa kilavaru ġeke tano, a naga sa naġa yaru la ne amloge lologena wo nene, ana akekaran veraga,

²¹ ana sa naġa ġeligasa pe po re poli. Akilia asu ve plas ga, a visae pogos ġarera tai, pona yaru la aġene la vanon naġa la amlelaga e visena kiena ne Ntewa, ĩisi na la aluru ke veraga.

²² "Taġena ġena ga, naga na kurus la naġa kekapil e yo naġa kilika viowa sike ea, ana naga na sa naġa yaru la ne amloge lologena wo nene, ana la asitom manene la kiela malena lala, a sinelan manene la suri na yomarava nini. Pelaga la nene apimi sane kilika viowa, ana la apiwo kare nalogena wo nene vena ve war re si mrasa e kiela malena.

²³ "Ana na maro, naga na kurus la naġa kekapili e porotano naġa po, naga na sa naġa yaru la amiyagogo ruru e lologena wo nene, ana amloge kilale ruru po, ana aġar mras nen nalogena nene e kiela malena lala, naġa sane laġasia aġar lualima telu, laġasia aġar sane lualima orai, a laġasia aġar moki sane mrasa tol ponotia taaga."

ġakaiwa na viluġini viowa amio kurus nen wit lalua akapuru lele taaga

²⁴ Ana Yesu pisa sina ga ġakaiwa taġena tai pan la, pisape "Pelaga naġa Ntewa ġere yaru lala apimi loyuġa e nasuġenena kiena naga sanini. Yerkawa tai naġa naga pa peven kurus nen wit la naġa po e kana lokove,

²⁵ ana pogos naġa yaru lala amomalio ke kolemallo, kiena nasinekar tai naga pimi, mapila kurus nen viluġini viowa tai e lokove nene ĩisi, ana pure pano.

²⁶ Ana suri la lua nene apitotovi, ana lalua maran taaga ga, ana pogos naġa wit lala asiar naġa awar mrasa, ana yerkawa nene, kiena yaru na yuġaena lala apisu kilalea sane viluġini viowa ġena ga kapuru ke amio wit nene.

²⁷ Ana la apimi puna, apiun tania, asape '?Yerkawa, sanape? Kurus la naġa

tepeven e koña lokove, ana kurus wo ga lala. ?Ana vilumĩni viowa nene pimi sanape?’

²⁸ “Ana naga pisa pan la, pisape ‘Peraga, nene na kiau nasinekar tai ne kila suri sanene.’

“Ana kiena yaru na yumãena lala apiun ke sina ga tania, asape ‘?Poga ga, ana sanape, sinomãan osape imimi meva moure plan vilumĩni viowa la nene?’

²⁹ Ana naga pisaluþaria, pisape ‘Toko, aligan suwa wa. Visae amiu ava aure plan vilumĩni viowa la nene, pona visae akila palia sa aure plan lae mēna ga amio wit la nene veraga.

³⁰ Lalua akilia akakapuru mña veraga vano-o tol pogos na waren kinas nen wit imi. E ke e pogos nene, þisi na nekilia nevisa va yaru la naþa ava awar wit, vena ava ate ke ne vilumĩni viowa nene sumo wa, aviaria e þegasia akoven va e kapi. Siraunia, la akilia ava ate wit lala vena awar vitomi umã.’ ”

*Pakaiwa na kurus nen mras nen purpa
Mak 4:30-32; Luk 13:18-19*

³¹ Ana Yesu pisawal þakaiwa taþena tai pan la, pisape “Nasuþenena nae ma e peni naga sane kurus nen mras nen purpa tai naþa pito pelan te laki tai.

³² Kurus nene na ve tokak na ve tokak paþisi, ana pogos naþa kapuru pano-o, ana pimi pe purlaki tai naþa keviu taulu make purlaki taþena lala, ana manu lala akila mñala ponovi lala e kana korowas lala.”

*Pakaiwa na is
Luk 13:20-21*

³³ A Yesu pisawal sina þakaiwa taþena tai pan la, pisape “Nasuþenena kiena ne Ntewa, naga sa naþa sira tai þalelar narin is amio puluyavi na kilaparavi e pupia pialora tai, ana narin is nene kilia kila kilaparavi la nene punu ga mlapa.”

*Yesu pisi pan la e ga e þakaiwa lala
Mak 4:33-34*

³⁴ E visena kiena ne Yesu la nene, naga pisawal suri la ne sanene pa yaru lala, a silaga naga pisi pan la e ga e þakaiwa lala.

³⁵ Sanene, naga kila visena kiena ne navisawalena nanua sumo imi ve lelaga, naþa Ntewa pisa, pisape

“Pisi na inu nevisawal kiau visena lala e ga e þakaiwa,

þisi na nevisawal suri la naþa tapolou su nakonua rui, asike ga perina wa, siar e pogos na sien yomerava nini, pimi tol nanagane.” *Yauena 78:2*

Yesu pisawal kinas nen þakaiwa na vilumĩni viowa

³⁶ Ana Yesu mligan þina lala, pa loyumã, ana kiena nalogena lala apimi puna, apiunia apisape “?Yesu, imimi sinemimi mesape ovisawal van imimi ya ne kinas nen þakaiwa na vilumĩni viowa naþa kapuru ke e lokove na wit nene?”

³⁷ Ana Yesu pisatañe la, pisape “Yerkawa naþa peven ke kurus wo lala, nane Narina ne Yeririna nene.

³⁸ A kana lokove nene, nane yomarava nini. A kurus wo la nene, nane yeririna la naþa asike loyumã e nasuþenena kiena ne Ntewa nene. A vilumĩni viowa la nene, nane yeririna kiena ne Yermare la nene.

³⁹ A nasinekar nene naþa pa peven kurus nen vilumĩni viowa nene, nane Yermare na ga. A pogos nawarpoloen kinas nen wit la nene imi, nane luas nen pog nini. A yaru na yumãena la nene naþa avanon ate wit awarpuloia, nane navisi lala.

⁴⁰ A yumãena nene na warpiloena vilumĩni viowa la nene vena asikapila, nane þelaga ke sina ga nene naþa þisi na imi e pogos maro,

⁴¹ naþa Narina ne Yeririna, naga ligan kiena navisi lala vena avano awar plan suri la naþa kila yaru lala amloru e mlamulena viowa, amio yaru la nataþaen mlamulena viowa, vena ve asu re si veraga amio yaru la nasuþenena kiena.

⁴² Þisi na navisi lala akoven la ava e pupia kapi, e yo naþa yaru lala asumã ga atagi, a asumã ga akar ke maluela ea.

⁴³ Ana siraunia, yaru mesmesu lala þisi na atego ve sa mrae, loyumã e nasuþenena kiena ne Arimala. A yaru naþa kiligana teke e naga monar yagogo ruru e visena nene.”

Pakaiwa na pupia kilavaru wo tai natauluwen kilavaru

⁴⁴ A Yesu pisape “Pelaga kiena ne yaru naña sinenan sape va loyuma e nasuŕenena kiena ne Ntewa, sane ŕakaiwa nini: yaru tai pa pisu kinakinas nen porotano tai, ana naga milan pupia kilavaru wo tai naña monyouyou ga mēke ea. Ana naga sinwan rurulein kilavaru nañani, ana naga pitove ŕiliwilin plan make kiena suri lala punu ga, vena kilia vam ul lua kinakinas nen porotano nene, vanon naña mloge po manene la paŕisi e suri wo naña mālia.”

Pakaiwa na kilavaru yuwowo naña teke e mratamelilivi

⁴⁵ A Yesu pisa mēna ga, pisape “A sa ke sina ga nini, ŕelaga kiena ne yaru naña sinenan pisape va loyuma e nasuŕenena kiena ne Ntewa, sa ke mēna ga nini: yaru tai naña naga pul ke kilavaru yuwowo la naña po tan yaru lala, naña sike loyuma e mratamelilivi.

⁴⁶ Ana pogos tai naga māal tai naña po na po, pisa pisape ‘!Lelaga ŕa, in na sineun suri nene paŕisi wa! Visae in na nokus ga ve kiau ga rui vera wo wa. Yoko in na neto nowilwilin plan make kiau suri taŕena lala, vena nevam nowul lua suri wo nini.’ ”

Pakaiwa na lilivi

⁴⁷ Ana Yesu pisa ke sina ga, pisape “A naga ke sina ga, ŕelaga kiena ne Ntewa nawereen yaru lala ava loyuma e kiena nasuŕenena, naga sa mēna ga nini, naña pogos na yaru la aŕure lilivi e lapa, la akilia asuwoia ana aure ika la naña veve taŕena ve moki vaŕisi ea.

⁴⁸ Ana pogos naña lilivi pule ruru po, ana yaru lala aŕurelua pa ura e yomema, ana atapurpurga atotano, amlipere ika lala. Ana ika la naña po, akon apito e kiela karo lala, a ika la ne piowa, ana akuwani pano.

⁴⁹ Pisi na ve sa nene e luas nen pogos nini, naña ŕisi na navisi lala ava alipere yaru lala, awere plan yeririna viowa lala,

⁵⁰ vena akoven la ava e pupia kapi nene, naña yaru lala asuma ga atagi, a asuma ga akar ke maluela ea.”

Pakaiwa na suri marua amio suri vii

⁵¹ Ana Yesu piun tan kiena nalogena lala, pisape “?Amiu amloge kilale ke visena la nene?”

Ana lala apisatamea, asape “Ee, pona mekilia ma yo.”

⁵² Ana naga pisa pan la, pisape “Suri la nene naga sane yaru tai naña sumo, naga pe navianena tai e navisaluaena lala na Visena Wa kiena ne Ntewa, ana siraunia, naga pimi sane kiau nalogena tai e nasuŕenena kiena ne Ntewa. Yaru na sanene naga sane yerkawa tai naña kiena suri wo na yumaena lala moki e mana yuma. Ana silaga naga kilia lalua kiena suri marua naña po ke ga wa, akilia mēna ga lalua kiena suri vii, vena kila kiena yumaena amio la.”

Le Nasaret lala pe sinelan re Yesu poli Mak 6:1-6; Luk 4:16-30

⁵³ Ana pogos naña Yesu pisawal ŕakaiwa la nene ŕisi, naga molue e yo nene,

⁵⁴ ŕasuŕe sina ga pimi kiena. Ana naga suma pian ke yaru lala nae yo nene, loyuma e kiela yuma na leniena, a la sinela kurkurun kiena visena la pano paŕisi. Ana la asuma apisavisa ke pan la, apisape “!Aulai! ?Yaru nene tol nakiliaena na sanene sanape, a naga kila ke kile la nene sanape?”

⁵⁵ Ita tekilia ke yaru nene rui. Naga arimana, yaru na yumaenen ga yuma, naña Yosop, a anena naga naña Maria. A wenla lala yaru la nene, Semes, a Yosop, a Saemon, a Sutas, naga pe wenla la nene.

⁵⁶ A vinena lala, la ga nene naña asike ga amio ita ne. ?Ana yaru nene naga molue pun ita pa ŕar suri la nene pe?”

⁵⁷ Ana sinela karia, pe sinelan re nena naga.

Ana Yesu pisa pan la, pisape “Yaru naña pe navisawalena, yaru taŕena lala akilia avatanon naga, ana yaru na mana mratava lala, amio yaru na kiena yo lala, la ga nene na taŕatete avatanon naga.”

⁵⁸ Ana e yo nene, naga pe kila re kile la moki e poli, vanon naþa pe amlelaga re e naga poli.

14

*Parin Suþe Erot Antiþas pisayu Yesu
Mak 6:14-16; Luk 9:7-9*

¹ E pogos nene, apisayu Yesu pa tol Suþe Erot, naþa naga pe þarin suþe e lepas nae garu Kalele.

² Ana Suþe Erot mloge visena la nene, ana naga pisa pan kiena yerkawa lala, pisape “?Yaru nene naþa apisayu ke ne, pona naga Yoane Nakeena nene, naþa nanagane naga mali sina e marena yo? Vanon suri ne nanene, naga kila naga tol namareraena nakilaena kile la nene.”

*?Yoane Nakeena mare sanape?
Mak 6:17-29*

³⁻⁴ Ana Suþe Erot pisa sanene, vanon naþa naga mēmar Yoane Nakeena mare rui, ana naga marau paþisi. Ana marena kiena ne Yoane Nakeena kana suniena nena sanini: wenla Suþe Erot nene, naga kiena kia Pilip, naþa lalua arimala taaga, ana anela lua. Ana sumo, Pilip nene talopa amio sira tai, kiena kia Lerotias. Ana siraunia, Suþe Erot pa þerelua sira nene. Ana e pogos nene, Yoane pisi pa Suþe Erot, pisape “Suri nene pe mesmesu re nene poli, naþa ko oure sira nene, komin naga pe wona ne womla.” Ana Erotias naga pe kekaran re nena visena kiena ne Yoane poli, ana naga pisi pa Suþe Erot, ana Suþe Erot mligan kiena yeririna la þasia apa atarar Yoane, ana apiari naga, amligan naga pa e yuþa nakoena.

⁵ Ana Suþe Erot sape weþar Yoane, ana naga maraun li þa le Israel lala, vanon naþa amlelaga e Yoane asape naga pe kiela navisawalena tai.

⁶ Ana Lerotias nene, naga narina na lomearu þa tai, ana pogos naþa la akila þaþagena nasitomþalena legiena naþa Suþe Erot paeme ea, lomearu nene naga polu e marana ne la naþa asike lele taaga e þaþagena nene. Ana Suþe Erot kekaran kiena wolena paþisi,

⁷ ana naga pisaar mþarera pan lomearu nene, pisape suri ya naþa naga visa, þisi na naga la vania.

⁸ Ana Lerotias pisi amio narina naþa sira mēe nene, ana sira mēe pa pisalein pa Suþe Erot, pisape “In na sineun nesape okus þarina ne Yoane Nakeena, mēne pialo tai, imi van inu nagane ga ne e nini.”

⁹ Ana visena nene kila Suþe Erot mloge piowa vanon kiena navisalaweena nene, ana naga pisape akila ga ve sa naþa sira mēe nene pisa, vanon naþa naga pisaar mþarera sanene e marana ne kiena erau la þisi rui.

¹⁰ Ana apa e loyuma nakoena nene, atelua kolmekina ne Yoane,

¹¹ ana la amligan þarina mēne pialo tai, akus pimi pa sira mēe naþani, ana sira mēe nene kus pa anena.

¹² Ana siraunia nalogena kiena ne Yoane lala apimi akus tasnena, apa asinia, ana apano apa apisawal pa Yesu.

Suniena kiena ne Yoane Nakeena nane maro e nene.

*Yesu pagan yerþene lala tol manu lima
Mak 6:30-44; Luk 9:10-17; Yoane 6:1-14*

¹³ Ana pogos naþa Yesu mloge sanene, naþa Suþe Erot naga pisayu ke mēna naga, sape naga Yoane Nakeena naþa mali sina petan marena, ana Yesu molue e yo nene, ana þiyu e waa tai, vena va e yo mþano tai naþa pe yaru re e poli. Ana pogos naþa yeririna lala akilia asape naga pa ke e sanene, la mēna ga amolmolue e kiela pulkumali lala, la amial akom ura.

¹⁴ Ana pogos naþa Yesu pa ura, naga pisu naþa þina na yeririna mēke pa ura rui, ana naga sinena mie la paþisi, ana naga kila ruru si kiela yaru namaiena lala apimi apo sina.

¹⁵ Ana pogos naþa mrae pito tano, nalogena lala apimi puna Yesu, apisa apisape “Ei, Suþe, yo nini pe po re nenaga, a lavisi mēna ga yemalo narui. Popon ko oligan þina na yeririna la nene awasuþe ava e pulkumali lala vena auli kala kinanena la þasia.”

¹⁶ Ana Yesu pisatame la, pisape “Toko, akilia asuma ga ve sanene woga ga ne.

Popon amiu awar kinanena laḡasia van la.”

¹⁷ Ana la apisa, apisape “!Ke peraga yo, imimi memlarar narin kilaparavi lima ga teke na, amio narin ika naḡa satin lua ga!”

¹⁸ Ana Yesu pisape “Ala imi van inu,”

¹⁹ ana naga pisi pan yeririna la nene, pisape “Amiu atosano e vilumḡini sumo wa.” Ana naga mla narin kilaparavi lima amio narin satin lua naḡani, kirava pa metava ma e sinapane, pisa potena pa Ntewa vanon kinanena nene, ana kau-roro narin kilaparavi lima naḡani, kian pa kiena nalogena lala vena avion plan va yeririna la nene.

²⁰ Ana la akan pano-o, mḡeḡela kawa paḡisi, ana kinakinas nen kinanena la naḡa pe akan re poli, torokin akon va e karo mavava la naḡa kerkeviu ve lualima taaga pa lua.

²¹ Ana yaru la naḡa akan kinanena nene, la pa sane manu lima, ana pe apulo re sira la poli amio ninis lala.

*Yesu mial yau metava e wos nen sive
Mak 6:45-52; Yoane 6:15-21*

²² Ana Yesu pisa pan kiena nalogena lala, pisape “Inu sineun nesape amiu akus kieta waa, ana asumo akusro pupia lapa nene ava lepas ḡasia navano, ana in na nesuwa nesumḡa neligan plan kone yeririna la awasuḡela avano wa.”

²³ Ana pogos naḡa naga mligan plan yeririna lala apavano ḡisi, ana naga pa metava e kunus tai, naga taaga, vena len. Pogos naḡa yemalolo, Yesu naga ga taaga sike na,

²⁴ ana e pogos nene, waa nene mḡeke perina paḡisi, mḡeke likan lapa naḡani, mḡeke va yotena narui. Ana sive keviu, a la asumḡa akawe lagi paḡisi, a kila sane akus mḡena ga sive naḡa akus sive.

²⁵ Pogos naḡa lavisi yelagi merarava, Yesu pimi pula, naga mial yau ga metava e wos nen sive.

²⁶ Pogos naḡa kiena nalogena lala apisu naga mial yau ke e wos nen sive pimi pula sanene, amarau paḡisi, apisa apisape “!Aulai! ?Suri ya na pimi ke sanene? ? Yermare yo, pona ya ne sanene?”

A la asumḡa ga amlolokai keviu, vanon naḡa la amarau paḡisi,

²⁷ ana Yesu pis pan la vilaga, pisa pisape “!Ei, ve amarau re, in ga nini!”

²⁸ Ana Pita pisatamḡea, pisape “Suḡe, visae ko kemua nene, otamḡan naḡa inu mḡena ga neyal yau metava e wos nen sive, neimḡasu puḡa.”

²⁹ Ana Yesu pisa, pisape “Ko, poga, otomi.”

Ana Pita mligan waa, pito tano, siar mial yau e sive, pa lavisin Yesu,

³⁰ ana pogos naḡa naga sitomḡal si lagi mḡarera nene, naga marau. Naga marau sanene, siar mian pito tano narui, ana naga pio Yesu, pisape “Suḡe, ko otamalia inu.”

³¹ Ana Yesu kian limana pa veraga, tarar Pita, ana pisa pania, pisape “?Vanon ya ne sinemḡa miyuwawa sanene? !Ko pe opiawa re nena kawa e inu poli wa!”

³² Ana pogos naḡa lalua aḡiyu si apa meta e waa, lagi nene mare,

³³ a la naḡa e waa amieluar Yesu, apisa, apisape “Lelaga kemua, ko ope narina ne Ntewa lelaga.”

*Namaiena lala atol ga isinen kulkota
mḡana Yesu*

Mak 6:53-56

³⁴ Ana Yesu lala akusro pupia lapa nene e kiela waa, apa e laḡas ḡasia, ana apa ura e yo tai, kiena kia Kenasaret.

³⁵ Ana pogos naḡa yaru lala nae e yo nene apisu kilale Yesu, amligan visena telivi piora pa e yo punu ga. Ana yaru lala aḡure namaiena lala apimi puna,

³⁶ apiun tan naga vena naga tamḡan namaiena lala atol ga mḡana isinen kulkota. Ana la naḡa atol ga sanene, kiela maiena la kokovio nenaga, apimi apowo sina.

15

*Nalogena lala kiena ne Yesu pe ataveve
re ḡelaga marua kiena ne le Yu la poli*

Mak 7:1-13

¹ Ana e pogos nene, Varasi la ḡasia amio navianena navisaluaena laḡasia amolue garu Yerusalem, apimi apisu Yesu.

² Apiun tan naga, apisa apisape “? Vanon ya ne kioḡa nalogena lala pe

ataveve ruru re kieta þelaga marua na lotuen nanua sumo poli, naþa kieta nasumonena lala apian ita, sa naþa la asumña apisa, apisape visae yaru tai sinenan sape kinana, naga monar taveve ruru þelaga mesmesu lala na kevanen limana sumo wa, ana þisi na naga kilia kinana?"

³ Ana Yesu pisatamñe la, pisape "¿ Ana amiu mñena ga, vanon ya ne amiu amñareran naþa ataveve kiamiu þelaga marua lala, ana e kiamiu þelaga marua la nene, amiu asumña akilaro ke navisalu-aena kiena ne Ntewa?"

⁴ Ana Ntewa pisa rui, pisape 'Ovatano e arimomña amio anomña,' a naga pisa mñena ga, pisape 'Yaru naþa pisi piowa pan arimana pona anena, awemñar naga mare.'

⁵ Ana nanagane, pogos naþa yaru tai visaar visave kiena suri lala ve suri wa, þisi na la va Ntewa pogos tai, ana naga pisa sanene ana siraunia naga pe pisuar ruru re kiena yermarua la luwoka poli, pona ve iila re si la luoka e suri la nene,

⁶ ana amiu asumña ga apisa ke asape sanene na poga ga ne, pe pe sur re tai nene poli. A e þelaga nene, amiu asumña ga akila ke navisalu-aena kiena ne Ntewa pimi pe suri korena ga tai ne, vanon naþa amiu sinemiun asape auarar ga kiamiu þelaga marua lala.

⁷ !Ana amiu na apisokani ke nene, amiu apisi korena ga ne! Navisawalena Aisea naga pisayu amiu sumo rui, naþa naga pisawal visena nene naþa Ntewa pisa, naþa pisa pisape

⁸ *'Yaru la nene apatanon inu e ga e kiela visena lala, ana kiela sitomena lala asike perinan inu wa.*

⁹ *Akila ke lotuena pan inu, ana pe suri korena ga, vanon pogos naþa akilapian yeririna lala, apisa ke asape visena nene naga pe visena kiena ne Ntewa nene, ana visena la nene pe kiela ga la ga yeririna lala.'* " Ais 29:13

*Suri la naþa kila yaru namname e marana Ntewa
Mak 7:14-23*

¹⁰ Ana Yesu pio viraviran yeririna lala vena aimi puna, ana naga pisa pan la, pisa pisape "Amiu ayagogo ruruia, amiu monar alogekilale kiau visena nene.

¹¹ Pe kinanena re naþa pa e logon yaru poli naþa kilia kila naga namname e marana ne Ntewa, ana visena lala naþa molue e logona yaru, suri ne nanene naga kilia kila naga namname."

¹² Ana siraunia, kiena nalogena lala apimi, apisa pania, apisape "¿Ei, ko okilia mña naþa Varasi lala sinela mimi paþisi vanon kiomña visena la naþa osuñña opisa ke ne?"

¹³⁻¹⁴ Ana Yesu pisatamñe la, pisape "Amiu na ve asitom re yaru la nene. Ya naþa la asumña akila ke ne, naga pe yuññaena kiena ne re Ntewa nene poli, a yoko kau Ata nae ma e peni, þisi na naga wereplan make suri la naþa naga pe mapila re poli. ¿Yeririna la nene na ape kilamara þala ga, ana sinelan asape asumoni yeririna lala, ana sanape narui, yaru tai naþa pe kilamara þala kilia sumon yaru taþena naþa pe kilamara þala lalua ayal? !Þisi na lalua akilia aloru veraga atotano e þiliþili tai ne!"

¹⁵ Ana Pita piun tan Yesu, pisape "Suþe, sineun nesape ovisawal ke ne kinas nen þakaiwa nene sumo wa, naþa opisa þesan ga na wa."

¹⁶ Ana Yesu pisa pisape, "¿Sanape ne, pona þarimiu mñena ga merorol ke yo wa?"

¹⁷ Pona amiu akilia mña ve tokak ga yo, naþa suri ya naþa vito kome logona yaru, pito tano vitove kome mñena narui, ana kilia pa vanua si kome tasnena,

¹⁸ ana suri ya naþa molue e logona yaru, naga molue e losinena sumo, a suri ne nanene, naga kilia kila yaru namname.

¹⁹ Naga nene na vanon naþa nasitomiena viowa lala amomolue e los nen yaru, sa naþa nawemomñaren yaru, nataþaen kolau, nakilaena lau, navin-aena, navisokanena, a nasisienena visena.

²⁰ Nanene þelaga la naþa akilia akila yaru namname e marana ne Ntewa. A þelaga nene naþa yaru kinana ana pe

ke re limana sumo poli, suri nene naga tařatete kila yaru namname sanene.”

Yesu pilelua yermare e sira mēe tai
Mak 7:24-30

²¹ Ana Yesu molue e yo nene, naga pito e lepas nařa pulkumali lua asike ea, nařa Taea amio Saeton.

²² Ana sira tai nae lepas nařa Kenan, naga pe wolawa ga, sike e lepas nene, ana naga pimi puna ne Yesu, pio naga, pisape “Suře, ko ope Navisaarena nařa ko omolue e lus kiena ne Tepet, neviun tan ko vena sinema ye inu. Kiau lomēaru, yermare tai sike e naga, nařa sumā kila kare naga silaga.”

²³ Ana Yesu mloge visena nene, ana pe pisa re nena suri tai pa sira nene poli.

Siraunia, nalogena lala apimi, apisa pa Yesu, apisape “Sira nene sumā taveve ita ke sanene na, naga sumā pio manene liu wa. Popon oligan lua naga vano.”

²⁴ Ana pe Yesu pisatame la re poli, ana naga pisi pa sira nene narui, pisa pania, pisape “Ntewa mligan inu nepimi vena neva ga puna ne le Israel lala, la nařa sane sipsip la nařa akila pal mrapa.”

²⁵ Ana sira nařani pimi, kinai tano e lana ne Yesu, pisape “Awis, Suře, nepiun tan ko, nesape oiila inu.”

²⁶ Ana Yesu pisatamea, pisa pisape “Ana pe mesmesu re nařa nelalua kinanena kana ne nisisi lala, vena nela va lokul poli.” Naga pisi sanene vanon nařa naga kilia mā sape e pogos nene, le Yu tařena lala, nařa la asitom asape la ga ape narina ne Ntewa, asumā apisayu kare yaru la nařa pe ape le Yu re poli, apisape la ape lokul ga la ne.

²⁷ Ana sira nene pisi, pisa pisape “Ko opisa pe lelaga, Suře, ana lokul lala akilia akan mēna kororos nen kinanena nařa amloloru vatano e lelen kinanena kana ne taena ne lokul lala.”

²⁸ Ana Yesu pisatame ruru naga narui, pisa pisape “Sira, ko opiawa ruru ke mārera e inu pařisi. Pisi na ko ovisu ga nanagane imi van ko ve sa nařa ko omlelaga ea.” Ana e ke e pogos nene narui, sira mēe kiena ne sira nene pimi po sina.

Yesu kila ruru namaien la moki
Mak 7:31-37

²⁹ Siraunia, Yesu molue ke sina ga e yo nene, řasuře si pa lepas nařa Kalele. Naga sumā mial pano, ana pa kom ga lavisin pupia lapa na lepas nene, ana pa totano metava e kunuř tai.

³⁰ Tomā sane, ana řegas nen yeririna lala apimi puna, amio laulu lala, amio latakin lala, amio kilamara řala lala, amio kiligapoře lala, amio mēna namaiena tařena mēna ga lařasia. Ana ařar la nene apimi, amligan la asike ga lavisin Yesu, ana Yesu kila ruru la apo ke sina ga.

³¹ Ana yeririna lala sinela kurkuru pařisi, pogos nařa apisu puru lala apisi, latakin lala apimi apo, laulu lala amial po, a kilamara kata lala akirava, ana la amieluar Ntewa kiena ne le Israel lala pařisi vanonia.

Yesu pagan yermene lala tol manu vari
[4000], amio mēna ga sira lala a nin sisi
lala

Mak 8:1-10

³² Ana Yesu pio kiena nalogena lala apimi puna, ana naga pisa pisape “Inu sineu mie řina na yeririna la nene pařisi wa, komin nařa asike amio ita legiena telu narui, ana pe kala kinanena re si poli. A inu tařatete neligan la ava si unā nařa pe kala kinanena re sanene poli, vanon nařa visae nekila sanene, pona e mrapa komsusa ana yaru lařasia viso kar la vano-o marala malko yo.”

³³ Ana nalogena kiena ne Yesu lala apisa pania, apisape “?Ana řisi na ita towar kala kinanena pe ne? Ana komin yo nini na yo korena ga nini, a la moki manene la wa.”

³⁴ Ana Yesu piun tan la, pisape “?Ana amiu kamiu kilaparavi via na sike na?”

Ana la apisa, pisape “Olua ga, amio narin ika nařa satin lařasia.”

³⁵ Ana Yesu pisa pa řina na yeririna la nařani, pisape “Atotano e nene sumo wa.”

³⁶ Ana naga řar kilaparavi la olua nařani, amio narin ika nařa satin la nene, ana naga pisa potena pan Ntewa vanonia, ana siraunia ana kawewowala, ana kian

pa kiena nalogena lala, ana la lein aþar apiovion pa yeririna lala.

³⁷ Ana la punu ga akan pano-o mēþela kawa ruru po paþisi. Ana siraunia, akon kinakinas nen kinanena la nene naþa sike na, pa e karo popos olua, ana puleule paþisi.

³⁸ Ana yermēne la naþa akania, tol manu vari, ana pe apulo re sira lala amio ninis la poli.

³⁹ Ana Yesu mligan þina na yeririna la nene aþasuþe apa si umā, ana naga pa si e kiela waa, ana mligan yo nene, pimi suli ga plas ga e lepas naþa kumali keviu naþa Makatan mēke ea.

16

*Yer kawa la þasia asape avisu kile tai
Mak 8:11-13; Luk 12:54-56*

¹ Ana pogos tai Varasi la þasia amio Satusi la þasia apimi puna Yesu, naþa sinelan asape akilali naga, ana apisa, apisape “Imimi sinemiminia mesape ko okilali pupia kile tai van imimi, naþa ko okila e puriukawa nae ma e peni.”

² Ana Yesu pisatamē la, pisape “Pogos naþa mrae pito ke tano, ana visae amiu avisu naþa yo vivaga e lepas naþa mrae pito ke tano ea, amiu akilia avisa avisave ‘Pisi na yepisun peni,’

³ a pogos naþa mrae pa þarpo yo, a visae amiu avisu sinapane tano vivaga a lul la malolo mēna ga metavania, amiu akilia avisave ‘Pisi na yua kove þane.’ ?Nane amiu asumā apisu kilale ke kile la nene e sinapane þisi narui, naþa þisi na pog ve sanape pona ve sanape, ana sanape naþa amiu pe apisu kilale re kiau kile lala na pog keviu nini naþa nesike nemio amiu poli?”

⁴ Ana Yesu pisa mēna pan la, pisape “Yaru la naþa sinelan ga avisu kile lala, la ape li viowa la paþisi, la akila wowe pa Ntewa, la apilon māsila pania, sane la naþa akila lau, aþure matan wola lala. Peraga, þisi na taþatete amiu avisu kile tai narui, ana yoko amiu avisu ga naþa mālivi e inu ve sa ke ga kile naþa pa

Navisawalena Sona nanua sumo, naþa Ntewa kila naga mali sina.” Ana Yesu purmatan la, naga mligan la asikena.

“Amiu avisuar e is kiena ne Varasi lala amio Satusi lala”

Mak 8:14-21

⁵ Ana pogos naþa Yesu amio kiena nalogena lala amligan e nene, ana aþaro e pupia lapa naþa apa e lepas þasa, ana nalogena lala sinela þesania naþa pe aþar re si kala kilaparavi laþas poli. Ana pogos naþa atol lepas þasa,

⁶ ana Yesu mla visena tai pan la, pisape “Amiu na monar avisuar ruru amiu, e is kiena ne Varasi lala amio Satusi lala.”

⁷ Ana la amloge visena nene, ana la apisayulein pan la, apisape “?Pona naga pisi sanene vanon naþa pe toþar re kilaparavi laþas pimi poli yo?”

⁸⁻⁹ Ana Yesu kilia mā kiela sitomena nene narui, pisape “?Pe na ya naþa amiu asitom manene ke mēþemiu la sanene, naþa apisape yoko takan ya ne? ?Sanape naþa amiu pe amloge kilale re suri la nene poli wa? !Kiamiu lelagaena ve tokaki paþisi wa! ?Pona amiu sinemiu þesan mēna ga kilaparavi la lima nene yo, naþa inu nemla pa yeririna lala tol manu lima nene, amio mēna karo la naþa amiu akon puleule?”

¹⁰ ?Pona amiu sinemiu þesan mēna ga kilaparavi la olua nene, naþa inu nemla pa yeririna lala tol manu vari nene yo, a karo via naþa amiu akon sirau?

¹¹ ?Sanape naþa amiu pe amloge kilale re naþa pe nepisi re pan amiu vanon kilaparavi poli? Inu nevisa ke sina ga van amiu, nesape amiu na monar avisuar ruru amiu e is kiena ne Varasi lala amio Satusi lala.”

¹² Ana e pogos nene, la akilia mā naþa naga pe pisayu re is nakilaen kilaparavi pan la poli, ana naga pisa ke visena navisokanena la naþa Varasi lala amio Satusi lala akilia avian la ea, naþa kilia kila þarin yaru lapa imi ve keviu, ana kilia kila kare make kiena malena, sa naþa is na miyumāen ke e kilaparavi.

Pita pisawal sape Yesu naga pe Navisaarena kemua lelaga

Mak 8:27-30; Luk 9:18-21

13 Ana Yesu lala apito garo e lepas naña pulkumali keviu nene Sisaria Piliþae ñeke ea, ana e pogos nene naga piun tan kiena nalogena lala, pisape “?Amiu asuñña amloge ñña naña yeririna lala asuñña ga apisavisa ke Narina ne Yeririna, apisape naga ai?”

14 Ana lala apisa, apisape “La þasia apisa apisape ko Yoane Nakeena ke sina ga, a la þasia apisape ko Elaisa, a la þasia apisape ko Seremñaea, pona navisawalena taþena tai na nanua sumo.”

15 Ana naga piun tan la, pisape “?Ana amiu, amiu na asape inu na ai?”

16 Ana Saemon Pita pisatañea, pisape “Ko, ko na Navisaarena, ko ope Narina ne Ntewa Mali.”

17 Ana Yesu pisatañe pania, pisape “Saemon, narina ne Yoane, navisa ruruena imi van ko. Suri naña ko opisa ne, pe yaru re na pian ko e poli, ana Ata ga nae ma e peni naga pian ko ea.

18 A ko nene ko kioñña kia taþena naña Pita, naga kana kinasia sanini, sane ‘kilavaru,’ ana lelaga paþisi, sa naña nanagane, in na nepisu ko na sane ko ope varsu tai, ana þisi na in na nevisirlua þegas nen kiau li nalotena lala e kilatapili na sanene narui, a puriukawa na marena taþatete kilia taulu þegas nene.

19 Pisi na in na nela kii lala navietavanena amio nakotaween nasuþenena kiena ne Ntewa van ko, a suri ya naña ko ovisaluþar e yomarava nini, ana Ntewa nae ma e peni naga ñña ga visaluþaria amio ko, a suri ya naña ko otañña e yomarava nini, ana Ntewa nae ma e peni naga ñña ga tañña amio ko.”

20 Ana Yesu pisa ññara pa kiena nalogena lala, pisape “Amiu na ve ava avisawal re van yeririna la avisave in na nepe Navisaarena.”

Yesu pisawal kiena marena

Mak 8:31-33; Luk 9:22

21 Ana siar e pogos nene, Yesu kilali naña kila merarava va nalogena lala, sape naga monar va ma Yerusalem, ana e yo nene, þisi na suþe kiena ne le Israel lala, akila kare manene naga vaþisi, amio þarin yaru wa lala, amio ñña ga navianena navisaluaena lala, la make narui þisi na akila kare naga vaþisi. Yesu pisa ñña ga pisape þisi na la nene aweñar naga mare, ana kana legiena na telu þisi, Ata Ntewa kila naga suññalu mali sina.

22 Ana pogos naña Pita mloge visena nene, piolua Yesu pano, pisi ññara pania, pisape visaluþaria, pisape “Yesu, Ntewa monar visaluþar suri nene. Suri la nene taþatete kilia imi ve lelaga e ko ve sa nene.”

23 Ana Yesu pilopuia, pisi ññara pa Pita, pisape “!Yermare Lego, oure vetan inu! Ko osuñña okilali inu ke sina ga e kioñña sitomena nene naña pe sitomena kiena yaru ga, pe sitomena kiena ne Ntewa re nena ga.”

Nalogena kiena ne Yesu monar sitom korenan ga kiena nasinenanena lala

Mak 8:34-9:1; Luk 9:22-27

24 Ana Yesu pisa pa kiena nalogena lala, pisape “Yaru naña sinenan sape siraun inu, monar sitom korenan ga kiena nasinenanena lala, ana monar kus kiena laki torovia, ana taveve inu.

25 Yaru naña sinenan sape visuar ruru kiena malena, naga þisi na kilaluia, ana yaru naña naga kilalu kiena malena vanon inu, naga þisi na kilia tol malena lelaga.

26 Ana visae yaru tai naga tol make suri na yomarava la punu ga, ana kilalu mrapa na malena, naga pe taulu re nena suri wo napo lelaga tai poli, ana siraunia, taþatete kiena suri wo la nene aulimaran si kiena malena.

27 Ana lavisi ke Narina ne Yeririna wasuþe ke sina ga imi narui amio navisi lala, naga imi amio naurarena kiena ne Arimana, ana naga ul yaru lala mesmesun kiela nayuññaen lala.

²⁸ Inu nevisa suri na lelaga nene van amiu, nesape yaru la p̄asia asum̄alu asike e nini, naḡa p̄isi na taḡatete amare asum̄a ga vano-o avisu Narina ne Yeririna war-poyo amio kiena nasuḡenena, vena vim ve suḡen yeririna la punu ga.”

17

Yepena ne Yesu pilonia pimi pe taḡena

Mak 9:2-10; Luk 9:28-36

¹ Siraun e pogos nene, legiena orai p̄arovia, ana Yesu p̄ere Pita, a Semes, a wenla naḡa Yoane, ana la ga vari nene apa metava e ravie tai.

² Asum̄a sanene, ana nalogena la telu nene apisu naḡa yepena ne Yesu pimi ke pe taḡena, a marana pilavila manene sa naḡa mrae, a m̄ana kulkota lala apimi amiyuwowo pano-o amiyuwowo po paḡisi.

³ Ana la telu nene apisu m̄ena ga Mosis amio Elaisa, lalua aḡaliv, ana lalua asum̄a ga asun ke amio Yesu.

⁴ Ana Pita pisa pa Yesu, pisape “Suḡe, popon tanea ita tesum̄a ga e yo nini. Visae ko sinom̄ania, ana neyum̄aen silparpara ve telu e nini, mom̄a tai, m̄ana ne Mosis tai, a m̄ana ne Elaisa tai.”

⁵ Ana pogos naḡa Pita sum̄a pisi ke ga wa, ana lul tai naḡa pilavila paḡisi pitomi kalo la, ana amloge visena tai molue e lul nene, pisa pisape “Nene na naruu nene, naḡa in na nesitom naga paḡisi. Kiau sitomena sike ga e naga, a nekekarana naga paḡisi. Amiu na monar alogear ruru naga.”

⁶ Nalogena lala amloge visena nene, ana amarau na amarau, ana amloru e porotano, aḡariwani marala lala.

⁷ Ana Yesu pimi pulu, mlipalipa la telu nene, ana pisa pan la, pisape “Amiu asum̄alu, ve amarau re.”

⁸ Ana pogos naḡa la aḡar plan si p̄arila pa metava, apisu re si lalua nene poli, ana la apisu ga Yesu naga taaga sike na.

⁹ Ana lala amolue e ravie nene, aḡasuḡe la ke sina apitomi tano, ana Yesu pisaar m̄arera pan la, pialuḡar la, pisape “Suri naḡa Ntewa kila amiu apisu ne, p̄isi na

amiu ve avisawal re va yaru la nanagane, vano-o tol naḡa Narina ne Yeririna mali sina ga e marena, e pogos nene narui amiu akilia avisawal va yeririna lala.”

La apisayu Elaisa

Mak 9:11-13

¹⁰ Ana nalogena la telu nene apiun tan Yesu, apisape “?Sanapen naḡa navianena na navisaluaena lala asum̄a ga apisa ke, apisape ‘Monar Elaisa naga wasuḡe ke sina ga imi sumo wa, siraunia na Navisaarena nene kilia imi m̄alivi?’”

¹¹ Ana Yesu pisatam̄e la, pisape “Naḡa la apisa sanene, naga lelaga kemua, komin Navisawalena Malakaea naga pisa sanene rui e kiena tusi. Elaisa naga monar imi sumo vena kila ruru make suri punu ga, p̄isi na Navisaarena naga kilia imi sirau,

¹² ana in na nevisa van amiu sanini, Elaisa nene pimi p̄isi rui, ana pe yaru lala apisu kilale re asape naga poli, ana pe asitom re naga poli. Ana e ke e p̄elaga nene, p̄isi na akila ke m̄ena ga viowa va Narina ne Yeririna.”

¹³ Ana e pogos ke nanene, nalogena la telu nene akilia ga na wa, naḡa Elaisa naḡa Yesu pisayu ke ne, nane Yoane Nakeena nene.

Yesu pilelua yermare e yaru m̄ee tai

Mak 9:14-29; Luk 9:37-42

¹⁴ Ana Yesu amio la telu nene aḡasuḡela, ana apito asikolila amio p̄ina la naḡa asike e pogos nene, ana yaru tai pimi kinai tano e lana ne Yesu, ana pisa pisape

¹⁵ “Suḡe, inu sineun nesape ko sinem̄a ye kiau yaru m̄ee nini, oiila naga, komin naḡa maiena tai teke e naga. Maiena nene kila naga marmarlusia yam moki paḡisi, ana kila kare manene la naga wa, sum̄a kila ke naga mlorvavae m̄a pano, mloru pa e kapi pona e m̄ena ga e wii lala.

¹⁶ Inu nepureli naga pimi puna ne kiom̄a nalogena lala, ana amiyum̄aen pano-o, peraga, ana akila ruru p̄ele naga.”

¹⁷ Ana Yesu pisi pa kiena nalogena lala, pisape “?Amiu la nene, sanape na sanene? Amiu na pe apiawa re nenaga e Ntewa poli, silaga amiu asum̄a ga apa

ape wowe yo. ?Monar nesuṃa si nemio amiu vano tol pogwai? Inu sineu maren amiu paṃisi rui. Ana poga ga, aure yaru ṃee nene imi pun inu.”

¹⁸ Ana la aṃpure yaru ṃee nene pimi, ana Yesu pisaar pan yermare naṃa sike e naga, pisape “!Omolue e naga nanagane ga ne!,” ana verakorena yaru ṃee nene pimi po sina.

¹⁹ Ana siraun e pogos nene, pog naṃa Yesu suṃa naga taaga, nalogena lala apimi puna, apiun tania apisape “? Sanape na imimi mepilelua ṃele yermare naṃa sike e yaru ṃee nene?”

²⁰ Ana Yesu pisa pan la, pisape “Nanene na vanon naṃa amiu pe apiawa ruru re ṃarera e inu poli wa. Lelaga nevisa van amiu, visae aviawa e inu ve tokak ga ve sa ga narin kurus nen mras nen purpa, ana visae kiamiu naviawaena ne ve lelaga kemua napo, ana ṃisi na amiu akilia avisa va tavie na ṃeke ne, avisave ‘Ko oure,’ ana ṃisi na naga monar ure. Pisi na pe suri re tai naṃa amiu akilia akila ṃele poli.

²¹ Ana naṃa namēneplanen yermare la ne sanene, ana kana mrapa ne sanini: yaru na monar len, ana monar monsilu ga ve kinan re. E ga e ṃelaga nene, ṃisi na naga kilia ṃene plan yermare kar la ne sanene.”

Yesu pisawal ke sina ga kiena marena Mak 9:30-32; Luk 9:43-45

²² Ana pogos tai naṃa Yesu amio kiena nalogena lala apimi lele taaga garu Kalele, Yesu pisa pan la, pisape “Lavisi ke naṃa aligan Narina ne Yeririna va e limana yaru la narui,

²³ naṃa ṃisi na awem̃ar naga mare, ana siraunia, e kana legiena na telu, ṃisi na Ntewa kila naga mali ke sina ga.” Ana pogos naṃa Yesu pisa visena nene, kiena nalogena lala amloge piowa vanon paṃisi.

Kilavaru na takis na Yum̃a Wa Mana Ntewa garu Yerusalem

²⁴ Pogos naṃa Yesu amio kiena nalogena lala apimi atol Kapeneam, yaru lala na warpoloen takis na Yum̃a Wa Mana

Ntewa, apimi puna ne Pita, apiunia apisape “?Sanape, kiom̃a navianena ṃena ga pul ṃa takis ne, pona peraga?”

²⁵ Ana Pita pisataṃea, pisape “Naga pul ṃaga.”

Ana Pita ṃasuṃe si pa e yum̃a naṃa Yesu sike ea, a naga pe pis re poli wa, ana Yesu naga pisṃesia, piunia pisape “Saemon, ko ositomveveli ṃarin suṃe na yomarava la nene. ?Li pe la ne apul ke takis nene pan la? ?Yaru na ṃala mratava ga lala, pona yaru taṃena lala?”

²⁶ Ana Pita pisa, pisape “Yaru taṃena ga lala, la monar aulia.”

Ana Yesu pisa, pisape “Ee, sanene narui, ana kana kinasia sanini, mratava kiena ne ṃarin suṃe lala, la taṃatete aulia. Ana in ke nena naṃa nepe mratava kiena ne Suṃe Keviu na Yum̃a Wa naṃa narui, ana vanon suri ne nanene, in na pe pon re neul takis naṃa la apiun ke tan ko poli.

²⁷ Ana popon italu na ve tekila kare re yaru lala na warpoloen takis, italu ṃena ga monar toul ga. Ko, oto garo e lapa, oto om̃ate ika, a ika naṃa om̃ate ṃesania, ṃisi na ko olual kilavaru tai e logona, naṃa torokin italu toul kieta takis ea, ana olavia ola ova oulia.”

18

“?Yaru ai naṃa naga to laa metavan yaru taṃena lala?”

Mak 9:33-37; Luk 9:46-48

¹ Ana e pogos ke nene, nalogena taṃena lala apimi am̃alivi, apimi nena puna Yesu, apiun tania, asape “Imimi sinemimin meviun mesape: ?Yaru ai naṃa naga to laa metavan yaru taṃena lala e loyumũa na nasuṃenena kiena ne Ntewa?”

² Ana Yesu pio sisi tai naṃa suṃa ga pimi puna, ana mligan sisi naṃani suṃalu su likan la,

³ ana naga pisa pan la, pisape “In na nevisa van amiu, visae amiu ve avilopu amiu re naṃa kiamiu ṃelaga la aimi ve sa ṃelaga kiena ne nisisi nene, ṃisi na amiu taṃatete kemua aimi loyumũa e nasuṃenena kiena ne Ntewa pogos tai.

⁴ Ana yaru naþa kila kiena sitomena su ga tano ve sa nisisi nini, yaru nene naga yoko kilia imi to laa metava, taulu yaru taþena lala e nasuþenena kiena ne Ntewa.

⁵ Yaru naþa kiena sitomena pito tano e inu, ana naga kekaran naþa naga kila wo va nisisi kokan tai ne sanene, yaru nene naga sa ga naþa naga kekaran inu ke ga narui.”

Nataþaliena lala

Mak 9:42-48; Luk 17:1-2

⁶ Ana Yesu pisa mēna ga, pisape “Ana visae yaru tai kila nisisi tai ne sanene ligana inu, ve viawa re si mārera e inu, ana þisi na yaru nene kus nakoena tai naþa mārera manene la. Visae amātear pupia kilavaru tai mēne kolmekina, ana akuwani naga talilu vitove e lowe memaena, nanene naga nakoena tai ne meme ga ne, ana yaru nene naga yoko war va re la na wa taulu nanene.

⁷ !Aulai! Yomarava nini piowa manene la narui, naþa pulen manene la suri la naþa silaga asumā akilali ke yaru lala vena kila la akilalu kiela naviawaena e inu. Nataþaliena la nene þisi na asumā likan amiu silaga, ana þisi na viowa manene la va yaru la naþa aþar nataþaliena viowa la nene pimi e yaru taþena lala.

⁸⁻⁹ “Visae lumomā tai, pona lamā tai, pona kilamaramā tai, pona suri ya sina naþa e kiomā malena, visae suri la nene tai kila ko ve oviawa re si mārera e inu, popon otelua suri nene vetan ko, okuwan vano. Visae otelua þelaga na mlamulena viowa vetan kiomā malena ve sanene, þisi na ko okilia ova loyomā e malena, a visae ko ova loyomā e malena naþa lumomā, pona lamā, pona kilamaramā, pona suri ya sina e kiomā malena, visae suri la nene tai kovio þisi rui, ana nanene na poga ga nene. Ana piowa manene la naþa visae tasemā la punu ga amio kiomā þelaga viowa lala asumā woga ga e ko, ana siraunia akoven ko e kapi naþa taþatete mēwo pogos tai e yo naloge viowaena.”

Pakaiwa na sipsip naþa kilalu mrapa

Luk 15:3-7

¹⁰ Ana Yesu pisa mēna ga, pisape “Amiu na monar avisuar ruruia vena amiu ve asitom korenan re naruu la tai nene pogos tai. Visae peraga, amaramē amiu, vanon naþa naruu la nene, la kiela navisi lala nae ma e peni naþa la asumā apisuar la mēga, a navisi la nene silaga asike e marana ne Ata nae ma e peni.

¹¹ Ana yumāena kiena ne Narina ne Yeririna naga sanini: naþa naga pimin pisape tamalia la naþa akilalu mrapa.

¹² “Amiu ayagogon ruru li suniena nini: Yaru tai naþa naga kiena sipsip lala tol ponotia taaga, ana lala tai kila þarina, pa la perina, ana kila pal mrapa, pa kovio. ? Þisi na yaru nene kila sanape narui? Naga monar ligana kiena sipsip la lualima ovari pa ovari nene, asumā ga akinana ke e yo na vilumīni, ana naga monar vano vena kaleli sipsip nene naþa kilalu mrapa.

¹³ Lelaga nevisa van amiu, pogos naþa naga māl si sipsip nene, ana naga kilia kekaran va þisi, taulu naþa naga kekaran kiena sipsip taþena la moki naþa asu ruru asumā ga, pe amial re naþa apa akovio poli.

¹⁴ “Ana Arimamiu nae ma e peni, naga mēna ga sa ke ga, naþa naga yepen mavin narina tai nene yepe vetan mrapa vena vano va kovio.”

Visae womla tai naþa kila viowa van ko

Luk 17:3

¹⁵ Ana Yesu pisa mēna ga, pisape “Visae womla tai naga kila viowa van ko pogos tai, monar ko ova ovisu naga naþa amiu ga lua nene asikena, ana ko monar ovisawal kiena naviowaena vania. Visae naga kekaran logeen kiomā visena, nanene naga sa naþa kiomā visena kila amiu luwoka ape mara wo si þisi narui.

¹⁶ Ana visae naga yepen mavin yagogonen kiomā visena, ana monar ko ovano oure si yaru taþena la ve lua pona ve telu aimi amio ko, vena aiila ko e kiomā visena, sa naþa Tusi Wa pisa pisape “Visena la punu ga, monar yaru naiilaena

visena, yaru ve lua pona ve telu, vena kila visena nene kilia sumʻalu.'

¹⁷ Ana visae womla nene yepen mavin ke yagogon rurukoena wa, ana ko monar ovisawal kiena p̄arkawa nene va p̄egas nen li nalelagaena lala, vena la p̄asia akilia aimi avisuli re m̄ena ga naga. A visae naga m̄arera ke ga wa, ve yagogon re m̄ena ga nalelagaena lala, amiu monar avisu naga sa naṗa naga pe wolawa ga tai, pona naga sa ga yaru na warpoloen takis, naṗa yaru lala pe ape erau ruru re nenaga amio la poli."

Leniena naṗa yaru la mras ve lua la ga aviranar la ea

¹⁸ Ana Yesu pisa m̄ena ga, pisape "Lelaga, inu nevisa van amiu, ana suri ya naṗa amiu avisaluṗaria e yomarava nini, ana Ntewa nae ma e peni naga m̄ena ga visaluṗaria amio amiu, a suri ya naṗa amiu ataṗania e yomarava nini, ana Ntewa nae ma e peni naga m̄ena ga taṗania amio amiu.

¹⁹ "A naga sina, nevisa m̄ena ga van amiu, visae amiu yaru la ve lua naṗa la lua aviranarlan suri tai e yomarava nini, ana visae lalua alenwoia, ana kau Ata nae ma e peni p̄isi na naga kila suri nene van lalua.

²⁰ Vanon naṗa visae yaru ve lua pona ve telu aimi lele taaga e kiau kia, ana inu m̄ena nesike likan la."

Pakaiwa na p̄elaga na viewoena

Luk 17:3-4

²¹ Ana Pita pimi puna Yesu, piun tania, pisape "ʻSuṗe, visae kiau wolai kila ke pe mesmesu re pan inu silaga poli, inu monar neviewo naga yam ve via? ʻMonar va tol yam ve olua pona sanape?ʻ"

²² Ana Yesu pisatam̄ea, pisape "Peraga, p̄isi na ko ve oviewo re ga naga yam ve olua ga, ko monar oviewo naga yam ve lualima yam ve olua, ko oviewo m̄a naga sanene vano tol sina ga kana yam ve olua [70 x 7].

²³ Pelaga naviewoena loyumūa e nasuṗenen kiena ne Ntewa, monar ve sanene narui. Amiu ayagogo e suniena tai naṗa pisayu p̄elaga naviewoena, naṗa

pisa sanini, pisape: Parin suṗe tai, naṗa naga sinenan sape visuveveli lapui la naṗa kiena yaru na yumūaena lala akila pania.

²⁴ Ana naga kila m̄a sanene pano-o, ana aṗure kiena yaru nayumūaena tai pimi puna, naṗa yaru nene naga kila lapui na kilavaru na tenario via puna ne kiena yerkawa nene.

²⁵ Pogos naṗa apiun kilavaru tan yaru nene, naga pisape naga taṗatete si ulmaran lapui nene. Ana yerkawa nene pisa pa kiena yeririna lala, pisape 'Poga, akilalua naga a auliulinlua naga ve kiena ne yerkawa taṗena, vena yumūa korena ga vania. Ana auliulin m̄ena ga wona, amio narina lala, a amio make kiela suri lala, a awar kana kilavaru imi vena auli kiena lapui nene komṗasia ea.'

²⁶ "Ana yaru nene mloru e lana ne p̄arin suṗe nene, tagi m̄arera pania, pisape 'Ko ope yerkawa, awis, inu sineun nesape neviun tan ko vena ko ola re narin pogos tai van inu sumo wa, vena inu nekilali neul maranli lapui nene van ko.'

²⁷ Ana yerkawa nene sinena miye yaru nene, naga piewo make lapui nene pania, vena ve ul marana re sina, ana taṗan yaru naṗani molue ga sa ga ne.

²⁸ "Ana pogos naṗa yaru nene pano, naga pisu kiena erau tai, naṗa kiena erau nene kiena lapui tai teke e yaru nene. Ana kiena lapui ne ve tokaki ga, ana yaru nene pano p̄uarar kolmekina, pisa pania, pisape 'Ko monar oul lua kioṗa lapui nene vetan inu nanagane ga ne.'

²⁹ "Ana kiena erau nene pimi mloru e lana, tagi manene pania, pisape 'Mara, ko ope kiau erau, awis, sineun nesape neviun tan ko vena ko ola re narin pogos tai van inu sumo wa, vena inu nekilali neul maranli lapui nene van ko.'

³⁰ Ana yaru nene yepena mavin viewoen kiena erau nene, p̄isi na naga pa kila la amligan naga pa e yumūa nakoena, vena sum̄a vano-o ul plan kiena lapui nene, p̄isi na naga kilia molue sina.

³¹ "Ana pogos naṗa yaru taṗena la naṗa kiena ne p̄arin suṗe nene apisu p̄elaga

nene, amloge piowa pañisi, ana apa puna ne kiela ãarin suþe, apisawal suri la nene pania.

³² Ana ãarin suþe nene pio kiena yaru nene vena vim si puna, ana sinena karia, pis m̃arera pania, pisape ‘!Aa, ko na ope yaru ãilþil ya na sanene! Inu nepiewo ko e kiom̃a pupia lapui nene rui, vanon naþa otagin manene pan inu, ana okila sineu miye ko.

³³ ?Vanon ya ne ko taþatete m̃ena ga sinem̃a ye kiom̃a erau sa naþa inu sineu miye ko sumo rui?’

³⁴ Ana ãarin suþe nene sinena mimi pa la narui, ana naga pisape monar aligan yaru nene va e yum̃a nakoena, ana la monar ala m̃a nakoena vania vano-o naga ul plan make kiena lapui nene.”

³⁵ Ana Yesu pisa, pisape “Visae amiu ve aviewo re womlamiu lala silaga, ve lelaga e sinemiu la wetelu, þisi na kau Ata nae ma e peni, naga sinena kar amiu ve sanene, þisi na naga la nakoena ve sa ke ga nene van amiu.”

19

Yesu pisayu sanape naþa yaru mligan lua wona

Mak 10:1-12

¹ Ana Yesu pisa visena la nene þisi, ana naga mligan Kalele naga kome wii nae Yortan lepas na vano, ana pa metava e lepas nae Yutea.

² Ana þina lala ataveve ke naga e pogos nene, ana e yo nene naga kila ruru namaiena la moki.

³ Ana Varasi m̃ena ga laþasia asike e pogos nene, ana apimi puna ne Yesu, apisape akilali ke sina ga naga, la apiun naviunena tai pania, la apiunia, apisape “?Kieta navisaluaena pisa ya ne e lepas nen þelaga kiena ne yaru naþa ligan lua wona? ?Mesmesu ga naþa yaru kilia kila sanene vanon suri kar punu ga naþa pe miasia, pona kilia kila vanon ga suri kerkeviu ga laþasia?”

⁴ Ana Yesu pisatam̃e la, pisape “?Pona amiu na pe akilia re Visena Wa kiena ne Ntewa naþa naga pisa, pisape

‘E purþesia, Ntewa naga sii suri punu ga, ana sii m̃ena ga yeririna lua, yerm̃ene tai, a sira tai?’

⁵ Suri nene amiu akilia þisi rui, amio m̃ena ga visena taþena nene naþa pisa, pisape

‘Sanene, þisi na yaru ligan arimana amio anena, ana naga vano vilolar wona na sira, ana lalua aimi ave taaga ga narui.’ *Nas 2:24*

⁶ Nanene kila sane lalua ve ave lua re sina, ana lalua apimi ape taaga ga narui. Ana ya naþa Ntewa naga vilolaria aimi ave taaga, pe pon re si yaru kilapure la poli.”

⁷ Ana Varasi la nene amloge visena la nene, ana apiun ke sina ga tan Yesu, asape “?Poga ga, ana vanon ya ne Mosis naga pisawal navisaluaena nene naþa tam̃an sape yaru naga kilia la m̃aki naliganluaena tai vena la va wona, vena ligan lua naga vano?”

⁸ Ana Yesu pisatam̃e la, pisape “Ee, ana sumon naþa nasien yomarava nini, naga pe sa re nene poli, ana vanon naþa amiu þarimiu lala apimi m̃arera pañisi, nane kila Mosis tam̃ania sanene sape siar e repimiu la pimi, amiu akilia aligan plan womiu lala.

⁹ Ana nanagane, inu nevisa van amiu, visae yaru tai, wona kila kolau, yaru nene kilia ligan lua wona nene. Ana visae sira nene ve kila re kolau ve sanene sumo, ana yaru nene ligan lua naga, ana þisi na va were sira taþena, visae ve sanene, ana Ntewa pisa sane yaru nene naga kila kolau narui amio sira taþena nene, naga kila kare sira nene naþa wona na sumo.”

¹⁰ Ana nalogena kiena Yesu lala apisa pania, apisape “Visae ve sanene, þelaga na talopaena pe suri m̃arera tai ne pañisi ne. Pe pon re si tekila ita tetalopa poli.”

¹¹⁻¹² Ana Yesu pisa pan la, pisape “Ee, lelaga naþa yaru laþasia naþa þisi na la ve atalopa re pogos tai, sa naþa sane laþasia apaeme ana tasnela la piowa pa rui, pona laþasia akila kare tasnela, sa naþa asila, ana la taþatete atalopa. A laþasia, pe atalopa re poli vanon naþa la amligan talopaena vena la ayum̃ae e nasuþenena

kiena ne Ntewa. Ana Visena Wa, naga pisa pisape popon yermene amio sira, lalua atalopa, a popon lalua asu ruru m̃aga sanene tol luas nen kiela malena la luoka. A ko naṽa ko okekaran visena nene, ana opisu naṽa Ntewa naga kila sanene pan ko rui, popon olarar ruru visena nene m̃arera e kiom̃a malena.”

Yesu pisa ruru sisi lala

Mak 10:13-16; Luk 18:15-17

¹³ Ana laṽasia akus narila lala apimi puna Yesu, vena naga ligan limana te la, len wo la. Ana nalogena lala apisuia, ana apisi m̃arera pan yaru la nene, apisalup̃ar la,

¹⁴ ana Yesu pisa, pisape “Amiu ve avisaluṽar re sisi la nene, amiu ataṽan la aimi pun inu, vanon naṽa sisi la nene na asa ga la naṽa asike loyumũa e nasuṽenena kiena ne Ntewa.”

¹⁵ Ana naga mligan limana te sisi la nene, ana suraunia, naga mial pano.

Yaru m̃ee tai naṽa kiena suri moki

Mak 10:17-22; Luk 18:18-23

¹⁶ Ana e pogos taṽena tai, yaru m̃ee tai pimi pisu Yesu, piun tania, pisape “?Navianena, ana in na monar nekila yumũaena wo ya, naṽa vena kila inu ṽisi na netol malena naṽa ve uro re?”

¹⁷ Ana Yesu pisa pania, pisape “?Vanon ya ne ko opiun tan inu sanene, osape nevisa yumũaena wo tai van ko? Ntewa ga naga po, a visae ko ologear kiena navisaluaena lala, ṽisi na ko okilia otol malena wo nene.”

¹⁸ Ana yaru naṽani piun ke sina ga tan Yesu, pisape “?Ana ko opisa ke navisaluaena ya la nene?”

Ana Yesu pisa pania, pisape “Navisaluaena ne la nanini narui, naṽa pisa pisape: ve oweñar re yaru mare, ve okila re kolau, ve ovinau re,

¹⁹ ve ovisokan re, ko ova tanon arimom̃a amio anom̃a, a ko ositom nalavis pumũa lala, ovisuar ruru la, ve sa ke naṽa ko opisuar ruru ko ke ga.”

²⁰ Ana yaru m̃ee nene pisa pania, pisape “Navisaluaena la naṽa ko opisa ke nene, inu nesumũa nemlarar make punu ga rui.

?Suri ya si naṽa teke ga wa, naṽa inu pe nekila re poli wa?”

²¹ Ana Yesu pisa pania, pisape “Visae ko sinoṽan osape oimi omesmesu ruru wo va ṽisi, torokin naṽa ko otol malena naṽa ve uro re, ṽisi na ko na monar okila ve sanini: ko ovano, oululin plan make kiom̃a suri la punu ga, ana owar kana kilavaru nena, ova oviovionia van yaru la naṽa pe kiela suri re poli. Visae ko okila sanene, ṽisi na ko kiom̃a suri wo lala ve moki vaṽisi ma e peni. Ko, ova okila, siraunia oimi otaveve inu.”

²² Ana pogos naṽa yaru m̃ee nene mloge visena nene, kiena sitomena urmi a sinena piowa paṽisi, vanon naṽa naga kiena suri la moki manene la. Ana naga pure matan Yesu.

Yaru naṽa kiena suri moki, naga m̃arera la naṽa va loyumũa e nasuṽenena kiena ne Ntewa

Mak 10:23-31; Luk 18:24-30

²³ Ana Yesu pisa pa kiena nalogena lala, pisape “Lelaga nevisa van amiu, visae yaru tai naṽa kiena suri moki, naga sinenan pisape va loyumũa e nasuṽenena kiena ne Ntewa, suri nene na m̃arera towe m̃a naṽa.

²⁴ Ee, inu nevisa van amiu, visae kamel tai naga va warpoyo e pulus nen nitil nene, nane naga m̃arera vaṽisi ne, ana visae yaru tai naṽa naga kiena suri la moki ana sinenan sape va loyumũa e nasuṽenena kiena ne Ntewa, naga m̃arera la na wa.”

²⁵ Pogos naṽa nalogena lala amloge visena nene, amilania paṽisi, ana la apisape “?Suwala, ana visae ve sanene, ṽisi na ane kilia tol namalena nene?”

²⁶ Ana Yesu kirava pisu la, naga pisa pisape “Ee, lelaga naṽa yaru taṽatete kilia kila yaru tol malena nene, ana Ntewa ga kilia kila make suri punu ga.”

²⁷ Ana Pita pisatamea, pisa pisape “? Ana sanapen imimi? Imimi meligan make kiamimi suri la rui, ana imimi metaveve ko. ?ṽisi na imimi metol m̃a suri wo laṽas ne, pona peraga?”

²⁸ Ana Yesu pisa pan la, pisape “Lelaga nevisa van amiu sanini, pogos naþa Narina ne Yeririna totano e kiena lelana wa natotanoena e yomarava viu nene naþa þisi na imi, amiu naþa ataveve inu ke nanagane, ana amiu mēna ga atotano e pupia lelemiu wa natotanoena ve lualima taaga va lua, vena avisuar lus nae Israel lala lualima taaga pa lua nene, sa naþa amiu ape kiela þarin suþe lala.

²⁹ Ana yaru naþa visae ligan mēna yumā, pona wenla pona vinena, pona arimana pona anena, pona narina, pona kiena porotano, ana visae naga ligan suri la nene vanon ga inu, þisi na naga war-marana sina ga e yomarava nini kiena suri la naþa naga mligania, kilia tol sina ve ponotia tai, ana metavana, þisi na naga kilia tol mēna ga malena naþa ve urō re.

³⁰ “Ana yaru la moki liu naþa asu metava, þisi na ato tano, a yaru la naþa ato tano, þisi na la asu metava.”

20

Pakaiwa kiena ne yaru na yumāena lala

¹ Ana Yesu sumā pisa mēaga pano-o, pisape “Suri naþa nepisa ga na wa, sa ke þelaga naþa Ntewa kila ke pa yaru lala loyūnā e nasuþenena kiena. A þisi na nevisayu suri nene van amiu e þakaiwa tai, naþa pisa sanene, pisape: Yerkawa tai, naþa kana pupia lokilmāsmās tai. E kolulagi tai, naþa pe yemlagi ruru re poli wa, naga pa e pulkumali tai vena were yaru laþasia ava ayūnāe e kiena lokilmāsmās nene e legiena nene.

² Naga māl la þasia, ana pisaar pan la e kilavaru tai naþa torokin yumāena na legiena wetelu tai, ana mligan plan la apano vena ava ayūnāe e kiena lokilmāsmās nene.

³ Ana e mrae ovari, naga pa sina ga e pulkumali nene, pisu yaru taþena lala asu korena ga, asumā sane pe kiela yumāena re poli,

⁴ ana naga pisa pan la, pisape ‘Popon amiu mēna ga aimi ayūnāe re e kiau

lokilmāsmās, ana þisi na nowul amiu ke ga.’

⁵ “Ana la nene apa amiyūnāe, a sirau-
nia, kolpae mēna ga, a mrae telu mēna
ga naþa yepekilavi, ana yerkawa nene
þasuþe si pano, þere ke sina ga yaru laþas
apimi amiyūnāe kiena sanene.

⁶ A yam si tai, e yepekilavi mrae lima,
naga þasuþe sina ga pa e pulkumali nene,
pisu yaru laþasia naþa asumālu asike e yo
nene na wa, ana naga pisa pan la, pisape
‘?Komin ya ne asu koren ke sanene na wa
e yo nini, naþa pe akila re nena yumāena
tai poli?’

⁷ “Ana la apisatāmēa, apisape ‘Peraga,
pe yaru tai pimin re sape meva meyumāe
kiena poli.’

“Ana yerkawa nene pisa pan la, pisape
‘Poga, visae sanene, in na neure amiu
narui. Amiu, aimi ayūnāe kiau.’

⁸ “Ana e ko yepekilavi la rui, amiyūnāe
þisi, ana yerkawa nene pisa pa kiena
navisuaren yumāena nene, pisape ‘Poga,
ovio yaru na yumāena la nene aimi, oul
la. Pisi na ko okila sanini: oul þesan la
naþa apimi mare ga na wa, vano-o oþisi
e la naþa apimþesani kolulagi.’

⁹ Ana pogos naþa yaru la naþa asiar ga
yumāena e mrae lima apimi, yaru nene
mla kilavaru pan la torokin ke legiena
wetelu na yumāena taaga.

¹⁰ A pogos naþa la naþa apami
amiyūnāe sumo apimin vena awar kiela
kilavaru, la amape pona la ala va la
metava, taulu la naþa amiyūnāe plas ga,
ana yaru nene mla kilavaru pan la, la
punu ga torok ga.

¹¹ “Ana pogos naþa la apisu kiela
kilavaru sa ke ga nene, la amloge piowa,
asumā apisimumun yerkawa nene.

¹² Ana amligan lala tai pa piun tania,
pisa pisape ‘La naþa apimi mare ga na
wa, la amiyūnāe aora taaga ga, ana im-
imi memiyūnāen legiena wetelu e pupia
yepisusun nene. Imimi mepisu naþa ko
omla kilavaru maran taaga pan la, sa ke
naþa omla pan imimi. ?Suri nene na
sanape na sanene?’

13 “Ana yerkawa nene pisatamē naga, pisape ‘Mara, in na pe nekila kare ko re nene poli. Italua tepranar p̄isi rui, tesape kō oyum̄ae e legiena wetelu ve taaga nene, ana tesape p̄isi na nowul ko torokin ga kioṃa yum̄aena nene.

14 Ve sanene, popon ko ola kioṃa kilavaru ova ga um̄a. Naga kiau sitomena ga tai nene, naṗa kilavaru naṗa nemla pan ko, sineun nesape nela m̄ena ga marana ve taaga va la naṗa apimi mare ga.

15 ?Ko ositom osape in na taṗatete nekila sa naṗa inu sineunia, e kiau kilavaru? ?Sanape na ko opielue e yaru la naṗa nekila ke po pan la? Ana p̄akaiwa nini p̄isi e nene.’ ”

16 Ana Yesu pisa make kiena visena e pogos nene, pisa pisape “Ana yaru la naṗa asirau, p̄isi na la asumo, a la naṗa asumo, p̄isi na la asirau.”

Yesu pisawal kiena marena yam telu narui

Mak 10:32-34; Luk 18:31-34

17 Ana Yesu pa ke metava ma Yerusalem narui, ana pogos naṗa amial ke e mrapplepa apavini, naga pio kiena nalogena la lualima taaga pa lua apimi puna, ana pisi pan la, pisape

18 “Amiu ayagogo ruruia. Nanagane ita tepa ke ma Yerusalem narui, naṗa p̄isi na ve ve piavi re, p̄isi na aligan Narina ne Yeririna e limana ne yerkawa lala kiena ne yaru wa lala, a amio navianena kiena ne navisaluaena m̄ena lala, ana p̄isi na la nene la aliṗere naga avisave p̄isi na naga monar mare.

19 Ana siraunia aligan naga e limana ne le Rom lala, naṗa p̄isi na la nene akirakirai viowa vania, a p̄isi na la akua naga, ana p̄isi na asuar̄ia naga e laki torovia vena mare. Ana pogos naṗa naga mare pae, ana e kana legiena na telu, p̄isi na Ntewa kilamalia sina naga.”

Anenane Semes amio Yoane, naga piun suri tai tan Yesu

Mak 10:35-40

20 Ana wona ne Sepeti, naga ṗere narila luwoka nene naṗa Semes amio Yoane, apimi puna ne Yesu. Sira nene kinai e lana Yesu, piunia pisape “Inu sineunia nesape otam̄an suri tai van inu.”

21 Ana Yesu pisatamē naga, pisape “? Ana ko sinoṃan osape oviun ya?”

Sira nene pisatamēa, pisape “Inu sineunia nesape otam̄an sanini: pogos naṗa ko ovisirlua kioṃa nasuṗenena, p̄isi na naru la luwoka nene akilia atotano amio ko e kioṃa yo wa naṗa metava lavisin ko, tai e lepas nen lumoṃa na ṗamarua, a tai e lepas nen lumoṃa na ṗam̄eli.”

22 Ana Yesu pisatamē la, pisape “Amiu pe akilia re suri naṗa apiun ke ne poli. ? Sanape, amiu lua nene asitom asape amiu lua atorokin naṗa ita tomunpae e piala naloge viowaena nene naṗa inu monar nomun ea?”

Lalua apisa pania, apisape “Ee, imimi lua metoroki.”

23 Ana Yesu pisa pan la luoka, pisape “Ee, lelaga naṗa p̄isi na amiu luwoka amun m̄ena ga e m̄au piala naloge viowaena nene, ana suri nene naṗa amiu lua apiunia, apisape amiu lua atotano amio inu e lepasneu luwoka, suri nene naga pe kiau re naṗa nela van amiu poli. Yo la ne sanene, kiena ne la ga naṗa kau Ata naga kila ruru pe kiela, a naṗa naga pisaar p̄isi rui pisape p̄isi na la atotano ea.”

Narina ne yeririna pimin vena yum̄ae kiena yaru lala

Mak 10:41-45

24 Pogos naṗa nalogena taṗena la lualima nene la amloge suri nene, naṗa wolai lalua nene Semes amio Yoane apiunia, ana la sinela kari lalua.

25 Ana Yesu pio la, vena aimi puna, vena naga visi van la, ana naga pisa pisape “Ita tekilia rui ṗelaga kiena ne yaru la naṗa pe amlelaga re e Ntewa poli. Ita tepisu m̄a naṗa suṗe lala amio yerkawa lala na yomarava nini, la sinelan asape am̄areran yaru taṗena lala vena asu vatanon la silaga.

²⁶⁻²⁷ Ana amiu kiau nalogena lala, kiamiu p̃elaga monar ve ve sa re nene. Visae amiu yaru tai sinenan sape imi ve kiamiu yerka wa tai pona kiamiu nasumonena tai, kana mrapa nena sanini: yaru nene monar imi ve sa ga yaru na yuñae kiamiuena tai.

²⁸ Narina ne Yeririna naga kila sanene p̃isi rui, naña naga pe pimin re naña vena yaru la akila yuñae nañilaen naga poli, ana naga pimin vena naga yuñae vena iilaen lala, a vena tamān kiena malena vena ul plan yaru la ve moki.”

*Yesu kila ruru kilamarakata lua
Mak 10:46-52; Luk 18:35-43*

²⁹ E pogos nene, Yesu amio kiena nalogena lala asike garu Seriko, ana pogos naña amligan e pulkumali nene apano, ana yeririna la moki pañisi naña ataveve la.

³⁰ Ana kilamara kata la lua, naña lalua atomā tano e isinen mrapplepa. Ana pogos naña lalua amloge naña apisape Yesu mial ke e mrapplepa pimi, lalua apio ke asape “!Suñe-o, ko lus kiena ne Tepet, imimi lua mesape ko sinemā ye imimi!”

³¹ Ana yaru tañena lala apisin sinemimien pan lalua nene, apisa apisape “Ee, amiu lua nene amāaga.”

Ana lalua apio manene la, asape “!Suñe-o, ko lus kiena ne Tepet, imimi lua mesape ko sinemā ye imimi.”

³² Ana Yesu sumālu su mrapa e yo nene, pio lalua, pisa pisape “?Amiu lua sinemiun asape nekila ya ne van amiu?”

³³ Ana lalua apisatamāea, asape “Suñe, awis, imimi lua sinemimin mesape kilamaramimi la imi wo, vena mekilia mekirava.”

³⁴ Ana Yesu sinen mie la, ana tol kilamarala, ana lalua apisu ruru ke ga suri e pogos nene, a lalua asumālu ataveve Yesu apano.

21

*Yesu pimi tol yo Yerusalem
Mak 11:1-11; Luk 19:28-40; Yoane 12:12-19*

¹ Nanagane, Yesu lala apami lavisin Yerusalem narui, ana la amāliwi e narin pulkumali tai sumo, kiena kia Petpas,

naña teke e kunus nene naña la apio asape Kunus Na Purolip. Ana Yesu miila kiena nalogena la lua, pisape

² “Amiu lua ava e pulkumali na gare, a mesmesu e pogos naña ava loyuma ea, p̃isi na amiu lua avisu togki tai, naña amatear sike na, naga amio narina. Ana amiu lua aluñar plan la, a amiu aure ga la luoka aimi pun inu e nini.

³ Ana visae amiu lua aloge yaru tai visi van amiu, p̃isi na amiu lua avisa ga vania, avisave ‘Suñe na sinenan suri mali lalua nini vena ava akila kiena yuñae nañilaen tai wa,’ ana pogos naña amiu lua avisa sanene, naga kila tamān lalua aimi veraga.”

⁴ Suri nene pimi p̃arpoyo vena kila visena nene kiena ne navisawalena nanua sumo vim ve lelaga, naña naga pisa pisape

⁵ “Amiu avion va le Saeon lala, avisave ‘Amiu apisu ke ne, nanagane kiamiu p̃arin suñe pam ke pun amiu narui.

Naga pe yaru tai naña kiena sitomena to ga tano, kila naga kus ga togki, togki tai naña ve tokaki ga, naña pe ninus ke ga wa.’ ” *Sek 9:9*

⁶ Ana nalogena lalua nene apano, ana lalua akila sa naña Yesu pisa.

⁷ Ana pogos naña lalua añere togki nene amio narina apimi, ana lala añatetae m̃ala kulkota lala e wos nen togki lalua nene, ana Yesu naga pa totano meta e navetokak.

⁸ Ana yaru la mokliu naña añatetae m̃ala kulkota lala suvileviles nen mrapplepa, ana yaru lañasia apa ate m̃amela lala pitomi añatetae m̃ena ga, vena togki kiena ne Yesu yali ea. Ve sanene, akila sa naña la apatanon Yesu sa naña naga pe pupia p̃arin suñe tai.

⁹ Ana la amial ke apano vena ava loyuma Yerusalem, ana p̃ina na yeririna la naña asumon Yesu, amio la naña asiraunia, asumā apiovionia sanini, apisa apisape

*“!A ke suwala, po na po! !Teyeluar naga naña pe lus kiena ne Tepet tai nene!
!Ntewa na mava, ko ovisa ruru naga nene naña pimi e kioñā kia!*

!Amiu nae ma e peni metava amiu mēna ga ayeluar naga!” *Yauena 118:26*

¹⁰ Ana pogos naḡa Yesu pa loyuma e Yerusalem, yaru lala sinela pulaula, ana la asuma akila ke visena la moki, asuma apiuviunia, asape “?Yaru nene naga ai?”

¹¹ Ana yeririna la naḡa apimi amio Yesu, la apisatame la sanini, apisa apisape “Nanene na navisawalena nene naḡa naga molue e pulkumali nae Nasaret garu Kalele, naḡa kiena kia Yesu.”

Yesu mēne plan la naḡa asuma apuliwilin ke suri e Yuma Wa Mana ne Ntewa Mak 11:15-19; Luk 19:45-48; Yoane 2:13-22

¹² Ana Yesu pa e Yuma Wa mana ne Ntewa, a e pogos nene naga pisu sane yaru la moki liu naḡa la asuma e kopkop na yuma nene. La nene la asuma akila ke ga yumaena lala natauluen kilavaru, naga nene e lepas nalaena lala a e kuḡaḡaena na Yuma Wa nene, ana la asuma akila kewia ke ga yaru lala. Ana pogos naḡa Yesu pisu suri nene, naga pe kekaran re poli. Ana naga pa mēne plan la, naga kawepu narin varvara kiena ne yaru na keueen kururu varu lala, a naga koantetain lele na totanoena kiena la naḡa apuliwilin ke kupa lala.

¹³ Ana naga pisa pan la, pisape “Ntewa pisa e kiena Visena Wa, pisape ‘Pisi na la avisa maau Yuma Wa avisave naga yuma na leniena,’ ana amiu apilon ḡisi pimi sa ga puluve mana yaru na vinauena la narui.”

¹⁴ Ana pogos naḡa Yesu sike e Yuma Wa nene na wa, kilamara kata lala amio laulu lala apimi puna, ana naga kila ruru la sina.

¹⁵ Ana yerkawa lala kiena ne yaru wa lala, amio navianena na navisaluaena lala, apisu yumaena wo kiena ne Yesu la nene, a amloge mēna ga naḡa sisi lala asuma ga apiovion ke ga wa, asape “!A ke suwala, pona po! Teieluar naga naḡa naga pe lus kiena ne Tepet nene!” ana yerkawa la nene sinela mimi manene la.

¹⁶ La sinela mimi sanene, ana la apisa pa Yesu, apisape “?E sanape, ko omloge ma visena naḡa la asuma apisa ke ne?”

Ana Yesu pisatame la, pisape “Ee, nemloge ma ne. ?Ana sanape, amiu asitom ke asape visena nene piowa ga? Pona pe apuloli re Visena Wa kiena ne Suḡe naḡa pisa, pisape

‘Ntewa o, ko okilia okila nin sisi kokan lala, amio mēna sisi tomtom lala, amieluar ruru ko paḡisi.’ ” Yauena 8:2

¹⁷ Ana Yesu mligan la nene, molue ke sina ga petan Yerusalem, pa e narin pulkumali naḡa Petani, pa mono ea.

Purlaki tai naḡa pe ḡar re mras poli Mak 11:12-14,20-24

¹⁸ Ana Yesu mon ma e nene, ana yemlagi kolulagi naga pisape wasuḡe sina va Yerusalem, a naga suma mial ma pavini, ana naga mloge sane viso karia.

¹⁹ Naga kira pa e isinen mrapplepa, naga mal purpiliva tai, naḡa naga mas ga moki, ana pe mras su re e poli. Ana Yesu pisa pa purlaki nene, pisape “Ko ove owar re si mrasoma pogos tai.” Naga pisi sanene, ana veraga ga purpiliva nene mano taḡa nenaga.

²⁰ Nalogenala lala apisu naḡa purlaki nene pimi mano sanene, ana sinela kurkur paḡisi. La apiun tai Yesu, apisape “?Ya ne kila purpiliva nene mano ke veraga sanene?”

²¹ Ana Yesu pisatame la, pisape “Lelaga nevisa van amiu, visae amiu aviawa marera e inu, naḡa amiu kiamiu sitomena ve veve lua re, ḡisi na amiu mēna ga akilia akila sanene, a ḡisi na amiu akilia akila mēna ga va re laa na wa taulu nene. Sane visae amiu avisa va pupia kunus nene, avisave ‘Osumalu otove oula ova e sive,’ ḡisi na ve sanene narui.

²² A visae amiu aviawa kawa e Ntewa, naḡa amiu alelaga kemua lelaga, ḡisi na amiu akilia atol suri ya naḡa amiu amlen vanonia, amiu aviun tan naga.”

Nasumonon le israel lala sinelan asape avisaluḡar Yesu

Mak 11:27-33; Luk 20:1-8

²³ Ana Yesu ḡasuḡe si pa loyuma e Yuma Wa Mana ne Ntewa, ana naga pa suma pian ke sina ga yaru lala. Ana yerkawa

kiena ne yaru wa lala, amio nasumonena lala kiena ne le Yu lala, apimi puna, apiun tania, apisape “?Ko osumã okila ke suri la ne sanene e yo nini e kia kiena ai, a a m̃ena ga naþa tam̃an ko sape okila ve sanene?”

²⁴ Ana Yesu pisatam̃e la, pisape “Poga ga, ana inu m̃ena ga nesape neviun naviunena tai van amiu wa. Visae amiu avisatam̃e ruru kiau naviunena nene, þisi na nekilia nevisawal van amiu sanape naþa nekilia nekila ve sanene.

²⁵ Poga ga, kiau naviunena sanini narui, sape: ?Nakeena naþa Yoane naga kila mare ga nanua e yaru lala, naga suri tai naþa Ntewa naga pisa pania pisape naga monar kila, pona yaru ga la apisa pania?”

Ana naviunena nene kiena ñe Yesu kila na la apisi ga pan la narui, naþa la asumã apisa apisape “?Þisi na ita tevisa sanape na vania? !Tevisuaruruia! Visae ita tevisa tevisave nakeena nene Ntewa naga pisa pa Yoane, þisi na yaru nene viun si tan ita, visave vanon ya ne ita pe temlelaga re e Yoane poli.

²⁶ Ana siraunia ita taþatete si tevisa tevisave nakeena nene, yaru ga la apisa pa Yoane, vanon naþa yeririna la nene la amlelaga ke m̃arera þisi rui, asape Yoane nene naga pe navisawalena na lelaga tai kiena ne Ntewa, ana pe pon re yeririna la nene sinela kar ita poli.”

²⁷ Ana kiela sitomena la ne sanene narui kila la apisatam̃e Yesu sanini, apisa ga apisape “Imimi memninue ga.”

Ana Yesu pisa pan la, pisape “Visae sanene, þisi na inu m̃ena ga, taþatete nevisa van amiu nevisave ane pisa pan inu pisape nekila yum̃aena la ne sanene.”

Pakaiwa kiena ne yaru tai amio narina lalua

²⁸ Ana Yesu pisa pan la, pisape “Amiu asitomli suniena nini. Yaru tai, narina na yerm̃ene lua, ana yaru nene pa pisu narina naþa m̃earu, pisa pania, pisape ‘Naruu, sineun nesape þane na ko ova oyum̃ae e kata lokilm̃asm̃as.’

²⁹ “Ana narina nene pisatam̃ea, pisape ‘Peraga, yepemavi.’ Ana pe piavi re poli, yaru viu nene sitom si arimana, ana naga

pilon kiena sitomena, ana pa miyum̃ae sa naþa arimana pisa pania.

³⁰ Ana arimana ne lalua nene naga sitom ke sape þisi na narina nene taþatete va yo, ana pisa si visena nene pan narina nasirau, ana narina nene pisatam̃e ruruia, pisape ‘Poga ga ata, þisi na neva ke nanagane ga ne,’ ana siraunia, ana naga pe pa re si poli.”

³¹ Ana Yesu piun tan la, pisape “?Lalua nene, ane kila sa naþa arimala sinenania?”

Ana lala apisatam̃ea, apisape “Mearu.”

Ana Yesu pisa pan la, pisape “Ee, ana lelaga nevisa van amiu, nanagane na sanene narui. Inu nesumã nepisu naþa yaru viowa la moki sane yaru na warpoloen takis lala, amio sira na mrapplepa lala, la ke naþa ape yeririna viowa la nene, ana nanagane la asumã akekaran ke naþa vena aimi loyum̃a e nasuþenena kiena ne Ntewa, la asumã apilon la ke rui. Ana nepisu sane amiu asike la varaun la, asike la perina paþisi wa.

³² Ana pogos naþa Yoane Nakeena naga pimi, naga pian amiu e þelaga na mrapa naþa mesmesu, ana yeririna viowa la nene amlelaga e naga. A amiu m̃ena ga, amiu apisu suri la nene, ana amiu na pe apilon amiu re lelaga poli, a pe amlelaga re nenaga.”

Pakaiwa na yeririna viowa la naþa apisuar lokilm̃asm̃as tai

Mak 12:1-12; Luk 20:9-19

³³ Ana Yesu pisi ke pan la na wa, pisa pisape “Amiu ayagogon ruru si þakaiwa taþena nini, naþa pisayu yerikawa tai, amio kiena lokilm̃asm̃as tai. Yaru nene kila ruru kiena yo nene naþa kila kove m̃arera tai telivi piora ea, a kila kana lelana navieplanen was nen m̃asm̃as, a kila m̃ena kana lele tai naþa pa metava naþa yaru kilia wiyu va se ea, vena visuar lokilm̃asm̃as nene.

“Ana e pogos tai, yerikawa nene sinenan sape yalor re va e purvanua taþena tai, ana naga mligan kana lokilm̃asm̃as nene e limana ne yaru la þasia ayum̃aenia, ana aul vania.

³⁴ Ana yerkawa nene pa sumã perina pano-o, ana naga pisu kilale pisape nanagane pogos na mramãsmãas marua narui. Ana naga mligan kiena yaru la ava si puna ne la naþa asike e kana lokilmãsmãas nene vena awar kiena kilavaru na mras nen mãsmãas kompasia, naþa la nene monar aul vania.

³⁵ Ana poglis naþa kiena yaru la nene apimi, ana yaru taþena la nene aþe la, naþa tai la aþe ga naga, a tai asumãar naga mare, a taþena sina akoveþnar naga mare.

³⁶ “Ana yerkawa nene mligan si kiena yaru taþena laþasia, ana la moki la sane, ana la naþani akila si þelaga maran taaga sa ke ga pan la.

³⁷ Ana yerkawa nene sitomyu þelaga kiena la nene, ana naga pisape ‘Inu monar neligan ga naruu vano, þisi na monar avatanon naga,’ ana naga mligan narina wawa napo nene pano.

³⁸ Ana pogos naþa apisu naga, asumã apisavisa pan la, apisape ‘Naga nene na narina ne yerkawa ke narui. Yaru ke nanene narui, naþa visae yerkawa nene kovio, þisi na naga ke narui naga kus porotano nene sane lalimana ne arimana. Popon ita toweþnar mþena ga naga mare, ana þisi na ita ga tekilia tokus porotano nene ve kieta.’

³⁹ Ana sanene narui atarar naga, aþure lua naga petan lokilmãsmãas pa vanua, ana aþeþnar naga mare.”

⁴⁰ Ana Yesu piunia, pisape “?Pogos naþa yerkawa nene imi sina, þisi na naga kila sanapen la naþa asumã apisuar ke kiena lokilmãsmãas nene?”

⁴¹ Lala apisataþnea, apisape “Yaru viowa la nene, þisi na yerkawa nene weþnar la, monar amare e þelaga tai naþa mþarera viowa vaþisi. Siraunia, naga ligan kiena lokilmãsmãas e limana ne yaru wo taþena lala, naþa þisi na akilia auli mesmesun vania e kana pog nena.”

⁴² Ana Yesu pisa pan la, pisape “Visena tai teke e Visena Wa kiena ne Ntewa, pisape

‘Kilavaru nene, yaru na yuþaenen yuþa lala, apisa apisape piowa ga, akoven rui.

Ana nanagane, kilavaru nene pimi pe kilavaru wo na mrapun yuþa, naþa uarar yuþa mþarera.

Suri nene, naga Ntewa ga kila, a imimi mepisua na po paþisi.’ Yauena 118:22

“?Visena nene na amiu apuloli mþa pogos tai rui, pona peraga yo?

⁴³ Inu nevisa van amiu, þisi na Ntewa lalua kiena nasuþenena vetan amiu, ana þisi na la va yaru taþena lala naþa kiela malena lala kilia war mras wo lala, torokin naþa asike loyumuþa ea.

⁴⁴ “Ana visae yaru tai loru e kilavaru nene, þisi na si kare naga vaþisi, tasnena wororowa make ga, pona visae kilavaru nene loru e yaru tai, þisi na kilamumu yaru nene kila kare naga vaþisi.”

⁴⁵ Ana pogos naþa yerkawa kiena ne yaru wa lala amio Varasi lala amloge þakaiwa kiena ne Yesu la nene, akilia naþa naga sumã pisayu la ke sanene.

⁴⁶ Kila narui lala sinela kar naga, sinelan asape auarar naga, ana akila þele ga komin amaraun manene laa þina na yeririna la, naþa amlelaga asape Yesu naga navisawalena kiena ne Ntewa tai.

22

*Pakaiwa na þaþagena na talopaena
Luk 14:15-24*

¹ Ana Yesu pis sina ga pan la e þakaiwa, pisa pisape

² “Þelaga kiena ne Ntewa naþa pio yaru lala apimi loyumuþa e kiena nasuþenena sanini: Þarin suþe tai kila ruru pupia kinanena tai e þaþagena na talopaena kiena ne narina.

³ Naga piun tan yaru la moki rui naþa yoko aimi e þaþagena na talopaena nene, ana pogos naþa mligan kiena yaru na yuþaena lala vena ava aure la nene aimi, ana la nene yepel mavin si imiena.

⁴ Ana þarin suþe nene pisa pan kiena yaru na yuþaena taþena lala, pisape ‘Amiu towe awasuþe amiu ke sina ga avano, vena avisa kiau visena nene van la, avisavenua ita toþe puluk la rui, amio mþena ga suri mali taþena lala naþa amlapa ruru po, ana suri punu ga lala e

kinanena nene tekila ruru la pa rui. Avisa van la avisave monar aimi lele taaga amio ita e p̄ap̄agena nini.'

⁵ "Ana la apa apisa pan la sanene, ana la nene asitom korenan ga visena kiena ne p̄arin suḡe nene, lala sinelan asape asuḡa akila ga suri naḡa la sinelania. Tai pa kana lokove, a tai suḡa ga pisuar ḡa kiena yuḡa na wilwilinen suria,

⁶ a laḡasia apuarar yaru na yuḡaena kiena ne p̄arin suḡe la nene, akila piowa pan la, ana aḡemoḡar la.

⁷ Ana p̄arin suḡe nene sinena mimi, ana mligan kiena li na mara lala apano, ana aḡe yeririna viowa la nene amarmare, a asikapi kiela pulkumali.

⁸ "Ana p̄arin suḡe nene pisa pan kiena yeririna lala, pisape 'Kinanena nene tekila ruru p̄isi rui, ana la naḡa nepio la p̄isi vena aimi ea, la pe pon re si aimi poli narui, teligan la.

⁹ Ana inu sineun nesape amiu ataveve narin mrapa taḡena lala, ana yaru ai la naḡa amiu alualia, avio la vena aimi e p̄ap̄agena nini.'

¹⁰ Ana kiena yeririna lala apano akila sanene, aḡure yaru la apimi, pe suri korena ga naḡa visae yaru wo lala pona yaru viowa lala, aimi ga sanene vena akokonia ruru yo na p̄ap̄agena nene.

¹¹ "Pogos naḡa la asike loyuḡa e yo nene, ana p̄arin suḡe nene pimi vena talopan la naḡa apimi, ana e pogos nene naga pisu lala yaru tai, naḡa pe miyen re moḡa kulsota wo naḡa torokin p̄ap̄agena poli, mien ga kulsota tai naḡa pe taḡena ga.

¹² Ana p̄arin suḡe nene piun tan yaru nene, pisape '?Mara, ko opimi loyuḡa e yo nini sanape, naḡa ko pe omiyen re moḡa kulsota wo na p̄ap̄agena poli?' Ana yaru nene pe pisa re si suri tai pan poli.

¹³ Ana p̄arin suḡe nene pisa pan kiena yaru na yuḡaena lala, pisape 'Amiu aviar ruru limana luwoka amio lana luwoka, ana amiu akoven naga va vanua, e yo malolo, e yo naḡa p̄isi na naga suḡa taglue, a suḡa kar luen ga maluena ea.' "

¹⁴ Ana Yesu pisa, pisape "Ntewa naga pio yeririna la punu ga, ana ve ve moki re naḡa naga wereplan la ave kiena."

Suri kiena ne Ntewa a suri kiena ne Sisa Mak 12:13-17; Luk 20:20-26

¹⁵ Ana Varasi lala apanon ataḡali naḡa alual naviunena ḡarera laḡasia vena ataḡali Yesu ea, naḡa naga visataḡe p̄ele ga.

¹⁶ Lala apisayu ḡaga pano-o p̄isi narui, ana lala mligan kiela nalogena laḡasia amio ḡena ga laḡas e p̄egas kiena ne Erot, apimi puna ne Yesu. Ana la nene akila kotalia naga e visena wo lala, la apisa apisape "Navianiena, imimi mekilia naḡa ko ope yaru mesmesu tai. Kioḡa visena lala punu ga pe lelaga, a ko opian ke yeririna lala e p̄elaga naḡa Ntewa naga sinenania. Ana ko pe opisu re ga yaru laḡas po poli, ana ko opisu yeririna punu ga marana taaga ga.

¹⁷ ?Suri ne nanene narui, imimi mesitom mesape ko ovisali van imimi, naḡa kieta navisaluaena pisa sanape? ? Pisa pisape, mesmesun ga naḡa ita le Yu lala toul takis va Sisa, naḡa pe p̄arin suḡe kiena ne le Rom lala, pona pe mesmesu re na sanene poli?"

¹⁸ Ana Yesu kilia ḡaga naḡa la sinelan asape akila kare naga, ana naga pisa pisape "Kiamiu visena lala po naḡa po, ana losinemi lala piowa a kona rui. ? Amiu asuḡa ataḡali inu ke sanene vanon ya?

¹⁹ Poga ga, amiu ala kilavaru na ulen takis tai imi."

Ana amla tai pimi, akian pania,

²⁰ ana Yesu piun tan la, pisape "'Ane marana na teke e narin kilavaru nene? ? A ane kiena kia nene?"

La apisa apisape "Marana ne Sisa nene, a kiena kia ḡena ga."

²¹ Ana naga pisa pan la, pisape "Poga ga, suri naḡa kiena ne Sisa, amiu ala va Sisa, a suri naḡa kiena ne Ntewa, amiu ala va Ntewa."

²² Ana pogos naḡa la amloge visena nene, amilan paḡisi, ana amligan Yesu aḡure apano.

*La naþa amare, þisi na amal sina
Mak 12:18-27; Luk 20:27-40*

²³ Ana e ke e legiena nene narui, le Satusi laþas apimi puna ne Yesu, la sinelan asape aviun suri tai tan naga e lepas naþa lala amlelaga m̃arera ea, naþa la amlelaga asape yaru la naþa amare, taþatete amal sina e legiena maro. Vanon suri ne nanene apiun tan Yesu sanini, apisa apisape

²⁴ “Yesu, ko naþa ope navianena, imimi sinemimi mesape meviun tan ko, mesape sanape e visena tai naþa yermarua Mosis pisa nanua sumo. Naga pisa pisape visae yaru tai mare tan wona, naþa pe narila re poli wa, naga wenla monar talopa sina amio letano nene vena ve wona. E þelaga nene, þisi na sira nene kilia war narila tai, vena uarar kia kiena ne wona na yerm̃ene naþa mare ne, vena kia nene mali m̃aga.

²⁵ Poga ga, ana e uñã tai pun imimi, welelai la olua. Kiela m̃earu talopa, ana naga pe narina re tai poli wa ana naga mare tan wona, ana wenla nasiraunia þere leinia pe wona.

²⁶ Ana wenla nene naga mare tan m̃ena ga, a welelai na telu kila m̃ena ga sanene, pano-o tol welelai na olua, la punu ga amare tan sira nene.

²⁷ A siraun e wona la punu ga, sira m̃ena ga nene mare.

²⁸ ?Ana ko ovisali suri nene: e legiena maro, pogos naþa apisa ke apisape þisi na yaru la amal sina, þisi na sira nene na ve wona ai, vanon naþa naga talopa amio punu welelai la olua nene þisi rui?”

²⁹ Ana Yesu pisa pisape “Peraga, kiamiu sitomena pa pe wowe la, vanon naþa amiu pe akilia re ya naþa Visena Wa kiena ne Ntewa pisa poli, a amiu pe akilia re m̃ena ga ya naþa naga kiena nam̃areraena keviu kilia kila poli.

³⁰ Pogos naþa yaru lala amal sina, þisi na lala ave saga navisi kiena ne Ntewa lala ma e peni narui, ana þisi na ve akila re si suri nene natalopaena.

³¹⁻³² ?A e lepas na malena si nene, ana Visena Wa tai kiena ne Ntewa sumã ga

naga kilia iila ita e nene, pona amiu na pe apuloli re poli yo wa? Visena nene pisa sanini, pisape ‘In na nepe Ntewa kiena ne Epraam, Aisak, a Sekop.’ ?Ana visena nene pisa ya? La telu nene la amare e yomarava nini nakonua rui, ana kas moki na moki þaro rui, ana Ntewa pisa ga visena nene na wa, naþa pisape naga pe kiela Ntewa. Sanene na kiena visena naga kana kinasia sape la telu nene la amare e yomarava, ana la amal kemua puna na wa. Ntewa pe sinenan re sape kiena yeririna lala la ave yaru naþa mare la poli, ana naga sinenan sape naga ve Ntewa kiena ne yeririna la naþa la amali.”

³³ Ana pogos naþa þina na yeririna lala amloge visena kiena ne Yesu nene, la amilan suri lala naþa naga sumã pian la ke ea.

*Navisaluaena na keviu lua
Mak 12:28-34; Luk 10:25-28*

³⁴ Ana pogos naþa Varasi lala amloge naþa Yesu kila Satusi lala pe akilia re si suri tai naþa avisa poli, ana la akila narin viorena tai þisi, ana apimi puna Yesu, la m̃ena ga asape akilalia.

³⁵ Ana la yaru tai, naþa la apisu sane naga pe manmarua ruru e Navisaluaena, naga piun naviunena tai pan Yesu, pisape

³⁶ “?Navianena, inu sineun nesape ko ovisawal li, ovisave e visena la punu ga naþa sike e kieta Navisaluaena, nape naþa keviu, a to metavan la taþena la sane?”

³⁷ Ana Yesu pisa pania, pisape “Visena Wa pisa sanini, pisape ‘Ntewa na mava naþa naga pe kioñã Ntewa, ko monar ositom naga e losineñã wetelu, a e kioñã malena wetelu, a e kioñã sitomena wetelu.’

³⁸ Nanene naga pe navisaluaena þesia, a naþa naga keviu paþisi.

³⁹ A navisaluaena na lua nene naþa naga keviu m̃ena ga sa ke ga nasumo nene, naga pisa sanini, pisape ‘Ko monar ositom nalavis pumã lala, okila wo van la, ve sa ke naþa ko ositom ko m̃aga.’

⁴⁰ Navisaluaena la lua nene, ape purþes nen navisaluaena taþena lala kiena ne Mosis, amio mēna ga visena kiena ne navisawalena lala, naþa asike e kieta Tusi Wa.”

Navisaarena naga pe Ntewa kiena ne yermarua Tepet

Mak 12:35-37; Luk 20:41-44

⁴¹ Ana e pogos naþa Varasi lala asike veraga amio Yesu sanene, naga mēna ga piun naviunena tai pan la, pisape

⁴² “?E kiamiu sitomena lala, asape þisi na Navisaarena mālivi e lus kiena ai?”

Ana la apisatañea, apisape “Pisi na naga ve lus kiena ne yermarua Tepet nene naþa naga pe þarin suþe sumo.”

⁴³⁻⁴⁴ Ana Yesu piun sina ga tan la, pisape “?Ee, naþa amiu apisa na pe lelaga, ana sanape naþa Ninuna Wa sike e Tepet, ana Tepet pisi, pisa pisape

‘Ntewa na mava pisa pa kiau Suþe, pisape “Ko ototano pun inu e lepas na þamarua, otomāte mā vano-o, þisi na inu neli-gan kionā nasinekar lala aimi ve sa narin takue na vilanvanen lamā ea.”

Yauena 110:1

“E yo nene tepisu naþa Tepet naga sumā pio Navisaarena nene pisape Navisaarena naga pe kiena Suþe.

⁴⁵ ?Ana vanon naþa Tepet pisa sanene, a sanapen naþa amiu apisa apisape Navisaarena nene naga molue ga e Tepet, ana naga pe kiena lus ga tai?”

⁴⁶ Ana pe yaru re si tai naþa kilia visa si navisatameena tai va Yesu, a siar mēna ga e legiena nene, pe yaru re si tai naþa kilali si Yesu e naviunena la poli.

23

Yesu pisi mārera paþisi pa nasumonena lala nalotena

Mak 12:38-39; Luk 11:43,46, 20:45-46

¹ Ana e pogos nene, Yesu pisi pa þina lala, amio mēna kiena nalogena lala, pisape

² “Lelaga kemua naþa nanagane, naviana na navisaluaena amio Varasi lala, naþa la ke narui la akus lelena ne Mosis vena avisawal kinas nen navisaluaena lala kiena ne Ntewa.

³ Ana visae ve sanene, ana amiu na monar alogear la, akila ve sa naþa la apisa. Ana amiu na ve ataveve re kiela þelaga lala, komin naþa pe akila re suri la naþa la asumā apisa ke pa yaru taþena la poli.

⁴ Ana la asumā asikol ke si narin navisaluaena la moki naþa la ga akila, naþa mārera paþisi, naþa amāreran ke pa yeririna lala vena alogear la. Asumā akila ke yumāena la nene sa naþa akon ke suri la naþa urmi paþisi e yeririna lala, ana lala na pe akekaran re nenaga naþa vena aiila la na akuspae ga suri la nene.

⁵ “Lala na aþarwar la manene la e kiela yumāena lala wa, naþa lala akila ga vena awere kilamarana yaru taþena lala. Amiu apisu ke kiela narin pultaga la nene, naþa akon Visena Wa kiena ne Ntewa sike e la, naþa apiari e piamenala a e pilepile na limala. La asumā sinelan ke asape kiela lala na monar ve kerkeviu vaþisi, taulu yaru taþena lala. Amiu apisu mēna ga naþa lala apil mālala in kulsota na leniena lala piayavi paþisi. Ana la apilave manene la e suri la nene, a la sinelan ga asape yaru la ayeluar la ea.

⁶ A e pogos na þaþagena lala a e loyuma na lotena mēna ga lala, la sinelan naþa silaga asape atoga tano e lelen yerkawa lala,

⁷ a pogos naþa visae la ayaloro e lelen na wilwilena, sinelan asape monar yaru lala avatanon la, a avio ruru la avisa avisave ‘!Oo navianena wo, pokolulagi!’

⁸ “Ana amiu na, amiu kiamiu naviana taaga ga rui, a amiu na sa naþa na mratava taaga ga, ana visae ve sanene na amiu ve atamān re si yaru lala avio amiu laþas avisa avisave ‘Navianena.’

⁹ Ana þisi na amiu ve avio re yaru e yomarava nini avisave arimamiu, vanon naþa amiu na Arimamiu na taaga ga, naþa naga sike ma e peni.

¹⁰ A þisi na amiu ve atamān re yaru la avio amiu laþasia avisave amiu ave kiela nasumonena, komin naþa amiu na, kiamiu nasumonena na taaga ga, naþa Navisaarena nene.

¹¹ Kiamiu yerkawa ai naþa naga to laa metava, naga monar imi ve sa ga yaru na yumãae kiamiuena.

¹² Ana yaru ai naþa naga ga pisirlua naga vena vim ve yerkawa, þisi na Ntewa kila naga sumã tano. Ana yaru naþa naga ga kila naga sumã tano, þisi na Ntewa visirlua naga va metava.”

Yesu pisawal napiowaena kiena ne nasumonena nalotena lala

Mak 12:40; Luk 11:39-42,44,52, 20:47

¹³ Ana Yesu pisa pan la, pisape “! Amiu navianena na navisaluaena lala amio Varasi lala, ake! Amiu akila kare amiu paþisi wa, þisi na viowa van amiu vaþisi, komin naþa kiamiu visena lala pona po, ana losinemi lala piowa a kona rui. Yaru la sinelan asape aimi loyumã e nasuþenena kiena ne Ntewa, ana amiu asumã akotawela ke ga e marala, vena ve aimi re si loyumã narui, a metavania, amiu mēna ga pe apimi re loyumã poli.

¹⁴ “!Amiu navianena na navisaluaena lala amio Varasi lala, ake! Amiu na apiowa ga. Amiu na asumã aþure piavin ke kiamiu leniena la paþisi, ana apisokani ke ga ne, vanon naþa e ke e pogos nene, amiu asumã akila kotalia ke letano la nene, vena avinaun kiela suri lala. Vanon suri ne nanene, þisi na kiamiu nakoena mārera re la sane.

¹⁵ “!Amiu navianena na navisaluaena lala amio Varasi lala, amiu na amiyumãe piowa ga! Amiu akekarana naþa ayaloro e waa lala, vena ava e purvanua taþena lala, vena akilali naþa aure yaru lala ataveve amiu. Ana pogos naþa amiu ataulu tai imi narui, ana ve ve piavi re naga la make kiamiu þelaga naþa piowa, va viowa la sane, taulu amiu sina.

¹⁶ “!Ake, amiu na sumonena lala, na ape kilamara þala ga lala! Akila kare amiu paþisi wa, þisi na viowa vaþisi van amiu. E pogos naþa yaru lala apisa kia kien suri tai vena kila kiela navisaarena sumãlu mārera, visae avisa avisave ‘Nepisa lelaga nene, Yumã Wa m̃ana ne Ntewa na mēke ne,’ ana siraun, visae akilaro sina navisaarena nene, amiu apisape ‘Nanene na naga poga ga nene, ve ve suri re tai.’ Ana

visae avisa avisave ‘Nepisa lelaga, suri la naþa pe kol, la ne asike e Yumã Wa m̃ana ne Ntewa ne,’ amiu apisa apisape visena nene na mārera paþisi, taþatete si akilarovia.

¹⁷ Aa, amiu na kilamaramiu þala ga, a þarimiu pe wowe. ?Ya ne pe suri wa manene la sane: suri la naþa pe kol nene, pona Yumã Wa m̃ana Ntewa naþa kila kol nene pe suri wa tai?

¹⁸ “A visae yaru tai visa visave ‘Nepisa lelaga nene, wonta na mēke ne,’ amiu apisa apisape visena nene pe suri korena ga. A visae naga visa visae ‘Nepisa lelaga nene, kuþaþaena nane mēke e wonta,’ nanagane amiu apisa apisape visena nene naga mārera paþisi, yaru taþatete kilarovia.

¹⁹ !Sa naþa nepisa rui, amiu ape kilamara þala ga! ?Ya naþa pe suri wo manene: kuþaþaena naþa mēke e wonta, pona wonta naþa kila kuþaþaena nene pe suri wa tai?

²⁰ Amiu na monar avisu kilale suri la nene, vanon naþa naga naþa ki wonta vena kila kiena visena va mārera, naga sumã ki ke mēna ga amio kuþaþaena naþa sumã e wonta.

²¹ A yaru naþa ki ke Yumã Wa Mana Ntewa, naga ki ke mēna ga yerkawa naþa m̃ana yumã,

²² a yaru naþa ki ke pa ma e peni, naga sumã kipran ke mēna ga lele natotanoena wa kiena ne pupia Þarin Suþe keviu nene, ana visae ve sanene, naga sumã ki mesmesun ke nena Ntewa narui.

²³ “!Amiu navianena na navisaluaena lala, amio Varasi lala, ake! Amiu akila kare amiu paþisi wa, þisi na viowa manene van amiu vaþisi. In na nekilia m̃aga naþa amiu asumã apisu ruru ke silaga, naþa visae amiu awar kamiu kinanena ve lualima, þisi na monar ala tai va e Yumã Wa m̃ana ne Ntewa, sa naþa navisaluaena naga sumã pisa, a amiu asumã akila ke sanene e kiamiu suri punu ga, pano tol mēna ga narin m̃ak lala a suri mēna ga la ne sane mrasil. Ana pupia suri la naþa navisaluaena naga pisa, ana amiu na pe asitom re nena

ga, sa naþa naga pisa pisape amiu na monar amesmesu ruru wo, a amiu monar asitom yaru taþena lala, a amiu monar auarar kiamiu navisaarena lala. Visae amiu sinemiun awarar narin suri la ne sanene m̃arera, nanene na poga ga, ana pupia suri la nene naga popon visae amiu akila rui, ana peraga.

²⁴ “!Amiu nasumonena lala, ake, amiu na ape kilamara þala ga! Amiu asuṃña akila ke sa naþa pogos naþa amiu amun suria, ana amiu asitom manene la naþa ve akilalu re naþa akilalua narin nene tai naþa naþa talilu pito teke e m̃amiu piala, ana amiu pe apisu kilale re naþa amiu asuṃña asinomlaunlae ke puluk la naþa asike e poli.

²⁵ “!Amiu navianena na navisaluaena lala amio Varasi lala, ake! Amiu akila kare amiu paþisi wa, þisi na viowa van amiu vaþisi. Amiu asuṃña ataveve ruru ke narin navisaluaena lala e lepas na kevanen m̃amiu piala amio kamiu pialo lala, ana amiu asitom ke asape kiamiu suri punu ga mekiki ruru narui. Ana kiamiu pialo la nene punu ga pulen ga kinanena na vinauena naþa amiu aþar e þelaga na sinesunena ga lala.

²⁶ Amiu Varasi lala, amiu ape kilamara þala kemua lelaga. Visae amiu sinemiun asape kamiu pialo amio m̃amiu piala lala imi ikiki ruru wo silaga, þisi na amiu ve akokonia la re si e kinanena la naþa kiamiu mlamulena viowa sike ea.

²⁷ “!Amiu navianena na navisaluaena lala amio Varasi lala, ake! Amiu na akila kare amiu paþisi wa, þisi na viowa van amiu vaþisi. Amiu na sa ga tampona na yaru naþa mare, naþa amioa wosia miyuwowo na miyuwowo ruru po paþisi, ana e losa na pulen ga puriu na yaru mare nene, amio tasnena naþa menun ke na wa.

²⁸ A sanene, na visae pogos naþa yaru la apisu ke yepas nemiu vanua, þisi na lala asitom ke asape amiu na amesmesu ruru ke ne, ana peraga, e losinemiu lala na apuleni ga visokanena a mlamulena viowa lala.

²⁹ “!Amiu navianena na navisaluaena lala amio Varasi lala, ake! Sila ga na amiu

asuṃña apisi ke ga e kulugomiu. Amiu na asuṃña ga apisuar ruru ke tampona kiena ne navisawalena na sumo lala, ana amiu asuṃña ga apaia ke m̃ena ga kilavaru na nasitoṃalena kiena ne yaru mesmesu lala, ana sanape: ?Amiu na asitom ke asape amiu amesmesu ruru m̃ena ga amio la nene?

³⁰ A amiu asuṃña apisa ke apisape visae amiu amal ke rui e pogos kiena ne repimiu la na nanua sumo nene, vera na amiu ve amio re la nene e pogos naþa la aṃe moṃar navisawalena lala kiena ne Ntewa.

³¹ Ana e kiamiu visena na visokanena nene, amiu asuṃña apisa kare amiu ke sina ga, vanon naþa visena nene, kana kinasia sane pisape amiu ape lus ruru nenaga kiena ne repimiu lala li nawe-moṃaren navisawalena lala.

³² Poga ga, amiu ayuṃnaen va m̃aga, amiu akilali naþa akila make yuṃnaena nene naþa repimiu lala la asiar þesan nanua sumo rui.”

Nakoena kiena ne li nasumonena nalotena lala

Luk 11:47-51

³³ Ana Yesu pisi m̃arera ke pan la na wa, pisa pisape “Amiu na sa nena ga lom̃ara lala. ?Amiu asitom asape amiu akilia aure matan kiamiu nakoena e lele naloge viowaena? !Peraga!

³⁴ Þisi na visae neiila navisawalena lala aiṃasu, amio yaru lala naþa ape manmarua ruru e visena kiena ne Ntewa, amio navianena na navisaluaena lala, visae aiṃasu pun amiu, ana þisi na amiu awe moṃar laþasia amare e laki torovia, a laþasia amiu awela e kiamiu yuṃna na leniena lala, a þisi na aṃene plan la m̃ena ga e kiamiu pulkumali lala.

³⁵ Ana þisi na amiu akilalue ga ve sanene van la vano-o, ana þisi na amiu ke ga narui naþa akus nakoena vanon marena kiena ne yaru mesmesu la punu ga nene naþa repimiu nasumo lala aṃe moṃar la amarmare rui. Nanene siar e Epela, naþa naga pe kila re suri tai piowa poli, pimi pimi tol Sakaraea naþa narina ne Parakaea, naþa repimiu la

nene añemñar naga mare lavisin wonta, loyũna e Yũna Wa mñana ne Ntewa.

³⁶ Lelaga nevisa van amiu, nakoarena nene vanon nawemñarena kiena ne la nene, p̃isi na imi tol amiu la nene, naña amiu amal ke nanagane.”

*Yesu Sinena Mie Yerusalem
Luk 13:34-35*

³⁷ Ana Yesu tagin Yerusalem, naga pisa pisape “!Yerusalem oo, Yerusalem oo! ? Vanon ya ne ko osuñña om̃e momñar ke navisawalena lala amare sanene, a okove momñar ke yaru lala naña Ntewa mligan la apimñasu puñña? Yam moki liu naña inu sineun nesape neligan luññau yervivi kioñña yeririna lala, sa naña lakaporo p̃ere narina lala apimi atapolou vatano e kupena, ana kioñña yeririna lala pe akekaran in re poli.

³⁸ Ana ko opisu ke ne, Ntewa mligan ko ke narui, ana p̃isi na ko oimi ove yo yau korena ga narui.

³⁹ Ana nevisa van ko, p̃isi na kioñña yeririna lala tañatete avisu inu sina, vano vano tol pogos naña kioñña yeririna lala avisa sina ga sanene, avisave ‘Ntewa Namava, ovisa ruru naga nene naña pimi ke e kioñña kia.’”

24

*Yesu pisawal naña p̃isi na awe plan
Yũna Wa Mana Ntewa
Mak 13:1-2; Luk 21:5-6*

¹ Ana Yesu molue e Yũna Wa mñana ne Ntewa, ana pogos naña naga suñña mial pano, kiena nalogena lala apimi akilologia pupia yũna la naña asike loyũna e kove na Yũna Wa nene, naña la apowo pañisi, ana la apisape Yesu kirañatau si viñu la.

² Ana Yesu pisa pan la, pisape “?Amiu apisu ke yũna la nene? Lelaga inu nevisa van amiu, yũna la nene, p̃isi na tañatete si kana kilavaru ne tai naña toñña ga towawa ruru teke e lelena, komin p̃isi na yar lañasia aimi, awe plan make nena yũna la nene vano.”

*Pog naloge viowaena monar imi
Mak 13:3-13; Luk 21:7-19*

³ La amial sanene, apimi e Kunus Na Purolip, ana Yesu totano e yo nene. A pogos naña pe yaru tañena lala asu re poli, kiena nalogena lala apimi puna, ana apiun tania, apisape “?Pisi na awe plan Yũna Wa nene pogwai, a kile ya na kioñña nawasuñeena, naña p̃isi na ko owasuñe ko sina e luas nen pogos nini?”

⁴ Ana Yesu pisatam̃e la, pisape “Popon amiu avisuar ruru e amiu, vena ve yaru imi ve visa kotalia amiu re,

⁵ vanon naña p̃isi na yaru la ve moki naña ala kiau kia, ana p̃isi na aimi avisa avisave ‘In na nepe Navisaarena nene,’ ana visae ve sanene, p̃isi na aure yaru la ve moki naña ava avewowe.

⁶ Ana e m̃ena ga e pogos nene, p̃isi na amiu aloge m̃aagena na mara naña suñña lavisi, a lologena na mara la naña sike perina, ana amiu ve sinemiu yuyuwawa manene re. Suri la nene monar imi kakate sumo, ana nanene na pe legien maro re poli la wa.

⁷ A p̃arin suñe lala, p̃isi na akila mara amio p̃arin suñe tañena lala, a purvanua lala p̃isi na asuññalu akawela amio purvanua tañena lala. A yo kari ga e yomarava nini, p̃isi na pupia viso, a yokorena yemninu vañisi e yo punu ga.

⁸ Ana suri la nene, pe legiena maro re nene po la wa, ana sa ga sira naña m̃eñena, naña sane mloge p̃esan m̃asina mlaea vena war sisi, ana pupia naloge viowaena naga pere na wa.

⁹ “A e pogos nene narui, amiu nene naña kiau kia sike e amiu, yokorena auarar amiu m̃arera, a akoa kare amiu m̃ena ga, vano vano-o awe momñar amiu amarmare. Ana yaru na purvanua tañena lala ve sinelan amiu re nenaga, la akawe kiamiu visena lala.

¹⁰ Suri la nene, p̃isi na kila yaru la ve moki naña ve aviawa re si m̃arera e inu, a p̃isi na la nene naña amlelaga p̃esan e inu, p̃isi na ve sinelan re si la naña amlelaga ke m̃arera e inu na wa e pogos nini, a p̃isi na la avie plan la ava e limana ne kiela nasinekar la nene.

¹¹ Ana yokorena navisawalena navisokanena la ve moki asuññalu, a p̃isi na

la aure yaru la ve moki ava ayal wowe.

¹² Yokorena naviowaena imi ve keviu manene va laa sane, kila yaru la ve moki vaṗisi naṗa sinela la imi marmare, la pe asitom re si Ntewa poli.

¹³ Ana yaru naṗa naga suṃalar ṃarera suṃa ga e inu vano vano-o pogos ṃarera nene ṗisi, ṗisi na Ntewa tamalia naga.

¹⁴ A lologena wo na nasuṗenena nene, yokorena alologon va yolai la punu ga e yomarava nini, ṗisi na kile tai naṗa pisawal ke pisape legiena maro pimi ke narui.”

*Pupia pog ṃarera tai garu Yerusalem
Mak 13:14-23; Luk 21:20-24*

¹⁵ Ana Yesu pisa ṃena ga visena taṗena tai, naṗa popon visae yaru naṗa wolovia, kilali naṗa kilia ruru kana kinasia. Visena nene pisa sanini, pisape “Yokorena ami akilia avisu avisirlua nono tai naṗa viowa na viowa manene laa, naṗa yoko suṃalu ana warnena kare manene laa yo wa na Yum̃a Wa Mana ne Ntewa. Suri nene Navisawalena Taniel naga pisawal nanua sumo rui,

¹⁶ a pogos naṗa ami avisu suri nene, ami naṗa asike Yutea, ami popon aure, ava atapolou e kunus lala.

¹⁷ E pogos nene, visae yaru tai va ruru teke vanua lavisin ṃana yum̃a, naga monar ve va re si loyum̃a vena war kiena suri laṗasia,

¹⁸ pona visae yaru sike e kana lokove, naga monar ve vito re si um̃a vena tar ṃana kulsota, naga monar kiriri vitaṗili ga sanene vano.

¹⁹ Ana e ṃena ga e pogos nene, yokorena viowa la va sira la naṗa la asena, amio ṃena ga la naṗa asuṃa amla ke yu pa kiela sisi tomtom lala.

²⁰ Visae ve sanene, popon ami alen wo ami vena kiami pog na ureena nene, ṗisi na ve imi tol ami re e pogos naṗa miava keviu, pona e legiena wa tai,

²¹ vanon naṗa pogos ṃarera nene, ṗisi na ṃarera la sane taulu ṃena ga pogos ṃarera taṗena lala, naṗa siar e pogos naṗa Ntewa sii yomarava nini pimi

tol nanagane, a yokorena ve pupia pog ṃarera re si tai ve sanene pogos tai.

²² Ana Ntewa naga sitoṃal rui pisape yokorena tero pogos ṃarera nene imi ve plas ga, vanon kiena yeririna la naṗa naga mligan plan la vena ave kiena, naṗa asike e pogos nene. Ana visae naga ve tero re ve plas sanene, yokorena taṗatete yaru tai kilia mali sike na.

²³ “Ana e pogos ṃena ga nene, visae yaru tai visa van ami, visa visavenua ‘Ami apisu ke yaru nene, nanene na Navisaarena nene,’ pona visae visa visavenua ‘Nane Navisaarena ne nane gare,’ ana ami na ve alelaga re e kiena visena la nene,

²⁴ komin naṗa navisaarena la mokliu naṗa pe ape lelaga re poli, la akilia asuṃalu, amio ṃena ga navisawalena navisokanena la ve moki, a ṗisi na la nene akila pupia kile lala, amio suri nailanena ṃena ga lala. Yokorena akila sanene, ana ṗisi na la aure yaru lala avano avewowe, vano-o tol naṗa ṗisi na akilali naṗa aure ṃena yeririna kiena ne Ntewa naṗa naga mligan plan la vena ave kiena, ana la taṗatete akilia akila.

²⁵ Ana nanagane, akilia avisuar ami, komin nepisawal suri la nene pan ami sumo rui, e pogos naṗa pe aṗaripo re yo poli wa.

²⁶ “Ana vanon suri ne nanene, visae yaru la avisa van ami, avisave ‘Navisaarena nene, nanagane naga sike gare yokorena nene rui,’ ana ṗisi na ami na ve avanon re naṗa avisulia, pona visae la avisa, avisave ‘Naga ke narui, naga nane sike ga loyum̃a e yum̃a nene,’ ṗisi na ami ve alelaga re e visena la ne sanene.

²⁷ Ana pogos naṗa Narina ne Yeririna wasuṗe sina ga vitomi, ana ṗisi na vitomi merarava ruru nenaga va yeririna la punu ga, sa naṗa yekarpla naṗa pilavila, a vivaga ruru make ga e yo punu ga ma e sinapane.

²⁸ E pogos nene, ṗisi na ve sa ṃena ga naṗa visae suri mare tai ṃeke e yo tai, ana pupia pepaum̃a la naṗa akan ke suri

mare lala, p̄isi na aiminia, la monar ave p̄egas ga asike e yo nene.”

Pisi na narina ne yeririna imi sina

Mak 13:24-27; Luk 21:25-28

²⁹ A Yesu pisa pisape

“Ana siraunia, mesmesun nena e pogos naḗa naloge viowaena nene visae p̄isi narui, p̄isi na mrae imi ve pupumalo, a kupario ve tego re sina.

A verue la ne ma e sinapane p̄isi na aloloru, a suri m̄arera lala nae ma e sinapane, yokorena Ntewa naga kululun la akululu.” *Ais 13:10, 34:4*

³⁰ “E pogos nene, kile nawasuḗeena kiena ne Narina ne Yeririna yokorena warpoyo ma e sinapane, a yokorena yolai lala nae yomarava nini atagtagi alolokai, a p̄isi na la avisu Narina ne Yeririna molue e lul lala amio pupia nam̄areraena a pupia naurarenakam kiena.

³¹ Ana siraunia, pupia kumasua yelu, a naga ligan kiena navisi lala ava e yo punu ga e yomarava nini a ma e peni, vena aure kiena yeririna la naḗa naga mligan plan la p̄isi rui, aimi lele ve taaga puna.”

Pe yaru re tai naḗa kilia pog na legiena maro nene poli

Mak 13:28-32; Luk 21:29-33

³² Ana Yesu pisa, pisape “Amiu asitomli purlaki nene, naḗa asape purpiliva ne. Naga kiena suri navian amiüena tai teke ea, naḗa amiu na monar avisururuia. Pogog naḗa amiu avisu naḗa naga korowas nena imi memaena, a imi malumu, sitos la siar miyulua sina, ana amiu akilia asape pogos na yepisinu m̄arera pimi ke lavisi narui.

³³ Ve sanene, pogos naḗa amiu avisu kile la nene e yomarava, sa naḗa nepisa pan amiu rui, ana amiu akilia naḗa Narina ne Yeririna naga suḗa ga e pulutava rui, lavisi ke molue narui.

³⁴ Nevisa suri na lelaga van amiu, yokorena suri la nene p̄isi na imi kakate sumo, ana siraunia, teras kiena ne yaru la naḗa la amal ke e pogos nene, p̄isi na naga kilia kovio vetan yomarava nini.

³⁵ A yokorena sinapane amio yomarava nini lalua m̄ena ga akovio veraga, ana kiau visena lala taḗatete akovio pogos tai.

³⁶ Ana pe yaru re tai naḗa kilia kana legiena pona aora nena naḗa p̄isi na Narina ne Yeririna naga imi ea. Navisi lala nae ma e peni, amio Narina ne Ntewa, la m̄ena ga amninue ga, ana Ata ga, naga taaga naga kilia m̄aga.”

Amiu monar akila ruru amiu asuḗa ga

Mak 13:33-37; Luk 17:26-30,34-36

³⁷ Ana Yesu pisa pisape “Vano vano tol pogos naḗa Narina ne Yeririna imi sina, ana p̄isi na taḗatete yaru la akila ruru la wo, ve sa ke pogos kiena ne Yermarua Noa nanua sumo.

³⁸ Ana e pogos nene narui, sumon naḗa pupia womie mlau, ana yaru lala asuḗa akinana m̄aga, a asuḗa amun m̄a namunena lala, a akila ke talopaena la sanene, pimi tol pogos naḗa Noa pa loyuḗa e kiena pupia waa naḗa naga miyuḗaenia.

³⁹ Ana yeririna la nene asuḗa ga sanene, la pe asitom re suri tai poli, ana apisu ga pupia womie nene mlau pimi p̄ere plan la. Ana inu nevisa van amiu, yokorena e pogos naḗa Narina ne Yeririna naga wasuḗe sina imi, ana p̄isi na la nene maran ve taaga ke ga ve sa nanua sumo e pogos kiena ne Noa.

⁴⁰ Visae yaru la ve lua, lalua asuḗa ayuḗae ke e lokove, p̄isi na navisi lala aimi atarlua tai, ana aligan tai m̄eke na,

⁴¹ a visae sira ve lua, naḗa lalua asuḗa ayuḗaen ke kinanena, ana la atarlua tai, ana aligan tai m̄eke na.

⁴² “Sanene, ana amiu monar asuḗa avisuar ruru amiu, komin naḗa amiu amninue ga e legiena ya naḗa kiamiu Suḗe imi sina warpo yo.

⁴³ Amiu na monar avisu kilale suri nene, sa naḗa visae yerkawa tai suḗa ga, ana visae naga kilia m̄aga pogos naḗa yokorena yaru navinauena tai imi e m̄ana yuḗa vena vinaun kiena suri lala, p̄isi na yerkawa nene suḗa visuar ruru silaga, vena suḗate ruru yaru navinauena nene imi.

44 Ana ve sanene, na amiu monar asuñña avisuar ruru amiu, vanon naña Narina ne Yeririna p̄isi na naga imi kate, e pogos tai naña amiu pe asitom re asape p̄isi na naga imi e poli.”

Pakaiwa na yaru na yuññaena naña kiena yerkaŵa p̄asuñe sina pimi

Luk 12:41-48

45 Ana Yesu pisa pisape “?Visae yaru na yuññaena tai, naña naga pe manmarua ea, naga p̄uarar ruru yuññaena, naga yuññaenae sanape? Naga yuññaenae sanene, naña visae kiena yerkaŵa naga ligana yo vena va perina, ana yerkaŵa nene ligana naga vena naga visuar ruru e yaru na yuññaena tañena lala, ana yoko yaru nene naga uarar ruru yuññaena la nene.

46 Ana pogos naña yerkaŵa nene wasuñe sina, ana kilia lual naña yaru na kiena yuññaena nene suñña ga uarar ruru ke yuññaena lala na wa. Ana yokorena yaru na yuññaena nene loge wo vañisi,

47 komin naña yokorena yerkaŵa nene ligana kiena suri punu ga e limana ne kiena yaru nene. Ee, lelaga, yoko Ntewa naga kila m̄ena ga ve sa ke nene.

48 “Ana visae yaru na yuññaena nene viowa ga, a pogos naña yerkaŵa nene ligana yo va suñña perina ve piavi, ana yaru na yuññaena nene kilia visa, visave ‘?E suwala, yerkaŵa nene pa su piavi la wa, pona ve wasuñe re si yo narui, pona m̄a sanape?’

49 Ana p̄isi na naga suññalu kila viowa va yaru na yuññaena tañena lala, a yokorena naga va suñña mun m̄a wii, ve wowe amio yaru na munen wii lala, ana asuñña akan kare ke ga kilavaru kiena ne yerkaŵa nene na.

50 Ana yokorena yerkaŵa nene naga wasuñe imi e legiena tai naña yaru na yuññaena nene ilan ga, a e pogos tai naña yaru nene naga pe sitom̄al re sape p̄isi na naga imi ea.

51 Ana yerkaŵa nene p̄isi na naga la nakoena ve keviu va yaru nene, naña yokorena kila naga va sike amio yaru na visokanena tañena lala e yo naña yaru la asuñña atagi, a akar ga maluela ea.”

25

Pakaiwa na sira m̄ee lualima

1 Ana Yesu pisa, pisape “E pogos naña Narina ne Yeririna wasuñe sina ga, yokorena nasuñenena kiena ne Ntewa naga ve sa naña p̄akaiwa nini pisa. Pakaiwa nini, naga pisayu p̄ağagena na talopaena tai, naña taveve kiela p̄elaga, la ne e lepas naña puna ne yerm̄ene la añure naga pa e yuñña m̄ana ne sira m̄ee vena aure sira nene amio naga imi amio la. Ana vinena ne yerm̄ene nene la lualima la asike ga uñña, vena la akila ruru suri la punu ga. Ana lavisi yemalo, ana vinena lala la añar kiela kapi vivaga lala, la amiyalilu m̄rapan la, vena la punu ga awasuñela si aimi.

2-4 Ana vinena la nene, lala lima la ape manmarua, asitom ruru suri po, naña añar m̄a piawi na sirveve lağasia vena akokonia sina ga kiela nakapi vivaga lala, ana la lima na ape tampos ga, la pe asitom ruru re si sanene poli, ana la añar m̄aga kiela nakapi vivaga lala, ana la pe añar re si sirveve lağas poli naña vena visae taña, ana akilia akokonia sina ga.

5 Ana lala asuññate m̄a yaru natalopaena nene pano-o, ana naga susun pañisi, kila sanene sira m̄ee la lualima nene, atekavito pano-o pañisi, ana amom̄alio.

6 “Ana kolemallo ko yepelilika, ana yaru tai pio, pisape ‘!Yaru na talopaena, pimi ke lavisi warpoyo narui. Amiu aimi avitawe naga!’

7 Ana sira m̄ee la lualima nene atavilo, akila ruru kiela nakapi vivaga lala vena vivaga ruru sina. La akila plan m̄au na kilika na kapi lala, a apisuveve kiela sirveve lala.

8 Ana la naña la pe asitom ruru re suri poli, apisu kilale kiela nakapi vivaga lala lavisi marmare, sirveve p̄isi, ana apiuntan lala p̄asia, apisape ‘Awis suwala, amiu akilia ala re narin sirveve van imimi wa, a visae peraga yokorena kiamimi nakapi la amarmare yo.’

9 “Ana la naña asitom ruru suri po, apisa apisape ‘!Peraga yo! Sirveve nini pe torokin punu ita re poli. Popon amiu

ava li si e yuñā nawilwilena vena aul si kiamiu lañasia.'

¹⁰ "Ana la apanon si asape aul kiela sirveve, a pogos naña apa ke ga wa, yaru natalopaena nañani pimi poru. Naga pa loyuma e mñana yuñā, a sira mñee la lima nene naña la asumñatea, lala amio naga apa veraga e kinanena na talopaena. Ana pogos naña yeririna la apa asike loyuma rui, ana la akotava ruru e mratava.

¹¹ "Ana siraunia, sira mñee tañena la nañani añasuñe la ke sina ga, ana asumñalu asumñā mratava, apio apisape 'Meneu, mñeneu, awis ovieta va meimñasu loyuma!'

¹² "Ana yaru naña pisa ga pan la, pisape 'Lelaga nevisa van amiu, nemninue amiu ga!'

¹³ Ana Yesu pisa pae ãakaiwa nene ãisi, ana pisa pisape "Poga ga, ana amiu na monar avisuar ruru wo, vanon naña amiu pe akilia re legiena na suri nene poli amio mrae nena."

Pakaiwa na yaru telu naña la apisuar kilavaru tai

Luk 18:11-27

¹⁴ Ana Yesu pisa, pisape "Ana pogos naña Narina ne Yeririna wasuñe sina ga, ãisi na ve sa mñena ga naña ãakaiwa nini pisa, pisape: Yerkawa tai, kila ruru ke pisape ãisi na va e yo tai naña koperina na koperina, e purvanua tañena tai. Ana yerkawa nene pio kiena yaru na yuñāena lala vena aimi puna, ana naga pisi pan la, mligan kiena suri lala e limala, vena avisuar ruruia ayuñāe amio.

¹⁵ Ana naga pisuveve kiela na kiliaena lala ãisi, ana mligan taga na kilavaru lima te liman tai, a mligan taga na kilavaru lua te limana yaru tañena, a mligan taga na kilavaru taaga e limana ne tañena, ana siraunia naga mligan la, ana pa sike koperina na piavi towe la ga.

¹⁶ Ana yaru naña mla taga na kilavaru lima, mial ke veraga pano, kila yuñāena la moki e kilavaru nene, pano-o tol ke sina ga taga na kilavaru tañena lima.

¹⁷ Ana e ke e ãelaga nene, yaru mñena ga naña mla taga na kilavaru lua, naga

mñena ga taulu ke sina ga taga na kilavaru tañena lua.

¹⁸ Ana yaru naña mla taga na kilavaru taga ga, naga pa kili ãiliñili e porotano, vena sinwan kilavaru kiena ne kiena yerkawa nene.

¹⁹ "Ana pogos moki ãaro pa rui, ana yerkawa kiena ne yaru la nene naga ãasuñe ke sina ga pimi, ana naga sinenan pisape visuveveli kilavaru la naña naga ãar pa kiena yaru la telu nene.

²⁰ Ana yaru naña naga tol taga na kilavaru lima sumo, ana naga pimi sumñalu se marana ne kiena yerkawa nene, naga ãar ke sina ga taga na kilavaru nene lima. Ana naga pisa pisape 'Mara, nanua sumo ko oñar taga na kilavaru lima pan inu, ana na nini. Ana netaulu sina ga taga na kilavaru lima nini su metavana nanua sumo, naña netauluia na pe kioñā.'

²¹ "Ana yerkawa nene pisa pania, pisape 'Po pañisi, potena. Ko na okila yuñāena po pañisi wa. Ko opuarar ruru narin yuñāena nene naña nemligan e lumomñā, ana ãisi na neligan ko vena ko ovisuar kiau yuñāena kerkeviu la ãasia. Poga ga, oimi omio inu e kiau ãañāgena na kekarena nini.'

²² "Ana yaru naña naga ãar taga na kilavaru lua, ana naga mñena ga pimi sumñalu se marana ne yerkawa nene. Ana naga pisa pania, pisape 'Mara, nanua sumo ko otar taga na kilavaru lua nini pan inu. Ana taga na kilavaru lua ne na nini, amio sina ga taga na kilavaru lua naña netauluia na pe kioñā.'

²³ "Ana yerkawa nene pisa pania, pisape 'Po pañisi! Potena, ko na okila yuñāena po pañisi wa. Ko opuarar ruru narin yuñāena nene naña nemligan e lumomñā, ana ãisi na neligan ko vena ko ovisuar ruru kiau yuñāena kerkeviu la ãasia. Poga ga, oimi omio inu e kiau ãañāgena na kekarena nini.'

²⁴ "Ana yaru naña tol taga na kilavaru taaga ga, naga pimi sumñalu se marana ne yerkawa nene, pisawo ga, pisa pisape 'Mara, nesitom nesape ko ope yaru

m̄arera tai. Ko okilia ola kinanena e lokove naṓa ko pe omiyuṓaen re poli, a ko okilia ola m̄ena ga mralaki e purmraki naṓa pe ko re omapila poli.

²⁵ Vanon suri ne na nene, nemaraun ko ea, ana nepa nesinwan ga kionṓa kilavaru e porotano. Ana nanini, ovisu kionṓa kilavaru nane su ruru ga suṓa ne.'

²⁶ "Ana yerkawa nene pisataṓea, pisape '!Aa, ko na yaru viowa tai nene naṓa ne, ko ope yowena paṓisi wa! Ko opisa kare inu ṓisi rui, osape in na nepe tewena tai, ana visae ko opisus naṓa in na nepe yaru m̄arera tai sanene, vanon ya ne ko omligan ga kilavaru su korena ga suṓa sanene?'

²⁷ Visae ko ova oligan ga e yuṓa na kilavaru vera na woga ga, vena pogos naṓa neimi si sanini, nekilia nelalua sina amio ninusa naṓa kapuru ke e yepasia.'

²⁸ Ana yerkawa nene pisi pa kiena yaru lala, pisape 'Aulai, avano alalua kilavaru nene vetan limana, ana ala va van yaru naṓa ṓarar ke taga na kilavaru lualima rui.

²⁹ Nevisa sanini van amiu, visae yaru naṓa kiena suri moki rui, ṓisi na naga war va la sane vena kiena ve moki vaṓisi, ana yaru naṓa pe kiena suri re poli, ṓisi na naga kilia kilalu narin suri naṓa naga mla ke na.

³⁰ Ana amiu akoven melioi nene va vanua e yo malolo, e yo naṓa yaru lala asuṓa ga atagi ke ea, a akar ke malueta ea! "

Legiena na liṓereena

³¹ Siraunia, ana Yesu pisa pisape "Pogos naṓa Narina ne Yeririna vitomi amio navisi lala e kiena naurarena, ṓisi na naga imi ve ṓarin Suṓe narui, a ṓisi na naga vitomi va e kiena lele wa na totanoen ea.

³² Ana navisi lala, ṓisi na awere yolai punu ga na yomarava nini aimi asuṓalu ase marana. Ana e pogos nene narui, ṓisi na naga liṓere yaru lala ava e ṓegas ve lua, ve sa naṓa yaru tai navisuaren suri mali lala, naga liṓere kiena sipsip lala e nane lala.

³³ Ana ṓisi na ṓarin suṓe nene ligan kiena sipsip lala ava ase kiena lepas na ṓamarua, a nane lala ava ase laṓas na ṓaṓeli.

³⁴ Ana ṓisi na naga visa van la ne asike e lepas na ṓamarua, visave 'Amiu yeririna ne la na nene naṓa Ata naga visa ruru amiu. Amiu aimi narui, a akus lelemiu loyuṓa e kiena nasuṓenena, naṓa naga miyuṓaen ruru suṓate amiu ke rui nanua sumo, e pogos naṓa naga sii yomarava nini ea.

³⁵ Amiu aimi, vanon pogos naṓa visae viso kar inu, amiu amla kinanena pan inu, a pogos naṓa moto kar inu, amiu amla wii pan inu. A pogos naṓa nepe wolawa ga, amiu aṓure inu nepa e m̄amiu uṓa,

³⁶ a pogos naṓa yepeu korena ga, amiu amla kulsota pan inu. A pogos naṓa nemai, amiu apimi akaten inu, a pogos naṓa nesike e yuṓa na loge viowaena, amiu apimi asun amio inu.'

³⁷⁻³⁹ "Ana yaru mesmesu lala naṓa asike e lepas na ṓamarua ṓisi na aviun tania avisave '?Ana Suṓe, sanape? Ko osuṓa apisa ke osape imimi memiila ko e kionṓa pogos m̄arera la ne sanene, ana imimi pe mesitom re nena mesape mekila sanene pan ko poli-i ṓisa. ?Imimi mekila suri la nene pan ko na pogwai?'

⁴⁰ "Ana yoko ṓarin Suṓe nene visataṓe la, visave 'Lelaga nevisa van amiu, pogos naṓa amiu akila ke sanene pan yaru na m̄au mratava tai, ana sa ga naṓa akila ke ga pan inu narui, pe suri korena ga naṓa naga pe yaru na sanape.

⁴¹ "Ana siraunia, ṓisi na naga pisi m̄ena ga pa la naṓa e lepas na ṓaṓeli, yokorena visa van la, visave 'Amiu aure vetan inu, Ntewa piain nakoena viowa tai pan amiu ṓisi rui. Amiu ava e kapi nene naṓa pivaga m̄a silaga, taṓatete mare pog tai, naṓa suṓate ke Yermare Lego amio kiena navisi lala vena la ava ea.

⁴² Vanon pogos naṓa viso kar inu, ana pe amla re kinanena pan inu poli, a pogos naṓa moto kar inu, ana pe amla re wii pan inu poli.

⁴³ A pogos naþa nepe wolawa, ana pe aþure inu re nepa mamiu umã poli, a pogos naþa yepeu korena, ana pe amla re kulsota pan inu poli, a pogos naþa neminana, pona nesike e yumã naloge viowaena, ana pe apimi akaten inu re poli.'

⁴⁴ "Ana þisi na la avisatamãe þarin suþe nene, avisave '?Ana Suþe, sanape? ? Imimi momãl ko na pogwai naþa ko viso kar ko, pona moto kar ko, pona ko ope wolawa, pona ko yepemã korena ga, pona omai, pona osike e yumã naloge viowaena? ?Ana pogwai naþa ko sanene, ana imimi pe mepimi memiila ko re poli?'"

⁴⁵ "Ana naga þisi na visatamãe la, visave 'Lelaga, nevisa van amiu, nevisave pogos naþa amiu na pe asitomãli re naþa akila ve sanene va kiau yaru tai naþa naga pe yaru na sanape, nanene na sa ga naþa amiu pe asitomãli re naþa akila pan inu poli.' "

⁴⁶ Ana Yesu kila make kiena visena nene, naga pisa pisape "La nene yokorena la avanon vena atol nakoena nene naþa ve uro re. Ana yaru mesmesu la nene yokorena la avanon atol malena nene naþa sumã vano vano ve uro re."

26

Apisape aweñar Yesu mare

Mak 14:1-2; Luk 22:1-2; Yoane 11:45-53

¹ Ana pogos naþa Yesu pian kiena yeririna lala e visena la nene þisi, ana naga pisa pan la, pisape

² "Amiu akilia mã legiena na vewo rui, ana Paþagena Nasitonãlana Natamaliaena siar narui. E pogos na þaþagena nene narui, þisi na aligan Narina ne Yeririna va e limana ne la naþa yoko asuari naga e laki torovia vena mare."

³ Ana e pogos nene, yerkawa lala kiena ne yaru wa lala, amio nasumonena kiena ne le Israel lala, asumã e viorena e yumã mãana ne þarin yaru wa, naþa naga kiena kia Kaeþas.

⁴ La apisayu ke naþa þisi na auaravin-aun ga Yesu, a ala nakoena namarena ga vania.

⁵ Ana la apisa apisape "Suri nene, ita taþatete tekila e pogos na þaþagena, vanon naþa þisi na yaru la sinela kar ita vaþisi, ana yokorena la amãaga vaþisi ne wa, komin naþa la mokliu naþa la akekararan yaru ne nanene þisa."

Maria taron ponotaninu e þarina ne Yesu

Mak 14:3-9; Yoane 12:1-8

⁶ Ana siraunia, Yesu sike garu e pulkumali nene Petani, ana naga pa sike e yumã mãana ne yaru naþa apio kiena kia asape Saemon Leperosi, komin naþa naga þar leperosi sumo.

⁷ Ana pogos tai naþa Yesu kinana ke e yumã nene, ana sira tai pimi puna, ana sira nena kus piawi naþa amiyumãenia e kilavaru tai naþa po paþisi, a ponotaninu pule ga mēke ea, naþa kana kilavaru keviu manene la paþisi. Ana sira nene taron make ponotaninu nene e þarina ne Yesu.

⁸ Ana pogos naþa nalogenena kiena ne Yesu lala apisu suri nene, ana sinela mimi paþisi, ana la apisape "?Vanon ya ne naga kila kare ponotaninu nene sanene?"

⁹ Visae naga wilwilin lua ga, vera na naga tol kilavaru keviu tai, naga kilia lavia vena iilaen yaru la naþa limala korena ga."

¹⁰ Ana Yesu kilia mã naþa la apisi ke sanene, ana naga pisi pan la, pisape "Ei, ve akila kare re sira nene sanene. Naga kila yumãena wo tanea e inu ne.

¹¹ Yaru la ne pe kiela suri re poli, þisi na la na asumã ga likan amiu silaga, vena akilia aiila la, ana inu na, taþatete nesike nemio amiu silaga.

¹² Suri naþa sira nene kila, naþa taron ponotaninu e tasneu, naga kila sane kila ruru ke tasneu vena asin inu.

¹³ Lelaga nevisa van amiu, e yo punu ga e yomarava nini naþa þisi na avisawal kiau nalologena wo ea, ana þisi na lala asunyu mēna ga suri naþa sira nene kila, vena asitonãli luen ga kiena nasitomiēna keviu nene, naþa sinena mie inu kemua lelaga."

*Sutas pisaar pisape yoko vielua Yesu
Mak 14:10-11; Luk 22:3-6*

¹⁴ Ana nalogena la lualima taaga pa lua nene, lala tai, naña kiena kia Sutas nae Kariot, naga pa puna ne yerkawa kiena ne yaru wa lala,

¹⁵ ana naga pisa, pisape “? Visae nevielua Yesu viñasu e limamiu, p̄isi na amiu ala ya ne van inu?” Ana la nene apul pania e kilavaru naña selpa tol lualima yam telu,

¹⁶ ana siar e pogos nene, Sutas sumña kalewele mrapa naña vielua Yesu van la ea.

*Nalogena lala akila ruru kinanena na
p̄aḡagena*

Mak 14:12-16; Luk 22:7-13

¹⁷ Ana pimi tol legiena p̄esia na p̄aḡagena nene, naña la apisa m̄ena ga apisape naga pe P̄aḡagena Na Kanen Kiligaḡe, ana nalologena lala apimi puna Yesu, apiunia apisape “?Ko sinoñan osape imimi meva mekila ruru suri lala e yo nape, vena ita tekila Kinanena Na Sitoñalena Natamaliaena ea?”

¹⁸ Ana Yesu pisatam̄ea, pisape “Ava garu Yerusalem, ava avisu yaru naḡani, avisa van sanini, avisave ‘Kiamimi navianena pisape naga kiena pogos pimi ke lavis narui. Naga sinenan pisape naga, amio imimi kiena nalogena lala, p̄isi na meimi mekila kanena naḡani e moñña.’ ”

¹⁹ Ana nalogena lala apa akila sa naña naga pisa, ana la akila ruru suri lala na p̄aḡagena nene.

*Yesu pisawal naña yoko Sutas vielua
naga*

Mak 14:17-21; Luk 22:14,21-23; Yoane 13:21-30

²⁰ Ana siraunia, Yesu lala apimi e umña nene, ana kolemalu, la atotano, la asumña akan ke kinanena nene narui,

²¹ a Yesu pisa pisape “Lelaga nevisa van amiu, p̄isi na amiu yaru tai, naga vielua inu.”

²² Ana kiena nalogena lala amloge naña naga pisa sanene, ana la sinela piowa paḡisi, ana lala peve taaga apiun tania, apisape “!Suḡe! ?Pe inu re poli, ne?”

²³ Ana Yesu pisatam̄e la, pisape “Tai naña imimi lua melapae kamimi kinanena e pialo taaga, naga ke narui.

²⁴ Yokorena Narina ne Yeririna monar mare ve sa naña Nasiriena Wa la pisayuia, ana yaru naña pielua naga, p̄isi na viowa la van naga, visae naga ve vaeme re vera wo va p̄isi.”

²⁵ Ana Sutas, naña siraunia naga pielua Yesu, naga piunia pisape “?Navianena, ana ai? ?Inu?”

Ana Yesu pisatam̄ea, pisape “Ana, sane opisa ne yo.”

Kinanena maro

Mak 14:22-26; Luk 22:15-20; 1 Koren 11:23-25

²⁶ Ana pogos naña la asumña akinana ke ga wa, Yesu m̄la kilaparavi tai, pisa potena pa Ntewa vanonia, ana naga kawewowaia, kian pa kiena nalologena lala, pisa pisape “Amiu alavia, akania. Nanene na pe tasneu.”

²⁷ A siraunia, m̄la piala na kuruta namunena, ana pisa potena pa Ntewa vanonia, ana kian pa pan la, naga pisa pisape “Amiu punu ga amunpae ga e piala nini,

²⁸ vanon naña nanene na tau nene, naña vena kila naviranarena kiena ne Ntewa sum̄alu m̄arera, a vena lau vanon naviewoena na mlamulena viowa kiena ne yaru lala ve moki.

²⁹ Nevisaar van amiu, yokorena ve nomun re si kuruta namunena nene narui, vano vano-o yoko nemun kuruta na munena viu nene nemio amiu, e pogos naña tesike e nasuḡenena kiena ne Ata.”

³⁰ Ana siraunia la amiyau maro e yauena tai na Yauena lala p̄isi, a siraunia la amolue, apa maro e Kunus Na Purolip.

*Yesu pisawal naña p̄isi na Pita viro
naga*

Mak 14:27-31; Luk 22:31-34; Yoane 13:36-38

³¹ Ana Yesu pisa pan la, pisape “E yemalo ke nini narui, kiamiu nalelagaena e inu p̄isi na loloru, vanon suri la naña imi m̄alm̄alivin inu. Pisi na ve sa ke ga naña Ntewa pisa e Nasiriena Wa lala, naña pisa, pisape

*'Pisi na nowem̃ar yaru na visuarena sipsip mare,
ana p̃isi na kiena sipsip lala ayaltetai
ava e yo punu ga.'* *Sek 13:7*

³² “Ana pogos naŋa nemali sina ga vetan marena, yokorena nesumo neva garu Kalele, ana yokorena amiu m̃ena ga monar asirau aimi.”

³³ Ana Pita pisawal pania, pisape “Yesu, pona nalelagaena kiena ne la nene punu ga loloru, ana la aure vetan ko yo, ana in na taŋatete kemua neligan ko pog tai.”

³⁴ Ana Yesu pisa pania, pisape “Lelaga nevisa van ko, p̃isi na yemalo ke ga nene, pogos naŋa term̃ene ve kokoreko re yam tai wa, ana ko oviro inu yam ve telu narui, ko ovisave omninue nu ga.”

³⁵ Ana Pita pisawal meraravan pa Yesu e marala, pisape “Visae la sinelan avisave awem̃ar nu nemio ko, nanene na poga ga ne, ana inu, yokorena taŋatete kemua neviro ko, nevisave in na pe nepe kioṃa re poli.” A e pogos nene, nalologena taŋena m̃ena ga lala apisa m̃ena ga sa ke ga.

*Yesu pa mlen e Ketsemani
Mak 14:32-42; Luk 22:39-46*

³⁶ Ana siraunia, Yesu amio kiena nalogena lala apa e yo tai, kiena kia Ketsemani. Ana naga pisa pan la, pisape “Amiu atoṃa e nene sumo wa, ana in na neva laa perina sane, vena nelen re yam ve plas ga.”

³⁷ Ana naga p̃ere Pita amio narina ne Sepeti la luwoka, Semes amio Yoane, la teloka nene amio naga apa la perina ve tokak ga, a e pogos nene Yesu naga sinena pimi urmi manene la, mloge piowa paŋisi.

³⁸ Ana naga pisa pa la telu nene, pisa pisape “Nanagane nemloge sane ninuu pilaroro la narui, ana kila inu lavisi nemare vanonia. Awis, amiu akilali asum̃a atavilo amio inu e yo nini sumo wa.”

³⁹ Ana Yesu mial ga pa la sane, ana mloru kinai mono, monar marana, vena len. Ana naga pio, pisape “!Ata o! Visae okilia okila suri nene, awis ko olalua piala naloge viowaena nene vetan inu, vena p̃isi na ve nomun re ea. Ana ko ve okila re nasinenanena kiau, ana okila ga kioṃa.”

⁴⁰ Ana naga p̃asuŋe sina, pitomi puna ne kiena nalogena la telu nene, ana naga pisa naŋa la asum̃a amomalio rui. Ana la atavilo sina, ana Yesu pisa pa Pita, pisape “?Sanape na amiu taŋatete atavilo amio inu e aora ve taaga ga nene?”

⁴¹ Amiu monar avisuar ruru wo, a amiu monar alen silaga, vena nakilaliena lala ve akila amiu re aloru e mlamulena viowa. Ee, kiamiu sitomena m̃arera ruru po, ana tasnemi malumu manene la.”

⁴² Ana yam lua, naga pa sina e naŋani, mlen pisape “!Ata o! Visae otaŋatete olalua m̃au piala naloge viowaena nene, ana monar nomun ea, komin naŋa monar ve sa ga naŋa ko sinoṃania.”

⁴³ Ana naga p̃asuŋe sina pimi, pisa naŋa la telu nene asum̃a amomalio ke sina ga, komin naŋa marala kawa, atekavito paŋisi, atavilo p̃ele ga.

⁴⁴ Ana naga mligan la telu nene asum̃a ga, ana p̃asuŋe ke sina ga pa e naŋani, mlen e visena taaga m̃a nena ga, naŋa naga kila yam telu ne.

⁴⁵ Ana naga p̃asuŋe si pimi pun la telu nene, pisape “?Ei, amiu asum̃a apa ruru amiu, a amomalio ke ga wa? !Amiu avisuaria! Lavisi ke pogos naŋa Narina ne Yeririna va e limana ne li viowa la narui.

⁴⁶ Ita, asum̃alu, tevano. Amiu apisu ke ne, yaru na vielua inuena nane sum̃a pimi m̃a ga lavisi nam̃a.”

La apuarar Yesu m̃arera

Mak 14:43-50; Luk 22:47-53; Yoane 18:3-12

⁴⁷ Ana pogos naŋa Yesu pisa ke visena nene wa, Sutas nene, naŋa nalogena la lualima taaga pa lua nene lala tai, naga pimi, naga amio yaru na mara la moki naŋa aŋar kiela playu na mara lala amio kiela plaki lala. La ke nene narui, naŋa yerkawa lala kiena ne yaru wa lala, amio nasumonena kiena ne le Yu lala, la amligan la apimi.

⁴⁸ Ana sumon naŋa la apa aṃalivi sanene, yaru na vieluaena naŋa Sutas nene, naga pisaar kile tai pan la, naŋa naga pisa pisape “Yaru naŋa visae neva nevitawe p̃esania, nane yaru ne nanene naŋa p̃isi na amiu auarar ruru naga,”

49 ana pogos naña la añalivi, Sutas mial mesmesun ga Yesu, ana naga pitawea, pisa pania, pisape “!Pokolemalo, Navianena! Sumñare sike amio ko.”

50 Ana Yesu pisa pania, pisape “Mara, yuññaena naña ko opiminia, ko okila ga.” Ana la apimi narui, apuarar Yesu mārera.

51 La apuarar naga sanene narui, ana Pita p̄erelua kiena playu, terania, tetere-ria yaru kiena ne Parin yaru wa tai, ana telua kiligana lepas tai.

52 Ana Yesu pisa pania, pisape “Ko oligan ruru si kionña playu e kana taga. Yaru naña p̄ar ke playu na kilaen mara, naga p̄isi na mare e playu na kilaen mara.

53 ?Amiu asitom asape in na taṗatete nevio Ata, vena naga iila inu? Visae nevio naga, yam ve taaga naga p̄isi na ligan p̄egas nen kiena navisi lala ve moki naña vena aimi avisuar inu.

54 Ana visae nekila sanene, p̄isi na visena nasumo lala naña asike e Nasiriena Wa lala, yokorena la taṗatete aimi ave lelaga, sa naña apisaar p̄isi rui.”

55 Ana Yesu pisi pan yaru la nene, pisape “?Vanon ya ne amiu aṗara kiamiu playu amio kiamiu plaki lala? ?A vanon ya ne amiu asape aimi atararvinaun inu e pupumalo sanene? ?Pona amiu asitom ke asape in na nepe yaru mārera na vinauena tai pona na weñaren yaru? ? Ana silaga e legiena punu ga, naña in na nesuñña nepian ke yaru lala loyuñña e Yuñña Wa Mana ne Ntewa, ana vanon ya ne pe apimi atarar inu re e pogos la nene poli?”

56 Ana suri la nene la poga ga ne, vanon suri la ne amiu akila ke ne, sa ke ga naña navisawalena nasumo lala apisawal nanua rui e kiela Nasiriena Wa lala, ana kiela visena la nene pimi ke sane pe lelaga make narui.”

Ana e pogos nene, nalogena lala amligan Yesu, la aṗure matania.

Aṗere yesu pa e kumali keviu kiena ne yerkawa kiena ne le yu lala

Mak 14:53-65; Luk 22:54-55,63-71; Yoane 18:13-14,19-24

26:55 Luk 19:47, 21:37 26:61 Yoan 2:19

57 Ana la naña atarar Yesu, aṗure pimi vena akila naga suññalu se marana ne Kaeñas, naña naga pe Parin yaru wa. Ana navianena navisaluaena lala amio nasumonena kiena ne le Yu lala, apimi m̄ena ga lele taaga e kiena kumali nene rui.

58 Ana Pita m̄ena ga suñña taveve ke Yesu e pogos nene, ana pe pa re lavisin naga poli, ana pogos naña la apimi loyuñña e kove na kumali nene, Pita pano totano amio li nayuññaena kiena ne Kaeñas lala, vena naga logeli sanape naña p̄isi na la akila va Yesu.

59 Ana yerkawa lala kiena ne yaru wa lala, amio yerkawa taṗena lala naña la asike loyuñña e viorena nene, akilali naña akale yaru laṗasia vena la avisokan ga e Yesu, naña la avisa suri laṗasia naña la avisu sane akilia aweñar Yesu mare vanonia.

60 Ana la apisi narui, ana yaru la moki naña asuññalu, la apisokani pano pano-o paṗisi, ana viorena nene pe m̄a re suri tai e kiela visena la poli vena torokin la akila ve sanene va Yesu. Kiela visena la pepe taṗena ga sanene pano-o p̄isi, ana yaru la lua asuññalu,

61 ana la lua apiranari visena taaga, apisape “Yaru nene, pisa pisape naga kilia we plan Yuñña Wa Mana ne Ntewa, ana visirlua sina e legiena ve telu ga.”

62 Ana Parin yaru wa nene suññalu, pisi pa Yesu, pisa pisape “?Sanape, yokorena ko ovisatam̄e la, pona peraga? ?Sanapen visena la nene naña la asuñña apisawal ke ne?”

63 Ana Yesu topuru ga toñña ga. Ana Parin yaru wa nene pisa sina ga pania, pisape “Nevisa van ko, ko na monar ovisa kia kiena ne Ntewa Mali, ovisave lelaga naña ko Navisaarena, naña ko ope narina ne Ntewa, pona pe ko re naga poli. ! Ko na monar ovisawal ruru van imimi nanagane narui!”

64 Ana Yesu pisatam̄ea, pisape “Suri ne nanene narui, nane ko osuñña opisa ke narui. Ana nevisa van amiu, nesape siraunia ve ve piavi re, p̄isi na amiu avisu Narina ne Yeririna naña totano e lepas

marua kiena ne Ntewa nam̄areraena, a p̄isi na amiu avisu naṗa warpoyo e lul lala, vitomi tano e yomarava nini.”

⁶⁵ Ana Parin yaru wa nene sinena mimi paṗisi, pitolwowa m̄ana kulsaket, pisa pisape “!Nane-e, toroki! Yaru naṗa sum̄a p̄arnena kare ke kia wa kiena ne Ntewa, nanene rui. ?Amiu amloge m̄a ne? ? Vanon ya ne ita tesum̄a takale ke si yaru vena visawal si suri laṗas e naga?”

⁶⁶ ?Ana viorena nini sitom sanape? ? Pisi na teliṗere naga sanape?”

Ana la apisatam̄ea, apisape “Popon awem̄ar nena naga mare.”

⁶⁷ Ana la nene la apilasiria marana, a asu naga, a laṗasia la amlipa kare naga paṗisi,

⁶⁸ ana apisa kare naga, apisape “?Ei, Navisaarena, ko ovisawalia, ane mlipa ko ga na wa?”

Pita piro Yesu

Mak 14:66-72; Luk 22:56-62; Yoane 18:15-18,25-27

⁶⁹ Ana e pogos nene, naṗa Pita toṃa tano loyum̄a e kove nene, sira m̄ee tai na visuaren yum̄a pimi puna, pisa pisape “!Ei, ko m̄ena ga otaveve Yesu nae Kalele nene!”

⁷⁰ Ana e marala la punu ga, Pita piro suri nene, pisa pisape “Peraga, nemninue suri na ko opisa ke ne.”

⁷¹ Ana naga mial petania, pito tano e pupia pulutava na kove na kumali nene.

Ana e yo nene, sira m̄ee taṗena m̄al naga, ana pisa pa yaru la naṗa asike ga lavisinia, pisape “Yaru nene, naga m̄ena ga amio yaru nae Nasaret naṗa Yesu.”

⁷² Ana Pita piro ke sina ga suri nene, pisa visena tai naṗa pe visena m̄arera, pisape “!Peraga p̄a, in na nemninue nena yaru nene!”

⁷³ Ana yam plas ga, yaru la naṗa asike ga lavisin pulutava nene apimi puna ne Pita narui, ana apisa pania, apisape “Lelaga, ko na ko lala yaru tai, vanon naṗa memloge kilale naṗa ko osum̄a oṗan ke visena lala sa ga le Kalele ga lala.”

⁷⁴ Ana Pita pisi m̄arera la sane, naga pisaar ga visena m̄arera lala, pisape “!

Lelaga p̄a, sinapane! Nepisa pa rui, inu na pe nekilia re nena yaru nene poli.”

Ana e ke e pogos nene naṗa Pita pisa visena nene, term̄ene tai kokoreko,

⁷⁵ ana kila Pita sitom̄al si visena kiena ne Yesu, naṗa naga pisa pania, pisape “Lelaga nevisa van ko, p̄isi na yemalo ke ga nene, pogos naṗa term̄ene ve kokoreko re yam tai wa, ana ko oviro inu yam ve telu narui, ko ovisave omninue inu ga.” Ana Pita mloge piowa naṗa piowa, ana naga pa vanua, naga tagi naṗa tagi.

27

Lala aṗure Yesu pa puna ne Parin Suṗe kiena ne le Rom lala naṗa pisuar ke Israel Mak 15:1; Luk 23:1-2; Yoane 18:28-32

¹ Ana e kolulagi nene, pogos naṗa mrae siar pa metava, yerkawa kiena ne yaru wa lala amio nasumonena kiena ne le Israel lala, la atotano ke sina ga vena aviranar ruru li mrapa tai, vena kilaen Yesu mare.

² Pogos naṗa la apisayu p̄isi, ana la apiar limana ne Yesu, la aṗure naga pa puna ne Paelat, naṗa naga pe p̄arin suṗe nae Rom naṗa naga pisuar ke Israel e pogos nene, ana la amligan Yesu e limana ne Paelat nene, vena naga liṗere naga.

Sutas m̄em̄ar ke sina ga naga

Yum̄aena 1:18-19

³ Ana Sutas, naṗa naga pielua Yesu p̄isi, naga pisu kilale naṗa la amlip̄ere Yesu p̄isi rui asape naga monar mare, ana e pogos nene naga mloge si piowagan suri naṗa naga kila. Ana naga pilon si kiena sitomena narui, ana naga p̄ar si selpa lualima yam telu nene, pa yerkawa la naṗa apul naga sumo.

⁴ Ana naga pisa pan la, pisape “In na nekila mlamulena viowa nene, naṗa inu nepielua yaru tai naṗa pe kila re nena suri tai, ana kiau visena na kila na yoko awem̄ar naga mare.”

Ana yerkawa la nene apisa ga pania, apisape “Ei, ve oimi otag re si van imimi. Imimi meṗisin ko pa rui.”

⁵ Ana Sutas silin tetain kilavaru nene su tano e loyum̄a wa m̄ana Ntewa, ana naga

pa vanua, pa telan kolmekina e kilika, naga mare.

⁶ Ana yerkawa kiena ne yaru wa lala, la apano aþar kilavaru nene, ana la apisape “Kilavaru nene, kuruta kana yaru mlau vanon rui, a e kieta navisaluaena, ita taþatete teligan kilavaru na sanene va teke karo na Yumã Wa Mana Ntewa.”

⁷ Ana lala apisayuia, ana amla kilavaru nene, apa apul kinakinas nen porotano tai naþa nanua sumo, la apisape kiena kia “Porotano na piaki,” ana la amligan narin porotano nene pe lotap kiena ne wolawa lala.

⁸ Vanon suri ne nanene, pimi tol nanagane, yaru lala apisa ke narin porotano nene, asape “Porotano na Kuruta.”

⁹ A suri ne nanene kila visena tai kiena ne Navisawalena Sereñaea pimi pe lelaga, naþa sumo naga kiena visena pisape

*“La ala kilavaru naþa selpa ve lualima yam telu nene,
na torokin maran kilavaru naþa le Israel lala apisa apisape mesmesun aul lua yaru,*

¹⁰ *ana la amla apano apul porotano kiena ne yaru na kilaen piaki nene, sa ga naþa Ntewa pisa pan inu sape nekila.”* *Sek 11:12-13*

Yesu suñalu e marana ne Paelat

Mak 15:2-5; Luk 23:3-5; Yoane 18:33-38

¹¹ Ana la aþure Yesu pimi suñalu se marana ne Parin Suþe Paelat, ana naga piun tan Yesu, pisape “?Ko ope Parin Suþe kiena ne le Israel lala, pona peraga?”

Ana Yesu pisatañea, pisape “Naga ke narui, sane ko opisa ke ne.”

¹² Ana pogos naþa yerkawa kiena ne þarin yaru wa lala amio nasumonena lala apisavisawal suri moki e Yesu, ana Yesu pisatañe re si suri tai poli.

¹³ Naga topuru ga tomã sanene, ana kila Paelat piun sina ga tania, pisape “?Sanape, ko pe ositom re naþa la apisa suri viowa la moki e ko poli?”

¹⁴ Ana e lepas na suri la nene naþa la asuñã apisa ke ne, ana Yesu pe pisatañe re si suri tai pan la poli, ana Parin Suþe nene milan paþisi.

Paelat naga tañan pisape Yesu Monar mare

Mak 15:6-15; Luk 23:13-25; Yoane 18:39-19:16

¹⁵ Ana e pogos nene, la asike e pog na Paþagena na Sitomãalena Natamali-aena na wa, ana e kayui punu ga e þaþagena nene, Parin Suþe nae Rom nene naga silaga kila suri tai pa le Israel lala. Naga kila naþa visae la þasia asike e yumã naloge viowaena, la akilia avisa kia kiena ne yaru ve taaga naþa la sinelania, ana yokorena Paelat naga ligan lua naga molue.

¹⁶ Ana e pogos nene, yaru na kilaen politik tai naga momã e yumã naloge viowaena, naþa yaru la akilia ruru naga, kiena kia Yesu Paraþas.

¹⁷ Pisi na, pogos naþa þina lala apimi ape moki lele taaga e marana ne Paelat, ana naga piun tan la, pisape “?Amiu sinemiun asape neligan lua ane molue sina iñasu pun amiu? ?Sinemiun Yesu Paraþas, pona Yesu naþa apio ke asape Navisaarena?”

¹⁸ Paelat piun sanene, vanon naþa naga kilia þisi rui naþa yerkawa ga lala kiena ne le Yu lala, la aþure Yesu pimi puna, sane yumãena na vielueen ga, vanon naþa apisu naþa kiela yeririna taþena lala akekaran Yesu paþisi.

¹⁹ Ana e mñena ga e pogos naþa naga totano ke e lelen naliþereena vena akila navisena nene, ana wona mligan visena pimi pania, pisape “Ko ve okila re suri tai va yaru nene. Naga pe kila re suri tai poli, ana na kolemallo nomomalio, nepisu naga, ana nanagane nemloge ke piowa vanon paþisi.”

²⁰ Sanene narui, Paelat sinenan pisape ligan lua Yesu naga vano, ana yerkawa lala kiena ne yaru wa lala amio nasumonena kiena ne le Yu lala, la akila kare sitomena kiena ne yeririna lala, la amãreran la paþisi vena la monar avisa va Paelat vena naga ligan lua Paraþas nene vano, a naga monar kila Yesu va mare.

²¹ Ana Parin suþe nene piun sina ga tan la, pisape “?Amiu sinemiun asape netañan yaru la lua nene, ana ane molue ga sane?”

Ana la apisatamea, apisape “Imimi sinemimin Parañas.”

²² Ana Paelat piun tan la, pisape “Poga ga, ana visae ve sanene, ĩisi na nekila ve sanapen Yesu nene naña apio ke naga asape Navisaarena?”

Ana la punu ga apionia, la apisape “!Asuar naga e laki torovia!”

²³ Ana Paelat piun tan la, pisa pisape “?Vanon ya? ?Naga kila suri ya naña piowa?”

Ana la apion manene la pa metava sane, la apisa apisape “!Asuaria, asuar naga e laki torovia!”

²⁴ Ana Paelat pisa naña naga taťatete si taulu la, vanon naña pupia mĕagena paĭisi naña pa ke metava rui, ana naga kus pialo na wii tai, ana e maran yeririna la nene, naga kevan limana ea, ana naga pisape “Kuruta na yaru nene naga pe su re e inu poli. Kiena marena, naga kiamiu yuĕaena ga nene.”

²⁵ Ana pogos naña yaru la amloge visena nene, la akiikii ke sina ga, apisape “Poga ga ne, suri ke naña imimi sinemimin ke nanene narui e, naña kiena marena pe kiamimi yuĕaena, a naña kana kuruta sumĕa e imimi memio narimimi lala.”

²⁶ Ana Paelat mligan lua Parañas molue si ĩasuĕe pa pula, sa naña la sinelania, ana naga mligan Yesu e limana ne kiena li na mara lala vena akoa naga, a vena aure naga va asuaria e laki torovia.

Li na mara lala akirakirai viowa pa Yesu

Mak 15:16-20; Yoane 19:2-3

²⁷ Ana yaru na kilaena mara lala kiena ne Paelat, la atar Yesu aĕurelua pa vanua e yometava na kiena kumali nene, ana la apio pa kiela ĩegas nen li na mara taĕena lala vena la aimi avisu Yesu.

²⁸ Ana la amiyenlua mĕana kulsota, ana amiyen kulkota tai e naga naña marana pe melia vivaga sa naña ĩarin suĕe la amiyen,

²⁹ ana la aĕar nenos nen kilsirili, ana aĕan ruruia, amligan e ĩarina, sa naña karo na ĩarin suĕe tai, a amligan mĕana lakiavio tai e limana na ĩamarua vena

lararia. Ana la asumĕa akinai tano pania, la asumĕa akirakirai viowa pania, la apisa apisape “!Imimi meva tanon ko, ko naña ope ĩarin Suĕe kiena ne le Yu lala, imimi memieluar ko!”

³⁰ Ana la asumĕa apilasiria naga, a amla lakiavio naĕani, asumĕa amĕe ĩarina Yesu ea.

³¹ Ana pogos naña la akirakirai piowa pania ĩisi, aĕarlua kulkota nene e naga, ana amien si mĕana kulsota la e naga, ana atar naga, apano vena asuar naga e laki torovia.

Asuar yesu e laki torovia

Mak 15:21-32; Luk 23:26-43; Yoane 19:17-27

³² Ana pogos naña li na mara lala la asumon Yesu apa ke narui, amal yaru tai nae Saerin, kiena kia Saemon, ana la amĕareran pania asape naga towe kus laki torovia kiena ne Yesu vano.

³³ Ana la apa atol kunus tai, kiena kia Kolkota, naña kana kinasia na asape yo naña sane puriu na piaĕarin yaru.

³⁴ Pogos naña apimi aporu e wos nen kunus nene, ana la sinelan asape ala kuruta namunena va Yesu vena munia, ana kuruta namunena nene was nen suri tai naña melkalka sike ea, vena kila tasnena ne Yesu kapulu ga, ve lae manene re, ana pogos naña Yesu munli suri nene, naga yepen mavin si munena.

³⁵ Ana la atar Yesu, asuari naga e laki torovia. ĩisi na, la akila sa naña amlil mĕapila, vena alual li naña ane war mĕana kulsota tai, a ane war tai,

³⁶ ana la atotano atomĕaga e yo nene vena akirakira mĕaga va avisu naga.

³⁷ Ana la asiri navisawalena tai, asuari teke metavan ĩarina, naña pisawal suri naña la amĕmar naga mare vanonia, naña pisa pisape “Yesu nene, ĩarin suĕe kiena ne le Yu lala.”

³⁸ Ana e pogos nene, yaru navinauena lalua, asuari mĕana ga la luoka e laki torovia sa ke Yesu, la amligan tai e lepasnena na ĩamarua, taĕena e lepasnena na ĩamĕeli.

³⁹ Ana yaru la naña asumĕa amialoro ke apa e yo nene, asumĕa asisilin ĩarila, apisalele kare Yesu ĩisa, la apisa apisape

40 “!Ke, suwala! Ko nene, nanua sumo ko opisa opisape ko okilia owe plan Yumã Wa Mana ne Ntewa, ana ovisirlua ke sina ga e legiena ve telu ga, ana sanape narui? !Poga, ko ga otamalia ko lia! !Visae ko ope narin Ntewa kemua lelaga, ko otapulu e laki torovia namã, otomi tano!”

41 E ðelaga mña nena ga nene, yerkaawa lala kiena ne ðarin yaru wa lala, amio navianena na navisaluaena, a li na sumonena kiena ne le Yu lala, la asumã apitalia kare naga paþisi,

42 la asumã apisa ke, apisape “!Pona naga tamalia mña yaru taþena la moki yo rui, ana naga mninue kare si narui, taþatete si tamalia naga! ?Ana naga pe kieta ðarin suþe ita le Yu lala, pona peraga? Popon naga vitomi tano e laki torovia nanagane, vena ita telelaga e naga.

43 A yaru nene pisape naga piawa e Ntewa, ana pisape naga Narina ne Ntewa. !Poga ga, tevisulia, visave Ntewa kekaran naga, yoko naga tamalia naga nanagane narui!”

44 Ana yaru navinauena la lua nene, naþa asuar la e laki torovia amio Yesu, la mña ga luoka asikol sina visena viowa kiena ne la nene pania.

Yesu mare

Mak 15:33-41; Luk 23:44-49; Yoane 19:28-30

45 Ana kolipae ga, yemalolo pimi kalo make yo punu ga e yo nene, pano tol mrae telu yepekilavi,

46 a lavis ga e pog nene, Yesu mlokai keviu e kiena visena ruru napo, pisa pisape “?Eli, Eli, lamã saþatani?” naþa kana kinasia sape “?Kiau Ntewa, kiau Ntewa, sanape naþa ko omligan inu nemẽke sanene?”

47 Ana yeririna laþasia naþa asumãlu asumã e yo nene, naþa la asumã apisuvisu ke suri la nene, ana amlogepalia naþa Yesu mlokai sane, ana la apisa apisape “Ke, yaru nene sumã pio ke yermarua Elaisa, vena imi iila naga-o.”

48 Ana veraga ga, lala yaru tai kiriri pimi, mla lumlum tai, taron kuruta namunena naþa melkalka pa ea, miyurar te laki tai, ana kian va Yesu munia.

49 Ana yaru taþena lala apisa apisape “!Osuwa! Tevisulia wa, pona yokorena yermarua Elaisa vitomi tamalia naga, pona ve vitomi re.”

50 Ana Yesu mlokai manene sina, ana ðere maron kiena yalua, tamãan ninuna pano, mare ðan.

51 Ana pogos ke ga nene, pupia kulmrae naþa e Yumã Wa Mana ne Ntewa, naþa mono ke yo wa naþa pe yo wa paþisi, naga purþa pito ga lika, siar metava pito tol tano. A yemninu, a pupia kilavaru lala pororowa la,

52 a e lotap, tampona na yaru mesmesu la moki na nanua sumo apikevike, ana kana yaru ne lala amamal sina.

53 Ana la amolmolue e kiela tampona lala, ana siraun pogos naþa Yesu mña ga mali sina ga e marena, la nene amial apa garu pulkumali wa Yerusalem, ana yaru la moki naþa apisula.

54 Ana li na mara lala, amio kiela yerkaawa, naþa la asumã apisuuari ke Yesu, pogos naþa la amloge yemninu, a apisu suri la naþa kakate, la amilan paþisi, la sinela kurkur pano-o amiyuyuwawa, ana la apisa apisape “!Aulai, yaru nene naga pe Narina ne Ntewa kemua lelaga naþa ne!”

55 Ana sira la moki paþisi e yo nene, la asumã asumãlu asike la perina sane, la asumã apisuvisu ke Yesu. La nene, naga la naþa amolue garu Kalele nanua sumo, la asumã ataveve mña Yesu pano-o, a asumã amiila naga.

56 Ana likan sira la nene, ana Maria tai naþa sira nae Maktala, a Maria mña naþa anenane Semes amio Yosop, a sira mña naþa wona ne Sepeti.

Yosop sin Yesu

Mak 15:42-47; Luk 23:50-56; Yoane 19:38-42

57 Ana yaru tai nae Aramatia sumã ga, naþa naga pe yaru na suri moki, kiena kia

Yosop, a naga pe nalogena kiena ne Yesu tai. Ana pogos naña lavisi mrae vito tano,

⁵⁸ naga pa suñalu se marana ne Paelat, piun tania pisape kus tasnena ne Yesu. Ana Paelat pisa pa kiena li na mara lala, vena la akus tas nen Yesu imi vania.

⁵⁹ Ana Yosop kus tasnena ne Yesu, mliluwoia e kulmrae tai naña miyuwowo ruru po,

⁶⁰ ana naga pa mligan mēke e puluve viu naña naga mēana, naña la ate mare ga p̄isi ga na wa. Ana la amelilivin pupia kilavaru na monoen puluve nene, pimi mono pulusa, ana Yosop la añasuṽe si apano.

⁶¹ Ana Maria lalua nene, naña lala tai nae Maktala, amio taṽena nene, lalua apimi asike e yo nene, la atoña tano ato mesmesun ga pulmaran puluve nene naña tasnena ne Yesu mēke ea.

Li namara lala akirakiravan m̄a puluve

⁶² Ana suri la nene la apimi kakate e legiena na kilaen suri la punu ga su ruruia suñate Legiena Wa. Ana e legiena taṽena, naña sane Legiena Wa nene narui, yerkawa kiena ne yaru wa lala amio Varasi lala la apa asuñalu ase marana ne Paelat,

⁶³ ana la apisa apisape “Mesape mevisa ga van ko, Paelat, naña imimi mesitoñal ke visena kiena ne yaru na visokanena nene na wa, naña pogos naña naga mali ke ga wa, naga suña pisaar pisape ‘Siraun legiena ve telu, p̄isi na nemali ke sina ga.’

⁶⁴ Ana visae ve sanene, imimi sinemimin mesape meviun tan ko sanini, mesape ko oligan kionña li na mara laṽasia ava avisuar e puluve nene, vano vano tol kana legiena telu nene warovia. Visae peraga sa p̄isi kiena nalogena la ava akusvinaun tasnena, ana p̄isi na la avisokan, avisawal va yaru lala, avisave ‘Naga mali sina e marena rui.’ A visae la akila ve sanene, p̄isi na kiena navisokanena maro nene yoko imi viowa la sane, taulu naña nasumo.”

⁶⁵ Ana Paelat pisa pan la, pisape “Poga ga, aure kiau li na mara laṽasia avano. Amiu akilia ava akila ruru make suri

punu ga sa naña amiu ava akirakiravan ruru yo nene.”

⁶⁶ Ana la apano, amligan pilu tai e kilavaru naña mono ke puluve nene, naña visae yaru tai melilivin kilavaru nene, p̄isi na pilu nene worovia, ana p̄isi na akilia avisu kilalea. Ana la amligan mēna li na mara lala asuñala akirakirava e puluve nene.

28

Puluve korena ga mēke na

Mak 16:1-10; Luk 24:1-12; Yoane 20:1-10

¹ Ana pogos naña Legiena Wa p̄arovia, ana e legiena na siraunia, naña legiena p̄esia na wik, pogos naña mrae p̄arpoyo, ana Maria nae Maktala amio Maria taṽena nene, lalua apanon asape avisuli puluve nene.

² Lalua apano atol yo nene, ana pupia yemninu veraga, vanon naña navisi kiena ne Ntewa tai mligan ma e peni, pitomi tano melilivin lua kilavaru nene, ana pa teke metava e wosia.

³ Ana marana pilavila paṽisi, a mēana kulsota merarava ruru po, naña miyuwowo na miyuwowo ruru po,

⁴ ana pogos naña li na mara lala la apisuia, la amarau pano pano-o amar-marlula asike ea.

⁵ Ana navisi nene pisi pan sira la lua nene, pisa pisape “Marauen toko. Nekilia m̄a naña amiu lua apimin ke Yesu, naña asuar naga e laki torovia,

⁶ ana naga pe mon re si e nini poli, naga mali sina, suñalu rui, sa naña naga pisaar sumo. Amiu lua aimi avisuia e naña tasnena momalio mēnea.

⁷ Ana amiu lua ava vila ga, avisawal va kiena nalogena lala naña naga mali si e marena rui. Ana nanagane, yokorena naga sumo vito garo Kalele, ana amiu mēna ga yoko atove, avisu naga e yo nene. Nane kiau visena pan amlua nene.”

⁸ Ana lalua akoskosin naña lalua amolue e puluve, lalua apano. Lalua apano na, sa naña lalua amarau ke ga wa ana lalua amloge sane akekara mēna ga paṽisi. Ana lalua akiriri apano vena

avisawal lologena nene va kiena nalogena lala,

⁹ ana lalua apa m̃a sane, ana lalua apitawe Yesu. Lalua amilan kare naga paṣisi, ana naga pisi pan lalua, pisa pisape “Pokolulagi.” Ana lalua apa akinai tano e naga, lalua atarar lana, lalua amlotun naga.

¹⁰ Ana Yesu pisa ga pan la luoka, pisape “Marauen toko. Amiu ga luoka ava avisa va wolai lala vena ato garo tano Kalele, ana e yo nene, la akilia avisu inu.”

Li na mara lala la apa avisawal suri la nene

¹¹ Pogos naṣa sira lalua nene aṣasuṣela apa ke puna ne nalogena lala, e ke e pogos ga nene, ana li na mara lala ṣasia aṣasuṣela apa Yerusalem, la apa avisawal suri la nene naṣa kakate, van yerkawa kiena ne yaru wa lala.

¹² Ana la nene, la apio nasumonena taṣena lala apimi, ana la apa lele taaga amio la, ana la apisayu suri la nene pano-o ṣisi, ana la apiranaria asape la monar awar kilavaru keviu tai va li na mara la nene,

¹³ ana la apisi m̃arera pan la, apisape “Avano avisavisawal va yeririna lala, avisave ‘!Peraga, kiena nalogena ga la nene! Apimi kolemalu, e pogos naṣa imimi mesuṃa momomaliu ke ga wa, ana la apinaun tasnena akus apano.’ ”

¹⁴ Ana la apisa m̃ena ga pan la, apisape “A visae visena na suri nene va tol Paalat, ṣisi na imimi ga mevano mekila ruru memio naga, ṣisi na amiu ve aloge re visena tai vanonia.”

¹⁵ Ana li na mara la nene akekaran kilavaru nene, amlavia, ana la apano apisovisokani e yo punu ga sa naṣa yerkawa la nene apisa pan la, a suri nene kila le Israel lala la apisavisa ke visena nene pimi tol nanagane.

*Yesu pimi puna ne kiena nalogena lala
Mak 16:14-18; Luk 24:36-49; Yoane
20:19-23*

¹⁶ Ana nalogena la lualima taaga pa taaga nene apito garo tano Kalele, e tavie naṣa Yesu pisaar pan la,

¹⁷ ana pogos naṣa la apisu naga, amlotun naga, ana la ṣasia la asitom ṣele ga asape Yesu re nene poli.

¹⁸ Ana Yesu pimi lavisin la, pisa pan la, pisape “Ntewa mligan suri punu ga nae ma e peni a nae m̃ena ga e yomarava nini, e lum̃au, vena nevesuṣen la.

¹⁹ Sanene, nemligan plan amiu ke narui, vena amiu monar ava e yolai punu ga na yomarava nini, amiu monar aurela aimi ave kiau nalogena lala, naṣa amiu akela e kia kiena ne Ata, Narina, a Ninuna Wa,

²⁰ a naṣa avian la m̃ena ga vena alogear visena la naṣa nepisa pan amiu ṣisi rui. Ana amiu monar asitom̃ali luen ga, naṣa nesuṃa nemio amiu silaga, vano vano-o tol luas nen pog nini.”

Lologena Wo Kiena Ne Yesu Kristo Naña MAK Siriyuia Visayuena Na Tusi Nene

Komþasnen suniena plas na tusi nini

Tusi nini, “Lologena Wo Kiena Ne Yesu Kristo Naña Mak Siriyuia”, naga siari e visena tai naña sape lologena wo nene, naga lologena wo kiena Yesu Kristo, narina Ntewa. Mak kilologia naña Yesu pe yaru na yumãena kiena ne Ntewa, a kiena visena m̃areraena sike ea. Tekilia tevisu kiena m̃areraena pogos naña piyan ke yeririna lala, a m̃eneplan m̃ena yermare lala, a naña warplan milamulena viowa kiena yaru lala. Yesu pisawal kiena kia tai, sape naga Narina Yeririna, naña naga pimin tam̃an kiena maliena vena warplanen milamulena viowa kiena yaru lala, vena akilia aure matan nalogeviowaena, yepela melala.

Mak pisayu manene yumãena kiena Yesu pa laa sane, amio kile lala naña naga myumãenia, taulu naña pisayu kiena visena lala.

E tusi nini, Mak pisayu þesan Yoane Nakeena amio kiena yumãena, a naña Yoane kee Yesu. Siraunia, pisayu naña Yermare taþali Yesu. A siraun m̃ena suniena plas na visena nene, naga pisayu yumãena kiena Yesu la narui naña kila ruru yaru la naña amai apimi apowo sina a naña naga piyan ke yeririna lala. Pogos naña Yesu kila kiena yumãena lala, silaga kiena nalogena la asumã akilia ruru naga amio kiena þelaga lala pa laa sanene.

Ana e pogos nene, yaru laþas pe akekaran re Yesu poli, sinela kar Yesu paþisi. Marana na maro la na tusi nini apisayu malena kiena ne Yesu e kiena legiana olua na maro e yomarava nini, a pupia suri naña pisayuia, nane kiena marena, a naña mali sina.

E marana na keviu 16, yaru moki asitom asape Mak naga siri tusi nene tol ga marana na ve tokaki orelu, ana

marana na ve tokaki la ne siraun nene, pona yaru taþena naga siria yo.

Komþasnen suniena la naña sike e tusi nini

Yumãena kiena Yoane Nakeena 1:1-13
Yumãena kiena Yesu garu Kalele 1:14—9:50

Yesu molue Kalele pa Yerusalem 10:1-52
Legiana olua na maro kiena Yesu naña kila kiena yumãena Yerusalem, a yo make la naña lavisin Yerusalem 11:1—15:47

Yesu mal sina 16:1-8

Yesu pimi m̃alivin kiena nalogena lala a naga pa mae peni 16:9-20

Yoane Nakeena sike e yokorena pisawal ke visena kiena ne Ntewa

¹ Na nene Lologena Wo kiena Yesu Kristo naña narina Ntewa.

² Suniena na Lologena Wo nini siar e Yoane Nakeena, sa naña Visena Wa kiena ne Ntewa pisayu naga konua rui e visena tai naña Navisawalena Aisea pisawalia, naña Ntewa pisa pisape

“Naga pe yaru tai nalologonen kiau visena,

naña nemligan naga sumon ko, pe na kilaruruen mrapa lala kionã mekiki ruru wo. *Mal 3:1*

³ Ana naga sumã piovion ke e yokorena, piovion ke pisa ke pisape

‘Amiu na monar akila ruru mrapa lala kiena Suþe Ntewa, amesmes ruru wo,

vena naga kilia yali ea imi kate e kiamiu malena lala.’ ” *Ais 40:3*

⁴ Sanene narui, Yoane Nakeena pimi kate e yokorena lepas naña Yutea, ana mlologon ke visena kiena ne Ntewa pan yeririna lala. Naga pisawal ke pan la pisape “Amiu monar avilopu amiu e kiamiu mlamulena viowa lala, aimi, vena nekee amiu e wii nakeena, þisi na Ntewa viewo amiunia.”

⁵ Ana þisi na yeririna la moki nae Yerusalem amio nae pulkumali taþena e lepas naña Yutea, la apa amiya-gogan Yoane, ana la apisa plan ke kiela naviowaena lala pania, ana naga kee la e wii naña Yortan.

⁶ Ana pogos naña Yoane Nakeena sike e yokorena sanene, naga kila sa ga yer-marua navisawalena tai na konua rui naña Elaisa, sa naña pe miyen re kulsota la naña po poli, ana mña kulkota ape ga e vilulus nen sur mali tai naña kiena kia kamel, ana kulka na mēpēna amiyumāen e narin kulus nen puluk tai. A kana kinanena e yokorena nene, naga kurpo ga ne amio kopululus nen lago na yomārua, naña kiki sane purutevi.

⁷ Ana pisaar pan yeririna lala, pisa pisape “Pisi na yar tai, naña puryuna mārera taulunu, naga yoko siraun inu imi. Yar nene, naga to laa metavan inu, in na pe netorokin re poli naña neulounia neyen plan kiena kulus nen lana, pona nekila si yumāen tai ne sanene vania.

⁸ In na nesuñā nekee amiu e ga e wii, ana yoko naga kee amiu e Ninuna Wa.”

*Yoane kee Yesu
Matu 3:13-17; Luk 3:21-22*

⁹ Ana Yesu mligan pulkumali naña Nasaret, e lepas naña Kalele, pimi e lepas naña wii nae Yortan, ana Yoane kee e wii nene.

¹⁰ Ana pogos naña kee pae Yesu, Yesu suñālu, molue e wii pa metava, ana veraga ga ma e peni pietava pania, naga mñal Ninuna ne Ntewa pitomi ke tano sa ga manu naña lomē, pitomi memes ga koan te naga.

¹¹ Ana lala amloge Ntewa nae ma e peni pis pitomi, pisape “Ko, ko ga taaga ope naru wawa, ana nepinaia ko paṗisi. Sineu si ko, nekekan ko paṗisi.”

Yermare taṗali Yesu

¹² Ana e pogos mña ke nene, Ninuna Wa ṗere Yesu naga taaga pa laa perina sane e yokorena,

¹³ ana Yesu suñā e nene tol legiena lualima yam vari, naña Yermare taṗali naga paṗisi. Yesu sike amio sur mal tetan lala e lele nene, ana navisi kiena ne Ntewa lala apimi apisuar ke naga.

*Yesu siar kiena yumāena garo Kalele
Matu 4:12-17; Luk 4:14-15*

¹⁴ Ana siraunia, apim atarar Yoane Nakeena, aṗere pa akotawea e yumā naloge viowaena. Ana pogos naña Yesu mloge lologena nene, petan yo ṗasuṗe pato si lepas naña Kalele, ana siar e pogos nene, naga mlologon Lologena Wo kiena ne Ntewa.

¹⁵ Ana pogos naña naga mlologon ke, pisa ke sape “Nanagane na, Ntewa kilia sane pe pog memes naña monar avilopu amiu narui. Navesuṗenena kiena ne Ntewa naga pimi ke pun amiu narui, monar avilopu amiu, alelaga e Lologena Wo nini.”

Yesu pio yar na wereen ika la vari

¹⁶ Ana siraunia, Yesu naga suñā mialoro ke e is nen pupia lapa nae Kalele, mñal yaru la lua nawereen ika, nane Saemon amio wenla Antru, lalua asuñā aṗere ke kiela lilivi.

¹⁷ Ana Yesu pisa pan la, pisape “Amiu lua aim atavevenu. Yoko nekila amiu ave li nawereen yeririna lala aim ave kiau.”

¹⁸ Ana veraga ga lalua nene amligan kiela lilivi lala, ataveve Yesu.

¹⁹ Ana Yesu mial pali laa sane, kirawal narina ne Sepeti la luoka, nane Semes amio wenla naña Yoane. Lalua atotano ke e pulus nen kiela waa, akila ruru ke kiela lilivi lala.

²⁰ Ana pogos naña Yesu kirawal lalua nene, pio la, vena la mña ataveve naga, ana asuñālu, amligan arimala Sepeti naga mēke e waa amio kiena yaru nayumāena lala, lalua ataveve Yesu.

*Yesu pilelua ninuna viowa tai
Luk 4:31-37*

²¹ Ana Yesu amio kiena yaru lala amial apa atol pulkumali naña Kapeneam, ana e Legiena Wa, apa e yumā nalotena, ana Yesu naga pian yeririna lala e Visena Wa kiena ne Ntewa.

²² Ana la naña amiyagogania amilan paṗisi, komin naña amloge navianena kiena ne Yesu naga pe taṗena, pe sa re navianena kiena ne kiela navianena la poli, komin Yesu naga kiena urmi po, puriukawaena kiena ne Ntewa teke ea.

23 Ana e pogos nene, yaru tai naña ninuna viowa teke e naga sike amio la,

24 kila yar nene, naga mñaaga kare ga pañisi, naga pis pa Yesu, pisape “?Yesu nae Nasaret, kioma ya ne teke e imimi? !Po ko na opimin osape okila kare imimi! In na nekilia ko pa rui, ko na ope Yar Nowo Wa kiena ne Ntewa.”

25 Ana Yesu pis mñarera pan ninuna viowa nañane, pialuñar pania, pisape “! E, ko na ve ovis re! !Oure vetan yar nene nanagane ga ne!”

26 Ana ninuna viowa nañane kila yepen yar nene miokamarmare, mñaaga keviu yam si tai, ñisi na molue petania pure pano.

27 Ana yar la nae yo nene amilan sur nene pañisi, asumña apisasayu ke Yesu, asape “?E, sanape na sanene? ?Navianena viu si tai nene, pona yar ne? Yar nene, naga puriuna kawa pañisi ne, pis ga pan ninuna viowa lala, ana amlogearia.”

28 Ana komin sur ne la nanene narui, akekarania, apisa ruru kia wo kiena Yesu pa e yo lala pa ñar punu yo punu ga e lepas nae Kalele.

Yesu kila ruru anenane wona Saemon Pita, amio yeririna tañena si lañasia

Matiu 8:14-15; Luk 4:38-39

29 Ana Yesu amio yaru ne la nini, Semes amio Yoane, a Saemon amio Antru, lala amolue petan yumña na lotena, apa e yumña mñaana ne lalua nene Saemon amio Antru, nanene e pulkumali mña ke ga naña Kapeneam.

30 Ana e umña mñaana lalua nene, anenane wona Saemon naga mai mñeke ea, yepena pisusun, momalio ke e mñaana tog, ana lalua apisawal pa Yesu.

31 Ana Yesu pa tarar limana sira marua nene, tarlua tomñalu e mñaana tog, ana yepena pimi manin sina, naga sumñalu, pa piran kala kap.

32 Ana e mña nena e legiena nene ko yepekilavi, pogos naña Legiena Wa ñarovia, sane mrae pito kovio pa rui, yeririna lala añure yar la naña amai, a la naña yermare la asike e la, apim pu Yesu,

33 ana la moki manene la, sa naña lavisi la punu ga nae kumali nene apim asumñalu e mratava na yumña nene.

34 Ana Yesu kila ruru yeririna la moki naña amain inanena tañena lala, a mñene plan yermare la moki petan yar lala, pisawo yermare lala sape ve avisa re si sur tai, komin akilia pa rui sane naga pe Navisaarena kemua lelaga kiena ne Ntewa.

Yesu mlologon ke e yo lala lepas nae Kalele

Luk 4:42-44

35 Ana kolulagi, pogos naña lakaporo pe kokoreko re poli waa, Yesu sumñalu, naga taaga mial petan umña, ana pa e yo mñaano tai, mlen pa Arimana.

36 Ana siraunia, yeririna la apimi akale si naga umña, ana Saemon la amña re si naga poli, la apa akalea.

37 Lala akale mña pano-o, amñal naga e yo nañane, apisa pania, asape “Yeririna tañena la moki apimin akale ko ke.”

38 Ana Yesu pisape “Ee, nekilia mña ga. Ana peraga, monar teva mñaana ga e pulkumali tañena lañas naña sike ga waa, vena nekilia nelologon mñaana Lologena Wo nene van la. Sur ne na nene, in na nepetan ma ne nepitom nesike e yo nene.”

39 Ana ñisi na Yesu pato mialoro ke e yo punu ga garo Kalele, mlologon ke e yumña na lotena kiena le Yu lala, pile plan ke mñaana yermare lala moki petan yeririna lala.

Yesu kila ruru yaru tai naña leperosi se yepena miania

Matiu 8:1-4; Luk 5:12-16

40 Ana yaru tai naña leperosi sike e yepena pimi puna Yesu, kinai tano puna, piun mñareran tania, pisape “Awis, visae ko na otamñan ga, nelelaga sane ko ga okilia okilarurunu, neikiki sina.”

41 Ana Yesu sinena miye manene yaru nañane, naga pe maraun re sape visae tol lae naga vanon kiena inanena, ana naga mligan limana te naga, pisape “Inu netamñania, nanagane monar yepemña ikiki sina.”

⁴² Ana veraga ga yepena miania, leperosi nene p̄isi petan yepena, naga mekiki sina.

⁴³⁻⁴⁴ Ana Yesu m̄areran pania, pisa pisape “Omloge ke ne, ovano ve ovisawal re suri nene wa, ana nanagane ga ne ova okom puna yaru wa vena naga kilia visuveve yepem̄a. Pisi na monar ova okila lotena va Ntewa a okila m̄ena kuḗpaḗaena na ikikiena nene naḗa Mosis pisa, sape yaru monar kila vanon sur na sa nene, ana p̄isin sur nene, yar wa kilia visawalia sape nanagane na leperosi naga p̄isi.” Ana Yesu pitetalia naga pano.

⁴⁵ Ana pogos naḗa yaru nene pano, pa pisayu sur la nene pan yeririna lala punu ga, kila sane visena nene pa p̄ar punu yo, pano-o kila sane Yesu pe mial re si pa loyuma e pulkumali taḗena la poli, komin visae vano, yoko yeririna la ve moki aiminia. Naga suma ga perinan pulkumali lala, ana yeririna lala asum̄a apetan ke kiela pulkumali lala, apimi puna.

2

Yesu kilia viewo m̄ena mlamulena viowa kiena yeririna lala

¹ Ana legiena laḗas p̄arovia, Yesu p̄asuḗe si pa ma pulkumali naḗa Kape-neam, ana pe piavi re poli, yeririna la amloge asape naga pam si rui.

² Ana p̄isi na la moki naḗa apim puna, yo loyuma naga pulen la paḗisi, a vanua m̄ena e mratava naga yepa vitokaki ga. Ana pogos naḗa la asike lele taaga sanene, Yesu mlologon Visena Wa kiena ne Ntewa pan la.

³ Ana e ke e pogos nene na, yar laḗasia atar yaru tai naḗa minana pimi, naḗa yepena wetelu ga mare. Ana la vari atar ga naga e m̄ana tog naḗa mono ke ea pimi.

⁴ Ana pogos naḗa apim atol yo naḗane, apisu sane yo pule pa rui, taḗatete si atar kiela erau nene va lavisin Yesu. Pisi na lala ataryaun naga apa metava e wos nen yuma naḗane, lala am̄epo wos nen yuma metava mesmesun ga e naḗa Yesu sike ea, amligan malumun yaru naḗa mono ke e

m̄ana tog, pitomi tano e pulmas naḗane, pito loyuma.

⁵ Ana pogos naḗa Yesu kira pisu sur nene, kilia sape la nene, amlelaga m̄arera e naga paḗisi sane yoko naga iila kiela inanena nene, naga pisa pania, pisape “Naruu, in na nepiewo kon kioḗa mlamulena piowa lala.”

⁶ Ana e pogos nene yaru navianena na visaluaena la p̄asia asum̄a ga, amloge ke visena kiena ne Yesu. Ana p̄isi na la kiela sitomena la miyumaḗe piowa ke e sur nene,

⁷ apisa kare ke naga, apisape “?Yaru nene pisalele kare ke kia wa kiena ne Ntewa sanape na sanene? Ntewa naga taaga kilia viewo mlamulena viowa lala, pe yar re si tai poli, ana yaru nene pis ke sanene, naga sitom ke sape naga pe Ntewa narui.”

⁸ Ana veraga ga, Yesu mnunulu-p̄aria sape asitom ke piowa sanene e naga, ana pis pan la, pisape “?Komin ya ne sinemiu la pulen ke sitomena viowa la ne sanene?”

⁹ Visae nevisa ve sanini van inanena nene, nevisave ‘Nepiewo pa kioḗa mlamulena viowa rui,’ pona nevisa vania nesapenua ‘Osum̄alu, osulowar moḗa tog, oyali,’ ana e visena lua nene, tai naga m̄areran navisaena, a tai naga meme ga naḗa avisa. Naḗa sape ‘Osum̄alu, oyali,’ naga m̄arera manene laa, komin yoko akilia avisuluḗar sane kiau visena nene pe lelaga pona pe pe lelaga re poli, naḗa yaru nene sum̄alu, pona pe sum̄alu re poli.

¹⁰ Ana nagane, neyumaḗen sur tai naḗa amiu asitom ke asape Ntewa ga naga taaga kilia yumaḗenia, vena akilia avisuluḗar sane Narina Yeririna naga kiena puriukawaena torokin naḗa viewo mlamulena viowa lala na yomarava nini. Amiu ayagogan ruruia.”

¹¹ Ana Yesu pisa pa yaru na inanena naḗane, pisape “Nepisa pan ko, osum̄alu, osulowar moḗa tog, oyali ova uma.”

¹² Ana veraga ga, e maran la naḗa apisu ke, sum̄al sanene, kus m̄ana tog, mial pa vanua pa uma.

Ana pogos naḗa p̄ina la nene apisu sur nene, amilan paḗisi, amieluar Ntewa,

asape “Awee, pe tepisuli re sur tai sanene poli wa e kieta malena, ãpane ga ne.”

Yesu pio Matiu naãa kiena kia tai Livae pimi tavevea

Matiu 9:9-13; Luk 5:27-32

¹³ Ana Yesu ãasuãe si pito garo e is nen pupia lapa, ana ãina la moki apim lele taaga e yo nene akovivia, naga pian la ke.

¹⁴ Pisi na naga mial laa pa sane, ki-rawal yaru tai teke e kiena yuãaena e yuãa na warpoloen kururu varu na takis. Yaru nene naga Livae, narina ne Alpeas. Ana Yesu pion pania, pisape “Oimi otavevenu.” Ana veraga ga Livae suãalu, taveve Yesu.

¹⁵ Siraunia, Yesu pa kinana e yuãa ãana Livae, ana e pogos nene, li nawarpoloen ãena takis la moki, amio ãarmãrera taãena la, naãa apimi atotano veraga amio Yesu amio kiena nalogena lala, komin e legiena nene, yeririna kar la ne naãa atavevelili ãa Yesu.

¹⁶ Ana navianena navisaluaena la ãasia, naãa la ape le Varasi lala, apisu naãa Yesu teke veraga amio yaru la ne sanene, apiun tan nalogena lala, apisape “?Komin ya ne kiamiu navianena kinan ke veraga amio ãarmãrera la sa nene?”

¹⁷ Ana Yesu mloge visena nene, pisataãe la, pisape “Yaru la naãa yepela poga ga la pe sinelan re asape ava puna ne yaru nakilaruruen maiena la poli, ana la ga naãa amai, la na sinelan paãisi. In na pe nepimin re naãa nevio yaru la naãa apisa ke asape amesmes ãisi rui e marana ne Ntewa vena ataveve inu, peraga, in na nepimin li viowa la sane la nini.”

Naviunena tai e lepas na monsilena

Matiu 9:14-17

¹⁸ Ana e pogos nene, nalogena kiena ne Yoane Nakeena amio le Varasi lala aãuar ke ãelaga namonsilena nakilaen lotuena van Ntewa, ana yeririna la apim pu Yesu, apiun tania, apisape “?E, sanape ne naãa nalogena kiena ne Yoane la amonsilu pe nakilaen leniena, a nalogena sa le Varasi ãena lala, akila ke maran taaga, ana komin ya ne kiomãa nalogena lala pe akila re poli?”

¹⁹ Ana Yesu pisataãe la, pisayu naga amio kiena nalogena lala, sane la akekara paãisi pogos naãa naga sike amio la, ana ãisi na sinela viowa pogos naãa sa naga ure matan la, ana pisape “?Pogos naãa yaru natalopa-ena sike e ãaãagena amio kiena erau lala wa, asitom ke asape lala monar aligan kinanena na ãaãagena? Peraga.

²⁰ Ana siraunia, visae pogos tai nasinekar kiena ne yaru nene laãasia aimi aurelua naga vetan kiena erau lala, e pogos nene narui kiena erau la nene akilia aligan kinanena, komin naãa la sinela piowagan manene naga.”

Sur viu amio sur marua

²¹ Pelaga na monsilena nene, naga ãelaga marua tai na lotena kiena ne le Yu lala, ana Yesu sinenan pisape kila meraravan van la sape ãelaga marua la ne sanene, la taãatete yakol si amio suri viu la naãa naga pian lan ke ne. Ana pisa ãakaiwa tai e lepas nene pan la, pisape “Taãatete tela kinakina kulmrae tai naãa pe urviu ana tesuluwo ruru pulus naãa teke e kulsota marua nene, komin kulmrae viu nene kilia urewowa kulsota nene komãas, ãisi na pulus naga kilia vim ve keviu laa sane.

²² Ana kuruta na munena naãa sirpup pava ke ga wa, taãatete tetaron vito e kulus nen nane naãa pe urmarua, naãa ataron kuruta na munena pito ea yam moki rui. Ana visae tekila ve sanene, yoko kuruta naãani lapa, kila kulus mapoa, kuruta namunena naga taroi, a kana pias nena piowa nena ga. Ana kuruta viu, monar tetaron va e kulus nen nane naãa pe urviu, ãarera ruru po, ana tekilia teligan ruru moãa yam ve piavi.”

Yesu pe suãen Legiena Wa

Matiu 12:1-8; Luk 6:1-5

²³ Ana e legiena taãena si tai, naãa pe Legiena Wa, Yesu amio kiena nalogena lala amial apano, ana kiela mrapa naga pa kom lokove na kona lala. La amial ãa sanene, pano-o kiena nalogena la viso kari la, ana apae plan kona laãasia akania.

²⁴ Lala akila ke sanene, le Varasi la p̄sasia asum̄a e naṣane, naṣa akirawal ke Yesu lala, apisa pa Yesu, apisape “!Ei, okira! Kioṁa nalogena la akila ke sanene, la pe pon re akila sanene e Legiena Wa poli, sa ve sanene la akilaro ke kieta navisaluaena ne.”

²⁵ Ana Yesu pisatam̄e la, pisape “?Pona pe amiu apuloli re e Visena Wa pogos tai poli yo, naṣa pisayu sur la naṣa Parin Suṣe Keviu Tepet kila nanua sumo? ! Amiu akilia ruru pa rui! Naga amio kiena yaru lala viso kar la paṣisi,

²⁶ naga pa loyuma e lele wa kiena ne Ntewa, mla kilaparavi wa naṣa navisaluaena pisape yar wa ga lala akilia akania, ṣisi na Tepet la akania. Ana Apieta, naṣa pe ṣarin yaru wa e pog nene, naga tam̄an ga pan la.

²⁷ “Nevisa van amiu, sane kieta navisaluaena lala pe pe na m̄areran kare itaen re si poli. Ve sanene na, Legiena Wa naga pe pe na kila kareen re si malena kiena yeririna la poli, ana pe naiila itaena.

²⁸ Ana Narina ne Yeririna naṣa pe suṣen sur punu ga, naga ke narui pe suṣen m̄ena Legiena Wa, naga ga kilia visa ya naṣa tekilia teyumaen e Legiena Wa, a naṣa ve teyumaen re.”

3

Yesu kila ruru lima ulu tai e Legiena Wa Matiu 12:9-14; Luk 6:6-11

¹ Ana e Legiena Wa si tai na, Yesu naga pa si e yuma na lotuena, ana e pogos nene, yar tai naga m̄eke loyuma naṣa limana tai pulu.

² Ana le Varasi laṣasa naṣa sinela kar ke pa Yesu rui, asike lavisin naga e pogos nene, la asape apisuar ruruli ke naga, vena alual li ṣelaga viowa ṣasia e naga, ana sinelan asape avisuli m̄ena yoko Yesu kila ruru lima ulu nene e Legiena Wa nene pona ve kila re.

³ Ana Yesu pisa pan yar naṣane, pisape “Osum̄alu, ovam metava e nini wa,”

⁴ ana naga piun tan la naṣa asike ne, pisape “?E, kieta navisaluaena pisa ke sape tekilia teyumaen yara la ne e

Legiena Wa lala? ?Pisa ke sape tekilia teyumaen sur la naṣa po, pona sur la naṣa piowa? ?Po pisa ke sape tekilia tetamalia yaru, po towemoṁaria?”

Ana la nene pe apisa re si sur tai poli.

⁵ Ana Yesu kira pisuveve la, pisu marala la m̄arera ga sike na, ana naga mloge piowa manene paṣisi vanonia, ana sinena kari la. Ana naga pis si pan yar naṣa limana pulu, pisape “Kian mesmesun li lumoma wa.” Ana pogos ga naṣa yar nene kila sanene, limana pimi po sina ga.

⁶ Ana le Varasi la amolue, apa mesmes ga apisu yeririna kiena Suṣe Erot, naṣa lala akilia alual li mrapa tai na wem̄aren Yesu ve sanape.

Yeririna la moki apimin Yesu

⁷ Ana Yesu amio kiena nalogena la apetan la, apato si garo pupia lapa, ana yeririna la moki atavevela apatove. Yeririna la nene, laṣasia amolue e yo taṣena lala nae Kalele,

⁸ a la ṣasia apitom tano e lepas naṣa Yutea, amio pupia kiela kumali naṣa Yerusalem, a ṣas apitom e lepas naṣa Itumea, a ṣas apitom e wii naṣa Yortan lepas na vano, a ṣas akom ma pupia sive keviu e yo lala nae kumali keviu lua nene, Taea amio Saeton. La punu nene amloge pa visena na sur la naṣa Yesu miyumaen ke rui, ana asape aviminia.

⁹ Ana pogos naṣa la punu ga nene asike e is nen lapa, Yesu pisa pan kiena nalogena la pisape ava avisawo narin waa tai toṁa ga, komin yaru la nene moki liu, ana naga yepen mavin sape sa ṣisi yar la aim yo kuskus manene la puna.

¹⁰ Na nene komin naga kila inanena la moki amloge po si rui, ana yar taṣena la naṣa aminana ke wa, la m̄ena moki naṣa asusunlan ke asape aimi lavisin Yesu, vena atol ga naga.

¹¹ Ana e pogos nene, visae ninuna viowa la asike e yeririna la ṣasia, visae avisu Yesu, lala monar avatanonia, akinai e mia lana, avion m̄areran, avisave “Ko na ope narina Ntewa.”

¹² Ana Yesu pis m̄arera pan ninuna viowa la nene, pisaluṣar la pisape yoko ve

avisawal re sanene van yaru lala avisave naga ai.

Yesu mliganar kiena nalogena la lual-ima taaga pa lua

Matiu 10:1-4; Luk 6:12-16

¹³ Ana siraunia, Yesu naga pa metava e yo naña pe kunusia, naga pio yeririna lañasia pisape aimi puna.

¹⁴ Ana pogos naña apimi, naga mliganar la lualima taaga pa lua, pisa pisape lala ave nalologena, naña kiela yuñae na ve sanini: yoko monar la ayal luen ga amio naga, a yoko naga ligana la vena akus Lollogena Wo va e yo lala,

¹⁵ a yoko puriukawaena na mñeplanen yermare sike e la.

¹⁶ Ana kia kiena ne nalologena ne lala sanini:

Saemon, naña Yesu sikiapu si ki viu tai Pita,

¹⁷ a Semes, naña narina ne Sepeti, a Yoane naña wenla ne Semes nene, naña Yesu sikiapu lalua nene rui, asape Ponases, naña kana kinasia pisape la lua nene ape polilu nena ga, komin la lua nene, pulgola apismolue lue ga,

¹⁸ a Antru,

a Pilip,

a Patalomiu,

a Matiu,

a Tomãs,

a Semes naña narina Alpeas,

a Tateas,

a Saemon, naña kila politik pan le Rom lala,

¹⁹ amio Sutas nae Kariot, naña sirau-
nia pielua Yesu.

Namratava puna ne Yesu asitom ke asape naga pe wowe

Matiu 12:24-32; Luk 11:14-23, 12:10

²⁰ Ana siraunia, Yesu ãasuñe si uña, pupia ãina la apim si puna, ana Yesu amio kiena nalogena la amiyuñae na ãa pano-o pe aparurula re nena ga, akinana re poli.

²¹ Ana la naña e mratava puna ne Yesu amloge naña naga miyuñae manene la pa sanene, amloge mña yar tañena la

apisayu ke naga, apisape “!Yar nene kilalu pa ãarina rui!” ana anena amio wenla lala, apano asape aurelua naga vetan la.

Yerkawa mña lala apisa ke asape Yesu miyuñae ke ga e puriukawaena kiena ne Yermare

²² Ana e pogos nene, navianena na visaluaena lañasia amligan ma Yerusalem apitomi e yo nene, la mña apisayu ke Yesu pan yeririna lala, asape “Yaru nene, suñe kiena yermare la naña Pelsepel, naga pa mñeke e rui,” ana apisa mña, asape “Yar nene, naga mña pile plan ke ga yermare lala e puriukawaena naña Pelsepel tañan pania.”

²³ Ana Yesu pio la apimi lavis puna, pisi pan la e ãakaiwa, pisa sape “?Sanape, amiu asitom ke asape Yermare naga kilia mñenlua sina Yermare? !Naga tañatete nena ve sa nene!

²⁴ Visae suñe tai, kiena yeririna la aureure, sane komñas la na akawela ke amio lañas, yuñae kiena suñe nene tañatete ga suñalu.

²⁵ A visae uña tai, la aureure naña la ãasia asape amñene plan lala ãasia, yoko yeririna la nene tañatete asu ruru pogos tai.

²⁶ Ana sa mña nene, sa yermare kiena Yermare Lego, la ãasia asuñalu asape akilali naña amñene plan lala ãasia, nanene kana kinasia sane nasuñenena kiena Yermare tañatete suñal mñarera, kiena puriukawaena naga ãisi. !Ana peraga, yermare mñarera ke ga wa!

²⁷ “Kam na apisu ke ne, visae yaru tai sinenan ke pisape va loyuña mña ne yaru mñarera tai vena vinaun kiena sur lala, naga monar war kilika viar ke ne yaru mñarera nene sumo wa, ãisi na kilia war plan kiena suria. Ana nekila ke sanene pan yaru mñarera nene Yermare.

²⁸ “Lelaga nepisa ke pan amiu, mlamulena viowa kiena yeririna lala, amio visena viowa la naña apisa ke nene, Ntewa kilia viewo la vanonia,

²⁹ ana yar naña visae visanena kare Ninuna Wa, visa kiena yuñae ãasia Yermare Lego ga naga miyuñae, yar

na sa nene tařatete tol naviewoena pogos tai, kiena mlamulena viowa nene tolue ga vano-o tařatete řisi pogos tai.”

³⁰ Yesu pisa ruru si visena řmarera nene pan la komin la nene la ke narui nařa apisa ke asape ninuna nařa teke e naga pe ninuna viowa ga tai.

Anenane Yesu amio wenla lala apim asape aurelua naga

Matiu 12:46-50; Luk 8:19-21

³¹ Ana anenane Yesu amio wenla la apimi akate e pog nene, asumal ga asumã vanua, amligan visena pavinia vena naga vitom katen la.

³² Ana e pogos nene, pupia řina atotano ke lavisin Yesu, ana visena nene pa tol naga, la apisa apisape “!E, anomã amio womla lala asike vanua, asape avis kone amio ko wa!”

³³ A Yesu pisatařne la, pisape “?A aneu naga ai? ?A wolai lala ai?”

³⁴ Ana kira pisuveve la nařa ateke lavisinia pisa pan la pisape “!E, apisu ke ne! Aneu, amio wolai lala, la ke nene narui.

³⁵ Komin yaru nařa miyumãen sur nařa Ntewa naga sinenania, yar ne sanene naga pe wolai, a pe vineu, a pe aneu řa rui.”

4

řakaiwa na yaru nařa peven kona

Matiu 13:1-9; Luk 8:4-8

¹ Ana e pogos tařena si tai, Yesu pian ke yaru lala e yepas nen lapa nae Kalele. Ana yeririna la moki nařa apimi puna e pog nene, kila naga pa metava e narin waa tai nařa tořa e lapa nene, pa totano metava ea, ana yar la nařa asumã ga ura.

² Ana naga pian la ke e sur la moki e řakaiwa,

³ naga pisa pan la, pisape “Ayagoga ruru lia. Yar tai, naga pa peven kona e kana lokove.

⁴ Ana pogos nařa naga peven kona la pa sanene, kurus la řasia kekapil lavisin laa is nen mrapplepa. Ana siraunia, manu la apimi atete plan sina.

4:1 Luk 5:1-3

⁵ “Ana kurus lařasia kekapil e yo nařa kilavaru sike vatano. Ana e yo nene pe porotano wo keviu re poli teke metava, ana kila narui akapuru iroro ga,

⁶ ana pogos nařa mrae řarlar pa metava, yepisusunun sus lala, veraga ga amiyayai komin řeligas la pe pito manene re tano poli.

⁷ “Ana kurus řasia amlolor e yo tai nařa sumo pe ate plan ruru re kilika la nařa pe nonos e poli, ana řisi na kilika nene kapur sina keviu, ana piwo make ga sus nen kona la nařane pano-o amarmare, pe ařar re si mras la poli.

⁸ “Ana kurus tařena la amloloru e porotano nařa po, akapuru po, pano-o ařar mrasnela lala. La řasia ařar mrasnela tol lualima yam telu [30], a lařas ařar tol lualima yam orai [60], ana lařasia pa laa tol ponotia taaga [100].”

⁹ Ana Yesu pisa pan la, pisape “!Amiu punu ga kiligamiu sike na. !Popon sa aloge kilia kiau visena nini!”

?Komin ya ne Yesu pis ke ga e řakaiwa lala?

¹⁰ Ana siraunia, řina lala apiařa tetai, ana Yesu naga taaga ga sike, ana yar la nařa asike amio naga amio kiena nalogena lala, apim apiun tania apisape “?Kinas nen řakaiwa nini naga sanape? ? Ana komin ya ne ko na okuan ke visena la ne sa nene, ana opian ke mrena yaru lala e řakaiwa?”

¹¹⁻¹² Ana Yesu pisatařne la, pisape “In na nepian la ke e řakaiwa la nene, komin la ape řarmarera la pařisi, sa nařa akila ke visena kiena Navisawalena Aisea na konua rui pimi pe lelaga, nařa pisa ke sape

‘La akirava, akirava řa vano-o, amloge, amloge řa vano-o, ana tařatete avisu kilia suri tai, tařatete mrena aloge kilia suria.

!Visae peraga, pona avilon kiela sitomena la yo rui, pona Ntewa viewo pa kiela mlamulena viowa la yo rui!’ Ais 6:9,10

“Vanon sur sanene, inu nepisape lala ape řarmarera lala, asumã perina pařisi.

Ana amiu ke narui, yoko wo laa van amiu vaṽisi. Navisawanena navesuṽenena kiena ne Ntewa, yoko in na nevisawal ruru merarava wo van amiu.

¹³ “?Ana sanape, amiu pe amloge kilia re kinas nen kona nene poli? ?Ana visae amiu pe asitom kilale re kinas poli, ana sanape yoko aloge kilia ṽakaiwa taṽena la naṽa sa nevisayu van yeririna lala?”

Yesu pisawal kinas nen ṽakaiwa na yar naṽa peven kona

¹⁴ Ana Yesu pisa, pisape “Pogaga, yoko in na nevisayu meraravan kinas nen ṽakaiwa nene van amiu. Kana kinasia naga sa nini: Porotano taṽena la nene, la sa naṽa malena kar la ne kiena yeririna lala. A naṽa yar nene peven ke kurusia e porotano la nene, naga sa naṽa apisawal ke visena kiena ne Ntewa pan yeririna lala.

¹⁵ “Porotano m̄arera naṽa e is nen mrapplepa, naga sa naṽa yar naṽa pogos naṽa mloge visena kiena ne Ntewa, ana visena nene pe pa ruru re nena loyuma e losinena poli. Ana manu la nene, la sa naṽa Yermare, naṽa veraga ga pimi mlalua sina visena kiena ne Ntewa petan los nen yeririna nene.

¹⁶ “Ana porotano naṽa kilavaru naga sike tano, naga sa naṽa yar naṽa mloge visena kiena ne Ntewa, ana verakorena ga kekarania, ana mlavia,

¹⁷ ana visena nene naga pe towawa ruru re e losinena poli. Ana naga kapuru sa ga narin sus tai naṽa pe pe ṽeligas ruru re poli naṽa kila yoko kapuru ve plas ga. Ana pogos naṽa sa pog m̄arera la imi pona yar la asape avevela komin amlelaga ke e visena kiena ne Ntewa, ana verakorena ga aligan sina ga.

¹⁸ “Ana porotano naṽa kilika viowa sike ea, naga sa naṽa yar la amloge visena kiena ne Ntewa,

¹⁹ ana ṽisi na, lala asitom manene la kiela malena, a sitomena na waren sur ve moki vim kila kotalia la, ana lala sinelan manene la sur wo lala na yomarava nini. Pelaga la nene pimi sane kilika viowa,

piwo Lologena Wo nene kila sane ve war re si mrasa e malena kiena yeririna la nene.

²⁰ “Ana porotano wo nene, naga sa naṽa yeririna la naṽa amloge visena kiena ne Ntewa, amloge kilia, akekarania, amlararia e losinela, ana siraunia aṽar mras nen Lologena Wo nene e kiela malena, la ṽasia aṽaria tol lualima yam telu [30], ṽas tol lualima yam orai [60], ṽas tol ponotia taaga [100].

“Kinas na ṽakaiwa na kona maro ga e nene.”

ṽakaiwa na kapi na tegaena

Luk 8:16-18

²¹ Ana Yesu pisa sina pan la, pisape “Ita yeririna lala, visae tesilan kap vivaga, yoko ve telawan re to vatanon paket. Peraga, monar tetelan to metava e kana lele nena vena tegoli punu yo.

²² Sanene, nanagane nasuṽenena kiena ne Ntewa sane kapi te ga nene, naṽa nanagane na molmolue ke e ita narui, vena tegoli sur punu ga, ana sur lala punu ga naṽa apisawo sike na, a visena wan lala, monar akakate e yomerarava.

²³ !Ana amiu punu ga kiligamiu sike na, popon sa aloge kilia kiau visena nini!”

La monar ayagogan ruru visena kiena Yesu

²⁴ Ana Yesu naga pis si pan la, pisape “Amiu monar ayagogan ruru kiau visena, asitom ruru la lia. Yaru naṽa mloge, ana pe taveve re poli, naga yoko taṽatete loge kilia ruru si narui. Ana yar naṽa mlogear kiau visena la, naga kilia loge kilia ruru m̄ena kiau navianena la moki naṽa sa imi si sirau.

²⁵ Ana yar naṽa kiena suri moki pa rui, yoko war ve moki laa va laa sane, ana yar naṽa pe kiena sur re poli, ṽisi na naga kilalu narin sur naṽa mla ke.”

ṽakaiwa na kurusia naṽa kapuru ke

²⁶ Ana Yesu pisa ke sina ga pisape “Nasuṽenena kiena ne Ntewa naga sa naṽa kona naṽa yar tai naga peven ke e kiena porotano.

²⁷ Pogos naña peven pae na, pe kila re si sur tai e kurus nene poli. Naga momña momalio ga, tavolo, momalio, tavolo, sumñalu, salue ga nene yemalo a legiena, ana kurus nen sur nene, naga ga sus plamolue, kapuru ke sanene. Kapuru mña pano-o, ana yar nene naga kiliar re kurus nen sur nene kapur ke sanape poli.

²⁸ Yar nene kilia re sur tai poli, pano-o korowas la kian pa perina piavi re na þar vinasia, þisi na tau.

²⁹ Ana pogos naña kinas la menmene ruru po, yar nene siar si miyumñae narui, þar kiena playu pa te plan mrasnena lala.

“Ana navesuþenena kiena ne Ntewa naga kapur tekak ga sanene, telivi ke e yomarava wetelu nagane, ana e legiena tai yoko tekirawal pupia mrasnena vam metava.”

*Pakaiwa na kurus nen purpa
Matiu 13:31-32; Luk 13:18-19*

³⁰ Ana Yesu pisa sina, pisape “Pelaga navesuþenena kiena ne Ntewa naga pe taþena ga sike na, naga mñarera paþisi naña nekilia nekirawal si þakaiwa tai naña vena visaen sape naga sanape.

³¹ Sa naña kurus nen purpa tai yo, naña naga tekaki ga miyuve kurus nen sur taþena la naña temapila la ke e kata lokove lala, naga tekaki na tekaki.

³² Ana pogos naña kapuru keviu, purþesia naga pimi keviu miyuve make ga kinanena taþena la naña sike e kata lokove lala. Ana pupia korowas la paþisi, naña manu la akilia ava ase ea, vanon kana wamal po, yomanin ea.”

Yesu naga pian yeririna la e þakaiwa

³³ Ana Yesu pian ke yeririna la e Lologena Wo e þakaiwa la moki sanene, naña sane torokin yoko akilia aloge kilia.

³⁴ Visena la punu ga naña pian lania, þakaiwa teke loyuma, ana pogos naña naga ga sike amio kiena nalogena la, e pogos nene narui na naga sun pisa meraravan kinas nen þakaiwa la nene pan la.

*Pupia lagi naña Yesu naga pisawoia
Matiu 8:23-27; Luk 8:22-25*

³⁵ Ana Yesu sumña ke e waa naña naga totano e pian yeririna lala, ana ko yepekilavi, naga pisa pan kiena nalogena la, pisape “Ei, ita tokusro teva komþas nen lapa vano.”

³⁶ Ana kiena nalogena la amligan yeririna la asike na, apa e waa naña Yesu naga teke pa e rui apano. Ana narin waa si laþasia asiraun la.

³⁷ Narin waa la nene apato mña pano-o, pupia lagi tai naga molue, miyu lapa naþane kila pupia sive naga kekela ke e waa, kila na pulen ke e sive narui, lavisi talilu.

³⁸ Ana Yesu naga miyulugan ke e yulugana tai e þeren waa, monon momalio mña. Pisi na lala apa apioþegeia, ana apisa pania, asape “!Navianena! ?E, sanape pe ositomñal ita re na lavis tetalilu ne po?”

³⁹ Ana Yesu sumñalu, pis mñarera pan lagi, a pis mña pan pupia sive la nene, pisape “!Amiu ava ruru amiu!” Pisi na lagi molue re si poli, yo mare ga mñeke na.

⁴⁰ Ana Yesu pisa pan la, pisape “?Komin ya ne amiu amarau sanene? ?Amiu pe amlelaga re e in poli yo?”

⁴¹ Pisi na la amarau paþisi, apiuyun ke sina ga petan la, sape “?Yar a nene? Aulai, naga pis ga sanene na, lagi amio sive amlogear veraga ga.”

5

*Yesu mñene plan ninuna viowa moki
petan yaru nae Kerasa*

Matiu 8:28-34; Luk 8:26-39

¹ Ana Yesu amio kiena nalogena lala apimi aþarpo yo e komþas nen pupia lapa nene, aþarpo lologia yo naña Kerasa, naña laþas apio ke asape Katara pona Kerkasa.

² Ana la apa ura e yo nene, ana e yo nene puluve na yar mare la asike ea, ana yar tai naña ninuna viowa teke e naga, naga sike e lotap nene, sa naña pe mña uma.

Ana pogos naña Yesu pula tano petan waa, veraga ga yar nene molue e lotap, kiriri pitomi puna.

³ Yaru nene marana ka pañisi, yar la akilayon asape aviaria pano-o akilapule ga yonia.

⁴ Yam moki rui apiar lana amio limana e sen pona kilika, apiviaria panon laki ana naga pureroro ga sen la nene amio laki lala, pano-o pe yar re si tai poli naña puryuna kawa torokin kila yar nene imi momāu.

⁵ Ana kolemallo punu ga amio legiena, naga sumā mialialor ke e lotap a metava mēna e kunus lala, naga monon māmāul ke, a pilavilan wowa ke yepena lala e kilavaru.

⁶ Ana yar nañane, pogos naña naga sumā ke perinan yo naña Yesu la apim ura ea wa, naga māl pa Yesu rui, kiriri pitomi tano puna, patanonia, kinai puna.

⁷⁻⁸ Ana Yesu pisa, pisape “!Ninuna viowa, ovetan yar naña, oure matan naga nanagane!”

Ana ninuna viowa mlokai mārera pania, pisape “A ko, Yesu, narina ne Ntewa Mali, kioña ya ne teke e inu? !In na nepiun tan ko, e kia kiena ne Ntewa, sane yoko ko na ve ola re nakoena van inu.”

⁹ Ana Yesu piun tania, pisape “?Ko na kioña kia ai?”

Ana ninuna viowa pisatamea, pisape “In sa kia Yaru Moki na Mara, komin imimi moki liu.”

¹⁰ Ana ninuna viowa nañane piuyun māreran ke petan Yesu sape ve mēne plan la re vetan māla nene.

¹¹ Ana e yepas nen kunus nae yo nene, pupia pēgas nen nompui, la asun akolkol mā e porotano, naña tol sane manu lua [2000],

¹² pisi na yermare la nañane atagi, apiuyun mārera petan Yesu, asape “Awis, oligan imimi meva e nompui la nene, otamān imimi meva mese e losinela.”

¹³ Ana Yesu tamān pan la, pisape “Pogaga, amiu avano.” Ana lala amolue petan yar nañane, apa e los nen nompui la nañane. Ana veraga ga, nompui la nene akiriri, apito tano e yeparpas nen kunus nene, amloloru apito tano e pupia lapa nañani, ana la amunmār lan wii na amarmare.

¹⁴ Ana yaru navisuaren nompui la apureure, apito unā, apisawal sur nene,

a lala apisawal mēna e yo tañena la naña sike ne, kila narui na yeririna la moki naña apavin asape avisulia.

¹⁵ Ana pogos naña la apavini, apisu Yesu naga sike amio yaru naña sumo ninuna viowa la ase naga, mian pa kulmrae rui, pa ruru pa rui pe maran ka re si poli. La apisu naga pimi po si sanene rui, amaraunia.

¹⁶ Ana la naña asuñesania apisu ke sur la punu ga nene, la asunyu pan yeririna tañena la naña apam marea, la apisayu sur la naña Yesu miyumāen pan yar nene, a sanapen nompui la naña amloloru apito e wii.

¹⁷ Ana la apisu sane piowa ga, amāreran ke pan Yesu asape naga monar ure vetan kiela yo.

¹⁸ Ana pisi na Yesu la apito si tano e kiela waa, pogos naña Yesu pa ke metava e waa, yar naña sumo ne, naga pitomi piun māreran ke pan Yesu, pisape “Awis Suñe, in na sineun nesape ko otamānia ita la nini!”

¹⁹ Ana Yesu pe tamān re poli, pisa pania, pisape “Peraga, popon sa ova si unā, ovisayu van la naña na mratava pun ko amio kioña erau lala, ovisayu van la sanape naña Ntewa sinena miye ko pañisi, ana kila po na po sanene pan ko.”

²⁰ Ana yaru nañane pāsufe sina, pa e yo punu ga e lañas naña puna, naña apio ke asape Pulkumali Lualima, naña yaru la naña Le Yu lala pe asu re e poli, ana pisawal ke yumāena wo naña Yesu miyumāen pania. Ana lala naña amiyagogon kiena sunena nene, lala amilan pañisi.

Narina ne Saeras naña sira, amio sira naña tol kulkota māna ne Yesu

Matiu 9:18-26; Luk 8:40-56

²¹ Ana Yesu la akome waa, akusro sina kompas nen lapa naña narui, ana pogos naña Yesu pula pa ura sane na, pupia pīna na yeririna la apim akovivi sina asike.

²² Ana yaru keviu tai na yumā na lotena nae yo nene, kiena kia Saeras, naga pimin sape visu Yesu, pimi lavisinia, kinai tano puna.

²³ Naga tagi pania, piun tania, pisape “Naruu naña sira, naga mai na mai, ana nanagane na pona naga mare pa yo rui. Ana nepiun ke tan ko vena ko oim, oligan lumomã te naga, vena loge wo sina, mal ve piavi re laa sane wa.”

²⁴ Ana Yesu þarlar sumãlu, amio yar naþane apavin, ana yaru la moki e þina la nene, la mña ataveve la, naña amigagar la ga e yepas nena ne Yesu apano.

²⁵ Ana lala yaru tai naña apa ataveve ke Yesu sanene, naga sira, naña inanena na kupario teke e naga legiena punu ga, tol kas lualima taaga pa lua rui.

²⁶ Ana sira nene, naga pul yaru na kilaruruen inanena la pano-o kiena kilavaru la þisi, akilayon naga pano-o paþisi, ana naga mloge maran taaga sike, inanena nene naga pimi keviu lue ga legiena punu ga.

²⁷⁻²⁸ Naga mloge yam moki rui naña yaru la apisayu ke Yesu, ana kiena sitomena tai na, sitom ke sape “Visae netol ga mña kulkota, yoko kiau inanena naga þisi.” Sanene narui na pa tapolou likan yeririna la naþane, naga pimlilue lavis varaun mñasina ne Yesu, kian limana sane na, tol ga mrapogos nen kulkota mña ne Yesu.

²⁹ Pogos naña naga tol kulkota mña Yesu sane na, veraga ga e aora nene kiena kuruta naþane þisi, ana naga mnunun luþaria e naga sane kiena inanena naga kovio petan rui.

³⁰ A Yesu mña mnunun luþar sur tai, sane puriuna tai kovio petania, ana naga pilon veraga ga likan yeririna la naþane, piunia pisape “?E, ane tol ga mña kulkota nanagane?”

³¹ Ana kiena nalogena la apisa-taþea, asape “?Ko na opiun osape ane tol ko ga nagane, sanape ne, ko pe opisus re yeririna la moki manene na amigar la akovivi ko ke ne po?”

³² Ana naga sumã kiraweve mña sape kirawal li ane tol naga.

³³ Ana sira naþane kilia pa rui, sape naga, naga marau paþisi, sinena kurkur na kurkur, þisi na pimi puna Yesu, kinai tano e mialana, pisawal sur punu ga.

³⁴ Ana Yesu pisa pania, pisape “Auia, nalelagaena ga kiomã e inu kila ko omloge si po narui. Kiomã inanena naga kovio nenaga. Sumãrena kiena ne Ntewa sike amio ko, owasuþe ko sina ga oto umã.”

³⁵ Ana pogos naña Yesu pis ke pan sira naþane wa, visena tai kom ma umã mña ne Saeras pitomi, pisawal pania sape “Narumã sira naþane naga mare rui. Yoko ve oure re si pupia navianena nene vavini, ve okila kare re naga.”

³⁶ Ana Yesu mloge mña visena nene, pisa pan Saeras, pisape “Ve sinemã viowa re, olelaga ga mñarera e Ntewa.”

³⁷ Ana Yesu pialuþar yeririna la punu ga sape la asumãra ga ve ataveve la re avavini, naga pure ga la telu Pita, a Semes amio wenla naña Yoane apavini.

³⁸ Pogos naña apa lavisin umã mña ne yar keviu naþane, apisu yar la sinela piowagan ke nin sira nene rui, la asike atagin ke, amlolokain ke.

³⁹ Ana Yesu pa loyumã, pisa pan yaru la nene, pisape “?Sanape ne amiu amlolokai keviu ke, atagi ke sanene? Sira nene naga mare re poli, naga momalio ga ne.”

⁴⁰ Ana la apitale viowa ga pania.

Ana Yesu pisa pan la apa vanua, purear ga anenane sira nene amio arimana, a kiena nalogena la telu naþane apa e lele naña tas nen narin sira nene mñeke ea.

⁴¹ Ana Yesu pa mlilu tarar limana, pis pania kome kiela visena, pisape “Talita kum,” kinas nen visena nene pisa ke sape “Kiau narin sira, ko osumãlu lia.”

⁴² Ana veraga ga e aora nene, narin sira nene naña kiena kas tol lualima taaga pa lua [12], naga sumãlu, mial. Ana pogos naña la apisu sur nene, amilan na pano-o kiela sitomena plas ga.

⁴³ Ana Yesu pisa pan la pisape ala re kinanena tai vania, a pisa mña pan la pisape yeririna taþena la ve aloge re sur nene.

6

*Le Nasaret lala pe sinelan re Yesu poli
Matiu 13:53-58; Luk 4:16-30*

¹ Ana Yesu molue e yo nene, þasuþe sina ga pimi kiena, amio kiena nalogena la.

² Ana e Legiena Wa, naga pa amio yaru lala nae kiena yo nene e loyuma e kiela yuma na lotena, ana suma pian la ke. Ana pogos naþa la amloge amilan kiena visena la pano-o paþisi. Ana la apisa apisape “!Aulai! ?Yaru nene naga þar sur la nene pe? ?Naga tol namanmaruaena nene sanape? A naga kila ke kile la nene sanape ne?”

³ Ita tekilia ke yaru nene rui. Naga yaru na yumaenen ga yuma, naga pe narina ne sira naþa Maria, a la nene, Semes, a Yoses, a Suta, a Saemon, naga pe wenla ne la nene. A vinena lala, la ga naþa asike amio ita ne.” Ana sinela karia, pe sinelan re nena naga.

⁴ Ana Yesu pisa pan la, pisape “Yaru naþa pe navisawalena, yaru taþena lala akilia avatanon naga, ana yaru nae kiena yo, amio mēna namratava puna, la ga nene taþatete avatanon naga.”

⁵ Ana e kiena yo wawa nene, Yesu taþatete kila kile la ea, ana naga mligan ga limana e yaru la lua la ga naþa aminana, amloge si po.

⁶ Ana Yesu sinen pula mila paþisi komin yaru la nae kiena yo wawa naþa pe amlelaga re e naga poli. Pisi na naga petan kiena yo, mial pa e pulkumali taþena lala ana pian ke yeririna lala.

Yesu mligan plan kiena nalogena lala peve lua

Matiu 10:5-15; Luk 9:1-6

⁷ Ana Yesu pio kiena lualima taaga pa lua nene, pis ruru pan la, mla namareraena pan la vena akilia ataulu ninuna viowa lala, a siraunia mligan plan la peve lua apano.

⁸ Visena wo la nene naþa naga pisa pan la sumon naþa lala apano, naga sanini, pisape “E lepas na kiamiu mrapa, yoko amiu ve awar re sur laþas amio amiu, ana kiamiu plasgai ga alararia avano. Yoko amiu ve awar re kami kinanena þasia, pona karo lala, pona varu.

⁹ Amiu akilia ayen kiamiu kulus nen lamiu lala, a ve awar re mamiu kulmrae taþena laþasia, mamiu kulmrae taaga nane amiyenar ke ne sa ayal avano.”

¹⁰ Ana Yesu pisa mēna ga, pisape “Pog naþa sa la awere amiu ava loyuma mēla, ana amiu monar akekaran ga nasuen amio na mratava nene, vano tol pogos naþa sa amiu avatan si pulkumali naþane.

¹¹ Ana visae pulkumali tai, yeririna laþas yepela mavin were amiuena ava mēla uma lala pona yepela mavin loge amiuena, amiu aligan ruru kiela yo nene mēke na, ana pogos naþa sa amolue e yo nene, monar atanvan puluyavi nae yo nene naþa sike e lamiu, sane kile tai, pona kiamiu visena marera tai pan la, sane yoko lala akus nakoena tai naþa memsesun ga kiela þelaga viowa nene.”

¹² Pisi na kiena nalogena lala apa amlogon pan yeririna lala asape monar avilopu la,

¹³ ana la amēne plan ninuna viowa la moki e yeririna lala, ataron mēna narin wel na mras nen olip e þarin nainanena la moki, sane kile na navisa ruruena kiena ne Ntewa, ana la amloge po sina.

Parin Suþe Erot Antiþas pisayu Yesu Matiu 14:1-2; Luk 3:19-20, 9:7-9

¹⁴ Ana e pogos nene, Parin Suþe Erot naga mēna mlogeli ma sur la naþa Yesu miyumaenia, komin kia kiena Yesu, apisawal ke pa rui e yo punu ga, a yeririna la punu ga akilia pa rui. Yar la þasia apisa ke Yesu, asape “Naga na, pe Yoane Nakeena si ne, naþa naga mal sina e marena; sur ne na nene kila naga puriuna kawan nakilaen kile la sanene.”

¹⁵ La þasia apisa ke asape “Naga na yer marua Elaisa na konua rui,” a la þasia apisa ke asape “Naga navisawalena tai ne sa naþa yermarua navisawalena lala nakonua manene la rui.”

¹⁶ Ana pogos naþa Suþe Erot mloge sur la naþa Yesu naga kila ke ne, ana naga pisa sape “?Yaru nene, pona Yoane Nakeena ke sina ga ne. Inu netero pa

řarina pa rui, ana nanagane naga mali sina e marena yo?"

?Yoane Nakeena mare sanape?

¹⁷⁻¹⁸ Ana Suře Erot pisa sanene vanon nařa naga męmar Yoane Nakeena mare nanua rui, ana naga marau pařisi. Ana marena kiena ne Yoane Nakeena kana suniena nena sanini: Wenla Suře Erot nene, naga kiena kia Pilip, nařa lalua arimala taaga a anela lua. Ana sumo, Pilip nene talopa amio sira tai, kiena kia Erotias. Ana siraunia, Suře Erot pa řerelua lein sira nene pe wona. Ana e pogos nene Yoane pis pa Suře Erot, pisape "Sur mesmesu re nene poli, nařa ko opurelua sira nene, komin naga pe wona ne womla."

Ana Erotias pe kekaran re nena visena kiena ne Yoane nene, naga sinena karia, ana Suře Erot mligan kiena yeririna la řasia apa atararia, apiari naga amligan pa e yuņa nakoarena.

¹⁹ Ana Erotias sinenan ke sape monar weņar Yoane, ana naga kila řele ga,

²⁰ komin Erot maraun wemoņarena. Naga maraunia komin naga kilia ruruia sane Yoane naga pe yar mesmes tai a pe yar wa, naga puar ruru ga suņa ga. Yam la moki naga mligan visenan Yoane pa puna lalua asun, naga kekaran visena kiena ne Yoane la pařisi, ana yam punu ga, visena la nene miyur ke naga, kila narui na naga kiena sitomena peve lua ke narui.

²¹ Pe piavi re poli na, Erotias māl kiena mrapa tai. Nane e pogos nařa la akila řařagena nasitorņalen legiena nařa Suře Erot paeme ea, ana Erot naga kila kinanena kana kiena yarkeviu lala, amio nasumonena na yuņaena kiena, a yerkawa tařena lala nae yo nařa Kalele.

²²⁻²³ E pogos na řařagena nene, lomņearu kiena ne Erotias naga polu e marala, ana Suře Erot la akekaran kiena wolena pařisi, naga pisaaria mārera pania, pisape "Suri ya nařa visae oviun tan inu, nekilia netaņan ga van ko, va tol komņas nen kiau sur make ga lala."

²⁴ Pisi na sira nařa pa vanua, piun petan anena nařa Erotias, pisape "?Auia, yoko neviun yar ne tania?"

Ana anena pisa pania pisape "Ovisa ga vania ovisave, naga monar kus ga řarina ne Yoane Nakeena van ita."

²⁵ Ana sira nařani miroro si pa loyumuņa, pisa iroron ga pa Erot, pisape "In na sineun nesape okus ga řarina ne Yoane Nakeena męne pialo tai imi ga nanagane e nini."

²⁶ Ana visena nene kila Suře Erot mloge piowa, pe sinenan re sape kilaro kiena navisaarena nařa pisaar mārera rui e maran kiena erau lala,

²⁷ řisi na veraga ga e mņa nena ga e pogos nene, naga miila kiena yar na mara tai pa pisa, pisape akus řarina Yoane vano. řisi na lala apa e loyumuņa e yuņa nakoarena nene, atelua kolmekina,

²⁸ ana la amligan řarina męne pialo tai, akus pimi pan sira męe nařane, ana kus pa pan anena.

²⁹ Ana siraunia, pogos nařa nalogena kiena ne Yoane la amloge suri nene, la apimi akus tasnena, apa amligan e lotap. Ana suniena kiena ne Yoane Nakeena maro ga e nene, ana pogos nařa Erot mloge suniena kiena ne Yesu, kila naga marau pařisi, mape Yoane Nakeena nene nařa naga męmaria, mal sina.

Li nalologena la apa amlologon visena kiena ne Ntewa řisi na ařasuřela sina

Matiu 14:13-21; Luk 9:10-17; Yoane 6:1-13

³⁰ Ana e pogos nene, nalologena la nařa Yesu mligan plan la apa amlologo, ařasuře la si apimi. Ana lala apisayu pa Yesu sur la punu ga nařa amiyumuņaen pan yeririna lala, a sanape nařa apian la.

³¹ Ana yar la moki nařa asumņa apimi ke pu Yesu, řisi na apano, ana řisi na tařena si la apimi, řisi na apano, salue ga nene, Yesu la pe apa ruru la re nenaga, pe aora re tai nařa la akilia ala narin kinanena tai. Ana Yesu pisa pan la, pisape "Aulai, ita, tevetanli la e yo nini wa. Teva takale yo tai nařa naga yo mņano, akilia avaruru amiu ea."

³² Pisi na la apa akus waa tai, asape ava akale yo tai lepas nen lapa naña pe yar la asu re e poli.

Yesu pagan yeririna la moki taulu manu lima [5000]

³³ Ana yeririna la moki apisu sane Yesu la apa ke sanene, la mēna ga amolue e kiela pulkumali lala, akiriri ataveve la akom ura, apato atolpēsa yo nene naña la apisu sane waa naga pato ke ea, la asumon Yesu lala.

³⁴ Ana Yesu pa ura, pogos naña pisu pīna na yeririna naña asike pa ura rui, naga sinena mie la pañisi, komin naga pisu la sa naña sipsip la naña akuspal mrapa, pe yar re tai naña kilia visuar la, pīsi na naga pa sun pian la e visena wo la moki.

³⁵ Ana pogos naña mrae pito tano, nalogena lala apimi puna, apisa asape “E, Supe, yo nini naga pe po re poli, a lavisi mēna yemalolo narui.

³⁶ Ana popon ko oligan pīna la nene awasupe ava mēla umā pona pulkumali lala vena awul kala kinanena la pāsia.”

³⁷ Ana Yesu pisatañe la, pisape “Toko, popon amiu ga awar kinanena pāsia van la.”

A lala amape Yesu naga pe pisa ruru re poli, ana la apisa asape “!Ke, peraga yo! Pona ko na sinomān ke osape imimi mowar pupia kieta varu ana mevato meul kilaparavi torokin lala manu moki nene akania!”

³⁸ Ana Yesu pitetalia la, pisape “Amiu avato avisulia apara ke kilaparavi via na sike amio amiu nanagane.”

La apato apisu pae na, apam sina ga apisape “Memlarar narin kilaparavi lima ga teke na, amio narin ika naña satin lua ga.”

³⁹ Ana Yesu pis pan yeririna lala, pisape “Amiu atotano e vilumīni wa,”

⁴⁰ ana la atotano e pegas lala, pegas laņasia sane lualima lima [50], ana pegas taņena laņasia sane ponotia taaga [100].

⁴¹ Ana naga mla narin kilaparavi lima naņane amio narin satin lua nene, kira pa ma e peni, pisa potena pa Ntewa vanonia,

pīsi na kaweroro narin kilaparavi lima naņane kian pa kiena nalogena lala vena avion plan van yeririna lala, pion mēna narin ika lua naņane sa ke ga.

⁴² Ana la akan mā pano-o, meņela la kawa pañisi,

⁴³ ana kinakinas nen kinanena la naña akanligania, torokin akon si va e karo la tol lualima taaga pa lua [12].

⁴⁴ Ana yaru la naña akan kinanena nene, yermēne ga lala, la atol sur sane manu lima.

Yesu mial yau metava e wos nen lapa Matiu 14:22-23; Yoane 6:16-21

⁴⁵ Ana Yesu pisa pan kiena nalogena lala, pisape “Inu sineun nesape amiu akus kieta waa, asumo akusro pupia lapa nene ava lepas pāsia e kumali naña Petsaeta, ana in na nesuwa nesumā neligan plan ke ne yeririna la nene wa.”

⁴⁶ Ana pogos naña naga mligan plan yeririna la nene apa pae na naga pa metava e kunusia vena len.

⁴⁷ Pogos naña yemalolo ke narui, waa naņane mēke perina pañisi, lika e lapa, ana Yesu naga taaga sike ura.

⁴⁸ Ana naga kira pisu la na mārera pan la na valuanen waa pañisi, komin la apane ke pupia lagi, kila kiela waa naga pure malum ga. Pogos naña lavisi yelagi merarava, Yesu pimi pula, mial yau ga metava e wos nen lapa. Suri ne na nene vena naga va pēsan ura sumon la,

⁴⁹ a pogos naña lala apisu naga mial yau ke e lapa pimi pula sanene, la apionia asape “!Aulai, suri ya ne pimi ke sanene! ?Yermare yo, pona yar ne sanene?”

⁵⁰ Lala punu apisu naga sa nene, amarau pañisi.

Ana veraga Yesu pisi pan la, pisape “!E, ve amarau re, in ga ne.”

⁵¹ Ana Yesu pīyu pa metava e waa amio la, ana veraga ga e aora nene, lagi nene mare, ana la naña asike e waa amilan pañisi.

⁵² Amilan sanene komin kiela sitomena la mārera ke wa, la pe apisu kilia re sur la naña Yesu naga kilia yumāenia e kiena puriu kawaena poli, sane ya naña

miyuñaen amio narin kilaparavi la lima nañane.

Namaiena lala atol ga luas nen kulkota mñana Yesu

Matiu 14:34-36

⁵³ Ana Yesu lala akusro pupia lapa nene e kiela wa, apa atol yo tai, kiena kia Kenasaret. Ana pogos naña akoan kana kilavaru pa ura,

⁵⁴ apula petan kiela wa, ana verakorena ga yaru nae e yo nene lala apisu kilale Yesu.

⁵⁵ Ana lala akiriri atelivi piora e mñala yuñña lala, akus kiela inanena la e mñala tog, apa ke e yo la naña amloge asape naga pa ke ea.

⁵⁶ Ana e yo punu ga naña Yesu pa ke ea, e yuñña lala, pona pulkumali lala, pona mrapa lala, akus ke kiela inanena lala, amligan ruru la ke pa rui e yo metava lala, la apiun ke tania asape visae naga tañania ana inanena lala akilia atoliga mñana luas nen kulkota. Ana lala naña atolga sanene, kiela inanena la pñisi, amloge po sina.

7

Nalogenena kiena Yesu la pe ataveve re ðelaga marua kiena le Yu la poli

Matiu 15:1-9

¹ Ana e pogos nene, le Varasi la pñasia apimi lele taaga puna Yesu, amio mñana navianena navisaluaena, naña lala akom garo Yerusalem apami.

² Ana lala apisu ke sane pogos naña nalogenena kiena Yesu la akinana ke, lala akila sane e nakiravaena kiena le Varasi la, la nene limala la na piowa ga. Na nene vanon pe ataveve ruru re narin mrapa la moki naña na kevanen limala sa naña le Varasi la apisa ke asape yar naga monar yuññaen, sumon naña kinana.

³ Nanene komin e pogos nene, le Varasi lala amio le Yu tañena la amñareran ke pañisi nayuññaen ve sanene, vena taveve ruruen kiela ðelaga marua na kiela nalotena na sumo lala.

⁴ La akila ke sanene pogos naña amiyal apa kumali, pona akom pe, ana pogos naña la awasuñe la si uñña, la monar

ataveve kiela navisaluaena na kevanlaen amerarava wo pona ave wa ruru sina. Pisin nakilaen sanene, la akilia akinana narui, komin visae la ve akila re, tañatete atol kala kinanena. Ana kiela narin navisaluaena mñana lañas moki naña monar atavevea, naña pñasia, na kevanen mñala piala la monar akevan ve sanene ve sanene, a pñasia, sane monar avilvan kala piaki ve sanene ve sanene, a pñasia, naña nakevanen kala pialo la naña amiyuññaen e pras ve sanene ve sanene, naga pa sa la nene.

⁵ Sur ne nanene kila le Varasi la apiun petan Yesu, asape “Komin ya ne kionña nalogenena la pe ataveve re ðelaga marua la na kieta nalotena na sumo la poli, naña kieta nasumonena la apian itania. Ana kionña yar la nene, la akinana ga e limala namname lala, komin pe akevan ruru re limala la poli.”

⁶ Ana Yesu pisatame la, pisape “Pe lelaga ga, navisawalena Aisea na sumo naga pisayu ruru amiu ga yeririna na visokanen lala, naña naga mlologon visena naña Ntewa naga pisa, naña naga pisa sape

‘Yeririna la nene la apatanonu ga e kiela visena lala, ana kiela sitomena naga sike perinan inu pañisi wa.

⁷ *La amiyeluarnu ke, ana pe sur korena ga, komin pog naña la apian ke yeririna lala, apisa ke asape visena nene kiena ne Ntewa, ana peraga, visena nene naga pe kiela ga yeririna lala!’ ”*

Ais 29:13

⁸ A Yesu pisa pan la, pisape “Amiu na amligan lua ke navisaluaena kiena ne Ntewa, apuarar ke ga ðelaga marua kiena ne yeririna lala mñarera.

⁹ Nanene naga pe memes re naña ayuññaen sanene poli, komin amiu amñareran ga nataveveen ðelaga marua kiena ne yeririna lala, a nanagane amiu akila pano-o ðelaga marua ga la nene naga sike narui, miaslua make navisaluaena kiena ne Ntewa.

¹⁰ Amiu na ve asitom re asape amiu akila ke sanene, ana yoko nevisa kiamiu tai, naña amiu asuñña akila ke. Amiu

asitomāl li navisaluaen kiena Mosis, naþa pisape ‘Ologear arimomā amio anomā,’ pisa mēna sape yar naþa sa vis viowa van arimana amio anena, awemonāria.

¹¹ Navisaluaena nene pisa ke sape ita monar tevisuar ruru ita kieta yermarua lua nene, ana amiu na akila pe taþena. Visae yar tai kilawoia sape kiena sur laþasia pe kiena ne Ntewa, ana pogos naþa kiena yermarua lua kiela sur re poli, aim aviunia, yoko amiu avisa ya ne vania?

¹² Yoko amiu amāreran vania, avisave ‘Toko, ve otamān re van lalua nene, vanon kieta þelaga naga pisa sape sur naþa tepisaarwoia pan Ntewa, ko na monar owar ga van kiena yar wa lala, ve otamān re van yar taþena lala.’

¹³ ? Amiu na apisa ke sanene, ana sanape na sanene? Amiu na asumāl ke mārera e kiamiu þelaga marua, amiu amligan lelein ke pitove, ana kila ke naþa þelaga marua la nene naga kila ke navisaluaena kiena ne Ntewa pimi pe sur korena ga. Ana pe naga re ga nene poli, amiu akila ke mēna sur la moki sanene.”

Suri la naþa kilia kila yaru naga pe namname e marana Ntewa

Matiu 15:10-20

¹⁴ Pisi na Yesu naga pio si yeririna lala pisape aimi veraga puna, ana pisa pan la, pisape “Amiu punu ga ayagogan ruru inu, monar aloge kilia kiau visena la nini.

¹⁵⁻¹⁶ Pe sur re tai naþa teke vanuan yeririna, naþa sa naga va loyūmā e losinena kilia kila naga namname e marana Ntewa. Ana suri ga la naþa sike loyūmā e losinena yeririna, pogos naþa molmolue e naga, kila naga ve namname e marana Ntewa.”

¹⁷ Ana Yesu petan yeririna la nene, pato si umā, siraunia kiena nalogena la apim, apiun tania e kinas nen þakaiwa naþa naga pisayu pan la.

¹⁸ Ana Yesu pisape “?Ei, sanape, pona amiu mēna pe þarimiu pike re sane la nene poli yo? Komin ya ne amiu mēna pe apisuluþar re sur nene poli, sane suri la naþa teke vanua, sane kinanena lala, visae va loyūmān yeririna, sur la

nene naga taþatete kila yeririna viowa e marana ne Ntewa.

¹⁹ Nanene komin sur la nene pe tol re kiena sitomena poli, la apato ga e mēþena, ana la amolue akom sina ga e yepena.” Yesu pisa pa sanene narui, siraunia, yeririna la apisuluþar kiena visena, naga pisa kilale pisape pe kinanen re tai poli naþa yeririna monar lonia vena mekiki e marana ne Ntewa, ana kinanena la punu ga naga pon na kanena.

²⁰ Ana Yesu pisa mēna sape “A suri la naþa sike pa e yeririna rui, þisi na amolmolue e kiena malena, sur ne la nanene naga kilia kila yeririna ve namname.

²¹ Nanene komin e los nen yeririna, þelaga viowa la na amolmolue ke ea, suri ne la sane sitomen viowa, kolau, vin-auna, nawemoñaren yaru, navinaunen wona yar taþena,

²² sinenanen sur kiena yar taþena, þelaga viowa lala, visokanena, kilaroen navisaluaena, veveyuena, navisa kareen yaru, nawarwarena, navilaveena, a ve woweena.

²³ Pelaga viowa ne la nene amolmolue e los nen yeririna, sur la nene kilia kila yeririna ve namname e marana ne Ntewa.”

Yesu mēnelua ninuna viowa e sira mēe tai

Matiu 15:21-28

²⁴ Pisi na Yesu petan yo nene, pato tano garo pulkumali nae Taea. Ana pa e umā tai, sape kila sane yaru la ve akilia re asape naga sike e yo nene, ana naga tapolou þele ga sanene.

²⁵⁻²⁶ Ana sira tai sike e nene naþa kiena lus la kom ma Kris apitom, naþa la pe ape Yu re poli, apitom asike yo naþa Ponosia lavisin Seria. Sira nene, narina tai na sira, ninuna viowa teke ea, pogos naþa naga mloge asape Yesu naga sike e yo nene, naga pa kinai e mialana, tagi pania sinenan pisape naga mēnelua ninuna viowa ure vetan narin sira nene.

²⁷ Ana Yesu pisatamē pania, pisape “Ana sisi mesmes la na monar akinana ko ne wa. Pe mesmes re naþa nowar plan kinanena kan sisi la vetan la, nevagan lokul la ea.” Naga pisa sanene komin e pogos nene, le Yu la na asitom ke asape

la ga ape narina Ntewa, la apio kare ke la naþa pe ape le Yu re la poli, asape “Amiu na ape lokul lala.”

²⁸ Ana sira naþa pisatamē pania, pisape “Ko na opisa pe lelaga, Suþe, ana lokul mēna la apa ke lavisin lele na kinanen kan sisi kokan lala, akilia akan korkoro kinanena la naþa kekapili sike e porotano.”

²⁹ Ana Yesu pisa pania, pisape “Ko na opisatamē kinas nen kiau visena nene po paþisi. Ana komin kionā visena nowo nene, nepisuluþar sane opiawa mārera e inu. Poga, okilia ovato si uña, ninuna viowa molue petan narumā naþa rui.”

³⁰ Pisi na sira naþa pato si uña, pisu narina pa ruru ga tomā ga, tomā momalio mā pogaga e māna tog.

Yesu kila ruru yar tai naþa kiligana la poþe

³¹ Ana Yesu naga mligan yo nae Taea, pato kome pulkumali taþena tai, Saeton, ana naga pam sina ga e lapa nae Kalele, e lepas nae yo naþa apio sape Pulkumali Lualima.

³² Ana la nae yo nene aþure yar tai pimi puna, vena naga ligan limana te ea, komin yar nene kiligana la poþe, mon mā mnenene ga.

³³ Ana Yesu þurelua yar nene petan yeririna moki la naþa asike lele nene, lalua apa li laa perina sane. Ana naga kian mrasilmana pa e pulkiligana lala, þisi na mla wasirina, plan e purmenen yar naþane.

³⁴ Ana Yesu kira pa ma e peni, pure kiena yalua keviu, pisa pan yar naþa e kiela visena, pisape “Epata.” Visena nene kana kinasia sape “Ovike.”

³⁵ Ana veraga ga, yar naþane kiligana la pike, a purmenena naga kululu sina, kila sane naga mloge ruru si sur lala, a pis ruru sina.

³⁶ Pisi narui na Yesu pisa māreran pan la, pisape ve ava asunun re sur nene van yar taþena lala, ana silaga pogos naþa pisa sanene pan la la apa apisalelein ke pa e yo punu ga.

³⁷ Ana la apisawal-lelein sa nene, komin sinela la pula na pulan sur la punu ga naþa apisu Yesu kilia taþa. La apisasa ke

asape “Yesu nene kila la naþa kiligala la poþe amloge si suria, a kila la naþa apis pule ga, akilia apis ruru sina. Aulai, yar nene kila sur la punu ga po na po pa þisi.”

8

Yesu pagan yeririna la miyuve manu vari [4000]

Matiu 15:32-39

¹ Ana e pogos tai, pupia þina na yeririna la moki apimi sina pu Yesu, la asumā amio pano-o, viso kar la, ana la pe kala kinanen re poli. Ana Yesu pio kiena nalogena la apimi lavisi puna, pisa pan la pisape

² “E, in na sineu miye þina la nini paþisi, komin naþa la asike amio ita legiena telu þaro rui, kala kinanena la þisi.

³ Ana visae netamān la ava uña mālala naþa pe akinana re sanene poli, pona laþas viso kar la e mrapa komsusa, kil-amarala malko, komin laþasia mālala uña la sike koperina paþisi.”

⁴ Ana kiena nalogena la apisa pania, asape “?Ana tevagan yeririna la nene e yo korena nini sanape ne?”

⁵ Pisi na naga piun tan la, pisape “?Amiu amlarar ke kilaparavi via?”

Ana la apisatamea “Olua ga þa.”

⁶ Pisi na Yesu pisa pan þina moki la nene, pisape “Amiu atotano e yo nene wa.” Naga mla kilaparavi la olua nene, pisa potena pan Ntewa panonia, þisi na kawewowaia, kian pan kiena nalogena lala vena akianlelein van yeririna lala, þisi na la apion tetain pan la.

⁷ Ana la amla mēna narin satin lua la ga e pogos nene, a Yesu mlotuwo mēna ga, pisa pan la sape ava avionlelein mēna ga van yeririna lala.

⁸ Ana la naþa akinana pano-o, meþela la kawa, ana korkoro kinanena naþa akanligania, aþar akon pa e karo olua.

⁹ Ana la naþa akinana e pogos nene tol sane manu vari.

Pisi na Yesu miila si þina la nene aþasuþe si mālala uña lala,

¹⁰ ana naga pa e kiela wa, amio kiena nalogena lala, apetan yo nene, akusro apa atol yo tai naþa kiena ki Talmanuta.

Yar keviu la þasia asape avisu kile tai

11 Ana e pogos tai, le Varasi laḡasia apim asape agorua Yesu, asape ataḡali mēna ga naga, ana la apisa asape “Imimi sine-mimin mesape okilali pupia kile tai van imimi, naḡa sane okila e puriu kawaena nae ma e peni.”

12 Ana Yesu naga miyuveve pa kona, sa naḡa sinena maren la pa rui, naga pisataḡe la, pisape “?Sanape na amiu na nanagane, sinemiun asape avisu kile tai ne sanene? Nepisa ke pe lelaga pan amiu, sane peraga, yoko kiamiu lus la na nanagane taḡatete avisu kile tai.”

13 Ana Yesu pure petan la mligan la asike na, pa si e wa, pa kusro lapa komḡasia pa lepas na vano.

Nasumonena nalotena la asumā akila ke ḡelaga viowa la kapurulue ke

14 Ana pogos naḡa la apetan yo nene apa atol komḡas nen lapa nene, amilan sane sinela pon nawararen kala kilaparavi ḡasia amio la, ana la amlarar ga kilaparavi taaga teke amio la e wa.

15 Ana Yesu pisa visena tai pan la, pisape “Amiu monar avisuar ruru amiu, vanon is kiena ne le Varasi la amio Erot.”

Yesu pisa is nene, kana kinasia ḡelaga viowa kiena ne nasumonena lala, ana nalogena la pe asitom kilia re poli.

16 La amloge visena nene, apisayu ke pan la, apisape “Pona naga pis sanene vanon ita pe toḡar re kilaparavi laḡas pimi poli yo.”

17 Ana Yesu kilia mā kiela sitomena lala, ḡisi na pisape “?Amiu apisayu ke asape ita pe toḡarar re kilaparavi komin ya? ?Sanape, amiu pe amloge kilia re poli, pona pe apisu kilia re sur la poli wa? ! Sinemiun la māraera paḡisi wa!

18 Amiu kilamaramiu la sike na, ana apisu kilale re sur poli, ana kiligamiun la sike na, ana amloge kilia re sur poli. ? Pona amiu pe asitoḡal re si sur la naḡa nemiyumāen pan yeririna la poli?

19 ?Pogos naḡa nekiantetain kilaparavi lima nanua ne pan yeririna la manu lima naḡane, akan pano-o meḡela kawa, ana

akon korkoro kinanena la nene pa e karo via?”

La apisataḡea, asape “Imimi mokonkonnia lualima taaga pa lua [12].”

20 Pisi na naga piun sina ga, pisape “?A pogos naḡa lala manu vari nanua ne akan kilaparavi olua ga naḡane, ḡisi na amiu akan si karo via?”

Ana la apisataḡea, asape “Imimi mokonkonnia olua.”

21 Ana naga pis pan la, pisape “?Pogaga, ana sanapen nanagane? ?Amiu akiliali mā sur la nene, pona pere ke ga wa?”

Yesu kila ruru kilamara kata tai nae Petsaeta

22 Ana Yesu la apam atol pulkumali nene, Petsaeta. Ana la nae yo nene, a sumon kilamara kata tai pimi puna, atagi pania vena tol ruru yaru nene.

23 Ana Yesu tarar limana ne kilamara kata, sumon naga pano, la lua amiyuve kumali apa lepas na vano. Pisi na Yesu mla wasirina, mligan e kilamaran yar luwoka naḡane, mligan liman tea, ana piun petania, pisape “?Sanape, ko na opisus ke suria, pona pere ke ga wa?”

24 Ana yar naḡane kirava, kira pisu suri lala, naga pisape “Ee, nepisu ke yar lala, ana nepisu la sa ga purḡes nen laki la amiyal ke na.”

25 Ana Yesu mligan si limana e naga, yam luania, ḡisi na yar nene kilamarana pimi po rurua, naga kilia kira pisu si suri lala, kira pisu la merarava po na po paḡisi.

26 Ana Yesu pisa pania, pisape “Yoko ko ove ova re si ovisu la nene gar uḡa, oto mesmes ga moḡa.”

Pita pisawal sape Yesu pe Navisaarena lelaga

Matiu 16:13-20; Luk 9:18-21

27 Pisi na Yesu amio kiena nalogena la asape avato e narin pulkumali lala naḡa lavisin kumali keviun naḡa Sisaria Piliḡae, a e pogos naḡa la amiyal ke apato e yo nene, naga piun tan la pisape “?Amiu amloge ke yar la apisa ke asape in na ai?”

²⁸ La apisatamea apisape “Laṗasia apisape ke asape ko na Yoane Nakeena sina ga, laṗasia asape ko na Elaisa, ṗasia asape ko na navisawalena tai naṗa na konua rui.”

²⁹ Ana naga piun si tan la, pisape “?A sanapen amiu, amiu na apisape ke asape in na ai?”

Ana Pita pisatamea, pisawalia pisape “Ko na ope kiamimi Navisaarena kemua lelaga.”

³⁰ Ana Yesu pisa mesmesun ga pan la, pisape “Pogaga, ana amiu ve ava avisawal lelein re sur nene van yeririna lala.”

*Yesu pisawal kiena marena
Matiu 16:21-28; Luk 9:22-27*

³¹ Ana e pogos nene, Yesu siar naṗa mlologon ke pan kiena nalogena lala, pisape Narin Yeririna, monar akila sur la ve moki naṗa naga loge viowagania, ana nasumonena kiena le Israel lala, amio yar keviu kiena yar wa lala, amio navianena navisaluaena, ṗisi na la akovenlua naga. Ana Yesu pisa mēna ga sape la aweṃar naga mare, ana e kiena legiena na telu, suṃalu sina, taulu marena.

³² Visena la nene, Yesu pisa meraravan po pan la, ana pogos naṗa Pita mloge, naga piolua Yesu, pis mārera pania, sape visawoia, yoko monar ve ve sa re nene.

³³ Ana veraga ga Yesu pilon māšina pimi pu Pita, kira pa pun kiena nalogena taṗena la naṗa asike ne, pisaluṗar mārera pa Pita, pisape “!Yermare, oure vetan inu! Kioṃa sitomena nene naga pe sitomena kien yeririna ga, pe pe sitomen kiena re Ntewa poli.”

Nalogena kiena ne Yesu naga monar sitom korenan nasinenanena kiena

³⁴ Ana Yesu pio ṗina lala amio kiena nalogena lala, sape aim puna, pisa pan la, pisape “Yar naṗa sinenan sape taveve inu, monar sitom korenan nasinenanena kiena, monar kus kiena laki torovia, sir-aun inu.

³⁵ Yar naṗa sape taulu kiena malena, yoko kilaluia. A yar naṗa kilalu kiena

malena vanon inu pona vanon kiau lologena wo, naga yoko tauluia.

³⁶ Visae yar tai war make sur na yomarava la punu ga ne, ṗisi na kuspal mrapa na malena, naga pe taulu re sur wo tai poli.

³⁷ Ana kiena sur nowo la naṗa naga ṗaria, taṗatete ulmaran si kiena malena.

³⁸ Yeririna moki naṗa lus na nanagane, la ataṗa mlamulena viowa, la pe ape lelaga re pan Ntewa poli, la apiowa manene la, a la amawan ke yar taṗena la vanon inu a vanon mēna kiau visena. Ana siraunia, Narin Yeririna naga yoko wasuṗe sina ga, amio kiena navisi wa lala, amio naurarena kiena arimana, ana pogos naṗa avim, visae yar naṗa yepena mavin ke naga nanagane, naga mēna yoko yepena mavin yar nene.”

9

¹ Ana Yesu pisa mēna pan la, pisape “Lelaga nepisa ke pan amiu, yeririna laṗas na asuṃal ke e nini, naṗa ṗisi na taṗatete amare, vano-o tol pogos naṗa avisu nasuṗenena kiena ne Ntewa imi kate amio kiena pupia māreraena.”

*Yepena ne Yesu pimi pe taṗena
Matiu 17:1-13; Luk 9:28-36*

² Siraun Legiena Orari ṗarovia, Yesu ṗere Pita amio Semes, a Yoane, la ga vari apa metava e pupia ravie tai. Asuṃa sane na, nalogena la telu naṗane apisu ga yepena ne Yesu pimi pe taṗena ke narui,

³ apisu ga mēna kulkota la pilavila ke, miyuwowo na miyuwowo, miyuve make ga sur na yomarava la naṗa miyuwowo.

⁴ Ana akirawal mēna navisawalena Elaisa amio yermarua Mosis akate, lalua asike asun ke amio Yesu.

⁵ Ana Pita pisa pa Yesu, pisape “Suṗe, po paṗisi naṗa ita tesuṃa ga e nini. Popon sa meyumaen silparpara ve telu se e nini, moṃa tai, mēna yermarua Mosis tai, a mēna ne navisawalena Elaisa tai.”

⁶ Pita pis wowe ga sanene komin lala sinela kurkur paṗisi, amarau mēna ga, ana la amninue ga avisa yara.

⁷ Veraga ga lul tai pimi kalo la, amloge visena tai molue ea, pisape “Nanene naga pe Naruu, naña nekekarana naga pañisi. Amiu monar alogear ruru naga.”

⁸ Nalogenena la amloge visena nene, ana akiraweke ke e yo nene, ñisi na pe apisu re si lalua naña poli, akirawal ga Yesu naga taaga suñal sike amio la.

⁹ Pisi na lala apetan ravie nañane, apitom ke sina ga tano, a Yesu pis mārera pan la, pisawo la pisape “Sur la naña Ntewa kila pan amiu apisuia, amiu na ve ava avisasawal re van yeririna la nanagane, vano-o tol pogos naña Narin Yeririna mal sina ga e marena, e pogos nene narui amiu akilia avisawal van yeririna lala.”

¹⁰ Pisi na la amlogear visena kiena ne Yesu nene, amlarar ga pe kiela ga, ana la apiuyun ke sina ga petan la asape ya ne kinas nen kiena visena nene, naña pisape mal sina ga e marena.

Asitom ke asape Elaisa na lua sirau vim sina, ana Yesu sape naga Yoane Nakeena pa rui

¹¹ Ana nalogenena la telu nene apiun tan Yesu, asape “Sanape ne navianena navisaluaena la apisa ke asape ‘Elaisa naga monar wasuñe ñesia wa, ñisi na Navisaarena nene naga mālivi?’ ”

¹² Pisi na Yesu pisatame la, pisape “Naña apisa ke ne pe lelaga, Elaisa naga monar imi ñesia vena kilaruruen sur la punu ga susumo, ñisi na Navisaarena kilia vim. Ana nasiriena wa pisa ke mēna sur tañena tai naña pe asitomāl re poli, naña pisayu ke Narin Yeririna, sane naga monar vane natañaliena la ve moki, ana yoko yeririna la asitom korenan naga viowa vañisi ne.

¹³ Ana nevisa van amiu, Elaisa nene naga pimi ga na wa, ana yeririna la yepela mavinia. Sa naña Visena Wa pisa, ana la akila pa piowa ga pan rui.”

Yesu mēnelua yermare petan teras tai Matiu 17:14-22; Luk 9:37-43

¹⁴ Pisi na Yesu amio la telu nañane apa ke sina ga puna ne nalogenena tañena

lala, ana apisu na pupia ñina na yeririna la akovivi la asike na, apisu navianena navisaluaena la agorua la ke amio la.

¹⁵ Ana pogos naña ñina la akirawal Yesu pam ke sina, amilania, akekarana mēna naña asape avisu naga, akiriri apim puna, atalopan naga.

¹⁶ Ana Yesu piun tan nalogenena la, pisape “?E, amiu apisayu ke ya ne amio la nene?”

¹⁷ Pisi na lala yar tai pisa pania, pisape “Navianena, in na nepure kiau sisi yermēne nini pimin ko vena ovisulia, komin purkol mārera tai kila naga.

¹⁸ Ana pogos naña kila naga, kovenlua naga pato tano e porotano, wasirina mlau piowa ga sa naña siripu, karar ke mraluena, a yepena punu ga miokamarmare. Ana nepure naga pamin ko, ko na osu re poli, ñisi na nepiun ga tan kioma nalogenena lala vena la alen namēneluaen suri nene vetania, ana la amiyumaen māpano-o, akilapule ga yonia.”

¹⁹ Ana Yesu pisatame la, pis pan la, pisape “?Amiu la nene, sanape na sanene? Amiu na pe asumāl mārera re nena e Ntewa. ?In na monar nesuma nemio amiu vano tol pog ya? Nemiwon amiu pa rui. Ana pogaga, akus teras nene vim punu.”

²⁰ Ana la añure pimi, ana pogos naña purkol nene māl Yesu, kila yepen teras nañane miokamarmare, mloru pato tano e porotano mēke pilolon ke, kila wasirina naga mlau piowa ga sa naña siripu.

²¹ Ana Yesu piun tan ariman teras nañane, pisape “?Ana purkol nene siar kila sanene pogwai?”

Ana arimana pisatamea, pisape “E, sur nene siar na konua konua rui, pogos naña pe sisi ke ga wa.

²² Ana pimi tol nanagane, yam moki rui naña sur nene kila ke naga mlolor pa e kapi po pito e puluwii. Sur nene kila kare ke ga naga pañisi, sape kilamaria, ana sa ko na okilia okila sur yan tai, imimi mepiun tan ko, awis, ko na sinema ye imimi, oiila imimi komin narimimi nini!”

²³ Ana Yesu pisa pania, pisape “Nemlogē ko na opisa sanene, osape sa in na

nekilia nekila. Ana nepisa pan ko, visae ko na olelaga ga, okilia okila sur punu ga.”

²⁴ Ana ariman teras nañane pio verakorena ga pa Yesu, tagi pania, pisape “Nemlelaga tekak ga, ana pe nemlelaga toroki re poli wa. Awis, ko na oiila inu vena kiau nalelagaena vim ve keviu laa sane wa.”

²⁵ Ana pogos naña Yesu pisu p̄ina na yeririna la apim moki manene la akovivi la, ana naga pis pa purkol naña teke e sisi yerm̄ene nene, pisape, “Ko yermare na kiliga poṑe, a na plapur, nepisa mesmes ga pan ko, omolue vetan naga nanagane, ana ve oimi re si loyuma e naga pogos tai.”

²⁶ Ana yermare nene ki viowa keviu, kila yepen sisi yerm̄ene nañane miokamarmare pano-o piowa ga rui, p̄isi na molue petania, pure pano. Ana yepen yar nañane malumu ga m̄eke, sa ga naña naga mare pa rui, yar la naña asike apisu ke la apisa ke sa nini, asape “Ke, teras nene mare pa p̄isi rui.”

²⁷ Ana Yesu tarar limana, tarlua sum̄alu, ana teras nene sum̄al ruru ga sike.

²⁸ Ana siraunia, Yesu pato si uña, a e pogos nene, naña naga taaga sike, kiena nalogena la apim, apiun tania, asape “? Sanape ne imimi na mem̄enelua p̄ele yermare petan teras nene?”

²⁹ Ana Yesu pisa pan la, pisape “Yermare la ne sanene, la am̄arera pap̄isi, ana leniena ga kilia m̄ene plan la.”

Yesu pisawal sina ga kiena marena

Matiu 17:22-23; Luk 9:43-45

³⁰ Ana Yesu la apetan yo nene, apa akom ga likan yo na e Kalele, ana e pogos nene, Yesu pe sinenan re sape yeririna la akilia suri la naña naga kila ke poli, a e m̄ena yo la naña apa ke ea.

³¹ Na nene komin naña pian ke kiena nalogena lala e pogos la nene, a naga pisa m̄ena ga ke pan la, sape “Lavis̄i m̄ena narui naña aligan Narin Yeririna va e liman yar la naña awem̄ar naga mare, siraunia e legiena na telu, p̄isi na Ntewa tamalia sina.”

³² Ana kiena nalogena la pe amloge kilia re sur la naña Yesu pisayu ke ne, ana la amaraun m̄ena naviun ruruen si tania.

“?Yar ane to metavan make yar taṑena lala?”

Matiu 18:1-5; Luk 9:46-48

³³ Ana siraunia, pogos tai la apam atol si Kapeneam, apa loyuma e yuma tai, ana Yesu piun tan kiena nalogena lala, pisape “?Amiu na akawe amiun ke visena ya naña e mrapa?”

³⁴ Ana la pe apisatane re poli, komin naña lala amiyal ke mrapa apami, apis ke pan la, asape lala ane naga to metavan make la, po miyuve make la ga.

³⁵ Pisi na Yesu totano, ana pio kiena lualima taaga pa lua apim lavis puna, pisa pan la, pisape “Visae amiu yar tai naga sinenan sape vim sumo, pona sinenan sape kiena kia to p̄esia, pogaga, naga monar kila naga imi maro, to vatanon la make ga, naga monar vim ve yar nayumaenen yumaena kiena ne yar taṑena la wa.”

³⁶ Ana Yesu pio narin sisi tai naña sum̄a ga pimi puna, mligan su likan la, ana tararia, pisa pan la, pisape

³⁷ “Yar naña kiena sitomena pato ga tanon inu, ana kekaran na kilaen wo van nisisi tai ne sanini, nanene sane naga kekaran inu ke pa narui. A yar naña kekaran inu sanene, pe kekaran inu re ga ne po, kekaran m̄ena ke pa naga naña mliganu nepimi.”

“Yar naña pe pialuṑar ita re poli, naga miila ita ke”

Matiu 18:6-9; Luk 9:49-50, 17:1-2

³⁸ Ana nalogena naña Yoane pisa pa Yesu, pisape “Navianena, imimi mepisu yar tai, naña naga m̄ene plan ke yermare lala, m̄ene plan la ke e kioma kia. Ana yar nene na, pe mekilia re naga poli, naga pe ita yar re tai poli, ana imimi mepisalup̄aria.”

³⁹ Ana Yesu pisa pan la, pisape “Peraga, amiu ve avisaluṑar re naga. Visae yar tai sane pe lelaga, kila ke yumaena keviu

la e kiau kia, ana yoko naga taʔatete si visanena kare kiau kia pogos tai.

⁴⁰ Yar naʔa pe pialuʔar ita re poli, miila ita ke ne.

⁴¹ Inu nepisa ke pe lelaga pan amiu, visae yar tai kilia sape amiu akus ke kia kiena ne Kristo e amiu, naga la piala na wii tai van amiu amunia, yar nene naga yoko taʔatete kilalu kiena nalaena nowo naʔa yoko tol sirau.”

Nataʔaliena lala

⁴² Ana Yesu pisa mēna ga, pisape “A visae yar tai naga kila narin sisi tai ne sanini ve sumal mārera re e inu, yar nene yoko tol nakoana tai ne mārera laa sane taulu naʔa sa aviar pupia kilavaru tai e kolmekina, akuan naga talilu e lowe memaena.

⁴³⁻⁴⁶ Visae lumoña tai pona laña tai naʔa kila ko na pe osuñalu mārera re si e in poli, popon manene ga otelua vano. Visae ko na ote plan ʔelaga naviowaena vetan kioña malena sanene, ʔisi na okilia ova loyuña e malena, a sa ova loyuña e malena naʔa komʔas nen lumoña tai po laña tai kovio pa rui, nanene naga pogaga ne. Ana piowa vaʔisi visae yepemā la asuña ga woga ga, ʔisi na akuan ko ova e kapi naʔa taʔatete mare pogos tai.

⁴⁷ Ana visae kilamaramā pona suri ya si tai e malena kioña naʔa kila ko pe osuñalu mārera re si e inu poli, popon manene ga osiplania. Pisi na okilia ova loyuña e nasuʔenena kiena ne Ntewa naʔa sane narin sur tai nene kovio petan ko, na nene naga pogaga ne. Ana piowa ga vaʔisi visae kilamaramā luoka pona kioña ʔelaga viowa tai sumā ga, ʔisi na narin sur ga la nene aure kioña malena wetelu va e kapi e lele naloge viowaena,

⁴⁸ naʔa kapi nene taʔatete ʔisi pogos tai, sisu la na akakarluē ga yepemā.

⁴⁹ “Sa naʔa kururu sive naga kila kinanena ponos taʔatete kona, yoko Ntewa naga ligan kapi e yar lala vena kekan plan kororaki la naʔa e kiela malena lala.

⁵⁰ Ana tepisu mēna sane kururu sive kila kata kinanena naga kiki, ana visae

kana māreraena kovio, taʔatete si kila kiena yuñāena narui. Ana amiu monar atañan kururu sive kiena ne Ntewa yuñae lue ga e amiu, vena kiamiu malena naga ve kona re, a vena kiamiu ʔelaga la kiki, naʔa sane sumārena sike amio amiu silaga.”

10

Yesu pisayu sanape naʔa yaru mligan lua wona

Matiu 19:1-12; Luk 16:18

¹ Ana siraunia, Yesu mligan Kalele ana pa metava e lepas nae Yutea, kome wii nae Yortan lepas na vano. Ana ʔina lala apim ke sina ga puna e pogos nene, ana sa naʔa naga kila ke silaga, pian la ke e sur la moki.

² Ana Varasi mēna ga ʔasia asike e pogos nene, apimi puna ne Yesu, apisape akilali sina ga naga, la apiun naviunena tai pania. La apisape “?Kieta Navisaluaena pisa ya ne e lepas nen ʔelaga naʔa visae yaru mligan lua wona? ?Ositom sanape, memes ga naʔa yaru kilia kila sanene, pona pe memes re poli?”

³ Ana Yesu piuntamē la, pisape “?Ana Yermarua Mosis pialua ya ne e kiena navisaluaena rui?”

⁴ Ana Varasi la apisape “Mosis pisawal navisaluaena tai naʔa naga tamānia sape yaru kilia la lumāki naliganluaena tai van wona, vena ligan lua.”

⁵ Ana Yesu pisatamē la, pisape “Lelaga, ana Mosis siri visena nene vanon ga naʔa amiu ʔarimiu la mārera paʔisi, suri nene kila naga tamānia sape akilia aligan plan womiu lala.

⁶ A siaria e nasiiena naga pe sa re nene poli, komin Visena Wa kiena ne Ntewa pisa sape

‘E purʔesia, Ntewa sii yeririna, yermēne a sira.’

⁷ Ana visena taʔena si tai, naʔa pisape ‘Vanon suri nene, ʔisi na yaru ligan arimana amio anena, naga va iakol amio wona,

⁸ ana lalua aimi ave taaga ga narui.’

“Nanene kila sane lalua ve ave lua re sina ga, aimi ave taaga ga narui.

⁹ Ana sur ya naña Ntewa vilolaria pimi taaga, pe mesmes re naña yaru kilapure si poli.”

¹⁰ Ana pogos naña lala apa si loyuma, kiena nalogena lala apiun sina ga tania e lepas nen visena la nañane.

¹¹ Ana Yesu pisa mesmes ga pan la, pisape “Visae yaru tai ligan lua wona, p̄isi na va ure si sira tañena, Ntewa pisu sane yaru nene naga taña ke pa kolau rui, naga kila kare sira naña pe wona nasumo.

¹² Ana visae sira tai ure mañan wona na yermene, va pu yermene tañena, naga m̄ena nene Ntewa pisu sane kolau.”

Yesu pisa ruru sisi lala

Matiu 19:13-15; Luk 18:15-17

¹³ Ana lañasia akus narila la apimi pu Yesu, vena naga ligan limana te la, ana nalogena la apisuia, apisi m̄arera pan yeririna la nene, apisalup̄ar la.

¹⁴ Ana pogos naña Yesu pisuia, pe kekaran re nena naña kiena nalogena la amiyumaen sanene poli, naga pis pan la pisape “Amiu ve avisaluñar re sisi la nene, atamañan la ga aim pun inu, vanon naña sisi lala, la na sa ga yeririna la naña asike loyuma e nasuñenena kiena ne Ntewa.

¹⁵ In na nevisa ve lelaga van amiu, yar naña sinenan ke sape va loyuma e nasuñenena kiena ne Ntewa, naga monar kilia sane naga sa ga sisi kokan tai, naga tañatete kila sur tai vena kus nasuñenena kiena ne Ntewa e malena kiena.”

¹⁶ Ana Yesu kutarar sisi la nene e limana, mligan limana te p̄arila pisa ruru la.

Yaru m̄ee tai naña kiena sur moki

Matiu 19:16; Luk 18:18-23

¹⁷ Ana e pogos naña Yesu siar mial pa ke narui, yaru m̄ee tai kiriri pimi kinai tano puna, piun tania, pisape “?Navianena Nowo, in na monar nekila yumaena wo ya, naña kila p̄isi na netol malena naña ve uro re?”

¹⁸ Ana Yesu pisa pania, pisape “?Vanon ya ne opiun tan inu sanene, osape in na

nepe Navianena Nowo? Pe yar re tai po poli, Ntewa ga naga taaga po.

¹⁹ Ana ko na okilia m̄ena kiena nayisaluaena la naña monar ologear la, naña apisa ke asape, ve owemañar re yaru mare, ve otaña re kolau, ve ovinau re, ve ovisokan re, ve okilakewean re yaru, ko ova tanon arimoma amio anoma.”

²⁰ Ana yaru m̄ee nene pisa pania, pisape “Navianena, navisaluaena la naña opisa ke ne, siar pogos naña nepe sisi ke ga wa, nesuma nemlarar make punu ga rui pimi tol nagane.”

²¹ Ana Yesu kira pisu ma sane pano-o, kekaran naga vanon kiena visena nene pañisi, pisa pania, pisape “Sur taaga teke ga wa naña ko na okila re poli wa. Ko ovano, owilwilin plan make kioña sur la punu ga, owar kana kilavaru nena, ova oviovionia van yaru la naña pe kiela sur re poli. Visae ko okila sanene, p̄isi na kioña suri wo lala ve moki vañisi ma e peni. Ko, ova okila, siraunia oimi otavevenu.”

²² Ana pogos naña yaru m̄ee nene mloge visena nene, kila naga milan karea, sinena piowa pañisi, vanon naña naga kiena sur la moki manene laa. Ana naga pure matan Yesu.

Yaru naña kiena sur moki, naga m̄arera laa naña va loyuma e nasuñenena kiena ne Ntewa

Matiu 19:23-30; Luk 18:24-30

²³ Ana Yesu kira pisuveve kiena nalogena lala, pisa pan la, pisape “!Nevisa ruru van amiu, visae yaru tai naña kiena suri moki, sinenan pisape va loyuma e nasuñenena kiena ne Ntewa, suri nene na m̄arera towe ma naña!”

²⁴ Ana kiena nalogena lala amilan visena kiena ne Yesu nene pañisi, naga pisa si pan la, pisape “Pe lelaga naruu la, navaen loyuma e nasuñenena kiena ne Ntewa naga m̄arera na m̄arera.

²⁵ Ee, nevisa van amiu, naña kamel tai naga va warpoyo e pulus nen nitil, nanene naga m̄arera vañisi ne, ana visae yaru tai naña kiena suri la moki sinenan

sape va loyuma e nasuñenena kiena ne Ntewa, naga mārera laa na wa.”

²⁶ Ana pogos naña nalogena la amloge visena nene, amilan pañisi, apisape “? Suwala, ana visae ve sanene, ñisi na ane kilia tol namalena nene?”

²⁷ Ana Yesu kirava pisu la, pisape “Ee, lelaga naña yaru tañatete tamalia yaru, ana Ntewa ga kilia kila make suri punu ga.”

²⁸ Ana Pita sinenan sape vis, pisape “? Ana sanapen imimi? Imimi memligan make kiamimi sur la rui, ana metaveve ko.”

²⁹ Ana Yesu pisa pan la, pisape “In na nepisa ke pe lelaga pan amiu, yaru a naña visae ligana mana uma, pona wenla pona vinena, anena pona arimana, narina pona kiena porotano, ana visae naga ligana sur la nene vanon ga inu, a vanon kiau lologena wo,

³⁰ ñisi na naga warmarana sina ga kiena suri la naña mligania, kilia tol sina ga ve ponotia tai. E yomerava nini, yoko tol sina mana uma la, wenla la, amio vinena la, anena la amio narina la, a porotano la, a amio sur la nene, yoko tol pog mārera ve moki, naña yaru la sinela kar mena ga. Ana metavan sur tañena la nene, e pogos naña imi, yoko tol mena malena naña tañatete ñisi.

³¹ Ana yaru la moki liu naña asike metava, ñisi na avito tano, ana yaru la naña asike tano, ñisi na la ava metava.”

Yesu pisawal kiena marena yam telu narui

Matiu 20:17-19; Luk 18:31-34

³² Ana Yesu lala amlulu ke mrapa, apa ke metava ma Yerusalem narui. Ana Yesu naga sumon ke kiena nalogena la, la sinela kurkur pañisi naña apisu naga sumon la apa Yerusalem, komin la akilia ke asape yeririna nae yo nene la sinela kari ke pañisi. Ana li tañena la naña asurau ke ga wa, la mena asuma amarau lili maga. A naga piolua ga kiena lualima taaga pa lua apimi puna, pisawal si pan la sanape naña ñisi na akila viowa vania gar Yerusalem.

³³ Naga pisayu pan la, pisape “Amiu ayagoga ruruia. Nanagane ita tepa ke Yerusalem narui, naña ve ve piavi re, ñisi na aligan Narina Yeririna e limana ne yerkawa lala kiena ne yaru wa lala, amio navianena navisaluaena mena lala, ana ñisi na la nene aliñere naga avisave ñisi na monar mare. Ana siraunia, aligan naga e limana ne la naña pe ape le Yu re poli,

³⁴ naña ñisi na la nene akirakirai viowa vania, avilasirkon marana, ñisi na akoa naga vano-o awemaria. Ana e kana ligiena natelu, ñisi na mali sina.”

Semes amio Yoane, apiun sur tai tan Yesu

Matiu 20:20-23

³⁵ Ana amiyal laa apa sane, ñisi na narina ne Sepeti lalua nene Semes amio Yoane, apimi puna ne Yesu, apiun petania, apisape “Navianena, imimi lua mesape sur ya naña meviun tan ko naganene, mesape otaman van imimi.”

³⁶ Ana Yesu pisatame la, pisape “?Ana amiu lua sinemiun asape in na nekila ya ne van amiu?”

³⁷ Apisatamea, asape “Imimi lua sinemimin mesape otaman sanini: pogos naña ko na ovim ove ñarin suñe na yomerava nini, ñisi na mekilua metotano memio ko e kioma yo wa metava lavisin ko, tai te lepas na ñamarua, a tai e lepas na ñameli.”

³⁸ Ana Yesu pisatame la, pisape “Amiu pe akilia re sur ne apiun ke ne poli. ?Sanape, amiu lua nene asitom asape atorokin naña tomunpae e piala naloge viowaena nene naña in na monar nemun ea? ?Ana amiu asitom ke asape amiu akilia atol nakeena e wii naña akee in ea?”

³⁹ Lalua apisa pania, apisape “Ee, imimi lua metoroki.”

Ana Yesu pisa pan la, pisape “Ee, lelaga naña ñisi na amiu amun mena ga e mau piala naloge viowaena nene, ana pe lelaga naña atol nakeena e wii nakeena naña akeenu ea,

⁴⁰ ana sur nene naþa amiu lua apiunia, asape atotano amio inu e lepasneu luwoka, sur nene naga pe kiau re naþa nela van amiu poli. Yo la ne sanene, kiena ga la naþa Ata kila ruru pe kiela, pisaar þisi rui pisape þisi na atotano ea.”

Narin Yeririna pimin vena yuþae kiena ne yeririna lala

Matiu 20:24-28

⁴¹ Ana pogos naþa nalogena taþena la lualima nene amloge sur nene, naþa wenla lalua nene Semes amio Yoane apiunia, la sinela kar lalua.

⁴² Ana Yesu pio la apimi puna vena naga visi van la, ana pisape “Amiu akilia ruru þelaga kiena ne yaru la naþa pe amlelaga re e Ntewa poli. Tepisu sa naþa suþe lala amio yerkawa lala na yomerava, la sinelan asape aþareran yaru taþena lala asu vatanon la silaga.

⁴³⁻⁴⁴ “Ana amiu kiau nalogena lala, ki-amiu þelaga monar ve ve sa re nene. Visae amiu yar tai sinenan sape imi ve yerkawa tai pona ve kiamiu nasumonena tai, kana mrapa nena sanini: yaru nene monar imi ve sa ga yaru na yuþae kiamiuena tai.

⁴⁵ Narina Yeririna naga kila sanene þisi rui, naþa pe pimin re vena yar la aiila naga poli, naga pimin naiilalaena, a vena taþan kiena malena nawulplanen yeririna la ve moki.”

Yesu taþa ruru kilamara kata tai

Luk 18:35-43

⁴⁶ E pogos nene, Yesu amio kiena nalogena lala apim asike garu Seriko, ana pogos naþa amligan yo e pulkumali nene apano, ana yeririna la moki paþisi ataveve la. Pog naþa amiyal ke apano, ana kilamara kata tai toþa tano e isinen mrapplepa. Yar nene, arimana kiena kia Timeas, ana apio kia kiena ne narina asape Patimeas. Patimeas nene, totano e mrapplepa legiena punu ga, pion ke pan yar lala sape akuan narin kururu varu vania vena iilaena kiena malena.

⁴⁷ Ana pogos naþa mloge apisape Yesu nae Nasaret mial ke e mrapplepa pimi, þisi na naga pion ke, sape “!Yesu-o, ko lus

kiena ne Tepet, nesape ko sinemþa ye inu wa!”

⁴⁸ Ana yaru taþena la apisin sine-mimien pania, asape “Ee, ve oþaaga re.”

Ana naga pion manene la pavini, sape “!Suþe-o, ko lus kiena ne Tepet, awis, nesape sinemþa ye inu.”

⁴⁹ Ana Yesu panar suþalu su mrapa e yo nene, pis pan yeririna lala, pisape avio yar nene vim lavis puna, ana lala apa apisa pan kilamara kata naþane, asape “Welu.” Ana naga sape “þasa.” Ana lala apisape “Ve ologe re viowa. Yesu naþane sape oim puna wa. Ko osuþalu, ita.”

⁵⁰ Ana yaru nene kuanlua mþana kulkota, suþal veraga ga, pimi puna.

⁵¹ Ana Yesu piun tania, pisape “?Ko na sinomþan osape nekila ya ne van ko?”

Ana naga pisataþea, sape “Suþe, awis, in na sineun nesape kilamarau la imi wo, vena nekilia nekirava.”

⁵² Ana Yesu pisa pania, pisape “Pogaga, ko na okilia ova si uþa moþa. Kioþa nalelagaena ga kila ko opim omloge po narui.” Ana naga pisu ruru ke ga suria e pogos nene, ana mial taveve Yesu e mrapa aþano.

11

Yesu pimi tol yo naþa Yerusalem

Matiu 21:1-11; Luk 19:28-40; Yoane 12:12-19

¹ Nanagane, Yesu lala apam lavisin Yerusalem narui, ana la aþalivi e narin pulkumali lalua sumo, kiela kia Petpas amio Petani, naþa sike e yepas nen kunus nene naþa la apio asape Kunus Na Purolip Lala. Ana Yesu miila kiena nalogena la lua, pisape

² “Amiu lua ava e pulkumali na gare, a mesmes ga e pogos naþa ava loyuþa ea, þisi na avisu narin togki tai, naþa aþatear teke na, pe yar tai totanoli re e wosia poli wa. Ana aluþarlua aure imi pun inu e nini.

³ Ana visae yar tai vis van amiu vanonia, viunia visave ‘?Amiu akila sanene vanon ya?,’ þisi na avisa ga vania, avisave ‘Suþe na sinenan sur mal nini vena va kila kiena yuþaena tai wa, þisi

na naga ligan wasuŕe sina ve ve piavi re.' "

⁴ Ana ƕisi na nalogena lua nene apano, aŕnal narin togki naŕane, apiaria teke na sike ga vanua e mratava na yuŕna tai lavisin ga mrapplepa. Pogos naŕa asape aluŕarlua kana kilika,

⁵ ana lala naŕa asike e yo nene apiunia, asape "Amiu akila ke ya ne, amluŕarlua ke kana kilika na ya ne?"

⁶ Ana la apisa pan la visena la naŕa Yesu pisa ruru pan la, naŕa sane avisa van yar la nene, ana la ataŕnan asape akilia aure togki vano pogaga.

⁷ Pisi na lalua aŕere togki nene pimi, aŕtatetae ŕnala kulkota lala e wos nena, ana Yesu pa totano metava ea.

⁸ Ana yar la moki liu naŕa aŕtatetae ŕnala kulkota lala suvileviles nen mrapplepa, ana yaru laŕasia apa ate ŕnaŕnala lala pitomi aŕtatetae ŕnena ga, vena togki yal ea. Sanene narui, akila sa naŕa la apatanon Yesu sa naŕa pe pupia ƕarin suŕe tai.

⁹ Ana la amial ke apano vena ava loyuna Yerusalem, ana ƕina na yeririna la naŕa asumon Yesu, amio la naŕa asir-aunia, asuŕna apiovion manene sanini, apisape

"!A ke suwala, pona po! !Teyeluar naga! !Ntewa na mava, ko ovisa ruru naga nene naŕa pimi e kioma kia!

¹⁰ !Ita tekekanan paŕisi nasuŕenena kiena ne kieta yermarua Tepet naŕa pimi ke! !Amiu nae mava peni, amiu ŕnena ga ayeluarial!"

¹¹ Ana Yesu pa loyuna Yerusalem, a pa tol Yuna Wa ŕnana ne Ntewa. Ana pa loyuna, pisuveve yo lala, a sur la punu ga naŕa amiyunaen ke ea, pano-o mrae naga pato ke tano narui, naga pure kiena lualima taaga pa lua, apetan si pupia kumali naŕani, apa amono gar Petani.

Purlaki tai naŕa pe tau re poli wa
Matiu 21:18-19

¹² Ana yemlagi kolulagi la amligan si ma Petani aŕasuŕe sina vena ava Yerusalem, ana Yesu mloge sane viso karia.

¹³ Naga kira pa e is nen mrapplepa, ŕnal purpik tai sike, ana naga mial pa lavisinia

vena war mras laŕasia. Ana pogos naŕa pimi pisuia, purpik nene ŕnas ga moki, ana pe mras su re e poli, komin pe kana pog re poli wa.

¹⁴ Ana Yesu pisa pan purpik nene, pisape "Ko ove owar re si mrasnoŕna pogos tai vena yar la akilia akania." Ana kiena nalogena ŕnena la amloge ke naŕa naga pisalele kare laki na sanene.

Yesu ŕnene plan la naŕa asuŕna aŕiliwilin ke suri e Yuna Wa Mana ne Ntewa

Matiu 21:12-17; Luk 19:45-48; Yoane 2:13-22

¹⁵ Ana Yesu la apa atol si Yerusalem narui, lala apa sina ga loyuna e Yuna Wa ŕnana ne Ntewa. Ana e pogos nene naga pisu sane yar la moki liu naŕa asuŕna e yepas nen yuna nene, la asuŕna akila ke ga yunaena natauluen kilavaru lala ea, ana yar la mok liu naŕa apul ke sur la naŕa aŕiliwilin ke ne. Ana naga pe kekanan re nenaga, pa ŕnene plan la, kawepu narin varvara kiena ne yar nakeueen varu sa le Rom la pimi ve sa le Yu la, nakilaena nalaena. A naga koantetai lele na totanoena kiena ne la naŕa apuliwilin ke kupa nakupaena lala.

¹⁶ A naga pisawo ŕnena ga yar la naŕa sinelan ke asape awar kiela sur na yunaena la ayal akom likan yepa na Yuna Wa nene.

¹⁷ Ana naga pisa pian la, pisape "Sanape, amiu pe akilia re asape Ntewa pisa e kiena Visena Wa, sape

'Pisi na la avisa ŕnau Yuna Wa avisave naga yuna nalotena kiena ne yolai punu ga e yomarava wetelu?' *Ais 56:7*

'Ana nanagane na amiu akepu pimi sa ga ponovi ŕnana yaru na vinauena la narui.' "

Ser 7:11

¹⁸ Ana pe piavi re nena, yerkawa lala kiena ne yaru wa lala, amio navianena na navisaluaena lala, amloge sur la naŕa Yesu kila e Yuna Wa ŕnana ne Ntewa, ana la sinela kar paŕisi, asape akila suriania. Ana amaraun Yesu, pe akila re si poli, vanon apisu kilale naŕa yeririna

la akekaran naga paḡisi, asuḡa amilan ke kiena navianena wo lala.

¹⁹ Ana pogos naḡa mrae pato pa tano narui, Yesu la apetan ke sina ga yo naḡa Yerusalem.

Purpik naḡa pe tau re poli, mare make ga

Matiu 21:20-22

²⁰ Ana kolulagi, la aḡasuḡe apa ke si Yerusalem, ana apisu purpik naḡane, mḡas la miaiai make nena rui.

²¹ Ana Pita sitomḡal si visena kiena ne Yesu, pisa pania, sape "Suḡe, opisu ke ne! Purpik naḡa opisanena kare nakoneva, nagane mare rui."

²² Ana Yesu pisataḡe, pisa pan la, pisape "Amiu punu ga monar aviawa mḡarera e Ntewa.

²³ In na nepisa ke pe lelaga pan amiu, visae yar tai naḡa pe kiena sitomena peve lua re poli, a mlelaga mḡarera, ana visae suri ya naḡa naga visa, monar ve sanene narui. Visae naga vis va pupia kunus nene, visave 'Osumḡalu otove, oula ova e sive,' ḡisi na monar ve sa ga nene.

²⁴ Nane nepisa pan amiu, ana sur ya ne ko na oviunia e kioḡa leniena, visae olelaga mḡarera sane sur nene pe kioḡa pa rui, ḡisi na monar ve sa ga nene narui.

²⁵⁻²⁶ Ana e pogos punu ga naḡa visae alen, amiu monar asitom ruru mḡena ga, visae kilapurpu tai teke e ko amio yar taḡena tai, monar oviewo sumo wa, ḡisi na okilia osumḡalu okila kioḡa leniena van Ntewa. Visae okila ve sa nene, yoko arimata nae ma e peni, naga mḡena sitomḡal ko, viewo kon kioḡa mlamulena viowa lala."

Nasumonon le Israel lala sinelan asape avisaluḡar Yesu

Matiu 11:23-27; Luk 20:1-8

²⁷ Ana Yesu la aḡasuḡe si apam atol Yerusalem, ana apa si loyumuḡa e kove na Yumuḡa Wa mḡana ne Ntewa. Ana pogos naḡa amialoro ke loyumuḡa, yerkawa kiena ne yaru wa lala, amio navianena navisaluaena, a nasumonena lala kiena ne le Yu la, apimi puna,

²⁸ apiun tania, asape "Ko osumḡa okila ke sur la ne sanene e yo nini e kia kiena

ne ai? Ana a si na pisa pan ko sape okila ve sanene?"

²⁹ Ana Yesu pisataḡe la, pisape "Pogaga, ana inu mḡena nesape neviun naviunena tai van amiu wa. Visae amiu avisataḡe ruru kiau naviunena nene wo, ḡisi na nekilia nevisawal van amiu sanape naḡa nekilia nekila ve sanene.

³⁰ Ana kiau naviunena naga sanini narui, sape: ?Nakeena naḡa Yoane naga kilamare ga nanua ne e yaru lala, naga pe sur tai naḡa Ntewa pisa pania sape naga monar kila, pona yaru ga la apisa pania? Amiu avisataḡeli kiau naviunena nene."

³¹ Ana naviunena nene kiena ne Yesu kila la agorua la narui, naḡa asuḡa apisa asape "?ḡisi na ita tevisa sanape na vania? !Tevisuaruruia! Visae ita tevisa tevisave nakeena nene Ntewa naga pisa pa Yoane, ḡisi na yaru nene viun si vetan ita, visave vanon ya ne ita pe temlelaga re e Yoane poli.

³² Ana ita taḡatete si tevisa tevisave nakeena kiena Yoane nene pe sitomena kiena yeririna ga lala, visae peraga, la sinela kar ita." Yar keviu la amaraun visaena visen nene, komin akilia asape yeririna la nene amlelaga ke po mḡarera e Yoane ḡisi rui, asape naga pe navisawalena na lelaga tai kiena ne Ntewa.

³³ Ana kiela sitomena la ne sanene narui, kila apisataḡe Yesu sa ga nini, apisape "Imimi memninue ga."

ḡisi na Yesu pisa pan la, pisape "Visae sanene, inu mḡena ga, taḡatete nevisa van amiu nevisave ane pisa pan inu sape nekila yumuḡaena la ne sanene."

12

Pakaiwa na li viowa la naḡa apisuar lokilkerep tai

Matiu 21:33-46; Luk 20:9-19

¹ Ana pogos naḡa Yesu sumḡa pian la ke, naga pisayu ke ḡakaiwa pan la. Pakaiwa tai na pisa sa nini, pisayu yerkawa tai, amio kiena lokilkerep. Yaru nene kila ruru kiena yo nene, kila kove mḡarera tai telivi piora ea, a kila kana lele navieplannen was nen kerep, kila mḡena kana lele tai naḡa pa metava naḡa yaru kilia wiyu

va se ea, vena kiravawoen lokilkerep nene.

“Ana e pogos tai, yerkawa nene sinenan sape yaloro re va e purvanua tařena tai, řisi na mligan kana lokilkerep nene e limana ne yaru lařasia, vena ayuřaenia, aul vania.

² “Ana yerkawa nene pa sumřa gare pano-o, řisi na pisu kilale sane nanagane na pogos na mrakerep la marua narui. Ana mligan kiena yaru tai pa si puna ne la nařa asike e kana lokilkerep nene vena war kiena kilavaru na mrakerep komřasia, nařa la nene monar aul vania.

³ Ana pogos nařa kiena yaru nene pano, ana yaru tařena la nene aře kare naga, ařenelua sina naga pano, pe mla re sur tai poli.

⁴ “Ana yerkawa nene miila si kiena yaru tařena pano, ana la nařa ařea, řar kuruta e řarina, akila piowa pan naga pařisi, ařenelua pa sina.

⁵ Pisi na naga miila ke sina ga tařena tai, ana ařemořar naga mare, siraunia, naga miila kiena yeririna moki apano, asula ařemořar la řena ga.

⁶ “Ana yerkawa nene pisu sane yar taaga sike narui, pe narina wawa nařa naga kekarana pařisi, ana naga sitomveve pano-o, pisape ‘In na monar neligan ga naruu vano, vena monar avatanon naga.’

⁷ “Ana pogos nařa yar viowa la nene apisu narina ne yerkawa nene pimi, la asuřa apismumun pan la, asape ‘Narina ne ke yerkawa nařa narui. Yaru ke na nene narui, nařa visae yerkawa kovio, řisi na kus porotano nene sane ve kiena lalimana. Popon ita towerřar řena naga mare, ana ita ga tekilia tokus porotano nene ve kieta.’

⁸ Ana sanene narui atarar naga, ařeřaria, akovenlua naga petan lokilkerep pa vanua.”

⁹ Ana Yesu piun tan la, pisape “?Pogos nařa yerkawa nene yoko imi sina, řisi na kila sanapen la nařa amiyuřae ke e kiena yo nene? Yaru viowa la nene, řisi na yerkawa nene imi weřar la, monar amare e řelaga řarera tai, siraunia naga ligan kiena lokilkerep e limana ne yaru wo tařena la řasia.”

¹⁰ Ana Yesu pisa pan la, pisape “Visena tai teke e Visena Wa kiena ne Ntewa, pisa sanini pisape

‘Kilavaru nene, yaru na yuřaenen yuřa lala apisa asape piowa ga, akoven rui, ana nanagane na, kilavaru nene pimi pe kilavaru wo na mrapun yuřa, ve nauararen yuřa řarera.

¹¹ Ana sur nene, Ntewa ga kila, a mepisui na po na po.’ ” *Yauena 118:22,23*

“?Ana sanape, visena nene akilia pa rui, apuloli řa pogos tai, pona peraga yo?”

¹² Ana pogos nařa Yesu pisa pae řakaiwa nene, yerkawa lala akilia nařa naga sumřa pisa ke ga visena la nene vanon kiela řelaga lala, ana sinela kar naga, kila narui sinelan asape auarar naga, řisi narui na apisu sane yar la mokliu, amaraun la, amligan naga řeke na ařure apano.

Sur kiena ne Ntewa, a sur kiena ne Sisa Matiu 22:15-22; Luk 20:20-26

¹³ Ana yar keviu lala apa apisuveve sur nene, lala amligan Varasi lařas apimi, amio řena ga řasia e řegas kiena ne Erot, nařa apiunli naviunena řarera lařasia ve natařalien Yesu ea, nařa sane naga visataře řele ga.

¹⁴ Ana apimi puna ne Yesu, akila kotalia e visena wo lala, apisa asape “Navianena, imimi mekilia ko na ope lelaga kemua. Ko ope omaraun re yar tai poli, sane yar keviu, pona yar nařa to metava, po yar na sanape, ana ko osuřa apisalua ke mrapa mesmes kiena ne Ntewa pan la punu ga. Ana mesape meviunli tan ko, mesape kieta navisaluaena pisa sanape? ?Pisape mesmes ga nařa ita le Yu toul takis va Sisa, nařa pe řarin suře kiena ne le Rom lala, pona pe mesmes re sanene poli?”

¹⁵ ?Pogaga nařa toul takis la nene po peraga?”

Ana Yesu kilia řaga nařa la apiun kotalia ga, sinelan ke asape akila kare naga, ana naga pis pan la, pisape “?Amiu asuřa atařalinu ke sanene vanon ya? Pogaga, amiu ala kilavaru tai imi vena nevisuvevelia.”

16 Ana amla tai pimi, akian pania, Yesu piun tan la, pisape “Ninun marana a ne teke e narin kilavaru nene? ?Ana kia na asiri teke ea, ane kiena kia nene?”

La apisape “Marana ne Āarin Suĕe Sisa nene, a kiena kia mĕna ga.”

17 Ana pisa pan la, pisape “Pogaga, sur naĕa kiena ne Sisa, monar ala va Sisa, a suri naĕa kiena ne Ntewa, monar ala va Ntewa.” Ana pogos naĕa amloge navisatamĕena nene, amilan kare paĕisi.

*La naĕa amare, ĕisi na amal sina
Matiu 22:23-33; Luk 20:27-40*

18 Ana siraunia, le Satusi laĕasia apimi puna ne Yesu, sinelan asape aviunli suri tai tania e lepas na sur tai naĕa la amlelaga mĕrera ea, asape sa yaru la naĕa amare, taĕatete amal sina e legiena maro. Vanon suri ne nanene apiun tan Yesu sanini, asape

19 “Navianena, sinemimin mesape meviunli tan ko sanape e visena tai naĕa yermarua Mosis siri pan ita nanua sumo. Naga pisa pisape visae yaru tai, mare tan wona naĕa sane pe narila re tai poli wa, ĕisi na wenla yaru nene monar talopa sina amio letano nene. Ana visae sira nene war sisi, akilia asikia e kia kiena ne arimana naĕa mare pa rui, vena kia nene mali mĕaga.

20 Ana e pogos tai, wenla la olua. Kiela mĕaru talopa, ana naga mare petan wona, pe narila re tai poli wa.

21 Ana wenla nasiraunia ĕereleinia pe wona, ĕisi na naga mĕna ga mare petania, pe narila re tai poli, a wenla na telu kila mĕna ga sanene,

22 pano-o tol wenla na olua, la punu ga amarmare tan sira naĕa sanene. A siraun wona la punu ga naĕa amarmare, sira mĕna ga nene mare.

23 Ana ko ovisali sur nene: ?E legiena maro, pogos naĕa apisa ke asape ĕisi na yaru la amal sina, ĕisi na sira nene na ve wona ai, vanon naĕa naga talopa amio wenla la olua nene ĕisi rui?”

24 Ana Yesu pisape “Peraga, kiamiu sitomena pa pe wowe laa. ?Pona kam na pe akilia re ya ne kila amiu ape wowe

ke sanene poli yo? Vanon pe akilia re ya naĕa Visena Wa kiena ne Ntewa pisa ke poli, a pe akilia re mĕna ya naĕa kiena namareraena keviu kilia kila poli.

25 Pogos naĕa yaru la amal sina, ĕisi na lala ave sa ga navisi kiena ne Ntewa lala ma e peni narui, ana ĕisi na ve akila re si suri nene naĕa natalopaena.

26 A e lepas na malena si nene, kana visena tai teke e tusi naĕa Mosis naga siria, naĕa pisayu ke narin laki tai naĕa kapi kekania, naĕa Ntewa pisa pa Mosis sanini, pisape

*‘Epraam, Aisak, a Sekop, in na nepe kiela
Ntewa.’*

“?Pona amiu na pe apuloli re visena nene pogos tai poli yo,

27 ana in na nevisakilale van amiu vena kila ruru kiamiu sitomena lala. La telu nene la amare e yomarava nini nakonua rui, ana kas moki na moki ĕaro pa rui, ana Ntewa pisa ga visena nini na wa, naĕa sape naga pe kiela Ntewa. Sanene na kiena visena naga kana kinasia sape la telu nene la amare e yomarava, ana la amal ke ma puna na wa. Ntewa pe sinenan re sape kiena yeririna lala la ave yaru la naĕa amare poli, ana naga sinenan sape naga ve Ntewa kiena ne yeririna la naĕa amali.”

*Navisaluaena na keviu lua
Matiu 22:34-40; Luk 10:25-28*

28 Ana navianena na visaluaena tai pimi sumĕalu sike e pogos nene, ana miyagogan ke le Satusi lala ataĕali ke Yesu, ana Yesu taulu la ga e kiena navisatamĕena wo lala. Ana navianena nene, naga sitom sape naga towe lai viun va Yesu, pisape “?E kieta navisaluaena lala, nape naĕa keviu, miyuve taĕena lala?”

29 Ana Yesu pisa pania, sape “Visena Wa pisa sanini, pisape
‘Yeririna nae Israel, amiu ayagoga.
Ntewa na mava, kieta Ntewa, naga taaga pe Ntewa na mava.

30 Ntewa na Mava naĕa pe kioĕa Ntewa, ko na monar sinemĕa sia e losinemĕa wetelu, e kioĕa malena wetelu, e kioĕa sitomena wetelu, a e kioĕa puriukawaena wetelu.’

31 “Nanene naga pe navisaluaena p̄esia, a nalua nena naga pisa sanini, pisape ‘Ko monar sinem̄a si nalavis puñā lala, okila wo van la, sa ga naña ko sinem̄a si ko ke ga.’

“Ana pe navisaluaena re si tai poli naña naga keviu taulu lalua nene.”

32 Pisi na navianena navisaluaena pisa-tam̄e pania, pisape “Lelaga ga navianena, ko opisa mesmesu ga. Ko opisa pe lelaga ga, osape yar keviu naga taaga ga, pe tai re si poli.

33 Ana ko opis pe lelaga m̄ena ga osape monar sineu si naga e sineu wetelu, e kiau nakiliaena wetelu, amio kiau puriukawaena wetelu, ana monar sineu si la naña asike lavis pun inu, sa ga naña sineu si in ke ga. Pe lelaga ga ne, e nakiravaena kiena ne Ntewa, visae nekila ve sa nene, nanene naga to laa metava, po manene laa taulu make nakuṗaṗaena lala naña netaṗa ke e m̄ana Yum̄a Wa.”

34 Ana Yesu mloge kiena navisatam̄eena naga po, pe manmarua po, ana pisa pania, pisape “In na nevisa van ko, sane ko ko na osike pa lavisi rui, ko na yoko p̄isi na ova loyum̄a e nasuṗenena kiena ne Ntewa na wa.”

Ana siraun e pogos nene, p̄isi na pe yar tai taṗali re si Yesu e naviunena la poli.

Navisaarena naga pe Ntewa kiena ne yermarua Tepet

Matiu 22:41-46; Luk 20:41-44

35 Ana siraunia, Yesu naga pian ke yeririna lala e Yum̄a Wa m̄ana ne Ntewa, ana naga towelai piun naviunena tai pan la. Naga pisape “?Nekilia m̄aga naña kiamiu navianena navisaluaena lala apian amiu m̄aga, ana nesape neviunlia, komin ya naña apisa ke asape Navisaarena naga monar m̄alivi e lus kiena ne yermarua Tepet nene naña naga pe p̄arin suṗe sumo?

36 Nepiun ke sa nene, komin nanua sumo, Ninuna Wa pimi e Tepet, kila naga pisi, pisape

‘Ntewa na Mava pisa pa kiau Suṗe, pisape “Ko ototano e kiau lepas na p̄amarua, otom̄ate m̄a vano-o, p̄isi na neligan

kioṗa nasinekar lala aimi ve sa narin takue na vilanvanen lam̄a ea.”
Yauena 110:1

37 “E lele nene tepisu naña Tepet sum̄a pio ke Navisaarena nene sape pe kiena Suṗe rui. ?Ana vanon naña Tepet pisa sanene, a sanapen naña amiu apisa ke asape Navisaarena nene naga molue ga e Tepet, ana naga pe kiena lus ga tai?”

Ana pupia p̄ina naña asike e pogos nene, lala sinelan manene navianena kiena Yesu la ne sanene, la akekaran manene paṗisi.

Yesu pisi m̄arera paṗisi pan nasumona lala nalotena

Matiu 23:1-36; Luk 20:45-47

38 Ana e pogos nene naña Yesu naga pian la ke, pian lan la ke m̄ena ga e p̄elaga na yeluarlaena kiena ne kiela nasumona lala. Naga pisape “Amiu avisuar amiu e navianena navisaluaena lala. Lala aplave ke paṗisi e m̄ala kulkota piayavi lala, a pogos naña visae la ayaloro e lele na wilwilinena, sinelan asape yaru lala monar avatanon la, a avio ruru la avisave ‘!Navianena, pokolulagi!’

39 A e pogos na p̄aṗagena lala, a loyum̄a e nalotena m̄ena ga lala, la sinelan naña silaga asape atotano ga e lelen yerkawa lala. Amiu apisu kilale la ke narui, ne?

40 Ana lala asum̄a aṗure piavin ke kiela leniena la paṗisi, ana apisokani ke ga ne, vanon naña e ke e pogos nene, lala asum̄a akila kotalia ke letano la, vena avinaun kiela suri lala. Ana vanon suri ne nanene, p̄isi na kiela nakoaena m̄arera re laa sane.”

Letano tai mla kiena kururu varu pan Ntewa

Luk 21:1-4

41 Ana siraunia, Yesu naga pa laa lavisin yo naña akuan ke varu ea e Yum̄a Wa nene, ana kira pisulili ke yar lala naña akuwakuan ke kiela nalaena lala. Naga pisu yar la moki naña kiela sur la mokliu, aṗar kiela nalaena kerkeviu la pimi, akuwania.

42 Ana p̄isi na pisu m̄ena sira marua tai pimi, naga letano tai, pe kiena sur re poli.

Ana naga mla narin kururu varu lua pimi, mla pan Ntewa.

⁴³ Pisi na Yesu pio kiena nalogena lala vena aim puna, naga pis pan la, pisape “?Amiu apisu ke sira marua nene, naþa kuan narin varu lua ga nene? In na nevisa ve lelaga van amiu, naga mla keviu taulu make nalaena punu ga naþa yar la naþa kiela sur la moki amlavia.

⁴⁴ Lala nene, kiela varu keviu paþisi, ana amla ga komþas tekak ga pano, ana letano nene, narin varu naþa naga mlararia vena iilaena kiena malena, mla punu ga pan Ntewa.”

13

Yesu pisawal naþa þisi na awe plan Yumña Wa Mana ne Ntewa
Matiu 24:1-2; Luk 21:5-6

¹ Ana Yesu molue e Yumña Wa mñana ne Ntewa, ana pogos naþa naga sumña mial pa ke, kiena nalogena lala tai kilologia pupia yumña lala na Yumña Wa nene, pisa sape “!Navianena, ovisuia! !Yumña la nene amio kana kilavaru lala apo paþisi wa!”

² Ana Yesu pisa pania, pisape “?Opisu ke pupia yumña la nene? Yumña la nene, þisi na taþatete si kana kilavaru ne tai naþa toña ga towawa ruru teke e lelana, komin þisi na yar laþas aimi, awe plan make nena yumña la nene vano.”

Naloge viowaena monar imi
Matiu 24:3-14; Luk 21:7-19

³ La amial sanene, apim e Kunus Na Purolip lala, naþa kira pisu ke Yumña Wa, ana Yesu totano e yo nene. A pogos naþa pe yaru taþena la asu re poli, kiena nalogena la vari apimi puna, Pita, Semes, Yoane amio Antru. Ana apiun tania, asape

⁴ “?Pisi na awe plan Yumña Wa nene pogwai, a kile ya ne yoko kila sur la nene vim kakate?”

⁵ Ana Yesu pisatamñe la narui, pisape “Popon amiu avisuar ruru amiu, vena ve yaru imi visa kotalia amiu re,

⁶ vanon naþa þisi na yaru la ve moki naþa ala kiau kia, ana aimi avisave ‘In na

nepe Navisaarena þa,’ ana þisi na aure yaru la ve moki ava ave wowe.

⁷ Ana visae e pogos nene, aloge mñaagena na mara pimi ke lavisi, pona alologon pupia mara la naþa sike perina, ana ve sinemiu kurkur manene re. Suri la nene monar imi kakate sumo, ana nanene na pe pe legien maro re poli na wa.

⁸ A þarin suþe lala, yoko akila mara amio þarin suþe taþena lala, a purvanua lala yoko asumñalu akawela amio purvanua taþena lala. A yo kar ga e yomarava nini, yoko yemninu vaþisi, a pupia viso mñena, ana suri la nene, pe pe legiena maro re nene poli na wa. Ana suri la nene sa ga sira naþa mēþena, naþa sane mloge þesan mñasina mlaea vena waren sisi, ana pupia naloge viowaena naga pere na wa.

⁹ “Ana monar avisuar ruru amiu, sa þisi yaru la aure amiu ava e kiela kumali, pona e kiela yumña na lotuena lala, vena avis van amiu, ala nakoena van amiu, pona awe amiu. Yoko monar aligan amiu ava asumñalu ase marana ne yerkaawa na purvanua vanon ga naþa amiu ape kiau nalogena lala, ana e pogos nene amiu akilia avisawal kiamiu nalelagaena e inu e marala.

¹⁰ A lologena wo, yoko alologon va yolai la punu ga e yomarava nini sumo wa, þisi na sur la nene kilia imi mñalivi.

¹¹ Ana visae la nene aim atarar amiu, aure amiu avano vena ala nakoena van amiu, amiu na ve asitom manene re avisave ‘?Pisi na nevisa ya ne van la ne?’ Ana avisa ga visena naþa þisi na Ninuna Wa la van amiu, mesmes ga e pogos na visena, vanon pe amiu re apis poli, komin Ninuna Wa ga naga vis e amiu.

¹² “E pog mñarera nene, yoko yar kilia tamñan yaru viowa taþena la aimi aurelua wenla ruru naapo pona narila ruru naapo, vena awe moñar la, nanene komin naþa la nene amlelaga e inu. A nin sisi mñena ga lala akilia asumñalu avisawal anela lala amio arimala lala naþa la amlelaga e inu, vena lala mñena ga amare sanene.

¹³ Ana yoko yaru la sinela kar manene amiu, naþa kiau kia teke e amiu, a

amiu yaru a naña suñalar m̄arera suña ga vano-o pog m̄arera nene ñisi, Ntewa tamalia naga.”

*Pupia pog m̄arera tai garu Yerusalem
Matiu 24:15-28; Luk 21:20-24*

¹⁴ Ana Yesu pisa m̄ena ga visena tañena tai, naña popon yaru kilia wuloyuia, vena kilia ruru kana kinasia. Visena nene sanini, pisape “Yoko amiu akilia avisu naña avisirlua nono tai naña piowa manene laa, yoko suñalu se e yo wa tai pe pon re nena naña aligan se ea. A pogos naña avisu suri nene, amiu naña asike Yutea, popon amiu aure, ava atapolou e kunus lala.

¹⁵ E pogos nene, visae yaru tai va ruru teke vanua lavisin m̄ana yuñã, naga monar ve va re si loyuñã war kiena suri lañasia,

¹⁶ pona visae yaru sike e kana lokove, naga monar ve vito re si uñã tar m̄ana kulgota, naga monar kiriri vitañili ga sanene vano.

¹⁷ Ana e pogos nene, yoko viowa laa m̄ena van sira la naña meñela, amio la naña amla ke yu pan kiela sisi tomtom lala.

¹⁸ Visae ve sanene, popon amiu alenwo amiu vena kiamiu pog naureena nene ve imi tol amiu re e pog na miava keviu.

¹⁹ Nanene vanon pogos nene, ñisi na m̄arera na m̄arera, m̄arera laa sane taulu pogos m̄arera tañena lala, naña siar e pogos naña Ntewa sii yomarava nini pimi tol nanagane, a yoko ve pog m̄arera re si tai ve sanene pogos tai.

²⁰ Ana Ntewa sitom̄al rui pisape yoko tero pog m̄arera nene imi ve plas ga, vanon kiena yeririna la naña pisir plan la vena ave kiena, asike e pogos nene. Ana visae ve tero re ve plas sanene, yoko tañatete yaru tai kilia mal sike na.

²¹ “Ana visae yaru lala avivisa van amiu, avisave ‘Amiu avisu yaru nene, naga na Navisaarena nene,’ pona avisa tañena, asape ‘Nane Navisaarena ne nane gare,’ ana amiu na ve alelaga re e kiela visena lala toko,

²² komin naña navisaarena la mokliu naña pe ape lelaga re la poli, la akilia asuñalu, amio m̄ena ga navisawalena navisokanena la ve moki, a ñisi na la nene akilia akila kile lala, amio sur nailanena lala. Ana yoko akila sanene, aure yaru la ava ave wowe, vano-o tol naña akilali naña aure m̄ena yeririna kiena ne Ntewa la naña pisir plan la vena ave kiena, ana la tañatete akilia akila.

²³ Ana akilia avisuar amiu ruruia, komin nepisawal make suri la rui pan amiu nanagane, naña pe añarpo yo re poli wa.”

*Pisi na Narin Yeririna wasuñe sina
Mak 13:24-27; Luk 21:25-28*

²⁴ A Yesu pisape “Ana e pogos nene, siraun naña naloge viowaena nene ñisi, mrae imi ve pupumalko, a kupario ve tego re sina.

²⁵ A verue la ma e sinapane asuñã aloloru, a suri m̄arera lala nae ma e sinapane, yoko Ntewa kululun la.

²⁶ E pogos nene, ñisi na la avisu Narin Yeririna molue e lul amio pupia kiena nam̄areraena amio naurarena.

²⁷ Ana siraunia, naga ligana kiena navisi lala ava e yo punu ga e yomarava a ma e peni, ana yoko aure kiena yeririna la naña naga pisir plan la ñisi rui, aimi lele taaga puna.”

Pe yaru re tai naña kilia pog na legiena maro nene poli

Matiu 24:32-36; Luk 21:29-33

²⁸ Ana Yesu pisape “Amiu asitomli purlaki nene, naña asape purpiliva. Naga kiena sur navian amiuena tai teke ea, naña monar avisururuia. Pogos naña avisu sitos la siar miyunlua sina, imi memaena, ana amiu akilia asape pog na yepisusunu m̄arera pimi ke lavisi narui.

²⁹ Ve sanene, pogos naña avisu kile la nene e yomarava, la apimi akakate ke sa naña nepisa pan amiu rui, ana amiu akilia naña Narin Yeririna suña ga e pulutava rui, lavisi ke kate narui.

³⁰ Nevisa suri na lelaga van amiu, yoko sur la nene imi kakate sumo, ana sir-aunia, lus kiena ne yaru la naña amal

ke e pogos nene, ĩisi na akilia akovio e yomarava nini.

³¹ A yoko sinapane amio yomarava nini lalua mēna akovio veraga, ana kiau visena lala taĥatete nena akokovio pogos tai.

³² Ana pe yar re tai naĥa kilia kana legiena pona aora nena naĥa ĩisi na Narin Yeririna mālivi ea. Navisi lala nae ma e peni, amio Narina ne Ntewa, la mēna amninue ga, ana Ata ga, naga taaga kilia.”

*Monar akila ruru amiu asumā ga
Matiu 24:42-44*

³³ Ana Yesu pisape “Sanene, ana monar asumā avisuar ruru amiu, komin amninue ga asape kiamiu suĥe naga imi sina e legiena ya.

³⁴ Sur nene sa naĥa yar keviu tai mligan mēna uĥa vena vanon kiena pupia yalena tai. Sumon naĥa naga ligan kiena yo, naga monar ligan kiena sur la punu ga va sike limana ne kiena yar na yuĥaena lala, a monar vis ruru van la naĥa apisuar ke mralaea, sape avisuar ruruia.

³⁵ Ana nanagane sa mēna nene van amiu, amiu mēna asumā avisuar ruruia, komin pe tekilia re poli, yar keviu na uĥa vim pogwai. Pona imi kotaĥa, po kolemallo, pona sa lakaporo la akokoreko, po kolulagi,

³⁶ ana piowa ga naĥa sa naga vim mālivin amiu, lual naĥa kam na amomali mēga.

³⁷ Ana visena naĥa nepisa ke pan amiu, mesmesun naĥa yeririna la punu ga monar aloge, sane amiu akirarava ruruia, avisuaria.”

14

*Li nasumonena la nae Israel sinelan
asape yoko awemār Yesu na wa*

Matiu 26:1-5; Luk 22:1-2; Yoane 11:45-53

¹ Ana ĩisi na, pog pimi lavisi naĥa e kas punu ga asumā akila kiela pupia ĥaĥagena lua. Legiena lua ga suwo ke wa, ĩisi na akila ĥaĥagena na sitomālen

natamaliaena naga sumo, ĩisi na akila ĥaĥagena na kanen kiligaĥe naga sirau.

A e legiena nene, ĥarin yar wa lala, amio navianena na visaluaena la sinelan ke asape yoko awemār Yesu na wa, ana akale ke mrapa tai na tarwanen naga.

² Ana lala apisayu ke pan la, asape “Sur nene taĥatete tekila e maran yeririna la naĥa apimi e ĥaĥagena nene, komin visae pere na la sinela kar ita vaĥisi ne, yoko akila pupia mēagena, vanon la mokliu naĥa akekaran ke pa yar nene rui.”

*Maria taron ponotaninu e Yesu
Matiu 26:6-13; Yoane 12:1-8*

³ Ana e pogos nene, Yesu sike e kumali naĥa Petani, naga sike e yuĥa mēna yaru tai naĥa apio ke Saemon Leperosi, komin nanua susumo naga ĥar leperosi se e yepena. Ana Yesu kinana ke e yuĥa nene, sira tai pimi puna, mla piawi tai naĥa amiyuĥaen e kilavaru tai naĥa po, a piawi nene na pulen ponotaninu naĥa amiyuĥaen e was nen ĥeligalaki tai, naĥa kana kilavaru keviu paĥisi. Ana sira nene pilonpo gon piawi nene, taron make ga ponotaninu nene taroi e ĥarina ne Yesu.

⁴ Ana laĥas naĥa asike e lele nene e pogos nene, apisu ke sur nene, ana la sinela kar sira nene paĥisi, asumā apisamumun ke pan la, asape “?Komin yar ne sira nene taron kare korenan ke ponotaninu sa nene?”

⁵ Visae wilwilinlua ga na, vera war varu keviu ea, vena iilaena yeririna la naĥa pe kiela sur re la poli. Naga kila kare na!” Ana la asun apisa kare ke sira naĥa sanene.

⁶ Ana Yesu pisa pan la, sape “?E, kam na akila ke sanene pan sira nene komin ya? Amiu na ve avisa kare re si naga, naga kila yuĥaena naĥa po tanea pan inu, pisa ruru inu paĥisi.

⁷ Li na lima korena la naĥa apisa la ke ne, yoko lala asulue ga likan amiu, ana amiu akilia aiila la silaga e pog punu ga naĥa sinemiunia. Ana inu, in na yoko ve nesu re silaga nemio amiu.

⁸ Suri naĥa sira nene miyuĥaenia, naĥa taron ponotaninu e inu, naga kila sur wo

punu ga naña naga kilia kila, naña pe nakilaruruen yepeu yoko neva e marena.

⁹ Nepisa ke sur na lelaga pan amiu, e yo punu ga e yomerava wetelu naña avisawal kiau lologena wo ea, ana asunyu mēna sur nowo nene naña sira nene miyumaenia, vena asitoñal sina ga silaga pupia sitomena kiena e inu, naña sinena miye inu lelaga.”

Sutas ãiliwilin wan Yesu

Matiu 26:14-30; Luk 22:3-20; Yoane 13:21-30

¹⁰ Ana Sutas nae Kariot, naña naga mēna pe nalogena na lualima taaga pa lua tai, naga sitom ke pa rui naña yoko wilwilinwan Yesu, ãisi na pa pisu ãarin yar wa lala.

¹¹ Ana pogos naña amloge yoko naga kila kiela mrapa na tarwan vinaunen Yesu, akekaran pañisi, apisaar pania, asape “!E po pañisi ne! Visae oiila imimi ve sanene, yoko mela narin nalaena tai van ko vanonia.”

Ana e pogos nene, Sutas siar kale ke pulmas tai yoko kilia ligan Yesu va e liman yaru wa la nene.

Yesu pitetalia Pita amio Yoane ava akila ruru kana kinanena maro

¹² Ana legiena ãesia na ãaãagena na kenen kiligaãe pe Toste, naga legiena naña la asuñia akila ke nakuãaãaena e narin sipsip lala vena sitomaena natamaliaena. Ana nalogena la apiun tan Yesu, asape “? Ko na sinomañ osape mekila ruru kata kinanena na ãaãagena naña e lepas nape?”

¹³ Ana naga pisa pan lalua, sape “Ava gar Yerusalem, yoko alual yar tai kus ke pupia piawi na wii tai, imi mañivin amiu. Ana ataveve naga avano,

¹⁴ ana yoko naga were amiu ava e yuñia tai. Ana pogos naña ava loyuñia e yuñia nene, amiu avis van ãar na yuñia nene, avisa sanini asave ‘Kieta navianena piun ke sape awa yo kiena ne wolawa lala, vena naga memio imimi kiena nalogena lala mekilia makan kinanena na sitomañalen natamaliaena ea?’

¹⁵ Amiu avisa sanene vania, ana naga vian amiu e pupia lele tai metava van amiu, naña suri la punu ga sike pa e

rui, ana yoko akila ruru sur la punu ga nakanena e lele nene.”

¹⁶ Ana Yesu pisa sanene pan nalogena lua nene, ana apano, amial ma apa atol Yerusalem. Ana e pogos nene, sur la punu ga pimi mañivi sa ga naña Yesu pisayu susumo pan lalua.

Pisi narui na, lalua akila ruru maron kinanena na ãaãagena nene kana Yesu, ãisi na aãasupela sina ga.

Yesu pisawal naña yoko Sutas vielua naga van kiena nasinekar lala

¹⁷ Ana kolemallo, Yesu amio kiena nalogena lala apitom garo Yerusalem, apito e yuñia nañani.

¹⁸ Ana pogos naña asuñia akinana ke narui, Yesu pisa pan la, sape “In na nepisa ke pe lelaga pan amiu ne, yoko amiu yaru ga tai yoko vielua inu, amiu yaru ga tai naña ita tesike tekinana ke veraga nagane.”

¹⁹ Ana nalogena la amloge naña naga pisa sanene, ana amloge piowa pañisi, apiun veve ke tan la peve taaga, asape “? E, in re poli?”

²⁰ Ana Yesu pisatame la, sape “Naga naña yoko kila sanene van inu, naga pe kiau nalualima ga taaga pa lua tai, naña naga yaru tai naña imimi lua meputon kamimi kilaparavi e ga e pulpiala taaga.

²¹ Ana yoko Narin Yeririna naga monar mare sa naña Nasiriena Wa pisayu pa sumo rui. A yaru naña vielua naga, yoko viowa manene laa van naga, naga popon manene sa ve vaeme re ga rui.”

Kinanena maro

²² Ana pogos naña la akinana ke sanene na, Yesu mla kilaparavi tai, pisa potena pan Ntewa, ana kawewowaia, kian pan la, ana naga pisa pan la, sape “Alavia, akania; nanene naga pe tasneu.”

²³ Ana ãisin nene, mla piala na kuruta, pisa potena pan Ntewa, ana kian pan kiena nalogena lala, ana la punu ga peve taaga amunpae ea.

²⁴ Ana naga pisa pan la, sape “Nanene, naga pe tau naña pe nakilaen naviranarena kiena ne Ntewa suñalu mañera silaga, naña yoko tau nene naga lauwo malena kiena ne yeririna la ve moki.

²⁵ Nepisaar ke pe lelaga na pan amiu ne, nesape yoko sane in na ve nemun re si kuruta pogos tai, vano vano-o nemun ga kuruta viu e navesuþenena kiena ne Ntewa.”

²⁶ Ana pogos naþa Yesu kila pa sanene, ana la amiyau e yauena tai naþa teke e tusi kiena ne Yauena lala, þisi na amolue petan yo nene, amiyal apa e Kunus Na Purolip la.

Yesu pisawal sape yoko Pita naga visawan naga

Matiu 26:31-35; Luk 22:31-34; Yoane 13:36-38

²⁷ Ana pogos naþa asike e kunus nene wa, Yesu pisawal pan la pisape “Pane ga kolemalu, kiamiu lelagaena e inu naga loru, komin Visena Wa pisawal pa sur nene rui, naþa sape

‘Yoko in na nowe moþar yar navisuaren sipsip, ana kiena sipsip lala yoko aureure tetai.’

Sek 13:7

²⁸ “A pog naþa netaulu si marena, yoko in na nesumo neto garo Kalele, ana amiu mþena monar asirau atom garo lele nene.”

²⁹ Ana pogos naþa Pita mloge visena naþa Yesu pisa pania, pisawolia pisape “Pona nalelagaena kiela punu ga nene e ko loru, aure vetan ko, a yoko inu, in na taþatete neligan ko pogos tai.”

³⁰ Ana Yesu pisa pan la, sape “Lelaga nepisa ke pan ko, yoko þane ga kolemalu, pogos naþa towa la ve akokoreko re yam ve lua wa, a ko, ko na yoko ovisawan inu yam ve telu rui.”

³¹ Ana Pita pisaluþar visena nene, pisaar mþarera, sape “Visae la sinelan asape aweþarnu mþena nemio ko, naga pogaga ne, ana inu, yoko taþatete nevisawan ko, nesape in na pe nepe kioþa re poli.” Ana e pogos nene, nalogena punu ga la apisa mþena sa nene.

Yesu pa mlen ma Ketsemani

Matiu 26:36-46; Luk 22:39-46

³² Ana sirau, Yesu lala apa e lepas nen kunusia, amiyal apito tano e narin pulþalu tai, naþa kiena ki Ketsemani. Ana naga pis pan la pisape “Amiu asuþa e

nini wa. Ana in na neva nelen ve plas ga wa.”

³³ Ana naga þere Pita amio Semes a Yoane, ataveve naga, apa li la vitokak ga sane, ana e pog nene, sinena Yesu naga pimi urmi keviu, mloge piowa paþisi.

³⁴ Ana naga pisa pa la telu nene, pisa pisape “Nanagane, nemloge sa naþa ninuu naga pororowa make ga, naþa lavisi nemare narui. Awis, amiu asuþali atavilo amio inu e yo nini wa.”

³⁵ Ana Yesu miyal pa laa sane, mlurun kinai, mlen pa arimana, sape “Ata-o, Ata-o, sa otamþania, yoko aora na pog mþarera la nene naga ve imin in re sina.

³⁶ Ko na okilia okila sur punu ga, ana nepiun tan ko vena okuslua piala naloge viowaena nene vetan inu, vena in na ve nemun reea. Ana ko na ve okila re sa naþa na sinenanena kiau, ana okila ga sa naþa kioþa nasinenanena.”

³⁷ Pisi na, naga pimi sina ga puna kiena nalogena la telu naþane, naga pisu lala amomalio pa rui. Pisi na lala atavilo sina ga, ana Yesu pis pa Pita sape “?Sanape Saemon? Ko na omomalio? ?Komin ya ne kam na taþatete atavilo amio inu e aora nini?”

³⁸ Kam na monar avisuar ruru amiu, monar alen lue ga, vena nataþaliena la ve akila amiu aloru re e mlamulþena viowa. Pe lelaga, kiamiu sitomena mþarera po, ana tasnemi naga miyowo ga.”

³⁹ Ana siraunia, naga pa si e yo na leniena naþane, mlen, mlenin sina ga visena naþane.

⁴⁰ Ana pogos naþa naga þasuþe sina, pisu la telu nene amomalio ke sina ga, komin atekavito paþisi, ana pogos naþa pis pan la, lala pe apisataþe re si suri tai pan poli.

⁴¹ Ana naga pavin sina, kiena leniena na telu, ana pogos naþa þasuþea, naga pis pan la, sape “!E! ?Amiu apa ruru amiu ke ga wa, amomalio ke ga wa? !Poga, þisi ga ne! Naga ne lavis ga pog naþa narin yeririna va e liman li viowa la narui.

⁴² Ko pogaga, amiu asuþalu ita tetove, yar nawilwilin wan inuena, nagane pam ke lavis gar ne narui.”

Apuarar Yesu m̄arera

Matiu 26:47-56; Luk 22:47-53; Yoane 18:3-12

⁴³ Ana e pogos nene naḡa Yesu pisa ke visen nene wa, Sutas, naḡa naga tai lala lualima yam taaga pa lua ne, naga pimi, amio yeririna la moki naḡa aḡar ke playu na mara amio kiela plaki lala. La nene, yar keviu la kiena yar wa la, amio navianena na visaluaena, amio na sumonena kiena le Yu la, lala amligan la apimi.

⁴⁴ Susumon naḡa apimi, yar na wilwili-nena naḡa Sutas, naga pisaḡes kile tai pan la sumo rui, pisape “Yar naḡa sa neva netalopan ḡesia, yar ne nanene naḡa ita sinetan ke, ana kiamiu yar na mara la monar atararia m̄arera aure naga vano.”

⁴⁵ Ana pog naḡa apimi narui, Sutas miyal mesmesun ga Yesu, pis pania, sape “Navianena, pokolemalo.” Talopania,

⁴⁶ ana kiela yar na mara la apimi atararia asape aure naga vano.

⁴⁷ Ana pogos naḡa atarar sanene, ana nalogena tai ḡurelua kiena playu, sape te yar tai naḡa nae pun yar wa la, ana naga tetereria ga ḡarina, telua kiligana komḡas pano.

⁴⁸ A Yesu pis pan yar la nene, sape “? Sanape na amiu aḡar kiamiu playu amio plaki lala? ?Sanape na asape aḡm ataranu sanene? ?Pona asitom ke asape in na nepe yar m̄arera na vinauena amio na weḡaren yaru la yo?”

⁴⁹ Sila ga e legiena punu ga, in na nepian amiu e yuḡa m̄ana Ntewa, ana sanape na amiu pe apim ataranu re e pogos nene poli? Ana pogaga, kome sur la naḡa nasiriena wa pisayu sumo rui, monar imi ve sa ga nene.”

⁵⁰ Ana e pogos nene, nalogena la amligan Yesu, aḡure petania.

⁵¹ Ana e pogos nene, yar m̄ee tai taveve ke yar la naḡa aḡure ke Yesu pano, ana naga pitavi ga. Ana yar la nene ḡasia apisuluḡar naga, asape atarar m̄ena naga,

⁵² ana atarpal ga naga, atarar ga kiena kulmrae aḡurelua petania, pe plamoḡe ga kiriri pano.

Aḡere Yesu pa e pupia kumali kiena yar kerkeviu kiena le Yu la

Matiu 26:57-68; Luk 22:54-71; Yoane 18:13-24

⁵³ Ana lala aḡere Yesu pimi suḡal e marana ne ḡarin yar wa, naḡa kiena ki Kaeḡas, amio yar keviu kiena yar wa lala amio navianena na visaluaena, amio na sumonena kiena ne le Yu lala, apim pa lele taaga e yo nene rui.

⁵⁴ Ana Pita m̄ena taveve m̄a Yesu e pogos nene, ana pe pa re lavisin poli, ana pogos naḡa apim loyuḡa e kove na kumali nene, Pita pa totano amio yeririna na yuḡaena kiena Kaeḡas, lala atega ke kapi, komin miava.

⁵⁵ Ana yar keviu la naḡa asike loyuḡa e viorena nene, lala akale ke yar laḡas naḡa akilia avisa plan sur laḡasia naḡa Yesu miyuḡaenia pona pisa, vena kila la akilia aweḡar naga vanonia, ana pe aḡa re sur tai poli.

⁵⁶ La aḡal laḡasia aḡerela apimi apisawal visena moki, ana visena punu ga nene apisokan ga, asum̄a apisa ke ga sur la naḡa pe taḡena lala, ana kiela visokanena la nene mlolor ga.

⁵⁷ Ana ḡisi na, laḡas na visokanena aḡal visena tai, asum̄alu, asape

⁵⁸ “Memloge yar nene naga ḡarwar e visena sanini rui, sape pupia yuḡa wa naḡa kieta yermarua ga la amiyuḡaenia e limala, pisa sape yoko naga taaga ga kilia weplania, yoko yuḡaen ruru si yuḡa wa viu taḡena tai e legiena ve telu ga, naḡa liman yeririna taḡatete yuḡaenia.”

⁵⁹ La apisa m̄a visena la nene pano-o, kaka ga, kiela visena la nene pe suḡal m̄arera re poli.

⁶⁰ Ana ḡarin yar wa suḡalar se marala, pisi pa Yesu, piun tania, sape “?Ko na yoko ovisataḡe van la pona ve ovisataḡe la re? ?Sanape e visena la nene naḡa apisa plan ke ne?”

⁶¹ A Yesu pe pis re si po, pisataḡe re si poli. Ana ḡarin yar wa pis si pania, sape “?Sanape? Ko na ope Navisaarena naḡa pe narina ne Ntewa, pona pe ko re poli?”

⁶² Ana Yesu pisataḡe pania, sape “Ee, Navisaarena nene, naga inu. Ana nesape

nevisa m̄ena van ko, p̄isi na yam ve plas ga, avisu si Narin Yeririna naga totano ke e lepas na p̄amarua puna Ntewa na m̄areraena, yoko avisu naga vaeme e lul metava vitom tano e yomarava nini.”

⁶³ Ana p̄arin yaru wa sinen karia na pitolwowa m̄ana kulkota, pisape “Pisi ga ne! ?Komin ya ne ita takale ke si yar taḗena naḗa kilia visa plan si sur laḗasia e naga?”

⁶⁴ Amiu amloge ke ne! !Yar nene naga p̄arnena kare pa kia wa kiena ne Ntewa rui! Viorena sitom sanape, yoko tela naliḗereena van ve sanape?”

Ana la amla naliḗereena pa Yesu, asape mesmes ga naḗa monar awem̄aria.

⁶⁵ Ana laḗas aplasirkon naga, apiwo kil-amarana, ana asuia, apisa karea, apiuyun tania, asape “?E, ovisalia, ane mliḗa ko ke nanagane?”

Ana yar na mara laḗas kiena p̄arin yaru wa la apim aḗurelua naga petan yo nene, ana la m̄ena nene asuia, amlilipa ke pogos naḗa aḗure ke naga apano.

Pita naga pisawan Yesu

Matiu 26:69-75; Luk 22:56-62; Yoane 18:15-18,25-27

⁶⁶ Ana e pogos nene, Pita sike loyuma e kove wa, ana sira na visuaren yuma m̄ana p̄arin yar wa pimi e lele nene,

⁶⁷ ana m̄al Pita tegan ke kapi, pisuluḗaria, pisa pania, sape “!E, ko nene ko m̄ena otataveve yar nae Nasaret naḗane!”

⁶⁸ Ana Pita pisawan sur nene, sape “!E! In na pe nemloge ruru re sur na ko opisa ke ne poli!” Ana naga petan lele nene, pato laa lavisin pupia pulutava na yuma nene.

⁶⁹ Ana e yo nene, sira nene naga m̄al sina, ana pisawal pan yar la naḗa asike ne, sape “Yar nene pe yar kiena ke yar nam̄a tai narui.”

⁷⁰ Ana Pita pisawan sina ga visena nene. Ana pe piavi re nenaga, la nene apisa pa Pita, asape “Peraga, ko ke tai narui, komin ko na yar nae ke Kalele tai narui.”

⁷¹ Ana Pita pis m̄arera, pisaluḗar m̄arerania e visena sa nini, sape “!E lelaga kemua rui, Ntewa na Mava, in na nepisa

pa rui, pe nekiliaar re nena yar na kam na apisayu ke ne poli.”

⁷² Ana veraga ga pogos naḗa Pita pisa ke sanene, towa kokoreko yam lua narui, kila Pita sitom̄al si visena kiena Yesu, naḗa pisa pania, sape “!Lelaga nepisa pan ko, p̄ane ga ne kolemallo, pogos naḗa towa ve kokoreko re na yam lua poli wa, ko na ovisawan inu yam ve telu rui.”

Ana Pita mloge sinena piowa na piowa, molue pa vanua, tag na tag.

15

Lala aḗure Yesu pa puna ne p̄arin suḗe kiena ne le Rom la naḗa sike Israel

¹ Ana kolulagi e Praere nene, li kerkeviu la kiena le Yu la apiora sina ga e kiela pupia kumali. La nene nane yerkawa kiena ne yaru wa lala, amio kiela nasumonena lala, amio kiela navianena navisaluaena la. Apis m̄a pano-o, atol sitomena tai, p̄isi na apiar limana ne Yesu, aḗure naga pa puna ne p̄arin suḗe keviu Paelat, ana la amligan Yesu e limana, vena naga liḗerea.

Yesu sum̄alu e marana ne Paelat

Matiu 27:11-14; Luk 23:3-5; Yoane 18:33-38

² Ana Paelat piun tan Yesu, sape “?Ko ope Parin Suḗe kiena ne le Israel lala, pona peraga?”

Ana Yesu pisatamea, pisape “Naga ke narui, sane opisa ke ne.”

³ Ana yerkawa lala kiena ne p̄arin yaru wa lala apisasawal suri la e Yesu, asape naga kila sur la moki naḗa piowa.

⁴ Ana Paelat piun sina ga tania, sape “?Sanape, la apisa suri viowa moki e ko rui, ana ko na omla m̄a kana navisatameena pona peraga?”

⁵ Ana e lepas nen sur la ne apisa ke ne, Yesu pe pisatame re si sur tai pan la poli, ana Paelat sinen pulan sur nene paḗisi.

Paelat taḗan pisape Yesu monar mare

Matiu 27:15-26; Luk 23:13-25; Yoane 18:39-19:16

⁶ Ana e pogos nene, la asike e pog na Paḗagena na Sitom̄alena Natamaliaena wa, ana e kas punu ga e paḗagena nene, p̄arin suḗe nae Rom silaga kila suri tai pan le Israel lala. Naga kila naḗa

visae laḡas naḡa asike e yuḡa naloge viowaena, la akilia aviun yaru ve taaga naḡa sinelania, yoko Paelat naga ligan lua naga molue.

⁷ Ana e pogos nene, yaru na kilaen politik tai naga ḡeke e yuḡa naloge viowaena, naḡa yaru la akilia ruru naga, kiena ki Paraḡas. Naga pe yar tai pogos naḡa asuḡalun kawelaen amio le Rom lala, ḡemomār laḡas amare, ana amligan pa e yuḡa na loge viowaena.

⁸ Pisi na, ḡina lala apimi moki lele taaga e marana ne Paelat, apiun tania vena naga kila van la sa naḡa naga suḡa kila ke ne, monar ligan lua lala yar tai naḡa sike e yuḡa naloge viowaena molue sina.

⁹ Ana Paelat pisataḡe la, sape “Pogaga. ?Amiu sinemiun asape neligan lua yaru nene molue sina, naga pe kiamiu ḡarin suḡe amiu le Yu la?”

¹⁰ Paelat piun sanene, vanon naga kilia pa rui naḡa yerkawa ga kiena ne le Yu lala, aḡure Yesu pimi puna, sane yuḡaena na vielueen ga, vanon naḡa apisu kiela yeririna taḡena lala akekaran Yesu paḡisi.

¹¹ Sanene narui, Paelat sinenan sape ligan lua Yesu vano, ana yerkawa kiena ne yaru wa lala akila kare sitomena kiena ne yeririna lala pimi pibusun paḡisi, asape aḡareran van Paelat vena ve ligan lua re Yesu, ligan lua ga Paraḡas vano.

¹² Ana Paelat mloge ke sur la naḡa apisa ke pania, piun tan la, sape “Pogaga, ana visae sanene, ḡisi na nekila ve sanapen yar nene naḡa amiu apio ke naga asape ḡarin suḡe kiena ne le Yu lala?”

¹³ Ana la punu ga apioyonia, asape “!Asuar naga e lak torovia!”

¹⁴ Ana Paelat piun tan la, sape “?Vanon ya? ?Naga kila suri ya ne piowa?”

Ana la apioyoni manene laa pa metava sane, asape “!Asuar ḡa, asuar ma e laki torovia!”

¹⁵ Ana Paelat pisu ḡele narui, sinenan sape visa sur tai naḡa kila yeririna la nene aloge wonia, ana naga sape Yesu naga suḡa ga, a mligan lua ga Paraḡas pa si pula. Ana mligan Yesu e limana ne kiena

li na mara lala vena akola, aure va asuar e lak torovia.

*Li na mara lala akila lele kare Yesu
Matiu 27:27-31; Yoane 19:2-3*

¹⁶ Ana li na mara lala atarar Yesu aḡerelua pa vanua e yometava na kumali kiena ne Paelat nene, ana la apio pa kiela ḡegas nen li na mara taḡena lala vena aimi avisuia.

¹⁷ Ana la amiyenlua ḡana kulsota, ana amiyen kulkota tai e naga naḡa marana mene sa naḡa ḡarin suḡe la amiyen, ana aḡar nonos nen kilsirili, ana aḡaniroron ga, amligan e ḡarina, sa naḡa karo na ḡarin suḡe tai.

¹⁸ Ana pogos naḡa amligan sur la nene e ḡisi, la asuḡa akila lele kare ke, asape “!ḡarin suḡe kiena ne le Yu lala-oo! Imimi mepatanon ko, memieluar ko!”

¹⁹ La amla lakiavio tai, aḡe ḡarina ea, la asuḡa apasiria kare naga, akinai tano puna sa naḡa apatanon ke naga.

²⁰ Ana pogosia naḡa la akila lele kare naga, ḡisi na aḡarlua kulkota mene nene petan naga, ana amiyen si ḡana kulsota tai ea, aḡure apano vena asuar naga e lak torovia.

*Asuar Yesu ma e lak torovia
Matiu 27:32-44; Luk 23:26-43; Yoane 19:17-27*

²¹ Ana pogos naḡa li na mara la asumon Yesu apa ke narui, aḡal yaru tai naḡa naga pa yoḡarua ana naga mial pimi. Yar nene, naga Saemon naḡa sumo naga nae Saerin, naḡa naga arimanane lalua nene Aliksanta amio Ruḡas. Ana aḡareran pania asape naga towe kus lak torovia kiena ne Yesu vano.

²² Ana lala asumon Yesu apa atol kunus tai, kiena kia Kolkota, naḡa kana kinasa asape yo naḡa sane puryu na piaḡarin yaru.

²³ Pogos naḡa apimi aporu e wos nen kunus nene, ana la sinelan asape ala kuruta namunena va Yesu vena munia. Ana kuruta namunena nene ataron was nen suri tai naḡa melkalka sike ea, vena kila tasnena ne Yesu kapulu ga, ve lae manene re, ana pogos naḡa amla pania, yepen mavin munena.

²⁴ Ana la atarar Yesu, asuar naga ma e laki torovia. Pisi na, la akuan taes, vena alual li ane war m̃ana kulmrae tai, a ane war tai.

²⁵ Ana pogos naṽa amligan pa Yesu ma e laki torovia, naga kolulagi, maran mrae ovari.

²⁶ Ana li na mara nae Rom la asiri navisawalena tai, naṽa pisawal suri naṽa nasumonena kiena ne le Yu la sinelan asape awem̃ar naga vanonia, naṽa sape “Yaru nene naga pe ṽarin suṽe kiena ne le Yu lala.”

²⁷ Ana e pogos m̃ena nene, yar navinauena lalua, asuari la m̃ena ga e laki torovia sa ke Yesu, apisirilua tai e lepas na ṽamarua, taṽena e lepas na ṽam̃eli.

²⁸ E mrapa ne nanene, lala akila visena marua tai na Tusi Wa pimi kate sina ga, naṽa sape “Amligan naga m̃eke amio yar na kilaroen navisaluaena.”

²⁹ Ana yaru la naṽa asum̃a amiyaloro ke apa e yo nene, asisilin ṽarila, apisalele kare ke Yesu ṽisa, la asape “!Koe, suwala! Ko nene nanua sumo ko opisa osape ko okilia owe plan Yum̃a Wa m̃ana ne Ntewa, ana ovisirlua sina ga e legiena ve telu ga, ana sanape narui?”

³⁰ !Pon ko ga otamalia ko lia, ovetan laki torovia nam̃a, otom tano!”

³¹ E ṽelaga m̃a nenaga nene, yerkawa kiena ne ṽarin yaru wa lala, amio navianena na visaluaena, asum̃a apitalia kare ke naga paṽisi, asum̃a apisa ke, asape “!Pona naga tamalia m̃a yaru taṽena la moki rui, ana naga mninue kare si narui, taṽatete si tamalia naga yo!”

³² ?Ana naga pe kieta Navisaarena, a pe ṽarin suṽen ita le Yu lala, pona peraga? Popon naga vitom tano e lak torovia nanagane, vena ita tevisu sane naga pe lelaga, vena telelaga e naga.” Ana la lua m̃ena naṽa asuar la e laki torovia amio Yesu, la m̃ena ga amiyakol sina visena viowa kiena ne la nene pania.

Yesu mare

³³ Ana kolipae ga, yemalolo pimi kalo yo punu ga e yo nene, pano tol mrae telu koyepakilavi.

³⁴ A e pogos nene, Yesu mlokai keviu e kiena visena ruru naapo, sape “?Eli, Eli, lam̃a saṽatani?” naṽa kana kinasia sape “?Kiau Ntewa, kiau Ntewa, sanape na omliganu nem̃eke sanene?”

³⁵ Ana yeririna laṽas naṽa asum̃alu asike e yo nene, apisusu suri la nene, ana amlogepal m̃aagena kiena ne Yesu nene, ana la asape “Amloge ke ne, yaru nene pio ke yermarua Elaisa, vena imi iila naga yo?”

³⁶ Ana veraga ga, lala yaru tai kiriri pimi, ṽar lumlum ṽasia, taron kuruta namunena naṽa melkalka pa ea, miyurar te laki tai, kian pa Yesu vena munia, ṽisi na naga sape “!Tesu wa! Tevisulia, pona yoko yermarua Elaisa vitom tamalia naga pona pere.”

³⁷ Ana Yesu mlokai manene sina, ṽere maron kiena yalua, marṽanu.

³⁸ Ana pogos ke ga nene, pupia kulmrae naṽa merorol tamalele ke e Yum̃a Wa m̃ana ne Ntewa, naṽa mono ke yo wa naṽa pe yo wa paṽisi, purṽa pito ga lika, siar metava pito tol tano.

³⁹ Ana yerkawa kiena ne li na mara lala, naṽa pisusuar m̃a Yesu, pogos naṽa pisu ṽere maron kiena yaluaena, milan paṽisi, pisa sape “!Aulai, yaru nene naga pe Narina kemua Ntewa lelaga naṽane!”

⁴⁰ Ana sira laṽasia naṽa atataveve ke Yesu asike e yo nene, asum̃alu asike laa perina sane, asum̃a atamaren ke kiela navianena. E lala nene, la telu naṽa kiela kia la sanini, Maria tai naṽa sira nae Maktala, Maria m̃ena naṽa anenane Semes kokan amio Yoses, a sira m̃ena tai, Salome.

⁴¹ Naga lala naṽa pogos naṽa Yesu sike garu Kalele nanua sumo, la asum̃a ataveve naga, amiila m̃ena naga. Ana sira m̃ena la moki asum̃alu asike e pogos nene, naṽa lala m̃ena akom garo Kalele ataveve Yesu apa ma Yerusalem.

Yosop sin Yesu

Matiu 27:57-61; Luk 23:50-56; Yoane 19:38-42

⁴² Ana legiena na Praere, naga pe legiena na kilaruruen sur la punu ga

suñate Legiena Wa peni, ana pogos naña lavis mrae vito tano,

⁴³ yaru tai nae Aramatia, kiena ki Yosop, naga pe marau re poli, kila kiena sito-mena mñarera po, pa suñalu se marana ne Paelat, piun tania sape kus tasnena ne Yesu. Naga mñarera pan pañisi nakilaen ve sanene, komin naga pe pupia yar tai na kansel kiena ne le Yu lala, naña yar la akilia ruru naga po, pe yar mña tai naña sinenan ke navesuñenena kiena ne Ntewa naga vim.

⁴⁴ Ana Paelat mninue ga sape e pogos nene na Yesu mare rui po pere wa, pio kiena yar kawa na mara pimi piun tania.

⁴⁵ Pogos naña mloge sape Yesu mare rui, ana tañan tasnena Yesu imi va Yosop.

⁴⁶ Ana Yosop temare ga mña puluve viu tai ñisi ga na wa, pa pul kulmrae nowo tai, pa akuslua tasnena ne Yesu petan laki torovia, amluluwoia ana la apa amligan mñeke e mña puluve nañane. Ana amelilivin pupia kilavaru pimi mono pulusia, ana la añasuñe la si apano.

⁴⁷ Ana Maria lalua nene, tai naña nae Maktala, amio tañena nene anenane Yoses, lalua mña apimi apisu yo naña tasnena ne Yesu mñeke ea.

16

Puluve korena ga mñeke

Matiu 28:1-8; Luk 24:1-12; Yoane 20:1-10

¹ Ana pogos naña Legiena Wa ñarovia, ko yepekilavi e Pog Orai, Maria nae Maktala, amio Maria naña anenane Semes, amio mña Salome, la telu nene apito apul suri la naña ponos taninu vena awar va avilan e yepena ne Yesu.

² Ana e Sante kolulagi wa ke ga wa, sa naña mrae siar molue, la teloka amiyal apa e puluve nañane.

³ Ana pogos naña amiyal ke apano, apiuyun ke sina ga pan la, asape “?Ana visae tetol ma ne, ane kilia melilivin lua pupia kilavaru naña mono ke pulus nena van ita, vena tekilia teva loyuma?”

16:7 Mat 26:32; Mak 14:28

⁴ Ana pogos naña la apimi lavisin yo nene, apisu ga pupia kilavaru nañane, yaru tai melilivin lua pa rui.

⁵ Ana la apa loyuma e puluve nañane, amilan yaru mñee tai totano teke e lepas na ñamarua, miyen ke kulmrae naña miyuwowa pañisi, ana pogos naña apisuia, sinela kurkur, miyuyuwawa pano-o pañisi.

⁶ Ana naga pis pan la, pisape “!E, ve amarau re! In na nekilia pa rui naña amiu apimi e yo nini vanon Yesu nae Nasaret, naña añear naga e laki torovia. Ana naga suñalu mali si rui, pe mon re si e yo nini poli. Aimi avisulia! Na nene yo naña amligan tasnena mñenea.

⁷ Ana ato vilaga, avisawal va Pita amio nalogena tañena lala, avisave yoko Yesu naga sumo vito ñes garo Kalele, ana ñisi na la mña monar asiraun atove, avisu naga e yo nañani, sa naña naga pisaar pan la sumo rui.”

⁸ Pisi na la apitañili, apetan puluve appure apitove, komin la amilan suri la nene pano-o pañisi, amiyuwawan ga rui. Ana la amarau mña pañisi, kila sanene la apitove na pe apisawal re si pan yaru tañena la poli, apa mesmes puna ne nalogena lala.

Yesu mñalivin Maria nae Maktala

Matiu 28:9-10; Yoane 20:11-18

⁹ Ana Yesu mal sina e Pog Olua kolulag wa ke ga wa, naña pe legien ñesia na wik. Pisi na naga mñalivin ke la naña atavevea, ana naga naña mñalivin ñesia, Maria nae Maktala, naña nanua sumo pile plan ninuna viowa la olua petania.

¹⁰ Pisin naña Maria pisu Yesu, pa mñalivin la naña asumã ataveve ke naga sumo, la asumã amloge ke piowa atag ke ga wa, naga pisawal pan la pisape Yesu naga mal si rui.

¹¹ Naga pisa ruru pan la pisape naga pisu Yesu e kilamarana rui, ana la pe amlelaga re e naga poli.

Yesu mñalivin kiena nalogena la lua

¹² Ana siraun sina, e pogos tai nalogena la lua apetan Yerusalem amial apa ke apa

sane, ana Yesu m̃alivin la. Lalua apisu sane yepena pe taḥena, pe sa re si nanua sumo poli,

¹³ ana pogos naḥa apisu pae ḥisi, lalua apilon la sina aḥasuḥela, apitove apisawal sur nene pan lala taḥena lala, ana yam si tai lala taḥena la nene pe amlelaga re e sur nene poli.

Yesu m̃alivin kiena nalogena lala

¹⁴ A siraun sina, Yesu m̃alivin kiena nalogena la lualima taaga pa taaga, e pogos tai naḥa atotanon ke kinanena. Ana naga pisli m̃a pan la, komin naḥa pe aḥasine ruru re naga poli, komin sinela la m̃arera paḥisi, kila na la pe amlelaga re e visena kiena ne la naḥa akirawal naga mali si rui.

¹⁵ Ana Yesu pisa pan la, pisape “Nanagane na monar avano, aliureure amiu e yo punu ga e yomarava nini, monar alologon kiau lologena wo van yeririna la punu ga.

¹⁶ Visae yar tai naga loge, ana lelaga ea, siraunia tol wii nakeena, yaru nene yoko tol malena, a visae naga naḥa ve lelaga re, ḥisi na Ntewa visaar marena vania.

¹⁷ Ana la naḥa yoko alelaga, ḥisi na kile la asike e la, sa naḥa la avile plan yermare la e puriukawaena na kiau kia, ana avisin m̃ena visena taḥena lala,

¹⁸ a sa pogos tai auarar lom̃ara tai, ana yoko woga ga, a visae amun sur tai naḥa monar amarenia, ana sur nene taḥatete kila sur tai van la, ana yoko aligan limala la e inanena lala, ḥisi na aloge wo sina ga.”

Yesu ḥasuḥe si pa ma e peni

Luk 24:50-53; Yum̃aena 1:9-11

¹⁹ Ana pogos naḥa kieta Suḥe Yesu pisa pa visena la nene pan la, Ntewa ḥurelua si naga pa ma e peni, mligan naga totano e lepas na ḥamarua puna.

²⁰ Ana kiena nalogena la amial tetai, apa amlologo e yo punu ga, ana apisu sane Suḥe naga miyum̃ae ke amio la, kila ke kile la moki pan la, vena kilaen yeririna la avisu kilia sane kiela visena la pe lelaga ga.

A sunena nene maro ga e nene.

Lologena Wo Kiena Ne Yesu Kristo Naña LUK Siriyuia Visayuena Na Tusi Nene

Kompasinen suniena plas na tusi nini

Tusi nini, “*Lologena Wo Kiena Ne Yesu Kristo Naña Luk Naga Siriyuia*”, naga pisayu Yesu sape naga yaru naña Ntewa pisayu pa lus nae Israel lala nanua rui, sape yoko naga imin tamalia la, a vena tamaliena yeririna makega na yomarava. Luk sirilua pa e kiena tusi nini, sape Yesu nene, Ninuna Ntewa namava ke narui pio naga vena “visawal kiena lologena wo va la naña limala korena ga.” Ana komin sur ne nanene, lologena wo naña Luk siriyuia, pulen suniena la naña kilologia sape Ntewa sinena miyee yaru la naña asike e nalogeviowaena.

Suri taņena la moki naña toñal e tusi nini, nane suniena kiena yaru la naña amloge po pona akekara. Suniena la moki na sanene sike e marana na keviu taaga [1] naña pisawal sape yoko Yesu imi, a e marana na keviu lua [2] naña pisawal sanape naña Yesu paeme.

A e mēna e marana na maro, yaru la akekara paņisi kome naña Yesu mal sina, a paņupe si pa mae peni.

Yaru naña siri tusi nini naga siri si tusi taņena tai naña kiena kia “*Yumāena Kiena Li Nalologena Lala*”. E tusi na lua nene, naga pisawal suniena lala naña moluwe marea e pogos naña Yesu pa mae peni. Suniena la nene pisa logia sape yaru la naña amlelaga e Yesu Kristo apimi moki liluwe, ana asumā apa apisawal kiela lelagaena nene e yo taņena lala.

Tusi nini “*Lologena Wo Kiena Ne Yesu Kristo Naña Luk Siriyuia*”, komsus orelu sike ea. E kompasnena na lua, amio na orai nena, pisawal suniena laņas la naña sike e ga e tusi nini, ana pe su re e tusi taņena lala naña Matiu, Mak a Yoane la telu asiriyuia.

Naga suniena la naña pisayu navisi lala naña amiyau, a suniena naña pisayu yaru na visuaren sipsip lala naña apimin apisu Yesu e pogos naña naga paeme, amio mēna suniena naña pisayu pogos naña Yesu pa e yumā mēna Ntewa pogos naña naga pe yaru viu ke ga wa, paņaiwa na yaru wo nae Samaria, a paņaiwa na ninis naña kovio.

Pupia suri mēna laņasia naña Luk pisayu kaņarania e tusi nini, naga sanini. Naga pisayu lotena, a Ninuna Wa, a yo kiena sira lala loyuma e yumāena kiena Yesu, a pisayu naña Ntewa kilia viyewo ita, kilia warplan kieta milamulena viowa lala.

Kompasnen tusi la nini

Visena na sumo 1:1—4

Yoane Nakeena amio Yesu lalua apaeme, a lalua akapuru 1:5—2:52

Yumāena kiena Yoane Nakeena 3:1-20

Yoane kee Yesu, a Yermare taņalia 3:21—4:13

Yesu kila kiena yumāena e lepas nae Kalele 4:14—9:50

Yesu moluwe Kalele pa ma Yerusalem 9:51—9:27

Legiena maro naña Yesu kila kiena yumāena garu Yerusalem a e yo la naña lavisin Yerusalem 19:28—23:56

Yesu mali sina a kiena nalogena la apisu naga 24:1-53

Visen pēsia

¹ Inu Luk nesiriyu suniena nini pan ko, Yerkawa Tiopilas. Sa naña ko okilia pisi rui, yaru la moki liu naña asiri suniena na suri la nene kompas rui naña amālmālivin ita e kas laņas paņaro rui.

² Suri la nene, ita pe tepisu mesmesun re e kilamarata poli, ana la naña apisuia, siar e purpesa, a la na sa naña la ape li Nalologena Wo pēsia, la ke narui la apisawal ruru lelein pimi pan ita.

³ Ana siar nakonua rui, nesumā nepisu ruru ke maki taņena la naña la asiria, a nesumā nemla ke visena na suri la nene, ana nepisu sane popon visae nekilali nela sunien taņena la nene kompas, nesirikolia vena aim sane tus wo tai naña taveve ruru narin mrapa lala na suniena nene.

⁴ A nane nesiri sike na rui, a nekekaran naþa neligan imi ve kionã, vena ouloyuia, okilia ovisu kilalea sane suri la naþa osuã omloge ke rui, la amesmes ga a ape lelaga, la sa naþa kiau tus nini pisawalia.

Navisi pimi pisawal pa Sakaraea pisape yoko naga war Yoane Nakeena

⁵ Suniena nena naga siar sanini, sape: E pogos naþa Parin Suþe Erot naga pe suþen ke lepas nae Yutea, yaru wa tai, naga pe namratava kiena ne Apisa, a naga þere sira tai naþa naga mēna molue kome lus kiena ne yaru wa lala, nane e namratava kiena yermarua Eron, wenla Mosis nanua sumo ne. Yaru nene kiena kia Sakaraea, a wona kiena kia Lesipet.

⁶ Ana lalua nene kiela malena mesmesu po paþisi e navisuenã kiena ne Ntewa, naþa la asuã amlogear kiena navisaluaena lala, a asuã akila ke þelaga la naþa mesmes silaga, pe akilalu re tai poli.

⁷ Ana suri ga tai, lalua pe narila re tai poli, komin sira naþa Lesipet naga pe luãaluã ga, a nanagane lalua apimi ape yermarua laa rui.

⁸ Ana e pogos tai, pe pog na þegas kiena ne Sakaraea naþa monar ava akila kuþaþaena e Yuã Wa mēna ne Ntewa, sa naþa þegas tai kila e wik tai, þegas tai kila e wik tai.

⁹ A silaga, pogos naþa akila sanene, la monar akila sa naþa amlil mēpila, vena alual yaru ai naþa yoko naga kila pupia yuãaena navaen loyuã e Yo Wa na Yuã Wa nene, vena sikapen ponotaninu na wonta naþa sike ne. Ana e poglis nene akila sanene, a kia kiena ne Sakaraea naga pa metava, asape naga narui naþa va kila yuãaena nene.

¹⁰ Ana e nena e pogos na sikapen ponotaninu nene, naga pa loyuã vena va kila, a pupia þina na yeririna lala asike vanua, asuã amlen mēga.

¹¹ Ana pog naþa Sakaraea pa loyuã, ana mēlan kare navisi tai kiena ne Ntewa naþa mēalivinia, suãal ga sike e lepas nen wonta naþani lepas na þamarua.

¹² Ana pogos naþa Sakaraea pisu navisi naþani, naga mninue kare narui sape

aãna kila ve sanape na wa, naga marau paþisi.

¹³ Ana navisi nene pisa pania, pisape “Sakaraea, ve omarau manene re. In na nepimin ga nesape nevisawal van ko, Ntewa mloge kiamiu leniena amlua rui, a yoko woãna Lesipet, þisi na war naruãna na moãe tai, a pogos naþa vaeme, yoko oligan kiena kia Yoane.

¹⁴ “Pogos naþa vaeme, yoko akekara vaþisi, aloge wo, ana ve amiu re ga, ana yaru taþena mēna lala akekara vaþisi.

¹⁵ “Sisi nene, yoko imi ve yerkawa tai kiena ne Ntewa, a naga sane ve yaru wa tai, þisi na naga valia kuruta a wii mērera mēna lala. Siar e pog naþa naga teke e lomēþena anena wa, ana yoko Ninuna Wa ulen naga vaþisi.

¹⁶ Yoko naga ve yaru tai naþa þisi na vilon le Israel la ve moki awasuþe la si puna Ntewa na Mava, kiela Suþe.

¹⁷ Yoko avisu naþa ninuna a naãareraena naþa se e Navisawalena Elaisa sumo sike sina ga e naga maran ve taaga, komin naþa naga imi sumo, vena visawal visave ve ve piavi re Navisaarena naga imi raunia. Yoko naga vilon sinen ata lala vena asitomyu ruru sina ga narila lala, a yoko vilon sitomenã kiena ne li nakilaroen navisaluaena lala vena ataveve si þelaga naþa pe manmarua a mesmes ruruia. E mrapa ne la nanene narui, þisi na naga kila ruru þegas nen yeririna la tai va Ntewa, vena asuãate naga imi mēalivin la.”

¹⁸ Ana Sakaraea mloge visena la nene, ana pisa pa navisi nene, pisape “Ei, ve ovisa re sanene. Taþatete ve sanene, komin imimi lua na mrae pito tano rui.”

¹⁹ Ana navisi naþani pisa ke sina pania, pisape “Peraga, yoko ve sa ga nene. In na Navisi Kapriel nini, naþa silaga nesuãal luen ga nesike e marana Ntewa vena nowar kiena visena, ana naga mligan inu nepim puãna vena nevisawal lologena wo nini van ko.

²⁰ Ana pogos naþa nepisawal pan ko, ko na pe omlelaga re e poli, ana nevisa van ko sanini, yoko ove puru, ana þisi na osuãna ga sanene imi tol pogos naþa ovisu

suri la nene imi m̃alivin ko nena ga e kana pogosia.”

²¹ Ana pogos naḡa navisi pis ke sanene pa Sakaraea, yeririna la asum̃al asike vanua na wa, asum̃ate m̃a pano-o, ana kiela sitomena lua narui, asape “Vanon ya ne naga pa loyuma, kila malion manene suri sanene.”

²² Ana siraunia na, molue sina, ana la apisu naḡa naga pe pis re si pan la poli, ana la apisu kilale asape naga sike loyuma, naga pisu suri tai, nane kila naga sanene. Ana naga pis ga e limana pan la, naga pe puru ga mom̃a ga.

²³ Ana suña kila kiena yum̃aena e Yuma Wa m̃ana ne Ntewa, pano-o kil- amake kiena pogosia, ana ḡasupe si pa m̃ana.

²⁴ Ana asum̃a sanene pano-o, pe piavi re poli, wona sena, ana pogos naḡa naga mloge sane m̃eḡena sanene, naga pa mom̃a ga m̃ala um̃a sanene pano-o tol kupario lima.

²⁵ A e pogos nene, naga sum̃a pisa sanini, pisape “! Ntewa kila po pan inu paḡisi nene wa! Sumonia, yaru la asum̃a apisu memawan inu komin naḡa pe noḡar re sisi poli, ana nanagane Ntewa pisuveve inu, sinena miye inu, ana mlalua memawaena na kiau lum̃alum̃aena nene rui.”

Navisi pimi pisawal pa Maria pisape yoko naga war Yesu

²⁶⁻²⁷ Ana Lesipet sena tol kupario orai rui, ana Ntewa pitetalia kiena navisi naḡani, Kaḡriel, vena vito visawal kiena visena tai va sira m̃ee tai, kiena kia Maria, naḡa naga sira m̃ee tai na pulkumali nae Nasaret e lepas naḡa Kalele. E pogos nene, la apisaar Maria rui vena va talopa amio yaru tai, kiena kia Yosop, naḡa naga molue kome lus kiena ne ḡarin Suḡe Tepet nanua sumo, ana Maria pe pa su re amio naga poli wa.

²⁸ Ana navisi naḡa Kaḡriel pimi m̃alivin Maria, pisape “O, Maria, Ntewa sitom ruru ko nena paḡisi, naga sum̃a pisa ruru ko, sike kemua amio ko lelaga.”

²⁹ Pogos naḡa Maria mloge visena nene, naga sitom paḡisi, sape visuvevelia, pisape navisi nene pisa po paḡisi, ana kana kinas sanape.

³⁰ Ana navisi pis sina pania, pisape “Maria, ve omarau re. Ntewa kekaran ko ga, ana yoko kila pupia navisa ruruena tai imi e kiom̃a malena.

³¹ Nanagane, yoko osena, vano-o owarwal narum̃a na yerm̃ene tai, a visae naga vaeme pae, monar osikia kiena kia Yesu.

³² Visena Wa nanua sumo naga pisayu pa narum̃a nene rui, naḡa pisape

‘Naga yoko ve yerkaewa, a kiena kia,

“Narina ne Ntewa na mava,”

a Suḡe Ntewa yoko kila naga imi ve ḡarin suḡe tai naḡa kus lelen re- pina marua nene ḡarin Suḡe Tepet nanua,

³³ ana ḡisi na naga ve suḡen la naḡa amolue e mratava m̃ana yermarua Sekop, nane le Yu ne la ne asike nanagane, a la naḡa yoko aim sirau, a kiena nasuḡenena nene yoko taḡatete ḡisi pogos tai.’ ”

³⁴ Ana Maria milan visena nene paḡisi naḡa sape yoko naga war sisi, ana naga piun tan navisi nene, pisape “?Ana suri nene yoko m̃alivi ve sanape ne, komin naḡa in na pe nesu re nemio wou nene poli wa?”

³⁵ Ana navisi pisatam̃ea, pisape “Ninuna Wa yoko naga vitom e ko, a nam̃areraena kiena ne Ntewa na mava ḡisi na kalo ko, ana yoko osena. A komin naḡa yoko ove sanene, ḡisi na avisave sisi wa nene naḡa yoko owaria, naga ve narina ne Ntewa.

³⁶ “E kiom̃a navisuena, opisu suri nene sane m̃arera paḡisi naḡa yoko ve sanene, ana popon ositomli anom̃a sira marua Lesipet nene. Asum̃a apisu ke naga asape naga taḡatete nena ga war sisi narui, ana nevisa van ko, naga pe sira marua rui, ana nanagane, kiena kupario orai narui.

³⁷ Ositomlia, sa naḡa Ntewa pisa pa sira marua Sera nanua sumo laa rui, e lepas na puna, pe suri re nena tai naḡa naga kila ḡele poli.”

³⁸ Ana Maria pisatam̃ea, pisape “Lelaga kemua naḡa. In na nepe sira m̃ee na yum̃aena kiena ne Ntewa ga, ana netaḡan inu ga vena naga kila suri la nene imi ve lelaga e inu ve sa ga naḡa naga sinenania, sa naḡa opisawal pan inu.” Ana navisi nene purmatania.

Maria pa m̃alivin Lesipet

³⁹ Ana Maria sum̃a sitoḡal ke visena lala kiena ne navisi nene, ana sinenan manene paḡisi sape va visu anena nene, naḡa Lesipet, ana pe piavi re poli na, mligan kiena yo, mial kawa pa e pulkumali naḡa Lesipet amio wona Sakaraea lalua asike ea, nane e lepas na kunus lala nae Yutea.

⁴⁰ Ana Maria pa tol m̃ala yum̃a, pa pio Lesipet.

⁴¹ A poglis naḡa Lesipet mloge kilale pulgo Maria naḡa pis pania, mloge narina naḡa teke e naga kulul keviu. Ana Ninuna Wa pitomi e Lesipet, pitomi pule ea,

⁴² ana Lesipet pio manenea, pisape “!O, Maria, Ntewa pisa ruru ko keviu paḡisi, taulu make sira la punu ga, a yoko pupia kiena navisa ruruena sike m̃ena e mrasnoḡa naḡa yoko owaria.

⁴³ In na pe nepe sira wo re nena tai poli vena anenane kiau Suḡe imi yal li inu sanene, ana nepisu sane po pan inu paḡisi.

⁴⁴ A kiau sisi tomtom pisu kilale ko, kekara paḡisi, komin pogos nena naḡa memloge ḡesan pulgoḡa, naga kulul paḡisi e loḡeḡeu.

⁴⁵ Ita lua tekekara na tekekara, komin temlelaga e visena kiena ne Ntewa, a yoko imi ve lelaga van ita ve sa nena naḡa naga pisaar pan ita.”

Maria mieluar Ntewa e yauena tai

⁴⁶ Ana e poglis nene, yauena kiena Maria tai sanini, sape

“Sineu mieluar Ntewa keviu,

⁴⁷ ninuu kekara paḡisi

pa kiau Suḡe Natamaliaena,

⁴⁸⁻⁴⁹ naga pisu inu nesike tano

nepe sira na kiena yum̃aena tai,

naga pe Ntewa nam̃areraena,

naga sitoḡal inu, kila po pan inu.

Teras lelei la naḡa aim sirau avisayu inu, asape ‘Sira nene, Ntewa pisa ruru naga keviu,’

nepisirlua kiena kia wa.

⁵⁰ Sinena miye la naḡa apatanonia,

teras na sumo, na sirau.

⁵¹ Nam̃areraena na limana kila suri moki, naga mlipureure la naḡa ape ḡarm̃arera, kila la apa tetai.

⁵² Kila plan ḡarin suḡe e lelela la, pisirilua la naḡa sitomena su ga tano.

⁵³ La naḡa viso kar la, pagan ruru la, li na suri moki, m̃ene plan la, limala korena ga.

⁵⁴⁻⁵⁵ Kila sa naḡa pisaar pa repita lala,

pimi miila ita kiena le Israel lala.

Pe sinen ḡesan re Epraam poli, sinen ye luen ga kiena piaparavi, vano-o ve uro re.”

⁵⁶ Yauena kiena ne Maria nane ḡisi e nene, a naga sike amio Lesipet pano-o tol kupario telu, siraunia ḡasuḡe si pa m̃ana um̃a.

Yoane Nakeena paeme

⁵⁷ Ana pimi tol ruru pogos na narina ne Lesipet vaeme, ana paeme pe mom̃e.

⁵⁸ Ana pogos naḡa namratava puna ne Lesipet amio la naḡa asike lavisinia amloge suri nene, akekara paḡisi amio naga e pupia sinewo kiena ne Ntewa naḡa pimi pania, naḡa nanua sumo naga pe lum̃alum̃a ga, ana nanagane narina nasumo nane paeme ne.

⁵⁹ Ana pogos naḡa sisi nene kiena legiena olua, apimin akila naga pe ḡaviu. E pogos nene, la sinelan asape asikia m̃ena kien kia, Sakaraea, sane kia kiena ne arimana,

⁶⁰ ana anena pisa luḡaria, pisape “Per-aga, kiena kia, Yoane.”

⁶¹ Ana la apis pania, apisape “Ya ne sanene? Namratava puḡa na pe amligan re kia tai sanene e poli!”

⁶² Ana apisi ga e limala pa ariman sisi naḡani, vena aviun tania avisave naga sinenan sape aligan kia nape e narina nene.

⁶³ Ana Sakaraea pis ga e limana pan la, pisape ala m̃aki tai vania, ana siri ea, pisape “Kiena kia, Yoane.”

Suri nene kila la nae yo nene amilan pañisi,

⁶⁴ a e mēna e pogos nene, purmenena ne Sakaraea kulul sina, kilia pis narui, ana mieluar Ntewa.

⁶⁵ Ana yaru punu lala na lepas nene amloge suri nene, amilan kare pañisi, a suniena nene pa laa narui tol pulkumali tañena lala na lepas na kunus lala nae Yutea.

⁶⁶ A la naña amloge, asitom pañisi, komin naña la apisu kilale asape limana ne Ntewa sike amio naga, ana la asumña apiuviun pan la asape “?Nin sisi wa nene yoko naga ve sanape ne?”

Sakaraea pisawal visena naña Ntewa pisa pania

⁶⁷ Ana Ninuna Wa pitomi pule e Sakaraea arimanane sisi nene, ana naga pisawal sanini, pisape

⁶⁸ “Teieluar kia kiena ne kieta Ntewa, Suñe nae Israel,

pitomi pun ita, pul plan ita,

⁶⁹ maplarar kana keyowo, molue e piaparavi na kiena yaru na yumñaena Tepet, naña yoko tamalia ita.

⁷⁰ Nanene kiena navisaarena nanua, navisawalena apisawalia, asape

⁷¹ Naga urelua ita vetan limana ne nasinekar lala,

⁷² Tañatete mēna sinen ñesan naviranarena amio repita lala,

sinena mie la ke na wa,

⁷³ nane navisaarena mārera amio repita Epraam,

⁷⁴⁻⁷⁵ Ntewa pisaar pisape tamalia ita vetan limana ne kieta nasinekar lala,

vena ve temarau re sina,

teve yaru wa,

temesmesu e marana,

teyumñae vania e legiena punu ga e kieta malena.

⁷⁶ Nin naruu, avio kon Navisawalena kiena ne Ntewa na meta manena, osumon Suñe okila ruru kiena mrapa.

⁷⁷⁻⁷⁸ Yoko ovisawal sane Ntewa sinena ye kiena yeririna lala,

ve sinewo van la,

viewo kiela mlamulena viowa lala, tamalia la.

Yoko Ntewa kila kiena narin yomerarava ñesa na kolulagi va metava van ita,

⁷⁹ vitom tegoli ita naña tesike e yemalolo, naña ninuna na marena kalo ita rui,

a vitom vivagali mrapa na sumñare vena teyaloro ea.”

Yoane Nakeena kapur pa metava

⁸⁰ Ana pogos naña kas la pimi ñaro pano, Yoane nene kapuru pimi keviu, a kiena sitomena marua ruru po, a sumñalu mārera suwa wa se yumñaena kiena ne Ntewa. A naga pa sike e yokorena, vena va tol pogos naña naga monar vaeme e marana ne le Israel lala.

2

Yesu paeme

Matiu 1:18-25

¹ Ana e pogos nene, ñarin suñe kiena ne le Rom lala, naga kiena kia Sisa Okastas. Ana naga pisawal pisape monar aulo yeririna punu ga e purvanua make ga naña asike vatanon kiena navisuarena.

² Yumñaena nawuloen yaru la nene, la akila ñesania, a e pogos naña la akila, yeririna kiena ne Sisa tai naga pisuar ke pupia lepas nene Seria, a kia kiena ne yerikawa nena, naga Kuarinias.

³ Ana nakilaen yumñaena nene, apisape yeririna punu ga monar ava si e kiela yo lala, vena akilia asiri ruru kiela kia, a aulo ruru la.

⁴ Suri ne nanene kila Yosop molue e pulkumali nene Nasaret, naña naga sike ea, naga nene e lepas nae Kalele, ana naga pa ma metava e pulkumali nene Petleem, naña yermarua Ñarin Suñe Tepet naga paemē e nanua sumo, naga nene e lepas naña Yutea, komin naña Yosop naga molue e lus kiena ne yermarua Tepet nene.

⁵ A Yosop ñere wona naña Maria lalua apano, naña e pogos nene, naga lavisin ke naña kana sisi vaeme narui.

⁶ Ana lalua apano, a pogos naña asike Petleem wa, Maria mninu sane kiena pogos na waren sisi pimi narui.

⁷ Ana Maria ñarlua ñesan kiena momē nene, a naga mliluwo ruru e kinakinas nen kulmrae lala, ana pe mñana yo namonena po re poli, komin lalua akilali

asape ava e yuñña mñana wolawa lala, ana pule rui, ana Maria mligan ga sisi tomtom nene mñene lelen navaganen surmali lala.

Navisi lala añalivin yaru navisuaren sipsip lala

⁸ Ana lemalo nene, yaru navisuaren sipsip lañas asike amio kiela surmali lala, e yo na vilumñini vanuan ga Petleem nene.

⁹ Ana navisi tai kiena ne Ntewa pitomi tano pula, a naurarena kiena ne Ntewa tegoli make yo nene sane pupia kapi tai, kila yaru la nene amilan pañisi.

¹⁰ Ana navisi nañani pis pan la, pisapenua “Ve amarau re. In na noñar ke visena tanea tai ne navisaen van amiu, naña kilia kila yeririna make ga aloge won vañisi.

¹¹ Yemalo ga nini, e pulkumali kiena ne Parin Suñe Tepet nanua, nane Petleem, nin sisi tai paememare ga na wa, naña yoko naga ve kiamiu Natamaliaena. Naga ke narui pe kiamiu Suñe, naga pe Navisaarena naña Ntewa pisaaria nanua rui pisape yoko ligan imi.

¹² “A nanene narui nane kile na sur ne tai nini. Yoko alual nin sisi tomtom nene, naña la akila ve tañena vania. Yoko avisu naña aliluwo ga e kinakinas nen kulmrae lala, a mligan mñeke e lelen kinanen kan surmali lala.”

¹³ Ana veraga ga amilan ga pupia ñegas nen navisi tai nae ma e peni apitom asikol navisi nañani. Ana navisi la nene amieluar Ntewa, amiyau apisape

¹⁴ “Ma metava ma e peni, asike amieluar ke Ntewa keviu pañisi, a e yomarava nini, sumñare sike e yeririna la naña Ntewa naga kekaran la.”

Yaru navisuaren sipsip la apa garu Petleem

¹⁵ Navisi lala apisawal visena nene ñisi, apur matan si yaru navisuaren sipsip la nañani, añasuñe la si apa ma e peni. Ana yaru la nene asumña apisasayu ke sina suri la nene pan la, apisapenua “Suwala, ita, tevano. Popon teva garu Petleem vena tevisuli suri naña mñalivi ga na wa, naña Ntewa pisawal pan ita.”

¹⁶ Ana amiyal kawa apano, apa añal Maria amio Yosop, apa akaten sisi tomtom nañani, mñeke ga mñana yo e lele navaganen suri mali lala.

¹⁷ Ana pogos naña apisu suri la nene ana apisawal visena make ga naña navisi pisa pan la e lepas na sisi tomtom nene.

¹⁸ Ana pogos naña yaru tañena la amloge suniena nene, apule mamaga e pupia nailanena tai.

¹⁹ A Maria, naga mligan ruru suri la nene e losinena, pe sinen ñesan re poli, sisitomñal luen ga silaga.

²⁰ Ana yaru la nene añasuñela si apa pun kiela sipsip lala, asumña apisirlua ke kia kiena ne Ntewa, a asumña amieluar naga pañisi vanon suri wo la naña amloge a naña apisuia, naña atorokin nena ga visena kiena ne navisi naña pisawal pan la.

Asikia Yesu

²¹ Ana pogos naña momñe nene kiena legiena olua, ana kana pogos na kilaen ñaviu ea. Akila sanene ñisi, asikia asape Yesu, kia nena naña navisi pisawal ñesania, sumon naña Maria mñeñenania.

Akus toroun Yesu pa e Yuñña Wa mñana ne Ntewa

²²⁻²⁴ A pogos naña Yesu paeme wik orai ñaro pae pano, pogos nakilaen kuñañaena naikikena e Yuñña Wa mñana ne Ntewa narui, naga nene komin kuruta kana sira naña ñar sisi. Ana akila kuñañaena nene, taveve Navisaluaena kiena ne Mosis naña pisape “La naña limala korena ga, akilia awe ga lomñe ve lua, pona narin kupa ve lua.”

Ana e ke e pogos nene, la akus toroun Yesu pa e Yuñña Wa mñana Ntewa, amiyawawo pania. Suri nene taveve mñena Navisaluaena kiena ne Mosis, naña pisape “Yermñene punu ga la naña apaeme ñesia ape wa, la ape kiena ne Ntewa.”

Yermarua Simion pisu Yesu e Yuñña Wa mñana ne Ntewa

²⁵ Ana yaru tai sike e Yuñña Wa mñana ne Ntewa e pogos nene, kiena kia Simion. Naga pe yaru nae ga Yerusalem, pe yaru mesmesu tai, a pe yaru mñarera tai e

þelaga na leniena. Naga suña suñate ke sape sinenan visu Nasineyeena kiena ne Ntewa nene, nane Navisaarena, imi iila le Israel lala e pog mārera nene naþa asike ea.

Ana Simion nene naga yaru tai naþa Ninuna Wa sike e naga silaga,

²⁶ a Ninuna Wa pisawal pa naga rui naþa yoko naga taþatete kovio, vano vano-o kilamarana visu Navisaarena kiena ne Ntewa sumo wa.

²⁷ A Ninuna Wa þere pimi e Yumña Wa mña ne Ntewa, e nena e pogos naþa akus sisi tomtom Yesu pimi, vena akila þelaga navisaluaena nene.

²⁸ Ana Simion miaþear sisi nene, mieluar Ntewa, pisa potena pania, pisape

²⁹ “Suþe Keviu o, nanagane nepisu suri naþa opisaar pan inu, pimi pe lelaga rui. Ana suri nene kila suñare pimi e sineu, ana nanagane okilia otamñan inu, yaru na kioña yumñaena, nevetan yomarava nini neiñasu.

³⁰ E ga e kilamarau, nepisu kioña Natamaliaena,

³¹ naþa omligan pimi e maran yolai lala na yomerava,

³² sane kapi tai na kipian koena van yeririna taþena lala, a yoko aieluar imimi kioña le Yu lala, komin kiamimi nau-rarena nene Yesu.”

³³ Ana Yosop amio Maria lalua amilan visena kiena ne Simion nene paþisi naþa pisayu Yesu,

³⁴ ana Simion pis ke sina ga, pisa ruru la, ana pisa pa anena Yesu, pisape “Ntewa mligan sisi nene pimi pan ita nae Israel vena kila ita ve moki teloru, a vena kila mña ga ita ve moki tesumñalu sina. Ntewa mligan naga pimi sane kile tai, ana yokorena yaru ve moki naþa avisa kare ga naga.

³⁵ Ana ve sanene, yoko naga kila kiela nasitomwanena la nene añalivi e yometava.

“Ana e lepas na pumña, þisi na naloge viowaena yur losineña sane playu na mara tai, yokorena sineña worovia komin suri la naþa yoko imi mñalivin narumña nini.”

Sira marua Ana pisu Yesu e Yumña Wa mña ne Ntewa

³⁶⁻³⁷ A sira marua tai naga mña teke e poglis nene, kiena kia Ana, naþa naga pe navisawalena tai. Ana nene, arimana Panuel, naþa molue kome lus kiena ne Aisere nanua sumo. Naga talopa pogos naþa pe sira mñee ke ga wa, ana naga sike amio wona na yermene tol kas olua ga, ana wona nene mare tania. Naga pe letano ga sanene, pano-o tol kiena kas lualima orely pa vari.

Naga pe sira tai naþa silaga sulueen ga e Yumña Wa mña ne Ntewa, naþa suña pa ke e pogos na lotuena na kolulagi lala pa tol na yepekilavi, a silaga naga monsilyu ga vena len.

³⁸ E poglis nene narui, pimi lavisin la, mlen, pisa potena keviu pa Ntewa vanon sisi nene, a siraunia, molue pano suña pisayu Yesu pa yeririna la naþa asun akiravan mñate ke asape Ntewa imi tamalia Yerusalem, ana Ana pisawal ruru pan la, naþa kiela Navisaarena pimi rui.

Yosop la aþasuþela si apa Nasaret

³⁹ Pogos naþa Yosop amio Maria akila suri la nene sa naþa Navisaluaena kiena ne Ntewa pisa þisi narui, ana aþar Yesu aþasuþela si apito garo kiela pulkumali nene Nasaret, lepas naþa Kalele.

⁴⁰ A nin sisi nene kapur pimi keviu, kiena sitomena pimi pe manmarua ruru po paþisi, a apisu naþa Ntewa miila naga vena naga kila sur punu ga wo e kiena malena.

Yesu pe yaru viyu ga, pian yaru la e Yumña Wa

⁴¹ Ana e kas punu ga, le Yu la asumña akila ke kiela þaþagena tai, naþa Paþagena na Sitomñalen Natamaliaena. A silaga, la naþa asike e yo taþena lala, la sinelan manene paþisi vena ava ma Yerusalem akila þaþagena nene, a arimana Yesu amio anena, la mña akila ke sanene.

⁴² Ana e kas tai, pog naþa Yesu kiena kas tol lualima taaga pa lua [12] ke na wa, apa sina, ana aþure Yesu amio la.

⁴³ Ana la akila suri na þaþagena la nene pano-o þisi, ana yeririna la aþasuþela si

apa e kiela yo lala. Ana Yesu na pe pa re poli, naga sumã ga Yerusalem, ana arimana amio anena pe akilia re poli.

⁴⁴ Lalua asitom ke asape pona naga sike amio la ãsiasa veraga e pupia ãegas na kiela namratava lala a kiela erau lala, ana amial mña pano-o tol legiena wetelu tai. Ana e yemalo nene akale Yesu pano-o,

⁴⁵ pe amñal re naga sike amio la poli, ana apisu sane la monar atayu lala awasuþe si ava garu Yerusalem vena alualia.

⁴⁶ La amial legiena wetelu taaga, apim atol si Yerusalem, akale pano-o, ana e legiena taþena, naþa kana legiena na telu na kiela yalena, amñal ga na wa, apisu teke tano e Yumña Wa mña ne Ntewa. Naga totano teke amio navianena lala nae e yo nene, toñia miyagogon ke kiela visena lala, a toñia piuviun ke naviunena la tan la.

⁴⁷ A la naþa asike lavisinia e pogos nene, la amilan manene pupia manmaruaena a nakiliaena kiena ne Yesu paþisi, amio navisatamñeen la naþa naga sumã mla ke pan la naþa apiun ke suri tania.

⁴⁸ Ana pogos naþa arimana amio anena apisu naþa naga kila ke sanene, amilan paþisi, ana anena pis pania, pisape “Ei, naru! Komin ya ne sinomñan osape okila kare manene imimi sanene? Opisu ke ne, imimi lua makale ko pano-o, pe moñal ko re nena ga, ana okila imimi memloge piowa paþisi wa.”

⁴⁹ Ana e pogos nene Yesu mla navisatamñeen tai pan lalua, pisa sanini, pisape “?Komin ya ne amiu lua apa akale inu e yo taþena la ne sanene? Sanape, amlua pe asitomñal re si sane in na monar nesumña nekila ga yumñaena kiena ne kau Ata loyumña e mña yumña poli?”

⁵⁰ Ana navisatamñeena naþa pisa pan la, amninue logekilaleen kana kinasia.

⁵¹ Ana Yesu mligan yo nene, naga pito amio la, ana la aþasuþe si apito e kiela yo naþa Nasaret.

A Yesu su pogaga amio la e yo nene, sumña mlogear ruru la mña silaga. A anena naþa Maria sumña sitomñal luen ga suri la nene loyumña e losinena silaga.

⁵² Ana kas la pimi þaro pano, a Yesu kapur pimi keviu, a kiena manmaruaena amio kiena maruaena sumña pimi keviu laa narui, a Ntewa sumña pisa ruru naga keviu paþisi, kila yaru la apisu naga po na po, akekaran manene naga paþisi.

3

Yoane Nakeena sike e yokorena, naga mlologon ke navilopuena

¹⁻² Ana kas laþas þaro pa rui, ana Yoane Nakeena, narina ne Sakaraea, naga pimi mñaliv e yokorena. Naga nene e pogos naþa pupia Parin Suþe Taepirias Sisa nae Rom naga pe suþe keviu ke tol kana kas lualima taaga pa lima rui, a e poglis nene na mliganar kiena yerkawa laþas rui, sane Ponses Paelat, naga pisuar Yutea, a Erot, naga pisuar Kalele, a wenla naþa Pilip, naga pisuar lepas nae Ituraea amio Trakonatis, a Lasanias, naga pisuar lepas nae Apilin. A e mña ga e pogos nene, lalua naþa ape þar na yaru wa lala asike garu Yerusalem, naga Anas amio Kaeþas.

Ana Yoane sike garu yokorena, ana Ntewa mla visena la pania,

³ ana naga pa make e lepas punu ga na wii nae Yortan, naga sumña mlologon ke pisape yaru la punu ga monar avilopu la, a monar ava e nakeena, ana yoko Ntewa naga viewo kiela mlamulena viowa lala.

⁴ Naga kila sa ga naþa Navisawalena Aisea pisa nanua rui e kiena tusi, naþa sape

“Pulgo tai sumña pio ke e yokorena, sape Akila ruru make mrapa kiena ne Ntewa, vena naga kilia imi mñalivi e kiamiu malena lala.

⁵ *Yoko kam na monar asinwo make pulþalu lala,*

a monar akilro kunus la su ga tano, a yo la naþa kapinia la monar aim amesmesu ruruia

a yo la naþa þilþil la monar aim ameri ruruia;

⁶ *ana sanene, yoko yolai la punu ga avisu kiela Natamaliaena naþa Ntewa ligania yalin la e mrapa nene imi mñalivin la.”*

Ais 40:3-5

Yaru la apim puna Yoane

⁷ Yum̃aena kiena ne Yoane, naga mlol-ogon sanene narui, ana pogos naþa þina la moki amolue apa e yokorena vena naga kee la, naga pis m̃arera pan la, pisa sanini, pisape “Kam na sa ga lom̃ara la naþa amaraun kapi tai ana aþure, ana kam na asitom asape akilia aurmatan pupia anen kapi naþa Ntewa yoko ligan imi? Peraga, komin pe apilopu amiu ruru re poli wa.

⁸ Ana visae lelaga kemua naþa amaraun nakoena nene, kiamiu malena lala monar war mras wo la naþa torokin kiamiu navilopuena nene. Ana avisuaria, ve awarwar amiu re sina, sa naþa akila ke rui, naþa asuñña apisa ke asape ‘E, ita na tesuñña poga ga rui, okilakan ita ke narui tepe lus kiena ne Epraam nena naþa.’ Ana nanene na pe sur re tai nene poli, komin naþa visae Ntewa sinenania, naga kilia war kilavaru la nene, yum̃aen lus kiena ne Epraam la ve moki ea, vena la akus lelemiu.

⁹ In na nevisa van amiu, nevisave m̃ekiavi mon ruru m̃eke rui, vena te plan laki la naþa pe aþar re mras wo la poli, akoven la ava e kapi.”

¹⁰ Ana pogos naþa þina la amloge nene, amarau na amarau, ana apiunia, asape “Ana visae ve sa nene, yoko imimi mekila ve sanape narui?”

¹¹ Ana Yoane pisatam̃e la, pisape “Yar naþa m̃ana kulsaket lua, yoko naga monar tam̃an tai va yar naþa pe m̃ana re tai poli. Yaru naþa kana kinanena keviu, yoko naga monar vion re komþas va yar naþa pe kana re poli.”

¹² A yar na takis la moki, naþa ape li nakila keuiaen nena yar lala, apimin vena Yoane kila nakeena van la, ana la m̃ena ga apisu kilale kiela napiowaena lala, ana la apiun m̃ena ga asape “?Navianena, sanapen imimi, yoko imimi monar mekila ve sanape?”

¹³ Ana naga pisa pan la, sape “Yoko awarpolo vetan yaru lala torokin ga ya naþa la monar aulia, ana ve yuve re, sa naþa akila ke þisi rui.”

¹⁴ Ana yaru na mara m̃ena laþasia apiun sanini pa Yoane, asape “?A imimi, yoko mekila ya?”

Ana naga pis pan la, pisape “Amiu apuarar ke kiamiu suri na mara lala, ana yaru la asuñña amaraun amiu paþisi, lala sane visae pog tai sinemiun kiela suri tai, amiu avisa ga ana monar atam̃ania. Ana þelaga nene, yoko monar ve akila re sina. A asuñña sinemiun mimi lue silaga asape yerkawa la nene apul amiu ve tokak ga, pona torok ga yo, ana monar akekaran ga narui.”

Yoane sape yoko Navisaarena imi

¹⁵ E pogos nene, le Yu lala asuñña asitom ke asape kiela Navisaarena lavisi m̃alivi, ana amloge visena wo la nene kiena ne Yoane, akekarania, ana naviunena sike e kiela sitomena lala, asuñña apiuviun ke, asape “O, pona yaru ne nanene yo, naga pe kieta Navisaarena, pona peraga?”

¹⁶ Ana Yoane suñña pisawal ruru merarava pan la, pisape “Peraga. In na nepitom sumo, vena nesuñña nekee amiu ke ga e wii, ana yaru taþena tai vim siraun inu. Yaru nene, naga to laa metavan inu, a in na pe netorokin re naþa neluþarlua kulus nen lana poli pona nekila kiena yum̃aena taþena. Ana naga ke narui, yoko kee amiu e Ninuna Wa, amio kana kapi nena, vena kekan plan kororaki lala vetan kiamiu malena.

¹⁷ Naga sa naþa naga tarar ke koruak nayuraren wit, vena silsilin plan kana kinas lala. Ve sanene, yoko naga war ruru kinas nen wit la nene va um̃a, ana yoko naga koven vinus va e kapi tai naþa taþatete mare pogos tai.”

¹⁸ Nanene narui, Yoane Nakeena mlol-ogon Lologena Wo pa yeririna la sa ke nene narui, a naga suñña pisa ke m̃ena visena wo naiilaaren taþena la pan la, a visena nakila þegelaena.

¹⁹ Ana yar tai pe kekaran re nena Yoane, nane Þarin Suþe Erot, komin Yoane suñña pis ke pania vanon naþa naga þerelua sira nene Lerotias, naþa wona wenla, a

pis pania vanon sur taþena mēna laþasia naþa naga kila.

²⁰ Ana metavan kiena napiowaena taþena lala, Erot sinen kar Yoane pano-o, suñal narui koven pa e yuñna naloge viowaena.

*Yoane kee Yesu
Matiu 3:13-17; Mak 1:9-11*

²¹ Ana pogos naþa Yoane pe pa re e yuñna naloge viowaena poli wa, naga kee mña yeririna la pano-o, ana pog tai Yesu mēna pimi e yo nene, ana Yoane kee mēna naga. Ana pogos naþa Yesu molue e wii, suñna mlen mñaga, ana veraga ga sinapane pike,

²² a Ninuna ne Ntewa pimi pe tasa, moñna pitomi tano sane loñe tai, pitomi pran ea. Ana Ntewa pis ma e peni pitomi pania, pisape “Ko Naruu nene, naþa nepinaia ko paþisi. Kiau sitomena sike ga e ko, nekekaran ko paþisi.”

*Repina ne Yesu lala
Matiu 1:1-17*

²³ Ana siraun naþa Yoane kee Yesu, ana naga siar kiena yuñnaena narui, a e poglis nene, naga kiena kas la tol lualima telu. A lus naþa Yesu molue komea, e lepas na yernēne, siar e Yosop, naþa apisu sane arimanane Yesu, pa sanini:

Yosop, naga narina ne Eli;

²⁴ Eli, naga narina ne Matat;

Matat, naga narina ne Livae;

Livae, naga narina ne Melki;

Melki, naga narina ne Sanae;

Sanae, naga narina ne Yosop;

²⁵ Yosop, naga narina ne Matateas;

Matateas, naga narina ne Amos;

Amos, naga narina ne Neam;

Neam, naga narina ne Esli;

Esli, naga narina ne Nagae;

²⁶ Nagae, naga narina ne Mat;

Mat, naga narina ne Matateas;

Matateas, naga narina ne Semein;

Semein, naga narina ne Sosek;

Sosek naga narina ne Sot,;

²⁷ Sota, naga narina ne Soanan;

Soanan, naga narina ne Resa;

Resa, naga narina ne Seruþapel;

Seruþapel, naga narina ne Saltiel;

Saltiel, naga narina ne Neri;

²⁸ Neri, naga narina ne Melki;

Melki, naga narina ne Ati;

Ati, naga narina ne Kosam;

Kosam, naga narina ne Elmñatam;

Elmñatam, naga narina ne Ere;

²⁹ Ere, naga narina ne Yosua;

Yosua, naga narina ne Eliesa;

Eliesa, naga narina ne Sorim;

Sorim, naga narina ne Matat;

Matat, naga narina ne Livae;

³⁰ Livae, naga narina ne Simion;

Simion, naga narina ne Suta;

Suta, naga narina ne Yosop;

Yosop, naga narina ne Sonam;

Sonam, naga narina ne Eliakim;

³¹ Eliakim, naga narina ne Melea;

Melea, naga narina ne Mena;

Mena naga narina ne Matata;

Matata, naga narina ne Natan;

Natan, naga narina ne Tepet;

³² Tepet, naga narina ne Sese;

Sese, naga narina ne Opet;

Opet, naga narina ne Poas;

Poas, naga narina ne Sala;

Sala, naga narina ne Nason;

³³ Nason, naga narina ne Aminatap;

Aminatap, naga narina ne Atmin;

Atmin, naga narina ne Ani;

Ani, naga narina ne Esron;

Esron, naga narina ne Peres;

Peres, naga narina ne Suta;

³⁴ Suta, naga narina ne Sekop;

Sekop, naga narina ne Aisak;

Aisak, naga narina ne Epraam;

Epraam, naga narina ne Tera;

Tera, naga narina ne Nao;

³⁵ Nao, naga narina ne Seruk;

Seruk, naga narina ne Reu;

Reu, naga narina ne Pelek;

Pelek, naga narina ne Eþa;

Eþa, naga narina ne Sela;

³⁶ Sela, naga narina ne Kaenan;

Kaenan, naga narina ne Aþaksati;

Aþaksati, naga narina ne Sem;

Sem, naga narina ne Noa;

Noa, naga narina ne Lamek;

³⁷ Lamek, naga narina ne

Metusela;
 Metusela, naga narina ne Inok;
 Inok, naga narina ne Saret;
 Saret, naga narina ne Malalil;
 Malalil, naga narina ne Kaenan;
³⁸ Kaenan, naga narina ne Enos;
 Enos, naga narina ne Set;
 Set, naga narina ne Atam; ana
 Atam, naga narina ne Ntewa.

4

*Parin suḑe kiena ne yermare la naḑa
 Yermare Lego, kilali Yesu*

Matiu 4:1-11; Mak 1:12-13

¹ Ana pogos naḑa Yesu pimi si e lepas na wii nae Yortan naḑa Yoane kee naga ea, naga pulen Ninuna Wa paḑisi. Ana Ninuna ḑere Yesu pa ke sina ga e yokorena,

² a naga sike e yo nene pa tol legiena lualima yam vari, naḑa ḑarin suḑe kiena ne yermare lala suḑa kilali naga. Ana e legiena la nene, pe kinan re poli, suḑa pano pano-o tol naḑa visokar na visokaria.

³ Ana Yermare Lego nene pimi pisa pania, pisape “Visae ko ope Narina ne Ntewa kemua lelaga, ovisali va kilavaru nene imi ve kilaparavi, vena okania.”

⁴ Ana Yesu pisataḑea, pisape “Peraga, komin Visena Wa pisape ‘Pe yar malin re ga kinanen poli.’ ”

⁵ Ana Yermare Lego sinenan sape kilali sina Yesu, ana ḑere kiena sitomena pa metava e pupia kunus tai. Kipian naga e purvanua make ga na yomarava nini,

⁶ ana pisa pania, pisape “Navisuaren yo la nene, amio kala naurarena make ga, asike pa e lumau rui. Inu noḑar kian la, ana nekilia netamān va yar ai naḑa in na sineun nesape netamān vania.

⁷ Pogaga, visae ovatanon inu, olotun inu, vera na neligan make sur la nene se lumomā.”

⁸ Ana Yesu pisataḑea, pisape “Visena Wa pisape

‘Olotun ga Ntewa okila ga kiena yumāena naga taaga, komin naga ga pe kiomā Suḑe.’ ”

⁹ Ana Yermare Lego sinenan sape kilali sina Yesu, ḑere kiena sitomena pito garo

Yerusalem, mligan naga e yo tai naḑa pa manene metava, e wos nen yumā māna Ntewa, ana pisa pania, pisape “Visae ko ope Narina ne Ntewa, oula oto tano. Okilia okila woga ga ne,

¹⁰ komin naḑa Visena Wa pisayu Ntewa, pisape

‘Naga yoko ligan kiena navisi lala, vena aim asuḑa amio ko, avisuar ko māga.

¹¹ Yoko ayukop yaun ko ga vena ve otan re lamā e kilavaru.’ ” *Yauena 91:11,12*

¹² Ana Yesu pisataḑe ke sina ga, pisape “Peraga rui, komin Visena Wa pisa māna ga pisape

‘Ve omāreran re okilali kiomā Suḑe Ntewa vena kila kiomā sur tai.’ ”

¹³ Ana pogos naḑa Yermare Lego kilali kiena nataḑaliena la nene pa Yesu ḑisi, ana purmatania pano, naga pa suḑate ke vena lual pogos taḑena naḑa sitom ke sape kilia taulu Yesu ea.

*Yesu siar kiena yumāena gar Kalele
 Matiu 4:1-11; Mak 1:12-13*

¹⁴ Ana siraunia, Yesu mialoro e namāraena kiena Ninuna Wa, pimi tol yo Kalele, ana yar la apisayu naga pano-o kalo make yo lepas nene.

¹⁵ Ana naga suḑa pa ke e kiela yumā na leniena lala, suḑa pian la, ana asuḑa akekaran naga paḑisi, asuḑa apisirlua ke kiena kia.

Le Nasaret la amēnelua Yesu

¹⁶⁻¹⁷ Ana Yesu pimi tol kiena yo naḑa Nasaret, naḑa kapuru pimi keviu ea, ana e Legiena Wa, sa naḑa kila mā silaga, naga pa amio la e kiela yumā nalenena. Ana asape naga ulolua Visena Wa Kiena ne Ntewa van la, ana akian tus naḑa Aisea siriya pania. Ana naga suḑalu na pikeḑa tus naḑani, mā e naḑa sinenan sape ulolua van la, ana puloia, naḑa pisa sanini, pisape

¹⁸ “Ninuna ne Ntewa sike e in rui, komin naḑa Ntewa mligan inu vena in ke narui naḑa nelologon Nalologena Wo va la naḑa limala korena ga.

Naga mligan inu nepimin vena nevisawal va la naḑa asike e yumā naloge

viowaena, nevisave nanagane, akilia amolue ga sa ga ne,

a vena nevisawal va kilamara ðala lala, nevisave nanagane, kilamarala la kilia imi wo sina.

A naga mligan inun sape yeririna la naða asike tano, naða yar taðena la asuña akila kare la ke silaga, yoko in na neure plan la, aim asu si e yo wo tai.

19 *Ana sanene, in na nekilia nekila merarava nevisave nanagane, Ntewa kila kiena pog viu nowo tai pimi málivin yar la nene rui.”* *Ais 61:1,2*

20 Ana pogos naða Yesu pulo nawuloena nene ðisi, naga pulonar si tus, kian si pa yaru na visuaren yuñaena, ana pa to meta e lelen nalologena, vena vis va yar lala. Ana la make ga naða asike loyuna asuña atamaria Yesu asape aña yoko aloge ya ne visa van la ne wa.

21 Ana pogos naða naga siar kiena visena, ana pisa sanini, sape “Nevisa van amiu, nevisave Visena Wa kiena ne Ntewa naða amloge ga na wa, kana visena la nene pimi pe lelaga nagane ga na wa, e maramiu.”

22 Ana pogos naða yar la amloge visena la naða kiena ne Yesu, amloge sane naga pis ruru po na po, pis malumu ga a pis tanea ðisa, ana la amilan paðisi, asuña apisavisa pan la sanini, asape “!Ana yar nene, naga narina ne Yosop ga nene! ? Naga ðar visena tanea la ne sanene pe ne?”

23 Ana Yesu pisatañe la, pisape “Pona sinemiun asape avisa kieta visena marua nene van inu yo, naða pisape ‘Tokta, okila ruru ko sumo wa, ana siraunia okilia oiila yar taðena.’ Nanene komin naða amloge ðisi rui naða nesike gar Kapeneam, nekila ruru ke namaiena la moki, ana asitom asape komin ya ne pe nepim nekila re mña sanene pan amiu e kieta yo nini poli.

24 Ana lelaga nevisa van amiu, sane visae navisawalena tai, ana kiena yeririna lala nae kemua kiena yo naða, la taðatete akekarania, taðatete alogearia.

25-26 Nanene na lelaga. Sineun ne-sape asitomyuli pogos kiena ne yermarua Elaisa nanua sumo. E pogos nene, yua pe powo re poli pa tol kas telu komsusa, a pupia viso tai kalo make yo Israel. ?Ana Ntewa mligan Elaisa pa miila ane e poglis nene? Apisu ke ne, pe mligan re naga panon iila letano nae Israel lala tai naða amloge ke piowa poli, ana mligan naga pa miila letano nae pulkumali keviu nene Sareðat, nane lepas taðena naða Saeton.

27 Ana asitomyuli mña ga pogos kiena ne yermarua Elisa. ?E pogos nene, yar la moki naða aðar leperosi, ana Ntewa kila ruru ai? Naga pe kila ruru re le Israel lala tai naða aðar maiena nene poli, ana kila ruru ga yere Seria nene naða Neman. Lelaga-o, ita yeririna la naða tepisa ke tesape ita nena naða tepe yeririna lala kiena ne Ntewa, ana yar la naða Ntewa mligan la apimin asape akila kieta yuñaena, ana yepeta mavin la ke sina ga.”

28 Ana pogos naða la nene asike loyuna nalenena amloge visena nene, kiela sitomena la pilon pa pe taðena narui, nagane la sinela kar Yesu narui.

29 Ana la aplamoluen Yesu, aþurelua naga petan kiela pulkumali pa vanua, aþure pa e pupia yeparpas tai naða kiela pulkumali mñeke ea, la sinelan asape akuan Yesu vito tano e yo ne nanene narui.

30 Ana Yesu kila naða la taðatete si auarar naga, ana mial ga pa þaro likan la sanene pano, mligan la asike na.

Yesu pa garu Kapeneam, pilelua yermare tai

Mak 1:21-28

31 Ana Yesu mial pito tol pulkumali taðena nae Kalele, nane Kapeneam, ana e Legiena Wa naga pian la e kiela loyuna na leniena.

32 Ana la naða amiyagogonia amilan paðisi, komin amloge kiena visena urmi paðisi, a naðareraena kiena ne Ntewa sike ea.

33 Ana pogos nene yar tai sike loyuna amio la, naða ninuna ne yermare viowa tai suña kila kare naga, ana yar naðani

pio manene kare Yesu pañisi, pisa pania, pisape

³⁴ “?Ei, Yesu nae Nasaret, kioña ya na teke e imimi? !Pona ko opimin osape okila kare imimi yo, a! Komin naña in na nekilia ko rui, sane ko ope Yar Wa nena napo tai kiena ne Ntewa.”

³⁵ Ana Yesu pis mārera pa yermare viowa nañani, pisaluñaria, pisape “!Ei, ve ovis re sina! Omolue ke vetan yar nene nagane.” Ana ninuna viowa nañani koven yar nene mloru pito tano likan la, ana molue petania pure pano, ana yar ne po sina ga sike na.

³⁶ Ana yar na yo la nene amilan pañisi, ana apisasayu Yesu, asape “?Ei, visen ya na sanene? Nanene yar mārera tai nene yo, kiena namāreraena keviu pañisi wa. Naga pis ga pa ninuna viowa lala, ana apureure ga sa nene.”

³⁷ Ana komin sur ne la nanene narui la akekara, a asumña apisa ruru kia kiena ne Yesu mlewo pa e yo punu ga e lepas nene.

Yesu kila ruru auia simem kana Saemon Pita, amio mēna yar tañena la moki

Matiu 8:14-17; Mak 1:29-34

³⁸ Ana Yesu sumālu pa vanua e yuñna nalenena nene, ana pa uña mēna Saemon, nanene gar ke Kapeneam na wa. Ana e uña nene auia simem kana Saemon mloru mēke e togin namaiena, yepena pisusun, ana apisawal pa Yesu, apiun pania asape sanape e sira marua nene.

³⁹ Ana Yesu pimi sumālu se yepas nen sira nañani, ana pisaluñar maiena nena, ana yepen pimi manin sina, mloge nena po, ana sumālu pa miyuñnaen kala kina-nena.

⁴⁰ Ana pogos naña mrae pito tano, sane Legiena Wa nene pisi narui, la naña kiela namaiena la asikena, añerela apim puna Yesu, ana Yesu pñuarar la, kila ruru la.

⁴¹ A la moki naña, yermare la amolue petan la, naña asumña akiikii, asape “!Ei, ko kemua naña ope Narina ne Ntewa narui!” Ana Yesu pisaluñar yermare la nañani, pisape ve avisa re si suri tai, komin naña akilia rui asape naga Navisaarena kemua lelaga.

Yesu mlologo make ga e lepas lala nae Yutea

Mak 1:35-39

⁴² Ana kolulag kona, Yesu sumālu naga taaga molue pa vanua, pa e yo mēno tai naña pa ruru po na po pañisi. Ana siraunia, yar la apiminia, akale mēna pano-o añal e yo ne nanene, a la sinelan asape naga sumña amio la, akilali asape avisaluñaria vena ve ligan la re,

⁴³ ana pisa pan la, pisape “Toko, in na monar neva nelologon Nalologena Wo na suñenena kiena ne Ntewa va e pulkumali tañena la naña asike ga wa, komin naga mligan inu nepimin suri ne nanene.”

⁴⁴ Ana naga petan la, pano mlologo teliv make e yuñna nalenena lala e pulkumali punu ga nae lepas naña Yutea.

5

La naña Yesu pio la pñesania, apa ataveve naga

Matiu 4:18-22; Mak 1:16-20

¹ Pogos tai, Yesu sike e yepas nen pupia lapa naña lañas asape Lapa nae Kenasaret, a lañas asape Lapa nae Kalele. A e pogos nene, yaru la naña asumālu amiyervivi Yesu la moki pañisi, sane yepa ve tokaki ga, komin naña sinelan asape aloge naga lologon visena kiena ne Ntewa van la.

² Ana Yesu pisu waa lua naña sike ga lavisinia, naña añure pimi sike ga e kukunone, a pisu kana yar ne la asumālu asike e sive, asumña akevan ke kiela lilivi lala.

³ Ana Yesu mial pano pa miai e waa tai nene, naña kiena ne Saemon, ana pisa pania pisape suponlua va li laa sane. Ana Yesu teke e waa nañani, tomña pian ke la naña asike ura.

⁴ Ana pogos naña naga pis pan la pñisi, naga pisa pa Saemon, pisape “Ita, in na sineun nesape teva re laa e lowe memaena, vena toure re lilivi wa.”

⁵ Ana Saemon pisatamēa, pisape “E yerkawa, imimi mekila sur nene rui pano-o yemlagi, ana pe metol re nena ika tai poli. Ana komin naña opisa sanene pan inu, poga, nekekaran naña tevali ga.”

⁶ Ana la apa akila sa naþa Yesu pisa, ana la amilan pupia þegas nen ika tai pulen ga kiela lilivi naþani, kila kiela lilivi nene siar pororovia,

⁷ ana la apio laþas naþa asike e waa taþena, la akuþin limalan la vena aim aiila la. Ana la naþa apim, ana asumã aþere lilivi naþani amio kana ika ne lala apa metava e waa luwoka nene, pano-o waa luwoka ga naþani pulemamaga ruru nena ga, lavis luoka ga talilu.

⁸ Ana Saemon pisu sur la nene, pisu kilale sane Yesu ga miyumuãen e kiena pupia namãreraena wa, ana kinai tano e mialana ne Yesu, pisape “Suþe, in na nepe yar viowa ga tai. Popon oure matan inu, ve osu re si lavisin inu.”

⁹ A pe naga re ga taaga po, ana la mēna naþa asike amio e pogos nene, la punu ga amilan þan wa e pupia þegas nen ika naþa la aþar ne,

¹⁰ amio narina ne Sepeti lua nene, Semes lalua Yoane, naþa asikol la amio Saemon amiyumuãe lele taaga, la mēna luoka amilan paþisi.

Ana Yesu pis pa Saemon, pisape “Ei, ve omaraun re si sur nene. Siar nagane, yoko ve oure re si ika, ana yoko osumuã oure yar la aimi ataveve inu.”

¹¹ Ana aþasuþe la, aþere si kiela waa la naþani apa ura, ana pe akila re si sur taþena poli, amligan kiela sur punu ga sumã sanene, ana ataveve Yesu apavini.

Yesu kila ruru yaru tai naþa þar leperosi

Matiu 8:1-4; Mak 1:44-45

¹² Ana siraunia, e pogos tai, Yesu sike pulkumali tai e yo nene, ana yar tai mǎlia pimi puna, naþa yaru nena, maiena naþa leperosi kilapel naga kila kare nena tasnena. Ana yaru naþani pimi mloru e lana ne Yesu, tag pania, piun tania, pisape “Suþe! In na nemlelaga nesape ko okilia okila ruru in si wo ga, ana visae okekarania, in na sineun nesape neviun tan ko vena okila inu neikiki sina ga.”

¹³ Ana Yesu pe maraun re tolen maiena kiena ne yar nene poli, ana puararia, pisa pania pisape “Ee, in na sineun nesape

yepemã yania.” Ana veraga ga yepena miania, leperosi naþani þisi e naga.

¹⁴ Ana Yesu pisa pania, pisape “Omloge ke ne, ovano ve ovisayu re sur nene va yar lala wa, ana nanagane ova nena okom puna ne yar wa vena naga visu ko lia, a kilia visawal visave tasnemã mian rui. Siraunia, ana monar ova okila lotena va Ntewa a okila kuþaþaena na kiomã yepe ikikena nene, sa naþa Mosis pisape monar akila.”

¹⁵ Yesu pisape yar nene vano ve visayu re sur nene, ana peraga, pe piavi re poli asumã apisayu mǎ Yesu pano-o pa tol yo punu ga, kila sane pupia þina la apimin asape aloge kiena visena, ana la sinelan asape naga kila ruru kiela namaiena lala.

¹⁶ Ana e pogos la punu nene Yesu sumã petan mēna yeririna lala, pa ke e yokorena, mlen ke pa Ntewa.

*Yesu kilia viewo mlamulena viowa
Matiu 9:1-8; Mak 2:1-12*

¹⁷ Ana pogos sina tai, Yesu pian la mǎga, a Varasi laþasa amio navianena navisaluaena lala atomãga tano e nene, naþa la na pulkumali taþena lala e lepas lala nae Kalele amio Yutea, a laþasia amolue Yerusalem apimi. Ana e pogos nene, namãreraena kiena ne Ntewa pimi keviu manene laa e Yesu narui, kila naga kila ruru namaiena lala.

¹⁸ Ana yar laþasia akus namaiena tai pimi, naþa yepena la punu ga marmare, naþa akus pimi ana mlor ga mēke e mǎna tog. La sinelan asape akus imi loyumuã aligan mon lavisin Yesu,

¹⁹ ana apisu sane pupia þina mēke pa loyumuã rui, ana yo ve tokak paþisi, taþatete akus kiela erau nene vano. Ana akus pa metava e wos nen yumuã narui, akawepo lologia Yesu, ana amligan malumun yaru naþa amio mǎna tog pito tano e pulus naþani, pito mēke likan yeririna lala, mēke nena ga vamon Yesu.

²⁰ A pogos naþa Yesu pisu suri nene, naga kilia naþa la amlalaga mǎrera e naga paþisi, asape yoko naga iila namaiena nene, ana naga pisa pania, pisape “Mara,

in na nepiewo kioṃa mlamulena viowa rui.”

²¹ Ana pogos naṓa Varasi amio navianen navisaluaena lala amloge visena nene, asitom piowa e naga paṓisi, ana asuṃa apiuviunia, asape “?Ane ṓarnena kare ke kia wa kiena ne Ntewa sanene? Ntewa naga taaga kilia viewo mlamulena viowa, pe yar taṓena re si poli, ana yaru nene pis ke sa naṓa naga sitom ke sape naga Ntewa nene narui.”

²² Ana Yesu mninu kilale rui sape asitom ke piowa sanene e naga, ana pisa pan la, pisape “?Komin ya ne sinemiu la pulen ke sitomena viowa la sanene?”

²³ Visae nevisa ve sanini va namaiena nene, nevisave ‘In na nepiewo kioṃa mlamulena piowa,’ pona nevisa vania nevisave ‘Osuṃalu, oyali,’ ana visena lua nene, tai ṃareran navisaena, a tai meme ga. Na naṓa sape ‘Osuṃalu, oyali,’ naga ṃarera laa sane, komin naṓa yoko okilia ovisu kilale sane kiau visena pe lelaga pona peraga, naṓa yar nene suṃalu pona taṓatete suṃalu.

²⁴ Ana nanagane ṓisi na nekila suri tai naṓa asitom asape Ntewa ga naga taaga kilia kila, ana avisu kilale sane in na Narina ne Yeririna, naṃareraena sike e inu. A nevisa van amiu, nesape naṃareraena nene torokin nekilia neviewo ṃena mlamulena viowa e yomarava nini. Ayagogo ruruia.”

Ana Yesu pis pa namaiena naṓani, pisape “Nevisa van ko, nesape osuṃalu, ovilonar moṃa tog, oyali ova uṃa.”

²⁵ Ana sa nena nene, e marana ne la naṓa apisu ke ne, yar nene suṃalu, ṓar ṃana tog, mial pa vanua, naga pa uṃa naṓa suṃa miyeluarliluen Ntewa sanene paṃo.

²⁶ A pogos na la naṓani apisu suri nene, amilan kare nena lelaga, yepela ṓil paṓisi, asuṃa amiyeluar Ntewa, asape “E suwala, lelaga kemua-o, ṓane na ita tepisu sur tai naṓa pe taṓena paṓisi!”

Yesu pio Matiu, naṓa apio ṃena Livae, pimi tavevea

Matiu 9:9-13; Mak 2:13-17

5:30 Luk 15:1,2

²⁷ Ana siraunia, Yesu mialili ga pa laa sane, ana ṃal yar tai totano teke e kiena yuṃaena e yuṃa na warpoloen takis. Yaru nena, kiena kia Livae. Ana Yesu pio, sape “Oim otaveve inu.”

²⁸ Ana Livae suṃalu nena ga, mligan kiena yuṃaena, mligan kiena suri punu ga sike na, ana taveve Yesu.

²⁹ Siraunia, Livae nena kila pupia kinnanena tai kana ne Yesu e ṃana uṃa, a e pogos nene, yar na takis taṓena la moki, amio ṃena yar taṓena la moki na sanene, la ṃena apim ato lele taaga amio Yesu amio kiena nalogena lala e kinnanena naṓani.

³⁰ Ana Varasi laṓasia, amio kiela navianen navisaluaena laṓasia, apragogo pa nalogena lala, asape “?Komin ya ne akinan ke lele taaga sanene amio yaru viowa lala a ṓarṃarera la nene?”

³¹ Ana Yesu ke pisataṃe la narui, pisape “La naṓa tasnela ṃarera ruru poga ga, la pe asitom re asape ava akom pun yar na kilaruruen maiena poli, ana la ga naṓa aṓar maiena, la sinelan paṓisi.

³² In na pe nepimin re nevio yar la naṓa apisa ke asape la apo rui e marana ne Ntewa vena ataveve inu, ana in na nepimin ke yeririna viowa la ne sanene narui, vena avilopu la vetan kiela mlamulena viowa lala.”

*Naviunena tai e lepas na monsilena
Matiu 9:14-17; Mak 2:18-22*

³³ Ana la apiun naviuena tai pa Yesu, asape “Nalogena kiena ne Yoane Nakeena la asuṃa apuarar ruru ke ṓelaga nene naṓa yam mokliu, asuṃa amonsilu ga vena alen va Ntewa, a Varasi ṃena la akila sa ke ga. ?Ana komin ya ne kioṃa nalogena la pe akila re poli, ana la asuṃa akinana a asuṃa amun ga sanene?”

³⁴ Ana Yesu pisataṃe la, pisayu naga amio kiena nalogena lala, sane la akekara paṓisi pogos naṓa naga sike amio la, ana yoko sinela viowa sirau e pogos naṓa naga ure matan la. Ana pisape “?Pogos naṓa yar natalopaena sike amio kiena erau lala wa, asitom asape yoko akilia

aligan kinanena na ããagena nene sike na, ve akan re? Peraga.

³⁵ Ana yoko pogos tai imi, naãa yoko au-relua yar natalopaena nene vetan kiena erau lala, a e pogos nene narui akilia amonsilu, komin naãa sinela miye naga paãisi.”

Sur marua amio sur vii

³⁶ Pelaga na monsilena nene, naga ãelaga marua tai nalotena kiena ne le Yu lala, ana Yesu sinenan sape kila mer-aravan sane ãelaga marua na sanene, taãatete asikol amio suri vii la naãa naga pian la ke ea, ana pisa ãakaiwa tai e lepas nene pan la. Pisape “Taãatete ola kinakinas nen kulmrae vii tai, naãa ovitolãa kinakinas tai, ana osuluar e kulmrae marua vena kilawo pulus naãa teke ea. Visae sanene, yoko opitol ãa kare kulmrae vii nene narui, ana kana kinakinas, yoko taãatete nena marana ve sa ke kulmrae marua nene, ana apisu piowa ga.

³⁷ A taãatete okokonia kuruta vii naãa ãeke ãepela ke ga wa va e kulus nen nane tai naãa pe urmarua, naãa akon kuruta pa e yam moki li rui. Visae okila sanene, yoko kuruta vii nene lapa, kila kulus nen nane naãani ãapo, ana kuruta nene lau kare ga ne, ana kana pias ãena imi viowa nena ga.

³⁸ Ana kuruta vii, monar okokonia va e kulus nen nane naãa naga ãena pe urvii, naga ãarera ruru po, a okilia oligan ruru moãa kuruta mon ãa ea.

³⁹ A pogos ãena naãa yar la amun kuruta naãa amiyuãaen towe laa nanua rui, yoko ve sinelan re si munen kuruta vii, naãa amiyuãaen mare ga na wa, ana yoko monar avisave kuruta marua naga kiki laa sane.”

6

Yesu pe suãen Legiena Wa Matiu 12:1-8; Mak 2:23-28

¹ Ana e sina ga e legiena tai, naãa pe Legiena Wa, Yesu amio kiena nalogena lala amiyaloro apano, a kiela mrapa pa ãaro e lokove na kona lala. La amiyal ãa sanene, ana nalogena lala viso kar la

ana akawe plan kona laãas naãani, apae vana, akania.

² La akila ke sanene, ana Varasi laãas asuãa e naãani, apisu ke Yesu lala, ana apisa pania, apisape “Ei, komin ya ne asuãa akila ke yuãaena nene e Legiena Wa sanene? Visae sanene, asuãa akilaro ke kieta navisaluaena ne.”

³ Ana Yesu pisatamãe la, pisape “?Pona pe apuloli re Visena Wa pog tai poli yo wa, e sur la naãa ãarin Suãe Tepet nanua naga kila? !Kam na akilia pa rui! Naga amio kiena yeririna lala la viso kar la manenea,

⁴ ana naga pa loyuãa e yuãa wa ãana Ntewa, a naga mla kilaparavi wa naãa Navisaluaena sape yar wa ga la akilia akania, ana Tepet amio kiena yeririna la akania.”

⁵ Ana Yesu pisa pan la, pisape “Inu Narina ne Yeririna, inu ke narui nepe suãen Legiena Wa, ana inu ga nekilia nevisa ya naãa popon akila e Legiena Wa, pona ya naãa pe pon re akila poli.”

Yesu kila ruru limaulu tai e Legiena Wa Matiu 12:9-14; Mak 3:1-6

⁶ A e si e Legiena Wa tai, Yesu pa si loyuãa e yuãa na leniena, pian la. Ana poglis nene yar ãena tai sike loyuãa naãani, limana marua pulu.

⁷ Ana navianen navisaluaena lala, amio Varasi lala, naãa la sinela kar Yesu rui, asike ga lavisinia e poglis nene, asuãa apisuar ruruia ãisa, vena asape alual li ãelaga viowa laãasa e naga, ana la sinelan asape avisu sane yoko Yesu kila ruru limaulu naãani e kiela Legiena Wa nene pona yoko ve kila re.

⁸ Ana Yesu kilia ruru make ya naãa sike e kiela sitomena, ana pis pa yar naãani, sape “Osuãalu, ovam osu metava e nini sumo wa,” ana naga suãalu pavini.

⁹ Ana Yesu piun tan la naãa asike e ne, pisape “?Kieta Navisaluaena sape tekilia tekila ya ne e Legiena Wa? ?Pisape popon tekila sur wo pona popon tekila sur viowa? ?Pona pisape popon tetamalia yaru, pona popon toweãar yaru?”

¹⁰ Ana Yesu pisuveve la make ga, ana pis sina pa yaru naãani, pisape “Lumuãa

visilia!" A e ga e pogos naña yar nene kila sanene, limana nañani pimi po nenaga.

¹¹ Ana le Varasi lala sinela mimi, naña sane amloge mlae pañisi, ana apa vanua apisayu weleli sane yoko akila ve sanape na va Yesu.

Yesu mliganar kiena nalogena la lualima taaga pa lua

Matiu 10:1-4; Mak 3:13-19

¹² Ana siraunia, e sina e pogos tai, Yesu pa metava e pupia tavie tai vena naga se ea, len va Ntewa, ana sumã kila ke sanene e yo nañani pa tol yemlagi.

¹³ Ana kolulag na pitomi pio kiena nalogena lala apimi lele taaga puna, ana e la nene, naga pisawal la lualima taaga pa lua naña naga mliganar la pisape la narui, la ape nalogena.

¹⁴ Ana kia kiena ne la lualima taaga pa lua nanini:

Saemon, naña Yesu mligan kiena kia tañena, sape Pita,
a wenla naña Antru,
a Semes, a wenla naña Yoane,
a Pilip,
a Patalomiu,
¹⁵ a Matiu,
a Tomãs,
a Semes, naña narina ne Alpeas,
a Saemon, naña sape mĩene plan le Rom lala,
a Sutas, naña narina ne Semes,
¹⁶ a Sutas nae Kariot, naña siraunia naga kom varaun Yesu.

Yesu sumã mlologo a kila ruru namaiena lala

Matiu 5:1-12

¹⁷ Ana Yesu ãere nalologena la nene apitom si tano, ana amãal yotop tai, apa asike ea. A poglis nene, nalogena kiena ne Yesu tañena lala apule ga asike ea, amio mĩena pupia ãina lala na pulkumali tañena lala nae Yutea, a le Yerusalem mĩena lala, amio le Taea a le Saeton lala, naña amolue e kiela yo lala garo losi lavisin sive apami.

¹⁸ La nene apamin asape aloge visena lala kiena ne Yesu, a la sinelan asape kila ruru kiela maiena lala. Ana Yesu kila

mã sanene pan la pano-o, naga kila ruru mĩena la naña yermare lala asumã akila kare la ke silaga.

¹⁹ Yaru la moki manene pañisi, ana la punu ga sinelan asape atol ga Yesu, vena la aninuli ga pupia namãreraena naña apisu sane sumã mĩalivi ke ea, naña sumã kila ruru ke yar la moki rui.

Navianena lala kiena ne Yesu

²⁰ Ana Yesu kira pisu kiena na-logena la nene, ana pian la, pisape:

"Kam naña apisu kilale sane limamiu koren ga, navisa ruruena sike e amiu, komin amiu ke narui naña Ntewa naga pe ãarin suñen amiu, ana visuar amiu.

²¹ Kam naña viso kar amiu ke nagane, navisa ruruena sike e amiu, yoko aloge sane aim aulemaamaga nena ga e suri wo ne lala.

Kam naña atagi ke nagane, navisa ruruena sike e amiu, yoko akilia akekara.

²² Kam naña yar la pe akekaran amiu re poli, a naña asumã yepel mavin amiu, a naña asunã apisa kare amiu, a asumã akoven plan ke kiamiu kia lala sane kam na ape yar viowa ga lala, nanene komin naña kam na ape yar kiena ne inu Narina ne Yeririna, navisa ruruena sike e amiu.

²³ E pogos la ne sanene, ve asitom manene re, aulaula ga warar pupia kekarena, komin naña asunã akila kare amiu ke ga e ãelaga mĩa nena naña repila lala akila pa navisawalena la nanua sumo. Ana pogaga, yoko awar kiamiu pupia nalaena ma e peni.

²⁴ Ana kam la naña ape nasur moki manenea, yoko viowa manene laa van amiu, komin naña aãar kiamiu nalogewoena a kiamiu nakekarena lala e kiamiu malena wo la na yomarava nini rui.

²⁵ A kam la naña mĩeãemiu pulemamaga ruru pa sike rui, yoko viowa van amiu vañisi, komin naña yoko viso kar amiu manene va laa sane.

A kam naña apitale ke nanagane rui, yoko viowa van amiu vañisi, komin ñisi na aloge viowa, atagi.

²⁶ “A monar avisuar ruru amiu pogos naña yar la asumña amieluar ke kiamiu kia. Visae ve sanene, pe pon re amiu mēna asitom ke asape amiu na apo, komin naña navisawalena navisokanena la nanua sumo, kieta yermarua la amiyeluar kiela kia la sanene, ana Ntewa pisu la sane la apiowa ga ana mla nakoena pan la.”

Yesu pisayu sinesien manene nasinekar lala

Matiu 5:38-48, 7:1-5

²⁷ Ana Yesu pisape “Kam la naña amloge kilale ke kiau visena nene, in na nevisa van amiu, nevisave: Monar sineta si kieta nasinekar lala, a monar tekila wo van la naña pe asitom ita re poli,

²⁸ a monar tevisa ruru la naña apiuelin ita, a monar telenwo la naña akila kare ita.

²⁹ Visae yar tai lipa pipimña lepas tai, ko monar ovilopu mēna pipimña lepas ñasia vana vena lipa, a visae yar tai māraran van ko vena war monña kulsaket, yoko monar okekarana ga war mēna monña kulsota.

³⁰ Visae yar tai viun kionña sur tai, monar ola vana, a visae yar tai lalua kionña suri tai, yoko ve ova oviun re si tania vena lamaran si van ko.

³¹ Ñelaga ya naña sinomñan vena yar la akila van ko, ñelaga ne nanene yoko monar okila van la.

³² “Visae tesumña sineta si ga yaru la naña asitom ita, nanene na pe sur re tai nene po laa wa, komin yar nakilaen mlamulena viowa lala asitom ke la naña asitom la rui.

³³ Pona visae tekila ga wo van la naña akila ke po pan ita rui, naga mēna pe sur re tai nene poli, komin yar nakilaen mlamulena lala, la mēna akila ke sanene rui.

³⁴ Pona visae tetamñan ga kilavaru va la naña akilia alamaran sina, naga mēna ga pe pe sur re tai nene po laa wa,

komin yaru nakilaen mlamulena la akila ke yumñena nene silaga.

³⁵ “Ana in na nevisa van amiu, nevisave: Sineña si kionña nasinekar, a okila wo vana, a otamñan ga kionña kilavaru sa ga ne, naña ve ositom manene re van naña omla pania, ovisave pona kilia lamaran si pogos tai, pona tañatete si lamarana. Visae osumña okila ke sanene, osumña okus ke ñelaga kiena ne Arimata Yaru na Meta ne, a naga yoko la nalaena tai van ko ve keviu laa sane, komin naña naga yar sur naña sinen po pan la naña pe apisa re potena pan poli, pona la naña asitom la ke sina.

³⁶ Sanene, ko na monar sineña ye yar lala sa naña Arimata naga sinena miye la.”

Yesu pisayu naliñereen yar tañena

Matiu 7:1-5

³⁷ Ana Yesu pis ke pan la na wa, pisape “Yoko ve aliñere manene re yar tañena pona ala nakoena vana. Visae sanene, yoko Ntewa tañatete liñere manene amiu, tañatete la nakoena van amiu. Visae aviewo yar tañena, yoko Ntewa viewo amiu,

³⁸ a visae ala sur va yaru tañena, yoko Ntewa la sur imi van amiu. A yoko Ntewa laa van amiu ve keviu la sane taulu naña amlavia, yoko naga war ve moki vañisi, sa naña akokonia karo, atanaria, yoko amiyalar mēna ga, pano-o pulemamaga ruru nenaga, suri lañas kekapil pito ke tano. Lelaga pañisi, yokorena awar imi pun amiu maran ve taaga sa ke ga naña añarwar ke pan yar tañena.”

Monar avisuar ruru kiamiu malena

³⁹ Ana Yesu pis ke pan la na wa, pisa ñakaiwa tai pan la, pisape “?Sanape, visae kilamara ñala tai sumña ga, ana naga kilia sumon kilamara ñala tañena tai lalua ayalñel woga ga? !Peraga, yoko la ga luwoka aloru ato e ñiliñili tai ne!

⁴⁰ Nalogenaga naga pe pa manene re metavan yar naña pian ke naga poli, ana visae naga kilia ruru make sur la naña navianena piania, yoko naga imi maran ve taaga sa ke ga kiena navianena.

⁴¹ Pe pon re osuñña ovisavisa ke narin kororaki tai naña teke e kilamarana ne womla poli, ana pe opisus kilale re osape pupia purpes nen laki tai ñeke e kilamarama poli.

⁴² “?Sanape na osape ovisa va womla nene, ovisave ‘Wolai, yoko nowarlua kone kororaki na kilamarama wa’? Sanene ko na pe opisus kilale re kioña mlamulena viowa poli, a osuñña omliþere ke ga mlamulena viowa kien yar taþena lala. Okilia ña naña ko opiowa ga, ana osape okila sane yar la asape ko opo rui. Okus lua pupia miasin laki na ñeke e kilamarama sumo wa, þisi na okilia ovisuveve narin kinakinas nen kororaki naña teke e kilamaran yar taþena nene.”

Purlaki amio mrasa

Matiu 7:16-20, 12:33-35

⁴³ Ana Yesu pisa ñena ga, pisape “Purlaki naña po taþatete war mras naña piowa, a purlaki naña piowa taþatete war mras naña po.

⁴⁴ Ee, sanene narui, naña tevisu kilale purlaki, tesape sanape e ga e mrasnela. Mralaki la naña mam ruru po, pe toþar re e vilumini la naña pe nenos poli, peraga.

⁴⁵ Yaru naña po naga miyuwon ruru suri wo la sike e losinena, ana silaga kiena sitomena wo suña ga naña kilia visaplania, ana yaru viowa naga suña þarpolo ke suri viowa e losinena, ana naga visa plan ga sitomena viowa lala. Suri ya naña pule sike e los nen yaru pona e kiena sitomena, sur ne na nene narui yoko suña molmolue luen ga e gona.”

Yuñña lua

Matiu 7:24-27

⁴⁶ Ana Yesu pisape “?Komin ya ne apio in ke asape ‘Suþe o, Suþe o,’ ana siraunia pe asuñña amlogear re ya naña nepisa pan amiu nesape akila poli?

⁴⁷ Yar naña pimi pun inu, mloge kiau visena, naga monar logearia a monar kila. Yar naña kila sanene naga sa naña suniena tai pisayua, naña pisa sanini:

⁴⁸ Yar tai suña kila ke ñana yuñña, a yaru nene pe manmarua ruru po, kil þiliþili la pito manene tano vena tol yo

ñarera tano, ana maplar kemraþe lala e pulus la naþani. Ana pogos na pog ñarera, pupia womie lau, ana taþatete nena kila yuñña nene kulul, komin naña yar na kila, kila ruru ñarera po.

⁴⁹ Ana yar naña mloge kiau visen lala, ana pe mlogear re poli, naga sane yar taþena tai. Yar nena, naga ñena miyuññaen ñana yuñña tai, ana naga pe wowe ga, miyuññaen ñana yuñña sumal yau ga e porotano, kana kemraþe ne la pe pito manene re nena tano poli. Ana pogos naña pog ñarera, pupia womie mlau pitomi, kil lua yuñña naña, kilalua mloru, ana yuñña naña pororovia, piowa make nenaga.”

7

Yer kawa na mara nae Rom tai mlelaga ñarera e Yesu

Matiu 8:5-13

¹ Ana pogos naña Yesu pisa plan kiena navianena la naþani þisi, naga pa loyuñña e pulkumali nae Kapeneam.

² Ana e yo nene, nasumonen li na mara nae Rom tai sike ea, ana naga kiena yar wo na yuññaena tai naga mai paþisi, lavis ga kovio.

³ Ana pogos naña mloge yar la apisayu ke Yesu, asape pimi ke lavisin kiela yo rui, ana pio nasumonena kiena ne le Yu lala, pitetalia la apanon Yesu, vena aviun tania imi kila ruru namaiena nene.

⁴ Ana la naþani apim puna Yesu, apisayu namaiena naña pania, ana apiun manene tan sanini, asape “Nasumonen li na mara la nene, popon sa oimi oiila naga.

⁵ Lelaga naña sane naga pe ita re tai nene poli, naga pe yere Rom ga, ana naga pe yar tai naña sitom manene kieta þegas nen yeririna la paþisi, ana naga ñena miila imimi e yo nini keviu paþisi rui, naña miyuññaen kiamimi yuñña na leniena. Ana visae ko okekarania, oim ovisu kiena yaru nene naña mai paþisi.”

⁶ Ana Yesu tañania, ana pa amio la. La amial apano, ana pogos naña asike towe laa perinan yuñña ñana nasumonen li na mara nena wa, apisu yaru laþasa amiyal

ke apimi. La nene, erau kiena ne nasumonenena si lañasa, naña naga pitetalia la si apim puna Yesu, vena avisa kiena visena tai vania. Ana la apim apisawal pa Yesu, apisape “Yere Rom nañani mligan imimi mepim si puña, pisa sanini, pisape naga sumña kila kare ko pañisi. Naga pisape naga pisu sa naña naga pe yaru tai naña pe torokin re oim mñana loyumuña poli.

⁷ A sitomena nene kila naga pisu sane pe pon re mñena naga imi kate puña poli, komin naga pe pe yere Yu re sane ko poli, ana naga pisa ga pisape, visae ovisa ga visena tai, yoko kiena yaru nene loge wo woga ne.

⁸ Naga kilia sape monar ve sanene komin naga kilia sape kioña visena naga namareraena sike ea. Naga sape suri nene naga sane li na mara la naña asike vatanonia, naña la monar alogear kiena visena. Visae visa van tai, visave ‘Ovano,’ naga monar vano, pona visae visave ‘Oimi,’ naga monar imi, pona visae visave ‘Okila sanene,’ yoko naga monar kila. A naga mñena sape monar kila ya naña pupia yerkawa nasumonen li na mara la pisa pania. Naga sape naga sitom sanene narui, visae ovisa ga sur tai, ana monar ve sanene.”

⁹ Pogos naña Yesu mloge visena nene, naga milan sitomen kiena ne nasumonen li na mara la nene pañisi, a kekaran pañisi, ana pis pa ñina la naña asike amio e poglis nene, sape “Nevisa van amiu, nevisave pe nomal re nena yere Yu tai naña sumal mñarera se e in sane yar nene poli.”

¹⁰ Ana siraunia, la nene añasuñela si apa mñana nasumonen li na mara la nañani, ana la amilan naña apisu namaiena nene pimi po si rui.

Yesu kila si mñee kiena letano tai mal si petan marena

¹¹ Ana siraunia, pe yam piavi re poli, Yesu mial pa tol pulkumali tañena tai, kiena kia Naeni, a sa naña silaga, kiena nalogena lala amio yaru tañena la moki asuña ataveve ke naga.

¹² Ana pogos naña Yesu lala apim ke lavisin pupia mralaea na pulkumali nene,

apisu sane yar la amiyalvai apim, asuña akus ke yar mare tai pano vena ava asinia. Naga naña mare ne, naga mñee tai naña anena pe letano. Letano nene, naga pe ñar re si narina tai poli, naga ñar nena taaga ne nane mare narui.

¹³ Ana Yesu la asuña apisu ke la naña amial apim, ana pogos naña kieta Suñe pisu letano nene, naga sinen mie pano-o ñisa. Ana pa lavisinia, pisa pania, sape “E, tagen toko.”

¹⁴ Ana Yesu pimi lavisin marena nene, mligan limana tea, a la naña akus pa ke ne asuñalar la asu, pe amiyal re si poli. Ana naga pis pa yar mare nañani, pisape “E, nevisa van ko, osuñalu si na wa.”

¹⁵ Ana mñee nene suñalu, sumña pivis pan la, apikevike van sina, ana Yesu sumon naga pano, mligan si pa anena.

¹⁶ Ana pogos naña yar la apisu sur nene, sinela kurkur pañisi, a asuña amieluar Ntewa, asape “!Ake, suwala! Pupia navisawalena kiena ne Ntewa suñalu nena sike likan ita rui.” A lañas apisa mñena, asape “!Lelaga ña! Ntewa pimi katen kiena yeririna la rui.”

¹⁷ A suniena na suri nene, asuña apisalelein pano, pano-o tol lepas naña Yutea, amio yo tañena la naña asike lavisinia.

Yoane Nakeena pitetalia kiena nalogena lala apim pu Yesu

Matiu 11:2-19

¹⁸ Ana e pogos nene, Yoane Nakeena sike e yuñma nakoena rui, ana kiena nalogena la apim apisayu pania e sur la punu ga naña Yesu sumña kila.

¹⁹ Ana Yoane pis ga pan lala lua, pitetalia la apa puna kieta Suñe, vena ava aviun ruru tania, avisave naga Navisaarena naña asuñate ke ne, pona pe naga re poli.

²⁰ Ana la amial apim apisu Yesu, apiun sanini pania, asape “?Kiamimi yerkawa naña Yoane sinenan sape kilia sanape? ? Ko na yar sur naña apisa nanua sumo asape yoko yerkawa tai imi ve kieta nasumon itaena, pona pe ko re na nene poli wa, a monar mesuñate ke yar nene yoko imi na wa?”

21 Ana e nena e pogos naña apim apiun naviunena nene, Yesu sumã kila ruru ke maiena lala a sumã pile plan ke yermare petan yeririna lala, a sumã kila ke kilamara ðala lala, kilamarala la pimi po sina, ana nalogena kiena ne Yoane la apisu sur la nene.

22 Ana Yesu pisatamẽ la, pisape “Awasuþe amiu si ava puna Yoane, ana avisawal sur ya naña apisuia pona amloge e nini. Suri la nene asa ga naña navisawalena Aisea pisa pan amiu rui, naña sape:

‘Kilamaraþala lala, nanagane apisu si suri rui,
a laulu lala nanagane amial ruru si rui,
a yaru la naña aþar leperosi, nanagane tasnela la mekik ruru si rui,
a kiligapoþe lala, nanagane amloge si suri narui,
a yar mare lala, nanagane amal si rui,
a la naña limala korena, nepisawal Lologena Wo pan la rui.’

23 Ana ava avisawal mñena va Yoane, avisave ‘Yaru naña pe sinen peve lua re e inu pog tai poli, navisa ruruena sike e naga.’”

Yesu pisayu Yoane Nakeena

24 Ana pogos naña nalogena kiena Yoane la amolue sina vena awasuþe avano, Yesu pisayu Yoane nene pa yeririna la naña asike ne, sape “?Pogos naña apa þesan e yokorena nene, apanon asape avisu ya ne? !In na pe nesitom re nesape apanon ga avisu kana kiai ne la poli, naña sisilin kare ke ga sanene.

25 A in na pe nesitom re mñena nesape apa apisu yerikawa tai naña miyen mñana kulsota nowo la poli, po sike e malena naapo, komin yaru sur la ne sanene, la pe asusu re e yo viowa la ne sane yomema nene poli, ana la asike ga e yuñia naapo mñana þarin suþe keviu lala.

26 Peraga, ana in na nesitom nesape apanon apisu navisawalena tai, ne? Nanene naapo ne, ana nevisa van amiu, Yoane naña apanon apisuia, naga pa laa sane, naga taulu navisawalena nasumo lala,

27 komin naña Ntewa pisayu naga e kiena visena wa rui, sape
‘In na nemligan þesan kiau yaru na warena visena nene pitomi pun ko, vena kila ruru kiomã mrapa.’ *Mal 3:1*

28 “Lelaga nevisa van amiu, sane e yomarava nini Yoane Nakeena nene naga mon metavan make yar la punu ga. Ana la punu naña yoko aim e nasuþenena kiena ne Ntewa, vito tol kiela yar maro naña sike laa tano, la punu nene la asike metavan Yoane, naña yoko la awar navisa ruruena kiena ne Ntewa va laa sane taulu naga.”

29 Ana pogos naña apa amiyagolon Yoane Nakeena mlologo, naga pisawal mrapa kiena ne Ntewa vena la akilia avilopu la. Ana yar viowa la moki, pa tol mñena yaru na takis lala, apisu sane mrapa nene pe lelaga, ana apilon la, ana Yoane kee la e wii.

30 Ana yar taþena lala, sa naña Varasi lala amio navianen navisaluaena lala, la apilopu mñasila e mrapa naña Ntewa kila vena akilia avilon la ea, ana Yoane pe kee la re poli.

Yesu pis mñarera pa yeririna la e kiena pogosia

31 Ana Yesu pis mñarera pa yar na vilaveena lala e poglis nene, pisape “? Yoko nevisa visena ya naña kilia tol þelaga ken la na nagane, sane la ape yar ya?

32-34 E lepas punu ga naña Ntewa kila vena kilali wo van amiu, ana yepemiu mavin ga, apisa kare ga naga vanonia. Komin poglis naña Yoane pimi, naga sumã monsilun kinanena vena len, a naga mlon kuruta namunena, ana yaru la apisu sanene, asuñia apisayuia, asape ‘Yaru nene, yermare sike e naga.’

“Ana pogos naña inu Narina ne Yeririna nepim nesike na, nekinan ruru ga a nomun ruru ga, ana apisayu si inu þisa, apisape ‘Apisu ke ne, yaru nene naga kinan merorol paþisi wa, naga pe yar na mun maneneen mñena kuruta, a naga kiena erau lala, yar na warpoloen ga takis, a yar viowa ga lala.’

“Komin sur ne nanene nepisu yeririna na nagane lala asa ga ninis la naþa visae asumã akila kokan ke e yepesinas na kumali, yoko la aviovio kiela narin erau lala, avisave ‘!Ei, kam na apilon manene visena na! Visae mowe ke plaþe, ana pe sinemiun re wolen amio imimi poli, pona visae meyaun ke yauena na marena, ana pe sinemiun re atagipae amio imimi poli.’

³⁵ “Sur ne na nene, yeririna la yepela mavin mrapa lala kiena ne Ntewa, ana mras wo naþa molue e malena kiena yaru naþa taveve ke mrapa kiena ne Ntewa, kilologia sane mrapa ne nanene narui, naga pe mrapa na manmaruaena naþa lelaga.”

Sira tai mloge kemua piowa lelaga e kiena mlamulena viowa lala

³⁶ Ana Varasi tai, kiena kia Saemon, naga sape sinenan kila kinanena tai ve kana Yesu, ana Yesu pa mña, pa totano vena akinana.

³⁷ Ana e pulkumali nena, sira tai sike ea, naþa naga kila þelaga viowa la moki paþisi, ana naga mloge naþa Yesu pa kinan ke mña Varasi naþa Saemon ne. Ana sira naþa pisu kiena mlamulena viowa, mloge piowa manene laa, ana mloge sane monar imi visu Yesu, ana kus kiena piawi tanea tai na ponotaninu, kus pimi e yuþa naþani.

³⁸ Ana Yesu pelein ke sape kinana, ana sira nene pimi suþal su varaun lana, naþa wamarana mlau, kekapil pito ke e lana ne Yesu. Wamarana kee ke lana sanene, ana tar viluna la naþa piayavi ne, suþa miyumuvan ke lana Yesu, a naga pelan pipina komþasa te lana ne Yesu, a yokorena taron ponotaninu naþani ea.

³⁹ Ana Varasi naþa þere Yesu pimi mña, naga pisu ke sur nene, ana sitom piowa towe ga ea. Naga sitom ke sanini, sape “Visae Yesu nene naga pe navisawalena tai naþa lelaga, pona vera na kilia ruru yo rui sane sira nene naga pe sira na mlamulena viowa na sanene, ana yoko ve taþan re tol lana wa nene. Ana naga taþan kila sanene, in na nemninue kare narui.”

⁴⁰ Ana Yesu na kilia mña kiena sitomena nene, ana pisatamea, sape “Saemon, in na nesape nevisa visena tai van ko sumo wa.”

Ana taþania sape “Pogaga, Navianena. Okilia ovisa.”

⁴¹ Ana Yesu pisatame sanini pania, sape “Yerkawa tai, ana yar lua akila lapui pania. Llua nene, tai na kiena lapui keviu, komþasa naga kiena lapui keviu manene laa paþisi.

⁴² Ana pogos na ulmaranen lapui la nene, la ga luwoka apulmaran þele ga, ana yerkawa naþani sinen mie la, ana piwo make kiela lapui la nene pan la. ? Ana komin sur ne nanene, lua nene ane sitom manene yerkawa nene?”

⁴³ Ana Saemon pisatame Yesu, pisape “Nemninue ga, pona naþa kiena lapui keviu manenea naga monar sitom va laa sane yo.”

⁴⁴ Ana Yesu pisape “Ee, sa ke nene narui.” Ana Yesu þarpuia kilologia sira naþani pa Saemon, sape “Saemon, pogos naþa nepim moþa, pe noþal re yar tai þar wii pimi pan inu poli vena nekevan kororak na mrapplepa e lau, sane e kieta þelaga na, monar okila. Ana opisu ke sira nini, naga ke naþa kevan lau e wamarana narui, a miyumuvan si mema e viluna.

⁴⁵ In na nepim moþa loyuma, ko na pe otalopan ruru in re poli, sane nepe kioþa erau wo tai, ana siar e pogos naþa nepim loyuma, naga mligan pipina lepas þasia te lau silaga.

⁴⁶ Ko na pe oþar re ponotaninu pimi otaron pito e þaruu po, ana naga kila e lau rui.

⁴⁷ Ana nevisa ruru van ko, nevisave sira nene, kiena mlamulena viowa moki paþisi, ana nepiewo make ga rui, kila narui naga sinena sii inu keviu paþisi. Ana nepisu yaru naþa kiena mlamulena viowa pe keviu re poli, nepiewoia, ana naga pe sinen sii manene inu re poli.”

⁴⁸ Ana Yesu pisa ruru mña pa sira naþani, pisa pania, sape “Kioþa mlamulena viowa la naþa ositom þele ke ne, nepiewo make rui.”

⁴⁹ Ana pogos naþa Yesu sumña pisa ke visena nene, yaru taþena la naþa akinan ke amio la e pogos nene pe akekara re nena poli, asuñña apragogo pan la, apisa ke asape “?Ana yaru nene sinenan sape naga ve ai, naþa naga pisa ke sape naga þar plan ke mlamulena viowa kien yar la sanene?”

⁵⁰ Ana Yesu pisa si pa sira nene yam tai, pisape “Kiomña naviawaena kila otol natamaliaena rui. Ve ologe re si viowa, okilia ova narui, a sumñare kiena ne Ntewa sike amio ko.”

8

Sira la moki naþa ataveve Yesu

¹ Ana pe yam piavi re poli, Yesu mial sina pano, pa kome pulkumali lala, la naþa ve torokak amio la naþa kerkeviu, a e yo punu ga naga sumña mlologo, a sumña mla lologena wo nasuþenena kiena ne Ntewa pimi pa yeririna lala. Ana sane silaga, kiena nalualima taaga pa lua la mña asike amio e pogos nene,

² a sira la moki li mña naþa la asuñña atavevela. E sira la nene, laþasia naþa Yesu taþa ruru la petan ninuna viowa lala a e inanena viowa la naþa se e la, sa naþa Maria nae Maktala, naþa sumo yermare la olua ase e naga,

³ amio Soana, naþa naga wona ne yar naþa Kusa, naþa naga pe yerkawa na kilaen yuññaena kiena ne Parin Suþe Erot, a amio mña Susana nene. A la moki manene ke sina ga, naþa la asuñña amiila Yesu lala keviu paþisi, a la asuñña apisuar la e nalaena la naþa asuñña aþar ke pan la.

Pakaiwa na kurus nen viluñini naþa kekapil e porotano na pe taþena vari

Matiu 13:1-9; Mak 4:1-9

⁴ Ana e pogos tai, pupia þina na yeririna lala la moki amolue e kiela pulkumali la peve taaga, ana la apimi amiervivi Yesu piora, ana naga pis pan la, kuan þakaiwa tai pan la.

⁵ Naga pisa sanini, sape “Yar tai sape va veven kurusia e kana lokove. Pogos naþa peven kurusia, sumña sisilinia, ana kurus

laþasia amloloru e mrapplepa, a siraunia, yar la apim amiyaloro ea, apie kare ga, a manu mña lala apimi ate plan make ga.

⁶ A kurus laþasia amloloru e yo naþa kilavaru sike ea, pitotovi pavini, ana yoko miaiai ga, komin naþa pe wii re e yo nene poli.

⁷ A kurus laþasia mloloru e yo naþa sumo na pe ate plan ruru re kilika viowa e poli, ana yoko siraunia kilika viowa nene kapur ke sina ga pimi keviu, kewo make kurus la naþa pitotovi ne-e amarmare.

⁸ A kurus taþena ne laþasia amloloru e porotano naapo tai, ana la apitotovi akapur mña pano-o, la aþar mrasnela la moki, tol ponotia taaga.”

Ana pogos naþa Yesu pisa visena la nene þisi, naga pion manene pan la, sape “Yar naþa kiligana teke ea, monar yagogon ruru visena nene.”

*?Komin ya ne Yesu pis e þakaiwa lala?
Matiu 13:10-23; Mak 4:10-20*

⁹ Ana siraunia, nalogena lala apim puna Yesu apiun kinas nen þakaiwa nene tania.

¹⁰ Ana naga pisatañe la, pisape “Ntewa kila sanene sape vena akilia alual nakilia wanena na kiena nasuþenena.

‘Ana e yar taþena lala, nakilia wanena la nene la atapolou asike e þakaiwa na wa, ana la asuñña apisu pano-o, pe apisu kilale re poli,

a la asuñña amiyagogo pano-o, pe amloge kilale re nena poli.’ ” Ais 6:9

Yesu pisavan kinas nen þakaiwa na kurus nen viluñini

¹¹ Ana Yesu pisavan ruru ga þakaiwa nene pan la na wa. Naga pisapenua “Pogaga, kinas nen þakaiwa nene naga sanini. Sur nasumo, naga kurusa, a naga na sane visena kiena ne Ntewa.

¹² A kurus la naþa akekapil mrapplepa, naga na sa naþa yar la ne amloge visena nene, ana kurus nowo lala mloloru pitomi e kiela sitomena lala. Ana Parin Yermare nene pimi þar plan ke sina ga visena la nene petan sinela lala, vena kila sane ve alelaga re sina, ve atol re si natamaliaena.

13 “Taþena, naga kurus la naþa asike e yo naþa pe kilavaru, a na nene sane yar la naþa amloge lologena wo nene, amlavia, akekarania, ana sa naþa þeligas nela pe po re poli. La asumã amlelaga yam plas ga, a visae atol pog m̃arera, pona nakilaliena imi, yokorena la aloloru ke sina ga.

14 “Taþena m̃ena ga, naga na kurus la naþa asike e lelen kilika viowa lala, a na nene sa naþa yar la amloge, ana pogos naþa la amial ke apa sane, ana asitom manene laa kiela malena lala, a sinelan manene m̃ena kilavaru, a akekaran manene m̃ena kekarena na yomarava la nini paþisi. Pelaga la nene apimi sane kilika viowa tai naþa piwo la, ana taþatete nena kiela malena war mras naþa marua ruruia.

15 “Ana na maro, naga kurus la naþa sike e porotano naapo, nanene naga sa naþa yar la amiyagogo ruru e Lologena Wo nene, ana amligan ruru sike e losinela lala, atarar ruru m̃arera, naþa ape lelaga kemua. Yeririna wo la ne sanene, la akila kiela sitomena la viayavi, ayumãe ruru m̃a vano-o awar mras nen Lologena Wo nene e kiela malena lala.”

Pakaiwa na kapi vivaga

Mak 4:21-25

16 A Yesu pisa m̃ena ga, pisapenua “Ita yeririna lala, visae towar kap vivaga imi, yokorena ve yar tai warwan re m̃eke vatanon karo tai pona sur tai sanene. Peraga, tetelan ga m̃eke metava vena kila yar la naþa aim loyumã la avisu naþa yo merarava ruru neña ga.

17 Pogaga, ana nasuþenena kiena ne Ntewa naga sane kap vivaga nene, naþa nanagane sumã m̃alm̃alivin ita vena tegoli make suri punu ga. Suri punu ga naþa tapolou sike ga wa, a nakilia wanena punu ga, yokorena la monar amolue e yepesinasa vena yar la akilia avisu kilalea.

18 Kam na monar ayagogon ruru kiau visena lala, a akilali naþa asitom ruru la. Yar naþa kiena suri moki rui, yokorena naga war va ve mok manene vaþisi. Ana

yar naþa limana plasan suri lala, yokorena naga kilalu kiena narin sur nene naþa naga sitom ke sape pe kiena pa rui.”

Anenane Yesu amio wenla lala, apim asape aurelua naga

Matiu 12:46-50; Mak 3:31-35

19 Ana anenane Yesu amio wenla lala apim aporun naga e pogos nene, ana la akila þele yon naþa ava atol naga loyumã, komin naþa þina la moki, kila yo ve tokak ga.

20 Ana yar la amla lelein ga visena pimi tol Yesu, asape “!Ei, anomã amio womla lala asumãlu asike vanua, sinelan asape avisu ko sumo wa!”

21 Ana Yesu pisatamea, sape “Naga naþa pe aneu, pona pe wolai, nanene na la ga naþa amloge visena wa kiena ne Ntewa, a la asumã akila ke sa naþa visena nene pisa.”

Pupia lagi naþa Yesu pialuþaria

Matiu 8:23-27; Mak 4:35-41

22 Ana e legiena tai, Yesu þere nalogena lala, la apa amiyai e waa tai, ana Yesu pisa pan la, sape “Ita, yoko teva e lepas nen lapa nene lepas þasia.” Ana la amligan yo, asumã apano,

23 ana pogos naþa waa kiriri ke pa narui, Yesu maran kawa pano-o momalio. Ana siraunia, pupia lagi tai miyui, miyu lapa naþani, ana pupia sive lala akilapela pano-o sive pule e pulu waa, apisu sane piowa ga narui.

24 Ana apito apioþege Yesu, apisa pania, asape “!Suþe, Suþe, lavis ke tetalilu narui!”

Ana Yesu sumãlu, pialuþar lagi amio sive m̃arera la nene, ana sur la nene apito tano, yo m̃ano ruru nenaga.

25 Ana Yesu pisa pan la, sape “?Awa kiamiu naviawaena?”

Ana amarau pano-o, amilan manene paþisi, ana asumã apiuviun ke sina tan la, asape “?Aulai, yaru ya nene? Naga pis ga sanene ana lagi amio sive, lalua amlogearia. !Suwala!”

Yesu pile plan yermare moki petan yere Karasa tai

Matiu 8:28-34; Mak 5:1-20

²⁶ Ana Yesu la apa atol lepas p̄asa, e naṗa Kalele kira ke pa ea, nanene mesmesun e yo naṗa Karasa.

²⁷ Ana pogos naṗa Yesu pa ura e yo nene, yar nae e yo nene tai pitomi pitawea, naṗa yar nene yermare la asike ea. Nakonua rui, yar nene pesinas ga, pe miyen re sur tai poli, a naga pe mon re e yuṁa poli, naga kekarana ga naṗa monmon ga e lotap lala, e puluve la naṗa amligan ke kiela tas nen yar mare la aṁemeke ea.

²⁸⁻²⁹ Ana yermare la nene akila kare yar nene yam moki rui, kila sane yar la akirakiravanli naga silaga, a apiar e kilipan, a apiar lana amio limana e kilika panon laki, ana naga suṁa kilaroro ga, a yermare la nene aṁenelua naga pa meke e yokorena nene.

Ana Yesu pisuia, pis pa ninuna viowa, pilelua sape ligana yaru nene. Ana yar nene pisa Yesu, pio naga, a mloru e lana, ana ninuna naṗa sike ea pis m̄arera, sape “?Ana Yesu, ko narina ne Ntewa na Mava, kioṁa ya na teke e inu? !Nepiun m̄areran pan ko, nesape ve ola re nakoena van inu!”

³⁰ Ana Yesu piun tania, sape “?Ana kioṁa kia ai?”

Ana ninuna viowa nene pisatamea, sape “Kiau kia ‘Yermare lala na kilaen mara.’ ” Naga pisa sanene komin naṗa yermare la naṗa apa e losinena la mok liu.

³¹ A ninuna viowa la nene asuṁa apiuviun m̄areran ke sina ga pa Yesu vena naga ve vile plan la re, naga ve kila la re ava aloru ato tano e pupia pulukapi.

³² Ana yepas nen kunus na yo nene, pupia p̄egas nen nompui lala asuṁa akolkol ke porotano, ana yermare la nene atagi pa Yesu, apiun m̄areran tania asape naga ligana la ga ava e nompui la nene. Ana Yesu taṁan pan la,

³³ ana la amolue petan yar nene, apa e los nen nompui lala. Ana nompui la nene aplamolue yam veraga akiriri apito

e yeparpas tai, ana apiovion la apito e pupia lapa nene, atalil make e sive.

³⁴ Ana yar na visuaren nompui lala apisu sur nene, la aṗure apa uṁa, apisawal sur nene, ana apisa make m̄ena ga e yo la punu ga,

³⁵ kila sane yar la moki sinelan asape aimi avisuia. A pogos naṗa la apimi, apisu Yesu suṁa ga, a yar naṗa ninuna viowa la aṗure petan rui naga totano teke e lana ne Yesu. Nanagane, naga miyen ruru m̄ana kulmrae wo la rui, a pimi moṁau ruru nenaga, pe sirag re si poli. Pogos naṗa la apisu yaru nene pimi po si sanene narui, ana amarau.

³⁶ A la naṗa asuṗesania apisu suri punu ga, asunyu pa la naṗa apim mare ga na wa, apisa meraravan pan la sanape naṗa yaru nene naṗa yermare la asuṗesan ea, ana Yesu kila naga pimi po si rui.

³⁷ Ana yeririna lala na lepas nae Karasa, la apisu sane piowa ga, ana la asuṁa aṁareran pa Yesu asape la sinelan naga molue si vetan la, komin naṗa sur nene kila amarau paṗisi. Ana Yesu la apitovin si vena aiai e kiela waa, vena awasuṗela sina.

³⁸ Ana pogos naṗa la asuṁa apito ke narui, yar naṗani pitomi piun m̄areran tan Yesu sape naga sinenan sape va su lue amio naga, ana Yesu pisaluṗaria, pisa pania, sape

³⁹ “Peraga, komin naṗa popon manene ko owasuṗe ko ga ova si uṁa, a ova osunyu van yar lala, ovisa van la sanape naṗa Ntewa kila po naṗa po manene pan ko sanene.”

Ana yar nene p̄asuṗe sina, a naga suṁa pa miyervivi yo punu ga nae lepas na kiena pupia pulkumali, a pisawal yuṁaena wo naṗa Yesu kila pania.

Nin sira kiena Saeras, amio sira naṗa tol kulsota m̄ana Yesu

Matiu 9:18-26; Mak 5:21-43

⁴⁰ Ana Yesu lala akusro lapa nene apa ke sina lepas p̄asia, a pupia p̄ina na yeririna lala asuṁate ke naga, ana la akekarana naṗa apisu pa m̄alivin la sina.

⁴¹ Ana yerkawa na kiela yuṁa na lotena nae e yo nene, kiena kia Saeras, naga pimi

lavisin Yesu. Ana kinai tanonia, tag pania, piun tania sape imi m̃ana,

⁴² vena visu nin narina naṓa sira, naga minana paṓisi. Nin sira nene, naṓa yerkawa nene naga narina taaga nena nene, a kiena kas pe sur sane lualima taaga pa lua ga [12], ana kiena inanena pimi keviu manene laa narui, kila narui apisu sane lavis ke mare ne. Ana Yesu suṓalu, amio yar nene apano.

Ana pogos naṓa naga pa ke sanene narui, pulen yeririna na pupia ṓina la nene asuṓa atavevea, asuṓa amiigin la piora e Yesu.

⁴³ Ana lala tai, naga sira tai, naṓa maiena kien sira lala teke e naga e legiena punu ga, tol kas lualima taaga pa lua [12] rui, ana pe yar re nena tai naṓa kilia kila ruru kiena maiena nene poli.

⁴⁴ Ana sira nene, naga mialvan ga yaru la lika, pimi pimi lavisin m̃asina ne Yesu, kian limana sane, tol ga m̃ana isinen kulkota. Tol ga kulkota m̃ana Yesu sane, ana e ke e pogos ga nene, kiena maiena naṓani ṓisi nena ga.

⁴⁵ Ana Yesu piun ke ga, pisape “?Ane tolmare in ga na wa?”

Ana la apisapenua “Pe yar tai tol ko re poli,” ana Pita m̃ena ga pisa pania, sape “? Ana Suṓe, sanape? Yaru la apule manene laa asuṓa amiigin la kar ga miyervivi ko pivi, asuṓa apavan e ko.”

⁴⁶ Ana Yesu pisa pania, sape “Peraga, yaru tai tol inu nena naṓa, komin naṓa in na nemninukilale sane kiau nam̃areraena komṓas pa vanua e inu pa e yaru nene ṓisi rui.”

⁴⁷ Ana sira nene pisu sane naga taṓatete si tapolou narui, ana pimi puna ne Yesu, marau paṓisi, sinen kurkur m̃ena ga. Naga pimi mloru e lana Yesu, ana e marana ne yeririna la naṓa asike ne, naga pisawal make sur la e naga pania, sa naṓa komin ya ne naga pimi tolia, a sanape naṓa pimi po si rui e pogos nene.

⁴⁸ Ana Yesu pisa pania, sape “Auya, kiom̃a naviawaena e inu kila ko opo si rui. Suṓare kiena ne Ntewa sike amio ko, owasuṓe ko sina ova uṓa.”

⁴⁹ Ana pogos naṓa Yesu suṓa pivis ke amio sira nene wa, visena pimi pa yerkawa nene, sape “Nin narum̃a nene kovio rui. Popon ve oure re si pupia navianena nene imi, vena ve okila kare korenan re naga.”

⁵⁰ Ana Yesu m̃ena mloge m̃a visena nene, ana pisa pa Saeras, pisape “Ve ositom re suria, owasine ga Ntewa m̃arera, a yokorena nin narum̃a sira nene imi wo si ne.”

⁵¹ Ana Yesu pa amio yar nene apa m̃ana, a pogos naṓa apim atol yo nene, naga pialuṓar laṓasa sape yoko ve ava re loyumuṓa amio naga, ana naga ṓere ga Pita, amio Yoane, a Semes, a arimanane nin sira nene amio anena, ana apa loyumuṓa.

⁵² Pogos naṓa apa loyumuṓa apisu naṓa yar la asuṓa sinela miye ke nin sira naṓa rui, asuṓa ataginia, ana Yesu pisa pan la, sape “Ve atagin re nin sira nene sanene. Naga pe mare re nene poli, naga momalio ke ga ne.”

⁵³ Ana la apitalia kare ga naga, komin naṓa la akilia asape nin sira nene marṓantop nena rui.

⁵⁴ Ana Yesu pa tarar limana ne nin sira naṓani, pisa pania, sape “Nin naruu, osuṓal li sumo wa.”

⁵⁵ Ana e ke ga e pogos nene, apisu naṓa nin sira nene, kiena malena ṓasuṓe sina pimi e naga, ana suṓalu, suṓa miyaloro, ana Yesu pisape popon ala narin kinanen tai vania.

⁵⁶ Ana arimana amio anena, amilan paṓisi naṓa kiela sitomena la kovio nena ga, ana Yesu pisa pan la sape yoko ve avisawal re sur nene va yar taṓena lala.

9

Yesu pitetalia kiena nalogena la peve lua

Matiu 10:5-15; Mak 6:7-13

¹ Ana Yesu pio viraviran kiena lualima taaga pa lua [12], ana pis ruru pan la, naga mla m̃areraena pan la, tam̃an la vena akilia ataulu yermare lala, a vena akilia akila ruru maiena lala.

² Naga kila sanene vena vitetalia la avanon alologon navesuṓenena kiena ne Ntewa, a vena akila ruru namaiena lala.

³ A visen wo laḡas naḡa pisa pan la sumon naḡa apano, sanini, naḡa sape “E lepas na kiamiu mrapa, yokorena ve awarar re sur tai. Ve awar re kiamiu plasgai, pona kiamiu karo, pona kinanena, pona kilavaru, a ve awar re m̄mamiu kulsota ve lua, yokorena ayen ga m̄mamiu kulsota ve taaga ga naḡa amiyenar ke ne.

⁴ “A uḡa ya naḡa visae aure amiu ava ase ea, ḡisi na monar akekaran naḡa asu amio mratava na uḡa nene, yokorena aligan ga uḡa nene pogos naḡa amolue si vetan pulkumali nene.

⁵ A e pulkumali ya naḡa visae la yepel mavin were amiuena ava e m̄ala yuḡa lala, ḡisi na aligan ga kiela yo nene, a pogos naḡa amolue vetania, monar atan plan puluyavi na mrapa na yo nene vetan lamiu, sane kile tai pona kiamiu visena m̄arera tai van la, sape yoko awar nakoena tai naḡa torokin ga kiela ḡelaga viowa nene.”

⁶ Ana nalogenala lala amolue apa narui, a asuḡa aḡaro ke e pulkumali lala, asuḡa amlologon ke lologena wo, a asuḡa akila ruru ke maiena lala.

*Parin Suḡe Erot Antipas pisayu Yesu
Matiu 14:1-2; Mak 6:14-16*

⁷ Ana e pogos nene, ḡarin Suḡe Erot m̄ena ga mloge towe m̄a ya naḡa Yesu la asuḡa akila ke ne, ana naga sitom manene paḡisi, komin naḡa yar laḡas asuḡa apisayu Yesu, asape naga Yoane Nakeena, naga mali si petan marena,

⁸ ana taḡena laḡas asape naga yer-marua Elaisa nanua, nane m̄alivi si ne, a taḡena laḡas asape naga pe navisawalena la tai nanua sumo sumo manene laa, naḡa suḡalu si petan marena.

⁹ Ana ḡarin Suḡe Erot pisape “Pe Yoane Nakeena re nene poli, komin nesilua ḡarina rui, ana yar na apisayu ke ne, naga a si nene?” Ana sitomena nene kila naga sinenan visuen Yesu paḡisi.

Nalogenala la apa amlologo, ana aḡasuḡe la sina

Matiu 14:13-21; Mak 6:30-44; Yoane 6:1-15

¹⁰ Ana nalogenala la naḡa Yesu pitetalia la sape ava alologo, aḡasuḡe sina, ana apisawal sur punu ga naḡa amiyuḡaenia pa Yesu. Ana Yesu ḡere la amolue petan yar lala, amiyepe la ve tokak ga apa e pulkumali tai, kiena kia Petsaeta.

¹¹ Ana siraunia, yar la amloge asape apa ke e yo nene, ana la m̄ena ga asirau apano, apa m̄ena e yo nene. Ana Yesu kekara ga, naga sun towe amio la, a siraunia pian la e lepas navesuḡenena kiena ne Ntewa, a kila ruru yar la naḡa sinelan ke asape popon yar tai iila la.

*Yesu pagan yeririna la manu lima
[5000]*

¹² Ana Yesu suḡa amio la pano pano-o, apisu naḡa mrae pito ke tano narui, ana kiena lualima taaga pa lua nene apim puna, apisape “Ei, Suḡe, popon oligan ḡina la nene awasuḡela ava m̄ala uḡa lala pona avakar ga e pulkumali la ne sike ne, vena akilia aul kala kinanena laḡasia, a vena akilia alual m̄ala lele na monoena, komin e yo na tesike e ne pe pon re yemalo wo ita e poli.”

¹³ Ana Yesu pisa pan la, pisape “E, peraga. Popon kam ga awar kinanen laḡas van la.”

Ana la apisatam̄ea, apisape “!Kei! Imimi memla ke ga narin kilaparavi lima, amio narin ika lua. ?Ana visae peraga, pona ko sinoḡan ke osape yoko imimi ke narui meva moul kinanena torokin pupia ḡina la nene?”

¹⁴ La apisa sanene komin yeririna la naḡa asike ne la moki manene laa, ana yerm̄ene ga lala pa tol sur sane manu lima [5000].

Ana Yesu pisa pan la, sape “Ava avisa va yeririna lala avisave atotano ke ne wa, atotano e ḡegas lala, naḡa yar la lualima ve lima [50] e ḡegas tai.”

¹⁵ Ana apa akila sa naḡa naga pisa, a yeririna lala atotano e ḡegas lala.

¹⁶ Ana Yesu mla kilaparavi lima nene amio narin ika lua naḡani, kirava pa ma e peni, pisa potenania ana kawewowa, kian

pa nalologena lala vena alalein akian va ðegas la nene.

¹⁷ Ana akan panpano-o mēþela kawa ruru nena ga, a kororos nen kinanena naþa akanligania, akon pa e karo popos lala tol lualima taaga pa lua [12].

Pita pisawal pisape Yesu naga Navisaarena kemua lelaga

Matiu 16:13-28; Mak 8:27-31

¹⁸ Ana pogos tai, Yesu sumã mlen ke naga taaga, a kiena nalogena lala asuñã ga lavisinia, ana naga piun tan la, sape “?Asumã amloge yar la apisavisa inu asape in na ai?”

¹⁹ Ana apisa pania, asape “Laþas asape ko Yoane Nakeena, a laþas asape ko Navisawalena Elaisa, a laþas asape ko navisawalena taþena lala tai nanua sumo sumo nane naga mali si petan marena ne.”

²⁰ Ana naga piun tan la, pisape “?A sanapen amiu, kam asape in na ai?”

Ana Pita pisatamea, pisape “Ko Navisaarena kiena ne Ntewa nene.”

Yesu pisawal kiena marena

²¹ Ana Yesu pis m̃arera, pisaar nena pan la, pisape yokorena ve avisawal re sur nene va yar lala,

²² ana pisa ruru pan la pisape yoko ve sanapen naga. Naga pisape “Inu na nepe Narina ne Yeririna, a yoko nasumonena kiena ne le Israel lala, amio yerkawa kiena ne yar wa lala, amio navianen navisaluaen lala, yoko akoven lua inu, þisi na monar akila sur ve moki na kila kare inuena. Yoko monar awem̃ar inu nemare, ana e kana legiena na telu, yoko Ntewa visirlua inu nemal sina.”

Nalogena kiena Yesu naga monar sitom korenan ga kiena nasinenanena lala

²³ Ana e pogos nene, Yesu pis pan la, pisape “Yar naþa sinenan sape taveve inu, naga monar sitom korenan ga kiena nasinenanena lala, naga monar kus kiena laki torovia e legien punu ga, sa naþa yoko inu nekus kiau, ana taveve inu luen ga.

²⁴ Nepisa sanene komin yar naþa sinenan sape ve puluvisin kiena malena, yoko kilalu kiena malena. Ana yar naþa tañan kiena malena vanon inu, yoko naga taulu si kiena malena.

²⁵ Visae yar tai tol make sur wo na yomarava nini lala, ana kila pal mrapa a kilalu kiena malena, naga pe taulu re nena sur wo tai poli.

²⁶ Yar naþa mawa e marana yar taþena lala vanon inu pona vanon kiau visena, yoko inu Narin Yeririna m̃ena nemawan yar nene e marana Ntewa e pogos naþa nowasuþe sina, naþa yoko nevitom nemio pupia naurarena naþa pe kiau, a pe kiena ne Ata, a naþa pe kiena ne m̃ena navisi wa lala.

²⁷ Lelaga nevisa van amiu, yar laþas asuñal asike e nini, naþa taþatete amare na wa, vano-o tol pogos naþa avisu Navesuþenena kiena ne Ntewa imi m̃alivi.”

Tasnena ne Yesu pimi pe taþena

Matiu 17:1-8; Mak 9:2-8

²⁸ Siraun pogos naþa Yesu pisa visena la nene, pe sur sane legiena olua þaro ga na wa, ana naga þere Pita, amio Yoane, a Semes, la vari apa metava e ravie tai, komin sape len.

²⁹ Ana apam atol yo nene, a pogos naþa sumã mlen, nalogena la telu nene apisu naþa marana pimi pe taþena, a apisu naþa m̃ana kulsota pilavila paþisi, a miyuwowo naþa miyuwowo manene laa.

³⁰⁻³¹ Ana siraunia, yermarua lalua nene Elaisa amio Mosis, lalua añalivi amio pupia naurarena nae ma e peni, ana lalua asun ke amio naga, naþa asuñã apisayu ke sanape naþa yoko naga monar va garu Yerusalem, a monar mare vetan yomarava nini, sa naþa Ntewa pisaaria þa rui.

³² Ana sumo, la telu Pita, Yoane a Semes nene asuñã amloge marala kawa paþisi pano-o amomalio, ana pogos naþa atavilo sina, la amilan sur la naþani, naþa apisu pupia naurarena kiena ne Yesu, a apisu lalua naþa asuñal asike amio naga.

³³ Ana apisu naña lalua nene asape aligan si yo vena awasuþela, ana Pita sinenan sape visi, ana naga mninue mña visa ya ne, ana naga pisolawe ga visen kar tai pa Yesu, pisape “Suþe, popon naña ita tesuña e nini. Popon teyumaen silparpara ve telu e yo nini, momña tai, mña Mosis tai, a mña Elaisa tai.”

³⁴ Ana pogos naña naga suña pisa ke visena nene, lul tai pitomi kalo la, ana pogos naña la apisu sane apa ke loyuma e lul nene narui, amarau paþisi.

³⁵ Ana amloge visena tai molue e lul nañani, pisape “Nanene na naruu ne, naña nepisirlua naga rui. Naga ke narui monar alogear ruru naga.”

³⁶ Ana pogos naña visena nene þisi, lul nene kovio sina, apisu naña Yesu naga taaga sike si amio la. Ana siraun nene, nalogena la nene apa ruru la, asuña ga sa ga ne, pe apa apisayu re sur nene pa yar taþena la poli.

*Yesu pilelua yermare petan mee tai
Matiu 17:14-21; Mak 9:14-29*

³⁷ Ana e kana legiena na siraunia, Yesu amio la telu nañani aþasuþela si apitom tano, ana pupia þina na yeririna la asuñate ke naga, sinelan asape avisuia.

³⁸ Ana pogos naña apim amalivin la, lala yaru tai pion manene pa Yesu, pisape “Navianena, nepisa awis pan ko, ovisuli naruu na yermene nini, komin naña naruu wawa taaga nena nini.

³⁹ Ninuna viowa tai ne suña pimi ke e naga sanene, kila naga mlakai manene paþisi, ana miokamarmare tasnena mñarera pano-o wasirina la mlalau. Sur nene suña kila ke naga pa piowa laa, kila kare naga paþisi, a suña kila luen ga, pe mliganli re naga pa ruru pogos tai poli.

⁴⁰ In na nopure naga pa puna ne kioma nalogena lala, nepisa awis pan la vena amñenelua ninuna viowa nene, ana la akilalia, amiyumaen pano-o, akila þele yonia.”

⁴¹ Ana Yesu pisatamea, pisa pan la, pisape “?Kam la nene, sanape na sanene? Pe asuñal re nena ase Ntewa poli. ?

Monar nesuña nemio kam wowe lala tol pogwai? In na sineu maren amiu rui. Ko, pogaga, oure naruma nene imi.”

⁴² Ana apa aþure pimi, a pogos naña apim ga sane, ninuna viowa nañani kilapel ke sina ninis nañani, kila tasnena miyuyuwawa a mñarera. Ana Yesu pis kapuru pisoluþar ninuna viowa nañani, a kila ruru mee nene, ana mligan si pa arimana.

⁴³ A la naña apisu sur nene, amilan manene namñareraena nowo kiena ne Ntewa nene paþisi, naña kila po sanene paþisi pan mee nañani.

Yesu pisawal sina ga kiena marena

Ana siar e pogos naña yar taþena la asuña apisasayu ke sur wo naña Yesu kila, ana Yesu pisa kiena visena tai pa kiena nalogena lala.

⁴⁴ Naga pisa pan la, pisape “Ayagogen ruru kiau visena nini, aligan ruru te kiamiu sitomena lala, vena ve sinemiu þesan re sina. Ee, nepisa ruru van amiu, nesape Ntewa mligan inu sane Narin Yeririna, ana lavis ke naña aligan inu neva e limana ne yaru la naña yoko awemñar inu nemare narui.”

⁴⁵ Ana nalogena lala pe amloge kilale re ya naña Yesu suña pisayu ke pan la poli wa, sa naña kana kinas tapolou ke ga wa, kila pe apisu kilale re poli, a amaraun mña naña aviun ruru va Yesu e lepas na visena nene.

“?Ane to laa metavan yaru taþena lala?”

Matiu 18:1-5; Mak 9:33-40

⁴⁶ Ana siraunia, veveyuena tai mñalivi likan nalogena lala, naña apisape ane to laa metavan lala taþena laþasa.

⁴⁷ Ana Yesu kilia mña kiela sitomena la nene, ana pio ninis tai naña pimi ke puna, ana mligan ninis nañani suñalu se yepasa,

⁴⁸ ana pisa pan la, sape “Yar naña kiena sitomena patanon inu, ana naga kekaran wereruruen ninis nini, nanene sa ga naña kekaran were ruru inuen ga narui. A yar naña kekaran inu, naga sane kekaran ke ga naga naña mligan inu nepim. Nanene

komin naþa amiu ai naþa kiena sitomena su tano vaþisi, naga ke narui naþa naga to metavan amiu make ga.”

“Yaru naþa pe pisaluþar ita re poli, naga suþa miila ita ke ne”

⁴⁹ Ana Yoane pisa pa Yesu, sape “Suþe, mepisu yar tai, naþa suþa pile plan ke yermare lala, naga mþene plan la e kioþa kia. Ana yaru nene, memninue ga, naga pe ita re tai poli, ana mepisaluþaria.”

⁵⁰ Ana Yesu pisa pania, pisape “Toko, visaluþaren toko, komin yar naþa pe pisaluþar ita re poli, naga miila ita ke ne.”

Yesu sitoþal sape lavis ke monar va ma meta Yerusalem narui

⁵¹ Ana Yesu pisa kilale sape nanagane, lavis ke Ntewa were si naga va meta ma e peni narui, ana kila ruru kiena sitomena, sape kiena mrapa monar va ma meta Yerusalem narui.

⁵² Ana la amial apano, ana Yesu mligan kiena yar na waren visena lala la asumo apa e pulkumali tai kiena ne le Samaria lala, vena akila ruru make suria, naga sirau imi.

⁵³ Ana la ne e yo nene, la pe sinelan re Yesu la aim e kiela yo poli, komin la pe sinelan re iilaen le Yu la naþa akom ke kiela yo poli vena ava meta Yerusalem.

⁵⁴ Ana pogos naþa nalogena lalua nene Semes lalua Yoane apisu naþa apisaluþar la sa nene, lalua apiun tan Yesu, asape “Suþe, ko sinoþan osape melen mevio kapi tai ligan ma e peni vitom tano kekan la nenaga?”

⁵⁵ Ana Yesu þarpuia pis mþarera pan lalua, pisaluþar la.

⁵⁶ Ana pe apa re si e nene poli, la apa e pulkumali taþena.

Yaru naþa taveve Yesu ve kiraþatau re sina

Matiu 8:19-22

⁵⁷ Ana pogos naþa amial ke e mrapa narui, yaru tai pimi pu Yesu, pisaar pania, pisape “Yoko netaveve ko e nape naþa visae ova ea.”

⁵⁸ Ana Yesu pisatamea, pisape “Lokul tetan lala la mþala pulus la suþa ga, a manu lala mþala ponovi la suþa ga. Ana

inu Narina ne Yeririna, naþa nokom ma e peni nepitom, in na pe mþau yo re poli, naþa neva nomonea. Visae ko okekaran mþena malena na sanene, ko okilia oimi.”

⁵⁹ E ke e pogos nene, yaru taþena tai, Yesu pisa mþena pania pisape imi tavevea, ana naga pisatamea, pisape “Suþe, otaþan neva nevisuar ke ne kiau yermarua sumo wa, a visae marþan pae, ana yoko neim netaveve ko ga na wa.”

⁶⁰ Ana Yesu pisa pania, pisape “Oligan yaru la naþa pe atol re malena poli wa ava asin kiela yar mare lala. Ana ko, oim ga teva telologon navesuþenena kiena ne Ntewa.”

⁶¹ A yar taþena si tai kila sa ke ga, kila sa naþa pisasa ga, pisa pa Yesu, sape “Suþe, yoko in na netaveve ko lue narui, ana sur taaga ga, nesape otaþan neva nevisa ke ne pokolemalo va la ne uþa mþau wa.”

⁶² Ana Yesu pisa visen tai sanini pania, pisape “Yar naþa suþa sitom manene la mþana uþa þarar kiena suri make ga, naga sane yaru naþa tarar ke þeligas nen waa, a silaga, suþa kira þatau lue ga. Yar na sanene pe torokin re imi ve yar na navesuþenena kiena ne Ntewa poli.”

10

Yesu pitetalia yar la moki naþa la peve lua ava alologo

Matiu 9:37-38, 10:7-16, 11:20-24

¹ Ana e pogos nene, kieta Suþe pisir plan si kiena nalogena laþasa. La punu ga tol lualima yam olua pa lua [72], a naga sitom ke sape ligan la nene ava sumo, la veve lua ava e pulkumali lala a e yo la naþa yoko naga sirau va mþalivi ea.

² Ana naga pian la sanini, pisape “Lelaga, kinanena moki liu naþa marua sike lokove, ana yar la lua la ga naþa asuþa aþar ke pitomi uþa. Monar aviun manene tan yerkaawa na lokove nene, vena naga ligan plan re si yar laþasia la avanon awar kana kinanena la nene imi.

³ Sanene, monar ala kiamiu mrapa avano. Ana popon avisu kilale sane in na nemligan plan amiu apano, sa ga

naþa narin sipsip, naþa apanon ke vena avitawe pupia lokul tetan lala.

⁴ A pogos naþa avano, ana ve awar re kiamiu taga na varu, a ve awar re kiamiu karo, a ve awar re si kiamiu kulus nen lamiu taþena. Ava ga sa ga ne, ve asunlilue re mrapplepa va yar lala.

⁵ A pogos naþa ava añaaliv e yuña ya, sur naþa yoko avisa þesania, yoko avisa sanini, avisave ‘Suñare sike e uña nini.’

⁶ Ana visae yaru naþa sike e uña nene naga sinenan suñare, yoko suñare naþa avisa kilia sike amio naga, ana visae pe yar re tai ne sanene poli, yokorena suñare wasuþe si imi van amiu.

⁷ A ve ava aulaula kare e yuña taþena lala, ana asuña ga e yuña nene, a akekaran ala kinanena ya pona namunena ya naþa ala imi van amiu. Ve amawan re ala sur wo ya naþa akila van amiu, komin naþa yar na yuñaena naga mesmesun la kiena narin nalaena tai.

⁸ “Sanene na, visae kumali ya naþa ava aworu ea, visae akekaran naþa avisuar amiu, yoko monar akekaran ga kinanena ya naþa sinelan asape ala van amiu,

⁹ a monar akila ruru namaiena la e yo nene, a monar avisa van la, avisave ‘Nanagane, nasuþenena kiena ne Ntewa pimi ke lavisin amiu, nanagane Ntewa pimi pe kiamiu Suþe narui.’

¹⁰ “A pogos laþasia, yoko aworworu e pulkumali tai, ana yoko ve akekaran re naþa aure amiu ava asike amio la. Visae sanene, amiu ataveve pupia mrapa nene ava e yepesinas na pulkumali nena, a avisawal va kana yar lala, avisave

¹¹ ‘Puluyavi na mrapplepa na kiamiu yo nini, imimi metan plan petan lamimi lala, sane kiamiu kile nasitomalen tai. Monar ve sinemiu þesan re, sane lavis ga navesuþenena kiena ne Ntewa imi pun amiu narui, ana pe sinemiun re poli, ana akilalu narui.’

¹² “Nevisa lelaga van amiu, e legiena na liþereena, yokorena la ne sanene la ava e nakoena tai naþa mārera manene laa

taulu nena naþa la nae pulkumali naþa Sotom nanua yoko awaria.”

Yesu pisayu la naþa pe amlelaga re e naga poli

Matiu 11:20-24

¹³ Ana Yesu pis mārera pa yeririna na kumali taþena laþasa, pisape “!Le Korasin, amio le Petsaeta, akila kare manene amiu paþisi wa! Visae le Taea amio le Saeton lala avisuli ga kile la naþa kam na apisu þisi rui, vera na avilopu la nanua rui. La pe ape le Yu re poli, ana vera na la ayen þilili karo a akuan yavi e þarila rui, pona atotano mña sanene ana yaru la avisu sane sinela piowagan kemua kiela mlamulena viowa la lelaga.

¹⁴ Nevisa van amiu, e pogos naliþereena, yokorena kiamiu nakoena naga taulu nena naþa kiena ne la nene.

¹⁵ “!A amiu le Kapeneam la naþa aþarwar amiu paþisi, naþa sinemiun asape avisir plan amiu asu manene metava, avisuar amiu! Yoko Ntewa koven amiu ato laa tano rui e pulus nen kapi.”

¹⁶ A Yesu pisa mña pan la, pisape “Yar naþa visae yoko logear amiu, naga suña mlogear in ke ne, a visae yar naþa yepen mavin amiu, naga suña yepen mavin in ke ne, a yaru naþa visae yepen mavin in ke sanene, naga suña yepen mavin ke yerkawa naþa naga mligan inu nepim.”

Ana e visena la nene, Yesu mligan yar nalologena lala apanon akila yuñaena.

Yar nalologena la aþasuþe la si narui

¹⁷ Ana yar nalologena la nene apa akila yuñaena wo la moki, ana siraunia aþasuþe la si apim puna Yesu, naþa apulen manene kekarena e sur punu ga naþa akila rui. Aþasuþe la, apisa pa Yesu, asape “!Suþe, memiyuñaeen sur la e kiomña kia pa tol naþa yermare mña la asu vatanon imimi!”

¹⁸ Ana Yesu pisatañe la, pisape “Ee, kieta yuñaena sanene narui. A in mña ga, nomal Yermare molue ma e peni, akoven lua naga pitomi tano sane yekarpla tai.

¹⁹ Nanagane, in na netamãan pan amiu rui, nesape akilia avieyar lomãara amio logovi, a m̃areraena kiena ne kieta nasinekar sike m̃ena vatanon lamiau, ana tařatete sur tai kila kare amiu.

²⁰ Ana ve awarwar amiun re ya nařa in na netamãan pan amiu, nařa ninuna viowa la asike vatanon amiu, ana sur taaga ga nařa akilia aulen manene kekarena vanonia, na nařa kiamiu kia lala asiri plan sike loyumuã e tus namalena rui.”

*Yesu pisa potena pa Arimana
Matiu 11:25-27, 13:16-17*

²¹ Ana e pogos nene Ninuna Wa kila sinena ne Yesu kekara pařisi, ana Yesu mlen, pisape “!Ata o, ko ope Suře nae ma e peni a Suře nae yomarava nini! Nevisa potena van ko, Ata, vanon sur la nařa e lepas na pun inu, okila meraravan pan la nařa kiela sitomena sa ga nin sisi lala, ana yaru la nařa asitom asape ape manmarua a la nařa asape akilia ruru suria, ko okilawan sur la nene van la. Lelaga řa Ata, nanene na sa ga nařa ko sinomãania.”

²² A Yesu pisa m̃ena pan la, pisape “Ata mligan suri punu sike e lumãau rui. A Ata naga taaga nařa kilia inu sape in na ai, a inu nařa nepe narina, in ga taaga nařa nekilia ruru naga, nesape naga ai. Inu nemio la nařa ne nemliganar la vena nekipian la e Ata vena awasine naga, imimi la nene narui nařa mekilia ruru naga nařa pe Arimamimi.”

²³ Ana Yesu pilon pa puna ne kiena nalogena lala, pragogo ga pan la, la ga amloge, pisape “Ntewa kila po pan amiu pařisi, nařa akilia avisu suri la nene.

²⁴ Navisawalena la mok liu amio řarin suře la mok liu nanua sumo nařa la sinelan manene pařisi asape avisu sur la nene, ana pe apisuli re pogos tai poli, a ařaryon asape aloge m̃ena sur la nene, ana la pe amloge re nena poli.”

*Pakaiwa nařa yere Samaria sinen miye
yere Yu tai
Matiu 22:34-40; Mak 12:28-31*

²⁵ Ana pogos tařena si tai, yar tai naga pe manmarua ruru e navisaluaena, naga pisape kilali Yesu e naviunen m̃arera tai ana naga sumãalu, piun tan Yesu, pisape “? Navianena, visae sineun nesape nekilali netol malena nařa pe luas re poli, yoko monar nekila ve sanape?”

²⁶ Ana Yesu pisatam̃ea, pisape “Ana kieta Tus Wa pisa ya ne e lepas nene? ? Ko opuloia opisus pisa sanape?”

²⁷ Ana yar nařani pisatam̃ea, pisape “Tus Wa pisa sanini, pisape: Ntewa na mava nařa naga pe kioãa Ntewa, ko monar sinemãa si naga, oligan naga to sumo e losinemãa wetelu, a e kioãa malena wetelu, a e kioãa m̃areraena wetelu, a e kioãa sitomena wetelu, a ko na monar ositom nalavis pumãa lala, okila wo van la, sa nařa ko ositom ko ke ga.”

²⁸ Ana Yesu pisa pania, pisape “Ee, opisa mesmesun nena narui. A visae okila ve sa nene, yoko otol malena nane opiun ke ne.”

²⁹ Ana yar nene kilia sape naga pe kila re mesmes sanene poli, ana naga kilali nařa kila pisape mninue ga, piun tan Yesu, pisape “?Ana a la ne asike lavis pun inu nařa monar nekila wo van la?”

³⁰ Ana Yesu pisatam̃e kiena naviunena nene e řakaiwa tai, nařa pisape “E legiena tai, yar tai molue ma Yerusalem, sumãa mialoro pito garo Seriko. Ana naga mialoro m̃a sanene pano tol yomãarera tai, ana milan řegas nen yar na vinauen tai, nařa apulania, am̃e kare naga pařisi, ařar plan make kiena suria ařure, amligan naga marluia m̃eke kiena mrapa komsusa.

³¹ Ana kieta yar wa tai, naga m̃ena mialoro e mrapa nene naga siraun pimi, ana pogos nařa pimi lavisin yar nene, naga miyepe ga pa e isinen mrapplepa, mial řaro pano.

³² Ana siraunia, yar tařena mial pimi. Naga pe Livae la tai, nařa asumãa akila ke yumãena make ga e Yumãa Wa m̃ana ne Ntewa, ana pogos nařa pimi tol yar nařani, naga m̃ena ga yepen mavin

iilaena, miyepe ga pa e isinen mrapplepa mial ga p̄aro pano.

³³ Ana siraun sina, yar taḗena, naḗa naga suḗa mlilu kiena mrapa viavi tai pimi. Naga pe yere Samaria tai, ana sa naḗa tekilia, yar la nene pe ape erau wo re amio ita le Yu la poli. Ana pogos naḗa pimi tol e yo naḗani, pisu yar nene marlu ḗeke e yo naḗa aḗe ea, ana sinen miye paḗisi.

³⁴ Ana naga pimi lavisinia, kevan lele la naḗa la nene aḗea, plan sirveve e magka la naḗani, piar ruruia. Ana tarlua yar nena, mligan mon meta e kiena togki, ana mial ḗa amio pano-o tol yo tai naḗa yuḗa na varuruen tai ḗeke ea. Ana p̄ere naga pa loyuḗa ea, miila naga po paḗisi.

³⁵ Ana kolulagi, p̄ar kiena varu tai, kian pa p̄ar na yuḗa na varuruena naḗani, pisape ‘In na monar neva si e kiau mrapa narui, ana yar nene yoko sike e lumoḗa sumo wa. Ovisuar ruruia e sur punu ga, a visae varu nene ve torok re, yoko in na nevisuveve si e pogos naḗa nowasuḗe si e kiau yalena nini.’ ”

³⁶ Ana Yesu piun tan yar naḗa piun naviunena nene pania, pisape “?Opisu suniena nene sanape? ?E yar la telu naḗa amiyal e mrapa naḗa yar nene ḗeke ea, yar ai naḗa kila pania sa ga yar tai naḗa ḗeke ga lavisinia?”

³⁷ Ana yar naḗa pisape “Nesitom nesape yar naḗa sinen miyea, a miila.”

A Yesu pisa si pania, pisape “Ore, naga ke narui, a ko ḗena ga, ova otaveve kiena p̄elaga wo nene.”

Mareta amio Maria

³⁸ Ana e pogos naḗani, Yesu amio kiena nalogena lala amiyaloro ke apa ma Yerusalem, ana apa aḗalḗaliv e narin pulkumali naḗa Petani, ana sira naḗa Mareta p̄ere Yesu pa ḗala uḗa.

³⁹ Ana pogos naḗa Yesu pa sike amio la nene, luenā ne Mareta nene tai, kiena kia Maria, naga totano ga teke lavisin lana ne Yesu, toḗa miyagogon ruru ke kiena navianena lala.

⁴⁰ Ana e pogos nene, Mareta naga pe toḗa miyagogo re poli, ana naga suḗa

ḗareran ke sape kila ruru make sur punu ga suḗate Yesu, a naga sitom manene laa e yuḗaena la nene. A siraunia, pimi pisu Maria to ga tano toḗa ga, miyagogon ḗa Yesu, ana pisa pa Yesu, pisape “Suḗe, luou naḗa to koren ga toḗa sanene, ana in ga taaga nekila make suria. Pona ko opisu kilale re poli yo, ana popon ovisa vania vena imi iila inu.”

⁴¹ Ana kieta Suḗe pisataḗea, pisape “Mareta, ko sireyar tai naḗa ositom manene sur paḗisi, a omloge piowagan manene sur moki laa na sanene wa.

⁴² Ana sur taaga ga toḗa ga naḗa yoko ko ositom manene urmi ea, nane suri ne nane Maria ḗal rui e kiena malena, ana yoko in na taḗatete si nelalua vetania.”

11

Leniena naḗa Suḗe pian ita ea

Matiu 6:9-13

¹ Pogos tai, Yesu pa mlen e yo tai, p̄isi p̄asuḗe pitomi, ana kiena nalogena tai piun tania, pisape “Suḗe, visae okilia ovian imimi lia vena imimi ḗena mekilia melen, sa ga naḗa sumo na Yoane pian kiena nalogena lala vena alen, vera na wo vaḗisi.”

² Ana Yesu taḗan, pisape “Pogaga, visae sinemiun leniena, akilia avisa sanini, avisave:

‘Arimamimi, torokin kemua naḗa imimi mevatanon kioḗa kia wa.

Memlen mesape kioḗa navesuḗenena imi.

³ Mepiun tan ko, mesape ola kinanena van imimi p̄ane a e legiena punu ga.

⁴ A oviewo kiamimi mlamulena viowa lala,

komin imimi mepiewo ke la naḗa akila ke piowa pan imimi.

A ve oligan re suri la imi akilali manene imimi.’ ”

Pakaiwa na viunen suria

⁵⁻⁶ Ana Yesu pisape monar ve amaraun re viunen sur tan Ntewa, ana pisa p̄akaiwa tai pan la, pisape “Visae kole-malo koe yepe lilika tai, oilan ga kioḗa erau tai yal imi tol yo puḗa. Ana pe

komā kinanen re si poli, ana monar okirir ova pun yumā tai naṣa mēke lavisin ko, monar oviun manene tania, ovisave 'Wolai, kiau erau tai pimi porun in ga nagane na wa, ana in na lumāu plas nena ga. In na pe kau kinanena re si naṣa nekilia nela van kan poli. ?Ko na komā kinanen tai tomā ga okilia otañan van inu sumo wa?' "

7 "Ana sanape, tesitom tesape yoko yaru nene kilia visatamē visave 'Aa, ve okila re yumāena mārera sanene van inu. Opisu ke ne, mokotava rui, ana memio nin sisi la, momēke e māmimi tog rui, ana taṣatete si nesumāl narui.' Ana peraga, yaru nene taṣatete visa sanene."

8 Ana Yesu yakol si visena van la, sape "Pona pogos tai yaru tai kilia sitom korenan ko, yepen mavin iila koena vanon ga ko na osike lavisinia. Ana visae ve omawan re naṣa oviun kaṣaran mā sanene vano vano-o, yoko yar nene monar la ya naṣa opiun ke ne van ko."

*Yesu pisayu naviunen suri tan Ntewa
Matiu 7:7-11*

9-10 Ana maran taaga e ṣakaiwa kiena ne Yesu nene, naga pisa ke sina pan la, pisape "Yaru naṣa piun ke suria, naga tol silaga, a yaru naṣa kale ke suria, naga mālia, a yaru naṣa sigariga ke mratava, pulutava pietava pan silaga. Visae sanene, yoko akilia awar ya naṣa apiun tan Ntewa, a alual ya naṣa akale ke puna, a mratava naṣa asumā asigariga ke ne, vietava van amiu.

11 Visae narumā tai viso karia, viun narin ika naṣa teke ne, taṣatete ola lomāra vania,

12 pona visae naga viun kopululus nen lakaporo naṣa teke ne, taṣatete ola logovi tai van kania.

13 Lelaga naṣa kam na ape yar viowa ga lala, ana amiu yar tai taṣatete kila sanene, asumā akekarān ga naṣa ala suri wo la va narimiu la silaga. Sanene, pogos naṣa aviun tan Arimamiu nae ma e peni, naga kekara manene la a naṣa la Ninuna Wa van amiu naṣa ape narina lala."

*Apisape Yesu miyūmae ke ga e
naṣareraena kiena ne Yermare
Matiu 12:22-30; Mak 3:20-27*

14 Ana siraunia, aṣure yaru tai naṣa yermare pa e naga pimi puna Yesu. Yermare nene kila yar nena pe pis re poli, ana Yesu pilelua yermare naṣani petania, ana naga pis ruru sina, kila yar la naṣa apisu sur nene amilan paṣisi.

15 Ana la ṣas apielue, ana apisalele kare Yesu ṣisa, apisape "Yar nene pile plan ke yermare lala e ga e naṣareraena naṣa suṣe kiena ne yermare lala, naṣa kiena kia Pielsipel, tamān pania."

16 Ana la si ṣasa, la mēna asitom piowa e Yesu, ana asumā akilalia, sinelan asape aṣareraena vena kila kile tai nae ma e peni avisuia.

17 Ana Yesu mloge kilale kiela sitomena lala, ana pisape "Visae suṣe tai, kiena yeririna la aliṣere la, naṣa laṣasia akawe laṣasia, yoko yumāena kiena ne suṣe naṣani monar loru. A visae unā tai, asumā aliṣere la, naṣa laṣasa asape aṣene plan laṣasa, yoko la nene taṣatete asu ruru pog tai.

18 ?Sa mēna nini, visae yermare kiena ne Yermare Lego la asumā amlṣere la ke rui, ana yoko nasuṣenena kiena ne Yermare Lego sumālu ve sanape ne? !Kam na apisa ke sur pa sanene narui, asape in na nesumā nomēne plan ke yermare lala e naṣareraena kiena ne pupia yermare naṣa Pielsipel, ana taṣatete nena ve sa nene ṣisa!

19 ?A visae ve sa kemua naṣa apisa, ana komin ya naṣa kam la ṣasa asumā aṣene plan ke yermare? ?Ane tamān māreraena nene pan la, pona yermare mā nene yo? Popon sa kiamiu nalogena la naṣa aṣene plan ke yermare lala aloge kiamiu visena la nene.

20 Ana peraga, apis pe po re nene poli. In na nesumā nepile plan ke yermare lala e ga e naṣareraena na limana Ntewa, a sur nene na kana kinasa sane navesuṣenena kiena ne Ntewa sike likan amiu rui.

21 “!Apisu ke ne! Sa naña visae pupia yar m̄arera tai, naga war kiena pupia suri na mara lala, naga sum̄a kirawo ruru ke m̄ana yūm̄a. Ana sur kiena ne yar nene su ruru ga sum̄a e kiena kove.

22 Ana Yermare Lego kiena yūm̄aena naga sa ga nene. Visae yar m̄arera tañena imi naña m̄arera laa taulu naga sane, yoko lalua akila m̄a mara vano naga taulu Yermare Lego, ana yoko kilia war plan kiena sur na mara lala, naña naga p̄asine p̄esania, a yoko naga kilia war make sur la naña sike loyūm̄a e kove nene ve kiena, ana liṗere va kiena yeririna lala.

23 “Yaru naña pe taveve in re poli, naga sane suwo in ke ne, a yar naña pe miyūm̄ae re amio in poli, vena moure kiau yeririna la aim lele taaga, naga sum̄a m̄ene tetain la ke ne.”

Ninuna viowa kilia wasuṗe sina imi
Matiu 12:43-45

24 Ana Yesu pisa m̄ena ga, pisapenua “Pogos tai, pog naña am̄enelua yermare e yar tai, yermare nena kilia va yom̄arua vena kaleli yo tai naña va se ea ve m̄ana ūm̄a. Ana visae ve lual re, yoko naga visavenua ‘Aa, yoko neto li si e m̄au ūm̄a marua na sumo.’

25 Ana pogos naña pitomi, yoko naga lual sane akilavan ruru ga m̄eke na, akila ruru make sur la e yūm̄a naña p̄isi rui.

26 Ana yoko naga va were si yermare tañena la ve olua naña apiowa manene laa taulu naga sane atom amio, ana yoko ava si asike los nen yar nene. Ana yar nene nanua sumo kiena malena piowa, ana siraunia kiena malena piowa manene laa sane.”

Mrapa na tolen kekarena naña lelaga

27 Ana e pogos nene, sira tai sike amio la naña apisu ke sur la nene, a naña amloge ke visena kiena ne Yesu lala, ana sira nañani kekaran paṗisi. Ana pion manenea, pisape “!A kee, anom̄a naña p̄ar ko, a mla yu pan ko, navisa ruruena kiena ne Ntewa keviu paṗisi pania, naña naga p̄ar sisi tai sane ko.”

28 Ana Yesu pisatam̄ea, pisape “Ee, nanene na lelaga, ana nevisa van ko, nesape navisa ruruena kiena ne Ntewa va ve keviu manene laa sanene sike e yar ai naña logear visena lala kiena ne Ntewa, a naña kila ya naña naga sinenania.”

Yar la naña sinelan visuen kile
Matiu 12:38-42; Mak 8:11-12

29 Ana e pogos nene, p̄ina la naña amiagogon ke Yesu asum̄a apim la mok manene laa narui, ana Yesu kilia m̄a naña sane la moki naña apimin ga avisu kiena kile lala, ana pis pan la, pisape “In na nepisu sane lus na yeririna nanagane lala la apiowa laa. La sinelan asape avisu ga kile lala, ana peraga, Ntewa taṗatete nena la kile tai van la vena avisuia. Ana kile kiena ne navisawalena Sona nanua sumo, naga ga nene akilia avisuia.

30 Ntewa mligan Sona, naga sane kile tai kiena ne la nae Ninive nanua sumo, ana naga mligan m̄ena inu Narina ne Yeririna nepimi sane kiamiu kile na nagane tai.

31-32 “Ana le Ninive la nanua sumo amloge visena kiena ne Sona, la apilopu la e pogos nene, a yoko la nene asum̄alu ase e legiena na liṗereena, la avisa lologia kiamiu naviowaena, komin yar tai naña naga to laa metavan Sona naga sike amio amiu, ana pe apilopu amiu re nena ga.

“A nanua m̄ena sumo naña sira kawa tai pe p̄arin suṗe tai naña molue e kiena purvanua naña sike koperin paṗisi, pitomi tano vena loge visena na manmaruaena lala kiena ne yermarua Parin Suṗe Solomon. Ana sira kawa m̄ena nañani yoko naga sum̄alu se e legiena na liṗereena nene ana visawal ruru nena kiamiu naviowaena lala, komin naña yar tai naga to laa metavan Solomon naga sike amio amiu, ana pe sinemiun re nena naga poli.”

Pakaiwa lua e lepas na kapi vivaga
Matiu 5:15, 6:22-23; Mak 4:21; Luk 8:16

33 Ana Yesu pisa m̄ena, pisape “Pogos naña tesilan kapi vivaga, ve tesilan re ga p̄isi na teva towarwan m̄eke e p̄ilipili tai e porotano, pona takalo si e piaki tai,

ana tesilania vena tetelan to metava, vena visae yar imi loyuma ana lual naŋa kapi vivaga nene tegoli make nena yo.”

³⁴ Ana Yesu pisa mēna, pisape “Kilamaran yar naga sane yo taaga ga naŋa yomerava pimi ke loyuma e tasnena. Sanene, visae kilamarama merarava ruru wo, visu ruru nena sur lala, yoko ve sa naŋa tasnema pulemamaga nena e yomerarava. Ana visae kilamarama viowa, pinaia sur la punu ga naŋa suma pisuia, yoko ve sa naŋa losinema pulen nena yemalolo.

³⁵ Visae sanene monar avisuar ruru amiu, vena kapi vivaga naŋa teke e losine-miu ve imi re si ve sa yemalolo.

³⁶ A visae losine-miu la ulen ruru luen ga kapi vivaga silaga, naŋa ve narin malo re nena tai teke ea, yoko kiamiu malena tego ruru nenaga, tegoli make yo punu ga.”

Yesu pis marera pa li nasumonen nalotena lala

Matiu 23:1-36; Mak 12:38-40; Luk 20:45-47

³⁷ Yesu pis ma pa pina la pa sanene, ana Varasi tai naŋa toma miyagogonia pisa pania pisape yoko were va mana, kila kinanen tai vania. Ana amio Yesu apano, ana pog naŋa kinanena su ruru pa sike na, ana Yesu pa totano e lelen kinanena.

³⁸ Ana e pogos nene, Varasi lala la sane monar atarar marera navisaluaena tai naŋa sane yar monar taveve mrapa laŋasa nakevanen limana, ŋisi na kilia kinana. A Varasi naŋani sitom pisape Yesu naga pe yaru wa tai, naga monar kila ve sa naŋa kiela pelaga marera nene pisa, ana pogos naŋa pisu sane Yesu pe sitom manene re kilaen poli, naga milan manene paŋisi.

³⁹ Ana Suŋe pis pa yar naŋani, pisape “In na nekilia make kiamiu pelaga le Varasi la rui. Amiu na sinemiun manene asape akevan ruru mamiu piala amio kiamiu pialora la silaga, ana apilaven paŋisi, asitom ke asape kam na amekik paŋisi ne, a ape yar wa. Ana pupia kororaki sike e amiu na wa, komin losine-miu lala pulen kilakotaliaen yaru, a nakila kareen yaru, a pelaga viowa la ne sanene.

⁴⁰ !E, ve ave wowe re sanene! ?Pe apisu kilale re naŋa asape Ntewa nene naŋa si make sur na vanua e sur punu ga, naga si mēna loyuma na sur make ga, ana po paŋisi naŋa visae akila yepas nemiu la punu ga ikik ruru nena wo lelaga, vanua amio loyuma.

⁴¹ Sur nowo la naŋa asuma akokonia manene ke e kiamiu pialora amio mamiu piala lala, visae aliŋere re ga laŋas va yar la naŋa limala plasia, vera na wo na wo. Visae ve sanene, pona yoko avisu kiamiu sur la imi ikik ruru yo rui, ana ve amaraner re si kilaen kiamiu pelaga taŋena laŋasia.”

⁴² Ana Yesu pisayu pelaga navisokanena kiena ne li na sumonen na lotena lala pa laa sane, pisape “!Amiu le Varasi lala, o! Akila kare amiu paŋisi wa, yoko viowa manene laa van amiu. In na nekilia ma naŋa apisuar ruru ke silaga, asape visae awar kiamiu kinanena ve lualima, yoko monar tai va e yuma mana Ntewa, sa naŋa navisaluaena suma pisa, a asuma akila ke sanene e kiamiu sur punu ga, pano-o tol mēna narin mas nen kapis lala a sur mēna la naŋa sane mrasil. Ana sur kerkeviu la naŋa navisaluaena pisa, kam na pe asitom re nena poli, sa naŋa pisape monar amesmes ruru wo, a monar sinemiun si Ntewa a yar taŋena lala. Visae sinemiun uararen narin sur la nene marera, naga pogaga, ana pupia sur kerkeviu la nene popon visae asuma akila ga rui, ana pe akilali re nenaga.

⁴³ “!Amiu le Varasi lala, o! Akila kare amiu paŋisi wa, yoko viowa van amiu vaŋisi. Loyuma e yuma na leniena lala, sinemiun asape ato luen ga tano e lelen yerkawa lala, a visae ayaloro e marana yeririna lala, sinemiun asape monar avatanon amiu, avio ruru amiu, avisave ‘A ke, navianena wo, pokolulagi!’

⁴⁴ Yoko viowa manene van amiu vaŋisi, komin naŋa kam na sane suri korena ga, kam na sane lotap marua la naŋa yaru la sinela pesan rui, ana amialor ke ga meta ea, pe apisu kilia re asape suri kona tai menunu meke tano e poli.”

⁴⁵ Ana e poglis nene, yar tai naŋa pe manmarua ruru e navisaluaena, naga

m̃ena sum̃a miyagogonia, ana mloge sane visena kiena ne Yesu tol ruru naga amio m̃ena la naṓa amiyum̃ae ke sane naga, ana pisape “!Navianena, nemloge sane sinom̃an osape ovisa kare imimi towe m̃ena ga!”

⁴⁶ Ana Yesu pisatam̃ea, pisape “!Ee, yoko viowa m̃ena van amiu li navisaluaen lala! Asum̃a apisir plan ke sina narin navisaluaena lala e lepas nen nalotena silaga, sane sur urmi la naṓa asum̃a akuanpolo sike e m̃asin yar lala asape monar awaria, ana amiu, asum̃a ga sanene, pe akululun re nena mrasilmamiu tai vena akilali naṓa aiila la.

⁴⁷ Yoko viowa nena van amiu, komin naṓa kam na asum̃a amiyowauia ruru ke tampona kiena navisawalena la kiena ne Ntewa, ana amiu na maran taaga ga sa ke repimiu marua la nanua sumo, naṓa la ke narui naṓa am̃e mom̃ar navisawalena la nene.

⁴⁸ Kam na amio la nene maran taaga, komin nanua sumo, yermarua la nene la am̃e mom̃ar navisawalena lala, ana nanagane kam na akekaran ke yum̃aena ken la nene, kam na asikol ke si ne naṓa asum̃a amioa ke kiela tampona lala.

⁴⁹ “Kam na sane na visena na manmaruaena kiena ne Ntewa naṓa pisa nanua sumo, naṓa pisape ‘Yoko neligan kiau navisawalena lala a kiau li nalologena lala imi van la, ana yoko akila kare la, pona yoko awe mom̃ar la.’

⁵⁰ Visena nini, kana kinasa sane yoko kam ke narui naṓa akus nakoena kiena ne nawem̃aren navisawalen la punu ga naṓa repimiu na sumo lala am̃e mom̃ar la, siar e nasiaren purṓes nen yomarava nini.

⁵¹ Naga nene siar e Epela nene, pimi tol Sakaraea naṓa repimiu la nene am̃em̃aria likan wonta amio yo wa loyum̃a e yum̃a wa m̃ana ne Ntewa. Lelaga nane nevisa van amiu ne, sane nakoena na kuruta kana navisawalena lala kiena ne Ntewa sike e kam nanagane.

⁵² “Ee, piowa pan amiu yaru na kilia ruruen navisaluaena lala, komin kam ke naṓa amlawan ki na pulutava na kiliaena,

ana kam na pe apa re si loyum̃a e poli, a asum̃a asuwo ke mrapa pan yar taṓena la naṓa sinelan asape ava loyum̃a.”

⁵³ Ana Yesu pisa pa visena la nene, molue petan yum̃a nene pano, ana navianen navisaluaena lala amio Varasi lala sinela mlaean naga paṓisi, naṓa sinela mimi kar paṓisi. Ana la apanon Yesu silaga, asum̃a akuan ke visen m̃arera a naviunen m̃arera la pania vena ayurli naga, ana akilali m̃ena naṓa asape naga visa visena laṓasa naṓa ve memes re.

⁵⁴ La apanon Yesu sa naṓa naga pe sur tetan tai, komin naṓa sinelan asape alual kiena visena laṓas naṓa torokin alip̃ere naga vanonia.

12

Navisawanena lala naṓa tapolou yoko aim akate e yometava

Matiu 10:26-27

¹ Ana ṓina la apim ke puna Yesu na wa, la ataulu manu mok liu, a poglis naṓa apim ke lele taaga sanene, yo ve tokaki ga, a asum̃a apieyepal kare ke ga lala lala. Ana pogos naṓa Yesu pe pis re pan la poli wa, pis ṓesan pa kiena nalogena lala, pisape “Kam na avisuar ruru amiu e ṓelaga viowa kiena ne Varasi lala, komin naṓa la asum̃a apivis ke ga e gola, la asum̃a apis vilave ke sanene, ana apisokan ga ne. Pelaga viowa kien la nene kilia va tolkare yar taṓena lala, sa naṓa is na kilaparavi naga ve tokak ga ana ṓarmake puluyavi na kilaparavi nene veraga.

² Sur viowa make ga naṓa yar la ne sanene asum̃a amiyum̃aen vinaun ke na, pona naṓa apisawan ke ga, yoko amolmolue e yo metava na wa, vena yar punu ga akilia.

³ Visena ya naṓa yar pisa ke ga e yemalolo, yoko monar aloge sina ko legiena, a sur la naṓa yar pisa mumun ke ga m̃ana loyum̃a, yoko monar avion manene si va metava e maran yar make ga, vena yar make ga akilia aloge.”

Nalogenena kiena Yesu naga monar ve maraun re yaru

Matiu 10:28-31

⁴ Ana Yesu pisa mēna pa kiena nalogenena lala, pisape “Eraun lala, nevisa van amiu sanini, nesape ve amaraun re la naṣa akilia awemār ga tasnemiū mare, ana sir-aunia taṣatete si akila sur tai va ninumiū.

⁵ Ana in na sineun nesape nevis ruru van amiu nesape yoko amaraun yar ai? Yoko monar amaraun nena Ntewa, naṣa naga kilia kilaṃar ṣesan tasnemiū sumo, a siraunia kilia kuan ninumiū vito e lele na logeen viowa. Lelaga ṣa, yar ne nanene na monar amaraunia.

⁶ Ana visae amaraunia, yoko taṣatete si amaraun sur tai, komin Ntewa na suṃa pisuar ruru amiu ṃaga, sitomāl amiu ṃaga. Asitomli narin ninlaea la naṣa la moki kar ga asike ne, sa ga kororaki, a yar la asuṃa aṣiliwilin ke la lima e ga e narin varu tai, ana Ntewa naga sitomāl make la ga peve taaga silaga, pe sinen ṣesan la re nena poli.

⁷ A vilṣarimiu mēna lala, moki paṣisi, ana naga polo make vilṣarimiu la peve taaga na sike ne. A Ntewa na pisu amiu na po paṣisi, taulu ninlaea la nene, ana yoko visuar amiu e sur punu ga na kiamiū malena lala.”

Yar naṣa pisawal pisape naga pe kiena ne Yesu

Matiu 10:32-33, 12:32, 10:19-20

⁸ Ana Yesu pisape “Yar a naṣa pisawal e maran yar lala pisape naga pe kiau tai, yoko inu Narina ne Yeririna inu mēna nevisawal e marana ne navisi lala nae ma e peni nevisave yar nene naga pe kiau.

⁹ Ana yar a naṣa pisawal e maran yar lala pisape pe pe kiau re poli, yoko inu Narina ne Yeririna inu mēna nevisawal e marana yar lala nevisave yaru nene na pe pe kiau re poli.

¹⁰ “Mlamulen viowa amio visen viowa lala, a visena naṣa kila kare inu Narina ne Yeririna, Ntewa kilia viewo ke yar vanon na wa. A yar naṣa kila kare sur wa kiena ne Ninuna Wa, pisayu yuṃaena kiena ne Ninuna Wa pisape Yermare Lego

ga miyuṃaenia, yar na sanene Ntewa taṣatete viewo pogos tai.”

¹¹ “A visae pogos laṣasia, yar la sinela kar amiu, yoko avis van amiu. Yoko akilia aure amiu ava asuṃal ase maran yerka wa lala na yuṃa na leniena, pona kumali, ana ve asitom manene re avisave yoko akilia avisataṃe la ve sanape ne, pona yoko avisa visena ya na van la ne.

¹² E nena e aora ga nene, yoko Ninuna Wa ga iila amiu, vian amiu e visena ya naṣa akilia avisa.”

Pakaiwa na yaru na sur moki naṣa pe sitom ruru re kiena malena poli

¹³ Ana yaru na ṣina nene tai pion ke pa Yesu, pisape “Navianena, wolai suṃa kila kare in ke ne, pe mliṣere ruru re lalimana arimamimi pan in poli. Popon ovisa vania monar kila mesmes ga van inu.”

¹⁴ Ana Yesu pisataṃea, pisape “Peraga yaru, sur nene ve in re na nekila. In na pe nepe yar na liṣereen re yar poli.”

¹⁵ Sanene, Yesu pe kila re sa naṣa yar nene pisa poli, ana mla visena tai pan la e lepas na sinesunen manenea. Naga pisape “Monar avisu ruruia, pe pon re avieluen manene yar taṣena la poli, sinemiun manene laa asape awar kiela sur lala. Kieta malena pe su re e sur moki la naṣa towar poli, ana kieta malena na suṃal ga sike e sur taṣena.”

¹⁶ Ana e nene Yesu sikol kiena visena pa laa sane, naga pisa ṣakaiwa tai pan la, pisape “Yar na sur moki tai, kiena porotano keviu paṣisi, a po mēna paṣisi, ana kana lokove la ṣar kinanen moki paṣisi.

¹⁷ Ana yar naṣa pisu kinanena la nene, sitom ṣele narui, pisape yoko naga kila ve sanape ne, yoko ligan ruru kana kinanena la nene su pe ne, komin kiena yuṃa na kinanena lala a kiena yo taṣena la puleule make rui.

¹⁸ Ana yar naṣani pisape ‘Yoko nowe plan ga kiau yuṃa na kinanena na ur-marua la nene, ana nekila si urviu laṣasa,

naþa akerkeviu laa sane, atorokin kina-
neñ make la nene amio kiau sur moki
taþena la naþa sike ne.

¹⁹ Pogos naþa nekila pae, yoko nevisave
in na sane in ke narui, in na nopo laa
narui. !Lelaga þa, yoko neloge wo vaþisi!
Kiau sur moki la nene, yoko nakan la mña
sanene vano-o, la avisuar ruru inu e kas
ve moki. E pogos nene, in na taþatete si
neyumñae narui, yoko in na nakan ga ya
naþa in na sineunia, yoko nomun korena
ga suria, sane nesu luen ga e malena wo
narui.'

²⁰ "Yar nene sitomiyu ke sanene pano,
ana mninue ga, naga ke naþa Ntewa kila
ruru ke sape vis van narui, visave 'Peraga
yaru, ko na ope wowe ga. Yemalo ga nini,
nesape nelalua si kioñña malena vetan
ko. A kioñña sur moki la naþa omñareran
omiyuwon polo pe kioñña sike ne, yoko a
ne ve kiena si narui?' "

²¹ Ana Yesu pisa pan la, pisape "Yoko
ve sa ke nene narui va la naþa amiyuwon
polo ke kiela sur lala, la ape yar na sur
moki e yomarava nini, ana la pe ape yar
na sur moki re nenaga e lepas kiena ne
Ntewa."

*Yesu pian la sanapen yar naþa sitom
manene kiena malena*

Matiu 6:25-34

²² Ana Yesu pisa mña pan kiena yer-
rina lala, pisape "Visae sanene, in na
nevisa van amiu, nevisave, pe pon re
kiamiu sitomena la ulen manene kiamiu
yumñae na visuar amiuen ga la poli,
naþa apiuviun ke asape '?Yoko telual kata
kinanena pe ne?' pona '?Yoko tetol mña
kulmrae na yenen sanape ne?'

²³ Sitomen la nene pe mesmes re poli,
komin kiamiu malena naga to laa meta-
van kinanena, a yepemiu na to laa meta-
van kulmrae.

²⁴ Asitomli sako la ne akaka kar ke la
ne. La nene pe amapla re lokove po, la pe
apanon re aþar kinanena pimi po, a pe
lelen kala kinanena re tai naþa awarpolo
se poli. Ana Ntewa pagan la ke ne, a
e kiena navisuena, naga pisu amiu ato
manene laa metavan manu la naþani, ana
naga monar visuar amiu manene laa na
wa taulu la.

²⁵ ?Asitom asape yar naþa naga sitom
manene laa kiena malena naga kilia kila
kiena malena naþa plas imi ve piavi li laa
sane?

²⁶ Peraga, pe sa re nene po, komin naþa
kam na taþatete akila narin sur tai ne
sanene, po pon kam na ve asitom manene
re sur taþena lala e kiamiu malena.

²⁷ "Asitomli meme tanea la ne pitotovi
kar ke ga la ne. La na pe amiyumñae re
poli, a pe asuluwo re mñala kulmrae la
poli. Ana nevisa van amiu, þarin suþe
Solomon nanua sumo, naga pe yar na
sur moki a naga kiena sur make ga, ana
mña kulgota pe miyowau ruru re poli
sane meme la nene.

²⁸ Meme la nene na legiena taaga ga,
yoko peni ga na asikapi la, ana Ntewa
sumña miyowauia ruru la paþisi. ?Ana
asitom asape yoko taþatete Ntewa war
kulgota van amiu? Peraga, kam na pe
apiawa re nena mñarera e naga poli.

²⁹ Komin sur ne la na nene, pe pon
re sinemiu ulen manene sitomena, naþa
asape '?Sanape na yoko tekinana, pona
tomun suria, pona telual mña kulgota?'
Pe pon re asitom manene sur la sanene
poli.

³⁰ Ee lelaga þa, yar make ga lala na
purvanua kerkeviu na yomarava nini la
asumña asitom manene sur la ne sanene
silaga, ana amiu na, Arimamiu kilia pa rui
sape yoko monar awar sur la nene.

³¹ Sur naþa asitom þesan ve keviu e ki-
amiu malena, naga navesuþenena kiena
ne Ntewa. A visae akila sanene, yoko
naga la mña sur taþena la nene van
amiu.

³² Lelaga þa, kiau narin sipsip lala,
Arimamiu sinenan manene paþisi sape
tañan amiu aimi avesuþen kiena yeririna
lala, ana kam na taþatete sinemiu konan
sur tai, yoko suri punu ga woga ga van
amiu."

Yar naþa naga pe yar na suri moki

Matiu 6:19-21

³³ Ana Yesu pisapenua "Po pon auli-
wilin plan kiamiu sur la nene, awar kana
varu la va van la naþa limala korena vena
aiila la. Visae akila sanene, sa naþa aþar
ke kiamiu pupia karo tai naþa mñeke ma

e peni, naþa taþatete viowa pogos tai, a akokonia ke kiamiu sur moki paþisi pito ke ea, naþa akilia awasinea, naþa yar navinauena taþatete si warlua vetan amiu, naþa kirara la taþatete si akila karea.

³⁴ Popon sane kam na kiamiu sur nowo la ve moki sanene su ma e peni, komin naþa yoko kiamiu sitomena lala sulue ga e yo nene naþa kiamiu sur nowo la sike ea.”

Nalogenā la monar asu ruruian naþa Suþe wasuþe sina

Matiu 24:42-51; Mak 13:33-36

³⁵⁻³⁶ Ana Yesu pisa mēna pan la, pisape “Monar asu ruru silaga vena kiamiu Suþe imi mālavin amiu. Kam na monar ave sa yar na yuṁaena kiena ne yerkawa tai, naþa mligan la vena va e talopaena tai. A amiyowau ruruia, a asilan kiela kapi lala, asumālu ga asumā ga, ana pog ya naþa kiela yerkawa imi mālavin la, sigariga mratava, ana la asu ruru asike rui, akilia avietavan veraga.

³⁷ Pupia navisa ruruena sike e yar la naþa amiyuṁae sanene, pogos naþa kiela yerkawa pimi mālavin la, ana asumāte mā naga, atavilo ga asumā ga. Yokorena kiela yerkawa kekarān la vaþisi, ana yoko naga va yowau, siraunia imi ana la aiilan ga naþa vio la vena atotano e kana lelen kinanena, naga piovion kala kinanena tanea nene.

³⁸ Pe sur koren ga visae yemalo rui, pona pa ko yepelilika la ne, pona lavis lakaporo kokoreko, ana visae yerkawa naþani imi lual kiena yeririna la atavilon ke sanene wa, þisi na naga kila wo manene laa van la sane wa.

³⁹ “Ana maran taaga sina ga, visae yar tai kilia ruru pogos naþa yoko yar na vinauena tai imi māna, yoko yar nene taþatete ligan māna yuṁa ana va koyo tai, ana naga monar su ruru ga sumāte māga.

⁴⁰ Ana visae sanene, kam mēna monar asururuia, asumāte naþa inu Narina ne Yeririna neim nomālivi, komin naþa yoko neim nomālavin amiu sina e pogos tai naþa pe yar tai kilia re poli, pona sitom ke sape yoko nowasuþe inu ea.”

Pakaiwa na yar na yuṁaena naþa kiena yerkawa þasuþe si pimi

Matiu 24:45-51

⁴¹ Ana Pita piun tan Yesu, pisape “? Suþe, þakaiwa naþa opisa ga na wa, opisa ga pan imimi imimi kioṁa li nalologena lala, pona pe kien yaru make ga?”

⁴² Ana Yesu pe pisatame ruru re poli, ana pisatamea e þakaiwa tai.

Pakaiwa nena sanini “?Visae yar na yuṁaena tai, naþa naga pe manmarua ruru ea, a naga þuarar ruru yuṁaena nene, naga yuṁae sanape? Visae kiena yerkawa ligan yo vena va perina, ana yerkawa naþani ligan kiena yuṁaena lala se e limana. Ana yar nene naga visuar ruru yar na yuṁaena taþena lala, yoko uarar ruru yuṁaena la nene.

⁴³ A pogos naþa yerkawa wasuþe sina, yoko lual sane yar na kiena yuṁaena naþani, sumā þuarar ruru ke yuṁaena la naþa na wa. Ana e pogos nene, yar na yuṁaena naþani kilia loge wo vaþisi,

⁴⁴ komin yoko yerkawa naþani ligan make kiena sur la e limana ne. Ee, a yoko Ntewa mēna ga kila ve sa ke ga.

⁴⁵ “Ana visae yar na yuṁaena naþani yuṁae viowa ga, ana pogos naþa kiena yerkawa mligan yo pa sike perina, yoko naga sitom visave ‘E, yerkawa nene pa sike gare piavi laa narui, pona ve imi re si yo.’ Ana yoko naga sumālu kila viowa va kiena yar na yuṁaena lala, pona sira na yuṁaena lala, a yoko naga sumā kinanan kilavaru kiena ne yerkawa naþani, a va mun luen ga wii e legiena punu ga.

⁴⁶ Ana yoko yerkawa naþani wasuþe sina e legiena tai naþa yar na yuṁaena nene ilan ga, e pogos tai naþa yar nene pe sitom re pisape yoko imi e poli. Ana yoko yerkawa naþani la pupia nakoena tai van yar nene, naþa yoko kila naga va sike e yo kiena ne þarmarera lala.

⁴⁷ “Yar na yuṁaena naþa kilia ruru ya naþa kiena yerkawa sinenan pisape monar kila, ana siraunia naga pe kila re poli, yoko awe kare naga vaþisi.

⁴⁸ A yar na yuṁaena naþa kila pi-owa sane popon awe kare naga, ana

komin naga mminue ga, yoko tařatete awe manene naga.

“Yar nařa Ntewa mla keviu pania, Ntewa sinenan pisape visu yaru nene yuńae ve keviu mńena amio. A yar nařa visae yar la amligan sur la moki se limana, yoko aviun ke sina sur ve moki vania va laa sane na wa.”

Yesu pe purřes nen yar na kaween yaru Matiu 10:34-36

⁴⁹ Ana Yesu pisape “In na nepimin nena nesape neligan kapi e yomarava nini, a popon manene visae kapi nene vivaga rui, ana pere wa.

⁵⁰ Ana pupia yuńaena tai sike vamon inu wa, vena in na monar neva nowar-poyo ea, a nanagane in na nakawean in manene ke vanon rui. Popon sur nene imi vilaga, vena nekilia nekila makea.

⁵¹ ?Kam na asitom ke asape in na nepimin nekila sa nařa pupia suńare imi sike e yomarava? Peraga, in na pe nepimin re neligan suńare e poli, ana in na nepimin nekila řelaga na viařaena imi ve keviu.

⁵² Siar nanagane, pona e uńa tai, yar la lima asike ea, ana yoko la ve telu aviařa vetan la ve lua, pona la lua aviařa vetan la ve telu.

⁵³ Yoko yar la asuńa aviaviařa, nařa yoko mńee lala akawe arimala lala, arimala lala akawe narila mńee lala, a anela lala akawe narila sira mńee lala, a sira mńee lala akawe anela lala, a yoko anen simem lala yoko akawe sira la nařa atalopa amio narila na yermńene lala, a yoko sira la nařani akawe anela simem la nene.”

Monar avisu kilale kile na pogos kiena ne Yesu

Matiu 16:2-3

⁵⁴ Ana Yesu pis sina ga pa řina lala, pisape “Pogos nařa ita tevisu pupia malo mńeke e yo nařa lagi molue ke kom ea, tekilia tesape řisi na yua wowo, a ve ve piavi re yoko yua nene imi.

⁵⁵ A pogos nařa visae teloge kieta lagi ura yui, nanene na tekilia tesape yepis-usun vařisi ne, a yokorena monar ve sa ga nene narui.

⁵⁶ ?Nanene narui, nane asuńa apisu kilale ke kile lala na sinapane a na yomarava nini narui, avisave yoko pogos ve sanape pona ve sanape, ana sanapen nařa pe apisu kilale re kiau kile la poli, na pupia pogos nanagane nařa nesike nemio amiu ea? ?Pona kam na yepemiu mavin ga visu kilaleen yo? Aulai, kam na apilaven manene laa kiamiu visen koren la nene pařisi wa.

⁵⁷ “Popon kam akilali nařa akilia towe laa narui sane mrapa ya nařa mesmesun aliluia.

⁵⁸ Visae pogos tai oveveyun sur tai omio yar tai, ana naga sinenan pisape were ko ova osuńalu ose marana ne yar naliřereena, popon okilayonli nařa vena ovis ruru omio naga sumo wa, pogos nařa pe atol re kumali poli wa. Visae peraga, pona naga ligan ko e limana ne yerkawa na liřereen yar yo, ana yerkawa nařani pona naga ligan ko mńena ova e limana ne yar na taren yaru lala, a yaru na taren yar lala pona aligan ko e yuńa nakoena yo.

⁵⁹ Lelaga, nevisa van ko sanini, nesape visae sanene, yoko tařatete si omolue e yuńa nakoena, vano-o oul plan make kiońa nakoena sumo wa, řisi na okilia omolue sina.”

“Ana visena nini pe lelaga e kiamiu malena na yomarava nini, a pe lelaga mńena e lepas na pun amiu amio Ntewa.”

13

Visae ve ovilopu ko re yoko omare

¹ Ana yeririna lařas nařa asike e pogos nene, la asunyu pa Yesu e lepas kiena ne le Kalele lařasia, nařa yerkawa nae Rom nařa Paelat kila řelaga piowa tai pan la. Apisape “La nene, asike e Yuńa Wa mńana ne Ntewa, ana pogos nena nařa amlotun ke Ntewa akila kuřařaena pania, Paelat la apim amial momar la. A la ařalelar kuruta kan la nene amio kuruta na kuřařaena nene nařa la asuńa akila ke ne.”

Ana pogos nařa apisa sur nene pa Yesu, la asitom pa rui asape sur viowa nene nařa pimi mńalivin la nene, pona

nakoena kiena ne Ntewa tai nene yo komin kiela sur viowa lañas naña akila.

² Ana Yesu pisatame la, pisape “?Kam na apisu le Kalele la naña kiela marena piowa sanene, asitom sanape? ?Pona kam na asitom ke asape la nene na ape yar viowa la lala, taulu le Kalele tañena lala, pona kiela nakoena ga?

³ In na sineun nesape nevisa van amiu nevisave peraga, pe sa re nene poli. Ana kam na monar avisuar ruruia, komin visae ve avilopu amiu re, yoko kam mēna amare e pēlaga tai ve sa ke nene.

⁴ A kam na asitomiyluli mēna yuñna na kirakiravaena naña mēke e pulkumali naña Siloam. Naga mon manene metava pañisi, ana poglis nanua mloru ne, ana kowar yar lala, la lualima taaga pa orelu [18] amare. ?Sanapen la nene? ?Pona kam na asitom ke asape la mēna apiowa laa taulu le Yerusalem tañena lala, pona nanene na sane kiela nakoena ga ne?

⁵ Ana peraga, naga mēna pe sa re nene poli. Ana in na nevisa si van amiu, kam na monar avisuar ruru amiu, komin visae ve avilopu amiu re, yoko kam mēna amare ke ga e pēlaga tai ve sa nene.”

Pakaiwa na purpiliva naña pe p̄ar re mras poli

⁶ Ana Yesu pisa sina p̄akaiwa tai, naña pisa sanini, pisape “Yar tai, kana purpiliva tai kapuru sike e kana lokove. Ana pogos tai yar nañani pimin purlaki nena, sinenan pisape visulia p̄ar m̄a mrasa pona peraga. Ana pimi pisulia, m̄al purlaki naña pe p̄ar re nena mras poli.

⁷ Ana pis pa yar naña pisuar ke kana lokove, pisape ‘Nanagane tol kas telu narui naña nepimin nakale mras nen purpiliva nini, ana peraga. Sineu maren rui, naga mono korenan ke ga yo wo nene, yoko otelua ga vano.’

⁸ “Ana yar nene sinen miye purpiliva nañani, pisa pa kiena yerkawa, pisape ‘Visae sanene, yoko teliganli mon m̄a tol si kas ve taaga. Yoko nekilayonli naña nekila ruru sumo, yoko nekilvivi purp̄esa, a yoko nokoven sin puluk lañas va ea vena kila kapur wo.

⁹ Ana visae kapur wo, war towe m̄a mras lañas e kas na sirau, yoko kilia sum̄a ga sanene, ana visae peraga, naga narui yoko otelua ga na wa.’”

Ana p̄akaiwa nene pisayu ke sape narin pulmas teke ga wa naña yaru la akilia avilon la, visae peraga, yoko Ntewa la nakoena van la.

Yesu kila ruru sira marua tai e Legiena Wa

¹⁰ Ana e Legiena Wa tai, Yesu sum̄a pian ke yeririna lala loyum̄a e kiela yuñna na leniena.

¹¹ Ana e yo nene, sira marua tai sum̄a ea, naña ninuna na maiena viowa sike ea. Ana ninuna nene kila naga pa tol kas lualima taaga pa orelu [18] rui, kila m̄asina ne sira nene pulu nena pañisi, naga sum̄alu mesmes p̄ele sina.

¹² Ana pogos naña Yesu pisuia, pio pimi, pisa pania, pisape “Sira marua, nevisa sanini, nevisave ko, inanena naña piar ko ke ne, ligan ko ga nanagane.”

¹³ A Yesu mligan limana tea amio visena nene, ana m̄asina pimi po ruru veraga e nena e pog nañani, ana sira nañani mloge po pañisi, mieluar Ntewa.

¹⁴ Ana nasumonen na yuñna na leniena nañani sinen kar Yesu vanon naña kila ruru sira naña e Legiena Wa. Ana pis pa yeririna lala, pisape “Sa naña tekilia rui, tekilia teyuñae e legiena ve orai, a legiena ve taaga ve teyuñae re. Visae sinemiun naña akila plan maiena vetan amiu, popon aimi e legiena orai la nene, ana Legiena Wa na sa nini pe pe kana pogos re nene poli.”

¹⁵ Ana Supe pisatamea, pisape “?Sanape? ?Pona akepu ke kiamiu puluk la e Legiena Wa yo, pona pe akila re poli? ?Pona apagan ke kiamiu sur mal lala, pona amla wii pan la e Legiena Wa yo, pona pe akila re poli? ?Ana vanon ya ne kam na pe akekan re naña nekila suri wo e sira marua nene? !Kam na ape yar navilavenen ga vis korenen nene!

¹⁶ Sira marua nini, naga vineta tai naña ita punu ga tomolue e lus kiena ne Epraam, ana Yermare Lego piar manene panon inanena nene mēne kas lualima

taaga pa orelu rui. Ana in na nepisu sane Legiena Wa naga torokin ga naña tourelua naga e yo viowa naña naga sike ea.”

¹⁷ A pogos naña Yesu pisa visena nene, kila kiena nasinekar la nañani amloge amawa pañisi e marana ne yeririna lala. Ana yar tañena lala, la amloge akekara pañisi e yuñnaena namareraena wo la naña Yesu kila pan la.

Pakaiwa na kurus nen mrapa
Matiu 13:31-32; Mak 4:30-32

¹⁸ Ana Yesu pisa ke sina ga, pisape “? Yoko nevisa visena ya ne van amiu vena kila na akilia sane nasuñenena kiena ne Ntewa naga sanape? Yoko nevisave nasuñenena nene naga sane sur ya?

¹⁹ Yoko nekilali naña nekila merarava van amiu e ãakaiwa nini, naña pisape: Nasuñenena nene, naga sane kurus nen mrapa naña mloru pito pelan te laki tai. Kurus nene na ve tokak pañisi, ana pogos naña kapuru, pimi pe purlaki tai naña keviu manene laa, ana manu la akila mñala ponovi lala e kana korowas lala.”

Pakaiwa na is
Matiu 13:33

²⁰ Ana Yesu pisa sina ãakaiwa tañena pan la, pisape “? Pona nevisave nasuñenena kiena ne Ntewa sa si ya narui?

²¹ Nasuñenena nene, naga sane sira tai ãalelar is amio yavi na kilaparavi pa e pupia pialora tai, ana narin is nañani kila kilaparavi la punu nene mlapa.”

Mrapa lua ga
Matiu 7:13-14,21-23

²² Ana Yesu mla si kiena mrapa, sinenan pisape va ma Yerusalem. Ana pogos naña pa sane, pa kome pulkumali lala, suña pian ke yeririna lala.

²³ Ana yar tai piun tania, pisape “?Suñe, la naña yoko atol malena la moki, pona pe la moki manene re poli?”

²⁴ Ana Yesu pisatamñe la, pisape “Monar akilayonli naña ava loyuma e pulutava tañena nene, naña ve tokak la ga. Nepisa ke lelaga na pan amiu ne, nesape yoko

yar la ve moki naña sinelan asape ava loyuma, ana yoko tañatete akila.

²⁵ Nanene komin naña siraunia, yoko yerkawa na yuma, naga visu sane toroki rui, ana yoko naga sumalu, kotava ruru sina. E pogos nene, yoko kam ve moki naña aim awon amiu ase mratava nene, asigar ga avio, avisave ‘Suñe-o, awis ovieta van imimi!’ Ana yoko yerkawa nañani visatamñe ga sanini visave ‘Peraga o, nemninue amiu nena ga! Kam na yer pe la nene?’

²⁶ Ana yoko akilali naña avisa van e pogos nene, avisave “?Ana sanape, ko na pe ositomñal re si naña osape ita ke narui nanua tesuma tekinan ke lele taaga ne? Imimi ke narui naña opam opian imimi ke e yometava la nene e kiamimi pulkumali lala?”

²⁷ Ana yoko naga visa van la, visave ‘In na nepisa pan amiu yam tai rui, nesape nemninue amiu nena ga, nesape kam na yer pe la nene. Nekilia nesape kam la nene kam na yar na kilaen ga ãelaga viowa lala. !Pogaga, kam na aure matan inu nagane!’

²⁸ E pogos nene, yoko kam na aloge viowa vañisi, yoko atag vano-o ãisa, asuma akar maluemi. Nanene komin naña yoko kam na avisu yeririna wo lala kiena ne Ntewa, naña sane Epraam, Aisak, Sekop, a navisawalen tañena mñena ga lala, la asu ruru ga asike loyuma e kiena nasuñenena ana kam na akoven amiu asumalu asuma ga vanua sanene.

²⁹ “E pogos nene, yoko yeririna tañena la ve moki naña amolue e mrapun yomarava varoka, aimi atotano vena akinana e pupia ãañagena loyuma e navesuñenena kiena ne Ntewa, ana kam na tañatete ava loyuma.”

³⁰ Ana Yesu pisa make kiena visena e pogos nene, pisape “Ana yar la naña asirau, ãisi na la asumo, a la naña asumo, ãisi na la asirau.”

Parin Suñe Erot sape weñar Yesu
Matiu 23:37-39

³¹ Ana e pogos nene naña Yesu pa ke ma Yerusalem wa, Varasi lañas apim

puna, apisawal pania, apisape “Pona ko pe okilia re poli yo, naña Āarin Suĕ Erot, naga pisaar rui pisape yoko weñar ko. Popon oure ova gar Ÿutea sumo wa, komin naga pisuar ke lepas nini.”

³² Ana Yesu pisatamē la, pisape “In na pe nesitom re kawē nene nesape naga pe yar tai naña kilia kila sur tai van inu poli. Yoko ava avisawal e marana, avisave in na nekila ke ne kiau yumāena sumo wa. Avisava vania avisave in na nomēne plan ke yermare lala, a nekila ruru ke namaiena lala, a yoko neyumāe ve sanene p̄ane, amio peni, amio mēna vewo, vano-o nevisu sane nekila make nenaga.

³³ Ana nekilia nevisa van amiu, sane ve asitom manene in re, komin naña e ke e legiena la nene narui, in na nomolue nepa ke sanene narui. Monar neva netol ke ne yo ma Yerusalem wa, komin naña nepisu sane siar nanua sumo yar la amē momār kiena navisawalena lala e ke e yo nena nene narui.”

Yesu sinen miye Yerusalem

³⁴ Ana e pogos nene, Yesu sitom manene Yerusalem pano-o taginia, pisape “Yerusalem o! Komin ya ne omē momār ke navisawalena lala, a okove momār ke yar la naña Ntewa mligan la pimi pan ko? Yam mok liu naña sineun nesape neligan lumāu yervivi kionā yeririna lala, sa naña lakaporo mligan narina lala apim atapolou vatanon kupena, ana kionā yeririna lala pe akekarān re poli.

³⁵ Ana opisu ke ne, Ntewa pilon ke māsina pan ko narui, ana naga pitetalia inu nepim p̄es e nini, ana nevisa van ko, nesape yoko kionā yeririna lala taĕatete si alual inu, vano-o tol pogos naña avisu kilale inu, avisayu inu, avisave

‘!Ntewa na mava, ovisa ruru naga naña pimi e kionā kia!’ ”

14

Yesu kila ruru namaiena tai

¹ Ana e Legiena Wa tai, nasumonena tai kiena ne Varasi lala p̄ere Yesu pa kinan māna. Ana yar taĕena mēna la p̄asia asike e pogos nene, naña pe sinelan re

Yesu poli, la asumā apisusu naga visae kila sur tai naña ve mesmes re, la akilia akila sur tai vania.

² Ana yar namaiena tai sike loyumā amio la e pogos nene, naña yar nena yepena la sirorop paĕisi. Ana Yesu pisu yar nene,

³ ana pis pa navianena navisaluaena lala, piun tan la pisape “?Sanape e lepas na kieta navisaluaena? ?Pisape tekilia tekila ruru maiena e Legiena Wa, pona pialuĕar pisape ve tekila ruru re?”

⁴ Ana pogos naña Yesu piun naviunena nene, apisu sane taĕatete avisatamēa, atopur nenaga. Ana Yesu p̄ere yar naĕani pimi lavis puna, kila ruru sina, ana pisape kilia wasuĕe si va ga umā.

⁵ Ana naga pis pa la naña asike ne, pisape “Kam na asitomyulia. Visae kam yar tai nene, e Legiena Wa tai, narina tai pona kiena sur mali tai va loru vito e p̄iliĕili na wii tai, ana yoko okila ve sanape? ?Yoko ovitaĕilin ne, naña ova ga ourelua si ne, pona ovisave: Ke, piowa narui e, nagane na Legiena Wa nini narui, navisaluaena pisape ve neyumāe re e Legiena Wa, ana pona naruu pona kiau sur mali nene mon mā e p̄iliĕili wa, neva ga nourelua peni? Peraga, pona yoko ovitaĕilin ga ourelua yo.”

⁶ Ana la amninue kare narui amā yoko avisatamē si naga e lepas nene ve sanape, la asupur ga asike na.

Pe pon re yar ga visirlua sina naga poli

⁷ Ana pogos naña apim asun ke naña atotano e kinanena nene, Yesu pisu kilale naña la taĕena laĕas naña p̄ar na p̄aĕagena pio la apimi, sinelan manene alual yo tai naña po, la apa atowo lelen yerkawa la metava. Ana Yesu pisu kiela p̄elaga navilaveena la nene, ana pisa pan la pisape

⁸ “Visae pogos tai avio kon ova e kinanena natalopaena tai, pona sur tai sane p̄aĕagena, ana pe pon re ovitaĕilin naña ova oto nena tano e lelen yerkawa la poli. Pona yo nene akila ruru monnate ke pupia yerkawa tai yo, ana pe okilia re poli,

⁹ ana yoko þar na þaþagena imi visa van ko, visave ‘Ake wolai, pe sineyeena paþisi, ana yoko otom ke ne tano wa, komin naþa oteke e lelen kiau yerkawa naþa.’ Ana yoko omawa ologe viowa vaþisi, ana yoko monar oto si tano, okilali naþa olual narin pulmas tai tano vena okilia olawan marama ea.

¹⁰ “Ana þelaga wo na sanini, visae avio ko ova e kinanena tai, pogos naþa omalivi ea, yoko ova oto ga tano omio yar kar ga lala. Ana visae þar na þaþagena vim visu ko, visave ‘E, yerkawa, nepisuar ruru lelemã teke meta ma e ne rui. Yoko ita lua tevavini, neligan ruru ko otea.’ Ana e pogos nene, okilia ologe wo vaþisi, naþa þar na þaþagena pisirlua ko sanene e maran yeririna taþena la naþa akinan ke lele taaga.

¹¹ Naga sanene narui, sane yar naþa naga ga pisirlua naga, yoko aligan naga mon tano, ana yaru naþa mligan naga mon tano, yoko avisirlua naga.”

Popon ovio mēna yar naþa limana korena ga imi e kioṃa þaþagena

¹² Ana e pogos nene, Yesu pisa mēna visena tai pa yar naþa pio naga pimi kinan mēna, pisa pania, pisape “Nagane, tepisu pogos naþa visae yar la akila kinanena tai, la sinelan ga avio kiela erau wo lala, pona kiela wolai lala, pona kiela namratava taþena lala, amio mēna pupia yerkawa la naþa asike lavisin la. Akila ke sanene, komin akilia ke asape visae siraunia, visae la mēna akila kinanena pogos tai, yoko monar akila maran sina van la.

¹³ Ana þelaga wo na kilaen e þaþagena naga pe sa re nene poli. Popon manene ovio yar taþena lala, sane la naþa limala korena ga, a la naþa tasnela la pioyowa ga, pona laulu lala, pona kilamara þala lala, yar la ne sanene, la aim akinana amio ko.

¹⁴ Yar sur la ne sanene la taþatete akilamaran si van ko pogos tai, ana pogos naþa Ntewa pisa naþa okekaran opure la nene apim akinana moṃa, yoko naga kekara vaþisi. Yoko naga visa ruru ko, a yoko

owar kioṃa nalaena wo vanonia, nanene e pogos naþa naga kila kiena yeririna mesmes lala amal si vetan marena.”

Pakaiwa na visawoena

Matiu 22:10

¹⁵ Ana yar tai toṃa e kinanena nene, naga mloge mēna naþa Yesu pisayu ke pisape yoko Ntewa visir plan kiena yar mesmes lala e legiena maro, ana naga pisape “!Lelaga naþane, yoko wo manene laa van ita e pogos nene, naþa ita tesikol ita e pupia þaþagena nene loyuma e nasuþenena kiena ne Ntewa!”

¹⁶ Yar nene pona naga sitom ke sape naga po narui, ana yar la na sanene la sinelan re vaen loyuma poli, ana Yesu pisa þakaiwa tai e lepas nene, naþa sanini “Yerkawa tai, naga sinenan pisape kila pupia kinanena tai, ana pio yar la moki naþa aimi.

¹⁷ Ana pogos naþa kila ruru make sur punu ga þisi, naga pitetalia kiena yar tai vena vanon were la naþa apio la þisi rui aimi.

¹⁸ Ana pogos naþa kana yar nena pimi malivin la, la make ga nene maran taaga asumã akila ke sina ga visena na visawoen suria. Tai pisa sanini, pisape ‘Pogaga, ana in na nopul ga kiau narin porotano tai na wa, ana nepavin ke nesape nevisulia amã porotano nena sanape wa. Yoko ovisa va yerkawa ovisave pe nasineyeena paþisi ana taþatete neimã nanagane.’

¹⁹ A taþena, pisa sanini pisape ‘Pogaga, ana in na nopul ga kiau puluk laþas na wa, vena ureen kiau kat lala, ana nesape neva nevisu la lia amã amãrera ruru maga. Yoko ovisa va yerkawa ovisave pe nasineyeena paþisi, ana in na taþatete neimã nanagane.’

²⁰ A taþena mēna ga, naga pisape ‘Pogaga, ana in na nekila ga þaþagena na kiau talopaena nanua ga nagane, ana in na nepisu sane taþatete neimã yo, komin sur moki paþisi.’

²¹ “Ana yar naþani pimi pisawal visena la naþani pan kiena yerkawa, mloge, sinen kar la. Ana naga pitetalia sina kiena

yar nařani, pisape 'Pogaga, oyal kawa, ova e narin mrapa la ne lavis ga namã, ova olual la nařa pe kiela sur re poli, amio la nařa tasnela la pioyowa ga, amio laulu lala, amio kilamara kata lala, ana owere la nene aimi e kieta řařagena.'

²² Ana naga pa kila, ana siraunia řasuře si pimi pun kiena yerkawa, pisape 'Suře, sur nařa opisa řa, nekila rui, a yaru moki apimi, ana yepa keviu mēke ga wa.'

²³ Ana pitetalia ke sina ga, pisape 'Visae sanene, ova sina, ova kare ga yo umã la e pulkumali, a omãreran kare ga va yar nařa visae olualia, ovisave monar aimi, vena akokonia kiau kove, vena akila řařagena nini imi wo.

²⁴ Tařena la nařa akila ke navisawoen viowa lala, in na nepio ruru la nesape aim e řařagena nini řa rui, ana nanagane, yoko tařatete nena lala yaru tai kan re narin kinakinas nen kinanena tai e řařagena nini řisa, peraga. !Nepisa ruru ga ne!'

Yesu naga monar to sumo e malena kiena ne kiena nalogena lala

Matiu 10:37-38

²⁵ Ana Yesu mla sina kiena mrapa, pa ke meta ma Yerusalem na wa, a pupia řina moki la ataveveia. Amiyal mã panoo, pilopu naga kira pimi pula, pisa pan la pisape

²⁶ "Yar nařa sitom sape taveve inu, naga monar ligam inu neto nena sumo e kiena malena, in na neto manene laa metavan arimana, pona anena, pona wona, pona narina, pona wenla, pona vinena. Yar nařa pe pisu kilale re kiena malena sane naga pe pe sur re tai poli, naga pe torokin re nena nařa imi sane kiau nalogena poli.

²⁷ Ana yar nařa sinenan sape imi ve kiau nalogena, naga monar kila sanini. Monar kus kiena lak torovia, taveve inu lue ga, sa nařa kilia tamãan naga loge viowa vanon inu.

²⁸ Po pon asitom ruru ke ne sur nene sumo wa, řisi na avitařilin visena, avisave sinemiun ataveve inu.

"Nanene naga sa ga nařa yaru tai, visae sitom ke sape kilia kila pupia yumã tai, naga monar totano, visu ruru ke ne sumo wa, wolo ruru kiena kilavaru nakilaen yumãena nene, naga monar visu kilale sane yoko naga torokin kilia kila make pupia yumãena nene, pona pe torokin re poli.

²⁹ Visae peraga, yoko naga siaria, yumãen ruru řeren yumã nena, va laa sane, yoko ilan ga nařa limana ve plas ruru nena ga ana yoko yumãena nene loru mēke na. Ana pogos nařa yar tařena la aimi avisu yumã nařa komřas mēke na amio kana lepas ne lala, a pe mãero pa re e poli wa, yoko avitalia kare yar nene narui, yoko avisave

³⁰ 'Ke, yar nene, kiena sitomena po pařisi. Sinenan sape yumãen mãana yumã, ana pe maplar ruru re kiena yumãena po, ana tařatete nena kila makea.'

³¹ "A yar nařa sinenan sape visaar nařa yoko imi kila yumãena amio inu, naga monar kila sane řarin suře tai, nařa yerkawa tařena sumãalunia, řere kiena pupia řegas nen nakilaen mara tai aim akila mara vania. Li namara kiena ne řarin suře nene pe la moki re poli sane yerkawa nene, ana řarin suře nene monar visu ruru sumo, monar sitom ruruia, sane naga kilia taulu pupia řegas nařa pimi ke ne, pona tařatete tauluia.

³² Visae visu sane tařatete kilia kila, naga monar ligam visena vano va yerkawa, pogos nařa sike perina wa. Naga monar viun tania, visave yoko ul ya nařa yerkawa nene pisa, vena lalua asu sina e sumãare. Visae ve sanene, naga monar vatanon yerkawa, tamãan make nena naga vania.

³³ Ana kam nařa sinemiun asape aim ataveve inu, monar avisu kilale sane kam mēna monar akila ve sanene van inu. Yar nařa pe tamãan re kiena malena poli, amio make kiena sur van inu, naga tařatete kilia imi sane kiau nalogena."

Pakaiwa na sive naña apeven e kina-nena

Matiu 5:13; Mak 9:50

³⁴ Ana Yesu pisa sina ðakaiwa taþena pan la, pisape “Sive naga pe sur tai naña po paþisi, ana visae pogos tai sive nene ve melkalka ruru re sina, taþatete kila kiena yuþaena naapo, a taþatete si sur tai kilia kila imi melkalka ruru sina.

³⁵ A sive na sanene, taþatete si kilia kila yuþaena wo taþena tai van ko moþa uþa, pona van mþena koþa lokove. Sur nene naga pe na kovenen ga va e kororak narui.

“Naga ke nene narui naga pe kiau totou na kiau nalogena naña kilalu kiena naþareraena nakilaen kiau yuþaena. Ana yar naña kiligana teke ea, popon naga loge kilale kiau visena nene.”

15

Yesu kila erau amio yar viowa lala

¹ Ana e pogos la ne sanene, apisu sane yar laþas naña yar la pe asitom la re poli, sane yar na takis lala, amio yar taþena la naña Varasi la asape la apiowa ga, la mþena apim ke lavisin Yesu vena ayagogonia.

² Ana pogos naña Varasi lala amio navianen navisaluaena lala apisu naña Yesu sinenan pisape sun amio la nene, apisu sane piowa ga, ana asuþa apisa ke apisape “Lelaga kemua naþane, yar nene naga sitom ga li namlamulen viowa la ne sanene, a silaga sinenan mþena sape va kinan lele taaga amio la. ?Pona naga pisu sane la ga kiela þelaga po yo, a ita na kieta piowa ga?”

³ Ana la kiela sitomena sane kila Yesu sun pan la e ðakaiwa la naña pisayu sanape naña naga pimi e yomarava nini vanon yar naña kilalu mrapa.

Pakaiwa na sipsip naña kovio

Matiu 18:12-14

⁴ Þakaiwa þesa kiena ne Yesu e lepas nene naga sanini, naña pisa pan la, pisape “Yar tai, naga pe yar na vaganen sipsip, ana kiena sipsip lala tol ponotia taaga [100]. Kiena sipsip la moki sanene narui,

ana visae pogos tai tai va kovio, yoko naga sitom korenan ga, pona naga sitom vaþisi? Yoko naga monar ligan kiena sipsip taþena lala asuþa ga sanene wa, ana naga vanon naña kovio, kale mþa vano-o lualia.

⁵ A pogos naña lualia, kekaran vaþisi, yoko kuslua sipsip naþani va e purkaunena, kus wasuþe imi.

⁶ Ana siraunia, pogos naña þasuþe si pitomi tano uþa, yoko vio namratava la puna pona kiena erau taþena lala vena aimi. Ana naga sunyu van la, visave ‘Aulai, sur tai nini naña ita tekilia teloge won vaþisi. Kiau sipsip tai naña pa kovio na kovio lue, ana yoko nepanonia, nepa nakale mþa pano-o, noþalia. !Pogos naña noþalia, nekekara na nekekara!’ ”

⁷ Ana Yesu pisa meraravan pa Varasi lala, pisape “Ana yoko ve sa ke mþena nene ma e peni. Yar mok liu naña asike e yomarava nini naña sane amiu, la asitom ke asape la na apogaga narui, ana asape ma e peni amloge ke pon amiu la ne sanene yo? Ana pogos naña visae yar namlamulen viowa ve taaga ga, naga vilopu kiena malena, yoko pupia kekaren vaþisi vania ma e peni, naña va ve keviu re laa sane na wa. Suri ne nanene kila narui inu na nekekaran sunen nemio yar la naña kam na pe akekaran la re poli.”

Pakaiwa na kururu varu naña kovio

⁸ Ana Yesu pisa si ðakaiwa tai e lepas nene, pisape “Sira tai, naga kiena kururu varu lualima, naña mlawan ruru teke e mþana loyuþa. Ana visae pogos tai, naga wasuþe imi mþal tai naña mloru rui, teke ko yo, yoko naga kila ve sanape narui? Yoko war kapi vivaga, war plan make kiena suri lala, yevan ruru mþana loyuþa vano vano lualia.

⁹ Ana pogos na lualia, yoko vio namratava la puna, pona kiena erau taþena lala, vena aimi. Ana yoko naga sunyu van la, visave ‘Aulai, sur tai nini naña tekilia teloge won vaþisi. Kiau pupia kilavaru tai nekilaluia pa kovio nenaga, ana siraunia, nakale mþa pano-o, noþalia. Pogos naña noþalia, nekekaran pano-o þisa!’ ”

¹⁰ Ana Yesu pisa meraravan pa Varasi lala, pisape “Ana yoko ve sa mēna nene ma e peni. Visae yar na mlamulen viowa ga tai, naga vilon kiena malena, yoko navisi kiena ne Ntewa lala avisu naṣa pupia kekarena paṣisi ma e peni.”

Pakaiwa na yaru mēe naṣa pa kovio

¹¹ Ana ṣakaiwa maro kiena ne Yesu e lepas nene sanini, naṣa pisape “Yaru tai, narina na yermēne lua, naṣa lalua amiyumāe ke amio naga e kiela porotano.

¹² Ana pogos tai, prasmaro na lalua nene sumālu, pisawal pa arimala, pisape ‘Ata, in na sineun nesape nowar kiau kilavaru komṣasa naṣa na lalumōma naganē ga ne.’

“Ana sur nene pe mesmesun re nena naṣa naga viun sanene poli, komin arimana mali sike ga wa, ana arimana pe pis re poli, mliṣere make kiena suria, tamān komṣas pa prasmaro nene, a komṣas pa mēaru.

¹³ A yokorena yar mēe naṣani sumā ṣiliwilin plan make sur la naṣa arimana ṣar pania, ana siraunia pe piavi re poli, amā ga naga kon make kiena sur lala, ṣar kiena kilavaru pion pano. Ana naga pa sike e purvanua taṣena tai koperin paṣisi, ana e yo naṣani, naga pa make nenaga e ṣelaga viowa lala, kan kilavaru naṣane pano-o, kila kare make punu nenaga.

¹⁴ “Ana naga kilia ruru sane limana plas ruru ga na wa, a e legiena nene, pupia viso pimi tol purvanua naṣa naga sike ea, mligan yar mēe naṣani sike e yo tai naṣa mārera paṣisi.

¹⁵ Ana pa kale yumāena tai naṣa pona naga kilia yumāen vena tamalia kiena malena, ana pa miyumāe kiena ne yerkaṣa tai e yo nene, pagan kiena nompui lala. Yar mēe naṣani, naga pe mesmesun re kila yumāena nene poli, komin naga palia nompui sane ita le Yu la, ana yumāena taaga ga nene naṣa naga kilia mālia.

¹⁶ “Ana miyumāe mā sanene pano-o, ana pe amla re kinanena pan poli, a pe māal re mrapa na lualen kinanen poli, kila naga visokar luen ga. Naga visokar mā sanene pano-o sinenan sape suan limana

vito e karo na kinakinaṣ nen kinanena ka nompui la naṣa komṣas pililua rui sike ea, amio purkavila na kona la naṣa kiena yerkaṣa ponpolo sumā ga vena kiena nompui la akania.

¹⁷ Ana pogos naṣa naga sinenan ke sape kila sanene, naga ga pisu kilale si naga narui, pisu kilale naṣa kiena ṣarmārera ga kila kare manene si naga. Ana sitoṣal si arimana amio māna umā, pisape ‘Lelaga kemua naṣane, in na nepe wowe paṣisi. Kiau ṣarmārera ga nane kila nesike viso karmārin ke e yo nini. Ositomyu la naṣa sane ape yar na yumāena kiena ne ata. Naga ṣar ke kinanena moki pan la e legiena punu ga, naṣa yoko akan make ṣele ga.

¹⁸ Sanene, popon nowasuṣeli in ga narui, neyumāe re ve sa la nene. Yoko neva nevisu ata, nevisa sanini vania nevisave: O Ata, in na nekila pupia mlamulen piowa pa Ntewa, a pan ko mēna ga.

¹⁹ Nanagane, pe popon re si naṣa ovisu inu sane nepe narumā tai poli, ana nesape neviun tan ko vena sinemā ye inu, otamān inu neyumāe re ga sane lala yar tai naṣa miyumāe kiomā ke ne.’

²⁰ “Ana naga kila ruru kiena sitomena sanene, ana sumālu, pimi lelei mā pimi ṣasuṣe si pu arimana.

“Naga pe kilia re poli, ana arimana sitoṣal luen ga naga silaga, sumā kirakira ke mrapa sape pona naga imi. Ana pogos naṣa sike perinan umā wa, ana arimana pisu kilalea, sinen miye paṣisi, ana kiriri pa pitawea. Ana pogos naṣa pimi puna narina naṣani, kutararia e limana luwoka yepen mavin liganen sina.

²¹ Ana yar mēe nene pisa pa arimana narui, pisape ‘O Ata, in na nekila pupia mlamulena piowa paṣisi pa Ntewa, a pan ko mēna ga. Nanagane, pe mesmesun re si ovisu inu sane narumā tai poli.’

²² “Ana arimana pisaluṣaria, pio kiena yaru na yumāena lala, pisape ‘E, ava vilaga, ava awar kulgota tai naṣa po, amio kana kulus nen lana, a kana rig nena, sur la ne sanene, awar imi ayen ea.

²³ A narin puluk naþa apagan mlapa po ne, ava awemaria, tekila kinanena tai takania vena tekekara temio prasmaro nini.

²⁴ Komin naruu nini naga mare rui, ana nagane mali sina, naga kovio, nanagane tomal sina.' Ana pe yam piavi re poli, la asuþa akila ke þapagena na yar mee nene narui.

²⁵ "Ana e pogos nene, narina na mearu naga mialoro pa miyuþae ke kana lokove rui, ana siraunia pitomi si uþa. Ana pogos naþa pitomi ke lavisin uþa, mloge yauena a mloge mēna māagena na wolena kapur pa meke na.

²⁶ Ana naga pisu yar na yuþaena la tai, piun tania, pisape 'Ei, ya ne akila ke garo uþa sanene?'

²⁷ Ana yaru naþa pisa pania pisape 'E, womla naþani, naga þasuþe si rui, mal ga! Ana arimoþa sinenan sape kila kana kinanena tai. Aþemmar narin puluk na þa rui!'

²⁸ Ana pogos naþa mearu mloge, sinena mimi paþisi, pe pa re loyuþa amio la poli.

"Ana arimana pimi pis amio, vena were va loyuþa, ana naga yepen mavin ga vaena.

²⁹ Pisa ga pa arimana pisape 'Ata, kas via rui naþa nesuþa nemiyuþae ke nemio ko e nini? In na nemlogear ruru ko e suri punu ga, ana pe okila re sur tai sanene pan inu poli. In na pe noþal re naþa oþemmar narin nane tai pan inu pogos tai poli, vena nekila kinanena tai nemio kiau erau lala.

³⁰ Ana pogos naþa oþal naruþa taþena nene þasuþe sina, ana osuþalu oþemmar kieta narin puluk naþa tesuþa tepagan ruruia. ?Ana yar nene kila ya ne po pan ko? Naga þar plan pupia kioma kilavaru kompasia, pa kan kilavaru nene na namēnen ga sira, pano-o kila makea. ?Pona þelaga ne nanene na ko sinoþania ana okila kana kinanena nena?'

³¹ "Ana arimana sinena miye mēna kiena mearu naþani, ana pisa pania pisape 'Ei, naruu, in na pe nesitom re sanene poli. Ko okila inu nekekara manene laa rui, naþa osuþa omio inu silaga, a kiau

sur la punu naþa sike ne, in na netamnan punu pan ko rui.

³² Lelaga naþa kiau prasmaro nene kilalu kiena mrapa na malena, ana pogos naþa pilopuia þasuþe si pimi pun inu, sineu miyēa, a in na nepisu sane popon kemua tekekaranja, a tekila kinanena tai temio. Womla nene naga mare rui, ana naga mali sina, naga kovio, ana tomal sina!'

Ana Yesu pisa pan le Varasi lala, pisape "Pogaga, þakaiwa nini þisi e nene narui. A sa naþa pisa ne, popon yar naþa kilalu mrapa, naga monar vilopu sina, sa naþa prasmaro nene. Ana monar avisuar ruru amiu mēna ga ve akila re ve sa mearu nene, naþa kiena sitomena marera paþisi, naga pieluen wenla naþa pilopu kiena malena."

16

Pakaiwa na þelaga na yuþaen amio kilavaru

¹ Siraunia, Yesu pis pa kiena nalogena lala, pisa þakaiwa tai pan la, ana pisayu yar na yuþaena tai. Yaru nene, naga pisu sane yoko kiena yerkawa kovenlua, ana suþalu miyuþaen sur tai naþa yoko siraunia kiena malena suþa woga ga. Pakaiwa nena sanini, sane: "Yerkawa tai, naga mligan lua kiena yar tai ve na visuaren kiena kilavaru. Ana pogos tai, visena pimi tolia sape kiena yar nene suþa kan ke ga kiena kilavaru, a kila kare ke kiena sur lala.

² Ana naga pio yar nene pimi puna, pis pania, pisape 'Ei, yar la apisawal ko pan inu rui. In na nepisu sane popon nekoenlua ko si vetan yuþaena nene, yoko oþis nenaga. Ana sumon naþa yoko ovano, sineun nesape oligan ruru sur lala wa vena nekilia nevisu lapui la naþa yar la akila pan inu.'

³ "Ana yar na yuþaena naþani mloge piowa, pisape 'Lelaga o, piowa narui, yerkawa nene lalua yuþaena wo nene vetan inu, neminue sane yoko aþa nek-inana ve sanape narui. In na netotano e yuþaena nini nakonua rui, ana in na pe puriuu pe mareran re si yuþaenen lokove poli, a pe sineun re mēna neva

nesuṃa neviuviun kinanena vetan yar la poli.

⁴ Pogaga, kiau mrapa ve sa nini. Yoko nete plan si lapui kiena ne yaru lala vito laa tano, ana yoko la akekaran inu vano vano-o yoko la monar avisuar inu e pogos naṃa yerkawa kovenlua inu vetan yuṃaena nene.'

⁵ "Ana naga pa pio la naṃa kiela lapui sike e yerkawa, la peve taaga apim puna. Ana tai pimi puna narui, piun tania, pisape '?Ana ko okila lapui e sur ya, a tol kilavaru via?'

⁶ Pisataṃea, pisape 'Pias nen wel na kanena tol ponotia taaga [100].' Ana yar naṃa pisa pania pisape 'Pogaga, yoko italua tetelua si vito laa tano. Nane kioṃa lapui ne nanini, ototano, oyumu plan ke ne vilaga wa, osiri lualima yam lima ga [50].'

⁷ "Ana naga pano, yar taṃena pimi, piun tania, pisape '?A ko, kioṃa lapui na ya?' Ana naga pisataṃea, pisape 'Karo na wit manu taaga [1000].' Ana naga pisa pania, pisape 'Pogaga, yoko italua tetelua si vito laa tano. Nane kioṃa lapui ne nanini, ototano, oyumu plan ke ne vilaga wa, osiri ga ponotia ve orelu [800].' Ana naga kila ṃa sanene pano-o kila makea.

⁸ "Ana siraunia, yerkawa naṃani pisu kilale sur nene, ana naga pisa ke pa kiena yar naṃane naṃa naga kan kiena kilavaru sumo, pisape 'Lelaga ne, opin-aun ruru inu nenaga, ana nepisu sane kioṃa manmaruaena po, ko ṃarumṃa po paṃisi naṃane.' "

Ana Yesu pisape "Kam na apisu ke ne, yaru na yomarava nini lala, pogos naṃa amiyuṃae amio kilavaru, ana akila masisuania ṃisa, akilia ṃelaga na kilaen erau wo amio yaru lala, vena yaru la nene akila wo van la sirau. Ana nepisu naṃa naruu na yomerarava lala, yam mokliu naṃa pe amanmarua ruru re poli naṃa ayuṃae amio kilavaru naṃa Ntewa mla pan la."

⁹ Nepisa ruru pan amiu, nesape "Kilavaru naga pe na yomarava ga nini, ana visae kilia iila ko vena ove erau ruru omio Ntewa, popon oyumuṃae ea.

Visae oyumuṃae ruru wo amio kilavaru kome mrapa naapo, siraunia yoko Ntewa kekaran vena were ko ova e naṃa pe kilavaru re e poli, nane ma e moṃa uṃa ma metava.

¹⁰ "Yar naṃa ṃar yepemṃaen narin yuṃaena tai, tekilia towasinea sane yoko naga war ṃena yepemṃaen pupia yuṃaena woga. Ana yar naṃa miyuṃaen narin suri tai pe mesmes re poli, yoko naga yuṃae viowa laa na wa e pupia suria.

¹¹ Visae kam na ve awar re yepemṃaen yuṃaena na kilavaru e yomarava nini, yoko ane ligan sina sur nowo lala kiena ne Ntewa e limamiu vena ave kiamiu?

¹² A visae kam na taṃatete ayumuṃae ruru amio sur la naṃa Ntewa taṃan pan amiu naṃa ve plas ga e yomarava nini, a ne yoko taṃan si nalaena nowo naṃa asike ma metava e peni ave kiamiu lue?"

Yar taṃatete yuṃaen yuṃaena kiena ne suṃe ve lua veraga

¹³ A Yesu pisa ṃena ga, pisape "Naga sina nini, visae yar na yuṃaena tai, naga taṃatete yuṃaen pran yuṃaena kiena ne suṃe ve lua veraga. Visae sanene, yoko naga kekaran tai, ana yepen mavin tai, pona logear tai, ana ligan tai. Taṃatete akila naṃa ave yar na yuṃaena kiena ne Ntewa, a ave yar na kilavaru ṃena veraga."

Varasi lala la pe akekaran re visen kiena ne Yesu nene poli

¹⁴ Ana e poglis nene, Varasi ṃena lala asike ga wa, asuṃa amiyagokon ke visena la nene. Ana lala, la ape yar la naṃa asitom manene kilavaru silaga, ana apitalia kare ga mrapa wo na yuṃaen amio kilavaru naṃa Yesu pisayu ke pa kiena nalogenala.

¹⁵ Ana Yesu pis pan la, pisape "Kam na sinemiun asape akila sa naṃa yar la avisu amiu sane yar mesmes lala, ana Ntewa naga pisu ke ya naṃa sike e losinemi. Sur mok liu naṃa yar la amieluaria, asape po, ana e visuena kiena ne Ntewa, pisu sane sur viowa ga lala."

*Nasuñenena kiena ne Ntewa pimi narui
Matiu 11:12-13, 5:18; Mak 10:11-12*

¹⁶ Visena tañena naña Yesu pisa sanini, pisape “Nanua sumo, Tus Marua moña ga, naña tus lala kiena ne Mosis amio tus la naña kiena ne navisaluaena lala asike ea, pimi ña pano-o tol pogos kiena ne Yoane Nakeena. Yoane miyumaen pano-o ñisi, a nanagane Lologena Wo na suñenena kiena ne Ntewa pimi, ana asuma amlologon kare ga, a yar la naña sinelan asape ava loyuma ea asuma apar ke yon pañisi vena atolia.

¹⁷ Ana nanene pe kila re sane Navisaluaena kiena ne Ntewa naña sike e Tus Marua naga piowa poli. Pona ma e peni amio yomarava nini ava akovio yo, ana tañatete narin mras nen visena na Navisaluaena nañani kilia kovio pogos tai.”

*Pe pon re teligan lua wota la poli
Matiu 5:31-32, 19:9; Mak 10:11-12*

¹⁸ Visena tañena si tai naña Yesu pisa, sanini, pisape “Visae yar tai ligan lua wona, ana va were si sira tañena, Ntewa pisu yar nene kila ke kolau amio sira tañena ne. Maran taaga mena ga visae yar tai talopa amio sira tai naña wona na sumo ligan lua rui, yar mena nene kila ke kolau.”

*Pakaiwa na yar na sur moki amio
Lasaros*

¹⁹ Yesu pisa mena pakaiwa nene, naña pisa sanini, pisape “Yar tai, naga limana pulen sur wo la moki pañisi, naga suma miyowau ruru lue ga silaga, a legiena punu ga amiyumaen kana pupia kinanena wo lala.

²⁰ Yar tañena mena tai toña ga, naña silaga apere naga pimi amligan teke vanua e kove na pupia yuma mena yar na suri moki nañani. Yar nene, naga pe yar tai naña pe kiena suri re poli, naga pe yaru na loginen ga kinanena, tas nen wetelu pulen ga magka, kiena kia Lasaros.

²¹ Amligan naga teke e yo nene pona visae yoko kilia tol re kororos nen kinanen lañas naña yerka nene kanligan

yo, ana peraga. Naga mlogin korenan ke ga sanene, ana lokul la apim asuma amunvan ke kiena magka lala.

²² “Pano-o yar nañani mare, ana navisi lala apim akuslua pa amligan meke e yepas nen Epraam, ma e peni. A pe piavi re poli, yerka mena mare, asinia.

²³ Ana akoven naga pa e kapi, naña mloge piowa na mloge piowa pañisi, ana siraunia, kira pa metava, kira pa perina pañisi, pisu Epraam sike na, a pisu naña Lasaros sike amio, lalua asuma akinana ke na.

²⁴ Ana pio laa, pisape ‘Oe, Ata Epraam, awis sinema ye inu, oligan Lasaros vitom suan luas nen mrasilmana vito e narin wii tai, vena ligan te purmeneu. Nanagane kapi kekan inu nemloge piowa pano-o ñisa.’

²⁵ “Ana Epraam pisatamea, pisape ‘Naruu, nagane ositoma si malena wo naña ose sumo. E pogos nene, ko otol make kioña suri la naña ko sinomania po pan ko pañisi, ana Lasaros na ositom korenan ga vanon piowa ga. E kiena malena nanua, suri punu ga piowa ga, ana nanagane, naga mloge si po e nini narui, a ko omloge ke piowa manene laa pañisi e nama.

²⁶ Ana suri ga tai, tañatete imasu iila ko, komin Ntewa mligan pupia pulus tai meke likan ita lua, vena kila sane yar tañatete molue e yo nini vena imasu puna, a tañatete molue e na osike e ne vena imi e yo nini.’

²⁷ “Ana yar nene piun ke si na ga, pisape ‘Ata, visae sanene, neviun mareran tan ko vena ovitetalia Lasaros wasupe si vito tano garo uma mena kau ata,

²⁸ komin naña wolai lima asike ga wa. Popon Lasaros vito visawal van la, visae peraga, sa ñisi la mena aimlae e yo naloge viowaena nini.’

²⁹ Ana Epraam pisatamea, pisape ‘?Ana komin ya ne monar Lasaros vitove? La apar ke Tus Wa rui, naña nasiriena wa kiena Mosis amio navisawalena la sike e rui. Popon la auloia, yoko alual suri punu sike ea.’

³⁰ Ana naga m̄areran m̄aga, pisape ‘? Ata Epraam, pona taṗatete akila yo? Ana visae yar tai wasuṗe si imi e marena, visawal make sur la nene van la, yoko monar avilon la ga narui.’

³¹ Ana Epraam pisataṁea, pisape ‘Visae la nene yepel mavin logeen ya naṗa Tus Wa pisa, pe sur re si tai naṗa kilia kila na alelaga poli. Pona yar tai wasuṗe si imi e marena, visa sur punu van la, pona ya sina, ana yoko la yepel mavin ga lelagaena.’ ”

17

Pelaga na kilaen nakilaliēna van yar taṗena

Matiu 18:6-7,21-22; Mak 9:42

¹ Ana Yesu pisa pan kiena nalogena lala, pisape “Yoko nakilaliēna lala akilia aim lue silaga ne, ana yar naṗa kila sur laṗasa naṗa were nakilaliēna imi lavisi, yoko viowa van vaṗisi.

² Visae am̄atear kilavaru tai m̄ene kolmekina a akoan talilu vito e lowe memaena, nanene na nakoena tai naṗa melala ga ne. Ana yar naṗa kila naruu tai ligan inu, ve viawa re si m̄arera e inu, loru e mlamulena viowa, yoko yar nene naga war nakoena tai naṗa m̄arera manene laa sane taulu naga nene.

³ Sanene, kam na monar avisu ruru kiamiu malena la silaga, vena ve okila re nakilaliēna viowa lala aim am̄alivin kioma erau.”

Pelaga naṗa oviewo womla

A Yesu pisape “Visae ovisu naṗa womla mloru ke pito tano e mlamulen piowa tai, monar ovis omio vena okila ruruia, a visae naga vilonia, monar oviewoia.

⁴ Visae naga kila viowa van ko yam ve olua e legiena ve taaga, a pogos punu ga, naga kila viowa, a siraunia naga pisa ga pan ko na wa pisape ‘Ake wolai, nekila kare ko paṗisi. Awis, oviewo inu,’ yoko okilakania? Pisi na monar oviewo naga e pogos make la olua nene.”

Nam̄areraena na viawaena

⁵ Ana nalogena la apiun tan Yesu, apisape “Suṗe, sinemimin mesape okila

kiamimi naviawaena imi m̄arera la sane wa.”

⁶ Ana naga pisataṁea pisape “Visae aviawa ve tokak ga e inu, sane kurus nen purpa, ana visae kiamiu naviawaena nene ve lelaga ruru naapo, ana ṗisi na akilia avisa va purlu na m̄eke gare avisave ‘Omolue e yo nene, omio ṗeligas nem̄a lala, ova okapur ke gare likan lowe memaena ne, ana yoko naga logear amiu woga.’ ”

Yar na kilaen yuṁaen kien yerkaewa naga monar kekaran ga kila

⁷ A Yesu pisape “Visae kam yar tai ve yerkaewa, a kiena yar tai sum̄a kila yuṁaena la pania. Pona pa miyuṁae lokove yo, pona pisuar kiena sur mali lala, pona ya sina, ana visae yepekilavi, pogos naṗa ṗasuṗe e yuṁaena pitomi, yoko yerkaewa visa ya ne vania? Taṗatete visa vania visave ‘Ko, oimi oto omio inu, italu tekina,’ komin naga pe kiena yar na yuṁaena ga.

⁸ Yoko yerkaewa monar visa ga vania, visave ‘Pogaga, yoko ova oviran kapi sumo wa. Visae kinanena manoa, ova oyowau ruru ke ne wa, ṗisi na owar kau imi nakania, nomunia, ṗisi, okilia ola kom̄a.’

⁹ A pogos naṗa yar nayuṁaena kila sur punu ga naṗa yerkaewa pisa pania, yoko yerkaewa taṗatete visa pupia potena vania, vanon naga kiena yuṁaena ga.

¹⁰ Ana kam m̄ena ga monar ave sanene. Visae akila ruru make yuṁaena naṗa Ntewa pisa pan amiu, vano-o ṗisi, yoko avisa ga sanene, avisave ‘Ee, nanene na pe sur re tai nene poli. Tekila ga ya naṗa torokin tekila sa ke ga yar na yuṁaena kiena ne Ntewa lala.’ ”

Yesu kila ruru yar na leperosi la lual-ima, ana taaga ga pisa potena

¹¹ Ana e pogos nene, Yesu la asum̄a amial ke apa ma Yerusalem na wa, ana kiela mrapa pa likan lepas lua nene, Samaria amio Kalele.

¹² Ana amial m̄a pano-o, lavis ga am̄alivi e pulkumali tai, apitawe ṗegas

nen yar tai na leperosi lala, la lualima, naña la asumña e yepas nen mrapa.

¹³ Ana pogos naña apisu Yesu, apion manene pania, asape “Yesu, Supe, awis sinemña ye imimi.”

¹⁴ Ana pogos naña Yesu mloge, pisa pan la, sape “Ava akom pñesan pun yaru wa lala vena la avisu ruru nena tasnemi lala vena avisave kam na yepemiu mian rui.”

Ana la apano, a pogos naña la asumña amial apano, amilan ga naña yepela la pimi mian ke narui.

¹⁵ A lala tai, pogos naña pisu naga po sanene narui, naga pilonia pñasupe si pimi, miyeluar Ntewa pañisi,

¹⁶ pimi mloru e lana Yesu, pisa potena pania. Yar nene, naga pe pe yere Yu re naapo poli, ana naga pe Yu la kompñas tai nae Samaria. Ana tañena lala, la ape yere Yu nena naapo, ana la pe añasupe re si apim poli.

¹⁷ Ana Yesu pisa sanini, sape “La naña yepela mian rui, la lualima, ana awa la ovari?”

¹⁸ Naña pñasupe pimi, naga yar nae ga lele tañena, ana komin ya ne naga taaga pñasupe pimi mieluar Ntewa, lañas pe apim re poli?”

¹⁹ Ana Yesu pisa pania, pisape “Erau, osuñalu oyali ova umña. Kioñña navi-awaena tamalia ko rui.”

Nasuñenena kiena ne Ntewa imi ve sanape?

Matu 24:23-28,37-41

²⁰ Ana siraunia, Varasi la apim apiun tan Yesu, asape “?Nasuñenena kiena ne Ntewa naña opisayu ke silaga, yoko mevisu pogwai?”

Ana Yesu pisatamña pisape “Nasuñenena kiena ne Ntewa pe pimi re sane sur tai naña yar kilia visu e kilamarana poli.

²¹ Naga pe sur re tai naña yoko avisave ‘Ke, na namña narui, nane pimi ke namña,’ pona avisave ‘Nane, sike gare rui.’ Kam na pe apisu kilale re poli, ana nasuñenena kiena ne Ntewa sike pa likan amiu rui.”

²² Ana Yesu pisa pan kiena nalogena lala, sunyu pan la sape yoko ve sanape

e legiena maro la ne pimi ke ne. Naga pisape “Siraunia, yoko kam na sinemiun manene vañisi navisuen pog naña yoko inu Narina ne Yeririna neim nomñalivin yomarava, ana nanene na pe pon re kam na avisu poli.

²³ Yoko yar la avisasa sanini avisave ‘!Naga nane gare!,’ pona ‘!Naga nane garo nel!,’ ana kam na ve ava re amio la, komin pe inu re nene po laa wa.

²⁴ Ana pogos naña inu Narina ne Yeririna nowasuñea ve lelaga e kana legiena nena, yoko yar make ga avisu kilalea, yoko neimi sane yekarpla tai naña kila sinapane vivaga e lepas tai va tol lepas kompñasa.

²⁵ Ana sur nene na pe kana pogos re poli wa, komin sumon nene, yoko inu Narina ne Yeririna, yar nanagane lala akila viowa van inu e sur viowa la ve moki, yoko monar akovenlua inu.

²⁶ “Vano-o tol pogos naña inu Narina ne Yeririna nowasuñea, yoko yar la ve akila ruru la re na wa, maran ve taaga ga sa ke pogos kiena ne yermarua Noa nanua sumo.

²⁷ E pogos nene, yar la asumña akinana, amun suri lala, asumña akila ke talopaena sanene, pimi tol pogos naña Noa pa loyurña e kiena pupia waa naña naga miyurñaenia. Ana pupia womie pitomi kus plan make kiela malena la punu ga.

²⁸ A e pogos kiena ne Lot sa mña nenaga nene. Yar la asumña akinana, amun suri lala, asumña apa ke e lele na wilwilena po amiyurñaen ke kilavaru, asumña amiyurñaen ke lokove, amiyurñaen ke yumña, la akila ke ga sanene pa ke na, pe asitomñal re sur tai poli.

²⁹ Ana e nena e legiena naña Lot molue petan kiela yo, kapi amio pan na kapiapo mloloru pitomi ma e sinapane, kekan la akokovio make nenaga.

³⁰ Ana nevisa van amiu, e pogos naña yoko inu Narina Yeririna neimi, yar la tañatete asitomñal sur tai, asitomñal la ga, ana yoko ailan pupia sur kerkeviu la ne sanene imi mñalivin la.

³¹ “E pogos nene, visae yar tai sumña yumñae ke meta e mñana wos nen yumña, ana visu sur nene imi, ana vito tano pe pon re kilali sape va war suri laḡas e mñana loyumña poli, naga monar va ga narui. Yaru naḡa miyumñae ke lokove, naga mñena taḡatete si vito umña, yoko monar va ga narui.

³² Kam na ve sinemiu ḡesan re wona Lot, naḡa kiraḡatau, ana pimi pe kilavaru.

³³ Yar naḡa kilali sape visuar ruru ga kiena malena, yoko kovio, ana yar naḡa tañan kiena malena kovio, yoko naga ga tamalia sina naga.

³⁴ Nevisa van amiu nevisave e pogos nene, pona kolemalo naḡa yar mñeke amio wona yo e mñala tog, ana yoko aim awerelua ve taaga ga, aligan tai mñeke na.

³⁵ Ana pona yoko sira la ve lua asike avili ke kala kinanena lele taaga yo, ana ve taaga vano tai sike na.

³⁶ Ana pona yar lalua ayumñaevain ke lokove tai yo, yoko tai ure matania, ve taaga sumñal wowe ga sike na.”

³⁷ Ana nalogena la apiun tania, asape “?Ana Suḡe, suri la nene yoko mñalivi e nape?”

Ana naga pisatamñe la, sape “E pogos nene, yoko ve sa naḡa visae sur mare tai mñeke koyo tai. E yo nene narui yoko manu la naḡa akakan ke sur mare, yoko aiminia, monar la ve moki ase yo nene. E nape naḡa mlamulena viowa sike ea, yo ke ga nanene narui yoko nalipereena se ea.”

18

Pakaiwa na sira naḡa tagi mña pa kiena suḡe na pulkumali pano-o, suḡe miyagognia

¹ Ana Yesu pisa sina ḡakaiwa taḡena tai pan la, vena iilaar la ve asitom ḡele re si kiela leniena lala, vena asumñal mñarera asulue ga ea, alen mña vano-o atol kana navisatamñeena.

² Kiena ḡakaiwa nena pa sanini, sape: “Pulkumali tai, naḡa kana suḡe nena naga pe yar mñarera tai, naga pe yar tai naḡa pe patanon re Ntewa poli, pe

maraun re nenaga, a naga sitom ḡele mñena yar la.

³ Ana letano mñena tai sike e yo nene, naḡa yar tai sumña kila kare ke kiena sur la silaga. Ana letano naḡani pa sumña tagi ke pan kiena suḡe, naga sumña pisawal ke yar naḡani, sape ‘Awis, monar okila sur tai va yar nene, naga kila kare in paḡisi wa.’

⁴ Ana suḡe naḡani pe sinen miye re sira nene poli, a pe yowenan visen va yar naḡani, ana kila luen ga sanene pa ke na, sira mñena naḡani pa tagi luen ga pan silaga.

“Ana siraunia naga pisape ‘In na nepe yar tai naḡa pe nesitom re nesape nekila ya naḡa Ntewa pona yar taḡena pisa pan inu sape popon nekila.

⁵ Ana sira pimi tagin ke pan inu, ana in na pe sineun re nesape nekila ya naḡa pisa ke poli. Ana naga pimi piun luen ga sanene, naga kila kare inu paḡisi wa, ana pona nekila ga ya naḡa naga piun ke yo. Visae peraga, yoko neloge kiena tagena vano-o sineu marenia.’ ”

⁶ Ana Suḡe Yesu pis pa la naḡa amiya-gogon ke ḡakaiwa nene, pisape “?Kam na ayagogon ruru visena naḡa suḡe yowena nene pisa ne? Komin sira nene tagi yam moki pania, ana yoko monar sitomli sur na sira nene piun ke ne.

⁷ ?Ana sanapen Ntewa nae ma e peni? ? Pogos naḡa mloge kiena yeririna la naḡa mligan plan la, atagi ke pania lemalo a legiena, naga kilia su kaḡar sanene ve kila re sur tai van la?

⁸ Peraga, ana nevisa van amiu sanini, visae loge naḡa alen mñarera vania silaga, yoko naga sumñalu vilaga e pogos make ga kilia iila amiu. ?Ana nesape neviun mñena van amiu, sane visae pogos naḡa inu Narina ne Yeririna nowasuḡe si neim e yomarava nini, yoko nelual naḡa yar la asumñalu mñarera asike e inu sanene, pona peraga?”

Pakaiwa kiena yar naḡa ḡarwar e kiena ḡelaga naḡa mesmesu

⁹ Ana pogos naḡa Yesu sike amio yeririna lala, naga pisu kilale naḡa laḡasa

aþarwar la paþisi, asitom ke asape la kiela malena memes ruru po narui, a la apisu yar taþena la apiowa ga, apisu sane la apiowa manene laa pe sa re la poli. Ana pisayu yar la sanini, pisa þakaiwa tai, sape

¹⁰ “Yar lalua apa ma e Yumña Wa mñana Ntewa e pogos na leniena. Lala yar tai, naga pe yere Varasi, a taþena, naga kila yumñaena tai naþa yaru la pe sinelan re naga vanon poli, naga pe yar na takis.

¹¹ Ana pogos naþa yere Varasi naga sumalu mlen, pisa sanini, sape ‘Ake Ntewa nepisa pupia potena pan ko paþisi, naþa kiau malena naga po laa sane taulu kiena ne yar taþena lala. Nemieluar ko, naþa in na pe sa re yar navinauen la poli, pona yar na kilakeuiaen yar lala, a yar na kilaen kolau lala, pona yar na takis lala sane yar na sumalu sike ne.

¹² Peraga, in na nesumña nekila ke po silaga, komin naþa in na nomonsilun kilaen leniena van ko e legiena lua e wik taaga, a e sur make ga naþa nemla e lumñau, visae netol ve lualima, monar nela ve taaga van ko silaga. Sur ne la na nene narui naþa in na nesumña nekila, ana kila inu nopo paþisi e maramña.’

¹³ “Ana yar na takis, naga sumña mloge ke piowa vanon kiena mlamulena viowa naþa kila, ana mninu sane Ntewa pisu kiena malena pe po re nena poli. Ana naga yepen mavin va maneneen lavisi, sumalu ga sumña perina, a naga yepen mavin kiraen va metava ma e peni, a naga þarin tau ga tomña ga, mlipalipa ke yerena, tagi, pisape ‘!Ake Ntewa, ove lemam van inu, sinemña ye inu, yar na kilaen mlamulena piowa!’

¹⁴ Ana kam na asitomyulia leniena kiena lalua nene, ana yoko Ntewa kekaran kiena ai? Lelaga, yar naþa pisu kilale kiena mlamulena viowa, a mloge piowagania, Ntewa þar plan kiena mlamulena viowa. Ana yar taþena naþani, naga þasuþe si pa umña naþa kiena malena maran taaga ga sa ke naþa pimi. Yar naþa sumña pisirlua naga, yoko Ntewa ligan naga mñeke tano, ana yar

naþa mligan naga sike tano, yoko Ntewa visirlua naga.”

*Yesu pisa ruru sisi kokan lala
Matiu 19:13-15; Mak 10:13-16*

¹⁵ Ana e poglis nene, auia laþas aþar narila sisi tomtom lala apim puna Yesu, sinelan asape kus la, visa ruru la. Ana pogos naþa nalogena la apisuia, apisalupar la, asape avava sina.

¹⁶ Ana Yesu pio sira la naþani, sape aim mñaga, ana pisa pan nalogena lala sanini, sape “Kam na ve avisaluþar re sisi la namña, atamñan la aim pun inu, komin naþa sisi la namña, yeririna la naþa asa ke ga la nene, la ke ga nene narui naþa asumña apa loyumña e nasuþenena kiena ne Ntewa.

¹⁷ In na nepisa ke lelaga na pan amiu ne, visae yar naþa sinenan nasuþenena kiena ne Ntewa, naga monar kila naga imi ve sa sisi la nini, visae peraga, naga taþatete va loyumña.”

*Yerkawa kiena ne le Yu lala tai sinenan
sape tol malena*

Matiu 19:16-30; Mak 10:17-31

¹⁸ Ana siraunia, suþe tai pimi piun tan Yesu, sape “Navianena wo, awis, popon ovisawal van inu sane in na monar nekila ya naþa visae nekila yoko nekilia netol malena naþa ve uro re.”

¹⁹ Ana Yesu pisatamea, sape “!Ei! Ko na okilia ya ne, osape in na nopo? Pe yaru tai po ruru re naapo poli, ana Ntewa ga naga taaga.

²⁰ Ana ko opiun osape sanape naþa yar tai sane ko naga kilia imi wo e marana Ntewa woga. Pona okilia ruru kiena Navisaluaena yo rui, naþa pisape ko ve okila re lau, ve owemñar re yaru, a ve ovinau re, ve ovisokan re, ovatanon arimomña amio anomña.”

²¹ Ana yar naþani pisatamea, pisape “Lelaga, in na nekilia kemua Navisaluaena la ne opisa ke ne, a nekilia nevisa van ko sanini, in na nopuar ruru la siar e pogos naþa nepe yar viu ke ga wa. Pimi tol nanagane, pe nekilalu re tai poli.”

²² Ana pogos naþa Yesu mloge pisa sanene, pisape “Pogaga, ana e lepas naþa

pumã, sur tai sike ga wa. Monar ova owilwilin plan make kioña sur moki la nene, ana owar kana kilavaru, ova okiakian kare ga va yar la naña limala plasa. Visae okila sanene, yoko kioña sur wo la ve moki ma e peni. Ko, ova okila, p̄isi na oim otaveve inu.”

²³ Ana pogos naña yar nene mloge visena nene, sinen piowa pañisi, kiena sitomena pimi urmi na urmi, komin naga pe yar na sur moki, limana pule pañisi.

Yaru naña kiena sur moki, naga m̄arera li m̄aga vena vaen loyũña e nasuñenena kiena ne Ntewa

²⁴ Ana Yesu pisu manene yerka nene pano-o p̄isa, siraunia pisape “Visae yar tai naña kiena sur moki, naga sinenan sape va loyũña e Nasuñenena kiena ne Ntewa, sur nene naga m̄arera towe m̄a naña.

²⁵ Ee, nevisa van amiu, visae kamel tai va warpo yo kome pulus nen nitil, nanene na m̄arera pañisi, ana visae yar tai naña kiena sur moki sinenan sape va loyũña e Nasuñenena kiena ne Ntewa naga m̄arera laa na wa.”

²⁶ Ana la naña amloge visena nene amilan pano-o pañisi, asape “!Aulai! Visae sanene, ane yoko tol malena?”

²⁷ Ana Yesu pisatam̄ea, pisape “Lelaga, yar tañatete kila naga tol malena, ana ya naña yar tañatete kila, Ntewa naga kilia kila woga.”

²⁸ Ana Pita piunia, pisape “?A yoko ve sanapen imimi? Memligan m̄amimi uña la rui, ana metaveve ko ke narui.”

²⁹ Ana Yesu pisa pa kiena nalogenala, sape “Kam na ve asitom manene re e lepas nene. Yar a naña visae ligan m̄ana uña, pona wona, pona wenla, pona arimana amio anena, pona narina lala, a visae ligan sur la nene vanon yum̄aena na Nasuñenena kiena ne Ntewa,

³⁰ yoko naga tol maran si kiena sur la nene va ve moki manene laa va laa sane na wa. Naga nene e pogos nanagane, a sirau m̄ena ga e pogos na pimi ke ne, yoko naga tol malena naña ve uro re.”

Yesu pisawal kiena marena yam telun nene

Matiu 20:17-19; Mak 10:32-34

³¹ Ana poglis naña amiyaloro ke apano, Yesu pio kiena lualima taaga pa lua apim puna, pisa pan la pisape “Ayagogo ruruia. Nanagane tepa ke ma Yerusalem narui, a pogos naña tetolia, sur make la naña navisawalena lala asiriyu nanua sumo rui e lepas nen Narina ne Yeririna, yoko avisuia aimi am̄alm̄alivi ve sa nena naña apisa.

³² Yoko avisu naña aligan naga va e li mana ne le Rom lala, naña yoko akirakirai viowa vania, akila karea e p̄elaga viowa lala, avilasiria,

³³ alilia, akila m̄a sanene vano-o awem̄aria. Ana yoko kana legiena ve telu, naga sum̄alu mal sina.”

³⁴ Ana pe sur korena ga naña Yesu pisawal meraravan make sur punu pan la sanene, ana la pe amloge kilia ruru re nenaga. Naga sa naña visena la nene na atapolou ga e la, ana kila sane tañatete atol kana kinasa.

Yesu kila ruru kilamara p̄ala tai Matiu 20:29-34; Mak 10:46-52

³⁵ Ana Yesu la amiyaloro apa m̄aga, apim lavisin pulkumali naña Seriko, ana kilamara p̄ala tai teke tano e is nen mrapa, tom̄a mlogin ke kana kinanena tan yeririna la naña apa akomkom ke e nene.

³⁶ Ana kilamara p̄ala nañani mloge naña Yesu la apim ke na amio p̄ina la naña asum̄a amialoro ke amio, ana naga piunia pisape “La nene na li pe la nene, akope ke ne?”

³⁷ Ana apisatam̄e sanini, asape “!Ke, nanene na Yesu nae Nasaret nañane, nane pimi ke ne imi kom pun ita ne!”

³⁸ Ana yar naña pio manenea, a tagi pa Yesu pisape “!Yesu, ko lus kiena ne Tepet, sineun naña sinem̄a ye inu!”

³⁹ Ana la naña asumon ke Yesu, amloge pio sanene, ana apisalup̄aria, apisape “Ova ruru ko ga.”

Ana yar naña yepen ma ga, pio ke sina ga, pa laa meta sane wa, pisape “!Yesu, ko na lus kiena Tepet, nemie awis pan ko, sinem̄a ye inu!”

⁴⁰ Ana Yesu mial pano, pimi sum̄al su puna e yo nene, pisape atar yar nene imi

lavisinia. Ana atar pimi, Yesu piun tania, pisape

⁴¹ “?Ana ko sinomñan osape nekila ya ne van ko?”

Ana naga piunia pisape “Suḗe, awis, sineun nesape kilamarau imi wo, nekilia nevisu suria.”

⁴² Ana Yesu pisape “Pogaga, nanagane nela kioṁa nakiravaena van ko sa naḗa opiunia. Kioṁa naviawaena kila ko opim opo sina.”

⁴³ Ana e nena e poglis nene, yar naḗani, kilamarana pimi po, ana mial ke amio Yesu, suṁa miyeluar ke Ntewa. A yeririna ṁena la naḗa apisu sur nene, apisu po paḗisi, asuṁa amieluar ke kia kiena ne Ntewa vanonia.

19

Yesu pitawe Sakias

¹ Ana Yesu la apim loyuṁa Seriko, amialin ke naḗa ava awar ro ga ea.

² Ana e naḗani yar tai sike ea kiena kia Sakias. Naga pe yerkawa kiena ne yar na warpoloen takis e pupia lepas nene, ana vanon naḗa naga miyuṁae piowa, kila kare ke yaru lala e kiela kilavaru na takis nena, kila naga liman pule paḗisi, naga pe yar na sur moki.

³ Ana Sakias ṁena pimi e poglis nene, sinenan sape visu Yesu naga pe yar na sanape, ana yeririna la mokliu naḗa asike lavisin Yesu, asuwo ga yo, sa naḗa yo kuskus ga rui, ana naga pe pisu ruru re poli, komin naga pe yar plas ga tai.

⁴ Ana Sakias pisu sane piowa narui, kiriri sumon Yesu lala, pa tol puryove tai ḗiyu pa e korowas tai, suṁate ke naḗa visae Yesu la ayal aimi, ana naga kilia visu ruruia.

⁵ Ana pogos naḗa Yesu pimi tol puryove naḗani, Sakias milan ga naḗa Yesu kira pa pisuia, pis pania, pisape “Sakias, otapulu vilaga. In na nemninuluḗar e inu sane ḗane neva nesu re nemio ko sumo wa gar moṁa.”

⁶ Sakias mloge narui, suṁalu pula nena pitomi tano, ana ḗere Yesu pa ṁana, amio pupia kekarena paḗisi.

⁷ Ana pogos naḗa yeririna la apisu sur nene, la moki naḗa pe akekan re poli, apismumu, apisape “Yar naḗa Sakias naga pe yar sur naḗa miyuṁae piowa ga, naga kila kareli yar lala wa, ana vanon ya ne Yesu sinenan sape amio ava asu ṁana?”

⁸ Ana pogos naḗa asike loyuṁa rui, Sakias mloge sane naga monar vilopuia, a monar keḗu kiena malena, ana suṁalu pisawal e marana ne Suḗe, pisape “Suḗe, nanagane in na netamñan kiau sur la komḗas va yar la naḗa limala korena, pe kiela sur re poli. A suri ya naḗa nepisa kotalia yar la ea, nepinaun la, yoko nowar maran si van la tol yam ve vari.”

⁹ Ana Yesu mloge pon manene visena naḗa Sakias pisa, ana pisa pania pisape “Nepisu sane ḗane na, natamaliaena kiena ne Ntewa pimi nena tol mratava nini. Yar nene naga kilalu mrapa na kiena malena, ana naga ṁena pe lus kiena ne Epraam kemua lelaga, naga pe yere Yu kemua tai,

¹⁰ ana inu Narina ne Yeririna nepim e yomarava nini vena nakale la naḗa amiyepe petan mrapa sane yaru nene, vena netamalia la.”

Pakaiwa na yar telu naḗa apisuar kilavaru kiena ne kiela yerkawa

Matiu 25:14-30

¹¹ Ana yeririna la asuṁa amiyagogon ke visena kiena Yesu la nene, ana pis ṁa pan la pano-o, pisa ḗakaiwa tai pan la. Naga pisu sane popon vian la e ḗakaiwa nena, komin naga kilia ke sape sane yeririna lala asitom ke asape pogos naḗa ava atol yo Yerusalem, yoko naga kila nasuḗenena kiena ne Ntewa imi warpo ke yo van la veraga. A nanagane apim ke lavisin Yerusalem rui, a Yesu sape vianin la sane naga monar ligan la sumo wa, yoko imi si pula.

¹² Naga pisa pan la sanini, sape “Yerkawa tai, naga pa perina e naḗa pupia ḗarin suḗe sike ea, vena avisirlua naga imi ve ḗarin suḗe na kiena lepasa, yoko naga kilia wasuḗe sina visuar kiena yo.

13 Ana sumon naþa pe pa re poli wa, naga pio kiena yar lala, la lualima, a la punu ga mla kilavaru peve taaga pan la, sape monar ayumãe amio kilavaru naþani vano-o tol pogos naþa naga wasuþe sina.

14 Ana yeririna la nae lepas nene ape nasinekar kiena ne yerkawa nene, ana pogos naþa naga pur matan la pa narui, la apisayuia asape la pe sinelan re si naga imi ve kiela þarin suþe poli. Ana amligan visena pa pa þarin suþe keviu na purvanua naþani, asape 'Pe sinemimin re yar nene imi ve kiamimi þarin suþe poli. A pe sinemimin re nena naþa oligan kia keviu nene e naga poli.'

15 Ana þarin suþe keviu naþani kila ga, ana yerkawa nene pimi ve suþen ke sina ga kiena lepasa. Ana pimi pio viraviran kiena yar la naþa naga þar þesan kilavaru nene pan la, sinenan sape visu sane amiyumãe ea, ana ataulu si kiena kilavaru via.

16 "Ana yar naþa pimi sumãal þesan se marana, pisape 'Suþe kionã kilavaru taaga naþa omla pan inu, nemiyumãe mã amio pano-o netaulu si lualima to metavana.'

17 "Ana yerkawa nene pisu kiena yar na yumãena nene miyumãe po, ana pisa pania sape 'Po na po paþisi, ko omiyumãe po manene laa wa. Ana komin naþa osumãalu mãrera ose narin yumãena naþa nemligan e lumomã, ana nagane nela yumãena keviu tai van ko, neligan ko ovisuar kiau pupia pulkumali ve lualima.'

18 "Ana siraunia, yar nalua pimi, pisape 'Suþe, kilavaru taaga naþa omla pan inu, nemiyumãe mã ea pano-o taulu si lima to metavana.'

19 "Ana yerkawa naþani pisa pania, sape 'Po wa, ko mnea omiyumãe po paþisi, yoko neligan ko ovisuar kiau pupia pulkumali ve lima.'

20 "Yoko kiena yar taþena pimi, pisape 'Suþe, kionã kilavaru naþa omla pan inu, nepiwo ruru e kinakina kulmrae tai, nemligan ruru tomã ga, nane nesape nela si wasuþe imi van ko narui.

21 In na nesumã nepisu ko ke sane ko yar tai naþa okilia owar plan kionã sur naþa yar taþena þarar sike na, a okilia okinana e lokove naþa pe ko re omapila poli. Kionã þelaga mãrera towe laa sanene, kila nemaraun ko, ana pe nekila re surian kionã kilavaru nene po, nepuarar ruru ga tomã ga.'

22 "Ana yerkawa naþani sinen karia, pisape 'Yaru, opisa kare in laa ne wa, naþa osape in na yar mãrera tai ne sanene. Ana pogaga, kionã visena nene naga ga kar ko ke sina ga.

23 'Visae in na yar sur na sanene, komin ya ne opuar kiau kilavaru sanene? Po paþisi naþa visae oligan ga e pag, vena pogos naþa nowasuþea, nekilia nowar plan sina amio narina naþa naga tauluia.'

24 "Ana yerkawa naþani pisa pa yar taþena la naþa asumãal asike lavisinia, sape 'Awar plan kilavaru nene e limana, awar va yar naþa taulu lualima.'

25 "Ana apis pa yerkawa naþani, asape '!Ana suþe, naga þar mokliu wa, kiena lualima rui!'

26 "Ana yerkawa pisa pan la pisape 'Lelaga, ana sanene narui. Naga naþa kiena sur mok rui, yoko naga war si va laa sane na wa, ana naga naþa pe kiena sur re poli, yoko naga kilalu kiena narin sur ve tokak ga naþa naga mla ke rui.

27 Ana e lepas na kiau nasinekar la nene, naþa la yepela mavin naþa in na neve suþen la, sineun nesape ava aurela aim e nini, awe momãr la amarmare e marau.'

Ana þakaiwa kiena ne Yesu nane þisi e nene.

*Yesu pimi tol yo naþa Yerusalem
Matiu 21:1-11; Mak 11:1-11; Yoane
12:12-19*

28 Ana Yesu pisa pa visena la nene, sumãalu, sumon la, þere la apa ma Yerusalem.

29 Ana la apim lavisin narin pulkumali lua nene sumo, naþa Petpas amio Petani, e lepas nen Kunus Na Purolip lala. Ana Yesu pisa pa kiena nalogena lua, pisape

³⁰ “Kam lua ayalor ava ke ne e narin pulkumali na gare sumo wa. Pogos naþa ava loyuma, yoko alual togki tai, aþatear teke ea. Togki naþani pe teras ga, pe yar tai to li re e masina poli wa, ana kamlua aluþarlua, aure imi e nini.

³¹ Visae aviun tan amiu amlua, avisave ‘E, amluþarlua ke pe na ya?,’ yoko avisatamea avisave ‘Suþe sinenan sur mal nini kila kiena yumaena tai.’ ”

³² Yesu pisa sanene pan lalua, ana mligan la apano, ana apano apisu sanena naþa pisa pan la.

³³ Ana apano asuma amluþarlua ke kilka petan sur mal naþani, ana pogos naþa akila ke sanene, kana þar ne la apiunia asape “?E, asuma amluþarlua ke kilika petan pe na ya?”

³⁴ Ana apisatamea asape “Peraga, Suþe sinenan sape sur mal nini kila ke ne kiena yumaena tai sumo wa.”

³⁵ Ana ataman narui, aþure togki naþani pimi pa Yesu, ana aþatetae mala kulkota lala meta e masina, amligan Yesu totano ea.

³⁶ Ana Yesu kus togki nene, mial pano, ana pogos naþa mial ke pa sanene, yeririna lala amien plan mala kulkota lala aþatetae sululu mrapa, vena togki kiena ne Yesu yalor ga metava ea.

³⁷ Ana amial ma e Kunus Na Purolip la pano-o, apim atol yo e naþa mrapa na vitoen garo Yerusalem. Ana pogos naþa pupia pina moki lala na nalogena lala apisu naþa Yesu pimi ke lavisin Yerusalem, asitomal pupia yumaena lala a kile lala naþa apisu naga kila, a apisu sane kiela pupia þarin suþe viu tai ne pimi ke ne, ana akekara paþisi, asuma amieluar Ntewa keviu vanonia.

³⁸ Asuma apiovionia, asape “!Ntewa na mava, ovisa ruru þarin suþe nene naþa pimi ke e kionia kia! !Pupia kekarena ma e peni, kam nae ma metava avisirlua kia kiena ne Ntewa, kiena naurarena po na po!”

³⁹ Ana e poglis nene, Varasi laþas asike mena likan pina la nene, ana pe akekaran re naþa apisirlua ke kia kiena

Yesu sanene poli, ana apisa pania asape “!Navianena, ovisaluþar kionia nalogena lala ve akiikiin ko re si sanene!”

⁴⁰ Ana Yesu pisatame la, sape “E, peraga narui! Visae ve akiikii re sa nene, pona yoko kilavaru ga la ne sike ne monar akiikii yo.”

Yesu tagin pulkumali wa naþa Yerusalem

⁴¹ Ana Yesu pimi lavisin pupia pulkumali nene Yerusalem, kira pito pisuia, sinen miyea, siar naþa wamarana mlau-

nia.
⁴² Kila sanene narui, pisaar nena pania, pisape “Visae ovisu kilale ga ya naþa molue puna nagane! Ntewa suma kila ke kionia mrapa wo tai vena olual sumare ea ana opisu kilale þele ga.

⁴³ Ana monar nevisa van ko sanini, yoko pogos tai imi van ko naþa kionia nasinekar lala, la ve moki vaþisi naþa aimin ko. Yoko asuvivi ko, asuwo ruru ko nenaga, a yoko awar porotano imi ayuwonpolo e yepas nen kionia pupia kove ana akila mrapa na vitomasen loyuma, vena awe ko.

⁴⁴ Yoko awe momar naruma lala, a akilawowa make moma yuma lala, awar plan make nena kala kilatapili lala. Nakoena na sanene yoko imi van ko komin naþa ko yepmavin visu kilaleen naþa nagane naga pe kionia pogos naþa Ntewa pimi malivi vena tamalia ko.”

⁴⁵ Ana Yesu mial pa loyuma e pulkumali, pa e Yuma Wa mana Ntewa, ana pisu la naþa akila ke yumaena na tauluen kururu kilavaru ea. Ana naga mene plan la, sape

⁴⁶ “Ntewa pisa e kiena Visena Wa, pisape ‘Mau yuma wa naga pe yuma na leniena, ana kam na apilon yuma nene narui pimi sane puluve tai mana yar na vinauena lala.’ ”

⁴⁷ Ana e poglis nene e legiena punu ga Yesu pa ke loyuma e Yuma Wa, ana pian ke yeririna lala, a yerkawa kiena ne yar wa lala amio navianena navisaluaena lala amio mena yerkawa kiena ne yeririna lala, pe akekaran re nenaga. Asuma

akalewele ke mrapa vena akilia akila sur tai vena kila narui monar aweñar Yesu.

⁴⁸ Ana peraga, apisu sane tařatete alual mrapa, komin yeririna la nařa amiya-gogon ke kiena navianena lala, akekaran manene laa kiena visena lala, la sinelan ga naga silaga.

20

Nasumonena nae Israel lala sinelan asape avisaluřar Yesu

Matiu 21:23-27; Mak 11:27-33

¹ Ana e si e legiena tařena, Yesu řasuře si pa e Yumã Wa mñana Ntewa gar Yerusalem, sumã pian ke yeririna lala a mlologon ke mñena nalologena wo pan la. Ana nasumonena kiena yar wa lala amio navianena navisaluaena lala amio mñena nasumonen tařena lala apim puna, apiun tania, asape

² “?Ovisali van imimi, sane okila ke sanene e nini e kia kiena ai? ?Ane pisa pan ko pisape okila sa nene?”

³ Ana Yesu pisatañe la, sape “Pogaga, ana yoko in mñena neviun naviunena tai van amiu sumo wa. Kiau naviunena sanini, sane

⁴ “?Nakeena nařa Yoane kila nanua ga ne pa yar lala, naga pe sur tai nařa Ntewa pisa pan pisape kila, pona Yoane ga sitom sape kila? Amiu avisalia.’ ”

⁵ Ana naviunena kiena ne Yesu nene kila narui apis manene ke sina ga pan la, apisa ke asape “?Yoko tevisa ve sanape na vania? !Tevisuar ruruia! Visae tevisave nakeena nene, Ntewa naga pisa pa Yoane, yoko yar nene viun sina tan ita ne visave ana komin ya ne yepeta mavin lelagaena e Yoane?”

⁶ Ana visae tevisave Yoane ga sitom sape kila, sa řisi yaru la sinela kar ita ana akove ita, komin nařa amlelaga mñarera rui sane Yoane naga pe navisawalena kiena ne Ntewa kemua lelaga.”

⁷ Ana sitomena nene kila narui apisatamñe Yesu asape aminue kare ga narui.

⁸ Ana Yesu pisa pan la, sape “Sanene, in mñena ga tařatete nevisa van amiu ane pisa pan inu sape nekila yumãena nene.”

Pakaiwa na yeririna viowa lala navi-suaren lokilkerep

Matiu 21:33-46; Mak 12:1-12

⁹ Ana Yesu pisa řakaiwa tai pan yeririna la nařa asike e poglis nene, pisape “Yerkawa tai, amio kiena lokilkerep tai. Naga sinenan sape yaloro re va e purvanua tařena tai, nařa mñeke laa perina, ana naga mligan kiena lokilkerep nene pa yeririna tařena lařasa nařa yoko aim ayumãe ea, ana aul vania.

¹⁰ Ana yerkawa nařani pa sumã gare pano-o, pisa kilale sane nanagane pogos nařa mrakerep marua narui. Ana mligan kiena yar tai řasuře si pa pun la nařa asike e kiena lokilkerep nařani, veña war kilavaru na mrakerep komřasa nařa monar aul vania. Yar nene pano, ana pogos nařa mñalivin la, la pe sinelan re aul poli, ana amñe kare naga, amligan si naga řasuřea liman korena ga.

¹¹ Ana yerkawa nařani mligan si kiena yar tařena pano, ana amñe mñena naga, akila piowa pania pařisi, ana amñenelua řasuře koren ga pa sina.

¹² Ana yam telu narui, yerkawa nařani mligan kiena yar tařena, ana naga mñena ga, amñea kulu ga kuruta rui, akoven lua e lokilkerep nene pano.

¹³ “Ana yerkawa na lokilkerep pisa řelaga viowa la ne sanene, mñinue kare narui, pisape ‘!Awe! ?Popon nekila ya narui? Pona nanagane monar neligan ga naruu wawa nini narui. Naruu taaga ga nini, nesitom naga pařisi, ana visae naga vano monar avisu kilalea, avatanonia.’

¹⁴ Ana mligan naga pano, a pogos nařa yar la nene apisuia, asitom piowa pania. Apisayu sina pan la, asape ‘Nanene na narin yerkawa nene yo. Yar ne na nene narui, nařa visae yerkawa nene kovio, naga ke narui nařa yoko kus porotano nene sane kiena lalimana. Popon towemñaria, vena ita ga touarar tano nene ve kieta.’

¹⁵ Ana asumãl narui atararia, akovenlua naga pa vanua e lokilkerep nařane, ana amñemñaria.”

Ana Yesu sape “Suniena nene pimi maro e nini na řa rui, ana popon asitom-

lia. Pogos naña yerkawa mloge sur nene, yoko naga imi kila ve sanapen la nene?

¹⁶ Nevisa van amiu sanini, yeririna viowa la nene, yoko naga imi we moñar la, yoko amarmare e nakoan mārera tai, ana yoko ligān lokilkerep nañani e limana yar lañas naña apowo.”

Ana poglis naña amloge Yesu pisa sanene, amloge kilale naña visena nene sane pisawan ga sur tai, pisayu sape le Yu lala pe sinelan re naga naña pe narina ne Ntewa poli, ana yoko Ntewa were yar la naña pe ape le Yu re poli akus lelela. Ana sur nene pe sinelan re aloge po, apis mārera, asape “Sur naña opisa ke ne, Ntewa monar ve ligān re sur nene imi mālivi sanene.”

¹⁷ Ana Yesu kira pisa manene la, piun pisape “Pe sinemiun re poli, ana vanon ya ne asiri visen wa naña pisa sanini, pisape ‘*Kilavaru nini, yar na yuñāenen yuñā lala asape piowa ga, ana akoven lua pa rui,*

ana nanagane kilavaru nene pimi pe kilavaru wo tai naña pe na mrapun yuñā, vena uarar yuñā mārera.’
Yauena 118:22

¹⁸ “Yeririna make ga naña visae avane kilavaru nene, yoko aloru akove kilavaru nena, siwowa kare yepela lala. A visae vano vano-o tol pogos naña kilavaru nene loru, ana yar a naña kilavaru monoaria, yoko kilamumu kare naga vano-o kovio nenaga.”

¹⁹ Ana navianen navisaluaena lala amio yerkawa kiena ne yar wa lala, apisu kilale pākaiwa kiena Yesu nene panon la nena ga, ana sinela kar manene laa narui, asuñalu asape auarar nena naga e pogos nene. Sinelan manene laa asape akila sur tai vania, ana akila pēle ga, komin apisu yeririna la akekarān laa naga.

²⁰ Kila sanene narui ana silaga asuñā apisuaria, a lañas apa vinau ga apa lavisinia, akila kokanin ga sa naña alelaga e naga, ana sur naña la akila ke ne, asuñā añar make nena kiena visena lala. Kiela sitomena sane sinelan asape alual visena lañas naña naga pisa, ana akilia avisawal va yerkawa nae Rom nene Paelat, vena

naga kilia la nakoana tai vania sa naña la sinelania.

Sur kiena ne Ntewa, sur kiena ne Sisa
Matiu 22:15-22; Mak 12:13-17

²¹ Pis na pog tai la naña apinaun vena aim lavisin Yesu, apiun naviunena tai tania, sa naña akila kotalia ga naga. Asape “Navianena, mepisu kilale sane kioñā visena lala a kioñā vianena lala ape lelaga a po pañisi. A mepisu kilale sa naña kioñā naliņereen yar lala pe peve taņena re poli, naña opisū la maran taaga ga, ko opisawal mesmesun ke mrapa kiena ne Ntewa pan yeririna make ga.

²² Ana sinemimin mesape meviun tan ko sanini, sane “?Kieta navisaluaena pisa sanape? ?Sape mesmesun ita le Yu lala toul takis va pārin suņe nae Rom, naña Sisa, pona pisape pe mesmes re poli?”

²³ Ana Yesu pisa kilale sane asape akila kotalia ga naga, ana pisa pan la pisape

²⁴ “Ala narin kilavaru tai imi van inu. ?Avisuli sane marana ne ane teke ea? ?A kia naña asiri teke ea, kia kiena ai?”

Apisape “Marana Sisa, a kiena kia mēna ga.”

²⁵ Ana naga pisa pan la sape “Pogaga, sur naña pe kiena ne Sisa, ala va Sisa. A sur naña pe kiena ne Ntewa, ala va Ntewa.”

²⁶ La nene sinelan manene asape atol ruru Yesu e maran yeririna lala e kiena visena tai, ana pogos naña amloge kana navisatameena nena, amilan pañisi, apisu sane naga kilamār ruru kiela kap narui, ana apa ruru la ga asikena, pe apisa re si sur tai po.

Yar la naña amarmare rui, yoko amamal sina

Matiu 22:23-33; Mak 12:18-27

²⁷ Ana siraun naga nene, le Satusi lañas, apim puna Yesu, naña sinelan asape aviun tania e lepas na sur tai naña la amlelaga mārera ea, naña asape yar la naña amarmare rui, taņatete amamal sina e legiena maro.

²⁸ Ana apiun tania, asape “Navianena, sinemimin mesape meviun tan ko sanini. Sanapen visena tai naña yermarua Mosis

siriyu pan ita na nanua sumo. Naga pisape visae yar tai, wenla mare tan wona, naña lalua pe narila re tai poli wa, yokorena wenla nene monar were letano nene ve wona, vena kila sane sira nene kilia war sisi, vena uarar kia kiena ne wenla naña mare mal toña ga.

²⁹ Pogaga, ana e pogos tai, welelai la olua. Kiela m̄earu p̄ere wona tai, ana naga mare tan wona nañani lalua pe narila re tai poli wa.

³⁰ Ana wenla na surana naga towe p̄ere sira nañani, ana yoko naga m̄ena mare tania,

³¹ ana wenla m̄ena na telu, kila sa ke ga, akila m̄a sanene pano-o tol wenla maro na olua, la make ga maran taaga ga, naña pe añar re nena narila tai poli.

³² A siraun wona la punu ga nene, sira m̄ena nañani marpanu.

³³ Ana ovisali sur nene: ?E legiena maro, pogos naña apisa ke asape yoko yeririna la amamal sina, yoko sira nene ve wona ai, komin naña talopa make amio welelai la olua nene?"

³⁴ Ana Yesu pisatame la sape "E ga e yomarava nini, yeririna lala asum̄a atatalopa,

³⁵ ana la naña Ntewa pisape visae akilia amal si vetan marena vena ava loyuma e kiena yo, ve akila re sina. E pogos nene, tařatete si atalopa narui,

³⁶ a yoko ve amarmare re sina komin naña aim sa ga navisi la narui. Yoko Ntewa kila amal sina e marena ana avim ave narina ruru nena lala.

³⁷ A e lepas namalen si nene, Mosis m̄ena pisayu nanua sumo rui e suniena na purlaki naña kap pivaga ke ea. E nene tepisu naña Mosis pion pa Ntewa na mava sape naga pe Ntewa kiena ne Epraam a Ntewa kiena ne Aisak a Ntewa kiena ne Sekop.

³⁸ Ana pogos naña Mosis siri visena nene, la telu nene amarmare e yomarava nini nakonua rui, sane amare e yomarava nini, ana amal asike ma puna Ntewa na wa. Ntewa naga pe pe Ntewa kiena ne yeririna re ga la ne amarmare po, ana naga sinenan sape yeririna la naña asike amio, yeririna la naña amali. E

navisuena kiena ne Ntewa, yeririna la naña amarmare e yomarava nini rui, la amal ga asike ga wa."

³⁹ Ana navianen navisaluaena lala asum̄a amiyagogon navisatameena kiena ne Yesu naña pa le Satusi lala, ana apisu sane manmarua ruru po pařisi, asape "Navianena, kioña navisatameena po na po pařisi."

⁴⁰ Apis sa nene vanon visena kiena Yesu nene kila sane le Satusi lala amaraun naña aviunli si sur la tania.

Yesu Navisaarena naga pe Ntewa kiena ne yermarua Parin Suře Tepet
Matiu 22:41-46; Mak 12:35-37

⁴¹ Ana Yesu pis pan la pa laa sane, piun sur tai tan la, sape "Komin ya ne la apian amiun ke asape Navisaarena naga monar m̄aliv e lus kiena ne yermarua Parin Suře Tepet, naña naga pe p̄arin suře p̄esania?"

⁴² Nepiun nene, komin nanua sumo, Tepet siri e kiena tus na Yauena lala, sape 'Ntewa na mava pisa pa kiau Suře, sape "Ototano e lum̄au lepas na p̄amarua,

⁴³ otom̄ate m̄a vano-o, yoko neligan kioña nasinekar lala aim ve takue tai na kilavanen lam̄a." ' *Yauena 110:1*

⁴⁴ "Nanene na tepisu sane Tepet pio ke pa Navisaarena sape naga pe kiena Suře rui. ?Ana komin naña Tepet pisa sanene, sanape naña asum̄a apisa ke Navisaarena nene asape yoko molue kome Tepet, naga pe lus nena ga tai?"

Ana yam si tai amilan visena kiena ne Yesu.

Yesu pis m̄arera pa nasumonen na lotena lala

Matiu 23:1-36; Mak 12:38-40; Luk 11:37-54

⁴⁵ Ana p̄ina la asike amiyagogon ke ga wa, naga pisawal visena tai, naña pe kiena ne kiena nalogena ga lala.

⁴⁶ Naga sape "Kam na avisuar ruru yar navianen navisaluaena la nene. Asum̄a aplave manene la e m̄ala kulsota viavi la nene, a visave ayaloro e yepesinasa e maran yar lala sinelan asape yar la avatanonla, a avio ruru la asave, '!Kee, pokolulagi, ko na ope Navianen tai naña po pařisi!' A e pogos na p̄ařagena a loyuma e yuma na leniena m̄ena lala,

sinelan asape atoga e lelen yerkawa lala. ?Kam na apisu kilale narui ne?

⁴⁷ A la akila kiela leniena la piayavi paŝisi wa, ana apisokan ke ga ne, komin e ke e pog nene, asumã akila kotalia ke ga letano lala, akila kare la. Ana vanon kiela ŝelaga la ne sanene, yoko kiela nakoena naga m̃arera manene laa sane.”

21

Letano tai mla narin kilavaru lua pan Ntewa

Mak 12:41-44

¹ Ana pogos naŝa Yesu la asike e yumã m̃ana Ntewa, apisu naŝa yar laŝasa apimin naŝa akuan kiela nalaena lala e karo na Yumã Wa. Ana Yesu teke pisu ke ne, pisu naŝa yar na sur moki la apim akuan kiela nalaena wo lala,

² a siraunia, naga pisu m̃ena letano tai, naŝa pe kiena sur re poli, pimi kuan kiena narin kururu varu lua ga.

³ Ana naga pisayu sira naŝani pan la, sape “Apisu ke letano nene, naŝa kuan narin kururu varu lua ga ne? Nevisa sur na lelaga van amiu, sane naga kuan taulu make yar la naŝa kiela sur moki.

⁴ Yar la nene, kiela kilavaru keviu paŝisi, ana akuan ga narin kinakinas komŝasa, ana letano nene, narin kilavaru naŝa mlararia vena ve kiena malena, tañan make nena pan Ntewa.”

Yesu pisawal naŝa yoko awe plan yumã wa m̃ana Ntewa

⁵ Ana siraun naga nene, yar laŝas apisayu ke Yumã Wa, asape apisu po paŝisi, amio kana kilatapili nowo lala, a kana sur tanea la naŝa aŝaria pe na vayaia punuen kana kove nena. Ana Yesu mloge m̃a naŝa asunyu ke sanene narui, naga sape

⁶ “?Kam na apisu sur la nene asape powo liu? Nevisa van amiu sanini, siraunia, e pogos la tai ne pimi ke ne, yoko taŝatete si kana kilatapili ne tai to ruru si teke e lelana, komin naŝa yoko yar laŝasia aim awe plan tetain kare make yumã nene.”

Yoko pog m̃arera monar imi

21:14 Luk 12:11,12

⁷ Ana pogos naŝa amloge Yesu pisa sanene, apiun tania, asape “?Ana Naviana, yoko awe plan Yumã Wa nene pogwai, a yoko mevisu kile ya naŝa visawal visave lavisi sur la nene imi m̃alm̃aliv narui?”

⁸ Ana pisa pan la, pisape “Kam na popon avisuar ruru amiu, vena ve yar tai imi visa kotalia amiu re, komin yoko yar ve moki naŝa ala kiau kia, ana aim avisave ‘!In ne nanini nepe Navisaarena nene!’ pona avisave ‘!Nane, kana pogos ne nanini narui!’ Ana ve ataveve la re.

⁹ A visae e pogos nene, aloge m̃aagena na mara lala, a sur viowa la asike ga lavisi, ana ve sinemiu kurkur manene re. Sur la nene monar añalñaliv sumo, ana naga nene na pe legiena maro re nene po la wa.”

¹⁰ Ana pisa m̃ena pan la, sape “A ŝarin suŝe lala, yoko akila sina mara amio ŝarin suŝe taŝena lala, a purvanua lala asum̃alun sina purvanua taŝena lala.

¹¹ Yoko yemninu vaŝisi, a yoko yo kar ga la e yomarava nini pogos na pupia viso vaŝisi a maiena m̃arera lala, a nanene yoko amio m̃ena sur na sine kurkurena a pupia kile lala meta e sinapane.

¹² Ana pogos naŝa sur la nene pere wa, yoko yeririna la akila ke ne viowa van amiu. Yoko auarar amiu m̃arera, ala magka van amiu, ana siraunia aligan amiu e limana ne li na sumonen yumã nalenena, pona akoven amiu ava asike e yumã naloge viowaena, pona akila amiu asum̃alu ase marana ne kiela ŝarin suŝe lala pona kiela nasumonena lala. Sur viowa la nene yoko akusia vanon naŝa kam na apuarar ke kiau kia m̃arera.

¹³ Pogos nene yoko akila m̃arera van amiu vaŝisi, ana yoko imi sa naŝa kiamiu pulmas na lologonen Lologena Wo van la.

¹⁴ “Ana nagane, pogos naŝa sur la nene pere ke na wa, ve asitom manene re sane yoko aña avisa ya ne e pogos nene,

¹⁵ komin naŝa yoko e nena e kana pogos nena, nela visena na manmaruaena van amiu. Ana pog naŝa avisa visena la nene van kiamiu nasinekar lala, yoko ataulu

la, yoko tařatete si avilon kiamiu visena nena.

¹⁶ “Yoko e kana pogos nena, la ga nařa kam na apio la ke asape arimamiu pona womla pona řapo pona erau, la ne sanene la ke nařa yoko aure plan amiu aligan amiu e limana ne yerkawa lala, ana yoko akilapel amiu sanene vařisi vano-o kam lařasa awe mořar la.

¹⁷ Yoko yar la sinela kar amiu vařisi, yoko lařasa alamaran si visena van amiu, kam la nařa kiau kia sike e amiu.

¹⁸ “Ana nevisa van amiu sanini yoko tařatete vilřarimiu tai yoko kovio lue.

¹⁹ Yoko asumřal mřarera asumřa vano-o ataulu pog mřarera nene, a e mřapa nena nanene narui, yoko atol kiamiu malena na lelaga ea.”

Pupia mara gar Yerusalem

²⁰ A e lepas na pupia pog mřarera nařa yoko imi, Yesu pisa sina pan la sape “Pogog nařa visae avisu řegas nen yeririna na kilaen mara lala asumřal asuwo ke yo yervivi pupia pulkumali nařa Yerusalem, nane yoko akilia narui sane pupia kana pog na kilaroroen pimi ke lavis narui.

²¹ A pogog nařa avisu sur nene, kam nařa asike Sutea, popon aureure ana atapolou e kunus lala, a amiu nařa asike loyumřa Yerusalem, popon amomolue ana aureure, pona amiu nařa asike yomřaru, ve akilali re si nařa ato garo umřa.

²² Nanene vanon poglis nene, naga pe pupia legiena na kila maranen sine-mimiena kiena ne Ntewa, sa nařa nasiriena lala nanua sumo apisaaria.

²³ E mřena e pogog nene, yoko viowa manene laa va sira la nařa mřeřela, amio mřena la nařa amla ke yu pa narila lala. E pog nene, yoko naloge viowaena ve keviu vařisi e kieta purvanua, a pupia sine-mimiena imi va kieta yeririna la nene.

²⁴ A yoko playu na mara kila la ave moki aloloru, a la ve moki nařa sen viar limala, aurela ava ayumřae korena kiena ne řegas nen yeririna tařena lala. Ita le Yu lala yoko yar tařena lala avienena kare kieta pulkumali wa nařa Yerusalem, la ave

suřenia vano-o tol pogog nařa Ntewa ga kila sane lala kiela řisi narui.”

Yoko Narina ne Yeririna wasuře si imi

²⁵ A Yesu pisayu legiena maro, sape “E pogog nene yoko avisu kile lala ma e mrae a e kupario a e verue lala. E yomarava nini, yoko řegas nen yeririna lala aloge viowa, asitom kare sur la vařisi, a pogog nařa avisu sive kululu ve keviu a lapa ke vam metava va ke ura, yoko la aninue kare narui asape mřa yoko ve sanapen la na wa.

²⁶ A pogog nařa la avisu kilale ya nařa pivim ke e yomarava nini, a pupia sur la nařa ma e sinapane kulkulul kar ga narui, yoko sinela kurkur vařisi, asumřa marala malon marauena, a amarmarluia.

²⁷ Yoko akila mřa sanene vano-o, avisu inu Narina ne Yeririna nomřalivi e lul amio kiau pupia namřareraena amio kiau pupia naurarena.

²⁸ “Ana e kiamiu lepas, pogog nařa viřae avisu sur la ne sanene asiar amřalmřaliv, ve amarau re. Ve asitom re suria, ana asumřalu awar plan řarimiu vena akira va metava, komin nařa sur la nene kana kinasa sane kiamiu yaru nawere plan amiuena pimi ke, lavis war-poyo narui.”

Lepas na purpiliva

²⁹ Ana Yesu pisayu řakaiwa tai pan la e lepas na pogog mřarera nařa pimi ke ga wa, sape “Kam na asitomyuli purpiliva nene pona purlaki tařena nařa sanene.

³⁰ Pogog nařa avisu sane korowas la imi memaena, a imi malmalumu, a kana stos la siar miyulua, ana kam na akilia sane pogog na yepisusun pimi ke lavis narui.

³¹ Sanene pogog nařa avisu kile la nene aim amřalmřaliv ke sa nařa nepisa pan amiu řa rui, yoko akilia sane nasuřenena kiena ne Ntewa pimi ke lavisin amiu narui.

³² Lelaga nevisa van amiu, yoko sur punu ga monar imi mřalmřaliv mřa sanene vano-o řisi, ana siraunia, teras na yaru la nařa amal ke e pog nene akovio e yomarava nini.

³³ A yoko sinapane amio yomarava nini la mēna luwoka akovio, ana kiau visena lala tařatete akovio pogos tai.”

Kam na monar akila ruru kiamiu malena lala

³⁴ Ana Yesu mla visena nene pan la e pogos nene, pe visena na weřege laena, sape “Ana e kiamiu lepasa, kam na avisuar ruru amiu. Pe pon re kiamiu malena ve tařena si poli, pona amun manene la kuruta na munena, pona sur kar la ne sanene, a ve kiamiu sitomena su manene re mēna ga e sur na yomarava nini la silaga. Visae peraga, yoko asumā akila mā sanene vano-o ailan ga pupia legiena nene imi mālavin amiu veraga sa ga ekarpila.

³⁵ Lelaga, yeririna make ga e yo punu ga e yomarava nini, pe asitořmal re poli, asu wowe ga pe akilia re poli, ana yoko legiena nene imi tol la sa nařa manu milan ga řeregawa suřmal maneno sike e naga, marřan nenaga.

³⁶ Ana kam na monar avisuar ruru amiu silaga, monar alen lue ga vena akilia asřmal mārera vena atamalia amiu e sur la nařa yoko imi mālmaliv, vena kila nařa akilia asumāl ase marau Narina Yeririna.”

³⁷ Ana Yesu suřa pian la ke sanene e Yumā Wa ko legiena lala, a kolemalu naga petan pulkumali pava ke e Kunus Na Purolip lala.

³⁸ A kolulagi kona lala yeririna lala atavilo koskos, ařasuře la apa si e Yumā Wa vena aloge kiena visena lala.

22

Nasumonena nae Israel lala asitom ke asape awemār Yesu na wa

Matiu 26:1-5,14-16; Mak 14:1-2,10-11; Yoane 11:45-53

¹ Ana siraunia, pimi ke lavisin pog nařa kas punu ga, la akila kiela pupia řařagena lua, sane řařagena na kanen kiligaře nařa pe is re e poli, amio řařagena na sitořmalen natamaliaena.

² A e pogos nene, yerkawa kiena ne yar wa lala amio navianen navisaluaena lala, asitom ke asape awemār Yesu na wa, ana pe ařal re mrapa na kilaen poli, komin

amaraun nařa asape visae akila, pona yeririna la akila sur tai van la yo.

Sutas sun amio yerkawa lala, pisaar sape řisi na kom varaun Yesu

³ Ana e nena e pogos nene, Yermare pimi pa e sinena Sutas nae Kariot, naga nene la lualima taaga pa lua lala ga tai.

⁴ Ana pe yam piavi re nenaga, Sutas suřmalu, pa mālavin yerkawa kiena ne yar wa lala amio yerkawa kiena ne kiela lokul lala, pisawal kiena sitomena nena, ana apisayu mrapa ya nařa po, vena yoko kilia vielua Yesu van la.

⁵ Ana sitomena kiena ne Sutas nene kila amloge po pařisi, ana la apisu sane popon ala kilavaru tai vania vanonia.

⁶ Ana Sutas kekarania, a siar e pogos nene, silaga naga suřa kale ke kiena pulmas tai nařa visae ve yeririna re lala, ana naga kilia vielua Yesu van la.

Yesu pitetalia Pita lalua Yoane vena ava akila ruru kana kinanena maro

Matiu 26:17-25; Mak 14:12-21; Yoane 13:21-30

⁷ Ana apim tol legiena na siaren řařagena na kanen kiligaře nařa pe is re e poli, nařa e mā nena e legiena nene monar akila kuřařaena na narin sipsip lala vena sitořmalen natamaliaena.

⁸ Ana Yesu pisa pa Pita amio Yoane, sape “Nevitetalia amlua ava gare, vena akila ruru make sur lala na kinanena na řařagena nene.”

⁹ Ana lalua apiun tania asape “?Ana ko na sinořan ke osape meva mekila ruru e nape ne?”

¹⁰ Ana Yesu sape “Kamlua ava atol pupia pulutava nae Yerusalem, ana pogos nařa avaliga loyumā ea, alual yar tai nařa kus ke pupia piawi tai imi vitawe amiu. Ana ataveve avano, yoko naga were amiu ava e yumā tai.

¹¹ Ana pogos nařa ava loyumā, avis va řar na yumā nařani, avisave ‘Kieta Navianena piun sape, ?Awa māmimi yumā imimi wolawa lala, vena mekilia mese ea makan kinanena nasitořmalen natamaliaena nene ea?”

¹² Kamlua avisa ve sanene vania, ana yoko naga kipian amiun pupia lele tai

metava, naþa sur make sike pa e rui, ana yoko akila ruru make sur na kanen la e yo nene.”

¹³ Ana Yesu pisa pa sanene pa nalogena lua nene narui, lalua apano, ana apisu sur la punu ga pimi m̃alivi sa ga naþa naga pisa ruru þesan kemua pan la rui.

Sanene narui, lalua akila ruru kinanena maro kana Yesu.

Kinanena maro

Matiu 26:47-56; Mak 14:2-26; Yoane 18:3-11

¹⁴ Ana siraunia Yesu la apa meta e yo naþani, ana pog na kinanena, Yesu totano e lelen kinanena, ana li na lologena lala apim atotano amio.

¹⁵ Ana Yesu pisa pan la sape “Na nanua rui, in na nesitom m̃a kata kinanena nasitomalen natamaliaena nene. Na nene kau kinanena maro nini, naþa ita ga tekinana lele taaga, ana siraunia, nekilia neva ga e kiau pog m̃arera na wa.

¹⁶ Nevisa van amiu sanini, kilaparavi nini kana kinas pisayu natamaliaena. Ana yoko in na ve nakan re si narui, vano vano-o tol pogos naþa kiau natamaliaena imi m̃aliv e yomarava nini, e pogos naþa nasuþenena kiena ne Ntewa imi.”

¹⁷ Ana naga mlarar piala tai, pisa potenan pa Ntewa, ana pisa pan la, sape “Ala nanini, ataron werewere van amiu, amunia.

¹⁸ Nanene komin naþa siar nanagane, in na yoko ve nomun re si kuruta na munena, vano-o tol pogos naþa nasuþenena kiena ne Ntewa imi.”

¹⁹ Ana naga mla kala kilaparavi tai, mlenin pisa potena pa Ntewa, kawewowaia pisape “Naga nini tasneu ne, naþa netañan pan amiu. Ana yoko kam m̃ena ga monar akila ve sanene, sa naþa kiamiu nasitomalinena.”

²⁰ Ana siraunia, pogos naþa akinana pae, naga kila ke sina sa naþa kila e kilaparavi sumo, mla piala na munen tai, pisape “Piala nini naga sane kile na kau kuruta naþa yoko lau vanon amiu, vena visirluaen naviranarena viu kiena ne Ntewa amio amiu.

²¹ Ana sur viowa tai, yar naþa yoko vielua inu, naga ita ga tai naþa tekinana ke lele taaga nagane.

²² Yoko inu Narina ne Yeririna monar nemare ve sa naþa apisaar kemua nanua sumo rui, ana yar naþa yoko vielua inu, sineu miye ke nagane, yoko viowa manene vania!”

²³ Ana pogos naþa amloge, asum̃a apiuviun tan la asape akilali naþa alual lala ai naþa sitom ke sape kila sanene, ana pe añal re poli.

?Ane yoko ve kiela nasumonena?

Matiu 20:25-28; Mak 10:42-45

²⁴ Ana e pogos nene, veveyuen tai molue likan nalogena lala, sape lala ai naþa yoko la monar avisu naga sane naga to laa metavan la sane, ve kiela nasumonena.

²⁵ Ana Yesu mloge, pisa pan la, sape “Ita tekilia þelaga kiena ne yerikawa na yomarava la nini rui. Parin suþe lala la ape navisuaren kiela yeririna lala, a nasumonen lala, yar la monar avatanon la, ala kia naþa tometava van la, avio la avisave ‘yar navisuar itaena.’

²⁶ Ana kam na kiau nalogena lala, monar ve akilali re sa naþa aim ave yerikawa na yomarava nini. Kam yar tai naþa pona apisa ke asape naga pe yerikawa, yoko monar imi ve tokakin amiu, sa naþa pe pras maro. Kam yar tai naþa sape naga ve kiamiu nasumonena, monar imi ve sa yar na iila amiuenta.

²⁷ “E pogos na kinanena, yar tai naga tom̃a ga sane kikiran ga, a yar taþena naþa þar ke kana kinanena pimi pania. Ana lalua nene apisu sane ane pe yerikawa, naga mon manene laa metava? Lelaga kam akilia m̃aga, ana in na pe sa re naga po, in na nepitom e yomarava nini sane naga naþa kila yum̃aena, miila yar taþena lala a kila po pan la.”

Yesu pisaar nalaena pan la

²⁸ Ana Yesu pisa pan la, sape “Kam nene, nepisu amiu sane kam na sane amiilar inu po e pog m̃arera la naþa netolia, pimi tol nanagane.

²⁹ Ana sa naþa arimau mligan inu nepe suþen kiena yo, in mēna nevisa van amiu sanini nevisir plan amiu aim ave narin suþe lala e kiau yo la nene.

³⁰ Sanene, yoko kam ke narui kam naþa yoko ato si tano amio inu, tekinana lele taaga loyuma e kiau nasuþenena, a yoko kam mēna atotano e lele na totanoena naþa mon metava vena visuaren lus lualima taaga pa lua nene nae Israel.”

*Yesu pisawal naþa yoko Pita viro naga
Matiu 26:31-35; Mak 14:27-31; Yoane
13:36-38*

³¹ Ana Yesu pis amio Saemon Pita, sape “Ake Saemon, ovisuar ruru ko. Yermare sinen kar amiu, sinenan sape kila kare amiu vaþisi, ana Ntewa tamān rui sape yoko naga kilali amiu ve tokak ga, kilia liþere naþa po vetan naþa piowa.

³² Ana in na nemlenwo amiu ke rui, in na nomāreran ko ke e kiau leniena nesape visae ko na ve sanape, ana yoko kioṁa naviawaena taþatete loru makea. A siraunia visae ko na oim owo ruru sina, owasuþe ko oimi, yoko ko na oim ove yar tai naþa silaga okila womla lala aviawa mārerera manene laa sane.”

³³ Ana Pita pisatame Yesu, sape “Suþe, visae akoven ko ova e yuma nakoena, yoko in na nemio ko woga ga. Pona akila nā van ko vano-o ova otol marena, ana in mēna nekekarān ga naþa italu.”

³⁴ Ana Yesu pisa pania, sape “Pita, nevisa sur na lelaga van ko, sane yemalo ga nini, ve lakaporo kokoreko re wa, yoko ovisa kotalia inu yam ve telu, ovisave ko na omninue in nena ga.”

Pog mārerera pimi þarpo yo rui

³⁵ Ana Yesu piun tan la, sape “Kam na asitoṁal ke nanua ne, pogos naþa nemligan amiu apa amlologo kar ga e yo la nene. In na nepisa pan amiu nesape ve awar re sur laþas amio amiu, sane taga na varu, pona karo, pona kulus nen lamiu taþena, pona sur la ne sanene. ?Ana sanape, kam na apisu limamiu plasan sur laþas, pona peraga?”

Ana apisatamea, asape “Suþe, pe limamimi plasan re sur tai poli.”

³⁶ Ana Yesu pisa pan la, sape “Lelaga, naga ke narui. Ana nanagane, tesike e pog taþena nini narui. Nanagane, yar naþa kiena taga na varu, pona kiena karo toṁa ga, yoko warar vano. Yar naþa pe kiena playu na mara re poli, popon wilwilin lua mēna kulkota ana la kana kilavaru, va ul kiena playu na mara tai.

³⁷ In na nepisa nene pan amiu, komin nasiriena wa nasumo lala naþa la apisayu inu, apim amālmāliv ape lelaga narui, pano-o tol visena naþa Aisea pisa, naþa sape

*‘Akila pania sa ga naga mēna pe yar viowa
ga tai naþa kilakilaro ke navisalu-
aena.’ ” Ais
53:12*

³⁸ Ana nalogena lala asumā asitom veve ke ga visena kiena Yesu e lepas na playu na mara nene, ana asape “Suþe, opisu ke ne, nanini kieta playu na mara lua nini.”

Ana Yesu pisu sane la pe akilia ruru re kiena visena poli, ana sape “E, tepisayu sur nene torok narui.”

*Yesu pa mlen ma Ketsemani ma meta e
Kunus na Purolip lala*

Matiu 26:36-46; Mak 14:32-42

³⁹ Ana Yesu la amligan yo na ma metava nene, ana sa naþa kilakila ke ne, naga mialoro pa tol Kunus Na Purolip lala, naga amio kiena nalogena lala.

⁴⁰ Ana pogos naþa atol yo naþa Yesu pava ke ea, amap ea, ana pisa pan la, sape “Kam na monar alen silaga, vena nakilaliena lala ve akila amiu re aloru.”

⁴¹ Naga pisa pa sanene pan la, ana mligan la, pa laa perinan laa sane, ana kinai mlen pa Ntewa.

⁴² Naga mlen sanini, sape “Awis Ata, visae okilia okila woga ga, olalua piala na loge viowaena nene vetan inu ve nomun re. Ana ve okila re kiau nasinenanena, okila ga sa naþa kioṁa.”

⁴³ Ana e poglis nene Yesu mloge urmi pan paþisi, ana apisu navisi tai mligan ma e peni pitomi tano, pitomi miila naga vena naga mārerera sina.

⁴⁴ Ana Yesu sumā mloge piowa paþisi, sitom þele narui ana mlen mārerera laa

sane, mlen mña pano-o kana ninena sigariga sane kuruta kekapili e porotano.

⁴⁵ Ana pogos naña mlen pae, sumñal sina, p̄asuṗe si pa puna nalogena lala, ana p̄isu naña nasineyeena m̄e la rui, amiyum̄aen ke ga momalena narui.

⁴⁶ Ana naga pis malum kilapege la, sape “?E, amomalion ke ya ne? Popon asum̄alu, akila ve sa naña nepisa pan amiu rui. Kam na monar alen vena nakilaliēna lala ve aim re akila amiu aloru.”

Sutas la apim atarar Yesu

Matiu 26:47-56; Mak 14:43-50; Yoane 18:3-11

⁴⁷ Ana pogos naña Yesu pis ke pan la wa, ap̄isu ga pupia p̄egas nen yeririna tai apim akaten la, ap̄isu naña yar tai sumon la apim ke lavis narui, nanene na lala yar ga na sumo tai, naña Sutas. Ana Sutas mial pimi lavisin Yesu, kutararia ana mun pipina.

⁴⁸ Ana Yesu pis p̄esan pania sape “Sutas, omun pipiu sanene na pogaga, ana komin ya ne osape owilwilin inu Narina ne Yeririna e mrapa na sanene?”

⁴⁹ Ana la naña ape kiena ne Yesu naña asum̄alu asike lavisinia ap̄isu kilale ya naña Sutas la asape akila, la apiun tan Yesu, asape “?Suṗe, sanape, tete la e kieta playu na mara lala?”

⁵⁰ Ana Yesu pe pisatam̄e re poli wa, ana nalogena tai sum̄alu, p̄erelua kiena playu na mara, mligan pan tai tea, naña naga yar kiena ne p̄arin yar wa, ana tetereria ga, telua kiligana na p̄amarua pano.

⁵¹ Ana Yesu pis pania, sape “!E toko! Ita ve tekila re si sanene van la.” Ana naga tol si lelen kiligana yar nene, kila ruru sina.

⁵² Ana kira p̄isu yerkawa kiena ne yar wa lala amio yerkawa kiena ne lokul lala na yum̄a m̄ana Ntewa, amio nasumonena taṗena kiena ne le Yu lala, naña la m̄ena ap̄iminia, pis pan la, sape “?Sanape na aṗar kiamiu playu lala a kiamiu plaki la sanene? ?Pona kam na asitom ke asape in na yar tai naña nepinau m̄arera pona nom̄em̄e yaru?”

22:53 Luk 19:47, 21:37

⁵³ Nanua sumo, e legiena punu ga, in na nesisike nemio amiu e Yum̄a Wa silaga pano-o, ana komin ya ne kam na pe apim re lavisin in poli vena atarar inu e pogos la nene? Ana nepisu sane kam na ape yar na yemalolo, naña apim amio nam̄areraena na yemalolo taṗena lala, a nanagane kiamiu aora nena napo.”

Ana apim atarar Yesu aṗere pano.

Pita piro Yesu

Matiu 26:57-58,69-75; Mak 14:53-54,66-72; Yoane 18:12-18,25-27

⁵⁴ Ana atarar Yesu, aṗere p̄asuṗe amio la apano, apa loyum̄a e kove kiena ne p̄arin yar wa. Ana Pita m̄ena mial tapolou ga taveve la e pogos nene, pe pa re lavisin la poli.

⁵⁵ Ana pogos naña apim loyum̄a e kove nene, laṗasa apa akila kapi pivaga vena ategania, ana Pita m̄ena pa totano amio la.

⁵⁶ Ana la asum̄a narui kapi pivaga tegoli marana Pita, ana sira m̄ee na yum̄aena tai naña naga sike amio la, naga p̄isu kilalea, sape “!E, avisulia! Yaru nene, naga m̄ena lala yar tai naña silaga taveve yar naṗani!”

⁵⁷ Ana Pita pirovia, sape “!Peraga, vineu! Nepisa ruru ke na pan ko ne, in na pe nekilia re yar nene poli.”

⁵⁸ Ana pe piavi re poli, yar taṗena kira p̄isu Pita, p̄isu kilalea, sape “E, ko m̄ena tai nene naña.”

Ana Pita pisatam̄ea, sape “Peraga, mara.”

⁵⁹ Ana asum̄a ga aora si taaga p̄arovia, taṗena pimi pilagan manene ke sina ga pan la, sape “Nevisa ruru van amiu, yar nene naga miaialor kemua amio yere Kalele nene nanua rui. !Ap̄isu ke ne, naga m̄ena pe yere Kalele ruru nena napo!”

⁶⁰ Ana Pita pisatam̄ea, pisa kotalia la ke sina ga sape “Peraga, nemninue nena sur na opisa ke ne.”

Ana pogos naña Pita pisa ke visena nene wa, lakaporo kokoreko.

⁶¹ Ana pogos naña lakaporo kokoreko, Suṗe pilon p̄arina kira pimi p̄isu manene Pita. Ana Pita sitom̄al si visena kiena

ne Suḗe naḗa pisawal ḗesan pania, naḗa sape “Nevisaar nena van ko, e yemalo na legiena ga nene, pogos naḗa lakaporo pe kokoreko re poli wa, ana yoko oviro inu yam ve telu narui, ovisave ko na omninue in ga.”

⁶² Ana Pita mloge piowa paḗisi, pa vanua, tagi na tagi.

Yeririna lala kiena ne ḗarin yar wa akila kare Yesu paḗisi

Matiu 26:67-68; Mak 14:53-65; Yoane 18:19-24

⁶³ Ana la naḗa atarar ke Yesu e pogos nene akila piowa pania, apisa karea, asuia,

⁶⁴ akila mā pano-o apiwo marana vena ve kirava re sina, ana pogos naḗa asumā amlipa ke naga, apiai pania apiun tania asape “Ei, apisa ke asape ko navisawalena tai, a ko ovisawal lia, ane mlipa ko ga na wa.”

⁶⁵ Ana akila mā sanene panpano-o, apisa kare naga paḗisi.

Atar Yesu pa e pupia kumali kiena ne yerkawa kiena ne le Yu lala

⁶⁶ Asumā ga sanene pano-o mrae pa metava, ana nasumonena kiena ne le Yu lala, sa naḗa pupia yerkawa wa lala amio navianen navisaluaena lala, apim lele taaga e kiela pupia kumali. Pogos naḗa apim pa e lele taaga narui, aḗere Yesu pa sumāl se marala.

⁶⁷ Ana apis pania, apiun asape “Visae ko ope Navisaarena kemua lelaga, naḗa le Yu lala akiravan ke asape yoko naga monar imi, sinemimin mesape ovisawal ruru van imimi nanagane.”

Ana Yesu pisatamē la, sape “Nekilia nevisawal van amiu, ana visae nevisa, pona taḗatete akekarar naḗa alelaga e yo.

⁶⁸ A sineun nesape in mēna neviun sur laḗas tan amiu, ana visae neviunia, yoko kam na taḗatete mēna avisatamē yo.

⁶⁹ Ana sur tai naḗa in na nekekarar nesape nevisawal van amiu, nevisa sanini, nesape ‘Siar nanagane, yoko ve sa naḗa Tusi Wa pisa rui, naḗa sape yoko Narina ne Yeririna va totano ma metava e lepas na ḗamarua puna ne Ntewa na pupia namareraena.’ ”

⁷⁰ Ana pogos naḗa amloge visena nene, apiun tania, asape “!Ke, ya ne sa nene! ?Opisa ke osape ko ke naḗa ope Narina Ntewa narui?”

Ana Yesu pisatamēa sape “Naga ke narui, sane apisa ke ne.”

⁷¹ Ana pogos naḗa la asumā apisu naḗa Yesu pisa ke sape naga pe Narina ne Ntewa, sinela mimi, apisa sanini, asape “Yar nene pisa sanene, tepisu kilale ruru sane pupia veveyuena mēke ga e naga rui. Yoko ve takale re si yar taḗena la kiena visena imi visawalia, naga kiena visena ga mliḗere sina naga rui.”

23

Aḗere Yesu pa puna ne Paelat, ḗarin suḗe nae Rom naḗa pisuar ke Israel

Matiu 27:1-2,11-14; Mak 15:1-5; Yoane 18:28-38

¹ Ana li na kumali kiena ne le Yu lala, amloge pa visena kiena Yesu rui, ana asumālu akuspran la e pupia ḗegas tai, aḗure Yesu pa sumāl se marana ne Paelat e kiena lele nalipereena.

² Ana apis pa Paelat, apisawal sur la mok paḗisi pania naḗa apisayu Yesu. Asape “Yar nene, naga sumā kila kare ke sitomena kiena ne yeririna lala e kiamimi purvanua, sumā pisaluḗar la ke sape ve aul re si takis va kiomā yerkawa nene, ḗarin Suḗe Sisa nae Rom, a naga ga sumā pisirlua ke naga sape kus kia naḗa Navisaarena, kila sane naga ve kiamimi ḗarin suḗe keviu. Sur la nene, imimi na mepisu nena e kilamaramimi.”

³ Paelat miyagogon pae kiela visena, ana piun tan Yesu, sape “Ko towe ovisali kiomā. ?Lelaga kemua naḗa ko ope ḗarin suḗe kiena ne le Yu lala, pona peraga?”

Ana Yesu pisatamēa, sape “Naga ke narui, nane opisa ne.”

⁴ Ana Paelat miyagogon visena kiena Yesu, ana pe mā re naḗa naga kila sur tai piowa po, ana pisa pa pupia yar wa lala amio kiela yeririna lala, sape “Yar nene, e kiau navisuena, naga mesmesu ga, naga pe kilaro re navisaluaena tai poli.”

⁵ Ana la pe sinelan re logen visena kiena ne Paelat nene poli, ana la akila ga sane

sur na vitaþilena, aňareran manene pania, asape "Peraga, yar nene na piowa ga. Naga suňa miyuyur kare sitomena kiena kiamimi yeririna lala, a suňa mlologo ke pan la e yo kar ga la ne e yo punu ga, siar gar Kalele, pimi þar make yo Yutea, pimi tol pupia pulkumali nene rui."

⁶ Ana pogos naþa Paelat mloge asape Yesu siar kiena yuňaena gar Kalele, piun sape naga pe yere Kalele naapo pona peraga.

⁷ Paelat piun sanene komin naga pe pisuar re lepas nae Kalele po, ana þarin suþe taþena naþa Erot naga pisuar ke yo nene, a pogos naþa apisawal pa Paelat asape Yesu naga nae Kalele, naga pisa pan la sape yoko monar aure naga va mľalivin nena Parin Suþe Erot e kiena lepasa. Ana e pogos ke nene, ana Erot mēna pimi mialiali ke Yerusalem rui, ana aþere ga Yesu apa apisuia.

⁸ Ana pogos naþa Parin Suþe Erot pisu kilale sape Yesu nene, kekarania komin naþa mloge pa kiena suniena rui, kila sane nakonua rui naga sinenan sape visuia ana peraga, ana naga sitom ke sape nanagane narui, pona visu Yesu kila kile tai van yo.

⁹ Ana naga sunli amio Yesu, piun veve sur la mok pania, ana Yesu pe pisataňe re poli, toňa ga sane, pe pis re poli.

¹⁰ Ana e pogos nene, pupia yerkawa wa lala amio navianen navisaluaena lala, la mēna asumľal asike ga lavis, apis keviu apisasawal ke sur lala e lepas kiena ne Yesu.

¹¹ Ana sur la nene akila Erot amio kiena yar na mara lala pe sinelan re si Yesu po, akila piowa pania, apisalele karea þisa. Siraunia amiyen kulmrae nowo mňana ne þarin suþe ea, vena avitalia, ana akila mňa sanene pano-o, yoko Erot mligan si þasuþe pa pa Paelat vena visuvevea.

¹² Ana sumon sur la nene, lalua nene Paelat amio Erot lalua ape erau viowa ga, ana siar e poglis naþa lalua amiyuňae si lele taagan liþereen Yesu, ana þere si lalua apim ape erau wo sina.

*Yesu suňal si se marana ne Paelat
Matiu 27:15-26; Mak 15:6-15; Yoane
18:39-19:16*

¹³ Ana aþasuþe la si apim e yo kiena Paelat, ana naga pio viraviran pupia yerkawa wa lala amio suþe lala a yeririna lala sape aim avisuia.

¹⁴ Ana pogos naþa apim loyuňa, pis pan la, sape "Naþa aþere þesan yar nene pimi suňal se marau, kam na apisawal asape naga pilon kare lue ga sitomen kiena ne kiamiu yeririna lala. Ana nepiun sur laþas tania, sa naþa kam na amloge, ana in na pe noňal re sane naga kila sur la naþa apisa poli, noňal sane naga mesmesu ga.

¹⁵ Ana nemligan pa pa Erot pisuvevea, ana Erot pe mľa re sur tai e poli, ana mligan sina pimi pan inu. Pogaga, kiau naliþereena naga sanini, sane naga pe kila re nena sur tai naþa monar maren poli.

¹⁶ Visae sanene, yoko in na nekila ga sanini vania, nekila ga naþa awea, yoko aligan si vano, kilia wasuþe si va e kiena yo."

¹⁷ Ana komin naþa e pogos nene naga pe pogos na kilaen pupia þaþagenana kiena ne le Yu lala, asitom ke asape sa naþa Paelat naga kila ke silaga, yoko naga monar ligan lua si yere Yu tai naþa apuarar mēke e kiena yuňa na loge viowaena.

¹⁸⁻¹⁹ Ana poglis nene lala yar tai naþa Paelat þuarar ke ga wa, naga yar naþa Paraþas, naþa nanua sumo, naga þere yar taþena laþas akila sur piowa tai gar Yerusalem pa yar na kilaen mara lala nae Rom, aňe momňar la, ana Paelat koven pa e kiena yuňa na loge viowaena.

Ana pogos naþa apisu sane Paelat sinenan sape ligan lua si Yesu molue, apion manene pania, asape "Toko, toko! Imimi na sinemimin ga Paraþas wasuþe si imi van imimi. Yar nene, mesape olalua ga kiena malena."

²⁰ Ana Paelat yepen mavi, naga sinenan sape Yesu na molue koren ga sa ga ne va si vanua, ana kilali naþa pis sina ga pan la.

²¹ Ana la ato ga metavania, apionia asape "¡Osuaria, osuar e laki torovia!"

²² Ana Paelat pis pan la yam telu narui, sape "¿Ana komin ya ne, naga kila ya ne

piowa? In na nepisuveve make sur la rui, ana pe nomal re sur tai piowa teke e naga po, naña naga kilia marenia. Yoko nekila awe ga naga, yoko aligan si wasupe va umãa.”

²³ Ana la apisatamẽ si Paelat, apion manene laa pan sane, amãreren asape Yesu na monar va e lak torovia, ana akila mã sanene pano-o atauluia.

²⁴ Ana yokorena Paelat mla kiena nalipereena, pisawal pisape naga tamãn ya naña la apiunia.

²⁵ Yar naña sike e yumã naloge viowaena komin ðelaga na kilaen mara amio ðelaga na wemãren yaru, Paelat tamãn naga molue si pa pan la, sa naña la apiunia. Ana e lepas kiena ne Yesu, naga pisawal sape yoko kiena yar na mara lala akila vania ve sa naña le Yu la sinelania.

Aþere Yesu pa e yo naña Kalþari

Matiu 27:32-44; Mak 15:21-32; Yoane 19:17-27

²⁶ Ana la aþere Yesu pavini, amiyal apa e lele na suaren naga e laktorovia. Poglis naña apa ke narui, amãl yar tai pa yomãrua þasupea, yar nena naga Saemon naña nanua sumo naga nae Saerin, ana amãreren asape naga kus laktorovia kiena ne Yesu, ana amligan e purkaunena, ana taveve Yesu vavini.

²⁷ Amiyal apa ke sanene, ana poglis nene yeririna taþena mēna la mokliu naña ataveve ke Yesu, naña sira la moki, naña asumã atagililue amio pupia sineyeena.

²⁸ Ana Yesu mloge mã kiela visena na loge viowaena lala, ana kira þatau pisu la, pis pan la, sape “Sira re Yerusalem lala o, ve atagin in re si sanene. Visae sinemiun tagena popon atagin amiu ga, pona narimiu lala.

²⁹ Nepisa sanene pan amiu, komin naña pog mãrera tai pimi ke ne naña yoko yar la ne asuwal pog nena yoko avisa sanini, avisave ‘!Visae sira la ve kala sisi re ga rui! A wo manene laa sane visae ve awar re sisi la ne amun ke yu ne, komin e pogos nene yoko mãrera manene laa van ita temio narita lala.’

³⁰ “A yoko pog nene imi viowa manene laa van la vano-o asumãlu atag va tavie lala a kunus la avisave ‘Awis, aloru akoar imimi, akove momãr imimi, asinwo imimi.’

³¹ Monar avisuar ruruia, komin nanagane na lak memaena ke ga wa ana akila ke mãrera manene pan inu rui, ana siraunia va mã sanene vano-o visae lak imi mano pae, yoko akilia akila viowa manene laa sane van amiu.”

Asuar Yesu e laktorovia

³² Ana e poglis nene, apuarar ke mēna yar lua nakilaroen navisaluaena, ana aþere lalua nene amio Yesu, vena awemãr la amio naga.

³³ Ana amial mã apano-o, apa atol kana yo nene, yo tai naña apio asape “Yo na puriu na þarin yaru.” Ana la atarar Yesu, asuar naga e laktorovia, apisirlua su lika, ana asuar yar na mlamulena viowa lua nene, apisirlua la tai se þamarua a tai se þamēli.

³⁴ Sa nene narui, Yesu telan mēke e lak torovia, ana pis pa Ntewa, pisape “Ata, awis oviewo la nene. La pe apisu kilale re sur na akila ke ne poli.”

Ana siraunia li na mara la asumã ga, akila sur sa naña amlil mãpila, vena lualen lala ane yoko war kulmrae mãna Yesu tai, a ane war tai.

Apitalia kare Yesu þisa

³⁵ A yeririna taþena la asumãlu asike laa perina, asumã apisuar ke ga, ana kiela nasumonena lala apis piowa pa Yesu, apisa karea, asape “Akira avisu yar naña! Asape naga tamalia yar taþena la mok rui, ana nanagane na sanape? Asape naga pe Navisaarena kiena ne Ntewa, pona naga pe yar tanea tai naña Ntewa mligan pimi. Visae sanene, popon tamalia towe laa naga narui!”

³⁶ Ana yar na mara mēna lala apisa karea, apim akian kuruta namunena naña melkalka pania vena munia,

³⁷ asape “!Visae ko ope þarin suþe kiena ne le Yu kemua la lelaga, sa naña apisa ke ne, popon otamalia ko nanagane!”

³⁸ A e pogos nene asiri navisakilaleena tai, asuar to meta e laktorovia to metavan þarina ne Yesu, naþa sape “Þarin Suþe kiena ne le Yu lala.”

Lalua na kilaroen navisaluaena apis pa Yesu

³⁹ Ana e pogos nene, lalua naþa atelan la asike meta e lak torovia amio Yesu apis pania. Tai pis piowa pania, sa ke taþena lala, sape “?Ko ope Navisaarena naþa, po peraga? !Popon ovitaþilin otamalia ita!”

⁴⁰ Ana taþena pis pania pisaluþaria, pisape “Mara, nanagane kieta pogos na marena narui, ana ko na pe opatanon re Ntewa poli wa. Ita telu nini, naliþereena naþa akila pan ita naga taaga ga,

⁴¹ a e lepas na ita lua, mesmesun ga napiowaena naþa ita lua tekila, ana e lepas na puna, naga pe kila re nena sur tai poli.”

⁴² Ana pis pa Yesu, piun tania, sape “Yesu, pogos naþa oim ove þarin suþe owasuþe ko sina, awis, ve sinema þesan in re.”

⁴³ Ana Yesu pisatamea, sape “Nevisaar van ko, legiena ga na þane, yoko italua tesike e kieta yo wo.”

Yesu mare

Matiu 27:45-56; Mak 15:33-41; Yoane 19:28-30

⁴⁴ Nanagane pimi tol kolpae narui, a siar e pogos nene mrae tego re si po, kila narui yemalolo kalo make ga yo nene, mon ma sanene pano-o tol mrae telu yepekilavi.

⁴⁵ Ana siraunia, kulmrae naþa telan meke loyuma e Yuma Wa mana Ntewa, naþa kilawo yo wa naþa pe yo wa paþisi, naga purpa lepas lua.

⁴⁶ Ana e pogos nene, Yesu pio maro sape “Ata, neligan ninuu e lumoma.” Pio sanene narui, ana þere maron kiena yalua marpan top.

⁴⁷ Ana pogos naþa yerka kiena ne yar na mara lala pisu sur la nene, naga pisirlua kia kiena ne Ntewa, sape “!Lelaga naþane, yar nene naga pe yar mesmes ga naþa!”

⁴⁸ A þina la naþa apim lele taaga e yo nene, la mena apisu make sur la nene naþa akila pa Yesu, pe nasineyeena pan la paþisi. Ana siraunia apasuþela sina, amial apano amio pupia naloge viowaena, apa si mala uma lala.

⁴⁹ A þegas nen yeririna taþena mena lala asike e pogos nene, la asumalu asike laa perina sane, asma apisu make sur lala. Naga nene erau kiena ne Yesu lala amio sira la naþa amolue gar Kalele nakonua rui, ataveve ma Yesu pano-o pimi tol yo nene, ana la mena apisu marena kiena ne Yesu.

Yosop sin Yesu

Matiu 27:57-61; Mak 15:42-47; Yoane 19:38-42

⁵⁰ Ana yar tai, naga nae pulkumali kiena ne le Yu la naþa Arimatea, kiena kia Yosop. Naga pe yerka tai na pupia kumali kiena ne le Yu lala gar Yerusalem, pe yar mesmes tai naþa kiena þelaga po paþisi.

⁵¹ Naga tai naþa sinenan manene sape popon sa nasuþenena kiena ne Ntewa imi, ana nanua pogos naþa apisayu ke asape akila ya ne va Yesu, naga taaga kiena sitomena pe sa re nene poli, naga kilali naþa pisaluþar la sape ve akila re viowa vania.

⁵² Ana pogos naþa mloge asape Yesu mare rui, naga pa sumal se marana ne Paelat, piun tania sape kilia kus tasnena ne Yesu.

⁵³ Ana Paelat tamnan pania, ana pa kuslua tasnena ne Yesu e laktorovia, mliluar e kulmrae, kus pa mligan ruru meke loyuma e puluve viu tai naþa ate mare ga na wa, pe amliganli re yar tai mene poli wa.

⁵⁴ Ana legiena na marena kiena ne Yesu nene naga e Praere, sa naþa pe legiena na kila ruruen sur lala na Legiena Wa. Ana mrae pito ke narui, lavis ke Legiena Wa siar ne, naga nene e ruru nena e pogos naþa mrae pito kovio.

⁵⁵ Ana sira la naþa nanua ataveve Yesu siar gar Kalele pimi tol kiena laktorovia, nanagane pogos naþa akus tasnena pimi, ataveve sina. Ataveve pimi tol kana yo na

nasiniena, ana apisu naña amligan mēke e puluve.

⁵⁶ Ana apisu pae, añasuþela apa si uña vena akila ruru ponotaninu lala sa naña mñaþes amio pomat. Atol yo uña, ana Legiena Wa siaria, kila narui pe pogos re si tai pan la naña ava avaia tasnena ne Yesu poli. Ana asuña ga uña sanene, sa naña navisaluaena pisape monar akila e legiena wa.

24

Puluve koren ga mēke na

Matiu 28:1-10; Mak 16:1-8; Yoane 20:1-

10

¹ Legiena Wa þaro pano, ana kana legiena taþena na peni, naga legiena þesa na legiena olua. Ana kolulag kona, sira laþas nene aþar ponotaninu sa naña pomat amio mñaþes naña akila ruru pa rui, amiyal apa e puluve naþani vena avaia ruru tasnena ne Yesu.

² Ana pogos naña apitom atol yo, aña naña pupia kilavaru na kilawoen puluve nene, amelilivin lua rui,

³ ana apa loyuma, amilan naña tasnena ne Yesu kovio rui.

⁴ Ana asuñal ga asike narui asitom wele mña pano-o amilan naña yar lua asuñalu asike amio la. Lalua nene mñala kulmrae la miyuwowo naña miyuwowo ruru nena naapo.

⁵ Ana sira la naþani amaraun naña akira avisu lalua nene, ana akinai tanon lalua, þarila tau pito e porotano. Ana lalua nene apis pan la, asape “E, sira lala, taþatete alual yar na malena e yo na marena.

⁶ Naga pe mon re si e nini poli, Ntewa pisirlua rui. Amiu asitomyuli sina ya naña naga pisawal pan amiu, pogos naña naga sike amio amiu nanua gar Kalele, pe apim re e nini poli wa.

⁷ Naga pisa sanini sape sa naña naga pe Narin Yeririna, yoko monar atañan naga va e limana ne li viowa lala, ana yoko asuar naga va e laktorovia, ana siraunia, e kana legiena natelu, yoko suñalu mal sina. Nane visena ke nanene narui naña naga pisawal þesan pan amiu.”

⁸ Sira la amloge narui, kila la asitoñal si visaarena naña pisa ruru pan la pisape yoko naga kilia mal sina.

⁹ Ana asitoñal sina, amligan yo nene añasuþela, apa apisu nalologena la lualima taaga pa taaga amio lala taþena lala. Sur la naña apisu e puluve apisayu meraravan pan la,

¹⁰⁻¹¹ ana la pe amlelaga re e poli, apisu sane sira la nene asun wowe ga.

Ana sira la naña apisu suri la nene, kiela kia la sanini: Maria nae Maktala, Soana, Maria naña anenane Semes, amio si sira taþena laþasa.

Pita kiriri pa pisuveve puluve

¹² Ana Pita ga naga taaga sinenan sape visuli sur nene pe lelaga pona peraga, ana naga suñalu, kiriri pano, sinenan sape visuveve yo loyuma e puluve. Pimi tol yo nene, pulu pa loyuma, ana pisu ga kulmrae la sike na, tasnena Yesu kovio. Ana pa si vanua, mial si þasuþe pa uña, suña sitom liluenia sape sur nene na sanape ne, pona kana kinas na ya.

Nalogenia lalua amial apa gar Emeas, apitawe Yesu

¹³ Ana siraunia, e ke ga e legiena nene, la ke ga lalua amligan Yerusalem, sinelan asape ava e narin pulkumali tai, kiena kia Emeas. Mrapplepa na vaen e yo nene pe piavi manene re poli, sur sane tasmelualima.

¹⁴ Ana pogos naña lalua amial apa ke narui, lalua asuña asunyu manene laa sur la naña þaro pa rui.

¹⁵ Asunlilue mña sanene apano, ana Yesu mial pimi piear la, amialpil amio apano.

¹⁶ Apisu naña mial ke amio la, apisu sane wolawa ga tai, komin naña apisu kilale þele naga.

¹⁷ Ana Yesu piun tan la, pisape “?Kam lua amial ke sanene asunyu liluen ke ya ne?” Ana pogos naña naga piun sanene, aparurula, asuñalu asu, marala piowa ga sike narui.

¹⁸ Ana lala tai nene, kiena kia Kleoþas, naga pisatañe Yesu, pisape “Yar la mok liu na yo kar ga la ne, asuña amialiali ke

Yerusalem e pogos nene, ana pona ko ga taaga manene ga pe omlogeyu li re pupia sur la ne kakate mare ga yo na wa?"

19 Ana Yesu piun pisape "Ana ya la ne sane opisa ke ne?"

Apisatamea, asape "Naga nene e lepas kiena ne yar nae Nasaret naña, Yesu. Naga pimi, pe navisawalen tai, kila kile la mok liu na kiena pupia namareraena, mlologo, a pian ruru yeririna la po pañisi, kila sanene sinelan naga keviu, pano tol mēna Ntewa na Mava pisawal sape kekarana naga pañisi.

20 Ana siraunia, nanua ga yemlagi nakoneva, pupia yar wa lala amio kieta nasumonena lala sinela karia, aþere mā naga pa e pupia kumali la pano-o amliþerea, asape naga monar mare, ana apa asuar naga pa e laktorovia, mare rui.

21 Nanua sumo, kiamimi sitomena sike ga e naga, mesape naga ke narui naña yoko tamalia ita le Israel lala, yoko were plan ita vetan namareraena kiena ne le Rom lala, ana nanagane, sur la punu ga pa piowa si narui. Naga kovio petan imimi, nagane kana legiena telu narui.

22 "Ana sur si tai naña kila imimi memilan manene pañisi, ana mesitomyu kaþaran ke na wa. Nagane kolulag pogos naña lakaporo kokoreko yam taaga, kiamimi sira laþas asumal apa si e puluve naña amligan tasnena ne Yesu mēnea, apavinin asape avaiia ruru wo.

23 Ana pogos naña apa aporu e yo nene, apisu naña tasnena pe mon re si e lelen poli, ana akirir si aþasuþe la apitom pun imimi, apisawalia, a pe naga re ga nene poli, ana pisawal mēna asape apisu navisi lalua, naña apisawal asape Yesu mal si petan marena rui.

24 Ana imimi laþasa sinelan asape ava avisulia, ana la apito e puluve, apisu sanena naña sira la apisa, pe aña re nena ga."

25 Nanene narui visena la naña lalua apisa pa Yesu, e pogos naña asumal ga asike mrapa. Ana naga mēna pis, pisa pan la, pisape "Aulai, kam punu ga kiligamiu la poþe ga. Navisawalena la apisawal sur

la nene nakonua rui, ana sanape naña kam na pe amlelaga re poli wa?"

26 Pona akilia rui naña yoko Ntewa visirlua kiena Navisaarena ve pupia yerkawa e yomarava nini. Ana kam na pe apisu kilale re nena ga naña Nasiriena Wa lala apisawal rui, asape yoko monar akila Navisaarena loge viowa e sur la ve moki, yoko akila kare naga sumo, þisi na Ntewa kilia visirlua naga, vena tol kiena pupia naurarena."

27 Ana Yesu sunyu ke pan la sanene, pian la pa re laa sane wa. Naga siar e tus lala kiena ne Mosis, pimi tol tus lala kiena ne navisawalena lala, sumā pisa meraravan ruru ke pan lalua nene sanape naña visena marua la nene sumā kiar ke ga naga, apisayu ke ga naga silaga.

28 Ana asumā amialor si apano, pe piavi re poli apim lavisin pulkumali naña lalua apanon ke ne. Ana lalua apisu sane Yesu sumā mlilu mrapa pa yalen silaga.

29 Ana amareran pania vena sike ne amio la wa. Apis pania, asape "Nagane na mrae pito ke narui, lavis pintamā ne. Oimi osu re omio imimi sumo wa, omēke ga e nini." Ana Yesu pa mēke amio la.

30 Asumā ga tol pogos na kinanena, ana apim lele taaga e yo na kinanena. Ana pogos na lenwoen kinanena, Yesu ga sumālu mlarar kala kilaparavi, mlen pa Ntewa pisa potena pania, kawe wowaia pion pan la.

31 Ana pogos naña kila sanene, e nena ga e pogos nene sa naña kilamarala pike, apisu kilalea sane naga naña sike amio la ne Yesu ke narui. Ana apisu manene mā sanene, a yam plas ga kovio nena ga.

32 Ana lalua asumā apisayuia, asape "Suwala, tepisu kilale re poli e, ana kieta Suþe ga naña. Ana lelaga, naga nena ga, komin naña tesun lilue ke temio mrapa naña naga pisayu meraravan ke visena wa pan ita, kiena visena lala sa ga kapi kekan ke sineta."

33 Ana pogos naña akilia sane apisu marana ne Yesu rui, pe amomal re si poli, ana asumal ke ga, amial e pupia lepamiema aþasuþe apa Yerusalem vena avisawal va laþasa.

Ana m̃alivin la lualima taaga pa taaga naña asike e viorena wa, amio lañasa,

³⁴ ana lalua pe apis re pan la poli wa, ana la apis p̃esan pan lalua, asape “E, pogos naña kamlua apa ga sane, sur tai pimi m̃alivin imimi e nini. Visena nanua sira la apisa, lelaga kemua naña, kieta Supe sum̃alu molue petan marena rui, Pita ne nanene naga pisu e kilamarana.”

³⁵ Ana la m̃ena lua nañani asikol kiela visena, apisayu sanape naña Yesu m̃alivin la mrapa, a naña la pe apisu kilale re poli, pano-o tol pogos naña kawewowa ga kilaparavi pan la.

Yesu m̃alivin kiena nalogena lala

Matiu 28:16-20; Mak 16:14-18; Yoane 20:19-23; Yum̃aena 1:6-8

³⁶ Ana pogos naña lalua asum̃a asunyu ke sur la nene pan la wa, amilan ga naña Yesu sum̃al ga sike likan la rui, pisa pan la sape “Sum̃are sike amio amiu.”

³⁷ Yesu pimi pula sanene, kila la am̃ape yermare, ana amarau pañisi.

³⁸ Ana Yesu pisu kilale naña amaraunia, piun tan la sape “!E, vanon ya ne asitom manene laa sanene? Ve sinemiu veve lua re!

³⁹ Avisuli lum̃au amio lau, lelen ya na sike e la? !Apisuia, in ga nini! Aim atolili tasneu la kom̃asa, komin sur sane yermare naga pe puryun re poli a pe kilam̃iu re poli sane tasneu nini.”

⁴⁰ Ana sum̃a pisa ke sanene pan la, kipian limana amio lana pan la vena akilia avisuia.

⁴¹ Ana e pogos nene, nalogena lala kiela sitomena miyum̃ae manene sanene, naña akekara pañisi naña apisu si Yesu, ana asitom p̃ele towe ke ga wa. Ana Yesu pis ke sina ga, piun tan la sape “?E, apran kapi rui?”

⁴² Ana la amlega ika tai, manoa ga na wa, ana amla kinakinas tai pa Yesu,

⁴³ ana mlavia, kan ga e marala.

Yesu pis maro pa kiena nalogena lala

⁴⁴ Ana siraunia, Yesu pis pan la, pisape “Pogos naña nesike nemio amiu nanua sumo ne, in na nepisayu visen la moki na

lepas make ga na Siriena Wa pan amiu. In na neñar visena la e tus lala kiena ne Mosis, e tus lala kiena ne Navisawalena lala, a e tus na Yauena Wa lala, ana nesum̃a nepisa ke nesape visena ne la nanene narui, asum̃a apisayu in ke ga, a nesape yoko aim ave lelaga e inu ve ve piavi re. In na nepisa sanene pan amiu, ana nagane kam na apisu sur la punu ga nene apim ape lelaga e maramiu p̃isi narui.”

⁴⁵ Ana Yesu pian la pa laa sane, kila kiela sitomen la pa keviu li laa sane loyum̃a e kinas nen Siriena Wa la nene, ana sur la punu ga pimi merarava ruru pan la.

⁴⁶ Naga pisa pan la, sape “Nane visen la nene kala kinas ne nanini narui, sane Navisaarena, yoko akila naga loge sinelae vano-o marenia, ana e kana legiena natelu, yoko sum̃alu mal si vetan marena.

⁴⁷ A siraunia e ga e kiena kia, yoko kiena yeririna lala asiar gar Yerusalem, a yoko amolue ava e yomarava wetelu, ava alologon va p̃egas nen yeririna make ga, avisawal van la avisave monar avilopu la narui, ana akilia atol naviewoena e kiela mlamulen viowa lala.

⁴⁸ “Ana kam la naña apisu sur la punu ga nene e kilamaramiu, kam ke narui ava avisawal va yar tañena lala avisave suri la nene na lelaga.

⁴⁹ Yum̃aena nene naga pe yum̃aena m̃arera tai naña m̃arera pañisi, ana yoko neligan nam̃areraena tai e amiu vena iila amiu atauluia. Nam̃areraena nene, navisaarena kiena ne Ata sike naña yoko naga ligan molue ma e peni vitom kokonia amiu, ana sineun nesape nevisa van amiu, ve aur matan re pulkumali nini wa, ana monar asum̃ate m̃a e nini, vano-o atolia.”

Ntewa p̃erelua si Yesu pa ma e peni

Mak 16:19-20; Yum̃aena 1:9-11

⁵⁰ Ana pogos naña Yesu sinenan sape ligan la, sumon la apito garo e narin pulkumali naña Petani. Apitom atol yo nene, asum̃a sanene, pano-o Yesu p̃ar plan limana metavan la, pisa ruru la.

⁵¹ Suũa pisa ruru la mĩa sanene pano-o, suũa siar mligan la palilue narui, pa si metava pa nena ma e peni.

⁵² Ana nalogena lala apisu kiela Suũa kovio sina petan la, ana akinai tano amlotunia, ana aņasuũa la si apa gar Yerusalem, naũa akekara naũa akekara.

⁵³ Ana asuũa e nene pano-o, ana silaga e pogos na leniena make ga asuũa apa amieluar ke Ntewa e mĩana Yuũa Wa.

Nane Lologena Wo kiena ne Yesu Kristo naũa in Luk nesiria, ڤisi e nene narui.

**Lologena Wo Kiena Ne
Yesu Kristo Naþa
YOANE
Siriyuia
Visayuena Na Tusi Nene**

Komþasnen suniena plas na tusi nini

Tusi nini, “*Lologena Wo Kiena Ne Yesu Kristo Naþa Yoane Siriyuia*”, pisayu Yesu, sape naga Visena kiena Ntewa naþa pimi sike amio ita, pe yaru. Yoane sape naga siri tusi nini vena yaru la naþa auloia, akilia alelaga naþa Yesu, naga yaru naþa Ntewa pisaaria sape yoko ligan imi vena tamalia ita, a naga narina Ntewa lelaga. Naga siri sanene vena tekilia tetol malena e kia kiena Yesu, komin naþa temlelaga ea (20:31).

Suri naþa Yoane pisayu þesania, sape Yesu pe Visena naþa sike kemua nanua sumo, naga sike amio Ntewa. Tusi nini pisayu kile la naþa Yesu kila, naþa akilia aiila ita tevisu kilalea sane Yesu naga narina Ntewa naþa Ntewa pisaaria sape vitetalia naga imin tamalia ita. A siraun kile la peve taaga nene naþa Yesu kila, Yoane pisayu kala kinasa. Naga pisayu sanape naþa yaru laþasa amlelaga e Yesu ana atavevea, a yaru laþasa yepela mavin naþa alelaga ea.

E marana na keviu 13 pa tol marana na keviu 17, Yoane pisayu suri la naþa pimi e Yesu kolemalo naþa nasinekar la apimin vena atararia. E yemalo nene, Yesu pis ke pan kiena nalogena lala, vena akila ruru la asumate suri la naþa yoko imi tol la pogos naþa akila ke kiena yumãena. Naga pisin mēna visena na visirplanen kiela sitomena la sumo, sumon naþa kiena nasinekar la apimi atararia.

E luasinen tusi nini, Yoane pisayu naþa nasinekar la apimi atarar Yesu, aþure pa kumali apis pania, a siraunia apa asuar naga e laki torovia. Naga mare, a siraunia naga mali sina, a kiena nalogena lala apisu naga.

E tusi nini Yoane pisayu malena naþa ve uro re, naþa yaru kilia tolia e ga e Yesu Kristo. Malena nene siari nagane, a pimi ga e yaru la naþa amlelaga, asape Yesu ga naga pe mrapa, a pe purþesnen visena lelaga, a pe purþesnen maliena. A pupia suri naþa tusi nini pisayuia, naga þelaga kiena Yesu pogos naþa piyan ke yaru lala, pisayu suri la naþa yaru la akila pona amiyumãenia e kiela maliena e legiena makega. Naga pis e þelaga na visena sanene, amio pakaiwa lala, vena kilaen totou naiilaen sitomiena kiena la naþa amloge, a kila mēna amloge sane naga mēna pa yaru saga lala. Naga pisayu suri la ne sane wii, kilaparavi, kapi vivaga, a yaru na visuaren sipsip amio kiena sipsip lala, a kilika naþa krep amio mrasa, vena vian kiena yeririna lala e leþas na kieta maliena amio naga.

Komþasnen tusi nini la na nini

Visena na sumo 1:1—18

Yoane Nakeena a nalogena þesa lala kiena Yesu 1:19-51

Yesu kila kiena yumãena 2:1—12:50

Legiena maro lala kiena Yesu garu Yerusalem 13:1—19:42

Yesu mali sina a kiena nalogena lala apisu naga 20:1-31

Yesu mālivi sina pan kiena nalogena lala garu Kalele 21:1-25

Navisaarena naga to sumon nasiiena na yomarava nini

¹ Na konua konua rui, e purþesia, naga naþa apio Purþes nen Pelaga kiena ne Ntewa naga sike amio Ntewa, a naga pe Ntewa.

² E pogos na siien sur punu ga, naga amio pa Ntewa rui,

³ naga miyumãen yumãena na kilaen sur punu ga. Pe sur re tai naþa naga pe miyumãen re poli.

⁴ Malena na lelaga molue e naga, ana malena nene pimi pe sane yomerarava kiena þegas punu ga na yeririna lala.

⁵ Naga pimi sa naþa yomerarava na tegolien la naþa asike e pupumalko, na yemalolo nene taþatete tauluia.

Yoane Nakeena pimi mlologon ke pisape yomerarava pimi ke rui

⁶ Siraunia, Ntewa mligan kiena yar tai pimi e yomarava nini, nane Yoane Nakeena.

⁷ Naga pimi sane yar na iilaena, vena visawalen yaru na yomerarava nene naga pimi ke ne, vena iilaen yeririna la punu ga akilia alelaga asape yaru nene naga pe yomerarava kiena ne Ntewa.

⁸ Sa naþa, Yoane naga pe pe yomerarava re poli na wa, ana pe yar na visawalen ga.

⁹ Ana siraunia, yaru na yomerarava nene pimi kate e yomarava nini. Naga pe yomerarava nalelaga napo, ana pimi pe na ligan kiena yomerarava nene e malena kiena yeririna punu ga.

Yomerarava na yomarava

¹⁰ Yaru na yomerarava, naga naþa sii yomarava nini, ana pogos naþa pimi ea, ana yeririna na yomarava lala pe apisuluþar re si naga poli.

¹¹ Naga pimi þes puna ne uña mña ne kiena yeririna la, ana la na mratava puna pe sinelan re naga poli.

¹² Ana la ga þasia akekaran naga, amlelaga ea, ana e la ga nene punuia, naga tañan la vena akilia aim ave narina ne Ntewa lala.

¹³ Naga kila la apaeme sina yam luania, pe sa re naþa sisi la na apaeme taveve lus na kuruta, pona nasinenanen sa yermene amio sira, pona sitomena kiena yeririna, ana apaeme sina taveve nasinenanena kiena ne Ntewa.

Purþes nen Pelaga kiena ne Ntewa pimi pe yeririna

¹⁴ Sanene na, Purþes nen Pelaga kiena ne Ntewa pimi pe yeririna lelaga, pimi sike likan ita, ana tepisu kiena malena napo, pulen manene laa þelaga na lemana amio þelaga nalelagaena. Naga pe nowo tanea wa mearu kiena ne Arimata, ana mepisu kiena pupia naurarena, kiena naga taaga.

¹⁵ Pogos naþa Yoane Nakeena pisayu naga nanua ne, pisape "Naga naþa nepisawal pae pan amiu, nesape naga yoko

siraun inu, naga su metava, in na neto ga tano, komin naga mal nakonua laa sane, in na na nanagane ga ne."

¹⁶ Naga pulen þelaga wo lala, ana silaga kila ke po pan ita paþisi, kiena pupia lemamena kila temlogelue ga po paþisi.

¹⁷ Nanua Ntewa pisirlua yermarua Mosis, þar ga kiena navisaluaena lala pimi pan kiena yeririna lala, ana Yesu Kristo, Ntewa pisirlua naga þar þelaga na lemana amio visena na lelagaena pitomi e yomarava nini.

¹⁸ Ita yeririna lala pe yar re nena tai naþa kilia Ntewa poli, pona pisu e kilamarana, ana yaru naþa tolue ga e sitomena kiena ne Ntewa, lalua aparpran la ga veraga, naga ga pimi kila ita tekilia Ntewa amio kiena þelaga lala.

Yoane Nakeena mlologonyu Navisaarena

Matiu 3:1-12; Mak 1:7-8; Luk 3:15-17

¹⁹ Ana pogos naþa Yoane Nakeena mlologo mña pano-o, nasumonena kiena le Yu lala nae Yerusalem la asitom veve ke paþisi sane naga miyuñae ke sanape, pona naga pe Navisaarena, po naga ai. Ana la apitetalia yaru wa þasia amio yar keviu si þasia na lus wa kiena ne Livae, apim apiun petania asape "Ko na ai?"

²⁰ Ana pogos naþa lala apiunia, naga pisawal ruru ga sur punu ga pan la, pisatañe la, pisape "Peraga, in na pe nepe Navisaarena re poli."

²¹ Ana la apisape "?Sanene na, ko na Yermarua Elaisa nanua sumo ne, ana ko omal sina, po pere? Nanene komin naþa Visena Wa pisape naga monar wasuþe sina sumon Navisaarena."

Ana naga pisatañe la sina, pisape "Peraga, pe in re nene poli."

Ana apisape "?Pogaga, ana po ko na navisaluaena naþa Mosis pisaar nanua yo rui?"

Ana pisatañe sina, pisape "Peraga rui."

²² Ana la apiun ke sina ga tania, sape "?Ana ko na a si narui? Monar ovisa sur tai van imimi vena mekilua mevano mevisawal van la naþa amligan imimi mepimi. Ovisawal ruru ga van imimi, sane ko na ai?"

²³ Ana kiena navisatamēena e pogos nene sanini, pisape “Inu in na pulgo korena ga ne e yokorena nini, naña Navisawalena Aisea pisawal na konua rui. Ana pulgo nene pimi pe na visawalen sape: ‘Amiu akila ruru mrapa lala kiena Supe e kiamiu malena!’ ”

²⁴ Ana lala p̄as naña asike e pogos nene, le Varasi lala,

²⁵ ana la apiun ke sina ga pan Yoane, apisape “Imimi memloge pa rui, ko na opisa osape pe ope Navisaarena re poli, pe ope Elaisa re poli, a pe ope navisaluaena re naña Mosis pisa poli. ?A visae sanene na, vanon ya ne ko na ositom osape ko na otorokin osun okekee lue yeririna lala sanene?”

²⁶ Ana Yoane pisatamē la, pisape “Inu, nakeena naña nekila ke ne e la nene, naga e ga e wii. A yaru tañena tai yoko imi kus leleu, naña naga sike pa likan ita rui, ana pe akilia re naga poli wa.

²⁷ Naga to laa metavan manene inu, sane in na pe netorokin re neva lavisin po, pona neyal nemio.”

²⁸ Ana lele naña apa ke ea na visuen Yoane, nane e norava lavisin kumali naña Petania, e wii naña Yortan lepas na vano, nane e yo naña Yoane sumā kee ke yeririna lala ea.

Yesu, narin sipsip nakuṗaṗaena kiena ne Ntewa

²⁹ Ana e legien tañena si tai, Yesu mial pa katen Yoane Nakeena amio imimi kiena nalogena la e yo naña mesike ea. Ana pogos naña Yoane pisu Yesu, pisa pan imimi, pisape “!E, amiu avisu yar na mial ke pimi naña! Naga, sa ga narin sipsip kiena ne Ntewa nawarplanen nakoena na mlamulena viowa kiena ne yeririna lala na yomarava nini.

³⁰ Nanene naga naña nepisayu ke pan amiu nanua rui, nepisa nesape: Siraun inu, pupia yar tai naga imi naña sumon inu, to manene laa metavan inu sane, komin naga teke sumon inu.

³¹ Nepisa visena nene nanua, nemninue ga nesape naga ai, nemninue ga nesape erau ne nanene, ana nekilia ga nesape monar nekee ita le Israel lala e wii,

vena kilaen naña tekilia tevisu kilale kieta yerkawa nene.”

³²⁻³³ Ana Yoane pisa meraravan pan imimi sanape naña naga kilia sape Yesu pe Navisaarena. Naga sape “Sa naña nepisa pa rui, in na pe nekilia re poli nesape naga ai, ana pe piavi re nena ga, Ntewa pis pan inu, pisa sanini, pisape: Visae ovisu kiau Ninuna Wa vitom ke tano, totano e yar tai, naga ke ga nene naña yoko kee yeririna lala e Ninuna naña kiau.

“Naga pisa sanene pan inu, ana pogos naña nepisu Yesu nene, nepisu Ninuna mligan ma e peni pitomi tano e naga, sa naña lomē, pitomi koan e naga.

³⁴ Vanon sur ne na nene naña nepisua, nekilia nevisawal ruru van amiu, sane pe lelaga ga, yar nene pe narina ne Ntewa kemua lelaga.”

Nalogena lua na sumo kiena Yesu apim puna

³⁵ Ana e legiena tañena si tai na, Yoane Nakeena sumā ke ga wa e yo nene, sun ke amio imimi lua Antru, naña e pogos nene mepe kiena nalogena.

³⁶ Ana mepisu Yesu mial pimi p̄aro lavis pu imimi. Ana Yoane pisa pan imimi lua, pisape “!Amiu lua avisu ke yar nene, naga sane narin sipsip na kuṗaṗaena kiena ne Ntewa!”

³⁷ Memloge Yoane pisa sanene, ana veraga ga mesumālu, memial mepa mesiraun Yesu.

³⁸ Ana Yesu kira p̄atau pisu imimi lua, pisape “Nepisu sane amiu lua sinemiun ke sur tai.”

Ana mepisatamēa, mepio naga sane kiamimi navianena tai, mesape “?Rapae, opimi e nini na, ko na omomon ke pe?”

³⁹ Ana naga sape “Pogaga, aimi teva avisua.” Ana memial mepa metol e naña Yesu sike ea e pogos nene, ana siar sane ko yepekilavi ko e maran mrae vari, mesun mā memio naga pano-o yemalolo.

⁴⁰ Ana Antru nene naña imimi lua memloge Yoane sunyu Yesu, mesumālu metaveve sanene, naga Antru naña wenla Saemon Pita navetokak.

⁴¹ Ana pog naña pisa sape taveve ga Yesu narui, ana miroro panon p̄esa wenla

nene, a pogos naþa malia pis pania pisayu Navisaarena, naþa e visena na Epru kiena ne le Yu la apio asape Mesaea, a e visena na Kris kiena ne le Krik la asape Kristo. Ana pisawal sanene, sape “Mara, Navisaarena nene, imimi meal rui.”

⁴² Naga pisa pan wenla naþane, ana pure pimi pu Yesu.

Ana pogos naþa Yesu pisu naga, pisape “?A, ko mena nene naþa narina ne yermarua Yoane tai? Nenagane na nesikia ko sina ga, kioma ki Keþas.” Ki mena nene kome visena nae Epru, naþa kana kinasia kilavaru, naþa kome visena nae Kris asape Pita.

Yesu pure nalogena lua sina apim atavevea

⁴³ Ana e legiena taþena si tai, Yesu sinenan pisape taveve si kiena mrapa, pisape kusro yo vato si kiena yo naþa Kalele. Mepa sanene, þisi na mal si yar tai, pisa pania pisape “Ko oim otaveve inu.” Yar nene, kiena ki Pilip,

⁴⁴ naþa naga mena nae yo kiena Antru amio Pita, nanene pulkumali na Petsaeta.

⁴⁵ Ana pe piavi re poli na Pilip pa kale kiena erau tai, kiena ki Nataniel, pa pisa pania, pisape “Yar keviu naþa yermarua Mosis amio navisaluaena lala asiriyuia, apisawal na konua rui, naga pimi malivi likan ita rui. Imimi meal rui, naga nae Nasaret, narina ne yermarua tai kiena kia Yosop. Ana yar nene, kiena ki Yesu.”

⁴⁶ Ana pogos naþa Nataniel mloge asape Yesu naga nae ga narin pulkumali naþani, naga piunia pisape “Ana sanape? Pupia yar keviu napo tanea sanene taþatete malivi e narin yo nene Nasaret!”

Ana Pilip pisatanea, pisape “Ei, ve ovis re sanene, ko na oim ovisuli kone wa.”

⁴⁷ Ana þisi na lalua apa sina puna ne Yesu, a pogos naþa lalua amial apim lavis puna, Yesu pisu Nataniel, pisayu naga, pisape “Lelaga ga, nepisu yar nene sa ne yar wo lelaga tai nae Israel, yar tai naþa navisokanena pe to re nena e naga poli.”

⁴⁸ Ana Nataniel mloge Yesu pisayu naga sanene, piun tania sape “?Ana sanape na ko na okilia osape in na yar na sanene?”

Yesu pisatanea pisape “Pogos naþa Pilip naga pe pimasun ko re poli wa, pogos naþa ko ga taaga opa ruru ko ke vatanon purpiliva, in na nekirawal ko pa rui.”

⁴⁹ Ana Nataniel milan nakiliaena kiena Yesu nene, pisape “!Navianena, ko na narina ne Ntewa kemua na lelaga! Ko na ope þarin suþe lelaga kemua nae Israel.”

⁵⁰ Ana Yesu pisa pania, pisape “!In na nepisa ga narin visena tai van ko, naþa nepisu ko e purpiliva nene, ana veraga ga kila ko na omlelaga marera e inu! Nanene na po paþisi, ana nevisaar van ko sane yoko ovisu sur na ilanena la ve moki vaþisi ne, naþa ve keviu laa sane taulu naþa opisu pa rui.

⁵¹ Lelaga nepisa ruru ga, sane yoko amiu punu ga avisu ma e peni naga vike ga meke na, amio navisi nae ma metava lala avitom ke tano e inu, ava sina metava, avitom tano, ava si metava ve sanene. Sur ne la nanene akilia avisuia komin naþa inu nepe Narina ne Yeririna, sane in na nae ma e peni nepimi nepe yeririna ruru nena naapo.”

2

Kile na sumo kiena ne Yesu, e talopaena gar Kana

¹ Ana Yesu lala apimi atol pa norava nae Kalele, ana e legiena na telu, þaþagena na talopaena tai e kumali nene Kana. Ana anenane Yesu naga pa kate pa e þaþagena nene rui,

² a siraunia amligan visena pimin Yesu amio kiena nalogena lala, apio la mena ga vena ava ea.

³ Ana Yesu lala apa akate e þaþagena, asuna amio yeririna la pano-o, sur tai naga piowa, kuruta na munena na þaþagena nene naga þisi iroso ga. Ana anenane Yesu pimi pisa pa Yesu, pisape “Namunena la naþa yar keviu na þaþagena kila ruruia, amun make rui, ana nanagane na aplasan narui.”

⁴ Ana Yesu pisatanea, pis pania, pisape “?Sira marua, yuaena ya ne e þaþagena nene teke e inu? Ve oligan re te luau, vanon kiau pog na yuaenen sur la ne sanene, naga pere ke ga wa.”

⁵ Anena mlogear sur la naþa Yesu pisa, ana pis pa yar la naþa na yumãenen þaþagena, pisape “Sur ya la naþa sa naga visa, amiu akila ga, ve avis re, ayumãen ga.”

⁶ Ana þisi na Yesu pisu pupia pias nen wii laþasia sumã ga lavis, naþa le Yu la asumã apio ke wii pa ea, akevan ke kiela sur la ea sa naþa kiela lotuena pisa ke. Pupia pias nen wii la nene ate e kilavaru torokin waren lita ponotia ve taaga [100], punu ga tol orai.

⁷ Ana naga pisa pan la, pisape “Amiu ava avio wii, awar imi ataron vito e pias nen wii la nene vano-o uleule.” La apio mña wii pano-o apuleule ruru nenaga.

⁸ Ana Yesu pisape “Pogaga, nagane na avioli ve tekaki ga, ala van yar keviu na þaþagena munlia.” Þisi na apio, amla pano-o akian pania.

⁹ Ana yerkawa munlia, mloge sane pimi pe kuruta na munena narui, ana milan paþisi, mninue ga sape amlal namunena nene pe. Lala naþa apio, la ga akilia ke, ana pe apisawal re poli, þisi na naga pio yar naþa talopa ga na wa pimi puna.

¹⁰ Yar nene naga pimi ana yerkawa pis pania, pisape “E þaþagena taþena lala, apio ke kuruta namunena naþa po pimi þesa, ana pogos naþa yar la amun lili mña pano-o, atol mare ga kuruta na munena naþa pe po manene re poli naga pimi maro. Ana e þaþagena nini, la amun mña pano-o, þisi na ko otol ga mñau kuruta napo tai naþa pimi maro. Komin ya ne okila sanene?”

¹¹ Ana sur naþa Yesu kila e pulkumali nae Kana e yo naþa Kalele, naga sane pe pupia kile tai, naga pe kiena kile þesia naþa miyumaenia. Naga kila, sa naþa naga sape siar na kila meraravanen kiena puriukawaena nae yo metava, ana pogos naþa kiena nalogena la apisuia, kiela nalelagaena e naga pa laa metava, sane naga pe Navisaarena kemua lelaga.

¹² Þisi narui na la punu ga nene apato si garo Kapeneam, nane Yesu amio anena, wenla lala amio kiena nalogena

lala, apam atol si yo nene asu li mña sane pano-o tol legiena la þasia.

Yesu mñene plan lala naþa aþilwilin ke sur lala loyuma e Yuma Wa mña ne Ntewa

Matiu 21:12-13; Mak 11:15-18; Luk 19:45-46

¹³ Ana pogos tai, lavis ke pog naþa le Yu la akila kiela pupia þaþagena tai, naþa Paþagena na Sitoñalen Natamaliaena. Ana kiela þelaga marua tai, sane e kas punu ga lala punu ga monar akilali naþa ava ma metava Yerusalem e kana pog ne naapo vena kilaen þaþagena nene, vena sitoñalen kala apua la naþa amoluegar Isip, ana e pogos nene Yesu mña ga pavin.

¹⁴ Naga pa tol yo, ana pa kate e Yuma Wa Mana ne Ntewa, pisu lala moki naþa asike aþilwilin ke puluk la, sipsip lala amio manu la, pisu mña la naþa nakepuen kilavaru taþena lala va e kilavaru nena naapo na Yuma Wa mña Ntewa. Yumaena la nene ape yumaena wo tai, komin ape yumaena na wilwilinen sur lala naþa yeririna la monar aulia vena kilaen kuþaþaena ea, a pe sur viowa tai, la akila kare laa yar lala, ana metavania, akila ke loyuma e kove na yo wa.

¹⁵ Ana Yesu pisu naþa akila kare yo wa na yuma sanene, þisi na sinena mimi, þar kilika lala, þuarar luas lua sane, panon la. Naga pa sanene, pa mñene plan la amio kiela sipsip lala amio puluk lala apa vanua petan Yuma Wa mña ne Ntewa, ana e lepas kiena ne la naþa akepu ke kilavaru, pa taron plan kiela karo na kilavaru, kawe plan mña kiela varvara lala.

¹⁶ Ana yar la naþa aþiliwilin ke manu lala, naga pis pan la pisape “!E, awar plan kiamiu sur la vetan yo nene! !Amiu ve akila re yuma mña ne kiau ata nene imi ve yuma na tauluen kiamiu kilavaru sanene!”

¹⁷ Ana pogos naþa nalogena la apisu naþa Yesu mñene plan la sanene, kila lala asitoñal si nasiriena wa tai, sa naþa

pisayu pa Navisaarena sumo rui, naña pisa sape

“Kiau sitomena urmi pañisi e yuñã wa kioñã, naga sa naña kapi naga kekan ke loyuñã e sineu.” Yauena 69:9

¹⁸ Ana vanon suri nene, yerka kiena le Yu lala, la mñena apisu ke sur la naña Yesu miyuñãenia, ana apiun tania, asape “Suria ne ko na omiyuñãen ga ne, sur keviu tanea. ?Ana ko nene okilia okila kile ya ne e maramimi, vena kila imimi mevisu kilia sane mesmesu ga naña okila sanene?”

¹⁹ Ana Yesu pisatamẽ pan la, pisape “Pogaga, kiau kile naga sanini: Amiu awe plan Yumã Wa nene, ana siraunia, e legiena ve telu ga, yoko nevisirlua sina ga.”

²⁰ Ana asape “Lala naña amiyuñãen yuñã nene, amiyuñãen pano-o tol kas lualima yam vari pa orai, ana sanape ne ko na opisa sanene, osape okilia ovisirlua si naga e legiena ve telu ga? !Tañatete ga ve sanene ãa!”

²¹ Lala apis sanene, vanon la pe akilia ruru re sur naña Yesu pisa ke e pogos nene poli. La pe apisu kilia re asape pog naña Yesu pisa ke Yumã mñana ne Ntewa nene, pisa ke ga tasnena ne.

²² Ana siraun laa sane, pogos naña naga mal sina ga taulu marena, kiena nalogena lala asitomãl naña naga pisa visena la nene pan la, ãisi na kila amlelaga manene laa e nasiriena wa lala amio visena kiena ne Yesu lala pan la.

²³ Ana Yesu la asumã e ãaãagena nene garo Yerusalem pano-o, naga kila kile la moki, ana pogos naña yeririna la apisuia, lala moki amlelaga e naga asape naga pe Navisaarena.

²⁴ Ana Yesu pe tamãan manene re naga pan la poli, pe ãasine manene la re poli, vanon naga kilia ruru la pa rui.

²⁵ Yar tañena tañatete visa sur tai va Yesu e lepas na ãelaga kiena ne yeririna lala, vanon naga kilia ruru make ga, kilia ruru sur punu ga naña sike e sitomena kiena yeririna lala.

3

Nikotimas pimi pisu Yesu

¹⁻² Ana pogos tañena tai na, kolemallo, nasumonena tai kiena ne le Yu lala pimi sape visu Yesu. Yar nene naga Varasi tai, kiena kia Nikotimas. Pisi na naga pimi, pisa pa Yesu pisape “Navianena, imimi mepisusu ko ke, naña mepisuluñar sane ko, ko navianena tai naña okom puna Ntewa opim, vanon pe yar re tai naña kilia kila kile la ne sa naña ko na okila ke ne poli, sa Ntewa ve to re amio naga.”

³ Ana Yesu pisatamẽ pania, pisape “Ee, kile la nene apogaga, ana in na monar nevisatamẽ ve lelaga van ko, sane yar naña ve vaeme re sina ga imi ve urviu, yoko tañatete Ntewa ve suñe e kiena malena.”

⁴ Ana Nikotimas sinena pulan visena nene, pisa pisape “!Aulai! ?Ana yar naña pe yermarua pa rui na kilia vaeme si ve sanape? In na pe nesitom re nesape naga kilia va sina ga loyuñã e mñeñena ne anena poli, vena vaeme sina.”

⁵ Ana Yesu pisatamẽa sape “Nepisa pe lelaga pan ko, sane yar monar vaeme e wii, a monar vaeme e ninuna. Visae peraga, naga tañatete va loyuñã e navesuñenena kiena ne Ntewa.

⁶ Yar kilia war sina ga yaru, ana Ninuna kiena ne Ntewa kilia war sina ga ninuna viu e malena kiena yeririna.

⁷ Nanene na vaemeena nalua naña nepisa ke pan ko. Ve sanene, ko na ve sinemã ulan re si naña nepisa pan ko nesape ko na monar ovaeme sina.

⁸ “Ositom veve li lagi. Lagi na miyui ke ne, naga pa ke ga e yo naña sape va ea, pona temloge ga miyui ana teminue ga tesape miyui pimi ke sanape, pona pa ke pe. Ana mrapa naña Ninuna miyuñãe e malena kiena ne yeririna lala naga sa nene, naga sa naña lagi.”

⁹ Ana Nikotimas sitom manene e visen la nene, piunia sape “Aulai, ana sur nene naga sanape ãa!”

¹⁰ Ana Yesu pisatamẽ pania, pisape “Ko na ope pupia navianena tai kiena ne le Israel la rui, ana nepisu sane sur la ne

nepisa meraravan ke pan ko ne, ko na pe okilia re nenaga na!

¹¹ Oyagogo ruruia! Sa naþa navi-sawalena la amiyuñae pa nanua rui, in na nepisa ke ga sur ya naþa nekilia amio suri ya naþa nepisua, ana sa naþa silaga, amiu yeririna nae Israel lala yepemiu mavin kiamimi visena lala.

¹² In na nepisayu pa sur na yomarava nini pan amiu rui, ana yepemiu mavin lелагаen ea, ana visae nevisayu si sur nae ma metava lala, yoko akilia alelaga e ve sanape? In na nepisu sane peraga yo.

¹³ Ana inu Narina ne Yeririna nekilia neviaan amiun sur la nae metava, vanon pe yar re si tai poli naþa pisu yo nene, ana in ga Narin Yeririna nepetan ma e nene nepitom tano rui, siraunia yoko nowasuþe neva si metava ea.

¹⁴ “Nanua sumo sumo, yermarua Mosis la asike e yo korena, loñara la akar moñar ke yeririna lala, ana pisirlua laki tai, miyuñae totouena na loñara a mligan mono metava ea, ana yar la naþa loñara kar la, visae akira ga va avisu loñara naþa ñeke metava, Ntewa tamalia la. Ana e ga e mrapa ña nena nene, yoko monar aligan inu ñena Narin Yeririna nomon metava e laki tai.

¹⁵ Ana yar naþa visae lelaga e inu, yoko tol malena viu naþa ve uro re pogos tai.”

¹⁶ Yesu pisa sanene komin Ntewa sinen si yeririna na yomarava la nini keviu paþisi, ana tañan narina nowo nene, naþa naga taaga ga pe kiena, pitomi mare wo ita, ana yar ai naþa lelaga e naga taþatete kovio, yoko tol malena wo naþa ve uro re pogos tai.

¹⁷ ?Ana vanon ya ne Ntewa mligan narina nene pitomi tanon yomarava nini? Pe mligan re pitomi vena naliþereen yeririna na yomarava nini poli, ana mligan pitomi vena tañan kiena malena vena tamalia itaena.

¹⁸ “Yar naþa mlelaga kemua e narina nene, yoko Ntewa taþatete liþere naga, ana yar naþa pe mlelaga re poli, nakoena teke pa e naga rui, vanon pe mlelaga re e narina ne Ntewa poli.

¹⁹ ?Ana naliþereena nene naþa Ntewa monar kila, purþesia naga ya? Nanene vanon mligan kiena yomerarava pitom e yomarava nini, ana yeririna la akila pi-owa ga pano-o, pe akekararan re naga poli, sinelan ga þelaga viowa la na yemalolo.

²⁰ A lala punu ga naþa akila ke pi-owa sanene, sa naþa pe sinelan re nena yomerarava nene poli, pe sinelan re aim lavisin poli, amaraun asape sa kilalae kiela naviowaena la nene vim kakate e yometava, þisi na yar la akilia avisu kilalea.

²¹ Ana yar la naþa amiyuñae e þelaga naþa na po a mesmes, pe amaraun re yaru na yomerarava nene poli, apim lavisinia. Lala akekaranja, komin yomerarava nini naga kila meraravania sane sur la naþa akila, pe yuñae nalogearena ga na sinenanena kiena ne Ntewa.”

Yoane Nakeena kekara vanon Yesu siar kiena yuñae

²² Ana siraun sur la nene, Yesu pure kiena nalogena lala amligan Yerusalem apa e norava nae Yutea. Apa sanene, asun akee ke yaru lala.

²³ Ana e ña nena e pogos nene, Yoane Nakeena ñena sumña e lele taþena tai kiena ki Aenon, lavisin yo naþa Salim. Naga pimi e nene vanon wii tai ñeke ea, þisi na yeririna la naþa apim puna, naga kee la e wii nene.

²⁴ Nanene e pogos naþa pe atarar re naga amligan pa e yuñae na koena poli wa.

²⁵ Ana e pogos nene nalogena kiena ne Yoane lala akila visena tai amio le Yu taþena tai e lepas nakevanen sur lala sa naþa kiela lotuena pisa ke, ana e lepas ñena nakeena lala naþa Yoane amio Yesu lalua akila.

²⁶ Apisayu ña pano-o þisi na apim apisu Yoane, apiun petania, asape “Navianena, mesape meviun tan ko sanape e lepas naþa nanua sumo, pogos naþa tesike e wii naþa Yortan lepas navano, ana yaru naþa Yesu pimi pisu ko, ana ko na opisa plan sur moki kom puna. A nanagane na naga ñena kee ke yeririna lala, ana la punu

ga asuñña amliligan ita apa ke ga puna, la moki na moki.”

²⁷ Ana pogos naña apisa sanene pan Yoane, naga pe pielue re poli, pe mloge piowagan re poli, kekaran ga, pisape “Ita yeririna la punu ga monar teyumaen ga suri ya naña sa Ntewa ligana te limata.

²⁸ Sa naña ami akilia ruru pa rui, in na nepisawal lue ga, sane kiau yumaena, in na pe Navisaarena re poli, in na nesumon ga naga nepimi, ve na visawalen sape naga pimi pa rui.

²⁹ A nenagane na, sane ami na apisawal ga pan inu na wa, naga pimi kila ke pa kiena yumaena rui, ana suri nene nekekarania, nepisu po pañisi.

“Naga sane pog na talopaena, naña sanini. Visae yar naña talopa, kiena erau tai, naga iila keviu nakilaruruen sur punu ga na pañagena, ana siraunia, e kana legiena nena, pogos naña aure sira imi, sira nene tañatete va totano amio yaru nene, va su ga amio wona. Ana yaru nene pe mloge re piowa poli, kiena kekarena maran taaga ga sane naga naña talopa. Ana nanagane, in mēna nekekara sanene, naña kiau nalogena la asuñña ataveve Yesu.

³⁰ Nanene komin Suñe Navisaarena naga monar imi ve keviu lue ga sanene, in na monar neim neve tokak lue ga.”

?Navisaarena imi yumaen ve sanape e yomarava?

³¹ Ana Yoane Nakeena pisayu Navisaarena, sape “Naga nae yo na mava, naga su metavan sur punu ga. Ita tomolue ga tano e yo nini, ana tekilia tevisu ga sur na tano lala. Ana sa naña nepisa, naga petan ma e peni pitomi tano, to metavan yeririna punu ga,

³² a naga pitomi pisawal ke sur la naña nanua susumo pisu ma metava, a sur la naña mloge. Naga pisawal sur wo la nene, ana yeririna la pe sinelan re kiena visena la nene poli, pe amlelaga re e poli.

³³ La moki pe amlelaga re poli, ana ita naña temlelaga, kieta nalelagaena kila sane Ntewa, naga kiena visena lala pe lelaga a mesmes ruru po.

³⁴ Kiena visena la nene, mligan Navisaarena pitomi pisawal pan ita rui, ana tekilia tesape visena la nene pe visena lelaga. Nanene komin pogos naña Navisaarena pitomi, tepisu sane naga pis e puriu kawaena na Ninuna Wa kiena ne Ntewa, vanon Ntewa mla kiena Ninuna pan naga pe komsus re poli, punu nenaga.

³⁵ Ntewa Arimana kekaran narina nene keviu pañisi, ana mligan sur punu ga e limana.

³⁶ “Ve sanene na, ita naña temlelaga e naga, tetol malena rui naña pe nalue ga. Ana yar naña pe mlogear re poli, yoko tañatete visu malena na sanene pogos tai, ana sinekar kiena ne Ntewa ve keviu vania.”

4

Yesu pisape wasuñe si Kalele kom lepas na Samaria

¹⁻² Ana e pogos nene, visena tai telivi ma ga, apisa ke asape Yesu suñña pure ke si nalogena tañena la moki apim puna, suñña kee la. Ana sa naña pe Yesu re kila ke nakeena e la poli, ana imimi nalogena ga la mekila, ana la apisu sane yeririna kiena ne Yesu la apim ape moki taulu kiena Yoane Nakeena.

Pisi na la apisasa lelein ke visena nene pa e yo la sanene, pano tol Varasi la, ana pogos naña Yesu mloge sape la mēna akilia, ana kila amloge piowa kominia,

³ naga pisu sane popon vetan Yutea, vato si tano garo Kalele. Pisi na naga mligan yo, pato sanene,

⁴ ana e kiena mrapa Ntewa pisaar sape monar vato war ro e norava nae Samaria.

⁵⁻⁶ Ana memial ma mepano, mepimi moñarpoyo e kumali tai, kiena ki Saeka. Ana lavisin kumali nene, pupia pulus nen wii tai moña ga, naña siar nakonua konua rui, pimi tol nagane, apio asape wii kiena ne Sekop. Porotano nene, nanua susumo pe kiena ne yermarua Sekop, ana siraunia naga tañan pa narina naña Yosop.

Ana memio Yesu memial mepim metol wii nene, mrae su va ruru nena, Yesu mloge yepena mimi vanon kiamimi pupia

yalena e mrae m̄arera, p̄isi na pa totano e yepas nen wii nene.

Yesu pitawe sira nae Samaria tai

7-8 Mesūña e wii nene pano-o, p̄isi na imimi nalogena la mesūñalu mepa e kumali pe na ulen kamimi kinanena, ana Yesu naga taaga pa ruru tōña ga. Pisi na sira tai nae Samaria mial pimi sape vio wii. Naga pimi ana Yesu piun tania pisape “?Awis, okilia ovio re m̄ña wii tai?”

9 Ana sira nene, pe kilia re Yesu poli, ana pisu kilia ga sane le Yu tai, ana milan pāpisi nāpa naga pis ruru po pan sanene, vanon e pogos nene, le Yu la amio le Samaria la pe apivis vitawa re poli. Ana piun tan Yesu, pisape “?Vanon ya ne ko na ope le Yu, opis panu, sira nae Samaria, opiun wii tan inu?”

10 Ana Yesu pisatām̄ea, pisape “!Sira, visae ko na okilia ga nalaena nowo nāpa Ntewa sinena pisape la van ko! !Visae ko na okilia ga sape in na ai, nāpa nepiun wii tan ko! Visae ve sa ga nene, pona ve in re nāpa neviun wii tan ko, ana ko na nāpa oviun wii tan inu. Ana pogos nāpa visae oviun wii tan inu, nekilia nela wii nāpa pe wii na laena malena van ko.”

11 Ana pogos nāpa sira mloge sur nene, piun petan Yesu, pisape “Yar keviu, pe kiōña sur re tai nāpa na vioen wii e poli, ana pulus nen wii nene naga pato tano pāpisi. Ve sanene, wii na malena nāpa opisa, yoko otol ve sanape, po yoko ovio lepas nape?”

12 Ana opisa ke wii tāp̄ena nene na, nane m̄eke nini naga pe wii tanea tai. Kieta yermarua na susumo nāpa Sekop, naga m̄ana wii nanini. Naga mun ke ea, amio narina lala, kiena sur mal lala, amligan lelein pimi tol p̄ane. Ko na ōñape ko opo taulu yermarua Sekop nene ana okilia ola wii tai nāpa wo taulu nanini?”

13 Ana Yesu pisatām̄ea pisape “Lelaga, wii nene naga po, ana pogos nāpa tomun pae na, ve piavi re na moto kar ita sina.

14 Ana yar nāpa visae mun wii nāpa nela vania, p̄isi na naga tāp̄atete si moto karia. Yoko wii nāpa naga munia, imi ve sa purp̄es nen wii si tai loyuma e kiena

malena, ve wii na malena nāpa ve uro re pogos tai, sūña lalau lue ga vetania, tāp̄atete mema pogos tai.”

15 Ana sira nene pe kilia ruru re visena kiena ne Yesu nene poli wa, pisape “Yar keviu, visae sanene, popon ola re narin wii tai nene van inu, vena nemunia, ana ve moto kar inu re sina, ve netom re si e nini nevio wii.”

16 Ana Yesu sinenan sape sira nene kilia sape naga ai, ana pisa pania, pisape “Nevisa sur tai van ko sumo wa: ovato sina, oto ovio ōña oure naga amiu lua avam si e nini.”

17 Pisi na sira nāpa pisape “Ee, pe wou re tai poli.”

Ana Yesu pisa pania, pisape “Lelaga, ko na opisa ke memes ne, ko na pe ōña re tai poli.

18 Nanene vanon yar la nāpa ko na ōpere la nanua sumo rui, la punu ga tol lima, ana nagane na osike sina amio tai, ana pe otalopa re amio poli. Sane kiōña visena pe lelaga ga, ko na pe ōña re tai poli.”

19 Ana sira nene sinena pula pāpisi nāpa sane Yesu kilia ruru kiena malena sanene, pisape “Lelaga ga, yar keviu. Nenagane na nekilia narui, ko ko na navisawalena tai.

20 Naga po pāpisi ne, ana pona ko na navisawalena ga kiena ne le Yu la yo. Imimi le Samaria lala, kiamimi yo wa nane pupia tavie nane ma ne Kerasim, nāpa repimimi la nasusumo amlotun Ntewa e konua rui, pimi tol nagane. Ana amiu le Yu lala, āmareran ke asape pupia kumali wa kiamiu nāpa Yerusalem, naga taaga ga pe lele memes na kilaen lotena van Ntewa. Sanene, a si na memesu narui, amiu pona imimi? Ovisali nene!”

21-22 Ana Yesu kekaran nakilaruruen sitomena kiena ne sira nene e p̄elaga memes na lotunen Ntewa, naga pisa pania, pisape “Lelaga vineu, opisa pe lelaga ne, lotena kieta italua pe maran taaga re poli. A nanene pe vanon re lele na kilaen lotena la lua, naga vanon sur na sanini. Amiu na yo nini, akila ke lotena, a pe akilia ruru re naga nāpa amlotun ke poli, a imimi le Yu la, Ntewa kilaar pisape yaru

na tamaliaen yeririna lala naga molue e kiamimi lusia, p̄isi na mekilia ruru Ntewa kamimi nāpa memlotun ke naga.

“Ana nekilia nevisa van ko sane yoko tāpatete ve sanene. Monar olelaga e inu, nāpa nepisa ke pan ko nagane, sane pogos tai ne pimi ke ne yoko nalotena viu tai siaria, nāpa ve kieta ita punu ga. Le Yu amio le Samaria, ve tesitōmal re si sape yo mesmes na lotunena Ntewa ea nane ma tavie ne, po kumali nāpa Yerusalem, po yo tāpena si tai.

²³ A pupia sur ga nāpa tesitōmalia, visae telotun Ntewa, na monar tetam̄an Ninuna Wa yūmae e ninuta, a monar telotun lelaga, torokin nāpa kiena visena lelaga pisa.

“Ana nanagane na Ntewa arimata kale ke yeririna la nāpa akilia alotun naga e p̄elaga mesmesu na sanene. Pisi na e pogos ne pimi ke na wa, po nāpa pimi pa rui, yoko kiena p̄egas na lelaga na kiena lotena, alotun naga ve sanene.

²⁴ Ntewa naga pe ninuna, ana yar nāpa sape lotunia, monar lotun e ninuna, a suri nene monar ve lelaga e kiena malena.”

²⁵ Pisi na sira nene, naga mlelaga ke sape yoko Navisaarena imi, naga nāpa visena nae Kris pisape Kristo, naga pisa pa Yesu pisape “Sur la nāpa ko na opisa ke ne, pona pe lelaga yo, ana nemlelaga nesape Navisaarena nāpa yoko imi, naga ke narui yoko visawal sur punu ga ve lelaga van imimi.”

²⁶ Ana Yesu pisa ga narin visena nene pania, pisape “Nane ko na opisa ke ne, in ga nini, nane nesun ke nemio ko nagane.”

²⁷ Naga pisawal pa naga pan sira nene sanene, ana nalogena la āpasūpe la sina apa atol yo nāpane. Apam na, apisu Yesu sun ke amio sira nāpa ne, sane lalua ga, ana la sinela pulania. Sinela pula na aparurula ga, pe lala yar tai piun re petan sira nāpane pisape sinenan ya, po piun tan Yesu pisape lalua asunyu ke ya.

²⁸ Ana sira nāpa sūmalu, mligan m̄ana piawi na wii m̄eke na, mial si pa ūma e kiela kumali. Pogos nāpa pa tol ūma pisawal pan yeririna lala, pisape

²⁹ “Wolawa le Yu tai sike tano garo puluwii, sun amio inu, kilia make sur punu ga e kiau malena. Nepisu sane Navisaarena kemua, po peraga? Amiu aimi, teto tevisulia.”

³⁰ Ana lala asūmalu apito tano asape avisu Yesu.

Pakaiwa na kinanena nāpa marua sike lokove

³¹ Ana pogos nāpa lala amiyal ke apimi, akate re poli wa, nalogena la āpar plan kala kinanena nāpa apato apulia, apisa pan Yesu, asape “Navianena, oim okinana.”

³² Ana Yesu pimi re poli, ana apio sina ga pano-o p̄isi na Yesu pisape “Amiu akinana, in na kau kinanena tāpena tai teke na nāpa amiu pe akilia re poli.”

³³ Nalogena la amloge sanene na, la apisasa ke pan la, asape “?Ane kus kana kinanena nene pimi pania? !Pe tepisu re nena yar tai poli!”

³⁴ Ana Yesu pisa pan la, pisape “Peraga, kinanena nāpa nepisa ke ne naga pe tāpena. Kau kinanena, naga yūmaena na logearen nasinenanena kiena ne naga nāpa mligan inu nepitom tano, monar neyūmaen punu ga vano-o p̄isi.

³⁵ Pogos nāpa temapila lokove, ita tepisayu lue ga tesape ‘Kupario vari sike ga wa, kinanena marua,’ ana nagane e lokove kana Ntewa yaru la asu ruru ke asape aloge kiena visena rui, la na asa ga kinanen la mamarua rui. Ana sineun nesape amiu avike li kilamaramiu lala, akirava ruru lia e yo lala, ana yoko akilia akirawal kinanena la mamarua ruru po rui, nagane pe pog na va waren imi.

³⁶⁻³⁷ Ana la nāpa ava awaria, yoko akekara vāpisi vanon kiela narin nalaen tai naga teke pa rui, ana pogos nāpa awar kinanena la nene imi ūma na malena nāpa ve uro re, yar keviu nāpa mapila, yoko naga m̄ena kekara vāpisi. Naga sa ga visena nāpa asape ‘Yar tāpena mapila, tāpena pa p̄aria, ana pupia kekarena pan yeririna punu ga!’

³⁸ Sanene, in na nemligan amiu vena ava aure yeririna lala nāpa li tāpena ga la akila pupia yūmaena pan la rui, ana

nanagane na amiu punu ga ayakol amiu veraga e na logewoena e yumãena nene.”

Le Samaria la moki amlelaga

³⁹ Ana pogos naña le Samaria la e kumali nene amloge naña sira nene pisape Yesu kilia make sur la punu ga e kiena malena, sinela pula pañisi, kila lala moki amlelaga e Yesu.

⁴⁰ Ana pogos naña apim asape avisuia, la asun mña amio naga pano-o, ãisi na apiun tania asape visae mekilia meva umã amio la. Pisi na mepa mesumã amio la pano-o tol legiena lua,

⁴¹ ana la moki sina amlelaga e naga vanon kiena visena wo lala.

⁴² Apisa mña pa sira nene, asape “Nanua sumo, memloge sur la naña opisa, memninue ga, a nanagane, memloge ruru nena kiena visena lala, mekilia sane pe lelaga ga narui, kieta yar keviu nene, naga pe Natamaliaena na yomarava.”

Kile nalua kiena ne Yesu ma Kalele, tamalia narina ne suñe keviu tai

⁴³ Ana legiena lua nene ãaro pano, memio Yesu memligan yo nene, metaveve si kiamimi mrapa mepato si tano e lepas naña garo Kalele.

⁴⁴ Yesu sinenan sape wasuñe si va gar kiena yo Kalele, komin naña naga pisu li tañena lala amaagan li visayuen naga, asumã akalewele silaga. Nanene taveve kiena visena tai, naña pisape “Yeririna tañena lala akekaran navatanon ruruen navisawalena, ana yeririna ga la na pulkumali puna na peraga, la asitom korenan ga naga.”

⁴⁵ Ana pogos naña mepa makate e yo naña Kalele, yaru na kiena yo lala akekaran pañisi, aporworunia. Nanene vanon naña sumo, lala moki la mña asike e ãaãagena ma Yerusalem, ana apisu pa nataãaen mñarera tai naña Yesu miyumãen e Yumã Wa mña ne Ntewa e pogos nene, ana apisu po pañisi.

⁴⁶ Ana sun mialili ke yo lala nae Kalele pimi tol sina ga kumali naña Kana, naña nanua sumo kilapu wii pimi pe kuruta na munena. Ana e pogos nene pupia suñe tai

nae pulkumali tañena nae Kapeneam sike e yo nene, mloge ke piowa vanon narina yermene mai keviu pañisi, lavis ga mare.

⁴⁷ Ana pogos naña mloge asape Yesu ãasuñe ma Yutea pitomi si Kalele rui, naga pa kirawalia. Ana pisu Yesu, tag pania sinenan pisape va umã vena tamalia narina nene.

⁴⁸ Ana Yesu pisa pania, pisape “Pona ko mña sane yeririna tañena la nene. Sinelan lue ga kile tañena lala, ana visae neyumãenia, alelaga e in narui, a visae pe apisu re poli, pe akekaran re nalelagaena e inu poli.”

⁴⁹ Ana pupia suñe mñareran pania, pisape “Yar keviu, awis oimi vilaga, visae pere na naru naga kovio.”

⁵⁰ Ana Yesu tañali nalelagaena kiena ne suñe nene, pisape “Peraga, ko ga taaga ovano. Nevisa van ko, narumã tañatete mare, mal mña woga ga.” Pisi na naga mlalaga e visena naña Yesu pisa pania, mligan yo pa si umã.

⁵¹ Ana e legien tañena sina, pogos naña ãasuñe ke si pavin, pitawe kiena yeririna lala, amial lulu ke mrapania. Ana apisa pania asape “Narumã mloge si pogaga teke na.”

⁵² Ana piun tan la pisape “Amiu asitom veve ruru lia: Pog ya ne naga siar mloge pimi po sina ga?”

Ana apisatamña, asape “Mepisu sane yepena pimi manin ruru nakoneva kolpae, sur tai sane koe aora taaga.”

⁵³ Ana ariman yermene nene mloge na nene, kilia ga sape naga ke narui mesmesu ga aora naña Yesu pisa pania pisape narina tañatete mare, mal ga woga ga. Ana sur nene kila naga, amio la punu ga na mratava puna, amlelaga e Yesu.

⁵⁴ Ana natamaliaena kiena ne yermene nene, Yesu kila suraun naña mligan ma Yutea pitomi, ana pe kiena kile nalua gar lepas naña Kalele.

5

Yesu kila ruru si yar tai naña yepena mare yam piavi

¹ Ana Yesu sumã Kalele yam piavi m̃a pano-o, tol pog na p̃aṣagenã taṣena si tai kiena ne le Yu lala ma Yerusalem. Ana Yesu lala apa si metava e p̃aṣagenã nene.

² Asumã Yerusalem sanena e legien tai Yesu mial pito tano lavisin pulutava keviu na kumali nene naṣa apio asape Pulutava Na Sipsip, ana apa lele tai naṣa wii na kulena tai m̃eke ea, naṣa e kiela visena apio kiena ki Petsaeta. Ana e yepas nen wii nene, silparpara la lima sike ea, amiyumãen e kilavaru.

³ Ana nalue ga inanena lala, kilamara kata lala, a laulu lala, amio la naṣa yepela la marmare, la ne sanene amoki manene apim aṃeke e lepa yumã taaga la nene. Apim asike sanene, vanon wii nene yam peve taaga kulkulul,

⁴ sa naṣa navisi kiena ne Ntewa tai pitomi kila wii nene kulkulul, ana pogos naṣa apisu sanena, inanena la nene yar ai naṣa va p̃es tol wii nene, yoko maiena ya naṣa teke e yepena p̃isi veraga ga e pog nene.

⁵ Sanene inanena la asumã apim e yo nene, ana lala yar tai naṣa sike e pog nene, naga yepena marmare tol kas lualima yam telu pa orelu [38] rui.

⁶ Ana pogos naṣa Yesu pimi, pisu yar nene, kilia sape yar nene monon inanena nene yam piavi sanene, piun tania pisape “?Kiau erau, ko na sinom̃an osape yepemã imi wo sina, ne?”

⁷ Ana inanena nene pisatam̃ea, sape “Yar keviu, sineun paṣisi ne, ana pogos naṣa wii kulul, pe yar nakusnuen re vito ligã nu e wii poli. Ana pogos naṣa in ga taaga nekila woweden ke yo nayalvitoen tano, yar taṣena tai pitomi pito p̃es tano e wii sumon inu.”

⁸ Ana Yesu pis memes ga pan yar nene, sape “Pogaga, osumãlu, okus momã tog, oyali ovatove.”

⁹ Ana taveve visena kiena ne Yesu nene, yepe marmare la nene punu ga pimi po, naga sumãl kus m̃ana tog mial pitove.

Ana e legiena na sur nene pimi kate, naga pe legiena wa tai kiena ne le Yu la,

¹⁰ kila sane pogos naṣa yar keviu p̃asia sa le Yu la apisu yar nene mial kus ke m̃ana tog, apis pan vanonia, akilawoia,

asape “E, p̃a nini na pe Legiena Wa p̃a! Okus ke momã tog sanene na okilaro ke kieta navisaluaena ita le Yu la ne.”

¹¹ Ana pisatam̃e la, sape “In na yepeu pororowaia, ana yar nene pimi kila ruru inu, pisa panu sape nekus m̃au tog nevano.”

¹² Pisi na lala sinelan asape akilia laa sane wa, apiun tania, asape “?Ana a nene? ?Naga pe ane pisa pan ko sape okila sanene?”

¹³ Ana yar nene mninue ga visaena, vanon naga pe kilia re sape Yesu naṣa kila ruru naga poli, a taṣatete visu kilalea vanon p̃ina na yeririna la asike ea, ana Yesu mial p̃aroro likan yeririna lala, petan yo nene rui.

¹⁴ Ana siraunia pe piavi re poli, Yesu kirawal si yar nene e Yumã Wa, ana pisa pania sape “Nanagane omloge po si narui, popon ovisuar ruru ko. Oligã punu ga kiomã naviowaena lala, visae peraga yoko sur tai viowa sina ga imi van ko va re laa sane taulu na sumo.”

¹⁵ Ana e pogos nene yar nene kilia narui sape Yesu ga naṣa kila ruru naga, ana pa pisawal pan yar keviu kiena le Yu lala.

¹⁶ Ana pogos naṣa la amloge sape Yesu ke narui naṣa tamalia, sinela karia, pe akekarã re naṣa miyumãen sur nene e Legiena Wa, p̃isi na la asiar naṣa apeveyunia.

¹⁷ Ana Yesu pisatam̃e la, sape “Kiau ata, naga miyumãen ke kiena yumãena wo lala e legiena make ga, pa tol m̃ena Legiena Wa, a in m̃ena monar neyumãe sa m̃a nena naṣa naga miyumãena.”

¹⁸ Sanene na e pogos nene, nasumonena kiena le Yu lala apisu ke pa Yesu narui sane pe yar na warnena kareen nawaena na Legiena Wa. A nanagane metavana, amloge naṣa naga pio ke Ntewa sape Arimana wawa, apisu sane naga kila ke naga marã taaga ga sane Ntewa. Ana sur ne la nene kila sane la apim pisusun manene laa sane, sinelan manene laa na wemom̃aren naga mare.

Narina ne Ntewa amio Arimana amiyumãe marã taaga ga

¹⁹ Ana Yesu pisa pan la, sape “Nepisa pe lelaga pan amiu, in na narina ne Ntewa,

tařatete nekila sur tai inu ga taaga, ana sur ga la nařa nepisu Arimau kila, naga ga nene nekilia nekila.

²⁰ In na narina ne Ata Ntewa, naga sinen sii inu pařisi, kila pian inu e sur punu ga nařa naga sitom ke sape nekila. Ana yuřaena tařena si řasia sike ga wa, nařa kerkeviu laa sane, nařa war van inu vena neyuřaen sirau, ana pogos nařa neyuřaenia, yoko amiu sinemiu ulan vařisi ne.

²¹ Naga řena nanini, sa nařa Ata mla si malena pan la nařa amarmare, tařan si kiela malena pan la, ve sa řa nena nene inu narina nekilia nela malena van yar ai nařa sineun nesape nela vania.

²² Ana pe Ata re ga kila naliřereena poli, ana yuřaena řena nene mligan e luřau,

²³ vena kilaen yeririna punu ga monar avatanon inu sa ga nařa apatanon ke Ata. Ve sanene, visae yar nařa pe patanon ruru re inu narina poli, ana sa nařa naga pe patanon ruru re yerkawa nařa naga mligan inu nepitom tano poli.”

Marena amio malena

²⁴ Ana Yesu pisa laa sanene, sape “Ayagogon ruru visena nene. Yar a nařa logear kiau visena, a lelaga e naga nařa mliganu nepitom tano, e ke e pogos nene tol malena. Naga pe su re nena vatanon naliřereena řarera tai, sane petan řelaga na marena rui, pa tol kiena malena viu rui.

²⁵ “A nepisa visena nalelaga nini pan amiu, sane pogos pimi ke sirau nanagane nařa sane yar la nařa amarmare e řelaga naviowaena rui, aloge pulgou inu narina ne Ntewa, ana la nařa aloge kilia, yoko atol malena.

²⁶ Kau Ata, malena nalelaga teke ga e naga, ana naga tařan malena nene sike e inu,

²⁷ a tařan řena sane inu Narina ne Yeririna, yoko nekila yuřaena lala na liřereena.

²⁸ “Sur la nene pe pon re si sinemiu ulan poli, monar yoko ve sa ga nene e pog nařa nepisa ke nesape pimi ke ne. Yoko la nařa amomalio e porotano, aloge pulgou vio,

²⁹ ana amolmolue sina ga, ana la nařa amiyuřae po, kiela nasuřalena si nene pe namalena, ana lala nařa amiyuřae piowa, kiela nasuřalena pe naliřereena.”

Sur la na iilaen visena kiena ne Yesu

³⁰ Ana Yesu pisa pa laa sane, pisa řarlologia ga pan yerkawa kiena ne le Yu la nařa amon nalelagaena e naga, pisayu sur la nařa kila meraravan sape naga pe lelaga. Pisa sape “E lepas naliřereena nařa neyuřaenia, yoko tařatete neyuřaen e nasitomiena kiau in ga taaga, ana nekila ga e sur nařa nemloge Ata pisa. Ve sanene, kiau naliřereena naga mesmas ga, vanon pe nekila re e kiau nasinenanena poli, nekila ga e nasinenanena kiena ne naga nařa mliganu nepimi.

³¹ Ana nepis sanene pan amiu, nekilia sane nepisayunu ke sina ga, pona amiu řas apisu sane pe pon re nevis ve sanene poli yo, tařatete alelaga e visena na sanene.

³² Ana pogaga, pe sur re tai nene po, vanon sur tařena la řasia nařa kilia iila kiau visena suřal ruru wo.

“Nasumo, naga yar tai nařa pisayu sur la nařa punu pe lelaga pařisi.

³³ Nane Yoane Nakeena ne, nařa nanua sumo, amiu amligan visena pato pania, apiunu sanape petania, ana pisawal sur punu ga pe lelaga pan amiu.

³⁴ Ana piowa ga nařa asitom asape kiau visena suřal sanene vanon ga visena kiena yaru tai sa ga Yoane. Ana sineun nesape amiu asitom ruru li e visena la nařa Yoane pisa pan amiu e lepas na punu, vanon neřaryon amiu ke vena akilia atol natamaliaena.

³⁵ In na nepisa Yoane nene pan amiu, vanon naga sane pe kap tego tai na tegolien kiamiu sitomena lala, amiu nařa akekaran li řa naga.

³⁶ “Ana sur si tai naiilaen kiau visena, keviu laa taulu sur la nařa Yoane naga pisa. Naga kile la nařa Ata tařan panu nemiyuřaenia e maramiu. Yuřaena keviu la nařa nemiyuřaen, lala amiila ke

visena nene keviu sane pe lelaga Ata ne nanene mliganu nepimi.

³⁷ “Ana metavan sur lua nene, taþena toña ga, nane kiau Ata naþa mliganu nepitom. Amiu pe amlogeli re pulgona poli, pe apisuli re marana po, ana naga mña, kiena visena la miila kiau visena la keviu, naþa pisawal inu.

³⁸ Ana amiu na akila sane visena nene pe lлена re e kiamiu malena poli, vanon amon lelagaen e naga naþa mliganu nepimi.

³⁹ Yam moki asumña apisuveve ke Visena Wa lala, vanon amiu asitom ke asape yoko alual kiamiu malena naþa ve uro re ea, ana visena wa la nene naþa pisawal inu ga.

⁴⁰ Asape in na nepe purþes nen malena nene, ana amiu amon aimi atol malena nene e inu.”

⁴¹ Pisi na Yesu pisu sane þarila mñarera paþisi, pis sanini, sape “Sur la naþa nekila ke ne, pe nekila re nesape amiu ayeluar kiau ki, peraga. Pe nesitoñal re nene poli,

⁴² ana sur viowa tai, nekilia ruru amiu pa rui, ana nekilia sane pe asitom manene re nena Ntewa poli.

⁴³ Pogos naþa nepim nakaten amiu, nepim e ki kiena ne kiau Ata, ana amiu pe akekaranu re poli. Ana visae pogos tai yar taþena imi, naþa imi ga e kiena ki naga taaga, pona amiu akekaranu ga naga yo.

⁴⁴ Sineu mie amiu paþisi, ana nepisu sane mñarera pan amiu paþisi naþa atol nalelagaena nalelaga pogos tai. Nanene vanon amiu sinemiun lue ga nayeluaren kiamiu ki va metava. Amiu pe asitom re asape akilia avilopu si kiamiu þelaga poli, vena akila sur la naþa siraunia Ntewa kilia yeluar amiu vanonia.

⁴⁵ “Nepisa visena la nene pan amiu, pona amiu asitom ke asape ‘E, yar nene sinen kar ita, pona e legiena nalipereena naga visawal kieta naviowaena la van arimata Ntewa ma e peni!’ A peraga, ve in re naþa nekila sanene, ana yar taþena naga kila. Taþena nene nane yermarua Mosis, naþa amiu aþasine ke naga asape yoko visa visena na iila amiuena, ana nevisa ruru van amiu, naga ke narui naþa

yoko visa plan ga kiamiu naviowaena lala.

⁴⁶ Amiu na apisa ke asape amlelaga ke mñarera e visena kiena ne yermarua Mosis nene, ana visae ve sanene, vanon ya ne amiu pe amlelaga mña re e in poli, vanon yermarua nene, naga siriyunu lue ke ga.

⁴⁷ Ana nanagane, nepisu sane amiu pe amlelaga re e kiena nasiriena la poli, ana komin suri ne nanene yoko taþatete mña alelaga e kiau visena lala.”

6

Yesu pagan þina na yeririna miyuve manu lima [5000]

Matiu 14:13-21; Mak 6:32-44; Luk 9:10-17

¹ Siraun naga nene, memio Yesu memiai e wa tai memligan si kiena yo nene, mepa mokusro pupia lapa naþa nae Kalele, naþa la þasia apio asape Lapa Taepirias.

² Ana pogos naþa yeririna la apisu imimi mepa ke sanene e lepas navano, la mña ga asumñalu asiraun imimi. Asape ataveve Yesu vanon apisu kile natamaliaena la naþa miyuñen pan inanena lala.

³ Ana pogos naþa mepa metol lepas nene, mepa metava e kunus tai naþa mñeke e yo nene, memial mña mepano-o, memapi.

⁴⁻⁵ Ana pogos naþa Yesu totano teke na kira pa gar tena, pisu pupia þina la apim ke puna. Pisuluþar sane la moki, ape yeririna na yo taþena ga la ne amlapran la ke apato Yerusalem. Apatovin ke pupia þaþagena kiena le Yu lala, Paþagena na Sitomalen Natamaliaena, naþa yoko ve yam ve piavi re na akila.

Ana pogos naþa Yesu pisu la apimi, piun sur tai pa Pilip, pisape “Pilip, la namña na viso kar la ke paþisi ne. ?Yoko toul kala kilaparavi ve sanape ne?”

⁶ Naviunena kiena ne Yesu, pe nataþaliena ga Pilip, vanon Yesu kilia pa rui sur naþa yoko kila van yeririna lala nene.

⁷ Pisi na Pilip pisatamña, pisa ga pisapenua “Visae neyuñae kas ve taaga, taþatete netaulu kilavaru torokin naulen

kala kinanena lala la punu ga akan ve torokaki!”

⁸ Ana nalogena tañena tai, Antru, naña wenla Saemon Pita na ve tokak, pisa pa Yesu, pisape

⁹ “Suñe, nekirawal teras tai teke e nini, ãar ke narin kilaparavi lima amio narin ika lua. Nanene tekaki ga, vanon yeririna la mok pañisi.”

¹⁰ Ana Yesu pisape “Peraga, poga ga ne, ovisa van ãina la nene ovisave atotano wa.” Mepisa pan la, ãisi na atotano e vilumñini lala, ana mepisu sane yermene ga lala tol sur sane manu lima [5000].

¹¹ Pisi na Yesu ãarar kilaparavi la lima nene, mlen, pisa potena vanonia. Sirau- nia siar kaweroroia, piovision pan la naña atotano ke ne, kila mña sa ke ga e ika, mla make ga pan la torokin naña sinelan asape akania.

¹² Ana akan mña pano meþela la kawa, ãisi na Yesu pisa pa imimi, pisape “Kor- koro kinanena la ne sike ne, ve tekila kare re, ana popon awarpolo va lele taaga.”

¹³ Ana mepa moþar kinakina kilaparavi la lima naña ne, naña akanligania, mokon pa e karo pano-o tol karo lualima taaga pa lua [12].

¹⁴ Ana pog naña yeririna la apisuluþar pupia kile naña Yesu miyuñaenia, apisa ke pan la sanini, apisape “Kieta pupia navisawalena naña kieta li marua la apisaar asape imi kate e yomarava nini, yar ne na nene navisawalena ke narui.”

¹⁵ Ana la asitom ke asape ava atarar Yesu, asape amñareran vania vena avisir- lua sumñal imi ve kiela ãarin suñe, ana po- gos naña mnunuluþar sur naña la asitom ke asape ayumñaenia, naga petan la, naga taaga mial pa laa sane metava e kunus la nene.

*Yesu mial yau metava e sive
Matiu 14:22-27; Mak 6:45-52*

¹⁶ Ana imimi nalogena la mepisu mrae pato ke tano narui, mepisu sane popon sa mowasuñe imimi sina, ana mepato si tano e yepas nen lapa.

¹⁷ Mepato tano ana pe momña re Yesu katen imimi si poli, ana vanon yemalo pa

rui, a mokus kiamimi waa, memligan si yo nene mepalua mepanon vena mokusro lapa meva ma Kapeneam.

¹⁸ Ana mepa ke sane, na narin lagi tai miyui li mña, kila sive siar piowa mña pañisi.

¹⁹ Ana pogos naña mepaluan pa laa tol sane kilometa lima, memilan Yesu mial ke metava e sive pimi ke lavisi. Ana memaraun naga pañisi,

²⁰ ana naga pis pan imimi, pisape “!Ee, amiu ve amarau re! In ga ne.”

²¹ Ana memloge po sina, metar pa meta e waa, ana veraga ga mepisu kiamimi wa monlogia ke lele naña mesape meva ea.

Yeririna la apim akale Yesu

²² Ana kolulag, la naña e lepas nen lapa, naña Yesu pagan la ga na wa, asitomwele ke asape sanapen Yesu narui. Asitom ke sanene vanon pogos naña memio Yesu mepim pula, mokus waa taaga ga, ana apisu imimi nalogena la mokus waa nene mepa pa rui, a Yesu pe amio imimi re poli, naga taaga sike na. A nanagane taþatete si alual naga amio la,

²³⁻²⁴ ana la apa akus waa tañena lala, akusro apa Kapeneam akale imimi. Waa tañena la nene, la pe kiela re poli, kiena ne la nae Taepirias naña apim akaten la, apim ga ura e naña Yesu mlenwo kilaparavi, kila pimi torokin naña akania.

Yesu pisape naga pe kilaparavi na malena

²⁵ Ana yeririna la naña ne apam atol Kapeneam, apa ura, apa akale Yesu. Ana pogos naña amñalia, apiun tania, apisape “?Navianena, ko opam otol e nini pog- wai?”

²⁶ Ana Yesu kilia pa sur naña la asape avisu vanonia, naga pisatame la, pisape “Visae apamin akale inu sina vanon apisu kiau kile lala a apisuluþar inu sane in na ai, visae ve sanene na po na. Ana in na nepisu sane asitomñal asape nakoneva nepagan ruru amiu, akinana pano-o meþemiu la kakawa po, ana amiu sinemiun si asape ve sa nene þane, yo?”

²⁷ “Poga ga, kiau visena na lelaga van amiu naga sanini: ve asitomñal manene

re si kinanena naþa yoko ve ve piavi re na naga kona make sina. Popon ayuñae m̃arera vanon kinanena naþa sulue ga, kilia suñã ga sanene vano-o tol pog na malena naþa pe luas re poli. Lelaga, in na Narin Yeririna nekilia nela malena nene van amiu, vanon Ntewa arimau kilaar pan inu rui in ga taaga vena nekila ve sanene.”

28 Ana apiun tania, apisape “Ana sa imimi sinemimin mesape mekila sur la naþa Ntewa sinenania, yoko monar meyuñae ve sanape?”

29 Ana Yesu pisatañe pan la pisape “Pupia sur naþa Ntewa sinenan sape ayuñænia, sanini, sape alelaga lelaga e in naþa Ntewa miila inu nepim e yomarava nini.”

30 Ana apiun ke sina ga, apisape “?A ko, kioñã kile ya naþa sa mevisuia, yoko mekilia melelaga e ko? Ko na yoko okila yuñæna wo ya ne van imimi?”

31 Mepiun ke sanene vanon mesitoñal kieta li marua la na susumo ne, naþa asu e yokorena. Asumã sanena Mosis kila kile wo tai pan la, naþa silaga la aþar kilaparavi naþa apio mana, ana akania, pe visokar la re nena ga. Sur nene teke e Tus Wa, a pisa sape

‘Silau ga naga pagan la e kilaparavi nae ma e peni!’ ” *Esik 16:4*

32 Ana Yesu pisatañe la ke sina ga, pisapenua “Lelaga, sur nene teke e Tus Wa, ana kilaparavi naþa Mosis mlavia, pe pe kilaparavi nae re ma e peni poli. Kilaparavi naþa nae ma e peni nalelaga, arimau ga kilia lavia.

33 Kilaparavi kiena ne Ntewa naga inu ga ne naþa nemligan ma e peni nepitom tano, vena nela malena viu van yeririna na yomerava lala.”

34 Ana apisatañea, asape “Suþe, kilaparavi ke nene narui naþa imimi sineminia silaga.”

35 Ana Yesu pisa pan la, pisape “Inu, in na kilaparavi na malena. Yar a naþa vim pun inu, taþatete si viso karia, yar ai naþa lelaga e inu, taþatete si moto karia.

36 Ana sur taaga ga na piowa, sa naþa nepisa pa pan amiu rui, naþa apisu inu

amio kiau kile lala e kilamaramiu rui, ana amon lelagaen e inu.

37 Ana monar yar þasia alelaga e inu, vanon la punu ga naþa Ata mligan sike e luñau, yoko monar aim pun inu, a la punu ga naþa aim pun inu, ve lala yar re si tai naþa nekilia nekuan lua sina, yoko nowarar ruru punu ga ave kiau.

38 “In na nemligan ma e peni nepitom tano e yomerava nini, pe nakilaen re nasinenanena kiau poli, ana pe nakilaen nasinenanena kiena ne naga naþa mligan inu nepitom tano.

39 A pupia kiena nasinenanena sanini, sape la naþa naga mligan la asike e luñau, yoko ve nekilalu re lala yar tai, naga sinenan pisape e legiena maro nevisir plan la punu sina ga.

40 Ata sinenan manene laa pisape ve sanene narui, naþa la punu ga naþa avisu inu, ana alelaga e inu, yoko atol malena naþa pe luas re poli, a sinenan manene m̃ena pisape e legiena maro, yoko in na nevisir plan la sina ga.”

Nasumonena kie le Yu lala pe akekaran re visena kiena ne Yesu la poli

41 Ana pogos naþa yerkawa kiena ne le Yu lala amiyagogan ke visena kiena ne Yesu, pe akekaran re nenaga, ana la apis lili m̃a vanonia. Kiena visen tai naþa amon logeena, nane visena naþa pisawalia sape naga pe kilaparavi naþa petan ma e peni pitomi tano e yomarava nini.

42 Apisayu pan la, apisape “?Sanape ne yar nene pisa ke pan ita pisape petan ma e peni metava pitomi tano pun ita? Naga pe yar re tai nene po, tekilia ruru pa naga rui, anena amio arimana. Naga Yesu ga þa, narina yermarua Yosop.”

43 Ana Yesu pisatañe la, pisape “!Ei, visen mumu la e inu þisi, amiu ayagoga ruru kone wa!

44 Yar ai naþa imi lelaga e inu nagane, e legiena maro nevisirlua naga mal sina ga. A ata naþa tañan inu nepimi, visae naga ve ure re yaru nene vim, ana taþatete nena kilia imi punu.

45 Tus kiena ne navisawalena Aisea pisawal visena tai, pisape

'Lala punu ga, yoko Ntewa ga vian la,' Ais
54:13

ana komin nanene, nepisape la naña aloge ruru visena kiena Ata Ntewa naña naga vian ruru la ea, lala nene aim pun inu.

⁴⁶ Ana la ne sanene, pe lala yar re tai naña pisu ke Ata Ntewa poli, vanon yar taaga pisu ke naga, nane inu naña nepetan ma puna nepitom.

⁴⁷ "Nepisa ke lelaga pan amiu, sane yeririna punu ga naña alelaga e inu, asike pa loyuma e malena naña ve uro re rui,

⁴⁸ vanon inu, in na kilaparavi na malena.

⁴⁹ Kilaparavi nene pe maran taaga re poli sa naña kilaparavi naña mana naña yermarua la akan e yokorena. Akan ma pano-o, ana siraunia pe lala yar tai mal lue re si teke poli, lala punu ga amarmare ga sa nene.

⁵⁰ Ana visae kilaparavi tai toña ga, visae yar naña kania tañatete mare pogos tai, na nene tepio tesape kilaparavi nae peni lelaga.

⁵¹ Pogaga, in ke narui nepe kilaparavi na malena nene, naña petan ma e peni pitomi tano e yomarava nini, vena yar naña kania, yoko mal lue. Kilaparavi ne nanene naga pe tasneu, netañan ke panon yomarava wetelu, nemla ke panon malena kiena ne kiena yeririna lala."

⁵² Ana visena kiena ne Yesu la nene, marera pan yerikawa kiena ne le Yu la nene akilia ruruia, ana apiun ke asape "? Ya nene? Yar nene pisape yoko war kana kilamñiu van ita vena tekania, po pisa ke ya ne?"

⁵³ Ana Yesu pisa meraravan pan la e lepas na kinas nen kiena marena, pisape "Nepisa lelaga pan amiu, sane amiu monar akan kiau kilamñiu inu Narina Yeririna, amiu monar amun kau kuruta. Visae peraga, kiau malena tañatete te amiu.

⁵⁴ A naga naña kan kau kilamñiu, a mun kau kuruta, naga tol pa malena naña pe luas re poli, ana nevisirlua si naga sumalu e legiena maro, nekila naga mal sina ga.

⁵⁵ Nanene komin kau kilamñiu, naga pe kinanena tañena tai, a kau kuruta, naga

pe na munena tañena tai.

⁵⁶ Naga naña kan kau kilamñiu, mun kau kuruta, kiena malena wetelu sike e inu, a kiau malena wetelu sike e naga.

⁵⁷ Ata naga pe purpes nen malena, ana mligan inu nepimi, a nemalin ke kiena malena naña teke e inu, ana naga naña kan kau kilamñiu yoko naga mali e kiau malena naña teke e naga.

⁵⁸ Sur ne nanene naña nepisa ke e kiau visena e lepas na kilaparavi naña petan ma e peni pitomi tano. Kilaparavi nene naga pe sa re kilaparavi naña repita nasumo la akan poli, ana amare ga sanene. Naga pe kilaparavi naña yar a naña visae kania, naga kilia mal lue narui."

⁵⁹ Visena ne la nene Yesu pian lan ke e yuma na lotena nae Kapeneam.

Nalogeno la moki amligan Yesu
añasuñe la sina

⁶⁰ Ana komin naña Yesu pisa visena la nene, ana imimi kiena nalogeno la moki asitom pano-o, apisa asape "Kiena navianena la nene marera pañisi. ?A si na kilia loge kilale ruruia?"

⁶¹ Ana Yesu mloge kilale e naga sane kiena nalogeno lañas apis lili ma vanon naga sa nene, naga piun tan la, pisape "? Sanape, pe akekan re kiau narin visena nene poli?"

⁶² Narin visena ga nene, kila amiu asape aliganu sina? Visae ve sanene, neminue amiu narui. Sane visae pogos tai, inu Narin Yeririna neligan amiu neva si metava ma e leleu, ana yoko sanape ne? Pona sinemiu ñesan ruru inu yo?"

⁶³ Kiau visena la nene ape mrapa na Ninuna a mrapa na malena. Yaru kilia war si yaru, ana yaru tañatete la malena lelaga nene va yaru tañena. Sur nene Ninuna ne Ntewa ga kilia lavia.

⁶⁴ Ana nevisu kilale amiu lañasia amlelaga pa rui, a amiu ñas peraga."

Yesu pisa naga nene, vanon siar nanua rui, naga kilia pa la naña pe amlelaga re e naga po, pano-o tol naña naga kilia lala ai naña awilwilin wan naga.

⁶⁵ Ana Yesu pisa mena ga pan la, pisape "Lala ñasia alelaga, ñas ve alelaga re, naga nene nepisa ruru visena nene rui,

nesape tařatete yar tai vim punu, nařa sa arimau naga ve tamān re naga imi.”

⁶⁶ Ana e pogos nene imimi kiena nalogena lařas apisu sane navianena kiena Yesu la nene ařarera laa narui, apisu sane peraga, ana ařasuře la sina, pe ataveve re si naga poli.

Pita pisalua řareran kiela na lelagaena pa Yesu

⁶⁷ Ana pogos nařa Yesu pisu lala řas amligan si naga, pis pan imimi kiena nalogena lualima taaga pa lua [12], piun pisape “?A sanapen amiu? ?Pona sine-miun asape amiu řena ava sina ga amio la nene?”

⁶⁸ Ana Saemon Pita pisatařea, pisaar řarera pa Yesu, pisape “Suře, visae meligan ko, yoko mesiraun si a ne? Ko ga taaga nařa lologena wo na malena teke e ko,

⁶⁹ nanagane na memlelaga ke ga e ko ga taaga, a mekilia pa rui mesape ko, ko na Navisaarena Wa nařa Ntewa mligan ko opimi vena otamalia imimi.”

⁷⁰ Ana Yesu pisataře pisape “Lelaga, in na nekiar amiu kiau lualima taaga pa lua, vena alelelaga e inu sanene, a tai teke řena likan amiu naga pe Yermare Lego ruru nenaga.”

⁷¹ Ana Yesu pe pisawal re kiamimi kia lala tai e pogos nene poli, ana siraunia mepisu kilale sane kiena visena nene, naga pisa ke Sutas, narina ne yermarua Saemon nae Kariot, nařa naga imimi na lua lima taaga pa lua tai, nařa pe sitom re poli, řililinwan si kiena Suře naapo.

7

Yesu, wenla lala pe amlapran la ruru re amio naga poli

¹ Siraun naga nene, Yesu mial telilivi ke ga e yo lala na tavie na kiena yo nene Kalele. Naga pe pa re si metava e yo na tavie nae Yutea poli, vanon nasumonena sa le Yu la nae yo nene akale ke naga rui, asape awe mořar naga mare.

² Ana pogos tai, lavisin pog na kiela pupia řařagena kiena le Yu la tai, nařa

Pařagena na Silparpara. Ana sa nařa silaga, la moki sinelan asape avavini ma Yerusalem vanonia.

³ Ana e pogos nene, wenla Yesu lala apis pania, apisape “E, ko na ose nini yam piavi rui, popon ova li ma Yutea, vena kiořa nalogena la ma ne la towe avisu kile la nařa okila ke ne.

⁴ Ko na sinořan osape yeririna la akilia ruru ko, ana omiyuřae tapolou ke ga. Visae lelaga nařa omiyuřaen ke pupia kile lala, popon ovanon okate yo punu ga e yomerava.”

⁵ Ana visena la ne sanene, sa nařa apisa kare ke ga Yesu, vanon lala na ape wenla ruru naapo, ana pe amlelaga re e naga poli.

⁶ Ana Yesu pisataře la, pisape “Amiu akilia akila ga kiamiu sur ya e ga e pog nařa amiu sinemiun asape ayuřaenia, ana kiau pupia pogos naga pe pimi re poli wa.

⁷ Amiu akilia akila ga kiamiu yuřaena la woga ga, yeririna la tařatete avisa kare amiu vanonia, ana pogos nařa in na nekila kiau yuřaena, nepisawal sane řelaga viowa kiena la na yomarava pe mesmes re poli, ana la sinela kar inu pařisi.

⁸ Ve sanene na amiu ga ava ma Yerusalem, in na nesuřa e nini wa. In na tařatete neva nakaten maran yar lala e řařagena nene, vanon kiau pog pimi ke rui, ana pe pimi punu re poli wa.”

⁹ Naga pisa visena nene pan la, siraunia apavin, naga suřa ga.

Siraunia Yesu pa ma e řařagena

¹⁰ Yesu suřa sane na, pe piavi re poli, naga řena pa ma Yerusalem, ana pe pa re sa nařa yeririna la akilia poli, naga tapoloun la ga.

¹¹ Ana yerkawa kiena le Yu lala, asitom ke pa rui sape pona naga řena ga vam e řařagena, ana la akalewele, apiun asape naga ře ke pe.

¹² Ana yeririna řena lala, asun apisayu lue ga naga, lařasia asape naga pe yar wo tai, lařasia asape naga pe yaru viowa ga,

naña kila kare ke ga sitomen kien yeririna lala.

¹³ Asun apisayu ke Yesu sanene na, pe apisawal manene re pa e yo metava poli, vanon asitom ke asape visae kiela yar keviu la aloge, yoko akila viowa van la.

Yesu pa kate e Yumã Wa Mana ne Ntewa

¹⁴ Ana akila mã ãpaãgana pano-o, legiena ãas ãaro rui, ana Yesu pisu sane monar va ma Yumã Wa Mana ne Ntewa vena vian si yeririna lala.

¹⁵ Ana pogos naña yerikawa kiena le Yu la amloge kiena navianena nowo lala, amilan papisi, apisape “!Sanape na yar nene kilia ruru visena kiena ne Ntewa sanene? !Naga pe apian re nena ga, ana kiena navianena po na po!”

¹⁶ Ana sanene na Yesu pisawal pan la, pisape “Sur naña nepian lan ke ne, pe kiau re poli, pe kiena ne Ata ga naña mligan inu nepitom tano e yomarava nini.

¹⁷ Visae yar tai kekaran ga kila nasinena kiena ne Ata, yoko naga kila yar nene loge kilia sitom ruru kiau navianena. Yoko yaru nene kilia visu kilale sane in na pe nepian re yeririna la e ga e kiau kia poli, ana kilia visu kilale sane navianena la nene, pe lelaga naña amolue kemua e Ntewa.

¹⁸ Visae tevisu yar tai vis ke ga e kiena kia, tekilia ga sane naga miyeluar ga kiena kia. Ana visae yar naña pis, miyeluar ke ga kia kiena ne kiena yerikawa naña mligan naga pimi, tekilia ga sane pe lelaga ga, naga pe pisokan re poli.

¹⁹ “Yar tai ne kila sanene nane Mosis. Ntewa mla kiena navisaluaena pania, a naga pialiluen pimi pan amiu, ana asumã akilaro ke pa narui. Ana sanape na asape awemãr inu vanon asape nekilaro navisaluaena. ?Pogaga na sanene?”

²⁰ Ana yeririna la apisatãnea, apisape “!Kue-e, nagane na opis wowe ke ga, sa ga yermare tai teke e ko! ?Ane sape weãr ko? Ovisawal lia.”

²¹ Ana Yesu pisatãnea, pisape “Nanua e pogos naña nepim e yo nini, in na

nekila pupia kile tai e maramiu, ne-tamalia laulu nene. Ana pogos naña apisuia, pe akekaran re poli, apisape in na nemiyumãe piowa ga naña nekila sanene e Legiena Wa.

²² Ana popon asitomãli kieta ãelaga na kilaen ãaviu, sa naña yermarua Mosis amio yermarua na sumo taãena lala, sane Epraam lala, la amla pan ita. Naga mnea pe yumãena tanea, ana visae kana legiena nena sulologia Legiena Wa, pe asitomãl re poli, amiyumãen ga.

²³ Amiu asumã apisa ke asape amon kilaroen navisaluaena kiena ne Mosis, ana atãman luen ga asape nakilaen yumãena na ãaviu e Legiena Wa pogaga. Ana visae atãman nene, vanon ya ne sinemiu karnu keviu vanon ga kiau narin yumãena wo taaga ga nene naña nekila ruru si yepen yaru nene e Legiena Wa?

²⁴ Nepisu sane asitom veve ke sur la ne e ga e kulusia, ana popon ave manmarua li laa sane, asitom veve ruru li sur la va tol kana kilamãiu.”

Asitom ke asape Yesu pe Navisaarena po pe naga re poli

²⁵ Ana e pogos nene yeririna moki nae Yerusalem apisu Yesu pian la ke e Yumã Wa, amilania, apisape “!Lelaga naña ne! Yar ga nene naãane, naña yerikawa la apisa ke asape awemãria.

²⁶ Ana nagane pisawal ke ga kiena visena la sanene, ana pe akila re si surian poli. Pe tekilia re poli, pona amon visaen vania vanon apisulupãria sane lelaga, yaru nene, kieta Navisaarena lelaga.

²⁷ Ana peraga, taãatete naga, vanon kieta nalelagaena tai ãa rui, sape Navisaarena, pogos naña naga kate, yoko taãatete yar kilia sape naga su pe na pimi ne. Ana yaru naña Yesu, ita punu ga tekilia ruru pa mãana umã rui.” Apisa sanene komin amãape Yesu na paeme Nasaret, ana peraga, naga paeme Petleem.

²⁸ Ana vanon naña apisa ke sanene, Yesu ãaryon ga navian laena loyumã e Yumã Wa, pisawal visena nene pan la, pisape “Asitom asape akilia inu, akilia ke lele naña nepim ea, ana in na nepisu

sane pe akilia ruru re poli. Nepimi e nini, pe e re ga e kiau sitomena poli, ana yar taþena ga mligan inu nepimi, naþa naga pe purþes nen lelagaena. A sa naþa amninue inu ga, ana amninue mþena naga.

²⁹ A naga, in ke narui naþa nekilia ruru nena naga, vanon naga ke narui naþa mligan lua inu nepitom tano e yomarava nini.”

³⁰ Ana visena kiena ne Yesu la ne sanene kila amþareran asape monar atarar naga, ana pe yaru re nena tai naþa kilia tol naga, vanon kana pog ne pe pimi re poli wa.

³¹ Asape awe momþar naga, ana yaru la moki amlelaga e naga rui, vanon kile la naþa miyumuþena. Apisa sanini, asape “! Yoko Navisaarena nape naþa kilia imi kila si kile ya la naþa yuve naga? Peraga, yar nene kieta Navisaarena ke lelaga narui.”

Amligan yar na mara la apavinin Yesu

³² Ana Varasi la þasia asumþa amiya-gogon ke yeririna la amiilaar ke Yesu e kiela visena lala, ana apa iroro ga, apis pa pupia yar wa lala, na apiranar asape monar akila ga sur tai va Yesu nagane ga ne. Ana amligan kiela lokul navisuaren Yumþa Wa lala, asape ava akale pulmas tai na tararen Yesu, vena aure si naga vim pula.

³³ Ana Yesu pisawalia, pisape “Yoko in na nekilia nesu si nemio amiu yam ve plas ga, þisi na nowasuþe sina puna ne naga naþa mligan inu nepimi.

³⁴ Pogos naþa sa nowasuþe pae na, amiu akilali naþa akale inu vano-o yoko taþatete alual inu. Lele naþa neva nese ea, taþatete aim ea.”

³⁵ Ana pogos naþa yerkaþa kiena ne le Yu la amloge visena nene, asitom þele narui, apisa ke pan la, apisape “?Yar nene pisa ke yo nape ne, naþa yoko va ea a þisi na taþatete ita telual si naga ea? Pona sitom ke pisape va e yo taþena lala e yomarava naþa wenla ita le Yu lala aþure apa ea e pog na pupia yaltetaena, ana pisape va vian la mþena ga?

³⁶ Ana naga pisa ke ya nene, sape takale naga vano-o taþatete telual naga. Ana sanapen kiena visena naþa pisape naga

pa ke lepas tai naþa taþatete tesiraun naga, taþatete teva ea.”

Ana e pogos nene, lokul na visuaren Yumþa Wa la pe atarar re Yesu poli wa.

Yesu mlologon Ninuna Wa, sape pe wii namalena

³⁷ Ana akila mþa þaþagena nene pano-o, apa atol kana legiena maro, naþa sane pe kana pupia legiena nena. Ana pogos naþa asike veraga, Yesu sumþal pion manene sanini, pisawal pisape “Amiu a naþa moto karia, popon imi pun inu, mun wii na malena.

³⁸ Yar naþa mlelaga e inu, yoko wo van vaþisi, sa naþa Nasiriena Wa pisa, pisape !Yar na sanene, yoko losinena ule mamagan wii na malena, vano vano-o tataroi vetania sa naþa wii mlau!”

³⁹ Ana visena kiena Yesu nene, kana kinasia na Ninuna Wa, vanon naga kilia sape siraunia, lala naþa alelaga e naga, yoko atol Ninuna Wa. A e pogos nene, Ninuna Wa pe pimi re poli wa, vanon Yesu sike yomarava wa, pe pa totano re e kiena lele wa poli wa.

Þarin sitomena la e Yesu

⁴⁰ Ana pogos naþa yeririna la amloge Yesu pion sane na, kiela sitomena la pa pe taþena lala. La þasia, apisa asape “Yar nene, naga navisawaliena sane Mosis, naþa temlelaga tesape yoko imi.”

⁴¹ La þasia apisa asape “Ana, pona visae peraga, naga pe kieta Navisaarena kemua.” Ana la þas apisatamea, apisape “Peraga, pe visena re tai naþa pisa sanene sape Navisaarena yoko ve yeririna nae Kalele sane yar nene poli.

⁴² Nanene komin naþa kieta Nasiriena Wa la apisa ke ga asape Navisaarena naga molue ga e lus kiena ne Þarin Suþe Tepet, yoko ve yeririna nae Petleem.”

⁴³ Ana þarin sitomena moki la ne sanene kila narui yeririna la asu tetai vanon Yesu.

⁴⁴ La þas pe akeþaran re poli, apisu sane popon akuan va e yuþa nakoena, ana siraunia peraga, pe yar tai pa re lavis puna poli, vena tararia.

Nasumonena la sinela kar manene Yesu

⁴⁵ Ana siraun sur la nene, lala na visuaren Yumña Wa apa sina ga puna ne ãarin yar wa amio Varasi lala, vena kilaen navisawalena lala van la. Ana pogos naãa amñalivi e marala, yar keviu la nene pe apisu re Yesu poli, ana apis pan la, apisape “?Awa yar naãa memligan amiu apanonia? ?Vanon ya ne amiu pe aãure re naga pimi poli?”

⁴⁶ Ana navisuarena la apisatamñeia, apisape “Imimi memiagogon kiena visena lala po na po, pe yar re si tai poli naãa kilia vian ruru ita wo sane naga.”

⁴⁷ Ana navisatamñeena nene kila Varasi la amilania, apisape “!Aulai, nagane na amiu mñena, yar nene ãpere kiamiu sitom-ena la pa pe wowe!”

⁴⁸ Amiu atamñan naga pisa kotalia amiu, ana sanape, apisu sane e imimi yar kerke-viu lala pona imimi Varasi lala, la ãas amlelaga ea? Peraga yo.

⁴⁹ Lala ga naãa amlelaga ea, nane ãina viowa ga la naãa asike ko laa ne, a la pe akilia re sur poli. Pe akilia re kieta navisaluaena poli, Ntewa piain pa nakoena pan la rui.”

⁵⁰ Asumña apis mñarera ke sane na, lala yar tai kilayon ke sape kila kiela visena vito si tano. Nane Nikotimas, naãa nanua sumo e yemalo tai pa sun amio Yesu.

⁵¹ Naga pisa pan la, pisape, “Ita tepisayu ke yar na sanene na, sa ga naãa ita temla ke pa naliãpereena pania. Ana kieta navisaluaena pisa lepas nene, pisa sape visae tesape tevis van yar tai, monar tetotano ruru temio e kumali, tela pog vania vena naga kilia visawal kiena sitomena van ita, ana monar teviun naviunena vania vena tekilia tekirawal tesape lelaga kemua naga kila sanene sanene po sanape. Naga nene pe mrapa mesmes nakilaen yumñaena nene.”

⁵² Ana la pe sinelan re yagogonen kiena visena nene po, vanon apisu sane naga miilaar ke Yesu. Apis pania, apisape “!Aulai, ko na opis ke sa naãa ko mñena ope yar nae si Kalele tai! Asitomrurulia sur naãa Visena Wa pisa. Pe visena re nena

tai naãa pisa sape yoko navisawalena viu tai sumñalu garo Kalele vam e nini.”

⁵³ Ana kiela visena pa mñarera e lele nene, ãis na la amial tetai sina ga aãasuãe si mñala umña lala.

8

Sira naãa apisape akirawal taãa kolau

¹ Ana Yesu mligan Yumña Wa, mial pa si ma Kunus Na Purolip Lala.

² Monomi e nene, ana yemlagi kolulag mial pato si Yumña Wa Mana ne Ntewa. Pogos naãa yeririna la apisuia, la moki apim puna, naga totano pian la.

³ Ana pe piavi re nena ga, navianena navisaluaena lala amio Varasi lala aãure sira tai pimi puna, akila sumñal e marana ne yeririna lala. Sira nene, atarar ke sanene vanon asape kila kolau, ana laãas apisuia, apisawalia.

⁴ Ana akila naga sumñal sanene, apis pa Yesu, asape “Navianena, sira nene, akirawal kila ke kolau.

⁵ Ana sa naãa navisaluaena kiena ne Mosis pisa e lepas na mlamulena viowa nene, nanagane na monar mokove monar ga naga mare. Ana navisaluaena kiena ne le Rom lala naga sape yoko taãatete mokoveñar yaru. A ko na sanape, kiomña sitomena sanape?”

⁶ Ana naviunena nene, pe apiun ruru re pa Yesu poli, ana akila ke ga nataãaliena pania, vena visapal sur tai naãa siraunia akilia ala naliãpereena vanonia.

Ana Yesu pe pisatamñe re poli, ãarina tau pito tano, kian mrasilmana siri visena tai e porotano.

⁷ Ana apiuyun ke pania asape sanapen sira nene, ana Yesu tomñal ruru sina, pis pan la narui. Pisa pan la, pisape “Pogaga, ana amiu yar naãa kove ães sira nene, naga monar ve yaru tai naãa pe naviowaena tai to re nena e naga.”

⁸ Ana yam si tai, pulu si pato tano, siri si visena taãena e porotano.

⁹ Ana pogos naãa amloge sur naãa Yesu pisa pan la, asiar naãa amiyal tetai si lala. Naga naãa sumon la, kiela yermarua tai, a siraun naga, lala taãena mñena lala

apiayapa apavano, pano-o sira nañani naga taaga sumal sike e marana Yesu.

¹⁰ Ana Yesu kira pa pisuia piun tania, sape “?Sira, la naña asike pe nagane? ?Pe lala yar re si tai sape liñere ko poli?”

¹¹ Ana sira pisatamēa, pisape “Suñe, pe tai re si poli.”

Yesu pisa pania, sape “Pogaga, in mēna tañatete neliñere ko. Ko, okilia owasuñe ko sina ova momā, ana ovavini ve okila re si naviowaena.”

Yesu pisape naga pe yomerarava na yomarava

¹² Ana siraunia Yesu pisi pan la, pisape “In na nepe yomerarava na yomarava, yar a naña taveve inu tañatete si yal e yemalolo, yoko yomerarava namalena teke e naga.”

¹³ Ana ñisi na le Varasi la ñasia naña asike wa apilon si kiena visena, apisape “Ko na opisa sanene, ko ga omiila ke si kioñia visena, ko na oñarwar ko wa! Sanene na, imimi tañatete melelaga ne, kioñia visena pe pe lelaga re poli.”

¹⁴ Ana Yesu pisatamēa, pisape “Pona nekila sanene yo, ana kiau visena la punu ga amio kiau vianena la ape lelaga. In na nekilia sur punu ga e inu, sane nesu pe na nepim e nini, po nesike e nini ñisi na nowasuñe si neva pe, ana amiu pe akilia in re nena poli.

¹⁵ Amiu amliñere in ke ga e sitomena kiena ga yeririna lala, ana in na pe nemliñere re ga amiu yar ta poli.

¹⁶ Ana visae pogos tai neliñere yeririna lala, yoko kiau naliñereena mesmas ga, vanon ve in ga taaga re nekila, nemio naga naña mligan inu nepimi.

¹⁷ “Ana e kiamiu navisaluaena, asiri sanini asape visae yar la ve lua aviranarla e visena tai, ñisi na monar alelaga ea,

¹⁸ ana yoko monar ve sa mēna nene e imimi lua kau ata. In na nepisa ke nesape in na nepe lelaga, a naga miilaar inu, ana kila sanē monar alelaga e inu narui.”

¹⁹ Lala amloge visena nene, apiun tania, asape, “?Ko na opisa ke arimomā nene, ana sike pe nagane?”

Yesu pisatamē la, pisape, “Amiu amninue ga naga, sa naña amiu amninue inu ga. Visae amiu akilia ruru inu, yoko kila amiu akilia ruru mēna naga, ana tañatete si aviun naviunena na sanene, ana peraga.”

²⁰ Visena la nene, Yesu pian la ke e Yumā Wa, e lepas naña akuan ruru nalaena lala kiena ne Ntewa sike ea.

²¹ Ana Yesu pisa mēna pan la, pisape “In na nepur matan amiu ke narui. Pogos naña neva pae na, akalenu vano o tañatete awal inu, yoko amare amio kiamiu naviowaena lala. In na nepa ke e lele tai naña amiu tañatete avam ea.”

²² Ana pogos naña yerkawa kiena ne le Yu la amloge visena nene, apiunia asape “?Yar nene sinenan pisape kila ya? Pisape va e lele tai naña ita tañatete teva ea, pisa ke sape yoko we momar naga mare yo?”

²³ Ana Yesu pisape “Kiamiu sitomen lala amio kiau naga peve tañena manene laa. Amiu na ape nae ga yo tano nini, inu na nepe nae yo na ma metava. Amiu na yomarava nini, in na pe nae re e poli.

²⁴ Ana sa ga naña nepisa ga na wa, yoko amare ga amio kiamiu naviowaena lala. Visae pe amlelaga re e in poli, naña nepe naga naña sike na sike lue narui, yoko monar ve sa ga nene.”

²⁵ Ana apiun, asape “Ko ovisa li sina osape ko na ai.”

Ana Yesu pisatamē la, pisape “In na nepe naga ga naña siar na konua rui pimi tol nagane, nepisa ke nesape in na nepe naga.

²⁶ Naga ga nene nepisa ke e lepas na punu. Ana e lepas na pun amiu, sur la moki naña nekilia nevisa, ana visae nevisa, pe visen naliñereena ga punu ga. Ana sur la ne nepisa ke ne e yomarava nini, naga pe visena ga la naña nemloge tan naga naña mligan inu, vanon silaga, kiena visena la mesmas pañisi.”

²⁷ Yesu pis merarava ga sanene, pisayu ke arimana naña ma e peni pan la, ana pe akilia ruru re nena poli.

²⁸ Ana pis si pan la, pisape “Pogos naña yoko amiu atelan pae inu Narina Yeririna

metava e laki, yoko akilia ga na wa sa naña in na nepe kiamiu Navisaarena. Yoko amiu avisu kilale naña sur punu ga naña nemiyuñäenia, pe nekila re ga in ga taaga poli, silaga nepisa ga sur la naña Ata pisa pian inunia.

²⁹ Naga ke narui naña mligan inu nepimi, a naga sike amio inu nagane. Naga pe mliganu li re poli, vanon silaga nekila ke sur punu ga sa ga naña naga kekarania.”

³⁰ Yesu pis ke sanene, kiena visena la ðere le Yu la moki amlelaga e naga.

Visena lelaga kila sen lala na mlamulena alolor sina ga

³¹ Ana Yesu pis pan le Yu la naña amlelaga mare ga e naga na wa, pisape “Visae awarar kiau visena m̄arera, amiu alogearia, amiu ave kiau nalogena la lelaga.

³² Yoko akilia ruru visena lelaga, ana visena lelaga kilia kila sen loru si vetan amiu.”

³³ Apisatañäia, apisape “Ee, imimi na lus kiena yermarua Epraam, imimi pe memiyuñäe koren kiena ne re yar keviu tañena tai poli. ?Ana sanape ne osape sen lala alolor vetan imimi?”

³⁴ Yesu pisatañäe la, sape “Nepisa lelaga pan amiu, yeririna punu ga naña asuñä akila ke naviowaena, la ape nayuñäe korenaena na naviowaena, sen la na viowaena apiar m̄areran la.

³⁵ Ana asuñä amiyuñäe korena ga kiena ne yar keviu na naviowaena, ana pe ape namratava re puna poli. A inu, in na nesulue ga nemio Ata, komin in na namratava nena puna.

³⁶ Ana in na sisi nae ma e peni, visae noul plan amiu, yoko amiu m̄ena akilia asulue amio inu ma uñä.”

Yesu pisape la pe ape narina ne re yermarua Epraam poli, ape narina ne Yermare

³⁷ Ana Yesu pisa ke sina ga pan yeririna lala, pisape “Nekilia ruru amiu na, ape lus nena kiena ne yermarua Epraam, ana lus kiena ne Epraam la narui naña popon sa akekaranu. Ana peraga, amiu lañasia na

lus ga nene naña kiau visena pe towawa ruru re e kiamiu malena la poli, sinemiun manene asape awe moñar inu.

³⁸ Ana popon amiu alelaga e kiau visena lala, vanon in na nepisawal ke ga sur la naña nepisua pogos naña nesike puna ne Ata, ana amiu na akila ke ga naña amloge arimamiu pisa.”

³⁹ Ana apisatañäia, asape “Lelaga, vanon arimamimi, yermarua apua Epraam na sumo sumo laa.”

Ana Yesu pisa pan la, sape “Peraga yo! Visae amiu ape narina ne yermarua Epraam lelaga, popon amiu towe lai akilali sur wo la ve sa naña naga miyuñäenia.

⁴⁰ Ana pere, amiu akila piowa manene laa pañisi. Sane inu, in na nepe yar tai naña nepisa plan ke ga visena na lelaga la naña Ntewa pisa pan inu, ana amiu asape aweñar inu. ?Pona amiu asitom ke asape ðelaga wo ke narui naña kiamiu yermarua Epraam sape akila?

⁴¹ Peraga, nepisu sane pe naga re nene po, ana arimamiu tañena ga tai sike ga wa, naña amiyuñäe kiena ke.”

Ana la apisape “!Ke ya ne! !Osape okila imimi meve sisi na mrapa lala, memninue ga arimamimi! Armamimi taaga ga nalelaga naña sike, nane Ntewa.”

⁴² Ana Yesu pisape “Visae visena nene lelaga, sape Ntewa pe arimamiu, yoko amiu monar akekaran manene inu, vanon in na nepetan ma puna nepitom tano e nini. In na nepim re ga sanene poli, naga ke narui mliganu nepimi.

⁴³ In na nepisasa ke sur la nene pan amiu pano-o, ana silaga amiu pe amloge kilale re nena ga. Nemninue amiu ga, vanon ya ne yepemiu mavin logekilaleen kiau visen sanene?

⁴⁴ Amiu na arimamiu na Yermare, ana amiu sinemiun ga asape akila sa naña naga sinenania. Siar nanua sumo e nasiarena pimi, naga pe yaru na we-moñaren yaru, pe sinenan re visena nalelaga poli, pe suñal re nena e lepas nene poli. Kiena ðelaga mesmas, pis lue ga e pupia visokanena lala, vanon naga

pe purþes nen navisokanena punu ga, pe ariman navisokanena.

⁴⁵ Naga sanene, ana pogos naþa in na nepimi, nepisawal visena na lelaga wo pan amiu, ana siraunia amiu amon lelagaen si e inu.

⁴⁶ ?Ana amiu ane kilia visalua kiau naviowaena tai? ?Ana visae amiu apisu nepis pe lelaga, vanon ya ne amon lelagaen e inu?

⁴⁷ “Yar naþa kiena ne Ntewa, naga suña miyagogon ruru visena kiena ne Ntewa. Ana amiu la naþa pe sinemiun re aloge kiena visena la poli, nekilia sane nanene vanon pe ape kiena re nena ga.”

Yesu amio Epraam

⁴⁸ Ana visena m̄arera la nene kiena ne Yesu kila yerkaawa kiena ne le Yu la nene amloge piowa, ana apiun pania, apisape “Imimi na memloge asape ko na pe ope yere Yu re lelaga poli, ko na ope apkas nae ga Samaria tai. Ana mepisu naþa yermare tai teke e ko, kila ko ope wowe li m̄aga. ?Visena la nene ape lelaga, po peraga?”

⁴⁹ Ana Yesu pisatañe pan la, pisape “Peraga, pe yermare tai to re e inu poli. Sur la naþa in na nekila ke ne, nekila ke ga vena kia kiena ne ata va metava. Sur la naþa amiu akila panu, akila naþa kiau kia pato tano.

⁵⁰ Ana pe pe sur re tai pan inu poli, vanon in na pe nemiyum̄aen re naþa na kilaen kiau kia va metava poli. Ana yar keviu tai m̄eke naþa sinenan pisape yeririna la popon avatanon inu, ana naga taaga ga kilia la naliþereena e lepas la nene.

⁵¹ Ana visena tai naþa lelaga nekilia nevisa van amiu sa nini, visae amiu yar tai larar kiau visena m̄arera, logearia, yoko taþatete va tol marena pogos tai.”

⁵² Ana le Yu la amloge visena nene, apisa pania, asape “Nanagane na mekilia ruru naþa yermare sike pa e ko rui. Ko opisape yar naþa lelaga e ko taþatete mare, ana pe yar tai naþa yoko taþatete ve mare re pogos tai. Yermarua Epraam mal m̄a pano-o mare, a navisawalena lala, lala m̄ena amiyum̄ae m̄a pano-o amare.

⁵³ ?Pona ko na opisu sane oto laa metavan kieta yermarua wa la nene yo? ?Ko na ositom ke osape ko na a si ne?”

⁵⁴ Ana Yesu pisatañe la, pisape “Visae nevisawal van amiu, pona avisu sane nemiyeluar ke sina ga kiau kia, ana avisu viowa ga. Yar taþena ga tai kila ke kiau kia pa metava, naga naþa asape pe kiamiu Ntewa, naga kau ata ne.

⁵⁵ Naga, amiu pe akilia re poli, ana in na nekilia ruru naga. Pe nepisokan re sane amiu poli, nepisa ruru ga ne, nesape in na nekilia ruru naga, a kiena visena punu ga, nemligan ruru sike e kiau malena.

⁵⁶ Nekilia nevisa m̄ena ga sane repimiu yermarua Epraam, naga tai naþa nanua sumo sinenan pisape visu kiau pog nane þane. Naga sinenan pisape visu naþa nomolue e kiena lusia, nevim nekila kiau yum̄aena nini, ana pogos naþa naga siar pisu ke pa rui, naga kekara na kekara.”

⁵⁷ Ana le Yu la apiunia, asape “Ana ko na pe ope yermarua re tai ne sane naga po, kiom̄a kas pe tol re lualima yam lima poli wa. ?Ana sanape na opisa ke osape okilia yermarua Epraam na sumo ne? Ko opisu naga koyo tai?”

⁵⁸ Ana Yesu pisatañea, pisape “Nepisa pe lelaga pan amiu, sane yermarua Epraam na nanua sumo ne, in na nesumon laa naga. Pogos naþa naga pere wa, ana inu in na naga naþa su sumo rui.”

⁵⁹ Ana pogos naþa le Yu la amloge Yesu pisa narin visena ga nene, naþa sane kia wa kiena ne Ntewa, ana akilia asape naga pisa ke sape naga Ntewa, ana sinela mimi paþisi. Akale kilavaru na kovemareen Yesu, ana naga tapoloun la, mligan Yum̄a Wa, pure sina ga pano.

9

Yar naþa paeme pe kilamara þala

¹ Ana imimi nalogena lala memio Yesu memial mepano, ana pogos naþa mepa ke sane na, mekirawal yaru tai naþa pogos naþa paeme, naga pe kilamara þala.

² Ana mepiun tan Yesu, mesape “?Navianena, sur ya ne kila yar nene? ?Pona nakoena na kiena mlamulena viowa ga yo, po nakoena na mlamulena viowa

kiena ne anena po arimana, kila naga pe kilamara p̄ala sanene?”

³ Ana Yesu pisatañea, pisape “Peraga, pe kiena naviowaena re poli, a pe naviowaena kiena re kiena yermarua lua poli, a naga paeme sanene vena kilaen ga sane yoko yaru la akilia avisu puriukawaena kiena ne Ntewa yuñae e kiena malena.

⁴ Sanene, yoko netamalia naga nanagane, komin pogos naña yemlagi ke ga wa, monar teyuñae m̄arera, monar teyuñae kiena yuñae lala naña naga mligan inu nepimi. Yemalolo naga pimi ke narui, naña taṣatete teyuñae ea.

⁵ A nanagane na, in na nesike tano e nini, in na nepe yomerarava na yomarava nini.”

⁶ Yesu pisa sanene, p̄isi na plasiria yavi na porotano p̄asia, pulou p̄alelar pimi sane kene, plan e kilamaran yar nañane luwoka.

⁷ Ana pis pania, pisape “Pogaga, ovano oto tano e pulus nen wii naña Siloam, okevan ruru si marañia.”

Wii naña Yesu pisa pania, kiena kia Wii Na Liganen Vano. Ana yar nene pito tano kila sanene, ana kilamarana pimi po. Pisi na p̄asuṣe si pun imimi memio Yesu, sane naga kilia kira pisu sur narui.

Visena moki e lepas kiena kilamara p̄ala nene

⁸ Ana siraunia, la naña nalavis puna ne yar nene, amio la naña na sumo asum̄a apisu naga mlogi ke, apisu si naga, apisa asape “?Kilamara p̄ala ke nene narui, naña nanua sum̄a monon mlolog kare ke ne, po pe naga re poli?”

⁹ Ana lala p̄asia apisape “Ee, naga ga nene ne,” a p̄asia asape “Peraga, yar taṣena ga tai ne kus marana ne,” ana yar nene pisa meraravan pan la, pisape “In ga nini.”

¹⁰ Ana pogos naña pisawal pan la sane na, apiun tania asape “?Ana sanape na kilamarañia po sanene?”

¹¹ Ana pisatañe la, pisape “Yar naña Yesu, naga miyuñae. P̄alelar narin

kene amio kiena vilasirena, plan e kilamarau, ana pisape netotano e wii naña Siloam ne, neke plan si vetan kilamarau. Ana nekila ga sanene, nepitove, nekevan marau, nepisu sane kilamarau po narui.”

¹² Ana apiun Yesu tania, asape “?Yar nene m̄eke pe nagane?”

Pisatañe la, pisape “Nemninue ga, pe nepisu re si po.”

Le Varasi la amliṣere la e sitomena lua e lepas na taña ruruena nene

¹³ Ana siraunia, aṣure yar naña sumo pe kilamara p̄ala, aṣure naga pa puna Varasi lala vena avisulia.

¹⁴ Aṣure naga pa sanene vanon legiena naña Yesu kila ruru kilamaran yaru nene, naga pe Legiena Wa, ana la asitom asape Yesu kila yuñae tai naña navisaluaena na legiena wa pisa luṣaria.

¹⁵ Ana pogos naña apa apisawal pan Varasi lala, apiun tania, asape “Pogaga, ko towe ovisayu meraravan sanape naña kilamarañia pimi po.”

Ana naga pisa ga sanini, pisape “Peraga, yar nene mligan ga narin kene e kilamarau, ana nepa neke plan sina ga, nekilia nepisu ruru si sur punu ga.”

¹⁶ Ana pogos naña Varasi la amloge, laṣas apisape “Yar naña kila nanene, naga kila sa ga sitom korena ga navisaluaena na Legiena Wa. Sanene na, naga pe molue re nena e Ntewa pitomi poli.”

Ana la p̄asia asape, “Peraga, visae pe lelaga naña pe yar viowa ga tai na kilaroen navisaluaena, sanape na naga kilia kila kile wo la ne sanene.” Ana apisayu m̄a sanene pano-o asum̄alu ase sitomena lua narui.

¹⁷ Ana apiun ke sina ga tan yar naña nanua pe kilamara p̄ala, apisape “?Ana ko, ko naña naga miyuñae kilamarañia, ko na ovisa ya ne e lepas na yaru nene?”

Naga pisatañe ga la nena, pisape “Naga pe navisawalena lelaga tai.”

¹⁸ Naga pisa sanene, ana yerka kiena le Yu la pe amlelaga re e kiena navisawalena la nene poli, pe amlelaga re asape nanua sumo yar nene pe kilamara

þala, a nagane kilia kirava. Ana apio arimana amio anena vena avim avisu la.

¹⁹ Ana pogos naþa lalua apim, apiun tan la, asape "Avisu ruru li yar nene. ?Naga pe narimiu kemua lelaga, naþa asape paeme ana pe kilamara þala, pona pe naga re poli? ?Ana visae naga, sanape na kilamarana pimi po si sanene?"

²⁰ Ana lalua apisatañela, asape "Imimi lua mekilua mesape naga pe narimimi, mekilua mesape pogos naþa moþaria, pimi tol nanagane, naga pe kilamara þala nenaga.

²¹ A pe mekilua re mesape naga kilia pisu ruru si sur la nanagane, pe mekilua re a ne kila ruru si kilamarana sanene. Ana popon aviun ruru ga tania, naga pe pe sisi re poli, kilia vis."

²² Lalua apis sanene, akilawan li ña kiela sitomena, vanon yerka wa kiena ne le Yu la apisayu pa rui, apisawal asape yar naþa mlelaga sape Yesu pe Navisaarena, yoko akuan lua ve su re si amio la e Yumña Wa Mana ne Ntewa.

²³ Apisawal sanena lalua amaraun paþisi, kila apisa ga asape amninue ga, asape "Popon amiu aviun ga tania, naga pe pe sisi re poli."

Varasi la apis si pan yar naþa nanua sumo pe kilamara þala

²⁴ Ana pogos taþena si tai na, apio kilamara þala na nanua ne pimi loyurña pula. Apis ñarera pania, asape "Ovisa kia kiena ne Ntewa na mava, ovisa ke sur la punu ga nene van imimi ve lelaga, vanon nagane na mekirawal pa rui sane yar nene pe yar viowa kemua na kilaroen navisaluaena."

²⁵ Ana naga pisatañe la, sape "Naga pe yar viowa pona pe yar wo, in na pe nekilia re poli. Sur taaga nekilia, sanini. Nanua sumo, kilamarau þala nena ga, ana nanagane na nekilia nepisu sur punu ga."

²⁶ Ana apiunia, asape "?Ana visae sanene, miyurñaen ko sanape? ?Kila ruru kilamaraña sanape?"

²⁷ Ana naga pisatañe la, sape "Nepisa meraravan ruru sur punu ga nene pan amiu yam tai þa rui, ana amiu amon logeena, ana nanagane na sinemiun asape aloge sina ga. ?Vanon ya? ?Pona

amiu ñena sinemiun asape aim ave kiena nalogena la yo?"

²⁸ Naga pisa sanene, sa naþa pisa kare li la ña ga, ana la sinela kar manenea, apeveyunia asape "!Oo! Ko ga ope kiena nalogena tai, imimi na mepe nalogena la kiena ne yermarua wa Mosis.

²⁹ Mosis nene, mekilua ruru mesape pe lelaga naþa Ntewa pisawal kiena visena pania, ana e lepas na yar taþena nene, imimi pe mekilua re poli, sane naga yar nae pe pimi sanape."

³⁰ Ana yar naþa pisatañea, sape "!Kue-e, nemilan amiu paþisi naþa pe akilia re naga poli! Naga kila ke pupia yumñaena la sanene, pano-o kila ruru kilamarau, ana amiu akilia re asape naga ai po naga yar nae pe.

³¹ Tekilia tesape visae yar viowa vio van Ntewa, yoko Ntewa taþatete yagogonia, a visae yar naþa pe yar na lotena a mlogear ke naga, visae vio vania, yoko yagogonia.

³² Ana yaru nene, Ntewa miyagogon ke naga, vanon siar e nasiarena na yomarava nini pimi tol nagane, pe apisuli re yar tai naþa kila ruru si kilamaran yaru tai pogos naþa paeme pe kilamara þala.

³³ Yar na monar petan ga Ntewa pitom e nini, visae pere, naga taþatete nena kila sur tai ne sanene."

³⁴ Ana lala pe akekara re nena naþa yar nene pis sanene pan la, asape "E, ko ope yar viowa kemua tai. Ko na þelaga na mlamulena viowa pulemamaga e ko siar e pogos naþa opaeme pimi tol nanagane. ?Ana ko ko na ai ositom ke osape okilia ovian imimi sina ga?"

Apis kare naga sanene pano-o, þisi na amñenelua si naga pa vanua.

Kilamaraþala nene mlelaga e Yesu narui

³⁵ Ana pe piavi re nena ga Yesu mloge asape amñenelua yaru nene sanene, ana pa ñalia, piun tania, pisape "?Sanape? ?Nanagane na ko na omlelaga pa e Narin Yeririna rui, po pere?"

³⁶ Ana yar naþane piun tan Yesu, pisape "?Ana naga naþa ko opisa ke ne, naga ai? Visae ko na okilia ovisali van inu, pona nekilia nelelaga e naga."

³⁷ Ana Yesu pisatam̄nea, sape “Ko na opisu pa naga rui, ko opisu ke naga nagane. In ga p̄a, nane nepis ke nemio ko ne.”

³⁸ Ana pisatam̄nea, sape “O Supe, visae sanene, in na nemlelaga nena ga e ko.” Ana yar nene p̄aryon lue ga na yeluaren Yesu.

Yesu pis pan Varasi lala

³⁹ Ana Yesu pis pisape “In na nepim e yomarava nini vena nevisusuveve yeririna lala, vena kilaen sane yeririna la na p̄a kilamarala p̄ala akilia avisusu suria, a vena kilaen sane yeririna la na p̄a asitom ke asape akilia apisu sur punu ga, avisu kilale sane la ape kilamara p̄ala ga.”

⁴⁰ Ana Varasi la p̄as asum̄a lavis ga, amloge visena nene, apiun tania asape “?Ana opisape sane imimi m̄ena kilamaramimi p̄ala ga, a?”

⁴¹ Ana Yesu pisatam̄e la pisape “Visae pe lelaga na p̄a amiu apisu kilale asape kilamaramiu p̄ala, po li m̄a ga, yoko amiu ta p̄atete akilia awar nakoena vanonia. Ana pogos na p̄a visae apisa ke asape akilia avisu ruru sur punu ga, sanene na pupia naviowaena sike pa e amiu rui.”

10

Pakaiwa na kove kan sipsip

¹ Ana Yesu pis pa re laa sane, pisa p̄akaiwa tai pan la, e lepas na kove kan sipsip, na p̄a amiyum̄aen pae ana sipsip kiena ne yeririna punu ga akilia ava amomalio loyum̄a veraga. Naga pisa sanene, pisape “Nepisa pe lelaga pan amiu, yar na p̄a visae ve kom re e mralaea na vaen loyum̄a vanon sipsip lala, ana p̄iyukalawan ga kove, yar ne sanene pe yar viowa na vinauen ga.

² A naga na p̄a silaga pa kom lologia mralaea, naga pe yar memes nena navisuaren sipsip.

³ Visae aligan yar tai na kirakirawoen mralaea, ana pogos na p̄a yeririna navisuarena sipsip vim, yoko naga kilia vike ga vania. Ana pogos na p̄a va loyum̄a, sipsip la punu ga aloge pulgona, ana naga vio ga kia kiena ne lala na p̄a ape kiena

ga, p̄isi na lala ga nene asum̄alu a naga sumon la ava vanua.

⁴ Ana pogos na p̄a visae sumon la apa ava vanua, naga yal sumon la, la asirau-nia avano, vanon akilia ruru pulgona.

⁵ Ta p̄atete akila ve sanene van wolawa tai, yoko amaraun ga, vanon pe amloge kilia re pulgon yar ta p̄ena la poli.”

⁶ Ninun visena nene Yesu pisawal pan la, ana pe amloge kilia re kinas poli.

Yesu sape naga pe mralaea na kove na sipsip

⁷ Sanene na, Yesu sunyu m̄a pan la sane e lepas na kove na sipsip nene, pisape “Nepisa pe lelaga pan amiu, sane mralaea na kove na sipsip nene, naga inu.

⁸ Lala ta p̄ena la na p̄a apim sumon inu, na p̄a apisokan asape yoko avisuar ruru sipsip lala, ape yar viowa na vinauena ga lala, ana pogos na p̄a apa akaten sipsip lala, sipsip la pe amloge la re poli.

⁹ In ga nepe mralaea na kove, yar na p̄a imi kom ga pun inu, yoko nevisuar ruru kiena malena. Yoko naga kilia va vanua lual kana kinanena, p̄isi na kilia vim sina momalio kolemallo, kilia vim vano ve sanene naga pogaga.

¹⁰ Yar na vinauena pimi vena war plan vinaunen sipsip lala, pona nawe monar laena, pona kila kare manene laena, ana in na nepimin vena akilia atol malena, vena akilia akekan malena na p̄a wo va p̄isi van la.”

Yesu pisape naga pe yar wo na visuar ruruen sipsip lala

¹¹ Ana Yesu pisa m̄ena ga, sape “In na nepe yar na po na visuar ruruen sipsip lala. Yar na visuar ruruen sipsip naga monar kekara na p̄a tam̄an kiena malena vena tamaliaen kiena sipsip lala.

¹² Visae ve yar na yum̄aena ga tai, p̄isi na ta p̄atete visuar ruru sipsip la ve sanene, naga pe kekan re la ne sanene vanon pe pe kiena sipsip re poli. Visae pogos tai visu pupia lokul tetan lala atomin sipsip la nene, yoko naga marau ga, sum̄alu kiriri ure, ligan sipsip la asike na, p̄isi na lokul tetan la nene avim akarkare la am̄enetetain la.

13 Yar nene ure vetan sipsip la ne sanene, vanon naga pe yar tai nayumãenen ga kiena kilavaru, naga pe sitom manene re sipsip la nene poli.

14 “A in na nepe yar na visuar ruruen kiau sipsip lala. Nekilia ruru la naþa ape kiau, a la nene akilia ruru mēna inu.

15 Imimi na mekilia ruru imimi sa ga naþa imimi lua Ata mekilia ruru imimi lua. A in na sineu si kiau sipsip la nene torokin naþa netamãan kiau malena vanon la.

16 “Ana kiau sipsip mēna la moki asumãa ke ga wa, naþa pe apim asu re loyumãa e kiau kove poli wa, ana monar neva nevio la mēna ga, ana pogos naþa aloge pulgou, yoko aimi. Nekila mã sanene vano-o kiau sipsip la punu ga aim ave þegas taaga ga narui amio inu, yar keviu na visuar laena.

17 “Vano-o yoko netamãan kiau malena vanon la, ana kau Ata naga kekaran paþisi, kekaran inu vanonia. Ana nekilia nevisa mēna sane kiau malena naþa visae netamãan vano-o, yoko nela maran sina.

18 Pe yar taþena re si naþa yoko lalua kiau malena vetan inu, ana in ga taaga netamãania. Naga pe kiau ga natañanen vano, a pe kiau ga nalamaranen sina. Na naþa neyumãae sanene, Ata ga mligan e inu.”

19 Ana yam si tai, visena kiena ne Yesu na sanene kila le Yu lala aþure tetai e sitomena lua sina.

20 Lala moki asape “Yermare ga na sike e naga, yar namã þarina pe wowe viowa ne. !Ve ayagoga re!”

21 Ana lepas þasia asape “Peraga, kiena visena wo la nene pe pe visena kiena ne re yar naþa yermare sike e poli. ?Ana sanape, yoko yermare viowa kilia kila ruru si kilamaran yaru naþa pe þala, sa naþa yaru nene kila rui?”

Yesu pisawal meraravan naga pan le Yu lala

22 Ana e pogos nene la apim atol si pog na kala pupia þaþagena tai, ma Yerusalem. Paþagena nene apio asape Paþagena Navisa Ruruen Yumãa Wa Mana

ne Ntewa, ana amiyumãaen ke e pog na miava.

23 Ana Yesu mēna pa sike e þaþagena nene, ana pogos tai naga pa ma e Yumãa Wa Mana ne Ntewa, mial ke pa e pupia mraliu naþa apio sape Mraliu Kiena Solomon.

24 Ana yerkawa kiena le Yu lala naþa asike ne apim puna, ape þegas amiyervivia, apiun m̄areran pania, asape “!Konua rui mesape mekilia ruru ko ko na ai, ana ko okilawan ko mã sanene pano-o! Visae ko na ope Navisaarena kiamimi na lelaga, imimi sinemimin mesape ovisa meraravan ruru van imimi nanagane!”

25 Ana Yesu pisatamē la, sape “?Ana in na nepisa ruru pan amiu þa rui, po pere? Nepisa ruru pan amiu ana amon naþa alelaga ea. A pupia yumãaena kerkeviu la naþa nemiyumãaen e kia kiena ne kiau Ata, sa naþa amiu apisu pa rui, lala mēna akila meraravan inu pan amiu rui,

26 ana naga mēna nene amiu pe amlelaga re e poli. Amiu pe amlelaga re nena e inu, pona nanene vanon amiu pe ape þegas na kiau sipsip re poli yo.

27 Kiau sipsip lala amloge kilia pulgou, a in mēna nekilia la punu ga, a lala asumãa ataveve inu.

28 In na nemla ke malena naþa ve uro re pan la, ana taþatete akovio, pe yar re tai naþa kilia war plan la vetan lumãau.

29 Nanene vanon kiau Ata ke narui naþa þar la pan inu, a naga m̄arera manene laa taulu punu ga, ana taþatete yar tai war plan sipsip la nene vetan navisuarena na limana.

30 Lelaga, inu nemio ata, imimi lua mepe taaga ga.”

Le Yu la sinela kar Yesu

31 Ana pogos naþa Yesu pisa pa visena nene, yerkawa kiena ne le Yu la sinela kar ke sina ga, aþar kilavaru lala asape akoveñaria.

32 Yesu pisuia, ana pis pan la, piunia pisape “?In na nekila þarin yumãaena wo lala e maramiu rui, naþa Ata sinenan sape neyumãaenia, ana amiu asape akove inu vanon nape?”

³³ Ana la apisatamēa, asape “Peraga, mesape mokove ko, pe vanon re yumāena wo poli, ana vanon ga naŕa ko na oŕarnena kare ke kia kiena ne Ntewa, naŕa ko, ko na ope yeririna ga, ana silaga okila ke sa naŕa ope Ntewa pa rui!”

³⁴ Pisi na Yesu pisatamē la, sape “E kieta Tus Wa, visena kiena ne Ntewa tai teke e Tus Na Yauena, naŕa pis pa yeririna nae Israel lala, pisayu sanape naŕa lala ape narina lala, naga pis sanene pan la, pisape ‘Amiu na sa ga ntewa lala.’

³⁵ “Sanene na, tevisu e yo nene sane la naŕa visena kiena ne Ntewa nene pan la, la ape yeririna ga lala, ana visena nene pisape lala ape ntewa lala, ana visena nene naga pe kieta Nasiriena Wa tai, monar ve lelaga ga.

³⁶ “Ntewa pisayu kiena yeririna la sanene rui, ana yoko ve sanape van inu, naŕa in ga taaga naga miawawo inu, mligan inu nepitom e yomarava nini? Mesmesun ga naŕa nepisawal nesape naga pe kau Ata Ntewa, ana inu nepe narina, ana amiu asape piowa ga naŕa nevisa sanene. Apisa ke asape in na neŕarnena kare kia wa kiena ne Ntewa, ana pe sa re nene poli.

³⁷ Visae pe lelaga naŕa nemiyumāe ke pe pe kiena re arimau poli, pona amiu ve alelaga re e inu, naga pogaga.

³⁸ Ana visae nekila ke kiena yumāena lala, pona amiu amlelaga ke e inu po pe amlelaga re poli, a amiu monar alelaga e kiau kile lala, sane ape yumāena kiena ne Ntewa lelaga. Visae ve sanene yoko amiu akilia avisu kilia sane Ata teke e inu lelaga, a inu mēna neteke e naga.”

³⁹ Yesu pisa sanene pan la, ana kiela sitomena mārera maran taaga suŕa ga. Lala akilali naŕa atararli si naga sanene na, amilan ga naga pure tan likan la pure pano.

⁴⁰ Ana Yesu petan si Yerusalem kusro pito sina e wii naŕa Yortan lepas na vano, e yo naŕa Yoane Nakeena kee yeririna lala ea nanua sumo. Ana suŕa e yo nene yam piavi li mēga,

⁴¹ ana yeririna la apim ke puna silaga. Apim apisayu naga asape “Yoane nanua, naga pe kila re kile la sane yar nene kila ke ne poli, ana naga pisa plan sur moki e lepas na puna, ana tepisu e kilamarata sane sur la punu ga naŕa pisa ne apim ape lelaga ga narui.”

⁴² Ana kiela sitomena na sanene kila sane la moki nae yo nene amlelaga e Yesu.

11

Suniena kiena Lasaros

¹ Ana pogos naŕa Yesu sike perina wa, maiena mārera tai pimi tol kiena erau tai, Lasaros. Lasaros nene vinena la lua naŕa Maria amio Mareta, la telu nene nae narin pulkumali naŕa Petani lavisin Yerusalem.

² Ana Maria ne naga mē nene naŕa sir-aunia taron ponotaninu e Yesu, miyumu vania lana e vilŕarina.

³ Ana pogos naŕa vinena la lua nene apisu mēnela nene mai keviu sanene, amligan visenan pa pan Yesu, asape “Suŕe, kiomā erau naŕa ko na sinemā si naga, mai tai na piowa ga.”

⁴ Ana pogos naŕa visena nene pa tol Yesu, naga pe pito re poli, pisa ga sape “Inanena nene pe na marena re poli. Inanena nene sa ga mrapa kiena ne Ntewa tai, vena kila meraravanen kiena urarena, a vena kila meraravanen kiena pupia puriukawaena naŕa mla pan inu Narina Ntewa.” Yesu pisa visena nene, sa naŕa kilia pa rui suri naŕa yoko yumāenia.

⁵ Yesu sinena si Mareta nene paŕisi amio luena na ve tokak a mēnela nene, a sinena mie la paŕisi, ana pe kan pog mesmes re na kilaen suri nene poli wa.

⁶ Sa nene, naga pe pa re ga poli, suŕa si legiena lua e yo nene naŕa wii nae Yortan lepas na vano.

⁷ Suŕa si sanene, ŕisi na pisa pan imimi nalogena lala, sape “Pogaga, tokusro sina ga teva si yo nae Yutea.”

⁸ Ana imimi mesitomāal ke yerkawa kiena le Yu lala e yo nene naŕa sinela kar Yesu paŕisi, ana memaraun vitoen

sina. Mepiun tania, mesape “?Navianena, sanape? Nanua ga naña tesike ma ne na le Yu la akilayon asape akoveñar ko, ana nanagane na osape teva si pula.”

⁹ Ana Yesu pisa pan imimi pisape “Kiau navisatamēena van amiu naga sanini. E legiena, kana aora nena lualima yam taaga pa lua, pupia mrae tegoli yo, kila sane yar kilia yal ruruia, tařatete lolor.

¹⁰ Ana yar naña yal li e yemalolo na kolemallo, naga yoko lolor ga, vanon yomerarava nene pe tegoli re si kiena mrapa poli.”

¹¹ Yesu pisa visena nene pan imimi, kana kinasia sape naga kilia yaloro ga woga ga ne, tařatete suri viowa tai vania vano tol pogos naña Ntewa ligand ruruia sape akilia aweñar naga. Ana miakolkol sina ga, sape “Kieta erau nene momalio rui. Ana nanagane na tevano na neviořege sina naga.”

¹² Ana imimi nalogena la pe memlogekilale re kinas nen visena nene po, ana mepisalupřar si Yesu, mesape “Suře, visae naga momalio, pogaga ne, yoko kilia loge wo sina ga ne.”

¹³ Mepisa sanene vanon mesitom ke mesape Yesu pisa ke sape Lasaros pa ruru ke ga, ana pere, Yesu pisa ke kana marena ne.

¹⁴ Ana nagane na Yesu pisa meraravan pan imimi narui, sape “Lasaros mare pa rui,

¹⁵ komin pogos naña naga mai, pe nesu re nemio la poli. Ana sanene na nepisu pogaga, a po mēna ga pan amiu, vanon sane kiena marena nene yoko imi ve sa pulmas tai van amiu, vena amiu akilia alelaga lelaga e inu. Pogaga, tevanon, tevisuia.”

¹⁶ Ana imimi nalogena la memaraun ke navaena wa, ana Tomřas naña apio sape Tomřas Kaora, pisa pan imimi sape “Amiu asumřalu, ita punu ga tevano. Kieta Suře sinenan sape va mare sanene, popon ita punu ga tevano, temare temio naga veraga.”

¹⁷ Ana imimi punu ga memial veraga mepano, mepa makate lavisin narin pulkumali naña Petani. Ana apisawal pa Yesu asape Lasaros, amligan tasnena

mono e pulu kilavaru legiena vari řaro rui.

¹⁸ Ana kumali naña Petani sike lavisin ga pupia kumali naña Yerusalem, torokin sane kilometa ve telu ga,

¹⁹ kila sane le Yu moki nae Yerusalem, pogos naña amloge marena nene, sinela miye Mareta amio Maria, ana apim vena atag amio la atagin naga naña kovio.

²⁰ Ana Mareta sike amio la nene, ana amligan visenania, asape Yesu pam sike pa garo ne e mrapa rui, ana naga sumřal pato talopania. Ana luena naña ve tokak, Maria, naga sumřa ga loyumřa, ana pe pa re vanua poli.

²¹ Ana Mareta pitomi pisu Yesu, pisa pania, sape “!Suře, visae ko na ovim ga e nini, mēnemimi nene tařatete kovio!

²² Ana in na nemlelaga pe sur korena ga naña mare, ana sur naña ko oviun vetan Ntewa, yoko naga tamřan ga van ko.”

²³ Ana Yesu pisa pania, sape “Mareta, yoko mēnemřa nene sumřal mal sina.”

²⁴ Ana Mareta pisatamēea, sape “Lelaga, nekilia ke ne, nekilia nesape naga yoko mal sina ga e pupia nasumřalena e legiena maro.”

²⁵ A Yesu pisa visena nene pania, sape “In na nepe mrapa na sumřalen sina, in na nepe purřes nen malena. Yar naña lelaga e inu, pe suri korena ga naña monar mare e yomarava nini, ana yoko mal sina ga.

²⁶ Yar naña tol malena nene, ana nalelagaena e inu teke e naga, naga tařatete visu si marena pogos tai. ?Mareta, ko na omlelaga sanene?”

²⁷ Naga pisatamēea, sape “O, Suře nemlelaga. Nemlelaga e ko, sane ko na Navisaarena, narina ne Ntewa, ko ko na naña siar nanua sumo sumo apisa ke sape yoko imi tamalia yeririna lala na yomerava nini.”

Yesu wamarana la mlalau

²⁸ Ana pogos naña Mareta pisa pa sanene pan Yesu, pa sina ga loyumřa, pavinin vinena naña Maria, pis malum ga pania, sape “Navianena naña! Pam pa rui, sike garo e mrapa wa, pisape visu ko kone wa.”

29 Maria mloge, suñalu veraga, sape vito visu Yesu,

30 nane e ga e mrapa naña Mareta pisu ga naga e nanagane, vanon naga pe pimi re loyuma e kumali poli wa.

31 Ana le Yu la naña asike loyuma amio la, apisu naña suñal pa vanua pito yuroro sanene na, asitom asape naga sinenan sape va tag sina e pulkilavaru, ana la mēna asuñalu, ataveve naga apano.

32 Ana Maria mial mā pito sanena, pimi tol e naña Yesu sike ea. Naga kira pisuia, pimi lavis puna, kuan mlor pito tano e mialana, tag pania, pisape “!Supe, visae ko na oimi ga e nini, mēnemimi nene taḡatete kovio ne!”

33 Ana naga tag mā sanene, le Yu taḡena la naña atavevea, lala mēna atagi. Ana pogos naña Yesu pisu pupia naloge viowaena kiena Maria la sanene, naga mēna mloge piowa, mnunu sur nene sane urmi manene e losinena,

34 naga piun petan la, sape “?Amiu amligan mono ke pe?”

La asape “Supe, oimi teva tevisuia.”

35 Yesu mloge sanene, ana tagena pimi e naga, wamarana la mlalau.

36 Pogos naña apisu naga tag sanene, la ḡas asape “!Lelaga naña ne, naga sinen si kiena erau nene paḡisi naña ne, kila sinena piowa na sinena piowa!”

37 Ana lala ḡasia, naviunena teke e kiela sitomena, asape “Yar naña nanua kila kilamara ḡala tai, kilamarana pimi po sina ga. ?Visae sinenania na, naga kilia kila naña kiena erau nene ve kovio re ga, a?”

Yesu pioḡege si Lasaros petan marena

38 Ana Yesu mial amio pupia sineyeena, amio Maria lala apa akate e pulkilavaru naña amligan tasnena ne Lasaros mono ke ea. Pulkilavaru nene naga pe puluve, naña amligan pupia kilavaru tai mono ke pulusia.

39 Ana Yesu pisape akuslua pupia kilavaru nene.

Ana vinena taḡena nene Mareta mloge naña Yesu sape akuslua kilavaru, ḡisi na sape visaluḡaria, pisa pania, sape “Supe, piowa naña tekila sanene, vanon naga

mare legiena vari ḡaro pa rui, yoko ponos kona va ḡisi ne.”

40 Ana Yesu pisatamē pania, sape “? E, ko na pe ositomāl re si kiau visena naña nepisa pan ko rui? In na nesape sa ko na olelaga ga, ovisu namareraena na urarena kiena ne Ntewa naga yumaē.”

41 Pisi na la akila ga, akuslua pupia kilavaru, ana Yesu kira pa metava, mlen, sape “Ata, nepisa siḡa pan ko keviu naña ko na okekaran nalogeen kiau naviunena nini.

42 Nekilia sane sur ya naña visae in ga taaga nesape neviun tan ko, yoko ko ologe ga. Ana suri naña neviun tan ko nagane na, nepiunia e maran la ne asuñal asike nini, vena la mēna akilia aloge. Ana visae avisu sane ko ovisatamē van inu sa naña nepiunia, kilia iilala alelaga sane pe lelaga ko na omligan inu nepitom e yomarava nini.”

43 Ana pogos naña Yesu mlen pae sane na, naga kii mārera sanene pano, pisape “Lasaros, omolue ovim.”

44 Ana amilan naña yar mare suñalu pimi vanua, ḡarar kulmrae la naña amlular naga ea, tamalele ke e limana la amio lana a ḡarina asike wa. Ana Yesu pisa pan la sape “Pogaga, awar plan kulmrae la nene vetania, vena naga kilia yal ruru sina ga.” Pisi na akila, ana Lasaros mal ruru ga sike si amio la.

Pupia kumali tamān sape monar aweḡar Yesu mare

Matiu 26:1-5; Mak 14:1-2; Luk 22:1-2

45 Ana le Yu la moki naña ataveve Maria apim e pulkilavaru nene, pogos naña apisu Yesu kila Lasaros mal si e marena sanene na, amlalaga nena e naga.

46 Ana lala ḡasia amon lelagaena, aḡasuḡe la sina ga, apa si pu Varasi lala, apisawal pan la sur naña Yesu miyumaenia.

47 A pogos naña amloge pe akekaran re nena ga, ana lala amio yerkawa na yar wa lala, apio mēna lala taḡena na pupia kumali kiena le Yu lala apim lele taaga asunyua. Ana pogos naña apim pae lele taaga, apisawal pan la asape “?Yoko tekila

kan yar nene narui? Naga kila ke pupia kile la pañisi e maran kieta yeririna lala.

⁴⁸ Visae ve tevisawo re naga, yoko kila mña sanene vano-o ve tai re naña ve lelaga re e naga, yoko ure la punu ga ataveve ne. Ana visae la na mara nae Rom avisu yar nene kila ke sape imi ve pupia nasumonena tai sanene, yoko sinela kar ita le Yu la punu ga. Yoko akilia aimi akila mara amio ita vano-o akila kare kieta pegas punu ga amio awe plan kieta Yumña Wa Mana Ntewa.”

⁴⁹ Apisa ke sanene na, kiela pupia nasumonena Kaeñas, naña e kas nene na naga pñarar kia naña Parin Yaru Wa, pisa pan la, sape “?E, vanon ya ne kiamiu sitomena la plas ga sanene, naña amiu amninue ga sane yoko tekila ya ne van yar nene?”

⁵⁰ Sur ya na po pan amiu? Pogaga naña yar taaga ga nene kila ita make ga tokovio, pona popon naga taaga mare vena tamalia kieta pegasia ita punu ga?”

⁵¹ Pogos naña pisa visena nene, naga mape pisawal ke sitomena tai naña kiena ga. Ntewa kila naga pñarar yumñaena na pñarin yaru wa e pogos nene, ana Ntewa ke narui mligan mña visena nene e kiena sitomena, vena visawalen visena lelaga tai, sape Yesu monar mare vena tamaliaen yeririna punu ga.

⁵² Naga pe kilia re poli, a pisa ke sape siraunia, pogos naña Yesu mare, naga pe maren re ga pegas kiena ne le Yu ga la nene poli, ana kiena marena panon mña narina ne Ntewa tañena lala naña asike mña e purvanua tañena lala, ve naurepran laena punu ga aim ave na mratava taaga ga.

⁵³ Ana e pogos nene, Kaeñas pisawal visena nene, pure sitomen kiena ne yerkawa la punu ga kiena ne le Yu la asape Yesu monar mare ga. Ana siar e pogos nene, apisayu ke silaga, asape akilia akila ve sanape.

⁵⁴ Ana kiela sitomena nene kila Yesu mialorotete sina likan yeririna lala e yo nae Yutea, naga pñere plan imimi, mepa mesike e narin kumali tai, kiena kia

Ipraim, naña sike perina, lavisin yokorena.

Lavisin pog na pñapagena maro na Sitomñalen Natamaliaen kiena ne Yesu

⁵⁵ Ana lavisin pog na pñapagena kiena le Yu la nene, Pañagena Nasitomñalen Natamaliaena. Ana le Yu la naña asike e yo la ne, amligan ke kiela yo lala, apa ke ma Yerusalem, asape ava e Yumña Wa Mana ne Ntewa, akila kuñapaena naikikena e marana ne Ntewa, sumon naña pñapagena siaria.

⁵⁶ Ana pogos naña yeririna la apa ke metava e Yumña Wa, asike akale ke Yesu. Akale pano amña re naga poli, ana la apiuyun ke petan la, asape “?E, amiu asitom sanape? ?Yoko naga vim kate e pñapagena nini, po ve vim re?”

⁵⁷ Ana pñarin yar wa la amio Varasi lala, lala mña asitom ke asape pona Yesu kate li e aora nene yo. Ana la apisaar mñarera asape visae avisu Yesu sike lele tai, monar aligan visena va van la vena aim na atararia.

12

¹ Ana pogos naña Pañagena Nasitomñalen Natamaliaena nene pere ke ga wa, legiena orai sike ga wa, ana imimi memio Yesu mepa tol si narin pulkumali nañani Petani. Ana mepa makate si e umña mña ne naga naña Yesu kilamalia sina ga pe piavi re poli, naña Lasaros.

² Mesumña memio la pano-o, la nene asape akila kinanen tai akan amio Yesu. Ana pogos naña akila ruru punu pa sur lala, imimi memio Yesu mepim metotano, a Lasaros mña totano amio imimi, ana vinena naña Mareta naga pñar ke kamimi kinanena pimi.

³ Ana vinena ne Lasaros tañena naña Maria, naga mña sumña ga, naga kus pupia pias na ponotaninu pimi, ponotaninu nene apio asape nat, naga ponotaninu tai naña kana maran kilavaru pa metava pañisi. Ana kus pimi lavis pu Yesu, taronia miyumuvan la Yesu ea. Pisi na Maria tar pupia viluna piavi nene, miyumuvan sina ga la Yesu, ana pe piavi re poli,

ponotaninu naþa ne ponos miyere make loyuma e naþa asike e ne.

⁴ Ana e pogos nene, nalogena kiena ne Yesu naþa yoko siraunia wilwilin wania, Sutas nae Kariot, naga mēna pisu ke sur nene.

⁵ Naga pisape “?Vanon ya ne ve awilwilin re ga pupia ponotaninu nene? Visae sanene, akilia ataulu pupia varu tai, sane kilavaru naþa yaru tai tauluia e kiena yumaena na kas wetelu tai, ana akilia ataman vena iilaen la naþa pe kiela sur la poli. !Akila kare ga ne!”

⁶ Naga pisa sanene, ana naga pe sitomāl re yar la naþa pe kiela sur re la poli. Naga pisa vanon naga pisuar ke kiamimi karo na varu, a pinaun la ke, kan ke kiamimi varu lala, a naga sitom manene laa varu na ponotaninu nene.

⁷ Ana Yesu pisatame e sur naþa Sutas pisa, sape “Ei, piowa naþa ko ovisa kare vineta sanene. Naga kila sanene pan inu vanon naga sitom ke sape legiena naþa yoko asinwo inu pimi make lavis narui.

⁸ Yoko yar la naþa ve kiela sur re la asulue ga amio amiu, vena amiu aiila la sanene, ana in na pe pe nasulueen re nemio amiu poli. Sanene, sur nene naþa naga kila pan inu naga po paþisi.”

⁹ Ana pe piavi re nena ga, visena pato tol lala naþa aþarpiran la ke e þaþagena garo Yerusalem, sape nagane na Yesu pam sike Petani rui. Þisi na lala apava ke asape avisuia, a pe naga re ga poli, asape avisu mēna Lasaros, naþa Yesu kila naga mal si rui.

¹⁰⁻¹¹ Yeririna la apa apisu ke Lasaros sanene, a sur naþa Yesu miyumaen pania kila naþa lala moki, pano tol li na sumonena laþas kiena le Yu lala, aþure petan kiela nasumonena taþena lala, apim amlelaga e Yesu narui. Ana yer keviu kiena yar wa lala naþa asike ne apisayu sur nene, apiranaria asape akale mrapa naþa awe moþar Lasaros mare.

Yesu pimi tol yo naþa Yerusalem

Matiu 21:1-11; Mak 11:1-11; Luk 19:28-40

¹² Lasaros lala akila pae kinanena kana ne Yesu þisi, ana e legiena taþena sina, visena pato tol pupia þina la naþa apam

asike Yerusalem e þaþagena, asape Yesu naga pimi ke rui, vena vim loyuma e pupia kumali nene.

¹³ Ana yeririna la amloge, asumāl amial apa ate lumamēla lala, amiyal apano vena avitawe naga mrapa.

Asape akila sanene vania vena naga vim ve sane kiela þarin suþe, ana la amial apa sanene, apioyon ke sanini apisape, “!Pona we-e po! Teieluar naga, kieta þarin suþe viu nae Israel!

!Ntewa na mava ovisa ruru naga naþa pimi e kioþa kia!” Yauena 118:26

¹⁴ Ana Yesu mial pimi ke, naga kila naþa aþure narin togki tai pimi puna, pa totano ea mial pimi. Sur nene naþa naga kila taveve ruru ga visena tai na Visena Wa naþa pisape.

¹⁵ “Amiu le Yerusalem lala, amiu ve amarau re sina,

Amiu avisuia, nanagane na kiamiu þarin suþe naga pimi ke pun amiu narui.

Naga kus ke ga narin ninus nen togki tai, pa totano ea pimi ke.” Sek 9:9

¹⁶ Ana e pogos nene, imimi nalogena kiena ne Yesu lala pe mesitomāl re visena nene poli, a siraunia, pogos naþa pa pae ma e peni, imimi mepisu kilale ga na wa sane visena marua na nanua ne naga pisayu naga mesmes, ana mepisu sane naga kila sur punu ga mesmesu ga sa naþa Visena Wa lala apisa nanua sumo asape yoko Navisaarena yumaenia.

¹⁷ Ana þisi na pupia þina nene kila ke naworworena pa Yesu sanene na. Lala moki la naþa nakoneva asike amio naga pogos naþa pio Lasaros māl si petan marena, ana la apa apisawal pupia kile nene pan yeririna taþena lala,

¹⁸ ana pogos naþa lala amloge sur la naþa Yesu miyumaenia, sinelan asape avisuia, ana la apim vena ava avisuia.

¹⁹ Ana lala punu ga nene, pupia þina pa tai narui, ana pogos naþa le Varasi la apisuia, amloge piowa, asilin þarila, apisape “Toþaryon yar nene pano-o piowa ga. Naga taulu ita punu ga, pure yomarava wetelu nene apa ataveve naga rui.”

Le Krik laþasia asape avisu Yesu

20 Ana e yeririna moki la naþa ke metava ma Yerusalem vena alotun Ntewa e þaþagena nene, lala þasia pe ape le Yu re poli, lala le Krik la naþa apim amlelaga e Ntewa sane le Yu lala.

21 Ana pogos naþa amloge manene laa kia kiena ne Yesu, asape avisu naga. Apa akale, akirawal kiena nalogena naþa Pilip nae Petsaeta ma Kalele, ana apiun Yesu tania.

22 Ana Pilip pa pisawal pa Antru, þisi na lalua apa apisawal pa Yesu.

23 Ana pogos naþa Yesu mloge sape la naþa pe ape le Yu re la poli asape avisuia, naga pisawal sape “Nanagane na pe pogos mesmesu vena Ntewa kila kiau kia, inu Narina ne Yeririna, va metava.

24 Nepisa pe lelaga pan amiu, sane visae kurus tai, visae ve amapla re, yoko naga taaga to korena ga toña sanene. Ana visae amapla, yoko menun nena ga, ana siraunia kilia war si mras ve moki.

25 “Sanene, naga naþa kekaran manene laa malena kiena e yomarava nini, taulu naþa kekaran inu, yoko kilaluia, a naga naþa pe sitom manene re naga poli, yoko naga sumã ga woga ga vano-o tol malena viu naþa pe luas re poli.

26 “Yere Yu pona yere Krik naþa sape sinenan kiau yuãaena, sinenan sape ilanua, naga monar taveve in lue ga. Ana pogos naþa naga taveve inu ke sanene, yoko e lele ya naþa sa neva nesike ea, a naga mēna kilia amio inu. Yar naþa pe yar na kiau yuãaena, yoko Ntewa la kia wo vania.”

Yesu sunyu kana marena

27 Ana Yesu siar sitomveve ke naþa yoko ve ve piavi re na, monar mare, ana mloge urmi paþisi e naga. Pisi na sape “Nanagane na, nemloge sane sitomena la moki e losineu. ?Yoko nevisa ya ne va kau Ata? ?Popon nelen, neviun vetania, nesape: Ata, awis otarlua inu e aora mārera na loge viowaena nene? Pona piowa ga naþa nevisa sanene, vanon in na nepim e yomarava nini vanon nenaga yuãaena ne nanene.

28 Peraga, popon nevisa ve sa ga nene, nevisave: Ata, awis okila kioña kia vim ve keviu kome sur la naþa sa akila van inu.”

Ana pogos naþa Yesu pisa pa visena nene, pulgo tai metava ma e peni pis pitomi tano, pisape “Inu na nekila ke kiau kia pa metava kom ga e ko rui, a yoko nekila ke sina ga na wa.”

29 Ana þina la naþa asu ke lavis ga amloge maagena na pulgo nene, ana þasia asape polilu ga tai, la þas asape “Peraga, navisi ga ta ne pisi ke pania.”

30 Ana Yesu pisa pan la sape “Pulgona naþa temloge ne, naga pe pitomi re sape in na neloge poli, a pitomin amiu, vena amiu akilia sane inu nepimi pe.

31 Monar ve sanene vanon nagane na, pe pog na liþereen yeririna na yomarava narui, pe pog na kovenluaen þarin suþe na yomarava narui naþa Yermare.

32 Vena nekila yuãaena nene, monar netamalele metava e laki torovia, ana pogos naþa nemēke metava sanene, nekilia noure yeririna punu ga aim pun inu.”

33 Ana visena kiena ne Yesu, naga pisa pe nakilaen imi merarava van la sane kiena marena pe marena tai naþa ve sanape.

34 Ana pogos naþa þina la amloge, asape “Memloge ke naþa apuloyu ke Visena Wa, pisa ke sape Navisaarena naga mal lue ga, taþatete mare pogos tai. ?Ana sanape naþa ko na opisa ke osape yoko atelan Narin Yeririna metava vena mare? ?Pona ko na opisa ke ga taþena tai yo? Narin Yeririna ya naþa opisa ke ne, naþa yoko ve sanene vania?”

35 Ana Yesu pisatarñe pan la, pisape “Inu na nepe yomerarava kiena ne Ntewa, a nekilia nesuãa si nemio amiu yam ve plas ga. Ana pogos naþa nesike nemio amiu, popon ayal e kiau yomerarava nena, visae peraga, yoko pupumalko kalo make amiu, a yar naþa sape yali, taþatete visuluþar si kiena mrapa.

36 Pogos naþa inu naþa nepe yomerarava nene nesike ke nemio amiu wa, popon alelaga e inu, vena amiu mēna

akilia aim ave yeririna na yomerarava lala.”

Ana pogos naña Yesu pisa pa visena la nene, naga mligan la asike, petan la pa tapolou e lele tai naña tařatete aimin sina naga.

Le Israel la pe sinelan re alelaga e Yesu poli

³⁷ Yesu miyuńaen pupia kile la moki e marala rui, ana pe suri korena, lala pe sinelan re asape alelaga e naga poli.

³⁸ Ana kiela řelaga na sanene, akila ke sina ga sa ga naña le Yu marua la nasumo akila e pogos kiena ne yermarua Aisea, naña pisayu e visena la lua naña pisawalia. Nasumo pisa sanene, pisape

“Ntewa na mava, imimi mepisasawal ke pan la, ana lala pe akekaran re asape alelaga poli, a ko ko na ok-ila meraravan kiońa puriukawaena na lumońa van la, ana lala a ne pisuluřaria? Pe ta re poli.” Ais 51:1

³⁹ Ana na luania, naga mńena pisa sanapen lala amon lelagaena e Yesu, pisa sanini, pisape

⁴⁰ *“Ntewa řaryon la pano-o peraga, řisi na kila ga kilamarala la pimi pe kilamara řala, kila losinela la pimi mńarera laa pařisi.*

Pisi na kilamarala la tařatete si avisu ruru suria, po losinela la aninuluřar suria.

Visae pere, yoko la avilon la ařasuře la aim pa panu rui, vena nekila ruru kiela malena la.” Ais 6:10

⁴¹ Ana visena kiena Aisea nene pimi e naga, siraun naña naga pisu naurarena kiena Navisaarena loyuńa e Yuńa Wa Mana ne Ntewa, a nanagane na tepisu sane pisayu ga Yesu lelaga, amio lala naña e kiena pogosia.

⁴² Ana sa naña visena la nene pisa, lala moki pe amlelaga re e Yesu poli, ana řasia amlelaga, pa tol mńena kiela nasumonena lařasia. Na nene naga po, ana sur taaga naga piowa, akilawan ke ga kiela nalelagaena, vanon amaraun Varasi lala, amaraun asape sa akoven plan la laea vetan kiela yuńa na lotena.

⁴³ Kiela marauena nene, naga sane lala pe asitom re si nakilaena vena yoko Ntewa kekaran la vanonia, ana lala asitom ke ga keviu sane yar tařena ga la avisu la ve sanape.

⁴⁴ Ana Yesu pisawal pupia visena maro tai e maran kiena yeririna lala, pisape “Naga naña mlelaga e inu, pe mlelaga re ga e inu poli, ana mlelaga e imimi lua naga naña mligan inu nepimi,

⁴⁵ a naga naña pisu nu ke, sa ga naña pisu ke mńena naga.

⁴⁶ In na nepim e yomarava nini, sane kana yomerarava, na kilaen yar ai naña lelaga e inu, yoko ve su re si e yemalolo.

⁴⁷⁻⁴⁸ Ana visae la řasia aloge kiau visena, ana pe amlogear re poli, pona visae lařasia akovenwanu amon logeen kiau navianena lala, la nene yoko akus kiela naliřereena e legiena maro. E pogos nene, ve in re naña nesuńalu neliřere la, vanon in na pe nepimin re naliřereen re yeririna na yomarava nini poli, nepimin natamaliaena. Ana sur naña liřerela, nane kiau visena la naña nepisa ke pan la pogos naña nesike nemio la nagane narui.

⁴⁹ Kiau visena kilia kila sanini, vanon pogos naña nepisa plan ke visena la nene, in na pe nepis re ga e kiau kia in ga taaga poli, ana nepis ke e kia kiena ne Ata naña mligan inu nepitom tano. Naga ga pisa plan ruru pan inu sur la punu ga naña pe kiau na visaplanena,

⁵⁰ ana sanene, silaga in na nepisa ke sur punu ga naña Ata sinenan pisape nevisa. A kiena navisaluaena punu ga nene, nekilia sane malena wo naña pe luas re e poli, sike ga e lala.”

13

Peni na luas nen malena kiena Yesu, ana naga kevan lana ne kiena nalogenala lala

¹ Nanagane na, sur la punu ga akila ruru pa rui, naña peni ga na pupia legiena naña Pařagena na Sitońalen na Tamaliaena siaria. Ana Yesu pisu kilale ke pa rui sane kiena pog pimi ke narui, legiena ga na peni pe pog naña monar ligan si yomarava nini wasuře sina va

puna ne arimana. Pimi tol pogos nene, e mrapa la moki, naga kila po pañisi pan la naña puna naña asike pa e yomarava nini, sitom la pañisi, a nanagane pe pog na sitom laen va ve keviu laa sane, vano-o tol naña kiena malena kovio vanon la.

² Ana naga sike amio imimi kiena nalogena lala e yo ma metava, kila ke kana kinanena maro amio imimi. A Sutas naña nae Kariot ne, narina ne yermarua Saemon, naga mēna sike ke amio imimi e pogos nene, naga sike amio kiena sitomena viowa na wilwilinwanen Yesu, komin naña Yermare mligan teke e kiena sitomena rui.

³ Ana mekinana mā pano-o p̄isi na Yesu naga sitomveve ke sanape naña nanua sumo, petan ma puna Ntewa pitomi tano, a sanape na Ntewa mligan sur punu ga sike e limana, a sanape naña monar tauluia, siraunia naga kilia vetan si yomarava nini va sina puna.

⁴ Naga mloge pupia sineyeena e losinena vanon imimi kiena nalogena lala, sinenan sape kila kile tai e sineyeena nene van imimi, vena imimi mēna ga mekilia mekila van imimi. Ana sumālu, pa miyenlua māna kulkota, pitavin tawol tai,

⁵ pio wii mēne pialo tai, kus pimi, siar kevan lamimi lala, kila naga sane pe yar na yuñae kiamimiena tai. Kevan mā lamimi la sanene pano-o, miyumuvan la e tawol naña pitavin ke ne,

⁶ pano-o pimi tol lana ne Saemon Pita. Ana Pita pisu mā naña naga pimi tolia, pisa pania, sape “?Suñe, yar nene? Ko na ope yerkaawa pañisi wa, pe mesmes re naña ko na okevan lau sanene poli.”

⁷ Ana Yesu pisatamēna, sape “Pita, sur na nekila ke ne, nanagane na pe opisus kilale re poli wa. Ana siraunia, ko na okilia ovisu kilale ruru ga na wa.”

⁸ Ana Pita sinenan sape kilawo Yesu wa, sape “Peraga Suñe, tañatete ga netamān okevan lau.”

Ana Yesu pisape “Visae ve nekevan ruru ko re, pe kiau sur re tai teke e ko poli.”

⁹ Ana pogos naña Pita mloge nene, kiena sitomena pe tañena narui, pisa pa Yesu sape “!Suñe, visae ve sanene, netamān ga, sineun nesape okee inu, ane ve lau re ga, okee inu punu ga va tol mēna lumāu lala amio p̄aruu!”

¹⁰ Ana Yesu pisatamēna pa Pita e narin p̄akaiwa tai naña pisayu p̄elaga naña yaru mekiki e kiena mlamulena viowa lala. Naga sape “Yar naña kulu mare ga na wa, yepena punu ga merarava rui. Ana visae lana ve namname sina, ana tañatete naga va kulu punu sina ga, yoko naga kevan ga lana. Ana nepisu sane amiu sanene narui. Amiu punu ga amerarava ruru pa rui, a amiu yar ga tai naga pe sa re nene poli, naga pe namname ga momā ga.”

¹¹ Ana Yesu pisa sanene, sape pe imimi punu re memerarava poli, vanon naga kilia pa rui imimi yar tai naña yoko ve yam ve piavi re na naga wilwilinwan naga.

¹² Ana Yesu kevan lana Pita amio imimi tañena lala pano-o p̄isi, pa miyen sina ga māna kulkota, totano piun tan imimi, pisape “?Amiu apisuluñar ke yuñae naña nekila pan amiu ne, po peraga?”

¹³ Sur nene naga sanini. Pogos naña amiu apio inu ke asape nepe Navianena pona nepe Suñe, amiu na apisa pe lelaga ga.

¹⁴ Ana visae apisu naña inu kiamiu Navianena po kiamiu Suñe nekevan lamiu, popon amiu mēna akekevan ke lamiu lala, amiu akilakila p̄elaga wo la sanene van amiu silaga.

¹⁵ In na nekila sanene pan amiu, vena amiu na yoko ataveve maran taaga e legiena la naña pimi ke ne, naña amiu ga akila si van amiu sane in na nekila pa pan amiu rui.

¹⁶ Nepisa pe lelaga pan amiu, sane yar na yuñae naga tañatete to metavan kiena yerkaawa, po yar na waren visena naga ve to re metavan naga naña mligan naga pano.

¹⁷ Ana visae amiu avisu sane kiau visena la nene pe lelaga, a visae amiu akila ke sur la naña nepisa, yoko pupia navisa ruruena vim van amiu sirau.”

Yesu pisawal sape yoko Yutas wilwilin wan naga

Matiu 26:22-25; Mak 14:17-21; Luk 22:21-23

¹⁸ Ana Yesu pisape “Nepisa sanene, a pe nepisa amiu punu re poli, komin ita yar ga tai naga sike ne, naña naga kiena sitomena pa pe tañena pa rui. Lelaga, in na nekilia ruru amiu punu ga naña nekilologia amiu, ana nekilia nesape amiu yar tai yoko kila mesmes ga sa naña Visena Wa pisawal nanua rui, naña pisa sanini, sape

‘Naga naña imimi lua makan pae kau kilaparavi,

nanagane na naga tarlua pa lana rui vena vielua inu!’ *Yauena 41:9*

¹⁹ “Sur nene naga piowa ga, ana nesape nevisawal van amiu sumo wa, ana pogos naña avisu sina ga ve yam piavi re na, akilia alelaga asape inu na lelaga, in na naga naña mon lue.

²⁰ Nepisa pe lelaga pan amiu, yar naña porworun yar na waren kiau visena naña nemligan naga piñasu, naga sa naña porworun inu ke ne, a naga naña porworun in sanene, naga sa naña porworun ke naga naña mligan inu nepimi.”

²¹ Yesu naga pisa pae visena nene pan imimi, ana siar mloge naña sinena pulen naurmiena lala, pano-o pisawal meraravan ga e maramimi, pisape “Lelaga nepisa pan amiu, yoko amiu yar tai wilwilinwan inu.”

²² Ana pogos naña naga pisa sanene, imimi memilania, mesuña metamaren imimi ke sina ga, memninue ga mesape naga pisa ke imimi a ne.

²³ Ana e pog nene, inu Yoane, sane nalogena naña Yesu sinena sii inu pañisi, inu netotano ke ga lavisin naga,

²⁴ ñisi na Saemon Pita kila limana pan inu, sape “Wolai, ko na oviunli ga tania, ovisave naga pisa ke ai.”

²⁵ Siraunia nepa la lavisu tekaki ga, nekian ñaruu pa laa lavis puna ne Yesu, nepiunlili tania, nesape “?Suñe, ko opisa ke imimi ai?”

²⁶ Ana Yesu pisatamñea, sape “Nepisa ke ga naga naña narin kinakina kilaparavi nene, nowuton vito e mñata pursi, ana nekian vania.” Ana naga kila sa ga naña naga pisa, mla kilaparavi tai, kian pito e mñamimi pursi, ana mlalua mla pan Sutas, narina ne yermarua Saemon nae Kariot.

²⁷ Pisi na Sutas mla kania, ana veraga ga, Yermare pimi pa loyuna e naga. Pisi na Yesu pisa pania, sape “Pogaga, sur naña pe kionña nakilaena, oto vilaga okilalia wa.”

²⁸ Ana e imimi tañena la naña metotano ke e kinanena nene memio Yesu e pog nene, pe imimi yar ta kilia re poli, sane vanon ya ne Yesu pisa visena nene pan Sutas.

²⁹ Imimi ñasia asitom amape vanon Sutas naga pisuar ke kiamimi karo, ana Yesu miila vena va ul kamimi kinanena yo, pona va la kilavaru tai van la naña pe kiela sur re poli, pona sur tai ne sanene.

³⁰ Ana Sutas naga kilia ruru ga sur ya naña Yesu pisa ke pania, ana veraga ga suñalu pa si vanua, naña sane yemalolo pa rui.

Navisaluaena viu na sinesiena

Matiu 26:31-35; Mak 14:27-31; Luk 22:31-34

³¹ Ana pogos naña Sutas pa pae vanua, Yesu siar pian imimi ke sina ga e sur la moki. Naga pisa pan imimi, sape “Nanagane na pe pog na naurarena kiena ne Narin Yeririna vim kate, nanagane na pe pog naña yoko naga kila naurarena kiena ne Ntewa vim ve keviu laa sane.

³² Ana sur ya naña yoko naga yunñaenia, kila kia kiena ne Ntewa va metava, siraun naga nene, ve ve viavi manene re, yoko Ntewa visirlua sina inu narina, kila mña kiau kia va metava.

³³ “Naruu lala, narin aora ga teke na, naña nekilia nesike nemio amiu wa, lavis ga naña monar neligan amiu. Pogos naña amiu avisu in na nevetan amiu pae na, yoko asape akalenukia ko laa ne, ana sur naña nepisa pan yerikawa kiena ita le Yu tañena lala, nevisa mña si van amiu,

sane lele naña in na yoko neva ea, amiu tařatete asiraunu aim e nanagane.

³⁴ Ana nanagane nesape nela si navisaluaena viu tai van amiu, sane amiu monar sinemiu sisii manene amiu, va laa sanene ve sa ga naña sineu sii amiu.

³⁵ Ana visae sinemiu sisii amiu ke sanene, naga nene pe mrapa nakilaen yeririna nae yomarava la avisu kilia sane amiu ape kiau nalogena kemua la pe lelaga.”

³⁶ Yesu pisa pae pupia visena nene pan imimi narui, ana Saemon Pita sitoñal ke sina ga naña Yesu sape ligan imimi, naga piunia sape “Ana Suře, ko na yoko okom pe?”

Ana Yesu pisatañea, sape “In na nepa ke e lele tai naña amiu tařatete asiraun inu aim e na wa, ana akilia ga aim e sirau.”

³⁷ Ana Pita mloge, piun sina ga, pisape “Suře, sanape in na tařatete neim nemio ko ke nanagane? In na nekekarana ga netañan kiau malena vanon ko nanagane.”

³⁸ Ana Yesu pisa pania, sape “Ko opisa osape otañan ga kioña malena vanon inu? Pogaga, ana nevisa ve lelaga van ko, řane ga ne kolemallo, pogos naña lakaporo ve kokoreko re wa, ana ko na oviro inu yam ve telu pa narui osape pe ope kiau re poli.”

14

Yesu mla visena na kila luřeluřeena pan kiena nalogena lala vena ve aloge manene re viowa

¹ Ana Yesu pisa naña imimi nalogena la memloge piowa naña naga monar vetan imimi, řisi na pisa pan imimi, sape “Amiu ve akila re naña sinemiu viowa manene sanene. Ařasine Ntewa rui, ana monar awasine in ñena ga.

² Sa naña nepisa pa řa rui, neva nekila ruru lelemiu metava ma puna ne kau Ata, ana metava ma ñana yuña, lele moki sike ea torokin amiu punu ga. Visae ve ve lelaga re, ve nevisa re van amiu.

³ Neva nekila ruru lelemiu nene, ana siraunia, nowasuře sina, netom tanon amiu, noure amiu avam punu, asulue ga amio inu e lele naña yoko nesike ea.

⁴ Ana mrapa naña na vaen tol lele naña nepa ke ea, amiu akilia pa rui.”

⁵ Ana Tomās piun petania, pisape “Suře, imimi memninue ga lele naña ko opisa ke osape ova ea, ana sanape ne yoko mekilia mrapa na vaen ea?”

⁶ Ana Yesu pisape “In na nepe purřes nen mrapa, in na nepe purřes nen lalagaena, in na nepe purřes nen malena. Pe yar re tai kilia va ma puna ne Ata sa ve kom re pun inu.

⁷ Visae amiu apisu kilale inu, asape in na nepe ai, naga sa ga naña apisu kilale ñena Ata. Ana nanagane, amiu apisu ke pa naga narui, sane siar na ne řane, amiu akilia naga ve lelaga.”

⁸ Ana Pilip piun petania, sape “Suře, sur ne naga ke nene narui naña sinemiminia, mesape mevisu Arimata. Awis, sa ko na ovisa lologia li naga van imimi, yoko mekekarana vařisi.”

⁹ Ana Yesu pisatañea, pisape “?Pilip, nesike nemio amiu tol kas via rui, ana ko pe opisu kilale ruru re in poli wa? Sa naña nepisa ke pa rui, yar naña pisa inu, naga sa naña pisa ke pa Ata narui. ? Ana sanape na ko opiun ke sina ga osape nevisa lologia li Ata nae ma e peni van amiu?”

¹⁰ ?Ko na omlelaga sane inu, in na e Ata, a Ata e inu, po ko na pe omlelaga re e poli? Visena la naña nepisa ke pan amiu la, pe sa re naña inu ga taaga ne nepis ke e kiau kia poli, ana Ata naña teke e inu naga kila ke kiena yuñaena la nene pimi řarpooyo e inu.

¹¹ Popon amiu alelaga e sur la naña nepisa, sane in na e Ata, a Ata na e inu. Visae ve alelaga re e inu vanon ga kiau visena la nene, monar alelaga ga vanon yuñaena la naña amiu apisu in na nekila ke pa rui.

¹² “Nepisa pe lelaga pan amiu, sane yar naña sa lelaga e inu, yoko naga ñena kilia kila yuñaena la sane in na nemiyuñaen ke ne. Yoko neligan si yo neva si puna ne Ata, ana siraunia neligan Ninuna vitomi, ana naga kilia kila kile kerkeviu la sanene, taulu naña amiu apisu pa rui.

¹³ Nepisaar pan amiu, sane sur ya ne aviunia e kiau kia, yoko in na nekila ga van amiu. Yoko nekila ga ve sanene vam amiu, vena kilaen kia kiena ne Ata naga kilia va laa metava ve keviu likan amiu, e yum̃aena la naṓa inu, sane narina, nemiyum̃aenia.

¹⁴ Sanene na, sur ya naṓa aviun tan inu, yoko nekila van amiu.”

Yesu pisaar Ninuna Wa pan la

¹⁵ Ana Yesu pisa m̃ena pan imimi, pisape “Visae amiu sinemiu sii inu pe lelaga, monar auarar ruru kiau navisaluaena lala.

¹⁶ Yoko in na ve nesu re si nemio amiu, ana yoko neviun tan Ata vena ligan yar taṓena tai vim kus leleu vena iila amiu. Naga naṓa yoko imi, yoko sulue ga amio amiu,

¹⁷ naga pe Ninuna na visawalen visena lelaga. Yeririna na yemalolo na yomarava nini taṓatete atol naga, vanon taṓatete akilia avisu kilale naga, pe akilia re nena, ana yoko amiu akilia ruru naga vanon naga ke narui naṓa amio amiu nanagane, a yoko sike lue ga e amiu.

¹⁸ “Kiau nalogena lala, taṓatete neligan kare amiu naṓa asum̃a sane ninuyu ga la poli. Peraga, yoko nowasuṓe si neimin amiu.

¹⁹ Narin aora teke ga wa, pe piavi re nena, yoko yeririna na yomarava nini taṓatete avisu in sina. Ana amiu ga yoko avisu naṓa in na nemal sina ga, ana vanon naṓa nemal, amiu m̃ena yoko amal.

²⁰ E legiena nene naṓa avisunu nemal sina, amiu akilia sane in na e Ata, a amiu e inu, a in na e amiu.

²¹ Naga naṓa sinena sii inu pe lelaga, naga pe naga naṓa p̃uarar ruru kiau navisaluaena lala a mlogear la. Naga naṓa sinena sii inu sanene, yoko Ata sinena siia, amio in m̃ena sineu siia, nakekaten ke naga vena nekila naga kilia inu laa sane.”

²² Ana imimi nalogena tai, naṓa Yutas taṓena, pe naga re naṓa nae Kariot poli, piun tan Yesu, sape “Ana Suṓe, osape oim okekaten imimi, ana yoko okila e mrapa

na sanape naṓa yoko yeririna taṓena la nae yomarava taṓatete avisu kilia?”

²³ Ana Yesu pisatam̃ea, pisape “Visae yar sinena sii inu, yoko uarar ruru kiau visena lala, ana yoko Ata sinena sii naga. A yoko imimi lua meim puna, mekila m̃amimi um̃a memio naga e kiena malena, ana yoko taṓatete ve sanene va la naṓa pe amlelaga re poli.

²⁴ Ana yar naṓa pe sinena sii in re poli, naga taṓatete logear ruru kiau visena lala. Naga nene navisatam̃eena na kiamiu naviunena nene, ana e visena naṓa amiu amloge ga nagane, pe pe kiau visena re nene poli, naga pe visena kiena ne Ata naṓa mliganu nepitom e nini.”

²⁵ Ana Yesu pisape “Pogos naṓa nesike nemio amiu wa, in na nepisa ke sur la moki sanini pan amiu rui.

²⁶ Ana pogos naṓa sa nevano, yoko Ata ligan Ninuna na iilaena vitomi, ana naga yoko kus leleu, vian amiu e sur punu ga, ana ligan nasitom̃alena e kiau visena la punu ga e kiamiu sitomena lala.

²⁷ In na nevano, ana neligan sum̃arena sike amio amiu. Sum̃arena kiau nene pe sum̃are nowo tai naṓa yomarava nini taṓatete la van amiu. Ve sanene na, ve akila re naṓa sinemiu viowa manenea, a ve amaraun re sur lala. Amiu ve asitom̃ manene re,

²⁸ kome monar ve sa ga naṓa nepisa pa pan amiu rui, nesape in na neure kone wa, ana yoko neim si pun amiu. Pona amiu aloge viowa naṓa nevano, ana visae sinemiu sii inu, popon amiu akekara manenea naṓa nekilia neva sina puna ne Ata, naṓa naga to laa metavan inu keviu paṓisi.

²⁹ “Sur la punu ga nene pere wa, ana nanagane na nepisawal ruru pan amiu rui. Ana pogos naṓa avisu imi m̃alivi torokin nena ga sa naṓa nepisa, ana ṓisi na akilia alelaga ga sane nepe lelaga.

³⁰ “A nanagane, taṓatete nevisa si sur ve moki van amiu, vanon p̃arin suṓe naṓa pe p̃arin suṓen ke yomarava nini nagane na, pimin inu ke pa rui. Ana yaru nene, puriukawaena kiena pe torokin re taulu kiau puriukawaena poli,

³¹ ana netamān inu ga e limana, monar nekila ga sur ya naþa Ata sinenan sape nekila. Nekila sanene, vena yeririna na yomarava nini avisuluþaria sane sineu sii la.

“Poga, kana pog narui, tesuñalu teva vanua.”

15

Yesu pe purþes nen kilka naþa lelaga

¹ Ana e pog naþa memial mepano, Yesu pisa ke sina ga visena þas pan imimi. Naga pisape “In na nepe purþes nen kilkerep naþa lelaga, a Ata naga pe yar na visuaren lokove na kilika lala.

² Naga pisuar ruru ke korowasneu lala, visae visu korowas tai naþa þar re mras poli, naga telua, a visae visu tai naþa þar mrasa, yoko kilavan ruruia vena war si mras ve moki.

³ Sur nene nekila pan amiu rui, naþa sane sur naþa kilavan ruru amiu, naga kiau visena la naþa nepisa ke pan amiu.

⁴ Amiu na korowasneu lala, monar ayakolkol ruru amiu e inu, a in na neyakolkol ruru nemio amiu. Visae korowas nen kilka ve yakol ruru re amio purþesia, taþatete war mrasa, a maran taaga ga amio amiu, visae ve ayakolkol ruru re amio inu, yoko kiamiu malena taþatete nena war mras napo lala.

⁵ “In na nepe purþes nen kilika, amiu na ape narin korowasneu lala. Naga naþa sikol e inu a nesikol e naga, naga ke naþa yoko kiena malena kilia war mras ve moki, vanon sa ve in re e amiu, taþatete nena akilia akila sur tai naþa po e marana ne Ntewa.

⁶ Visae yar tai ve sikol re e inu, naga sane korowas tai naþa pimi mano pa rui, atelua awar akoven va e kapi, kapi kekania.

⁷ Visae asu ruru ña e inu, a kiau visena to ruru ña e amiu, sur ya naþa sinemiun asape aviunia, akilia atolia.

⁸ Popon amiu awar mras la ve moki e kiamiu malena lala, naga nene mesmesun kiau nalogena la asumña akila, a pe mrapa ñena nakilaen kia kiena ne Ata va manene laa metava.

⁹ Ata sinena sii inu paþisi, ana vanon naþa sinena sii inu, inu ñena sineu sii amiu, ana popon amiu asikol ruru amiu e kiau nasinesiena nene.

¹⁰ “Visae auarar ruru kiau navisaluaena lala, akilia asumña loyumña e kiau nasinesiena nene, sa naþa in na nepuarar ruru ke pa rui navisaluaena kiena ne Ata, nesike pa loyumña e kiena nasinesiena rui.

¹¹ “Ana sur la naþa nepisa ke pan amiu, nemla pan amiu vena kiau nakekarena sike amio amiu, kila pupia kekarena tai naþa po na po kilia sulue ga amio amiu silaga.

¹² A kiau navisaluaena maro tai nalaen van amiu sanini, sane amiu monar sine-miu sisii amiu lue ga, sa naþa in na sineu si amiu ke ne.

¹³ Pe sinesiena re si tai poli naþa po taulu na sinesiena naþa yar tai tamñan kiena malena, mare vena tamalia kiena erau tai.

¹⁴ Ana yoko in na nekilia nekila ve sa ga nene van amiu, vanon visae alelaga e kiau visena lala, yoko ave kiau erau la rui.

¹⁵ “Pe nepio amiu re sina nesape kam yar na yumñae kiauena ga lala poli, vanon yar na yumñae naga miyumñae ga, pe kilia ruru re navisaarena na yumñae kiena ne kiena suþe poli. Ana in na nepisu amiu ape kiau erau lala, vanon sur punu ga naþa nemloge Ata pisa pan inu, nepisawalia pimi merarava pan amiu.

¹⁶ Amiu pe apisa lologia in re poli asape nepe kiamiu, ana in na nepisa lologia amiu ape kiau, nepisirlar amiu vena ava awar mrasa e kiamiu malena lala, mras naþa sulue ga sike na rui. Ana pogos naþa ava ke sanene, sur ya naþa aviun e kiau kia van Ata nae ma peni, yoko naga la ga van amiu.

¹⁷ Na nene kiau navisaluaena van amiu naga sanini, sane amiu monar sinemiun sisii amiu.”

Lala naþa na yomarava nini yoko sinela kar nalogena kiena Yesu lala

¹⁸ A Yesu pisape “Visae yoko avisu sane yaru na yomarava la naþa pe amlelaga re poli, sinela kar amiu, ve ailan manene re. Monar asitoñal ña naþa lala na

yomarava nini sinela kar inu sumo rui, ãisi na sinela kar mare amiu mēna ga ne.

¹⁹ Visae amiu ave sa ga yeririna na yomarava nini, yoko akekaran amiu ga, ana in na nekilologia amiu pa rui nesape aure vetan malena na yomarava nini. Kam na pe maran taaga re si sane kiena yar la poli, kila sane sinela kar amiu narui.

²⁰ Ana popon amiu asitoñal lue ga visena naãa nepisa pan amiu rui, naãa nesape yar na yuñnaena taãatete sukalawan kiena suãe. Visena nene kana kinasia sape sa ga naãa akila piowa ga akila karenu, yoko akila viowa akila kare amiu mēna. Sa ga naãa la pe amlogear re kiau visena la poli, yoko ve alogear re mēna kiamiu visena lala.

²¹ Pelaga viowa na sanene yoko akila van amiu vanon ga naãa amiu ape kiau, akila vanon pe akilia re naga naãa mligan inu nepitom tano.

²² “Visae ve neim nevisa meraravan re sur la nene e marala, yoko Ntewa visu sane lala pe akilaro re kiau visena poli. Ana nanagane na, amloge kiau visena la punu ga rui, ana taãatete avisawan si visena tai e kiela naviowaena naãa akila ãarmarera van Ntewa.

²³ Lelaga, akila ãarmarera pa Ntewa rui, vanon naãa apieluen inu, ana naga sa naãa apieluen mēna Ata.

²⁴ Visae ve kiau kile re la naãa apisu nekila, naãa pe yar re si tai naãa kilia kila, pona Ntewa yoko ve visa re sape naviowaena sike e la. Ana pere, apisu pa rui, ana pe amlelaga re ga poli, aãaryon nakilaen navielueena pan imimi lua Ata.

²⁵ Sur nene mesmesun ga visena tai naãa Ntewa mligan teke e Nasiriena Wa, naãa sape

*‘Sinela kar nu paãisi, ana peraga, pe panon re kiau naviowaena tai poli.’
Yauena 35:19, 69:4*

²⁶ “Ana nevisa van amiu, sane yoko neligan Ninuna na iilaena vetan Ata mava vitom ñalivin amiu, naãa pe Ninuna naãa molue e malena kiena ne Ntewa,

naãa pe Ninuna na visawalen nalelagaena. Naga vitom visawal inu re laa van amiu sane,

²⁷ ana siraunia, amiu mēna monar avisawal manene inu va laa sane van yar taãena lala. Na nene komin naãa amiu la nene asu lue ga amio inu silaga siar e nasiarena kiau yuñnaena pimi tol nanagane.”

16

¹ Ana Yesu pis ña ke pan imimi kiena nalogena lala wa, sape “Visena la nene, nepisa ke pan amiu ve nauarar ruru amiuena, vena kiamiu viawaena ve lor re pogos tai.

² “Pe lelaga, monar akilia asape kieta yerkawa lala yoko akoven plan amiu vetan kieta yuñna nalotena lala, ana yoko viowa laa sane van amiu vano-o tol pogos naãa sane sa awe moñar amiu, ana yoko la avisa asape nanene yuñnaena wo tai nene, ana akila vena Ntewa kekarania.

³ Yoko la akilia akila ve sanene van amiu, komin pimi tol nagane pe akilia ruru re Ata nae ma e peni poli wa, a pe akilia ruru in re mēna poli.

⁴ Ana siraunia, pogos naãa avisu sur la ne imi kakate ke ve sanene van amiu, akilia asitoñal sina ga, ana yoko avisa asape ‘Lelaga ga o, nanagane na tepisu sur la nene sa ga naãa Suãe pisa pan ita nanua sumo ne.’ ”

Yesu pisa sape Ninuna Wa yoko iila la

Ana Yesu pisape “Sur la nene pe nepisa re pan amiu sumo poli, komin e pogos nene nesike nemio amiu wa.

⁵ Ana nepisa ga na wa van amiu komin yoko ve viavi re na, monar neligan amiu, neva sina puna ne naga naãa sumo na mliganu nepitom. Nepisa lili ña sanene pan amiu rui, ana nepisu sane pe apiun manene re si lepas nene tan inu poli, asape nekom pe po neva e yo na sanape,

⁶ vanon pogos naãa nepisawal nesape monar neligan amiu sa nene, amloge piowagan paãisi ne.

⁷ Ana peraga, monar ve sa ga nene. Nepisa pe lelaga pan amiu, po manene laa pan amiu naãa nevetan amiu, komin

naþa visae ve neva re, yoko Ninuna na iilaena taþatete imi, ana sa nevano, yoko neila naga vitomin amiu.

⁸ Ana Ninuna nene, pogos naþa vit-omi, kila pupia yuþaena tai e yeririna na yomarava nini, kila la asitom kilia pupia sitomena þasia, tai e lepas na kiela mlamulena viowa, tai e lepas na kiau mesmesuena, a tai e lepas naliþereena kiena ne Ntewa pan la.

⁹ “Na sumo, Ninuna nene yoko kila la avisu kilia sane purþes nen kiela mlamulena viowa, naga kiela þelaga na yepela mavin vatanon inuena.

¹⁰ “Nalua, Ninuna nene yoko kila la avisu kilia sane in na pe nekila re suri viowa tai poli, nemesmes nenaga. Inu netorokin naþa nekilia neva si metava puna ne Ata, ana yoko ve alual inu re sina.

¹¹ “Natelu, Ninuna nene yoko kila avisu kilia sane Ntewa kilia liþere la, sa ga naþa mligan ruru pa naliþereena kiena suþe viowa naþa pe þarun ke yomarava nini nanagane.

¹² “Sur la moki sike na wa naþa nekilia nevisa van amiu, ana nepisu amiu amloge piowa sanene, taþatete nevisawal van amiu nanagane.

¹³ Ana pogaga, vanon sirau, pogos naþa Ninuna na visawalen lelagaena vim pun amiu, yoko naga kilia sumon amiu, atol visena nalelagaena taþena la nene. Visena na lelagaena la naþa naga vian amiunia, taþatete visa ga e kiena sitomena naga taaga, ana sur la naþa loge ma e peni, naga ga nene visawal van amiu. Ana yoko kila sanene vano-o tol naþa naga kilia vian amiu ruruia e lepas na sur la naþa amolmolue e inu ve yam piavi re.

¹⁴⁻¹⁵ Naurarena la punu ga naþa kiena ne Ata, pe kiau mþena, ana Ninuna war kiau visena lelaga imi ligan ruru e kiamiu malena lala. E mrapa ne nanene yoko Ninuna naga kila mesmesun kiena yuþaena, naþa pe nayeluaren kiau kia.”

Pupia kekarena nawasuþeena kiena Yesu

¹⁶ Ana Yesu pisa mþena pan imimi, pisape “Ve yam viavi re na, yam ve plas ga,

ana yoko ve avisunu re sina, ana yoko ve yam viavi re sina, akilia avisunu sina ga.”

¹⁷ Ana imimi nalogena la memloge visena nene, mepisa lelein pan imimi mesape “Ita pe tekilia re nenaga sur la naþa naga pisa ke ne. Nanua sumo ne, pisa ke sape wasuþe sina va su si amio arimana ma e peni, ana nanagane na sape yam ve viavi re na, tevisu re si naga, þisi na yam ve viavi re na, tevisu sina ga.

¹⁸ ?A narin aora naþa pisa ke ne, kana kinasia yara? !Pe tetol re nena kiena sitomena poli!”

¹⁹ Ana Yesu kilia sane sinemimin mesape meviun meraravan sur la nene tania, naga pisawal þesania, pisape “? Pona amiu apiuyun ke sina ga pan amiu e lepas nen kiau visena lala yo?

²⁰ Pogaga, nevisa ve lelaga van amiu sanini, sane yoko amiu atagi, aloge viowagan ya naþa yoko lala akila van inu, ana yoko yeririna taþena lala na yomarava akekarania, aloge won vaþisi. Yoko sinemiu la ulen naloge viowaena vano-o, ana þisi na, nemali sina ga vetan marena, ana avisu inu sina, a yoko kila kiamiu naloge viowaena nene vilonia imi ve nalogewoena.

²¹ Naga sa ga pogos naþa sira mþena, naþa sa tol kana aora nena, mþena laea naga monar loge viowagania vano warlua. Ana pogos naþa þar pa na, pe sitoþal re si kiena naloge viowaena poli, ana naga pulen kekarena vanon kiena sisi tomtom naþa paeme mare ga pimi yomarava.

²² “Ana þisi na amiu ve sa ga nene narui. Nanagane na sinemiu la ulen nasineyeena keviu, ana siraunia in na neþalivin amiu si na, akilia akekara sina ga e pupia kekarena tai naþa taþatete yar tai lalua sina ga vetan amiu pogos tai.

²³ Ana e pogos naþa neimi neþalivin amiu, pona amiu asitom asape popon sa aviun sur ve moki vetan inu, ana taþatete ga, sur la nene pe naviunen re tan inu poli, akilia aviun mesmesun ga tan Ata ma e peni. Akilia aviun tania e ga e kiau kia, ana þisi na naga kilia tamþan van amiu.

²⁴ Pimi tol nanagane na, amiu pe apiun re sur e kiau kia poli, ana siar ga nanagane na, sa aviunia e kiau kia, p̄isi na atolia, ana kila sinemiu ulen kekarena.

²⁵ “Pimi tol nanagane na, nepisa ke sur la pan amiu e ga e p̄akaiwa, ana aora pimi ke narui naṗa ve nevisawan re si van amiu, nevisayu Ata ma e peni van amiu, nevisa plan meraravan sur punu ga van amiu.

²⁶ Ana e pogos nene, ve in re ga naṗa neviun ke sur lala van Ata vanon amiu, ana amiu ga akilia aviun mesmesun vania e kiau kia.

²⁷ Amiu akilia aviun mesmesun ga vania, vanon naga pisu amiu ke naṗa sinemiu sii inu, naga kilia ke naṗa amlalaga e inu sane nepetan ma puna nepitom tano e yomarava nini. Suri nene kila sinena sii amiu paṗisi, kekarana ga na yagoganen kiamiu naviunena lala.

²⁸ “Ana e lepas na lele naṗa nepa ke ea, nekilia nevisa ga sa naṗa nepisa ga p̄isi ne, sa naṗa nepetan ma puna ne Ata nepitom e yomarava nini, ana p̄isi na nevetan si yomarava nini, nowasuṗe si ma uṃa puna.”

²⁹ Ana mepisatam̄ea, mesape “!Suṗe, nanagane na ve ovisawan re si kioṃa visena e p̄akaiwa lala! Pogos naṗa opisa meraravan sur la sanene mepisu po paṗisi.

³⁰ Memloge kioṃa visena lala, mepisu kilia sane ko na okilia sur punu ga, pe kiamimi naviunena re si naviunena tan ko poli. Lelaga, nanagane na memlelaga m̄arera sane pe lelaga, ko na opetan Ntewa opitom e yo nini.”

³¹ Ana Yesu pisatam̄e la, sape “Ana yo. Pona amlalaga e inu pe lelaga?”

³² Popon alelaga m̄arera, vanon aora naṗa nepisa ke ne, pimi ke narui, ana visae pere, pimi pa yo rui. E pogos nene, am̄em̄ene amiu aliureure amiu, po amiu awasuṗe amiu veve taaga sina e m̄am̄iu uṃa lala, taṗatete tai sike si amio inu, yoko inu ga taaga nesike. Ana nanene naga pogaga pan inu, vanon nekilia sane inu, pe in ga taaga re nesike poli, ana Ata na amio inu lue ga.

³³ Nepisa sanene pan amiu vena ve sinemiu kurkur re, a vena ve aloge re viowa. Pe lelaga naṗa kiamiu malena e yomarava nini, ulen ga naloge viowaena amio pog m̄arera, ana in na netaulu pa naviowaena na yomarava nini rui. E kiamiu malena la e inu, yoko alual luen ga sum̄arena wo.”

17

Pupia leniena kiena ne Yesu

¹ Ana pogos naṗa Yesu pisa pa visena la nene, sape len va arimana. Kira pa metava ma e peni, pisape “Ata, nekilia sane nanagane na kiau pog na loge viowaena pimi narui. Awis, ovisuar inu narum̄a, vena kiau kia ve vito re tano, ana va metava, yoko inu m̄ena ga nekilia nevisirlua kioṃa kia va metava.

² Nemlelaga sane ko na okila sanene, vanon omla pupia puriukawaena pan inu rui, vena neve suṗen yeririna punu ga. Ana otam̄an pan inu osape la naṗa omligan la e limau, yoko nekilia netam̄an malena naṗa ve uro re pogos tai van la.

³ Ana mrapa na malena naṗa ve uro re pogos tai naga sanini, naṗa akilia ko, naṗa ope Ntewa taaga ga naṗa pe lelaga, amio m̄ena inu Yesu Kristo naṗa omligan inu nepitom.

⁴ In na nemligan ko nepitomin nakilaen kioṃa kia ve keviu e yomarava nini, ana nemiyum̄aen m̄a sur nene pano-o p̄isi, naṗa lavis netaulu yum̄aena la naṗa sinom̄an osape nekila.

⁵ Ana Ata, sineun nesape neviun sane sa nevar̄nasu nesum̄alu si e maram̄a, oliganu sina nemio ko ita lua teve suṗen si naurarena nae ma e peni sa naṗa tekila nanua pogos naṗa tesii yomarava nini.”

Yesu mlenwo kiena nalogena lala

⁶ Ana Yesu mlen m̄a, sape “Ata, e lepas na lala na yomarava nini naṗa ko okilologia la ape kioṃa, ko na otam̄an la panu, omligan la e lum̄au, ana nekilia nevisa van ko nesape in na nepisayu ko pan la rui. Ana nanagane apuarar ke kioṃa Visena Wa m̄arera.

⁷ “Lala apisuluþar pa rui sane sur wo punu ga naþa sike e inu, ape sane kioṃa nalaena lala pan inu,

⁸ vanon kioṃa visena la naþa oþar pan inu, nepisalelein pan la, ana la atol punu pa rui, kila sane amlelaga ṃarera asape in na nomolue pun ko nepitom, ko na omiilanu.

⁹ “Nemlen pan ko nanagane, nomon nalenwoen yeririna punu ga na yomarava wetelu veraga ga, ana nesape nelenwo manene laa lala naþa otaṃan pan inu, komin apimi ape kioṃa rui.

¹⁰ La punu ga naþa ape kiau, ape kioṃa, a la punu ga naþa ape kioṃa, ape kiau, a lala naþa otaṃan la pan inu, ape purþes nen kiau naurarena.

¹¹ “Ana nanagane na pimi tol pog naþa nevamās si pun ko, naþa sane ve nesu re si e yomarava nini, ana kieta yeririna la nene asumāra ga. Ve sanene, Ata Wa, awis ovisuar la naþa otaṃan la pan inu, ouarar ruru la loyuma e mratava pun ita, vena akilia aim ave taaga, sa naþa ita lua tepe taaga.

¹² Pogos naþa nesuma nemio la, nepisuar ruru la, nepuar ruru la vatanon kioṃa kia. Nepisuar la pano-o la punu ga asu ruru ṃa amio inu, taaga ga naþa monar vetan inu, sa ga naþa Nasiriena Wa pisawalia, nane yar naþa pe sisi nakovioena.

¹³ “Lavisi ga nowasuþe puṃa narui, ana nesape nevisa plan visena la nene pogos naþa nesike e yomarava nini wa, vena kilaen sane pupia kekarena naþa teke e inu nanagane yoko kilia imi ve keviu ṃena van li taþena la nene.

¹⁴ In na nemla kioṃa visena pan la rui, ana pogos naþa yeririna taþena la na yomarava nini apisu la, sinela karla paþisi. Nanene komin apim sane pe ape na yomarava re si po laa rui, sa naþa in na pe nepe nae re yomarava poli.

¹⁵ Ana nemlenin la pan ko, pe nepiun re nesape oure plan la vetan yomarava, nepiun nesape pogos naþa asike yomarava wa, ko na yoko ovisuar ruru la, vena yar viowa nene ve kila kare la re.

¹⁶ Awis ovisuar ruru la, komin la na sa ga inu, imimi mepe wolawa ga lala na yomarava nini.

¹⁷ Nemlen ṃena sane ovian kioṃa visena na lelagaena van la, vena yawawo kiela malena lala aim ave wa, ave kioṃa ga ko ga taaga.

¹⁸ Nemlen wo la sanene, komin sa ga naþa ko na omliganu nepim e yomarava nini, þisi na in ṃena nemligan la ke avava sanene ea.

¹⁹ Nemiawawo kiau malena wetelu pan ko vanon la, vena þisi na lala ṃena yawawo kiela malena lala van ko ve lelaga.”

Yesu mlenwo li nalelagaena lala

²⁰ Ana Yesu mlen ṃa, pisape “Ata, nemlen ke pan ko, pe nemlen wo re ga la nene poli, nemlen wo ṃena lala taþena naþa alelaga e inu vanon kiela visena la naþa pisayu inu.

²¹ Nemie awis pan ko Ata, sane la punu ga nene aim ave taaga, maran taaga sane ita lua. Ko, ko na e inu, a inu na e ko, ana lala ṃena monar e ita, vena yomarava wetelu kilia lelaga sape in na nemolue puṃa, ko na omiilanu nepitom tano.

²² Pupia naurarena naþa omila pan inu, nemla pan la, þisi na lala akilia aim ave taaga, sa naþa ita lua tepe taaga.

²³ Ko na e inu, a in na e la, þisi na akilia aim ave taaga e sur la punu ga, ana pogos naþa yeririna na yomarava la avisuia, akilia sane pe lelaga ga, ko ga naþa omliganu nepitom, akilia sane sinema sii la keviu sa naþa sinema sii inu.

²⁴ “Nanagane Ata, nepis maro sanene, sineun paþisi nesape la naþa otaṃan panu, yoko sirau akilia amio inu ma e leleta. Sineun nesape amionu vena akilia avisuveve pupia kiau naurarena nene, naþa ko na omila panu nanua sumo e nasiiena na yomarava nini, vanon ko na sinema sii inu paþisi.

²⁵ Ata, ko na ope wa a omesmes, ana yeririna taþena la na yomarava nini pe akilia ko re poli, ana in na nekilia ruru ko lue ga. Nekila sane nanagane na kiau

nalogena lala akilia sane in na nepetan ko, ko na omligan inu nepimi.

²⁶ In na nekila sane nanagane na, lala moki akilia ruru kioṃa ṗelaga wo rui, ana yoko nekila va laa sane na wa, vena pupia sinesiena naṗa sinemaṃa sii inu ea kilia sike e la, a vena inu ṃena nemio la lue ga.”

Ana leniena kiena Yesu pan arimana maro ga e nene.

18

Atarar Yesu ṃarera

Matiu 26:47-56; Mak 14:43-50; Luk 22:47-53

¹ Yesu pisa plan visena la nene, mlen pae na, ṗisi na sumalu sumon imimi nalogena la mepetan si Yerusalem, memial ga kolemalo mepito tano e ṗalu naṗa Kitaron lepas na vano. Memial mepa metol narin los nen purolip lala naṗa Yesu pa lue ga ea yam moki ṃa rui, ana mesu li ṃa yam plas ga ea.

² Lele nene na, Yutas taveve imimi memio Yesu mesuṃa mepa ke ea nene yam moki rui, a naga kilia sape e pogos nene, imimi memio Yesu mesike e nene yo. Sanene na e pogos nene, naga pa pa sumo narui pisawal Yesu pan yar keviu la, ana la amiila kiela yar ṗasia asiraunia, ana naga sumon la apim e lele nene vanon Yesu.

³ La naṗa yerkawa kiena ne yar wa lala amio Varasi la amiila la, la nanene na ṗegas na mara nae Rom tai, amio ṗegas na yar na kiravawoen Yumṃa Wa lala. Ana amial ke apimi amio kapi vivaga lala, amio kiela sur na mara lala.

⁴ Apimi asape atarar Yesu, ana naga kilia ruru pa ṗisi rui sur la naṗa yoko vim katenia, a pogos naṗa pisu la pe milan re poli, pa ga naṗa pitawe la, pis pan la, piunia sape “?E, amiṃu akale ke ai?”

⁵ Ana la naṗa asuṃal ga asuṃa amio Yutas, yar na wilwilinwanen Yesu, ana apisataṃea, asape “Imimi makale ke yar naṗa Yesu, nae Nasaret.”

Yesu pisataṃe la, pisape “Naga naṗa apisa ke ne, in ke narui.”

⁶ Ana pogos naṗa Yesu pisa visena nene pan la, amilania naṗa kila la apuresula veraga, amloloru kar ga lala e porotano.

⁷ Ana yam si tai Yesu piun ke sina ga tan la, sape “?Amiṃu avisali sina ga, akale ke ai?”

Pisi na apisa ke sina ga, asape “Makale ke Yesu naṗa nae Nasaret.”

⁸ Ana Yesu pisape “Sa naṗa nepisa pa rui, in ke nanini narui. Ana visae amiṃu apimin inu ga taaga, popon ataṃan kiau la taṗena nini akilia ava ga sanene, ve atol la re.”

⁹ Naga pisa sanene pan la, kila kiena visena tai pimi pe lelaga, naṗa pisalua mare ga e kiena leniena pan arimana, naṗa pisa sanini, sape “E la naṗa otaṃan pan inu, pe nekila pal re tai poli.”

¹⁰ Asuṃa ga sanene, ana memilan ga naṗa Saemon Pita ṗarlua kiena playu na mara, mligan ṃene ṗarin yar tai kiena ṗarin yar wa lala, ana tetereria ga, telua kiligan yar nene lepas na ṗamarua. Yaru nene kiena kia Malkus.

¹¹ Ana Yesu pisa pa Pita, pisape “Pita, osuan ruru si kioṃa playu vito si e kana pias nen paos nena. ?Sanape, pe sinoṃan re nowar ro e pog ṃarera na loge viowaena naṗa Ata nae ma e peni mla pan inu? Peraga, monar nowar ro e naṗa!”

¹² Yesu pisa sa nene, ṗisi na yar na mara la, amio kiela na sumonena, amio nakiravawoena la na Yumṃa Wa, apim atarar Yesu, apiar ruru limana luwoka, aṗure apano.

Aṗure Yesu pa e yo kiena Parin Yaru Wa

¹³ Ana aṗure Yesu pano, apa atol kove kiena ne Parin Yaru Wa, ana suri na sumo naṗa akila, aṗure Yesu pa tol yo puna ne yermarua nene Anas. Anas nene naṗa sumo na naga pe Parin Yaru Wa, ana naga sike e yo nene wa amio Parin Yaru Wa vii, komin Parin Yaru Wa vii nene naga talopa amio narina naṗa sira.

¹⁴ Yaru nene kiena kia Kaeṗas, a naga naṗa nanua sumo, pisawal mrapa tai pan li nasumonena kiena le Yu lala. Naga sape visae avisu sane monar aweṃar yar

ve taaga vena tamaliaen malena kiena yeririna la ve moki, naga kilia tamān van la vena akila ve sanene na woga ga.

Navisawan ðesanena kiena ne Pita e Yesu

Matiu 26:69-70; Mak 14:66-68; Luk 22:55-57

¹⁵ Sanene na aþure Yesu apa e lepas naþa Anas sike ea, ana e pogos nene, imimi lua Saemon Pita mesiraun la. Inu nemio yermarua Parin Yar Wa na sumo nene, imimi lua mepe erau, þisi na ataþan inu nepa loyuma siraun Yesu, ana apisalupar Pita asape taþatete imi loyuma.

¹⁶ Asape naga monar sumalu ga suma e mratava vanua, ana pogos naþa nepisu sanene, neþasuþe si nepa nepis pan sira mee na yumaena kiena yar keviu nene tai, naþa sumal sike e mratava. Pisi na sira nene tamān sape nekilia noure mēna Pita imi loyuma.

¹⁷ Ana pogos naþa Pita pimi ke loyuma, sira naþa pisuia ana piun tania, sape “? Ana ko mēna nalogena tai kiena ne yar nene, ne?”

Pita mloge, þisi na miila, pisatame kotalia ga, sape “E, peraga.”

¹⁸ Pisi na Pita pisu yar na yumaena la amio nakiravawoen lala akila kap tai na kilamemego, asumal asuvivia ategania, ana naga pa lavisin la, naga mēna tegania.

Parin Yar Wa na sumo nene Anas piun naviunena la pa Yesu

Matiu 26:59-66; Mak 14:56-64; Luk 22:66-71

¹⁹ Amligan Yesu sumal e marana ne yermarua Parin Yar Wa na sumo nene Anas, ana naga piun sur la moki petania. Naga piun tan Yesu sanape e nalogena la naþa amlelaga ke e naga, a piun mēna e lepas navianena la naþa pianlania.

²⁰ Ana Yesu pe pisa re sur mok pan poli, ana pisa ruru ga pania sape “Sur la naþa nepian la ke ea, in na pe nekila vinaun re poli, ana nepisa plan ke ga e yometava merarava pan yeririna punu ga. Nepian lue ga kieta le Yu lala e yuma na lotuena, pona e Yuma Wa, ana lala moki amiyagogan inu silaga.

²¹ ?Ve sanene na, komin ya ne opiun tan inu, osape nepian la sanape? Visae sinomān osape okilia, popon oviun tan la naþa amiyagogan inu lue ga. Lala akilia ruru ga ne.”

²² Ana pogos naþa Yesu pisa visena nene, yar na kiravawoen tai naþa sumal ma lavis puna, mloge sane Yesu pisa kare ke yerkawa nene, þisi na mlipa Yesu, pis pania, sape “Ei, ositom osape po ne opisatame kieta yar wa e visena na sanene? !Ovisuar ko!”

²³ Pisi na Yesu pisatame pania, pisape “Ositomveve ruru li kiau visena. Visae nepisokan, popon ovisawal e maran yeririna la nene, okilia ovisave nepisokan sanape. Ana visae pe nepisa re sur tai naþa piowa poli, vanon ya ne omlipa inu?”

²⁴ Ana þisin nanene aþure Yesu, naþa limana la apiar ruru ga sike ga wa, amligan lepas nene puna ne yermarua Anas, aþure apa e kumali kiena Parin Yaru Wa Kaeþas, vena naga kila kotena vania.

Navisawanen na lua kiena Pita pa kiena Suþe

Matiu 26:71-75; Mak 14:69-72; Luk 22:58-62

²⁵ Ana Saemon Pita sumal suma amio la naþa asike atega ke kapi wa, ana la apisu kilia li ma naga, apiun asape “?Sanape, pona ko mēna ope nalogena kiena ne yaru nene tai?”

Ana naga pisawoia, sape “Peraga, in na pe nepe kiena re poli.”

²⁶ Pita pisatame sanene, ana lala yar tai naþa asumal asike ne, naga pe yar tai na yumaena kiena ne Parin Yar Wa, naþa naga pe namratava tai puna ne naga naþa Pita telua kiligana komþasa. Ana naga mareran manene laa sane naviunen si tan Pita, sape “?Ko na pe ope kiena re poli yo, ana in na nesitom sane nepisu ko amio naga gare pun purolip la rui?”

²⁷ Ana Pita pisaluþar marera sina, piro yam telun narui sape pe kilia re Yesu poli, ana e nena e aora nene, amloge lakaporo kokoreko.

Añure Yesu pa suñalu e marana ne yerkawa nae Rom nene, Paelat

Matiu 27:1-2,11-14; Mak 15:1-5; Luk 23:1-5

²⁸ Ana kolulag wa ke ga wa, pe yomerarava ruru re poli wa, ana Kaeñas pisi pa Yesu pano ñisi, ana añure si naga apetan yo nene, apa e pulkumali kiena ne Paelat, pupia yar keviu nene naña le Rom la apisirlua naga suñalu ve suñen purvanua kiena ne le Yu lala.

Ana pogos naña apim lavisin kiena pulkumali, nasumonena kiena ne le Yu lala asitomñal asape amlon yumña nene, sane visae ava loyumña ea ñisi na kila la aim sane ve ayekiki re sina e marana ne Ntewa, tañatete ayakol e kinanena na Pañagena na Sitomñalen na Tamaliaena. Sanene, vanon sur nene, añure Yesu apim asuñalu ga asu vanua, pe apa re loyumña poli.

²⁹ Pisi na apisawal pan Paelat, ana naga pimi pisu la vanua, piun tan la, sape “Pogaga, ana amiu avisawal li sane yaru nene kila ya ne piowa, nane añure pimi suñal sike e marau kolulag wa ke sanene.”

³⁰ Ana apisatamña, asape “Yerkawa, mekilia mevisa van ko sane yar nene, pe yar na kilaen ve woweena ñisa! Visae peraga na, tañatete moure imi pun ko.”

³¹ Ana Paelat pisape “Visae sanene, amiu ga akilia ava ala nakoena ya naña mesmesun kiamiu navisaluaena vania.”

Ana nasumonena kiena le Yu la apisa pania, asape “E kiamimi navisaluaena, mekilia meliñere naga sape akove momñar naga, ana nanagane na navisaluaena nae Rom pisawo imimi sina, sape ve mekila re ve sanene. Ko ga taaga, yar keviu kiena ne ñarin suñe na e Rom, okilia okila, okilia otamñan osape ala nakoena na marena vania ma e laki torovia.”

³² Ana pogos naña apisa visena nene pa Paelat, la amninue ga, ana la akila ke visena kiena Yesu tai nanua sumo pimi pe lelaga. Nanene komin naga pisawal pa kiena marena rui, pisayu ruru mesmesun nena ya naña le Rom la akila ke, naña awarear yaru pa e laki torovia.

³³ Ana Paelat sinenan sape vis towe re amio Yesu lalua ga, pa si loyumña e kiena kumali, pio Yesu sape va puna. A lala akila Yesu pa loyumña, Paelat piun petania, sape “Sineun nesape ovisa ruru van inu. ?Ko na Ñarin Suñe kiena le Yu la lelaga, po pere?”

³⁴ Ana Yesu pe pisatamña mesmes re pan poli, ana naga pisatamña e naviunena tai, sape “?Kiomña naviunena nene, opiun ruru ga ne, pona opiun ke pan inu vanon ya naña omloge lala tañena nene apisalele kare in ke ea?”

³⁵ Pisi na Paelat pisatamña, pisape “Aulai, nemninue ga amiu le Yu lala, in na pe amiu re tai poli. Nekilia ga sane kiamiu yeririna lala amio yar keviu kiena kiamiu yar wa lala, añure ko opimi vena neliñere ko. Sanene na, nesape nekilia ga nesape omiyumñaen ya ne naña la apisu pe mesmesu re poli?”

³⁶ Ana Yesu pisatamña, sape “Sinelan asape oliñere inu, vanon la pe sinelan re neve suñen la poli. Ana kiau nasuñenena pe sa re nasuñenena na yomarava nini poli. Kiau yeririna lala pe akila re mara amio la naña apimi atararnu rui, vena ve neva re e limana ne kiamimi li kawa le Yu la. Imimi pe mepe yaru na kilaen re mara sanene poli, vanon kiau nasuñenena pe pe na yomarava re nini poli.”

³⁷ Ana Paelat pis pania, pisape “?A, ana nemloge opisayu ke kiomña nasuñenena, sane ko na ope ñarin suñe pa tai rui, po peraga?”

Ana Yesu pisape “Nagane e! Otol ruru pa ñisi ne, sane opisa ne. In na nepim e yomarava nini, nepaeme ea, vanon sur ga nene, a nepimi vena nevisawal sur na lelaga lala van kiena yeririna lala. Yar naña suñalu se e lepas na lelagaena, yoko yagogon ruru kiau visena lala.”

³⁸ Pisi na Paelat piun ke sina ga petania, sape “Ana ane kilia, nalelagaena naga ya ne?”

Paelat sinenan sape tañan ga Yesu va si sanene

Matiu 27:15-31; Mak 15:6-20; Luk 23:13-25

Ana pogos naþa Paelat pisa pa visena nene, sumalu pa sina ga vanua, pisawal pan le Yu la naþa asumalu asike vanua, sape "Yar naþane, nepisuveve pa naga rui, pe nemal re nenaga narin sur tai piowa teke e naga. Popon sane naga va sina ga ve sa ga nene.

³⁹ Ana visae amiu asitomal ke e kas punu ga, e þapagena la nene, nepure ke amiu yar tai naþa sike e yumã nakoena, netaman naga imi si pun amiu ve sa ga nene. Ana nepisu sane e kas nini na, popon sa netaman yar nene, kiamiu Parin Suþe amiu le Yu lala, inãsu pun amiu sa ga nene."

⁴⁰ Naga pisa sanene, ana la pe akekaran re poli, apion marera, asape "Pere, peraga, pe sinemimin re yaru nene poli. Otaman taþena nene Panaþas imi van imimi sina." Panaþas nene naþa asape, naga pe le Yu tai naþa sumo naga pepeyu pa le Rom lala.

19

Paelat tamãan sape awe Yesu

¹ Ana Paelat sitom ke sape kila Yesu molue sina ga, ana yerka kiena ne le Yu lala amaranerãna naþa apisalupãria. Ana Paelat sinenan sape kila suri tai naþa akekaran naga vanonia, ana pisape kiena yar na mara lala awe li naga sumo wa.

² Pisi na yaru na mara la apure naga pano, aþar nonos nen kilsirili, aþan ruruia, amiyen te þarina, sane karo na þarin yar keviu tai. Ana aþar pupia kulkota wo tai naþa memaena sane kulkota mana ne þarin suþe, amiyen ea.

³ Ana la peve taaga apivim ke lavisinia, apisa kare ke naga, asape "Parin suþe kiena le Yu lala, o! Mepatanon ko!" Apisa visena nene pania, amlilipa ke marana.

⁴ Ana siraunia, Paelat pa sina molue puna li kerkeviu kiena le Yu la naþa asumal asike vanua wa, pisawal pan la, sape "Pogaga, nanagane na sineun nesape amiu avisulupãr naþa nemal re sane yar nene, pe naviowaena tai to re e naga poli, ana nanagane neligan si inãsu van amiu."

⁵ Naga pisa pa sanene, þisi na Yesu pimi vanua, sumalu se marala, þarar karo na nonos nen kilsirili e þarina, amio kulkota naþa amiyen ea. Ana Paelat pisa pan le Yu la, sape "Nagane, kiamiu yerka ne nanene!"

⁶ Ana li kawa kiena ne yar wa lala, amio li nakirawoena lala na Yumã Wa, pogos naþa apisalupãr sur naþa Paelat sape kila, pe akekaran re nena poli, apion ke, asape "Awear mare e lak torovia! Awear mare e lak torovia!"

Ana Paelat taþatete taulu la narui, þisi na tamãan ga, sape "Pogaga, e nakiravaena kiau, yar nene pe kila re nena napiowaena tai poli, ana visae amiu sinemunia, amiu ga aure naga, ava awear naga e lak torovia."

⁷ Ana pogos naþa amloge, pe akekara re poli, asape "Peraga yo! Okilia rui osape taþatete mekila ve sanene. Ana lelaga, popon yar nene mare, vanon naga kilaro kiamimi navisaluaena. Naga miyeluar ke naga pa lue ga metava, sape naga pe narina ne Ntewa. Ana ko ga narui okilia okila mare."

⁸ Ana pogos naþa Paelat mloge visena nene, pupia marauena tai pan si naga, sitomveve ke sina ga sape Yesu naga pe yar na sanape,

⁹ þisi na pa si loyumã e kiena kumali, pisape Yesu imi, piun tania, sape "Ko, kionã yo wawa nape?"

Naga piunia, ana Yesu pis re poli, pe pisa re sur tai pan poli.

¹⁰ Pisi na Paelat sape "Ei, ve ovis re sanene, ko ga okila kare ko ke si ne. Popon ovisa sur tai van inu, vanon in ke narui, teke e inu nakilaen sur ya naþa sineun nesape nekila van ko. Visae sineun nesape omolue sina ga ve sanene, nekilia nekila, pona visae sineun nesape omare e laki torovia, nekilia nekila. Ko okilia ma sur nene yo?"

¹¹ Ana Yesu naga pis narui, pisa-tamea, sape "Pona sanene yo, ana a ne tamãan sur nene pan ko sape okila ve sanene? Visae Yar Keviu na mava ve tamãan re van ko, ko na taþatete okila sur tai van inu. Visae ovisa osape nemare, na nene kionã napiowaena tai narui, ana naga

naþa mligan inu e lumomña, naga kila piowa manene laa, nanene kiena pupia mlamulena viowa tai nene.”

¹² Ana pogos naþa Paelat mloge Yesu pis sanene, naga þaryo mñareran ke sinenan sape ligan Yesu va sina ga, ana li kawa lala kiena le Yu la apion sina ga, asape “Yar nene miyeluar ke naga pa metava, sape pe þarin suþe tai, sinenan sape kila naga to metavan kioma yerkawa nene Þarin Suþe Sisa. Sanene na, visae ko oligan va ga sanene, okila ke yumñaena tai naþa þisi na Sisa ve kekaran re, yoko kovenlua ko e kioma yumñaena nene.”

¹³ Apisa sanene, kila Paelat kiena sito-mena peve lua sina ga, þisi na kila aþure Yesu molue pulkumali pimi vanua. A þisi na pa totano metava e kiena lele na naliþereena, naþa apio asape Kilavaru Yotop, naþa le Yu la apio asape Kapata.

¹⁴ Ana e pogos nene, pimi tol kolpae rui, nanene e legiena na kilaruruen sur punu ga na legiena na peni naþa pe pupia legiena na Paþagen na Sitoñalen na Tamaliaena.

Ana Paelat totano ke pa metava rui, kiiar Yesu e marana ne yerkawa kiena ne le Yu lala naþa asumñal asike tano ne, sape “!Naga ke narui, pe pupia kiamiu þarin suþe!”

¹⁵ Ana la amon ga, amñamagawoia keviu, asape “!Aurelua vano! !Asuar metava e lak torovia, awemñaria!”

Þisi na Paelat pisatamñe pan la, sape “!Ke! ?Sanape, amiu sinemiun asape nekila awemñar kiamiu þarin suþe nene?”

Þisi na li kawa kiena yar wa lala apisatamñea, asape “?Ane pisa sape naga pe kiamimi þarin suþe? Yar keviu Sisa naga taaga pe kiamimi þarin suþe.”

¹⁶ Pogos naþa Paelat pisu amñarera laa sanene, þisi na naga tamñan ga Yesu pan la narui, mligan naga e limala vena asuar e laki torovia, sa ga naþa la sinelania.

Asuar Yesu e lak torovia

Matiu 27:32-50; Mak 15:21-37; Luk 23:26-46

¹⁷ Paelat mligan Yesu e limala, þisi na aþurelua naga pano. Pogos naþa apa ke narui, akila naþa Yesu kus ke sina ga

kiena lak torovia, ana la asumonia apa atol narin kunus naþa kana kilavaru ne sane puriu na þarin yaru, naþa apio e visena nae Epru, Kolkota.

¹⁸ E yo ne nanene narui asuar Yesu e laki torovia, amio mñena yar la lua, tai e lepas komþasia, a tai e lepas komþasia, a naga mon ga likan lalua.

¹⁹ Ana visena kiena Paelat tai, naga sape yoko asiria visena tai, asuar e lak torovia metavan þar Yesu, naþa sape “Yesu nae Nasaret, Þarin Suþe kiena ne le Yu lala.”

²⁰ Visena nene asiri e visena la telu, Epru naþa kiena le Yu lala, Latin kiena le Rom lala, a Krik kiena le Kris lala, amñear mon metava e lak torovia kiena Yesu. Yo naþa lak torovia nene sike ea, lavisin ga pulkumali, ana yeririna la naþa amial ke aþaro e yo nene apisu visena nene apuloia.

²¹ Ana yar keviu kiena yar wa kiena ne le Yu lala pe akekaran re visena nene poli. Apisawal pa Paelat, asape “Yerkawa, ko na opisa osape asiri sanene sape ‘Þarin Suþe kiena le Yu lala,’ ko opisa pe mesmes manene re poli. Sinemimin mesape avilopu sina, asiri ve sanini, avisave ‘Nanene, pisa sape naga pe Þarin Suþe kiena le Yu lala.’ ”

²² Ana Paelat pe sinenan re poli, sinenan sape tomña ga ve sa naþa pisa, þisi na pisa mesmes ga pan la, sape “Sur naþa nesiria, nesiri pa narui.”

Yar na mara la amliureure kulmrae mñana ne Yesu e la

²³ Li na mara la amñear Yesu amio la lua nene e kiela laki torovia lala, þisi na apa ruru la. Yar na mara la nene la vari, ana aþarar kulmrae mñana ne Yesu, apisayuia, asape aliureure e la þegas ve vari, tai kiena yar tai, tai kiena yar tai, sanene. Amliureure mña sanene pano-o, tol pupia kulkota mñana ne Yesu, ana amon vitol wowaena e lepas ve vari, vanon kulkota nene pe kana lele na yakolen re poli, amiyumñan ga e pupia kinas nen kulmrae taaga.

²⁴ Vanon sanene, apisasa si pan la, asape “Piowa naþa tevitól kare kulkota nene, yoko telili ga mñapilania.”

Ana la amninue ga, akila ke ga mesmesun visena na yauena tai e Tus na Yauena Wa Lala na susumo rui. Visena nene pisa sanini, sape

“Amlioreure m̃au kulmrae lala e la, amlil m̃apila vanon m̃au kulkota.”
Yauena 22:18

Visena nene pisa sanene, mesmesun ga ya naḡa li na mara la akila.

Yesu pis pa anena

²⁵ Yesu tamalele m̃eke pa metava e kiena laki torovia sanene, ana e la naḡa asum̃al asike lavisin apisu ke e pogos nene, sira la vari. La nene, anena Yesu, amio anena na ve tokak tai, amio Maria naḡa wona na yerm̃ene kiena kia Klopas, amio Maria nae Maktala.

²⁶ Ana Yesu kira pito tano, pisu anena, pisu inu m̃ena, naḡa sane imimi lua mepe puruvi, nesum̃al nesike lavisinia, ana pisayu inu pan anena, sape “Sira marua, naga nene na pe narum̃a narui.”

²⁷ A pis m̃ena pan inu, sape “Naga nene pe anom̃a narui.”

Ana siar e pogos nene nepure sira marua nene pam momalio ke um̃a m̃au, nepisuar ruru naga sane pe aneu.

Yesu mare

²⁸ Yesu mloge ke piowa metava e lak torovia pano-o pisuluḡar sane kiena yum̃aena punu ga ḡisi narui, ḡisi na pi-sawalia sape “In na moto karnu.” Nanene pe kiena visena si tai naḡa pisa ana kila visena tai na Tus na Yauena Wa Lala pimi pe lelaga.

²⁹ Ana pogos naḡa amloge sape moto karia, amla lumlum, aputon e m̃ala kuruta na munen tai naḡa m̃eke e pialo tai, amiyurar e laki tai, akian pa metava tol gona ne Yesu.

³⁰ Akian pae, ana kuruta na munena nene kee pa gona ḡisi, ana pisawal visena tai, sape “ḡisi narui.” Ana pogos naḡa pisa pae visena nene, telan ḡarina pito tano, tam̃an ninuna pano, pure maron kiena yalua, mare.

Amiyurḡe mram̃anena ne Yesu

19:37 Nakilol 1:7

³¹ Pogos naḡa Yesu mare, naga kolpae e legiena na kilaruruen sur punu ga na Paḡagena na Sitom̃alen na Tamaliaena. Sanene, legiena na peni, naga pe pupia legiena na ḡaḡagena nene, ana e legiena nene, taḡatete atol tas nen yar mare. Nanene kila sane yar keviu kiena le Yu lala sinelan asape monar akus plan tas nen la telu nene sumon naḡa mrae vato tano. Ana amaraun m̃ena asape sa ḡisi la telu nene pe amare ruru re poli wa, ḡisi na amligan visena pa puna ne Paelat, apiunia asape aweroro lala lala vena amare vilaga.

³² Pisi na Paelat tam̃ania, ana kiena yar na mara la apa am̃ero lan naga naḡa asuar e lak torovia lepas tai, ḡisi na akila pan taḡena.

³³ Pisi na apanon vena akila m̃ena va Yesu, ana apisu naḡa naga marḡantop pa rui, ana pe akila re si pan poli.

³⁴ Ana lala yar na mara tai kus kiena kalie, miyurḡe mram̃anena ne Yesu, susun pano-o apisu pupia kuruta amio wii pinin molue pito tano.

³⁵ Ana sur nene pe lelaga kemua paḡisi, vanon nepisu e kilamarau, nekilia nesape pe lelaga, ḡisi na nesape nevisawal van amiu, vena amiu m̃ena alelaga ea asape sur nene pe lelaga ga.

³⁶ Sur la nene molmolue sanene vena kilaen visena la na Nasiriena Wa na susumo la aim ve lelaga ga. Visena tai naḡa pisa sanini, pisape

“Pe puriu na yepena re nena tai poli naḡa yoko worovia,” *Yauena 34:20*

³⁷ a taḡena pisape

“Amiyur kare naga, ḡisi narui na asun avisusu m̃a naga.” *Sek 12:10*

Ana ḡelaga na marena kiena ne Yesu naga sa ga naḡa visena la nene apisawal na konua konua rui.

Amligan tasnena ne Yesu e kana puluve

³⁸ Pisi na pupia yerkawa kiena ne le Yu la tai, kiena ki Yosop, nae pulkumali naḡa Arimateia, naga pe nalogena tai kiena ne Yesu nanua m̃a rui, ana kilawan ke kiena nalelagaena komin mamaraun ke li kawa taḡena lala. Ana pogos naḡa kiena Suḡe

mare pae, marauna nene kovio, pa puna Paelat, piun tasnena ne Yesu. Ana Paelat tañania, pa kuslua tasnena ne Yesu petan lak torovia.

³⁹ Ana yar tañena tai naña amio Yosop e pogos nene, naga Nikotimas naña nanua tapolou ga pimi puna ne Yesu kolemalu tai vena sun amio. Ana Nikotimas nene naga pimi e pogos nene, ãar mēna sur la na liluaren tasnena ne Yesu, amio pupia pias nen sirveve na ponotaninu tai, naña kana kilo miyuve lualima yam telu [30].

⁴⁰ Pisi na akus tasnena ne Yesu, apiar e kulmrae yuwowo lala, amio ponotaninu la nene, sa naña le Yu la amiyuñāen ke e kiela marena lala.

⁴¹ Amluluar pae naga, ana lavisin ga e naña añear naga e laki torovia, lokove tai moña ga, ana loyuma e lokove nene puluve viu tai mēke ea, naña atemare ga na wa vena liganen tas nen yar mare va ea, ana pe tai pa li re e poli wa.

⁴² Pisi na amligan tasnena ne Yesu mon loyuma e nene, vanon apisu pog ãarovia, lavis legiena na kilaruruena sur punu ga ãisi, ana pogos naña sa mrae vato kovio, Legiena Wa siaria.

20

Puluve korena ga mēke narui

Matiu 28:1-8; Mak 16:1-8; Luk 24:1-12

¹ Amligan tasnena Yesu mēne puluve nene, ãisi na moña pano tol legiena ãesia na wik tañena. Ana sira la ãasia, sane Maria nae Maktala lala, asumāl kolulag wa ke ga wa, amial malo ga apam e puluve.

Ana pogos naña apam ke lavisi, amilan naña apisu pupia kilavaru pe mono re si e pulus nen puluve poli, amelilivin lua pae rui pa mēke ga yepasia.

² Ana pogos naña Maria pisuia, pilon sina ga kiriri pimi, pisu Saemon Pita amio inu, inu naña imimi lua Yesu mepe sa ga puruvi ga lala, pisawal pan imimi lua, sape “!Aulai, tasnena ne Yesu kovio! Akuslua kom ko yo tai, memninue ga sane mēke pe narui.”

19:39 Yoan 3:1,2

³ Imimi lua memloge, mesuñalu, mepa iroro ga ma puluve.

⁴ Imimi luwoka mekirir ke mepavin, ãisi na nemiyuve Pita, nepa netol ãesan yo nene, a Maria taveve imimi lua, naga mēna pimi sina.

⁵ Nepa netol puluve, nepa lavisinia nekira pa loyuma e lele naña amligan tasnena ne Yesu mēne ea. Pisi na pe nomāl re si Yesu poli, nepisu ga kulmrae la naña amluluar tasnena ea, akekapili ga sike sanene, ana pe nepa re loyuma poli.

⁶ Ana pe piavi re nena ga Saemon Pita siraun inu pam, naga pa loyuma e puluve. Pisu kulmrae la nañane, sa ruru ga naña amluluar Yesu e nanua yemlagi nakoneva.

⁷ Ana tawol tai naña apiar e ãarina Yesu, naga pe to re amio kulmrae la poli, akawe ruru si naga taaga teke.

⁸ Pita pisuveve ke sur la ne sanene, ana inu mēna nepa loyuma nepisua. Imimi lua mepisu veve ke sanene, mekilia ga narui, memlelaga mesape Yesu sunāl si taulu marena rui, lelaga na lelaga.

⁹ Sumo, imimi nalogena la pe mesitom re mesape ãisi na ve sanene poli, vanon pe mekilia re naña Nasiriena Wa la apisawal ke rui asape kieta Navisaarena monar mare, siraunia mal sina.

¹⁰ Nanua na memninue ga, ana nanagane imimi lua nene mepisu e kilamaramimi. Mepisu mēna sanene pano-o, ãisi na moñasuñe si uña.

Maria nae Maktala pisu Yesu

Matiu 28:9-10; Mak 16:9-11

¹¹ Imimi lua moñasuñe si uña, ana Maria sunāl ga sunā e pulgon puluve sunā ga, wamarana mlalau ke. Naga tag mēna sanene pano-o, ãisi na kira si pa e puluve,

¹² milan si navisi lua, amiyen kulmrae naña miyuwowo pañisi, atotano ateke metava. Tai totano e naña sumo amligan ãarina Yesu pa ea, tai totano e naña lana la pito ea.

¹³ Pisi na lalua apis pa Maria, asape “? Erau, ko otagin ke ya?”

Pisatamē sape “Akuslua kiau Suḡe kovio, nemninue amligan mēke pe narui.”

¹⁴ Naga pisa pa visena nene, ḡisi na kirawelesina, pisa yar tai sunālu sike na. Pe pisuluḡar re poli, ana Yesu ke narui.

¹⁵ Pisi na Yesu mēna piun tania, sape “? Erau, ko otagin ke ya? Okale ke a ne e nini?”

Ana Maria sitom māpe yar na yunāena ga nae e nene, pisatamēa, sape “Yarkeviu, visae ko na okuslua naga petan e nini, awis, ovisawal van inu e nape naḡa omligan tasnena mēke ea. Sineun nesape neva nekusia, neligan ruru sina mēke e lēna.”

¹⁶ Siraunia Yesu pio Maria, pio kiena kia, sape “!Maria!”

Naga mloge, pilonia, pisuluḡar sane Yesu, pa lavisinia, pio e kiela visena, sape “!Raponi!” naḡa kinas nen visena nene “Navianena.”

¹⁷ Pisi na Yesu pisa pania, sape “Maria, toko, ve otolnu re sanene. Inu taḡatete nesu e nini, komin pe neḡasuḡe re metava puna ne Ata poli wa. Ana popon ko na owasuḡe si puna ne kieta puruvi lala, ovisa van la osape nepisa sanini, nesape nanagane, nepa ke si metava puna naga naḡa pe arimau, a pe arimamiu, naḡa pe kiau Ntewa, a pe kiamiu Ntewa.”

¹⁸ Siraunia Maria nae Maktala nene kila sanene, ḡasuḡe si pu imimi nalogena lala, pisawal, pisape “Nepisu Suḡe e kilamarau,” a pisayu pan imimi e sur la naḡa Yesu pisa pania.

Yesu mālivin kiena nalogena lala

Matiu 28:16-20; Mak 16:14-18; Luk 24:36-49

¹⁹ Ana e legiena ḡesia na wik ke nene wa, ko yepekilavi, imimi nalogena la mesike lele taaga loyuna e yo naḡa metapolou ke ea. Mekiar ruru mratava lala, vanon memaraun ke mesape sa ḡisi yerkawa kiena le Yu la sinela kar imimi mēna, sa naḡa sinela kar Yesu rui. Mesuna sane na, veraga ga, Yesu mālivi pimi sunālikan imimi, sape “!Sunārena sike amio amiu!”

²⁰ Naga pisa sanene, ḡisi na pian lologia imimi e lepas na mrapototo la naḡa

e limana amio pupia piakapila naḡa e mramānena. Mepisuia, ana pogos naḡa mekiliasape naga Suḡe nene, mekekara na mekekara.

²¹ Pisa ke sina ga pan imimi, sape “! Sunārena sike amio amiu!” A miakol ke sina ga, sape “Sa ga naḡa kiau Ata miilanu vena nekila kiena yunāena, ana inu towe neiila amiu re vena akila sanene.”

²² Siraunia, miyu yalua pimi e imimi, sape “Amiu atol Ninuna Wa.

²³ Yar a naḡa visae amiu aviewoia vanon kiena mlamulena viowa, yoko naviowaena nene kovio vetania, ana yar a naḡa visae amiu ve aviewo re vanon kiena mlamulena viowa, yoko naviowaena nene to lue ga e naga.”

Tomās pisuia, mlelaga

²⁴ Ana pogos naḡa Yesu mālivin imimi, imimi yaru tai pe su re poli, naḡa Tomās Kaora.

²⁵ A suraunia, mepisu naga, mepisawal pania, mesape “! Suḡe mālivin imimi, mepisu naga rui!”

Ana naga pe mlelaga re e poli, pisape “Peraga, in na monar nevisu e kilamarau. Visae ve nevisu re piakapila na mrapototo e limana, netol e mrasilmau nini, a visae ve neligan re luḡau nini e piakapila e mramānena, yoko taḡatete nelelaga nesape naga mal sina ga.”

²⁶ Tomās pisawal kiena sitomena nene, ḡisi na wik tai ḡaro pano, mesike si lele taaga e yo naḡane. Ana e pogos nene Tomās mēna mesike memio, ana akiar mratava la mārera, ḡisi na Yesu pimi mālivin imimi yam si tai, sape “! Sunārena sike amio amiu!”

²⁷ Ana pis pa Tomās, pisa pania sape “Luḡau na nini, okian mraslumona, otol luḡaria. Mramāneu nanini, oligan lumona te ea. Ve ositom ḡele re sina, oviawa mārera e inu.”

²⁸ Tomās mloge na kira pisa Yesu, pisatamēa sape “!Kiau Suḡe, ko ope kiau Ntewa!”

²⁹ Pisi na Yesu pisa pania sape “?Sanape, opisunu ana omlelaga e inu? Nanene naga po, ana pupia navisa ruruena sike

e la naña pe apisunu re nena poli wa, ana amlelaga ke pa e in rui.”

Visena maro tai

³⁰ Sur la moki naña Yesu kila, nesiri plan pa e tusi nini rui, ana naga miyumāen mēna kile tañena la moki e maramimi naña pe nesiri plan re poli.

³¹ Ana visena la punu ga naña asike e tusi nini, ve naiila amiuena vena alelaga asape Yesu naga pe Navisaarena, pe narina ne Ntewa na lelaga. Ana kiamiu nalelagaena e kiena kia nene, yoko ve kiamiu mrapa na tolen malena e naga.

21

Yesu mālavin sina kiena nalogena la olua

¹ Ana siraunia, imimi nalogena la p̄asia mesuñā garo pupia lapa na garo Taepirias, pona Kalele, p̄isi na Yesu pimi mālivi.

² Imimi naña mesike e pogos nene, Saemon Pita, Tomās Kaora, Nataniel nae pulkumali naña Kana ma Kalele, inu nemio olai na sumo Semes, amio sina imimi lua. Ana navaemeena kiena ne Yesu pan imimi e pogos nene sanini.

³ Susumo na Saemon Pita pisawal, pisape “Aulai, in na neva neure lilivi metava narui.”

Pisi na mesuñalu mepisape “Poga, ita punu ga.” Pisi na mepatove mokus waa mepa mokuan lilivi. Mesuñā e sive pano o yemlagi, ana pe metol re nena ika tai.

⁴ Ana pogos naña yemlagi merarava ruru ke narui, Yesu patom su ura e nene, ana mepisu sane sa ga yar tai ne sike ne, ana pe mepisuluñar re poli mesape naga ke narui.

⁵ Ana Yesu pion pan imimi, piunia sape “?Naruu lala, añar mā ika lañasia, po pere?”

Pisi na mesape “Peraga rui.”

⁶ Pisi na pisa, pisape “Pogaga, akila sanini. Ava akuan si lilivi, ana ve akuan re si sa naña akuan ke ne, aluñarli va e lepas na p̄amarua sumo wa, ana nekilia nesape yoko atol ika p̄asia.”

Ana pe mepisu kilale re poli wa sane Yesu na pis ke ne, ana mepa meluñar

lilivi sa ga naña naga pisa. Ana veraga ga pulen ga ika na ika, ana pogos naña mesape mourelua va metava mepure p̄ele ga, pulen manene la ika lala.

⁷ Pisi na mepisu kilale narui mesape Yesu, ana inu naña imimi lua Yesu sane mepe puruvi, nepisa pa Saemon Pita, nesape “Pita, ovisuia, Suñe namā!”

Pogos naña Pita mloge sane na, suñalu veraga, miyen sina ga m̄ana kulkota, pula tano e sive, miye pa ura.

⁸ Pe mesu re perinan ura poli, sur sane tasmē ponotia taaga ga [100], ana Pita sumon imimi mokus waa mesirau mopure yalolog ke lilivi naña pulen ika.

⁹ Ana pogos naña mepim ura, mepisu kap tai momā ga, naña amlega ika p̄asia e mopulusia, mepisu narin kilaparavi lañas manoa ruru pa sike rui.

¹⁰ Ana Yesu pisa, sape “Ika la naña amiu añar ga na wa, awar p̄as vam ve kata.”

¹¹ Ana Saemon Pita pitove, pa metava e waa, p̄erelua lilivi, p̄ere pimi ura. Ika mok pañisi, memaraun mesape sa p̄isi lilivi wororowa lawea, ana peraga, mep̄ere pimi pogaga. Pogos naña moñar plan ika la nene, mopuloia tol ponotia taaga lualima yam lima pa telu [153].

¹² Ana pogos naña ika la manoa ruruia, Yesu pio, sape “Aimi akinana.”

E pogos nene mepisu kilale ruru mesape Suñe ga nene, pe mesitom re si meviun mesape naga ai.

¹³ Mepim mesike pa lele taaga narui, Yesu mla kilaparavi, pion pan imimi, amio mēna ika lala, ana makania.

¹⁴ Naga nene sane pe Yesu kiena navaemeena natelu pan imimi kiena nalogena lala, siraun naña Ntewa tamalia sina naga petan marena.

Yesu amio Pita

¹⁵ Ana pogos naña memla pae kamimi kinanena na kolulag, Yesu pisape sun re amio Saemon Pita. Piun tania, sape “Saemon, narina ne Yoane, sanape? ?Ko na sinemā sii inu keviu, taulu naña la nene sinela sii inu, po peraga?”

Pita pisatamē pania, sape “Suñe, sur nene okilia pa rui, nekekan ko pañisi.”

Ana Yesu pisa pania, sape “Pogaga, ovagan narin kiau sipsip lala.”

¹⁶ Pogos tařena sina ga, Yesu pisa pania, sape “Saemon narina ne Yoane, ko na sinema sii inu po pere?”

Pita pisatame ke sina, sape “Suře, sur nene okilia rui. Sa nařa nepisaaria, nekekan ko pařisi.”

Ana Yesu pisa pania, sape “Pogaga, ovisuar kiau sipsip lala.”

¹⁷ Ana yam si tai, kila yam telun narui, Yesu piunia, sape “?Saemon narina ne Yoane, ko na okekan inu kemua lelaga, po peraga?”

Ana pogos nařa Pita pisu Yesu piun ma sanene pano tol yam telu, mloge piowa, pisa pa Yesu sape “Suře, ko okilia make sur punu ga, okilia nařa nekekan ko pařisi.”

Ana Yesu pisa pania, sape “Pogaga, ovagan kiau sipsip lala.

¹⁸ Ana nevisa ve lelaga van ko sanini, sane nanua sumo, pogos nařa ope me ke ga wa, ko na okila ke ga sa nařa sinoman osape okila. Ko ga taaga omiyen mona kulsota omialoro opa e lele la nařa sinomania. Ana nekilia nevisa van ko, pogos nařa ovim ove yermarua, yoko yar tařena la ayenwo ko e mona kulmae, atarar lumona aure ko ova e lele la nařa ve sinoman re ova ea.”

¹⁹ Visena kiena ne Yesu nene, sane pisawal ke sape sanape nařa yoko awemar Pita. Ea kiena marena, naga kila řelaga tai nařa mligan naga pito tano, a pisirlua kia kiena ne Ntewa pa metava.

Ana siraun nařa Yesu pisa pa sanene pa Pita, řere ke sina ga naga, pisape naga kilia siraun si naga, pisape “Ovim, otaveve inu lue ga narui.”

Yesu amio Yoane

²⁰ Ana siraun nařa Yesu sun pae amio Pita, Pita pilonia, pisu inu, erau wo kiena ne Yesu, nesike lavisin la luoka. Inu ke narui nařa nanua, e kinanena maro, netotano lavisin Yesu, nepiun tania nesape e imimi nalogena lala, ane yoko vielua.

²¹ Ana pogos nařa Pita pisu inu, piun tai Yesu, sape “?Suře, sanapen erau nene?”

²² Ana Yesu pisa pania, sape “Visae nasinenanena kiau sane yoko naga ve kovio re, ana suma sanene vano neim sina ga, sur nene naga pe kiau, pe pe kiona re nařa ovisa sur tai e poli. Sur nařa pe kiona na kilaena, nepisa pan ko řa rui, nesape otavevenu silaga.”

²³ Ana suraun pogos nene, pog nařa nalelagaena tařena la amloge nařa Yesu pisa sanene, amlogepalia, amape Yesu pisayu inunia, sape tařatete nemare pogos tai. Ana Yesu pe pisa re sanene poli, pisa ga sape visae naga sinenania, yoko kilia ve sanene. Sanene, kana kinasia sane sur nene nařa Pita piunia, pe kiena re poli, ana pe kiena Yesu ga.

Visen maro

²⁴ Ana inu nařa nepisawal ke sur la nene, nesiri plan ruru ke vena akilia auloia. Ana ita punu ga tekilia telelaga tesape visena la nene pe lelaga pařisi.

²⁵ Poga, tusi nene pimi řisi ga e nini narui. Sur la moki nařa Yesu kila sike ea, ana sur la moki na moki nařa Yesu kila pe su re e poli. Visae tesiri punuia, nepisu sane pona yoko kana tus la ve mok vařisi, vano-o yo ve tokak e yomarava nini.

YUMAENA Kiena ne Li Nalologena Lala Visayuena Na Tusi Nene

Kom̃pasnen suniena plas na tusi nini

Tusi nini “*Yum̃aena Kiena Ne Li Nalologena Lala*”, Luk siri pan yaru tai, kiena kia Teopilas. Nane tusi na lua nãpa Luk siria, pimi siraun kiena tusi na sumo, nãpa kiena kia “*Lologena Wo Kiena Yesu Kristo Nãpa Luk Siriyuia*”. Tusi nini “*Yum̃aena Kiena Ne Li Nalologena Lala*”, kiena kia na plasa sanene, sape “*Yum̃aena Lala*”. Naga pisayu yum̃aena p̃esa kiena li nalologena lala kiena Yesu, nãpa Ninuna Wa naga sumon la e yum̃aena na visawalen lologena wo, siar garu Yerusalem a e yo punuga garu Yutea a Samaria, pano pano-o p̃ar make yo e yomarava (Yum̃aena Lala 1:8).

Tusi nini naga suniena tai kiena li nalelagaena p̃esa, nãpa siari e p̃egas kiena lus nae Israel lala nãpa amlelaga, a kapuru pimi keviu kalo make yo la e yomarava.

E tusi nini, Luk sinenan sape kilologia nãpa lala nãpa amlelaga e Yesu, ve akawe re Parin Supe nae Rom nãpa naga pe supe make yo la e pogos nene. A naga sinenan sape kilologia nãpa suri makega nãpa lus nae Israel lala amlelaga ea asape yoko imi m̃alivi, nane apimi m̃alivi rui kome lologena wo nãpa ita li nalelagaena lala temlelaga ke ea.

Tusi nini komsus telu, nãpa kilologia sanape nãpa lologena wo sum̃a p̃ar make ke e yo punuga narui, a sum̃are sum̃a kapuru ke silaga. Komsus na sumo, pisayu sum̃are nãpa siari garu Yerusalem, siraun nãpa Ntewa p̃erelua Yesu pa ma e peni. A na lua, pisayu nãpa yum̃aena kapuru pimi keviu, kalo make yo lua nene Yutea amio Samaria. A komsus na maro, pisayu nãpa yum̃aena pano pa kalo yo punuga e puruvanua lala na yo na pawa sive nãpa apio asape Sive Nãpa Metiterenian, pa tol yo Rom.

1:1 Luk 1:1-4

Pupia suri keviu tai nãpa tusi nini pisayuia, nane yum̃aena kiena ne Ninuna Wa. Pogos nãpa li nalologena lala asike garu Yerusalem wa e pogos na legiena na Pentikos, Ninuna Wa pitom ana mla m̃areraena pala. A siraun e pogos nene, Ninuna Wa sum̃a miila ke yum̃aena na sum̃are, a miila m̃ena li na sumonien yum̃aena lala e kiela yum̃aena. Tusi nini pisawal visena lãpasa nãpa li nalologena lala apisawalia, a kila meraravan nãpa kiela visena la m̃arera po, pilon malena kiena la nãpa amlelaga, a miila li nalelagaena lala vena aimi aviran la lele taaga.

Kom̃pasnen tusi la na nini

Yesu pis maro pan kiena nalologena lala 1:1—14
Amligan lua yaru nãpa kus lelana Sutas 1:15-26
Amlologon lologena wo garu Yerusalem 2:1—8:3
Amlologon lologena wo pa Yutea a garu Samaria 8:4—12:25
Yum̃aena lala kiena Pol 13:1—28:31
Yalena na sumo kiena ne Pol 13:1—14:28
Apiora lele taaga garu Yerusalem 15:1-35
Pol miyaloro yam lua 15:36—18:22
Pol miyaloro yam telu 18:23—21:16

Visena na sumo

¹ O, kiau erau Tiopilas, inu nekekara pãpisi nãpa nevitawe ko e tusi tãpena nini. E kiau tusi na sumo nãpa nesiri pan ko, nesiriyu suniena na suri la nãpa Yesu naga sum̃a kila, a nãpa naga sum̃a pian ke e sumo, naga nene naga siar e pogos nãpa naga siar p̃esan kiena yum̃aena,

² pimi tol e pogos nãpa e nam̃areraena kiena ne Ninuna Wa, naga mla maron kiena visena maro pa kiena li nalologena lala nãpa naga mligan plan la rui, ana siraunia Ntewa p̃ere naga pa si metava.

³ Ana pogos nãpa naga mali sina ga e marena, nãpa naga pe pa re si metava poli wa, ana pogos moki, naga sum̃a m̃alnm̃alivin la pa tol legiena lualima yam vari, nãpa kila meraravan ruru pan la nãpa naga mali sina ga e marena lelaga. E

pogos la nene, la asuñã apisu kilale ruru naga, a naga suñã pisayu mrapa lala na nasuñenena kiena ne Ntewa pan la.

⁴ Pogos tai, naña naga suñã veraga amio la, naga mla visena nene pan la, naga pisa, pisape “Amiu na monar ve aur matan re yo nene Yerusalem, amiu na monar asuñate mña ga wa vena atol Ninuna Wa nene naña Ata pisaar ãisi rui sape naga la van amiu, sa naña nepisa mña ga pan amiu rui.

⁵ Sa nanua sumo, Yoane Nakeena naga kee yeririna lala e ga e wii, ana ve ve piavi re, legiena ga lañasia warovia, ãisi na Ntewa naga kee amiu ve lelaga, na nene e Ninuna Wa.”

Yesu pa metava ma e peni

⁶ Ana e si e pogos tai, naña li nalologena lala la apimi sina ga lele taaga amio Yesu, la apiun tania, apisape “?Suñe, sanape, nanagane naga pogos ruru naña ko okila naña ita le Israel lala ita ve kieta ãarin suñe sina ga tai, pona pe kana pogos nen re poli wa?”

⁷ Ana Yesu pisatamñe la, pisape “Naga nene pe pe kiamiu re naña amiu akilia pogos la nene poli, pona legiena la nene poli, naña Ata ga naga taaga mligan ruru pisape ve sanene, a ve sanene.

⁸ Ana siraunia, Ninuna Wa naga vim e amiu, ana e pogos nene narui akus namareraena, ana ãisi na amiu na monar ava avisawal inu garu Yerusalem nene, a e yo tañena punu ga lala garu Yutea amio Samaria, ana vano vano-o tol mña ga yo tañena la punu ga e yomarava nini.”

⁹ A pogos naña naga pisa pa visena la nene ãisi, naña la asike apisu ruru ke naga wa, Ntewa ãerelua pa metava, a lul tai pitomi kalovia, ana la pe aña re si poli.

¹⁰ Pogos naña la asuñã akirakira ke pa metava e sinapane wa, veraga ga amilan ga, naña añal yaru la lua naña mñala kulsota lala miyuwowo pañisi, lalua apimi asuñalar la asike amio la, lalua apisape

¹¹ “!E, le Kalele lala! Amiu ve sinemiu viowa re, ve akirakañar re va metava e sinapane sanene. Yesu nene naña Ntewa naga ãerelua naga petan amiu pa metava e peni, ãisi na naga monar wasuñe sina vitomi, a naga yoko wasuñe sina e ãelaga ga nene naña apisu ga nanagane ãisi ne.”

Þegas kiena ne nalologena lala

¹² Ana li nalologena lala amligan kunus nene, naña Kunus Na Purolip lala, añasuñela apito garo Yerusalem, pe perina manene re poli, sane tasme na manu taaga ga.

¹³ La nene la apimi atol yo Yerusalem, ana la apa ke sina ga loyumña e yo naña metava naña la asusukemua e rui. A la nene kiela kia sanini: Pita, Yoane, Semes a Antru; amio Pilip, Tomñas, Patalomiu, a Matiu; amio Semes naña narina ne Alpeas, amio Saemon naña naga lala yaru tai naña sumo akila politik pa le Rom lala, amio Sutas naña narina ne Semes.

¹⁴ Ana e pogos nene, la nene amio sira lala, la apalue ga lele taaga vena alen. A Maria, anenane Yesu, amio mña ga wenla Yesu lala, asuñã apa lele taaga amio la.

Yaru na kusen lelena ne Sutas

¹⁵ Legiena lañas ãarovia ãisi, ana li nalelagaena lala apimi lele taaga, naña la punu ga atol suri sane yaru ponotia taaga lualima yam lua. Ana e pogos nene, Pita naga sitom sape visayu van la vena akila sanape naña alual yaru na kus lelen yaru nene Sutas.

¹⁶⁻¹⁹ Naga nene vanon naña siraun naña Sutas naga sane kila kiena yum̃aena viowa nanua sumo, naga pul ke sina ga porotano tai amio kilavaru naña naga tauluia, ana naga ga mloru e yo nene, ana mñeña mña po, a sinena la molmolue, ana naga mare. A yeririna lala nae Yerusalem amloge lologena nene, ana nane kila la apio kinakinas nen porotano nene e kiela visena asape “Akeltaña,” naga nene visena tai naña naga pisape “Yo Na Kuruta.”

Sanene, Pita naga sitom pisape visayu suri nene van li nalelagaena lala, ana naga sum̃alu e marala, pisi pan la, pisa pisape “Erau lala, nanua sumo, Ninuna Wa naga pisi kome pulgona ne Tepet, naga pisayu yum̃aena kiena ne Sutas nene naṗa naga sumon yeririna lala apimi apuarar Yesu, a visena la nene apimi ape lelaga ṗisi rui, sa naṗa Visena Wa naga monar ve lelaga silaga. Sutas nene naga imimi yaru tai naṗa, naṗa Suṗe mliganar naga vena tarar yum̃aena amio imimi,

²⁰ ana nanagane, naga sa naṗa visena lalua nene naṗa teke e Tusi Kiena ne Yauena Lala, naṗa tai pisa, pisape

‘Naga popon naṗa m̃ana yum̃a mon korena ga, ṗisi na taṗatete yaru tai mono ea,’ *Yauena 69:25*

a taṗena sina ga, naṗa pisape

‘Popon yaru taṗena tai kus lelana.’ *Yauena 109:8*

²¹⁻²² “Komin suri ne na nene, ana monar yaru si tai naga imi sukol imimi sina vena navisawalen Yesu, kieta Suṗe, visave naga mali sina ga e marena. Yaru nene naga monar lala yaru tai naṗa la amio imimi nanua sumo, e pogos la naṗa Suṗe sum̃a mialoro ke amio imimi. Naga monar ve yaru tai naṗa naga sike e poglis naṗa Yoane naga mlologonyu ke kiena nakeena, pimi tol legiena naṗa Ntewa naga ṗurelua Yesu petan ita, vena va si metava.”

²³ Ana la apisawa kia kiena ne yaru la lua. Tai, kiena kia Yosop, naṗa la apio asape Pasapas, a kiena kia taṗena sina, kien kia asape Sastas. A yaru taṗena, kiena kia Mateas.

²⁴ Ana la amlen, apisa, apisape “Ntewa, Ntewa namanmaruaena, ko ga okilia m̃a ya naṗa sike e los nen yeririna lala. Narui imimi na sinemimin mesape ko okipian imimi e lalua nene, nape naṗa ko oṗere rui,

²⁵ vena naga tarar yum̃aena kiena ne nalologena nene, naṗa Sutas naga mligan rui vena naga va ruru nena ga e kiena lele na kovioena.”

²⁶ La amlen pae, ana akila sur sa naṗa la amlil m̃apila, ana kia kiena ne Mateas

naga kate. Ana la amligan lua naga, ana asikol naga amio la lualima taaga pa taaga nene, kila la lualima taaga pa lua ke sina ga.

2

Ninuna Wa pimi

¹ E legiena na Paṗagena Na Yui Marua, li nalelagaena lala la apimi asu m̃a ga lele taaga,

² a veraga ga, m̃aagena tai molue ma e sinapane, sa ga naṗa pupia lagi tai m̃ai, ana m̃aagena nene naga kalo punu yo na loyum̃a nene naṗa la ateke tano ea.

³ Ana la apisu suri tai sane kapi mluamene, ana kapi nene naga mliṗerea, ana peve taaga pa sike e la punu ga nene.

⁴ Ana la punu ga, Ninuna Wa naga pimi pulemamaga e la, kila la apivisi e visena taṗena lala, sa naṗa Ninuna nene naga kila akilia apisi komea.

⁵ Ana garu Yerusalem, le Israel la asu m̃a ga, naṗa la ape li nalenena lala. La nene na la amolue e yo la moki na yomarava nini apimi.

⁶ Ana la nene amloge m̃aagena nene, lala amio yeririna taṗena lala, la moki paṗisi naṗa la apimi e yo nene. Ana la nene sinela kurkur paṗisi, komin naṗa yaru la naṗa Ninuna pimi e la, la pogos naṗa asum̃a apisi sanene, ana yaru make ga amloge nena kiela visena la naapo.

⁷ Ana la amilan paṗisi, a amiyuwawa, apisa apisape “!Aulai! Yaru la nene naṗa asu m̃a apivisi ke sanene, ana lala na ape le Kalele ga lala.

⁸ ?Sanape naṗa ita punu tesu m̃a temloge ke naṗa apivisi ke e kieta visena la sanene?

⁹⁻¹¹ Ita tepe yaru na purvanua la moki na tesike ne, nae Patia, nae Mitia, nae Elam, nae Mesopotemia, nae Yutea, nae Kapatasia, nae Pontas, nae Esia, nae Pirisia, nae Pampilia, nae Isip, nae Krit, nae Arepia, nae Lipia e lepas na vaen Saerin, a nae m̃ena pupia pulkumali naṗa Rom. Ita laṗasia tepe le Israel ruru ga, a laṗasia pe ape le Israel re sumo poli, ana sirau la apimi ataveve kieta nalelagaena. Ana ita punu ga, ita punu peve taaga

temloge ke naḡa la apivisi ke kome kieta visena lala ita punu ga, la asum̃a apisa ke pupia yum̃aena la nene naḡa Ntewa naga kila.”

¹² Ana la amilan paḡisi, kiela sitomena la kokovio, ana la amninue kare narui asape sanape narui, ana la asum̃a apiuviun ke tan la apisape “!Aulai! ?Ya ne sanene?”

¹³ Ana laḡasia asu m̃a apitalia la nene naḡa Ninuna pimi e la ḡisi rui, la apisa apisape “E, la nene amun ga kuruta nene, nane kila ape wowe ke ne.”

Visena kiena ne Pita pan la

¹⁴ Ana Pita amio li nalologena taḡena la lualima taaga pa taaga nene, la aḡariplan la asum̃alu, apimi ase e nene, ana naga pisi manene pan la, naḡa naga pisawal sanini, pisape “Erau lala, naḡa amiu le Yu lala, a amio amiu yeririna taḡena lala naḡa amiu asike Yerusalem, amiu na ayagokon ruru inu vena nevisawal sur nene van amiu.

¹⁵ Yeririna la nene na pe amun re wii poli, sa naḡa amiu asu m̃a apisa ke ne, peraga, komin nanagane, aora ovari ga na kolulagi nini na wa.

¹⁶ Ana suri nene naḡa amiu apisuia, naga suri nene naḡa Navisawalena Soel naga pisayu sumo rui, naḡa pisape

¹⁷ *‘Ntewa naga pisa, pisape “E legiena la nene na pog maro nene, ḡisi na nela ninuu van yeririna la punu ga.*

Ana ḡisi na narimiu lala la avisawal kiau visena,

a ḡisi na kiamiu yar viu lala yokorena avisu sur lala,

a kiamiu yermarua lala, la aḡeni naḡeni lala.

¹⁸ *Lelaga ḡa, e pog nene, ḡisi na neligan Ninuu,*

naga vitomi ve keviu e yaru m̃ee lala amio sira m̃ee lala na kiau yum̃aena,

ana ḡisi na la avisawal kiau visena.

¹⁹ *Pisi na nekila suri lala nailanena e yo yau,*

amio kile lala na yomarava nini, ana yoko kuruta a kapi a pupia m̃au naḡa piu asum̃a ga.

²⁰ *Sumo na, mrae naga imi malolo, a kupario naga ḡisi na imi vivaga sane kuruta.*

Ana siraunia, legiena keviu nene kiena ne Ntewa, naḡa wo vaḡisi, naga kilia imi.

²¹ *A e pogos nene narui, yaru ai naḡa naga vio kia kiena ne Ntewa, ḡisi na Ntewa tamalia naga.” ‘ Soel 2:28-29*

²² “Amiu le Israel lala, amiu ayagokon ruru kiau visena la nini. Yesu nene nae Nasaret, naga pe yaru naḡa Ntewa naga kipian ruru naga merarava pan amiu sape naga pe Navisaarena. Ntewa naga kila sanene nane e yum̃aena na naḡareraena lala, a e suri nailanena lala, a e kile lala naḡa naga kila Yesu naga miyum̃aenia e maramiu nanua sumo rui. Suri la nene amiu asum̃a akilia ke ḡisi rui,

²³ ana pogos naḡa Ntewa naga mligan naga e limamiu, amiu asum̃alu aḡem̃ar naga mare, naḡa amiu ataḡan li viowa lala la asuar naga e laki torovia. Pogos naḡa amiu na pe akila re suri nene poli wa, ana Ntewa naga kilia ḡisi rui pisape ḡisi na ve sanene, ana naga taḡania, komin naḡa naga taveve sa naḡa naga sitom ruru nanua sumo rui vena kila.

²⁴ A siraunia, naḡareraena na marena pe torokin re naḡa uarar manene Yesu poli, ana Ntewa ḡerelua naga petan nasinelaea lala na marena, kila naga mali ke sina ga.

²⁵ Naga nene naga sa naḡa visena tai kiena ne Tepet nanua sumo, naḡa naga pisayu Kristo, naḡa naga pisa, pisape *‘In na nepisu naḡa Ntewa naga sum̃a amio inu silaga,*

naga sike e lepasneu na marua, ana kila sineu pe kurkur re nena ga.

²⁶ *Kila sanene narui, sineu kekara, a purmeneu naga miao, in na nepe yeririna ga, ana neḡasine ga Ntewa m̃arera.*

²⁷ *A Ntewa, ḡisi na ko na ve oligan re ninuu e yo na marena,*

a ḡisi na ko ve ataḡan re tas nen kioḡa Yaru Wa na yum̃ae kioḡaena me-nunu.

28 *Ko okipian inu e mrapa lala na malena
p̃isi rui,*

*a p̃isi na sineu naga pulen nakekarena
ve keviu, naṓa ko osum̃a omio inu.’*
Yauena 16:8-11

29 Wolai lala, in na nesape nevisawal meraravan suri nene van amiu. Repita ne na nene naṓa Tepet, naga na mare nakonua rui, la asin naga p̃isi rui. Naga nane kiena tampona ne nane m̃eke e kieta yo ne, mon m̃a pimi tol nanagane.

30 Ana pogos naṓa naga mali ke ga wa, naga kilia rui naṓa Ntewa pisaar m̃arera pania pisape p̃isi na pogos tai na, kiena lus tai naga monar to sina ga tano e kiena pupia lele natotanoena, sa naṓa naga kiena lus nene naga imi ve p̃arin suṓe va yeririna lala, sa naṓa Tepet nene naga pe p̃arin suṓe sumo. Ana Tepet naga pe navisawalena tai,

31 a pogos naṓa suri nene naga pe m̃alivi re poli wa, naga pisu naṓa p̃isi na Ntewa kila Navisaarena nene naga mali ke sina ga e marena. Suri nene na Tepet pisa e kiena visena nene, naṓa pisa, pisape Ntewa pe mligan re ninuna e lelen marena poli, naga pe tam̃an re tasnena pa menun poli.

32 Suri ke na nene narui naṓa imimi mesum̃a mepisawal ke ne, naṓa Ntewa naga pisirlua ke sina ga yaru naṓa Yesu nene petan marena.

33 Ntewa pisirlua naga, ana p̃erelua naga pa metava rui, mligan naga sike e kiena lepas na marua. Ana sa naṓa Ntewa Arimata nene naga pisaaria, naga mla Ninuna Wa pania, a nanagane Yesu taron Ninuna Wa nene pan imimi, ana Ninuna Wa nene naga sum̃a miyum̃aen ke suri la nene naṓa amiu na asum̃a apisuia a naṓa amiu na asum̃a amloge.

34 E visena kiena ne Tepet la nene, naga pe pisayu re naga poli, komin naṓa ve naga re naṓa naga va metava e peni, ana naga pisayu ga Navisaarena nene. A kiena visena taṓena sa m̃ena ga nini, naṓa naga pisa, pisape

*‘Ntewa na Mava pis pa kiau Suṓe, pisape
“Ko ototano e kiau lepas marua,
otom̃atea,*

35 *p̃isi na inu nekila kioṃa nasinekar lala
ve sa takue naṓa ko oviawa ea.” ’*
Yauena 110:1

36 Komin suri ne la nanene narui, inu sineun nesape nevisawal ruru merarava van amiu, amiu mratava nae Israel la wetelu, sane Yesu nene naṓa Ntewa mliganar naga sumo rui pe kieta Suṓe a pe Navisaarena, ana amiu asuar naga e laki torovia rui.”

Yeririna la moki naṓa amlelaga e Yesu

37 Pogos naṓa yeririna lala la amloge visena nene, amloge sa naṓa miyur sinela, pano pa tol ruru nena puriu, ana la apiun tan Pita amio li nalologena taṓena lala, la apisape “?Wolai lala, p̃isi na mekila kan imimi narui?”

38 Ana Pita pisa pan la, pisa pisape “Amiu punu ga, amiu avilopu amiu, ana amiu ava e nakeena e kia kiena ne Yesu Kristo, vena p̃isi na Ntewa naga viewo kiamiu mlamulena viowa lala. A p̃isi na Ntewa naga ligan Ninuna Wa van amiu, sane kiena nalaena tai van amiu,

39 komin naṓa navisaarena naṓa Ntewa naga kila, naga kila pan amiu, a naga kila pa narimiu lala, a naga kila m̃ena ga pa yeririna taṓena lala naṓa la asike perina wa. Navisaarena nene naga sike e la naṓa kieta Ntewa na Mava naga sum̃a pio la m̃a ga.”

40 Ana Pita sum̃a pisa ke visena wo nawere laena la moki pan la vena aimi, a naga pisa pisape “Amiu na monar aligan mlamulena kiena ne yeririna viowa lala na nanagane, amiu na atamalia amiu vetan nakoena naṓa naga sum̃a pimi ke pan la.”

41 Ana la moki liu naṓa la amloge visena nene kiena ne Pita, la amlelaga ea, ana la apa e nakeena. A e yeririna la punu ga naṓa asike e legiena nene, la moki pe suri sane manu telu la apimi apiran la amio kiela p̃egas nene.

Li nalelagaena lala apiran la e nasinewo

42 Ana li nalelagaena la nene, la asum̃a apurari ke p̃elaga la nene m̃arera paṓisi, naṓa la amiyagogo ruru po silaga naṓa li nalologena lala la apian la, a lala apiran

la silaga e nasinewo e kiela p̃egasia, a la asum̃a akinana lele taaga silaga, a la yepela m̃aen aora na leniena lala silaga.

⁴³ Ana li nalologena lala la amiyum̃aen suri nailanena la moki pãpisi, amio kile la moki, ana yeririna la apisu suri la nene, sinela kurkur pãpisi.

⁴⁴ Ana li naléлагаena lala, la sinela sum̃a maran taaga ga pano-o, a la asum̃a atam̃an kiela suri lala ve kiela pae ga.

⁴⁵ Sanene, la asum̃a ãpiliwilin kiela porotano lala a kiela suri make ga lala, vena la avion kana kilaveru la nãpa la atolia, va lala ai nãpa limala plasan suri lãpasia.

⁴⁶ Legiena punu ga, la nene la asum̃a apiran la sane p̃egas taaga loyum̃a e Yum̃a Wa m̃ana ne Ntewa, a la asum̃a akinana ke lele taaga e m̃ala loyum̃a lala. A silaga nãpa la asum̃a apimpae ke sanene, ana la akekara pãpisi, a silaga lala apito ga tano e Ntewa, a la apotena pãpisi pania komin malena wo nene nãpa naga mla pan la,

⁴⁷ ana amieluar naga vanonia. A e pogos nene, yeririna tãpena m̃ena ga lala akekaran kiela p̃elaga viu wo nene p̃isa, a e legiena punu ga, Ntewa na Mava naga sum̃a tamalia si yeririna la p̃asia, naga sum̃a sikol la ke e p̃egas nen li nalologena lala.

3

Laulu tai sum̃alu mial

¹ Ana legiena tai, e nena e pog na leniena e mrae telu, ko yepekilavi, Pita amio Yoane, lalua asum̃a apa ke metava e Yum̃a Wa m̃ana ne Ntewa.

² Ana yaru tai nãpa naga paeme naga pe laulu, a e legiena punu ga la asum̃a akus naga pimi amligan naga e mralaea nene nãpa apisape “Mralaea Wo,” naga nene e Yum̃a Wa m̃ana ne Ntewa. Ana laulu nene naga tom̃a mlogi ke pan la nãpa apa ke loyum̃a.

³ Ana naga pisu Pita amio Yoane, nãpa lalua asum̃a apa ke loyum̃a, ana naga mlogin nalaena tai vetan lalua vena lalua ala suri tai vania.

⁴ Ana Pita amio Yoane, lalua atamaria yeririna nene, ana Pita pisa pania, pisape “Mara, okira ovisu imimi sumo wa.”

⁵ Ana naga pisu manene lalua, naga m̃ape p̃isi na lalua nene ala suri tai vania.

⁶ Ana Pita pisa pania, pisape “Erau, in na pe kiau kilavaru re nena ga, ana in na kiau suri wo ga tai nãpa inu na kiau, nela van ko. Nane suri ne nanene: e kia kiena ne Yesu Kristo nae Nasaret, nevisa van ko, osum̃alu narui, oyali.”

⁷ Ana naga pulun tarar limana na p̃amarua, miila laulu nene tarlua sum̃alu, ana lana luwoka pimi po veraga.

⁸ Ana naga sum̃alu ke veraga e pogos nene, sum̃alu su, ana mialial lia. Ana pogos nãpa lalua apavini, naga taveve la, ana la ga teloka apa loyum̃a e Yum̃a Wa m̃ana ne Ntewa, nãpa yaru nene kekara pãpisi nãpa naga mial ke narui, naga sum̃a pulaula, sum̃a mieluar ke Ntewa.

⁹ Ana la nãpa asike loyum̃a apisu nãpa naga mial, a naga sum̃a mieluar ke Ntewa,

¹⁰ a pogos nãpa la apisu kilale yaru nene la apisa apisape “!Apisu ke ne! ! Nanene na laulu nãpane-e! Sila ga naga sum̃a mlogin ke kilavaru vanua e mralaea nene na Yum̃a Wa, ana naga pimi po sina, naga sum̃a mialoro ke narui.” Ana la amiyuwawa ruru e suri nene nãpa pimi m̃alivin yaru nene.

Pita pisi pan la loyum̃a e Yum̃a Wa Mana ne Ntewa

¹¹ Ana komin nãpa yeririna lala la sinela kurkur pãpisi, la akiriri apimi puna ne la telu nene e kopkop nene na Yum̃a Wa m̃ana ne Ntewa, nãpa kiena kia “Kopkop m̃ana ne Solomon.” E yo nene, yaru nene naga sum̃a tawa ke e Pita amio Yoane na wa.

¹² Pog nãpa Pita pisu yeririna la nene apimi lavisi, ana naga pisi pan la, pisape “?E, ita le Israel lala, sanape ne? ?Sanape na amiu amilan ke suri nene, ana amiu apisu ke imimi lua sanene? ?Pona amiu na amape imimi ga lua mekila yaru nene naga kilia mial e ga e nam̃areraena ga kiamimi imimi lua yo, pona amiu na

amape imimi lua mepe yaru wa yo, pona sanape? !Peraga!

¹³ Ana Ntewa ga naga kila suri nene, nane pupia kieta Ntewa na naŋa pe Ntewa kiena ne Epraam, Aisak, a Sekop, a naga pe Ntewa kiena ne kieta yermarua taŋena m̃ena ga lala. Naga kila suri wo nene vena visirlua kia kiena ne kiena yaru na yum̃aena nene Yesu, e maramiu. Ana Yesu ke ga nanene narui, naŋa amiu aŋure naga pa e kieta kumali keviu, ana Paelat naga pisu sane Yesu naga poga ga, naga pisa pisape naga kilia molue, ana e pog ke nene narui amiu na apisawal m̃arerania e marana ne Paelat asape Yesu na pisokan ga, amiu yepemiu mavin naga.

¹⁴ Pe suri korena ga naŋa naga ŋar kia naŋa asape Yaru Wa a Yaru Mesmesu, ana amiu na apisa sanene e pog nene narui, asape yepemiu mavini naga. Ana amiu na apisa ga pa Paelat asape sinemiun yaru nene naŋa naga m̃em̃ar yaru mare ŋisi rui naga kilia molue, ana Yesu naga sum̃a ga, ana Paelat taŋania.

¹⁵ Visae sanene, amiu ke narui, naŋa aŋem̃ar Purŋes nen Malena mare rui, ana siraunia, Ntewa naga kilamalia sina ga naga e marena, a suri ne na nene imimi mepisu e kilamaramimi, ana imimi na mesum̃a mepisawalia.

¹⁶ Kia kiena ne Yesu ne nanene naga kila ruru laulu nene naŋa amiu akilia ruru naga, naga pimi po, sa naŋa amiu asum̃a apisu ke ne. Komin naŋa imimi na mepiawa m̃arera e nam̃areraena na kia nene kiena ne Yesu narui, ana lana ne yaru nene luwoka naga m̃arera ruru nena ga e maramiu nanagane.

¹⁷ “Poga ga, wolai lala. Inu nekilia m̃a naŋa suri la nene naŋa sumo amiu amio kiamiu yerkaŋa lala akila pa Yesu, amiu punu ga akila komin naŋa amninue ga.

¹⁸ Ana naga nene naga pe mrapa kiena ne Ntewa naŋa naga kila visena la naŋa naga pisawalia nanua sumo rui pimi pe lelaga. E visena lala kiena ne kiena navisawalena lala, naga na pisawal ŋisi rui, naŋa ŋisi na kiena Navisaarena naga monar loge viowa e tasnena.

¹⁹ Poga ga, ana amiu na monar avilopu amiu, a monar awasuŋe amiu aimi puna ne Ntewa, vena naga ŋisi na yumu plan kiamiu mlamulena viowa lala.

²⁰ Visae amiu na akila ve sanene, ŋisi na Ntewa naga kilia la nam̃areraena viu e kiamiu malena lala, a naga kilia ligan kiamiu Navisaarena nene naŋa naga mli-ganar ruru ŋisi rui, naga nane Yesu, naga wasuŋe ke sina ga imi.

²¹ Ana Yesu naga monar sum̃a metava e peni sumo wa, vano vano tol pog naŋa yoko Ntewa sinenan sape kila suri la punu ga aimi ave urviu ke sina ga, sa naŋa naga pisawal ŋisi rui e visena lala kiena ne kiena navisawalena wa lala nanua sumo.

²² Ana lala yaru tai naŋa naga pisa sanene naga nane Mosis, a naga pisa pisape

‘Ntewa na Mava naga ŋisi na naga kila kiamiu navisawalena tai naga sum̃alu su likan amiu sa naŋa kila inu na nesum̃alu ŋisi rui. Navisawalena nene ŋisi na naga ve yaru tai nae ga kiamiu yo, a amiu na monar ayagogon ruru kiena visena lala.

²³ Yeririna la naŋa la ve alogear re kiena visena lala, ŋisi na Ntewa naga ligan plan la vetan kiena yeririna ruru la napo, vena la ava akovio.’

²⁴ Suri nene Mosis naga pisa, a navisawalena taŋena m̃ena ga lala, sane Sami-uel, amio m̃ena ga la naŋa apimi mare ga, e kiela visena lala, asum̃a apisayu ke suri lala na kieta legiena nanagane la nene.

²⁵ Navisaarena lala naŋa Ntewa naga mla nanua sumo e visena lala kiena ne kiena navisawalena lala, la ape kiamiu, a amiu na asike m̃ena ga loyum̃a e naviranarena nene naŋa Ntewa naga kila ŋisi rui amio kiamiu yermarua lala na sumo, sa naŋa Ntewa naga pisa pan Epraam, pisa pisape ‘Pisi na in na nekila naŋa navisa ruruena naga imi e yeririna lala na yomarava nini, naga imi kom ga e kioña lus lala.’

²⁶ Mesmesun navisaarena nene, Ntewa naga kila Yesu naga sum̃alu rui sane yaru tai na kilaen kiena yum̃aena, ana naga

pe mligan re pan le taḗena la poli, naga mligan ga pimin amiu ḗesia. Naga mligan Yesu naga pimi vena kila wo van amiu vaḗisi, naḗa ḗisi na naga vilopu amiu, vena amiu aligan kiamiu ḗelaga viowa lala.”

4

¹ Ana Pita amio Yoane, lalua asum̃a amlologo ke pan yeririna lala wa, ana yaru wa lala, amio nasumonena kiena ne li nakirawoen yo lala e Yum̃a Wa Mana ne Ntewa, amio Satusi lala, la apimi lavisin la.

² La nene sinela mimi paḗisi, komin naḗa lalua asum̃a apian ke yeririna lala asape sa naḗa Yesu naga mali sina ga e marena, yeririna m̃ena ga lala akilia amal sina ga ve sa ke ga.

³ Ana atarar la luoka, apano amligan la apa e yum̃a naloge viowaena vena asum̃ate tol legiena na peni, komin naḗa yepekilavi rui.

⁴ Ana yaru taḗena la mokliu naḗa amloge visena kiena ne lalua, amlelaga ea, ana pimi tol pogos nene maran kiena ne la make ga naḗa amlelaga rui apim ape moki manene la narui, lavis tol manu ve lima, nanene sane yerm̃ene ga la ne [5000].

La aḗure Pita amio Yoane apa e kumali keviu kiena ne le Yu lala

⁵ A e kana legiena taḗena, yerkawa kiena ne le Israel lala, amio kiela nasumonena lala, amio navianena navisaluaena lala, la apimi lele taaga garu Yerusalem.

⁶ Ana la apa atotano e pupia kumali amio Anas, naḗa naga pe ḗarin li wa lala, a amio m̃ena ga li kawa taḗena laḗas, naḗa sane Kaeḗas, a Yoane, a Aliksanta, a yeririna taḗena lala na mratava m̃ana ne ḗarin li wa la nene.

⁷ Ana la akilali nalologena lalua nene asum̃alu likan la, ana la apiun naviunena tan la luoka. Apiunia, apisape “?Ane pisape amiu lua nene akila sanene e laulu nene? ?Amiu lua akila e nam̃areraena nae pe?”

⁸ Ana Ninuna Wa pitomi pule e Pita, ana Pita pisi pan la, pisape “Inu nesum̃alu

e maramiu, amiu yerkawa kiena ne le Israel lala, a nasumonena lala,

⁹ a in na nepisu sane amiu asum̃a apiun ke tan imimi imimi lua, apisape sanape e kiamimi yum̃aena wo nene naḗa imimi lua na mekila e laulu nene, a sanape naḗa imimi lua mekila naga pimi po sina.

¹⁰ Poga ga, in na nekekaran ga naḗa nela navisatam̃eena na kiamiu naviunena nene van amiu, vena amiu akilia, a vena yeririna nae m̃ena ga Israel lala la akilia. Nesape laulu ne nanene, naga nane sum̃alu sike e maramiu nam̃a, sum̃alun ke lana luwoka ga naḗa po, naga pimi po rui e nam̃areraena na kia kiena ne Yesu Kristo nae Nasaret. Yesu nene naga naḗa sumo amiu am̃em̃aria mare e laki torovia, ana naḗa Ntewa naga pisirlua ke sina ga naga mali si petan marena.

¹¹ Naga na sa naḗa Visena Wa naga pisayu naga, pisa pisape

*‘Amiu li nakilaena yum̃a lala,
amiu na akovenlua lawe laki tai,
naḗa nanagane naga pimi pe pupia kem-
raḗe na mava rui na mon lika e
yum̃a.’* *Yauena 118:22*

¹² Ana pe mrapa taḗena re si tai naḗa ita tekilia tetol malena e poli, komin naḗa Ntewa naga pe mla re nena kia taḗena pan ita e yomarava nini poli naḗa naga kilia tamalia ita ea.”

¹³ Ana yerkawa la nene la amilan paḗisi, komin naḗa la apisu naḗa Pita amio Yoane, ape yaru kari ga, lalua pe ape yerkawa re nenaga, a lalua pe akilia re m̃ena ga suri moki poli, ana lalua nene pe sinela kurkur re nena ga. Ana la apisu kilale m̃ena ga sa naḗa sumo, lalua nene na amiyal loro amio Yesu silaga.

¹⁴ Ana la taḗatete si aweḗar visena kiena ne Pita narui, komin naḗa yaru naḗa lana luwoka po si rui, sum̃alu sike amio lalua nene.

¹⁵ Ana la apisa pa la telu nene apisape la ava vanua sumo wa, vena la akilia avisayu suri nene.

¹⁶ La telu nene apa vanua, ana yerkawa la nene apisayula, apisa apisape “?Pisi na ita tekila ve sanapen lalua nene? Le Yerusalem la punu ga la amloge make ḗisi rui naḗa lalua nene akila ke pupia

yum̃aena tai nene e laulu nene ne, ana ita na tařatete si tevirovia.

¹⁷ Ana popon ita tekilali sane tekila visena nene na ve va manene re si e yeririna lala, ana ve sanene řisi na ita tevisaluřar lalua nene vena ve avis re si va yeririna lala, ve avisa re kia nařa Yesu van la.”

Kumali keviu naga pisaluřar Pita amio Yoane

¹⁸ Ana la apio ke sina ga la telu nene apimi loyum̃a, ana apisi m̃arera pa li nalologena la lua nene, la apisa apisape “Amiu lua nene ve avisayu re si kia kiena ne Yesu va yeririna lala, pona avian la ea.”

¹⁹ Ana Pita amio Yoane, lalua apisa-tařela, apisa apisape “?Sanape? ?Pona mesmesu ga nařa e marana ne Ntewa nařa imimi ve melogear re naga, imimi na melogear amiu ga? Naga nene na popon amiu na avisali suri nene,

²⁰ ana imimi nini, na imimi tařatete meva ruru imimi mesum̃a ne. Imimi monar mevisawal m̃a suri la nene nařa imimi mepisu e kilamaramimi, a nařa imimi na memloge e kiligamimi.”

²¹ Ana yerikawa la nene la apisi manene sina ga pa lalua, apisaluřar la sa si nanua sumo, siraunia la apisa apisape lalua na akilia ava vanua, komin nařa la pe am̃a re si mrapa nalaen nakoena van lalua poli, vanon nařa yeririna lala la asum̃a amieluar ke Ntewa komin ya nařa pimi m̃alivi e laulu nene,

²² nařa e pogos nene, yaru nene naga kiena kas na taulu pa lualima yam vari řisi rui.

Leniena kiena ne li nalelagaena lala

²³ Pogos nařa Pita amio Yoane, lalua apa vanua, na ařasuřela ke sina ga apa e řegas nen li nalelagaena lala. Ana lalua apisawal visena lala nařa yerikawa lala kiena ne yaru wa lala a nasumonena lala apisa,

²⁴ a pogos nařa li nalelagaena la nene la amloge visena la nene řisi, la amlen pa Ntewa. La apisa, apisape “Ntewa na

Mava, ko osii sinapane a porotano a sive, a suri punu ga nařa sike e yomarava nini.

²⁵ Imimi mesitom̃al si kiořa Visena Wa tai, nařa yermarua repimimi Tepet, nařa naga na pe kiořa yeririna tai, naga pisawal e nam̃areraena kiena ne Ninuna Wa, nařa naga pisa sanini, pisapenua

‘?Komin ya ne yaru la nařa pe amlelaga re poli sinela mimi manene sanene?’

?Komin ya ne yeririna lala la asum̃a asitom ke asape akila yum̃aena viowa, ana komin ya ne la akila řele ga?

²⁶ Parin suře lala na yomarava nini, la asum̃alu asururuia vena akila mara, a yerikawa lala apimi lele taaga vanonia,

ana la amninue nařa akila ke mara amio Ntewa na Mava, a amio kiena Nav-isaarena.’ *Yauena 2:1,2*

²⁷ Ntewa na Mava, imimi mepisu visena nene pe lelaga, nařa mesmesun nena ga e kiamimi pogos nanagane, vanon nařa mesmesu ruru e pulkumali nini, Erot amio Ponses řaelat, amio le Israel lala, amio yaru tařena la nene, la sinela kari manene la yeririna na yum̃ae kiořaena nene nařa Yesu, nařa naga pe Nav-isaarena nařa ko omiawawo naga, ana la asitom ke asape akila viowa manene vania.

²⁸ La nene la apimi lele taaga vena akila sanene, ana la akila mesmesu ga e ya nařa ko ositom ruru sumo rui ana ko omliganaria osape naga monar ve sanene.

²⁹ “Ana Ntewa na Mava, imimi na mepiun mesape ko ositom̃al ruru ke visena m̃arera la nařa la asum̃a apisa pan imimi, ana imimi mesitom mesape ko oiila imimi, kiořa yeririna na yum̃aena lala, vena kila imimi na mevisawal kiořa visena, nařa kiamimi sitomena lala ve yuyuwawa re, a nařa ve memarau re.

³⁰ A imimi na meviun m̃ena ga tan ko okianlua lumom̃a, vena okila namaiena lala awo sina, a vena mekila kile lala pona suri nailanen lala, e kia kiena ne kiořa Yaru Wa na yum̃aena, nařa Yesu.”

³¹ A pogos naṓa la amlen sanene ṓisi, yo nene naṓa la apiora ke ea naga kululu, ana Ninuna Wa naga pitomi pulen la, ana kila la apano apisawal visena kiena ne Ntewa, naṓa kiela sitomena lala m̃arera la e naga sane.

Li nalelagaena lala la amiila la ga e kiela suri lala

³² Ana e poglis nene, ṓegas nen li nalelagaena la nene, kiela malena pimi po paṓisi, sane la sinela taaga ga, a kiela sitomena m̃ena ga taaga ga, kila na sane pe yar re tai naṓa naga m̃areran sitom visave kiena suri lala la ape kiena ga, ana la asum̃a atam̃an kiela suri lala vena ve kiela pae ga.

³³ A li nalologena lala la asum̃a apisawal ke e maran yeririna lala, naṓa kieta Suṓe Yesu, naga mali sina ga e marena rui, a visena nene kiena la nene, naga nam̃areraena keviu sike ea, a li nalelagaena lala la apisu naṓa e pogos nene, Ntewa naga sum̃a pisa ruru la paṓisi e kiena lemamiēna pan la.

³⁴ Pe lala yar re tai naṓa e kiela ṓegasia naṓa naga limana plasan suri tai poli, komin naṓa yaru la naṓa la kiela porotano lala pona m̃ala yum̃a lala, la asum̃a apuliwilin plan ke suri la nene, ana la asum̃a aṓar kana kilavaru ne lala apimi,

³⁵ amligan e limana ne li nalologena lala. Ana siraunia, li nalologena lala la asum̃a amliṓere kilavaru la nene pan li nalelagaena la naṓa limala plasan suri la ṓasia.

³⁶ Lala yaru tai nene naṓa naga taveve ṓelaga nene naga yaru naṓa Yosop, naṓa naga molue e lus kiena ne Livae, naga paeme e purvanua nene Saepras, a naṓa li nalologena lala la amligan ke sina ga kiena kia taṓena tai, asape Panaṓas, naṓa kia nene kana kinasa asape “Yaru na visirluaen sitomena kiena ne yaru taṓena lala.”

³⁷ Naga kila yum̃aena wo tanea sanene narui, naṓa naga ṓiliwilin lua kiena kinakinas nen porotano tai, ana naga mla

kana kilavaru pimi, ana naga mligan e limana ne li nalologena lala.

5

Ananias amio wona Sapira

¹ Ana yaru taṓena tai, kiena kia Ananias, naṓa naga wona kiena kia Sapira, naga m̃ena ga ṓiliwilin lua kinakinas nen porotano tai naṓa lalua kiela,

² ana mla kana kilavaru komṓasa, mla pimi mligan e limana ne li nalologena lala. Ana naga ṓarwan kilavaru na porotano nene komṓasa, pe kiela ga lalua, ana wona m̃ena ga kilia m̃a suri nene, naṓa lalua apranaria.

³ Ana Pita pisa pania, pisape “?Ananias, sanape naṓa ko otam̃an Yermare pimi kila kare sinem̃a sanene, ana ko opisa kotalia Ninuna Wa, naṓa ko osum̃a omlarar ke kilavaru na porotano nene komṓasa wa?

⁴ !Opisu ke ne! Poglis naṓa ko pe opilwilin lua re kinakinas nen porotano nene poli wa, ana pe kiena ai? Naga pe kiom̃a ga. A pogos naṓa oṓilwilinia, kana kilavaru m̃ena ga punu ga sike e limana ai? Sum̃a ke e lumom̃a wa. Ana pogos naṓa ko opisaar osape owar punu va Ntewa, ko monar okila ga sanene narui. ? Ana ya ne kila kiom̃a sitomena naṓa okila si visokanena sanene? !Ko na pe opisa kotalia re ga yaru la poli, ko na osum̃a opisa kotalia ke Ntewa narui!”

⁵ Pogos naṓa Ananias mloge visena nene, veraga ga naga mloru pito tano e porotano, naga marṓantop nenaga. A la naṓa la amloge kiena lologena nene, la amiyuyuwawa paṓisi.

⁶ Ana kiela yaru viu lala la asum̃alu, la amluluwo tasnena, akus pa vanua, ana apa asinia.

⁷ Lavisi aora ve telu warovia, ana wona nene Sapira, naṓa naga mninue ke suri ya naṓa pimi e wona na yerm̃ene wa, naga towe pimi loyum̃a.

⁸ Ana Pita piun tania, pisape “Sapira, ko ovisawal van inu. ?Nanene na kilavaru punu nene na kinakinas nen kiamiu porotano nene, pona peraga?”

Ana sira m̃ena ga nene pisokan, pisa-tãnea, pisape “Peraga, naga ga nene.”

⁹ Ana Pita pisi pania, pisape “?Sanape na amiu lua apisokan sanene? !Amiu lua na apiranaria nãpa asape akilali Ninuna kiena ne Ntewa na Mava! ?Omloge ke yaru la ne amial ke apimi e pulutava ne? ! La nene asin wõna na yerm̃ene rui apimi, a p̃isi na nanagane ga ne la aviar ko m̃ena ga ova vanua!”

¹⁰ Ana pogos nãpa sira nene mloge visena nene kiena ne Pita, naga m̃ena ga mloru mesmesu ke e lana ne Pita veraga, mar̃pantop nena ga. Ana yaru vii la nene apimi si loyumã, la apisu nãpa sira m̃ena mar̃pan p̃isi rui, ana la apiar ke m̃ena ga tasnena pa vanua, la apa asinia m̃eke ga e yepas nen wona na yerm̃ene.

¹¹ Ana li nalelagaena na sum̃are lala, amio yeririna tãpena m̃ena ga lala nãpa la amloge suri nene, la sinela kurkur, amiyuyuwawan pãpisi.

Kile lala amio suri nailanena lala

¹² Ana e pogos nene li nalologena lala la asum̃a akila ke kile la moki na nam̃areraena kiena ne Ntewa, amio m̃ena ga suri nailanena la moki, e marana ne yeririna lala. A silaga, la nene amio li nalelagaena tãpena lala la asum̃a apimi veraga e Kopkop m̃ana ne Solomon, e Yum̃a Wa Mana ne Ntewa.

¹³ Yeririna tãpena lala la asum̃a apitanon la, ana yeririna la nãpa la pe amlelaga re poli, la moki amaraun nãpa ava akuspran la amio la.

¹⁴ Ana silaga, yerm̃ene lãpasia amio sira lala la amlelaga e Yesu, la apimi ape moki nãpa moki manene laa, ana la nene, Ntewa na Mava sum̃a sikol la ke e p̃egas nen li nalelagaena lala.

¹⁵ Komin suri m̃ena ga la nene, yeririna lala asum̃a ãpure kiela li namaiena lala apimi, ana la amligan la ãneke e m̃ala tog a m̃ala takue lala e isinen mrapa. Ana lala akila sanene vena visae Pita war ro e yo nene, visae ninuna ga, ana visae tol lãpasia, p̃isi na la aloge wo sina.

¹⁶ A puna lala nãpa e narin pulkumali lala nãpa la lavisin Yerusalem, la m̃ena ga apimi, a ãpereari kiela li namaiena lala

apimi, amio lãpas nãpa yermare lala apa e la, ana li nalologena lala la akila ruru la sina ga amloge po.

Yerkawa lala nae Israel la apuarar li nalologena lala

¹⁷ Ana p̃arin yaru wa, amio kiena erau lala, naga nene na p̃egas nen Satusi lala nae e yo nene, la apieluen manene la li nalologena lala,

¹⁸ ana la apa apuarar la, akuan la e yum̃a nakoena amio li viowa lala nãpa la asike e p̃isi rui.

¹⁹ Asum̃a pano-o kolemallo, ana navisi kiena ne Ntewa naga pimi, pietava e mratava na yum̃a na koena nene, ana naga sumon li nalologena lala amolue sina ga.

²⁰ Naga pisa pan la, pisape “Amiu ava si asum̃alu asu loyumã e Yum̃a Wa Mana ne Ntewa, amiu avisawal si visena lala na malena vii nene va yeririna lala.”

²¹ Ana li nalologena lala la amlogear visena nene, a pogos nãpa yemlagi merarava, la apa si loyumã e Yum̃a Wa Mana ne Ntewa, la asum̃a amlogo.

Kumali keviu nae Israel naga pisi pa li nalologena lala

Ana kolulagi ke ga nene na wa, p̃arina ne yaru wa amio kiena erau la nene, la apio nasumonena tãpena lala nae Israel vena la aimi atotano e kiela kumali keviu. La nene amape li nalologena la asike e yum̃a nakoena na wa, a pogos nãpa la apimi veraga sanene p̃isi, la amligan visena pa e yum̃a na koena vena li nakirawoen yo lala aure la aimi.

²² Ana pogos nãpa apa atol yum̃a nakoena, la pe am̃al la re poli. Ana la ãpasũpe ke sina ga apimi kumali, apisawal pan la, apisape

²³ “Pogos nãpa mepa metol yum̃a nakoena, mõmal pulutava m̃arera ga, akiar ruru ga mon m̃aga, a li nakirawoen yo na yum̃a nakoena lala asum̃alu asum̃a e mratava nene. Ana pogos nãpa mepietava, mepa loyumã, pe mõna re yaru tai poli.”

²⁴ A pogos nãpa yerkawa lala kiena ne yaru wa lala a nasumonena kiena

ne nakirawoen yo e Yum̃a Wa Mana ne Ntewa, la amloge visena nene, la amninue kare ga e li nalologena la nene narui, m̃a sanape na sanene.

²⁵ A e pogos nene, yaru tai pimi pisa suri taņena tai pan la, pisape “!Aulai! Yeririna la nene naņa amiu amligan la e yum̃a nakoena, la asuñalu asike loyum̃a e Yum̃a Wa, la apian ke si yeririna la rui.”

²⁶ Ana pogos naņa nasumonena nene mloge, ana naga amio kiena li nakirawoen yo lala, la apa aņere nalologena la nene apimi ke sina ga, ana la akila ga e p̃elaga naņa malumu ga, komin naņa la amaraun asape saņisi yeririna lala nae e yo nene p̃isi na la akovela vanonia.

La aņure li nalologena lala apa ke sina ga e kumali keviu

²⁷ La nene aņere li nalologena lala apimi loyum̃a, ana la akila la asuñalu ase marana ne yerkawa la nene. Ana p̃arina ne yaru wa naga piun tan la, naga pisi pan la, pisa pisape

²⁸ “?Sanape na sanene? Imimi na mepisalup̃ar amiu m̃arera rui, mesape p̃isi na amiu na ve avisayu re si kia kiena ne yaru nene va yeririna lala, pona avian la ea. ?Ana nanagane sanape? Amiu na akila m̃aga pano-o yo nene naņa Yerusalem naga pulen kiamiu visena la rui, a amiu na asuñia apisa ke asape imimi ke naņa mepe purp̃es nen marena kiena ne yaru nene narui.”

²⁹ Ana Pita amio li nalologena taņena lala apisatañela, apisa apisape “Imimi na monar melogear Ntewa taulu naņa melogear yeririna.

³⁰ Amiu na aņem̃ar Yesu rui, amiu asuar naga e laki torovia, ana Ntewa na Mava kiena ne kieta yermarua lala naga kila si naga mali ke sina ga petan marena.

³¹ Ntewa nene naga pisirlua naga rui, vena naga sum̃a e lepasnena na p̃amarua, vena naga ve kieta Nasumonena a vena ve kieta Natamaliaena. Ntewa naga kila sanene vena le Israel lala akilia avilopu la, a vena naga kilia viewo kiela mlamulena viowa lala.

³² A imimi, imimi navisuen suri la nene e kilamaramimi rui, a navisawalena va yeririna lala, naga nene imimi memio Ninuna Wa nene naņa Ntewa naga mla rui pan yeririna la naņa amlogearia.”

Kameliel naga pisi e kumali keviu

³³ Ana pogos naņa la nae pupia kumali nene la amloge visena nene, miyur la pa p̃isi, ana kila sane la sinela kari li nalologena la paņisi, ana la sinelan asape aliņere la sa naņa la monar amare.

³⁴ Ana lala yaru tai, naņa la asuñia apatanon ke naga, naņa naga pe Varasi, naga pe navianena navisaluaena tai, kiena kia Kameliel, naga sum̃alu pisapenua aure li nalologena lala la ava vanua sumo wa.

³⁵ Ana naga pisi e kumali keviu nene, naga pisa pisape “Yerkawa nae Israel lala, amiu amaram̃e amiu, amiu na monar asitom ruru suri nene naņa amiu na sinemiun asape akila van la nene.

³⁶ Amiu asitomyuli yaru naņa Tutasi. Nanua ga ne, pe nakonua manene re poli, naga sum̃alu, naņa naga pisa pisape naga pe yaru m̃a tai ne, a suri sane yaru la ponotia vari naņa la apa apiran la amio. Ana la aņem̃ar naga rui, la aņenetetain kiena yeririna lala, a kiena p̃egas nene naga pimi pe suri korena rui.

³⁷ Siraun naga nene, nane e poglis nene naņa la apolo viraviran yeririna lala, Sutas nene naņa nae Kalele, naga m̃ena ga sum̃alu, naga p̃ere yeririna lala ataveve naga. Ana siraunia, la aņem̃ar m̃ena ga naga mare, a la aņenetetain m̃ena ga kiena yeririna lala apa apeve taaga.

³⁸ “Poga ga narui, a e suri nene naņa ita tesum̃a tepisayu ke ne, inu nepisa ke sanini, nesape p̃isi na ita na teligan yeririna la nene la asuñia ga sanene, p̃isi na ita ve tekila re suri tai van la. Naga nene komin naņa visae kiela sitomena pona kiela yum̃aena nene naga molue ga kome yeririna, p̃isi na suri m̃ena ga nene monar loru ne,

³⁹ ana visae naga molue e Ntewa, ita na taņatete tevisalup̃aria. A visae ita tekilali naņa tevisalup̃aria, pona ita na tevisu

naṣa sane tesuṃa tesuwo ke yuṃaena wo kiena ne Ntewa tai.”

La amlil li nalologena lala

⁴⁰ Ana kumali keviu naga mloge visena namasisuena kiena ne Kameliel nene, naṣa pisapenua ve akila re suri tai va li nalologena la nene, a la apisa apisape ṣisi na la ataveve ga ve sa naṣa naga pisa. Ana la apio li nalologena lala apisape aimi si loyuṃa, ana la amla narin nakoarena pan la, amlil la, apisi ṃarera ke sina ga pan la, apisape la ve avian re si yeririna lala e kia kiena ne Yesu, ana siraunia, la amligan plan la apano.

⁴¹ Ana li nalologena lala apa vanua e pupia kumali nene, ana la pe amloge re piowa poli, amloge ga po paṣisi komin naṣa Ntewa naga pisa la sane la atorokin kemua naṣa atol memawaena e marana ne yeririna lala, vanon kia kiena ne Yesu.

⁴² Ana lala pe amlogear re nena kiela yerikawa la nene, ana legiena punu ga, loyuṃa e Yum̃a Wa Mana ne Ntewa, a loyuṃa lala e yuṃa ṃana ne yaru lala, la pe amligan re nenaga naṣa la apian ke yeririna lala, a la amlologon ke Nalologena Wo nene kiena ne Yesu, asape naga pe Navisaarena.

6

La apu ṣarin yeririna naiilaena la olua

¹ Ana e pogos nene, nalogena kiena ne Yesu lala apimi ape moki manene la narui, ana nasinemimiena tai pimi likan la. E lepas tai, le Yu la naṣa apisi ke kom Kris, a e lepas taṣena, le Yu la naṣa apisi ke ga kome kiela visena, naṣa Epru. Ana la nene naṣa la apisi kom Kris, la asuṃa apisimumun ke apisape e legiena punu ga, pogos naṣa la apion kiela narin naiilaena la pan letano lala, ana la akila pe po re nena ga poli pa kiela letano lala.

² Ana li nalologena la lualima taaga pa lua amloge visena nene, la apio viraviran make nalogena lala punu ga vena aimi lele taaga, ana la apisi pan la, apisa apisape “Wolai lala, pe pon re naṣa imimi meligan yuṃaena na visawalen visena kiena ne Ntewa poli, vena imimi mesuṃa mevisuar ga yuṃaena taṣena la nene.

³ Visae ve sanene, amiu na monar akilali naṣa akale kiamiu yeririna la ṣasia ve olua, naṣa la kiela kia po e maran yeririna lala, a naṣa la apulen Ninuna Wa, a naṣa la yepela ṃaen yuṃaena, vena ṣisi na mevisiri plan la la ave narin ṣegas na visuar ruruen yuṃaena taṣena la nene.

⁴ Ana sanene, ṣisi na imimi li nalologena lala, sinemimi la wetelu kilia suṃalu ṃarera su silaga e yuṃaena na leniena a navisawalen Visena Wa kiena ne Ntewa.”

⁵ Ana la ne e ṣegas keviu nene, la amloge sitomena nene, ana la akekan manene paṣisi, ana la aṃal yeririna la olua sa naṣa la apisa. La olua nene naṣa la aṃalia, ana Stipen tai, naṣa naga pe yaru ṃarera tai naviawaen e Ntewa, a naga pulen Ninuna Wa, amio ṃena ga Pilip, a Pokaras, a Nikeno, a Timon, a Pamenas, a yaru nae Antiok naṣa Nikolas naṣa naga pe pe Yu re poli, ana naṣa naga mlalaga e Ntewa kiena ne le Yu la rui.

⁶ Ana la aṣure yeririna la olua nene la apimi asuṃalu e marana ne li nalologena lala, vena la aligan limala te ṣarila, a la ayawawo la.

⁷ Ana suri nene naṣa la akila, kila sane silaga, visena kiena ne Ntewa naga suṃa telivi laa e yaru la narui, a ṣegas kiena ne nalogena lala garu Yerusalem pimi moki laa narui, naga pa tawa ṃena ga e yaru wa kiena ne le Yu la moki narui, ana la ṃena ga akus nalelagaena.

Le Yu laṣasia aṣere Stipen pa e kiela pupia kumali

⁸ Ana la olua nene, lala yaru tai naṣa Stipen, naga pe yaru tai naṣa naga pulen lemamiena kiena ne Ntewa, a naga pulen ke ṃena ga pupia naṃareraena kiena ne Ntewa, kila sa naṣa naga miyuṃaen kile la moki a suri nailanena ṃena ga pa yeririna lala.

⁹ A le Yu laṣasia naṣa asike e yo nene, la pe akekan re nena Stipen poli, ana la sinelan asape akila veveyuena vania. La nene, le Saerin lala, a le Aliksantrea lala, naṣa la asike Yerusalem e pogos nene, amio ṃena ga le Silisia laṣasia a le Esia laṣasia, naṣa la apimi asikolila. La

moki nene la sane p̃egas taaga ga, nãpa la asum̃a apiora ke lele taaga silaga e yum̃a tai na leniena kiena ne le Yu lala.

¹⁰ Ana la nene la akilali nãpa avisalũpar Stipen, pano pano-o peraga, komin nãpa Ninuna Wa naga sum̃a kila ke Stipen naga pe manmarua ruru po e kiena visena lala, ana kiela visena na sinekar lala tãpatete nena ataulu naga narui.

¹¹ Ana la apa añal sina yeririna lãpasia vena la ava avisa kotalia yerikawa lala, ana la nene la apa apisawal pan la, apisape “Imimi memloge yaru nene naga pisi na, pisa kare Navisaluaena kiena ne Mosis pãpisi wa, a naga p̃arnena kare m̃ena ga suri wa kiena ne Ntewa pãpisi.”

¹² Ana e p̃elaga nene, la akila nasumona nena lala, a kiela navianena na navisaluaena lala, amio m̃ena ga yeririna tãpena la moki, la sinela pilulun Stipen pãpisi. Ana la apimi apuarar naga m̃arera, ãpure pa e pupia kumali kiena ne le Yu lala.

¹³ Ana e pogos nene narui, visena na visokanena la molmolue pimi pe moki laa sane, nãpa apisayu kare Stipen, apisapenua “Sila ga yaru nene p̃arnena kare luen ga kieta Yum̃a Wa m̃ana ne Ntewa, a e m̃ena ga e Navisaluaena kiena ne Mosis.

¹⁴ Imimi memloge nãpa naga pisayu Yum̃a m̃ana ne kieta Ntewa nene, nãpa naga pisa pisape p̃isi na yaru suri nene nae Nasaret nãpa Yesu, p̃isi na naga we plan Yum̃a Wa nene, a p̃isi na naga vilon m̃ena ga kieta p̃elaga marua lala nãpa Mosis naga mla kemua pan ita nanua sumo laa rui, nãpa ita tepuarar ruru la asum̃a ga pimi tol nanagane. !Yaru suri nene nãpa Stipen naga sum̃a pisawal ke suri la nene, naga kila kare ruru ita pãpisi ne!”

¹⁵ La amloge visena nene, ana apilon p̃arila lala akirava apisu Stipen vena naga visatãne visena la nene, ana pogos nãpa la apisuia, la apisu marana na sa ga marana ne navisi narui.

7

Visena kiena ne Stipen: Naga sunyu p̃esan Epraam sumo

¹ Ana p̃arin yaru wa naga piun tan Stipen, pisa pisape “?Ana ko, ko na opisa ya? ?Lelaga nãpa ko osũma opisawal ke visena la nene sa nãpa la asum̃a apisa ke ne, pona peraga?”

² Ana Stipen pisatãnea, pisape “Ata lala a wolai lala, amiu ayagogon kiau navisatameena sumo wa. Pisi na in na nevisayu repita marua la sumo wa. Nakonua konua rui, yermarua Epraam naga sum̃a e kiena purvanua nãpa Koltea, e pupia lepas nen yo nene nãpa Mesopotemia, ana kieta Ntewa na Naurarena naga pimi m̃alivinia, ana pisawal pania, pisape

³ ‘Ko na monar omolue e mõna mratava, a e kiõna yo, vena ova e purvanua tai nãpa p̃isi na in na nevisa van ko.’

⁴ Ana Epraam naga molue e Koltea, naga pa sike e pulkumali nãpa Aran sumo, vano vano-o tol pogos nãpa arimana naga mare, ana Ntewa p̃ere naga pimi sike e purvanua nini nãpa ita tesike e nanagane.

⁵ “Ana poglis nãpa Epraam naga pimi tol yo nene, ana Ntewa naga pe mla re nena narin kinakinas nen porotano tai pania, a e pogos nene Epraam naga pe p̃ar re m̃ena narina la poli wa, ana naga p̃uarar m̃areran ga navisaarena nãpa Ntewa naga pisaar m̃arera pan sumo rui, nãpa naga pisaar pisape p̃isi na purvanua wetelu nene naga ve kiena ne Epraam amio kiena lus lala nãpa aimi siraunia.

⁶ Ana visena nãpa Ntewa naga pisa pa Epraam e poglis nene, sanini, nãpa Ntewa naga pisa pania, pisapenua

‘Kiõna lus la nene p̃isi na la ava ase purvanua tãpena, ana yoko la ayũnae korena van kana sũpe lala, nãpa p̃isi na la akila viowa manene van la vãpisi, vano-o tol kas ponotia ve vari.

⁷ Ana siraunia, p̃isi na in na nela nalĩpereena van purvanua nene, a p̃isi na nela m̃ena ga nakoena van kiena yeririna lala, a p̃isi na inu neure plan ke sina ga kiõna lus la nene, vena la awasũpela aimi alotun inu e yo nena nãpa in na nemla pan amiu.’

⁸ “Ana e poglis nene Ntewa naga pisa p̃elaga na p̃aviu pa Epraam, sane totou na naviranarena nene nãpa Ntewa naga kila amio naga, ana pogos nãpa narina nãpa Aisak naga paeme, legiena olua p̃arovia, ana Epraam kila p̃aviu e naga. Ana siraunia, Aisak naga m̃ena ga kila sa ke ga nene pa narina nãpa Sekop, a p̃isi na Sekop m̃ena ga naga kila pa narina la lualima taaga pa lua nene, nãpa nanagane ita tesumã tepio la ke sane la ape p̃arin arimata nasumo lala.”

Stipen pisayu Yosop

⁹ A Stipen naga sumã pisi ke ga wa, naga pisa pisape “Ana Yosop naga pe p̃arin arimata la nene tai, ana wenla tãpena la nene la apieluen naga pãpisi, ana la ãpiliwilin lua naga vena vanon yumãe korena e purvanua nãpa Isip. Ana Ntewa naga sike amio naga e yo nene,

¹⁰ a miila naga e kiena pogos m̃arera lala, panopano kila nãpa p̃arin sũpe nae Isip nene, nãpa kiena kia Pero, naga pisu manmaruaena kiena ne Yosop po pãpisi, ana Pero nene mligan pupia yumãena lala navisuaren kiena purvanua e limana ne Yosop naga taaga.

¹¹ “Ana e pogos nene narui, ana pupia pogos na viso tai garu Isip a e yo kiena ne m̃ena ga repita lala nãpa Kenan, ana la amloge piowa vanon pãpisi, a la apisu sane peraga narui, pe kala kinanena re si po laa rui.

¹² Ana yermarua Sekop, naga mloge nãpa kinanena lãpasia na wilwilinena sunã ke ma Isip wa, ana naga mligan narina la nene, nãpa la ape p̃arin arimata lala, vena la ava metava ma Isip vena awar kala kona lãpasia. Naga nene nãpa sane la apa p̃esan ga ma Isip na wa.

¹³ Ana yam luan nãpa la apa ma Isip sanene, Yosop naga pisa lologia naga pa wenla lala, a suniena na mratava la nene kiena ne Yosop naga pa tol m̃ena ga Pero.

¹⁴⁻¹⁵ Ana Yosop naga mligan visena pa pa arimana nãpa Sekop, pisape naga amio la punu ga na mratava m̃ana la monar avami asike amio naga, ana Sekop amio na mratava m̃ana lala apavini, la punu ga la lualima olua pa lima, la apa asike

ma Isip. La apa asumã pano pano-o, ana siraunia Yosop nene amio kieta yermarua tãpena la nene la amarmare ga e yo nene.

¹⁶ Ana ko pa tãpena ga rui, la ãpar si puriula lala ãpasũpe sina e yo kiena ne la nene, e yo tai kien kia Sekem, ana la asinila e lotap tai nãpa yermarua Epraam naga pul lua nanua sumo rui tan le Amaro lala.”

Stipen pisayu Mosis

¹⁷ Ana Stipen naga sumã pisi ke na wa, pisape “Ana kieta yeririna lala asike garu Isip tol si kas moki pãpisi, ana la akapuru apimi ape moki manene la narui, ana Ntewa naga pisu sane naga torokin ruru kana pogos nãpa naga kila sa nãpa naga pisaar pa Epraam sumo p̃isi rui, pisape p̃isi na naga were plan kiena lus lala e kiela nayumãe korenaena.

¹⁸ Ana e pogos nene p̃arin sũpe viu tãpena tai naga sumãlu garu Isip rui, nãpa naga mninue suniena kiena ne Yosop nanua sumo amio kiena na mratava m̃ana lala,

¹⁹ ana naga kila kare manene laa kieta lus la nene na nanua sumo, nãpa naga m̃areran la ga vena la aligan kare ga narila lala asumã ga vena amarmare, vena ve akapuru re si avim ave moki.

²⁰ “Ana e ke e pogos nene, Mosis naga paeme, nãpa naga pe sisi tomtom tai nãpa pe sisi tanea po pãpisi. Ana arimana amio anena, lalua apisuar wan ga sisi nene e m̃ala loyumã pano pano-o tol kupario telu,

²¹ ana siraunia, lalua akila p̃ele si yonia, ana lalua monar aligan lua naga. Ana siraunia, loñearu kiena ne p̃arin sũpe ga nene naga m̃alia, ana naga sane kuslua Mosis, pisuarua vena ve narina.

²² Naga sumã kapuru m̃a sanene pano-o, ana la asumã apian naga e manmaruaena kiena ne le Isip lala, ana naga kapuru pa pe yaru m̃arera tai a pe yaru na visena na manmaruaena a yepen m̃aen m̃ena ga yumãena.”

Mosis naga sinenan sape tamalia le Israel lala

²³ Ana Stipen naga sum̃a pisa ke, pisape “Ana pogos naña Mosis, kiena kas pa tol sane lualima yam vari, naga sitom̃al si le Israel tañena la naña la asike na, naña la sa ga wenla ga lala, ana naga sum̃a siar pa m̃alivin la towe m̃aga.

²⁴ Ana pogos tai naga pano, m̃al naña yaru nae Isip tai sum̃a m̃e ke yaru nae Israel tai, ana naga pa miila yere Israel nene, ana naga kilamaran pa yaru nae Isip nene, m̃em̃ar naga mare.

²⁵ Naga nene komin naña Mosis naga sitom ke pa p̃isi rui pisape p̃isi na Ntewa naga ligana lua naga vena natamaliaena kiena ne kiena yeririna la nene, ana e pogos nene le Israel lala la pe apisu kilale re poli wa naña asape p̃isi na Mosis kila sanene van la.

²⁶ “Ana yemlagi ke sina ga e legiena tañena, naga m̃al le Israel lalua asum̃a asu la a am̃e la m̃aga, ana naga panon pisape visaluþar naña lalua ve awela re sina, a naga pisape kilali naña lalua atalopan la sina. A naga pisa pan la, pisape ‘E, amiu lua ayagogo. ?Sa ga naña amiu lua nene ape welelai ga rui, sanape na amiu lua akila kare amiu ke sanene?’

²⁷ “Ana naga naña pe kila mesmesu re pan naga komþas nene poli, naga suponlua Mosis pa perina, ana pisa pania, pisape ‘?Sanape? ?Ane mligan lua ko pisape ko ove kiamimi yerkawa, a vena ko oliþere imimi sanene?’

²⁸ ?Pona ko sinom̃an osape owem̃ar inu ve sa naña om̃em̃ar yaru nae Isip nene nakoneva, ne?’

²⁹ “Ana poglis naña Mosis naga mloge visena nene, mloge piowa paþisi, naga sum̃alu, pionlua petan Isip, pure pa sike e purvanua tañena tai, kiena kia Mitian, ana naga sike e yo nene piavi laa sane, a narina na yerm̃ene luwoka ga, apaeme e yo nene.”

Mosis mloge Ntewa pisi pania

³⁰ Ana Stipen pisa pisape “Ana Mosis sike e yo nene pano tol si kas lualima yam vari, ana legiena tai naga sum̃a e yokorena tai, lavisin pupia tavie naña Sinae. Ana e yo nene naga mali navisi tai

pimi m̃alivinia e kapi naña kekan purlaki wetelu tai.

³¹ Ana Mosis naga milan suri nene ana sinena kurkur paþisi, ana naga pa laa lavisin purlaki nene vena visu ruruia. Ana naga mloge pulgona ne Ntewa,

³² naña pisa pisape ‘In na nepe Ntewa kiena ne repim̃a lala, sane Epraam, Aisak, a Sekop.’ Ana Mosis telm̃anin paþisi, naga maraun visuena.

³³ Ana Ntewa na Mava naga pisa si pania, pisape ‘Ko oyenlua kioṃa kulus nen lam̃a, komin yo na ko osum̃alu osike e ne, naga pe yo wa tai naña.

³⁴ Ana in na nevisa van ko sanini, nesape inu nepisuveve ruru naloge viowaena kiena ne kiau yeririna la garu Isip p̃isi rui, a nemloge kiela tagiena p̃isi. In na nepimin ke nesape neure plan la narui, a opisu ke ne, inu nesum̃a nemligan ko m̃ena ga nesape ko owasuþe si ova garu Isip sumo wa, vena ove kiau yeririna nakilaen yum̃aena nene.’ ”

Le Israel lala yepela mavin Mosis

³⁵ Ana Stipen naga sum̃a pisi ke pan la na wa, naga pisa pisape “A Mosis nene, naga ke nanua sumo yepela mavin naga narui, naña la apisa visena ne nanene narui, apisape ‘?Sanape, ane mligan lua ko vena ko ove kiamimi yerkawa, a vena ko oliþere imimi sanene?’ Ana Ntewa ke ga naña naga mligan kiena navisi naga pimi teke e purlaki naña kapi kekan ke ne, vena ligana si Mosis naga ve suþe a ve natamaliaena kiena ne le Israel lala.

³⁶ Ana Mosis ke ga nanene na wa, naña naga sumon le Israel lala amolue garu Isip, la apimi. A silaga, garu Isip, a e Sive Naña Pivaga, a kas lualima yam vari ke sina ga e ga e yokorena, naga sum̃a kila kile lala na nam̃areraena kiena ne Ntewa, a suri nailanena lala pan la.

³⁷ A Mosis ke ga nene na wa, naña naga pisawal pa le Israel lala, naga pisa pisape ‘Ntewa naga p̃isi na naga ligana ga amiu yaru ga tai, sane kiamiu navisawalen tañena tai, sa naña naga mligana inu sumo rui.’

³⁸ A Mosis ke ga nene na wa naña naga sum̃a amio repita marua lala a amio le

Israel tařena lala, poglis nařa la amialoro ke e řegas taaga e yokorena, a naga ke ga nařa sumã amio navisi nene nařa pisi pania meta e tavie nařa Sinae. E pogos nene narui, Ntewa mla visena namalena pa Mosis ne na nene, ana Mosis kus pitomi kian pan la.

³⁹ “Ana repita la nene yepela mavin nena logearen Mosis, a la akoven lua kiena visena nene, ana e kiela sitomena lala, la sinelan ga asape awasuře la sina ga ava Isip.

⁴⁰ Pogos nařa Mosis petan la, pa sike yam piavi ma tavie nařa Sinae, ana la asitomãl ke sina ga kiela malena marua nanua asike garu Isip sumo, ana la apisa pa Aron nařani, apisape ‘Imimi na sine-mimin mesape ko oyumãen kieta nono lařasia, vena la akilia asumon ita tevano, komin Mosis nene naga řerelua ita garu Isip ana naga sumon ita tepimi e yo nini, ana ita temninue kare ga naga sike pe narui, pona amã sanape e naga.’

⁴¹ Ana la apa akila sanene, la amiyumãen nono na narin puluk tai nařa pe purwolu, ana la akila nakuřařaena pania, a la akila pupia řařagena tai pa kiela nono nene nařa la ga amiyumãenia e ga e limala.

⁴² “Ana pogos nařa Ntewa pisu suri nene, naga pilopu mãsina pan la, a naga mligan la vena la ava alotun verue lala. A suri nene naga sa nařa visena wa kiena ne Ntewa nene nařa Navisawalena Amos naga pisa e Visena Wa, naga pisa pisape ‘!Le Israel lala!

?Sila ga e kas lualima yam vari e yokorena,

amiu amẽ mořar suri mali lala vena kilaen nakuřařaena,

ana nakuřařaena nene pan inu, pona pan ai?

⁴³ *Peraga kemua rui, pe akila re pan inu poli, ana amiu na amlotun ke ga nono la nařa amiu ga akila ne,*

sa nařa Molek nene,

nařa amiu na amialoro amio kana silparpara nena,

a Repan mrena ga sa ke ga,

nařa amiu akus nono na kiena verue nena naga pa sumon amiu.

Komin suri ne nanene, řisi na in na nemene plan amiu ava koperinan kiamiu purvanua, ava asumã garu Pabilon lepas na vano.’ ” *Amo 5:25-27*

Stipen pisayu nařa Ntewa naga miila manene laa le Israel lala wa

⁴⁴ Ana Stipen pisa pisape “Ana e pogos nařa kieta yermarua la nene la asike e yokorena nene, Ntewa naga pisa pa Mosis pisape naga monar yumãen mmana silparpara tai, sane kile tai nařa pisawal pisape Ntewa naga sumã amio la. Ana la amiyumãenia torokin ruru sa nařa Ntewa naga pisawal pania, ana la asumã amlenlelein mna silparpara nene pimi.

⁴⁵ La akila mna sanene pimi tol pogos nařa Yosua sumon kieta yermarua lala apimi amene plan yolai tařena la nařa apimi asike e kieta porotano nene, rui. Ana Ntewa naga řere kieta yermarua lala apimi si loyumã e kieta purvanua nene a e poglis nene, la akus silparpara nene pimi loyumã amio la, mon mna amio la pimi pimi tol pogos nařa yermarua Tepet naga pe řarin suře.

⁴⁶ “Ana Tepet pisu nařa Ntewa naga kekarania e suri la moki liu, ana naga piunia pisape visae Ntewa naga tamãnia, vena naga yumãen mmana yumã wa tai, vena lus kiena ne Sekop lala akilia ava ea alen vania.

⁴⁷ Ana Ntewa naga pe tamãan re Tepet naga yumãen yumã tai sanene poli, ana siraunia narina nene nařa Solomon naga miyumãen mmana pupia Yumã Wa nene.

⁴⁸ Ana ita monar tesitomãl mrena ga, sane Yer Kawa Na Metava Manenea, naga tařatete se yumã tai nařa yaru ga la amiyumãenia, sa nařa Navisawalena Aisea naga pisa pisape

⁴⁹ *‘Ntewa Na Mava naga pisa pisape*

‘Ma ga e peni naga sane leleu natotanoena,

a yomarava nini naga sane le lena liganen lau su metava ea.

?Amiu na asitom asape akilia ayumãen yumã ya, vena neva nese ea?

?Pona amiu asitom asape akilia ayumãen e yo nape, nařa neva neva ruru inu ea?

⁵⁰ *Suri la punu ga na sike ne, ana in ga na nesii make punu ga.” ’ ’ Ais 66:1,2*

Stipen pisi m̄arera pan la pisape le Israel la pe amlogear re Ntewa poli

⁵¹ Ana Stipen sinenan pisape kila make kiena visena nene narui, ana naga pisi pa yerka kiena ne le Yu lala naña la asike e kumali, ana naga pisa pan la, pisape “Ana amiu na, amiu atorokin ruru nenaga kieta yermarua la na nanua sumo ne. Amiu na ape kuruñil pañisi wa, ãarimiu m̄arera, a kiligamiu poñe m̄ena ga, yepemiu mavin logeen visena kiena ne Ntewa, a sinemiu lala naga sa ga sinen yaru la naña la pe ape ãaviu re poli wa. Amiu na ape yaru na suwoen luen ga Ninuna Wa silaga.

⁵² Navisawalena lala kiena ne Ntewa nanua sumo, kieta yermarua lala akila make kemua piowa pan la punu ga rui, a la am̄e moñar la moki, pe sur koren ga naña ape yaru la naña Ntewa naga mligan la apimi vena avisawal avisave Yaru Wa Nayunfaena kiena ne Ntewa nene naga ãisi na imi. Ana amiu na apiowa laa sane, komin naña pogos na yaru nene naga m̄alivin ita rui, ana amiu apielua naga a añem̄ar naga mare.

⁵³ Amiu ke narui naña amiu atol Navisaluaena kiena ne Ntewa ãisi rui, naña navisi lala amla pimi sumo, ana amiu na pe amlogear re nena poli, akilaroro kare make ga silaga.”

La akoveñar Stipen

⁵⁴ Visena kiena ne Stipen ãisi e nene narui, a pogos naña li navioraena lala na kumali la amiyagogon naga, visena la nene miyur manene sinela pañisi, ana la sinela mimi pañisi, la asum̄a akar ke maluela vanonia.

⁵⁵ Ana Stipen, naga Ninuna Wa pimi pulenia, ana naga kira pa metava ma e peni, kirava ruru m̄a sanene, pisu pupia naurarena naña kilawo ke Ntewa, a naga pisu m̄ena ga naña Yesu naga sum̄alu sike e yo na metava lavisinia, nanene na e lepasnena na ãamarua.

⁵⁶ Ana naga pisu suri nene, naga pisa pa la naña asike ne, pisape “!Ake-e aulai! Inu

nepisu naña sinapane naga suwowo ga mon m̄aga, ana Narina ne Yeririna naga sum̄alu sike e lepasnena ne Ntewa naña ãamarua.”

⁵⁷ Ana yerka kiena la nene la amloge ya naña Stipen pisa, ana la amloge sa naña naga pisa kare Ntewa, ana amlokai keviu pa metava, a apuwo pulkiligala lala, vena la ve aloge re si visena kiena ne Stipen, ana la punu ga akiriri apa puna veraga,

⁵⁸ ana atararia, a ãereyalolon naga petan pulkumali keviu nene pa vanua. A ãure matan pulkumali keviu nene, vena la akoveñaria, ana la apisa asape yeririna la naña amligan la sumo vena la avisawal visena la naña kila Stipen kus naloge viowaena, apisape la ke nene narui la monar akoven ãesan kilavaru. Ana la amien plan m̄ala kulsota lala, ana la amligan sike e limana ne yaru viu tai naña naga sike amio la e pogos nene, naga kien kia Sol, ana la nene asun ke naña akove Stipen narui.

⁵⁹ Ana pogos naña la asum̄a akove ke naga sanene, ana naga mlen, pio Ntewa, pisa pisape “Suñe Yesu, awis, otam̄an ninuu vam̄asu, nesike nemio ko.”

⁶⁰ Ana naga kinai mloru mon tano, mlokai keviu, pisape “Suñe, awis, ve ola re si nakoena van la e kiela mlamulena viowa nene naña la akila ke pan inu ne.” A siraun naña naga pisa sanene ãisi, mloru pito tano, naga mare nena ga.

8

¹⁻³ Ana Sol nene naña naga sike e pogos nene, naga pisu suri nene, naña akoveñar Stipen mare, a naga pisu sa ga naña la akila ke ga yunfaena wo tai. Ana pe yam piavi re poli, yaru m̄arera na leniena la ãasia, la pe amarau re poli, la sinela miye pañisi, ana la apimi akus tasnena ne Stipen, ana la ataginia ãisa ataginia, ana la apa asinia.

Sol naga m̄ene kare la naña amlelaga e Yesu pañisi

Ana siar e pogos nene, ana Sol lala, la apilamoluen kare ãegas nen li nalelagaena lala garu Yerusalem. La am̄ene kare la pano-o kila narui la moki naña

aþure e yo nene, apa asike e yo taþena lala garu Yutea amio Samaria, ana li nalologena ga lala, la pe apa re poli, la asuñã ga Yerusalem. Ana Sol la sinela kar manene laa li nalelagaena lala va laa na wa, ana la asuñã apa ke ga e m̃ala yuñã lala, a aþere plan la, amligan la e yuñã naloge viowaena, naga nene yerm̃ene amio sira.

Pilip pa mlologo garu Samaria

⁴ Ana la naþa la amlelaga e Yesu, la moki naþa apuretetai petan Sol lala e pogos nene, ana pogos naþa la asuñã apa tetai sanene, ana la asuñã amlologon ke visena kiena ne Yesu pano.

⁵ Ana lala yaru tai naga yaru naþa Pilip, naþa la amliganaria pe tikon sumo, naga pitomi tano e pulkumali keviu tai garo lepas naþa Samaria, ana naga mlologon þesan ke Navisaarena Yesu pa yeririna lala nae e yo nene.

⁶ Ana yeririna la moki paþisi naþa la amiyagogon ruru ke kiena visena lala, a la apisu kile la naþa naga kila,

⁷ sa naþa yermare lala amolue petan yeririna la moki, naþa pogos naþa la amolue, ana la amlokai manene paþisi ana apureure. Ana la apisu m̃ena sane yaru la naþa yepela la komþas marmare, a amio m̃ena laulu lala, la apimi apo sina.

⁸ Ana e yo nene, a þina lala la akekara naþa akekara paþisi komin suri la naþa amloge a naþa apisuia.

Yaru na purm̃aki tai, kiena kia Saemon

⁹ Ana nanua sumo, naþa Pilip naga pe pimi re Samaria poli wa, ana yaru na purm̃aki tai naga sike e yo nene, naþa naga kiena kia Saemon. Siar e pogos la nanua sumo rui, naga pe yaru naþa naga kiena kimi moki paþisi a naga suñã miyuñãen ke suri la moki sanene, ana naga kila sa naþa naga suñã pisawal ke naga pisape naga pe yaru taþena tai, ana yeririna lala nae e lepas nene la silaga sinela kurkurun naga paþisi.

¹⁰ Kiela yerkawa lala, amio yeririna taþena lala, la asuñã amlelaga ke e kiena visena lala, a la apisa ke sanini, apisape “!Aulai! Yaru nene, naga nam̃areraena

kiena ne Ntewa kemua tai sike e naga. Naga nene naga monar nam̃areraena nanene narui naþa ita tesuñã temloge ke naþa asuñã apisayuia, apio apisape ‘Nam̃areraena Keviu.’ ”

¹¹ La amilan manene naga sanene narui, komin naþa naga kila suri nene yam piavi rui, ana kila narui la amlelaga ea.

¹² Ana siraunia, pogos naþa Pilip naga pa mlologon nasuþenena kiena ne Ntewa pan la, a mlologon m̃ena ga kia kiena ne Yesu Kristo, ana la amlelaga e kiena visena narui, ana yerm̃ene lala amio sira lala, la punu ga apa e nakeena.

¹³ Pimi tol m̃ena yaru nene Saemon, naga m̃ena ga mlelaga, ana la amligan naga pa e nakeena. Siraun naga nene, silaga naga su ga lavisi, pe sinamaran pa Pilip, naga suñã milan manene luen ga kile lala a pupia yuñãena lala nam̃areraena kiena ne Ntewa naþa Pilip naga suñã kila ke ne.

¹⁴ Ana pe yam piavi re poli, visena na suri la nene naþa molue e nini, pano-o tol li nalologena lala garu Yerusalem, apisape le Samaria m̃ena ga lala, nanagane la amlelaga e Ntewa rui. Ana li nalologena la nene la apisayuia, apisu sane popon avitetalia Pita amio Yoane vena lalua ava akaten la, ana lalua akilali naþa avisuveve suri la nene.

¹⁵ Ana pogos naþa la apito am̃alivin la garo Samaria sanene, ana lalua apu þarila, a lalua amlenwo la vena Ntewa ligan Ninuna Wa vitom van la.

¹⁶ Ana lalua amlenwo la sanene, komin naþa sumo ana Pilip naga kila nakee laena e kia kiena ne Suþe Yesu, ana Ninuna Wa naga pe pitomi re e la poli wa.

¹⁷ Ana sanene, Pita amio Yoane, lalua akila sanene pan la narui, ana Ninuna Wa pitomi e la e poglis nene narui.

¹⁸ Ana purm̃aki naþa Saemon nene, poglis naþa naga pisu nalologena la lua nene apu þarina ne yeririna la, naþa amlelaga mare ga na wa, ana kila naþa Ninuna Wa pitomi pan la sanene, ana naga pieluen kiela nam̃areraena nene. Ana naga pa mla kilavaru tai pimi, kian

pan lalua nene vena ul lua nam̃areraena nene naŋa sike e lalua nene,

¹⁹ pisa pan la, pisape “Nanene na, in na sineun nesape amiu lua ala re nam̃areraena nene komŋas van inu, vena inu m̃ena ga nekilia nowu ŋarin yaru lala, vena la akilia atol Ninuna Wa.”

²⁰ Ana Pita naga miyelu kapuruia Saemon, naga pisi m̃arera pania, pisape “Aa, in na taŋatete nela kioṃa kilavaru naŋa ko ositom ke osape okilia oul lua nam̃areraena kiena ne Ntewa ea. ?Ko na okilia oul nalakorenanena naŋa Ntewa naga mla ga sa ga nene pa yaru lala? In na nevisa van ko, kioṃa kilavaru nene ŋisi na amiu lua ava akovio e lele na loge viowaena e kapi.

²¹ Nanagane mepisu kilale ko narui, ana taŋatete metaṃan ko okila yum̃aena nene amio imimi, komin naŋa kioṃa malena pe mesmesu re nena e marana ne Ntewa poli.

²²⁻²³ Peraga, ko na sineṃa pule ga e vielueena lala, a kioṃa mlamulena viowa lala apiar kioṃa malena m̃arera paŋisi. Ko na monar ovilopu ko e kioṃa sitomena viowa la nene, ana ko na monar olen va Ntewa vena naga viewo ko ea.”

²⁴ Ana Saemon naga pisatam̃e Pita lalua Yoane, pisape “!Ake suwala! Visae sanene, inu sineun nesape amiu lua alenwo inu, vena Suŋe naga iila inu vena suri m̃arera la naŋa apisa ke ne, ŋisi na ve imi tol re kiau malena.”

²⁵ Ana nalologena lalua nene Pita amio Yoane, asu towe laa amio yaru la nene, ana asum̃a apisawal suri la naŋa Kristo naga kila, amio visena lala naŋa Ntewa naga pisa, ana siraunia aŋasuŋela, amlilu sina ga kiela mrapa apa Yerusalem. Ana e kiela mrapa komsusa, ana lalua asum̃a amlologon ke nalologena wo kiena ne Yesu e pulkumali lala kiena ne le Samaria lala, ana siraunia lalua apimi aporu ke sina ga garu Yerusalem.

Pilip pisi amio yaru malo tai nae Itiopia

²⁶ Ana poglis naŋa Pilip naga miyum̃ae ke gar Samaria wa, ana navisi kiena ne Ntewa tai pimi m̃alivinia, pisi pania, pisape “Pilip, inu nevisa van ko, nevisave

osum̃alu oyali ova otaveve mrapa naŋa kom Yerusalem, pa metava ma pulkumali nae Kasa.” Ana mrapa nene naga mrapa naŋa pa metava ŋaro e lepas naŋa e yokorena.

²⁷⁻²⁸ Sanene, Pilip mloge visena nini sum̃alu, naga siar pisape va narui. Naga sum̃a mial ke pa sanene, ana milan yaru malo tai naŋa sike e kiena kat naŋa wosi ŋere ke pimi e mrapa nene. Yaru nene sum̃a pulo ke Tusi Wa naŋa Aisea naga siriyuia. Yaru nene, naga pe yerkawa tai kiena ne pupia sira tai nae Itiopia, naŋa la apio sira nini asape Kantes, naŋa kana kinasa apisape naga ŋarin suŋe na kiela purvanua. Yum̃aena kiena ne yaru nene, naga pe navisuaren pupia yum̃aena lala e lepas na kilavaru kiena ne pupia sira kawa nene, a yaru nene, naga pe yaru m̃ena ga tai naŋa sumo rui la akila naga pe kalmaite. Ana e pogos nene, na pito garo Yerusalem rui vena len va Ntewa, ana naga taveve kiena mrapa vena wasuŋe sina va kiena.

²⁹ Ana Pilip naga mlilu m̃a mrapa pano, a yerkawa m̃ena ga nene mialoro e kiena lele na totanoena naŋa wosi ŋere ke ne, ana Pilip pisu naga. Ana Ninuna Wa pisi pania, pisape “Ko otaveve yaru nene, ova ga lavisin kiena kat nene.”

³⁰ Ana Pilip kiriri taveve naga pano, ana pa lavisinia, naga mloge naŋa yaru nene sum̃a pulo ke tusi kiena ne Navisawalena Aisea. Ana Pilip piun tan yerkawa nene, pisape “?Sanape, ko na okilia ke kinas nen visena la ne ko opuloyu ke ne, pona pe opulokilale re poli?”

³¹ Ana yerkawa nene pisatam̃ea, pisape “?Pisi na in na nekilia ve sanape ne, naŋa pe yaru re tai naŋa visawal kana kinasa van inu poli?” Ana naga pisa ke sina ga pa Pilip, pisape “Visae sanene, oula ovami metava e lele na totanoena e nini wa, oto omio inu e nini.” Ana Pilip pa totano amio e kat.

³² Ana visena na Tusi Wa nene naŋa Aisea siriyuia, a naŋa yerkawa nene kilali ke sape wulovia e pogos nene, nane visena ne nane pisa sanini, pisape

“Yaru nene naga sane sipsip tai, komin naña visae atararia vena awem̃aria, naga pa ruru ga moña ga, pona naga sa ga ninus nen sipsip ga tai, naña pogos naña am̃e plan p̃esan ke vilulusia ana pe mlokai re poli.

Ana yaru nene naga sa ke nene narui, naña naga e pogos m̃arera na kiena malena, naga pe pisa re nena kiena visena tai poli, naga pa ruru ga m̃eke na.

³³ *Ana la akila m̃ena ga memawaena pan naga pañisi, ana pogos naña la amlip̃ere naga, la akila pe mesmesu re pan poli.*

Pisi na la apisu sane ve narina re si tai naña naga la kiena kia narui, komin naña lala la akilaro kiena malena e yomarava nini, pimi plas ga rui.” *Ais 53:7,8*

³⁴ Ana yerkawa nene piun kinas nen visena la nene tan Pilip, pisape “Mara, sineun nesape ovisayuli van inu, ane navisawalena nene pisayu ke ne? ?Naga pisayu ke sina ga naga, pona naga pisayu ke ga yaru tañena tai?”

³⁵ Ana Pilip naga pisayu ruru pa yaru nene, siar ruru e marana Tusi Wa naña naga puloyu ke ne, a naga taveve pano-o, pisawal wetelun m̃ena ga lologena wo kiena ne Yesu pania.

³⁶ Ana e pogos nene akiriri m̃a ke e kat wa, lalua ataveve mrapa apano, apimi atol e yo tai naña wii tai m̃eke ea. Ana poglis naña yerkawa nañani m̃al wii nene, pisa pa Pilip, pisa pisape “Inu sineun nesape okila nakeena van inu na, okira, wii tai ne m̃eke ne. ?Sanape, suri lañasia suwo ke italua na wa, naña tañatete neva e nakeena e nene, ne?”

³⁷ [Ana Pilip pisatam̃ea, pisa sanini, pisape “Visae ko olelaga kemua e sinem̃a wetelu, inu nekilia nekila nakeena e ko.”

Ana yerkawa nene pisape “Ee, inu nemlelaga e Yesu Kristo naña naga pe narina ne Ntewa kemua lelaga.”]

³⁸ Ana naga kila kiena kat pa ruru e nene, ana lalua amligan metava e lele na totanoena nene atapul apito tano, apito

asum̃alu ase e wii, ana Pilip kila nakeena e yere Itiopia nene.

³⁹ Ana pogos naña lalua amolue sina ga e wii nene, ana Ninuna Wa pimi p̃erelua Pilip veraga pano, ana yerkawa nene pe m̃a re si poli. Ana naga pa si teke e kiena kat, mla ke sina ga kiena mrapa pano, ana kekara a kiena sitomena mloge po pañisi.

⁴⁰ Ana Pilip, sa naña pa narui, milan ga naña naga sike garu pupia pulkumali naña Astoto rui. Ana naga sum̃a mialoro ke pito garove, mlologon nalologena wo kiena ne Yesu e pulkumali la moki e lepas nene, a naga pa m̃ena ga tol pulkumali keviu naña Sisaria.

9

Ntewa pilon Sol pimi pe yeririna kiena ne Yesu
Yum̃aena 22:4-16, 26:9-18

¹ Ana e pogos nene, Sol ne nanene naña sumo ana naga sum̃a kila kare ke li nalelagaena la garu Yerusalem pañisi, naga sinena kar ke nalogena kiena ne Supe la nene na wa, ana naga sum̃a pisaar ke ga wa pisape p̃isi na naga we moñar la. Sanene e pogos tai, naga pa pisu yerkawa kiena ne yaru wa lala,

² ana piun naiilaena lañas tania. Sol naga sinenan pisape yerkawa nene naga siri m̃aki lañasia vano va li nasumonena lala na yum̃a na leniena kiena ne le Yu lala, nae garu Tam̃askas, vena visawal van la visave la monar atam̃an Sol vito garo pula, vena kale yeririna lala naña la asike loyuña e ya naña la apio e pogos nene asape “Mrapa Viu,” nane li nalelagaena lala. Sol na kila sanene komin naña naga kiena sitomena pisape vito uarar la, yerm̃ene lala amio sira lala, ana were la si awasupe ava ma Yerusalem, e naña la ase sumo p̃isi na apureure, vena koven la ava e yum̃a nakoena. Ana yerkawa nañani siri sa naña Sol piunia, kian pania.

³ Ana Sol naga p̃ar m̃aki la nene, ana mligan yo Yerusalem, ana pito ke garo Tam̃askas. Ana Sol lala la amial m̃a apano-o e legiena lañasa, a pogos naña apimi lavisin pulkumali nene Tam̃askas,

ana naga milan ga naḡa pupia yomerarava kiena ne Ntewa tai molue metava e sinapane tegoli yo naḡa naga mial ke ea.

⁴ Pogos naḡa yomerarava nene tegoli Sol sanene, ana kila naga mloru pito tano e porotano, ana naga mloge pulgon yaru tai pis pania, pisa pisape “!Sol, Sol! ? Vanon ya ne ko osum̃a okila manene piowa pan inu sa naḡa ko osum̃a okila ke ne?”

⁵ Ana pogos naḡa Sol naga mloge naviunena nene, ana naga piuntam̃e sina ga, pisape “?Ana Suḡe, ko anene ḡa?”

Ana naga pisatam̃ea, pisa pisape “Inu Yesu nini naḡa ko osum̃a okila kare ke naga, in ne na nini.”

⁶ Ana Yesu pisa sina ga pania, pisape “Ko, osum̃alu, oyali ova garu um̃a Tam̃askas, ana ḡisi na yaru tai imi visawal van ko visave ḡisi na ko okila ve sanape.”

⁷ Ana yeririna la naḡa la asum̃a ataveve ke Sol e pogos nene, la m̃ena ga amloge visena la nene, ana la pe am̃a re yaru naḡa pisa poli, ana la sinela kurkur paḡisi, la asum̃alu wowe ga asikena, la pe kiela visena na visaen re si poli.

⁸ Ana siraun suri nene, Sol naga kila sa naḡa Yesu pisa. Naga sum̃alu sina ga, ana pogos naḡa pikeḡa kilamarana, naga pe pisu re si suri tai poli, naga sa naḡa pe kilamara ḡala ga narui. Suri nanene kila narui ana la atarar limana, aḡure naga, ava garu Tam̃askas.

⁹ Ana la apa aporu garu um̃a e yo nene, ana Sol naga pe kilamara ḡala m̃aga sanene pano tol legiena telu, a e m̃ena ga e pog nene, naga pe kinana re poli, a pe mun re m̃ena ga sur tai poli, naga monsilu ga.

Ananaias pa mlotuwo Sol

¹⁰ Ana e yo naḡa Tam̃askas, nalogena tai sum̃a ea, kiena kia Ananaias, ana naga pisu suri tai sa naḡa m̃eniena tai naḡa Suḡe Yesu naga kila lologia naga pania, naḡa pio naga, pisape “Ananaias.”

Naga pisatam̃ea, pisape “Ya ne Suḡe, in nanini.”

¹¹ Ana Suḡe pisa pania, pisape “Osum̃alu, oto garo likan pulkumali nene, ana otaveve narin mrapa naḡa la apisa

apisape ‘Mrapa Mesmesu,’ ana ova e yum̃a m̃ana ne yaru nene Sutas. E m̃ana um̃a, ana oviun yaru nae Tasas tai, naḡa kiena kia Sol. A yaru nene, nanagane ga ne naga mlen ke e nene, ana naga pisu m̃ena ga suri sa naḡa m̃eniena,

¹² naḡa e kiena navisuena nene, naga pisu ko ke narui, ana naga m̃al ko opa loyum̃a puna, ko omligan lumom̃a e naga, vena kilamarana imi wo sina.”

¹³ Ana pogos naḡa Ananaias mloge visena la nene, naga sitom paḡisi, naga pisa pisape “Suḡe, yaru la moki naḡa apisayu ḡelaga viowa kiena ne yaru nene pan inu ḡisi rui, naḡa naga kila ke piowa pa kiom̃a nalelagaena wa lala garu Yerusalem,

¹⁴ ana nanagane, nemloge naḡa naga pimi Tam̃askas rui, naḡa yerkawa kiena ne yaru wa lala la atam̃an rui vena naga imi uarar imimi la naḡa memlotun ko.”

¹⁵ Ana Suḡe pisa pa Ananaias, pisape “Ve omarau re, ova ga, komin naḡa nemligan lua naga sum̃alu rui, nepisaar nesape naga ve kiau yaru na yum̃aena tai, a ḡisi na naga kilia war kiau kia va e yo punu ga va yolai la naḡa pe ape le Israel re la poli, a visawal va tol kiela ḡarin suḡe lala, a visawal towe m̃ena ga van le Israel lala.

¹⁶ A yoko in na nekila naga visu kilale m̃ena suri m̃arera si tai nene, sane pogos naḡa yoko naga sum̃a visawal ke kiau kia, yoko naga monar loge viowa e suri viowa la ve moki naḡa la monar aimi vania, vanon ga kiau kia nene.”

¹⁷ Ana Ananaias mlogear visena la nene, naga pano pa tol yum̃a nene naḡa Suḡe pisa pania, naga pa loyum̃a, pisu Sol, pu ḡarina. Ana naga pisa pania, pisape “Wolai Sol, kieta Suḡe, naḡa Yesu, naḡa naga porun ko garo mrapplepa, naga ke nane mligan inu nepam narui, vena nelenwo ko ana kilamaram̃a kilia imi wo sina, ana vena Ninuna Wa vitomi kokonia ko.”

¹⁸ Ana naga mlenwoia, a veraga ga, narin suri naḡa sane kilekilerana na ika mloru petan kilamarana veraga, ana kilamarana pimi po sina ga. Ana Sol sum̃alu, ana e ruru e poglis nene, aḡere naga apano akila nakeena pania.

¹⁹ A naga kinana sina ga, ana pimi mloge si po, puriuna m̄arera sina.

Sol siar mlologo garu Tamaskas

Ana Sol sike si legiena la p̄asia garu Tamaskas amio nalogena lala kiena ne Yesu la naṣa la nae e yo nene.

²⁰ Ana pe piavi re poli, naga suṃa pa loyuma e yuma na lotena lala kiena ne le Israel lala e yo nene, naga pa loyuma ana mlologon ke Yesu pisape naga narina ne Ntewa kemua lelaga.

²¹ Ana yeririna la mokliu naṣa amloge visena kiena ne Sol, ana la amilan paṣisi, ana la apiuviun ke tan la, apisape “!Kee suwala! Nanua sumo na yaru ne nanene naga m̄e kare yaru la garu Yerusalem paṣisi, vanon naṣa la apisa ke kia ne nane naga suṃa mlologon ke si ne. A naga pimin m̄ena ga suri nene e yo nini, vena naga uarar yaru la nene, vena were la na awasuṣe si ava puna ne p̄arin yaru wa lala garu Yerusalem, naga pimi pe taṣena narui. ?Nanagane na ya ne kila naga sanene narui?”

²² Ana Suṣe naga miila visena kiena ne Sol pimi m̄arera ruru po laa narui, a naga suṃa taulu yaru la moki laa narui, naṣa naga suṃa pisa ruru merarava po paṣisi pan la naṣa pisape Yesu, naga Navisaarena kemua lelaga napo. Ana le Israel taṣena la naṣa asike garu Tamaskas, la pe kiela suri na visatameen re si poli, vena la avisaluṣar visena kiena ne Sol la nene, ana kiena visena lala la ataulu make ruru nena kiela sitomena viowa lala.

²³ A pogos laṣasia p̄arovia, ana Sol naga suṃa mlologo ke sanene, ana le Israel la nene asuṃalu apimi lele taaga, ana apiran ruru asape aweṃar naga mare.

²⁴ Ana legiena punu ga a lemalo punu ga la apa asuṃate ke naga e yepas nen pupia pulutava lala e pupia purkove na pulkumali keviu nene, visae naga kilali visave ure, ana la akilia aweṃar naga. Ana visena nene pimi tol Sol,

²⁵ ana yemalo tai, la naṣa asike amio naga la atar naga, amligan m̄ene pupia karo tai, ana la amligan malumun naga

pito pito tol yo tano lepas na va vanua e pupia purkove na kumali keviu nene.

²⁶ Ana Sol mligan yo nene Tamaskas, ana p̄asuṣe si pa Yerusalem.

Sol p̄asuṣe pa Yerusalem

Ana pogos naṣa Sol pam tol sina Yerusalem, ana kilali naṣa va viranar naga amio li nalogena lala, ana la nene pe amlelaga re e naga asape naga pe nalogena lelaga kiena ne Yesu poli, ana la yepela p̄ilinia, amaraun naga paṣisi.

²⁷ Ana lala tai nene, kiena kia Panaṣas, naga pisu sane Sol naga pe lelaga, ana kilali naṣa miila naga, ana naga kila kiena mrapa naṣa naga kilia suṃalu se marana ne nalogena lala. Ana lalua apano, ana Panaṣas pisawal pan la sanape naṣa Sol naga pisu kieta Suṣe e mrapa a naṣa kieta Suṣe pisi pan naga, a naga pisawal m̄ena ga naṣa Sol naga m̄areran manene naṣa mlologon kia kiena ne Yesu garu Tamaskas.

²⁸ Ana lala amloge kiena visena, ana la akekarania, ana Sol sike amio la, a naga suṃa pa e yo punu ga garu Yerusalem, suṃa mlologon ke kia kiena ne kieta Suṣe Yesu, naṣa naga pe sinena kurkur re nena ga.

²⁹ Ana naga pisi ke amio le Israel la nene naṣa la asuṃa apisin ke ga visena nae Kris, ana naga amio la asuṃa apilup pan la e visena paṣisi, pano pano asitom asape popon aweṃar naga mare.

³⁰ Ana pogos naṣa kieta wolai la p̄asia amloge suri nene, ana la aṣure Sol pito poga ga garo e pulkumali naṣa Sisaria, ana siraunia la apisi maro amio, ana la amligan lua naga p̄asuṣe si pa kiena yo, pulkumali naṣa Tasas.

³¹ Siraun e pogos nene, ana nalelagaena lala naṣa asike yo punu ga gar e lepas nae Yutea, a garu Kalele, a garu m̄ena ga Samaria, la apisu sane pog malumu towe pan la narui. Ana Ninuna Wa naga suṃa kila po pan la, miila la, kila kiela suṃare kapur pimi m̄arera, a kila ke m̄ena ga nalelagaena lala la apimi ape moki la sane, ana nalelagaena la nene punu ga asuṃa apatanon ke kieta Suṣe silaga.

Garu Lita, nalologena Pita naga kila ruru lana ne Aeneas

³² Ana Pita naga sum̃a mial e pulkumali la moki e lepas nene, naga sum̃a mlologo, ana e si e pogos tai, naga pitomi pisu li nalelagaena wa la naṗa asike garu pulkumali naṗa Lita.

³³ Ana pogos naṗa naga pa tol yo e nene, naga m̃al yaru tai naṗa yepena komṗas mare, m̃eke ga e m̃ana tog tol kas orely rui, pe mial re si poli. Yaru nene kiena kia Aeneas.

³⁴ Ana pogos naṗa Pita pisuia, pisi pania, pisape “Aeneas, nevisa van ko, nevisave nanagane Yesu Kristo kila tasnema wo si narui. Osum̃alu, osiloar moṃa tog.” Naga pisa sanene, ana Aeneas naga sum̃alu veraga, yepena po nenaga.

³⁵ Ana yeririna la punu ga naṗa asike e pulkumali naṗa Lita, amio la naṗa asike e yotop naṗa Seron, apisu yaru nene naga pimi po sina, la apilon kiela malena lala ava e Ntewa.

Garu Soṗa, Pita kila Toreka mali sina

³⁶ Ana e yotop nene ana pulkumali tai m̃eke ea, kiena kia Soṗa, ana nalelagaena la tai naṗa sike ea, naga sira naṗa kiena kia, Tapita. Naga nene kia tai naṗa e visena kiena ne le Kris lala la apisape Toreka, naṗa kana kinasia, kia kiena ne suri mali nowo tai naṗa tia. Sira nene, naga pe sira tai naṗa naga sum̃a kila ke yum̃aena nowo la silaga, naga sum̃a miila luen ga yaru la naṗa pe kiela suri re poli.

³⁷ Ana e pogos nene, maiena tai tol sira nene, ana mai m̃aga pano pano-o mare, ana akevan tasnena, ana amligan naga m̃eke e m̃ana loyuma na metava, vena ataginia.

³⁸ Ana pogos naṗa nalogena lala nae e yo nene Soṗa la amloge visena naṗa apisape Pita naga sike ga lavisi, e ga e pulkumali taṗena nene Lita, la apitalia yaru la lua amiyal kawa apanonia. Ana lalua apano-o aporun Pita, la apiun m̃arera pania, apisape “Imimi sinemimin manene mesape oimi pun imimi vilaga.”

³⁹ Ana sanene Pita sum̃alu, amio la lua nene, apano. Pogos naṗa pimi m̃alivin la,

la aṗure naga pa e loyuma na metava e naṗa la amligan sira naṗa m̃eke ea. Ana letano lala apimi, amiyervivia, la asuma atagin ke rui, a pogos naṗa Pita pimi, la apian naga e kulsota nowo la naṗa Toreka naga suluia e pogos naṗa naga mali ke ga wa amio la.

⁴⁰ Ana ṗisi na Pita pisa pan la pisape la amolue ava vanua sumo wa, a pogos naṗa la apa vanua, ana naga kinai, ana mlen. Ana ṗarlua ṗarina kira pisu tasnena ne sira naṗani, naga pisi pania, pisa pisape “!Tapita, osum̃alu!” Ana sira nene pike ṗa kilamarana veraga, ana pogos naṗa pisu Pita, naga ṗarlua tom̃alu totano.

⁴¹ Ana Pita tarar limana, miila naga sum̃alu, ana naga pio nalelagaena lala, amio letano la nene. Ana la apimi loyuma, ana naga pisa pan la, pisape “Nanene narui, kiamiu sira nanini, naṗa Ntewa naga kilamalia si naga.”

⁴² Ana lologena na suri keviu nene telivi piora e yo naṗa Soṗa, ana yeririna la moki naṗa amlelaga e kieta Suṗe vanonia.

⁴³ Ana siraunia, Pita naga su piavi towe laa garu Soṗa sane, puna yaru tai, kiena kia Saemon, naṗa naga pe yaru na yum̃aenen suri lala e kulus nen suri mali lala.

10

Ntewa pis pa Konilias

¹ Ana pulkumali keviu taṗena tai m̃eke garo losi e lepas nene, kiena kia Sisaria, a yerkawa tai kiena ne yaru na mara lala nae Rom naga sike e yo nene, kiena kia Konilias. Naga sum̃a pisuar ke ṗegas nen li na mara la nene tai, naṗa yaru la tol ponotia taaga, a la apio kiena ṗegas nene apisape “Pegas Nae Italia.”

² Yerikawa nene, naga pe yeririna wo tanea tai nene, a naga amio namratava la m̃ana, la silaga amlen pa Ntewa, a la amlotun naga, a silaga la asuma amiila ke le Israel la naṗa pe kiela suri re poli, ana la asuma aṗarpel ga pupia nalaena la pan la.

³ E legiena tai, e ruru e pog na leniena na yepekilavi, e mrae telu, ana naga pisu suri tai sa ga naṗa m̃eniena, naṗa

Ntewa naga kipian naga ea. E kiena navisuena nene, naga p̃isu meraravan pãp̃isi, nãpa naga p̃isu navisi kiena ne Ntewa tai pitomi e m̃ana loyuma, ana pio naga, pisa pisape “!Konilias!”

⁴ Ana pogos nãpa Konilias naga p̃isu navisi nene, naga sinena kona pãp̃isi, ana naga p̃isu manene navisi nene, naga pisa pisape “?Ya ne?”

Ana navisi nene pisatamea, pisape “Ntewa naga sum̃a mloge ke kiõma leniena la rui, ana naga pe sinena p̃esan re kiõma p̃elaga wo la poli nãpa ko okila ke pa la nãpa limala korena, ana naga kekarania a sitom̃al ko ke na wa.

⁵ Ana naga pisa pan ko, pisape ko na monar oligan kiõma yeririna lãpasia ava garu kumali nãpa Sõpa, vena avio yaru tai, nãpa kiena kia wetelu, kien kia Saemon Pita, vena naga imi e yo nini.

⁶ Ana yaru nene naga sike puna yaru tãpena tai, naga kiena kia m̃ena Saemon, naga m̃ana yuma m̃eke garo lavisin sive, naga yaru na yumaenen suri lala e kulus nen puluk.”

⁷ Ana navisi kiena ne Ntewa nene pi-sawal pa pania, ana kovio sina ga. Ana Konilias pio kiena yaru na yumaena la lua, amio m̃ena ga kiena yaru na kilaen mara tai nãpa naga m̃ena ga pe yaru na lotunen Ntewa, nãpa naga sum̃a amio naga silaga, pisuar naga, ana yeririna la telu nene apimi puna.

⁸ Ana naga pisawal sur punu ga nene pan la telu nene, siraunia ana naga mli-gan la apa garu pulkumali nãpa Sõpa, vena aure Pita imi.

Pita m̃ena ga p̃isu suri tai sa nãpa m̃eniena

⁹ Ana legiena na peni, pogos nãpa la nene amial ke apimi Sõpa na wa, Pita naga sike na, ana naga sinenan pisape kila leniena na kolpae, ana sa nãpa silaga, naga pa metava e yotop na wosoyuma nãpa naga sike ea.

¹⁰ Naga sike e nene wa, ana naga mloge visokaria, ana naga pisape la aviran kapi. Ana pogos nãpa la asum̃a akila ke kana kinanena wa, ana Ntewa pian naga e suri tai sa nãpa naga m̃enia.

¹¹ Naga p̃isu nãpa ma e peni pike, ana m̃al suri tai sa nãpa pupia kulmrae, sum̃a pitomi ke tano e yomarava nini. Naga p̃isu nãpa la asum̃a atarar ke mrapura la varoka, ana la amligan malumun ke pitomi tano.

¹² Ana loyuma e kulmrae nene, Pita p̃isu sur mali tãpena la punu ga asike ea, a amio m̃ena ga suri tãpena la nãpa Ntewa naga kila ape suri wa nãpa ve le Israel la ve akan re, sane lom̃ara lala, a nopi lala, a manu lala.

¹³ Ana naga mloge m̃ena ga pulgon yar tai pisa pania, pisape “Pita, osum̃alu, owem̃ar suri mali tai nene, ana okania.”

¹⁴ Ana Pita pisa, pisape “E Ntewa, peraga yo, tãpatete nena ga ve sanene, komin suri mali la nãpa asike e nene ana pe nakanli re lãpas poli wa, nãpa imimi le Yu lala mepalia ga pe makakan re poli.”

¹⁵ Ana naga mloge ke sina ga pulgon yar nãpani, pisa pisape “Suri nãpa inu Ntewa nepisa rui nesape mekiki ga, ana ko na tãpatete si ovisa ovisave namname.”

¹⁶ Ana suri nene molue pimi yam lua sanene, p̃isi, siraunia, yaru telu nena, ana Pita p̃isalũpar m̃aga, ana siraunia, pupia kulmrae nene p̃asupe ke sina ga pa metava ma e peni.

Pita tol kinas nen suri nãpa naga p̃isuia

¹⁷ Ana Pita sum̃a mloge piowa pãp̃isi, naga sum̃a sitom manene laa pisape popon sa tol kinas nen sur nãpa m̃alivinia, ana pogos nãpa naga sitomveve ke ga wa, yaru kiena ne Konilias la telu nãpa naga pitetalia la apimi, apimi aporu Sõpa. Ana la apiun yuma kiena ne Saemon tan yaru la p̃asia, ana la akipian la ea, ana la apimi, asum̃alu asum̃a e mratava na yuma m̃ana ne Saemon.

¹⁸ Ana la apio apisa apisape “?Ei, yaru tai kiena kia Saemon, nãpa kiena kia tãpena apisape Pita, naga sike amio amiu e nam̃a, pona peraga?”

¹⁹ Ana pogos nene Pita naga tõma sitomyu ke kinas nen suri nãpa p̃isu sane m̃eniena wa, ana Ninuna Wa pisa pania, pisape “?E, ko omloge m̃aga? Yaru la telu asum̃a akale ko ke nagane, la ne nane asum̃alu asike vanua, apio ko ke ne.

20 A ko osuñalu, oyal kawa ga ototano vena ovisu la telu nene, ana visae avisave otaveve la, ana ve okilali re naña ovisaluñaria, ko na monar otaveve la, vanon in na nemligan la apimin ko.”

21 Ana Pita suñalu pito tano vanua, ana pisu la telu nene, ana naga pisi pan la, naga pisape “Inu naña akale inu ke ne. ? Amiu sinemiun inu vanon suri tai yo?”

22 Ana la apisatamea, apisape “Ee, yerkawa na kilaen mara nene, Konilias, naga pitetalia imimi mepimin ko, vena oimi garu m̃ana, vena naga loge re visena lañas tan ko. Navisi kiena ne Ntewa tai naga pisa pania pisape naga vio ko oimi puna sanene. Kiamimi yerkawa nene, naga pe pe yere Yu re tai poli, ana naga pe yaru mesmesu tai naña naga tarar luen ga kiamiu pogos na leniena la punu ga silaga, ana le Israel m̃ena ga lala nae e kiamimi yo nene akekaran naga pañisi. Naga ke naña pitetalia imimi mepimin ko narui, nane mesike e nini vanon ne.”

23 Ana vanon naña mrae pito ke tano rui, ana Pita ãerear la nene am̃eke amio naga e yum̃a naña naga sike ea, vena kolulagi ke ga wa ana la punu ga atove.

Pita pa mialiali Konilias

E yemlagi ke sina ga, Pita pa amio la nene, amio ke m̃ena ga nalelagaena tañena lañasia nae Soña, la apa m̃ena ga amio la.

24 La apano, yemalo wola ga mrapa komsusa, la amono, ana yemlagi ke sina ga la apa aporu ga Sisaria nene na wa. E yo nene, Konilias sike amio namratava m̃ana lala, a naga pio ke m̃ena ga kiena erau lañasia vena la aimi asuñate Pita lala.

25 Pogos naña Pita pimi tol um̃a m̃ana ne Konilias, Konilias pa pitawea, mloru pito tano e lana, sa naña mlotu naga.

26 Ana Pita tarlua ke sina ga pa metava, pisa pania, pisape “E, awis, ko osuñalu. Opisus ke ne, in na nepe yeririna ga.”

27 Ana Konilias suñalu, ana lalua asiar asunu lilue, ana apa loyuma, naña e pogos ke nanene narui Pita pisu yeririna la mokliu naña asuñate ke naga loyuma.

28 Ana Pita pisi pan la narui, pisa pisape “Amiu asuñala akilia ke naña e lepas nen kiamimi lotuena imimi le Yu lala, naña imimi na tañatete meva loyuma e yum̃a m̃ana ne yaru tañena la naña la pe ape le Yu re poli, pona meve erau wo memio la. Ana nagane, Ntewa naga pian inu merarava po, pisape pe pon re nevisu viowa e yaru lañasia naña nevisave la apiowa ga, pona la ape kororaki ga.

29 Komin suri ne nanene naña Ntewa naga pian inunia, inu pe nepisaluñar re la nene e pogos naña apimin inu poli, nesape tañatete neim̃asu, ana nepimi ga. ?Ana in na sineun nesape amiu avisawal li van inu, avisave amiu apio inu asape neimi vanon ya?”

30 Ana Konilias pisatame Pita, pisape “Ee, potena pañisi. Nanagane legiena telu ãaro pa rui, mesmesun e pog suri nene narui, e mrae telu naña yepekilavi, in na netoma ga m̃au loyuma, nesuma nekila ke leniena na yepekilavi. Nesuma nemlen ke sane, ana nemilan ga navisi tai naga pitomi suñalu ga sike e marau, naña naga m̃ana kulsota pilavila po na po.

31 Ana naga pisi pan inu, pisa pisape ‘Konilias, Ntewa naga sum̃a mloge ke kioñia leniena la ne, a naga sum̃a sitoñial ke m̃ena ga kioñia ãelaga wo la naña ko osuñala okila ke pa la naña pe kiela suri re poli.

32 Ana ko na monar okila sanini: ko na monar oligan yaru lañas ava Soña, komin yaru tai, vena naga wasupe ke sina ga amio la aimi puma. Yaru nene, kiena kia wetelu Saemon Pita, a naga pa sike e yum̃a m̃ana ne yaru tañena naña naga m̃ena ga kiena kia Saemon, naña naga, kiena yum̃aena naga miyumaen ke suri lala e kulus nen puluk. Pisi na kioñia yeririna lala akilia alual yum̃a m̃ana ne Saemon nene garo lavisin sive.’

33 Navisi nene pisi pan inu sanene, ana nane kila na nepitetalia ke yaru la nene apitoñiasun ko vilaga, a nepisa potena pan ko pañisi komin kioñia nasinewoena naña ko opam pun imimi e yo nini. Ana ita punu ga tesike e yo nini e marana ne Ntewa, vena imimi meloge visena naña

Ntewa pisa pan ko vena ko ovisa van imimi.”

Pita pis pa Konilias lala

³⁴ Pita mloge visena la nene, ana naga pisa pan la, pisapenua “Po pañisi, a nepisa potena pañisi naña amiu amla pogos nene pan inu, vena nekilia nevis van amiu. Nekekara pañisi, komin naña nanagane nepisu kilale sa naña lelaga pañisi naña Ntewa naga pe p̄aveve re yaru tañena la poli.

³⁵ Yere Israel, pona yaru naña pe molue re kome lus nene poli, pona yer pe ke sina ga, ana visae naga vatanon Ntewa, kila ga sur la naña Ntewa naga sinenania, p̄isi na Ntewa kekaran naga.

³⁶ “Visena naña Ntewa naga mligan pimi pan imimi le Israel lala, amiu akilia p̄isi rui, naña naga lologena wo tai naña pisawal pisape yeririna kilia tol sum̄are naña pe lelaga e Yesu Kristo, naña naga pe Supe kiena ne yeririna punu ga na yomarava nini.

³⁷ A amiu akilia kana suniena nena, naña nanua sumo, ana Yoane Nakeena naga pimi mlologon kiena nakeena nene, a siraun naga nene, ana pupia suri ne m̄alivin ita, siar garo Kalele, pano pano tol make ga yo punu ga e lepas naña Yutea.

³⁸ Pupia suri nene, nane Yesu nae Nasaret nene amio yunfaen kerkeviu la naña naga, naña Ntewa naga mligan kiena Ninuna Wa pan naga, pulemamaga ruru keviu e naga, a naga mligan nam̄areraena keviu pania, ana Yesu naga sum̄a pa kare ga e yo punu ga, kila ke yunfaena wo lala a kila ruru ke m̄ena ga la naña Yermare naga sum̄a kila kare la ke pañisi. Yesu kila ke suri la nene, komin naña Ntewa naga sike amio naga.

³⁹ “Ana suri la nene naña naga kila garu Yerusalem, a e lepas tañena m̄ena ga lala e kiamimi purvanua imimi le Yu lala, imimi li nalologena la, mesum̄a mepisawal ke suri la nene pan yeririna lala. Imimi mesum̄a mepisawal ke naña kiamimi yerka lala la asuar naga e laki torovia, ana naga mare,

⁴⁰⁻⁴¹ ana e kana legiena na telu, Ntewa kilamalia sina ga naga. Ana Ntewa naga kila imimi lañasia mepisu naga, a imimi metotano memio naga, imimi mekinana a memun wii memio naga. Ana Ntewa naga pe tam̄an re naga imi vaeme sanene va yaru la punu ga poli, ana naga vaemen imimi ga la naña Ntewa naga mliganar imimi sanene, vena mevisawal va yeririna tañena lala mevisave Yesu naga mal si rui.

⁴² A pogos naña Yesu sike amio imimi sanene, naga pisi pan imimi, pisape imimi monar melologon kiena lologena wo va yeririna punu ga, a imimi monar mekila merarava van la mevisave Ntewa mliganar naga taaga vena naga lipe yeririna lala, sane la naña amare p̄isi rui a amio m̄ena ga la naña yokorena la amal ke e pogos nalipeereena wa.

⁴³ Nanene naga Yesu ke ga naña navi-sawalena lala apisawal naga nanua sumo rui, naña la apisape p̄isi na Ntewa naga viewo mlamulena viowa lala kiena ne yeririna la naña la amlelaga e kiena kia, la aviawa e naga.”

Ninuna Wa mloru pitomi e la

⁴⁴ Pogos naña Pita sum̄a pisi ke sanene wa, ana amilan ga naña Ninuna Wa pitomi tano pa tol la nini naña asum̄a amiyagogon ke naga.

⁴⁵ Ana li nalelagaena tañena la naña amligan yo Soña la amio Pita apimi, ape le Yu lala, ana lala amilan manene la suri nene, komin naña pimi tol pogos nene, ana lala amape Ninuna Wa naga pe nalaena tai naña Ntewa mligan ga pan le Yu lala.

⁴⁶ Ana nanagane, ana apisu la nini naña pe ape le Yu re poli, apisi e visena tañena lala, asum̄a amiyeluar manene ke Ntewa keviu pañisi, ana akilia asape Ntewa mla m̄ena ga Ninuna Wa pan la naña pe ape le Yu re la poli.

⁴⁷ Ana Pita pisi pan la naña amio naga, pisape “!Amiu apisu ke ne! Nanagane, lala nene akus Ninuna Wa sa ke ga naña ita tokus sumo. Sanene, ana tetapatete m̄ena ga tevisaluṗar la tevisa ve tekee la re e wii.”

⁴⁸ Ana Pita pis pan Konilias lala, pisape akeela e kia kiena ne Yesu, ana p̄isi na, la akeela.

Ana la am̄areran m̄ena ga pa Pita vena naga sike re laa amio la wa e legiena si laṗasia.

11

Pita mla navisayuena pan nalelagaena lala garu Yerusalem

¹ Ana pe yam piavi re poli, ana lologena nene pano-o tol nalologena taṗena lala garu Yerusalem amio m̄ena ga nalelagaena taṗena lala e lepas wetelu na yo Yutea, pisape yeririna laṗas naṗa pe ape le Yu re poli naṗa lala amlelaga e lologena wo kiena ne Ntewa rui.

² Ana nalelagaena laṗas nae garu Yerusalem lala asitom manenea apisape nalelagaena taṗena lala naṗa pe ape le Yu re poli, la m̄ena monar ave ṗaviu vena ave sa le Yu lala, ana pogos naṗa Pita naga pavini ma Yerusalem la apisa nene kare naga piowa paṗisi.

³ Lala apisa pania, apisape “?Sanape naṗa ko opa osike omio yeririna kar lala naṗa pe ape ṗaviu re poli, naṗa ko okinana ke m̄ena ga omio la?”

⁴ Ana Pita naga pisi pan la, siar e kana purṗes nena, naga pisawal ruru suri punu ga pan la, naga sun pan la sanini, pisape

⁵ “Nanua sumo, nesike Soṗa, ana pogos tai nesuṗa nemlen. Nesuṗa nemlen sanene pano-o netopopog ga neteke narui, ana nepisu suri tai sane pupia kanus tai, naṗa naga molue metava ma e peni pitomi tano, naṗa asu m̄a atarar ke mrapuna varoka, asu m̄a amligan malumun ga pitomi tano, naga pitomi tano lavisin inu.

⁶ In na nepisu ruru loyumuṗa e kanus nene, ana nepisu sur mali lala na ur̄na amio suri mali lala na yom̄arua, amio lom̄ara lala a nopi lala, amio manu lala, la asike loyumuṗa ea.

⁷ Nesuṗa nepisuvisu ke sanene, ana nemloge pulgona yaru tai pisi pan inu, naga pisape ‘Pita, ko osuṗalu, oweṗar suri tai nene, okania.’

⁸ Ana nepisape ‘!Peraga Suṗe, taṗatete ve sanene! Suri la ne sanene naṗa pe mesmesun re nena akan poli, a naṗa imimi le Yu lala memlonia, nesuṗa nemilon ruru silaga.’

⁹ “Ana nemloge pulgona naṗa pitomi metava e peni naga pisi sina pan inu, naga pisape ‘Suri naṗa inu Ntewa nepisa rui nesape naga mekiki ga, ko ve ovisa re si ovisave naga namname.’

¹⁰ Nemloge visena na m̄alivin inu sanene yam telu p̄isi, ana kanus nene amio suri la naṗa asike ea aṗure si pa metava.

¹¹ “Ana e ruru nena ga e pogos nene, yeririna la telu apimi aporu e yuṗa naṗa imimi mesike ea, naṗa yaru nae garu Sisaria tai naga pitetalia la telu nene apimi vena aure inu neva sina nemio la.

¹² Ana Ninuna Wa naga pisi pan inu, pisa pisape ‘Ko na ve ositom re ovisave ve okekaran re naṗa ova omio la telu nene,’ ana inu nepa ga, a orueta taṗena la orai nena nini nae Soṗa la m̄ena ga apimi amio inu. Imimi mepano-o, meporu Sisaria, ana lala aṗure imimi mepa e yuṗa m̄ana ne yaru nene, Konilias.

¹³ “Ana mepa loyumuṗa, naga sun pan imimi, pisayu sanape naṗa naga pisu navisi tai m̄alivinia suṗalu nenaga se marana loyumuṗa e m̄ana yuṗa, ana navisi nene pisi pania, pisa pisape ‘Ko oligan visena va garu Soṗa, vena yaru naṗani Saemon Pita naga monar imi visu ko.

¹⁴ Yaru nene naga imi visawal lologena tai van amiu ana visena nene naga kilia tamalia ko amio na mratava mom̄a lala.’

¹⁵ “Ana pogos naṗa Konilias naga pisi p̄isi, inu towe re nepisi pan la, ana e ruru nena e pogos naṗa nesuṗa nesiar nepisi ga na wa, ana Ninuna Wa pitomi e la sa ga naṗa pitomi ṗesan e ita nanua sumo rui.

¹⁶ Nepisu suri nene, ana nesitom̄al visena kiena ne kieta Suṗe, naga pisa nanua sumo, pisape ‘Yoane naga kee amiu e wii, ana ve ve piavi re, ana amiu akus nakeena naṗa e Ninuna Wa.’

¹⁷ Ana ita le Yu lala, naṗa ita temlelaga rui e kieta Suṗe Yesu Kristo, Ntewa naga

m̃la kiena Ninuna pan ita, sane nalaena tai, ana pogos naṓa nepisu naṓa Ntewa m̃la m̃ena ga nalaena na sanene pan la naṓa pe ape le Yu re poli, ana suri nene kila merarava ruru pan inu naṓa sane nanagane, pe pe pon re naṓa nevisave yeririna la nene la taṓatete aimi loyumã amio ita. !In na nepe ai nini naṓa vena nevisaluṓar Ntewa sanene, visae naga sinenan visave kila sanene van la?”

¹⁸ Ana pogos naṓa le Yerusalem la naṓani amloge visena kiena Pita, ana la pe apisa re si suri tai pan poli, ana la akekarania, amiyeluar Ntewa paṓisi, la apisa apisape “!Lelaga paṓisi naṓa ne! Nanagane ga ne ita tepisuluṓar rui naṓa Ntewa naga kekara m̃ena ga paṓisi pan la naṓa pe ape le Yu re poli, ana naga m̃la m̃ena ga pulmas pan la vena lala akilia avilopu la, a vena akilia atol malena lelaga e naga.”

Pegas nen li nalelagaena lala nae garu Antiok

¹⁹ Ana nanua sumo, pogos naṓa Sol lala am̃em̃ar Stipen naga mare rui, Sol la nene la akila kare ruru m̃ena ga nalelagaena taṓena lala garu Yerusalem paṓisi, ṓisi na nalelagaena la nene la moki apuretetai apeve taaga. Laṓas aṓure manene laa apa perina apano-o atol lepas naṓa Ponisia, laṓas aṓure asumã akus waa lala apano atol purvanua naṓa Saepras, a laṓas apa laa ga waa, apa e kumali keviu tai, naṓa kiena kia Antiok. A pogos naṓa lala asike e yo la nene, la asumã amlologon ke Nalologena Wo nene, ana la asumã amlologo ke ga pan la naṓa ape le Yu ga sa naṓa lala.

²⁰ Ana siraunia, gar yo naṓa Antiok, nalelagaena taṓena lala naṓa amolue e lepas na Saerin a purvanua naṓa Saepras, lala apimi m̃ena ga, amlologo, ana la asumã apisasawal ke Nalologena Wo kiena ne kieta Suṓe Yesu pan m̃ena ga la nae Antiok naṓa la pe ape le Yu re poli.

²¹ Ana nam̃areraena kiena ne Ntewa sum̃a pimi keviu e la nene, a yeririna la moki naṓa amloge kiela visena lala, ana

lala amlelaga e Yesu, la apilopu la apimi e naga.

²² Ana nalologena na suri nene pimi tol kiligana ne ṓegas nen li nalelagaena lala garu Yerusalem, sape visena kiena ne Ntewa pa tol pa li taṓena la rui la naṓa pe ape le Yu re poli, ana la apitetalia Panaṓas pa garu Antiok vena naga visuli sur la nene wa.

²³ Pogos naṓa Panaṓas naga poru e yo nene, naga pisu suri nene pe lelaga paṓisi, naṓa Ntewa naga pisa ruru malena kiena ne yeririna la nene keviu paṓisi, ana kila naga kekara keviu paṓisi ea, ṓisi na naga sukol visena lala pan la vena la atarar Suṓe m̃arera e losinela lala wetelu, e pogos naṓa po a pogos naṓa piowa.

²⁴ Panaṓas naga kila sanene komin naga pe yaru tanea tai, naṓa Ninuna Wa naga pule e naga, a naga piawa m̃arera e Ntewa, ana sanene, yeririna la moki apimi e Ntewa e pogos nene.

²⁵ Ana Panaṓas naga pisu sane yum̃aena keviu garu Antiok, ana naga pisu sape popon va tol garo pupia pulkumali naṓa Tasas, vena kaleli Sol, vena were naga imi iila yum̃aena.

²⁶ Pogos naṓa naga m̃alia, ana pure naga la lua aṓasuṓe si apimi apa Antiok. La lua asike amio nalelagaena lala e yo nene, ana lala apian yaru la moki, amiyumãe m̃a sanene pano-o tol kas wetelu taaga. E kumali keviu nene Antiok, ana li taṓena lala la apisa kare towe la nalogena lala, lala apio la asape “La yeririna Kristo lala” pona “Kristin lala,” a nane la apisa ṓesan ke kia ne nanene narui.

²⁷⁻³⁰ Ana e pogos nene, nalelagaena laṓasia naṓa ape navisawalena, amolue Yerusalem apimi atol garu Antiok, ana la nene tai, kiena kia Akaṓas, naga sum̃alu, pisi e nam̃areraena kiena ne Ninuna Wa, naga pisape “Ana ṓisi na ve ve viavi re, ana visokarena tai ve keviu imi tol yeririna make ga e purvanua punu ga e kieta lepasia.”

Ana pogos naṓa nalogena lala nae garu Antiok la amloge visena nene, la apisayuia, ana lala apranaria apisape ṓisi

na monar la punu ga akoan kilavaru ya naŋa la akilia alavia, vena aligan vano van kiela wolai lala naŋa asike e lepas nae Yutea, vena iila la vena lala asum̃ate ruru pogos m̃arera nene. Ana lala akoan kilavaru la nene, ana lala amligan nalaena nene sike e limana ne Panaŋas amio Sol, vena lalua nene awar vano van nasumonena kiena ne nalelagaena lala garu Yerusalem.

A visena kiena ne navisawalena nene pe lelaga, komin naŋa sirau ana pupia pogos m̃arera tai tol yo la nene, sa ga naŋa naga pisawalia, ana nanene e pogos naŋa Klotias naga sum̃a pe p̃arin suŋe ke garu Rom.

12

Yerkawa la am̃e li nalelagaena lala, akila kare la manene laa

¹ E pogos nene, naŋa lalua aŋar nalaena nene pimi garu Yerusalem, Parin Suŋe Erot sum̃a m̃e kare ke p̃egas nen li nalelagaena laŋasia.

² Kiena yaru na mara laŋasia la apa atarar wenla Yoane nene, Semes, ana la aŋeñar naga e kiela playu na kilaen mara.

³ Ana yerkawa lala kiena ne le Yu lala la akekaran manene suri nene paŋisi, ana kila Parin Suŋe Erot naga kila p̃elaga nene pa laa sanene, ana naga pisa pa kiena yeririna la nene vena ava atarar m̃ena ga Pita. Naga kila nena ga nene e pogos na p̃aŋagena kiena le Yu lala, naŋa la akila Paŋagena Na Sitom̃alena Natamaliaena, amio m̃ena ga Paŋagena Na Kanen Tam̃a.

⁴ Erot sum̃a sitom ke pisape visae pogos na p̃aŋagena nene war ro pae, yokorena naga were Pita va sum̃alu se marana ne yeririna lala, vena la avis vania, a vena la avisa avisave naga monar mare.

Naga narui, yaru la nene apa atarar Pita, ana akoven naga pa e yum̃a na koaena, a la amligan p̃egas nen yeririna na mara la vari vena akirakiravan ruru naga, naŋa p̃egas la nene kiela yaru na kilaen mara la peve vari ea.

⁵ Ana pogos naŋa Pita sike loyum̃a e yum̃a na koaena sanene, nalelagaena

lala la amlen ke m̃arera silaga pa Ntewa vanon naga.

Navisi pimi p̃erelua Pita petan yum̃a na koaena

⁶ Pita pa sum̃a e yum̃a na koaena pano-o, pa tol nena yemalo naŋa Erot naga sum̃a sitom ke pisape e kolulagi, p̃isi na naga were Pita va sum̃alu se marana ne yeririna lala vena la aliŋere naga. E yemalo nene, Pita naga momalio, m̃eke ga likan yaru na mara la lua nene, naŋa la apiar Pita panon lalua nene amio sen lua. A li na mara taŋena lalua, naŋa la m̃ena asum̃a apisuar ke mratava lala na yum̃a nakoena nene.

⁷ Ana verakorena ga, navisi kiena ne Ntewa tai naga sum̃alu sike loyum̃a e yo nene, a pupia yomerarava nenaga e naŋani paŋisi. Ana navisi nene pa kululun purkaunena ne Pita, pio p̃egea, ana pisape “!Ovitaŋili, osum̃alu vilaga!” Ana sen lua nene la ga amluŋa petan limana ne Pita veraga, luoka ga mloloru pito sike e porotano.

⁸ Ana navisi nene pisape “Oviteran ruru kioŋa kilika na kararen mopom̃a, oyen kioŋa kulus nen lam̃a a mom̃a kulsota, italua tevano.” Ana Pita kila sanene,

⁹ ana naga taveve navisi nene, lalua apano. E pogos nene, Pita pe kilia re pisape suri nene na lelaga poli, pona sanape, komin naga sitom ke pisape naga m̃eni ke ga naŋa.

¹⁰ Ana lalua apa m̃a sane, lalua amiyuve mratava na sumo naŋa yaru na mara sike ea, lalua apa m̃aga amiyuve m̃ena ga mratava nalua naŋa yaru na mara sike ea, ana lalua apimi atol pulutava maro na keviu naŋa mrapa na vaen vanua vetan yum̃a nakoena. Pupia pulutava nene la amiyum̃aen e pototo, ana pogos naŋa lalua apimi lavisinia, pupia pulutava nene naga ga pietava, ana lalua aŋaro apa vanua. Lalua amialoro la ga e mrapa apa sane, ana Pita milan ga, navisi nene mligan ke naga veraga, ana Pita naga ga taaga sike na.

¹¹ Ana e ke e pogos ga nene, Pita pisu kilale ya naŋa navisi nene kila ke pania, ana naga pisape “!Aulai! !Lelaga kemua

nañane! Nekilia narui, naña nesape Ntewa naga mligan kiena navisi nene pimi vena vinaunlua inu vetan limana ne Erot, a vena tarlua inu vetan suri viowa la naña le Israel lala la asum̃a asitom ke asape akila van inu.”

¹² Pita pisu kilale suri nene narui, ana naga pa mesmas ga e yum̃a m̃ana ne anenane Son Mak, kiena kia Maria. E yum̃a ke ga nene narui, la moki naña la asike pa e rui vena alen wo naga.

¹³ Ana Pita tol yum̃a nene, naga sigariga mratava, ana sira m̃ee nae yo nene tai, kiena kia Rota, naga pimin vena vietava.

¹⁴ Naga pe pietava ruru re poli wa, ana naga mloge kilale pulgona ne Pita naña pisi pania, ana naga kekara na kekara, naga mligan mratava nene m̃eke na, kiriri pa pisawal pan la, pisape “!Pita nañani! !Pita nane sum̃alu sike vanua e m̃ata pulutava rui!”

¹⁵ Ana la apisa pania apisape “!Ko na ve ovisi wowe re sanene!” Ana naga pisa ke sina ga pan la, pisape “!Peraga kemua rui! Nepisokanlae re poli, nepisa ke lelaga ne!”

Ana la apisa ke sina ga pania, apisape “!Peraga! Visae sanene, pona kana yer-mare ga nene yo?”

¹⁶ La asum̃a apivis ke sanene, ana Pita sike vanua na wa, naga sigariga mratava suluen ga sike na pano-o, ana la apa apietavanja. Pogos naña la apietava, la apisu kilale Pita, ana la amilan manene pano-o pañisi.

¹⁷ Ana Pita sisi ga pan la, kuan limana pisape vena avarurula, ana naga sunyu pan la sanape naña Ntewa naga ãerelua naga petan yum̃a nakoena. Ana naga pisa pan la pisape “Popon naña amiu ava avisawal suri nene va Semes nanagane, amio m̃ena ga arueta tañena la nene.” A siraunia, Pita molue ke sina ga, pa tapolou e yo tañena tai.

¹⁸ Ana kolulagi, yaru na mara lala amiyuyuwawa pañisin naña Pita pe mon re si e sen la nene poli, ana la amarau a amninue kare ga asape ãisi na am̃a akila ya narui, la asum̃a apiuviun tan la, asape “?Ana yaru pure sanape, am̃a naga pa sike pe narui?”

¹⁹ Ana visena pa tol Parin Suñe Erot pisape Pita kovio, ana Erot mligan kiena yeririna lala apa akale pano-o, akale ãele ga. Ana Erot pisi pa kiena yeririna la naña la apisuar Pita, ana la nene tañatete si avisa suri tai vania, ana Erot pisape akoven plan la nene, la awe mom̃ar la amarmare.

Ana siraunia, Erot mligan si yo naña Yutea, pito garove sike e pupia pulkumali keviu naña Sisaria.

Suniena na marena kiena ne Parin Suñe Erot

²⁰ Ana e pogos naña Erot naga m̃ene ke nalelagaena lala wa, ana naga sum̃a peveyu keviu m̃ena ga amio yeririna na pupia pulkumali lua nene Taea amio Saeton, pano pano-o kila yeririna na kumali keviu lua nene amarau pañisi, naña asape visae veveyuena nene imi viowa ãisi na yoko m̃arera van la vañisi. La nene asitom sanene komin naña la asum̃a amalin ke ga kinanena la naña la añar ga e porotano tai kiena ne Erot nene. Ana la amligan kiela yerkawa lañasia vena la aimi akila mara wo amio Erot. Ana la nene apa ape erau wo amio yerkawa kiena ne Erot tai, naña naga kiena kia Plastas, vena naga kilia iila la a naga kilia kila mrapa naña la akilia avis amio Erot vena asu ruru sina e sum̃arena amio naga.

²¹ Ana Erot pisawal legiena tai pisape la akilia aimi avisu naga ea, ana e legiena nene la apimi. E pogos nene, Erot mien m̃ana pupia kulsota wo lala, sa naña naga pe pupia ãarin suñe, a naga totano e kiena pupia yo na totanoena, ana naga toña mligan ke visena tai pan la.

²² Ana la nene amloge kiena visena nena, ana la sinelan asape akila kotalia yo pona am̃a sanape, ana la apioni manene pa metava, la apisa apisape “!Ee, nanene pe yeririna re na pisi nene poli, pona na nene na Ntewa ga nene yo, aulai!”

²³ Ana Erot mloge visena nene, ana kekaranja, a naga ãarwar m̃ena ga naña la apisape naga Ntewa, ana mesmasu e pogos nene, navisi kiena ne Ntewa tai pimi m̃e naga, komin naña naga pe

pisaluþar la re poli, pisape la monar ayeluar ga Ntewa, a la monar ve ayeluar re yaru. A pe piavi re poli, ana pulen ga kular viowa lala akaria akaroro sinena ana naga mare.

²⁴ A e pogos nene, pe suri koren ga naþa yeririna la ne sane Erot nene la asum̃a akilali naþa akila yum̃aena kiena ne Ntewa vito tano, ana visena kiena ne Ntewa naga sum̃a kapuru kekei ke pa e yo punu ga, a sum̃a þar ke mras moki liu.

²⁵ Ana Panaþas amio Sol, lalua amla nalaena naþa li nalelagaena lala nae garu Antiok la akuan rui, amla pa nasum̃onena lala kiena ne nalelagaena lala garu Yerusalem, þisi ana lalua apitove, lalua aþasupela sina ga apa Antiok, a e pogos nene, lalua aþure Son Mak taveve la.

13

Amiyawa Panaþas lalua Sol

¹ E þegas nen li nalelagaena lala garu Antiok naþani, ana yeririna laþasia la asum̃a naþa ape li navisawalena lala, a laþasia naþa la ape li navianena lala. La nene ana laþasia la kiela kia sanini: Panaþas, a Simion Kuluyepe Malolo, a Lusias nae Saerin, a Manaen naga nanua sumo, naþa namratava m̃ana Parin Suþe Erot la akuslua naga pogos naþa lalua Erot ape sisi ke ga wa, a amio la nene Sol naga m̃ena ga pe lala yaru tai.

² Ana pogos tai, la nene amio li nalelagaena taþena lala, la amonsilu ga, ana asum̃a amlotun ke Ntewa, ana Ninuna Wa pisi pan la, pisape “Amiu akilalua Panaþas amio Sol vetan amiu nanagane, ana amiu avisir plan lala lua naþa akila yum̃aena tai naþa in na sineun nesape lalua monar akila.”

³ Ana siraunia, lala amonsilu ke sina ga pogos tai vena alen, ana la apuarar þarina ne Panaþas lalua Sol, ana amlenwo lalua, þisi na amiila lalua apano vena akila yum̃aena kiena ne Ntewa.

Panaþas lalua Sol aporu garo Saepras

⁴ Ana sa naþa Ninuna Wa miila Panaþas lalua Sol sanene, lalua amligan yo Antiok, ana lalua apitomi e pulkumali naþa Selusia naþa m̃eke garo losi, ana lalua amiyai

e waa tai, apa aporu e purvanua naþa Saepras.

⁵ E purvanua nene, ana lalua apa ura e kana pupia pulkumali nena naþa Salamis, ana lalua apa e yum̃a lala nalotena kiena ne le Yu lala, ana lalua asum̃a apisawal ke visena kiena ne Ntewa. Ana e pogos nene, Son Mak naga sikol ke lalua nene na wa, ana naga sum̃a miila la ke e yum̃aena.

⁶ Ana la telu nene amiyal ke e purvanua nene, apitom atol kana luas taþena, e kana pulkumali keviu taþena tai naþa Papos. Ana e yo nene, apisu yaru tai naþa kilia kilaen m̃aki m̃eke e yo nene, naþa naga pe Yu tai, kiena kia Payesu, ana apio m̃ena ga naga e visena kiena ne le Kris lala asape Elim̃as. Yaru nene naga sum̃a pisokan kar ga sape naga pe yaru navisawalena tai kiena ne Ntewa.

⁷ Ana yaru na kiliaen m̃aki nene, naga pe yerkawa m̃ena ga tai e yum̃aena kiena ne þarin suþe na purvanua nene, naþa Sese Polos. Ana þarin suþe nene, naga pe yaru tai naþa naga kilia ruru suri po, ana naga pio Panaþas lalua Sol sape aimi avisu naga, komin naþa naga sinenan sape loge visena kiena ne Ntewa tan la.

⁸ Ana pogos naþa lalua apimi, ana yaru na kiliaen m̃aki nini naga kawe kiela visena, taþali naþa visaluþar la, a taþali naþa kila kare sitomena kiena ne þarin suþe nene naþa naga taþatete kus lelagaena e Yesu.

⁹ Ana Sol, naþa naga asum̃a apisa m̃ena ga kiena kia asape Pol, naga pimi pulemamaga e Ninuna Wa, ana kiena natamariaena m̃arera nene miyur yaru na kiliaen m̃aki nene,

¹⁰ ana pisi pania, sape “!Ko na ope narina Yermare ruru nena ga napo! Suri punu ga naþa po, ana ko pe sinom̃an li re nena ga, ana ko na opulen ga visokanena a þelaga piowa ga lala. Visena lelaga lala kiena ne Ntewa, ana ko na osum̃a opilon la silaga apimi ape visokanena ke sina ga.

¹¹ Nanagane ga ne, yoko ovisu limana ne Ntewa imi tol ko ruru nena ga. Nana-gane yoko kilamaram̃a imi ve kilamara þala, þisi na ko otaþatete ga ovisu legiena ve piavi li m̃a ga.”

Ana veraga ga, ana yaru nakiliaena m̃aki nañani naga pisu sa naña m̃au tai na yom̃arua naña malolo manenea pimi kalwo kilamarana, ana naga mom̃a mial wowe ga sanene narui naña tañali sape lual re yaru tai naña tarar limana ana were vano.

¹² Ana pogos naña ãarin suñe naga pisu suri la nene, ana naga mlelaga e visena kiena ne Ntewa narui, ana pogos naña Panañas amio Pol apian naga e visena wa la nene, ana naga milan manene pañisi, pisu po na po.

Pol lalua Panañas apa si Antiok tañena, e yo lepas naña Pisitia

¹³ Ana Pol la amligan yo Papos, ana akome waa apitove, ana apa ura e yo lepas nañani Pampilia, ana la amiyal apano atol pulkumali keviu nene Peka. Ana e yo nene, ana Son Mak naga mligan la, naga pe taveve la re si poli, ana naga ãasuñe sina pa Yerusalem.

¹⁴ Ana Pol lalua Panañas, lalua amligan yo Peka, ana amiyal apa re laa sane apano aporu e yo lepas naña Pisitia, apa atol m̃ena ga pulkumali keviu tai naña kien kia m̃ena ga Antiok. La asum̃a e yo nene, ana e Legiena Wa, ana apa loyuma e yuma na leniena kiena ne le Yu lala, ana atotano amio yeririna lala.

¹⁵ Ana li nasumonena lala la akila lotuena, pano tol pogos naña apuloyu Visena Wa, ana apuloyu nawuloena tai e navisaluaena kiena Mosis, a tai e tusi kiena navisawalena lala. Ana pogos naña nawuloena la nene ãisi narui, ana li nasumonena lala apiun tai Pol lalua Panañas, la asape “Wenlamimi lala, visae amiu lua amlarar ke visena tai naña kilia iila malena kiena ne yeririna lala, ana imimi sinemimin mesape amlua avisa van imimi.”

¹⁶ Ana Pol sum̃alu, ana koan limana, naña sape ava ruru la ana ayagogon naga, ana naga pisi pan la, pisape “Poga ga, ana in na sineun nesape nevisa ve sanini, amiu le Yu lala, amio li tañena la naña amiu m̃ena ga asum̃a amlalaga ke e kiamimi Ntewa, ana amiu punu ga ayagogon ruru kiau visena nini.

¹⁷ Kieta Ntewa nene, naga ke narui naña naga pisir plan kieta li marua la nanua sumo, a naga ga naña kila la apimi ape moki pañisi e pogos naña amiyum̃ae korena ke ga garu Isip, a naga ga ke sina ga naña ãere plan la e pogos m̃arera nene, e kiena nam̃areraena keviu.

¹⁸ Ana naga sumon la amolue apa e yokorena, ana amiyal m̃a e yo nene pa tol kas lualima yam vari, ana yam moki naña e pogos nene ana apilopu m̃asila pan Ntewa, ana naga pe mligan la re nena poli.

¹⁹ Ana pogos naña la apimi atol purvanua nene Kenan, naña Ntewa pisaar pisape tañan van la, ana naga m̃ene plan lus la olua kiena ne li tañena la naña apimi asike e yo nene rui, ana siraunia ana mla porotano nene pan repita lala, la ape ãarunia, ana lala apa asu wawa asike ea.

²⁰ Siar e pogos naña apa garu Isip sumo, ana pimi m̃a pano-o tol pogos naña añasuñe la sina apa loyuma e kiela purvanua, tol kas pe suri tai sane ponotia vari lualima yam lima.

“Ana e pogos naña asu wawa asike e kiela porotano sanene, ana Ntewa pisir plan kiela suñe lala, naña asumon la a aliñere la, ana suñe la nene la amiyum̃ae m̃a sanene pano-o tol lala yaru maro nini, Navisawalena Samiuel.

²¹ Ana la apisawal asape la pe sinelan re si suñe la ne sanene poli, ana la apisa pa Samiuel asape naga lual re yaru tai naña naga kilia ve kiela ãarin suñe keviu. Ana Ntewa kilologia Sol, narina ne Kis, pan la, naña naga pe lus kiena Pensiman, ana Sol naga pimi pe kiela ãarin suñe keviu nasumo, ana naga pisuar la pano-o tol kas lualima yam vari.

²² Siraunia, ana Ntewa kilalua sina Sol, ana mligan Tepet kus lelana, ana Ntewa naga kekarmanene Tepet pañisi, naga pisayu sape ‘E Tepet nini, narina Sese, ana nepisu nesape netol yaru tai naña kiena ãelaga torokin ruru nena ga kiau sitomena, ana nekilia nesape naga ãisi na naga yum̃ae ga va sa naña in na sineunia.’

²³ Ana Ntewa pisaar pan repita la nanua sumo sumo laa rui, sape ãisi na naga

werelua lus tai kiena ne yermarua Tepet nene, ana ligan naga van ita le Yu lala, ve kieta Natamaliaena, ana suri nene Ntewa kila pa e yaru naña Yesu rui.

²⁴ “Sumonia, pogos naña Yesu nene pe pimi re poli wa, ana Yoane Nakeena sum̃a mlolog ke pan ita, sape ‘Amiu monar avilopu amiu, ana amiu monar ava e nakeena.’

²⁵ Ana pogos naña Yoane nene lavis ga kila punu yum̃aena la naña Ntewa mla pan narui, ana naga sum̃a piun ke tan yeririna lala, pisape ‘?Amiu añape in na nepe Navisaarena? Inu nevisa van amiu, in na pe nepe yaru re nena naña amiu asum̃a asum̃ate ke poli, peraga. Ana siraun inu, ana naga sum̃a pimi ke ne, a naga po naña po, a naga pe yaru wa manene laa, ana in na nepisu sane inu pe nemesmesu re naña neve yaru na kiena yum̃aena ga poli, inu pe netorokin re neva lavis puna poli naña nowar plan kiena kulus nen lana.’ ”

Pol pisape yerkaewa kiena ne le Yu lala, la ke naña am̃em̃ar Yesu narui

²⁶ Ana Pol pisa pan la, pisape “Wolai lala, amiu lañas naña ape le Yu ruru lala, naña am̃alivi e lus kiena Epraam, a amiu lañas naña ape li taņena lala, ana amlelaga ke e kiamimi Ntewa imimi le Yu lala, ana sineun nesape monar avisu kilalea avisave ita ke narui naña Ntewa mla visena na natamaliaena pan ita rui, kila nesum̃a neņar ke pimi pan amiu ne.

²⁷ Lala nae Yerusalem amio kiela yerkaewa lala, la pe apisu kilale re nena Yesu poli e pogos naña naga pimi, a pe apisu kilale re asape naga pe Natamaliaena poli naña li navisawalena la apisayu e Visena Wa la naña apuloyu silaga e Legiena Wa lala. Sanene, ana pe apisu kilale re poli, naña la akila visena kiena ne navisawalena la moki apimi ape lelaga, komin naña la ke nene narui la amliņere kiela Navisaarena nene asape naga monar mare.

²⁸ La pe am̃al re nena suri tai poli naña torokin naga mare vanonia, ana

la am̃areran pa Paelat vena naga monar tam̃an visave la akilia awem̃aria.

²⁹ Ana la akila piowa ga pania taveve ga ya naña li navisawalena lala apisawal nanua sumo la rui naña asape p̃isi na yeririna la akila vania, vano vano awem̃ar naga e laki torovia, ana siraunia la akus tasnena pano, amligan m̃eke e puluve.

³⁰ Ana Ntewa tamalia ke sina ga naga petan marena,

³¹ ana e legiena laņasia, moki li m̃a ga, ana naga sum̃a m̃alm̃alivin kiena yeririna lala naña sumo lala asu amio naga garu Kalele, a naña ataveve naga apami metava ma Yerusalem. Ana la naña apisu Yesu sa nene rui, nanagane la ke nene narui la asum̃a apisasawal ke pan yeririna lala asape naga mali sina petan marena.

³² “Ana nanagane, e yo nini, imimi lua mepimi pun amiu naña memla Lologena Wo nene pimi pan amiu. Imimi lua mepisawal pan amiu, mesape suri wo la naña Ntewa pisaar pan repita la na sumo, pisape p̃isi na kila van kiena yeririna lala,

³³ ana nanagane suri la nene apimi ape lelaga rui e ita narin mapila lala, a e ita li taņena m̃ena ga la naña temlelaga e naga. Ana ita tetol suri wo nene e ga e kieta pogos nini, naña Ntewa mligan Yesu pimi tano e yomarava nini, ana tamalia ke sina ga naga petan marena.

“E Visena Wa, Yauena marana lua naga pisayu suri nene, naña sape

‘Kiau sisi, nepisu sane p̃ane ko opimi ope naruu,

a nepimi nepe arimom̃a kemua lelaga.’

Yauena 2:7

³⁴ Ana e lepas naña Ntewa kila Yesu mali sina e marena, naña naga taņatete va sina ga e puluņili pogos taņena, e lepas nene ana visena lua na Visena Wa la apisa rui. E visena tai, ana Ntewa pisa sanini, pisape ‘Navisa ruruena wa la nini naña in na nepisaar pan Tepet sumo rui,

la asum̃alu m̃arera asike ga wa,

ana nanagane nela van amiu narui,’ Ais

55:3

35 ana visena na lua na lepas nene, sike sina ga e Yauena tai, naña yaru naña siria pisi pa Ntewa, pisape

'Pisi na ko na tařatete okilia otam̃an kioṃa yaru wa visu marena, pona tasnena menun pogos tai.' *Yauena 16:10*

36 "Ana visena la nini pe apisa re yermarua Tepet nanua sumo poli, komin naña siraun naña naga kila yum̃aena kiena ne Ntewa pan kiena yeririna la pano pano-o, naga mare ga, ana asin naga ṃeke amio repina lala, ana tasnena mon ṃa pano menun.

37 Ana visena la nini apisayu ga Yesu nini, apisayu naña naga tasnena pe pa piowa re sanene poli, naga Ntewa pisirlua sina ga naga malı sina."

Pol sape naviewoena naga ṃeke ga e Yesu

38 Ana Pol sape "Wolai lala, visae sanene, inu sineun nesape monar akilia ruru suri nene, sape e ga e Yesu nene, ana Ntewa sum̃a kila pan ita lua sape naga piowo punu kieta mlamulena piowa lala.

39 Navisaluaena kiena ne Mosis tařatete were plan ita lua vetan kieta řelaga na mlamulena viowa lala, ana ko ai, naña visae olelaga ṃarera e Yesu, ana řisi na naga war plan kioṃa řelaga na mlamulena viowa nene vetan ko.

40 Sanene, ana monar avisuar ruru amiu, komin naña visae peraga, ana řisi na amiu ve sa naña visena tai kiena ne navisawalena lala,

41 naña naga pisa pisape
'!Amiu apisu ke ne! Amiu asuṃa apitalia kare suri wa lala, ana nanagane ga ne ana yoko avisu kilale ga na wa, siraunia amare.

Komin naña in na nesuṃa nekila ke yum̃aena tai likan amiu e pogos naña amal ke ga wa,

ana asuṃa apisavan ruru merarava pan amiu,

ana amiu na pe sinemiun re alelaga e poli.' " Aña *1:5*

Yeririna nae Antiok lala akekaran visena nene kiena ne Pol

42 Ana Pol pisi pan la řisi, ana la apa vanua, ana yeririna la apimi apiun ṃareran tan Pol, asape "Imimi sinemimin mesape e Legiena Wa naña pimi ke ne, ana řisi na amlua awasuře amiu si aimi, ana avian imimi re laa ga wa e suri la nene."

43 Ana pogos naña Pol lalua Panañas apano, ana le Yu la moki amio ṃena ga yeririna tařena la naña apimi sa ga ape le Yu la rui, apimi amiyaloro ataveve lalua apano naña asape asun re laa sane wa. Ana nalologena lua nene apisi amio la, ana apisa pan la asape la monar awasine manene laa Ntewa sane wa, a lala monar atařali naña ava re laa loyuṃa e kiena lemamiena.

44 Ana sa naña la apisa pa Pol amio Panañas rui, e Legiena Wa tařena naña sirau pimi, ana pulen ga le Yu lala, a pulen ṃena ga yeririna tařena lala e pulkumali nene apimi sina lele taaga, naña asape ayagogon Pol lologon Visena Wa kiena ne Ntewa.

45 Ana pogos naña yerkawa kiena ne le Yu lala apisu yeririna moki tařena la nene, ana apielue narui, ana la asuṃa apisa kare Pol, asuṃa apisa pan yeririna lala asape naga sum̃a pisokan ke ga nene.

46 Ana Pol amio Panañas lalua pe sinela kurkur re poli, ana lalua asuṃa apisi molmolue ga narui, a lalua kiela visena pa ṃarera laa narui, a la apisa pan le Yu la nene, asape "Imimi mepisu mesape popon naña Visena Wa kiena ne Ntewa naña imimi mesuṃa mepisawal ke pan amiu, naga imi tol řesan amiu le Yu la sumo, sumon naña tol yeririna tařena lala. Ana amiu na pe sinemiun re alelaga e poli, asuṃa akuwan plan kare ga pano, sa ga naña amiu atařatete si akilia atol malena naña ve uro re narui. Ana poga ga, teke ga e amiu, ana sanene řisi na imimi meva ga melologon va la naña pe ape le Yu re la po la rui.

47 Komin naña Visena Wa tai pisa rui naña imimi monar mekila sanene, naña Ntewa naga pisa, pisape

'In na nepisirlua ko vena ovivaga sane kapi tai,

vena tegoli la naṓa pe amlelaga re e inu poli wa.

Pisi na ko okus kiau natamaliaena va tol yo punu ga e yomarava.’” Ais 49:6

⁴⁸ Ana pogos naṓa lala naṓa pe ape Yu re poli amloge visena nene, ana amloge po manene laa ea, la apisape “!Suwala, visena kiena ne Ntewa nene naga po naṓa po, imimi sinemimin paṓisi wa!” ana lala naṓa lala laṓas naṓa Ntewa pisaar la sape ṓisi na la atol malena naṓa ve uro re, la ke nene narui naṓa amlelaga e Yesu e pogos nene.

⁴⁹ Ana siar e pogos nene, ana visena kiena ne Suṓe suṓa mlenlelein pa ṓar make yo e lepas nene.

Le Yu la sinela kar Pol amio Panaṓas

⁵⁰ Ana le Yu la naṓa apielue apa apisu sira kawa lala na kiela yum̃a na leniena amio li nasumonena lala na pulkumali, ana apis pan la akila kare kiela sitomena lala, pano pano-o yerkawa la nene amiila yeririna la apa aṓenelua Pol lalua Panaṓas petan kiela yo.

⁵¹ Ana pogos naṓa lalua asum̃a apa ke narui, ana lalua akila kile tai pan la ne na pulkumali nene, lalua aṓevan puluyavi na mrapa naṓa sike e lolala lalua.

Ana lalua apetan yo Antiok, lalua apa atol pulkumali naṓa Ikoniam,

⁵² ana nalogena viu la naṓa asike garu Antiok, la sinela kekara keviu, a Ninuna Wa pimi pulemamaga ruru nenaga e la.

14

Pol lalua Panaṓas, lalua amlologo e yo naṓa Ikoniam

¹ Ana e kumali naṓa Ikoniam, suri punu ga aṓalñalivi sa ga naṓa Antiok narui. Lala aporu e yo nene, ana siraunia Pol lalua Panaṓas, lalua apa loyum̃a e yum̃a na leniena kiena ne le Yu lala, ana lalua amlologo. Lalua amlologo amio naṓareraena kiena ne Ntewa, ana yeririna la moki naṓa asike e yo nene, lala amlelaga e Nalologena Wo nene, naṓa lala ṓasia ape le Yu, a lala laṓas ape le Kris.

² Ana le Yu taṓena lala naṓa asum̃a ga, lala pe sinelan re naṓa alelaga poli,

ana siraunia la nene apano akilayon naṓa avilonkare sitomena kiena ne yeririna taṓena lala naṓa pe ape le Yu re poli, la akila sinela la pimi kari la naṓa amlelaga mare ga na wa.

³ Suri ne nanene narui kila Pol amio Panaṓas, lalua asike e yo nene yam piavi la sane, vena akilali naṓa aiila nalelagaena lala. Ana pogos naṓa lalua asike amio la sanene, ana pe amaraun re la naṓa sinela kar la ke poli, ana la asum̃a amlologon Suṓe Yesu pan la, a apisayu kiena pupia lemamiena pan yeririna lala. Ana Suṓe naga kila yeririna lala apisu kilale naṓa kiela visena lala ape lelaga, komin naga taṓan pan lalua vena akila kile ve moki e yo nene a suri nailanena lala.

⁴ Ana yeririna lala na kumali nene la amlip̃ere la e ṓegas lua narui, naṓa laṓas akekaran le Yu lala, ana laṓas akekaran nalologena lua naṓani.

⁵ Lepas lua nene lalua asu ṓa apepeyun la sanene, pano-o ana le Yu lala amio li taṓena lala naṓa pe sinelan re si li nalelagaena la poli, amio ṓena kiela yerkawa laṓasia, la ke naṓa apisa ruru narui vena la asu nalologena la nene a akove moṓar la amare.

⁶⁻⁷ Ana nalologena lua naṓani lalua amloge suri nene, ana apisu sane popon naṓa aure vetan yo nene, vena ava atapolou e yo tai. Sanene, lalua asum̃alu petan yo nene, apa e lepas taṓena naṓa Likonia, ana lalua apa amlologon Nalologena Wo e lepas nene, amio kana pulkumali ne luwoka, naṓa lalua kiela kia sanini, Listra amio Tepe.

Pol lalua Panaṓas lalua amlologo garu Listra

⁸⁻⁹ Ana e narin pulkumali nene naṓa Listra, pogos tai ana Pol naga suṓa mlologo ke pan yeririna lala, ana yaru tai pe laulu naga toṓa tano, ana naga toṓa miyagogon Pol. Yaru nene, siar e pogos naṓa naga paeme, naga pe mial re pogos tai poli, komin naṓa naga lana luwoka ga pulu.

Ana Pol pisu naḡa yaru nene suḡa miy-agogon ruru ke naga, a naga mlogeluḡar naḡa sane yaru naḡa pe laulu ne naga suḡa mlelaga e Yesu sape yoko naga kilia kila ruru lana luwoka. Ana Pol pisu manenea,

¹⁰ pio naga, pisape “!Laulu, ko oula ova metava, osum̃alun laḡa luoka!” Ana yaru nene mloge Pol pisi pan sanene narui, ana naga pula pa metava veraga, ana naga suḡa mial ke amio lana luwoka naḡa apimi aḡarera ruru narui.

¹¹ Ana pogos naḡa yeririna lala apisu suri nene naḡa Pol kila e laulu nene, la asuḡa apiovion e kiela visena, apisape “!Ake! !Kieta ntewa lala akus maran yeririna, apitom tano pun ita sa ga yaru narui!”

¹² Ana la asikia Panaḡas, apio naga asape Susu, naḡa naga pe kia kiena ne ḡarina suḡe kiena ne kiela ntewa lala, a amligan kia kiena ne Pol, la apio naga asape Emis, naḡa naga pe kia kiena ne yaru nawaren visena kiena ne kiela ntewa lala, komin apisu naḡa Pol naga suḡa pisi manene laa sane taulu Panaḡas.

¹³ Ana vanua e mralaea na kumali nene, yum̃a wa tai ḡana ne kiela ntewa nene, Susu, naga mon ḡa ga, amio kana yaru wa nena, ana yaru wa nene naga sitom sape kila ruru naḡa vena yeririna lala monar akila kuḡaḡaena van Pol amio Panaḡas, naḡa la asitom asape yaru lua nene lala ape kiela ntewa. Ana yaru wa nene kila la apitaḡilin naḡa apanon aḡure puluk lala apimi, ana apaia la e meme, vena awe moḡar la e kove na yum̃a wa nene narui.

¹⁴ Ana Panaḡas amio Pol, lalua pe akilia re kiela visena poli, naḡa la asuḡa apisayu ke suri la nene, ana pogos naḡa lalua amloge ya naḡa asuḡa asitom ke naḡa asape akila, lalua amloge piowa paḡisi wa. Nalologena lua naḡani, lalua pe akekaran re nena naḡa yeririna la nene sinelan asape alotun lalua poli, kila sanene lalua apitolwowa ḡala kulsota lala, ana lalua akiriri apano asuḡalu asike likan yeririna la nene, apionia, apisape

¹⁵ “!Avisaluḡar la, avisaluḡar la! !Ve akila re ve sanene van imimi! !Imimi lua mepe yaru ga sa naḡa amiu, pe mepe ntewa re poli! Mepimi ga memio Nalologena Wo, mepimin naḡa mevisawal van amiu monar aligan kiamiu ḡelaga marua la ne sanene sike na, amiu ve alen re si va kamiu ntewa moki la naḡa amarmare ga ne. Mepimin mesape mevisawal van amiu naḡa Ntewa mali taaga ga naḡa sike na, a mesitom mesape mevilon amiu vania, naḡa naga ga naga sii sinapane, amio porotano, amio sive, a naga sii suri la punu ga naḡa asike e yo punu ga e yomarava nini.

¹⁶ E kas kiena ne teras la moki naḡa aḡaro apa rui, Ntewa naga taḡan naḡa yeririna lala na yomarava, sane amiu, la asuḡa amiyaloro ataveve ḡelaga la naḡa pepe taḡena lala, a la pe akilia re naga poli, ana akila lotena sa ga naḡa la asitom apisape mesmesun naḡa akila.

¹⁷ Nepisu naḡa amiu akila sanene komin naḡa amiu pe akilia punu re naga po, ana e lepas naḡa puna, naga pe tapoloun punu re naga pan amiu poli, komin naḡa pogos punu ga naga suḡa kilologia naga ve torokaki ga pan amiu pisape naga pe lelaga, a naḡa kiena ḡelaga e amiu na po paḡisi. Naga ke narui naḡa naga suḡa kila ke kiena yua mloloru pitomi e yo yau, a naga ke narui naḡa naga suḡa kila ke suri punu ga akapuru e kamiu lokove la ne, lala aḡar kala kinas lala e kana pogos ruru nena napo. Naga ke narui naḡa naga suḡa kila amiu akekara a amiu amloge po keviu e kinanena wo la naḡa amiu asuḡa aḡar ke e kamiu lokove la nene.”

¹⁸ Pol amio Panaḡas lalua apisa visena la ne sanene ḡisi, ana lavis ga naḡa taḡatete akilia avisaluḡar yeririna la nene naḡa lala sinelan manene naḡa akila lotena van lalua nene pona akila kuḡaḡaena van la. Ana siraun naḡa la amloge visena kiena ne lalua nene, ana la pe akila re si poli.

¹⁹ Ana siraunia, le Yu laḡasia naḡa aḡene Pol amio Panaḡas rui garu Antiok a e yo naḡa Ikoniam, ana nanagane la

nene apimi am̃alivi ke sina ga narui e yo Listra nene. Ana la asum̃a asun pan le Listra lala, pano-o aṗure plan ke sina ga kiela sitomena lala pa pe taṗena ke sina ga, ana siraunia, ana lala apanon Pol, ana la akove naga pano-o apisu amape naga mare rui. Ana lala aṗurelua tasnena petan pulkumali pa vanua, akoan kare ga naga mon m̃a ga sa ga ne, ana la aṗasuṗe sina apano.

²⁰ Ana nalogena laṗasia apimi amligan ruru Pol, ana la asum̃a amio naga, ana siraunia, naga tavolo sina, ana naga pa sina um̃a amio la. Ana kolulagi, naga amio Panaṗas, lalua amiyal, lalua apa e narin pulkumali taṗena nene naṗa Tepe.

Pol amio Panaṗas, lalua apa sina, aṗasuṗe sina ga apa akome yo la nene

²¹ Ana garu Tepe, Pol amio Panaṗas, lalua amlologo, ana e yo nene la aṗere yeririna moki apimi amlelaga, apimi ape nalogena lala kiena ne Yesu. Ana siraunia, ana lalua amolue ke sina ga e yo naṗa Tepe, la asiar apa sina, ana lala ataveve m̃a ke sina ga mrapa naṗa la akom ea apimi. Sanene, la aṗasuṗe ke sina ga apa garu Listra, sirau, Ikoniam, yokorena apano aporu garu Antiok nae Pisitia.

²² Ana e yo make la nene, la apian ke sina ga nalelagaena lala, ana amla visena wo la pan la vena iila la, a la apisape “Pe suri korena naṗa pona ita tekilia tetol pogos m̃arera lala, pona yeririna la ve moki akawe ita, ana naṗa ita teva loyum̃a e navesuṗenena kiena ne Ntewa naga monar ve sa ga nene narui. Visae sanene, amiu ve amalumu re, ve aursu amiu re sina, ana asum̃alu asuwawa m̃arera e Kristo pogos punu ga.” La apisa visena la ne sanene, kila nalelagaena lala la apuarar naviawaena m̃arera.

²³ Ana e kumali la nene punu ga, la apu ṗarina ne yeririna la ṗasia vena ave nasumonena la e ṗegas na nalelagaena la veve taaga, ana lalua amonsilu ga vena alenwo la. Ana amligan la asike e limana ne Suṗe, naṗa lalua amlelaga asape yoko naga iila la silaga.

²⁴ Ana la aṗasuṗela sanene, ana la aṗaro e lepas na yo Pisitia, ṗisi na apimi e lepas na yo Pampilia.

²⁵ E lepas nene, la amlologo e kumali naṗa Peka, siraunia la apito garo Atalia, garo losi,

²⁶ ana la akus waa, aṗasuṗela si apa aporu garu Antiok, nanene e yo naṗa Seria. Nanene kumali keviu naṗa sumo rui, la amlenwo Pol lalua Panaṗas, apisape vena lemamienna amio navisuarena wo kiena ne Ntewa naga sike amio lalua, ana la amligan plan lalua vena ala Lologena Wo avano. Ana nanagane narui, lalua akila make nena ga pupia yum̃aena nene ṗisi, ana apimi si rui.

²⁷ Ana lalua apio nalelagaena lala vena la punu ga aimi lele taaga, ana lalua apisawal yum̃aena la pan la naṗa Ntewa miyum̃aen pan lalua, a lalua apisayu ruru pan la sanape naṗa Ntewa naga pietava pan la naṗa pe ape le Yu re poli, pisape la m̃ena ga akilia alelaga, a la akilia aviran la lele taaga e kiena nasuṗenena.

²⁸ Ana lalua asu m̃ena tol kupario lua pona telu suri tai sanene amio nalelagaena lala garu Antiok.

15

?Li nalelagaena viu lala la monar ataveve navisaluaena kiena ne Mosis pona peraga?

¹ Ana pogos naṗa Pol amio Panaṗas lalua asike garu Antiok wa, li nalelagaena laṗasia na lepas nae Yutea, naṗa la ape le Yu, la apitomi garo e yo nene. A pogos naṗa la amlologo pa li nalelagaena taṗena lala nae Antiok, la apisawal kiela navianena tai, asape “Visae amiu li nalelagaena laṗasia, la pe ape ṗaviu re poli taveve ya naṗa navisaluaena kiena ne Mosis pisa, ṗisi na Ntewa naga taṗatete tamalia la.”

² Ana Pol amio Panaṗas, lalua pe akekaran re nenaga visena nene poli, komin naṗa la akilia asape Lologena Wo kiena ne Suṗe naga pe pisa re sanene poli, ana la apisi m̃arera pan la nene, la apepeyu amio la nene yam piavi laa sane, vena akilali naṗa avisaluṗar la vena ve avian wowen re si yaru la sanene.

Ana li nalelagaena lala nae Antiok, la asitom manene laa visena la nene narui, ana peraga, la apisu sane popon manene naŋa la avitetalia Pol amio Panaŋas amio m̃ena ga laŋasia, la apa ma meta Yerusalem vena ava avisu li nalologena lala amio nasumonena lala, vena alogeli naŋa sane yerkaŋa la nene la asitom ke sanape e lepas na suri naŋa la apepeyu vanonia.

³ Naga narui, li nalelagaena lala apitalia la apitove, apitove akome lepas la ne sane Ponisia, p̃isi na apa Samaria, a e pulkumali punu ga naŋa la apa akomea, la asum̃a apiora amio li nalelagaena lala, a asum̃a asun amio la apisayu sanape naŋa apa atelivi e la naŋa la pe ape le Yu re poli, a apisawal Lologena Wo pan la, a sanape naŋa la moki apilon la apimi e Ntewa rui. A kiela navisawalena la nene la akila li nalelagaena lala la amloge po paŋisi, amieluar Ntewa vanonia.

⁴ La akila liluen sanene pano pano-o, apito atol garo Yerusalem, ana la apa apisu p̃egas nen li nalelagaena lala, amio nalologena lala a nasumonena na sum̃are lala, ana la nene la akekaranaŋa apisu Pol amio Panaŋas lala, ana la apisa visena na worworen pan la. Sanene, Pol amio Panaŋas lalua apisawal m̃ena ga e la naŋa garu Yerusalem, apisape sanape naŋa Ntewa naga kila yum̃aena moki rui pa lalua naŋa lalua apa atol la naŋa la pe ape le Yu re poli, ana amlologon pan la, apisape visae la alelaga ga e Kristo, p̃isi na Ntewa naga tamalia la.

⁵ Ana pogos naŋa lalua apisawal suri la nene sanene, li nalelagaena laŋasia naŋa ape le Yu, naŋa ape Varasi, la asum̃alu la apisawal ke sina ga kiela navianena nene, apisape “Popon visae la naŋa la pe ape le Yu re poli, visae la sinelan asape alelaga e Kristo, ana la monar ave p̃aviu m̃ena ga, a la monar ataveve m̃ena ga visena taŋena lala na navisaluaena kiena ne Mosis, ana visae ataveve kieta p̃elaga ita le Yu la sanene, naga nene ana p̃isi na ita tekilia tevisa tevisave p̃isi na Ntewa naga kekarana la.”

Pupia viorena garu Yerusalem

⁶ Ana la asum̃a apisayu manene laa suri nene, kila sanene li nalologena lala amio nasumonena lala la apisa apisape monar akila viorena tai vena avisayuia.

⁷ Ana e viorena nene, la apisi manene pano pano-o kila Pita sum̃alu, pisi pan la, pisape “Wolai lala, amiu akilia p̃isi rui, nanua na Ntewa naga mligan inu vena in na nevaŋesan nelologon Lologena Wo va la naŋa pe ape le Yu re poli, ana nanagane ita tesum̃a temloge ke naŋa la moki asum̃a amlelaga ke e Kristo rui.

⁸⁻⁹ Ntewa naga kila sanene, komin naŋa naga pe mliŋere re la nene petan ita poli, ana naga p̃isu ke losinela lala marantaaga ga sa naŋa naga kilia ruru ya naŋa sike e losineta. Naga kila merarava pan ita sa naŋa naga kekarana vena la akilia alelaga ke e mrapa m̃a nenaga naŋa ita tesum̃a temlelaga ke ea, naŋa naga mla Ninuna Wa pan la, a naga kevan ke m̃ena ga losinela lala mekiki, komin naŋa la aŋasine naga, sa ke ga ita.

¹⁰ Ntewa naga kila po manene laa pan la rui, ana nanagane, ita laŋasia la sinelan asape akila ke sina ga m̃arera van la. Visae ita sinetan tesape tom̃areran la nene vena la awar suri urmi lala na kieta navisaluaena e m̃asila, sa naŋa la asum̃a apisa ke ne, sanene na piowa ne, ita tekilawo ke sina ga Ntewa ne. Repita lala la apisu sane navisaluaena nene naga m̃arera paŋisi wa, a ita m̃ena ga tepisu sane taŋatete yaru tai kilia logear kana visena ne la punu ga.

¹¹ Ana la amlelaga, a ita m̃ena ga temlelaga temio la, tesape ita punu ga towasine ga Suŋe Yesu, a tetol malena e naga, pimi kom ga e kiena lemamiena.”

¹² Ana la naŋa e viorena la pe apisi re si po laa rui, ana la asu puru, ana amla pogos na visena tai pa Pol amio Panaŋas, la sinelan asape aloge re si kile lala amio suri na ilanen lala naŋa lalua akila e nam̃areraena kiena ne Ntewa pa la naŋa pe ape le Yu re poli, pogos naŋa lalua apa atelivi pula.

Semes sikol kiela visena lala

¹³ Ana pogos naḗa lalua asunyu suri la nene ḗisi, Semes nene, naḗa naga pe kiela yerkawa tai garu Yerusalem, naga sum̃alu sikol visena pa yeririna lala, pisape “Wolai lala, sineun nesape ayagogon inu sumo wa.

¹⁴ Ita temloge ga ḗisi na wa naḗa Saemon nene, naḗa Pita, naga pisawal ruru pan ita rui sanape naḗa Ntewa naga m̃alm̃alivi ḗesan pa la naḗa pe ape le Yu re poli, a naḗa naga pure laḗasia apimi ave yolai viu tai naḗa kiena kia sike ea.

¹⁵ A e Visena Wa, visena kiena ne kieta navisawalena lala nanua sumo, pisa pisape yoko ve sanene narui. Lala tai naḗa pisa sanene, naga Emos, naḗa naga pisawal visena kiena ne Ntewa tai, naḗa pisa sanini, pisape

¹⁶ *‘Pisi na, inu nowasuḗe inu sina neimi, neyum̃aen ruru si lus kiena ne Tepet nene naḗa mloru, vena mali sina.*

Naga sa ga yum̃a tai naḗa kekapili kar ga sike ne, ana ḗisi na nevisirlua sina.

¹⁷ *Ana ve sanene, yeririna taḗena lala naḗa pe ape kiau re poli wa,*

ḗisi na la akale inu Ntewa Namava, a yeririna lala na purvanua punu ga na yomarava nini, naḗa nemligan kiau kia sike e la rui, la aimi ave kiau yeririna.

¹⁸ *Inu Ntewa Namava, naḗa nekila yeririna lala la apisu kilale suri la nene siar nanua sumo laa rui,*

kiau navisaarena sanene narui.’ ” Amo 9:11,12

¹⁹ Ana Semes pisi manene laa sane, pisawal kiena sitomena, pisape “E kiau navisuena, naga sanene narui. Pe pon re ita tekila yum̃aena m̃arera pona tekila kare manene la naḗa la pe ape le Yu re poli, naḗa la apilon la ga apimi puna ne Ntewa na wa. Pe pon re tevisave la monar ave ḗaviu poli, pona la monar ataveve kieta Navisaluaena sanene pona sanene.

²⁰ A ya ga naḗa popon ita tekila van la, naga sanini, sane ḗisi na ita tesiri m̃aki tai, tevisawal suri ve telu van la. Suri na tevisaḗesania, tevisave la ve akan re si tata la naḗa yaru taḗena la akila ke kuḗaḗaena ea pan kiela nono lala, la

monar avaliania. A sur nalua, la ve akila re si ḗelaga viowa, sa naḗa kolau pona lau. A natelu, ḗisi na ve akan re m̃ena ga kuruta na suri mali, sane tata na suri mali naḗa kuruta pe mlau make re poli wa.

²¹ Yaru lala la asum̃a akilia make ke suri la nene naḗa pe mesmesun re naḗa akila po laa rui, komin naḗa Navisaluaena kiena ne Mosis naga sum̃a pisa, a la asum̃a apulolua ke Navisaluaena nene a amlologon silaga e Legiena Wa lala e kiela yum̃a na lotuena e kiela pulkumali lala, siar nakonua rui pimi tol ḗane.”

Yerkawa lala nae Yerusalem la asiritam̃e pa la nae Antiok

²² Ana siraunia, la apisu sane la apisi toroki, ana li nalologena lala a nasumonena lala, amio m̃ena ga li nalelagaena la punu ga, la apisu sane popon aligan laḗas ava ke sina ga amio Pol lalua Panaḗas, ato garo Antiok. Ana la apisaar kiela yerkawa nayum̃aena lalua nene, Suta Pasapas amio Saelas, apisape ḗisi na lalua nene atove.

²³ Ana la asiri m̃ena m̃aki tai vena lalua akilia alarar vitove, a m̃aki nene pisa sanini, pisape “Imimi li nalologena lala memio nasumonena lala nae Yerusalem, naḗa imimi mepe wolai memio amiu e Yesu, imimi mekekara paḗisi naḗa mevitawe amiu e m̃aki nini. Imimi mesiri m̃aki nini piḃasu, amiu na pulkumali nae Antiok, a e kana lepas naḗa Seria, a van amiu m̃ena ga e lepas nae Silisia, nanene na amiu la naḗa pe ape le Yu re poli, naḗa nanua sumo ana amiu na asike ga e yemalolo.

²⁴ Visena pam tol imimi ḗisi rui, pisape sumo, imimi laḗasia mepitom̃asu garo pun amiu, a la apian amiu asape amiu na monar ataveve kiamimi Navisaluaena imimi le Yu lala, visae peraga, ḗisi na Ntewa naga taḗatete tamalia amiu. Imimi mekilia mesape visena nene naga kila kare manene kiamiu sitomena la paḗisi, a kila amiu amloge piowa paḗisi, ana visena nene naḗa la apisa, imimi memninue ga, imimi pe mepisa re pan la mepisape la monar atom̃asu avian amiu ve sanene poli.

25-26 Ana kieta wolai wo lalua nene, Pol amio Panañas, naña lalua na pe asitom re kiela malena poli ana lalua asum̄a sinela urmin ga visawalen kia kiena ne Suņe Yesu Kristo, amiu apitetalia lalua nene apami apisu imimi vanon suri nene. Ana imimi mepiora vanonia, imimi mepisuveve-e pano-o, ana imimi mepranar mesape řisi na imimi meligan wolai ve lua e yo nini awar m̄aki nene, la amio Pol a Panañas la atom̄asu pun amiu.

27 Lalua nene, Suta amio Saelas, řisi na lalua asunyu ruru manene laa van amiu, maran ve taaga ve sa m̄a nena naña imimi mesiriyu pan amiu e m̄aki nini.

28 Ana e kiamimi navisuena, a e navisuena kiena ne Ninuna Wa m̄ena ga, imimi mepisu sane piowa naña imimi mom̄areran amiu vena amiu monar alogear kiamimi Navisaluaena imimi le Yu lala. Ana imimi mepisu sane suri laņasia, naña imimi le Yu lala imimi yepemimi mavin pařisi, a popon manene naña amiu m̄ena ga ve asum̄a akila re, vena kila sane amiu akilia asu ruru amio arueta taņena la naña ape Yu.

29 Suri la nene, tai pisa sanini, pisape řisi na amiu monar alon tata naña yaru taņena lala la akila kuņapaena ea pan kiela nono la rui. A nalua nena, řisi na amiu ve akan re kuruta, pona tata na suri mali naña kana kuruta pe mlau re petan poli wa. A natelu nena, řisi na amiu ve akila re řelaga viowa lala, sane kolau a lau.

“Visae amiu aligan ruru make suri la nene, imimi mepisu sane řisi na wo vařisi van amiu punu ga. Pogaga, kiamimi visena e lepas nene řisi ga e nene.”

30 Ana la amligan Pol a Panañas amio lalua taņena nene, la apito garo Antiok. Pogos naña la nene aporu e yo nene, la apio řegas nen li nalelagaena lala la apimi lele taaga, ana amla m̄aki nene pan la.

31 Ana la nae Antiok apulo m̄aki naņani, ana la akekara pařisi e visena wo la naña la nae Yerusalem asiri pimi pan la.

32 A lalua nae Yerusalem nene, Suta amio Saelas, lalua nene ape navi-

sawalena, ana lalua asum̄a amlologon ke pa la nae Antiok, apisape la monar awasine manene ga Yesu silaga, ana lalua akila sinela la sum̄alu m̄arera, e kiela visena wo moki naña lalua apisa.

33-34 La asum̄a apisi ke pan la sanene e legiena moki, ana siraunia, la nae Antiok la amligan lalua e kiela mrapa, la amlenwo lalua, asape “Sum̄arena kiena ne Ntewa sike amio amluoka.” Ana lalua aņasuņe sina apa ma Yerusalem.

35 Ana Pol amio Panañas, lalua asike garo Antiok tol si kuņar laņasia, lalua asum̄a amiila yaru taņena la naña la asum̄a amlologo a asum̄a apian ke yaru lala e Visena Wa kiena ne Ntewa.

Pol amio Panañas, lalua apeveyu

36 Ana siraunia, Pol pisa pa Panañas, pisape “Ei, sanape, řisi na italua teva teyaliali ke sina ga arueta amio vineta lala e yo la nene naña italua tepa temlologon Visena Wa kiena ne Ntewa e nanua sumo rui? řisi na italua teva tevisu la li sane am̄a la asike sanape.”

37 Ana Panañas pisape “! Po pařisi ne, nekekaran pařisi wa! Ana sineun manene nesape řisi na italua toure Son Mak nene imi temio.”

38 Ana Pol naga sum̄a sitom̄al ke ga wa naña la amialiali la řesan sanene sumo, Son Mak nene naga purmatan la yam tai rui, nene garu Pampilia, naña pogos naña yun̄aena pe řisi ruru re poli wa ana naga řasuņe ke sina ga pano. Sanene, Pol pisu sane, peraga, pe pon re Son Mak imi amio la ke sina ga e kiela yalena taņena nene poli.

39 Suri nene kila Pol amio Panañas lalua apeveyun la ruru nenaga, ana lalua amliņere la narui. Panañas pa řere ga Son Mak, ana la ga lua apa akome waa, lalua apa amiyum̄ae garu Saepras,

40 ana Pol naga pa kilalua Saelas. Ana li nalelagaena lala amlenwo lalua nene apisape řisi na lemamiēna a navisuarena wo kiena ne Ntewa sike amio la.

41 Ana lalua amialoro apa atelivi e lepas lua nene Seria amio Silisia, amiyum̄aen

ke sanene vena akila p̄egas nen li nalelagaena lala la aimi am̄arera manene la sane.

Nanene sane pupia yalorena kiena ne Pol yam lua ne.

16

Timote m̄ena ga pa amio Pol lalua Saelas

¹ Ana e kiena pupia yalena na lua nene, Pol pimi tol sina kumali lua nene Tepe, amio Listra. Ana e yo Listra nene, ana nalogena tai sike ea, nanene yaru m̄ee naġa Timote. Timote nene, anena pe sira re Yu tai, naġa naga mlelaga e Yesu rui, ana arimana naga pe pe yere Yu re poli, naga pe yere Kris tai.

² Ana arueta lala nae yo kiena ne Timote, amio lala nae pulkumali taġena naġa m̄eke lavis ga ne Ikoniam, la apisu naġa Timote naga kila yunġaena kiena ne Suġe po paġisi pan la.

³ Ana Pol naga sitom pisape were Timote va amio naga e kiena yalena nene, ana suri taaga ga naga piowa, naga ga naġa Timote naga pe pe p̄aviu re poli, nanene komin arimana naga pe pe yere Yu re poli. Ana Pol naga kilia naġa visae Timote taveve naga sanene, ana visae e yo ya naġa la ava ea, ana yoko le Yu lala, avisaluġar naga vena ve va re loyunġa e kiela yunġa na leniena lala, a yokorena la ve akekaran re aloge kiena visena lala. Ana komin suri ne na nene, ana Pol kila Timote pano ana la akila p̄aviu e naga, ana siraunia, la telu nene Pol, Saelas, a Timote, apano.

⁴ Ana pogos naġa la asuġa atelivi ke e kumali lala, la asuġa apisalelein ke visena la pan nalelagaena lala, apisawal pan la e navisaluaena la naġa nalologena a nasumonena nae Yerusalem la apisa e kiela viorena sumo rui, ana Pol lala apisa pan la naġa monar ataveve visena la nene narui.

⁵ Ana pogos naġa Pol lala asuġa amiyalyal li laa a la apian ke p̄egas nen nalelagaena la sanene, kila sa naġa p̄egas la nene asuġalu asu m̄arera ruru laa, a la apisu sane silaga naġa nalelagaena lala apimi ape moki manene laa narui.

La asike garu Troas, ana Ntewa pis pa Pol e nam̄eniġa tai

⁶ Ana Pol la asitom naġa asape ava awar ro e kumali la ve moki e lepas nae Esia, ana Ninuna Wa pisaluġar la vena la ve ava re avisawal Nalologena Wo e yo nene, kila sanene apa atol ga e lepas na yo Prisia amio Kalesia.

⁷ Asuġa apa ke sanene, ana pogos naġa la apimi lavis e lepas naġa Misia, la akilali naġa ato garo e lepas keviu naġa Pitinia, ana pogos si tai, ana Ninuna ne Yesu pe tam̄an re pan la naġa la ava sanene poli.

⁸ Ana lala apa aġaro ga e yo Misia nene, apa m̄a pano-o la atol kana kumali ne tai garo losi, kiena kia Troas.

⁹ Ana e yo nene, ana kolemallo, Pol naga momalio pisu sane yaru tai nae lepas keviu nae Masitonia e sive lepas p̄as, naġa yaru nene naga pimi puna, naga taġi pania, piun tania, pisape "Awis Mara, imimi sinemimin mesape ko oimi owar ro pun imimi, vena oiila imimi."

¹⁰ Ana e poglis nene, inu Luk ne-sike m̄ena ga nemio la, ana pogos naġa Pol naga pisawal naġa naga pisu yaru nene pisi pania, veraga ga imimi mepanon makale mrapa vena mekilia meva mokusro yo meva Masitonia, komin imimi mekilia naġa Ntewa naga pio imimi rui vena meva melologon Nalologena Wo nene van la.

Asike garu Piliġae, ana sira naġa Litia naga mlelaga

¹¹ Sanene, imimi mokus waa, memligan yo Troas, meġure mepano-o metol purvanua nae Sametres. Ana imimi momalio e yo nene, ana kolulagi, ana mepano-o metol lepas nae yo Masitonia, ana mepa ura e kana kumali nene Niapoles.

¹² Ana e lepas na Masitonia nene, pupia pulkumali taġena tai mon m̄a ga, naġa naga m̄eke vatanon navisuarena kiena ne p̄arin suġe nae Rom. Kumali nene kiena kia Piliġae, ana imimi memial mepano-o meporu ea. Imimi mesike e yo nene legiena lua pona telu, pano-o tol Legiena Wa.

¹³ Ana imimi memloge rui naña apisa apisape e Legiena Wa, le Yu lala nae yo nene la asum̃a akila ke lotena e yo na leniena tai garo e wii tai, e pulkumali lepas na vano. Ana imimi m̃ena memolue vena metoven mevisu la e yo nene, ana imimi mepa metotano mesun memio sira lañasia naña la asum̃o apitom asike e yo nene rui.

¹⁴ Sira la nene tai, naga pe pe Yu re poli, ana naga sum̃a mlelaga e Ntewa. Naga pe nae kumali nae Tuatira, ana p̃uarar ke kiena pupia yum̃aena keviu tai, naga sum̃a p̃iliwilin kar ke kulmrae tai naña maran lavis malolo, naña po na po naña la amiyum̃aen e kiena yo. Sira nene, kiena kia Litia. Ana e pogos nene, Supe pietava e kiena sitomena narui, ana naga mlarar ruru visena la naña Pol naga sum̃a pisa pan la, a naga tarar m̃arera po e losinena.

¹⁵ Ana e pogos nene, Litia nene amio la naña e m̃ana um̃a, la punu ga apa e nakeena. Pisi, naga m̃areran imimi, pisa pisape “Visae amiu apisu sane nesum̃alu kemua m̃arera lelaga e Supe, sineun nesape amiu aimi asu re garu m̃au wa.” Sanene narui, ana naga pure imimi mepa mesike e m̃ana um̃a.

Akuan Pol amio Saelas apa e yum̃a nakoena

¹⁶ Ana e legiena si tai, ana memio Pol mepitom sina e kiela yo na leniena, ana imimi mepitawe narin sira m̃ee tai e mrapa. Narin sira m̃ee nene, yeririna lañasia apulua naga vena yum̃ae kiela, ana ninuna viowa tai sike e naga, naña apio asape ninuna ne lom̃ara, naña pe ninuna navisuen suri la naña aimi am̃alivi sirau. Ana yeririna la moki apimi apiun ke sira m̃ee nene tan yerkawa lala, vena naga visawal van la sanape e kiela malena lala. Ana pogos naña sira m̃ee nene pisawalia, ana la asu m̃a apan ke naiilaena pan kiena yerkawa lala, kila sanene ana pogos punu ga la asum̃a ataulu kilavaru moki na moki vanonia.

¹⁷ Ana imimi memial mepa laa sanene, ana narin sira m̃ee nene taveve imimi naga sirau, naga sum̃a piovion manene pan yeririna kar ga la punu ga, naga sum̃a

pisawal ke, pisape “!Ei, apisu ke ne! Yaru la nene la ape nayum̃aenen yum̃aena kiena ne Ntewa mali na metava manenea. La ke narui naña akilia avisawal mrapa na tamaliaena van amiu.”

¹⁸ Ana sirau, naga sum̃a kila ke sanene pan imimi e legiena moki, kila Pol mloge piowa pano pano-o, tol pogos tai, ana naga sinena kar ninuna viowa nena, ana naga kira pa varau, pis pania, pisape “!E, toroki! Nepisa mesmesun pan ko, nesape e kia kiena ne Yesu Kristo, ko omolue tan narin sira m̃ee nene nanagane.” Ana veraga ga, naga mligan narin sira m̃ee nene naga pano.

¹⁹ Ana pogos naña yerkawa lala kiena ne narin sira m̃ee nene apisu naña mrapa nene natauluen kiela kilavaru ea pimi piowa rui, la sinela kar Pol amio Saelas pañisi. Ana la apane lalua nene apano asum̃alu ase marana ne naliṣereena lala nae Rom garu kumali.

²⁰ Ana la apisawal pan la, apisape “Le Yu la nene, la apimi e kieta yo, la akila kare ita manene laa na wa.

²¹ La asum̃a sinelan asape am̃areran ita vena tetaveve kiela p̃elaga lañasia, ana e navisaluaena nae Rom naña ita tesike vatanonia e yo nini, pe mesmesu re nena ga naña ita tekila sa naña la asum̃a apisa ke ne poli.”

²² Ana yeririna la akila pupia m̃aagena, ana la akila kare Pol amio Saelas pañisi, asitom asape asu lalua, ana naliṣereena la nene apisa apisape la avitolwowa kulsota m̃ana lalua nene, ana awe la e laki.

²³ Ana la am̃e kare lalua nene pano pano-o p̃isa, ana apane lalua apano akuan la apa loyum̃a e yum̃a nakoena, ana apisaar m̃arera pan yaru na visuaren yum̃a nakoena, apisape naga monar visuar ruru la, lalua ve aure re sina, visae peraga, ana yoko viowa vania.

²⁴ Ana pogos naña yaru nene naga mloge visena nene, naga pure lalua nene apa manene loyum̃a, e yo m̃arera tai naña la apuarar ke yaru la naña ape p̃arm̃arera pañisi apa ea, a naga piar lala lala panon pupia laki naña m̃eke e yo nene.

Yemninu kululun yum̃a nakoena nene

²⁵ Ana asũma pano-o tol kolemallo yepelilika, Pol amio Saelas lalua asũma amlen ke pa Ntewa e yauena wa lala, a yeririna taṣena la naṣa asike amio la e yũma nakoena la asũma amiyagogon lalua.

²⁶ Ana la amilan manene paṣisi, naṣa veraga ga, pupia yemninu tai pimi, kila yũma nakoena nene miyuyuwawa make ga, naga kululun make kana nin kinakinan la punu ga. Ana la apisu mratava punu ga apietava, a sen punu ga naṣa apiarar limala lala a lala lala akekapil ga sa ga ne.

²⁷ Ana yaru na visuaren yũma nakoena nene naga tavilo, ana kiriri pimi pisu mratava la punu ga pietava ga sike na, ana naga maṣe la naṣa asike loyũma, la make ga apuretetai apava make rui. Ana suri nene kila naga marau paṣisi, ana naga mlalua kiena playu na mara, ana sinenan pisape yalm̃ar ke sina ga naga mare.

²⁸ Ana Pol naga pisu ke ne, ana pio manenea, pisape “!Ei, ko osuwa, ko ve okila kare ko re! !Imimi punu ga mesike ga wa!”

²⁹ Ana yaru nene naga pio sape awar kapi vivaga imi, ṣisi na naga kiriri pa loyũma e yo naṣa Pol amio Saelas asike ea, ana naga mloru pito tano e lan lalua nene, naṣa naga sinen kurkur na kurkur.

³⁰ Ana sirau, naga ṣere lalua na apa ke sina ga vanua, ana naga piun tan lalua nene, naga pisape “Ei, yerkawa luwoka, ana monar nekila ya naṣa ṣisi na nekus natamaliaena?”

³¹ Ana lalua nene apisa pania, apisape “Ko monar olelaga e Suṣe Yesu, ana otol natamaliaena, ko omio la naṣa e moṃa mratava.”

³² Ana la apisawal visena kiena ne Suṣe pania, a apisawal maṃa ga pan la naṣa asike maṃa uṃa,

³³ ana e ke e kolemallo ga nene, yaru nene naga kila ruru yepe sirorop la naṣa sike e yepena ne Pol amio Saelas, ana e ke maṃa e pogos nene, lala akee naga amio la naṣa asike e maṃa mratava.

³⁴ Ana naga ṣere lalua nene apa loyũma e maṃa yũma, ana naga mla kinanena

pan la, ana naga amio lala na maṃa uṃa la asũma akekara na akekara, komin nanagane la maṃal Ntewa e kiela malena la narui.

³⁵ Ana pa tol kolulagi, ana naliṣereena lala amninue ke suri nene wa, ana la ato si tano, ṣisi la apitetalia kiela yeririna lala apimi apisawal, apisape “Yeririna lua nene akilia amolue ga sane.”

³⁶ Ana yaru na visuaren yũma nakoena nene naga pimi pisawal pa Pol, pisape “Naliṣereena lala amligan visena pimi apisape amlua akilia amolue ga sa ga ne, sanene ana amiu aimi, ava ga sane. Ana ita ve tekila re si visena van ita vanon suri nene.”

³⁷ Ana Pol pisa pa la naṣani pisape “Ei, taṣatete ga, pe sa re nene poli. Imimi maṃa mesike vatanon ṣarin suṣe nae Rom nene, a e kiena navisaluaena, naliṣereena la nene akila pe mesmesu re pan imimi nene poli. Pe maṃa re naṣa imimi mekila suri tai piowa poli, ana sir- aunia la maṃe imimi e marana ne yeririna lala, a akoan imimi mepa loyũma e yũma nakoena, ana nanagane la sinelan asape maṃene plan vinaun imimi ga sanene. ! Taṣatete ga, awasuṣe amiu ava avisa van la avisavenua la ke narui la monar aimi aure plan imimi e yo nini, a monar aimi avisa visena tai van imimi sumo wa!”

³⁸ Ana yeririna kiena ne naliṣereena lala amla visena nene kiena ne Pol aṣasuṣela si apano, ana pogos naṣa amlogeyu naṣa Pol amio Saelas, lalua maṃa asike vatanon navisaluaena nae Rom, la amarau narui.

³⁹ Ana la apimi apisa visena laṣas pan lalua, ana aṣure la apa mrapa, apisape la sinelan asape lalua monar amolue e yo nene.

⁴⁰ Ana Pol amio Saelas, lalua aṣasuṣe la sina, lalua apa maṃaliviṣesan e yũma maṃa Litia sumo, a siraunia, ana la apisu sina arueta lala, a la amla visena wo lala vena iilaar laena, a siraunia, ana lala amolue petan pulkumali nene.

17

Pol amio Saelas, lalua asike garu Tesalonaika

¹ Ana ñisi na Pol amio Saelas, amiyaloro apano, ana akome pulkumali lua nene Ampipolis amio Apolonia, ana lalua apimi atol pulkumali nene, Tesalonaika. Pulkumali nene yum̃a na leniena kiena ne le Yu la tai m̃eke ea,

² ana sa naña Pol mon m̃a kila e yo punu ga naña naga pa ea, naga pa sikol la nae e yo nene, ana sum̃a pa ke loyum̃a amio la e kiela yum̃a na leniena, e pogos na leniena punu ga. Ana e Legiena Wa telu, naga kila sanene, a naga pisi yam moki amio la e ya naña Visena Wa naga sum̃a piania.

³ Ana Pol sum̃a pian la ea, a naga sum̃a pisawal meraravan po pan la pisape taveve ya naña Visena Wa pisa, ana mesmesu ga naña kiela Navisaarena, yeririna la akila viowa ga vania, va m̃a va m̃aga naga mare, ana siraunia naga monar mal sina e marena. Ana Pol pisawal pan la, pisape “Yesu nene, naña nesum̃a nepisayu ke ne, naga ke naña pe kieta Navisaarena narui.”

⁴ Ana lañas naña la asum̃a amiyagogonia, apisu asape visena nene pe lelaga, la amlelaga e Yesu, ana apimi e lepas kiena ne Pol lalua Saelas. Ana e yo nene, yeririna lañasia naña pe ape Yu re poli, la amlelaga e Ntewa rui, ana lala moki m̃ena ga naña amlelaga e Yesu narui, amio m̃ena ga li nasumonena kiena sira la moki.

⁵ Ana yerkawa kiena ne le Yu la pe akekara re poli, la apielue, ana la apisayu asape akilali suri tai. Ana la apa apisu ñegas kiena ne ñarkawa lala nae yo nene, ana añere lañasia naña apiowa laa ga wa, ana apa añere sina yeririna la moki ana akila pupia ñina ga nene, ana la apa akila kare ke pupia veveyuena e pulkumali nene na. Ana la añape Pol amio Saelas lalua asum̃a ke e yum̃a m̃ana yaru tai, kiena kia Seson, ana la apanon lalua e yum̃a nene, vena aware la ava kumali. Ana la apimi atol yum̃a nene, ana la akila kare ruru nena ga, akilaroro kana mratava nena,

⁶ ana pe añal re lalua asu loyum̃a e poli. Ana apuarar ga Seson nene, amio arueta tañena lañasia, ana añere la apano asum̃alu ase marana ne li nasumonena

lala na pulkumali nene. La apisi keviu, asape “Yeririna la nene naña asum̃a apilontapon ke kieta yomarava, la apa e yo tañena la moki rui, ana nanagane la apimlein asike pun ita narui.

⁷ Ana yaru nene, Seson, naga ñere la apa m̃ana, ana la nene apiowa ga, asum̃a akilaroro ke navisaluaena kiena ne ñarin suñe nae Rom nene, Sisa. Sisa nene pisa rui pisape monar telotun ga naga, ana la nañani asum̃a apisa ke asape ñarin suñe taaga ga na yomarava nini, naga yaru tai, kiena kia Yesu.”

⁸ Ana yeririna punu ga amio li nasumonena lala na pulkumali nene, pogos naña amloge visena nene, ana la sinela mimi, ana la asum̃a akiikii a asum̃a apisi piowa keviu manene la.

⁹ Ana li nasumonena la nene asape Seson lala la monar aligan pupia kilavaru tai sike pula, naña kila sane ñisi na Seson la ve aure re si Pol imi sike amio la pog tai, visae peraga, ana la tañatete si akilia awarmaran kilavaru nene. Ana siraun naña amligan kilavaru nene sike na, ana la atañan la apetan yo nene apano.

Pol amio Saelas, lalua asike garu Perea

¹⁰ Ana kolemalo ga, ana arueta la nae e yo nene apa amligan vinaun ga Pol lalua Saelas e kiela mrapa, ana lalua apa sina metava e pulkumali tai, naña Perea. Ana yam si tai, lalua asum̃a apa ke loyum̃a e yum̃a na leniena lala kiena le Yu lala e yo nene.

¹¹ Ana le Yu make ga la nae e yo nene la apo, a nalogearena sike e la, lala pe sa re le Tesalonaika la poli, lala kiela sitomena la po naña la akilia amiyagogo ruru po e navianena kiena Pol amio Saelas. Ana legiena punu ga, sinelan manene asape avisuveve loyum̃a e Visena Wa kiena ne Ntewa, vena akirawal asape lalua apisa pe lelaga pona pa sanape.

¹² La akila m̃a sanene pano pano-o, pe yam piavi re poli, ana la asiar naña amlelaga narui, a nasumonena lala kiena ne sira yere Kris m̃ena ga lala amio yere Kris la moki, la m̃ena ga amlelaga.

¹³ Ana siraunia, visena ñasuñe sina pa tol le Yu la garu Tesalonaika nanua ne,

ana sape nanagane ana Pol mēke mlologon ke mēna ga visena kiena ne Ntewa garu Perea, ana la sinela mimi sina. Ana apam ma metava Perea, ana akila kare ke sina ga sinena ne le Perea taḡena lala vena kila la aveveyu van lalua, amēnelua lalua avano.

¹⁴ Ana arueta la apisu suri nene, ana apisu asape popon aiila Pol naga vito sina ga garo losi vilaga wa, ana apisu asape Saelas amio Timote, lalua akilia asuḡa ga wa, lalua na poga ga.

¹⁵ Ana aḡere Pol e kiena mrapa, apito garo losi, ana la akus waa tai ana apa atol pupia pulkumali naḡa Atens. Ana pogos naḡa amligan Pol e yo nene ana la asape awasuḡe la sina, ana Pol pisa pan la pisape ḡisi na Saelas lalua Timote, la mēna ga luwoka monar ato garo puna vilaga ve viavi re, vena ayuḡae sina ga lele taaga amio naga.

Pol sike garu Atens

¹⁶ Ana Pol sike garu Atens, suḡate ke Saelas lalua Timote vena lalua aimi, ana pogos naḡa naga pisuveve yo la uḡa e pulkumali nene, ana pisu ga naḡa yo pulen ga nono lala, ana suri nene miyur sinena paḡisi.

¹⁷ Ana naga suḡa pa ke loyuḡa na leniena kiena ne le Yu lala, ana suḡa kila visena la moki komin suri nene amio la a amio mēna ga li taḡena la naḡa amlelaga e Ntewa. Ana legiena punu ga, ana naga suḡa pa mēna ga e yo metava na pulkumali, vena sun amio yaru ai naḡa visae naga lual e yo nene.

¹⁸ Ana garu Atens, ana pupia yuḡa lua naḡa na navianen namanmaruaena, naḡa yaru navianena la na yuḡa lua nene, a pio la asape le Epikuru, amio le Stoiki lala, ana la asuḡa apiora ke mēna ga amio Pol.

Ana laḡas nene, asuḡa apismumun Pol, asape “!Yaru naḡa pivis kaḡar ne, ana naga pe kilia ruru re suri wo tai naḡa kilia visa van ita poli.” Ana lala mēna ga laḡas, amloge naḡa Pol suḡa pisayu ke Yesu amio nasuḡalena, ana la asitom ke asape nanene na yeririna lua nene, ana

la apisa, apisape “Peraga, imimi mepisu mesape yaru nene naga suḡa pisayu ke ntewa taḡena lala a ninuna taḡena lala na purvanua nae ga gare tai.”

¹⁹ Ana siraunia, le Atens la apio Pol asape naga va totano amio la e kiela pupia kumali, metava e pupia kunus nae yo nene, naḡa kiena kia, Areoḡakas. Ana apiun tan Pol, asape “Imimi sinemimin mesape ko otaḡali ovisayu navianena viu nene naḡa osuḡa opisawal ke pan yeririna lala, ovisa van imimi wa.

²⁰ Imimi mesuḡa memloge ke navianena nene pe taḡena ruru nena ga, ana sinemimin mesape mekilua suri la naḡa osuḡa opisa ke ne, ana kala kinas sanape.”

²¹ Ana pogos naḡa akila sanene, ana asuḡa ataveve ke kiela ḡelaga mārera tai, komin naḡa le Atens lala amio yeririna taḡena la naḡa asike e yo nene, ana la sinelan manene ga naḡa silaga, ana asuḡa aloge pona asun e navianena viu pona visena viu, pona sitomena taḡena lala pona lelagaena kiena ne yeririna lala.

²² Ana Pol suḡalu se marala e kumali naḡa ma metava garu Areoḡakas nene, ana naga pisi pan la. Naga pisa pan la, pisape “Yerkawa lala nae Atens, nepisu sane amiu sinemiun manene laa nalotena lala, taulu naḡa yaru taḡena la sinelania.

²³ Pogos naḡa nesuḡa nemialoro ke e kumali nene, ana nepisu punu ga yo wa lala a wonta lala, a kiamiu nono la moki manene laa, ana pogos tai ana nepisu wonta tai naḡa ate siriena tai sike ea, naḡa pisape ‘Wonta kiena ne ntewa naḡa temninue naga.’ Ee, amiu amlenin ke ntewa nene, ana amiu apisa lelaga ga, pe akilia re nena naga poli, naga a ne. Ana Ntewa naḡa pe lelaga ga taaga sike na, ana naga ke narui naḡa sineun nesape nevisawal van amiu vena akilia naga.

²⁴ Naga nene naga pe Ntewa keviu naḡa sii yomarava nini, a suri punu ga la naḡa tepisu sike ea. Naga na, naga pe ḡarin Suḡe nae ma e peni, a pe ḡarin Suḡe na yomarava nini. Naga na, naga pe su re nena e yo wa la poli, a pe su re e suri wa la naḡa yeririna ga la akila poli,

²⁵ a naga pe ðasine re yeririna poli, vena tevagania pona tevisuaria. Peraga, komin naða naga ke narui, naða naga mla malena, a mla yalua, a mla suri make ga pan yeririna punu ga.

²⁶ Ntewa ke na nene narui, naga kila yolai la punu ga amalivi e yeririna na sumo naða naga siia, ana nanua nanua sumo laa rui, ana naga pisaar pogos punu ga a yo punu ga e maran yomarava nini, naða ðisi na yolai la nene akilia amal ea.

²⁷ Naga kila sanene naða kila sape ita punu ga, monar tesitomål tesape ita monar telual Ntewa nene, ana kila ita tesumåa tekian kare ga limata pa e yemalolo, vena topoporog welen kiena kapi vivaga. Ana popon naða tesitomål mæna ga, tevisave Ntewa nene, naga pe su manene re koperin poli, naga moña ga lavisi pun ita ita make ga peve taaga.

²⁸ Yeririna na siriena kiamiu yauena lala la apisayu suri nene rui, naða lala tai naga pisa sanini, pisape 'Ita temal e naga, ita temial e naga, ita na e ga e naga silaga,' ana ta mæna ga tai pisa sanini, pisape 'Ita punu ga ita tepe kiena li viu lala.'

²⁹ "Ana komin naða ita punu nena ga tepe narina ne Ntewa nena sanene, ana pe mesmesu re naða tesumåa tesitom tesape naga sa ga nono tai naða liman yeririna miyumænen e kol, pona e selpa, pona e kilavaru, naða amiyumænenia taveve ya naða sike ga e kiela nasinena-nena.

³⁰ Nanua sumo laa rui, e yemalolo, ana yeririna la pe akilia re suri poli, ana Ntewa sinen po pan la, naga pe pulo re kiela naviowaena la e pogos nene poli. Ana nagane narui, ana Ntewa pisawal mesmesun ga pan yeririna punu ga e yo punu ga, pisape monar avilopu la,

³¹ komin naða naga pisaar legiena rui, naða ðisi na naga liðere yomarava nini, ve sa naða torokin naga kila, a naga pisaar mæna kiena yaru tai rui naða ðisi na naga kila kiena yumænen nene. Naga kila suri nene merarava ruru pan yeririna make ga ðisi rui, naða kiena yaru wa nena, amemmar pa naga rui, ana siraunia Ntewa pisirlua ke sina ga naga

mal sina."

³² Ana pimi tol pogos nene, la asumåa amiyagogon ruru Pol, ana pogos naða amloge naga pisayu pisape yaru tai mare, ana Ntewa kila naga mali sina, ana la laðas apitalia kare naga vanonia, ana laðasia apisa pania, apisape "Poga ga, tomåa sanene wa. Pona visae ðisi na imimi mela pulmas tai van ko vena ko osunyu sina van imimi pogos tai yo."

³³ Ana Pol pisu sane la nene yepel mavin yagogonen naga, ana naga petan la, ðasuðe sina pito garo tano,

³⁴ ana yeririna laðas nae lele nene la amlelaga, ana asumåa apimi akuspran la apa lele taaga amio Pol, naða lala yaru tai, naga pe yerkawa tai na kumali nae ruru nena Areoðakas nene, kiena kia Tionisia, ana ta mæna ga, naga pe sira tai, a naga kiena kia Tamaris, a la taðena mæna ga la laðasia.

18

Pol sike garu Koren

¹ Ana siraun e suri la nene naða Pol kila garu Atens, naga purmatania, naga pa e pupia pulkumali taðena naða Koren.

² Ana e yo nene, naga mål yere Yu tai, naða naga pe yaru tai nae lepas nae Pontas, a naga pa sike ga e purvanua naða Italia, e kana pulkumali keviu naða Rom, ana nanagane, naga amio wona, lalua apimi ga asike Koren na wa, komin Parin Suðe Koltias nae Rom naga koven plan le Yu lala e kiena yo. Yaru nene, kiena kia, Akwila, a wona, kiena kia Prisila.

Sanene, Pol pa pisu lalua nene,

³ a lalua apisape popon Pol sumåa amio la, la ayumænen re laa kilavaru sane wa, komin naða lalua amio Pol, la telu, kiela yumænen taaga, naða kiela yumænen nasuluen kanus na yumåa.

⁴ Ana la amiyumænen mæna sanene pano-o, ana e Legiena Wa lala, Pol naga sumåa pa ke e yumåa na leniena kiena ne le Yu la, a sumåa kila ke visena la moki paðisi amio le Yu lala, a amio mæna ga le Kris lala naða asike ea, ana naga kila mæna sanene pano-o taulu la moki.

⁵ Ana siraunia, Saelas amio Timote la apimi mare ga rau atol ga yo e nene na wa, ana e pogos nene, Pol naga tam̃an make kiena pog punu ga e yum̃aena kiena ne Suṽe, naṽa suṽa mlologo, suṽa pisawal ke pa le Yu lala pisape kiela Navisaarena lelaga naṽa la asum̃ate ke asape imi, naga nane Yesu nene naṽa pimi rui.

⁶ Ana visena nene kila le Yu laṽasia sinela kar Pol, ana la apisatam̃e kare naga paṽisi, ana la akila m̃a pano-o kila narui pogos tai Pol kila kile tai pan la, naṽa naga kululun plan yavi nae yo nene petan m̃ana kulsaket, naga pisa pan la, pisape “Visena lelaga kiena ne Ntewa nepisawal ruru pan amiu le Yu la rui. Ana visae yepemiu mavin logearena, sinemiun asape ava akokovio ga, nevisa van amiu sanini nesape kamiu kuruta naga sike ga e limamiu, pe su re si e lum̃au po laa rui. Siar nanagane, neligan amiu, ṽisi na neva nevisawal ga Lologena Wo nene va la naṽa pe ape Yu re poli.”

⁷ Ana Pol molue petan la e kiela yum̃a na lotuena, ana naga pa sike ga e yum̃a tai naṽa m̃eke ga e lepas nen yum̃a na lotuena nene. Yum̃a nene, m̃ana ne yaru tai naṽa naga pe pe Yu re poli, ana nanagane naga mlelaga e Ntewa rui, kiena kia Titias Sastas.

⁸ Ana nasumonena na yum̃a na lotuena nene e pogos nene, naṽa kiena kia Krispas, naga tai naṽa mlelaga e Suṽe Yesu, naga amio la ne e m̃ana mratava, a le Koren m̃ena ga la moki naṽa pogos naṽa la amloge visena lala kiena ne Pol, ana la amlelaga, a siraunia akee la.

⁹ Ana sirau, e yemalo tai, Pol momalio pisu Suṽe pisi pania, pisape “Pol, ko na ve omaraun re yaru, ana ova ga, osuṽa ovisawal kiau visena. Ve okila re naṽa yaru taṽena la akila ko omalumu,

¹⁰ komin naṽa in na nesike nemio ko. Pisi na taṽatete yaru nae e pulkumali nene tai naṽa kilia su ko pona m̃ene ko, komin naṽa in na kiau yeririna la mokliu asike e yo nene rui.”

¹¹ Ana Pol sike e yo nene yam piavi m̃aga, pa tol kas taaga kupario orai, a

silaga naga suṽa pian ke visena kiena ne Ntewa pa yeririna lala.

Le Yu la aṽure Pol pa kumali

¹² Ana e pogos nene, ṽarin suṽe nae Rom naga mligan yaru tai vena naga ve suṽen lepas nen yo kiena ne le Kris la nene, a yaru nene kiena kia ne nanene Kalio. Ana e pogos nene le Yu la apisayuia ana la apiranari apisape la monar akila suri tai vena akila wo Pol naga ve lologo re sina, ana la apa atarar Pol, aṽure pa e kumali kiena ne Kalio nene. Ana le Yu lala apisawal pa Kalio amio kiena naliṽereena lalua, la apisape

¹³ “Yaru nene, naga suṽa kilali ke pisape were yaru lala vena ava alotun Ntewa e mrapa tai naṽa pe mesmesu re nenaga e lepas na kiamimi navisaluaena.”

¹⁴ Ana Pol suṽa sinenan ke pisape la navisatam̃een visena kiena ne la nene narui, ana naga pe pisi re poli wa, ana Kalio nene suwo marana, pisli m̃a pa le Yu lala. Naga pisa pan la, pisape “Le Yu lala, visae avisa van inu avisave yaru nene naga kila ṽelaga la naṽa piowa manene paṽisi, pona naga m̃e yaru tai, pona naga pinau, pona suri tai sanene, pogaga, pona nekilia neyagogon amiu yo.

¹⁵ Ana ya naṽa amiu apisa, nemloge sane pe pe suri re tai poli, pe suri korena ga nene na e kiamiu lepas navisaluaena amiu le Yu ga lala. Ve sanene, ṽisi na amiu ga avisuveve e naga, in na pe nekekarar re naṽa neyagogo e suri la nene poli pona nekila naliṽereena tai vanonia.”

¹⁶ Ana e visena la nene naga m̃ene plan la ke sina ga petan kiena kumali.

¹⁷ Ana suri nene kila narui la sinela mimi manene la sane, ana pogos naṽa la apa vanua, atarar kiela nasumonena viu naṽa na kiela yum̃a na lotuena, naṽa kiena kia Sostinis, ana la asu kare naga paṽisi mon ga e mratava na kumali nene. Ana Kalio suṽa pisu ke ne, ana naga pe sitom ṽele re poli, naga pe kila re nena suri tai pan la poli.

Pol sike Episas, siraunia pa si ma Antiok

18 Ana siraun e naga nene, Pol naga sike amio arueta lala nae Koren yam piavi towe laa sane, ana siraunia, naga mligan la, sitom sape va si Seria, a e pogos nene, Prisila amio Akwila, lalua amio naga. Ana la apito garo losi, e pulkumali naŋa Kenkria, ana e yo nene, Pol pisape awe vilŋarina. Naga nene komin naŋa naga kila navisaarena mŋarera pa Ntewa rui nanua sumo, ana nanagane, suri punu ga e navisaarena nene la ŋisi rui, ana la aŋe ga viluna e pogos nene na wa. Ana la amiai e waa tai, naŋa sumŋa pa ke garu Episas.

19 Ana pogos naŋa apimi atol Episas, la apa ura, ana Pol pisape ŋisi na Prisila amio Akwila la asumŋa ayumŋae e yo nene sumo wa. Ana naga, naga mligan lalua, pa loyumŋa na lotuena kiena ne le Yu lala e yo nene, ana naga kila visena moki amio la.

20 La akekarana naŋa asun amio Pol, ana la sinelan asape naga su re laa amio la wa vena la akilia avis amio naga,

21 ana Pol pisa pan la, pisape “Potena paŋisi, ana in na monar nowasuŋe si neva garu Seria sumo wa. Ana visae Ntewa naga kiena naliganarena visave neimi sina, ŋisi na ve ve piavi re, nowasuŋe si pun amiu e yo nini Episas.” Ana naga taaga mligan si la nene, kus waa pano.

22 Ana pogos naŋa naga pimi tol ke sina ga Seria, naga pa ura e pulkumali naŋa Sisaria, ana naga pa si ma metava Yerusalem. Pisi na naga pa mŋalivin ŋegas nen li nalelagaena lala, a siraunia, naga pitomi si garo Antiok. Nane, Pol kila make kiena pupia yalena yam lua nene narui.

Pol mial ke sina ga, yam telu narui

23 Ana Pol pa sumŋa garu Antiok pano- o ŋisi, ana naga mligan si yo nene, naga ŋasuŋe si pa e pulkumali kar ga la punu ga e lepas nae Kalesia nene amio Prisia. Naga pa komli e yo la nene yam tai rui, ana naga pa ke sina ga vena iila li nalologena lala vena aviawa mŋarera la sane.

Apolos mlologo garu Episas amio Koren

24 Ana pogos naŋa Pol pe pimi tol re si Episas poli wa, yere Yu tai pimi e yo nene, naga nae pupia pulkumali nene Aliksantrea. Yaru nene, kiena kia Apolos, naga pe yaru tai naŋa ŋarina po paŋisi, naŋa naga kilia make visena la naŋa sike e Siriena Wa lala, a naga pe yaru tai naŋa mlologo po naŋa po.

25 La apian ruru naga e mrapa kiena ne Suŋe rui, ana naga tamŋan kiena malena wetelu vena naga lologo pona vian ruru yeririna la e suri la e Yesu. Suri la punu ga naŋa naga pisa pe mesmesu paŋisi, ana suri ga tai, naga pe mlogeli re poli wa naŋa apisape yaru la monar ava e nakeena e kia kiena ne Yesu, naga kilia ga nakeena naŋa Yoane Nakeena naga kila nanua sumo.

26 Ana pogos naŋa naga sumŋa pa mlologo ke loyumŋa e yumŋa na lotuena kiena ne le Yu lala, ana naga pe maraun la re poli, naga pe sitom ŋele re suri tai poli. Ana pogos tai, Prisila amio Akwila, lalua amloge naŋa naga mlologo ke sanene, ana lalua amloge kilale sane yaru nene pe kilia ruru re suri laŋas poli wa e mrapa kiena ne Ntewa, ana lalua aŋure naga pa akilapian ruru si e suri la moki.

27 Ana siraunia, Apolos naga sinenan sape va e yo kiena ne le Kris lala, garu Akaea, ana arueta lala nae Episas la apisa apisape po paŋisi naŋa visae naga va sanene, ana la asiri mŋaki tai pa li nalologena lala e lepas nene naŋa Apolos naga kilia war vano, vena la akekarana naŋa aurear naga sike amio la. A pogos naŋa naga pa tol yo nene, naga miila ruru la naŋa lemamiena kiena ne Ntewa kila la amlelaga rui.

28 Naga miila la naŋa sane e marana ne yeririna lala, naga kipian la pisape sanape naŋa le Yu lala la akila pal mrapa, komin naŋa naga kipian la e visena la moki naŋa sike e Siriena Wa naŋa la apisa meraravan rui apisape Yesu naga pe Navisaarena kemua lelaga. Ana pogos naŋa le Yu la amloge kiena vianena la nene, la pe apisa re si suri tai poli.

Pol sike sina ga garu Episas

¹ Ana pogos naŋa Apolos pa sike ma Koren wa, Pol sumŋa mialoro ke e kiena mrapa naŋa kom ke e lepas naŋa pa mŋa metava e kunus lala, ana naga mlilu mŋa mrapa nene pano-o naga pimi tol Episas. Ana e yo nene, naga pa mŋalivin narin pegas nen li nalelagaena la naŋa asike ea,

² a pogos tai, naga piun tan la, pisape “?Pogos naŋa amlalaga e Yesu, amninu Ninuna Wa pimi e amiu e pogos nene, pona pe amninu re poli?”

Ana la apisatame naga, apisape “?Ana Ninuna Wa ya nene? Imimi pe memlogeli re suri tai sanene poli wa.”

³ Ana Pol piun ke sina ga tan la, pisape “?Ana pogos naŋa akee amiu, amiu apisu sane naga nene na kana kinas sanape?”

Ana la apisatamea, pisape “La akee imimi, imimi mepisu sane sa ke ga e nakeena nene naŋa Yoane sumŋa kila ke nanua sumo.”

⁴ Ana Pol naga pian ruru la, pisape “Ee, naga nene naga poga ga, ana nakeena naŋa Yoane naga kila nanua sumo, naga kila pa yaru lala sane kile ga tai naŋa sane yaru la nene la apilon la rui, ana naga nene na kana kinas na pe sa re naŋa amlalaga e Yesu po laa wa. Yoane naga mŋena ga kilia mŋa suri nene, komin naŋa naga pimi sumo, a naga sumŋa pisa ke pa yeririna lala, pisape la monar alelaga van naŋa pŋisi na imi raunia, sane Yesu.”

⁵ A pogos naŋa le Episas la amloge naŋa Pol pisayu ruru suri nene pan la, la apisu sane popon la ava si e nakeena, ana la akeela e kia kiena ne Suŋe Yesu.

⁶ A e pogos nene, Pol pu pŋarila, ana Ninuna Wa pitomi e la, kila la asumŋa apisi ke kome visena taŋena lala, a kila mŋena la asumŋa apisawal ke mŋena ga visena laŋasia naŋa Ntewa mla pan la.

⁷ E kiela narin pegas nene, pe la moki re poli, la atol ga lualima taaga pa lua.

⁸ Ana Pol na sike garu Episas tol sina ga kupario telu, a pogos punu ga naga pa kila ke lotuena loyuma e yuma kiena ne le Yu lala, a naga kila ke visena moki pan la. Pogos tai, naga pe sitom pŋele re poli,

naga pisi mŋarera pan la, pogos tai naga peveyu pan la, a pogos tai naga tagin la vena aimi loyuma e nasuŋenena kiena ne Ntewa.

⁹ Naga kila mŋa sanene pano-o, ana naga pisu naŋa peraga, la ape pŋarmarera ga, la pe sinelan re nena naŋa alelaga poli. Ana la pŋasia la asumŋa apisayu kare Mrapa Viu nene pa yaru taŋena lala loyuma e yuma na lotuena nene, ana Pol sumŋalu pŋere plan si li nalogena lala, la amolue petan le Yu taŋena la nene, ana legiena punu ga la apa akila viorena a amlologo pa yaru lala e yuma na viorena kiena ne yaru nene Tiranas.

¹⁰ Naga nene, Pol sumŋa kila mŋa ga sanene pa tol ke sina ga kas lua, ana kila sanene yeririna lala nae lepas keviu nene Esia, le Yu lala amio yaru taŋena lala, la punu ga amloge visena kiena ne Suŋe.

Yaru laŋasia la amlenpal ga e kia kiena ne Yesu

¹¹ Ana pogos naŋa Pol sumŋa miyuma e ke sanene garu Episas, Ntewa miyuma e naga, kila kile kerkeviu la moki ve na iilaen yeririna lala.

¹² Visae narin kulmrae tai, pona kulsota tai, ana yaru la aŋar pimi Pol pilivili sumo wa, pŋisi na aŋar pano akila tol ga yepena ne li namaiena lala, a kulmrae la nene amene plan kiela maiena lala, pona ninuna viowa la naŋa asike e la.

¹³ Ana e pogos nene, le Yu mŋena ga laŋasia amialiali ke yaru lala, la asumŋa amene plan ke ninuna viowa petan la. La nene pe amlalaga re e Suŋe Yesu poli, ana pogos naŋa amloge sane Pol miyuma e ke sanape, la mŋena ga asitom asape pŋisi na la akilali naŋa ayuma e namareraena na kia nene. Ana pogos naŋa amene plan ninuna viowa, la apisi pania, apisape “Mepisa mesmesun pan ko e kia kiena ne Suŋe Yesu naŋa Pol sumŋa mlologon ke ne, pisape ko oure vetan yaru nene.”

¹⁴ Ana e pogos tai, mee mŋena ga laŋas sinelan asape akilali ve sanene. La nene, la olua nene la na narina ne pŋarin yar wa kiena ne le Yu naŋa kiena kia Skeva.

15 Ana la naḡani apimi amlenwo yaru tai naḡa ninuna viowa sike e naga, ana la apisi pa ninuna viowa nene vena ligania, ana ninuna viowa nene sinena kar la, pisape “Ee, nekilia m̃a kia naḡa Yesu, a nemloge ke m̃ena ga kia naḡa apisape Pol, ana amiu na ai? !In na nemninue amiu nena ga, avisuar amiu!”

16 Ana veraga ga, yaru nene pula pimi pula, kila mara amio la su la pano pano-o, taulu la olua nene, kilapel la naḡa kilapel la pitolwowa make m̃ala kulsota lala. Ana apurmatan yo nene aḡar kuruta paḡisi.

17 Ana yeririna la apisayu suri nene pano tol le Yu lala amio m̃ena ga yaru taḡena lala, le Episas lala la punu ga amloge, a suri nene kila narui la sinela kurkur towe la sane, a kila narui amieluar kia kiena ne Suḡe Yesu pa laa sane.

18 Ana siraunia, la moki naḡa nanagane la apimi ape li nalelagaena la ḡisi rui, la apimi apisawal apisape la aḡar ke kimi, a la apisawal suri la naḡa la amiyum̃aen ke e purkol.

19 A laḡas naḡa ape purḡes nen kimi kemua lelaga, aḡar polo suri la naḡa amiyum̃aen ke amio la apimi lele taaga, sa naḡa kana tus ne lala, ana e marana ne la naḡa apisu ke e pogos nene, la akoven make ga pa e kapi. Tusi la nene moki paḡisi, ana pogos naḡa asitoḡal kana kilavaru ne la punu ga naḡa apul la e sumo, ana la apisu sane keviu paḡisi, taulu tenario na kilavaru moki paḡisi.

20 Ana pogos naḡa suri la ne sanene pimi ḡarwowo ke yo, la apisu sane nam̃areraena kiena ne Ntewa naga sum̃a miyum̃ae ke m̃arera paḡisi, a la apisu naḡa visena kiena ne Suḡe naga sum̃a kulkululu pano taulu yaru la moki laa narui e yo punu ga.

Veveyuena keviu garu Episas

21 Ana Pol pisu kilale naḡa yum̃aena kiena ne Ntewa pa ke metava narui, ana naga mninukilale pisape naga m̃ena ga monar yum̃ae va re laa na wa, vena naga va telivi visuveveli sina ga lepas la nene Masitonia amio Akaea, gare Kris, a sirau, ḡisi na naga wasuḡe ke sina ga va Yerusalem. A naga pisaar m̃ena

ga e pogos nene, pisape “A sirau naḡa nowasuḡe neva si Yerusalem, ḡisi na monar neyaloro si neva re laa na wa, monar neva m̃a neva m̃a netol ma Rom.”

22 Ana naga pisu sane ḡisi na naga monar su re laa yam ve plas laa sane sumo wa e lepas nae Esia amio kana pupia pulkumali nena naḡa Episas, ana yaru naiilaen lalua nene, Timote amio Erastas, naga mligan la asumo apa Masitonia.

23 Ana e pogos nene, naḡa Pol sike gar yo naḡa Episas wa, ana pupia veveyuena tai molue e lepas na Mrapa Viu kiena ne Yesu.

24 Suri nene, kana purḡesia naḡa le Episas lala, la apisa apisape kiela ntewa, naga sira tai, kiena kia Atemis, a la amlotun ke kana pupia nono nena e kana pupia yum̃a wa nena. Ana yaru tai nae e yo nene, kiena kia Timitrias, naga ḡere yaru moki liu apimi amiyum̃ae kiena, naḡa la asum̃a amiyum̃aen ke narin nono lala na yum̃a m̃ana ne sira ntewa nene, la amiyum̃aen e selpa, a yaru la asum̃a apul ke tania, naḡa naga amio kiena yeririna lala la asum̃a aḡar manene kilavaru e paḡisi.

25 Ana sirau, naga pisu yum̃aena naḡa Pol kila ke ne sum̃a m̃e moḡar ke kiena yum̃aena nene narui, ana pogos tai naga pio kiena yeririna la nene, amio yaru taḡena la naḡa la amiyum̃aen ke suri la e selpa, ana pogos naḡa apimi lele taaga, naga pisi pan la, pisape “A, aulai, amiu akilia m̃a naḡa sane ita temali ke ga e kieta yum̃aena nene naḡa ita tesum̃a temiyum̃aen ke suri la e selpa. Yum̃aena ga nene kila na ita tesum̃a toḡar ke kilavaru laḡasia.

26 Ana nesitom nesape amiu na amloge narui, pona ita laḡasia tepisu e kilamarata rui, naḡa yaru suri naḡa Pol nene naga sum̃a pilon ke sitomena kiena ne yeririna la pa pe taḡena. Naga sum̃a kila ke e nini, a sum̃a kila ke m̃ena e lavisin pulkumali punu ga na pupia kieta lepas nini Esia, naḡa naga sum̃a pian ke yaru lala pisape nono la naḡa yaru miyum̃aen e limana, la pe ape ntewa re nena poli.

27 Ana in na nepisu sane visena kiena ne yaru nene ḡisi na kila kieta yum̃aena

vito tano vaṗisi, naṗa ṗisi na yaru la ve akekaran re si auli suri la naṗa ita temiyum̃aen ke narui. A metavana, ita temio le Esia lala, amio m̃ena ga yeririna taṗena kar ga lala e yomarava nini, ita tesum̃a temlotun ke ntewa wo tanea tai nene naṗa Artemis, pona yaru nene sinenan pisape kovenlua kare naga yo, pona sinenan pisape kila m̃ana yum̃a wa imi ve suri korena tai yo.”

²⁸ Ana pogos naṗa naga ṗalelar kare kiela sitomena la sanene, kila la sinela mimi manene laa narui, ana la asum̃a apiovionia, apisape “!Artemis nae Episas naga po, tepinaia naga taaga-o!”

²⁹ Ana la sane am̃arera laa narui, ana la apa akila pupia m̃aagena gar kumali, ana apa atarar Kaias amio Aristakas, yere Masitonia lua naṗa amialoro amio Pol apimi asike e yo nini, ana la apurela, akiriri amio la apa loyum̃a e pupia lelen viorena nae Episas nene, a le Episas m̃ena ga lala apa amio la, apa akokonia yo nene ṗisa.

³⁰ Ana Pol m̃ena ga sinenan pisape va loyum̃a vena kilali naṗa visi amio pupia ṗina nene, ana nalogena nae Episas lala amaraun asape sa ṗisi awem̃arlaea, ana apisalup̃ar naga.

³¹ A yerkawa laṗas na Lokol Kansel kiena ne le Esia lala, la ape erau ruru po amio Pol, ana la m̃ena ga amligan visena pimi, apiun manene pa Pol vena naga ve va re loyum̃a, akila sanene naga pe pa re si poli.

³² Ana loyum̃a e yo nene, yeririna lala la akila ke pupia m̃aagena paṗisi, la moki liu naṗa apisi veraga, laṗasia apisi pa sanene, laṗasia apisi pe taṗena, a la moki naṗa am̃inue nena ga sane am̃a akila ke viorena na ya wa.

³³ Ana le Yu lala la amaraun asape sa ṗisi yaru la asitom asape la ke naṗa la ape purṗes nen veveyuena nene narui, ana la asupon lala yaru tai, kiena kia Aliksanta, naga pa sum̃alu se maran yaru lala vena visli van la vena la ve sinela kar re le Yu lala. Naga kuan limana kila avarurula, ana la am̃ape naga ke tai naṗa pe yaru na veveyuena narui.

³⁴ Ana siraunia, pogos naṗa la apisu kilale asape naga pe yere Yu ga tai, m̃aagena pe pito re nena tano poli, ana la asum̃a apio manene ke e kia kiena ne kiela ntewa naṗa sira nene, la asum̃a apiovion ke veraga, apisa apisape “!Kiamimi Artemis imimi le Episas lala naga po paṗisi-o! !Kiamimi Artemis naga taaga po paṗisi-e!” Ana la apio m̃a sanene pano-o tol mrae lua pe suri tai.

³⁵ Ana siraunia, suṗe kiena ne le Episas la nene sum̃alu se marala, naga kilali naṗa aimi amalumu sina pano-o ṗisi, ana naga pisa pan la, pisape “Yeririna nae Episas lala, ita punu ga tekilia ruru rui tesape kieta pulkumali nene, naga pe kumali keviu tai, a pe pulkumali wa tai. Ita ke narui naṗa tesum̃a tepisuar ke yum̃a wa kiena ne pupia kieta ntewa nene, Artemis, a tekilia tesape kieta lelagaena pe lelaga, komin nanua sumo verue ta nene mlai, ana kana pupia kilavaru wa nena mloru ma e peni pitomi, naṗa pe mloru re e yo taṗena la poli, mloru ga e ita rui, ana ita tesum̃a tepisuar ruru m̃a ga.

³⁶ Suri la nene tekilia rui tesape lelaga make ga, yaru taṗena lala taṗatete nena ga avisa karea. Ana sanene na, pe pon re tekila manene ṗarita poli, popon tekilali naṗa tesu ruru ga tesu m̃aga.

³⁷ Ana e lepas kien la nene naṗa amiu aṗure la apimi e nini, in na pe nemloge re naṗa amiu apisa apisape la apa apinaun suri wa tai e yum̃a wa m̃ana ne kieta ntewa poli, pona la apiuelin kiena kia, ana visae ve sanene ita taṗatete tekila suri tai va lalua nene e yo nini.

³⁸ “Ana visae yaru na kilaen selpa la nene, sane Timitrias lala, visae la kiela suri na visaen laṗasia sike ga wa vena avisa van lalua nene, poga ga, kieta kumali la sum̃a ga, a kieta naliṗereena la sum̃a ga, ana visae avisu ve sanape, la akilia aurela ava avis van la e kana yo nena.

³⁹ Ana visae amiu asitom avisave suri si laṗas sike ga wa vena ita punu ga tevisuveve sina, poga ga, tekilia tevisuveve ga e kieta viorena si tai.

⁴⁰ “Naga nene, komin ṗelaga naṗa tekila ke nanagane, ita tepa manene laa narui.

Pe pe suri re tai naḡa mesmesun tekilia tekila manene m̃aagena nene vanon poli, pona tekila naveveyuena keviu sanene vanonia, a visae peraga, pona ḡisi na yerkawa kiena ne le Rom lala la ḡisi na akoven ita e yum̃a nakoarena na wa vanon kieta yum̃aena na nanagane.”

⁴¹ Ana pogos naḡa naga pisa visena nene ḡisi, sitomena kiena ne yeririna lala pimi pa ruru ke sina ga po narui, ana naga kalo visena, naga pisa pan la pisape la akilia aviaḡa ke sina ga.

20

Pol mialiali sina li nalelagaena lala garu Masitonia a garu Kris

¹ Ana legiena si laḡasia, pogos naḡa pupia m̃aagena naḡa le Episas la nene akila, pito si tano, Pol naga pio nalelagaena lala apimi lele taaga, ana naga mla visena wo pan la vena asum̃alu m̃arera va laa sane, ḡisi na naga pisi maro pan la, ana mligan la, pa si garu Masitonia.

² Ana e yo nene, naga pa mial kome kana lepas ne lala, ana e yo punu ga naga sum̃a miila ke yeririna lala e kiena visena wo lala, ana siraunia, naga pa si metava ma Kris, naḡa kana pupia pulkumali nena, naḡa Koren.

³ Ana Pol naga sike e yo nene pano-o tol kupario telu, ana ḡisi na naga sum̃a sitom sape kome waa tai naḡa m̃eke pa rui, wasuḡe sina ga va garu Seria. Ana lavisi naḡa aure vano, ana visena pimi tol Pol pisape le Yu lala nae e yo nene, la asum̃a akila ke sitomena viowa tai vena akila van ia e pogos naḡa naga sum̃a m̃eke e mrapa komsusia, ana kila naga pe pa re si e waa nene po laa rui, ana naga mla mrapa piavi tai, naga mial ḡasuḡe si pa telivi garu yo Masitonia.

⁴ Ana e pogos nene laḡas apa amio naga, sane Sopata nae Perea, naḡa narina Piras, amio Aristakas a Sekantas, lalua nae Tesalonaika, amio Kaias nae Tepe, amio Timote, a amio m̃ena Tikikas a Tropimas, lalua nae Esia.

Pol lala asike garo Troas

⁵ Ana laḡas nene naḡa asike amio Pol, la asumo apano aporu garu Troas.

⁶ Ana Pol naga sirau pimi, ana inu Luk, nesikol inu sina nemio la garu Piliḡae, a imimi mekila Paḡagena Nakanena Tamḡa e yo nene. Pogos naḡa ḡaḡagena nene ḡisi, ana mokus waa, ana mekiriri m̃a pano-o tol legiena lima, ḡisi na imimi mepimi metol yo Troas, la naḡa apa sumo la asum̃ate imimi ke e nene. Ana imimi punu ga mesike garu Troas tol legiena olua.

⁷ Ana e Legiena Wa, pogos naḡa mrae pito pa tano na ḡa rui, sa naḡa legiena ḡesia na legiena olua siar narui, imimi mepiora memio nalelagaena lala nae yo nene, imimi memlotu a makawero kila-paravi wa. Ana Pol naga sitom sape imimi meial ke kolulag ga, ana komin naḡa pe kiamimi viorena maro memio la, ana la akila visena la moki, ana kila Pol m̃ena ga pisi yam piavi, pisi m̃a pano tol yemalo pa ko yepe lilika narui.

⁸ Ana e pogos nene, imimi mesum̃a mepiora ke e lele tai metava e yotop naḡa na telu, ana yeririna lala aḡar kiela kapi vivaga moki pimi, kila yo loyum̃a nene yo pisusun keviu paḡisi.

⁹ Ana yaru m̃ee tai, kiena kia Yutikas, naga tom̃a tano e pulutava na lagi, ana pogos na Pol naga mlologo m̃a pa sanene pano-o, m̃ee nene mloge momalena na mloge momalena. Naga tekavito na tekavito, kila m̃a sanene pano-o, ḡisi na naga momalio ruru nena naapo, ana la amilan ga naḡa naga mloru e pulutava na lagi nene, naga mloru pito koan vanua e porotano. Yo nene naga mon manene laa metava, ana pogos naḡa la akiriri apitove, atol naga, ana la apisu naḡa naga mare pa rui.

¹⁰ Ana Pol m̃ena pito tano vena visulia, naga pulu pito tano kutarar e limana luwoka, ana naga pisa pan la, pisape “Ve aloge re viowa, ve atagin re naga, nanagane kiena malena ḡasuḡe si pimi e naga rui.”

¹¹ Ana Pol lala apa sina ga metava, ana la amla Kinanena Wa nene, siraunia la akinana, ana siraun nanene, la asun ke sina ga pano-o yemlagi, ana Pol mligan la pano.

12 Ana e lepas na ninis yerm̃ene nene, aṅar naga mali ruru sina amio apa um̃a, a la amloge po paṅisi naṅa Pol naga kila ruru naga pan la.

Pol lala asike mrapa vena awasuṅe la sina

13 Ana Pol naga pis pan imimi rui pisa pisape imimi mesumo mokom e waa, imimi meva mesum̃ate naga e pulkumali nene Asos, ana naga sirau imi, naga yali ga kom ura.

14 Ana imimi mepano metol garu Asos, ana naga sirau pimi, ana naga miai e waa, ana imimi punu ga mepano metol pulkumali naṅa Maetilin e narin purvanua tai.

15 Ana siraunia, imimi mekiriri si e legiena wetelu tai, mekiririn narin purvanua tai, kiena kia Kios, ana siraunia e legiena taṅena, metol e narin purvanua nene Samos, ana legiena taṅena sina, imimi metol e kumali nae Maelitas e purvanua keviu, ana imimi mepa ura e yo nene.

16 E pogos nene, imimi moṅaro ga yo Episas sanene, pe mepa re ura e poli, komin Pol naga pisu pisape pe pon re naṅa ita tokus pogos ve moki e lepas nae Esia nene poli, komin naga sum̃a sitom ke sape visae imimi mekilia meki-la sanene, ana popon moworu garu Yerusalem mesmesun pogos na Paṅagena na Yui Marua.

Pol naga sike garu Maelitas, naga pis maro pan nasumonena lala nae Episas

17 Ana garu Maelitas, Pol mligan visena pa garu Episas, naga pisape nasumonena nalotena lala aimi avisuia.

18 Ana siraunia la apimi, ana Pol pisa kiena visena maro pan la. Naga pisa sanini, pisape “Amiu, amiu akilia ruru inu rui, naṅa siar e pogos naṅa nepimi ṅesan e kieta lepas nini, naṅa Esia, pimi tol nanagane, nesum̃a nemio amiu pogos piavi paṅisi rui. Ana akilia ruru m̃ena ga kiau ṅelaga a yum̃aena kiena ne Suṅe la naṅa nekila rui.

19 Akilia m̃a naṅa yum̃aena la nene, nekila ke naṅa kiau sitomena pito ga tano, a nekila ke m̃ena ga amio wamarau, a

nekila m̃ena e pogos m̃arera naṅa le Yu la akila pan inu, naṅa m̃alivi e kiela sinemimiena lala pan inu.

20 Ana akilia ruru m̃ena rui, naṅa visena punu ga naṅa mesmesun navisaena, naṅa kilia iila amiu, visena la nene pe nemawan re naṅa nevisawal van amiu poli, pona pe nemaraun re naṅa neviaan amiu e poli, nanene e poglis la naṅa ita tesike e yo metava temio yeririna moki lala, pona e pogos la naṅa netelivi ke e m̃amiu um̃a lala.

21 Ana nepis pan le Yu lala pona nepis pan la naṅa pe ape le Yu re poli, ana pe nesitom ṅele re naṅa nevisawal van la poli, ana nom̃areraan la, nepisawal ruru nena pan la, nesape la punu ga monar avilopu la ava puna Ntewa, la monar alelaga e kieta Suṅe Yesu Kristo.

22 “Ana nanagane, nepa ke sina ma Yerusalem, pe nekilia re ya naṅa le Yu la yoko akila van inu poli e pogos naṅa noworu e yo nene, ana nemlogelupar e inu naṅa Ninuna Wa naga sum̃a pure inu ke sanene, ana monar neva ga.

23 Ana Ninuna Wa naga sum̃a kila merarava pan inu rui naṅa e pulkumali punu ga la naṅa nepa ke ea, ana monar netol pogos m̃arera lala, a yeririna la asum̃ate ke ga vena akoan inu neva e yum̃a nakoena. ?Sanene nepisu visae neva garu Yerusalem, pona ve sa ke m̃ena ga nene yo?

24 Ana poga ga nene, komin naṅa pe nepisu re kiau malena naga pe suri tai poli, pona tasneu, vena monar nesitom manenea, peraga. Ana nesitom ke suri taaga ga, vena nekilia nekiriri m̃aga vano-o netol luas nen kiau yum̃aena naṅa Suṅe Yesu mligan sike e lum̃au, naṅa monar nevisawal Nalologena Wo na nalemamiena kiena ne Ntewa va e yo punu ga.

25 “Ana nanagane, nekilia m̃ena rui, amiu naṅa nesum̃a nemiali amiu, naṅa nemlogon ke navesuṅenena kiena ne Ntewa pan amiu, nekilia naṅa amiu punu ga taṅatete si akilia avisu marau pogos tai.

26 Visae amiu yaru tai naga pe mla re visena lala kiena ne Ntewa nene e kiena

malena poli wa, naṓa nepisa pan amiu rui, ana yokorena naga va kovio, ana visae naga va kovio, kiena kuruta teke ga e naga, ana pe to re e inu poli,

²⁷ komin naṓa in na nepisawal mrapa pan amiu rui, ana pe nekilawan re sitomena kiena ne Ntewa pan amiu poli.

²⁸ “Ana amiu li nasumonena lala, komin naṓa Ninuna Wa pisir plan amiu sa naṓa yeririna lala navisuarena sipsip lala na nalotena kiena ne Ntewa nene naṓa naga pul lua e tana ne narina, ana amiu na monar avisuar ruru amiu, a amiu monar avisuar ruru la nene.

²⁹ Ee, sineun nevisave nevisa van amiu, pogos naṓa nevetan amiu pa narui, ana nekilia m̃aga naṓa yoko lokul tetan lala aimi, akila kare kiamiu sipsip la vaṓisi, akilayon naṓa am̃enetetain la, ava aveve taaga.

³⁰ Ana nekilia nevisa m̃ena ga, nevisave siraunia, ana amiu yerkawa ga laṓasia, ana asum̃alu, ana avisokan kar ga la ve moki vaṓisi, vena akilayon ga naṓa asape aurelua nalogena lala ava ataveve la ga.

³¹ Sanene, monar asururuia, a monar avisururuia, a monar asitom̃al naṓa ayum̃ae m̃arera ve sa naṓa nekila pogos naṓa nesike nemio amiu pano-o tol kas wetelu telu, naṓa pogos punu ga, e legiena a kolemallo, nesum̃a nepian ke yeririna lala, a nepisawal nena visena kiena ne Ntewa pan la, pano-o wamarau kekapili vanon la.

³² “Ana nanagane, pe su re si e lum̃au poli vena nevisuar amiu, nemligan amiu asike ga e limana ne Ntewa. A nemlen nesape yoko Lologena Wo na lemamiena kiena, naga sum̃a iila amiu, kila amiu asum̃alu m̃arera, a kila naṓa amiu m̃ena ga, akilia awar navisa ruruena wo lala naṓa Ntewa naga yokorena war sirau va kiena yeririna wa lala.

³³ “Ana sineun nesape asitom̃al m̃ena ga, pogos naṓa nesike nemio amiu, nesum̃a nemiyum̃ae korena ga sanene, a pe sineu sun re kiamiu suri wo la naṓa sane kiamiu kilavaru la poli, pona kiamiu kulmrae lala.

³⁴ Ana pe nepisa re nesape avisuar inu e suri la nene poli, ana inu ga nepisuar

inu e yum̃aena na lum̃au luwoka nini, a nepisuar m̃ena la naṓa amiyum̃ae ke amio inu e pogos nene.

³⁵ Ana e mrapa nene, a e ṓelaga taṓena m̃ena ga lala, nepian amiunia nesape popon ita teyum̃ae m̃arera teiila yaru lala naṓa yepela malumu, apisu ṓele narui, komin naṓa monar tesitom̃al m̃ena ga visena kiena ne Suṓe Yesu tai, naṓa naga pisape ‘Visae ko otol kiom̃a nalaena tai, ana ko ologe wonia, ana visae ko ola nalaena tai vano, ana ko ologe wonia va ve keviu laa sane, ana navisa ruruena sike e ko.’ ”

³⁶ Ana pogos naṓa Pol naga pisa visena la nene ṓisi, ana akinai, naga mlen amio la.

³⁷ Ana la asiar naṓa atag narui, ana la atalopan Pol, akulkalil e yepena, amlipalipa naga pano pano-o paṓisi,

³⁸ komin naṓa la asum̃a asitom ke kiena visena taaga ga nene, naṓa naga pisape ve avisu re si marana pogos tai. Kiena visena ga nene narui kila la sinela miye naga keviu paṓisi. Ana siraunia, la amiyal amio naga, aṓure naga pitomi si e waa naṓa imimi mokusia mokomkom ke ea.

21

Luk pisayu naṓa naga amio Pol lala, apa atol yo Yerusalem

¹ Ana imimi memligan la asike e yo nene Maelitas, ana imimi meṓere m̃ale, mepa mesmesu ga mepa metol narin purvanua naṓa Kos, ana imimi momomalio e yo nene. Yemlagi kolulag, ana imimi mepetan ke sina ga yo nene, mepa m̃a mepa m̃a pano-o metol sina purvanua taṓena naṓa Rots, ana imimi momon sina, ana yemlagi kolulag, meṓure sina ga, mepa metol pulkumali nene Patara e purvanua keviu.

² Ana kiamimi waa nene naga pa tol ga yo nene, ana mepa ura. Ana pogos naṓa mom̃al si waa taṓena tai naṓa ṓisi na va garu e yo nene Ponisia, ana memiai ea, aṓere m̃ale, ana mesike sina ga e kiamimi mrapa.

³ Imimi mekirir mepa m̃a sanene e sive keviu nene, va ko yotena ne, pano-o moñal pupia purvanua naña Saepras, ana memligan sike ga e kiamimi lepas na ãam̃eli, ana mepa m̃a sanene mesape meva metol yo naña Seria naña sine-mimin mesape meva ea. Waa nene ãar ke tegaki la naña sape va ligan e pulkumali naña Taea, ana pogos naña mepa metol yo nene, ana mepa ura ea.

⁴ Ana mepa makale li nalologena lala e yo nene, ana siraunia, mesum̃a memio la pano tol legiena olua. Ana e pogos nene, la apisu naña Ninuna Wa pian la naña ãisi na va ve sanape e Pol garu Yerusalem, a la apisi pania, sinelan asape avisaluãaria asape ve va re si tol yo nene.

⁵ Ana Pol mninu e naga, sape monar va ga, ana siraunia, mepa sina e kiamimi mrapa. Ana e pogos nene, yerm̃ene lala a sira lala amio nin sisi lala, amiyal amio imimi, mepa vanua e kiela pulkumali, ana aãere imimi sina mepito garo e kiamimi waa. Ana imimi punu ga mekinai tano e none, ana memlenwo imimi, ãisi na metalopan la.

⁶ Ana memiai sina e kiamimi waa, ana la aãasuãela si apa um̃a.

⁷ Ana meãure petan yo Taea, mepa metava e pulkumali naña Tolimeas, ana e yo nene ana mepa mepitawe arueta lala, mesike memio la e legiena taaga nene.

⁸ Ana kolulagi, mepetan sina yo nene, ana mepimi metol pulkumali naña Sisaria, mepa ura ana e yo nene, mepa mesike e yum̃a m̃ana yaru na Lologena Wo nene, Pilip, naña naga lala olua tai naña apisiriplan la ãesania asape la aiila yum̃aena, nane garu Yerusalem.

⁹ Ana Pilip nene, narina na sira la vari asike um̃a, ana la pe atalopa re poli wa, ana la nene, yam moki liu naña Ntewa mla ke visena pan la, ana la apisawal pa yeririna la.

¹⁰ Ana mesum̃a memio la legiena laãas ãaro rui, ana navisawalena tai mligan yo Yutea pitomi tano e yo nene, yaru nene naga kiena kia Akaãas.

¹¹ Ana naga pimi pun imimi, sinenan

sape kila kile tai va Pol, ana naga mla kulmrae kiena ne Pol tai, ana pavinar e limana amio lana, ana pisawal pisape “Ninuna Wa pisa, pisape ‘Yaru naña naga kiena kulmrae nini, yoko le Yu lala garu Yerusalem, aviar naga ve sanini, a sirau-nia, akila naga va e limana ne la naña pe ape le Yu re poli, vena akila viowa vania.’ ”

¹² Ana pogos naña memloge visena nene, memio la naña asike e nene, meta-gin Pol, moñareran pania mesape naga ve va re si metava m̃a Yerusalem.

¹³ Ana Pol pisatañe imimi, pisa pisape “Ei, aulai, asum̃a atagi ke sanene, kila nemloge sane sineu sape wororo ga narui. Ana suri punu ga nene poga ga, visae le Yerusalem lala aligan inu e yum̃a nakoaena komin kia kiena ne Suãe Yesu, ana naga poga ga, ana visae m̃arera m̃a sanene vano-o nemare, ana nekekara ga.”

¹⁴ Ana metaãali naña mepisaluaãar sanene pano-o, mepisaluaãar ãele ga, ana mepisa ga, mepisape “Poga ga, yoko monar ve sa ga naña Suãe naga sinenania.”

¹⁵ Ana mesike sina legiena laãas gar Sisaria nene, ana siraunia, mekila ruru ke sina ga kiamimi karo lala, ana mepetan yo nene, memial mepa metava ma Yerusalem.

¹⁶ Ana li nalologena laãas nae Sisaria ataveve imimi m̃ena ga, ana pogos naña mepimi metol yo Yerusalem, ana aãere imimi mepa e yum̃a m̃ana yere Saepras tai, vena mesike memio naga. Ana yaru nene, naga m̃ena pe nalogena ães tai naña amlelaga e Yesu sumo, ana naga kiena kia, Nason.

Garu Yerusalem, Pol pa pisu Semes

¹⁷ Ana pogos naña arueta lala apisu naña mepimi metol si yo Yerusalem rui, ana la akekara paãisi.

¹⁸ Ana memono-o, yemlagi kolulagi, imimi memio Pol mepa meñalivin Semes, ana li nasumonena taãena m̃ena ga lala na sum̃are nae Yerusalem, la m̃ena asike e pogos nene.

¹⁹ Ana metalopan la, ana Pol pisi pan la, naga pisawal suri punu ga peve taaga la naṗa Ntewa kila pa rui m̃alivi e kiena yum̃aena, nanene e la naṗa pe ape le Yu re poli, naṗa naga pa telivi ke e kiela yo lala.

²⁰ Ana pogos naṗa la amloge visena na suri la naṗa Pol naga pisawalia, kila sanene la amloge po manene la, la amieluar Ntewa vanonia. Ana e pogos nene, visena la moki m̃ena ga garu Yerusalem kana Pol, ana la akilia m̃a suri nene, ana apisa pa Pol, apisape “Wolai Pol, ko okilia rui naṗa osape yaru la e nini la sane manu pe suri tai naṗa la amlelaga mare ga na wa, la nene ape le Yu ga lala, ana sa naṗa ko okilia, yeririna la ne sanene la akilia asum̃alu m̃arera manene la e kieta navisaluaena marua lala.

²¹ Ana lala amloge pa rui, naṗa yaru la asum̃a apisayu kare ko ke asape ko opa opiankare ga kieta lus la naṗa asike gare purvanua taṗena lala. La asape ko osum̃a opian ke la nene osape popon aligan rui navisaluaena kiena Mosis amio kala ṗelaga marua ne lala, ana asape osape popon manene m̃ena naṗa ve akila re si ṗaviu e narila lala.

²² ?Ana ṗisi na ita tekila ya narui, komin naṗa visena la nene kila la sinela kari ko manene pa rui? Ana nanagane, ve ve piavi re, ana ṗisi na monar la aloge m̃ena naṗa asape ko opimi osike pa e yo nini rui.

²³ Ana poga ga, ṗisi na ko okila ga ve sa naṗa ṗisi na mevisa van ko, komin naṗa mepisu pa mrapa tai rui naṗa okilia okila naṗa owe plan kiela sinemimiena nene. Pisi na monar okila ve sanene: e yo nene, ana imimi yeririna la vari naṗa nanua sumo, ana la akila navisaarena m̃arera tai pan Ntewa, apisape ṗisi na la avalia suri laṗasia va tol pogos ve sanene.

²⁴ Ana peni, la kiela pogos naṗa ṗisi na monar ava e Yum̃a Wa m̃ana Ntewa, naṗa vena la akila suri la e lepas na kiela navisaarena nene, sane leniena lala, amio nalaena naikikena, a suri la ne sanene, naṗa sane la akilia awe ke sina ga vilula lala. Ana mepisu mesape popon

sane ko m̃ena ga ova omio la nene, ova osum̃a omio la e pogos naṗa la akila suri la nene, ana popon m̃ena ga naṗa visae suri la punu ga naṗa la monar aul e pogos nene, ko ga ovisuvevea. Ana visae okila sanene, ana ṗisi na yeririna la avisu asape ko ope yaru tai naṗa osum̃a okekarana make navisaluaena kiena Mosis amio kana ṗelaga la na wa, ana ṗisi na la akilia asape visena naṗa amloge, naṗa pisayu ko, ana pe pe lelaga re poli.

²⁵ Ana e lepas kiena la naṗa pe ape Yu re poli, naṗa la amlelaga rui, ita tepisayu pa suri nene nanua rui, ana kieta visena la nene nanua tepisa ne, ana imimi mesiri pa e m̃aki tai pa pan la rui. Imimi mepisawal pan la, mepisape la monar avalia tata la naṗa li taṗena lala akila pa kuṗaṗaena ea pa kiela nono la rui, a la monar ve akan re kuruta, pona akan tata na suri mali naṗa kana kuruta pe mlau re poli wa, a yokorena la monar ve akila re ṗelaga viowa, sa naṗa la ataṗa lau, pona kolau.”

²⁶ Ana Pol pa kila ga sa naṗa la apisa, naṗa e legiena taṗena, ana naga ṗere la vari naṗani, ana naga pa kila nalaena naikikena amio la, a naga pa m̃ena ga loyum̃a e Yum̃a Wa m̃ana ne Ntewa amio la, vena loge asape ṗisi na kiela navisaarena naga ṗisi na va tol legiena ve via, ana ṗisi na monar la awar kiela nalaena navisaarena la veve taaga nene e legiena ya. Ana apisape visae legiena ve olua warovia, ana ṗisi na la asiar akila suri la nene.

Atarar Pol mon loyum̃a e Yum̃a Wa m̃ana ne Ntewa

²⁷ Ana e pogos nene, le Yu laṗas asike e Yum̃a Wa m̃ana Ntewa, la nene akom perina e lepas nae Esia la apimi, nanene e yo la naṗa Pol tetelivi e nanua sumo rui. Ana pogos naṗa legiena olua navisaarena kiena Pol la nene lavis ga ṗisi, ana le Yu la naṗa am̃al naṗa Pol m̃eke loyum̃a e Yum̃a Wa m̃ana Ntewa. Ana la akila pupia m̃aagena, la apa atarar Pol, ana asunyu kare naga pan yeririna lala,

²⁸ la apion pan la, apisape “!Ei, amiu le Israel lala, aiila imimi e yaru nene! !Yaru

ke nanene narui naṣa naga sum̃a pa make e yo punu ga, ana naga sum̃a pisa kare ke ita le Yu lala, naṣa ita yeririna wa kiena ne Ntewa lala, a sum̃a pian kare yeririna la pisape kieta navisaluaena amio kieta Yum̃a Wa nini, la pe ape suri re tai poli. Ana imimi mekilia m̃ena ga mesape naga ṣerevinaun ga yeririna laṣasia naṣa la pe ape le Yu re la poli, ana apimi loyum̃a e yo wa na Yum̃a Wa nini. !Yaru nene naga ṣarnena kare manene Yum̃a Wa m̃ana ne Ntewa paṣisi, popon tekila suri tai vania!”

²⁹ Apisa sanini, apisape Pol ṣere yaru naṣa pe pe Yu re poli pimi loyum̃a e yo wa, komin naṣa apisu Pol vanua e mrapa naṣa naga mial ke amio Tropimas naṣa nae Episas, naṣa naga pe pe Yu re poli, ana am̃ape pona Pol ṣere naga pa loyum̃a.

³⁰ Ana la asum̃a akila ke sanene loyum̃a e Yum̃a Wa, ana m̃aagena nene naga pa m̃ena ga ṣar make yo la e pulkumali nene, ana kila yeririna taṣena la akiriri apimi. Apimi aṣuar kare ga Pol, ana aṣere naga pa vanua e Yum̃a Wa nene, ana pogos naṣa la apa vanua rui, ana li wa la akotava ruru e kana mratava kerkeviu ne lala.

³¹ Ana pogos naṣa asum̃a aṣere Pol pa ke naṣa asape aweṣaria, ana visena pimi tol yaru keviu kiena li na mara lala nae Rom naṣa asike garu Yerusalem, pisape pupia mara kapuru ke gare.

³² Ana yerkawa nene sum̃alu veraga, pio kiena yeririna lala, amio kiela yaru na mara lala, ana la akiriri apito tano e yo naṣa asum̃a akila ke pupia m̃aagena nene ea. Ana pogos naṣa yeririna la apisu apisape yerkawa na mara nene pimi tol yo nene, ana la amligan Pol, la pe asu re si poli.

³³ Ana yerkawa nene pimi, pisi pan kiena yeririna lala, pisape ava atarar Pol, ana aviar limana tai va e lala yaru tai, limana taṣena va e lala yaru tai, aviar e sen. Pisi na naga piun tan la, pisape “? Ana yaru nene, naga ai? ?A naga kila ya ne pan amiu?”

³⁴ Ana yeririna la moki naṣa asum̃a apiovion manenea, laṣasia apisape sanene,

laṣasia apisape sanene, pa m̃a pa m̃a ga yerkawa nene naga pe mloge kilale re si visena tai e lepas nen ya naṣa la asum̃a akila ke ne, ana naga pisa pan kiena yeririna lala pisape awere Pol wasuṣe va e kiela kove.

³⁵ Ana pogos naṣa asum̃a apa ke e narin mrapa tai, ana mrapa nene ve tokak yokuskusun ga yeririna lala nene naṣa la asum̃a sinelan ke asape asu si Pol wa. Ana yaru na mara lala aṣure ga Pol pano,

³⁶ ana ṣegas nen yeririna lala asum̃a asirau apimi, la asum̃a apiovionia, apisape “!Aweṣar yaru viowa nam̃a! ! Aweṣar ga naga mare!”

³⁷ Ana la asum̃a apano, ana lavis ga aimi atol mratava naṣa navaen loyum̃a e lokove kiena ne yeririna na mara la nene, ana Pol piun tan kiela yerkawa, pisape “Awis, ko otam̃an inu neviun suri tai tan ko sumo wa.”

Ana yerkawa nene milan naṣa Pol pis kome Krik pania, pisape “!A, ana ko okilia m̃a naṣa opis kom e Krik!

³⁸ ?Visae ve sanene, nesitom nesape ko ope yere Isip nini naṣa pe yam piavi re poli naga taṣali sape kila politik nene, ana naga ṣere yeririna lala manu vari apa e kiena ṣegas naweena yeririna nene, ana aṣure apa atapolou e yo korena. ?Ko na yaru ne na nene, ne?”

³⁹ Ana Pol pisatam̃ea, pisape “Ei, peraga, in na nepe yere Yu ke tai nini narui, ana in na nekilia nepisin visena nae Krik komin naṣa in na nae pupia pulkumali naṣa Tasas, e lepas naṣa Silisia. Ana in na sineun nesape neviun tan ko, naṣa ko otam̃an nevisi ke ne va ṣina moki la nene sumo wa.”

⁴⁰ Ana yerkawa nene tam̃ania, ana Pol sum̃alu su metava, ana kuan limana sape ava ruru la, ana la apimi apa ruru la nenaga paṣisi. Ana naga pisi pan la, pisi nena ga kome visena kiena ne le Yu lala.

22

Pol pisi pa la naṣa asape aweṣar naga mare

¹ Ana Pol pisi pan la, pisape “Wolai lala, amio ata lala, in na sineun nesape atam̃an

vena nekilali naṣa nevisa ruru suri make ga van amiu. Ayagogon ruru inu sumo wa.”

² Ana pogos naṣa la amloge Pol pisi ke pan la e kiela visena, naṣa visena nae Epru, la apa ruru la narui, la sinelan asape aloge kiena visena.

Ana naga pisa, pisape

³ “In na yere Yu ga nini, sa ke amiu, a in na nepaeme e pulkumali naṣa Tasas, e lepas nae Silisia. Ana pogos na nepe sisi ke ga wa, in na nepimi e yo nini, e Yerusalem, in na yaru naṣa Kameliel naga pian inu, naṣa akilia ruru naga rui. In na netotano e lana, naga pian ruru inu e navisaluaena punu ga kiena ne kieta yermarua lala, pano pano-o inu towe nepimi nepe navianena tai na navisaluaena nene. A sane amiu nanagane, amiu asitom manene asape akila kia kiena ne Ntewa imi ve keviu, inu m̃ena ga, e pogos la nanua sumo, nekila yum̃aena kiena ne Ntewa amio kiau malena wetelu.

⁴ E pogos nene, inu m̃ena ga pe sineun manene re nenaga la naṣa ataveve ke Mrapa Viu nene poli, naṣa nesum̃a netetelivi ke sanene nakale ke la naṣa la asum̃a ataveveia, ana nesum̃a netarar la, a nesum̃a nokoven la ke apa e yum̃a naloge viowaena, yerm̃ene lala amio sira lala. E pogos nene sineun nesape la monar amarmare ga, a sineun nesape kiela Mrapa nene monar ṣisi vilaga.

⁵ Suri nene, akilia aviun tan ṣarin yaru wa amio kiena nasumonena lala na kiena kumali, komin la akilia ruru inu naṣa nekila sanene. A e pogos nene, la asiri m̃aki laṣasia, vena kila sa naṣa nekilia neva nom̃ene yaru na Mrapa Viu la nene e kiela yo lala.

“Ana e pogos tai, nemla m̃aki tai sanene, ana sineun nesape neto garo tano Tam̃askas vena netarar la nene e yo nene, vena neviar la e sen, ana neligan plan la awasuṣe si aimi e nini vena kieta yerka wa lala la ala nakoena van la.

⁶ “Ana e pogos nene, nemialoro m̃a nepa sane, ana tol kolpae, lavis ga netol Tam̃askas, ana nemilan ga naṣa pupia

yomerarava tai pimi veraga tegoli yo naṣa nemial ke nepa ea.

⁷ Ana suri nene kila nemloru nepito tano e porotano, a nemloge visena tai, pisape ‘!Sol o, Sol o! ?Komin ya ne ko okila kare inu ke sanene sa naṣa osum̃a okila ke ne?’

⁸ “Ana nepiun tania, nesape ‘?Ana Suṣe, ko ko ai?’

“Ana nemloge naga pisi ke sina ga pan inu, pisape ‘Yesu nae Nasaret nene, naṣa ko okila ke piowa pania, nene inu ga ne.’

⁹ Ana la naṣa asike varaun inu e pogos nene, la apisu pupia yomerarava nene, ana la pe amloge re pulgona nene naṣa naga pisi ke pan inu poli.

¹⁰ A siraunia, nepiun ke sina ga, nesape ‘?Ana Suṣe, ṣisi na nekila sanape narui?’

“A Suṣe pisa pan inu pisape ‘Ko osum̃alu, oyali ova ga loyum̃a Tam̃askas rui, a ṣisi na yaru tai im̃asu visawal van ko e yum̃aena la naṣa nemligan ruru ṣisi rui vena ṣisi na oyum̃aenia.’

¹¹ Ana nemloge visena nene, ana pe nepisu re si suri poli, komin pupia yomerarava nene kila kilamarau ṣala, ana la atarar ga lum̃au, asumon inu e mrapa, mepa meporu Tam̃askas.

¹² “Ana pe yam piavi re nena ga, yaru nae e yo nene tai pimi pisu inu. Naga pe yaru tai naṣa naga pe yaru kiena ne Ntewa kemua lelaga, a naga mlogear kieta Navisaluaena, a kieta le Yu lala nae e yo nene, la apisu naga sane naga pe yaru wo tanea tai paṣisi, a kiena kia Ananaias.

¹³ Ana naga pimi sum̃alu su lavisi pun inu, ana pisi pan inu, pisape ‘!Wolai Sol, nanagane, nesape kilamaram̃a imi wo sina!’ Ana e ke ga e pogos nene sa nena nene, ana nekilia nepisu kilale marana ne Ananaias nene.

¹⁴ Ana naga pisi ke sina ga pan inu, pisape ‘Ntewa Na Mava kiena ne repita lala, naga pisaar ko sumo rui, pisape ko ke narui naṣa ṣisi na ko okilia kiena nasitomwanena keviu tai, a vena ko ke narui naṣa ko ovisu kiena Yaru Mesmesu a ologe kiena visena.

15 Ntewa pisaar ko p̃isi rui, pisape p̃isi na ko ova ovisawal va yeririna lala e yo make ga, suri make ga la naṣa opisuia a omloge.

16 Ana nanagane ga ne, ita monar tekila suri tai sumo wa. !Monar osum̃alu, monar akee ko e kia kiena ne Yesu, ana kia ga nene kee plan kiom̃a mlamulena viowa lala, oimi oikiki e marana ne Ntewa!

17 “Ana siraunia, in na neṣasuṣe inu ke sina ga e nini Yerusalem, ana nepa e Yum̃a Wa m̃ana ne Ntewa, sineun nesape nekila leniena. Ana pogos naṣa nesum̃a nemlen ke sanene, nemloge sane kiau sitomena pa kovio,

18 ana nepisu Suṣe pisi pan inu, pisape ‘Ovitaṣili, omolue Yerusalem vilaga, komin la nae e yo nini, visae ko osunyu van la e ya naṣa inu nekila pan ko, p̃isi na taṣatete nena ga alelaga e ko.’

19 “Ana nepisa pania, nepisape ‘Ana Suṣe, la akilia ruru inu p̃isi rui, amio ya naṣa in na nesum̃a nekila p̃esania. La akilia m̃aga asape inu ke ga narui naṣa nesum̃a netetelivi ke e yum̃a lala naloteṃa kiena ne imimi le Yu lala, a nesum̃a nepuarar ke la naṣa amlalaga ke e ko. A la apisu ke rui naṣa in na nesum̃a nom̃e la nene, a nesum̃a nokotawe la ke e yum̃a nakoena, ana in na nesitom ke nesape la monar alelaga e inu sa naṣa nepe lelaga ga.

20 A nanua ne, pogos naṣa kiom̃a yaru nene Stipen, kana kuruta mlau, la akilia ruru po paṣisi naṣa asape in ke naṣa nesum̃a nemio la e pogos nene narui. Pogos naṣa la akoveṃaria, in na nemiila la, in na nepisuar ruru m̃ala kulkota lala. !La monar alogenu!’

21 Ana Suṣe pisa ga pan inu, pisape ‘Omolue e yo nini, sineun nesape neligan ko ova koperina vaṣisi, ovanon la naṣa pe ape le Yu re poli.’ ”

22 Ana pimi tol aora nene, la naṣa asum̃a amiagogon ke Pol la asum̃a amiagogon ruru ga, ana nanagane, kiela sinemimiena e naga pimi ke sina ga, la apisape “!E, popon aweṃar ga yaru na piowa lepa ga sanene! !Ita pe sinetan

re yaru na sanene naga mali sike e yomarava nini poli!”

23 Ana la asum̃a apiovion sanene, a la asum̃a atatanogin Pol e m̃ala kulkota lala, a la asum̃a akoven puluyavi na mrapa pa kar ga e yo punu ga.

24 Ana yerkawa kiena ne yaru na kilaen mara lala pisape la aurelua Pol vetan p̃ina nene va loyum̃a e kiela kove, a naga pisape alili re naga wa, la am̃areran naga vena alual li suri ya naṣa naga kila p̃ina la sinela kari manene naga sanene.

25 Ana pogos naṣa la apiar Pol p̃isi, la asape awe narui, ana Pol pisa pa kiela nasumonena tai, pisape “?Sanape, mesmesun ga naṣa awe yaru tai sanene naṣa naga sike vatanon navisuarena nae Rom, a naṣa naga pe pali re kumali yam tai poli wa vena la aliṣere ruru naga, pona akilia awe ga naga sa ga nene?”

26 Ana pogos naṣa nasumonena naṣani mloge naviunena kiena ne Pol nene, naga pisape ve awe re si naga wa, ana naga pa pisu kiela yerkawa veraga, pisape “?Ei, p̃isi na ko okila ve sanapen yaru nene narui? Naga sum̃a pisa ke pisape naga sike vatano e navisuarena nae Rom ne.”

27 Ana yerkawa nene pimi si sape visu Pol, viun tania, visave “!Ei, ko na opisa ruru ke ne! ?Ko na osike vatanon navisuarena nae Rom, pona peraga?”

Ana Pol pisatamea, pisape “Ee, in na sanene narui.”

28 Ana yerkawa nene pisa pa Pol, pisape “?Ana ko na sanene na sanape ne? Naṣa in na sanini, in na nopul pupia kilavaru tai ne.”

Ana Pol pisa sanini, pisape “Pona ve sanene yo. Ana inu, ata na sa kemua nene rui, ana in na nepaeme, in na sa ke m̃ena ga nene.”

29 Ana pogos naṣa yaru la naṣa asape awea amloge visena nene, akilia narui asape Pol naga pe yerkawa ta ne sanene. Ana la apur matan veraga, akilia asape taṣatete si awe naga narui, a yerkawa m̃ena ga nene, nanagane naga m̃ena ga marau li laa narui, komin naga yaru na kilaen mara nae Rom, ana naga kila

piowa pa Pol rui naña naga m̃ena ga sike vatanon navisuarena nae Rom.

La aþere Pol pa e pupia kumali kiena ne le Yu lala

³⁰ Ana kolulagi, yerkaawa kiena ne yaru na kilaen mara la nene naga sum̃a sine-nan ke na wa sape popon sa kilia ya ne pe purþes nen veveyuena nene, ana naga pio yerkaawa lala kiena ne yaru wa lala amio nasumonena lala kiena ne le Yu lala, pisape la monar asum̃ate naga gare kiela pupia kumali. Ana naga pisa pisape akila plan sen la e Pol, ana naga þere naga pito garo tano e kumali nene, naga mligan Pol sike likan la.

23

¹ Ana Pol naga tarlua marana pa metava tamaria yerkaawa la nene, ana naga pisa pan la, pisape “Wolai lala, e kiau malena wetelu pimi tol þane, e yum̃aena punu ga kiena ne Ntewa naña nekila, in na pe nemloge re suri tai miyur sineu poli, naña pisape in na nekila pe mesmesu re poli. !Peraga rui!”

² Ana pogos naña þarin yaru wa nene Ananias naga mloge visena nene, naga sinena kari Pol paþisi, a naga pisa pan la naña asike lavisin Pol sape alipa gona.

³ Ana Pol pisi towe laa pan naga narui, pisape “!Ei, ko ovisuar ko, yokorena Ntewa wem̃ar ko na wa! Ko ototano ke e yo na kieta navisaluaena, e yo na nalipereen yaru, ana siraunia ko ke ga naña okilaro si navisaluaena nene narui, naña ko opisa osape la alipa inu sanene. Ko ope kulupopos ga na oteke ne.”

⁴ Ana la naña asike lavisi apisape “?Ei, ko osape poga ga naña ko opisa kare Parin Yaru Wa kiena ne Ntewa sanene, pona peraga?”

⁵ Ana Pol pisape “!Ke, lelaga o! Wolai lala, inu nemloge kiena visena, ana pe nekilia re si po laa rui, in na pe nesitom re si nesape naga pe Parin Yaru Wa nene poli. Ana sane amiu apisawal ruru pan inu narui, ana nekilia naña nepisa suri pe po re pan poli, komin Visena Wa kiena ne Ntewa naga pisawal ruru rui, pisape pe

pe pon re ita tevisi viowa van yerkaawa kiena ne kieta yeririna la poli.”

⁶⁻⁸ Ana Pol naga pe kilia re si ya naña yoko naga visa po laa rui, ana naga pisa sane la naña asike loyum̃a e viorena e pogos nene, la þasia ape Varasi, a la þasia ape Satusi. Pegas lua nene asum̃a apepeyu paþisi, komin Satusi lala apisa ke asape yeririna lala taþatete amal si vetan namarena, ana apisa suri la ne sane navisi lala, pona ninuna lala, apisape suri la nene, pe sur ta sa re nene poli, ana Varasi lala amlelaga e suri la nene. Ana Pol kilia narui, yoko visa sanape ne, ana naga pio yerkaawa la nene, naga pisape “Wolai lala, in na nomolue ruru nena e lus kiena ne Varasi lala. Arimau lala la ape Varasi, a inu m̃ena nepe Varasi. Ana amio Varasi lala, in na nemlelaga naña nesape pogos naña yaru mare, siraunia, ana yoko naga kilia mali sina. Ana nesitom nesape nesum̃alu nesu vamo e maramiu nanagane komin naña yaru laþasia asitom ke asape avis van inu komin kiau nalelagaena nene.”

Ana visena kiena ne Pol nene kila Varasi la naña asike e nene ana la asiar ke sina ga naña apeveyu amio le Satusi la naña asike ne, kila sanene la punu ga naña asike e viorena nene la amliþere la ke sina ga.

⁹ Akila m̃a sanene pano-o, m̃aagena pimi keviu paþisi, a siraunia, navianena laþas e lepas na puna ne Varasi lala asum̃alu, apisi m̃arera paþisi, apisape “Imimi mepisu sane yaru nene naga poga ga, pe suri re ta naña ita tekilia tevisi van naga vanon poli. ?Ana ane kilia, pona pe lelaga ga naña ninuna wo tai, pona navisi tai naga pisi pan yo?”

¹⁰ Ana sinemimiena nene naga pano keviu laa narui, la asu m̃a asitom ke asape asuania, ana yerkaawa kiena ne li na mara lala naga pisa sane piowa laa narui, naga maraun sape sa þisi la nene akarkare manene laa Pol, ana naga pite-talia kiena yaru lala apito tano, aþerelua Pol petan yeririna lala, ana aþere naga pa si e kiela kove.

11 Ana siraunia, kolemallo, Pol pisu naŕa Suŕe sum̃alu sike ga lavisinia, naŕa sum̃a pisi pania, pisape “Pol, ve omarau re. Ko opisawal ruru inu pan yaru m̃arera lala nae e nini rui, ana sineun nesape ŕisi na ko monar okila m̃a si sanene yam tai, naga nene garu Rom.”

Le Yu laŕasia asape akilali naŕa awem̃ar Pol

12 Ana kolulag, le Yu laŕasia apim vinau ga lele taaga, vena avisayu ve sanape naŕa akilia awem̃ar Pol. Ana pogos naŕa amal mrapa ta narui, ana la apisaar e kia kiena ne Ntewa naŕa aligan kinanena amio namunena lala, vano-o tol naŕa la monar awem̃ar Pol sumo wa.

13 Ana la naŕa apirantar la e visena nene a naŕa akila navisaarena sanene, la ataulu yaru la lualima yam vari.

14 Ana siraunia la apano apisu yerkaŕa kiena ne yaru wa lala, amio nasumonena lala, ana apisawal suri nene pan la. Apisape “Imimi mepisaar m̃arera pan Ntewa rui, naŕa imimi mevalian kinanena punu ga vano-o tol pogos naŕa imimi mekilia mowem̃ar yaru nene.

15 Ana sinemimin mesape aiila imimi, naŕa amiu amio la naŕa e kieta kumali, amiu aligan visena vano van yerkaŕa kiena ne yaru na mara la nene, avisave naga were si yaru nene vato si garo tano kumali, avisa kotalia ga naga avisave asitom asape avisuveve sina visena la nene. Ana imimi mesum̃ate ga e mrapa, a pogos naŕa atomi, mowem̃aria, naŕa naga sike perinan kumali wa.”

16 Ana siraunia, narina ne vinena Pol tai, naga mlogewal naŕa asum̃a apisayu ke asape ŕisi na la akila ve sanene ve sanene, ana sisi naŕani pa mesmesu ga e kove kiena ne yaru na mara lala, pa pisawal suri nene pa Pol.

17 Ana Pol pio yaru na mara la tai, naga pisape “Ei, awis, ko oure yaru viu nene vano visu kiamiu yerkaŕa, naga kilia ke sur tai naŕa popon yerkaŕa nene naga monar loge.”

18 Ana naga ŕere mearu kiena ne Pol nene pa puna ne kiela yerkaŕa, pis pania, pisape “Pol naŕa sike garo e

yuŃa nakoarena, naga pisape noure kiena mearu nene im̃asu visawal suri tai van ko.”

19 Ana yerkaŕa nene naga tarar limana ne yaru viu nene, ŕere yapen ga pa sanene, ana piun tania, pisape “?Ana ko ositom osape ovisa ya ne van inu?”

20 Ana mearu kiena ne Pol nene pisa plan pania, pisape “Ko opisu ke ne, yerkaŕa kiena le Yu lala apisirilua kiela sitomena ta rui, naŕa asape awem̃ar meruou naŕa, Pol. La apisa rui apisape yoko aligan visena im̃asu van ko, asape la sinelan avisuveve re laa visena la nene e lepas nene wa, ana aviun tan ko vena peni, ana oure si Pol vitove garo e kiela kumali.

21 Ana pe pon re naŕa okila sanene poli, komin naŕa la asum̃a akila kokan ke ga nene. Apisa ruru rui apisape pogos naŕa visae asike mrapplepa, ato ke garo tano, ana lala lualima yam vari nene awulan amiu, awem̃ar meruou nene. La nene apisaar pa Ntewa rui apisape yoko aligan kinanena amio namunena vano-o avisu naŕa sane la awem̃ar naga ŕisi, a la nene na asum̃ate amiu ke rui, vena visae otam̃an naŕa amiu ato si garo tano.”

22 Ana yerkaŕa nene, pisa pan mearu kiena ne Pol nene, pisape “Poga, ana nevisa mesmesun van ko, ve ovisawal re si van yaru tai naŕa ko opimi opisawal suri nene pan inu. Ana potena paŕisi, ko okilia ova si um̃a narui.”

Amligan Pol pano pan ŕarin suŕe tai nae Rom garu Sisaria

23-24 Ana yerkaŕa kiena ne li na mara la nene naga pio kiena yaru lua, naga pisa sanini, pisape “Suri lala naŕa e lepas na yaru nene naŕa Pol, la apimi m̃arera paŕisi. Nanagane, yoko in na neligan naga va e limana ne kieta ŕarina suŕe naŕa Vilikis, naŕa naga sike garo tano Sisaria. Amiu lua, akila ruru ŕegas tai na kieta yaru na mara lala, vena amiu akirakirava ruru wo e Pol, amiu aure naga vito garo tano. Amiu akilia aure yaru na mara la ve ponotia ve lua, amio la lualima yam olua naŕa la akus wosi, amio si la tol ponotia ve lua naŕa la awar pupia kalie na mara lala. Ana akus m̃ena

ga wosi kiena ne Pol tai vena naga kilia va totano ea. In na sineun nesape aligan kotaña kolemallo, e pogos naña yemalolo rui.”

²⁵ Ana yerka nene siri m̃aki tai vena alarar amio la avano, naga siri sanini, pisape

²⁶ “Maki nini, inu Klotias Lisias, naña nesiri pim̃asu pan ko, Parin Supe Vilikis, naña ko ope yerka nae Rom naña ko opisuar ke kieta pupia lepas nene.

²⁷ Inu nekekara keviu naña nevitawe ko sina e m̃aki nini.

Yaru naña aere pim̃asu pan ko nene, kiena suniena nena sanini: sumo, le Yu lala nae e nini atarar naga, lavisi aweñaria. Ana siraunia, nemlogewal naña naga sike vatanon kieta navisuarena nae Rom, ana imimi mepato garo tano, ana meperelua naga petan limana ne le Yu la nene.

²⁸ Ana sineun nesape nekilia ya naña naga pe miasin suri nene, ana neere naga pito e kiela kumali keviu.

²⁹ E pogos nene, nepisu naña naga pe kila re sur tai naña torokin aweñar naga poli, pona ala nakoena vania, ana nepisu sane la asum̃a apepeyu ke amio naga e ga e lepas na navisaluaena na kiela nalotena ga.

³⁰ Ana siraunia, visena tai pam tol inu, pisape apisayu rui a añal mrapa rui vena akilayonli sina vena aweñaria mare. Ana nepisu sane popon vena nevitetalia naga im̃asu pum̃a vilaga, ana nepisawal m̃ena ga pan la naña sinela kari naga, nesape la monar aim̃asu avisawal suri la naña la asitom ke asape aliere naga vanonia e maram̃a.”

³¹ Ana li na mara la akila sa naña kiela yerka nene pisa, ana kolemallo la aere Pol, ana pupia pegas nene amligan yo Yerusalem, apano atol yo garu Antipatris.

³² Ana kolulag nena, yaru na mara la naña amial ga, la aasupe la sina apa ma Yerusalem, ana la naña la akus wosi, lala

amio ke Pol na wa, la apito ke sina ga e kiela mrapa, apito garo Sisaria.

³³ Ana pogos naña apimi aporu e yo nene amla m̃aki nene pa parin supe nene narui, a siraunia aere Pol, apano amligan naga sike e limana.

³⁴ Ana parin supe nene pulo m̃aki nañani pisi, ana naga piun tan Pol, pisape naga pe yaru nae lepas nape. Ana Pol naga pisape naga pe yaru nae ga yo garo Silisia,

³⁵ ana parin supe nene naga pisa sina, pisape “Ana poga ga, ita monar tesum̃ate ga yaru la naña yoko avis van ko, ana pogos naña aimi, ana nouarar visena nemio amiu.” Ana naga pisa pan kiena yaru na mara lala, pisape “Yaru nene naga kilia sike amio ita na wa e yum̃a marua m̃ana ne Parin Supe Erot nene, naña ita tesike e nanagane, ana amiu akirawo ruru naga ea.”

24

Le Yu lala la apimin apisape avis va Pol e marana ne Pilikis

¹ Ana Pol sum̃a ga sanene, tol legiena lima parovia, ana siraunia, parin yaru wa nae Yerusalem naña Ananias pitomi garo tano Sisaria, naga amio nasumonena taena lala kiena ne le Yu lala, amiowar ke yaru na navisaluaena tai, vena naga visi kiela, kiena kia Tetalas. Ana la nene apa apisu Parin Supe Pilikis vena avisawal suri la punu ga naña la sinelan asape avis va Pol vanonia.

² Ana la apio m̃ena ga Pol pimi loyum̃a, ana Pilikis mla pog pa Tetalas vena naga kilia vietava e kiela visena.

Ana naga pisi pa parin supe nañani, naga pisape “Parin Supe Pilikis, imimi mekekara pañisi naña mesum̃alu mese maram̃a pane, komin mepisu naña ko osum̃a opisuar ruru imimi po pañisi. Siar e pogos naña ko opuarar ke yum̃aena nene, pimi tol nanagane, kioñ manmaruaena naga kila sum̃are wo sike e purvanua nini, a ko osum̃a okila ke suri viu la moki vena iilaen yum̃aena e yo nini.

³ Sanene, mepisa potena keviu pan ko naṓa silaga osuṓa okila ke po pan imimi sanene.

⁴ Ana ko, kioṓa yum̃aena moki, pe pon re mekila kare ko e kiamimi visena la ve moki poli, in na sineun nesape neviun tan ko vena ko owo van imimi, oyagogon kiamimi narin visena tai naṓa plas laa ga.

⁵ “E lepas kiena ne yaru nene, mepisu sane naga pe ṓarkawa towe laa sane. Naga suṓa telivi ke piora e le Yu lala e purvanua taṓena lala, a e yo punu ga naṓa naga pa ea, ana naga kila ke yaru la apiaṓa a apeveyu. A naga pe nasumonena na ṓegas kiena ne yaru la naṓani, naṓa apisape naga molue garu Nasaret, naṓa pona naga pe nalotena taṓena, pona visae peraga, la asuṓa akila ke ga politik yo.

⁶⁻⁷ A pogos naṓa yaru nene pimi sike garu Yerusalem, naga kila piowa pano pano-o ṓisa, naga sinenan ṓisape kila kare sur wa na kiamimi Yum̃a Wa nene, ana kila narui mepa metararia.

⁸ Visae ko oviun ga tania, ṓisi na okilia ologe sur la naṓa imimi mepisa naga pe lelaga nena ga.”

⁹ Ana pogos naṓa naga pisi ke sanene, le Yu taṓena lala la asuṓa asisilin ṓarila, la asuṓa apisa ke apisape “Naga ke nene narui, sa ke ga nene, lelaga ṓa.”

Pol pisataṓe la

¹⁰ Ana siraunia, ṓarin suṓe nene naga kira pisu Pol, naga mla pog tai pania vena naga kilia la kiena navisataṓeena. Ana Pol ṓisape “ṓarin Suṓe Pilikis, sa naṓa ko okila ṓa naliṓereena pan imimi e purvanua nini e kas moki ṓaro pa rui, in na nekekanan naṓa nesuṓalu nese maram̃a vena nekila kiau navisataṓeena.

¹¹ Nesape nevisa ga van ko sanini, in na nepa ṓa Yerusalem nanua ga ne. Visae oviun ruru tan yaru lala, ṓisi na olual naṓa sane in na nepa e yo nene vena neva ga nelen e Yum̃a Wa ṓana ne Ntewa, pe tol re legiena lualima taaga pa vari po laa wa.

¹² A pogos naṓa nesike e yo nene, pe apisu re naṓa nekila suri tai poli. In na

pe nepepeyu re nemio yaru tai poli, a pe nepisa re pa yaru lala nesape akila suri tai poli. E Yum̃a Wa ṓana ne Ntewa, pona e yum̃a na leniena lala, pona e pulkumali e nape, ana in na pe nekila re nena suri tai poli.

¹³ A sur la naṓa apisa mare ga pan ko nanagane, apisape in na nekila sanene sanene, naga nene na visena na kiela ṓegas ga nene, ana la pe apisa re suri tai pan ko poli vena iilaen kiela visena nene, vena kila na ko ovisu sane kiela visena nene na pe lelaga.

¹⁴ “Ana sur taaga ga nekilia netam̃ania, nekilia nevisa van ko nevisave lelaga, in na nekila kemua naga nene. Sur nene, naga sa naṓa in na nesuṓa netaveve ke Mrapa Viu nene, naṓa la apisape naga nalotena taṓena. Ana naga pe sa re nene poli, komin naṓa e Mrapa nene, imimi mesuṓa memlotun ke Ntewa taaga ga, naga pe Ntewa kiena ne repimimi marua lala na sumo, a mesuṓa memlelaga ke ga e sur la naṓa kiamimi navisaluaena pisa, pona naṓa kiamimi navisawalena lala la asiria.

¹⁵ Ana taveve suri la nene, in na neṓasine ga Ntewa, maran taaga sa ke ga naṓa la ṓena ga apisu ga naga, asape ṓisi na naga kila yaru la make ga aṓal ke sina ga e marena, naga nene na la naṓa la amesmesu e marana, a la naṓa la pe amesmesu re e marana poli.

¹⁶ Ana komin naṓa nekilia ṓa nesape ṓisi na Ntewa kila sanene, in na pe nesitom re nena nesape nekila ṓelaga viowa tai sanene poli, ana e pogos punu ga, in na noṓaryo paṓisi vena narin suri tai ve yur inu re pogos tai visave in na nekila ke piowa e marana ne Ntewa pona e mara yeririna lala.

¹⁷ “Ana kas laṓasia ṓaro pa rui, in na nepa nesike e purvanua taṓena lala, ana siraunia, nanagane ga ne, in na neṓasuṓe inu ke sina ga nepimi Yerusalem. Ana yaru nae gare lala, la akuwan nalaena tai vena iilaen kiamimi yeririna lala nae Yerusalem, ana in na noṓar nalaena nene nepimi, neṓar pan la, a in na sineun ne-

sape neva nekila ke m̃ena ga kuṓpaṓaena laṓasia e Yum̃a Wa m̃ana ne Ntewa.

¹⁸ Ana pogos naṓa nesike e Yum̃a Wa, nekila kuṓpaṓaena na ikikiena rui, ana la nene la apimi apisu inu. E pogos nene, pe yaru taṓena re la asike amio inu poli, a pe visena re poli pona m̃aagena re nena poli, peraga, ana siraunia, le Yu laṓasia nae Esia apimi, ana la ke nene narui naṓa asiar veveyuena nene.

¹⁹ Ana la nene naṓa ape purṓes nen sur nene, visae la asitom asape in na nekila sur tai piowa, ana popon visae la m̃ena asike amio ita e nini nanagane vena la avisawal li van ko, ana pe nom̃al la re poli.

²⁰ Visae peraga, popon oviunli tan yaru taṓena la ne asike ne, ovisave pogos naṓa la aṓere inu nepa e kiela kumali, am̃al sane in na nekila ya. ?In na nekila ya ne pe mesmesu re poli, pona nepisa visena ya naṓa piowa? In na pe nom̃al re poli.

²¹ Ana visena taaga ga naṓa nepisa, nepisa sanini, nesape: Inu na nepisu sane sinemiun asape avis van inu ṓane, komin ga kiau nalelagaena nene, naṓa pisape pogos naṓa yaru mare, ṓisi na, naga kilia mali ke sina ga. Nepisa visena nene ṓisi, ana kila la ga asum̃a apeveyu ke sina ga pan la.”

²² Ana Parin Suṓe Pilikis nene, naga kilia towe m̃a sur moki rui e lepas na Mrapa Viu nene, ana pogos naṓa naga pisu sane veveyuena nene, le Yu lala amio Pol akila vanon ga sur nena ga la nene, ana naga kalo nena visena, pisape “Poga ga, ṓisi na ita tesum̃a e nini sumo wa. Pisi na nesum̃ate ke ga yerka wa kiena ne yaru na kilaen mara la nene Lisias vena kom ma Yerusalem vitomi neloge ruru kiena visena nene wa, ṓisi na nela kiau naliṓereena van amiu.”

²³ Ana naga pisa pan kiena yaru na kilaen mara lala, pisape la atarar ga Pol, apisuar naga, ana naga pisape ve akila manene re m̃arera vania, la monar ataṓan naga yaloro m̃aga, a ve avisaluṓar re kiena erau lala vena aimi ayaliali naga avisuar.

Pol pisayu Yesu pa Pilikis amio wona

24:21 Yum̃aena 23:6

²⁴ Ana Parin Suṓe Pilikis, naga wona sira re Yu tai, kiena kia Trusila, ana lalua nene la sinelan asape asun re amio Pol wa. Ana legiena laṓas ṓarovia, ana lalua apimi e yo naṓa Pol sike ea, ana aṓere Pol pimi pula, ana Pol pisi amio lalua, naga pisayu kiena nalelagaena naṓa e Kristo Yesu.

²⁵ Ana Pol mligan visena la moki la sane pan lalua, naga sitom ṓele la ga, naga pisayu sanape naṓa yaru monar kila ṓelaga mesmesu, a naṓa yaru naga monar kawe ruru kiena malena mesmesu, a pisayu m̃ena ga naliṓereena kiena ne Ntewa naṓa ṓisi na imi e Legiena Maro. Ana pogos naṓa Pilikis mloge visena la nene, naga mloge sane miyur manene kiena sitomena paṓisi, kila narui naga marau towe laa sane, ana naga pisa pa Pol, pisape “Poga ga, toroki narui. Ko ova si loyum̃a e nene sumo wa, ana visae nelual si kiau pogos tai, ṓisi na neligan si visena vim̃asun ko.”

²⁶ Ana pogos naṓa Pilikis pisa visena nene, naga kiena sitomena viowa m̃ena ga tai toṓa ga, naṓa naga sitom ke pisape ṓisi na Pol naga war kilavaru keviu tai vania, vena kilia visa va Pol visave Pol kilia molue sina. Ana kiena sitomena nene kila narui naga mligan luen ga visena panon Pol, a naga sum̃a sun amio naga yam mokliu.

²⁷ Ana naga kila m̃a sanene pano-o tol kas lua, ana naga ṓisin kiena yum̃aena nene. Ana naga pe taṓan re Pol molue si e yo naṓa apuarar naga sike e poli, komin naṓa naga sinenan pisape kila le Yu la akekaran naga. A siraunia, yaru taṓena tai pimi kus lelana ne Pilikis nene, kiena kia Posias Pestas.

25

Pol pisape Sisa ga naga monar liṓere naga

¹ Ana ṓarin suṓe viu nene Pestas, naga pimi garu Sisaria, pimin vena visuar kiena lepassia nene, ana siraun naṓa legiena telu ga ṓarovia, ana naga pisu naṓa naga monar vavini visuveve yo ma metava Yerusalem.

² Ana pogos naṗa naga pa tol yo nene, ana naga piora amio yerkawa lala kiena ne yaru wa lala, amio yerkawa taṗena lala kiena ne le Yu lala, ana apisa kare Pol pania. Ana am̃areran pania,

³ apisape visae naga sitom sape kila suri wo tai van la, ana lala sinelan naga ligan Pol wasuṗe sina imi pula, vena la akilia aure naga va kumali avis vania. La apisa sanene, ana la asuṃa asitomwan ke rui asape visae Pol imi, ana la ava asuṃate naga gare, a vena aweṃar ga naga mare meke mrapa komsusia.

⁴ Ana Pestas pisape “Poga ga, ana ve ve piavi re inu meṃa nowasuṗe sina neva garu Sisaria, naṗa la asuṃa atarar ke yaru nene sike ea.

⁵ Sanene, ana amiu yerkawa laṗasia, akilia ataveve inu teto garo ne, teviṣu ve sanape. Visae yaru nene kila suri laṗasia naṗa pe mesmesu re poli, ana tekilia tekila kana visena nena e pogos nene.”

⁶ Ana Pestas sike amio la gar Yerusalem pe tol re legiena lualima yam taaga pa vari poli, ana naga pito si garo Sisaria, amio yaru laṗas naṗani. Ana e ga e legiena na siraunia, naga pa totano ke e kiena yo naliṗereena, ana naga pisape avano aure Pol imi.

⁷ Ana pogos naṗa Pol pimi loyuṃa, ana le Yu la nae Yerusalem naṗa ataveve Pestas apimi, asuṃalu asu, ana asuṃa apisawal ke pupia suri viowa la moki liu naṗa apisape Pol naga kila, ana kiela visena la nene pe suṃalu re nena ga.

⁸ Ana pogos naṗa Pol sinenan sape la kiena navisatameena, naga tero plas ga, pisape “In na pe nekila re nena suri tai poli, naṗa nekilaro navisaluaena kiena le Yu lala, a pe noṗarnena kare re Yum̃a Wa nae Yerusalem poli, a pe nekilaro re meṃa ga navisaluaena kiena ne ṗarin suṗe nae Rom poli, naṗa Sisa.”

⁹ Ana Pestas nene, naga sinenan sape le Yu lala la aloge wo e naga, ana naga sitom sape kilayonli kila ve sa naṗa la apisa pania, ana piun tan Pol, pisape “? Sanape, pona popon neure ko teva nevisi ga van ko ma kumali nae ma Yerusalem,

ana yoko ko osuṃalu sina ga ose marau e yo nene yo?”

¹⁰ Ana Pol pisatamea, pisape “Nanagane, e yo nini, in na nesuṃalu rui nesike e marama, ko yaru naliṗereena navisaluaena kiena Sisa nae Rom. Visae suri nakilaena tai van inu, ana yo ke nini narui naga mesmesun ga naṗa ko okila. ? Ana yoko nevavin si ya ne ma Yerusalem ne? Ko opisus kilale rui naṗa e lepas kiena ne le Yu lala, ana pe kiela visena tai suṃalu re nena e inu poli, peraga.

¹¹ Ana visae ko opisus nekila suri tai piowa torokin naṗa monar nemare vanonia, ana poga ga nene, in na pe nekilayonli re naṗa noure vetan poli. Ana visae la nene, pe kiela visena re si tai naṗa kilia suṃalu suṃa poli, ana pe mesmesu re nena naṗa ko oiila inu nowasuṗe sina neva e limala vena la akila ya naṗa la sinelania van inu. Ana nanagane, sa naṗa nekilia nekila, sane nesike vatanon navisuarena nae Rom, ana nepisa ruru ga pan ko nesape sineun ṗarin Suṗe Sisa nae Rom, naga ga monar liṗere inu.”

¹² Ana visena nene kila Pestas pano pis amio kiena kansel la sumo wa, ana siraunia, pimi sina ana pisape “Ko opisa rui opisape sinoṃan Sisa ga liṗere ko. Ana nepisape poga ga, yoko osuṃalu ga ose marana ne ṗarin suṗe nene narui.”

Pestas sunyu Pol pan suṗe keviu taṗena nene Akriṗa

¹³ Ana siraunia, legiena laṗasia ṗaro sina, ana suṗe keviu na yo taṗena tai pimi garu Sisaria. Naga kiena kia ne na nene, Akriṗa Nalua, ana naga pimi amio vinena naṗa Penis. Lalua amloge naṗa Pestas siar ga kiena yum̃aena na wa naṗa pe ṗarin suṗe nae lepas nene, ana la sinelan asape aimi aialialia.

¹⁴ Ana la lua asike e yo nene pano-o, ana yam moki naṗa la asuṃa asun amio Pestas nene, ana legiena tai, ana Pestas sunyu ga lepas na puna ne Pol pan lalua. Naga pisa pan la lua, pisape “In na kiau yaru tai suṃa e kiau yum̃a nakoena, naṗa sike e limana ne Pilikis nanua sumo rui, sumon naṗa nepimi e nini.

¹⁵ Ana siraun naṓa nepimi, ana nepa ma Yerusalem, ana yerkawa kiena ne li wa lala, amio nasumonena taṓena kiena le Yu lala, la apimi apisayu yaru nene pan inu, la sinelan asape nevisawal kiena naliṓereena tai vania.

¹⁶ Ana nepisa ruru pan la, nepisape taṓatete nekila ga sanene, ana monar noure lepas luwoka aimi lele taaga sumo wa, ana la naṓa akila navisawalena, monar avisawalia e marana yaru naṓa akila ke navisawalena pania, a monar nela pogos van yaru nene vena naga m̃ena la kiena navisatam̃eena. Nepisa pan la nepisape kiamimi ṓelaga na navisaluaena nae Rom naga sa ke nene narui.

¹⁷ Sanene, in na neṓasuṓe sina nepimi e yo nini, ana le Yu lala la akom ma Yerusalem apitomi vena mekila visena. Ana pogos naṓa nekilia nesape la apimi atol yo nene ko yepekilavi, pe nemla re si pog tai pan la poli, ana kolulag ga, nepa netotano e yo naliṓereena, ana nepio yaru naṓa Pol pimi loyuma.

¹⁸ Ana pogos naṓa le Yu lala asuṓalun navisawalena suri lala na yaru nene, inu nesitom nom̃ape yoko neloge pupia suri viowa laṓas naṓa la apisape naga kila, ana nanene na peraga.

¹⁹ La apisa ga narin suri lala e ga e lepas na kiela nalotena, naṓa la asuṓa apepeyun ke amio yaru nene. Naga nene e ga e lepas na kiela ṓelaga marua ga lala, a e lepas na yaru tai, kiena kia Yesu, naṓa naga mare rui, ana Pol suṓa pisa ke pisape naga mali sina.

²⁰ Ana la apisayu ke suri la naṓa pe nekilia re nena poli, ana nemninue kare narui nesape am̃a yoko nekila ya ne, ana nepiun tania nepisape visae naga sinenania, wasuṓe si va ga ma Yerusalem, vena la akila ga kiela visena e yo nene.

²¹ Ana siraunia, yaru nene pisape peraga, ve va re sanene, ana naga suṓalu pisape sinenan pisape Parin Suṓe ga Sisa naga liṓerea. Naga kiena visena nene kila netarar naga sike e yo nini na wa, vena nelual mrapa tai neila naga va garu Rom, vena Sisa naga visuvevea.”

²² Ana Akriṓa pisa pan Pestas, pisape

“Ana inu m̃ena sineun paṓisi nesape neloge re visena kiena ne yaru nene.”

Ana Pestas pisape “Poga ga, peni ga na amlua asun.”

Pestas ṓere Pol pimin vena Akriṓa yagogonia

²³ Ana kolulagi, akila suri punu ga su ruru sike e kiela pupia yuma na viorena tai, la akila sane pe pupia suri tai. Ana suṓe keviu nene Akriṓa la lua vinena nene Penis, la lua apimi naṓa amiyowa ruru la rui, ana apimi loyuma naṓa yerkawa kiena li na mara lala amio yerkawa taṓena lala la amiyal ke varaun la. Ana la akila suri punu ga pa la lua nene sa naṓa la akila ke e pogos keviu la ne sanene. La akila ma pano-o, ana siraunia, ana Pestas pisape aure Pol imi loyuma.

²⁴ Ana la aṓere pimi, ana Pestas pisi narui, pisape “A Parin Suṓe Akriṓa, amio yerkawa taṓena lala naṓa tesike e nini ṓane, nanene yaru ne nanini narui naṓa le Yu lala la apim apis pan inu vanonia. Garu Yerusalem, a e yo nini, la apimi apiun m̃areran tan inu apisape neliṓere naga, asuṓa apisi keviu apisape yaru nene, naga pe pon re si mali va re laa sane poli, la sinelan asape naga monar mare ga vilaga.

²⁵ Ana nepisuveve suri nene pano-o, pe nom̃al re sur tai naṓa torokin naga mare vanon poli. Ana siraunia, yaru nene naga m̃ena piun pisape kieta ṓarina suṓe keviu nae Rom, naga ga liṓerea, ana nanagane nesuṓa nepisuveve nesape yoko monar neila naga va ga e limana ne Sisa narui.

²⁶ Ana monar nesiri m̃aki tai va amio yaru nene va van kieta ṓarina suṓe nene, ana pe nekilia ruru re m̃ena nesape am̃a nesiri ya ne te m̃aki nene wa. Nanini narui, nekekara naṓa neṓere naga pim̃asu vena suṓalu se maram̃a, Suṓe keviu Akriṓa, amio amiu yerkawa taṓena la nene, vena ita tevisuveve ke sina ga kiena visena la nene, pona amiu akilia aiila inu navisaen ya naṓa nesiri te m̃aki nini.

²⁷ !Pe popon re neligan yaru nene va e pupia naliṓereena nene poli, naṓa pe

nepisawal ruru re visena ya naṓa kila narui nemligan naga pano!”

26

Pol pis e marana Āarin Suṓe Akriṓa

¹ Ana Akriṓa pisa pa Pol, pisape “Poga ga, nela pog van ko narui vena osunyu ko e lepas na suri la nene.”

Ana Pol koan limana sanene, ana siar kiena visena narui, vena la navisa-taṓeena na suri la nene.

² Ana pisa sanini, pisape “Āarin Suṓe Akriṓa, nepisu sane po paṓisi naṓa nekilia nesuṓalu e maraṓa ṓane, vena ne-taṓali naṓa nela navisataṓeena laṓasia e visena la naṓa le Yu lala akila pan inu.

³ Nepisa visena nene komin naṓa ko ke narui, okilia ruru kieta ṓelaga ita le Yu la rui, a okilia ruru ṓena suri la naṓa pogos punu ga kieta yeririna lala asuṓa apepeyun la ke vanon rui, a naṓa la asuṓa amlṓere la ke vanonia. Ana inu nepiun tan ko vena ko ve sinema kar inu re, komin naṓa yoko kiau suniena naga tawa manene e suri la ne sanene narui, a ve piavi towe ṓena ga.

⁴ “Kiau suniena naga siar sanini, sane inu, nesiar e pogos naṓa nepe nisisi ke ga wa, nesu luen ga nemio le Yu lala, nanene e kiau yo, ana siraunia, garu ṓena Yerusalem. Ana lala la akilia ruru kiau ṓelaga lala nanua rui, a akilia ṓa naṓa pogos naṓa nepe yaru vii ke ga wa,

⁵ ana nesikol inu e ṓegas kiena ne Varasi lala, naṓa la ke narui naṓa atarar manene kieta navisaluaena taulu ṓegas taṓena lala. Ana visae la ṓena ga akekaran naṓa la asuṓalu ase maraṓa, ana yokorena la akilia avisawal li van ko, avisave suri naṓa nepisa ke ne naga pe lelaga punu ga.

⁶ “?Ana komin ya ne la sinela kar inu si sanene? Nanene komin naṓa nesuṓalu ṓarera nesike e navisaarena tai naṓa Ntewa naga kila pa repita lala nanua sumo rui, naṓa pisawal sape naga yoko kila yaru la naṓa amare amal sina.

⁷ Ana navisaarena nene, kieta lus ṓena ga la lualima taaga pa lua [12] nene la

asuṓa amlen ke ko legiena a kolemallo vena yoko la akilia atolia. !Āarin suṓe, opisu ke ne! Sur nene Ntewa naga pisaar pan le Yu la rui, ana le Yu lala sinelan asape avis si van inu komin nemlelaga ea.

⁸ ?Pe nekilia re poli, ana komin ya narui naṓa yaru la nene asuṓa asitom ke asape Ntewa naga taṓatete si kilia kila yaru naṓa mare rui naga mali sina?

⁹ “Ana pe lelaga, nanua sumo, in ṓena sa ke ga nene, pe nemlelaga re e suri la nene poli. Na nanua na, in na sineu kar laa la naṓa amlelaga e Yesu nae Nasaret paṓisi, a nepisu sane monar nekilali ṓarera vena nekila kia nene vito tano.

¹⁰ Ana garu Yerusalem, nesuṓa nekila suri moki sanene. Yerkawa kiena ne li wa lala, la ataṓan pan inu, ana nepa nekila nalelagaena wa la nene, la moki naṓa apa e yuṓa nakoena, ana pogos naṓa la amlṓere la asape monar la amare, in ṓena ga nesike loyuṓa ea.

¹¹ A nesuṓa netetelivi e yuṓa na leniena lala, pogos punu ga nesuṓa nekila ke piowa pan la, a nesuṓa nekilali la ṓena ga, nesuṓa nekilayon naṓa vena la aviuelin kia kiena ne Yesu. Ana nesuṓa nekila ṓa sanene pano-o yepeu pisunun paṓisi, ana nomene plan la apuretetai apeve taaga e purvanua taṓena lala, ana siraunia, nepanon la ke sina ga e kumali la naṓa la apa asike e la.”

Pol pisayu sanape naṓa Yesu paemenia

¹² Ana Pol suṓa sun pano-o, pisape “Ana e pogos tai, nesuṓa nepito ke garo Taṓaskas vena nekila ke sina ve sanene van la naṓa asike e yo nene. Yerkawa kiena ne yaru wa lala, la amiila inu nepitove, a la amla ṓaki pan inu naṓa asape nekilia nekila sanene.

¹³ Ana mesuṓa memial ke mepato garo tano, ana kolpae ga, nepisu pupia yomerarava tai metava ma e peni, naṓa tego taulu mrae, ana yomerarava nene tegoli nena yo naṓa mesike ea.

¹⁴ Ana yomerarava nene naga merarava keviu sanene narui, naga kila imimi mekekapil mepito tano e porotano, ana siraunia, nemloge pulgon yar tai, pis pan

inu pis ga kome visena nae Epru, naga pisape '!Sol o, Sol o! ?Komin ya ne ko osuṃa okila kare inu ke sanene sa naṓa ko osuṃa okila ke ne? Ko osuṃa laṃa te p̃ataun inu ke sanene, ana kila laṃa mlaea p̃isa.'

¹⁵ "Ana nepiunia, nepisape "Ana Suṓe, ko a nene?"

"Ana Suṓe pis ke sina ga pan inu, pisape 'Yesu naṓa ko osuṃa okila ke piowa pania, nane in ne nanini narui.

¹⁶ Ana osuṃalu sina, komin naṓa yoko oyum̃ae kiau. In na neṃalivin ko sanene komin suri nena nene narui. Pane opisu kilale inu sane ovisave in na aṓ, a siraunia, yoko ovisu inu nesuṃa neṃalivin ko e suri la ve moki e legiena lala naṓa pimi ke sirau. Suri la naṓa nepian kon ke ne, naga ke narui naṓa ovano ovisawal van yeririna lala.

¹⁷ Ana yoko ovanon ovisawal va le Yu lala, a va ṃena yaru taṓena la naṓa pe ape le Yu re poli, ana p̃isi na ovisu naṓa la nene, yoko akila viowa van ko, ana ve sineṃa pepe re, yoko neṃalivin ko e pogos la ne sa nene, vena netamalia ko.

" 'Nanene narui, nevitetalia ko ovanon la nene,

¹⁸ vena ovikepa kilamarala, vena ovilon la amolue vetan yemalolo naṓa la asike ea, aim e yomerarava, a vena aligan ṃareraena kiena ne Yermare sike na, aim ga puna Ntewa. Ana pogos naṓa aviawa ga e inu sanene, ana yoko Ntewa viewo kiela mlamulena viowa lala, a yoko naga sikol la e p̃egas nen kiena li wa lala.' "

Pol pisayu kiena yum̃aena

¹⁹ Ana Pol pis ke na wa, pisape "Naga narui, Suṓe Akriṓa, pogos naṓa nepisu pupia suri naṓa molue ma e peni pitomi e inu, in na taṓatete si nekila sur tai narui, ana nemlogear ga visena kiena ne Suṓe narui.

²⁰ Ana nepa Tam̃askas sumo, nemlologon pa yeririna lala, nepisape monar avilopu la ava puna Ntewa, a kiela malena monar awo make nena ga, torokin navilopuena nene. Ana siraunia,

nepa ke sina ga ma Yerusalem, nemlologon ke sina ga sanene pan la, siraunia nepa nekila sanene e kumali taṓena lala e lepas nae Yutea, a siraunia, nepa kar ga e yo kiena ne la naṓa pe ape Yu re poli, nemla ke ga visena maran taaga sanene pan la.

²¹ Ana komin ga kiau yum̃aena nene narui, kila le Yu lala apimi atarar inu loyum̃a e Yum̃a Wa Mana ne Ntewa, ana la sinelan asape awem̃ar inunia.

²² "Ana pimi tol p̃ane, naiilaena ga naṓa pimi kome Ntewa naga suṃa amio inu silaga, a nanagane nekilia nesuṃalu nese maramiu amiu yerkawa lala, a amiu li taṓena ṃena ga lala, a in na kiau pulmas nini naṓa nekilia nevis van amiu. Ya naṓa Mosis amio navisawalena lala apisa nanua nanua sumo rui, la apisape yoko ve sanene ve sanene, ana suri ga nene, nane nesuṃa nepisawal ke pan amiu nanagane.

²³ Naga nene naga sanini, naṓa Navisaarena, pogos naṓa naga imi ṃalivi, ana yeririna lala monar akila viowa vania, ana siraunia, yoko naga ve yaru naṓa naga mal p̃esania petan marena. A kiena nasuṃalena si nene petan marena, ana suri ne nanene narui ve mrapa nawaren yomerarava na tamaliaena imi tegoli yeririna la punu ga, Yu lala, a la naṓa pe ape le Yu re poli."

Pol sinenan sape monar alelaga e Yesu sane naga

²⁴ Ana pogos naṓa Pol suṃa mla ke kiena navisatam̃eena sanene, Pestas suṃalu tero kiena visena lala, naga pisi keviu, pisape "!'Pol, ko ope wowe ga nene! Ko sinoṃan osape ove manmarua e nakiliaena taṓena lala, ana kila p̃aruṃa pano-o pe wowe ga narui."

²⁵ Ana Pol pisape "Nepatanon ko, Parin Suṓe Pestas, ana in na monar nevisa van ko, in na p̃aruu poga ga. Kiau visena la naṓa nesuṃa nepisawal ke e yo nini, la ape purṓes nen nalelagaena naṓa ape lelaga paṓisi.

²⁶ Suri la naṓa nesuṃa nesunyu ke ne, nekilia ruru nesape Suṓe Akriṓa naga

kilia ruru rui, la apimi atol kiena navisuena rui, nanene narui kila pe nema-raun re naãa nevisawal e marana poli. Suri la nene, pe apimi aãalivi re ga e narin yo ta naãa yaru la pe akilia re poli, peraga, yeririna la punu ga akilia rui, asumã apisayu paãisi.

²⁷ ?Ana Suãe Akriãa, ya naãa pe kioãa sitomena lelaga e suri la nene? ?Nepisu sane ko mãena ga omlelaga e visena kiena ne navisawalena lala nanua sumo, ne?”

²⁸ Ana Akriãa pisa pa Pol, pisape “! E, peraga, peraga! ?Pona opis yam plas ga nene, osape okilia oure inu mãena neimãasu neve yeririna kiena ne Kristo, ne?”

²⁹ Ana Pol pisatãmea, pisape “E, nemn-inue ga, pona nevis ve plas ga pona nevis ve piavi, ana suri taaga ga nemlen nesape Ntewa kila ãane, sineun nesape ko, omio yaru taãena la nene, naãa asu mãa amiyagogon ke kiau visena, sineun nesape aimi ave sa ga inu. Pe nepisa re nesape awar sen la nene ve sa naãa noãar ke poli, ana nepisape popon aimi ave sa ga inu, naãa nemla Yesu Kristo e kiau malena, nepimi nepe yaru viu e naga.”

³⁰ Ana Parin Suãe Akriãa kalo visena e nene, ana naga, amio Pestas, amio Penis, amio yerkawa taãena lala naãa la ateke tano ma metava amio la, la nene asusumãalu, apava si vanua.

³¹ Ana pogos naãa apava vanua rui, asumã apisayu ke pan la, apisape “Yaru nene naga pe kila re nena suri tai piowa poli, naãa torokin naga mare pona war nakoena nena vanonia.”

³² Ana Akriãa pisa pa Pestas, pisape “Visae yaru nene ve visa re visvae Sisa ga liãerea, vera naga kilia molue ga va vanua sanene rui.”

27

Aãere Pol amligan yo Sisaria vena avu garu Rom

¹ Ana e pogos nene, in Luk, in mãena nesike nemio Pol garu Sisaria, ana nepisape in mãena ga yoko neva nemio naga garu Rom. Ana pogos naãa yerkawa lala apisu sane meva narui, ana aãere plan Pol amio yaru taãena laãasia naãa asike loyuãa e

yuãa nakoena, amligan la apa e limana ne yerkawa na mara tai. Yaru nene, kiena kia Sulias, a naga pe nasumonena na ãegas na li na mara la nene naãa apio asape “Pegas kiena ne Okastas.”

² Ana naga ãere imimi mepano, mepito garo losi, ana aãal waa tai nae Atramitiam, ana memiai meta ea. Ana e pogos nene, Aristakas nene nae Tesalonaika e lepas nae Masitonia, memio mãena ga naga. Ana mokus waa nene mepano, naãa kiena mrapa nena naga pano kome lowe lala e lepas nae Esia.

³ Ana kolulag, mepimi metol yo Saeton, ana e yo nene, Sulias naga kila po paãisi pa Pol, naga taãan naga pa ura vena visu kiena erau lala, a naga taãan naãa amiila Pol e suri laãasia e kiena mrapa.

⁴ Ana memligan si yo nene, mekiriri mãa e sive pano-o, ana makawe lagi e pogos nene, kila sane pogos naãa metol purvanua nae Saepras, ana mepa mokom varaun lepas ãasia, lepas navano.

⁵ Ana mokusro pupia sive nene naãa va ko yotena narui vanua e lepas nen yo lua nene Silisia amio yo Pampilia, ana mekiriri mepimi metol kumali nae Mãera, e lepas nae Laesia.

⁶ Ana waa nene naga mligan imimi e yo nene, ana yaru na mara nene Sulias naga pano kale mrapa taãena. Ana naga mali waa tai nae Alikantrea naãa naga suãa pa ke e purvanua naãa mesitom ke mesape mevanea, Italia, ana naga miila imimi mepa mesike e waa nene narui.

⁷ Ana mepa sina metava e sive, ana lagi piowa ga, kila mekiriri malumu ga pano-o legiena la laãasia, ana moãar yo paãisi, mepilolou mãa mãale sanene pano tol kunus nae Nitas, ana lagi monwo ruru imimi nenaga narui. Ana mepilon imimi, mekirilologia kunus taãena nae Salmone e purvanua naãa Krit, ana mepa varaunia e lepas na sive malumu.

⁸ Imimi mokom ga lavisin purvanua nene, mesuãa mekeveve mãa mepano, ana lagi mãe kare imimi ke na wa, ana mepa mãa pano-o metol lowe tai naãa apio asape “Lowe Tanea,” lavisin kumali naãa Lasea.

⁹ Ana mesu towe la e yo nene yam plas ga, ana la apisu sane piowa ga narui, komin naña lagi kila ke sanene pan imimi, ana mesike mrapa yam piavi laa rui, ana mrapa piavi ke ga wa, a nanagane, pogos na lagi amio pupia miava narui. Sila ga la apisape pog piowa nene siar e kupario na Pañagena na Naviewoena, ana pañagena nene ðaro pa rui. Ana Pol mloge piowagan suri nene, naga pisa ruru pan la, pisape

¹⁰ “Yerkawa lala, in na nemninuluñar naña visae tevano, ana viowa vañisi, yoko suri la punu ga akilia akokovio. Nepisu sa naña yoko waa nene naga kilia talilu ga warar kana tegaki lala, a ita m̃ena ga, kieta malena lala akilia akokovio e sive.”

¹¹ Ana yaru na mara nene naga pe miyagogon re Pol poli, ana naga miyagogon ga yaru naña kus ke waa, amio yaru naña naga kiena waa nene. Ana lalua apisape “Peraga, woga ga ne, yoko teva ga,

¹² komin naña tañatete tekilia tesike e yo nini vano-o tetol ke sina ga pog wo.” Ana apisayuia, la moki naña apisu asape popon meligan si yo nene, moureli ga mevano metol lowe tañena tai kiena kia Pinikis, e purvanua m̃a nena nene, naña la apisu asape e nene narui popon mesike ea, tol pogos naña yoko pupia lagi na miava nene ðisi.

Pupia lagi miyusesa kare la apano

¹³ Ana pogos naña apisu lagi pilonia, ana lagi marua naga molue towe narui, apisu apisape po narui, ana asitom asape lagi ke nene narui naga yu imimi meva e lowe naña mesitom ke mesape meva ea. Ana añere kilavaru pam metava, ana meñure mepano, mekeveve ga yo ura.

¹⁴ Ana pe yam piavi re poli, memilan ga pupia lagi ura tai molue pimi miyu imimi.

¹⁵ Lagi nene miyui keviu sanene, ana tañatete si mekilia moure naña mokus lagi nene, ana apilon ga waa narui, ana atañan ga lagi nene supon imimi ga mepa yotena, ana lagi nene miyusesa imimi sanene mepano.

¹⁶ Ana mekiriri mepano, metapolou towe la sane e narin purvanua tai, kiena kia Kaota, ana e yo nene memiyum̃aen

kana narin wa nene pano-o, ana añurelua pam metava.

¹⁷ Ana la amaraun apisape sa ðisi waa nene wurorowaia, ana añere pupia kilika lala akom va tanon waa, ana apiar ruruia vena tarar ruruia.

Ana apisu naña lagi mom̃a miyusesa kare imimi mepa ke na wa, ana amaraun asape asum̃a apa ke lavisin piame lala nae Saetis narui, lavisin yo Lipia, ana añere si m̃ale. Ana lagi miyusesa kare imimi sanene mepano metaulu yo nene, ana yemalo, ana mekirir malo ga mepano.

¹⁸ Ana kolulagi, ana lagi m̃arera ke na wa, a sive mom̃a kokovenkare imimi, ana la asiar naña akoven plan tegaki pito e sive.

¹⁹ Ana legiena tañena sina, yo piowa ke ga wa, ana apano amluñar plan kilika lala a m̃ale lala a suri la ne sanene, akoan m̃ena apito e sive.

²⁰ Sa m̃a ke sina ga nene tol legiena moki, naña sinapane naga malo ga m̃eke na, pe mepisu re verue la poli, a pe mepisu re maran mrae poli. Mepisu sane mesike loyuma e lagi tai nene naña pe yaru tai sitom re si sape yoko memal poli.

²¹ Ana yaru na waa lala pe akinana re poli legiena moki rui, amloge piowa keviu pañisi, ana Pol pimi pisu la, pisa pan la, pisape “Suwala, visae ayagogon ruru inu ga nanua rui, e pogos naña ita tesike garu Krit wa, ana yoko pupia loge viowaena a pupia nakilaluen suri la nene tañatete imi tol ita.

²² Ana nanagane, yoko nevisa si suri tai van amiu, vena akilia aloge si wonia. Nepisawal pan amiu, nesape yoko kieta waa nene naga talilu na wa, ana tañatete ita yaru tai kovio.

²³ Nekilia suri nene komin na kolemano, kiau Ntewa naña nemlen ke pania, nepisu naña naga mligan kiena navisi tai pitomi m̃alivin inu. Navisi nene pimi suñalu sike lavisin inu,

²⁴ ana naga pisape ‘Pol, ve omarau re. Ana monar ovano-o oworu garu Rom, monar osuñalu ose marana ne Sisa na wa, ana nekilia nevisawal van ko sanini, malena kiena ne la naña asike e waa nene amio ko, Ntewa naga sitom sape tañan

ga van ko sape yoko amal ga, tařatete tai kovio.'

²⁵ Na nene narui, ve aloge re si viowa, in na neřasine manene Ntewa pařisi nesape yoko ve sa ga nařa kiena navisi nene pisawal pan inu.

²⁶ Ana suri taaga ga, yoko monar tokus kieta waa vano teyalar ga yo ura e narin purvanua tai."

La apim lavisin purvanua tai

²⁷ Ana lagi nene naga suņa miyusesa kare imimi mepa ke ga wa, tol wik lua narui nařa mesuņa mekirir ke e pupia sive nae Metiterenian nene. Ana kole-malo pogos tai, yaru na waa la nene apisu kilale sane mesuņa mepimi ke lavisin purvanua tai ko yo tai.

²⁸ Ana amligan kilika pito tano, la apulo merorol na sive nene pano-o tol meta lualima yam vari, siraunia, asu laa yam plas ga, ana akila sina, apulo asape meta lualima yam telu.

²⁹ Ana amaraun asape sa řisi mekirir ña sanene mevane lawe pupia kilavaru lařasia pona ya, ana akoan kilavaru vari nařa sike varau e řeren waa, ana asuņa amlen ke asape vena kilavaru lala nene monar atarar imimi, a vena yelagi imi vilaga.

³⁰ Ana yaru na waa lala apisayuia, apisape yoko avisa kotalia imimi ke sina ga lařasia, ana yoko la akilayon nařa akus kana narin waa nene ana aure akom ea ava ura. Ana apisa kotalia imimi, apisape "Oe, yoko mokusli kilavaru nene va gare sumo wa, vena metařali nařa uarar kieta purgon waa." Ana asuņa amligan narin waa pito tano e sive.

³¹ Ana Pol pisu kilalea, ana pis pan yaru na mara lala, pisape "Visae asitom asape amali, monar avisaluřar la nene asuņa ga amio ita e waa nini."

³² Ana yaru na mara la nene amloge, asuņalu veraga apano ateroro kilika na narin waa nene, ana lagi miyulua ga tan waa, korur mian pano.

³³ Ana lavisin yemlagi merarava, ana Pol sitom pisape monar akan suri tai, ana naga pisa pan la, pisape "Ei, pimi tol řane,

ana wik lua narui nařa tesike e pogos piowa nene, pe tekinana ruru re poli.

³⁴ Ana popon řane na tekinana ruru sina, vena yepeta lala akilia aimi ñarera sina, ana sanene yoko tekilia temali. Sa nařa nepisa rui, ana yoko tařatete narin vilřarita tai kovio, ana yoko ita punu towoga ga."

³⁵ Ana siraun nařa pisayu suri nene řisi, pano mla kilaparavi tai, ana mlen e marala, pisa potena pan Ntewa vanonia, ana kawewowaia, suņa kania.

³⁶ Ana pogos nařa lala tařena apisu nařa Pol suņa kinana ke sanene, la ñena ga amlelaga asape pe lelaga kemua, yoko lala awoga ga ne, ana la ñena ga akekarar asape akinana sina, ana akinana.

³⁷ Ana imimi punu ga nařa mesike e waa nene, metol ponotia lua lualima yam olua pa orai.

³⁸ Ana pogos nařa la punu ga akinana řisi, apisu asape popon akila waa melala va laa sane, ana ařar plan mras nen wit la nene nařa sane kamimi kinanena, akoakoan plan pito e sive.

Waa pa tawa ñeke ga yotena, ana akulkul ga apa ura

³⁹ Ana pogos nařa yemlagi narui, ana mepisu ña yo ura lavis ga rui, ana pe mekilia re yo nene poli. Ana apisu pululus tai nařa pe lowe ñeke ea, ana ura e yo nene none tanea ñeke ea, ana apisayuia, apisape yoko la akilayonli nařa vena akila kiamimi waa kiriri va ura ea.

⁴⁰ Ana ate plan kilika na kilavaru lala, amligan la asike e sive, a amluřar plan kilika la nařa apiar ke řeligas nen waa, ana ařere narin ñale nařa teke e purgon waa, vena lagi yu imimi meva meialar none.

⁴¹ Mesuņa mekirir ña mepano-o, memilan ga, nařa waa mialarlar pupia none tai nařa koruru řerepoloia sike lele taaga tanon sive. Purgon waa mialarlar none nene, ana tawa ruru nenaga ñarera ñeke ea, pe kululu re si po laa rui. Ana pupia sive lala asusuņalu ařanwowola apimi asusu řeren waa nene, asuwowaia.

⁴² Ana yaru na mara lala asuñña apisayu rui, asape visae suri tai sanene, ana awe mom̃ar ga yaru na yum̃a nakoaena la naña asuñña akirawo la ke na, visae peraga, pona lañasia akilayonli naña awula ato tano e sive, vena akulu ava ura, aure.

⁴³ Ana kiela yerkawa pisaluñar la, pisape ve akila re, komin naña naga sitom ke sape Pol naga monar mali ga. Ana naga pisa ga pan imimi punu ga, pisape “Poga ga, ita naña tekilia tokulu, tesumo, towula ga e sive, ana teyenli ura.

⁴⁴ Ana ita naña temiye ðele ga, ana tokus kulutaki, pona ya naña tekilia telual e waa, vena tokusia tokulu, ana ita sirau tevano.” Ana e ga e mrapa nene, imimi punu ga mepano-o mepa ura e yo nene, naña imimi punu ga memali po ga, pe imimi yaru tai kovio re poli.

28

Pol lala la asike e purvanua naña Molta

¹ Ana pogos naña imimi punu ga mepimi mesu ruru ke pa ura rui, yeririna lala nae e yo nene apimi apisu imimi, ana apisa ga pan imimi na wa apisape yo nini naga pe purvanua tai, kiena kia Molta.

² Ana akila po manene laa pan imimi, la sinela po pan imimi pañisi. E pogos nene, yua powo ña ga, ana la apisu naña imimi memloge miava tol imimi pañisi, ana la apirani kapi, apisuar ruru imimi sanene.

³ Ana Pol pa ðar lukilar na yato tai, pisape kuan va e kapi, ana pogos naña kuan pa e kapi, narin lom̃ara tai talinar naga teke likan yato la nene, pogos naña mloge kapi mlege, ana molue e lukilar na yato nene, talinar naga e limana ne Pol, karia.

⁴ Ana pogos naña yaru nae e yo nene lala apisu lom̃ara nene na kilam̃aren yaru telan teke e limana ne Pol sanene, la apisamumun ga pan la, apisape “!Ovisu yaru na yum̃a naloge viowaena nene, pona naga pe yaru tai naña ñe mom̃ar ga yaru la moki yo! Sive pisape kilam̃ar naga, ana naga pure ga, ana nanagane na, lom̃ara nene tol ruru nena naga na teke ne.”

⁵ Ana Pol silinlua si lom̃ara nene petan limana mloru pa e kapi, ana mloge re

nena suri tai poli, limana pe mlae re nena ga.

⁶ Ana asuñña apisuar ña naga, asitom asape ðisi na yepena la monar sirop ve keviu va ðisi yo, a visae peraga, pona loru vito tano na mare, ana asuñate ña sanene pano-o peraga, apisu suri nene pe kilam̃ar re nena ga naga. Ana pogos naña apisu naga pogaga, asitom pe tañena narui, asitom asape pona Pol naga pe ntewa tai yo.

⁷ Ana e yo naña mepa ura ea, naga lavisin lokove lala kiena ne suðe na purvanua nene, kiena kia Puplias. Ana ðere imimi mepa um̃a ñana, a pisuar ruru imimi e legiena telu naña mesike memio.

⁸ Ana pogos naña mesike memio la nene, yermarua naña arimana ne suðe nene naga momalio ñeke ñana tog, naga mai, naña yepena la pisun, a meñena piowa ðarwowea. Ana Pol pa pisu yermarua nene, ana mligan limana tea, mlotuwoia, kila naga pimi po sina.

⁹ Ana pogos naña yeririna tañena lala amloge naña Pol kila sanene e yermarua nene, la ñena ga naña amai apimi, ana la ñena ga kiela maiena la ðisi.

¹⁰ Ana akekara keviu pañisi e suri la nene, ana asuñña añar korenan suri la moki pan imimi. A mesuñña e purvanua nene pano-o tol kupario telu, a pogos naña mepiaña sina, la añar kinanena mokliu a suri la naña añar korenan ga pitomi, amligan e kiamimi waa tañena vena iila imimiena e kiamimi mrapa.

Pol la apa atol yo Rom

¹¹ Ana waa tañena naña yoko mokom ea, naga wa tai nae Aliksantrea naña naga ñena ga ñeke e purvanua nene yam piavi rui, monñate ke ga visae pogos na lagi war ro narui. Waa nene, la asikia kiena kia “Kasto a Polakis,” naña kia lua nene na kia kiena ne kiela ntewa lua naña lalua ape kaora, naña la ate kana nono nena sike e purgon waa nene.

¹² Ana memligan yo nini mepano metol ke sina ga yo tai, kiena kia Saerakius, ana mesike e nene legiena telu.

¹³ Ana momolue ke sina ga, mokom varaunia mekirir mekeveve ña yo sanene

pano pano-o metol Resiam. Mesuñã e yo nene tol legiena wetelu tai, ãisi ana lagi marua tanea tai miyui na po paãisi, ana mekiriri manene laa sane tol legiena lua, mepa metol lowe nae Puteoli.

¹⁴ Ana mepa ura memligan waa ãeke e nene narui, ana moñal wolai laãasia, ana aãure imimi mepa mesike pula tol wik taaga. Ana siraunia, mepisu sane pupia kiamimi yalena e pogos nene lavisi ãisi narui, mepimi ke lavisin pupia pulkumali na yomarava nini narui, naãa Rom.

¹⁵ Ana wolai la naãa asike Rom, visena pa tol la apisape imimi na memial mepito ke pula narui, ana la amiyalilu mrapan imimi. La apam manene laa perina paãisi, naãa laãasia apam asumãate imimi e pulkumali nene naãa pupia lelenã wilwiliena kiena ne Apias ãeke ea, a laãas apami manene laa sane, apam yalensilau atol pulkumali nene naãa yumã telu ãana ne wolawa lala sike ea. A pogos naãa Pol pisu asumãate ke naga sanene, naga kekara paãisi, a pisa potena pa Ntewa naãa suri nene kila naga mloge po paãisi, a kila naga mloge sane naga ãarera sina.

¹⁶ Ana pogos naãa mepimi metol yo Rom, la pe amligan re Pol pa e yumã naloge viowaena poli, ana la apisape naga kilia lual yumã tai naga va sike ea, ana la amligan yaru na kirakiravanena tai naga sike amio.

Kas lua naãa Pol sike garu Rom

¹⁷ Ana Pol sike garu Rom legiena telu, ãisi na mligan visena pa pa li na sumonena kiena ne le Yu la naãa asike e yo nene, ana pogos naãa la apim lele taaga, Pol sun pan la. Naga pisa pan la, pisape “Wolai lala, kiau suniena sanini: inu nepim e nini komin naãa e kas nanua ãaro ne, nesike garu Yerusalem, ana kieta yerkawa la akuwan inu nepa e yumã na loge viowaena, siraunia la amligan inu e limana ne yaru naliãereena lala nae Rom naãa la apisuar ke kieta purvanua. E inu, pe nekila re nena suri tai pa kieta yeririna lala, a pe nekila re suri tai naãa pe mesmesu re e kieta ãelaga poli, pona

e visena kiena ne repita lala, ana la akila sanene pan inu narui.

¹⁸ Ana pogos naãa naliãereena lala nae Rom la apisuveve ruru suri nene, la sinelan asape nekilia nomolue ga narui, komin la pe añal re suri tai naãa kila na ala nakoena van inu vanon poli, sane monar nemare.

¹⁹ Ana siraunia, kieta nasumonena lala nae Yu la apisin sina, ana pa piowa ga ãeke na. La akila sanene, ana nepisu sane pe yo re si po laa rui naãa nekilia neva ea, ana mrapa ga naãa nekilia neva ea, ana nepisawal nesape Parin Suãe ga Sisa nae Rom nene, naga ga monar liãere inu. In na pe sineun re nesape neligan la nae kieta purvanua ava e pupia kumali nae e nini poli, peraga, ana komin naãa la akila ãarera manene laa pan inu sanene, nane kila narui nepisape la monar awere inu neimi e yo nini Rom.

²⁰ Nane nesike e nini narui, ana sineun nesape monar akilia suri la nene, ana nepio amiu vena aimi tesu lele taaga sanene vena inu nekilia nesunyun van amiu. Sineun nesape monar akilia naãa sen la nene naãa asumã apiar inu ke sanene, pe komin re kiau napiowaena laãas poli, ana komin kieta Navisaarena naãa ita le Israel make ga tepisape tesuñã toãasine ke ga naga.”

²¹ Ana nasumonena kiena ne le Yu la nene naãa asike Rom apisa pa Pol, apisape “Suri la naãa osuñã opisa ke ne, imimi memninue ga. Imimi pe moñã re ãaki tai naãa pisayu ko poli, naãa molue garu Yerusalem pimi pun imimi, a kieta wolai laãasia naãa la akom e nañã apimi, ana pe apisayu ko re pan imimi poli apisape okila ke sanene sanene.

²² Ana memloge kioñã visena la nene narui, ana sinemimin mesape meloge re laa si kioñã sitomena na wa pona kioñã nalelagaena, komin naãa pe lelaga, memloge towe ãaga e lepas na nalotena viu nene, ana memloge ga naãa yaru lala la asumã apisayu kare ga e yo punu ga.”

²³ Ana la asitere apisape ãisi na aimi avisu si Pol vanonia e yo nene naãa naga sike ea. Ana siraunia, pogos naãa

la apimi, la moki na moki, ana asum̃a amiagogon ke Pol, naṗa siar kolulagi pa ne tol pogos naṗa mrae pito tano ana naga sum̃a pisi ke pan la na wa. Naga pisawal pan la sanape naṗa yaru kilia va loyum̃a e nasuṗenena kiena ne Ntewa, a naga sum̃a pian la ke sanape naṗa navisaluaena kiena ne Mosis amio visena kiena ne navisawalena na sumo lala, la akila merarava ruru naṗa asape Yesu ga narui, naga pe kieta Navisaarena, naṗa la m̃ena asum̃ate ke naga vena imi tamalia la.

²⁴ Ana laṗasia amloge visena lala kiena ne Pol sane pe lelaga, ana laṗasia pe amlelaga re e poli.

²⁵ Ana naga nene kila na la asike e lepas lua narui, ana asitom ṗele ga apisape popon aṗisi ga rui, ava um̃a wa. Ana Pol pisa maron suri tai pan la, pisape “Ei, in na nepisu naṗa Ninuna Wa naga pisa suri na pe lelaga paṗisi ne, nanua sumo, naga pisa visena tai pa repita lala, naṗa Navisawalena Aisea naga pisawal pan la. Naga pisa, pisape

²⁶ *‘Ovanon kieta yeririna la nene, ovisawal van la sanini, ovisave “Pisi na aloge vano vano-o, ana taṗatete aloge kilale pogos tai, ṗisi na avisu vano vano-o, ana taṗatete avisu kilale pogos tai,*

²⁷ *komin naṗa amiu na sa ga yaru la naṗa kiela sitomena lala marmare, sa naṗa aposino pulkiligala, a sane la aṗelawa ṗisi rui. Visae la ve akila re ve sanene, vera na kilamarala lala kilia visu kilalea, a kiligala lala kilia loge kilalea, a kiela sitomena kilia sitom kilalea, ana ve sanene la akilia avilon la aimi pun inu vena nekilia netamalia la.”*

Ais 6:9,10

²⁸⁻²⁹ A nanagane, nevisa van amiu, nevisave monar akilia sane natamaliaena kiena ne Ntewa nene naga molue rui pano pa tol la naṗa pe ape Yu re poli, ana la asum̃a amloge ke ne a ṗisi na la ke narui la alogearia!”

Ana pogos naṗa Pol pisa maron kiena visena nene pan la, la apiṗa, naṗa la

asum̃a apeveyun la ga narui.

³⁰ Ana Pol sike e yo nene sanene pano-o tol kas lua, a naga ga pul m̃ana yum̃a, naga ga sum̃a pisuar naga. A yaru ai naṗa pimi pisuia, ana kekaran ga naṗa were va um̃a m̃ana,

³¹ ana sanene, naga sum̃a mlologon ke nasuṗenena kiena ne Ntewa silaga pa yaru la punu ga naṗa naga m̃al la. A naga sum̃a pian ke Suṗe Yesu Kristo pan la, naṗa pe yaru tai pisi re si pan vanon poli, pona pisaluṗar naga pisape naga ve kila re sina.

**Maki Naña Pol Siria
Pa Pan Li Nalelagaena Wa
Lala Nae Garu
ROM
Visayuena Na Tusi Nene**

Kom̃pasnen suniena plas na tusi nini

Pol siri m̃aki nini vena kila ruruen kiena mrapa, naña sinenan sape va visu li nalelagaena lala gar Rom. E kiena sitomiena, naga sinenan sape yum̃ae re yam ve plas ga amio li nalelagaena la nae yo nene, vena siraunia aiila naga naña sinenan sape yalen silau va garu Spen. Pol kilia ruru naña visae yaru lelaga e Yesu Kristo, a imi ve yaru kiena Yesu naña taveve kiena ðelaga e kiena maliena, yaru nene yoko ve yaru mesmesu e marana Ntewa. Ana komin suri ne na nene, naga siri m̃aki nene vena visawlaen ðelaga na lelagaena naña po van li nalelagaena lala gar Rom. Tusi nini puara purþesnen sitomiena kiena Pol e mrapa la naña yaru kilia lelaga e Kristo.

Sumo, naga pisa pokolemalo pan li na sum̃are lala nae Rom, a pisawal panla sape naga sum̃a mlotu wola. Ana sir- aunia, pisawal si purþesnen sitomiena na m̃aki nini, naña pisape “Lologena wo nene naga sum̃a kilologia ke ðelaga lala naña yaru kilia imi mesmesu e marana Ntewa. Siar e purþesia va tol luwasia, ðelaga nena m̃alivi ke e ita kom ga e lelagaena.” (1:17)

E tusi nini, Pol pisayu ruru va moki kiena purþesnen sitomiena. Naga sape yaru make ga, pe suri korena ga naña visae ape lus nae Israel pona pe ape lus nae re Israel poli, ana ita punuga maran taaga, tesike vatanon m̃areraena na milamulena viowa.

A yaru kilia imi ve yaru mesmesu e marana Ntewa, visae naga lelaga ga e Yesu Kristo. Suri si tai, Pol pisayu maliena naña yaru sikol ruru naga amio Kristo, e malena viu naña yaru pimi mesmesu e marana Ntewa. Yaru naña lelaga e Kristo, naga pe marawo amio Ntewa, a Ninunane

Ntewa kilia visaruru kiena maliena, naña kilalua naga vetan milamulena viowa, a kila naña m̃areraena na milamulen viowa amio marena pe aþuar re si naga poli. A siari e marana na keviu 5 pa tol marana na keviu 8, Pol pisawal sanape naña Ntewa mila navisaluaena pa kiena yeririna na sumo lala, a pisawal m̃ena ðelaga naña Ninunane Ntewa sum̃a miyum̃ae ke e malena kiena yaru naña mlelaga e Yesu Kristo.

A naga pisayu m̃enaga naña lus nae Israel lala, a la naña pe ape lus nae re Israel poli, la punuga akilia asikol la e namaplarena naña Ntewa Kila vena yaru na yomarava la atavevea. Pogos naña sape visi þisi narui, naga sape ðelaga naña lus nae Israel la asum̃a apilon m̃asila pa Yesu, Ntewa naga kilia sape yoko ve sanene, ana kila naña naga sinena miyee makega yeririna na yomarava, ana pitetalia Yesu pimi, vena ita naña telelaga ea, tekilia teimi mesmesu e marana Ntewa. A Pol mlelaga sape lus nae Israel lala, yoko la na taþatete avilon masilia va Yesu silaga, monar avilopu la yam tai.

Pito e luwasnen m̃aki nini, Pol pisayu ðelaga naña li nalelagaena la monar atavevea e kiela maliena lala, a metavan m̃ena nanene pisayu ðelaga naña ita monar sineta si yaru taþena lala. Pisayu ðelaga naña yaru tavevea e yum̃aena kiena Ntewa, a ðelaga naña li nalelagaena la monar akila van þarin suþe lala na purvanua, pona va yerkawa taþena lala. A naga pisayu ðelaga naña li nalelagaena la monar asitom rurua vena re akila kare re sitomena kiena yaru taþena. E luwasnen kiena m̃aki, naga amio kiena erau lala apisa kiela visena na potena pan kiela erau taþena lala garu Rom, a kiena visena maro, pisawal visena tai na yeluaren Ntewa.

Kom̃pasnen tusi la na nini

Visena þesa amio purþesnen sitomiena
na m̃aki 1:1-17

Yaru makega monar awar malena viu
naña Ntewa kian pimi 1:18—3:20

Mrapa kiena Ntewa na tamaliaen yaru
3:21—4:25
Maliena viu kiena yaru naþa sikol naga
amio Kristo 5:1—8:39
Namaplarena kiena Ntewa pa kiena lus
nae Israel lala 9:1—11:36
Pelaga wo naþa li nalelagaena la monar
ataveveia 12:1—15:13
Visena maro 15:14—16:27

Visen þesia

¹ Erau nae Rom lala:

Inu Pol nevisa pokolulagi pona pokole-
malo van amiu e kia kiena Yesu Kristo,
naþa in na nepe kiena yar na yuþaena,
in na nepe nalologena ke naþa Ntewa
pio inun narui, mligan lua inu vena
neyuþaen navisawalen kiena lologena
wo viu nene.

² Lologena wo nene, naga sike loyuþa
e visena lala na Nasiriena Wa kiena
ne Ntewa rui, nane e visawalena lala
naþa kiena navisawalena lala apisawal
na konua konua rui pimi.

³ Pupia sur naþa lologena viu nene
pisawalia, nane Yesu Kristo kieta Suþe,
naþa pe narina ne Ntewa naþa mligan
naga pimi malivin ita e yomarava nini.
Naga ke narui naþa e lepas na mratava
puna, tekilia tevisave naga molue nenaga
e lus kiena ne yermarua Þarin Suþe Tepet.

⁴ Ana e lepas na ninuna, naga pe wa
paþisi, naga molue ruru nenaga kome lus
kiena ne Ntewa. Aþeþar naga mare,
ana e kiena pupia mareraena, Ntewa kila
naga mal ruru sina ga. Ana tekilia tevisu
kilale ruru tesape lelaga, kieta Suþe nene
naga pe narina ne Ntewa kemua lelaga.

⁵ Naga ke narui naga pisirlua inu nepe
nalologena, a mligan lua inu vena nevano
e þegas nen yeririna taþena la naþa pe
ape Yu re poli, vena la mena ga akilia
alelaga e Ntewa, vena akilia alogear kiena
visena. Yuþaena na sanene naga pe
nalaena wo tai naþa Suþe mla pan inu,
ana nekekarana nakilaena vena kiena kia
va metava.

⁶ A nagane, nesuþa nekila ke yuþaena
nene e amiu, komin naþa amiu mena
kiamiu kia sike loyuþa e, amiu mena

amio li taþena la nene naþa Ntewa pio la,
vena aim ave yeririna kiena Yesu Kristo.

⁷ Amiu yeririna mena la naþa naga
sinen si amiu paþisi, naþa naga pisir-
lua amiu ape kiena li nalelagaena wa
lala e pupia pulkumali naþa Rom, nane
nekekarana manene narui nesiri maki nini
piþasu pan amiu.

Nesiri sanene, nemlen nesape
lemamiena a nasinesiena kiena ne
Arimata Ntewa amio kieta Suþe Yesu
Kristo, pimi keviu e kiamiu malena la
peve taaga.

Pol sitom manene paþisi vena va malivin la gar Rom

⁸ Sumon naþa nevisawal sur laþas van
amiu, nemlen e kia kiena ne Yesu Kristo,
nepisa potena keviu pan kieta Ntewa
vanon amiu. Nesape nekila ve sanene,
komin nanagane, visena e lepas na ki-
amiu þelaga wo na suþalun mareraena e
lelagaena e Kristo, naga suþa pa mlewo
make yo moki narui.

⁹ Sur nene kila nekekarana paþisi,
komin naþa nemiyuþaena kiena ne Ntewa
nakonua rui nemio kiau malena wetelu,
nemiyuþaena visawalen lologena wo
naþa pisayu narina. A naga kilia ma
naþa nesuþa nesitoþal amiu silaga e
kiau leniena,

¹⁰ a nesuþa nepiun ke mena tania
nesape visae mesmes ga e kiena nasine-
nanena, yoko naga kila kiau mrapa vena
nekilia neim noþalivin amiu.

¹¹ Sineun manene naþa neim nevisu
amiu vaþisi, a visae nekilia neim nelipere
re nalaena kiena Ninuna Wa vena kila
amiu aþarera laa sane, vera na wo vaþisi.

¹² Nemlelaga nesape kiau viawaena
kilia iilar amiu, a sineun neimi vena
kiamiu viawaena kilia iila inu mena ga,
a visae sanene ita tesuþa temiila ruru ita
ke sina ga.

¹³ Erau lala, sineun nesape akilia naþa
sane yam mok liu, noþion viþasen pun
amiu paþisi, ana silaga mrapa pe po re
poli komin sur laþas suwo ga yo, kila
narui pe nepiþas re poli wa. Ana sineun
iþasen paþisi, vena kiau yuþaena kilia
war mrasa e amiu naþa amlalaga rui, sa

naþa þar mras rui e la naþa pe ape Yu re poli e yo taþena lala.

¹⁴ Yumãena naþa sike e lumãau naga sanini, sane monar nelologo nenaga van ita, ita le Yu lala, a van m̃ena yeririna taþena lala, a monar nelologo van la naþa akilia suria a la m̃ena naþa pe akilia re sur poli,

¹⁵ nane kila narui sineun neim nevisawal lologena wo van amiu e kiamiu pupia pulkumali naþa Rom.

¹⁶ Lologena wo nene, nane mrapa taaga ga naþa namãreraena kiena ne Ntewa miyumãae ea vena la tamaliaena van yaru, kila sane silaga pe nemawan re visawalen poli. Lologena wo nene pimi m̃aliv þesan pun ita le Yu lala, siraunia mlewo palilue pun la naþa pe ape Yu re poli, ana yar ai naþa lelaga, yoko lual malena ea.

¹⁷ Lologena wo nene naga pe kieta mrapa na kilaen naþa teim temesmesu sina e marana Ntewa, vena ve tetol re si nakoena vanon kieta mlamulena viowa lala, ana popon tekilia sane monar tesiar amio naviawaena, a yoko toþisin amio naviawaena, komin naþa sane visena marua tai kiena ne navisawalena Aþakuk pisa, pisape

“Yaru naþa visae wasine ga Ntewa, yoko Ntewa kila naga imi mesmes ruru nenaga, nane mrapa nenaga nene vena tolen malena.”

¹⁸ Mrapa na tolen malena tomã ga, ana þarmãrera a napiowaena pule manene laa likan yeririna la naþa pe ape Yu re poli e yomarava nini, kila sane asuwo manene visena lelaga lala kiena ne Ntewa, ana sanene tepisu naþa Ntewa sike ma e peni, kiena sinemimiena monar imi m̃alivi kilapel la nenaga.

¹⁹ Naga sumã þi plan ke kiena þelaga wo lala pimi m̃alivi e yometava e maran yeririna la rui, ana popon avisu kilalea, ana pe sinelan re kiliaena poli.

²⁰ Lelaga sane Ntewa naga pe pe yar re poli, ana yar taþatete visuia, ana siar e nasiiena yomarava nini pimi tol nagane, yar la asumã apisu ke kiena þelaga wo lala, ana akilia apisu kilale asape naga pe Ntewa kemua lelaga. Visae avisu ga kiena

nasiiena lala vera na taþatete si aviun avisave amã naga ai.

²¹ Visae peraga, akilia asape Ntewa sumã ga, ana pe akilali re naþa sinelan akila kiela sitomena su vatanon poli, pe akilali re naþa sinelan visaen potena van poli vanon kiena nawoena la pan la. La pe asitom re sur ta poli, pano pano-o kiela sitomena lala pulen make ga yemalolo.

²² Asitom ke asape ape manmarua, ana apa ape wowe make la,

²³ a pe amlotun re si Ntewa naþa taþatete si mare pogos tai poli. Yepel mavin ga naga, ana amiyumãen ga nono la naþa aþar maran yaru pona maran manu pona maran sur mal la ne sane nopi lala pona ya, ana asitom ke asape alotun ga sur la ne sanene narui.

²⁴ Pogos naþa akila sanene, Ntewa sinen maren kiela þarmãrera la nene, ana mligan la vena asumã akilakila ga napiowaena ya naþa la sinelania. E pogos nena nene narui tevisu naþa yar la asumã akila þelaga na mawaena lala e tasnela,

²⁵ a monar ve sanene, komin akovenlua visena lelaga kiena ne Ntewa, amligan visokanena kus lelana, a pe amlotu re si Ntewa naþa popon ayeluar kiena kia wa silaga, ana apatanon ga sur la naþa naga sii la.

²⁶ Apilopu kare suri make sanene, ana Ntewa pe pialuþar la re si poli, ana tamãan la apa akila þarila amio kiela nasinenanena viowa lala. Sa naþa sira lala pe apa re si amio yerm̃ene poli, ana apa amio ke sina ga sira,

²⁷ a yerm̃ene m̃ena lala pe asitom re si asape popon atalopa amio sira poli, sa naþa Ntewa pisa pisape popon akila, ana la asumã sinelan ga yaru, asumã apa amio la ke sina ga e þelaga naþa temawan visayuena. Yumãena la ne sanene pe mesmes re nena poli, a la naþa asumã akilakila ke sanene, yoko e kiela malena lala, alual ga nakoena la naþa torokin yar naþa kila sanene monar kusia.

²⁸ Yar sur la ne sanene, pe asitom re Ntewa poli e kiela malena lala, pe sinelan re m̃ena kiliaena poli, ana Ntewa pe

pisaluþar la re poli, ana mligan la vena kiela sitomen viowa lala were la ava nena e þelaga viowa lala.

²⁹ Akila m̃a sanene pano-o opisu kiela malena pimi pulen þelaga na kilaroen navisaluaena, amio napiowaena lala, navinayaena, amio sitomen viowa lala na kila kareen yar taþena. Amloi, am̃emom̃ar yar lala, apeveyun la, apisokani, sinela kar yar taþena lala, asum̃a apisasayu la,

³⁰ apisatam̃ela, a e leþas kiena ne Ntewa, la pe sinelan re nena ga. A amio þelaga viowa la nene, ape þarm̃arera paþisi, aþarwar la, apis vilave, amaplar na kilaen sur viu viowa lala naþa nanua sumo na peraga, a pogos naþa kiela yermarua la apis pan la, pe sinelan re nena loge laen poli.

³¹ Yar la nene tekilia tevisave la pe ape manmarua re poli, pe apuarar ruru re kiela navisaarena poli, pe ape lemam re poli, pe kiela nasineyeena re nena poli.

³² Akilia ruru visena kiena ne Ntewa, akilia m̃a naþa Ntewa pisaar marena pa yeririna la ne sanene rui, ana pe asitom re nena ga. Asum̃a akila luen ga sanene, a metavania, akekaran manene paþisi naþa visae avisu kiela erau taþena la asum̃a akila ke viowa sanene amio la.

2

Ntewa naga taaga liþere yaru lala

¹ Sanene, visae ko na yere Yu tai naþa osuṃa opisu ke napiowaena kiena yaru taþena la nene, yoko ositom ve sanape? Pona ositom osape ko na opo, la apiowa ga, ana peraga, napiowaena naþa teke e ko maran taaga, ana taþatete si ovisa sur tai. Ko ope yar na liþereen yar taþena lala, ana osuṃa omliþere ko ke ga ne, komin osuṃa okila ke sur torokin ke naþa omliþere la vanonia.

² Ana sane tekilia m̃aga, yoko Ntewa la nakoena va la make naþa akila piowa sanene maran ve taaga.

³ Pona ko tai naþa ositom ke osape ko na opo yo, komin naþa opis ke pa yar na kilaroen navisaluaena, ana ko m̃ena ga

osum̃a okilarovia, ana pe pon re ositom ovisave yoko nakoena naþa Ntewa lavia taþatete tol ko.

⁴ Pona ositom ke osape Ntewa pe lemam paþisi yo, naga sinen miye yaru, pona kiena sitomena piavi, nane ositom ke osape taþatete kila sur tai van ko yo? Ee, Ntewa po paþisi sane osuṃa opisa ke ne, ana kiena lemamiena pe tam̃an ko re naþa osuṃa okilaroro navisaluaena poli, ana vena were koena ovilon ko vetan mlamulena viowa naþa osike ea.

⁵ Ana ko na pe otam̃an re nena naþa ovilon ko poli, okila luen ga þar m̃arera pa m̃aga, ana sanene osuṃa okila naþa omiunpolo ke kiom̃a nakoena lala vano tol pogos naþa yoko sinemimiena kiena ne Ntewa liþere nena yar lala.

⁶ E pogos nene narui yoko naga vion plan van yar lala toroki taveve sa naþa la asum̃a akila ke ne.

⁷ Sane yeririna la þasa, apa rurula ga, asum̃a akilakila ke ga þelaga wo la silaga vena kiela kia la wo e marana Ntewa, akilia kila naþa atol naurarena nae peni. Ya naþa Ntewa la van la, naga malena naþa ve uro re.

⁸ Ana la þasa, ape yar na veveyuena, pe amlelaga re e visena lelaga po, asike ga vatanon m̃areraena viowa. Ya naþa yoko Ntewa la van la, naga nalipereena naþa molue e pupia kiena nasinemimiena ga.

⁹ Yoko pogos m̃arera amio naloge viowaena imi tol make yeririna la naþa akila ke piowa, siar e la naþa Ntewa pisir plan la þesania, nane le Yu lala, va tol yar taþena la naþa pe ape le Yu re poli.

¹⁰ A la naþa kiela malena po, yoko atol navisa ruruena kiena ne Ntewa, yoko kiela kia su ruru amio naga, kiena sum̃are sike amio la. A naga m̃ena nene siar e le Yu lala, va tol yar la naþa pe ape Yu re poli,

¹¹ komin Ntewa naga pe pisuveve re sane yar tai pe taþena poli, ana naga kila po maran taaga pan la.

¹² Le Yu la asike vatanon navisaluaena rui naþa Ntewa mla pan la, ana visae akilaro navisaluaena nene, yoko Ntewa la

nakoena van la. A yar la naþa pe ape Yu re poli, pe atol re navisaluaena nene poli, pona pe akilia re ya naþa navisaluaena nene pisa poli yo, ana visae akila viowa, yoko la akovio. Sanene, mlamulena viowa sike e ita punu ga maran taaga, ana yoko Ntewa monar liþere make ita ga.

¹³ Yar la naþa amesmesu e marana Ntewa, pe la re naþa akilia ga ya naþa navisaluaena pisa poli, ana la naþa Ntewa kekaran sape were la, naga la naþa kiela malena taveve ruru ke ya naþa navisaluaena pisa narui.

¹⁴ Yar laþasa pe ape le Yu re la poli, amninue navisaluaena kiena ne Ntewa, ana pe sur koren ga, kiela malena po pano-o, kiela þelaga sa ga naþa navisaluaena kiena ne Ntewa sike amio la rui.

¹⁵ La sa ga naþa ya naþa navisaluaena sumã pisa ke ne, sike e losinela rui. Sanene, pogos naþa amloge visena kar lala apisa pan la asape ova e nene pona ova e nene, ana kiela sitomena wo sumã pisawal ruru ke pan la e ya naþa po a ya naþa piowa.

¹⁶ Sa naþa lologena wo naþa nesumã nemlologonia pisa, pupia legiena naþani sumã pimi ke ne, a e pogos nene, yoko Ntewa la va Yesu Kristo vena visuveve ruru sitomena kiena yar lala, vano-o tol sur naþa amlawan ruru teke e losinela, a liþere sur la naþa akila, vano tol nena naþa asitom asape pe yar kilia re poli.

Le Yu lala amio navisaluaena kiena ne Ntewa

¹⁷ Nepisu sane popon nevis si va laa sane wa e lepas na sur la naþa ita le Yu lala tesumã tepisa. Tesumã tepisayu ke sanape naþa ita ke narui ita na tetaveve ke navisaluaena kiena ne Ntewa, tesitom ke tesape ita ke narui naþa Ntewa sinenan ita pa laa sane wa, ana kila narui kieta sitomena la pa manene laa metava.

¹⁸ Tepisa ke tesape tesukul ruru po e navisaluaena kiena ne Ntewa, kila narui tesitom tesape ita ga tekilia ruru Ntewa amio kiena nasinenanena, ita ga tekilia ruru sur la naþa lelaga pona naþa mesmesu napo.

¹⁹ Ita tesumã tepisa ke tesape ita le Yu ga lala topon naþa tesumon la naþa pe

ape Yu re poli, komin naþa tepisape la ape kilamara þala naþa pe akilia re mrapa poli. Tomãape ita ga tepe yomerarava kien la naþa asike e yemalolo,

²⁰ ita ga topon naþa takawe ruru yaru naþa kila pal mrapa, ita ga tetorokin naþa tevidan ruru la naþa asa ga sisi lala, pe akilia re sur poli.

Ana sineun nesape nevis re e lepas nene, sane pogaga naþa tepisu kilale sane navisaluaena kiena ne Ntewa pulen make kiliaena wo lala a visena wo make la rui, ana piowagan ga naþa tesumã tesape naga pe kieta ga.

²¹ A sur si tai naþa piowa manenea metavan nene, tomãreran vianen yar taþena lala, ana nepisu sane pe tepian ruru ita re si poli. Visae ologon naþa ovisave yar ve vinau re sina, ana popon naþa ko na osumã ovinau mãaga?

²² Ko naþa opian ke yaru osape monar ve akila re kolau, komin ya ne ko mēna okila? A ko naþa opisa ke osape nono la naþa la amiyumãenia, apiowa ga, opisa tanea, ana ko mēna ga, pona osumã opinaun ke sur la ne pe kol naþa amligan sike e kiela lele wa lala, a?

²³ E lele nene monar tevisave piowa paþisi wa, komin ita la naþa toþarwar ita vanon naþa toþar Navisaluaena kiena ne Ntewa, ana tesumã tekila kare ke sina kia wa kiena kieta Ntewa ne, komin naþa tesumã tekilaroro ke kiena navisaluaena la nene.

²⁴ Visena Wa pisayu ke kieta þelaga nene rui, pisa sanini sape

“Amiu yeririna lala kiena ne Ntewa, ki-amiu navisokanena kila sane yar taþena lala asumã apisa kare ke kiena kia.”

Yaru naþa pe yere Yu kemua lelaga

²⁵ Ko osape ope þaviu rui, ana ope Yu kemua lelaga, nanene na po paþisi. Ana sur nene miila ko visae ologear ga navisaluaena kiena ne Ntewa. Ana visae okilarovia, ko ope Yu korena ga, ko opiowa pa Ntewa sa ga la naþa pe ape þaviu re poli.

²⁶ Ana pona yaru tai pe sa re le Yu la naþa ape þaviu poli yo, naga pe pe þaviu

re poli, ana visae yar nene logear ruru Navisaluaena lala, e navisuena kiena ne Ntewa naga imi torokin ga yere Yu narui.

²⁷ Yere Yu naga pe p̄aviu rui a mla ke navisaluaena, ana visae pe mlogear re poli, monar visuar ruruia, visae peraga, yoko Ntewa kovenlua naga, a were taḡena naḡa pe pe p̄aviu re poli ana mlogear kiena navisaluaena.

²⁸ Nanene komin e navisuena kiena ne Ntewa, naga naḡa pe yere Yu kemua lelaga, pe naga re ga naḡa pe Yu e kulus poli. Ana p̄aviu naḡa Ntewa pisu sane lelaga napo, pe naḡa re ga e tas nen yar vanua poli.

²⁹ Yar naḡa pe yeririna kiena ne Ntewa lelaga, pe naga re ga naḡa p̄uarar nasiriena wa e limana poli, ana naga yaru naḡa Ninuna Wa miyuḡae ke e losinena, naḡa kiena malena pilonia pimi po. Yar na sanene, pona yeririna la asitom ke asape naga pe pe yar re tai nene poli yo, ana Ntewa kekaran naga paḡisi.

3

Sur wo naḡa sike e le Yu lala

¹ Nepis ke sanene, pona naviunena tai ḡalivi yo, viun sanini, visave “Visae yere Yu maran ve taaga ga amio yar taḡena lala, sa naḡa osumḡa opisa ke ne, komin ya ne kia naḡa Yu naga po, a tesitom ke tesape ita na tepe sur tai? Naḡa tekila p̄aviu e ita, vena teim teve le Yu kemua lelaga, ana pona pe sur koren ga yo?”

² Naviunena nene mesmes ga, ana nevisataḡea nesape, Peraga, toḡar kia na Yu, naga pe pupia sur wa tai naḡa po manene laa pan ita. Lus kiena yeririna ai sina naḡa Ntewa mligan kiena visena wa sike e limala? Pe yar taḡena kar re la poli, ana ita le Yu ga lala.

³ Pe lelaga naḡa kieta yeririna la p̄asa pe amlogear re visena kiena ne Ntewa nene poli, ana naviunena sike na sape: Sanape, pona yoko Ntewa ve visa ruru ita re sina sa naḡa naga pisaaria sape yoko kila? Ana pe sa re nene poli. Pe sur koren ga naḡa laḡas pe apuarar ruru re visena kiena ne Ntewa poli, ana pe Ntewa purmatan li re kiena navisaaren e ita pogos tai poli wa.

⁴ Pona ita yeririna lala ita tepisokan lue ga, ana Ntewa naga pe lelaga lue ga, sa naḡa Parin Suḡe Tepet pisa e kiena Tus na Yauena lala, naḡa pisa sape

“Yoko avisu naḡa ko ope lelaga kemua e kiomḡa visena lala vena liḡerelaena, a yoko sinelan liḡere koena sina ga, ana ko na omesmesu ga na osike ne.”
Yauena 51:4

⁵ Kieta napiowaena lala apioyowa ga, ana sur tai naḡa po towe laa ga, napiowaena la nene akila merarava e maran yeririna lala asape navisaluaena kiena ne Ntewa la naḡa apisalup̄ar ke napiowaena la nene, apo na apo. Nepisa sanene, pona visae yoko yar laḡas naḡa p̄arila pe wowe asuḡalu avisave “Visae kieta napiowaena la akila sur wo nene, komin ya ne Ntewa sinena kar ita sape la si nakoena van itania?” Ana peraga, nanene sitomena kiena yaru ga,

⁶ pe sa re nena nene poli! Visae Ntewa ve liḡere ita re le Yu lala, ana pe pon re naga liḡere li taḡena la naḡa pe ape Yu re poli, ana peraga, naga mesmesu nena ga, a naga taaga torokin liḡereena.

⁷ Naviunena si tai ve sa nene kilia vim, naḡa pisa sanini, sape “Nanua sumo nesape nemlelaga e Ntewa, ana siraunia pe nemlogear re poli, ana sa naḡa nesuḡa nepisokan ga. Ana kiau visokanena nene suḡa pisawal ke sape visena kiena ne Ntewa ga pe lelaga paḡisi, a sanene na suḡa kila kiena kia pa metava. Ana visae ve sanene, komin ya ne naga sinena sape liḡere in ke na wa, sape in na nepiowa ga?”

⁸ A p̄isi na yar la p̄asa avilon visena la ne sanene va ve taḡena laa na wa, avisave “Visae p̄elaga viowa visawal visave visena kiena ne Ntewa pe lelaga, popon tesuḡa tekilakila ḡa mlamulena viowa la ve moki silaga, vena kilaen visena kiena ne Ntewa ve lelaga laa sane.” Laḡas apisape nesuḡa nemlologon ke sanene, ana naga nene na visokanena ga, a la naḡa asuḡa apisa, yoko akus naliḡereena torokin kiela visen viowa la nene.

⁹ Nesape nowasuḡe in sina e sur naḡa tepisayu ke p̄a rui, tesape yar na p̄ar kia

na Yu, yoko ve sanapenia? Pona yar laŕasa, naviunena sike e la yo sape yoko wo vaŕisi vania taulu yar naŕa pe ŕar re kia nene poli, pona peraga? Pogaga, kiau navisatameena nesape ve sa re nene poli. Sa naŕa nepisa ŕa rui, le Yu amio le Kris lala, la make ga asike vatanon m̄areraena na mlamulen viowa maran taaga.

¹⁰ A sane visena na Tus Wa pisape
“Pe yar re nena tai naŕa kiena malena po poli.

¹¹ *Peraga, pe yar re nena tai naŕa pisu kilale mrapa poli,
 pe yar re nena tai naŕa sum̄a kilali ke sape lual Ntewa e kiena malena poli.*

¹² *Yeririna make ga apilipal ga mrapa naŕa mesmesu, apa apiowa manene laa.
 Pe tai re nena naŕa miyumāe po poli.
 Yauena 14:1-3*

¹³ *Kiela visena piowa ga, sa ga yar mare naŕa kona rui,
 purmenela sum̄a miyumāen ke ga visokanena,
 navisa kareena la naŕa sum̄a m̄alivi ke e kulugola lala, sa naŕa lom̄ara viowa karm̄ar yaru.
 Yauena 5:9*

¹⁴ *Lelaga ŕa, gola lala pulen ga viaiena amio visen melkalka lala.
 Yauena 10:7*

¹⁵ *Lala lala sum̄a ŕar la akirkirir kar ga la ne vena kilaen kuruta lau,*

¹⁶ *kiela yalorena lala apa akila kare make suria, akila yaru la amloge piowa.*

¹⁷ *Pe asitom re asape mrapa na sum̄are tai sike poli,
 Ais 59:7,8*

¹⁸ *pe apisu kilale re nena asape Ntewa sum̄a pisu la ke poli.”
 Yauena 36:1*

¹⁹ Ee, visen la nene amolue kome Navisaluaena kiena ne Ntewa, a tekilia tevisave ya naŕa Navisaluaena kiena ne Ntewa pisa ke ne, kiar ita ga le Yu lala. Ita tesike vatanon Navisaluaena nene, a yar naŕa pisu kilale ya naŕa navisaluaena nene pisa, naga pe kiena visena na visaen re si po, naga kilia sape yomarava wetelu kilarovia, yar make ga akus nakoena vanonia.

²⁰ Pe yar re tai naŕa logear Navisaluaena kiena ne Ntewa torokin vena naga

kilia mesmesu e marana, ana Navisaluaena nene kila sane yar make ga akilia rurua asape mlamulena viowa sike e la.

²¹ Ve sa nene, mrapa na logear visaluaena, yar la taŕatete atayu nena aimi amesmesu e marana Ntewa, a nane kila sane Ntewa pisu popon kila ruru mrapa viu taŕena tai naŕa tekilia tetavevea.

Mrapa viu nena naga po paŕisi, komin pe kana navisaluaen re la naŕa yar monar logear la poli. Mrapa nena, nasiriena marua wa lala amio visena kiena ne navisawalena lala, apisawal m̄a ve torokak nanua sumo rui, ana nagane Ntewa kilologia pan ita rui.

²² A mrapa nena naga sanini: pe mrapa nalelagaena. Sanene, yar ai naŕa viawa e Yesu Kristo, yoko Ntewa kila naga imi wo e marana. Mrapa nena pe kiena yar re ga laŕas poli, ana pe kien yaru make ga,

²³ komin yar make ga amlamla piowa, pe ta re poli naŕa kiena malena mesmesu va torokin naŕa tol malena wo naŕa Ntewa sinenania.

²⁴ Ana pogaga, komin Yesu Kristo pul lua ita rui, kila naŕa Ntewa kila ita tepim temesmesu e marana, sane kiena nalaena tai pan ita, naŕa mlavia pimi ga kome kiena lemamiena.

²⁵ Naga pul plan ita komin naŕa Ntewa pisirlua naga sane kuŕaŕaena tai naŕa kana kuruta mlau kee plan kieta mlamulen viowa ita la naŕa temlelaga ea.

Ana sanapen yeririna la naŕa siar e kas la nakonua rui pimi, pogos naŕa Yesu pe pimi re poli wa? Pe tepisu re naŕa Ntewa mla nakoena pan la vanon amlamla piowa poli, pona sitomena tai sape pona Ntewa mla ga nakoena pan mlamulen viowa kien yar laŕas yo, ana yar laŕasa pe mla re nakoena pan kiela mlamulena viowa la poli. Ana peraga, naga pe sa re nene poli. Nakonua manenea, Ntewa kila ke ga kiena sitomena piavi, sum̄a piro ke ga kiena sinekar, a kila m̄a sanene pano-o tol pogos naŕa Yesu maren m̄ena mlamulena viowa kien la na sumo.

²⁶ Sanene Ntewa pisawal meraravan pan ita nagane narui sape naga miyumāe

po silaga, kila sane yar ai naþa viawa ga e Yesu, yoko ekik ruru nena e marana.

²⁷ Visae sanene, yoko tekilia towarwar ita komin si ya ne? Pe sur re si ta poli, komin ya ne kila ita si tepim topo temio Ntewa? Pe þelaga wo re na tai nalogearen kiena navisaluaena poli naþa tesitom ke tesape tekila yo, ana peraga, kana purþesa, kieta lelagaena ga e Yesu.

²⁸ Kiamimi lologena pisa sanene narui, sape visae yar imi mesmesu e marana Ntewa, naga wasine ga kiena naviawaena e Yesu. Taþatete wasine kiena yuþaena wo la naþa naga mlogear ruru navisaluaena make ga kiena le Yu silaga, komin naþa taþatete yaru tai kila ve sanene.

²⁹ Sanene, tepisu sa naþa Ntewa pe pe Ntewa kiena ne re ga ita le Yu la poli, ana pe Ntewa kiena ne mþena li taþena lala.

³⁰ Ee, Ntewa naga taaga ga, ana pe kien yar make ga, ana visae yere Yu, naga kilia imi mesmesu e marana Ntewa visae viawa ga e naga, pona visae yar naþa pe pe Yu re poli, naga mþena ga kilia imi mesmesu e marana Ntewa visae viawa ga ea.

³¹ Ana visena la nene pe pisa re sape þelaga na lelagaena kiena Yesu kovenlua navisaluaena kiena ne Ntewa naþa sike ne poli, sape pe kiena yuþaena na kilaen re si poli. Pe sa re nene poli, ana kana kinasa sane pogos naþa tesuþa temlelaga ke e Yesu, tesuþa tepatanon ruru ke e sur la naþa navisaluaena pisa, tekila ke naþa ape lelaga.

4

Epraam tepo yomþarua na vianen mrapa na viawaena van ita

¹ Tesuþa tepisayu ke sane þelaga na lelagaen e Kristo naga pe mrapa na tolen natamaliaena, ana sanapen kata apua la nanua sumo, sane pupia apua na kieta lus naþa yermarua Epraam?

² Naga kila yuþaena la moki naþa Ntewa kekarania, ana yuþaena la nene taþatete kila naga mesmesu e marana Ntewa. Visae naga imi mesmes komin

kiena yuþaena lala, pona naga kilia warwar si e yo, ana pe sa re nene poli. Pe yar re tai naþa kilia warwar e marana Ntewa vanon yuþaena la naþa naga kila,

³ ana naviawaena ga kilia kila yaru mesmesu amio Ntewa, sa naþa suniena kiena Epraam pisayu e Tusi na Siiena, naþa sape

“Epraam naga piawa mþarera paþisi e navisaarena kiena ne Ntewa, ana Ntewa kekarania, mla viawaena nene kiena Epraam, kila narui pimi mesmesu e marana.” Nas 15:6

⁴ Ositomlia, sane yar naþa miyuþaen kilavaru, pogos naþa kupario þisi monar waria ve kiena. Ana ve tevisa re tevisave kilavaru nene naga pe nalaena tai naþa kiena yerkaewa mla pania molue kome kiena sitomena, ana kilavaru nene, yar na yuþaena nene, þiyon paþisi naþa, ana popon kemua naga waria ve kiena.

⁵ Ana lepas naþa yaru imi mesmesu e marana Ntewa, naga pe pe sur re tai naþa teyuþaen vanon poli, naþa tekilia towaria sane sur tai naþa ita ga tetauluia ve kieta. Ita, kieta yuþaena la piyowa ga, ana monar towasine ga Ntewa, naþa naga ga kilia war plan napiowaena e kieta malena. Visae towasine ga naga, ana yoko kila ita temesmesu e marana.

⁶ Yermarua Þarin Suþe Tepet kilia sur nene nanua rui, ana kiena yauena tai pisayu sanapen naþa yoko wo vaþisi van yar naþa pe þasine re ke sina ga kiena yuþaena poli, ana þasine ga Ntewa sape yoko naga kekara naþa kila naga mesmesu e marana. Yauena nena pisa sanini, sape

⁷ *“Yar naþa Ntewa piwo kiena napiowaena lala, naþa yumu plan kiena mlamulen viowa, na nene navisa ruruena tai naþa yoko wo van vaþisi.*

⁸ *Yar naþa Ntewa pisu naga sane pe namname tai to re si e poli, naþa monar war nakoanania, naga yoko kilia loge wo na loge wo.” Yauena 32:1,2*

⁹ Ana la naþa akilia aloge wo sa naþa yauena nene pisape, a la nene? Navisa

ruruena nene, yoko tařatete imi ga va řaviu lala, sa nařa ita le Yu ga lala, ana yoko imi mēna va la nařa pe ape řaviu re poli, na nene naga merarava ruru po pařisi, komin sa nařa tepisape, Epraam pimi mesmesu e marana Ntewa, pe komin re nařa naga pe řaviu poli, ana pimi mesmesu e marana Ntewa komin ga nařa mlelaga mārera ea.

¹⁰ Ana tekilia sur nene sanape? A Ntewa sape Epraam mesmesu e marana na pogwai? Naga pisa e pogos nařa Epraam pe řaviu pa rui, pona pisa e pogos nařa pe pe řaviu re poli wa? Visae teva si e kiena suniena, yoko tevisu nařa Ntewa pisape Epraam mesmesu e marana pogos nařa naga pe pe řaviu re poli wa.

¹¹ Sanene, viawaena kiena Epraam e Ntewa, naga ga nene kila naga mesmesu e marana. E poglis nene naga pe řaviu re poli wa, ana siraunia, Ntewa mla řaviu pania sane kile tai nařa pisawal sape viawaena ga e Ntewa nane mrapa nařa yar imi mesmesu amio naga.

Epraam naga pe yar řesa nařa sanene, ana yar moki apim sirau nařa pe ape řaviu re poli, ana amlelaga e Ntewa ana Ntewa pisu sane amesmesu e marana. La pe amolue re e lus kiena Epraam naapo poli, ana nagane apisu naga sane pe kala apua marua mēna tai,

¹² maran taaga sa ke nařa naga pe apua kan la nařa ape řaviu.

Ana nanua sumo, ita le Yu lala tesitom tesape yar nařa pe řaviu sane yermarua Epraam, lelaga kemua nařa naga ke narui naga molue kome kiena lusa. Ana nagane, sitomena tai mālivi nařa pisape yaru nařa kilia visa visave Epraam naga pe kana apua marua kemua lelaga, nanene pe yaru nařa mlelaga e Ntewa sa ke nařa Epraam mlelaga ea, pogos nařa pe pe řaviu re poli wa.

Naviawaena kiena yaru kila navisaarena kiena ne Ntewa imi ve lelaga

¹³ Nakonua konua rui Ntewa pisaar pa Epraam sape yoko kiena navisa ruruena lala amolue akome Epraam amio

kiena lusia avava vanua va va yeririna make ga na yomarava. Ana komin ya ne Ntewa kekaran sape kila kiena navisaarena nene va Epraam? Pe vanon re ga nařa Epraam mlogear ruru kiena navisaluaena poli, komin pogos nařa Ntewa kila navisaarena nene, pe navisaluaena re poli wa, pogos kiena ne Ntewa na laen navisaluaena va Mosis sike koperina wa. Sanene, tekilia tevisave naviawaena kiena Epraam ga kila naga mesmesu e marana Ntewa, nane Ntewa kekaran nařa la navisaarena wo nene vania.

¹⁴ Visae navisaarena nene pe kiena yar ga la nařa asmāl amlogear ke navisaluaena, yoko kila sane yar nařa mlelaga, mlelaga korena ga ne, a kila sane navisaarena kiena ne Ntewa pe sunāl re si poli.

¹⁵ Suri tařena ke sina ga nini, nařa kila meraravan pan ita sape navisaarena wo kiena ne Ntewa lala tařatete aņalivi e řelaga nalogearen navisaluaena. Naga nene komin pogos nařa navisaluaena sike na, ana řelaga na kilaroen navisaluaena monar mālivi, ana siraunia monar kana nakoaena nena, komin nařa pe yaru tai tokon re kilaroen navisaluaena pogos tai poli.

¹⁶ Ve sanene, navisaluaena tařatete kilia iila ita vena tekila ruru kieta napiowaena e marana Ntewa, ana Ntewa pe lemam manene laa pan ita, ana naga ga kila. Naga pisu nařa tořasine ga naga, tevisu ga naga, ana naga kila tetol kiena navisaarena wo lala. Nanene na pe le Yu re ga la nařa navisaluaena pitomi řesan pan la poli, ana yeririna tařena mēna la asikola amio la. Yer pe lala, ana visae akus řelaga na lelagaena e Ntewa maran ve taaga sa ke nařa Epraam mlelaga ea, naga sane la mēna amolue e kiena lusa. A ita make mēna ga e řegas nen nalelagaena teliv piora e yomarava, tepisu sane naga pe pupia kata apua.

¹⁷ A nanene mesmesun ga nařa Ntewa pisaar pa Epraam nanua rui, nařa pisa pania sape

“In na nepisirlua ko, ko ope purřes nen

lus nen yeririna lala na purvanua moki.” *Nas 17:5*

Pogos naña Ntewa pisaar sanene pa Epraam, Epraam pe sinen kurkur re poli, ana p̄uarar ruruia, komin naña naga kilia sape Ntewa nena naña naga pisa visena nene pania, naga pe Ntewa naña kilia kila ya naña mare imi mali, kilia kila sur naña pe su re poli wa vim m̄alivi.

¹⁸ Pe lelaga, Ntewa pisa sur ta pania m̄arera pañisi naña naga lelaga ea, komin naña pisaar pania, sape

“Kiom̄a lus lala yoko aim ave moki na ave moki vañisi e yomarava nini.” *Nas 15:5*

Ana pogos naña Epraam mloge, mlelaga ea sape monar ve sa ga nene narui.

¹⁹ E pogos nene, naga kilia sape naga amio wona Sera, kiela mrae lalua lavis vito tano narui, naña kiena kasa lavis tol ponotia ve taaga [100], a wona pe p̄arli re sisi poli wa, ana kiena naviawaena pe mlor re nenaga.

²⁰ Naga pe sitom re nena suri ta poli, ana kiena sitomena sike ga e ya naña Ntewa pisaaria. Kiena naviawaena sum̄a pimi m̄arera laa narui, a silaga sum̄a mieluar ke Ntewa a pisa lue ga potena keviu pania vanon ya naña yoko kila.

²¹ Naga pe sitomli re pogos ta poli sape Ntewa naga pe torokin re naña yum̄ae taveve ruru kiena navisaarena poli,

²² a kiena p̄elaga na viawaena nene narui kila Visena Wa pisayu si naga, sape Epraam p̄asine ga Ntewa, ana Ntewa pi-sawal sape naga memes ruru e marana.

²³ Ana visena nene pisayu ga Epraam naga taaga,

²⁴⁻²⁵ ana popon tela sane visena tai naña pisayu ita make ga, komin ita m̄ena ga temlelaga e Ntewa tesape yoko naga kila ita teim temesmesu e marana sa naña naga kila pa Epraam. Temlelaga sane naga ke narui naña mligan Yesu pitomin vena tol marena vanon kieta mlamulen viowa lala, a temlelaga tesape Ntewa p̄ere lua ke sina ga Yesu petan marena vena kila merarava ruru van ita sa naña tekila si mara wo temio naga rui.

5

Tepe mara wo si temio Ntewa rui, tepisu sum̄are a lemamiena

¹ Pogaga, nagane merarava ruru po pan ita sane sur naña kila ita tepe mara wo sina temio Ntewa, naga kieta naviawaena e ya naña Yesu kila vena tamalia itaena. A pogos naña tepisu kilale tesape tepe mara wo temio Ntewa sanene, kila naña tepisu sum̄are sike likan ita temio naga,

² a kila naña tesu ruru ga tesike e kiena lemamiena silaga. Visae ve sanene, kieta sitomena m̄areran sape siraunia, yoko ita monar teva loyum̄a e naurarena kiena ne Ntewa, temio kekarena keviu.

³ A pe tekekaran re ga malena wo naña yoko imi sirau poli, a tekekaran m̄ena pog m̄arera la naña tesum̄a tepisu ke nagane. Pona temloge piowagan yo, ana teloge won ga komin naña tekilia tesape naloge viowaena kilia kila sitomena ve piavi vañisi,

⁴ a sitomena piavi kila p̄elaga wo va laa e marana Ntewa, a p̄elaga wo nene kila nawasineen Ntewa va laa na wa,

⁵ a nawasineen Ntewa kila tañatete kieta sitomena lorun sur tai pog tai. Nanene komin naña Ninuna Wa naña naga mla pan ita, silaga sum̄a kokonia ruru ke sinesiena kiena ne Ntewa va loyum̄a e ita vano vano-o toulén ruru nenaga.

⁶ Tekilia tesape Ntewa sinen si manene ita sanene komin naña sumo, temloru e p̄ilip̄ili ta rui naña tañatete si tekila sur tai vena tamalia ita, ana e nena e kana pogos naña pisaar pa rui, naga pitetalia Yesu pimin marewo ita yeririna viowa lala.

⁷ Ita na, pe tepisu manene li re naña yar tai kilia tam̄an kiena malena vena tamalia yar tañena poli, pona yam peve taaga yar tai kilia tam̄an kiena malena vena tamalia yar tai naña asitom asape naga po pañisi, ana sur ne nanene narui Kristo kila pan ita make ga naña ita li viowa lala.

⁸ Nasinesiena kiena ne Ntewa keviu sa ke nene narui, komin pogos naña ita yar na kilaen mlamulena viowa tekila ke p̄arm̄arera wa, Kristo pitomin mare wo itania.

⁹ Kana kuruta mlau kevan ita temekiki rui, ana tepim temesmesu e marana

Ntewa, a kila naña pe sur re si tai sike e ita poli naña yoko naga la nakoena van itania.

¹⁰ Nanua, pogos naña tepe nasinekar kiena ne Ntewa ke lala wa, marena kiena narina kila mara wo temio, a nagane, komin naña tepe erau wo temio rui, yoko malena kiena narina kila ita mña ga temal lue temio.

¹¹ Sanene, tekekaran pañisi naña Ntewa pisirlua kieta Suñe Yesu Kristo, komin naña naga kila kieta mrapa na mara wo temio, tesu si veraga temio naga.

Atam kila marena pimi, Kristo mla malena

¹² A sur lua nene marena amio malena, lalua apim e yomarava nini sanape? Yar ñes na yomarava nini nane Atam, a naga pe purñes nen mlamulen viowa, a kila naña nakoena na mlamulen viowa, sane marena, monar imi mñaliv e yomarava. A yeririna la naña asiraunia, la mña ga atol mlamulen viowa, ana marena tol la make mña ga.

¹³ Sumon pogos kiena Mosis, Ntewa pe mla re navisaluaena poli wa, ana pe sur koren ga naña pe navisaluaena re poli wa, ñelaga na mlamulena viowa sike pa rui. Sanene, Ntewa pe mliñerela re e pogos nene poli sape akilaro ke kiena navisaluaena, komin naña pogos nene, navisaluaena naga pere wa, ana kiela mlamulena viowa la narui kila sane la monar akus nakoena na marena na wa.

¹⁴ Tekilia tesape sanene, komin siar e pogos kiena Atam, pimi tol pogos kiena Mosis, pe navisaluaen re poli, ana yar la asuña amarmare mña ga, komin nakoena na mlamulen viowa sike e yomarava rui. Pona lañas akila piowa sane Atam kila yo, pona akila mña sur tañena lala, ana e navisuena kiena ne Ntewa, kiela napiowaena make la nene ape mlamulena piowa torok ga.

Sanene, tepisu ya naña yar taaga ga nene naña Atam kila, tol make malena kien yeririna na yomarava, sa ke ga naña ya ne Kristo naga taaga kila sirau, naga mña ga tol make kieta malena ita punu ga naña temlelaga.

¹⁵ A yuñena wo naña Ntewa kila naña molue kome kiena lemamiena, naga po pañisi, kilia taulu yuñena viowa naña Atam kila naña molue kome kiena mlamulen viowa. Mlamulen kiena Atam naga taaga kila yar la monar amare, ana nawoena kiena Yesu Kristo naga taaga kila tepim temesmesu e marana Ntewa. Sur nene sane nalaena wo tai naña toñar korenan ga sa ga ne.

¹⁶ Mlamulen kiena Atam pe kila re nena sur wo tai, ana nalaena nene po pan ita pañisi. Ntewa mliñere mlamulen kien yar taaga nene, pisape yoko pupia kiena nakoena va e yar make ga, ana siraunia, Ntewa pisu nalaena naña Yesu mla pan ita, naña pul plan kieta mlamulen piowa lala, ana sape temesmesu ruru e marana rui.

¹⁷ Lelaga kemua naña mlamulen kiena yar taaga ga, naña Atam, kila sane marena suña taulu ita, naña kilia war plan make malena kien yar lala. Ana yoko, lemamiena kiena si yar tañena, naña Yesu Kristo, mla nalaena wo nene pan ita nanagane, kila sane temesmesu e marana Ntewa, tetaulu marena rui, ana siraunia yoko tetol malena wo temio naga.

¹⁸ Sanene, kana kinas sane mlamulen viowa nene kiena Atam naga taaga ñere yeririna make ga apa e nakoena, ana siraunia yuñena wo mesmesu taaga ga nene kiena Yesu, kilia kila plan la make ga e nakoena nene, ana mligan la ase malena naña ve uro re.

¹⁹ Ana sa ke sina nene, yar taaga pe ñarmarera, pe miyagogon re Ntewa poli, ana kila yar make ga ape yar na kilaen mlamulena viowa, ana siraunia, yar tañena mlogear ya naña Ntewa pisa pania, ana mare e lak torovia kila narui ita moki naña tepim temesmesu e marana Ntewa.

²⁰ Nanua, Ntewa mla navisaluaena pa Mosis, a navisaluaena nena suña kilologia ke yeririna lala sape kiela mlamulen viowa la pule pañisi. Ana pogos naña mlamulena viowa la suña pimi pe moki manene lue ga, Ntewa mña ga pa laa sane, kila sane kiena lemamiena pimi

keviu manene laa.

²¹ Nanua sumo, mlamulen viowa p̄ar marena pimi, a marena nena suña kila mlamulen viowa tolue ga metava silaga. Ana siraunia, Ntewa kila kieta mrapa vena teim temesmesu e marana, ana nane kila sane nagane kiena lemamiēna taulu make suria, komin naṗa suña kila ita make ga naṗa temlelaga e kieta Suṗe Yesu Kristo, yoko tetol malena naṗa ve uro re.

6

Popon toṗisin mlamulen viowa, temal temio Kristo

¹ Sa naṗa nepisa ga na wa, ita tepe yar na kilaen mlamulen viowa lala, ana Ntewa pe lemam pan ita piewo ita, ana vanon sur nene, popon kieta malena nanagane ve sanape? Pona yaru laṗas apisape popon tesuña tekilakila mlamulen viowa ve moki yo, vena kila sane lemamiēna kiena ne Ntewa mēna ga suña imi manene laa, sa naṗa naga suña pievewo ke kieta mlamulen viowa la nene?

² Ana peraga, taṗatete nena ve sanene! Tekilia tevisave e lepas na sinenanen viowa na kilaen mlamulena viowa, ita sa ga yar mare lala, monar toṗisin nena ga, ve tekila re sina.

³ Ositomli pogos naṗa akee ita vena teve taaga temio Kristo Yesu. E poglis nene, ya naṗa m̄alivin ita naga torokin ke ya naṗa m̄alivin naga nanua rui. Sane nanua sumo naga mare wo kieta mlamulen viowa, ana nagane, pogos naṗa akee ita, kieta malena marua na mlamulena viowa mēna lala monar mare.

⁴ Sumo, amligan tasnena mēne lele na marena, ana nagane, pogos naṗa akee ita, monar teligan kieta p̄elaga na mlamulena, toṗisin ruru nena ga. A nanua mēna sumo, Ntewa kila yuñāena na iilanena nene, naṗa kila Kristo suñalu mal sina, a nanagane, pogos naṗa akee ita, tesuñal sina temialoro e malena viu tai.

⁵ Sanene, tepe taaga temio Kristo rui komin naga mligan kiena malena mare e yomarava nini, ana ita mēna ga monar teligan kieta malena marua. Ana tekiliar

ruru sane yoko teve taaga si temio ke na wa, komin naṗa naga p̄ar si kiena malena viu tai, a yoko ita mēna ga towar kieta malena viu.

⁶ A monar tesitoñal silaga, sane p̄elaga na kilaen mlamulen viowa naṗa tepaeme temio, naga sa naṗa asuar sike e lak torovia amio Kristo. Sanene, kila naṗa ve tekila re si mlamulena viowa la naṗa tasneta la sinelan kilaena, a mlamulena viowa taṗatete kilia ve suṗen kieta malena sape tepe kiena yar nayuñāena ga.

⁷ Popon toṗisin mlamulen piowa, nagane m̄areraena na sinenanen kilaena mlamulena viowa monar p̄isin ita, komin ita na sane yar mare naṗa sitomena viowa na mlamulen viowa taṗatete kila sur tai van ita.

⁸ Lelaga kemua, nanua sumo, sa naṗa temare temio Kristo rui, ana nagane, kieta lelagaena m̄arera sape yoko temal lue temio naga narui.

⁹ Tekilia tesape Ntewa kila Kristo mal si petan marena, kila sane yoko Kristo mal m̄a vano-o yoko taṗatete si mare pog tai, nam̄areraena na marena taṗatete si kilia tol naga pogos tai.

¹⁰ Kiena marena nanua ne, naga pe marena tai na war plan makeen nakoena na mlamulen viowa, a kiēna malena nagane, naga pe malena tai na visirluaen kia kiena ne Ntewa,

¹¹ a yoko monar ve sa ga nene van ita. Monar tesitoñalia tevisave ita mēna ga popon toṗisin ruru p̄elaga na mlamulen piowa, a silaga monar tevisirlua kia kiena ne Ntewa e malena viu naṗa tesike ea temio Kristo Yesu.

¹² Sanene, kiau visena urmi e lele nene sanini, sane ve atañan re kiamiu sitomena la nakilaen mlamulena viowa imi ve sa naṗa nam̄areraena m̄arera tai naṗa suña ve suṗen amiu. Visae peraga, tasnemiū lala, naṗa ape na yomarava ga nini, yoko asuñā alogear ga nasinena-nena viowa la na p̄elaga naṗa ita yeririna la tepaeme temio.

¹³ Ana sanene pe po re poli, komin lepas nen tasneta lala, pe pon re aim sane sur

na yuññaena naña napiowaena miyuññaena amio vena kilaen kiena ðelaga viowa ne lala. Sumo, ita sane yar mare lala, naña malena na Ninuna pe su re nena e ita, ana nagane Ntewa kila ita si temali, ana monar teyawawo kieta malena viu nene va si vania vena naga lavia vena kilaen kiena yuññaena. Sanene, yoko lepas nen tasneta lala apim sane sur na yuññaena naña Ntewa miyuññaena amio, vena kilaen kiena ðelaga mesmesu lala.

¹⁴ Sumo, tesike vatanon navisaluaena naña Ntewa mla pa Mosis, amio kana nakoena nena lala, ana ita toþion logearen pano-o, ana peraga, pe tetorokin re natolen kana natamaliaena poli. Sanene, Ntewa sinen miye ita a nagane sumña miila ita vena nasinenanena na kilaen mlamulen viowa taþatete nena uarar ita.

Mlamulen viowa taþatete si uarar ita, ana ita yar na yuññaena na ðelaga wo

¹⁵ Nepisa ke ga yam tai þisi ne nesape pe tesu re si vatanon navisaluaena naña Ntewa mla pa Mosis poli, ana nemarau nesape pona yar laþasa amla kiau visena nene pa piowa yo. Pona asitom asape, “Ke, Pol pisape ita na pe tesu re vatanon navisaluaena poli, a nagane ita tekilia tekila ya naña piowa naña sinetania, tekila naga pogaga, ana yoko Ntewa sinen ye ita, viewo ita.” Ana peraga, pe nepisa re nena poli þisa.

¹⁶ Monar asitoñal sane pogos naña yar tai sike vatanon suþe tai, monar logear suþe nena a monar imi sa naña yar na yuññaena kienaena tai. A ve sa mña nene e kieta malena. Visae nasinenanena viowa sumña ve suþen kioñña malena, yoko monar okila mlamulena viowa la naña naga sinenan sape okila. Ana visae kioñña suþe naga Ntewa, yoko osuñña okila kiena yuññaena wo lala. Mrapa lua nene, tai yoko kila ko omio Ntewa amlua aviaþa lue, ana taþena yoko kila ko omesmesu omio naga.

¹⁷ Nanua sumo, amiu mña yar na yuññaena vatanon mñareraena na kiamiu nasinenanena viowa ga lala, ana potena paþisi pa Ntewa naña nepian amiu,

ana amligan ruru sike e losinemi lala, ataveve ruru e kiamiu malena lala.

¹⁸ Sanene, amiu amolue vetan suþe viowa nene nanua sumo, pe ape kiena yar na yuññaena re si la poli, ana nagane ape yar na yuññaena kiena ne Ntewa, naña amiu asuñña akila ke sur mesmes lala sa naña naga sinenania.

¹⁹ Nekilia nesape navianena la nene mñarera li mña komin sitomena kiena yar naga pe sa re sitomena kiena ne Ntewa poli, nane kila nemiila amiu ke ne, nepis kome þakaiwa naña pisayu ga yeririna lala na yomarava nini, sane suþe lala amio kiela yaru na yuññaena lala.

Ana monar avisu kilale ruru kinas nen visena la nene, sane nanua, sitomena na kilaen sur viowa, naga keviu manene laa e amiu, naña sumña mñareran ke yepemi lala vena kilaen mlamulena viowa naña apiowa na apiowa, ana nagane pe sa re si nene poli. Nagane, sitomena na kilaen ðelaga wo monar ve keviu e amiu, naña kila sane kiamiu malena imi ve wa naña ve wa.

²⁰ Pogos naña sane ape yar na yuññaena ga na mlamulen viowa, mñareraena na sitomena na kilaen ðelaga wo taþatete yuññaena e amiu,

²¹ ana akila ke ga yuññaena viowa lala. Ana sur la nene, pe amiila re nena kiamiu malena poli, ana amligan amiu nena e mrapa na marena, a nagane, visae asuñña asitoñal la sina, yoko amawan vaþisi ya naña akila.

²² Ana nagane, Ntewa þerelua amiu petan ðelaga na sinenanen kilaen mlamulena viowa la nene, amiu apim sane ape yar na kilaen kiena yuññaena, kila naña po manenea e kiamiu malena naña apim ape wa ruruia, a nagane asike e mrapa na malena naña ve uro re.

²³ Wulena naña mlamulena viowa kila yar waria, nane marena naña ve uro re, ana kieta Suþe Yesu Kristo kila naña towar malena naña ve uro re, naña pe popul re poli, ana pe nalaena tai naña Ntewa mla korenan ga pimi pan ita.

7

Ita li nalelagaena lala pe tesu re

vatanon Navisaluaena poli

¹ Erau lala, nekilia naña amiu akilia ruru navisaluaena lala na kiamiu purvanua, ana yoko nevisayu sur tai e lepas na visaluaena la nene naña kilia iila kieta sitomena e lepas navisaluaena kiena ne Ntewa naña tesuña tepisayu ke ne.

Sur nene sanini, sape e navisaluaena, pogos naña temal ke ga wa, monar telogearia, ana visae temare, pe tesu re si vatanon po laa rui.

² Ositomyuli ðelaga kiena yaru naña ðere sira, lalua atalopa. Visae sira tai, pogos naña wona mal ke ga wa, navisaluaena m̄areran sape sira nene monar su ruru lue ga amio wona na yerm̄ene nene. Ana visae yar nene kovio, navisaluaena pe pisa re si sur tai e lepas na sira nene poli, sape naga monar sum̄a ve wona yar ke nene na wa.

³ Ve sanene, visae sira nene, wona mal ke ga wa ana naga va vinaun yar taþena, yoko navisaluaena visave naga taþa ke kolau. Ana visae wona na yerm̄ene mare tania, navisaluaena taþatete si visa sur tai ea. Naga kilia va talopa si amio yar taþena woga, naga pe pe kolau re nene poli.

⁴ Pogaga, erau lala, sitomena nene naga sa ga nono ga na kilologia itaena temio navisaluaena naña Ntewa mla pa Mosis. Nanua sumo, yar la asike vatanon navisaluaena nene, naña monar alogearia vena atol natamaliaena, ana nagane, ita li nalelagaena lala temare petan navisaluaena nene. Nagane pe tesu re si vatanon navisaluaena poli, ana tekilia teva tesu vatanon yar taþena, nane Kristo naña mare wo ita. Ntewa kilamalia sina, ana kila sane ita korowaŝ nena lala yoko towar mras wo lala naña naga sinenania.

⁵ Nanua sumo pogos naña tesike vatanon m̄areraena na ðelaga viowa naña tepaeme temio, kieta nasinenanena viowa lala amiyum̄ae e tasneta, akila tekila manene laa mlamulena viowa lala. Ana pogos naña tekilia tesape navisaluaena kiena ne Ntewa sum̄a naña pisaluþar ke mlamulen viowa la nene, pisape ve okila re nene, ve okila re nene, ana sur nene kila kieta nasinenanena

piowa lala pa laa metava narui. Sanene navisaluaena na kilawoen ðelaga viowa nene sum̄a kila ke sane tepim tepiowa manene laa narui, a mligan ita nena ga e mrapa na marena.

⁶ Navisaluaena nene þuarar ita m̄arera sanene, kila tepim tepe yar na yum̄ae korenaen kiena navisaluaena marua la naña asiripolo la asike rui. Ana nagane toþisin ruru nenaga mrapa nene, tomolue tokom ea ana tepim tepe yar na yum̄ae korenaena e mrapa viu wo nene kiena ne Ninuna Wa.

⁷ Ana kam na asitom ya ne e kiau visena la nene, naña nesape navisaluaena kiena Mosis sum̄a kila ke kieta nasinenanen viowa pa laa metava narui? Pona kam na asitom ke asape sanene na nesum̄a nepisa ke nesape navisaluaena kiena ne Ntewa piowa ga?

Ana peraga, kiau navisaena pe naga re nene poli, komin navisaluaena naga kiena yum̄aena wo tom̄a ga. Visae ve navisaluaena re, yoko taþatete tekilia naña nakilaroen navisaluaena naga sanape. Sane navisaluaena pisaar m̄arera sape "Ve ovinaia re sur ken yar taþena," ana visae navisaluaena ve visa re, yoko taþatete tekilia tevisave navinayaena naga ya ne, pona navinayaena naga kana ðelaga sanape.

⁸ Ana lelaga, pogos naña navisaluaena kilaro navinayaena nene, nagane narui sitomena na kilaroen navisaluaena sum̄alu m̄al kiena narin pulmas tai, kila navinayaena lala pimi moki loyum̄a e ita. Ve sanene, navisaluaena kiena yum̄aena tom̄a ga, komin visae ve navisaluaena re, yoko taþatete tevisu kilale ðelaga viowa nakilaen mlamulena naña tepaeme temio.

⁹ Sane nanua sumo, nemninue navisaluaena, a pe nesitom̄al re poli, nesum̄a ga sanene. Ana siraunia, nepisu kilia naña navisaluaena pisape, Ve ovinaia re sur ken yar taþena, ana nagane nepisu kilia narui nesape nesum̄a nekilaro ke navisaluaena,

¹⁰ a nekilia sane monar nokus nakoena vanonia, nemare.

Sanene ðelaga na logearen navisaluaena pe pe mrapa na tolen re si malena poli, ana navisaluaena naga pimi sane pe kieta mrapa na marena rui.

¹¹ Nanua sumo, tomãape navisaluaena naga pe mrapa na malena, ana nanene naga kieta nasinenanena viowa na kilaen mlamulena ga naða kilali ita, kila tesitom sanene. Ana pe sa re nene poli, komin naða tekilaro navisaluaena nene, ana mligan ita e mrapa na marena rui.

¹² Naga ke narui yumãena naða navisaluaena sumã kila, ana pe nepisa re nesape piowa poli, komin navisaluaena naga pe wa na pe wa, a kana visena lala apo a amesmes ruru nenaga.

¹³ Ana pona laþasa aviun naviunena yo, avisave visae lelaga naða navisaluaena naga pe sur wo tai, ana sanape naða kila ke yar la monar awar nakoena na marena? Ana peraga, pe nepisa re nesape navisaluaena nene monar kilañar ita poli, ana kieta nasinenanena viowa nakilaroen navisaluaena la nene, naga ga kila. Visena na visaluaena la apogaga, ana pogos naða nekila mlamulen viowa, in ga nemligan inu e mrapa na marena. Visae ve navisaluaena re nene, taþatete tekilia tevisave mlamulen viowa naga ya ne, a yoko teninue tevisave ya ne po a ya ne piowa. Ana pogos naða navisaluaena sumãlu sumã ga, kila meraravan ruru pan ita sape ðelaga na kilaen mlamulen viowa naða sike e ita, piowa na piowa.

Suri lua apilup loyuma e sitomena kiena yaru

¹⁴ Sa naða nepisa, navisaluaena kiena Mosis na pe wa paþisi, molue kome Ninuna ne Ntewa pimi, ana in na nepisu sane kiau ðelaga pe pe wa re nenaga, in na nesuma nemiyumãe taveve ga kiau nasinenanena viowa lala.

¹⁵ Sur viowa la naða nesuma nekila ke ne, pe nekilia ruru re poli amã nekila sanape, pona amã nekila vanon ya, komin sur wo naða sineun nesape nekila, ana pe nekila re poli, ana sur viowa naða pe sineun re kilaen poli, naga ke nane nekila ke narui.

¹⁶ Nanene narui, nesape navisaluaena kiena ne Ntewa po paþisi, komin naða monar navisaluaena sumã ga vena visaluþaren kiau napiowaena la nene, naða sa naða nepisa ke nene, yepmavin kilaena, ana nesuma nekila mãaga.

¹⁷ Sanene, pe in re naða nesitom kilaen napiowaena la nene poli, ana ðelaga nasinenanen kilaen mlamulen viowa naða sumã miyumãe manene laa e kiau malena, naga ke narui naga sumã kila.

¹⁸ A kiau ðelaga na kilaen mlamulena viowa nene, pe nepisuli re nesape naga kila sur wo tai se kiau malena poli wa. Yam moki kiau nasinenanena pisape nekila sur wo, ana siraunia, pe nekila re poli.

¹⁹ Sa ke naða nepisa ke narui, pe nekila re nawoena naða sineun kilaen poli, ana napiowaena la naða pe sineun re kilaen poli, sur nene naga ke nane nesuma nekila ke narui.

²⁰ A visae nesuma nekila ke napiowaena la naða pe sineun re kilaen poli, nanene kana kinasa sane pe nekila re po poli, ana sur taþena sumã mãraran ke sape nekila, nane ðelaga na kilaen mlamulena viowa naða sike e kiau malena.

²¹ Pelaga na kilaen mlamulen viowa nena, nepisu sane naga navisaluaena mãrara taþena sina ga tai naða sumã miyumãe ke e inu. Pona pogos tai sineun nesape neyumãen suri wo tai yo, ana sitomena viowa sike ga lavisi, kilali naða were inu neva neviowa sina ga.

²² Pogos moki, e kiau sitomena in ga taaga, nesuma nesitomãl ke suri la naða Ntewa pisa, a nepisu kiena visena lala apowo paþisi,

²³ ana nemloge e inu sane visena taþena si tai naga mãena sumã pis. Naga nane ðelaga na mlamulen viowa, naða naga sumã mãraran inu vena nesu vatanon mãraraena na kiau nasinenanena piowa lala. Naga sane nasinenanena viowa la nene asike e tasneu, asuma akila ke pupia mara amio nawoena la naða asike e kiau sitomena.

²⁴ Kei, sitomena wo amio ðelaga viowa, lalua asuma apeveyu ke e in sanene, nem-

loge piowa paḡisi, nepisu kieta malena e yomarava na tolana marena nini m̄arera paḡisi. Ana ane yoko kilia iila ita, ane yoko werelua ita e naloge viowaena nene?

²⁵ Kieta malena m̄arera paḡisi naḡa, komin e kana lepas ne tai, kieta sitomena sinenan sape logear navisaluaena kiena ne Ntewa, ana e kana lepas ne komp̄asa, ḡelaga na kilaen mlamulen viowa suḡa miyuḡae ke e tasneta.

Ana lelaga, potena paḡisi pa Ntewa, komin naḡa naga pitetalia kieta Suḡe Yesu Kristo pitomi, naḡa yoko iila ita, werelua ita vetan naloge viowaena nene, tamalia ita.

8

Malena wo amio Ninuna Wa

¹ Kristo Yesu pitomin tamalia ita, ana kila sane ita naḡa kieta malena su ruru sike amio naga rui, yoko Ntewa taḡatete la nakoena van ita pog tai.

² Nanene komin nanua sumo, tesike e malena viowa naḡa ḡelaga na mlamulen viowa pa metava, a naḡa pisaar marena pan ita, ana siraunia, Yesu Kristo ḡerelua ita petan malena nene, mligan ita tesike e mrapa viu taḡena tai naḡa tekilia tetol malena wo naḡa Ninuna Wa mlavia.

³ Yar la asuḡa aḡion ke nalogear ru-ruen navisaluaena kiena ne Ntewa vena atol natamaliaena ea, ana akila ḡele ga vanon yaru naga ḡarin m̄arera paḡisi. Ana ya naḡa akila ḡele ga, Ntewa ga kila. Naga mligan narina Yesu pitomi e yomarava, kila tasnena a kiena malena maran taaga sa ke ita li na mlamulen viowa lala. Ana Yesu pitomi taḡan tasnena a kiena malena nene, sane kuḡaḡaena tai vena weluaen nakoena na kieta mlamulena viowa lala.

⁴ Nakoena na kieta nakilaroen navisaluaena, naga ga ḡaria, kila ita temesmesu rui e visuena kiena ne Ntewa, ana nagane pe temial re si e ḡelaga naḡa mlamulena viowa suḡa ḡuarar itania, ana tekilia teyaloro ga e ḡelaga naḡa Ninuna Wa suḡa susumon ita ke ea.

⁵ Yar naḡa suḡa mialoro taveve ke ḡelaga na mlamulena naḡa naga paeme amio, kiena sitomena suḡa pulen nasinenanena viowa na yomarava, ana yar naḡa suḡa mialoro taveve ke Ninuna Wa, kiena sitomena pule mamaga e sur wo la naḡa Ntewa sinenania.

⁶ Nasinenanen maneneen ḡelaga viowa lala e yomarava nini, naga pe mrapa na marena, ana nasinenanena maneneen ḡelaga wo kiena Ninuna, naga pe mrapa na suḡare, pe mrapa na malena.

⁷ Yar naḡa kiena sitomena sinenan manene ḡelaga na sinenanena viowa, naga pe nasinekar kiena ne Ntewa nenaga. Pona pe sinenan re vatanonen navisaluaena kiena ne Ntewa la poli yo, pona visae peraga, pona sinenan m̄a vatanon yo, ana komin naḡa naga pa piowa manene la rui pano-o, ana yoko vatanon ḡele sina, ana naga pe yar na sanene narui.

⁸ La naḡa amiyaloro ataveve ke ḡelaga na mlamulen viowa naḡa apaeme amio sanene, taḡatete akila sur tai naḡa yoko Ntewa kilia kekarania.

⁹ Ana ko naḡa visae Ninuna ne Ntewa teke e ko, ve oyal re si e ḡelaga na mlamulen viowa naḡa opaeme omio, ana monar osuḡa oyal e m̄areraena kiena Ninuna naḡa Kristo mla pan ko. Ana visae yaru tai suḡa ga naḡa Ninuna nene ve to re si e naga, yar nena pe pe kiena re Ntewa poli.

¹⁰ Pelaga na mlamulen viowa na yomarava nini kila sane ita make ga tasneta monar mare pogos tai, ana ita naḡa Kristo sike e ita, naga kila ita temesmesu e marana rui, ana yoko ninuta mal lue ga.

¹¹ Ninuna ne Ntewa naḡa kila malia si Yesu petan marena, nane ninuna ne nane teke e ita narui, a yoko kila m̄ena wo ve sanene van ita. Pe sur korena ga naḡa tasneta mare, ana Ninuna Ntewa naḡa sike e ita yoko kila malia ita sina.

¹² Erau lala, Ntewa kila po paḡisi na pan ita sanene, ana kila sa naḡa kieta pupia lapui sike e naga narui. Sanene, popon telamaran si sur wo vania, ana pe

pon re si teyaloro tetaveve kieta ðelaga na sinenanen mlamulena viowa poli.

¹³ Pelaga na mlamulena viowa naga pe mrapa na tolen marena, ana yar naþa sinenan yali taveve mrapa na malena, naga monar tañan Ninuna yuñae ea, iila vena te plan nasinenanena viowa nakilaen mlamulena viowa vetan kiena malena.

¹⁴ A ita naþa temlogear pulgona ne Ninuna Ntewa sanene, ita ke la nene narui tepe narina ne Ntewa lelaga.

¹⁵ Nanene komin naþa Ninuna ne Ntewa pe kila re tepim sane tepe yar na yuñae korenan re poli kiena ne Ntewa, ana naga kila sane Ntewa kuslua ita tepe kiena, tepim tepe narina lala. Sanene, monar ve temaraun re Ntewa, ana pogos naþa tevis vania, tekilia tevio sane ari-mata, tevisave "Ata."

¹⁶ Mesmesun ga naþa tevio ve sa nene komin Ninuna Ntewa sumã pian ita ke narui ana ninuta mñena kilia sape lelaga, ita tepe narina ne Ntewa.

¹⁷ Ana komin ita tepe narina ne Ntewa sanene, navisa ruruena wo la naþa Ntewa mligan ruru sike ne ve kiena ne narina napo naþa Yesu Kristo, yoko ave kiena ne ita narina taþena mñena lala, yoko towaria tevion pae temio. Lelaga naþa sane ita mñena monar towar naloge viowaena sa ke ga naþa naga þaria, ana visae tekekara ga, yoko Ntewa kila wo vaþisi van ita maran taaga ve sa naþa kila po pa Kristo.

Yoko wo vaþisi va yeririna lelaga kiena ne Ntewa

¹⁸ Nagane e yomarava nini tesuñã tepane ke pog mñarera la nene moki, ana visae kieta sitomena la su ga e naurarena naþa yoko imi sirau, nekilia nevisa nevisave e kiau visuena, naloge viowaena la na nagane, ape suri korena ga.

¹⁹ Naloge viowaena la nene sumã tol ke sur make ga naþa Ntewa siia, a sur punu ga sumãate ke ga wa, sinelan manene la asape popon legiena maro imi, vena Ntewa kipian ga na wa naþa sape a la ne ape narina kemua lelaga.

²⁰ Nanua sumo, pe naloge viowaena re poli, vanon Ntewa si sur punu ga apoga ga, ana siraunia, asumã apim apililua, apororowaia, apioyowa sanene pano-o, sur make ga pe su re si sa naþa naga sinenan poli. Naga tañan sape ve sa nene e yomarava, vena kilaen ve sa naþa yoko yeririna lala monar asitom asave monar awasine ga naga.

²¹ Sitomena nene yoko monar sike e narina lala, naþa monar alelaga avisave yoko sur la taþatete asu mña sanene silaga, monar asitomãl asave pogos tai yoko naga kila sur la punu ga naþa naga sii la aim awo sina, atol kiena naurarena, sa ke ga naþa ita narina la nene yoko tetolia.

²² Ana nagane tepisu ke yomarava nini na wa, naþa siar nanua sumo pimi, sur la naþa asike ea asumã amloge piowa sa naþa sira tai sape war narina.

²³ A maran taaga sa ke mñena ga ita naþa tetol Ninuna Wa sane nalaena þesia tai naþa Ntewa mla pan ita, naþa kila tesitomãl naþa þisi na nalaena keviu imi sirau na wa. Ita mñena ga, tagena sike e losineta la na wa, a tekilia sa naþa yoko teloge viowa mña vano-o tol pogos naþa Ntewa wereplan ita vetan yomerava. Sinetan manene sur nene paþisi, komin ita na sane ninis la naþa kus plan la ga. Ana e poglis nene, yoko teloge ga wo na wa sane ita tepe narin kemua la lelaga naþa teva tesike nena temio e kiena yo napo.

²⁴ Sur ne nanene naga tamalia ita vanonia, a siar e pogos nene pimi, tesuñã temlelaga ke mñarera e kiena navisaarena naþa sape yoko naga kila wo van ita ve sanene. Temlelaga mñarera e naga komin pe tepisu re poli wa, ana pogos naþa imi mñalivi, yoko taþatete si tevisave telelaga tevisave ve sanape, vanon sane ve sanene narui.

²⁵ Ana pe tepisu re sur nene poli wa, ana monar telelaga mñarera sane yoko ve sa nene, a monar tekila kieta sitomena la ve piayavi vena sumãateen vano-o kilamara la visu ga na wa.

²⁶ Pogos naña tesuñate ke sanene, pogos tai sineta marenia a yepeta malumu, ana silaga Ninuna Wa sumña miila ita, pogos tai sinetan tesape telen wo pog mñarera lala, ana temloge piowa manene narui tekilali naña tepis, tomål ðele visena napo navisaena. Ana e pogos nene Ninuna Wa kilia imi, kus leleta narui naga lenin kieta e tagena la naña apisawal ke kieta sitomena la naña visena la pe torokin re avisa poli.

²⁷ E pogos na sanene, Ntewa kilia make ya naña sike e losineta lala ita kiena li na lelagaena lala, a kilia naña Ninuna sumña mlenwo ita ke lala, naña sumña pisa ke ga sur la naña mesmesun nasinenanena naña sike e sitomena kiena ne Ntewa rui.

²⁸ A e pog mñarera naña tepanea, e ya naña yoko imi mälivin ita, tekilia tesape yoko Ntewa kila sane e kana luasa, yoko woga ga van ita naña sineta si naga. Naga kila sanene komin naña mligan plan ita sumo rui vena kila kiena yumäena wo lala e kieta malena.

²⁹ Naga kilia ruru ita nakonua konua rui pimi, mligan ruru kieta mrapa nakonua rui, ana kila kieta malena ðar nono na narina naña Yesu. Sanene, ita tepe puruvi a tepe vineta lala e mratava taaga, naña Yesu naga sane kieta puruvi nasumo.

³⁰ Nane yumäena wo ne nane Ntewa kila pa yeririna la naña mliganar la vena ave kiena namratava lala. Naga pio la vena aim puna, kila la ape mara wo amio naga, a kila sa naña yoko atol kiena naurarena e legiena naña yoko imi.

Sinesiena wo kiena ne Ntewa

³¹ Sur la nene akila merarava sane Ntewa sike amio ita, sumña kila ke po pan ita, a visae ve sa nene yoko tevisa si ya ne? Visae Ntewa sitom visae visir plan ita, yoko ane kilia kila si teloru?

³² Tepisu naña Ntewa sinen miye ita manene pano-o tamån sape awemär narina vanon ita, ana visae kekaran naña kila pupia yumäena wo van ita sanene, yoko kekaran mäna la sur nowo taþena la van ita.

³³ A nanene Ntewa sumña kila ke pan ita rui. Naga ga mligan lua ita vena teve

kiena narui, ana yoko a si naña visave ita pe tetorokin re tomälivi e marana poli?

Ntewa ke narui naña sumña pisa ke sape ita temesmesu temio naga rui,

³⁴ ana a si naña visave monar towar nakoena vanon kieta mlamulena viowa? Pe yar re tai po, okilakan naña Navisaarena Yesu kila sur make rui. Naga mare wo ita, siraunia mal si petan marena, siraunia þasuþea pa teke tano e kiena lele wa ma metava amio Ntewa, a nagane pisawal ita ke pa Ntewa vena Ntewa viewo ita.

³⁵ Kristo sinen si ita manene sanene, sur ya si naña yoko kilalua ita si vetan kiena sinesiena nene? Pe sur re tai poli.

Pogos tai, yumäena la urmi pan ita, pona yar la akila piowa pan ita. Pogos tai, tetol pog mñarera, pona pe kata kinanena re poli, pona pe mäta kulsota re poli. Pogos tai temaraun kieta malena, pona takan playu na mara, ana peraga, silaga Kristo sinen sii ita, a kieta malena su ruru sike e limana.

³⁶ Nanene sa naña Parin Suþe Tepet pisa nakonua rui, e pogos naña naga mäna kus ke pog mñarera, naña sape:

“Kiomä kia sike e imimi,

ana sinelan asape awe moñar imimi lue ga,

apisu imimi sane sipsip la naña asvilevile-san vena asiro kolmekila.” *Yauena 44:22*

³⁷ Ana sur kar la ne sanene, akilia aimi amälivi pun ita, ana pe suri korena ga, e sur punu ga na sanene, sinesiena kiena Kristo sike e ita, ana tesulue ga metava, tetaulu silaga.

³⁸ Nekilia nevisaar nena van amiu, nevisave pe sur re si tai poli naña kilia kila Ntewa pe sinen sii ita re si poli. Visae temali pona temare, visae navisi la asike amio ita pona yermare la apimin ita ke yo, visae tevane sur la naña asuñña amäliv ke nagane yo pona tevane sur la naña yoko amälivi e legiena na pimi ke ga wa,

³⁹ a visae namäaraena wo lala na yo na metava asike amio ita, pona namäaraena viowa na yo tano asuwo ita, ana pe sur re nena tai naña Ntewa siia kilia lalua kiena sinesiena vetan ita. Kristo Yesu kieta Suþe

mligan sinesiena kiena ne Ntewa sike e kieta malena la rui, ana sulue na sike ne.

9

Pol mloge piowagan naña le Yu la pe sinelan re aelaga sane Yesu naga pe kiela Navisaarena poli

¹ Erau lala, nagane sineun nesape nevisayu e lepas nene naña ita le Yu lala, tesape ita na yeririna kiena ne Ntewa lala, ana ita mokliu naña pe sinelan re Yesu poli. Ana yoko ve sanapen la nene? Pogaga, tañatete nevisokan, monar nevisawal van amiu e sitomena wo lañasia naña Ninuna Wa kian pan inu e lepas nene rui,

² ana lelaga, visena la nene, akila sane kiau sineyeena a kiau naloge viowaena keviu pañisi, pe pito re nena tano poli.

³ Nanene komin nagane, kiau malena sikol amio Yesu rui, ana nepisu sane namratava tañena na Yu la naña ita kuruta taaga, kiela malena pe sikol ruru re amio naga poli wa. Visae nekilia nourelua in sina vena la akilia aimi akus leleu, yoko nekekara ga, ana tañatete ve sanene.

⁴ Asitomyuli sur wo la naña Ntewa kila pan ita le Yu la rui, naña la na sanini:

ita ke narui naña Ntewa mliganar kata apua lus nae Israel lala sape ape kiena yeririna lala,

ita ke narui naña Ntewa pisawal sape kuslua ita sane tepe narina lala,

ita ke narui naña Ntewa mligan kapi vivaga na kiena urarena sumon kieta yeririna lala e yomema nanua sumo,

ita ke narui naña Ntewa sumã kila ke naviranarena lala amio kieta yermarua lala,

ita ke narui naña Ntewa mligan kiena navisaluaena sike e ita,

ita ke narui naña pupia yumã wa na lotunen Ntewa sike pun ita,

ita ke narui naña Ntewa pisaar navisa ruruena moki pan ita,

⁵ ita ke narui naña tepio yermarua wa nasumo lala, sane Epraam, Aisak, amio Sekop, ape kata apua lala, ana metavan sur make la nene, ita ke narui naña Yesu molue kome kieta

lusia, naga paeme e yomarava nini sane pe yar ga, ana naga mēna pe Navisaarena, naña naga Ntewa naña pe suñen sur make ga, naña popon teyeluar naga silaga vano-o ve uro re.

Sur wo ne naga ke la nene narui naña Ntewa kila ve kiena ne kiena yeririna lala, ana ita mokliu naña tepisua sane ape sur koren ga.

⁶ Nane la naña pe asikol la ruru re amio Kristo poli, a pona yeririna lañasa asitom asape suri nene kila sane navisaarena naña Ntewa mlañesania pe mālivi re sa naña naga pisa poli, komin naña naga pisaar sape yoko kiena navisa ruruena su make amio lus kiena ne le Yu lala. Ana pe sa re nene poli, komin sur tañena tai naña pa sanini, sape la naña amolue akome lus kiena Sekop, naña tepio la le Israel lala, pe la make re naña Ntewa sape la ape kiena yeririna la poli.

⁷ Pona tevisa si visena nene kome mrapa tañena, tevisave la naña apisape la kala apua Epraam, pe la make re naña tesape la amolue e kiena lus nena napo poli. Visena tai naña sike e Visena Wa pisa sanene rui, naña Ntewa pis pa Epraam, e lepas na narina lua nene Ismael amio Aisak, pisape

“Kiomã lus napo lala yoko amolue ga akome narumã naña Aisak.”

⁸ Ana visena nene, kana kinasia sape la naña Ntewa pisa sane asike loyumã e ñegas nen lus kiena ne Epraam kemua lelaga, la ape ai? Pe yeririna make re naña amolue e lus kiena ne sisi tañena la naña naga ñar la poli, ana la naña amolue e lus na nisisi naña Aisak, naña Ntewa kilologia naga, pisaaria sape yoko kiena navisa ruruena lala sike e la.

⁹ Tekilia tesape sanene, komin nanua sumo Epraam mla sisi pa kiela sira na kilavanen yo mñala naña Aka, ana sisi nene pe naga re naña Ntewa sape yoko lus kiena ne Epraam napo la amolue akome poli. Ana Ntewa piranar ruru sina ga amio Epraam, pisape “Epraam, yoko nekila van ko omio womã Sera, sane e kas na sirau, e pogos na sanini, yoko amiu lua awar narimiu tai, ve yermēne.” Ana

siraunia, sanena naña Ntewa pisaaria, ana narina ne Epraam nene, Aisak, naga ke narui naña ita lus kiena ne le Yu lala tomolue tokom ea.

¹⁰ A pogos naña tepisu Aisak pimi keviu, naga narina tai, a maran taaga ke sina ga, wona naña Repeka naga ãar kaora Sekop amio Esau,

¹¹ a pogos naña lalua pe apaeme re poli wa, Ntewa pisawal ya naña maplar pe kiela lalua. Naga pe sitom re sape kila taveve kiela yuñnaena lalua poli, sape lalua akila suri piowa pona po, ana kila ga taveve ya naña sinenania.

¹² Ana pogos naña lalua apaeme, Esau na paeme ãesa a Sekop paeme maro, ana Ntewa pisa pa kala auia, pisape

“Naga naña paeme maro yoko taãatete logearia naga naña paeme sumo, ana naga naña paeme sumo, naga monar logear naga naña paeme maro.” **Nas 25:23**

Sanene, pe ãelaga marua nataveveen re nene poli, ana kila meraravania sape Ntewa pisirlua yaru, pe taveve re sitomena kiena yaru poli, ana taveve ga ya naña Ntewa maplaria.

¹³ A sur nene merarava po paãisi e lepas kiena kaora lalua nene, komin naña visena taãena sike e Nasiriena Wa rui, naña Ntewa pisape

“In na nemligan Esau naña naga paeme ãesa, naga sike vatano, a nemligan Sekop naña naga paeme maro, naga to metava.” **Mal 1:2,3**

¹⁴ Pogaga, Ntewa pisawal kiena sitomena merarava ruru sanene, ana yoko tevisa si ya narui? Pisi na tekilia tevisave ãelaga kiena ne Ntewa nene piowa ga, pona naga kila pe memes re e lepas kiena lalua nene poli yo? Ana peraga, taãatete tevisa kare Ntewa sanene.

¹⁵ Nanene sa ke sina visena taãena tai naña pisa pa Mosis nanua sumo rui, naña sape

“In na nepe Ntewa, sike ga e inu sane nekilia sineu ye yar ai naña sineun nesape sineu yea.” **Nau 33:19**

¹⁶ Sanene na Ntewa sumã pisa plan kiena yeririna lala, pe taveve re naña la ga apisape naga monar visa plan la, a pe

komin re naña la aãion asape akila sur laãasa naña sane pona naga kekaran la vanon yo, ana naga pisa plan yar lala taveve ga kiena sineyeena e yar la naña asumã amloge ke piowa.

¹⁷ Pelaga kiena ne Ntewa nene, naña kila ke pa yaru taveve ga kiena sitomena, tepisu naga kila mña pa Parin Suãe Pero nae Isip, e pogos kiena Mosis nanua sumo. Pero nene naga yaru tai naña naga kawe ke yeririna kiena ne Ntewa, ana Ntewa pislua naga mña ga vena kilaen kiena yuñnaena tai, sa naña Nasiriena Wa pisape, naña Ntewa pis pa Pero, sape

“In na nepisirlua ko vena ovisuar kioñã purvanua. Yoko netamãan ovilaven kioñã mñareraena sumo wa, ana nekila vena yoko ovisu ga kiau mñareraena na wa naña naga mñarera manene taulu kioñã namñareraena, a sineun nesape yeririna la nae yo make ga yoko akilia sane namñareraena make ga sike ga e inu.” **Nau 9:16**

¹⁸ Sanene, tepisu yar naña Ntewa sinenan sape ve lemam vania, yoko monar ve sa nene, ana visae yar tai ve sa Pero nene naña Ntewa sinenan sape kila kiena sitomena mñarera vania, ana monar ve sa ga nene narui.

Sinemimiena kiena ne Ntewa, amio kiena lemamienna

¹⁹ Nepisa sanene, yoko monar sitomena tai va metava naña yaru kilia viun sanene, visave “Visae e yaru laãasia, Ntewa ve lemam van la, a e yar taãena lala, naga sumã kila ke naña kiela sitomena mñarera, yoko ve sanape narui? Visae Ntewa naga ga narui naña sumã kila sape teim towo pona teim teviowa, ana pe pon re naga liãere ita si poli. A visae Ntewa sinenan kila van ita taveve ga kiena nasinenanena, yoko taãatete tevisaluãar tevisave ve kila re.”

²⁰ Ana yoko nevisatamne visena la nene, nevisave: Peraga Mara, ko na ope yaru ga, ko ope sur tai naña Ntewa siia, ana ve okilali re naña ovisatamne kioñã visena tometavan si naga. Naga sa naña visae yaru tai sumã yuñnaen porotano ve piaki.

Pogos na yumāen pae porotano ve piaki p̄isi, ana piaki na porotano nene taṗatete kilia sumālu vis sina vania, visave, “Ei, komin ya ne omiyumāen kare in ga sanene?”

²¹ Ana taṗatete ve sa nene, komin yar naṗa miyumāen piaki naṗa e porotano, sike e naga kilia yumāen taveve kiena sitomena. Visae la narin porotano tai, kilia yumāen piaki taṗena ve lua ea. Tai, piaki nowo tai naṗa popon p̄aṗagena lala, a taṗena, naga piaki tai na umā ga.

²² Ana Ntewa mēna ga kila sa ke nene, naga mēna ga kiena sur lua naṗa naga sinenan sape kila. Naga sinenan sape kila yar la avisu kilale naṗa naga sinen kar ke kiela mlamulen viowa lala, vano-o yoko kilia la ruru nakoena van la amio kiena namareraena. Na konua rui, naga kila kiena sitomena piavi pan la, ana nagane sike ga e naga kilia kila van la ya naṗa naga sinenania.

²³ A sur taṗena naṗa naga sinenan sape kipian la, naga kiena p̄elaga wo la naṗa naga sinenan sape kila van ita la naṗa naga pe lemam pan ita. Nanene naga sane nakonua rui, naga kila ruru kiena navisa ruruena nowo lala, a nagane miyumāen ita sa naṗa pias nen sur naṗa kon la vito ea.

²⁴ Naga kila po pan ita sanene komin ita ke narui naṗa naga pio ita, naṗa ita laṗasa tomolue e lus kiena ne le Yu lala, a ita laṗasa pe tomolue re e lus kiena le Yu la poli.

²⁵ A p̄elaga nene sane visena kiena ne Ntewa tai naṗa Navisawalena Osea pisawal e kiena tus, naṗa Ntewa pisa sanini, sape

*“Pegas nen yeririna la naṗa nanua sumo la pe ape kiau re poli,
a nagane nepio la, nesape ape kiau yeririna lala.*

Purvanua nene naṗa nanua sumo pe nesitomāal re poli, a nagane nesape nekekarān paṗisi.” **Ose 2:23**

²⁶ A yam si tai, Osea pisawal taṗenan si visena kiena ne Ntewa tai, naṗa pisape

“Nanua sumo nepisa pa yeririna nae e yo nini lala nesape la pe ape kiau yeririna re la poli,

ana nagane, yoko aloge naṗa asumā avio la asape naru lala, in na nepe Ntewa namareraena, nepe Ntewa naṗa nemali.” **Ose 1:10**

²⁷ A visena taṗena pisa ke mēna sanene, naṗa sike e tus naṗa Navisawalena Aisea siriyuia. E yo nene, naga mloge piowagan le Israel, pisape

“Pegas nen yeririna nae Israel lala la moki manene laa, la moki na moki, la sane mras nen none naṗa yar wolo p̄ele ga.

Ana suri piowa tai, yoko la ve lua la ga naṗa Ntewa tamalia la.

²⁸ Ana e pogos na liṗereena, yoko naga la nakoena va yeririna lala na yomarava. Yoko kilapel ga la ve moki naṗa pe amlelaga re poli.” **Ais 10:22,23**

²⁹ A nanene yoko ve sa ga visena taṗena naṗa Aisea siriyu nanua sumo rui, naṗa pisayu pogos na liṗereena naṗa yoko imi, naṗa visae Ntewa ve sinen ye re yaru, yoko la punu ga akokovio. Visena nene pisa sanini, sape

“Ntewa pitomi amio kiena yar na mara lala, lavisi we moṗar make ita. Visae ve sinen ye re narita la naṗa avetorokaki, ana mligan la asikena, yoko kieta lus la akokovio make nenaga.

Lavisi naga kila van ita maran ve taaga torokin ke ya naṗa kila pa yar viowa la e pupia yo lua nene nanua sumo, Sotom amio Komora, ana siraunia kila sane ita laṗas tekilia temal tesike ga wa.” **Ais 1:9**

³⁰ Pogaga, visena la nene kana kinasa sanini, sape la naṗa pe ape Yu re poli, pe aṗi re yon naṗa ataveve navisaluaena kiena ne Ntewa poli vena amesmesu e marana, ana siraunia, pogos naṗa amlelaga e Yesu, Ntewa kila la ga apim amesmesu e marana na wa.

³¹ Ana le Yu lala, aṗionli naṗa aimi alo-gear navisaluaena vena aimi amesmesu e marana Ntewa, ana akila p̄ele nena yonia, ana la apiowa ga narui.

³² Nepisape piowa pan la sanene, komin naṗa la aṗilion naṗa aimi amesmesu e marana Ntewa, ana la akom e mrapa

tañena, apa amlor ruru nena ea. La akome mrapa naña asitom ke sape kiela yumãen wo lala kilia kila aim awo amio Ntewa, ana pe sa re nene poli. Monar tesumãl ga tese e ya naña Yesu kila, naga ke nene narui kieta mrapa naimen towo si temio Ntewa.

³³ Visena si tai sike e tus kiena Aisea, naña Ntewa pisawal ðakaiwa tai, naña pisayu kilavaru na ðeren yumã tai, ana kilavaru nene naga Yesu, sane Navisaarena naña Ntewa mligan naga pimi. Visena nene pisayu sa naña yar laþasa pe sinelan re kilavaru nene poli, ana laþasa amlelaga ea, ana pisa sanini, pisape

“Avisu ruruia!”

Nesumã nepisirlua ruru kilavaru wo na ðeren yumã tai, nane metava e kunus naña Saeon e pupia pulkumali kiena kiau yeririna lala nae Yerusalem.

Kilavaru nena m̃arera ruru po, ana yoko yar la ve moki naña yepela mavinia, atan m̃a lala ea vano-o kila alolor kar ga va ke ne.

Ana yeririna la naña alelaga e kilavaru nene, asumãlarla asea, yoko nekila wo van la vaþisi.” Ais 8:14, 28:16

10

Yesu ga kilia kila ita temesmesu e marana Ntewa

¹ Erau lala, nemloge piowagan naña kiau lus ruru nena lala, sa naña le Yu lala, pe amlelaga re poli. Ana sineun manene nesape monar atol natamaliaena, nane nesumã nemlen manene ke pa Ntewa vanon la ne.

² Asumã aþikeyon naña akale Ntewa e kiela malena, ana nepisa lelaga, amninue mrapa, yoko taþatete alualia.

³ Nanene komin ga naña asumã ataveve ke ga kiela sitomena lala, ana yepela mavin taveveen mrapa naña Ntewa miyumãenia vena kilaen yaru imi mesmesu sina e marana.

⁴ Asumã amãraran ke ga naña asape nalogearen ga navisaluaena naga pe mrapa, ana mrapa nene piowa rui, komin naña ita make ga tekilaro navisaluaena lala. Mrapa naña tesape

temesmesu temio Ntewa komin naña temlogear navisaluaena, Kristo suwo rui, a naga miyumãen kieta mrapa viu tai. A nagane, visae telelaga tevisave Kristo ðar plan kieta mlamulen viowa lala, ana Ntewa kilia kila ita teim temesmesu e marana.

⁵ Visae ve tekilaro re navisaluaena, yoko woga ga, tekilia teim temesmes e marana Ntewa komin naña temlogear navisaluaena, komin Mosis pisa visena tai e lepas nene rui, pisape

“Yaru naña taveve ruru sur make ga naña navisaluaena nene pisa, yoko tol malena.” Lev 18:5

Ana pe yar re tai naña kiena malena po sa naña Mosis pisa poli, ana taþatete tetol malena kome kieta yumãena wo la naña tekila.

⁶ Nakilaen sanene, naga m̃arera paþisi, ana visae telelaga ga e Kristo tekilia teim temesmesu e marana Ntewa, a naga pe pe sur re tai naña m̃arera poli. Sane visena tai naña Mosis pisa, naña pisape

“Pe pon re asitom avisave sur nene m̃arera paþisi, ana asumã aviuviun avisave ane yoko kilaþesan mrapan ita vena vaen ma e peni?” Nav 30:12

Naviunena nene kana kinasa sape ane kilia va tol ma e peni were Kristo vitom tano e nini vena tamalia ita, ana sitomena na sanene piowa ga.

⁷ Pona aviun naviunena tañena naña sike e Nasiriena Wa la yo, naña sape

“Ana ane kilia vito tano vito tol yo kiena yar mare lala ana wasuþe sina?”

Naviunena nene, kana kinasa asitom sape Kristo mare e lak torovia, ana naga m̃ena ga pito sike e lelen marena, ana asitom asape taþatete yar tai kilia vito si werelua naga e yo nene vena vam tamalia ita, ana tekilia tesape visena la nene pe po re poli. Tekilia ruru rui tesape Kristo molue ma e peni pitomi tano rui, a siraunia mare, þisi na naga sumãlu mal sina a pa si ma e peni rui.

⁸ Visae ve sanene, tekilia tevisatam̃e naviunena la nene, tevisa visena tañena naña Mosis pisa nanua sumo, naña pisa pisape *“Visena kiena ne Ntewa naña pan ita ita yeririna lala sike amio ita rui. Sike*

e limata, ana tekilia teligan se gota, tekilia teligan ruru se kieta sitomena lala.”

Nav 30:14

A visena kiena ne Ntewa naña visena nene pisayuia, nane Lologena Wo naña mesuña melologon ke ne, naña pisawal ke sape yar lala monar alelaga e Yesu Kristo.

⁹ A ko ai naña olelaga e Yesu Kristo e losinema, ovisave Ntewa naga kila naga mal si petan marena, a okekarana naña ovisawal e yo metava ovisave omla Yesu pe kioña Supe, yoko otol malena.

¹⁰ Nanene komin naña visae yar naña lelaga e losinena visave Yesu naga mal sina petan marena, a visawal e yo metava visave Yesu naga pe kiena Supe, yoko Ntewa ve la re si nakoena vania komin kiena mlamulena viowa lala, yoko tamalia naga.

¹¹ Naga nene sane visena tai na Siriena Wa, naña sane pisayu naña temlelaga e Kristo, naña pisape

“Yaru naña mlelaga ea, naga tařatete kiena sitomena loru pog tai.” *Ais 28:6*

¹² Yaru naña mlelaga naga pe Yu yo, pona naga pe pe Yu re poli, ana Supe naga taaga pe kiela supe la punu ga, kila make po pan la naña atag ke pania.

¹³ Naga sane visena tai naña Navisawalena Soel siriya nanua sumo, naña sape

“Yaru ai naña vio kia kiena Supe, yoko tamalia naga.” *Soel 2:32*

¹⁴ Ana lelaga, le Yu la mok liu naña pe apio re Kristo asape tamalia la poli, ana sanape na sanene? Nanene komin tařatete avio naga visae ve alelaga re ea, a tařatete alelaga ea visae ve alogeli re kiena kia pogos tai, a tařatete aloge kiena kia visae ve yar va lologon re van la.

¹⁵ A tařatete yar va lologo visae Ntewa ve ligana lua re naga vano, ana visae yaru nene kekarana naña vano, yoko ve sa naña Siriena Wa pisayu rui, naña sape

“Potena pařisi pa Ntewa naña kiena nalologena lala, temloge la amial tamain ke ava e kiela mrapplepa la ne, asuña apava ke amio kiena lologena wo.” *Ais 52:7*

¹⁶ Nane visena naña yar lařas asuña apisasa, ana nekilia nesape Peraga, Ntewa suña pitetalia kiena nalologena lala apava ke rui, ana piowa pařisi naña le Yu la mok liu yepela mavin ga logeena. Nanene taveve ke sina ga visena na Siriena Wa tai, naña Navisawalena Aisea tagi pa Ntewa na mava, sape

“Ake Supe, mesuña memlologon ma kioña visena pano-o, ana sane yar la yepela mavin ga logeena.” *Ais 53:1*

¹⁷ Ana nagane imimi sanene, mesuña memlologon ke Yesu Kristo pan la, a pogos naña mesuña memlologo, lařasa amloge, a pogos naña amloge, lařasa amlelaga.

Komin ya ne omlologon ke pa le Yu la naña apuloyu ke Siriena Wa la rui?

¹⁸ Nane nesuña nemlologon ke pa le Yu la ne, ana yoko naviunena tai kilia kate e nene, sape Pona osuña omlologon ke pan la sanene komin naña ositom osape pona la pe amloge re ya naña Siriena Wa pisayu poli yo? Ana yoko nevisatamea nesape, Peraga, visena kiena ne Ntewa tol la nakonua rui. La make ga akilia maran taaga torokin ke naña la make ga apisu ke mrae amio kupario a verue lala, sa ke ga naña visena tai e Tus na Yauena pisayuia, pisape

“Yeririna make ga na yomarava nini wetelu apisu sur la meta e sinapane, a apisu kilalea sane Ntewa sike na, pano-o tol yeririna la e yo la naña asike koperina, la mena apisu kilale asape kiena mareraena keviu pařisi.” *Yauena 19:4*

¹⁹ Sanene, sane le Yu lala apisu kilale sur mokliu rui, ana sur viowa tai, la asitom asape Ntewa tamalia la ga yo. A pe apisu kilale re asape Lologena Wo naga kiena yar make ga, komin Ntewa sinenan sape tamalia mena yeririna la naña pe ape Yu re poli.

Ana popon avisu kilale sur nene, komin kiela navisawalena marua lalua apisayu nakonua rui e Siriena Wa lala asape yoko ve sa nene. Mosis řesa, naña pisayu

visena tai naþa Ntewa pisa pa le Israel lala, naþa sape

“Apisu piowa e la naþa pe ape Yu re la poli, sa naþa la ape sur korena ga, ana yoko amiu avielue e navisa ruruena la naþa yoko nekila van la.

Amiu asitom asape taþatete la nene akilia akila sur wo tai, ana yoko sinemiu kari la e pogos naþa amiu avisu netamalia la mēna ga.” Naw 32:21

²⁰ A nalua nena, naga Navisawalena Aisea, naga mēna suñalu pisawal nena visena taþena si tai kiena ne Ntewa e marana kata apua ita le Yu lala, naþa Ntewa pisayu la naþa pe ape Yu re poli, pisa pisape

*“Nanua sumo, pe akale in re poli, ana siraunia, yoko atañan inu, nanua pe apiunin re poli, ana yoko sirau-
nia, sinelan asape neva nakaten la.” Ais 65:1*

²¹ Ana Aisea siri plan taþenan sina visena kiena ne Ntewa tai, naþa Ntewa pisayu la naþa pe ape Yu re poli, pisape

“Yar la nene asuñā amlogelu inu, asuñā akovenlua inu silaga.

Nakonua rui nepikeþa ga luñau pan la, sineun nesape awasuþela aimi si pun inu, ana la na peraga narui.” Ais 65:2

11

Le Yu la yepela mavin Yesu, ana Ntewa pe pilon re māsina pan la poli

¹ Naviunena taþena suñā ga, nane e lepas kiena le Yu lala, sa naþa pe amlelaga re e Ntewa poli, ana naga mēna ga suñalu pilon māsina pan la, pona peraga?

Nekilia nesape peraga, naga pe kila re sanene poli komin in na nepe yere Yu na nesike ne, inu mēna ga yermarua Epraam naga pe repiu marua, a in na nomolue e lus kiena yermarua Pensiman, a nekilia ruru po naþa Ntewa pe koven lua in re poli.

² Sanene, nekilia nesape peraga, Ntewa pe koven plan ita re ita naþa pio ita tepe kiena. Popon tesitoñal Siriena Wa

tai nanua sumo rui, e pogos kiena navisawalena Elaisa. E pogos nene, Elaisa mloge piowagan þarmarera kiena yeririna lala kiena ne Ntewa, ana pisimumu pa Ntewa, sape

³ *“Suþe, kioñā navisawalena lala, kioñā yeririna la asuñā añemoñar la, a kioñā wonta wa lala, asuñā akilarovia, a piowa pano-o nepisu sane in ga taaga nepatanon ko ke narui,*

a nagane in mēna ga, ataveve in ke ne asape alalua kiau malena.” Suþe1 19:1

⁴ Ana e poglis nene, Ntewa pisatañea, sape

“Peraga Elaisa, pe ko ga taaga re poli. Pe okilia re poli, ana e yo nene in na kiau yeririna la tol manu olua [7000] la asuñā sane ko, naþa pe akila re lotena pa nono navisokanena poli, naþa Paal nene.” Suþe1 19:18

⁵ A nagane, e kieta pogosa, maran taaga ga amio nene. Yar moki liu naþa pe amlelaga re poli, ana ita ke narui naþa tesike ne, ita narin þegas nen le Yu lala, naþa Ntewa pe lemam pan ita, kian plan ita, narui temlelaga ea.

⁶ Ana popon tekilia ruru tesape Ntewa kian plan ita vanon ya? Pona yar laþasa asitom ke asape naga kian plan ita komin tekila ke yuñāena wo la moki naþa naga kekaran yo. Ana peraga, komin visae ve sanene, kana kinasa sane lemamiēna kiena ne Ntewa pe kila re nena sur tai poli. Ana Ntewa kian plan ita pe e re ga e naþa tekila sur wo la moki poli, ana kian plan ita e ga e kiena lemamiēna wo pan ita.

⁷ Tekilia tesape ita le Yu lala, ita make ga tesuñā takale ke mrapa naþa teim temesmesu temio Ntewa, ana ita lua la ga naþa toñalia. Ana visae ve sa nene, yoko ve sanapen taþena la nene? Nanene kana kinasa sane la mokliu naþa ape þarmarera paþisi, ana pe amal re mrapa nene po la wa.

⁸ Visena na Siriena Wa tai pisayu la ne sanene, sape

“Ntewa tañan la asuñā ga amio kiela wowe lala, Ais 29:10

ana pimi tol nagane sa naþa kilamarala la sike na, ana pe apisu kilale re sur poli, kiligala la sike na, ana pe amloge kilale re sur poli.” **Naw 29:4**

⁹ A sa mēna visena kiena Parin Suþe Tepet nanua sumo, pogos naþa sinenan sape Ntewa lalua māreraena kiena nasinekar lala naþa asumā amāraran ke naga. E pogos nene naga piun tai Ntewa, sape “Suþe, kiau nasinekar la nene silaga asumā amloge ke pon kiela pupia þaþagena lala, ana nesape neviun tan ko vena okila sane kiela na logewoena la nene vim sane suri tai naþa kila kare ruru la nenaga, kan la ke sina ga, kila sane pe apisu kilale re sane kiela nasinekar la asike ga lavisin la poli.

¹⁰ *Ana popon sane okila kilamarala imi þala, vena ve akilia re si avisu kilale sur lala, a okila naþa kiela nasinekar la amāraran naþa ayumāe koren ga, awar sur urmi la e māsila.”* **Yauena 69:22,23**

¹¹ Ana e lepas kiena ne le Yu lala, Ntewa pe koven plan la re poli, ana pe lelaga naþa, la apiowa towe māga. Ana napiowaena kiena la nene, kila narui Ntewa tamalia la naþa pe ape le Yu re la poli, a pogos naþa le Yu la apisu Ntewa sinena miye mēna yaru taþena la nene, apisu piowa ga, apieluen la, ana kila amāraran vena la mēna ga monar aim amesmesu ke sina ga amio Ntewa.

¹² Ana na nene kana kinasa sane le Yu lala kiela þelaga nene, naþa pe amlelaga re e Yesu poli, nanene kila mrapa na viewoena a navisa ruruena kiena ne Ntewa kilia imi tol la naþa pe ape Yu re poli.

A visae le Yu lala, la mēna alelaga, alelaga vano-o tol marana naþa Ntewa pisaaria, yoko kilia kila naþa kiena navisa ruruena lala aim ave keviu manenea.

¹³ Pogaga narui, sineun nesape nevisa narin visena tai e lepas na pun amiu la naþa pe ape Yu re poli. In na nepe nalologena naþa Ntewa pisirlua inu vena navanon nevisawal kiena lologena wo

van amiu, a naga pe yumāena tai naþa nomāraran ruru kilaena, komin naþa nepisu po paþisi.

¹⁴ Nanene komin naþa nepisu sane pog naþa nemlologon ke pan amiu naþa pe ape Yu re poli, asumā amlelaga, a kila naþa imimi le Yu laþasa sinelan asape la mēna monar ava loyumā ea, ana la mēna amlelaga.

¹⁵ Sumo na, Ntewa pilon māsina pa le Yu lala, a nanene kila naga pisu la naþa pe ape Yu re poli la rui, naga sitom sape kilia kila kiela mrapa aim ave mara wo sina amio naga.

Ana visae le Yu la avilon la a la mēna awasupela puna Ntewa, vera wo na wo, komin nagane la sa ga naþa amarmare rui, ana visae alelaga e Yesu, yoko aim sa naþa amal sina.

¹⁶ Yoko nevisa þakaiwa tai e yo nene e lepas na mralaki þesia naþa tesumā toþar pa e yumā na leniena, tepisa potena vanonia pa Ntewa, teyawawoia ve sur wa. Ana pogos naþa toþar þesan mralaki pa Ntewa, kila sane mralaki taþena mēna la naþa pe toþar re poli, lala mēna ape wa, ape kana Ntewa. Ana yermarua kiena le Yu lala, la sane mras þesia naþa apa þesan e yumā mēna Ntewa, a kila sane le Yu la naþa aim sirau, la mēna ga ave kiena ne Ntewa. A yermarua la nene, la sane purlaki tai naþa sumā kapur ke e lokove kana Ntewa, a visae purþesa ve kana Ntewa, yoko korowas la naþa avim sirau la mēna ave kiena ne Ntewa.

¹⁷ Sanene, purþes nene amio korowas lala naga kana kinasa yeririna kiena ne Ntewa lala, sane le Yu lala. Ana siraunia, Ntewa pisu korowas laþasa piowa ga, ana peve plan la, a pa te plan ruru korowas nen laki taþena tai naþa sike ga yomarua, ana þar pimi, a teruruia piar la panon purþesia naþa sike lokove, vena kus lelen korowas la naþa peve plan la rui.

Ana korowas taþena la naþa pimi sikol e purþes nene, kinasa sane kam la naþa pe ape Yu re poli. Amiu na pe amolue re e purþes nen yeririna kiena ne Ntewa napo poli, ana naga sinenan sape amiu mēna monar asikol amiu amio la loyumā

e kana lokove, vena amiu punu ga awar kiena navisa ruruena lala.

La naþa pe ape Yu re poli, la taþatete akilia awarwarlan naþa Ntewa þere la

¹⁸ Sanene kam naþa pe ape Yu re poli, kam na monar ve awarwar amiun re naþa Ntewa piran amiu amio kiena yeririna lala, komin naþa amiu na pe ape purþes re poli, ana kam na ape korowas ga la naþa Ntewa sikol amiu e purþes nene naþa sike pa sumo rui. Korowas lala pe kila re purþes mali poli, ana purþes ke narui naga sumã kila korowas la amali.

¹⁹ Sa nene, pe pon re kam na asitom asape kam apo poli, ana asape, Ke, Ntewa na sinenan imimi paþisi, ana peve plan korowas laþas petan purþes nene vena kila sane mekilã mesikolia.

²⁰ Lelaga naþa Ntewa peve plan korowas laþasa, ana kila ga pa le Yu la naþa pe amlelaga re e Yesu poli, a pe lelaga naþa sinenan sape amiu akilia asikol amiunia, ana nanene pe komin re naþa akila yuãna wo laþas poli, ana komin naþa asumãl m̃arera e kiamiu viawaena e naga. Sanene, ve avilaven re naþa apimi sane yeririna lala kiena ne Ntewa, ana monar ava ruru amiu asumã asitom ruru sur wo nene naþa Ntewa kila pan amiu. A monar maraãe amiu ruru m̃ena ga,

²¹ komin naþa sane Ntewa koven plan korowas marua la nene naþa kiena yeririna la naþa pe amlelaga re poli, yoko naga kilia koven plan amiu m̃a nenaga korowas viu lala maran va taaga sa ke ga, visae ve amiu awar re mras wo lala.

²² Sanene, e nene tevisu þelaga kiena ne Ntewa e lepas ga luwoka. E kana lepas tai, kiena sinemimiena m̃arera na m̃arera pan la naþa amloru, naþa pe asmãl re m̃arera e naga poli, sane le Yu lala. Ana e kana lepas taþena, naga pe lemam paþisi pan la naþa pe ape Yu re poli, naga la naþa akekarania a asumã ataveve ruruia. Ana la m̃ena ga visae ve asumãlu re m̃arera, naga kilia te plan la sina ga vetan purþes wo nene naþa asumã asikol la ea.

²³ Nanene naga kila pa le Yu la rui. Pe amlelaga re poli, ana te plan la, ana visae avilopu la ga, akilia awasuþela, ana

Ntewa kilia sikol ruruena sina e purþesa sane kiena yeririna ruru nena la napo.

²⁴ Naga kila sanene rui pan amiu naþa pe ape Yu re poli, komin naþa amiu na sane korowas nen laki na yom̃arua, ana naga þere amiu apimi, sikol amiu e purþesa naþa sike e kana lokove, ana asikol amiu amio navisa ruruena naþa naga sinenan sape la van kiena yeririna lala. A visae kila van amiu þisi, yoko kilia kila m̃ena van le Yu la naþa naga te plan la, komin naga kekaran sikol ruru la sina e purþes nene naþa asikol e naga nanua sumo rui.

Ntewa sinenan sape le Yu lala atol natamaliaena

²⁵ Erau lala, sineun nesape nevisawal van amiu la naþa pe ape Yu re poli, sane monar avisu kilalea sa naþa Ntewa pe koven plan re kiena yeririna la nene poli, naþa le Yu lala.

Lelaga sane asumã ape þarm̃arera ke ga wa a yepela mavin lelagaena, ana naga mligan la towe m̃a ga sumo, a sumã kila ke naþa amiu naþa pe ape Yu re poli akilia alelaga, akilia aim ave moki loyom̃a vano o tol pupia maran naþa Ntewa sinenania. Sur nene sane sur tapolou tai naþa yar la pe akilia þesan re poli, ana nagane Ntewa kila meraravan ruruia. A monar akilia sur nene, komin pe pon re awarwar amiun poli, asitom asape Ntewa sitom amiu ga, ana pe kekaran re si le Yu la poli.

²⁶ Pe sa re nene poli, ana yoko naga tamalia la na wa, sane visena na Siriena Wa tai, naþa pisa sanini, sape

“Yar na tamalia itaen yeririna lala kiena ne Ntewa yoko m̃alivi ga e kieta yo, e kieta pupia pulkumali nene Yerusalem metava e tavie naþa Saeon.

Ita lus lala kiena Sekop, ita le Yu lala naþa kieta napiowaena la moki paþisi, ana yoko naga ke narui imi war plan make kieta nakoena lala, kila ita towo sina.” *Ais 59:20,21*

²⁷ Visena taþena na Siriena Wa tai pisawal navisaarena kiena ne Ntewa tai e m̃ena e lepas nene, naþa pisa sanini, sape

“Kiau navisaarena pan la sike pa rui,

sape yoko nowar plan kiela mlamulena viowa lala, neviewo la make ga.”

Ais 59:20,21, 27:9

28 Pogos naþa Lologena Wo pimi m̃alivin le Yu lala, la pe sinelan re poli, ana e lepas tai naga po, komin naþa kila sane kam la naþa pe ape Yu re poli, Ntewa mla towe pulmas pan amiu vena alelaga. Ana e kana lepas taþena, naga m̃ena piowa ga, komin naþa kila le Yu la apim si sane nasinekar kiena ne Ntewa lala. Ana Ntewa taþatete kilia visu la ave kiena nasinekar silaga, naga monar sinena ye la sina, komin naþa naga taþatete sinen p̃esan kiena visaarena wo la naþa kila pan li marua lala kiena ne kiena yeririna la nene, le Yu lala.

29 Ntewa pisaar navisaar ruruena la pan la p̃isi rui, a naga pio la ape kiena rui, a yoko naga taþatete kilia vilon sina ga kiena sitomena pogos tai.

30 Sanene, naga miyuñae e ita sanene. Nanua sumo, kam naþa pe ape Yu re poli, kam na pe amlalaga re e Ntewa poli, ana pogos naþa imimi le Yu la imimi pe melelaga re e Lologena Wo poli, nanene kila kiena mrapa vena sinena ye amiu.

31 A pogos naþa naga sinena miye amiu sanene, kila naþa imimi m̃ena memlelaga e Lologena Wo, ana yoko naga kilia sinena ye imimi sina.

32 Nane sitomena kiena ne Ntewa sanene narui. Nanua sumo naga tañan naþa ita punu ga teyal e mrapa naþa pe sinetan re logeen kiena visena poli, kila sane naga kilia sinena ye ita, kilia were ita punu ga teim teve kiena.

33 Erau lala, navisa ruruena lala kiena ne Ntewa e ita keviu paþisi! Kiena manmaruaena a kiena kiliaena apa manene laa metava! Kiena sitomena la merorol paþisi, a kiena p̃elaga la apowo manene laa!

34 Sa naþa visena na Siriena Wa tai pisa, pisape

“Pe yar re nena tai naþa torokin tol ya naþa teke e sitomena kiena ne Ntewa.

Pe yar re nena tai naþa torokin kilia la visena na iilarena va Ntewa.

35 *A pe yar re nena tai naþa kila po pa Ntewa torokin naþa kilia kila Ntewa monar lamaran si navisa ruruena wo la vania ve sa naþa naga suñã p̃ar ke pan ita.”* *Sop 41:11*

36 A nesikol visena nene, nesape: Kieta Ntewa, naga taaga pe purp̃es nen sur make ga, naga taaga pe m̃areraena na sur make ga, naga taaga pe luas nen sur make ga, ana popon ita punu ga teyeluar luen ga naga vano ve p̃isi re pogos tai.

12

Pelaga wo kiena yaru naþa mlelaga

1 Erau lala, sa naþa Ntewa sinena miye amiu ruru nena ga, kila po pan amiu paþisi, sineun neviun manene van amiu vena monar atañan kiamiu malena wetelu vania. Monar ave wa ruru wo, sa naþa amiyawawo tasnemiun pania sane kuþaþaena tai naþa amla pania. Naga pe pe kuþaþaena re sane sur mali tai naþa añem̃ar mare, ana naga pe kuþaþaena naþa sane mali, a yoko Ntewa kilia kekaran manenea. Naga ke narui p̃elaga mesmesu na kilaen lotena va Ntewa naþa mesmesun naþa akila.

2 A ve atañan re sane naviowaena lala na yomarava nini awere amiu vena ataveve kiena p̃elaga, ana silaga, monar atañan Ntewa kila kiamiu sitomena la imi ve urviu sina. Sanene, yoko kiamiu p̃elaga kilia vilonia, kilia imi wo silaga, a yoko akilia ayaloro ataveve nasinenanena kiena ne Ntewa, naþa po, merarava a mesmesu naþa mesmesu silaga.

3 Nepisawal visena la nene pan amiu, komin naþa Ntewa pe lemam pan inu, mligan lua inu, mligan yuñãena nene e luñau narui. A nesape nevisa re m̃ena suri tai van amiu, sane pe pon re si naþa asuñã akila kiamiu sitomena apa manene metava poli. Tekila kiena yuñãena sanape, ana kieta sitomena la monar mesmesu, monar su ga tano.

4 Taþatete tevisave ita na tepo laa taulu taþena lala, komin ita na sane tas nen yaru taaga, naþa kana korowasa la asuñã

ga, ana korowasa la peve taaga nene kiela yumāena na kilaena la susumā ga.

⁵ Sane ita moki, ana Kristo p̄ere ita make ga tepim tepe taaga, ana sane inu neṗasine ko, a ko oṗasine inu.

⁶ A Ntewa pe lemmam pan ita, a tamān nakiliaena taṗena lala pan ita, naṗa sane nalaena lala naṗa naga kian plan pan ita vena teyumāe temio. A ita veve taaga monar tomāreran teyumāe temio ya naṗa mla pan ita. Sanene,

visae Ntewa tamān van ko sape kioṃā, ko na ove navisawalen visena naṗa mla pan ko, ana monar okila omio pupia lelagaena naṗa sape sane kiena visena nene pe lelaga paṗisi,

⁷ pona visae kioṃā, ko na ove naiilaen yumāena na sumāre, monar okila omio kioṃā māreraena wetelu, pona visae kioṃā, ko na ove navianena yaru e visena kiena ne Ntewa, ko na monar yepemā māen ruru kilaena,

⁸ pona visae kioṃā, ko na ove naiilaaren sitomena kiena yaru lala, ko na monar ositom urmin kilaen, pona visae kioṃā, ko na ve nalaen naiilaena, monar owar ve moki, pona visae kioṃā, ko na ove nasumonen yaru lala e yumāena kiena ne Ntewa, ko na monar ve omalum re, pona visae kioṃā, ko na ve naiilaen la naṗa asike e pog mārera, ko na monar okekaran kilaena.

⁹ A naga ke nene narui p̄elaga wo taṗena la naṗa akila:

kiamiu sinesiena e yaru taṗena lala monar ve lelaga, monar aure vetan p̄elaga viowa lala, monar auarar ruru p̄elaga wo la mārera,

¹⁰ monar avinaia amiu sane ave namratava taaga ga, monar akilali naṗa avisu sane ane yoko kilia kila ruru p̄elaga navatanonena va la ga wa,

¹¹ ve atamān re naṗa kiamiu sitomena mārera na kilaen suri wo la kovio sina vetan amiu, monar akila sane kapi vivaga sa Ninuna Wa sumā vivaga ruru e amiu,

¹² monar akekarān navisaarena kiena ne Ntewa naṗa kiamiu sitomena wasinea sane yoko kila wo van amiu sa ga naṗa naga pisa,

pogos naṗa avane naloge viowaena, monar akila kiamiu sitomena ve piavi,

monar alen silaga,

¹³ pogos naṗa li nalelagaena taṗena lala limala plasan suri laṗasa, monar akekara aliureure suri van la,

a monar akekarān visuaren yaru taṗena lala e māmīu umā.

¹⁴ A nanene suri si laṗas nanini narui naṗa monar asitom ruruia vena kilaen va yaru taṗena lala:

visae laṗasa asumā akila kare amiu komin naṗa amlelaga e Yesu, monar akila wo van la. Ve avis re viowa van la, ana aviun Ntewa visa ruru la,

¹⁵ visae laṗasa amloge po komin suri nowo tai, amiu mēna monar akekara amio la,

visae laṗasa asumā atagin ke sur tai, amiu mēna monar atag amio la,

¹⁶ visae amiu amio taṗena lala, monar asu ruru ga amio la naṗa kiamiu sitomena ve taaga ga,

visae ayumāe amio taṗena lala, ve aligan amiu re metavan la, sane amiu na apo, ana akekarān ga narin yumāena lala, a akekarān ayakol amiu amio yar la naṗa ave torokaki, visae akila suri laṗasa, ana ve asitom re avisave ape manmarua, ana akila kiamiu sitomena vito su ga tano,

¹⁷ visae yaru laṗasa akila viowa van amiu, ana ve akila maran re si naviowaena van la, ana silaga monar asitomālia vena akila suri punu ga naṗa yoko yaru la akilia avisu kilale asāpe po a mesmesu,

¹⁸ a visae kiamiu suri viowa tai sike likan amiu amio yar taṗena lala, monar akila suri make ga naṗa sike e limamiu vena were si sumārena imi sike pun amiu punu ga.

¹⁹ Erau lala, sineu si amiu paṗisi nane nepisa sur la nene pan amiu. Laṗas sina sanini, sane:

“Visae laḗasa akila viowa van amiu, ana ve akilali naḗa ala nakoarena van la. Akilia aligania van Ntewa vena naga liḗere mare la sirau, komin visena tai sike e Siriena Wa rui, naḗa Ntewa sape,
in ke narui naḗa yoko nela nakoarena van yeririna lala, inu ke narui naḗa yoko nelamaran va la naḗa akila ke piowa.” *Nav 32:35*

²⁰ A sanene, visae kiamiu nasinekar la asuḗa ga, monar akila ruru la, sa naḗa visena na Siriena Wa pisa, naḗa sape
*“Visae kioḗa nasinekar visokaria, ola kinnanena vania, visae moto karia, ola wii vania. Visae okila sanene, yoko okila naga mawan kiena ḗelaga viowa vaḗisi,
vano vano-o pona kekaran naḗa amiu lua ave erau wo sina yo.”* *Pakaiwa 25:21,22*

²¹ Taveve suri la nene, nepisa sanene pan amiu, nesape ve ataḗan re ḗelaga viowa taulu amiu, ana monar ataulu ḗelaga viowa e kiamiu ḗelaga wo lala.

13

Li nalelagaena la monar avatanon yerkawa lala amio ḗarin suḗe lala naḗa Ntewa pisir plan la

¹ Nagane sineun laen visena laḗasa e lepas kiena li nasumonena lala. Tekilia tesape Ntewa na mon manene laa metava, naga pe suḗen ke suri punu ga, a naga ke narui ḗarin suḗe taḗena la naḗa asike ne, mla māraena pan la. Sanene, ita li na lelagaena make ga monar tevatanon ḗarin suḗe la nene, monar telogear la.

² Yaru la naḗa visae asuḗa akilali naḗa avisaluḗar ḗarin suḗe lala, asuḗa apisalulḗar ke suri naḗa Ntewa pisirplanina, a yoko Ntewa taḗan ḗarin suḗe lala akilia ala nakoarena van la vanonia.

³ Parin suḗe lala, Ntewa pe pisiriplan la re poli vena kilaen yeririna wo la amarau, ana naga pisiriplan la komin la naḗa asuḗa akilaro ke navisaluaena. La ke nene narui monar amarau, komin naḗa visae ḗarin suḗe tol la yoko la nakoarena

van la. A visae sinoḗan sane ve omaraun re ḗarin suḗe, yoko monar okila mesmes ga e ya naḗa yerkawa la apisa, ana yoko ve akila re viowa van ko, yoko akekaran ko.

⁴ Ntewa pisiriplan la sane ape kiena yaru na yuḗaena lala, vena kilaen yuḗaena wo naiilaen yeririna lala, a visae sinoḗan kilaen ḗaruḗa, monar ovisuar ruruia, komin naḗa asuḗa aḗarar ke ḗena plaki, ana pe aḗarar korenan re poli. Ntewa pisiriplan la, mligan e limala vena ala nakoarena van la naḗa akila piowa.

⁵ Sanene, popon tevatanon ḗarin suḗe lala, komin naḗa pe pon re tekila viowa poli vena ala nakoarena van ita. A nekilia sane kieta sitomena suḗa pisu kilale ke ḗena rui sape popon manene visae tesuḗa tekila ke sur make ga wo mesmesu silaga.

⁶ Taveve visena la nene, popon tekekaran toul takis lala naḗa monar tela va ḗarin suḗe, komin pog naḗa ḗarin suḗe kila kiena yuḗaena, suḗa kila ke yuḗaena naḗa Ntewa mligan vena akila.

⁷ Sanene, monar akila sur punu ga naḗa mesmesun akila. Visae kilavaru na takis e lepas na kilavaru naḗa tesuḗa tetauluia, pona kilavaru tai naḗa monar tokoan vanon sur laḗasa, na monar toulia. A la naḗa apuarar ke yuḗaena kerkeviu lala, pona kiela kia pa metava loyuḗa e ḗarin suḗe lala, monar tekekaran la, mesmesun ga naḗa tevatanon la.

Li na lelagaena lala monar akila wo va yaru taḗena lala

⁸ Suri taḗena tai, naga e lepas na lapui la naḗa yaru la asuḗa akila. Visae kioḗa lapui teke e yaru tai, monar olamaran vania torokin ga ya naḗa amiu lua apisaaria. A popon ositomyuli ḗena sane kioḗa lapui teke ḗena e Ntewa, komin naga mla suri tai pan ko keviu manene rui. Suri nene naga sinesiena, a ko na monar olamaran ruru va yeririna taḗena lala. Monar sineḗa sisi la naḗa asike lavisin ko, komin yaru naḗa kila ke sanene, naga

sane naga mlogear make navisaluaena kiena ne Ntewa rui.

⁹ Visena kar la moki sike loyũa e navisaluaena, sane la nařa apisa sanini, asape: Ve okila re kolau, pona ve owenřar re yaru mare, pona ve ovinau re, a ve sinemřa sun re suri kiena yaru tařena, a suri tařena la ne sanene. Ana visena na visaluaena make ga, asike vatanon pupia purřes nen navisaluaena tai nařa pisa sanini, sape: Monar sinemřa si yaru nařa sike lavisin ko, okila wo vania sa nařa osuřa okila ke sina ga pan ko.

¹⁰ Yaru nařa visae sinena si kemua yaru tařena lelaga, yoko naga tařatete nena kila sur nařa viowa vania. Sanene, řelaga na sinesiena yaru naga kilia kila sa nařa sane okilia ologear make visena la nařa Navisaluaena pisa.

¹¹ Ita na monar tekila ga řelaga wo la nařa, komin nagane, pog pa ke narui. Monar tevisu kilale sane lavis pogos nařa tesuřal ruru narui, ve tomomalio re sina. Pogos nařa ita temlelaga mare ga na wa, ita tesitom tesape yoko Ntewa tamalia ita vetan yomarava nini pogos piavi ke ga wa, ana nagane, pimi ke lavisu rui.

¹² Nekilia nevisa sanini nesape lavis yemalo řisi, yomerarava suřa pimi řalivi, ana popon tořisin řelaga viowa lala na yemalolo, a monar towar sur na kilaen mara na řelaga mesmesu na yomerarava, vena tekilia tomolue tevano vena tekila mara van sur viowa la nene.

¹³ Kieta malena monar mesmesu ruru wo, torokin nařa tepe yeririna lala nařa tesuřa temial ke e yomerarava, a yoko monar teligan řelaga viowa lala. Ve tekila re řařagena kar la nařa apulen ga kekarena na yomarava a yaru la amun wii vano-o akilalu řarila lala. Ve tesuřa tekila re suri nařa yermřene lala amio sira lala asuřa aureurela kar ga sa ga nene, a asuřa akila ke řelaga namname lala. Ve tesuřa teveveyun ita re, a ve tesikol ita re e vielueena lala.

¹⁴ Monar teligan řelaga viowa nařa tepaeme temio, a pe tesitomřal re na taveveen kiena nasinenanena poli, ana sa nařa tesuřa temiyen ke mřata kulsota

nowo e marana yeririna lala, monar teyen řelaga mesmesu lala kiena ne Suře Yesu Kristo e kieta malena, vena yeririna la avisu sane ita tepe kiena yeririna kemua la lelaga.

14

Popon li nalelagaena lala ve asuřa avisa kare la re sina vanon ga narin sur lařasa

¹ Erau lala, sineun nesape akilia sa nařa nemloge rui sane pupia visena tai sike e amiu nagane. Sane lařasa, kiela sitomena mok liu e sur lařasa, asape popon akila, pona viowa ga nařa akila, pona amaraun asape visae akila, sa řis Ntewa ve kekaran la re sina.

Sineun nesape la ne sanene, nepisu sane la pe apiawa re mřarera poli wa, ana pogos nařa asike amio ita, ve tekilali re nařa takawe manene laa, tekekaran nařa toure la.

² Sanene, yar lařasa akan kare ga kina-nena lala amio mřena tata punu ga lala, a yar lařasa asitom asape Ntewa sinenan sape avalia kinanena lařasa, pona avalia tafa.

³ Ana sineun nesape nevisa van amiu visae ko tai nařa okan ke ga tata, ve ovisu re viowa e yaru nařa palia, a visae ko tai nařa opalia tata, ve oliřere re naga nařa suřa kania, ovisave yoko Ntewa liřere naga vanonia. Ntewa kekaran make ita ga, ana amiu mřena ga monar akekaran amiu.

⁴ Li nalelagaena make ga asuřa apisu ke ga Ntewa asape naga pe kiela suře, ana naga ga kilia visa van la visave la veve taaga akila nene pona ve akila re nene. A sanene, pe pon re ita ga teliřere ita si poli. A Ntewa pisu yeririna lařasa akan tata, a lařasa pe akan re tata poli, ana naga kekaran la make ga, komin naga kilia nařa sape yoko Suře Yesu kilia suřa iila la silaga vena asuřa asuřal mřarera e naga.

⁵ A naga nene maran taaga e lepas na legiena lala. Yar lařasa amla legiena tai asape pe kiela legiena wa, a yar lařasa apisu legiena lala asape maran taaga.

Naga nene naga pogaga, ana ita make ga monar ita veve taaga tekila kieta sitomena lala, ana tesu ea, ana ve tom̄areran re yaru taveve kieta sitomena.

⁶ Yar naña m̄areran sape la legiena tai sane kiena legiena wa, naga kila vanon sinenan sape visirlua kia kiena ne Ntewa ea. Yaru naña kekaran sape kan suri make ga, naga pisa ke potena pa Ntewa vanonia, ana pogos naña kinana, sum̄a pisirlua ke kiena kia. Yar naña kila sane palia kinanena laṗasa, naga m̄ena ga sum̄a kila ke naña pisirlua kia kiena ne Ntewa, ana naga m̄ena sum̄a pisa ke potena pa Ntewa e kinanena taṗena la naña sum̄a kania.

⁷ Monar tesitom̄alia, sane pe yar re tai naña kilia sike e yomarava nini sane yar taaga ga poli, vena kilaen sur make ga sa naña naga taaga sinenania, a pe ita yar re tai naña visae mare, ana sur nene pe kiena naga taaga ga.

⁸ Pe sa re nene poli, komin visae temali, temali naña tevisirlua kia kiena Suṗe, a visae temare, temaren naña tevisirlua kiena kia. Sanene, sur make naña tekila, monar tekila amio sitomena naña sane pe tekila re ga kieta nasinenanena poli, ana ita tepe kiena ne Ntewa, monar tetaveve ga kiena nasinenanena.

⁹ Nanene komin nanua ne, siraun naña Kristo mare, na sum̄alu mal sina, ana kila naga pimi pe suṗen kiena yeririna la naña amare, a pe suṗen kiena yeririna la naña amali, ana silaga monar tesu ga vatanon kiena nasinenanena.

¹⁰ Ana sanene, pogos naña nalelagaena tai sum̄a kila sur la taveve ṗelaga marua kiena ne le Yu lala, ana sum̄a mliṗere ke nalelagaena taṗena naña pe asum̄a akila re poli, naga nene na piowa manene laa paṗisi. A pogos naña yar tai ve kila re sanene, ana naga sum̄a pisu ke piowa e yar taṗena naña kila, naña sane kiena puruvi tai loyum̄a e namratava kiena ne Ntewa, na nene pe ṗelaga na mawaen tai.

Ve tesum̄a teliliṗere ita re, komin naña yoko ita make ga tesum̄alu tese marana Ntewa na wa, a yoko naga ke narui naña

visuveve ruru ya naña ita make ga tekila.

¹¹ Sur nene sike e Nasiriena Wa la rui, naña Ntewa pisi, pisape

“In na nemal na nesike ne, ana nekilia nevisa ruru sane pogos na pimi ke ne naña yoko yar make ga akinai vamon inu,

a yoko yar make ga avisawal avisave in ga taaga nepe Ntewa.” Ais 45:23

¹² Sanene, yoko ita make ga teim e marana Ntewa, a yoko monar ita make ga veve taaga tevisawal sur la naña tesum̄a tekila, a naga ke narui yoko visuvevea.

Monar ve okila re kioṃa erau tai kiena naviawaena loru

¹³ Taveve sitomena la nene, ve tevisuveve manene ita re sina ga, tevisayu ya naña yar taṗena kila, tesape po pona piowa ga. Ana ya naña ita li nalelagaena lala monar tesitomia vena tekila sina van ita, naga sanini, sane monar ve tekila re sur tai naña kilia kila nalelagaena kila pal mrapa pona kilia kila naga loru e mlamulena viowa.

¹⁴ Sane visae nesitomveve inu, nekilia nesape nesum̄alar m̄arera ruru na nesike ne nemio Suṗe Yesu, ana nemlelaga m̄arera nesape taṗatete sur tai naña monar tevalia, ve takan re. A visave nalelagaena tai war sitomena visave kinanena tai pe torokin re kan po, naga pogaga, ana kana kinasā sane monar valia ruru nenaga, a ita taṗena lala monar tetam̄an naga taveve kiena sitomena nene.

¹⁵ A visae ositom ovisave kinanena la torokin ga nakanena, okilia osum̄a okania, a visae kioṃa puruvi taṗena tai naga valia, ve okilali re naña ovisave naga m̄ena ga monar kania. Visae peraga, yoko okilia okila kare nena kiena sitomena, a naga nene naga pe ṗelaga wo re kiena ne ita yar la naña sineta sisi ita poli. Monar tesitom̄al tevisave Kristo maren nakilaen kieta malena imi wo, ana pe pon re tetam̄an narin sitomena e lepas na kinanena imi ve sur keviu naña sum̄a kila kare si kieta malena poli.

¹⁶ A taṗena sina, visae sur tai naña ko opisu sane pogaga vena kilaena, naga pogaga, ana pe pon re naña osum̄a okila

þisi na kila kare sitomena kiena nalelagaena taþena tai, vano-o kila yar taþena lala avisa kare kieta kia ita li nalelagaena lala vanonia.

¹⁷ E lele nene tesuþña tepisayu visena la na lepas nene naþa sape yoko tekilia tomun ya pona takan ya, pona monar tevalia namunena ya pona kinanena ya, ana monar ve sineta þesan re tesape nanene naga pe sur keviu re tai nene poli loyuþña e nasuþenena kiena ne Ntewa. Ana kana pupia sur ne lala, nane naþa ita tekila þelaga wo na malena mesmesu, a tese suþñare temio yar taþena lala, a tetol kekarena naþa Ninuna Wa suþña mlavia.

¹⁸ A pogos naþa tela sur la nene ve keviu e kieta sitomena, tekila ke yuþñaena wo naþa Kristo sinenania, ana yoko Ntewa kekaran ita vaþisi vanonia, a yoko yar taþena lala avisu sane po paþisi.

¹⁹ Sanene, silaga ita make ga monar toþareran li naþa tekila þelaga wo naþa kilia ligan suþñare sike e ita li nalelagaena lala, a naþa aiila ita make ga kieta sitomena la imi marua nena napo.

²⁰ Kinanena naga sane pe sur re ta nene poli, ana pe pon re tekila naga imi ve sur ta naþa kila kare ke sina ga yuþñaena wo naþa Ntewa kila e malena kiena nalelagaena taþena la rui. Nepisa sanene, nesape kinanena make ga po torokin kanena, ana pe pon re okan sur tai narui yar taþena visuia ana kila naga loru, naga kila sur tai naþa sitom sape pe popon re naga kila poli.

²¹ Ana kana þelaga wo na kilaena naga sanini, sane ve okan re tata, pona ve omun re kuruta, pona ve okila re si sur tai, visae pogos naþa kioþña puruvi visuia, kilia kila kare naga, kilia kila naga loru.

²² Sanene, visae kioþña sitomena laþasa e laþas na narin sur naþa ositom osape pogaga nakilaena pona ositom osape pe pon re okila poli, naga pogaga, ana owarar ruru suþña ve kiamiu ga amiu lua Ntewa, ve ova olologon re e yo make ga. Yar naþa kila ga ya naþa naga kilia sape mesmesun ga naþa kila, yoko Ntewa kekaranja, a naga pe mloge re piowagan poli sape kila sur piowa.

²³ Ana visae yar nene kiena sitomena veve lua e lepas na ya naþa kilia kania, ana kan ga, yoko Ntewa taþatete kekaranja. Nanene komin naþa yar nene sitom rui sape kila sur nene, pona pe po re e marana Ntewa poli yo, ana pe sur korena ga, naga kila ga. Sanene, naga kila pa mlamulen piowa narui, komin naþa naga pe miyuþñae re amio kiliaena e ya naþa po pona piowa e navisuena kiena ne Ntewa.

15

Aþareran li naþa akila ke sina ga wo van amiu

¹ Ita mokliu naþa tesuþñalu þarera ga tesike e Kristo, a pe kieta sitomena peve lua re poli e lepas na narin sur lala naþa li nalelagaena taþena lala asuþña apeveyu ke ea. Ana ita na sanene, monar ve tekila re ga ya naþa sinetan kilaena, ana monar tekila kieta sitomena la ve piayavi ruru wo va nalelagaena taþena lala naþa asitom ke asape taþatete akila sur laþasa naþa tesitom tesape tekila woga ga.

² Ita make ga, monar tesitoþñal li nalelagaena taþena la naþa asike lavisin ita, a monar tekila ya naþa la asitom asape po, vena akekaranja, a vena iilaen kiela malena amio Suþe.

³ Visae tesitoþñal Kristo, naga sike e yomarava naga pe kila re ya naþa naga sinenan sape kila poli, ana naga pane pog þarera yam mokliu, akila pania sa naþa visena tai na Tus na Yauena pisa, naþa yar tai pis pa Ntewa, sape

*“Visen viowa la naþa akoven pan ko, akoven mþena pan inu maran taaga.”
Yauena 69:9*

⁴ Visena la ne sanene, naþa asike e Nasiriena Wa la nanua sumo, asiria vena vian ruru itaen la naþa teim sirau, ana touloia, akilia akila kieta sitomena la þarera ruruia vena ita mþena tekilia teva teyupor e pog þarera lala. Visena la nene vena iila itaena, akila tekilia ruru tesape yoko monar tetaulu sur make la naþa Ntewa pisaaria.

⁵ Sanene na, nemlen ke pa Ntewa vanon amiu, komin naga ke narui naga pe purþes nen sitomena viavi, naga ke narui naþa kilia iilar malena kiena yaru, a

nemlogin ke tania vena kila sane asuũa ataveve ðelaga kiena Kristo Yesu, asuũa ruru ga veraga amio ðelaga na ve taagaena,

⁶ naða kiamiu sitomena ve taaga a kiamiu visena ve taaga, ana yoko ayeluar ruru Ntewa, naða naga pe armanane kieta Suþe Yesu Kristo.

⁷ Sanene, amiu le Yu lala, amio kam la naða pe ape Yu re poli, pogos naða asuũa apim ke lele taaga, ana akekarana ga naða aworworun amiu punu ga aim loyũa, sa ga naða Kristo kekarana worworun itaena. Pogos naða visae akila ve sanene, naga pe mrapa si tai naða vena visirluaena kia kiena ne Ntewa.

⁸ A popon naða akila ve sa nene, komin Kristo pitomi e yomarava, pe kila re ga yuũaena pan le Yu la poli, ana kila mēna pan la naða pe ape Yu re poli. Sane e laþas kiena le Yu lala, kila ya naða Visena Wa kiena ne Ntewa pisa, kila naða navisaarena lala naða Ntewa kila pa apua kana le Yu lala, pimi pe lelaga.

⁹ A e lepas kiena la naða pe ape Yu re poli, naga kipianli lemamiena kiena ne Ntewa pan la, kila vena ayeluarda, maran taaga e naða Siriena Wa la apisa. Tai naða pis þesania sike e Tus na Yauena, naða sape

“Nesike likan wolawa lala, nemieluar kioũa kia, yoko nelotun ko e yauena wa lala.” Yauena 18:49

¹⁰ A taþena, sike e Tus Navisaluaena lala, pisape

“Kam wolawa lala, aimi vai amio nena yeririna lala kiena ne Ntewa naða le Yu lala, amiu make ga akekara!” Naw 32:43

¹¹ A tai sina sike sina e Tus na Yauena lala, sape

“Amiu naða pe ape Yu re poli, avisirlua kia kiena ne Ntewa,

Amiu yeririna na yo make ga aieluarda.” Yauena 117:1

¹² A na maro molue kome Tus kiena Aisea, pisayu Navisaarena kiena le Yu lala, sape yoko naga sumon mēna la naða pe ape Yu re poli. Ana visena nene pisa sanini, sape *“Yoko lus kiena yermarua Sese tai mālivi,*

naða yoko Ntewa ligan lua naga metava ve suþen li taþena la naða pe ape Yu re poli,

ana yoko awasinea vena naga kila navisa ruruena kiena ne Ntewa imi mālivin la.” Ais 11:10

¹³ Ana nemlenin amiu sina pa Ntewa, naða tekilia towasine ga kiena visaarena lala, nemlogin vena awasine mēna naga vano-o kiena kekarena make ga a kiena suũare imi ulemamaga e kiamiu malena, ana kila vena māreraena kiena Ninuna Wa kilia yuũae e amiu vena kila sa naða amiu asuũa aþasine ke kiena navisaarena lala, imi uleule va va sa nene.

Pol pisayu pa le Rom lala e lepas na kiena yuũaena naða kila pa la naða pe ape Yu re poli

¹⁴ Erau lala, pe nesitom þele amiu re poli, ana nekilia ruru nesape amiu sinemiu la po paþisi, akilia ruru sur la moki rui, a kam na atorokin naða akilia avian amiu sina e visena kiena ne Ntewa la ve moki.

¹⁵ Sanene, pona ailan towe laa māk nini yo, apisu naða nesuũalu nepisayu sur mārera la moki towe laa pan amiu sane, a nepisayu ke sina ga sur laþasa naða pona kam na asape akilia yo rui. Ana nepisu sane monar nekila ve sa nene, komin Ntewa mligan nakiliaena nakilaen yuũaena nene e luũau vena nekila, sane nalaena wo tai,

¹⁶ vena neim sane yar na yuũaena kiena Yesu Kristo vena visawalena Lologena Wo kiena ne Ntewa va yar la naða pe ape Yu re poli. Nekila yuũaena nene, in na sane yar wa tai naða nemiyuũae ke loyũa e Yuũa Wa mēna Ntewa, nekila la naða pe ape Yu re poli vena aim ave wa ruru nenaga, neyawawo la e kia kiena Ninuna Wa, vena akilia aim sane nalaena wo tai naða pa Ntewa naða yoko kekarana vaþisi.

¹⁷ Sanene, imimi lua Kristo Yesu memiyuũae ke veraga, a nekekarana naða inu mēna nekila ke yuũaena kiena ne Ntewa komþasa.

¹⁸ Ve nevisin re kulin wowe, ana nekilia nevisave noþarwar inu paþisi e ya naða Kristo miyuũaen pimi mālivi kome inu,

komin nagane, imimi lua moņere la naņa pe ape Yu re poli apim lavisin Ntewa, asuņa apatanonia. Nepisawal visena lala, nekila yuņaena moki,

¹⁹ Ntewa kila kile la naņa peve taņena, naņareraena kiena Ninuna Wa miyuņaae, ana kila sane lologena wo kiena Kristo pa vanua make nenaga e yo la moki, siar gar Yerusalem pa nena perina yalen silau pa tol pupia lepas naņa Lirikam.

²⁰ Ana nepisu sane pe torok re poli wa, kiau sitomena maņrera tai toņa e inu naņa sape monar neva laa sane wa. Ana pe nesitom re nesape neva e naņa kia kiena ne Kristo pa pa e rui, komin pe sineun re nesikol yuņaena naņa yar taņena siar pa rui, ana sineun nesape neva e yo naņa yar la pe akilia re naga poli wa.

²¹ Nanene sane visena tai naņa navisawalena Aisea pisawal nanua rui, naņa pisayu Navisaarena, pisape
“La naņa pe yar pisawal re naga pan la poli wa, yoko akilia avisu kilalea, la naņa pe amlogeli re kiena kia poli wa, yoko alogekilalea.” Ais 52:15

Pol maplanar ruru naņa va maļivin le Rom lala

²² Sa naņa nepisa pa rui, yam mokliu naņa sineun nesape neim noņalivin amiu gar Rom, ana nesuņa nekila ke yuņaena la e yo taņena lala, a sur taņena maņa la moki paņisi pano-o pe noņal re kana pulmas tai poli wa.

²³ Ana nagane, nepisu sane kiau yuņaena e lepas nini naņa Esia sane paņisi narui, a sitomena naņa sike e inu kas mokli rui, sane sineun nesape neim noņalivin amiu re, noņape pona woga ga yo narui.

²⁴ Nekila ruru ke nesape noure matan e nini neva yalen sila u gar pupia purvanua naņa Spen, ana nesitom ke nesape yoko nokom pun amiu, vena tekilia tesu re veraga telual pog wo tai sanene temio ita sumo wa. Yoko taņatete nesike ve piavi ve sa naņa sineunia, ana visae akilia akila sur laņasa vena iila inuena e kiau mrapa, yoko nela sina ga kiau mrapa nevano.

²⁵ Ana nanene pe nagane re poli, komin naņa yoko neva nokom ke ne Yerusalem sumo na wa, komin naņa kiau narin yuņaena tai vena kilaen va li nalelagaena kiena ne Ntewa la naņa asike e nene sumo.

²⁶ La asike e pog maņrera tai nagane, naņa la mokliu pe kiela sur re poli, limala korena ga, ana paņas nen li nalelagaena la nae yo make ga naņa Masitonia amio Kris, amloge, ana la ga aņar sitomena nene naņa asape popon akuan kilavaru tai vena iila laena.

²⁷ Nanene sur wo tai naņa akila taveve ga kiela sitomena, ana nepisu sane naga pe sur wo tai naņa monar akila kemua. La nene pe ape Yu re poli, ana e kiela malena amio Suņe, aņar navisa ruruena moki kiena ne Ntewa pimi e la, kome le Yu lala, ana pogos naņa le Yu la nene atol maņa ga pog maņrera, popon la naņa pe ape Yu re poli, akila maran towe van la, aiila la e sur laņas naņa limala plasia.

²⁸ Ana kilavaru nene naņa amiyuwon poloia, amligan e luņaau vena nowar vano, ana pogos naņa neva neligan ruru sike amio le Yerusalem la narui, yoko nowasuņe in sina neim nokom pun amiu gar Rom, siraunia yoko neva yalen sila u gar Spen.

²⁹ A nemninu rui visae pogos naņa noworun amiu, yoko wo na wo van ita make ga, yoko neim nemio navisa ruruena wo kiena ne Kristo la ve moki naņa nevion van amiu.

³⁰ Erau lala, sineun nesape neviun maņene van amiu e kia kiena kieta Suņe Yesu Kristo, nesape asitoņal in ma e kiamiu leniena lala. Nekilia nesape apulemamaga amio sinesiena naņa Ninuna Wa mlavia, ana popon alen wo inu manenea, asikol kiamiu leniena amio kiau leniena naņa noņion ke nesape nelen silaga.

³¹ Pogos naņa nepa netol lepas naņa Sutea vena neva Yerusalem, la mokliu naņa pe sinelan re naņa alelaga e Lologena Wo poli asike ea, ana pe nekilia re nesape yoko la asitom akila ya ne van inu, ana nemie awis pan amiu vena alen va Ntewa kilawo inu e kiela sitomena

viowa lala e inu. A monar alen mēna ga sane li nalelagaena wa lala naṗa asike gar Yerusalem, yoko akekaran ala narin kilavaru naṗa yoko nekian van la.

³² Ana visae sur make ga torokin nasi-nenanena kiena ne Ntewa, yoko nekilia nomālivin amiu amio pupia kekarena na losineu, a yoko nekilia nesu ruru nemio amiu, neva ruru inu sumo wa.

³³ A in mēna nesumā nemlen wo amiu, nesape yoko kieta Ntewa, purṗes nen sumāre, sike amio amiu vano-o ve uro re.

16

Pol pisawal sur laṗasa pa li nalelagaena lala gar Rom

¹ Erau lala, sineun kaloen kiau mākī e visena laṗasa e lepas na kam laṗasa. E lepas na vineta naṗa Vipi, naṗa naga ke narui ṗar māk nene pimi mālavin amiu, sineun akilia sa naṗa naga pe yaru na visuaren yumāena wo tai na ṗegas kiena ne li nalelagaena lala nae pulkumali naṗa Kenkria,

² ana popon akekaran naṗa aworworun naga, aure naga sane vinemiu tai loyumā e namratava māna Suṗe, sane torokin nenaga naṗa ita li nalelagaena lala tekila van ita. Awis aiila naga e ya naṗa naga limana plasania, komin naṗa naga pe sira wo tai naṗa pe erau wo amio imimi moki, miila ruru imimi po paṗisi.

³ Sineun mēna ga nesape avisa kiau pokolulagi pona pokolemalo va sira wo taṗena nene Priska, amio wona na yermēne Akwila, naṗa mepe yar na yumāevaena e yumāena kiena Kristo Yesu.

⁴ Lelaga naṗa, pogos tai nanua ne, nesike e lepas na marena rui, ana lalua akila naṗa lavis akilalu kiela malena naṗa apim atamalia inu, ana nepisa potena pan la vanon paṗisi. A pe in ga taaga re poli, ana ṗegas nen li nalelagaena taṗena mēna laṗasa e lepas nene la mēna apisa potena pan lalua vanon ya naṗa akila ne.

⁵ A pokolulagi pona pokolemalo naṗa nepisa pan lalua, sineun nevisa mēna va taṗena la naṗa asumā loyumā e narin

ṗegas nen li nalelagaena lala naṗa apiora ke lele taaga e mālā loyumā lalua.

Sineun nesape nevisa mēna ve sa nini va la nene, sane kiau erau wo naṗa Eṗanatas, naṗa naga pe yar ṗesa e pupia lepas na Esia naṗa naga mlelaga e Yesu,

⁶ a Maria, naṗa naga kila yumāena wo moki likan amiu,

⁷ a yar lua taṗena na kiau yo nene Antronikas amio Sunia, naṗa nanua ne imimi make ga mesike e yumā na koaena veraga. Nalologena lalua nene, lalua amlelaga e Yesu nanua rui, sumon inu, a lalua aṗar kia wo paṗisi e nalologena taṗena lala.

⁸ Laṗas ke sina ga, nane Ampliatas, naṗa Suṗe kila sane imimi lua mepe erau wo,

⁹ a Uṗanas, naṗa memiyumāe lele taaga memio e lologena wo kiena Kristo, a kiau puruvi wo nene Stakis,

¹⁰ a Apelesi, naṗa pe sur koren ga naṗa pupia na kilaliena pimi pania, ana naga sumālu mārera e Kristo.

A nevisa mēna pokolulagi a pokolemalo va la ne mratava puna Aristopeulas,

¹¹ a taṗena naṗa imimi lua kiamimi visena taaga nane Erotian, a li nalelagaena kiena namratava puna Narsisas,

¹² a sira wo lalua na yumāena kiena Suṗe nene, Traepina amio luena Traeposa, a vineta mēna naṗa Pesis, naṗa sineta si naga paṗisi, a naga kila yumāena kiena Suṗe moki manene laa rui,

¹³ a Rupus, nasumonena wo na yumāena kiena Suṗe, amio anena naṗa naga kila inu sa ga narina nenaga.

¹⁴ A laṗas sina nane Asinkritas, Plekon, Emes, Patroṗas, a Emas, amio mēna puruvi taṗena la naṗa asike amio la,

¹⁵ a naga sina, pe sineu ṗesan re Pilologas, Sulia, Nereas amio vinena, a Olimṗas, amio li nalelagaena wa taṗena la naṗa akila lotena pa lele taaga.

¹⁶ Nekekaran naṗa nepitawe amiu make ga e kiau mākī nini, a amiu mēna monar aworworun ruru amiu, akila kiamiu sinesiena imi kate e namunen pipimiu e sinewoena. A ṗegas nen li nale-

lagaena kiena Kristo m̃ena lala e lepas la nene apisawal asape asum̃a asitom̃al amiu ke e kiela leniena lala.

¹⁷ Erau lala, nepiun m̃areran ke sina ga pan amiu nesape monar avisu ruru la naṓa asum̃a asiar ke veveyuena, akila ke li nalelagaena la amlilip̃ere la, a asum̃a akawe ke visena na vianena la naṓa amiu atol pa rui. A pogos naṓa apisu ruru la, ve ava re lavisin la.

¹⁸ Na nene komin naṓa yaru kar la ne sanene, pe akila re yum̃aena kiena kieta Suṓe Kristo poli, ana la asum̃a ataveve ke ga kiela sinenanena viowa lala. Akilia avisawal sur ve moki naṓa wo na wo, ana visen kiki ga la ne, a asum̃a akilali nena sitomena ken yar la naṓa pe akilia ruru re sur poli.

¹⁹ La punu ga akilia ruru rui asape amiu asum̃a amlogear ruru ke visena lala kiena ne Ntewa, a nanene kila nekekara paṓisi, ana monar avisuar ruruia e lepas na sur naṓa po, monar yepemiu m̃ae ruruia, a e lepas na sur viowa lala, monar ve kala narin namname tai to re nena e amiu.

²⁰ A visae akila ve sa nene, yoko kila mrapa kiena kieta Ntewa na sum̃are, kila Yermare sike vatanon lolamiu lala vena aviemumuia. A kiau leniena nesape yoko lemamiena kiena kieta Suṓe Yesu Kristo sike amio amiu.

²¹ Erau naṓa Timote naṓa imimi lua memiyum̃ae lele taaga, pisa pokolulagi a pokolemalo pan amiu, a la telu nene nae kiau yo, Lusias, Sason, amio Sosipata, la m̃ena apisa.

²² In naṓa nemlarar sur na siriena, nesiri m̃aki kiena Pol nini pan amiu, kiau kia Tesias, a in m̃ena ga sineun nesape nekekara paṓisi naṓa nevitawe amiu e m̃aki nini, e kia kiena Suṓe.

²³⁻²⁴ Pogaga, inu si Pol nene nesiri ne, ana lavis nesiri make kiau m̃aki narui, a pokolulagi a pokolemalo piṓasu ke pan amiu, pimi kome la telu nene, Kaias, naṓa nesike e m̃ana um̃a, a naṓa li na lotena nae e yo nene asum̃a apim ke lele taaga e m̃ana um̃a, a Erastas, naṓa naga yerka

na visuaren kilavaru na pulkumali nene, a kieta puruvi naṓa, Kotas.

²⁵ Ana e kiau visena maro, sineun nesape nela maran si nayeluarena make ga va Ntewa. Nemlen nesape yoko naga la visena la na Lologena Wo, amio naviana wo la naṓa apisayu Yesu Kristo naṓa nemla pan amiu rui, ligan ruru sike e kiamiu malena lala, vena asum̃al m̃arera e legiena na pimi ke ne. Visena wo lelaga la nene, yar la pe akilia re poli e kas la moki ṓaro pa rui, ana nagane Ntewa kipian ita.

²⁶ Nanua, yar la apulo visena lala kiena navisaluaena lala, amninue asape visen lelaga la nene asike loyum̃a e la, ana nagane, mepisawal meraravania, a ita punu ga tekilia telogekilalea. A Ntewa, sane naga naṓa sike nakonua rui a yoko sike sike nena, naga pisaar sape Lologena Wo nene monar va vanua va yeririna na purvanua make ga, vena la m̃ena akilia aloge, a akilia alelaga ea.

²⁷ Naga taaga pe Ntewa, naga taaga pe purṓes nen manmaruaena, a naga taaga naṓa Yesu Kristo kila kieta mrapa na lotunena, vano vano ve uro re pogos tai.

Inu, Pol.

**Maki Nasumo Naþa Pol Siri
Pa Pan Li Nalelagaena Wa
Lala Nae Garu
KOREN
Visayuena Na Tusi Nene**

Komþasnen suniena plas na tusi nini

Maki nini pe maki naþa Pol siri þesa pa le Koren lala naþa amlelaga e Yesu. Naga siria komin suri viowa la suñalu e maliena kiena li nalelagaena lala nae yo nene, a naga mligan maki nene pano vena iila la. Suñare nae Koren, Pol ke narui naga siaria.

Koren naga pupia pulkumali kiena le Kris lala, a naga pe pulkumali keviu na lepas naþa Akaea, naþa meke vatanon þarin suþe nae pulkumali naþa Rom. Yaru nae purvanua taþena la moki asike e nene, a naga pe yo tai naþa yaru la akila ruruia e lepas na kilaen yumãena na tauluen kilavaru, a e lepas na kiela þelaga marua. A la nae yo nene, kiela kia keviu e yomarava komin kiela þelaga viowa lala, a naþa amlotun ke ntewa taþena la moki.

Suri kerkeviu la naþa Pol pisayu e kiena maki nene sanini:

pisayu napiowaena naþa yaru na suñare la asumã amliþere la,

pisayu napiowaena naþa la asumã akila ke piowa pa sira lala,

pisayu mrapa mesmesu na kilaen talovaena,

pisayu sanape e kinanena lala naþa akila kuþaþaena e la van nono lala.

Pol pisatãme kiela naviuniena laþasa, ana pian la e mrapa mesmesu na taveveena vena alotu e suñare, amio m̃areraena la naþa Ninuna Wa suña kian ke pa suñare, a nalelagaena naþa yaru kilia mali sina. Pol kila meraravan naþa kilia ruru napiowaena a navisatãmeena la nene, a pisa meraravan naþa lologena wo kiena Yesu ga kilia la navisatãmeena van la.

E marana na keviu 13 pisayu þelaga na sinesien Ntewa amio yaru lala naþa

pe þelaga keviu tai naþa yeririna kiena Ntewa la monar atavevea. Marana na keviu nene pe komþasnen visena kiena ne Ntewa naþa yaru la akilia ruruia, taulu komþas taþena la na tusi nene.

Komþasnen tusi laþas nene

Visena þesa 1:1-9

Yaru na suñare la amliþere la 1:10—4:21

Mlamulena viowa amio sira, a malena na mratava 5:1—7:14

Li nalelagaena lala a yaru la naþa aminue Ntewa 8:1—11:1

Mrapa kiena li nalelagaena lala na kilaena lotena 11:2—14:40

Yesu mali sina, a yaru la naþa alelaga ea akilia amali 15:1-58

Nalaena naþa aligan va van li nalelagaena lala nae Yutea 16:1-4

Visena maro 16:5-24

Pol sike gar Episas, pisa pokolulagi pona pokolemalo pan le Koren lala

¹ Erau nae Koren lala, inu naþa nesiri maki nini piñasu pan amiu, inu Pol, naþa Ntewa sinenan sape neimi neve nalologena tai kiena narina Yesu Kristo, ana pio inu, pisirlua inu vena nouarar yumãena na sanini.

Nesike e yo nini nemio kieta erau Sos-tinis, ana imimi lua mepisa pokolulagi pona pokolemalo pan amiu punu ga,

² nae suñare kiena ne Ntewa e pupia pulkumali nene Koren. Kam ke narui naþa Ntewa pio amiu aimi vena asikol amiu amio kiena li nalelagaena taþena lala, naþa asutetae asike e yo punu ga naþa asumã amlotun naga naþa kila ita tepe wa ruru rui, nane Yesu Kristo naþa naga pe kieta Suþe ita punu ga.

³ Memlen mesape lemamiãna kiena ne Yesu Kristo a suñare kiena ne Ntewa arimata sike amio amiu.

Pol pisa potena pa Ntewa komin navi-awaena kiena le Koren lala

⁴ Nepisu sane pogos naþa apim ape yeririna kiena Kristo Yesu, lemamiãna kiena ne Ntewa suña miyumãe keviu e kiamiu malena lala, ana silaga nesuñã nepisa potena keviu vanonia.

⁵ Asumã apim apo manene laa e lepas na visawalen Lologena Wo, a asumã apa ke metava e lepas na kiamiu nakiliaena, e mïena ga e lepas na ðelaga wo taþena make ga lala.

⁶ Pogos naþa nepisu nene, nepisu sa ga kiau yumãena la nanua ne, naþa nepian amiu e Kristo, nagane sumã þar ke pupia mrasa.

⁷ Nalaena lala pona namãreraena lala naþa Ninuna Wa sumã kian pan amiu, pe tai re naþa pe atol re poli wa, ana asumã amiyumãe ke amio la po paþisi, komin akirakiravan ke naþa kieta Suþe Yesu Kristo kilia imi mïalivi si e yomarava nini.

⁸ Naga pe pimi mïalivi re poli wa, ana naga sumã miila ita silaga vena tesumãlu mïarera tesumã ga vano-o tol legiena maro nene, ana pogos naþa tesumãlu tese marana ne Ntewa, yoko naga kila naþa naviowaena taþatete se ita.

⁹ Ntewa pisaar rui vena viewo ita, ana tekilia towasine ruru kiena visena nene, komin naga pio ita, þere ita sikol ita teve erau wo temio narina, Yesu Kristo kieta Suþe.

Sumãre sumã mlilipere paþisi

¹⁰ Kiau namratava lala kiena kieta Suþe Yesu Kristo, nesape neviun manene van amiu e kiena kia, nesape aþionli naþa aim ave taaga sina. Popon ve alilipere amiu re, ana amiu, kiamiu sitomena a kiamiu visena monar ve taaga.

¹¹ Nepisa visena la nene, komin la naþa puna yaru nene Kloe apim apisawal pan inu asape veveyuena sike likan amiu, olai lala a vineu lala.

¹² Nemloge naþa amiu peve taaga asumã apisasa ke kiamiu þegas lala asape "In na yoko netaveve Pol," pona taþena sape "O, in na nepe kiena Apolos," pona tai sina, sape "O, in na nesikol inu e þegas kiena Keþas." A laþas sina, apisirilua si kiela narin þegas laþasia, akoven plan taþena lala, asape "O, imimi ga mepe yeririna kiena Kristo lelaga."

¹³ Ke, ya ne akila ke sanene? ?Pona popon tetewowa Kristo ve kinakinasa,

teliwerwere e kiamiu narin þegas la sanene? ?Pona laþas asape ape kiau Pol, komin naþa asitom asape in ke narui naþa netelan inu e laki torovia vena netamalia la? ?Pona laþasia sinela þesan naþa akeela e kia kiena Yesu, ana asitom asape akeela e kiau kia?

¹⁴⁻¹⁶ Sanene, nepisu pogaga naþa nanua ne, pe nekee amiu re nena tai poli, Krispas ga lalua Kaias, pona sineu þesania, nekee mïena Steþanas amio namratava puna, a pe nesitoþal re si po laa rui, sane la ga nene, pona laþas sina? Nepisa sanene komin naþa visae nekee amiu ve moki, pona asumãlu avis vilaveena rui, asumã avisave "¡O, imimi ke narui, naþa Pol kee imimi e kiena kia!"

¹⁷ Sanene piowa ga, komin Kristo pe mligan inu re nepimin keen yar la poli, ana mligan inu nepimin lologonen kiena Lologena Wo van la. A pogos naþa nemlologon ke sanene, pe nekila re nemio mïareraena na manmaruaena na yomarava nini poli, ana nekila amio mïareraena na laki torovia kiena ne Kristo.

Kristo kipian manmaruaena a mïareraena kiena ne Ntewa

¹⁸ Ana yaru la naþa asumã ataveve ke mrapa na kovioena, amloge visena na laki torovia kiena ne Kristo sane suri tai naþa pe sur korena ga pan la, ana ita la naþa tetaveve ke mrapa na malena, temloge visena na kiena laki torovia sane mïareraena kiena ne Ntewa natamalia itaena.

¹⁹ Naga nene sane visena kiena Siriena Wa tai, naþa Ntewa pisa sanini, sape "Yoko nowe plan manmaruaena kiena la naþa asitom ke asape ape manmarua,

yoko nekilawo nakiliaena kiena la naþa asitom ke asape akilia suria." *Ais 29:14*

²⁰ Ana visena nene pe lelaga paþisi, komin naþa tepisusu yomarava, tekilia teviun tevisa sanini tevisave awa kiena yaru na manmaruaena lala? Awa yaru la naþa apisuveve ruru kiliaena la naþa sike e tus lala? Awa yaru la naþa akilia

avisayu ruru sitomena la naña pe tañena pe tañena naña tetelivi ke nagane? Tepisu sane peraga yo, a tepisu sane Ntewa kila manmaruaena lala na yomarava nini apimi sane sur wowe ga tai rui.

²¹ Ntewa ga pe manmarua, a e kiena manmaruaena, naga kila sane manmaruaena na yomarava nini tañatete kilia kila yaru kilia naga. Ana naga pisu sane po laa sane vena kila naña kiamimi lologena lala, naña yaru la asitom ke asape pe wowe ga, kilia tamalia yaru naña mlelaga ea.

²² Le Yu la moki liu naña yepela mavin lelagaena, asumña apisavisa ke asape visae mekila kile lala, yoko alelaga ga na wa, a le Krik la moki liu yepela mavin lelagaena, asumña apisa ke asape visae mevis mesmesu nena e kiela nakiliaena marua lala, yoko alelaga ga na wa,

²³ ana pe mekila re sanene pan la poli. Memlologon ga Yesu pan la, mesape naga marewo kiela mlamulena viowa lala e laki torovia, ana visena nene, le Yu lala asape tañatete alelaga ea, a le Krik lala, asape visena na wowe ga nene.

²⁴ Ana e lepas kiena ne la naña Ntewa pio la vena ave kiena, sane ita, naña ita lañas tepe le Yu a ita lañas tepe le Krik, pe sa re nene poli. Ve tesitom re tesape tevisu kile tañena, komin naña tepisu kilale mñareraena kiena ne Ntewa e yunñaena kiena Kristo rui, a ve tesitom re tevisave tetaveve kiliaena tañena, komin naña tepisu kilale namanmaruaena kiena ne Ntewa e mrapa kiena Kristo natamalia itaena.

²⁵ Yaru tañena lala apisu naña Ntewa tañan Kristo mare e laki torovia, asitom ke asape Ntewa malumu ga, ana peraga. Sur nene kila meraravan kiena mñareraena naña mñarera laa sane, taulu mñareraena kiena yaru. Apisu sur nene, asitom asape Ntewa pe wowe ga, ana peraga, kipian kiena manmaruaena naña po manene laa taulu manmaruaena kiena yaru.

²⁶ Wolai a vineu lala, asitomyuli sane kam na sanapen naña Ntewa pio amiu ape kiena? Pe ita moki re poli naña e

lepas na visuena na yomarava, ita temanmarua, pona tepe yaru mñarera, pona tepe yaru kerkeviu lala.

²⁷ Yomarava nini sape tepe wowe, ana Ntewa ñere ita, ana kome ita sumña kila plan ke manmaruaena na yomarava. Yomarava nini sape ita temalum ga, ana Ntewa ñere ita, ana kome ita, sumña kila ke mñareraena na yomarava pito tano.

²⁸ Yomarava nini pisa ke sape ita yaru korena ga naña tesike tano, ana Ntewa ñere ita, ana kome ita, sumña kila ke pupia sur kerkeviu la pito tano, kila apimi ape suri korena.

²⁹ Sanini, pe yar re nena tai naña kilia visirlua naga e marana Ntewa, sape naga pe manmarua, pona naga mñarera, pona naga yar tai ne,

³⁰ ana Ntewa ga pe purpes nen kieta malena viu temio Kristo Yesu. Naga ke narui pitetalia Yesu pimi kilologia mrapa pan ita, ana Yesu pul plan ita, kila ita temesmesu e marana, kila ita tepimi tepe kiena yaru wa lala.

³¹ Ana komin suri ne nanene, tepisu naña visena kiena ne Tusi Wa tai pe lelaga pañisi, naña pisa sanini, sape
“Yaru naña sinenan sape warwaria, naga kilia warwarian ga kieta Suñe.” Ser 9:24

2

Pol mlologon lak torovia kiena Yesu e mñareraena kiena Ninuna Wa

¹ Erau lala, nanua kam na aminue visena kiena ne Ntewa lala, ana nepim nepisawal pan amiu. Ana sa ga naña apisuia, pogos naña nepimin nekila, pe nekila re naña nepilaven visena piayavi lala pona manmaruaena kiena yaru.

² Nekila kiau sitomena mñarera nesape pogos naña nesike likan amiu, yoko ve nesitomñal re si sur tañena, ana yoko nelologon ga Yesu Kristo, amio kana marena e lak torovia.

³ Nesike nemio amiu, nemloge sane yepeu malumu pañisi, namarau, sineu kurkur,

⁴ a kiau visena a kiau suniena pe pulen re nena manmaruaena pona kiliaena

kiena yaru. Ana e pogos nene, amloge naña kiau visena lala apulen m̄areraena kiena Ninuna Wa,

⁵ a kila sane kiamiu naviawaena pe suñal re su e visena na manmaruaena kiena yaru poli, ana suñalu su e m̄areraena kiena ne Ntewa.

Manmaruaena kiena ne Ntewa

⁶ Lelaga naña kiau visena pe pulen re visena lala na manmaruaena na yomarava nini poli, pona kiliaena kar la naña yerkaena na yomarava nini la akekaran poli, ana pogaga, komin yomarava nini amio kiena yerkaena lala yoko avano amap ga. Ana kam la naña kiamiu sitomena marua ruruia, apisu kilale naña kiau visena lala pulen ruru nena manmaruaena kiena ne Ntewa.

⁷ Kiena manmaruaena nene, naga p̄arpolo ruru sike pa rui sumon naña naga si yomarava nini, ana manmaruaena nene tapolou ruru suña ga, yar la pe akilia re nena ga, ana nagane narui molue merarava ruru ga pan ita na wa sane pupia visaruruena tai naña Ntewa mlavia vena kila ruruiaena.

⁸ A kiena manmaruaena nene m̄alivin ita e mrapa naña Yesu pimi tamalia ita, ana yerkaena na yomarava lala pe apisu kilale re sur nene poli, ana atarar Yesu, naña naga pe pupia Supe na urarena nae ma e peni, la atelanm̄ar naga metava e laki torovia.

⁹ Yeririna la pe apisu kilale re sitomena kiena ne Ntewa sanene poli, naga sane Siriena Wa tai, naña pisa sanini sape

Sur nowo la naña kilamarana yaru pe pisuli re poli wa, pona kiligana yaru pe mlogeli re poli wa, pona los nen yaru pe sitomli re poli wa,

ana sur ke la nene Ntewa kila ruru suña ga pe kiena ne kiena yaru la naña sinela si naga. **Ais 64:4**

¹⁰ Ana ita, ita na tekilia navisa ruruena la nene, komin Ninuna ne Ntewa naña pisu kilale make suria, a kilia make sitomwanena kiena ne Ntewa, naga kipian itania.

¹¹ Sa ga ita yeririna, naña yar taḗena mninue ya naña sike e kieta sitomena, ana ninuta ga kilia ruru po. Ana maran

taaga m̄ena sa nene e Ntewa. Pe tekilia re ya naña sike e kiena sitomena poli, ana Ninuna ga kilia m̄aga, ana pisawal pan ita.

¹² Pe ninuna na yomerava re ga nini tai poli naña pisawal pan ita, ana Ninuna Wa nene naña molue ma puna Ntewa pitomi, naga ke narui naña kila ita tepisu kilale ruru nalaena wo la naña Ntewa suña kian ke pan ita.

¹³ Sanene, popon avisu kilale m̄ena sane kiamimi visena la naña pimi ke pan amiu, pe amolue re e manmaruaena kiena yar poli, ana Ninuna Ntewa ga suña pian itania. Sanene, mesuña moḗar ke visena lelaga lala kiena Ninuna Wa nene, ana memligan sike e amiu naña Ninuna nene sike e kiamiu malena rui.

¹⁴ Yar naña Ninuna pe su re e kiena malena poli, naga taḗatete visu kilale sur lala na Ninuna, naga sane pe yar tetan ga e la, ana naga taḗatete nena tol m̄areraena la naña Ninuna kiania.

¹⁵ Yaru naña Ninuna sike e naga, yoko naga kilia visu kilale ruru sur make ga, ana yar naña Ninuna pe su re e naga poli, naga taḗatete visu kilale ruru ya naña sike e malena kiena yaru naña Ninuna sike ea.

¹⁶ Visena Wa pisa sanini, sape *Pe yar re nena tai naña kilia ya naña sike e sitomena kiena ne Ntewa poli,* *pe yar re nena tai naña kilia vian si sur va Ntewa poli.* **Ais 40:13**

Visena nene pe lelaga paḗisi, ana e ita naña Ninuna sike e ita, tetol sitomena kiena Kristo rui.

3

Pe pon re veveyuena su likan nalelagaena la poli

¹ E pogos naña nesike nemio amiu nanua ne, sineun nesape nevis ruru nemio amiu sa naña kam na ape yeririna naña Ninuna ne Ntewa sike e kiamiu malena rui, ana peraga. Nepisu sane kam na pe atoroki re poli wa, nane kila narui nepis pan amiu sa naña kam na ape yar na yomarava ke ga wa, naña e lepas na kiamiu malena amio Kristo, kam na sa ke sisi tomtom lala wa.

² Sanene, nepagan amiu e ga e yu, tařatete nela kinanena řarera van amiu, komin kam na pe atorokin re poli. Ana pimi tol nagane, nepisu sane kam na pe atoroki re poli wa,

³ komin nařa řelaga na yomarava nini mok liu sike likan amiu wa. Pona kam na pe apisu kilale re poli yo, ana pogos nařa vielueena amio veveyuena sike e amiu, kana kinasa sane asike e yemalolo na wa, kiamiu řelaga sa ga řelaga kiena yaru.

⁴ Merarava ruru po pařisi nařa amiu na sanene, komin nařa asumņa amlipere amiu ke sanene. Kam lařasa asumņa apisa inu, asape "Aulai, imimi na mekekarān Pol, metaveve naga," a kam lařasa asumņa apisa ke erau nalologena Apolos nene, asape "Ke, imimi na mekekarān Apolos, metaveve naga," ana sitomena sur la ne sanene, sitomena kien yar ga.

⁵ Visae sinemiun avisayu kiamimi kia imimi lua Apolos, popon asitom ruruia avisave imimi lua mepe yar sur na sanape? Imimi lua mepe yar kiena Suře ga, vena kilaen yuņaena nařa mligan sike e limamimi, vena kila sane akilia alelaga ea.

⁶ E lepas na yuņaena nene, in ke narui nemapila kurusia, a Apolos ke narui naga řeleule susia, ana Ntewa ga nařa kila purřesia kapuru pimi kerkeviu řar mrasa.

⁷ Ana monar tevisu kilale sane yar nařa mapila kurusa, a naga nařa řeleule susia, lalua pe akila re pupia sur tai poli, ana naga nařa kila purřesa pimi keviu řar mrasa, naga ke narui kila pupia suria.

⁸ Ana imimi lua, nařa tai mapila kurusa, a tai řeleule susia, imimi lua memiyuņae marān taaga ga, a yoko imimi luoka ga mowar kiamimi nalaena torokin kiamimi yuņaena.

⁹ Pe sa re nařa imimi lua, imimi yar tai naga po, a tai piowa ga, ana imimi lua mepe yar na yuņaevaiena lele taaga kiena ne Ntewa, a amiu na sane porotano nařa memiyuņae ea.

Pona kana totou tařena na visaena, nekilia nevisave kam na sane yuņa tai

nařa Ntewa suņņa miyuņņaenia.

¹⁰ Ntewa mla kiliaena wo pan inu, ana nemiyuņae sane yar tai nařa yepena mņen yuņaena, nemiyuņāen řeren yuņa tai nařa řarera ruruia sike na. Ana siraunia, pe in re nařa nepisir-lua yuņa metava e řerena nene poli, ana erau tařena nene pimi suņņa miila nayuņāenen yuņa. A kam ke sina ga lařasa akilia aiila nakilaen yuņa metava e kana řerena nene, ana yaru nařa yuņāen sanene monar visuar ruru kana řelaga na yuņāenena.

¹¹ Naga monar tařatete liganli si řerena tařena, komin nemligan řerena napo rui, nane Yesu Kristo.

¹² A pogos nařa amiyuņāen yuņa metava e řerena nena, pona lařasa amiyuņāen e kol pona selpa pona kilavaru řarera, pona lařasa amiyuņāen e laki pona mņero pona mņakururuye.

¹³ Ana siraunia, yoko kapi na legiena maro kekānia kilali kiela yuņaena lala, kila yuņaena la nařa akila, mņalivi e yo metava.

¹⁴ Visae kapi tol yuņa nařa yar tai pisirlua metava e řerena nene, ana kekan řele ga, yuņa suņņalu ruru suņņa ga, yoko yar nene war kiena nalaena wo tai.

¹⁵ A visae yar tařena, kapi kekan make kiena yuņaena, yoko yar nene kilalu make kiena suria. Lavis kapi nene kilia kekanmņar mņena yar na yuņaena nene, ana pona naga purmatan kapi nene, tamalia kiena malena.

¹⁶ A kam na monar avisu kilale sane yuņa nene nařa amaplar metava e řerena nene, naga kam li nalelagaena lala, a sane yuņa na lotena wa tai mņana Ntewa, nařa Ninuna suņņa loyuņa ea.

¹⁷ Yuņa na lotena kiena ne Ntewa naga kam ga ne, a visae yar tai sinenan sape kila kare yuņa nene, yoko Ntewa welua nena naga, komin kiena yuņa na lotena nene naga pe wa pařisi.

¹⁸ Amiu monar ala ya nařa nepisa ke ne, pe pon re asitom avisave naga pe sur korena ga. Visae amiu yar tai sitom ke sape naga pe manmarua ruru

po e nakiliaena na yomarava nini, popon manene naga ligana sitomena navisokanena la nene sike na. E lepas nakiliaena na yomarava nini, naga monar kila naga sane yar ga tai naña pe wowe, ana visae naga kila sanene, yoko naga kilia ve manmarua ruruia e nakiliaena lala kiena ne Ntewa.

¹⁹ E Visena Wa, tepisu visena tai naña kila meraravan sape manmaruaena na yomarava nini sane sur wowe ga e marana Ntewa, naña pisa sanini, sape

La naña asitom ke asape la ape manmarua ruru po e yomarava nini, asitom ke asape la akilia suria, ana e marana Ntewa la ape wowe ga, naga pisu kilale la ruru rui. *Sop 5:13*

²⁰ A visena tañena sina sanini, naña sape *Suñe pisu kilale ruru sitomena lala kienali na manmaruaena la na yomarava nini, sape ape sur korena ga.* *Yauena 94:11*

²¹ Sanene na, ve tevilaven re sitomena na yomarava lala. Tañatete akila sur wo tai van amiu, komin naña Ntewa kian kiena navisa ruruena wo punu ga pan amiu rui.

²² Inu Pol nemio Apolos a Keñas, mekila yumaena wo punu ga pan amiu rui, a nagane yomarava nini sike e limamiu. Visae amal pona amare, visae asuñña nagane pona ase legiena naña pimi ke ga wa, ana sur punu ga ape kiamiu rui,

²³ a amiu ape kiena Kristo, a Kristo pe kiena ne Ntewa.

4

Yumaena kiena Pol amio Apolos sane nalologena kiena Yesu

¹ Sanene na, amiu ve aligan imimi re meva metava, ana popon avisu imimi sa ga yar na yumaena kiena Kristo lala, naña naga mligan visawanena lala kiena ne Ntewa e imimi, vena mevisawal va la naña pe akilia re poli.

² A pupia sur naña sike e kiamimi sitomena, mekilia sane monar memasisun ruru wo e yumaena nene naña kiamimi yerkawa mligan e limamimi.

³ Pe nesitom manene re nesape aña amiu asitom ke sanapen inu, po yar la

aliñere inu ve sanape, a in mñena pe nepilevilen in re sina poli nesape in na sanene pona sanene.

⁴ Lelaga, pona nepisu in ke sina ga nesape nemiyuñae pogaga ne, ana nanene kiau sitomena ga ne. Kiau sitomena nene tañatete kilia kila inu nemesmesu, a Suñe ga naga pe yar naña torokin liñere inuena.

⁵ Ve sanene na, ve tokoskosin re liñereen yar tañena, ana monar tesuñate Suñe wasuñe e kana legiena na liñereena nena. E pogos nene, yoko naga la sur la naña atapolou asike e yemalolo, kila naña amolue e yomerarava, a yoko la sitomwanena la naña atapolou ke e los nen yaru, kila naña amolue e maran yeririna make ga. Yoko Ntewa waveve sur la nene, ana yoko naga vis va yeririna lala torokin ya naña naga mñal e kiela malena.

⁶ Erau lala, visen la ne nesuñña nepisa ñisi ne, nesuñña nepisayu ke ga imimi lua Apolos ne, ana nekila sanene komin sineun neviaan ruru amiu, sane ve avisusu re ve tañena e kiamiu navianena lala. Amiu lañasa apilave komin navianena na kiela ñegasa, a asuñña apisusu ke piowa e navianena na ñegas tañena, ana sanene na pe mesmas re poli.

⁷ Kam punu ga maran taaga, kam na pe apo manene re taulu tañena la poli, a visae sur wo tai sike e amiu, pe kam re na amiyuñae poli. Ntewa ga kian pan amiu sane nalaena tai, ana sanene na pe pon re si avis vilave vanon poli.

⁸ Lelaga, nekilia nesape asuñña asitom ke asape kam na limamiu pulen sur wo lala kiena ne Ntewa rui, ana amloge po, asitom ke asape kam na ape kiena yerkawa lala na yomarava nini rui, naña akoven imimi mesike nena varau. Visae lelaga naña sane kam na ape ñarin suñe lala kiena ne Ntewa na yomarava nini, po pañisi, ana pe nesitom re nesape sanene poli.

Ana visae pogos tai ve sanene, pona pe kam re ga poli yo, ana yoko Ntewa visu sane imimi lua mñena ga metorokin meto metava memio amiu vena ve suñenen kiena yeririna lala.

⁹ Ana nagane, imimi li nalologena lala pe mesu re e yo wo na sanene poli. Sane Ntewa mligan imimi mesike laa varau tano, naþa yeririna na yomarava nini amio mēna navisi lala apisu kare imimi, sane metorokin ke ga yaru lala naþa amla koena na marena pan la.

¹⁰ Memlogear ke Kristo, mekila ke kiena yuṁaena, ana li taþena la apisu imimi sa ga mepe wowe towe ga, ana asuṁa apisayu amiu asape ape manmarua ruru nena e malena kiena Kristo. Apisu sane imimi na memalum ga, ana kam na aṁarera. Apisu imimi piowa ga, ana amligan amiu asike metava.

¹¹ Imimi na pe sa re nena amiu poli, komin siar nanua pimi tol nagane, viso kar imimi, moto kar imimi, pe ṁamimi kulsota wo re poli, mesuṁa mepane ke pog ṁarera lala, ṁamimi yuṁa wo re naþa memon e poli,

¹² ana mesuṁa memal ke ga e yuṁaena na limamimi. Yar la apiuelin imimi, ana mepisa ruru la ga. Akila kare imimi, ana metaṁan ga.

¹³ Apisa kare kiamimi kia, ana mekilali naþa mepe erau ruru ga memio la. Mekila po sanene, ana akila imimi sa ga kororaki na yomarava nini. Lelaga, pimi tol nagane apisu imimi sa ga sur korena ga.

Pol piun sape ataveve lana

¹⁴ Pogaga, pe nepisa re visena la ne ne vena kila amiu amawa poli, komin kam na sa ga naruu lala naþa sineu sii amiu paþisi, a sineun neviau ruru amiu.

¹⁵ Nekilia nesape yerkawa taþena la mok liu naþa apisuar amiu a amiila kiamiu lelagaena e Kristo, ana popon asitoṁal sane inu ga taaga nepe arimamiu. In na noþar þesan Lologena Wo kiena Kristo pimi pan amiu, ana in na sane arimamiu e kiamiu malena amio naga.

¹⁶ Sanene na, nepisu sane mesmesun ga naþa nevis van amiu, noṁareran amiu nesape ataveveli lelen lau sumo.

¹⁷ Sitomena ne nanene kila nesape nevitetalia Timote iṁasu pun amiu.

Nepisu sane Suþe taṁan naga pan inu sa ga naruu tai, komin naga miyuṁae ruru po e yuṁaena lala a nekekarana naga paþisi. Ana pogos naþa visae imi ṁalivin amiu, sineun nesape naga kila amiu asitom ruru si kiau þelaga nayalena naþa nataveveen Kristo, sa naþa nesuṁa nepian ke pa yar lala na suṁare make ga la naþa nesuṁa neteteliv ke e la.

¹⁸ Nekilia sane pogos naþa apisu sane pe noṁalṁaliv re si pun amiu poli, kam laþasa akilali naþa amligan la sina asu metava.

¹⁹ Ana pogaga, komin naþa visae Suþe taṁan van inu, yoko ve ve piavi re neim noṁalivin amiu. E pogos ne nanene narui, yoko yepeu mavin logeen visena kiena la nene, ana sineun nesape nevisu sane kiela ṁareraena na kilaen yuṁaena ṁarera sanape.

²⁰ Nanene komin naþa visena kiena yaru pe pe sur re tai poli loyuṁa e nasuþenena kiena ne Ntewa, ana ṁareraena kiena Ninuna ke narui naga pe pupia suria.

²¹ Pogaga, sineun nesape asitom ruru sumo, sane visae noṁalivin amiu, yoko ve sanape? Visae sinemiunia, nekilia neiṁasu pun amiu nemio kiau visena ṁarera lala na veveyuena, ana po manene laa visae akila kiamiu sitomena la su tano sumo wa, ana nekilia neiṁasu nemio ga visena la naþa malumu, e þelaga na sinesiena.

5

þelaga viowa loyuṁa e suṁare

¹ Visena pimi tol kiligau sape sur tai sike likan amiu naþa piowa manene laa. Apisape kam yar tai, arimana pa talopa amio sira taþena, ana siraunia, yar nene pinaun wona arimana nena pimi sike amio. Lelaga kemua naþa, yaru na yemalolo lala taþatete akila þelaga nene, ana sanape na kam li nalelagaena tai suṁa kila?

² Kam li nalelagaena lala asuṁa apisir plan amiu, asape kam na amiyuṁae ke po, ana sanape asuṁa ataṁan ke þelaga

na sanene sumã miyumiãe ke likan amiu? Popon aloge viowagan sur nene, a popon akovenlua yaru nene vetan kiamiu sumãre.

³ Ee, lelaga naþa nagane nesike e yo nini nesike laa perinan amiu, ana e ninuu nemloge sa ga nesike ga nemio amiu. Sanene na, e kia kiena Suþe Yesu, nesumã nepisawal ke nalipereena tai kiena yar nene sa ga nesumãl ke ga nesike e maramiu.

⁴ Sanene na, pogos naþa aim si lele taaga, monar avisu sa naþa ninuu sike ga amio amiu, a monar akilia sane Suþe Yesu mēna sike amio kiena māreraena,

⁵ ana monar akovenlua yar nene vetan sumãre. Naga monar ure sina, wasuþe si e yomarava va e limana Yermare, ana popon þelaga lala na mlamulena viowa na yomarava akila naga loge viowa vano vano-o va þisi, ana suraunia pona wasuþe si imi yo, vena Suþe kekaran tamalia ninuna e legiena maro.

⁶ Erau lala, pe pon re asumiã awarwar manene amiu poli, avisave kam na amekiki, komin kororaki nene sike e amiu na wa. Kam na akilia rui sa naþa narin is ga, ana kilia kila kilaparavi punu ga lapa.

⁷ Sanene na, popon vena awar plan is viowa nene naþa sike e amiu, vena amiu punu ga aim aekiki ruru sina. Monar tesitomãl sa naþa yermarua lala asumiã akila ke kuþaþaena e narin sipsip vena kilaplanen kiela mlamulena viowa lala, ana Kristo pimi mare e laki torovia vena warplanen kieta mlamulena viowa lala, ana pe pon re kororaki sumã e ita poli.

⁸ Ana pogos naþa yermarua la akila kuþaþaena þisi, akila kana þaþagena nena, a ita nalelagaena mēna lala ita mēna kieta þaþagena tai. Ana pe pon re tesike e þaþagena nene poli, takan kilaparavi tai naþa is marua sike ea. Visena nene kana kinasia sane pe pon re sane mlamulena viowa a þelaga viowa na malena marua sumã ga e ita, komin loyumiã e malena na sumãre, sur make ga monar ikiki ruru wo, ve lelaga ruru wo, a ve wa ruru wo.

⁹ Kiau visena tai pan amiu sanene rui. E maki tai naþa nesiri piñasu pan amiu nanua rui nepisawal nesape pe pon re ava lele taaga amio yar la naþa akila ke þelaga viowa la poli, pona asumiã akiriri kar ke vanon sira lala.

¹⁰ Ana pona kam laþasa amlogepal kiau visena nene yo, komin pe nepisa re e lepas kiena yar la naþa pe amlelaga re poli. E la nene, la moki akila kolau, la moki ape puluvis lala, la moki apinau, la moki amlotun kiela nono lala, ana visae sinetan tevisave tesu perinan la, pona monar teligan ga yomarava nini narui, komin naþa ita make ga tesike e yomarava, a tesumiã tepitawe ke yar sur na sanene silaga.

¹¹ Pe nepisaluþar re nene poli, naþa tesumiã tepitawe ke yar kar na sanene e kieta yalorena, ana ya naþa sineun nesape nevisa, sineun nesape visae yaru tai sumã ga, neþa naga pe nalelagaena lelaga tai, ana apisu ke naþa e kiena malena naga sumã taþa ke kolau, pona sumã pe puluvis lue ga, pona sumã mlotun ke nono lala, pona sumã piuel, pona sumã mun kuruta namunena, pona sumã pinau, ana pogaga, yar sur ne nanene narui ve akila re nena sur tai amio naga. Yoko ve ava re lavisinia, ve akinana re lele taaga amio.

¹² Ve sanene na, e lepas kiena la naþa asike vanua e sumãre, pe pe kieta re naþa teliþere kiela malena poli, ana e lepas kiena la naþa asike loyumiã e sumãre, monar tevisuveve ruru la. Visae laþasa asumiã akila ke þelaga na mlamulena viowa la naþa sane nepisa ke ne, monar teliþere la, a monar tekila sur tai van la.

¹³ Ntewa ga yoko liþere la naþa pe asu re loyumiã e sumãre poli,

ana e lepas kiena yar nene naþa sumã kila ke þelaga viowa likan amiu, kam ke narui monar akoven lua naga vano.
Naw 17:7

6

Pelaga wo na kilaruruen veveyuena

¹ Nemloge mēna sane pogos tai, kieta puruvi tai na sumāre naga pepeyu amio amiu taņena tai, ana naga sumālu pēre taņena nene pa e pupia kumali apis pania. Nepisu sane sur nene pe mesmes re nena poli, komin naņa pe pon re yar la naņa amlelaga e Ntewa ava asumālu e marana yerkawa la nene naņa pe amlelaga re e Ntewa poli, vena yerkawa la nene aliņere la.

² Pogos naņa li nalelagaena lala aveveyu, popon li nalelagaena taņena ga lala akila ruruia, komin naņa monar tesitomāl tevisave ita li nalelagaena ke la narui naņa teliņere yeririna lala na yomarava e legiena maro. Ana visae ita ke narui naņa yoko tekila pupia yumāena na sanene, pona amiu atorokin naņa akila ruru kiamiu narin veveyuena la ne sanene.

³ Yoko Ntewa ligan ita vena teliņere navisi lala nae peni, ana pogos naņa li nalelagaena taņena lala avisin sur na yomarava nini, sanape? Apisu sane mārera paņisi, taņatete akila ruruia?

⁴ Peraga, monar akila. A visae peraga, pona asitom asape popon amiu li nalelagaena lala aligan kiamiu visena e limana yar taņena la naņa pe asumā apim re e sumāre poli?

⁵ Nepis mārera sanene komin naņa sineun nesape nekila amiu amawa towe laa ga! Ee, nemilan manene paņisi navisuena sa naņa pe amiu re nena tai naņa pe manmarua poli, naņa kilia kila ruru kiamiu veveyuena la nene.

⁶ Pona sur ne nanene narui kila sane kieta puruvi taņena na sumāre sumālu mligan puruvi taņena nene pa e pupia kumali, ana sumā pisawal ke kiena napiowaena lala e marana pupia yerkawa lala e totanoena nene, la naņa pe amlelaga re e Ntewa poli?

⁷ Nesumā nepis ke pan amiu sanene e lepas na mrapa naņa monar atavevea vena kilaruruen veveyuena la naņa sike likan amiu, ana po manene laa visae veveyuena re mēna ga. Veveyuena la ne sanene, kana kinasa sane Yermare sumā taulu amiu rui. Pona pe akilia re poli yo

wa, naņa visae womla tai kila viowa van ko, pona vinaun kioņa sur tai, ve ositom re, otaņan ga, komin mlamulena viowa naga kiena.

⁸ Ana visae osumālu sinoņan oligan yar nene e pupia kumali vena ala nakoena vania, ko ke narui ko osumā okila ke piowa pan womla nene.

⁹ Monar asitomālia sane la naņa kiela malena pe mesmes re poli, yoko taņatete avisu nasuņenena kiena ne Ntewa imi mālivi pu la. Pe pon re akilali akila sa naņa amninue ke sur nene na wa, komin akilia rui asape Ntewa pe kekaran re nena la naņa asumā amiyaloro kar ga, pona la naņa amlotun ke ga ntewa navisokanena lala, pona la naņa akila ke kolau, pona la naņa asumā aņiliwilin ke tasnela, pona yermēne pona sira la naņa asumā aņere la ke sina ga,

¹⁰ pona la naņa asumā apinau, pona la naņa pe apion re kiela sur pa yar taņena la poli, pona la naņa asumā amun wii, pona la naņa apiueli, pona la naņa akila urlelai.

¹¹ Lelaga naņa, nanua sumo kam laņasa akila sanene rui, ana potena paņisi naņa Ninuna Wa kevan amiu amekiki, kila amiu ape wa, a kieta Suņe Yesu Kristo kila ita temesmesu ruru sina e marana Ntewa.

Tasneta monar ikik ruru wo

¹² Nepisawal pēlaga viowa la nene, naņa pe pon re tekila poli, ana yar laņasa pe sinelan re kiliaen poli. La apisa sanini, asape “E, kiau malena naņa, nekilia nekila ya naņa sineun nesape nekila.”

Ana nevisatamē la, nesape “Lelaga, pona kiamiu malena yo, ana avisuaria, komin sur moki liu naņa sinoņan kiliaena, akilia akila kioņa malena imi viowa mēna ga. Sur mok liu naņa sinoņania osape sumā e kioņa malena, ositom osape okilia okawe ruru woga, ana peraga, yoko ovisu naņa sur ke la nene narui yoko akawe ruru si kioņa malena.”

¹³ A yar si laņasa naņa sinelan asape akila ya naņa la sinelania e tasnela, la asumā apisa ke visena taņena tai, asape

“Kinanena, naga na mēpeu, a mēpeu, naga pe na kinanena.”

Ee, lelaga, ana ovisuar ruru sina, komin naḡa yoko Ntewa kila sur lua nene ava akovio na wa. Sanene na, Suḡe mla tasneta pan ita vena ve kieta, ana ita monar tela tasneta tela si vania. Tasneta vena kilaen kiena yuḡaena, ana pe nava kareena re ga poli.

¹⁴ Visae tetamān tasneta vena kilaen ga yuḡaena wo lala, yoko e legiena maro Ntewa kilia visirlua si tasneta, sa naḡa pisirlua tasnena ne kieta Suḡe Yesu rui, e kiena pupia māreraena.

¹⁵ Monar tekilia sane tasneta lala la sane komḡas nen tasnena Kristo. Ana sanape, popon komḡas nen tasnena ne Kristo tai va sikol si amio sira na mrapa tai? Taḡatete ve sanene ḡisa!

¹⁶ Ana Visena Wa pisa sanini, sape “Yoko yermēne amio sira, lalua aim ave taaga,” ana yar naḡa va amio sira na mrapa tai, kila naḡa tasnena pimi pe taaga amio tasnena sira nene.

¹⁷ Pe mesmesun re yar tai kila sanene poli, ana monar tesikol ita temio Suḡe, naḡa ninuta imi ve taaga temio Ninuna.

¹⁸ Monar tevisuar ruru wo e mlamulena viowa la naḡa yar la akilia akila amio tasnela, e lepas na yermēne amio sira. Mlamulena viowa taḡena la naḡa asumā akila, asumā akila ke piowa ga pa e yepen yar taḡena, ana yar naḡa kila mlamulena viowa amio sira, sumā kila ke sina ga piowa pa e yepena.

¹⁹ Ve sineta ḡesan re, sane tasneta na sane yuḡa wa na lotena tai naḡa pulen Ninuna Wa naḡa Ntewa mligan sike loyuḡa e ita. Ana tasneta nene, pe pe kieta re mēna poli,

²⁰ ana pe kiena ne Ntewa, komin naḡa naga pul lua kieta malena e marena kiena Yesu. Sanene na, monar teyuḡae temio tasneta vena kilaen ga sur la naḡa asumā avisirlua kiena kia.

7

Talopaena

6:19 1Kor 3:16; 2Kor 6:16

¹ Pogaga, nagane yoko nevisawal sito-mena laḡasa e naḡa apiun tan inu e lepas na talopaena, asape popon tetalopa, pona popon tesuḡa ga sanene?

Ana pogaga, yoko nevisa ve sanini. Visae yaru tai sitom ke sape ve talopa re, naga nene pogaga, pe pe sur re tai poli.

² Ana komin naḡa tepisu naḡa nataḡaliena pimi mārera, a nataḡaena lau pule manene la, popon manene yar make ga aure wola lala.

³ Sanene na, visae yar sinenan sape va lavisin wona na sira, wona nene monar kekarania, a pogos naḡa sira sinenan sape va lavisin wona na yermēne, wona nene monar kekarania.

⁴ Sira naḡa talopa taḡatete visave tasnena pe kiena naga taaga, ana wona na yermēne kilia visave naga pe kiena mēna ga. Ana yaru naḡa talopa taḡatete visave tasnena pe kiena naga taaga, ana wona na sira kilia visave naga pe kiena mēna ga.

⁵ Sanene na, tai ve visaluḡar re taḡena visave ve imi re lavisinia.

Ee, pona pogos tai lalua apisayu yo, lalua atamān naḡa lalua aligania, ve amon re lele taaga e narin pogos tai, vena kila lalua akilia alen mārera vanon sur tai wa, ana nanene na pogaga. Ana siraunia, lalua monar sinelan si aim lele taaga, komin visae peraga, pona Yermare visu kilale naḡa tai malum ga, taḡatete uarar naga, ana kila loru e nataḡaliena koyo tai.

⁶ Sur la naḡa nesuḡa nepisa ke ne, pe nepisa re sane navisaluaena mārera tai poli, sane yar monar talopa, pona monar ve talopa re, ana nemla ga sitomena naiilaena laḡas nene.

⁷ Visae yar make ga akilia asumā ga sane inu, naḡa pe netalopa re poli, nesuḡa ga sanene, pona yoko vera na wo na wo, ana sur nene sike ga e sitomena naḡa Ntewa mlavia pan ita peve taaga.

⁸ Nesape nevisa visena tai van la naḡa asu mḡaga sanene, sane la naḡa pe atalopa re poli wa, amio letano lala. Nepisu sane visae akilia asumā ga sanene, sane naḡa in mēna nesuḡa nekila ke ne, yoko wo na wo.

⁹ Ana visae laþasa apisu sane peraga, yoko m̃arera van la vaþisi vena auarar la lue ga sanene, pogaga, po paþisi naþa visae alual tai naþa atalopa amio. Pe pon re nataþaliena sum̃a kar la sanene vano-o asum̃a aloge viowagania silaga.

¹⁰ Visena taþena si tai naþa sineun nesape nevisa, naga van la naþa atalopa rui, naþa pe kiau sitomena re ga poli, ana naga pe visena tai naþa Suþe mlavia sane visena m̃arera tai pimi pan ita. Pisa sanini, sape sira monar ve ure matan re wona na yerm̃ene.

¹¹ A visae pogos tai sira tai ligan wona na yerm̃ene, ure matan sina, naga monar ve talopa re sina, ana monar sum̃a ga sanene. Pona visae peraga, popon naga amio wona na yerm̃ene lalua akila ruru marala, lalua asu si lele taaga. A yerm̃ene lala, ve am̃ene plan re si wola na sira lala.

¹² Pogaga, yoko nevisawal si suri taþena laþasia. La pe sa re navisaluaena kiena Suþe poli, ana sane kiau sitomena ga laþasa vena iila itaena.

Suri þesia, naga e lepas naþa yaru tai naþa mlelaga e Yesu sike amio wona sira tai, ana sira nene mlelaga re poli. Ana visae sira nena kekaran ga naþa lalua asum̃a veraga, po pon re yaru nene sitom sape m̃enelua si sira nene poli.

¹³ A maran taaga m̃ena ga visae sira tai mlelaga e Yesu sike amio wona yerm̃ene tai, ana yerm̃ene nene pe mlelaga re poli. Visae yerm̃ene nene kekaran ga naþa lalua asum̃a veraga, po pon re sira nene sitom sape m̃enelua si yerm̃ene nene poli.

¹⁴ Nanene komin naga e lalua naþa mlelaga kilia kila suri wo tai van naþa pe mlelaga re poli, ana kiena þelaga wo kilia kila kiela talopaena lalua imi wo vaþisi sane talopaena kiena yaru lalua naþa amlelaga. A naga e lalua naþa mlelaga kilia kila suri wo tai va narila lala, komin naga yoko kilia ligan ruru narila lala e mrapa na malena wa, yoko akapuru loyum̃a e mratava tai naþa po sa ke ga ninis taþena la naþa arimala amio anela la ga luwoka amlelaga.

¹⁵ Ana e lepas kiena lalua nene naþa tai mlelaga a tai pe mlelaga re poli, visae naþa pe mlelaga re poli sinenan sape ligan lua si naþa mlelaga, ita li nalelagaena taþena lala monar tetam̃an ga sanene narui. Visae naþa pe mlelaga re poli yepen mavin naþa mlelaga, taþatete tekilali naþa tom̃areran naþa mlelaga sum̃a amio wona naþa sinenan sape ligania, komin Ntewa sinenan sape tese malena tai naþa pulen þelaga na sum̃are.

¹⁶ Ko sira naþa omlelaga, pona ko yerm̃ene naþa omlelaga, pona ositom osape okilia otaulu si wom̃a naþa pe mlelaga re poli, ana peraga, pe okilia ruru re naþa osape yoko ve sanene poli, komin pona taþatete nena otauluia þisa, peraga.

Monar teva ruru ita tesum̃a e malena naþa Ntewa mligan ita tesike ea

¹⁷ Ana ya ga naþa monar tekila, ita make ga monar teligan ruru kieta malena ita punu ga su ruru e naþa kieta Suþe mligan ita tesike e rui, pona monar teyali ga e mrapa naþa Ntewa pio itania vena teyal ea. Nanene naga visena tai naþa nemligan sike e kieta sum̃are lala.

¹⁸ Visena nene kana kinasa sane e nape naþa osike ea nanua, sumon naþa omlelaga, monar okekaran osum̃a ga ea wa, pogos naþa osiar omlelaga. Sanene visae laþasa ape le Yu la yo, naþa asum̃a ataveve ke kiela þelaga marua lala, sane þaviu pona ya sina, nanene na pogaga, pe nepisa re nesape visae pogos naþa alelaga ana monar avilopu kiela þelaga marua la naþa asum̃a ataveve ke poli. A maran taaga m̃ena ga sa ke la naþa pe ape le Yu re poli, naþa pe akila re þaviu poli ana asum̃a ataveve ke kiela þelaga marua taþena lala. E m̃ena e kiela leþasia, pe nepisa re nesape visae alelaga monar avilopu la e kiela þelaga marua la poli.

¹⁹ Yaru taveve þelaga marua ya, sane ve þaviu pona ve ve þaviu re, naga pe pe suri keviu re tai poli e navisuenā kiena ne Ntewa, ana Ntewa sinenan ga sape tetaveve kiena visaluaena.

²⁰ Nane nepisa ke pan amiu narui nesape pogos naña olelaga, ova ruru ko ga osumã e yo naña osike ea pogos naña pe omlelaga re poli wa.

²¹ Sa ke ga naña visae omiyumãe korena kiena yaru tai nanua sumo, ana naganane omlelaga ga na wa, nanene pogaga, monar okekaran naña oyumãe korena ga sanene. Ana lelaga, visae pog tai olual kiomã pulmas tai naña okilia ourmatan e naña omiyumãe korena ke ea, naga mēna nene popon oñisia.

²² Visae ko na omiyumãe korena kiena yaru tai, monar ositoñal sane pogos naña Supe vio ko, naga visirlua ko ligan ruru ko nenaga e namratava puna. Ana e kana lepas ne tai, visae ko pe omiyumãe korena kiena yaru tai poli, osumã ga sanene, ko mēna monar ositoñalia ovisave pogos naña Kristo vio ko, ko na monar oimi sane kiena yaru na yumãe korenaena tai narui, vena kilaen kiena yumãena make ga.

²³ Naga nene komin Kristo pul plan ita e pupia suri tai, sane kana kuruta, vena ita teve kiena, ana monar tevisu kilale ga narui sane mesmesun ga naña teyumãe koren ga vania, po pon re teyumãe korena van yaru tañena poli, pona tesike vatanon sitomena kiena yaru tañena naña temiyumãe ke pania.

²⁴ Erau lala naga ke nene narui, yo naña osike ea pogos naña pe okilia re Ntewa poli wa, yo ke nanene narui monar osumã ga ea, ana naganane omlelaga rui, yoko Ntewa suria ga amio ko e nene silaga.

Naviunena e lepas kiena la naña pe atalopa re poli wa, amio letano lala

²⁵ Pogaga, nesape nela narin visena tai van amiu e lepas kiena la naña pe atalopa re poli wa. Visena nena, tañatete nevisave nanene navisaluaena tai kiena Supe naña pisa pan inu, ana visena nene naga sane kiau sitomena ga tai. Ana kam na akilia rui sane Supe naga po pañisi pan inu, naga mla manmaruaena lala pan inu naña yoko amiu akilia awasine ruru la, ana popon asitom urmi e kiau visena nini narui.

²⁶ Nagane, tesike e pog viowa tai naña tesumã tepisu ke suri mārera la naña

tepane la, ana popon nevisa si visena naña nepisa metava rui, naña nesape popon teva ruru ita tesumã ga e malena naña tesike pae e rui.

²⁷ Sanene, visae ko yaru tai naña otalopa rui omio sira tai, popon osu ruru ga osumã sanene, ve ositom re ovisave oligan lua naga. Visae ko pe opure re sira tai poli wa, ko mēna ga osumã ga sa ga nene, pe ositom re osape otalopa omio tai poli.

²⁸ Ana visae ositom sane peraga, sinoñan manene osape oure sira tai, pe nepisa re nesape piowa poli, a visae sira mēe tai talopa amio yaru tai, naga mēna nene pe sa re kiena mlamulena viowa tai poli, nanene na pogaga nene. Ana la naña sinelan talopaena, la monar avisu kilale sane yoko tañatete kiela malena memea, yoko avane pog mārera la ve moki vañisi e yomarava nini, a visae otaveve kiau visena, naña ve otalopa re, yoko nekekara vañisi.

²⁹ Erau lala, nepisa ke sanene komin naña narin pog plas ga sike ga wa vano-otol pogos naña sa Supe wasupe si vitomi, a pe yaru la moki re poli na kilaen kiena yumãena. Ve sanene popon manene visae la naña añure wola la rui, akila sa naña pe atalopa re poli wa, ana akilia akila yumãena lala kiena Supe ve moki.

³⁰ A la mēna ga naña asumã atagin ke suri tai, popon sinela pēsān suri naña atagin ke ne, a la naña amloge ke pon kekarena lala na yomarava, popon ve asitoñal re sina. La mēna naña amiyumãen ke kilavaru, popon akila sa naña limala korena ga.

³¹ La naña akila yumãena tañena lala na yomarava nini, popon akila sane pe kiela sur re tai sike e poli, komin yomarava nini amio kiena suri make ga naña sike ea sun ke naña yoko va kokovio narui.

³² Nepisa ke visena la nene pan amiu komin nesitom amiu pañisi, pe sineun re naña silaga aligan lue ga kiamiu sitomena se suri la ve moki poli. Yaru naña pe wona re poli, naga kilia sitom urmi e yumãena kiena Supe silaga, sape yoko naga kila ve sanape naña yoko Supe kekaranja,

³³ ana yaru naþa sike amio wona, naga sumã sitom manene suri na yomarava la paþisi, ana kila ve sanape naþa yoko wona na sira kekarania,

³⁴ a yoko kilia kila mēna sa naþa kiena sitomena la ve ve lua. A sira mēe naþa pe wona re poli, naga mēna ga kiena sitomena mārera ruru po vena kilaen yuñāena kiena Suþe, a kiena yalena amio kiena yuñāena kilia ve wa ruru lue ga. Ana sira naþa wona sumã ga, kiena sitomena monar su ga e yuñāena na yomarava nini, sane monar kila suri la naþa wona na yermēne loge wonia.

³⁵ Kiau visena la nene, pe sineun re visaluþar amiuena e suri tai poli, naþa sinemiun asape akila, ana nepisa kiau visena kilali naþa iila kiamiu malena. Sineun ga nesape suri na sumare punu ga kirir ruru wo, a sineun nesape ita li nalelagaena lala ve tekirakirai re, ana tekira tevisu ga kieta Suþe naga taaga.

³⁶ Ita laþasia akila naþa akilawo kiela sira tai, ana asitom asape popon asutowe laa sane wa, pe asitom re talopaena poli komin naþa sinelan kilaen yuñāena kiena Suþe. Ana visae lala tai visu sane sitom manene la sira nene naþa akilawoia, sa naþa sitom manene vano-o visu sane yoko uarar þele si naga, naga popon akila ga lalua atalopa narui. Nanene naga pogaga ne, naga pe mlamulena viowa re tai nene poli þisa.

³⁷ Ana visae tai kila ruru sitomena mārera naþa mārera sape naga sinenan vena naga amio sira nene naþa akilawoia vena ve kiena, lalua asumã sanene sumo wa, a visae naga visu kilale sane naga kilia kawean ruruia, nanene naga kila po paþisi visae ve talopa re ga amio wona nene rui.

³⁸ Sanene, naga naþa talopa mare ga amio naga naþa akilawoia asape ve kiena, naga kila suri wo tanea tai paþisi, a naga naþa sumã ga, pe talopa re amio naþa apisawo poli, naga kila sur tai naþa po manene laa sane.

³⁹ E lepas kiena la naþa atalopa rui, monar ve aure matan la re sina. Sira naþa talopa naga monar su ruru ga amio wona na yermēne naþa wona nene mali ke ga

wa. Ana visae yaru nene mare, sira nena kilia talopa sina, akilia talopa amio yaru tai naþa naga sinenania, ana monar ure ga naþa naga mēna mlelaga e Suþe.

⁴⁰ Sanena naþa nepisa ke ne, naga kilia talopa, ana nepisu sane yoko wo laa vania, pona kiena kekarena keviu laa sane, visae naga ve talopa re sina. Nanene inu ga kiau sitomena, ana nesitom nesape Ninuna Ntewa ga mla sitomena marua la nene pan inu, ana popon asitomruruia.

8

Sanapen tata la naþa aþemāria pe na kilaen lotena van nono lala?

¹ Nagane sineun visataþēen kiamiu naviunena e lepas na tata la naþa yar la naþa pe amlelaga re poli akuþaþain la ke pan kiela nono lala. Ana amiu asumã apiun ke asape popon ita li nalelagaena la takan tata la nene, pona peraga?

Pogaga, yoko kiau navisataþēena visayu sur ve lua, þelaga na kiliaena, a þelaga na sinesiena. E lepas na kiliaena, yar la mok liu naþa la asape akilia ruru navisataþēena na kiamiu naviunena nene, a akilia avilaven towe mǎga naþa asitom asape akilia suria. Þelaga na kiliaena kilia kila yaru ligan kiena sitomena va metava, ana þelaga na sinesiena pe sa re nene poli, sumã miila ruru ke ga malena kiena yaru.

² Yaru naþa sitom manene ke sape naga tol ruru þelaga na kiliaena, naga pe kilia ruru re Ntewa poli wa sane popon kilia naga.

³ Ana yaru naþa tol ruru þelaga na sinesiena, naga ke narui naþa Ntewa pisu kilale ruru naga.

⁴ Pogaga, nane kiau visena lua si ne nanene narui, e lepas na tata la naþa akuþaþain pa nono lala. Suri na sumo pisa sanini, sape akilia asape sane nono la nene ape totou ga, a pe ape totou na sur lelaga re nena tai poli. A sur na lua naga sanini, sane kieta Ntewa naga taaga nena naþa pe lelaga sike na.

⁵ Yar la asumã apisayu ke kiela ntewa taþena lala pona kiela suþe taþena lala naþa asape asike ma e peni pona e

yomarava nini, a apisayula ke sa ga la yo pulen la ga asumã ga,

⁶ ana e ita, tekilia ruru tesape Ntewa na taaga ga sumã ga. Naga nane Ata Ntewa, naþa naga pe purþes nen sur make ga, naþa ita tepe kiena. A Suþe taaga ga naþa sike na, nane Yesu Kristo, naþa naga sii make suria, a naþa temal ke mēna ga e naga.

⁷ Naga nene kiliaena napo naþa ita li nalelagaena la moki tetol rui, ana sur tai piowa ga, ita laþasa pe tekilia ruru re sur la nene poli wa. La nene, nanua sumo la mēna asumã amlotun nono lala, ana pimi tol þane, mārera paþisi naþa avisu kilalea sane naga nene pe sur na visokanen ga. Sanene na pogos naþa yaru la akukin tata la naþa akila kuþaþaena ea pa nono lala, tekilia takania sa ga pe pe sur re tai poli, ana ita taþena la nene, pogos naþa akania, akan amio sitomena naþa asape tata nene naga kana nono lala, a siraunia yepela þilinia, amloge sane akila sur tai naþa pe mesmes re poli e marana Ntewa.

⁸ Ana monar tekilia sane kinanena, naga pe pe sur re tai naþa kilia kila Ntewa visu ita sane topo pona tepiowa. Visae ve takan re tata nene, pe kana kinas re nane topo e kiena navisuena poli, pona visae takania, pe kana kinas re nane tepiowa poli.

⁹ Sike ga e ita visae sinetan takania pona yepeta mavin kanena, ana pe pon re tekila sur tai naþa nalelagaena taþena sitom sape pe mesmesun re kilaen poli. Pona ita tekilia tekila sur nena woga ga yo, ana pe pon re naga visu naþa tekila poli, ana kila kare kiena sitomena.

¹⁰ Sane e lepas na tata la nene, pona e kioṃã sitomena, okilia okan woga yo, ana okilia okila pe pe sur re tai poli. Ana visae pogos tai osike omio yar lala loyurṃã e kiela yurṃã na lotunen nono lala, ana ala tata van ko ana okan omio la, yoko ve sanape naþa visae nalelagaena taþena tai visu ko? Pona naga tai naþa pisaar pisape naga mlon ke tata la nene yo, ana pogos naþa naga pisu ke naþa okania, yoko naga visave “Suwala, yar nene naga pe yar na sumare tai naþa kilia ruru suria, ana naga

sumã kan ke ga tata la nene. Sanape, popon in mēna ga nakania.” Naga pisa sanene narui, ana naga mēna ga kania, ana siraunia yoko kilia loge viowagania vaþisi komin naþa sitom sape naga kila pupia mlamulen viowa tai.

¹¹ Naga nene kana kinasa sane ko na osurṃã otaveve ke kioṃã kiliaena napo, opisu kilale sane okilia okila sur nene. Ana monar ositom ovisave yar taþena nene, naþa naga pe womla tai naþa Kristo mare vena tamalia naga, naga maraun kilaen paþisi. Sanene, visae naga visu naþa okila pogos tai, yoko kilia kila naþa okila kare nena kiena naviawaena.

¹² Visae ve sanene, yoko Ntewa visu ko sane ko ke narui okila mlamulena viowa pa womla nene, komin naþa okila naga kila sur tai naþa e kiena sitomena piowagan kilaena. Naga nene piowa ga, sane okila ke ga mlamulena piowa pan Kristo.

¹³ Komin sur nene, in na nekila kiau sitomena tai, sane visae kiau þelaga na kanen tata nene naga pe sur tai naþa kila kare naviawaena kiena wolai nene, yoko neligan ga narui. Ve netol re sina, komin naþa yepmavin naþa in ke narui nekila wolai nene loru.

9

Pol pisayu kiena þelaga na yurṃãena

¹ Erau lala, sineun nevisa van amiu nevisave in na pe nesu re vatanon e sitomena kiena yar taþena poli, ana nemiyurṃãe taveve ke ga ya naþa nekilia nesape mesmesun nakilaena. In na nepe nalogena tai naþa nepisu kieta Suþe Yesu e kilamarau, a amiu ke narui naþa sane mras nen kiena yurṃãena naþa nemiyurṃãenia.

² Nekilia nesape yar la þasia yepela mavin visu kilale inena sane nepe nalologena tai, ana amiu na pe sa re nene poli. Nagane kiamiu malena su ruru sike amio Suþe rui, a sur nene kila apisu kilale asape nemiyurṃãe ke pan amiu sane nepe kiena nalologena lelaga tai.

³ Ana e la naþa sinelan liþere inena sane asape nekila ke piowa sanene sanene, kiau navisatamēna la sumã ga.

⁴ Nekilia sane asape asuñña apisuar imimi pano-o sinela mare, ana sanape? Apisuar ñña tañena la nanua sumo ne, ana pe apis re sanene poli, ana pogos naña nepimi, apisa sur tañena narui. Pona asitom asape visae ve mekinana re pona ve momun re ana mekilua memal ga ve sanene vena kilaen yuññaena pula?

⁵ A apisayu imimi lañas naña atalopa rui, apiun asape komin ya ne wola ñña la apim asuñña ataveve imimi? Ana ane sape nene naga piowa ga? Nalologena tañena la ne apim ñña, amio wenla Suñe lala, amio Keñas, pogos naña amiyalin ke yuññaena sanene, wola na sira lala asuñña ataveve la, ana e poglis nene, yar la nene pe apisa re sur tai e lepas nene poli.

⁶ Ana asape avisaluñar imimi ke sina ga ve meyuññaen re kilavaru vena ulen kiamimi suri lala. Visae imimi lua Panañas ve meyuññaen re ga woga ga rui, ana komin ya ne apisa ke ga sanene pan imimi lua Panañas, ana pe apisa re pan tañena la poli?

⁷ Asitomyuli yaru na mara lala na purvanua tañena tai. Pogos naña apanon mara, ana ane pul ke kiela sur lala? La ga apulia, pona kiela ñña suñe naga pisuvevea? A asitomyuli la naña amapla kinanena e lokove. Visae akinana e lokove nene, tañatete yar tai vis van la vanonia. A sanapen ñña yar naña pagan ke surmal lala? Pona naga pe kanli re nena kala tata ne tai poli yo?

⁸ Nepisa sur la nene vena kila amiu avisu kilale sa naña visae yar tai kila yuññaena tai, popon yar la naña naga miyuññaen kiela monar avisuar ruruia. A nepisa sanene, pe molue re ga e kiau sitomena poli, ana kieta navisaluaena wa pisayu ñña ga sanene.

⁹ Visena tai sike loyuñña e navisaluaena kiena Mosis rui, naña pisa sanini, sape *Pogos naña kioñña puluk tai suñña yaloro ke metava e kioñña mralaki sane kona vena vie plan kurusnela, ve oviar re gona, ana monar otamñan naga yaloro ea ana kinana lilue ñña ga vano.* *Naw 25:4*

Pogos naña Ntewa pisa visena nene narui naga pe suñña sitomñal re sur mal la poli,

¹⁰ ana naga sitomñal ita naña temiyuññaen, sape la naña temiyuññaen kiela, monar avisuar ruru ita. Yaru naña miyuññaen e porotano, mesmesun naña naga sitom visave pogos tai yoko kan ya naña naga mapila, a yar naña va lokove war kinanena vitomi, mesmesun naña naga ñña sitom visave yoko atamñan ve tokaki vania.

¹¹ Ana e lepas na kiamimi yuññaena pun amiu, memapila mras wo la mok liu rui e kiamiu malena, ana popon vena amiu akekaran naña avisuar imimi a akian navisa ruruena lañas naña Ntewa mligan e limamiu van imimi.

¹² Amiu asuñña amiila ke yar tañena lañasa sanene rui, ana popon akekaran manene laa sane nakilaen wo van imimi naña imimi mekila ñña pan po pan amiu sumo rui.

Ee, popon akila sanene van imimi, ana tol nagane pe mepisa re nena pan amiu mesape monar akila. Memaraun mesape sa ñña mevisawal sanene ñña, yoko asitom viowa e imimi narui, sa ñña kilawo lawe mrapa na Lologena Wo imi pun amiu. Kila narui mepis re si poli, a visae meloge viowagan naña pe apisuar imimi re poli, pogaga.

¹³ Ana popon asitomyuli ñña ga sane e Yuñña Wa ñña Ntewa, la naña amiyuññaen ke loyuñña ea amio li na kuññaena lala, asuñña akan ke sur la nene, a asuñña amal ke e sur la naña yar la amla ke sane kiela nalaena pa Ntewa.

¹⁴ A Suñe pisawal ñña ga sa ke nene e lepas kiena ne kiena yeririna la naña asuñña amlologon ke Lologena Wo. La ñña ga, mesmesun naña akilia amal e nalaena la naña yaru la ne amloge ke Lologena Wo nene asuñña ala van la.

¹⁵ Pogaga, in na yar la ne tai ne sanene, ana siar nanua sumo pimi pe nepisali re nesape yar la monar ala sur tai sanene van inu poli, pona monar akila ve sanape na van inu. A nesuñña nepisakol ke ga

sur la ne e m̃aki nini, pe naga re ga naṓa nesape neviun sur tai tan amiu poli. Pe sineun re nesape asiar naṓa ala sur van inu poli, ana aṓarwar amiu asape amiu ke narui apagan inu, ana sineun nesape in na nekilia nesuṓa nowarwar inun nesape Ntewa ga suṓa pisuar inu silaga. Pogos naṓa nekilia nesape kiau malena sike ga e limana, nesuṓa nemloge po paṓisi, a visae ve naga re naṓa suṓa visuar inu, pona yoko neloge sane popon sa nemarṓan ga rui.

¹⁶ Nesape noṓarwar inun naṓa naga pisuar inu sanene pogos naṓa nemlologon ke kiena Lologena Wo, ana e lepas na pun inu, lelaga paṓisi pe sur re tai naṓa nekilia noṓarwar inun poli. Taṓatete nevisirlua si kiau kia va metava, nesape in ke narui nepe yar na lologonen Lologena Wo, vanon Ntewa ke narui naga mligan e lum̃au, ana nepisu sane monar nekila ga narui. Visae pogos tai nourenia ve nekila re sina, yoko viowa van inu vaṓisi.

¹⁷ Visae nekila ke yuṓaena nene e ga e kiau sitomena tai, inu ga nesape popon nekila, vena Ntewa kekarania, pona yoko kilia la nalaena tai van inu komin yo, ana pe sa re nene poli. Pe inu re naṓa nesitom nesape nekila poli, ana Ntewa ga pisawalia, mligan e lum̃au, ana monar nelogearia, nekila ga ve sanene narui.

¹⁸ Ana sanene, nesitom ṓele nesape nela nalaena tai vanonia, ana naga nene pogaga, komin naṓa Ntewa suṓa kila ke sur taṓena tai sane pul inu e sur wo tai rui. Sur nena, naga pupia nalogewoena nene naṓa netolia, pogos naṓa nesuṓa nemlologon ke lologena wo pa yar lala, naṓa nekila korenan ga sanene pan la. Pona nekilia nevisa van la nevisave ala sur van inu vanonia, pona avisuar ruru inu e pogos naṓa nemiyuṓae ke sanene, ana pe sineun re nene poli, sineun nesape akilia atol ga sa ga nene, pe suri tai suwo la re poli.

Pol naga miyuṓae korena ga pa yaru lala sane nalologena wo tai kiena ne Ntewa

¹⁹ Sitomena ne nanene sike e inu, a nesuṓa nemiyuṓae ke e ṓelaga tai naṓa yoko nevisa meraravan van amiu nagane.

Sane, inu na pe nemiyuṓae kiena yar re tai poli, a pe yar re tai naṓa pe yerkawan inu poli, ana inu na nekila inu nepimi sane yar na yuṓae korenenana van yar taṓena lala, vena kila sane nekilia netaulu la ve moki aimi alelaga.

²⁰ E lepas kiena ne le Yu lala, nesuṓa nekila inu nepim nepe yere Yu nena napo, vena kila sane nekilia noure laṓasia aimi.

E lepas kiena ne la naṓa pe ape Yu re poli, ana ataveve ke navisaluaena kiena Mosis, nesuṓa nekila inu nepim sane yar tai naṓa nataveveen m̃ena ga navisaluaena nene. Pe nepisu re sane nesike vatanon navisaluaena nene poli, ana nekekarana naṓa nevatanonia ve sanene, vena tauluen la nene naṓa sinelan suen vatanonia.

²¹ E lepas kiena taṓena la naṓa pe ape Yu re poli, naṓa pe ataveve re navisaluaena kiena Mosis poli, nesuṓa nekila inu neve taaga nemio la, komin nesape netaulu la m̃ena ga. Pe nepisa re nesape nesuṓa nekilaro navisaluaena marua kiena ne Ntewa poli, peraga, ana pogos naṓa nesike nemio la, nesuṓa netaveve ke navisaluaena viu kiena Kristo vena kilia kila la alual malena.

²² E lepas kiena ne la naṓa nepisu sane pe asuṓal ruru re m̃arera poli, pe nepis m̃arera re pan la poli, ana nekila ke sa naṓa in m̃ena nemio la, nesuṓa nemiila la, vena pona netaulu la yo.

Sanene, inu na nesuṓa netaveve ke mrapa make ga nakilaen suri make ga naṓa nekilia nekila van yaru make ga, vena kilaen sanene vano-o yoko nekilia netamalia laṓasa aimi alelaga e Yesu.

²³ Nekila sanene, pe nekila re ga pan inu poli, pona vanon suri taṓena tai, ana nekila vanon ga naṓa sineun nesape Lologena Wo monar war mrasa e malena kiena yaru lala, a pogos naṓa nepisu navisa ruruena naṓa Lologena Wo kila pan la, nemloge po na po.

²⁴ Asitomyuli pogos naṓa yaru na kiririena lala akiriri ke veraga. E pogos nene, la make ga monar akilali naṓa

akiriri koskos veraga avano, ana la ve via aim p̄es vamon la, a kilia taulu taṕena lala? Yoko ve taaga kilia koven make laṕasa, kiriri vano yuve la, la kiena nalaena vanonia. Ve sanene narui, kam make ga monar aṁareran yuṁaena kiena Suṕe, monar aṁareran akiriri avano vena ala kiamiu nalaena.

²⁵ Yar na kirakiraena la asuṁa aṕion ruru la silaga, a asuṁa apalia ke suri make ga la naṕa kilia kila tasnela ve ṁarera ruru re. Asuṁa akila ke sanene komin kiela sitomena lala ṁareran sape monar atauluia, atol nalaena. Ana pogos natelaten meme e yaru na kirakiraena la nene, yam plas ga meme la nene pioyowa sina, ana meme naṕa popon toṕion naṕa atelan e ita, naga yoko sike sike nena.

²⁶ Sanene, in na nekila ke sanene narui e yuṁaena kiena Suṕe naṕa nekila ke ne. Pe nekiriri koren kar re ga poli, a pe nekirikirai re ga sanene poli,

²⁷ ana nesuṁa nakawean inu, nesuṁa nepisuar ruru tasneu silaga, komin naṕa pe pon re nesuṁa nelologo ruru van yaru lala, nesape la sanene, sanene, ana siraunia, in ke narui nekila pal mrapa, pona pe netorokin re naṕa nekila make ruru kiririena naṕa nekiriri ke ea.

10

La naṕa asitom asape la amesmesu rui, akilia akila pal mrapa, sa naṕa apua kana le Yu la akila sumo rui

¹ Erau lala, popon tesitomyuli ya naṕa kata apua la akila. Naga nene e pogos naṕa yermarua Mosis sumon la amolue gar Isip, amio naga ataveve lul nene naṕa suṁa sumon la apa akusro pupia sive nene naṕa mliṕere pan la.

² Aṁal pogos ṁarera laa nene, ana Mosis p̄ere la apa aṕarpoyo ea, ana apim sane ape kiena yeririna kemua lelaga.

³ Kas moki asuṁa amialoro ke e yokorena, la make ga akan kinanena nene naṕa Ntewa kian pan la,

⁴ a pogos naṕa moto kar la, Ntewa kila wii kate e pulus nen kilavaru nene vena amunia. E poglis nene, sane Kristo ga sike amio la, suṁa pisuar ruru la e sur make ga.

⁵ Ntewa kila ṁa po pan la sanene pano-o, ana yepela mavin suṁalen ṁarera se ea. Apilon ṁasila pania, ana naga pe taṁan la re apa loyuṁa e yo naṕa naga pisaar pan la poli, kila naṕa asuṁa amarmare tetai kar ga e yomema.

⁶ Ana ita nagane, pe pon re teve ṕarṁarera ve sa repita la nene poli, ana visae tesitom ruru e ya naṕa pimi paemen la, kilia vian ita ea.

⁷ Visae ve sanene, monar ve teligan re sur taṕena sumon Ntewa e kieta malena, sane nono tai naṕa telotunia, sa naṕa repita la nene akila. Visena tai naṕa pisayu kiela ṕelaga e poglis nene, pisape *“La pe asitom re si sur taṕena poli, sinelan ga kilaen ṕaṕagena, amun wii marala tetelivi, a aṕure ṁena sira lala e wolena lala, naga ga nene.”* *Nau 32:6*

⁸ La asitom asape malena wo ne nanene narui, ana ve sineta ṕesan re legiena nene naṕa Ntewa kila loṁara viowa la apim akar yermene lala amio sira lala naṕa akila lau, ana e legiena taaga ga nene la manu lualima yam lua pa telu [23,000] amare veraga e legiena taaga, sane kiela nakoena ṁarera tai. Visae ve sanene monar tevisuar ruruia, pe pon re ita laṕasa ava kar ga sanene poli.

⁹ Yar naṕa pilave, kila mlamulena viowa sanene, a naga sitom sape pogaga ne, ana suṁa miyur kare Suṕe paṕisi. Yoko Suṕe kilia kila sur tai vania, yoko yar nene ilania, loṁara iminia sane yar na sumo la nene.

¹⁰ A pe pon re tevisumun Ntewa poli, sane la naṕa asuṁa akila nanua sumo e pogos kiena kata apua lala. E poglis nene, Ntewa pitetalia navisi tai na visaaren marena pimi pula, ṁemoṁar la.

¹¹ Tepisu naṕa la asuṁa akila ke mlamulena viowa sanene, ana tepisu naṕa nakoena pimi ṁalivin la ke sanene, ana pe suri tai naweṕege itaena. La asirilua kana suniena nena nakonua konua rui, ana tekilia tesitomyu si suri nene nagane, e legiena maro la ne tesike e ne.

¹² Sanene, visae yar tai visuveve si kiena malena naga taaga, a sitom sape naga suṁa suṁalu ruru ke ṁarera rui,

popon naga visuar ruruia, komin viowagan naŕa visae naga kila si viowa pogos tai, ana loru.

¹³ Apisu nakilaliena la imi, ana ve sinemiŕu kurkur manene re. Pe kam re ga apane ke nataŕaliena la nene poli, ana asumŕa amŕalivi ke e malena kiena ne yaru make ga. Ana akilia awasine Ntewa, komin naŕa yoko naga taŕatete kila ko ovane nataŕaliena naŕa ko pe otorokin re otaulu poli, ana pogos naŕa nataŕaliena imi kilali ko, yoko naga vian kon kionŕa mrapa namŕareraena naŕa nasuwoen nataŕaliena, vano-o oure matan namŕareraena na taŕaliena nene.

¹⁴ Kiau erau wo lala, monar ve ava re nena lavisin ŕelaga naŕa yar la asumŕa amlotun ke nono na visokanena lala.

¹⁵ Nekilia nesape kam na yar sur la naŕa akilia suria, ana pogos naŕa nepisaar mesmesun nena pan amiu sanene, nemlelaga nesape kam na amninu kilale ya naŕa nesumŕa nepisa ke ne.

¹⁶ Nepisa visena la nene komin naŕa pogos na ova oyokol amio yar la naŕa asumŕa amlotun ke nono tai, sa ga naŕa ko mŕena omlotun ke nono nene narui. Naga nene maran taaga amio ita la naŕa temlelaga ke e Kristo. E pogos na ŕaŕagena wa, temlenin namunena wa, temlavia, a na nene sa naŕa ita tepisawal tesape tesikol ita e ŕegas kiena yar la naŕa kana kuruta mlau komin la. Ana siraunia, takawero kilaparavi wa, temlavia, a na nene sa naŕa ita temio la naŕa akila kare tasnena naŕa tamalele metava e lak torovia.

¹⁷ Nanene lelaga pan ita punu ga naŕa tesumŕa tepim lele taaga e ŕaŕagena wa nene, komin naŕa tepim sane ŕegas taaga, a takan pae ga kilaparavi taaga nene.

¹⁸ A sa ke mŕena ga nene pa le Israel lala, pogos naŕa amŕemoŕar suri na kuŕaŕaena lala. Laŕasa pe akila re kuŕaŕaena poli, ana akekaran kanen tata na kuŕaŕaena nene naŕa yaru taŕena ga la akila, ana kila sa naŕa ape ŕegas taaga naŕa akila lotena na sanene pan Ntewa.

¹⁹ Pogaga, visena la nene kana kinas na ya? Nesumŕa nepisayu ke nono lala

amio nakuŕaŕaena la nene, ana e kiau sitomena kana kinas pe nepisa re nesape sur la nene na lelaga poli, pona apowo liu.

²⁰ Pe sa re nena nene poli, ana popon nekila meraravan van amiu, nesape la naŕa akila ke lotena kar la ne sanene, pe amlelaga re e Kristo poli, a kuŕaŕaena la naŕa asumŕa akila ke ne, pe asumŕa akila re pa Ntewa lelaga poli, ana asumŕa akila ke ga pa yermare lala. Sanene, pe pon re ava lavisin la naŕa asumŕa akila ke poli, komin pe sineun re nesape asikol amiu amio yermare la poli.

²¹ Ko naŕa ototano ke e lele na kinanena kiena Suŕe, osumŕa omun ke e mŕana piala wa, a osumŕa okan ke kana kinanena wa, taŕatete okilia ova ototano e lelen kinanena kiena yermare lala vena omun kiela namunena a okan kiela kinanena.

²² Yar na kila sanene naga sumŕa miyur ke Suŕe, kilia kila Suŕe vielue vaŕisi, sinena karia. A pona yar nene sitom ke sape visae Suŕe sinena kar sanene, pe pe sur re tai poli, komin naga mŕarera manene taulu Suŕe? Pe nesitom re nena sanene poli.

Li nalelagaena lala monar ve akila re sur naŕa kilia kila li nalelagaena taŕena lala aloge viowa

²³ Visena tai sumŕa ga, naŕa yar la mokliu apisa apisape, yaru kilia kila ga ya naŕa naga sinenan sape kila. Pona visena nene pe lelaga yo, ana sur laŕasa sike na naŕa nekilia nekila, ana yepmavin ga kilaena, komin e kiau navisuen, la pe asumŕa amiila inu re e kiau malena poli, a pe asumŕa amiila re malena kiena yar la naŕa asike lavisin inu poli.

²⁴ Nepisa sanene komin naŕa pe pon re yar tai sumŕa sitomŕal ga naga taaga poli, ana monar sitomŕal mŕena yeririna la naŕa naga sike lavisin la.

²⁵ Pogaga, nagane yoko nevisa sur laŕasa e lepas na tata na sur mali lala naŕa akila kuŕaŕaena ea pan kiela nono na visokanena lala. Visae awar tata la nene imi, aligan su amio tata taŕena lala, vena awilwilin la, tekilia toulia takan woga ga. Nanene komin naŕa taŕatete

tekilia tevisu kilale sane tata na ya la ne sanene, tesape tata ya naña akila kuřařaena ea, pona tata ya naña pe akila re kuřařaena e poli, ana ve tesitom manene re, ve teviun re, toul ga narui.

²⁶ Telavia, takania, komin naña sane visena tai pisa sanini sape yomarava nini, *amio sur make ga naña sike ea, naga pe kiena ai? Naga pe kiena kieta Suře. Yauena 24:1*

²⁷ A visae yaru tai naña pe mlelaga re poli, vio ko vena ova okinana e mmana yuňa, pona omaraun vaena yo, osuňa ositom ke osape pona awar kinanena lařasa van ko naña akila pae lotena na kiela nono la e yo rui. Ana peraga, visae osuňa ositom ke naña ovano, ova ga, a ve oviun re naviunena sanene, ola ga ya naña visae ala van ko.

²⁸ Ana sur ga tai, visae ova osike pae e naña rui, a nalelagaena tařena tai teke ea, ana pona naga visa van ko sanini, visave Wolai, tata nene, italua monar telonia, komin nekilia rui nesape akila pae e rui pa kiela nono lala. Visae naga visa ve sanene van ko, ana sanene yoko ko mmana ga ve okan re.

²⁹ Lelaga, e lepas na kionna sitomena, okekan ga kanena, ana e lepas na womla tařena nene naña pisa sur nene pan ko, viowa vania, ana pe pon re si otol poli, komin visae peraga, yoko okila sur tai naña kiena sitomena pe mesmesun re nenaga řisa.

Ana visae ko ga taaga, a pe yar tai pisawal re sur la sanene pan ko poli, okilia okila ya naña ko sinonnan osape okilia okila.

Nane kiau sitomena sanene e lepas nene. Nesitom nesape pe mesmesun re naña yaru tařena ga kilia mmareran inu visave monar nekila nene, pona ve nekila re nene.

³⁰ Visae kinanena ya, nevisu sane visae nelenwo sumo, yoko nekilia nakania woga ga. Pe pon re yaru tařena sinena karinun poli, naña nakan ke tata naña nepisa potena pa Ntewa vanon rui.

³¹ Pogaga, naga kana kinasa sanini, sane visae tekan suri tai, pona tomun sur

tai, pona ya si naña tekilia tekila, ana monar tekila make ga e řelaga tai na visirluaen kia kiena ne Ntewa.

³² Pe pon re akila sur naña kila kare sitomena kiena le Yu la poli, pona le Kris lala, pona kieta li nalelagaena tařena lařasa,

³³ ana popon amiu akilali sa naña in na nesuňa nekila ke pan la. E sur make ga naña nesuňa nekila, pe nekilali re ya naña yoko wo van inu poli, ana nořikeyon naña wo van la, vena kila sane pona lařasa akilia atol natamaliaena.

11

¹ Lelaga erau lala, sa naña nesuňa nekilali ke naña neyaloro nelilu lana Kristo, popon akilali ayaloro alilu lelen lau.

Pelaga wo kiena yeririna la pogos naña ava e sumare

² Erau lala, nemloge sane asuňa asitomnal ke yuňaena la naña nekila pan amiu na wa, a asuňa atarar ruru ke řelaga lala na yuňaena nene naña nepian amiyunia.

³ Ana e sur la nene, tai sike ga wa naña sineun nesape monar akilia ruruia, naña pisayu yermene amio sira, naña lalua kiela yuňaena pe maran taaga re poli. Sa naña Ata Ntewa naga pe řarun Kristo, a Kristo naga pe řarun yaru, ana yermene naga pe řarun wona.

⁴ Ana taveve kieta řelaga, visae yar tai lotu, pona visi e marana li nalelagaena lala, naga monar ve yan re karo na řarina e řarina. Visae naga yania, tevisu naga sane wowe tai naña mninue řelaga na vatanoena.

⁵ Ana sira lala na pe tařena. Visae sira tai lotu, pona visi e marana li nalelagaena lala, tepisu sane popon naga yenwo řarina e karo na řarina pona kulmrae tai. Visae ve yenwo re řarina sanene, naga mmana ga kila piowa, tepisu naga maran taaga visae akervan řarina ve řarmu ga rui sumnal se maran yaru lala.

⁶ Visae sira tai ve řarmarera, yepen mavin kaloen řarina sanene, popon avisa vania avisave popon naga kervan

vilþarina, ana yoko kilia sumal ga na wa su loyuma e sumare ana lotu. Ana yoko naga mawa vaþisi nakilaen sur nene, komin pe pon re sira la aweroro vilþarila ve plalas manene poli, pona akervan þarila ve þarmu. A visae ve sur na kilaen sira mawa sanene, popon sira la akekaran tararen kieta þelaga na vatanoena, monar ayenwo þarila la sanene pogos naþa aim alotu e sumare.

⁷ Ana komin ya ne yermene lala la monar ve ayenwo re þarila lala? Nanene komin Ntewa sike metava, a naga pe þar pa rui, ana naga kila yermene sane naga, pisirlua yermene kila naga pe þarun sira. Nane sa ke nene narui, yermene taþatete kalo þarina, ana sira monar kalo þarina.

⁸ Tekilia sane yermene naga monar ve þarin sira sanene, komin Ntewa sii þesan yermene, siraunia sii sira molue kome lepas nen yermene, ana pe sii re yermene molue kome sira poli,

⁹ a naga sii sira vena iilaen yermene, pe sii re yermene poli vena iilaen sira.

¹⁰ Sanene, sira monar kalo þarina, vena kilaen sa naþa naga patanon ke wona. Ana pogos naþa naga kila sanene, navisi lala nae ma e peni apisuia, a kila naþa apisu kilale sa naþa sira kekaran vatanonen wona na yermene, a la mena monar akekaran vatanonen kiela yerkawa keviu naþa Ntewa.

¹¹ Lelaga naþa sira monar vatanon yermene sanene, ana nanene kana kinasa sane pe sa re naþa sane lalua pe atoroki re poli. Ita naþa tesike loyuma e þegas nen kieta Suþe, tekilia rui tesape sira na taþatete suma naga taaga, a yermene taþatete suma naga taaga, ana lalua monar asuma ayuma e lele taaga vena aila la maran ve taaga.

¹² Nanua sumo la e nasiiena, sira nsumo molue e tasnena yermene, ana siraun na nene, yeririna punu ga amolue akome tas nen sira tol nagane, ana tekilia tesape purþes kemua lelaga, naþa sur punu ga molue komea, naga Ntewa ga.

¹³ Pona laþasa pe akekaran re kiau visena poli yo, naþa nesape popon sira lotu monar kalo þarina, ana asitomyu

rurulia. E kiamiu navisuena, apisu sane sira naþa ve kalo re þarina, mesmesun ga naþa sumalu lotu va Ntewa? Peraga, e kieta þelaga na pe mesmes re poli.

¹⁴ E kieta malena na yomarava nini, merarava ruru pan ita rui sane pogos naþa yermene ligan vilþarina kapuru vim ve piayavi manenea, piowa pan paþisi.

¹⁵ Ana pogos naþa sira taman vilþarina ve piayavi rurua, po pan paþisi, a viluna na piayavi ne, Ntewa mla pania sane sur tai naþa miyowauia ruru yepena.

¹⁶ Ana sa naþa nepisa, li nalelagaena laþas asuma apisliu, pe akekaran re sitomena nene poli, sane sira naþa sinenan sape lotu monar kalo þarina. Pogaga, kiau visena sanini, nesape imimi li nalologena lala, memlologon ga sanene, pe mekekaran re þelaga taþena poli, a sumare kiena ne Ntewa taþena la ne asike ne, la mena ga asape ve sa nene.

Mrapa mesmesu nakilaen þaþagena wa

¹⁷ Sur si tai sike ga wa naþa sineun nela sitomena laþasa ea van amiu. A piowa ga, komin naþa naga pe pe sur re tai naþa nekilia nevisir plan amiun poli, ana naga pe sur tai naþa monar nevis van amiunia. Naga e lepas na pogos na sumare, naþa popon vena sur tai naiilaen kiamiu malena, ana akila sa naþa pimi pe purþes nen sur viowa si tai.

¹⁸ Nepisa sanene komin naþa nemloge rui sane pogos naþa amiu li nalelagaena lala apim lele taaga, pe ape taaga re poli, ana naliþereena suma pa ke metava likan amiu. Visae visena la nene navisokanena ana po, ana peraga, nepisu sane monar ve lelaga ga.

¹⁹ Ana pe nekilia re poli vanon ya ne sinemiun asape akila sanene? Pona yar tai sinenan sape yuve tai, tai sape yuve tai sanene yo? Pona sinoman osape otauluia vena yoko yar la avisave ko ke narui ope lelaga, pona ko ke narui naþa Ntewa sike amio ko?

²⁰ Ana e lepas na þaþagena wa, nemloge sane naga mena nene asuma akila ke piowa ga. Pogos naþa apim lele taaga vena kilaen þaþagena wa nene, pe akila re si sane nasitomwalena kieta Suþe poli,

ana akila ke ga sa naþa kamiu kinanena taþena lala.

²¹ Visae tai imi loge viso karia, yoko naga suñalu kian limana la kilaparavi ve keviu, pona taþena mun kuruta na munena ve keviu, ana ve torokin re si laþasia!

²² Pona pe kamiu lelena viranen re kapi e poli yo, þisi na aim vena akinana loyuña e suñare? Pona asumña akila sanene komin naþa asumña asitom korenan ke ga suñare kiena ne Ntewa, pona asumña asitom korenan ke ga erau na lelagaena taþena lala? Nemninue kare narui aña nevisa ya ne van amiu e sur nene, yoko nevisa ga nevisave pe nekekaran re nena poli.

²³ Mrapa mesmesu na kilaen kinanena wa, Suþe ga pisa pan inu, ana siraunia in ke narui naþa nemla lein pan amiu. Pa sanini, sa naþa Suþe Yesu, kiena yemalo maro nene, naþa Sutas pielua naga ea, naga mla kilaparavi nene,

²⁴ ana mlen pisa potenania, kawerovia, ana pisape "Tasneu ke nini narui, naþa netamñania vanon amiu. Ana monar asumña ala luen ga kilaparavi sanini silaga, sa naþa sur na sitomñalinena tai."

²⁵ Ana siraunia, pogos naþa akan pae, mla piala na kuruta, kila ke mña sanene, pisa pan la, pisape "Piala nini, naga kau kuruta, naþa vena kilaen naviranarena viu naþa Ntewa kila amio yaru suñalu. A pogos punu ga naþa ala piala nene, awis, monar asitomñal inu."

²⁶ Erau lala, nane visena kiena Suþe e lepas nene, ana kila sane pogos naþa tela kilaparavi a tela piala sanene, tesuñña tepisawal ke nasitomñalena na kiena marena, a monar tekila mña sanene vano tol pogos naþa naga imi mñalivin ita sina.

²⁷ A nalaen kilaparavi kana Suþe nene amio mña piala, naga pe sur tai naþa pe wa paþisi. Visae yar tai la e þelaga tai naþa ve mesmesu re, yaru nene kila piowa ga, þarnena kare tasnena Suþe amio kana kuruta, sa ga naþa naga ga mñemomñaria.

²⁸ Ana pogos nakilaen þaþagena wa sanene, monar ita make ga veve taaga

tevisu ruru kieta malena lala, þisi na, tela kilaparavi amio kuruta nene.

²⁹ A pogos naþa telavia, monar tevisu kilale sane sur nene kana pupia kinasa suñña ga, naþa pisayu kieta Suþe naþa naga tamñan kiena malena vanon ita. Ana visae yar tai lavia, ve sitom re urmi sane ita make ga tepe tas taaga e Kristo, naga la korenan ga, ana yoko naga visu sa naþa viowa manene laa vania.

³⁰ Sur nene suñña kila amiu ke rui, naþa amiu mokliu yepemiu la miaiai a amai, pano-o tol naþa kam laþasa amare.

³¹ Ana visae tevisu ruru kieta malena silaga, yoko Ntewa ve la re nakoena sanene van ita.

³² Ana ita naþa Ntewa kila sanene pan ita, ve tela re sa naþa nakoena tai, tela sa naþa navianena tai naþa Ntewa kila pan ita sape tekirava, vena la pulmas tai van ita e legiena maro, naþa yoko ve akoven ita re teva temio yar na yomarava taþena la naþa yoko ava e lele naloge viowaena.

³³ Erau wo lala, kiau visena ne na nene e lepas na kilaen þaþagena wa. Pogos naþa aimi lele taaga sanene, ana akila ga e þelaga napo. Ve yar tai kilali re naþa la þesania vena kan ve keviu, ana ava ruru amiu ga, pogos naþa amiu make ga asike lele taaga narui, ana akilia akila ga na wa.

³⁴ Yaru naþa viso karia sitom manene laa kinanena, popon naga suñña ga uña, kinana ruru kana. A monar ataveve ruru kiau visena e lepas nene, visae peraga, pogos naþa aimi lele taaga, ana yoko taþatete suri tai wo van amiu.

Sur taþena si laþasa sike e inu vena visawalen van amiu, ana yoko nevisayu la van amiu e pogos naþa neim nomñalivin amiu.

12

Mareraena la naþa Ninuna Wa kian ke sa naþa nalaena tai

¹ Wolai a vineu lala, pogaga, sineun visayuen mñareraena la naþa Ninuna Wa kilia kian van ita li nalelagaena lala sane nalaena tai. E lepas nene, ve ave wowen re, ana sineun nesape monar akilia ruru toweli mña.

² Ana popon asitom si wasuŕe va e pogos naŕa kam na pe amlelaga re poli wa. E poglis nene, nam̄areraena na ninuna taŕena lala asuŕna amiyuŕnae ke e amiu, aŕure kare kiamiu sitomena la pa pe wowen ruru nenaga nalotunen nono kar la naŕa pe apis re poli.

³ Nane ninuna sur ne la naŕa akilia akila yaru vis viowa va Yesu, viuelin kiena kia, ana Ninuna Wa kiena ne Ntewa naga taŕatete la visena la ne sanene. A ninuna la nene, taŕatete akilia akila yaru visa visena wo lala, naŕa sape Yesu naga pe Suŕe kemua lelaga, ana yar naŕa visa sanene, tekilia tesape Ninuna Wa miyuŕnae ke e kiena malena, mla visena na sanene pania.

⁴ Sanene, pogos naŕa tepisu m̄areraena wo la naŕa li nalelagaena la akilia amiyuŕnae amio, tekilia tevisave nane sane nalaena la naŕa Ninuna Wa mla ke pan la. Mareraena mokliu nakilaen yuŕnaena la sike ne, ana Ninuna ne Ntewa naga taaga pe purŕesan make ga.

⁵ Sa ga naŕa ŕelaga na yuŕnaena la mokliu sike ga wa, ana kieta Suŕe naga taaga pe ŕarun la make ga,

⁶ a sitomena wo na kilaen yuŕnaena la sike ne, ana Ntewa ga naga taaga kila la apa ke metava pan ita make ga.

⁷ Sanene, e lepas nam̄areraena lala naŕa Ninuna Wa kiania, li nalelagaena lala aŕar peve taaga sane tai mla tai, tai mla tai, taveve ga ya naŕa Ntewa pisu sape yoko iila manene ŕegas nen li nalelagaena lala.

⁸ Pan tai, Ninuna kian visena la naŕa amanmarua paŕisi.

Pan tai, kian navisukiliaena nowo lala.

⁹ Pan tai, kian pupia naviawaena, pan tai, kian naŕa kilia kila ruru maiena.

¹⁰ Pan tai, kian naŕa kilia yuŕnaen kile lala.

Pan tai, kian navisawalena suri la naŕa pimi ke ga wa.

Pan tai, kian naŕa kilia m̄ene plan yermare lala.

Pan tai, kian naŕa kilia vis e visena taŕena lala.

Pan tai, kian naŕa kilia vilon visena kiena la naŕa apis ke e visena taŕena lala.

¹¹ Nane nalaena la naŕa Ninuna Wa naga taaga kilia ligan se malena kiena yaru, kian plan ke pan ita peve taaga taveve ga ya naŕa naga sinenania.

¹² Li nalelagaena lala aŕar nalaena taŕena la ne sanene, sa naŕa tasneta lala kiela kinakinas taŕena lala mokliu. Kinakinas taŕena la nene, amiyakolkol la asuŕna amiyuŕnae ruru ke veraga e tas taaga, a sa m̄ena ga nene loyuŕna e ŕegas kiena ne li na lelagaena lala, naŕa la na sane kinakinas nen tasnena Kristo.

¹³ Pona ita tepe yere Yu pona tepe yere Krik, pona tepe yerkawa pona tesuŕna temiyuŕnae korena kiena yerkawa tai, ana Ninuna ne Ntewa naga ŕere ita make ga, kila akee ita vena teimi teve kinakinas nen tasnena ne Yesu komŕasa, ana Ninuna ne nane naga taaga sike e kieta malena peve taaga.

¹⁴ Popon tesitom manene laa totou naŕa tesuŕna tepisa ke ne, sane ita li na lelaagaena lala ita na sane tasnena Kristo. Ana e lepas na tasneta lala, tekilia tesape kana kinakinas la mokliu.

¹⁵ Ana sanene, pe mesmesun re naŕa kinakinas komŕasa sane lana, mloge piowa, suŕnalu pisape “Ke, in na nepe lana ga, in na pe nemiyuŕnae ruru re sane limana miyuŕnae poli, pona in na pe pon re ga neve kinakinas nen tas komŕas poli.” Ana peraga, lata pisa ŕele sanene, komin naga pe pupia kinakinas na tasneta komŕas rui.

¹⁶ Ana pe mesmesun re naŕa kiligata loge viowa poli, suŕnalu pisape “Ke, in na nepe kiligana ga, pe nepisu kilale re sur sa naŕa kilamarana kila ke poli, pona in na pe netorokin re nesikol nemio tasnena poli yo.” Ana peraga, kiligata taŕatete visa sanene, komin naŕa naga kiena yuŕnaena napo e tasneta sike pa rui.

¹⁷ Naga nene komin naŕa visae tasneta ve kilamarana ga, yoko taŕatete teloge kilia suria, a visae tasneta ve kiligana ga, taŕatete telopon suria.

¹⁸ Ana e tasneta, Ntewa kila taveve kiena sitomena, mligan ruru kinakinas make ga su mesmesu ruruia sike nena e lelela lala, vena la veve taaga akila nena kiela yuṁaena lala.

¹⁹ Visae kinakinas nen tasneta make ga maran ve taaga, yoko taṁtatete tevisu sane tas tai,

²⁰ ana kinakinas taṁpena la monar asikol la lele taaga vena kila sane tas nen yaru.

²¹ Kilamarata taṁtatete visa kare limata, visave “Ke, pe sineun ko re poli,” a ṁarita taṁtatete ṁene lata, visave “Ke, pe nesitom ko re si poli.”

²² Pe sa re nena nene poli, ne! Kinakinas nen tasneta la ṁasia amalumlum paṁisi, ana tekilia sane asuṁa akila ke pupia yuṁaena.

²³ Kinakinas nen tasneta taṁpena laṁasa, pe tesitom re tesape aṁa la apo sanape wa, ana tesuṁa tepisuar ruru la. Kinakinas nen tasneta taṁpena lala, pe sinetan re yar taṁpena visu poli, ana tesitom urmin naṁa teyenwoia.

²⁴ A kinakinas nen tasneta taṁpena laṁasa, la atorokin ga naṁa yar la akilia avisuia, ana ve teyenwo re. Sanene tepisu ke naṁa Ntewa mligan ruru make kinakinasnena mesmes ga, a mligan sitomena tai sike e ita sape pe sur korena naṁa kinakinas laṁasa amalumlum, po pe akila re yuṁaena keviu poli, ana tesitom urmi e la a tepisuar ruru la.

²⁵ A naga nene kila naṁa kinakinas make ga pe apeveyun la re poli, asu ruru ga, asuṁa amiila la ke sina ga silaga.

²⁶ Visae kinakinas nen tasneta tai loge viowagan sur tai, kinakinas taṁpena make ga monar aloge viowa amio, a visae avisirlua kinakinas taṁpena tai akila wo vana, kinakinas make ga akilia aloge wo amio.

²⁷ Ana visena la nene la kala kinasa sanini, sane ita li nalelagaena lala, ita na sane tasnena Kristo, a ita peve taaga tepe kana kinakinas lala.

²⁸ A Ntewa mligan ita kinakinas na tasnena Kristo, ve nakilaen yuṁaena lala na suṁare. Na sumo, Ntewa pisirplan

laṁasia ape nalologena, a nalua, laṁasa ape navisawalena, a natelu, laṁasia ape navianena, a suraunia, la ṁena ga ṁasia naṁa ave nakilaen kile lala, pona akila ruru maiena lala, pona avisuar yuṁaena na suṁare, pona avis e visena taṁpena la, sanene.

²⁹ Ana ṁegas nen li na lelagaena lala, tepisu naṁa la make ga ape nalologena? Pona la punu ga ape navisawalena? Pona la make ga navianena? Pona la make ga ape nakilaen kile? Peraga, sa re nene poli.

³⁰ Pona la make ga nakilaruruen maiena? Pona la make ga akilia avis e visen taṁpena lala, pona avilon visena taṁpena lala?

³¹ Pe sa re nena nene poli, ana popon vena la make ga akekarana naṁa atol pupia naṁareraena ya naṁa Ninuna kilia kian van la.

A e ṁareraena la nene, tai suṁa ga naṁa monar imi ṁesa e kieta malena ita punu ga, naṁa po taulu make taṁpena lala, naṁa sineun visayuen van amiu, nane ṁelaga na sinesiena.

13

Sinesiena

¹ Sinesiena, naga sur tai naṁa monar ve sur nasumo e kieta malena. Pona nekilia nevisi kome visena kiena yar taṁpena la woga yo, pona nekilia nevisin visena kiena navisi la woga yo, nanene pogaga, ana visae ve sineu sii re yar lala, nekila ke sane kiau visena make ga sane ṁe tai naṁa aṁea miyelu wowe korena ga.

² Pona pupia ṁareraena sike e in yo vena visawalen visena kiena ne Ntewa, pona nekilia ruru sur moki naṁa yar taṁpena la pe akilia re poli yo, pona kiau naviawaena keviu maṁenea torokin nelotu ana sur la imi ṁalmṁalivi yo, sur la nene po manene paṁisi, ana visae ve sineu si re yaru lala, nepe sur korena ga.

³ Pona nekian kiau sur make ga pa yar la naṁa limala korena yo, pona nesuṁalu ṁarera ṁa pano-o asikap tasneu komin naṁa nepe yaru kiena Kristo, naga ṁena nene po na po, ana visae ve sineu sii re yaru, nekila korenan ga.

⁴ Ana pupia sur nene, þelaga na sine-siena, naga sanape? Kiena sitomena piavi, a naga sinewo. Naga pielue re poli, naga pilave re poli, a naga pisirlua re si naga poli.

⁵ Kiena þelaga po, naga puluvis re poli, naga sinena mimi koskos re poli, a naga tarar re sitomena viowa piavi poli.

⁶ Naga pe sinenan re sur viowa poli, ana naga kekaran ga sur wo.

⁷ Sinesiena naga suñalar lue ga, sine-siena naga lelaga lue ga, sinesiena naga wasine lue ga, a sinesiena naga taulu lue ga.

⁸ Sinesiena naga pe sinena mare re pogos tai poli.

Lelaga paþisi, nañareraena taþena lala, sane navisawalena lala, pona navisaen visena taþena lala, pona nakiliaena lala, yoko taþatete sike lue, ana nasine-siena ga naga su lue, naga taþatete þisi pogos tai.

⁹ E kieta pogosia, asuñã apisawal ke visena kiena ne Ntewa, a asuñã apian ke nakiliaena la ne sanene, ana ya naþa asuñã akila ke nagane, naga komþas nena ga, pe wetelu re nenaga þisa.

¹⁰ Sur la nene ape nanagane ga, a e pogos naþa Ntewa yoko kila sur make ga imi wo ruruia, sur taþena la nene yoko aþisi, ana sinesiena yoko su lue.

¹¹ Naga maran taaga ga amio kieta malena. Pogos naþa tepe sisi ke ga wa, kieta visena amio kieta sitomena mla ke ga þelaga kiena sisi. Ana pogos naþa tepe yerka, pe tesa re si ninis poli, kieta þelaga marua ruru nenaga. Ana kieta malena amio Ninuna Wa monar ve sa mēna ga nene.

¹² A maran taaga mēna ga e kupito naþa tepisu ke marata ea. Pogos tai, visae kupito nene namname pona pe urmarua, ana taþatete si tekilia tevisu ruru marata ea. Ana e pogos naþa Ntewa kila ruru make sur la imi wo, yoko tevisu kilale make suria, a yoko tevisu nena marana Ntewa e kilamarata. A e mēna e lepas na kieta kiliaena, nagane tekilia vitokak ga, ana e pogos naþa pimi ke ne, yoko Ntewa kila naþa tekilia ruru naga, amio sur taþena make ga, maran ve taaga sa ke

ga naþa naga kilia ruru ita nanua sumo rui pimi tol nagane.

¹³ Sanene, sur taþena lala yoko þisi, ana sur la ve telu ga yoko kilia sulue, nane naviawaena, nawasineena, a sinesiena. A e sur la telu nene, naga naþa keviu manenea, nane nepisa maron ne, naga sinesiena.

14

Pol pisayu sina ñareraena lala kiena Ninuna Wa, sa naþa avis kome visena taþena lala

¹ Ana komin sinesiena naga pe sur tai naþa keviu manene sanene, monar aligan naga su þesia e kiamiu malena. A amio naga nene, monar aligan kiamiu sitomena se nañareraena la naþa Ninuna Wa suñã kiania, akekaran naþa atolia. A e ñareraena la nene, tai naþa po manenea, na naþa yar visawal visena kiena ne Ntewa.

² Visae yar tai suñalu visawal visena kome visena taþena naþa Ninuna Wa mla pania, pona wo van yo, ana sa naþa pis ke ga pa Ntewa, naga pe suñã pisa re visena naþa yar taþena la akilia aloge kilale poli. Pona naga suñã pisawal ke pupia visena la naþa Ninuna Wa mla ke pan yo, ana visena la nene pe merarava re pan ita poli, tapolou ga, taþatete tetolia.

³ Ana visae yar tai visawal visena lala kiena ne Ntewa van ita, vis van ita kome kieta visena, kiena visena wo la nene akilia akila ita toñarera, akilia avisir plan kieta sitomena, akilia akila luþeluþe losineta.

⁴ Sanene, yar naþa pis ke kome visena taþena naþa Ninuna Wa mla pania, suñã pagan ke sina ga naga taaga, ana yar naþa pisawal ke visena kiena ne Ntewa naþa yar la amloge kilalea, naga suñã pagan ke suñare make ga.

⁵ Pogaga, nekekaran naþa visae avis kome visena taþena la ne sanene, ana nepisu sane popon manene visae asuñã avisawal ke visena kiena ne Ntewa van yar taþena lala. Naga naþa suñã pisawal ke visena kiena ne Ntewa, kiena yuñãena po manenea taulu yuñãena kiena yar naþa suñã pis ke kome visena taþena.

Naga nene komin yar naþa sumãa pis ke kome visena taþena, kiena yumãena taþatete kilia war mrasa e malena kiena yar taþena. Kiena yumãena taþatete vagan sumãare visae yar re tai naþa sumãa vilon kiena visena vena yar taþena lala akilia alogekilalea.

⁶ Erau lala, asitomiyulia visae inu, pogos naþa nepim ke pun amiu nesumãa nemlologo kome visena taþena naþa Ninuna Wa mla pan inu. Ana yoko taþatete nena kiau visena la ne sanene kilia iila amiu. Ana pogos naþa nepis kome visena naþa akilia amloge kilalea, kila sane ya naþa nemla pan amiu, sane sur viu tai naþa Ntewa kipian inunia, pona kiliaena tai, pona navisawalena tai na visena kiena ne Ntewa, pona vianena tai, ana kilia iila ruru kiamiu malena.

⁷ Naga sane plaþe amio kana laki naweena naþa aþnea apolu, visae sur lua nene amenunu, ana pogos na wolena taþatete ologe yauena pona pialu yelu.

⁸ Ana visae suþe tai sinenan visave we þe na kumali, ana þe nene menununu, taþatete yelu ruru ve keviu, yoko yeririna la taþatete akilia aloge kilale avisave suþe me þe na ya.

⁹ Ana sa ke mþena nene e kiamiu sumãare gar e namãa. Visae yar tai sumãa pisa ke visena lala kome visena taþena naþa yeririna la akilia re poli, yoko taþatete nena atol narin sur tai e ya naþa naga sinenan sape visa van la. Kiena visena yoko va kovio ga e yepesinas na meke ne.

¹⁰ Sa naþa tekilia, visena mokliu sike e yomarava, a kiela visena lala kala kinas la sumãa ga.

¹¹ Ana visae neva ko yo tai, neninue kiena visena, in na sane nepe wolawa ga e yo nena, a la mþena ga ave wolawa ga e inu.

¹² Ana visena nene, kana kinasa e amiu naþa asumãa aþion ke asape mþareraena lala kiena Ninuna Wa ayumãae likan amiu. A kana kinasa sanini, ve akila re naþa kam veve taaga asumãa avisir plan amiu ga, ana monar awionlia vena amiu make ga asumãa avisirlua sumãare imi mþarera ruruia.

¹³ Ana visae amiu yar tai kilia visi kome visena taþena tai sanene naþa Ninuna Wa mla pania, popon naga lenin va Ntewa vena Ntewa la mþareraena vania vena vilon kiena visena la nene ava e kiamiu visena.

¹⁴ Nepisa sanene komin naþa visae nelotu kome visena taþena na sanene, nepisu sane nesumãa nelotu ke ga e ninuu, ana loyumãa e kiau sitomena nemninue ya naþa nesumãa nepisa ke ne.

¹⁵ Visae ve sanene, yoko popon tekila ve sanape? E kiau navisuena, popon tekila e lepas ga luwoka veraga. Visae nesumãa nelotu, pona nesumãa neyau, ana popon nekila e visena naþa molue kome ninuu, a popon mþena nekila e visena naþa molue kome kiau sitomena.

¹⁶ Visae peraga, pona osumãa olotu ga kome visena naþa molue kome ninumãa, osumãa ovisa potena va Ntewa komin sur laþasa, ana yar taþena naþa loge þele visena nene, yoko taþatete kilia, yoko taþatete visa "Sanene" e kioþma leniena.

¹⁷ Pona osumãa omlotu ke sanene, opisa ke suri wo la moki yo, ana kioþma lotena nene taþatete kilia iila sitomena kiena kioþma erau þisa.

¹⁸ In na nekekara paþisi naþa Ntewa mla namþareraena nene pan inu vena nevisi kome visena taþena naþa Ninuna Wa mlavia, nepisa potena pan paþisi, a nepisu sane inu na nekila keviu paþisi taulu amiu make ga.

¹⁹ Ana nesumãa nekila ke e pogos naþa inu ga taaga nesiau, pe nekila re e maran yaru la poli e pogos na sumãare. E kiau navisuena, visae nevisa visena tai ve tokak ga kome visena tai naþa yar la akilia, naþa kilia vian kiela malena, naga nene po manene laa taulu naþa visae nekila visena la ve moki kome visena taþena tai naþa la pe amloge kilia re poli.

²⁰ Erau lala, awis akilali naþa asitom ruru e sur la nene, kiamiu sitomena ve ve sa re ga ninis. Pe lelaga naþa e lepas na þelaga viowa lala, popon ave sa ga ninis, ve akilia make re sur ea. Ana e lepas na þelaga wo, kiamiu sitomena lala monar marua ruruia.

²¹ Visena tai sike e Siriena Marua, pi-sawal visena tai naþa Ntewa pisa sanini, sape

Yoko noure yar la naþa apimi e purvanua taþena lala, naþa apisi kome visena taþena lala, neligan plan la avano vena avisawal kiau visena van kiau yeririna lala.

Ana kiau yeririna lala ape þarmarera paþisi, yoko taþatete ayagogon kiau visena la naþa wolawa la nene avisawal van la.

Ais
28:11-12

²² E visena nene, nepisu naþa Ntewa pisawalia pisape naþareraena na visinen visena taþena lala naþa Ninuna Wa kiana, naga na ya? Mareraena nene pe pe kieta re poli ita la naþa temlelaga pa þisi rui, ana naiilaen la naþa pe amlelaga re poli wa. Pogos naþa aloge, avisu kilalea sane lelaga. Ana naþareraena navisawalen visen kiena ne Ntewa, naga kilia iila manene ita naþa temlelaga rui, naþa tekilia teloge ruru merarava wo. Ana naþareraena nene taþatete iila manene la naþa pe amlelaga re poli, komin yepela maviñ yagogonen visena lala kiena ne Ntewa.

²³ Ana pogos naþa aimi lele taaga vena kilaen suñare sanene, pe pon re asumã avis manene kome visena la naþa Ninuna Wa mla ke pan amiu poli. Visae pogos tai, yar tai naþa pe kilia ruru re sur nene poli yo, pona pe mlelaga re poli, visae naga imi loyumã e kiamiu suñare, yoko naga visa ve sanape? Yoko naga monar sitom visave kam make ga ape wowe la.

²⁴ Ana visae imi loyumã, visu naþa asumã apisawal ke visena kiena ne Ntewa kome visena naþa amiu punu ga akilia, yoko naga yagogon ruru kiamiu visena wo lala, ana kilia yur kiena malena, kilia kila naga visu kilale kiena mlamulena viowa.

²⁵ A pogos naþa yagogon mña sanene vano-o, yoko naga loge visena kiena ne Ntewa tol kiena malena, va yupor e sur la naþa naga þarwan sike e kiena sitomena, a yoko kila naga sinena ye si naga, kinai tano lotun Ntewa, visawal visave lelaga, Ntewa sike likan amiu.

Monar teyumãe e naþareraena kiena Ninuna Wa e þelaga mesmesu

²⁶ Taveve visena la nene e lepas na naþareraena lala naþa Ninuna Wa kiana, yoko akila ve sanape e pogos na kiamiu lotena lala? Pogos naþa aimi lele taaga, popon vena aliureure kana yumãena lala van amiu. Sanene, yar tai la yauena tai, yar tai la navianena tai, yar tai la sitomen viu tai naþa Ntewa pisawal pania, yaru tai la visena tai e visena taþena tai naþa Ninuna Wa kian pania, a taþena kilia vilon visena nene vena yeririna la make ga akilia kana kinasia, ana suri punu ga kilia vagan ruru malena kiena li nalelagaena la naþa asike ne.

²⁷ Ana sa naþa nepisa, visae e pogos nene, yar tai sinenan vis kome visena taþena naþa Ninuna Wa kian pania, nanene pogaga. Visae ve lua pona ve telu naga pogaga mña ga, ana monar ve yuve re telu. A ve avis re veraga, ana ala pogos van la, tai sumo, siraunia taþena sanene. A tai mña ga, visae tai vis pae, yar taþena monar vilon kiena visena, vena la make ga akilia.

²⁸ A visae sinelan visen kome visena taþena sanene, ana visae pe tai re suñã ga naþa tol naþareraena na visawalen kinas nen visena la nene poli, yoko la ve avivis re si kome visena taþena la ne sanene e maran yaru lala. Yaru na sanene, yoko topur ga, a kilia vivis ga kome visena taþena e ga e ninuna, naþa naga ga amio Ntewa lalua akilia aloge.

²⁹ E lepas kien la naþa apisawal ke visena kiena Ntewa, popon sane la ve lua pona ve telu ga avis. A pogos naþa avis pae, popon li nalelagaena taþena lala avisawal kiela sitomena ea.

³⁰ Visae tai suñã mlologo mña, ana Ntewa kila sitomena viu tai imi van nalelagaena taþena naþa totano teke ne, naga naþa suñã pis ke ne monar þisi kone wa vena la pulmas van taþena nene.

³¹ Sanene, amiu punu ga akilia atol pulmas na visawalen visena kiena ne Ntewa, naþa tai visawal tai, þisi taþena visawal tai, sanene. Ana visena la nene yoko kilia visirlua sitomena kien yaru

make ga, a la make ga akilia atol sur wo ea.

³² Visena wo tai sike ne, naþa torokin la naþa aþar ke naþareraena naþa Ninuna Wa kian pan la. Visena nena pisa sanini, sape Ninuna naþa mla visena pan yaru naga pe mñareran re yaru poli, ana naga monar logear ga manmaruaena kiena yaru nene naþa pisawal ke visena nene.

³³ Visena nene kana kinasa asape monar teyuñae e þelaga wo sa naþa Ntewa naga sinenania, komin naga pe sumña miyuñae kar re poli amio kiena naþareraena, ana sumña miyuñae ke sur punu ga torokin þelaga na sumñarena.

A popon akila ve sa naþa þegas nen li nalelagaena wa taþena lala asumña akila,

³⁴ naþa pogos na lotena, akila naþa sira lala apa ruru la ga asumña ga. Pe atañan re sira la asumñalu poli vena avis e marana yermene lala, komin sa naþa navisaluaena marua pisa, sira lala monar ve asu re metava taulu yermene lala.

³⁵ Visae sira la sinelan kiliaen suria, pe pon re aviun manene naviunena poli pona avisawal manene kiela sitomena loyuma e sumñare, ana visae ava umña narui, akilia aviun ga va wola la na wa.

³⁶ Nanene kiau visena laþasa naþa pan amiu, ana pe pon re kam laþasa asitom asape nepisa sur nene pe memes re poli. Pe kamiu re naþa Visena Wa kiena ne Ntewa pimi þes pan amiu poli, a pe kam re ga naþa atol poli.

³⁷ Visae kam yar tai sitom visave naga yar na visawalen visena kiena ne Ntewa, pona naga pe yar naþa sitom ke sape naga taveve ke mrapa naþa Ninuna Wa kila pe merarava pania, naga ke narui naga po, ana visae ve sa kemua nene, yoko naga monar visu kilia visave sur la naþa nesumña nesiriyu ke pan amiu, ape visena kiena Suþe kemua lelaga.

³⁸ Ana visae naga ve visu kilale re sane kiau siriena la nene ape visena lelaga kiena Suþe, yoko monar ve atañan re si naga yuñae amio amiu.

³⁹ Pogaga, monar asitom ruru kiau visena lala, nesape añareran naþa vena atol naþareraena na visawalen visena kiena Suþe, ana visae la þasa atol naþareraena na visena kome visena taþena naþa Ninuna Wa kian pan la, monar ve avisaluþar la re avisave kilaen toko.

⁴⁰ Ana visae akila nene, pona ya sina, ana monar akila sur make ga taveve kana mrapa naþa memes ruru po.

15

Suñalen sina e marena

¹ Erau lala, sineun nesape nevisayu si Lologena Wo naþa nepim nemlologon pan amiu rui, naþa amlavia, asumña asumñal ke mñarera ea, vena kila amiu ve sinemiu þesan re.

² Lologena Wo nene na naþa visae asumña amlarar ke mñarera yo wa, naga sumña kila ke naþa atol kiamiu natamali-aena. Ana visae ve atarar re si mñarera torokin ya naþa nemlologon pan amiu, pona visae avilon ve ve taþena, kana kinasa sane amlelaga nanua sumo ana amlelaga korenan ga.

³ Lologena Wo naþa amla þesan pan inu nanua sumo, nane nemla narui, nepisawal ke pan amiu ne. Kana pupia visena ne lala apisayu Kristo, naþa naga kila maran taaga sa ke naþa Nasiriena Wa pisayu nakonua rui sape yoko naga kila, pogos naþa naga pe pitomi re poli wa. Pa sanini, sape Kristo, naga mare wo ita vanon kieta mlamulena viowa lala,

⁴ siraunia amligan naga mñene puluve, siraunia e kana legiena na telu suñalu mal sina,

⁵ a siraun naga nene naga mñalivi þesan e marana Keþas, siraunia, naga mñalivi ke sina ga e marana la lualima yam taaga pa lua.

⁶ A siraun naga nene, pogos si tai naga mñalivi e marana þegas nen li na lelagaena lala, la taulu ponotia lima [500], naþa la mok liu amal ke ga wa tol nagane, ana laþasa akokovio rui.

⁷ Ana siraunia, naga m̃alivi sina ga e marana Semes, siraunia m̃alivi e marana nalologena taņena lala,

⁸ ana siraun nene, naga p̃asuņe si pa ma e peni. In na pe nesu re e poglis nene poli, ana potena paņisi naņa siraunia, Suņe m̃alivi si yam tai, naņa naga m̃alivi maro nenaga, m̃alivin inu.

⁹ In na pe netorokin re naņa naga kila sanene van inu poli, komin naņa e nalologena make ga, in na nesumaro tano, a in na pe netorokin re nena kia nene poli, komin nanua ne in ke narui naņa nesuņa nomene ke p̃egas nen li na lelagaena lala kiena ne Ntewa.

¹⁰ Ana Ntewa naga pe lemam pan inu paņisi, pisirlua inu e yo naņa nesike e nagane, a naga pe lemam korena re sanene pan inu poli, komin naņa nekila ke kiena yuņaena kerkeviu la moki. Lelaga, pona nekilia nevisave in na nekila ke yuņaena pa laa sane taulu make taņena lala, ana pe in re naņa nekila ke poli, ana lemamiņa kiena ne Ntewa ne nanene narui naņa sike e inu, naga ke narui miyuņae p̃arpoyo kome kiau malena.

¹¹ Ana in na pe nesitom manene re nesape in na nemiyuņae ke sanape, pona nalologena taņena lala amiyuņae ke sanape, ana pupia sur nena sane memlologon Lologena Wo pan amiu, ana amlelaga ea.

¹² A pogos naņa memlologo ke sanene pan amiu, mepisawal meraravan ruru pan amiu mesape Kristo, naga mare, ana siraunia mal sina. Ana komin naņa mekila ke sanene, nemilan paņisi naņa nemloge sane kam la p̃asa asuņa apisape pogos naņa tokovio, asin ita, ana yoko temare lue, ve temal re si pogos tai.

¹³ Sitomena na sanene pe memes re poli, komin naņa visae asuņa avisave pe yaru re tai naņa kilia suņalu si poli, kana kinasa sane Kristo m̃ena pe suņalu re si poli. Ana peraga, Ntewa pisirlua naga mali si rui.

¹⁴ Visae naga ve visirlua re Kristo, kila sane memlologon korenan ka ga Kristo pan amiu, a amiu m̃ena amlelaga korenan ga.

¹⁵ A visae ve sanene, kila sane pogos naņa memlologon ke sanene pan amiu mesape Ntewa pisirlua Kristo mal si rui, mepisokan paņisi e kia kiena ne Ntewa, pona mepian amiu ke e sur tai naņa pe lelaga re poli.

¹⁶ Visae lelaga naņa sane yar mare taņatete si mali, kana kinasa sane Kristo m̃ena ga taņatete si mali.

¹⁷ A visae Kristo mare mon m̃aga sanene, kana kinasia sane kiamiu navi-awaena pe sur korena ga, a kana kinasia sane kiamiu mlamulena viowa la sike e amiu na wa.

¹⁸ A visae Kristo ve mal re m̃ena ga si sanene petan marena, kana kinasa sane kieta erau la naņa amlelaga ana akovio rui, apa e yo viowa rui, komin pe yar re tai naņa kilia tamalia la poli.

¹⁹ A visae kieta lelagaena e Kristo suņa miila ita e ga e yomarava nini, ana taņatete iila ita e pogos naņa tokovio ea. A visae Kristo taņatete tamalia ita e pogos naņa tokovio e yomarava nini, yoko viowa manene van ita, sineta ye kare ita vaņisi.

²⁰ Ana peraga, pe sa re nena nene poli, nekilia nevisa memesu nevisa ve lelaga, Ntewa kila si Kristo mal si petan marena, a pisirlua naga sane pe mras p̃esa kiena li na lelagaena make ga, naņa visae akovio pogos tai, ana yoko Ntewa kilia kila amal sina ga vetan marena.

²¹ Nanua e purp̃esa, yar p̃esa naņa Atam p̃ere marena pimi e yomarava, ana nagane, yar taņena nene naņa Kristo p̃erelua malena petan marena pimi.

²² Taveve ya naņa Atam kila, yeririna make ga na yomarava monar amare, ana taveve ya ne Kristo kila, yeririna make ga na yomarava akilia alual malena.

²³ Ana sur make ga kala pog memesu sike ne, komin naņa Kristo naga sumon naņa suņalu p̃esa e marena, ana ita li na lelagaena lala yoko tesuņate m̃a vano-o tol pogos naņa naga wasuņe sina, ana yoko ita m̃ena tesuņalu e marena.

²⁴⁻²⁵ Ana siraun nene yoko naga wereplan ninuna viowa lala amio yermare

lala na yomerava, a yoko naga taaga ve ĩarin suĥen sur make ga, vano-o taulu naġareraena viowa taĥena lala asike vatanon lana. Pisi yoko naga war nasuĥenen wetelu e sur make ga wasuĥe si va Ntewa Arimana.

²⁶ A e nasinekar la naĥa yoko Kristo taulu e pogos nene, naĥa yoko naga taulu maronia, sur nene marena, amio kiena naġareraena viowa lala.

²⁷ Kristo monar taulu marena nene, komin visena na metava ne pisa sanene rui, sape yoko Ntewa ligan sur make ga su vatanonia. Ana visena nene kana kinas pe pisa re sape Ntewa mligan ke sina ga naga sike vatanon Kristo poli, ana pisayu sur taĥena lala, naĥa yoko Kristo taulu make la nenaga.

²⁸ A pogos naĥa Ntewa mligan sur make ga sike vatanon Kristo sanene rui, yoko Kristo, sane narina Ntewa, mligan sina ga naga vatanon Ntewa, ana yoko kila naĥa Ntewa naga taaga ve Ntewa na sur make ga.

²⁹ Nowasuĥe si neva e visena naĥa nepisayu nesape visae temare, yoko sir- aunia tesuġal sina. Ana laĥas naĥa amlelaga sa nene, la asitom manene kiela erau la naĥa pe akeela li re poli wa, ana amarmare. Asitom ke asape la nene taĥatete atol malena, kila narui akee la sina e kia kiena ne kiela erau lala naĥa amare rui. La akila ke sanene, komin naĥa amlelaga ġarera asape visae temare, yoko tesuġal sina.

³⁰ A imimi ġena ga maran taaga, asito- mli sane komin ya ne mesuġa moġal pog ġarera lala e pogos make ga? Mesuġa moĥar ke naloge viowaena la sanene komin ga memlelaga ġarera mesape visae yaru tai mare, yoko naga kilia mal sina ga vetan marena.

³¹ Lelaga erau lala, mesuġa memiyuġae ke sanene, nekilia nevisa mesmesun sane nemloge sane nesuġa netamġan ke kiau malena vanon amiu e legiena make ga. Ana nanene pogaga, komin nekekara na nekekara e malena naĥa atolia amio kieta Suĥe Yesu Kristo.

³² A pogos naĥa nesike e pulkumali naĥa Episas, ĥararera lala nae yo nene

la asaga lokul tetan lala, asuġalun inu lue ga, ana komin ya ne nesuġa nepisaluĥar la? Nesuġa nekila ke sanene, pe netaulu re nena sur wo tai na malena na yomar- ava nini, ana nesuġa nekila ke sanene komin nesitoġal ke malena na pimi ke sirau.

Visae ve malena re nene, popon teve sa ga yar kar taĥena la naĥa pe amlelaga re poli, naĥa la asuġa apivis ke sanini, asape, "Pane, tekila ĥaĥagena, ve tesitom re sur tai, komin naĥa peni, ane kilia? Visae temare na ĥisi narui, yoko taĥatete tekilia sur tai."

³³ Ana monar ve ataveve re sitomena na wowe la ne sanene, visae peraga, yoko visena taĥena nene imi ve lelaga e amiu, naĥa pisa sanini, sape "Oyaloro omio erau viowa lala, yoko kiela napiowaena kila kare kioġa ĥelaga wo."

³⁴ Monar aim ave manmarua, a monar aligan kiamiu mlamulena viowa lala. Nepisa sanene, pona asitom ke asape nekila kare kiamiu kia yo, ana monar nevisa, komin kam laĥasa pe akilia ruru re nena mrapa mesmesu lala kiena ne Ntewa poli.

³⁵ Ana e lepas na malena si e marena, yoko laĥasa aviun sanini, avisave "Yoko akila si yar mare la amal e marena ve sanape?" Pona yoko aviun sanini, avisave "La naĥa amare nakonua rui, yoko asuġal sina amio tasnela na sanape?"

³⁶ Ana naviunena la ne sanene ape naviunena kiena yar naĥa pe kilia re sur poli. Visae tesitomli narin kurus nen sur la naĥa tesuġa temapila ke ne, yoko telual kana navisatanġeena. Pogos naĥa omapila narin kurus tai vito e porotano, okilia rui osape kurus nene monar me- nun, monar mare, ana siraunia, yoko sirus viu kilia kapur komea.

³⁷ Sur naĥa omapila, naga kurus ga tai naĥa yoko sike e porotano, ana sur naĥa yoko kapur marea ve urviu sina, naga ve sur taĥena.

³⁸ Sa naĥa omapila ke kurus la peve taĥena ana Ntewa suġa kila sirus viu lala peve taĥena,

³⁹ a maran ve taaga e sur mali lala, naĥa tasnela la peve taĥena. Tasnena yaru

kana tata pe taþena, a surmali lala sane na porotano, na si, po na metava, la peve taaga tata taþena la sike e la.

⁴⁰ A surmali la nene, tasnela lala pe taþenan manene laa e tas nen sur taþena la naþa asike ma e sinapane,

⁴¹ sane mrae, kupario, amio verue lala. La telu nene, tai marana pe taþenan maran taþena, a maran taaga mēna ga e lepas na verue lala, naþa tai, marana pe taþenan taþena.

⁴² Ana sur make ga la nene, tepisu naþa Ntewa kila la ape taþena manene laa, a sur nene þar totou na tasneta, kiena ita la naþa tokovio, naþa tekilia tokusia pogos naþa tesuñalu temal sina. Tasneta vito e pulus nen porotano, sane kurus tai naþa amapla, naþa monar menun, ana siraunia, tasneta viu naþa molue yoko taþatete si imi viowa pogos tai.

⁴³ Tasneta naþa vito e porotano, tepisu piowa ga, a pororovia, ana tasneta viu naþa ñalivi sirau, yoko tevinaia vaþisi, a ñarera ruru wo.

⁴⁴ Sur naþa vito e porotano, naga e lepas na tasneta ga ne, ana sur naþa ñalivi sirau, naga e lepas na ninuta.

⁴⁵ A tekilia tesitoñal mēna yar na sumo naþa Ntewa siia, naþa Atam, amio Atam maro naþa mligan e yomarava, naþa Kristo. Visena tai pisape Atam, Ntewa kila naga pimi amio tasnena tai naþa mali, ana Kristo, Ntewa kila naga pimi amio ninuna tai naþa pe purþes nen malena.

⁴⁶ Taveve nene, tepisu naþa sur na lepas nen tasia pimi þesa, ana sur na lepas na ninuna, pimi maro.

⁴⁷ Yar na sumo naþa Atam, Ntewa sii naga molue kome porotano na yomerava nini, ana yar na lua naþa Kristo, Ntewa mligan naga kom ma e peni pitomi.

⁴⁸ Ana ita yeririna taþena lala, ita naþa tepe na yomarava, tokus ke þelaga kiena yar na sumo na yomerava nini, ana ita naþa tepe nae ma e peni, tokus ke þelaga kiena naga naþa pitomi ma e peni.

⁴⁹ A ita naþa temlelaga, sumo tokus maran yaru na yomerava, ana nagane tokus ke maran yaru nae ma e peni.

⁵⁰ Erau lala, sur naþa kate ga e yomarava nini, sane tasneta, taþatete va loyuma e nasuþenena kiena ne Ntewa nae peni, a sur naþa yoko va kovio, taþatete va tol yo naþa sike sike lue.

⁵¹ Ana yoko ve sanapen li na lelagaena lala naþa amal ke ga wa, pogos naþa Kristo wasuþea? Sur nene, pe yar mok re naþa akilia poli, ana yoko nevisawal mesmesun van amiu. Lelaga, ita li na lelagaena laþasa yoko ve temare re e yomarava nini, ana e pogos nene, yoko tasneta vilopu nena veraga sa ga yekarpla.

⁵² Sa naþa toþelawa ve plas ga, yoko teilan ga kumasua yelu, a yoko li na lelagaena la naþa amare pa rui yoko asuñal amal sina amio tasnela viu, a ita mēna naþa temal ke e pogos nene wa, tasneta mēna lala yoko imi ve urviu.

⁵³ Tasneta marua monar vilon ve sanene, komin naþa sur na yomerava monar imi ve sur nae peni a sur na marena monar yoko imi ve sur naþa mal nalue.

⁵⁴ Ana pogos naþa toþar tasneta viu na sanene, yoko kila visena na Siriena Marua tai imi ve lelaga nenaga, naþa sape *“Nañareraena na malena kiena ne Ntewa ñenelua nena na ñareraena na marena.”* *Ais 25:8*

⁵⁵ E pogos nene, yoko tevisa lele kare sur naþa marena þisa, tevisa sanini tevisave *“Marena, ko sinoñan osape otauluia, ana nagane kioña kap mare. Kioña nenos naþa nayur imimiena sike pe nagane?”* *Ose 13:14*

⁵⁶ Yoko tevis sanene komin navisaluaena naþa sike pa rui, naga mla ñareraena pan þelaga na mlamulena viowa loyuma e kieta malena, naþa kila ita tepim sane yar lala na kilaroen navisaluaena, a kieta þelaga na mlamulena viowa nene mla na ñareraena pan marena vena ve sa nenos naþa kilia yurñar ita.

⁵⁷ Ana potena pa Ntewa paþisi, komin naþa naga kila naþa kieta Suþe Yesu Kristo taulu ñareraena navisaluaena a ñareraena na mlamulena viowa a ñareraena na marena, kila tetol malena naþa ve uro re.

⁵⁸ Erau nowo lala, komin naña Ntewa kila po pan ita sanene, asumãlu m̃arera, ve akulkulu kar re, a ayumãen ruru yuñãena kiena kieta Suþe amio kiamiu nam̃areraena wetelu. A pogos naña akila ke sanene, popon asumã asitomãl sane kiamiu yuñãena nena ve ve sur korena re, ana yoko monar war mrasa sa naña Suþe sinenania.

16

Kilavaru naña akoania va li na lelagaena lala nae Yerusalem

¹ Sineun nesape nela visena laþasa van amiu e lepas na warpoloen kilavaru vena iilaen li na lelagaena lala nae Yerusalem, naña apane ke pogos m̃arera, limala korena ga e poglis nene. Nemla visena pan sum̃are kar make ga e lepas nae Kalesia rui, a nagane sineun nesape nevisawal van amiu narui.

² Sineun nesape nevisa sanini, nesape ve asusu koren re asumã sanene va tol pogos naña neim̃asu nom̃alivin amiu ana awarpolo ga nalaena na wa, ana sineun nesape siar nagane, e legiena þesa na legiena olua make ga, kam veve taaga monar ala narin kinakinas nen ya naña amlavia, ana monar aligan ruru tomã ga.

³ Ana pogos naña neim̃asu, yoko to-warpolo narin kilavaru la nene imi lele taaga, a yoko akilia akilalua yar laþasa awar nalaena nene va gar Yerusalem. A yoko nesiri m̃aki laþasa awararia va va li na lelagaena lala gar ne, vena visawal amiuena van la.

⁴ Nemninue ke ga wa pona inu m̃ena nemio la yo, ana yoko nevisulia wa.

Mrapa kiena Pol

⁵ Pogaga, kiau mrapa sanini, sineun nesape neva nokom e lepas nae Masitonia sumo, ana suraunia yoko neim̃asu nom̃alivin amiu.

⁶ Nemninue ke ga wa nesape yoko nesike nemio amiu va tol pogwai, ana nesitom ke nesape nesike nemio amiu e pogos na miava na pimi ke ne, ana siraun naga nene, akilia aligan inu si e kiau

mrapa, vena neva si e nape naña yoko neva ea.

⁷ Pe sineun re nokom pun amiu nagane poli naña nesumã nepanon ke Masitonia, komin visae ve sanene, yoko nekilia nesu yam ve plas ga ne, ana yoko neva ke ne gare sumo wa, siraunia neim̃asu, komin naña visae Suþe tam̃ania, nekekarana naña yoko nesu towe laa nemio amiu ve piavi.

⁸ Nagane nesike Episas, a yoko nesu towe laa e nini na wa, tol pogos na Paþagena na Yui Marua warovia.

⁹ Kiau pulmas na kilaen yuñãena wo la e nini moki ke wa, a suri si tai, nasinekar m̃arera m̃ena la mokliu asike e nini, ana pe nekilia re poli naña nekilia neyal pogwai.

¹⁰ Visae avisu Timote imi m̃alivin amiu, awis, awo vania, akila naga logewon naña sike amio amiu, komin naña naga kila ke yuñãena kiena Suþe, maran taaga sa ke inu.

¹¹ Ve atamãan re kam laþasa avisusu viowa e naga, ana avisuar ruruia e þelaga na sum̃are, siraun aligan naga e kiena mrapa vena naga kilia wasuþe ruru imi pun inu, komin nesum̃ate ke nesape vena naga amio wolai taþena lala aim aworu e nini.

¹² E lepas kiena ne kieta puruvi naña Apolos, nepiun manene pania vena naga taveve puruvi taþena la nene aim̃asu pun amiu, ana kiena sitomena m̃arera sape naga nene pe kana pog memes re poli naña m̃alivin amiu, ana visae kana pog nena, pona yoko naga sirau iñasu.

¹³ Erau lala, lavis ke kiau visena þisi narui, ana sineun nesape nevisa van amiu sane amiu avisuar ruru amiu, asumãl ruru ase kieta lelagaena, ve sinemiu kurkurun re suria, ana am̃arera.

¹⁴ A suri make ga e naña akila, monar akila e þelaga na sinesiena.

¹⁵ Popon avisu kilale Steþanas nene amio kiena namratava lala, amio yuñãena naña asumã akila ke ne. E yeririna nae make ga e kiamiu lepas nene, Akaea, la ke nene narui la amlelaga þesa.

A siraun naþa amlelaga, asuũa akila ke yuũaena wo paþisi, asuũa amiila ke li na lelagaena lala pimi tol nagane.

¹⁶ Yar nowo la ne sanene, popon avisir plan la vena asumon amiu, a popon avatanon mēna yeririna taþena la naþa amiyuũae ke lele taaga amio la.

¹⁷ Steþanas nene pimi mālivi e nini rui, naga pimi amio Posanatas a Akaekas, a nekekaran la telu paþisi. La asuũa amiila inu ke e suri moki, torokin ke ga naþa amiu mēna akilia akila visae asike e nini.

¹⁸ La telu nene akila po pan amiu rui, ana pogos naþa apam e nini akila inu mēna nemloge po paþisi, apisirlua kiau sitomena. Popon avisa potena ve keviu van la komin kiela pupia yuũaena wo na sanene.

¹⁹ Suũaare make ga lala na lepas nini nae Esia asape asuũa asitom amiu paþisi. A kieta erau lua nene, Akwila amio wona na sira Prisila, amio yeririna lala na suũaare naþa e mālala uũa, la apisa pokolulagi a pokolemalo pan amiu e kia kiena Suþe.

²⁰ Kieta erau lala nae yo nini akekaran navitawe amiuena e mākī nene, a amiu mēna, pogos make ga naþa avitawe amiu, popon asuũa atalopan amiu a asuũa aviran pipimiu, vena akekaran amiu amio sinewo.

²¹ Ana siar e narin yo nini, inu Pol nemlarar ke pensel nesuũa nesiria vena nevisa kiau visena maro van amiu.

²² Monar sinemiu sii ke mēna Suþe ve lelaga, visae peraga, yar naþa ve sinena sii re naga, visaarena na marena sike e naga. Nesuũa nemlen ke sanini, nesape Suþe Yesu, awis, otom vilaga,

²³ a nesuũa nemlotuwo amiu ke mēna ga, nesape lemamiēna kiena kieta Suþe Yesu sike amio amiu.

²⁴ A sane silaga, nekilia nevisa e kia kiena Kristo Yesu sane kiau sinesiena van amiu keviu sulue ga suũa ga.

Kiau mākī þisi ga e nene narui,

Inu, Pol.

**Maki Nalua Naþa Pol Siri
Pa Pan Li Nalelagaena Wa
Lala Nae Garu
KOREN
Visayuena Na Tusi Nene**

Komþasnen suniena plas na tusi nini

Maki na lua nene naþa Pol siria pa li nalelagaena lala nae Koren, ana naga siria e pogos naþa pane ke pogos m̄arera amio li nalelagaena lala e sum̄are nene nae Koren, naþa laþasia sinela kar manene naga paþisi, ana akawelan naga. Ana Pol kila mareravan panila sape naga kiena sitomiena m̄arera ke na wa vena kila ruruen napiowaena nene. Naga sinenan sape naga amio la aimi ave erau wo sina, ana pisawal panila pisape kerara paþisi naþa amlogear naga.

E komsusnen m̄aki na sumo Pol pisayu komin yane naga pis m̄arera e m̄aki na sumo tai naþa siri pa pan la. A pisa naþa naga kerara paþisi naþa mloge sape apilon kiela sitomiena komin kiela milamulena viowa lala, a kila ruru napiowaena la naþa sike pula, ana ape erau wo sina amio.

A siraunia, pisa panila sape monar akuwan kilavaru vena waren van kiela erau na lelagaena lala nae Yutea, la naþa pe kiela sur re poli. E komþasnen luwasnen m̄aki nene, Pol pis m̄arera pa yaru la þas nae Koren naþa la asape ape li nalologena wo kemua lelaga, ana asum̄a akila kare li nalelagaena la nae yo nene e kiela vianiena la naþa pe mesmesu re poli. Asum̄a apisa ke asape Pol naga pe nalologena kiena ne re Yesu Kristo lelaga poli, þisi na Pol pis m̄arera vena suwoyon laena, a kila meraravan sane naga pe nalologena kemua lelaga kiena ne Yesu Kristo.

Komþasnen tusi la nini

Visena þesa 1:1-11

Pol amio li nalelagaena lala nae Koren 1:12—7:16

Kilavaru naþa na warena va li nalelagaena lala nae Yutea 8:1—9:15

Pol kila meraravan naþa naga pe nalologena kemua lelaga 10:1—13:10
Visena maro 13:11-14

Visena þesia

¹ Erau lala, inu Pol nemio kieta puruvi naþa Timote; imimi lua mekekarana naþa mevitawe amiu sina e m̄aki nini, nane amiu sum̄are kiena ne Ntewa e pupia kumali nae Koren amio m̄ena li na lelagaena taþena lala naþa asutetai asike e pupia lepas naþa Kris.

Ntewa kiena nasinenanena, naga pisirlua inu Pol vena neim sane nalologena tai kiena ne Yesu Kristo, kila narui kiau suri moki naþa nevisawal van amiu e m̄aki nini, ana sumon nanene,

² nevisa sanini nevisave kiau leniena nesape yoko Ntewa Arimata amio Suþe Yesu Kristo aligan lemamiena a sum̄arena, lalua asike e amiu punu ga.

Pol pisa potena pan Ntewa vanon kiena sinewoena

³ Sineun manene paþisi neyeluar kieta Ntewa nene naþa naga pe Arimana kieta Suþe Yesu Kristo, a naga pe Arimata nowo tai naþa naga pe purþes nen þelaga na sineyeena, a naga pe Ntewa nowo tai naþa naga pulen þelaga na kila luþeluþeena.

⁴ Pogos ya naþa visae tevene pog m̄arera, Ntewa sum̄a kila luþeluþe ita ruru nenaga, ana kila tom̄arera ruru sina ga. Ana siraunia, tekilia tela þelaga na kila luþeluþeena naþa naga kila pan ita, tekila towe va kieta erau taþena lala naþa apane ke kiela pogos m̄arera lala, teiila la sanene.

⁵ Pe lelaga paþisi sane pogos moki tesum̄a ga toþar ke naloge viowaena maran taaga sa naþa Kristo þaria, ana naga kila naþa tekilia towar m̄ena kiena kila luþeluþeena nowo lala.

⁶ Pogos naþa mepane pog m̄arera lala, metam̄an ga narui, vena kila sane amiu akilia aloge wo a alual malena. A pogos naþa mevisu sane Ntewa kila luþeluþe

imimi, naga mēna ga po paṣisi, komin naṣa kila sane imimi mēna ga mekilia mekila luṣeluṣe amiu sina ga, a mekilia meila amiu vena akila kiamiu sitomena ve piavi vena akilia awar ro e napi-owaena la naṣa amiu mēna ga akilia alualia.

⁷ Mesitomyu ya naṣa amiu aṣarpoyo e ṣisi rui, kila sane e lepas na pun amiu, pe kiamimi sitomena kurkur re nenaga, sane yoko amiu na ve sanape. Nanene komin naṣa imimi mekilia ruru ṣisi rui sane pe sur korena naṣa amiu monar avisu naloge viowaena maran taaga sa ke naṣa mepisuia, ana yokorena amiu akilia atol mēna ga pupia kila luṣeluṣeena kiena ne Ntewa ve sa ke ga naṣa imimi metolia.

⁸ Pona pe amloge kilia ruru re poli yo wa, e pupia pogos naloge viowaena lala naṣa mepisuia pogos naṣa mesumā memiyumāe kar ke ga e pupia lepas nene naṣa Esia, ana nekilia nevisa nevisave pi-owa na piowa paṣisi. Sur la urmi manene la pan imimi, imimi pe metorokin la re si poli, pano pano-o mesitom mesape naga narui monar kiamimi luas nen malena narui.

⁹ Lelaga, memloge sa naṣa visae yerka wa na kumali tai visawal visave awe moṣar imimi memarmare, yoko mevisu sane sa ve sanene na wo laa sane, komin naṣa mepisu rui sane taṣatete si mekila sur tai, moṣasine imimi ṣele sina mesape yoko imimi moṣarera ve sanape. E pogos nene, memligan kiamimi malena sike ga e limana Ntewa, moṣasine ga naga komin naṣa naga taaga ga pe Ntewa naṣa kilia kila yaru naṣa mare imi mali sina.

¹⁰ A moṣasine naga sanene, mepisu naṣa pe lelaga paṣisi naṣa naga tamalia imimi, a nagane kiamimi sitomena mārera ruru po sane naga kilia tamalia imimi sina, pe yam taaga re ga poli, ana yoko naga sumā kila lue ga silaga.

¹¹ A monar amiu aiila imimi naṣa asitomā imimi silaga e kiamiu leniena lala. Sa nene, pogos naṣa Ntewa loge kiamiu leniena moki nene, yokorena visa ruru imimi narui, tamalia imimi sina vetan pogos mārera la nene, a yoko amiu

ve moki avisa ga potena vaṣisi va naga vanon ya naṣa yoko naga kila van imimi.

Pol pisa meraravan ruru sur naṣa kila naga pe pimi mialiali la re si poli

¹² Moṣar naloge viowaena la sanene, ana sur tai sumā naṣa kila imimi memloge pon imimi paṣisi. Nane sitomena tai naṣa teke e imimi naṣa pisa sanini, sape e lepas na kiamimi ṣelaga e maramiu, a e maran yeririna taṣena lala na yomar-ava nini, mekila sur make ga pe wa ruru nenaga, a kiamimi malena pe lelaga nena na po, sa naṣa Ntewa sinenania. Pe memiyumāe re memio sitomena na yomerava nini poli, ana memiyumāe ga memio lemamiēna kiena ne Ntewa.

¹³ Sur make ga naṣa mesiriyuia e kiamimi mākī la nini, naga pe sur la naṣa mekilia mesape aulo woga, a mekilia mesape akilia aulo kilalea. Ana visae sur laṣas naṣa amiu akilia ga komṣasa, sineun nesape e legiena la ne pimi ke ne, yoko monar akilali naṣa akilia ruru make la ga.

¹⁴ Visae ve sa nene, pogos naṣa ita punu tesike lele taaga e legiena keviu nene naṣa Suṣe Yesu wasuṣe sina, ana yoko amiu akekarān imimi vaṣisi a imimi mēna ga mekekarān amiu vaṣisi.

¹⁵ Ana komin naṣa nekilia ruru nesape sitomena wo na sanene sike likan ita rui, sineun manene nesape pogos naṣa neva e lepas nene Masitonia, yoko neimāsun nomāliyin amiu.

¹⁶ Lelaga, nesumā nesitom ke nesape neimāsu nokom pun amiu yam ve lua, naṣesia e pogos nene naṣa nesumā nepa ke Masitonia, a yam ve lua nena e pogos naṣa noṣasuṣe inu, naṣa nesitom nesape amiu akilia aligan ruru inu e kiau mrapa vena nowasuṣe si neva Sutea, ana per-aga. Sineun nesape nekila wo van amiu sanene, ana sa naṣa akilia rui, taṣatete nekilia nekila.

¹⁷ Ana sineun nesape amiu monar akilia ruru sane pogos naṣa nesitom ke nesape neimi pun amiu, naga sur tai naṣa sineun manene paṣisi nesape nekila, naṣa kiau sitomena māreran paṣisi

ve na kilaena. Naga pe pe sur re tai naþa kiau sitomena peve lua e poli, naþa nesitom ke nesape yoko nevano pona ve neva re. Peraga, inu na pe nesa re yeririna taþena la poli, naþa taþatete olelaga e kiela visena,

¹⁸ ana sa naþa amiu akilia awasine ga visena kiena ne Ntewa, akilia awasine mēna kiamimi visena. Kiamimi “Ore” pe kana kinas re naþa asape “Peraga” pona “Ana yo,”

¹⁹ ana pogos naþa mevisape “Ore,” naga “Ore” ga. Monar meve lelaga sanene, vena meve maran taaga memio narina Ntewa, Yesu Kristo, naþa imimi telu Silvanus amio Timote mepimin memlologon pan amiu nanua rui. E pogos nene mepisawalia mesape kiena visena make ga pe lelaga silaga, komin kana “Ore” pe “Ore” nena napo,

²⁰ a navisaarena make ga naþa Ntewa pisawalia e lepas kiena ne Yesu, pe tai re naþa pimi sane pe navisokanena poli, ana punu ga pe lelaga. Sur ne nanene kila sane pogos naþa tesuþa temlen pa Ntewa, e kana nasiarena pitomi tol naþa tepisape “Sanene,” tekila ga e kia kiena ne Yesu Kristo.

²¹ Kristo ke nanene narui naþa memlologon pan amiu, a Ntewa ga pisirilua imimi pe na kilaen kiena yuþaena. A amio naga nene, Ntewa kila imimi memio amiu, ita punu ga tepim lele taagania.

²² Ntewa kiar ita tepe kiena, ana naga mligan Ninuna e losineta, sane navisaarena tai naþa sape yoko temio naga e pogos la naþa suþa pimi ke ne.

²³ Kieta Ntewa nene naga pe lelaga silaga, a naga kilia iila visena nene naþa sineun nesape nevisawal van amiu. Sane nanua ne nepisa mē nesape yoko nomālivin amiu gar Koren nene, ana siraunia pe nepimās re si poli, a pona asitom piowagan inu e yo. Ana nesape nevisa van amiu naþa pe vanon re kiau sur tai poli, ana vanon amiu ga, komin naþa nekilia nesape visae neiþasu yoko monar nevis mārera van amiu komin kiamiu þelaga laþasia. Ana pe sineun re

nesape yoko nekila amiu aloge viowa poli, nane kila sane pe nepim re si poli.

²⁴ Nepisa pan amiu sanene, awis monar ve asitom re avisave mesitom ke mesape mesike metavan amiu, vena meve þarun kiamiu lelagaena. Pe sa re nene poli, ana sinemimin mesape teyuþae ga lele taaga, vena kila amiu akilia aloge wo silaga, asuþalu ruru mārera ase kiamiu naviawaena.

2

¹ Sa naþa nepisa, nanua nepim sumo, sur laþasa suþa ga naþa monar nepis pan amiu panon narui, ana kila amiu amloge piowagania. Ana nagane pe sineun re neim nekila amiu aloge viowa yam si tai poli, a sitomena ne nanene narui kila sane ve neiþasu nakaten amiu re sumo wa.

² Visae neiþasu nevis van amiu, nekila aloge viowa, yoko inu mēna ga neloge viowa, ana pogos naþa ita punu ga teloge viowa sanene, yoko taþatete si naþa tai kilia iila tai vena loge wo sina.

³ Sitomena ne naga nene naþa nepisa þesan e mākī taþena naþa nemligan piþasu nanua rui. Sineun nesape akilali akila ruru sur viowa la nene sumo wa, vena kila sane visae pogos naþa neiþasu, yoko ve sur re si tai sike likan amiu naþa monar neloge viowagania. Ana visae akila ruru kiamiu yuþaena wo, yoko nekilia neiþasu naþa nevisu naþa apim apo si rui, a visae ve sanene, yoko nekekara vaþisi, a yoko kiau kekarena nene kila kiamiu kekarena mēna ga ve keviu vaþisi.

⁴ Nepisa sanene komin naþa pogos na nesiri piþasu pan amiu nanua ne, nemloge piowagan manene laa. Nemloge sane losineu lavis worovia, a wamarau la suþa mlalau. Visena mārera la naþa nepisa pan amiu e mākī nene, pe nekila re poli komin naþa sineun amiu mēna ga aloge viowa, ana sineun nekila amiu avisu kilale sane sineu sii manene amiu silaga.

⁵ Ana sa naþa ita make ga tekilia, tai sike likan amiu naþa naga kila pupia

naloge viowaena nene. Sineun nesape sane sur viowa naña naga kila, kila inu nemloge piowa, ana pe in re ga poli, kila amiu mña ga moki liu amloge piowa. Ana pe sineun re si nevisave monar ala manene si nakoena van poli,

⁶ komin nekilia sane amiu punu ga apis pan pñisi rui.

⁷ Apis pania toroki narui, ana nagane pe pogos naña aviewo naga, sinemiu ye si naga. Visae peraga, yoko naga loge viowagan manene sina vano vano-o viowa vania.

⁸ Ore, nomãreran vena neviun van amiu ve sa nini, sane monar akila merarava ruru vania sane sinemiu si ke naga na wa.

⁹ In na nesiri mñaki tañena nene nanua ne, sineun nevisuveve sane yoko amiu akekara naña alogear kiau visena lala naña sike loyuma ea, pona peraga.

¹⁰ Pogos naña nepisa nesape popon aviewo yar tai, nemlelaga nesape yoko akila, a naga naña aviewoia, in mña ga neviewoia. A nemninue ga, pona naga kila mña sur lañasia piowa pan inu yo, ana nekekarana naña nevisawal e marana Kristo nesape nepiewo naga, ana sanene, iila amiu mña ga vena akekaran aviewo yar tañena.

¹¹ Monar tevisuar ruruia, komin naña tekilia ruru sitomena viowa lala kiena yermare vena kila kare itaena, ana visae tesuma teviewo ita silaga, yoko naga tañatete nena taulu ita pñisa.

Pol pisayu kiena mrapa navaen ma Troas amio Masitonia

¹² Ana pogos naña nepam re si pun amiu ma Koren poli, nepito ga nemlologon lologena wo kiena Kristo garo kumali naña Troas, ana e yo nene, nepisu sane pulutava pietava ruru nena pan inu vena nekila yumãena kiena Supe.

¹³ Ana sur viowa tai e pogos nene, nesitom ke nesape yoko nelual wolai naña Taetas e yo nene, ana naga pe su re poli. Ana kiau sitomena nesitom manene naga pañisi, kila sane pe piavi re poli nemligan la nene, nemla si kiau mrapa yalen silau ma lepas nene Masitonia.

¹⁴ Kiau yalena pa sanene narui, ana potena pañisi pa Ntewa komin naña silaga mligan Kristo naga sumã sumon ita. Nanua sumo ita tepe kiena nasinekar ga lala, ana naga taulu ita rui, ana tetaveve naga tepa kar ga e yo make ga, ana pogos naña yar la apisu ita, yoko avisu kilale sane Kristo naga pe kieta Supe. Pona nekilia nevisa sanini, sane ita na sane ponotaninu wo tai naña asikapia, ponos miyere pãr make yo, ana pogos naña yar la amloponia, yoko alopon kilalea sane Kristo sumã pimi mñalivin la.

¹⁵ Ntewa kila ponotaninu nene pa vanua e yar make ga, pano tol la naña asuma apanon ke mrapa natamaliaena, a pano tol la naña apanon ke mrapa na kovioena.

¹⁶ Ana e la naña apanon ke akovio, ponotaninu nene naga ponos piowa sane sur mare tai naña kona, ana e la naña asuma aña ke malena, naga sane ponos nen mñaes wo na tamaliaena.

Nanene narui ita tevisu yumãena naña mesuma mekila naga pe pupia yumãena pañisi, komin memlologon visena kiena ne Ntewa naña kilia kila yar tol malena pona tol marena.

¹⁷ Nalologena la pãsa pe asitom manene re urmi e yumãena nene poli, asuma amlologon ke visena kiena ne Ntewa vena ataulu ga kilavaru ea, ana imimi na pe sa re nene poli. Ntewa pisir plan imimi ana memiyumãe ga e yo metava e marana, a mepian visena lelaga kiena Kristo pa yar tañena lala, pãrpoyo ga e mãreraena naña mla pan imimi.

3

Imimi na yar na kilaen yumãena na viranarena viu

¹ Nepisayu kiamimi yumãena keviu na metava ne, pe pon re asitom avisave nepis vilave ke sane navianena tañena lala navisokanena. La nene apim pun amiu amio mñaki la naña apisayula asape la apo pa sanape, a pogos naña amolue petan amiu, amãreran asape monar amiu asiri si mñaki lañasia vena visawalen kiela

yum̃aena naṓa aṓar ke pano. Ana visae sinemimin meva si e lele taṓena, pe mesitom re m̃aki tai ne sanene poli vena visawal imimiena.

² Visae yaru tai sinenan kilia visave imi sanape, popon imi visu ga mras nen kiamimi yum̃aena e kiamiu malena lala. Amiu na sa ga m̃aki tai narui, naṓa Kristo siria navisawalen kiamimi yum̃aena. Yaru taṓena lala akilia aim auloia, vena akilia ya naṓa mesiria e losinemiu lala.

³ Yoku avisu amiu sane ape m̃aki tai naṓa Kristo naga mligania, ana moṓar pimi, a yoku avisu kilalea sane lelaga, mekila yum̃aena e amiu po paṓisi. Ana m̃aki nene naga pe m̃aki re naṓa wii na kilamemego na kapi naṓa asiri e m̃as nen tus tai poli, ana naga m̃aki naṓa Ninuna Ntewa siri e los nen yaru.

⁴ Visae ve sanene, kiau visena la nene pe visen vilave re poli, ana mekilia mevis sanene komin Kristo ga naga taaga kila naṓa moṓasine Ntewa keviu pa ṓisi.

⁵ Visae imimi ga, yoku taṓatete mevisave imimi metorokin mekila sur tai, komin sur make ga naṓa mekila, Ntewa ga kila sane imimi mekilia mekila.

⁶ Naga ke narui mla m̃areraena amio kiliaena pan imimi, kila imimi mepim mepe kiena yaru na yum̃aena e lepas na viranarena viu naṓa naga kila amio ita yeririna lala na yomerava. Naviranarena ṓesa asiri plan kana visena ne lala e tus lala navisaluaena lala kiena Mosis, ana visena la nene amiila ita ana pe torok ruru re poli. Apowo, ana ya naṓa akila, akila meraravan ga asape ita yaru nakilaroen navisaluaena, naṓa yoku monar telual marena vanonia. Ana naviranarena viu, naga visena ne lala apim aṓalivi e Ninuna Wa, a Ninuna nene narui kila ita tetol natamaliaena.

⁷ Mrapa marua nasumo nene, naṓa ate kana navisaluaena lala e kilavaru la naṓa pe lepalepas nene, naga sum̃a pisaar ke ga kieta marena, ana naga pe sur tai naṓa pe wa paṓisi. Pogos naṓa Mosis ṓar lepalepas nen kilavaru la nene, naurarena kiena ne Ntewa pimi e naga, ana pogos naṓa ṓar maran si kilavaru la nene pa

le Israel lala, m̃areraena naurarena nene sum̃a pito ke tano rui, ana la apisu ṓele marana komin naṓa pilavila na pilavila.

⁸ Sanene, visae naurarena kiena ne Ntewa miyum̃ae m̃arera e pogos naṓa apisawal mrapa na tolen marena, yoku yum̃ae ve sanape e pogos naṓa yoku avisawal mrapa na tolen malena?

⁹ Yoku naurarena kiena ne Ntewa monar yum̃ae ve keviu va manene va ṓisi e pogos nene, a tesum̃a tepisu ṓisi rui naṓa kapi vivaga na mrapa viu sum̃a tego kar ga, sum̃a taulu kapi na mrapa marua nene naṓa sum̃a pito ke tano rui.

¹⁰ Lelaga, kapi viaga na mrapa marua nene naga sum̃a tego ruru nanua sumo, ana nagane, tepisu naṓa kana kapi nena sane pe tego ruru re si poli, komin kapi na mrapa viu pimi ṓarpoyo, sum̃a tego keviu e yo make ga.

¹¹ Kapi naṓa sum̃a pito ke tano nene, lelaga naṓa naga pitomi ṓesa, pitomi amio kana pupia naurarena nena. Ana nagane kapi viu naṓa naga pimi mare ga sirau, yoku naga sulue na sike ne, a kana naurarena nena yoku ve keviu manene lue.

¹² Visae tesitomiyuli nene, yoku kila kieta sitomena m̃arera ruruia, a ve temaraun re si naṓa tekila kapi vivaga kiena Suṓe tegoli yo kar lala.

¹³ Ana tesitomiyuli m̃ena yermarua Mosis, naṓa naga pa metava e tavie, ana Ntewa pimi lavisinia, kila marana pilavila paṓisi. Ana pe pon re ita teve sa naga poli, komin pogos naṓa ṓasuṓe si pitomi pu le Israel lala naga kalo marana e kulmrae vena ve avisu re, vano-o tol pogos naṓa kana tegoena sum̃a vito m̃a tano vano ṓisi.

¹⁴ E pogos nene, pe apisuli re kapi nene poli wa, komin naṓa ṓarila m̃arera paṓisi, ana tepisu naṓa pimi tol nagane, la sa m̃a ke nene na wa. Apulo ke visena lala e tus marua naṓa sike ne, ana sane kulmrae na sike ga wa, sum̃a kilawo ke kiela sitomena lala. Ana visae alelaga ga e Kristo yoku naga kilia tarlua kulmrae nene vena akilia avisu kilale kiena yomerarava viu.

¹⁵ Pogos naṓa apulo ke navisaluaena

kiena Mosis, naga sa naña sur tai kalo ke ðarila,

¹⁶ ana pogos naña visae yaru tai imi e Kristo, a warlua sur nene naña kilawo ke kiena sitomena, ana naga kilia visu kilale suria. Sa ga visena na Nasiriena Wa naña pisayu yermarua Mosis nene, naña pisape “Pogos naña Mosis pilon naga, kira pisu Suþe, kulmrae nene mloru si petania.”

¹⁷ Ana pogos naña visena nene sape Mosis pilon naga kira pisu Suþe, visena naña Suþe, kana kinasia naga naña pe Ninuna Wa kiena ne Ntewa. A tekilia tesape e nape naña Ninuna Wa kiena ne Ntewa sike ea, yaru lala akilia aurmatan ñareraena na viowaena, alual malena.

¹⁸ Sanene, ita make ga naña temlelaga rui, pe kulmrae tai towo re si marata poli, ana tesuña tepisu ruru nena pupia nauraraena kiena ne Ntewa. A pogos naña tesuña tepisu ña pano, nauraraena nene pimi puleule e ita, pano tol naña tepim tepe sane kupito vena tegoliaena kiena kapi vivaga va va yeririna taþena lala. Ana kapi vivaga nene pe molue re kome kieta malena poli, molue kome kieta Suþe, naña naga Ninuna nanene naña sike e ita.

4

Pol amio nalologena lala amlologon kapi vivaga nalologena wo

¹ Mesuña mekila ke kapi vivaga kiena ne Ntewa pilavila ke sanene, naga pe kiamimi pupia yuñae na tai vena ilaena yaru taþena lala. Losinena Ntewa pulen sineyeena, a naga ke narui naña mla yuñae nene pan imimi, a pogos naña mesitoñal nene, kila sane pe sinemimi maren re yuñae pogos tai poli.

² A pogos naña memiyuñae, mesuña memiyuñae ruru po silaga. Yaru laþasa, amiyuñae vinau e ga e nakilakotaliaena lala pona akilali naña awere sitomena kiena yaru lala, a akilia avilovilon ñena visena kiena ne Ntewa va ve taþena, a imimi na pe mekila re ðelaga la sanene poli. Mekilia mesape pogos naña mesuña memiyuñae, mekila ke ga e marana

Ntewa, a monar meyuñae wo. Yeririna taþena ñena lala asuña aþaveve ke kiamimi yuñae a asuña amloge ke ponía, komin naña asuña apisu kilale asape mesuña mepisawal make visena lelaga kiena ne Ntewa lala mesmes ga.

³ Memlologo sanene, pe yaru re tai naña kilia visave naga pe mloge kilale re lologena wo poli, naña mesuña mepisawalia. Ana visae yaru tai visave pe merarava re pan poli, naga pe yar re tai naña suña mialin ke yomerarava poli, ana monar ve yar tai naña suña mialin ke ga yemalolo, naña monar sur tai kilawo ke kiena sitomena, sane kulmrae naña tepisayu rui.

⁴ E lepas kiena ne la naña pe amlelaga re poli wa, suþe viowa na yomerava nini naga kilawo kiela sitomena rui, naga kila la sane ape kilamara kata, komin naña naga yepen mavin sape avisu pupia kapi vivaga na lologena wo kiena Kristo. Kristo nene, kiena naurarena tego paþisi, komin naña naga ðarnena marana Ntewa lelaga.

⁵ Mesuña memlologon ke nene narui, nane Yesu Kristo, kieta Suþe. Pe mesuña mepisiri plan imimi re sina pan amiu poli, ana mepe kiamiu yar na yuñae na ga lala vena lologonen Kristo van amiu vena akilia naga.

⁶ A sur make ga la nene naga pe yuñae kiena ne Ntewa ga. E nasiiena, Ntewa pisa sanini, sape “Yoko kapi imi tegoli yemalolo naña ñe ne,” a suña kila ke sanene pan ita na wa. Ntewa ke ga nanene narui naña suña miyuñae ke nagane, kila kiena kapi vivaga tegoli losineta lala, kila tetol kapi nene naña suña tego molue kome marana Kristo, naña molue nena e naurarena kiena ne Ntewa naña sike ea.

⁷ Nakiliaena lala na naurarena kiena ne Ntewa sike e ita sanene, naga pe sur wo tai naña pe wa paþisi. E imimi naña memiyuñae ke yuñae kiena kieta Suþe, mepisu sane imimi na sa ga sur korena ga, a pe metorokin re naña kiena nawaena la naña powo nene ase e imimi, ana Ntewa naga po, suña kokonia ke e

kiamimi malena la silaga. A nanene kila sane visae pogos tai meyumāen sur wo la p̄asia, ana yoko mevisu kilale ga sane pupia m̄areraena na kilaen sur la nene pe pe m̄areraena na yomarava re tai nene poli nāpa p̄ar po yo kome imimi, ana naga m̄areraena tai nae ma e peni nāpa kom ga e Ntewa pitomi.

⁸ Nagane memiyumāe ke memio m̄areraena nene naga miila imimi keviu, komin nāpa mepane ke pog m̄arera la moki, ana pe memloru re poli wa. Sur la moki nāpa akila imimi mesitom p̄ele pāpisi, ana kiamimi sitomena la pe kovio re poli.

⁹ Yaru la moki nāpa akila kare imimi pano pāpisi, ana silaga Ntewa pisuar ruru imimi. Mōpar magka lala, ana tāpatete awe plan imimi, memal ke na wa.

¹⁰ Lelaga, pogos m̄arera pan imimi sanene narui, pano pano naloge viowaena na marena sike e yepemimi sa nāpa Yesu p̄aria e kiena marena. Ana metañan ga, komin nāpa visae marena kiena Yesu sike e imimi, yoko kiena malena m̄ena ga sike e imimi.

¹¹ Memiyumāe kiena Yesu sanene, kila sane pogos nāpa memal mesike e yomerava nini, ana silaga mesike ga lavisin marena, ana nanene kila m̄ena ga sane amiu akilia avisu kilale sane malena kiena Yesu sum̄a m̄alm̄alivi ke keviu e yepemimi na marena ga lala.

¹² Lelaga nāpa mesum̄a mepanon ke kiamimi marena, ana mekila sanene vena amiu akilia avano alual kiamiu malena.

¹³ Visena tai sike e Tus na Yauena Wa lala, nāpa yaru tai pisi pisape “In na nemlelaga rui, nane kila narui nekilia nevisawal visena,” a mepisu sane ninuna na viawaena nāpa sike e yaru nene, nagane keviu m̄ena ga e imimi. Mesa ke ga naga, nāpa imimi m̄ena ga memlelaga, a sur ya nāpa memlelaga e naga, nanene mepisu sane mekilia mevisawalia.

¹⁴ A pe memaraun re nena visawalen poli, komin nāpa mekilia ruru sane kieta Ntewa nāpa naga kila kieta Sūpe Yesu mali sina e marena, yoko naga kila imimi m̄ena memali sa ke ga Yesu, a yoko naga kila amiu m̄ena amal sina sane imimi, ana

yoko were ita punu ga teva tesike temio naga.

¹⁵ Lelaga, mepa mōparpoyo e pogos m̄arera la moki sanene, ana pogaga, komin naga kiamimi mrapa ke ga tai nanene narui nāpa mekilia miila amiu-
nia. Sanene sinemimin ga lemami-
kiena ne Ntewa monar momolue silaga va yar kar ga lala e yo punu ga, vena kila sane ayeluar Ntewa silaga, asum̄a avisa potena vania vano vano-o vena kila kiena naurarena imi lapa ve keviu.

¹⁶ Sitomena wo la nene kila sane pe sur korena ga nāpa viowa van imimi ve sanape, ana mesum̄alu mōmarera ruru mesum̄a ga. E lepas na yepemimi lala, pimi pe yermarua, sum̄a pimi pororovia, ana e lepas na ninumimi lala, Ntewa sum̄a kila pimi pe urviu, m̄arera ruru lue ga e legiena make ga.

¹⁷ Narin pog m̄arera lala e yomarava nini, la ape na yam plas ga, ana asum̄a akila ita tesururuia vena teva tom̄alivi tese e naurarena nae peni, nāpa keviu pāpisi, po pano-o po manene laa, nāpa teloge ke wonia vano vano ve uro re.

¹⁸ Nagane ve kieta sitomena la ve su re e sur la nāpa kilamarata visuia, ana kieta sitomena la sike e sur la nāpa kilamarata pisu p̄ele ga, komin nāpa sur la nāpa kilamarata kilia visuia, la ape na yam plas ga e yomarava nini, ana sur la nāpa kilamarata pisu p̄ele ga, la ape na sulueena ma e peni.

5

Leleta ma e peni

¹ Tekilia rui tesape tasneta na yomarava nini tāpatete sulue. Naga sane narin silparpara tai nāpa tesovania, nāpa yoko pogos tai monar m̄awowo make ga, pona yar tāpena lala aimi aweplania. Ana tekilia m̄ena tesape pupia m̄ata yum̄a m̄arera tai m̄eke ga wa, nāpa pe amiyum̄aen re e yomarava nini poli, ana Ntewa ga kila ruru monm̄ate ita ke ma e peni ana siraunia tekilia teva tesu ea.

² Yomarava nini naga sa ga lele na tagiena ga, a tekekarana ga naŋa tourmata-nia, sinetan teva tetapolou e m̄ata yuṁa ma metava,

³ a pogos naŋa teva tesike ea, yoko ve teloge re si sane pe m̄ata uṁa re poli, ana tevisu ga na wa sane kieta yo nena napo nane suṁa ne.

⁴ Lelaga, tasneta naga sa ga silparpara tai naŋa tesuvania e yomarava nini, ana lelaga naŋa, pogos naŋa tesike e sanene tesuṁa takar malueta silaga komin naloge viowaena lala na pog m̄arera la naŋa tesuṁa toŋarwowo ke yo ea. Pona pe pon re aimin awe kare tasneta poli, ana sitomena tai monar suṁa ga e ita sane visae akila, pogaga, komin naŋa popon sane toure matan silparpara nini, teva tese yuṁa wo tai sumo wa. Monar tevisu kilale ruruia sane popon sa tas nen marena nene p̄isi, ana yoko tas viu tai kilia imi kus lelana.

⁵ Nakonua rui, Ntewa suṁa miyuṁae ke e ita vena kila ruru ita teva e kiena yo sanene narui. Naga mligan Ninuna sike e ita vena kila ita tesitoṁal silaga sane kiena visaarena na kilaen van ita sanene yoko imi ve lelaga.

⁶ Tesuṁa tesitoṁal ke nanene, kila sane silaga toṁarera. Tekilia tesape nagane, tesuṁa tekila ke m̄ata uṁa e silparpara nene, naŋa tasneta, ana pe tesu re e m̄ata uṁa wo temio Suŋe ma metava poli wa.

⁷ Sanene, pogos naŋa tesike e yomarava nini wa, monar ve tekilali re naŋa tesuṁalu e ya naŋa kilamarata ga kilia visuia, ana monar tesuṁalu m̄arera e naviawaena.

⁸ A e lepas na pun imimi, moṁarera ruru ke ga wa vena suen e yomarava nini vena mesuṁa mekila kiena yuṁaena, ana mepisu sane po m̄ena ga visae mekilia meligan tasnemimi la na yomerava nini, meva mesu nena e m̄amimi uṁa memio Suŋe.

⁹ Sanene, visae tesike e yomarava nini, pona tesike ma metava, ana silaga monar tekilali ya naŋa yoko naga kekarania.

¹⁰ Monar tesitom sane pogos naŋa Kristo pa totano metava e kiena yo wa

na liŋereena, yoko ita make ga veve taaga teva tesuṁalu tese marana. Ana e pogos nene, yoko naga ga kila sane wo van ita, pona viowa van ita, taveve ga ya naŋa tesuṁa tekila e pogos naŋa tesike e tasneta e yomarava nini.

Kristo kila ruru marata temio Ntewa

¹¹ Pogos naŋa mesitoṁal naŋa yoko Kristo liŋere yaru lala, memarau, a mepisu sane popon meyuṁae m̄arera vena metaulu yar lala vena ve akovio re. Ntewa pisu kilale ruru p̄elaga na kiamimi yuṁaena la nene, a nesitom sane amiu m̄ena apisu kilale sane memiyuṁae sa ga naŋa naga kekarania.

¹² Nesuṁa nepisa ke sur la nene, pe nekila re poli komin naŋa sineun vena amiu avisirlua imimi sina, ana popon vena akilia akekara e ya naŋa mesuṁa mepisa. Visae atol ruru kiamimi visena lala, yoko kila sane visena la nene kilia se amiu, ana yoko akilia avisatam̄e la naŋa asitom ke asape apo rui. Ana la nene akila la ke apa metava komin ga ya ne akila ke e maran yaru lala, ana pe asitom re ya naŋa sike loyuṁa e kiela malena poli.

¹³ Nekilia nesape pogos naŋa nepisa visena la nene, yoko la p̄as naŋa asike amio amiu monar avisave nepe wowe, ana na nene na poga ga. Visae lelaga naŋa mepe wowe, mepe wowe komin naŋa mekila manene laa yuṁaena kiena ne Ntewa, ana visae p̄arimimi la woga ga suṁa ga, p̄arimimi la po komin naŋa mesitoṁal amiu, ana monar ayagogon imimi.

¹⁴ Sur taaga ga naŋa suṁa kawē ruru ke kiamimi malena vena mekila ruru yuṁaena wo la kiena Kristo, nane kiena sinesiena. Memlelaga m̄arera mesape kiena marena naga taaga tamalia kieta malena ita make ga, visae peraga, yoko ita punu ga monar temare ga, yoko taŋatete ita yaru tai kilia mali.

¹⁵ A naga mare wo ita punu ga sanene, naga sinenan sape ita la naŋa temlelaga ea pona temal ke e yomerava nini wa, ve teyuṁae kieta re ga, ana teyuṁae

kiena, naþa naga mare vena tamalia kieta malena, siraunia Ntewa pisirlua si naga.

¹⁶ Sanene, popon ve tevisuveve re si yaru lala taveve sitomena na yomarava nini. Nanua, pog naþa Kristo sike e yomarava nini, yaru la apisuvevea taveve sitomena na yomerava nini, ana nagane pe tepisu re si naga sanene poli, a pe pon re tevisuveve yaru taþena lala taveve mēna sitomena na yomerava nini poli.

¹⁷ Na nene na komin naþa visae yaru a naþa mlelaga e Kristo, naga pimi sane pe yaru viu ruru nena ga. Kiena malena marua na sumo kovio nena ga, ana nagane kiena malena viu pimi malivi rui.

¹⁸ Ntewa ga kila sane tekilia tevilopu kieta malena sanene, komin naþa naga ke narui mligan Kristo pitomi e yomerava ve na kilaen kieta mrapa towasuþe si teimi puna, a sinenan sape monar toure yar taþena lala la mēna ga awasuþe si aimi pūna.

¹⁹ Visae ve sanene, Ntewa miyuñae þarpoyo e Kristo vena wereen yar na yomerava lala awasuþe sina vena aim ave taaga sina amio, naþa naga pe sitom re si sape la nakoarena van la vanon kiela mlamulena viowa la poli. A amio mēna nene, naga sinenan sape ligand kiena visena lala e limata, vena tela va va yar taþena lala vena la mēna ga awasuþe si aim puna.

²⁰ Sur ne nanene narui kila sane mepim mepe yaru kiena ne Kristo vena waren visena kiena ne Ntewa vano. Sanene, pogos naþa mepisawal visena pan amiu, sa ga naþa Ntewa ga suña pis, ana sinemimin paþisi mesape meviun manenea van amiu punu ga mesape awis, e kia kiena ne Kristo, monar awasuþe amiu aim puna Ntewa.

²¹ Naga ke narui sinena miye ita, ana mligan narina nene Kristo, naþa naga pe kilali re mlamulena viowa poli, kila naga pimi sane yaru na waren kieta mlamulena viowa ita make ga. Ntewa kila sanene vania vena kila sane ita yar na kilaen mlamulena viowa, tekilia teim teve yaru mesmesu lala e marana ne Ntewa.

6

Malena m̄arera kiena yaru na yuñae kiena ne Ntewa

¹ Mesuñae memiyuñae ke sane yar lala na yuñae lele taaga memio Ntewa, a mekilia sanape naþa naga pe lemam paþisi pan ita make ga. Sanene, mesape meviun manene van amiu, sane kiena lemamiena wo naþa pimi e amiu, pe pon re imi korena ga poli. Monar alavia, a monar atañania kila kiena yuñae e kiamiu malena.

² Visena tai teke e Tus Marua pisa sanene rui, naþa Ntewa sape, *“Mesmesun pogos naþa po pan amiu, neyagogon kiamiu tagena, a mesmesun legiena natamaliaena, neim neiila amiu.”* *Ais 49:8*

Ana e kiamimi navisuena, mekilia mevisawal mevisave nagane narui pe kiamiu pog mesmes narui, nagane narui pe legiena na natamalia amiuena.

³ E lepas na kiamimi yuñae, mesuñae moþikeyon naþa mekila wo lue ga, vena ve mekilawo re mrapan yaru kar ga naþa sinenan sape imi. Pe sinemimin re naþa yar laþasa asape mekila sur tai piowa, pona mekila pal yuñae koyo tai.

⁴ Mesuñae mekila ke sur make ga vena kilologia sane mekila ke yuñae mesmesu sane yar wo lala na yuñae kiena ne Ntewa, ana mesuñae metañan imimi vena mevanē sur ve moki. Mesuñae makawean imimi vena meva mowar-poyon luas nen yuñae lala, pe suri korena naþa mepane sur viowa lala, pog m̄arera lala, a sur nailanen viowa lala.

⁵ Asuñalu akawe imimi, a añe imimi, a akoven imimi e yuñae nakoarena. Pogos moki, memiyuñae na memiyuñae, pe momomalio ruru re poli, a kamimi kinanena pe po re poli.

⁶ Piowa manene laa pan imimi sanene, ana mesuñae ga memiyuñae mesmes ga, a mesuñae memiyuñae memio kiliaena, a sitomena viavi, a sinewoena. Yeririna la apisu naþa kiamimi malena pulen Ninuna Wa, a kiamimi þelaga pulen sinesiena naþa lelaga,

⁷ naþa mepisawal visena la naþa pe apisokan re poli, naþa memiyuñae e māreraena kiena ne Ntewa, a naþa e limamimi lala, e lepas na þamarua a e lepas na þamñeli, mopuarar sur na mara lala vena kilaen mesmesuena taulu naviowaena.

⁸ Yeririna la þasa apisir plan imimi, a laþasa amligan imimi mesike laa tano, laþasa apisa ruru imimi, laþasa apisa kare imimi paþisi, ana pe mesitom re poli, mekila ga. Pe mepisa kotalia re yar tai poli, ana asuñña apisu imimi sane pe mepe lelaga re nenaga.

⁹ Akilia ruru imimi þisi rui, ana asuñña akila ke sa naþa pe sinelan re akilia imimi poli. Memal ruru mesuñña ga, ana asuñña sinelan asape visae memare ga rui.

Nane suñña pa sanene pan imimi narui, ana pe sur korena naþa moþar ke nakoena lala, la taþatete akilalua kiamimi malena na wa.

¹⁰ Pe sur korena ga naþa naloge viowaena la moki paþisi, ana sinemimi la kekara silaga. Pe sur korena naþa limamimi korena ga silaga, ana mesuñña mekila ke yar taþena la aþar ke sur moki. Ana pe sur korena naþa pe kiamimi sur re la poli, ana mepisu naþa sur make ga pe kiamimi ga.

¹¹ Erau nae Koren lala, pe kiamimi sitomen viowa re tai e amiu poli, naþa mekilawania pan amiu suñña ga. Mepisawal sur make ga pan amiu rui, a sinemimi sii amiu paþisi.

¹² Pe mekila re suri tai naþa pona kilawo kieta erau wo poli, ana visae kilawo e lele tai, nanene komin naþa amiu ga apuarar sitomena viowa laþasa e imimi suñña ga.

¹³ Ana visae ve sanene, monar nevisa van amiu sa ga naruu la narui, nesape awis, ve akilawan re si kiamiu sitomena laþasia, ana monar akilali losinemiu vike van imimi.

Avisuar ruru e la naþa pe amlelaga re poli

¹⁴ Sineun nevisa van amiu nesape ve asuñña akilali re naþa aimi ave taaga

6:16 1Kor 3:16, 6:19

amio la naþa pe amlelaga re poli. Popon asitomñalia sane þelaga na mesmesu amio þelaga na mlamulena viowa, lalua taþatete aviran la aim lele taaga, a legiena pe erau þele ga amio yemalolo.

¹⁵ Kristo kiena sitomena ve taaga þele ga amio Yermare, a yaru naþa mlelaga pe kiena sur re tai poli teke amio yaru naþa pe mlelaga re poli.

¹⁶ Nono na visokanen lala asu þele loyuñña e yuñña wa mñana Ntewa pogos tai, a visena nene kana kinasa komin yuñña wa mñana Ntewa, naga pe yuñña re ga tai poli, ana ita li na lelagaena kiena ne Ntewa naþa mali. Naga nene taveve ga kiena visena laþasa, naþa pisa sanini, sape

“Inu yoko nesike e la, yoko neyaloro likan la.

Inu yoko neve kiela Ntewa, yoko aimi ave kiau lus nena lala.

Lev 26:12

¹⁷ *Ve sanene, sane kiela Suþe, nepisa pan kiau la nene nesape monar amolue vetan taþena lala, monar aviaþa vetan yar viowa lala.*

Monar aim ave wa nenaga, a monar ve atol re kororaki lala,

sanene yoko nekilia noworworun la aim asike amio inu.

¹⁸ *Yoko inu, sane Ntewa na mava, nekilia nevisa van la nevisave*

‘Amiu aim vena neve Arimamiu, a vena amiu ave naruu nena lala.’”

7

¹ Erau lala, nanene navisaarena wo lala kiena ne Ntewa naþa pisape yoko naga were ita sane kiena namratava lala. Naga kila sanene pan ita po paþisi, ana popon monar tewatanon naga silaga, naþa monar towe plan make kororaki e kieta malena lala. Mlamulena viowa laþasa tekila e tasneta, a laþasa tekila ga loyuñña e losineta, ana monar toþisin la make ga, monar tevim naþa teve wa naþa teve wa sa naþa naga sinenania.

Pol kekaran paþisi naþa Ntewa miyuñae e la

² Sineun nesape neviun si tan amiu nesape ve sinemiu kar imimi re, ana

aligan ruru lelemimi tai e sinemiu lala, vena nekilia nevisa re si sur lařasa van amiu sumo wa. Popon akila sanene, komin nařa pe amiu re tai poli nařa mekila piowa pania, pona mekila karea, pona mekila kotalia e sur lařasa.

³ Ana pogos nařa nepisa visena la nene, pona asitom ke asape nesitom ke piowa e amiu, pona nesape nevisa kare amiu, ana pe sa re nena nene poli řisa. Peraga, sa ga nařa nepisa rui, nesape amiu na asike e losinemimi rui, a tesuřa tepim tepe taaga pano pano tol nařa sanena nařa tesike ga e malena taaga, pona visae ita tai vane marena, yoko teloge sane ita make ga temare.

⁴ Lelaga nekilia nevisa sanini nevisave in na nořasine amiu keviu na keviu, nořarwar inun amiu pa řisi, a pogos nařa nesitořal kiamiu yuřaena wo lala, suřa miila ke kiau sitomena keviu pa řisi. Lelaga nařa nepane sur viowa moki, ana asuřa akila pan inu nařa nalogewoena a kekarena suřa pule manene pařisi e losineu.

⁵ Nepisa sanini komin sanene narui nanua sumo ne, pogos nařa mepa mořalivi e lepas nařa Masitonia. E yo nene, mořar ke si veveyuena řarera lala, kila sa nařa memarau towe řaga, a tasnemimi pe pulmas re tai nařa va ruru e poli.

⁶ Ana kieta Ntewa naga pe Ntewa na kila luřeluřeen sitomena kiena yaru lala nařa amloge piowa, ana naga sitořal imimi, kila kiamimi erau wo nařa Taetas pimi řalivin imimi, a pogos nařa mepisu si naga memloge po pařisi.

⁷ A pogos nařa sun pa imimi, naga pi-sawal sur wo la nařa amiu akila, miilaar imimi keviu pařisi. Naga pisayu sanape nařa naga řena ga, pogos nařa naga pimi řalivi pun amiu, naga řal sur mok liu e amiu nařa miila naga, a pisawal sape akila mara wo e kiamiu visena la nanua ne, nařa nagane apilopu kiamiu sitomena, asuřalu asike e kiau lepasa. Pisawal sape sinemiun manene laa pařisi nařa neiřasu neyaliali amiu, a suwala,

pogos nařa nemloge nene nemloge po na nemloge po!

⁸ Pogos nařa nesiri řaki tařena nene pimi pan amiu, nemligan pae pano ana pe piavi re poli nesitomyu sina, nesape visae ve neligan re ga rui. Nanene komin nařa nekilia nesape kiau visena řarera lala yoko monar kila amiu aloge viowagan towe řaga. A poglis nařa memloge navisawalena kiena Taetas, nepisu sane lelaga ga na wa, kiau řaki kila kare kiamiu sitomena řisa. Ana nanene na yam plas ga, siraunia avilopu amiu sina, ana kila sane nekekaran sina nařa nemligan řaki nene piřasu.

⁹ Sane pe nepisa re nesape nekekaran nařa řaki nene kila amiu amloge piowa poli, ana nekekaran ga nařa naloge viowaena nene kila apilon amiu. A kiamiu naloge viowaena nena, pe imimi re nařa mekila pimi řalivin amiu poli, ana Ntewa narui naga kila pimi řalivi.

¹⁰ Sanene, naloge viowaena nene naga naloge viowaena wo tai nařa pitomi ma e peni, nařa kila yaru vilonia vena tol nataliaena. Ana naloge viowaena tařena, naga naloge viowaena na yomerava nini, nařa naloge viowaena viowa tai nařa yoko kila yaru loge viowagan řa vano vano va tol marena.

¹¹ Amiu řena akilia avisu kilale sane naloge viowaena nařa Ntewa tařan pimi pan amiu, naga kila yuřaena wo tai pařisi. Kila sane asitom urmi manenea e kiamiu malena, ařareran ke pařisi vena kiamiu kia imi wo sina. Sumo na, sinemiu mimin nařa apisayu napiowaena nařa sike likan amiu, ana pogos nařa nepis pan amiu vanonia, apisu kilale ga mrapa na wa, ana amarau. Amiu ga asuřalu apisi ke sina ga pan amiu, a amla nakoena pan la nařa akila piowa, vena ve naviowaena tai su re si pun amiu.

¹² Sineun nesape nevisa řaki nasumo, nemligania komin nařa nepisape nevis va lalua nene nařa akila piowa, a sineu miye řena yermarua nene nařa lalua akila kare manene laa naga. Nemligan řena ga komin nařa sineun nesape monar

avisu kilale sane lelaga, sinemiu si imimi, ana pogos naña mevis van amiu e kia kiena ne Ntewa, amiu akekaran naña avatanon ya naña mevisa.

¹³ Ana poglis naña Taetas pimi pisawal pan imimi sape amiu akila sanene rui, kilalua kiamimi sitomena pa metava pañisi.

Mekekaran manene laa nene rui, ana pogos naña Taetas pisayu sina pan imimi, pisayu sa naña amiu akila manene po pania, mekekaran pa laa sane. Naga pisa ke naña sike amio amiu, amiila naga a apisirlua kiena sitomena, a akila si naga kekara pa ñisi.

¹⁴ Nepisayu amiu pania nanua sumo rui, nesape nekekaran kiamiu ñelaga wo la pa ñisi, ana pogos naña piñasu mñalivin amiu, ana pisu ga na wa sane pe nepisokan re poli, nepisa ga lelaga. Sa ke ga nanua sumo, nepisa ke ga sur lelaga la pan amiu silaga, ana nagane, akila kiau visena naña pa Taetas e kiamiu lepasa pimi pe lelaga ruru mña ga.

¹⁵ Naga tañatete sinen ñesan pogos naña piñasu, amiu amarau pañisi a sinemiu kurkur, ana poglis naña pis pan amiu, amlogearia, apatanon ruru nena kiena visena. Kiamiu ñelaga wo na sanene, kila sane pogos naga ñasupe sina, sitomñal amiu lue ga silaga.

¹⁶ A e kiau lepasa, nepisa ga nesape nekekara naña nekekara, a nagane nepisu sane nekilia nowasine ruru amiu e sur make ga e pogos make ga.

8

Popon ala nalaena

¹ Erau nae Koren lala, sinemimin mesape amiu aloge lologena na sur wo tai naña sumña ñarwowo ke yo e sumñare lala na pupia lepas naña Masitonia, naña Ntewa miyumñan ke e kiena lemamiena.

² E yo nene, apa añarpo yo e pog mñarera lala naña sur moki liu kilali kare la, a pano tol naña pe kiela sur re si poli, ana la nene, pe añis re nena e kekarena ga e ya naña la apisuia. Limala korena ga, ana memilan pañisi sane pogos naña amloge asape nalelagaena tañena la

gar Yerusalem apane mña pog mñarera, sinela miye la ana sane limala pimi pule ruruia amio sur lala vena laen vano sane kiela nalaena van li tañena la nene.

³ Pe yar re tai poli naña pisape monar akila ve sanene, ana la ga asape akila, a nekilia ruru sane amla sur make ga naña akilia alavia, vano tol naña lañasa amlavia taulu ya naña akilia alavia.

⁴ A pogos naña añar viraran punu pae rui, amligan e limamimi, amñareran asape melual mrapa tai vena liganen nalaena nini vano, komin naña asape visae akilia alual si pulmas naiilaena na lelagaena wa tañena la sanene, yoko ve sur wo manene laa tai van la, naña yoko akekaran vañisi.

⁵ La apo pañisi, komin nanua sumo atamñan make kiela malena sane kiela nalaena tai pa Suñe, a amligan la asike vatanon kiamimi visena, ana siraunia amla ya naña la kiela sane nalaena tai pimi pan li na lelagaena tañena lala. Akila po taulu manene ya naña mesitom mesape yoko akila, ana lelaga, akila mesmesun ga e nasinenanena kiena ne Ntewa.

⁶ Ana pogos naña mepisu le Masitonia tañena lala akila sanene, mesitom mesape popon meligan si Taetas imñas pun amiu, vena iilar amiu vena akila mña ve sa nene. Mekilia mesape pogos naña naga piñasu sumo, naga sumña pis pan amiu ana amiu asiar kilaen yumñana wo na sinewo nene rui, ana popon naga imi kila make ruru nena ga amio amiu.

⁷ Mepisu naña yumñana tañena lala, asumña akila ke po rui, naña kiamiu viawaena keviu pañisi, apisawal ke visena lelaga po pañisi, akilia sur moki rui, asumña yepemiu mñan ruru yumñana, a asumña sinemiu sii imimi li nalelagaena tañena lala keviu pañisi. Akila yumñana la nene pano taulu ya naña mesitom mesape atorokin akila, ana popon akila mña ve sa ke ga e lepas na yumñana nakianen nalaena nene.

⁸ Nepisa sanene, ana visena nene naga pe sa re navisaluaena tai naña yoko monar atavevea. Sur nene sike ga e amiu, ana nesitom nesape popon sa nevisayu

taþena laþasa ve sanene, nepisawal sur wo la naþa akila ke rui. A pogos naþa yoko aloge, yoko kila amiu avisuveve amiu towe li laa maga sane, sane kiamiu sinesiena keviu maga yo, maran taaga sa ke kiena la nene pona peraga?

⁹ A popon tesitoal lemamina kiena kieta Suþe Yesu Kristo ve keviu silaga, naþa sumo, naga sa naþa kiena sur make ga, ana naga sitom ita e yomarava, naga pitomi sa naþa pe kiena sur re tai poli, vena kila sane tekilia teim teve yar na sur moki.

¹⁰ Pogaga, nanene kiau sitomena tai nene e lepas nene. Nepisa ga nesape nepisu sane sur nene sinemiun asape akila e kas nanua rui, a nane asiar asape akila ne, ana popon manene laa naþa asualun sina vena akila make ruruia.

¹¹ Kiamiu sitomena nakilaen sanene naga marera ruruia nanua þa rui, a nagane popon aareran ruru nakilaena, a vena akila va aa pe naþa atorokin akila.

¹² Ntewa pe pisa re pisape monar tela nalaena taulu ya naþa teke e limata vena tekiana, ana naga sinenan ga sape tekekan iilaen yaru taþena, a tela nalaena torokin ya naþa tekilia telavia.

¹³ Ana poglis naþa nepiun tan amiu vena akekan iilaena sanene, pe nesitom re nesape nekila sane yoko yuaena urmi van amiu poli, ana imi melala ga van li taþena lala.

¹⁴ Nesua nesitom ke ga sane popon ita make ga teve maran taaga ga. E pogos nene, kiamiu sur mok liu, ana lala na peraga, pe kiela re poli, ana popon kiamiu sur komþasia vano ve kiela, vena kiela sur ma tai ve tokak ga. A pona yam laþasa visae kiamiu sur re e kas laþasa naþa pimi ke ne, kiela sur komþasa kilia imi kila sane kiamiu narin sur ma tai. Pogos naþa tesua teiila ita ke sanene na po, kila sane ita make ga tesua marana taaga,

¹⁵ a yoko ve sa visena na Tus Marua tai, naþa pisa sanini, sape

“Yar naþa war kinanena ve moki vim, yoko naga kan vano kan make nena ga, ana siraunia visu sane pe kana re si tai poli,

a naga naþa pa þar kinanena vitokaki ga, naþa pisu sane torok ga, yoko naga ve ve plasan re sur tai.” Nau 16:18

Yoko Taetas wasuþe si va gar Koren

¹⁶ Nakonua rui pimi, nesua nesitom amiu paþisi, a nagane, nepisa potena paþisi pa Ntewa naþa naga kila pa Taetas sape sitomena marera tai sike e naga rui, sane naga monar iasu iila amiu.

¹⁷ Ana pogos naþa mepisayu mesape iasu malivin amiu, naga kekan ga, komin naþa kiena sitomena tai sanene sike pa e naga rui.

¹⁸ A pe naga re ga taaga poli, ana yoko meligan imimi yar taþena tai iasu amio naga, naþa naga kieta puruvi tai naþa sumare la na yo moki akilia ruru naga, komin naþa naga yar wo nalologonen Lologena Wo.

¹⁹ Sumare make ga la akekan kiena yuaena, ana amligan lua naga vena sua yaloro amio imimi metelivi e kieta lepasa, pogos naþa mesua mekilapolo ke kilavaru na iilaen li nalelagaena lala gar Yerusalem. Mekila yuaena nene komin naþa sinemimi sii la paþisi, a pogos naþa atol nalaena nene yoko ailan ruru vaþisi e þelaga naiila laena naþa tekila pan la, yoko avisirlua kia kiena Suþe va metava.

²⁰ A mekekan paþisi naþa kieta puruvi taþena nene taveve imimi, komin naga kilia iila imimi vena visuar ruruen pupia kilavaru nene naþa asua akoan poloia. Sinemimin mesape mevisuaria taveve ga kana mrapa wo ne lala, pe sinemimin re si meloge visena laþasa imi sirau poli.

²¹ Sinemimin mesape mekilala yuaena nene sa naþa yoko mesmesu e navisuena kiena Suþe, a yoko mesmesu mena e visuena kiena yar taþena lala.

²² Ana amio lalua Taetas nene, yoko meligan puruvi taþena iasu visu amiu. Naga mena ga pe yaru tai naþa memligan sur moki sike e limana rui, a mekilali ma naga sanene pano mepisu naþa naga yepen maen make sur la nene. Naga pe yaru wo tai na yuaena, a pogos naþa nepisayu kiamiu þelaga wo la pania, naga

þasine amiu paþisi sape visae imi yumae re amio amiu vera wo vaþisi.

²³ Sanene, e lepas puna kiau erau wo nene Taetas, monar avisu naga sane imi ke lua narui naþa memiyumae veraga vena iila amiuena, a e lepas na kieta puruvi taþena lua nene naþa yoko aimi amio naga, monar avisu la sane aim pun amiu e kia kiena sumare taþena lala na lepas nene, a aimi e kia kiena Kristo naþa kiela malena suma kipian ke kiena þelaga wo lala.

²⁴ Ana sineun nesape nevisa van amiu sane pogos naþa la nene aim aalivin amiu, kiamiu malena lala monar kipian mena kiamiu þelaga wo lala. Nesuma nemlologon amiu ke pan la rui, ana pon manene sane la avisu kilale ruru ga na wa e kilamarala sa naþa nepisa ga sur na lelaga, nesape kiamiu sinesiena keviu manene paþisi, a akilia ala navisawalena wo tai naþa visayu amiu va va sumare taþena lala.

9

Nalaena naiilaena va li na lelagaena taþena lala

¹ In na nesiri plan visena moki rui e lepas na laena na kilavaru naþa toþar viravirania vena iilaen li na lelagaena taþena lala nene kiena ne Ntewa, ana nesitom ke nesape asuma asitomal ke sur la nene na wa.

² In na nekilia ruru sane amiu akekaran naþa asikol e yumaena nawar viravirannen kilavaru nalaena nene, komin naþa e kas nanua þaro pano, asuma akila ruru ke naþa ataulu kana narin kilavaru rui. A poglis naþa nepa e lepas nene Masitonia nepisayu amiu pan la, nepisape amiu le Akaea lala asiar rui, a pogos naþa la amloge miyur la towe maga, kila sane miilaar kiela sitomena pa metava vena monar aareran laa sane vena kilaen kiela kompasia.

³ Nepisayu amiu ke pan yaru taþena lala rui, sane amiu na amiyumae po sanene sanene, ana sa ve akila re na piowa ga! Naga ke nanene narui kila sineun neligan kieta puruvi telu nene

aimasu avisuveve ruru amiu lia, komin naþa nepisa pan la nesape monar awar viraviran kilavaru la nene rui, ana la akilia aimasu alual sane sanene pona pere wa.

⁴ Visae pere wa, monar amiu akila vilaga, komin naþa lavis ke inu mena neimasu narui, a yoko neimasu nemio le Masitonia laþasa, naþa nepisayu amiu pan la rui. Ana visae meimasu melual naþa pe akila ruru re poli wa, yoko kieta kap mare, pupia mawaena van inu, a van amiu mena ga, a yoko monar la avisave nepisa koskosin manene nayeluaren kiamiu kia pan la.

⁵ Nane kila narui nepisu sane monar nevisa van Taetas lala aimasu sumon inu, ana ayumae amio amiu vena war viravirannen kilavaru la naþa amiu apisaar asape awaria, awarpolo ruru suma ga, ana yoko meimasun mowaria mowar vano. Nepisa sanene, ana ve asitom re sane nesuma nomareran amiun ke nesape monar awar nalaena nene. Waren nalaena na sanene, naga sur tai naþa ape sinewo, ana kiamiu sitomena ga kekaran nakilaena.

Navisa ruruena na þelaga nalaen suria

⁶ Ana visena tai ne nekilia nevisa manene van amiu sanini, yaru naþa mapila ve tokaki, yoko naga war ve tokaki, ana yaru naþa mapila ve moki, yoko naga war ve moki.

⁷ E lepas na kianen nalaena van yar taþena, ita make ga veve taaga monar tela ga ya naþa kieta sitomena pisaar sape tekila, ana pe pon re olavia naþa pe okekaran re laen poli, pona olavia komin naþa yaru taþena mareran sape monar olavia. Ntewa pe sinenan re nene poli, ana naga kekaran manene yaru naþa mla suria molue kome kiena sinewo a e ga e kiena sitomena naga taaga.

⁸ Ana visae ko tai naþa osuma omla ke nalaena pano, ve ositom manene re, komin naþa Ntewa kilia lamaran si nalaena wo la imi van ko, ve moki na ve moki. Naga kilia kila naþa silaga owar toroki e sur make ga naþa sinomania, a metavania owar torokin naþa owar sina ve na iilaen yumaena wo taþena lala.

⁹ Nanene sane visena tai na Tus na Yauena Wa lala naña pisayu sinewo kiena ne Ntewa, sape

*“Naga suña kiakian lua ke nalaena wo lala pa yar la naña limala korena, kiena ðelaga wo lala sulue na sike ne.”
Yauena 112:9*

¹⁰ A Ntewa, naga ke narui mla mrasa pan ita vena temapila e porotano, a naga ke narui naña kila kurusa ðar mrasa nakilaena kata kinanena ea, a ve sanene, yoko naga la ya naña sinetania vena kilaen yuññaena ea, a yoko kila kieta sur la imi ve moki, a yoko kila naña kieta yuññaena mesmesu lala awar mrasnela ve moki.

¹¹ Yoko naga visu kilale kiamiu ðelaga wo nene, naña silaga akekaran kianen suria, ana yoko naga lamaran sina ve moki vim van amiu, a pogos naña mowar kiamiu nalaena va tañena la nene, yoko kila naña ita punu ga tevisa pupia potena tai va Ntewa komin navisa ruruena nowo naña naga suña kian ke pan ita.

¹² Nalaena nene naña yoko ala vano, yoko iila li nalelagaena wa tañena la ve keviu naña asuñña apane ke pogos ñarera, a yoko kila ayeluar ñena Ntewa ve keviu vañisi, avisa manene potena vania vañisi.

¹³ Yoko ayeluar Ntewa sanene komin naña yoko avisu naña pe asuñña amlologon re ga lologena wo kiena Kristo poli, ana asuñña amlogear ñena ya naña pisa, a yoko avisu nalaena naña amlavia keviu pañisi, naña yoko kilia iilala ve keviu a iila li tañena ñena lala. Ana pogos naña apisu sur la nene, yoko avisu kilale ñena sane kiamiu yuññaena suña kipian ke sane kiamiu viawaena ñarera ruruia a pe lelaga na sike ne.

¹⁴ Yoko avisu naña lemamiena kiena ne Ntewa pule manene sanene e losinemiu, a yoko asitom amiu vano vano ðisa, yoko sinela ye amiu, yoko asuñña alen wo amiu silaga.

¹⁵ Popon avisa potena van amiu komin kiamiu nalaena wo na sanene, ana po ñena ga vena ita punu ga tevisa manene potena van Ntewa silaga komin nalaena

tanea naña naga mla pan ita, naña narina ne nane Yesu Kristo.

10

Pol mla navisatameena pa la naña apisa kare kiena yuññaena

¹ Erau lala, akilia sane in ga Pol nesuñña nesiri piñasu, ana sineun nesape ala kiau visena e ðelaga ña nena naña sike e Kristo, naña naga momau po a malumu po. Naga ke nene narui ðelaga naña nesuñña noñikeyon kilaena pan amiu nanua sumo, ana nekilia ña sane yaru lañasa asuñña apisa kare in ke vanonia. Asuñña apisa ke asape pogos naña nesike nemio amiu, in na nemalumu manene laa, a nemaraun visena, ana asape pogos naña nesiri piñasu, nekila ga sane in na yaru tai naña nekilia nevis ñarera, komin ga naña nesike perinan amiu.

² Na nene na pogaga, ana monar akilia sane pogos naña neim nomalivin amiu, visae nevisu sane popon nevis ñarera, nekilia nekila ga narui. Ana sur ne nanene narui nesape nevisa van amiu, a nepisa awis pan amiu, neviun manene van amiu vena akilali napiowaena la nene vim wo towe laa ga wa, pogos naña pe nepim nomalivi re pun amiu poli wa. Visae ve sanene, pogos naña neimñasu, yoko ve sur re si tai naña monar nevis ñarera ea, ana visae peraga, in na pe nemaraun re nena nakuanen visena lañasa naña ñarera na ñarera van la naña asike loyuma e napiowaena la nene poli, a naña apisa kare imimi ke ne, apisape memiyuñña taveve ke ga sitomena na yomarava.

³ Lelaga, ita make ga tesike e yomarava nini, ana imimi pe metaveve re kiena ðelaga poli. A lelaga, mesuñña mekila ke mara tai e yomarava, ana mara nena na pe nae re e yo nini poli.

⁴ Mesuñña mesikol ke mara tai naña ñareraena lala nae ma e peni asuñña akila ke pan ñareraena lala na yo naloge viowaena, a suri na mara la naña mesuñña moñaria, pe ape na yomarava re nini poli, ana mekila ke mara moñar ke ñareraena kiena Ninuna Wa naña kilia

yumu plan make yo m̃arera la naṓa sur viowa la asuṓa atapoulou ke ea.

⁵ Visae avisa visena viowa laṓas na kaween yuṓaena kiena Suṓe, ana mekilia metaulu woga. A visae avilaven, akilali naṓa avisaluṓar kiena yuṓaena, ana mekilia meva mowarpoyo vena kilaen yar la akilia naga e kiela malena. Visae asuṓalu amio sitomena viowa lala, ana mekilia mevilon yar la nene aimi naṓa kiela sitomena imi m̃arera vena ataveve ga Kristo.

⁶ Yoko mekilia mekila ve sanene van amiu vano vano atam̃an amiu, vena aligan amiu asu vatanon visena kiena Suṓe, a siraunia, yoko mekila m̃a vano va e yo taṓena la naṓa yaru na kaween naga asike m̃ena ea.

⁷ Ana e lepas na yaru nene naṓa pe purṓes nen napiowaena nene, pona amiu asuṓa apisa ke asape sur punu ga pogaga komin naṓa yaru nene pisape naga pe yeririna tai kiena Yesu yo? Ana awis, ve avisu re ga kulyepena, aṓionli avisuveve sur lelaga naṓa sike pae e maramiu rui. Naga pisape pe yeririna kiena Yesu na pogaga, ana naga suṓa kila ke piowa, a popon naga visu ruru si kiena malena. Sinemiun ke yagogonen naga na wa, ana sanape, inu m̃ena ga nepe yeririna kiena Yesu, ana komin ya ne yepemiu mavin yagogon inuena?

⁸ Nepisa sanene, pona yoko laṓasa avisa kare in sina avisave in na sineun ga netaulu luen suria, ana pe sa re nene poli. Pona lelaga sane pogos laṓasa noṓarwar inu paṓisi yo, pona nesuṓa nepisayu manene sane imimi ke narui mesuṓa mepisuar amiu, ana pe nesitom re nesape nekila sur tai piowa naṓa monar nemawania. Nesuṓa nepisayu amiu sanene komin naṓa Suṓe ga mligan amiu e limamimi nanua rui vena mekila kiamiu malena amio naga va metava. Visae amiu asitom avisave mesuṓa mepis ke pan amiu vena kila kareen si kiamiu malena, pe sa re nena nene poli.

⁹ A visae asitom ke asape in na nepe yar na sinemimiena tai naṓa nesuṓa nesiri ke m̃aki la nene piṓasu vena kila sane monar amaraun inu, naga m̃ena nene pe

mesmesu re poli.

¹⁰ Nekilia nesape laṓasa asuṓa apisayu in ke sanene rui, asape “Suwala, Pol sur nene, naga ga kiena m̃aki lala apulen visena urmi la naṓa m̃arera, ana visae ovisu naga, naga sane pe yar malmale kar ga tai, a visae ologe naga visi, melala ga.”

¹¹ Ana sineun nesape nevisa van la nene sane popon avisu kilale sane ya naṓa mesiriwal ke e m̃aki, pogos naṓa pe mesu re memio amiu poli, naga maran taaga ga sa ke e ya naṓa yoko mesuṓa mekila e maramiu, pogos naṓa mesike memio amiu.

¹² Nepisa sanene, ana pe sineun re visaen sur ve moki poli vena kilaen si kiamimi kia va metava. Pe sineun re naṓa meim sane yaru taṓena laṓas poli, naṓa apilaven manene visawalen si kiela sur wo lala. Yar la ne sanene asuṓa apisuveve ke kiela erau lala, a asuṓa apisuveve ke m̃ena yar taṓena lala, ana asitom asape la apo taulu la, ana naga nene pe yuṓaena na wowe ga tai, komin naṓa pona la punu ga nene apiowa maran taaga yo.

¹³ Sanene, yoko ve nevisayu manene imimi re va sanene, ana monar nevisa sur laṓasa van amiu naṓa atorokin yuṓaena lala naṓa Ntewa mligan e limamimi, a loyuṓa ea, pano tol sur laṓasa e lepas navisuar amiuena naṓa mesuṓa mekila.

¹⁴ Pe mesitom re naṓa meva manene poli vena mekilali naṓa mesu metavan amiu, ana mesmesun naṓa mekilia mela visena laṓasa naṓa monar avatanonia, komin naṓa ve sinemiu ṓesan re sane imimi ke narui naṓa moṓar ṓesan lologena wo kiena Kristo pimi pimi yalen silau pimi tol amiu.

¹⁵ Visae taṓena laṓasa la apimṓes pun amiu, yoko ve mesitom re navisuar amiuena, pona nalaena visena la ne sanene van amiu. Ana siraun naṓa mesiar yuṓaena memio amiu, monar meva re laa na wa memio amiu. Sinemimin ga naṓa kiamiu naviawaena suṓa kapuru silaga, a mekekaran manenea visae kiamimi yuṓaena kilia imi ve keviu laa sane, ve e re ga e kiamiu yo,

¹⁶ ana yoko mekekaran vaṓisi visae

amiu akilia aiila imimi vena kilaen sane teva re laa ga wa vena lologonen lologena wo va e purvanua taņena lala na pun amiu lepas p̄asa na vano, vena teva tetepo yom̄arua e yo naņa yar taņena lala pe apa amlologo re e poli wa. Sanene, visae pogos tai tevisayu yum̄aena lala naņa yoko tekila e yo la nene, yoko taņatete si avisa kare ita avisave tesum̄a tepilaven ke ga mrasa naņa molue e lokove kana yar taņena! E pogos nene, yoko la akilia sane tesum̄a tepisayu mrasa naņa molue ga e kata lokove naņa ita ga temapila.

¹⁷ Sitomena la nene apowo paņisi, ana popon ve towarwar itan re sur naņa tekila, komin Tus Wa pis rui, sape

“Yaru naņa sinenan vilaveena sur tai, monar vilave ga e ya naņa Ntewa kila.”

Ser 9:24

¹⁸ A pe pon re ita ga teyeluar ita si poli, komin yar wo naņa lelaga, pe naga re naņa naga ga pisa si sape naga po, ana naga naņa Ntewa ga pisa sape naga po.

11

Le Koren lala ataveve nalogena lala navisokanena

¹ Pona apulo visena la p̄asa naņa nesiri rui, asitom asape nepis wowe yo, ana awis, sineun nesape akila kiamiu sitomena ve piavi li laa sane e inu, ana yoko nekilali naņa nevisa si laņasa.

² Ana monar nevisa visena la nene komin naņa silaga nesum̄a nesitom amiu paņisi. Yoko nevisa ve sanini, sane nepisu amiu sane amiu na kiau sira m̄ee tanea tai, naņa nepisalar vena talopa amio kiena yar mesmesu nene naņa Kristo. Nemloge sane nepieluen ruru amiu nenaga, komin naņa sineun visuar ruru amiuena vena ave lelaga e visaarena nene, a naga nene sa ga Ntewa, naņa naga m̄ena ga pieluen ruru ita, pe sinenan re sape teligan naga poli vena teva si varau.

³ A inu m̄ena ga nemarau towe m̄aga sane saņisi yar taņena imi were si kiamiu sitomena va ve taņena. Sa nanua sumo ne, lom̄ara nene pimi pisa kotalia sira naņa Iv, kila kotalia kila mloru e mlamulena piowa, ana pe sineun re nenaga vena

pogos tai ve alelaga re si e Kristo, sa p̄isi ve sinemiu sii ruru re si naga taaga.

⁴ Nepisa sanene komin naņa nepisu kilale towe m̄a p̄arimiu rui. Pogos naņa nalologena tai im̄asu visayu Yesu taņena tai naņa pe Yesu re naņa memlologon ke poli, ana alelaga ke e naga veraga. A pogos naņa ninuna taņena imi m̄alivin amiu naņa ve Ninuna re nene naņa Ntewa mligania, apulan amiyopua ga. Pona pogos naņa lologena wo taņena tai imi m̄alivin amiu, yoko akekaran logearen naga veraga.

⁵ Nalologena taņena la apisa kotalia amiu ruru nenaga e sur la nene, ana nepisu naņa amiu asum̄a asitom urmi manene laa e la. Amiu akila sa naņa la ga ape nalologena e kieta yomarava nini, a amligan inu nesike tano, ana pe nesitom re nesape nanene naga mesmesu poli.

⁶ Lelaga, nekilia nesape yar laņasa asitom ke asape in na pe nemlologo ruru re po poli, ana nekilia nesape pe yar re si tai naņa kilia sur taulu inu poli, a nesitom nesape amiu apisu kilale suri nene rui, komin naņa sum̄a m̄alivi ke e yum̄aena punu ga naņa nekila ke ne e maramiu.

⁷ Nekilia nesape e lepas na warpoloen kilavaru nene, yar laņas pe akekaran re nenaga, ana nemninue ga komin ya ne sanene. Pona asitom asape nepiun ke kilavaru nene ve kiau ga? Peraga rui, komin pogos naņa nepimin nemlologon Lologena Wo kiena ne Ntewa pan amiu, pe nepisali re nesape ala sur tai van inu poli. In na nemligan inu nesike laa tano, vena nekilia nevisirlua amiu ava metava, ana pona amiu p̄asia sinemiu karinun naņa nekila sanene? Pona asitom asape in na nekila piowa ga naņa pe nepiun re suri tai pan amiu e pogos nene poli yo?

⁸ Nekilia nevisa mesmesun van amiu nevisave e poglis nene, sum̄are taņena lala asum̄a amligan nalaena pimi vena iila inu, a nesum̄a nakan ke ga kilavaru nene pogos naņa nemiyum̄ae kiamiu ke ne. Ana pe nekila re sur wo tai pan la nene poli e pogos nene, ana nemloge sane sa ga nesum̄a nepinaun la ke ga.

⁹ A pogos naþa nesike nemio amiu, lumãau plasa pano pano þisa, ana puruvi la lua naþa akom Masitonia apitomi apisu kilale naþa nemloge ke piowa sanene ana apisuar ruru inu. Pe nepim netag li re pan amiu poli vanon sur tai, a nepisaaria sane yoko taþatete nekila kare amiu naþa nomãareran amiu nesape monar akila sanene pona sanene pan inu.

¹⁰ Nepisarar sanene komin naþa yep-mavin yar la asumã avisa kare inu asape visokar inun kiamiu kilavaru, ana yoko nevisawal kiau navisaarena nene va kar ga e yo punu ga e lepas nene Akaea. Pe nemarau re nenaga, nepisaaria e kia kiena ne Kristo naþa kiena visena lelaga sike e inu sane yoko nekila ga narui.

¹¹ Ana pogos naþa nepisa sanene, pona yar laþasa yoko avisave sineun ga kila kareen kiamiu kia, pona asitom asape pe sineu sii amiu re poli yo, ana in na pe sa re nena nene þisa. Ntewa kilia ruru sane sineu sii amiu paþisi.

¹² Ana monar nomãareran ga sane visaarena naþa nepisa, yoko monar nekila ga narui, komin naþa sineun kemaren kapi kiena taþena la nene naþa asumã apilave kar ke sanene. Asumã apisali ke pan amiu asape asumã amiyumãe lele taaga amio imimi, asape akila ga yumãena mña nena naþa mesumã mekila ke ne, ana pe sa re nene poli.

¹³ Yar la ne sanene ape nalologena navisokanena ga, amiyumãe pe mesmes re nena poli, ana asumã akila kotalia amiu ke ga li na lelagaena lala, sane aþar marana nalologena lelaga lala kiena Kristo.

¹⁴ Ana monar ve ailan re naþa akila sanene, komin kiela yerkaawa naþa Yermare, naga mña ga sumã kila ke sanene rui. Naga kilia kila sane naga imi ve navisi wo na yomerarava,

¹⁵ ana tepisu naþa kiena yar lala na yumãena akila kotalia ke mña yaru lala, akila la sane la ape yar na kilaen þelaga mesmesu. Ana pogaga, tekilia sane yoko ava ga narui aþisi e yo naþa mesmesun ga kiela yumãena viowa lala.

¹⁶ Ana sa naþa nepisa rui, pe sineun

re sane nevisi ana kila laþasa asape nepe wowe, ana visae sinelan visaena, atamãan avisa. Ana visae ve sanene, popon la akila van inu sa naþa akila pa wowe lala, sane ve avisaluþar in re sumo wa, ana atamãan nevisa ya naþa sineun nesape nevisa.

¹⁷ Pogos naþa nesumã nepisayu ke kiamimi yumãena, visae nevis vilaveena manenea, kila sane pe lelaga kemua naþa nesumã nepis wowe, a yoko Suþe taþatete kekarania.

¹⁸ Pe pon re tevis vilave manene poli, ana in na pe nesa re yaru taþena la naþa asumã apis vilaveena kiela sur lala na yomarava nini, komin naþa visae nevis vilave, nesumã nepisayu ke ga sur wo lala.

¹⁹ A nepisu naþa asumã sinemiu miye ke yar taþena lala naþa amiu asitom ke sane la ape wowe, komin naþa apisu sane la ape taþena, pe atol re manmaruaena wo nene poli naþa amiu asitom ke asape asike ea. Ana visae asitom ke asape in mña nepe wowe, komin ya ne taþatete akila kiamiu sitomena ve piavi laa sane e inu mña?

²⁰ Nepisu naþa asumã atamãan ke pa nalologena navisokanena taþena la nene vena akila sur viowa la ve moki van amiu. Akila van amiu sa naþa amiu ape kiela yar na yumãena lala, la amiyelelain amiu, aþar kiamiu sur lala, amligan la asu metavan amiu, a visae sinelania akilia alipa maramiu. Amiu asumã atamãan akila sanene, ana sanape? Ana pogos naþa nepisa ga visena tai pan amiu, komin ya ne yepemiu mavin yagogenena?

²¹ Pona popon manene visae in mña nesumã nekila þelaga kar la ne sanene van amiu, ana pona kila amiu akekaran inu ga yo na wa? Ana pe sineyeena, in na nemalum laa paþisi yo, in na pe netorokin re nekila nene poli yo?

Pogaga, nepisa visena nene, nekilia sane yoko yar laþasa avisave nesumã nepis wowe ke sina ga, ana sineun nesape visae nalologena taþena la nene asitom sane akilia avis vilave komin naþa asitom asape sur laþasa na lepas pula naga po, ana in mña nekilia nevis vilaveena sur laþasa na sanene.

22 Visae asumã avisir plan la ke asape la ape yer Epru, ana in mēna nepe yer Epru. Visae asumãlun avisave la ape yaru na lepas nene Israel, ana in mēna nae yo nene. Visae aligan la metava komin naþa apisape la ape lus kiena Epraam nena ga, ana in mēna nepe lus nene.

23 Ana yoko neviun naviunena tai van amiu narui, sane la nene amiyumãe kiena Kristo pa tol yumãena naþa inu nemiyumãenia? Peraga, inu nesitom sane in na nekila po manene laa taulu la. Piowa ga naþa nesumã nepisayu inu ke sina sanene, ana þarimiu la m̃arera paþisi kila sane in mēna lavis þaruu ve wowe, nane nesumãlu nepis sanene. Ana sur nene na lelaga paþisi, naþa in na nekila pupia yumãena la taulu la, yerkawa la akoven inu e yumã naloge viowaena yam moki taulu la, aþe inu yam via nopulo þele sina, a yam moki mēna ga naþa pano-o lavis ga nemare.

24 Nekilia sane yam lima rui, yerkawa kiena ne le Yu lala aþe inu naþa yam taaga, kovilva kakapuru e mosineu yam lualima yam telu pa ovari [39], ana akila sanene yam lima. Apisaluþaria asape ve akila re va tol lualima yam ve vari [40], komin visae peraga, vena marena ga narui.

25 Ana yam telu aþe inu e laki lala, a yam si tai akove inu e kilavaru pano pano lavis nemare. Yam telu nokulu e sive naþa waa talilu, e pogos la tai nene, sive mian inu m̃aga tol lemalo wetelu tai a legiena wetelu si tai.

26 Pupia yalena piayavi lala, nemialoro e la yam moki manene laa, a e pogos la nene nepane sur la moki liu naþa namarena ga. Wii lala na þalu lavis ayanlua inu nevano, yar la naþa aþevinaun ke yar lala aþene inu, kiau yeririna ga lala sa naþa le Yu lala apisu piowa e inu, a la naþa pe ape le Yu re poli akila kare inu mēna ga. Nepa e yo nape, sane pulkumali, pona yom̃arua, pona losi, ana nepane pog m̃arera, ana silaga, puruvi navisokanena la nene, asumã akawe inu.

27 Sila ga nepa nemio yumãena m̃arera a pog m̃arera, nepano naþa nomomalia þele ga, nepano naþa moto kar inu paþisi a viso kar inu naþa pe kinanena re nena poli, a nepano naþa pe nomãl re yo natapolounen miava poli.

28 A metavan pog m̃arera la nene, silaga nesumã nesitomãl luen ga kiau yumãena nemio sumãre lala, naþa sane sur tai naþa urmi na urmi e kiau malena.

29 A nesitom amiu mēna ga paþisi, naþa visae nevisu amiu li na lelagaena yaru tai imi malumu, yoko kila neloge sane yepeu malumunia, a visae neloge naþa amiu tai loru e mlamulena viowa, yoko kila naþa neloge sineu laea paþisi.

30 Nanene sur viowa la naþa nesumã nepisua, ana nepisu sane nemalumun manene laa yumãena kiena Suþe, ana pe nekila re sur wo tai naþa nekilia nevis vilaveena poli, kila sane nesumã nepis vilave e pog viowa la nene naþa nepanea.

31 A kieta Ntewa, naþa naga pe Arimana Suþe Yesu, naþa yoko teyeluar luen ga kiena kia, naga kilia sape pe nepisokan re poli, sur la naþa nepisa ke ne ape lelaga make ga.

32 A pupia sur viowa si tai naþa nomãlia, pe nepisa re ma metava poli, nanene e poglis naþa nepa e pupia pulkumali naþa Tamãskas. E poglis nene, þarin suþe nae lepas nene naga yar naþa Aretas, a kiena yerkawa naþa naga pisirlua vena visuaren kiena pulkumali sinenan sape tarar inu, ana pitetalia kiena lokul na taren yaru lala apa asuwo make mralaea punu ga e yo nene vena ve noure re.

33 Lavis atol inu, ana erau laþasa amiila inu, akonwan inu e los nen pupia karo tai, ana apiar e kilika, asumãlu metava e pupia arman kove na yo nene, amligan malumun pito tano vanua e yepas nen kove nene, pito malum m̃a pito tol tano, ana nomolue e karo nene nopure nepano.

12

Sur la naþa Pol pisu e m̃eniena

¹ Poga, nepisu sane visae nesuũa nepisayu in ke sanene wa, yoko tařatete vilon kiamiu sitomena imi wo sina, ana pogaga, nemloge sane sineun nesikol si visena nevisayu sur la nařa nepisuiua pona sur la nařa Suře kilologia pan inu e mřeniena lala.

² Ana yoko nesunyu yar kiena Kristo tai sumo wa, nařa nekilia ruru naga, nařa kas lualima taaga pa vari [14] řaro rui, naga suũa ga milan ařere naga pa kate ma e peni ma metava. Nemninue ga pa amio tasnena wetelu, pona apitom ařerelua ga ninuna pavini, Ntewa ga kilia.

³ Ana pe sur korena ga nařa visae pa e tasnena pona pa e ninuna ga, nekilia nesape lelaga sane yar nene pavini yalen silau pisu loyũa e mřata uũa tanea e yo nene.

⁴ Naga mloge sur mok liu nařa pe navisawalen re si poli, nařa pe visena re si na yomarava lařas poli nařa torokin navisayuena.

⁵ Ana pogos nařa nepisayu yar nene, pona amilan yo, apisape ke, yar nene, naga pe yar tanea tai nařa ne. Ana sanape, visae nevisave pe yar tařena re poli, ana nepisayu in ke ga, pona yoko avisa ga avisave nanene naga pe pe sur re tai poli a? Sanene, nepisu sane visae sineun nevisayu pupia sur lařasa sanene van amiu, popon nevisa ga e kia kiena yar tařena, vena akekarana nařa alelaga ea, ana e kiau kia, yoko nevisayu ga kiau narin sur lařasia.

⁶ A visae sineun nevis vilave e pupia sur la nařa nekila, yoko tařatete si yar tai kilia visave nesuũa nepis wowe, komin sur la punu ga ape lelaga make ga. Ana pe sineun manene re nevisa sur la ne sanene poli, komin nařa pe pon re nekilali aligan inu metava vanon sur lařasa nařa pe apisuli re poli wa pona pe amlogeli re poli wa, ana in ga nesuũa nepisa. Sineun nesape asuũa avisuveve inu e yuũaena ya nařa apisu nekila ke pan amiu, a e visena ya nařa nepisa pan amiu.

⁷ A nepisu sane Ntewa mřenena naga yepen mavin sape kiau sitomena va manene laa metava vanon mřeniena lala

pona sur la nařa naga pisa lologia ke pan inu, a naga mligan napiowaena tai sike e tasneu nařa nemloge sane kurumol tai nařa Yermare suũa miyur inu ke e silaga, nařa suũa kila tasneu mlalaea, a suũa kila kiau sitomena suũa ga tano.

⁸ Nepiun tan Suře vena lalua sur nene vetan tasneu, ana pe kila re poli, ana yam lua sina nemleninia, yoko kana yam telu nena, ana peraga rui.

⁹ Ana naga pis ga pan inu, pisa sanini sape "Yoko kiau lemamiena ga torokin uarar ko, komin kiau mřareraena kilia yuũa ve keviu manenea e pogos nařa yuũa amio kiũa malumuena." Visena ne nanene narui kila sane nekekarana nevisayu manene in laa sane, ana yoko nevisayu ga kiau malumuena lala, vena kila sane mřareraena kiena Kristo kilia yuũa kome inu sanene, sa nařa naga pisa.

¹⁰ Sanene, vena kila kiena kia imi ve keviu manene laa sane, netamřan sane nekekarana malumuena la se tasneu, pona avisu viowa e inu, pona nelual pog mřarera lala, pona akila kare inu, pona neva nowarpoyo e sur viowa lala, komin nařa nekilia sane pogos nařa yepeu malumu, Kristo ga yoko kila nomřarera.

¹¹ Suwala! Nesitomřal ke visena la nařa nepisayu e yo nini, nepisu sane lelaga, nepisi sa nařa nepe wowe pařisi. Aviewo inu, ana po mřenena ga nařa apisu kilale sane amiu ke narui nařa akila nepisi sanene. Nesitom ke nesape amiu ke narui yoko asuũa avisayu ruru inu, nařa akekarana sur wo la nařa nekila pan amiu rui, ana peraga, asuũa apisa kare ruru inu nena ga. Nekilia nesape in na nepe sur korena ga, ana pe nesitom re nesape in na nepiowa taulu nalologena navisokanen tařena la poli, ana vanon ya ne asuũa amieluar la sanene?

¹² Popon asitomřal si sur la nařa nekila likan amiu, nařa pisawal inu sape in ke narui nepe nalologena lelaga. Sila ga, kiau sitomena piavi ruruia vena yuũa malumu amio amiu, a nekila amiu apisu kile lala, amio sur nailanena lala, amio kile lala na namřareraena kiena ne Ntewa.

¹³ Nekila sur make ga pan amiu po paḡisi, maran taaga e ya naḡa nekila pan suḡare taḡena lala, ana la pe apismumun re sur tai poli, ana amiu na apis liu wa. Sur ga tai naḡa nekila nemio la ana pe nekila re nemio amiu poli, pe nepiun amiu re poli nesape avisuar inu pona aiila inu, sa naḡa la akila, ana pona nane nekila pal e nene yo? Visae ve sanene, aviewo inunia, komin naḡa visae pona neviun ga sur ve moki vetan amiu vera na yoko akekaran in ga na wa?

¹⁴ Pogaga, nagane narui nesuḡa nekila ruru ke nesape neiḡasu nevisu amiu sina, naḡa kana yam telu ne narui. Nepisaar nesape yoko ve nekila re yuḡaena van amiu, komin naḡa ve neiḡasun re vena kiamiu sur la iila inu, a neiḡasun vena neiila amiu. Nanene sane ata lala a auya lala amio narila lala, naḡa pe yuḡaena kiena re nin sisi la poli naḡa avisuar kiela yermarua lala, ana yermarua ke la narui monar avisuar ruru narila lala,

¹⁵ ana visae sanene, in na nekekaran ga naḡa nekian make kiau suria, amio ḡena kiau malena, vena iila amiuena. In na nekilia nekila sanene komin naḡa sineu sii amiu manene paḡisi, ana nemloge piowa komin naḡa nepisu sane pog naḡa kiau sinesiena e amiu suḡa pa manene ke metava, ana kiamiu sinesiena e inu suḡa pito lilue ke ga tano.

¹⁶ Nepisa nanene komin nemloge visena taḡena e amiu. Asumḡa apisu kilale ke asape pogos naḡa nesike nemio amiu, pe nekila re yuḡaena tai ḡarera pan amiu ve navisuarinena poli, a pe nakan re nena kamiu kilavaru poli, ana sitomena tai teke ga e amiu wa. Amiu apisa apisape in na nepe manmarua po e lepas nakilakotaliaen yaru, ana asitom ke asape nesuḡa nekila vinaun ke mrapa na visa kotalia amiuena vanon kiamiu sur lala.

¹⁷ Ana pe sa re nena nene poli ḡisa. Asitom ruruli la naḡa nepitetalia la apimḡas pun amiu. Apisu naḡa akila kare amiu e sur tai, pona aḡar kiamiu sur laḡasa pe kiau? Pe nesitom re poli.

¹⁸ A sanapen ḡena pogos naḡa

nomḡareran Taetas sane naga amio kieta puruvi taḡena nene, lalua monar aḡalivin amiu? Apisu naḡa lalua akilakokanin ga naḡa awar kiamiu kilavaru laḡasa? Peraga, komin imimi sane ḡegas taaga ga, naḡa Ninuna taaga ga sike e imimi, a mesuḡa metaveve mrapa na yuḡaena taaga ga, naḡa pe mesitom re nena naḡa nakilaen yuḡaena kiena Suḡe vena mowar sur laḡasa ve kiamimi.

Pol sitom manene paḡisi sape pogos naḡa va gar Koren yoko ve sanape?

¹⁹ Nesuḡa nepisayu ke kiau yuḡaena la sanene, pona asitom ke asape noḡikeyon nekilalua kiau kia va metava e maramiu yo vena ve asitom re si viowa e inu. Ana peraga, in na pe nesitomḡal inu re poli, ana nesuḡa nesitomḡal amiu ga, a visena la naḡa nepisa, nepis sane yar kiena Kristo tai, e marana Ntewa, vena iilaen kiamiu malena.

²⁰ Nepisa visena la nene komin nemarau paḡisi sane pe pon re naḡa nomḡalivin si amiu poli, ana nevisu naḡa amiu asike e yo tai naḡa piowa paḡisi e kiau sitomena, a nemarau ḡena ga sa ḡisi yepemiu mavin inu. Visae ve sa nene kilia kila sane teveveyun ita, pona tesitom ita viowa, pona sineta kar ita, pona ve tesitom re si yar taḡena ana tesitomḡal ita ga veve taaga. E pogos la ne sanene, yar kilia viueli, kilia vismumun yar taḡena, kilia vis vilave, a kilia ḡaga manene ḡena ga. Visae va sanene, ana viowa narui.

²¹ A nemarau manene ḡena ga sane pogos naḡa nowasuḡe si neim pun amiu la nene, yoko nevisu kiau yuḡaena lala e amiu sane aviowa ruru make nenaga. A visae ve sa nene, yoko kila inu nemawan Ntewa vaḡisi, yoko kila inu neloge sane naga mligan inu nepito tano keviu paḡisi e maramiu. Ana nepisu sane yoko monar ve sa ga nene narui, komin pupia mlamulena viowa naḡa amiu laḡasa asuḡa akila ke ne naga pe ḡelaga na kororaki na kolau naḡa kilaro navisaluaena naḡa Ntewa mligan pa yermḡene amio sira vena

atavevea, a pe apilon la re nena ea ñisa, ana amiu atamãan ga naña la asumã akila.

13

Visena maro na weñege laena

¹ Erau lala, sa naña nepisa ne, nanene yam telun naña nemialoro naña yoko nekila vena neimi neyalial li mña amiu, a pona yoko yam ve telun naña nevisi van amiu komin napiowaena nene. Nanene kila narui nesitoñal visena tai na Tus Wa naña pisa sanini, sape

“Pogos naña apa kumali apis pa yar tai vanon mlamulena viowa tai, monar yar ve lua pona ve telu naña akilia avisawal mlamulena viowa nene, vena kila sane avisu sane lelaga.”
Naw 19:15

² Nesitoñal nene komin pogos naña nepim ñesan noñarpoyo pun amiu yam lua nanua sumo ne, nepis nemio amiu la naña akila mlamulena viowa nene, nanene naga pogos naña nekila ñesania. A nagane nesumã nepis ke sina ga yam lua pan la e mñaki nini, a visae neim nevis sina, naga nene kila kana yam telu nena. A sineun nesape nevisa van la nene, amio la naña asike e yepas nela, visae neimãasu nevis sina, nanene yoko ve nasineyeena to re si e inu narui, yoko neliñere la e nakoena mñarera tai.

³ Amiu asumã apisa ke asape popon nekilologia inu towe mñaga sane ve lelaga naña Kristo sumã pis ke ñarpoyo e kiau visena lala, ana visae sinemiun sanene, popon aim ayagogon inu e poglis nene, ana yoko avisu ga na wa. Yoko avisu sane pogos naña Kristo sinenan kilaen kiena yumãena e amiu, naga pe malum re nena ga, ana naga kilia yumãae amio kiena mñareraena make ga.

⁴ Pogos naña añear naga mare e laki torovia, tepisu naña tasnena pimi malumu nenaga, ana pogos naña sumãlu e marena mali sina, naga pule ruru nenaga e mñareraena kiena ne Ntewa. Ana imimi mña memalumu sane naga, ana pogos naña mekila kiena yumãena naiila amiuena, mesumã memiyumãae ke memio mñareraena naña Ntewa tamãan pan imimi.

⁵ Sineun mña nevisawal nesape nevisu sane amiu asumã amlipere inu manene laa, ana sanape narui, tañatete naña amiu ga akilia aliñere amiu re sina, sane kiamiu viawaena sumã mñarera ke ga wa pona sanape? Avisu ruru amiu, sane asumã apisu kilale ke sane Yesu Kristo sumã miyumãae ke e kiamiu malena wa, pona peraga? A visae peraga, pona lañasa asike nena e malena naña Suñe pe su re nena e poli, a pe ape nalelagaena re naña pe lelaga poli.

⁶ A visae pogos tai visae sinemiun avisuveve mña kiamimi malena, naga pogaga, ana sineun manene pañisi sane yoko avisu kilale naña Suñe sumã miyumãae ke e kiamimi malena ana pe mekila pal re kana nin kinakinas tai poli.

⁷ A mesumã memlen ke pa Ntewa vena yumãae e kiamiu malena vena amiu mña ve akila pal re suri tai. Visae ave sanene, yoko kilia kila mña kiamimi kia wo, komin imimi ke narui mepian amiu, ana pe memlenwo amiu re poli komin ga kiamimi kia. Visae yar lala avisu sane memiyumãae piowa sanape, nanene na pogaga, ana kiamimi pupia sitomena, sinemimin naña asumã akilalue ga mesmes silaga.

⁸ A imimi mña ga, sinemimin naña kiamimi yumãena make ga mesmes ga e visena lelaga kiena Suñe, ve sinemimin re si kilaen sur tai naña welua si kiena visena lelaga vito tano.

⁹ Mesumã memiyumãae kiena ke ga, a visae pogos tai kila imimi meim memalumu, mekekaran ga, komin naña mekilia mesape pogos naña meim memalumu, ana amiu aim añarera. Mesumã memlotun ke ga na nene, sane yoko asumã aimi awo manene silaga.

¹⁰ Sitomena ne nanene kila nesiri mñaki nene pimãasu pan amiu nagane e pogos naña nesike perinan amiu wa. Sineun nesape alogearia, a visae akila, yoko pogos naña neimãasu tañatete nevis mñarera van amiu. Suñe mligan amiu e lumãau vena nevisuar amiu, pe nakila kare amiu en re poli, ana nakila amiuena ava metava. A visae neimãasu nevisu ve sanape, yoko

monar nekila m̃arera van amiu e ga e ya naṗa mesmesun nekila.

Pol pisa pokolemalo pan la

¹¹ Erau lala, nepim e kiau visena maro narui, nevisa ga pokolemalo van amiu. Awis, akilali naṗa akila ruru kiamiu mrapa mesmesu. Alogear ruru suri la naṗa nepiun tan amiu. Amiu punu ga atañan ga aviranar amiu e sitomena wo tai. Asururu ga e ṗelaga namalumenena, ana yoko Ntewa na sinesiena a na suṃarena sike amio amiu.

¹² Pogos naṗa asuṃa avitawe amiu, atalopan ruru amiu, aviran pipimiu e kekarena wa.

¹³ Nalelagaena wa lala nae e nini apisa m̃ena kiela pokolemalo pan amiu.

¹⁴ Ana kiau leniena nesape yoko lemamiena kiena kieta Suṗe Yesu Kristo, amio sinesiena kiena ne Ntewa, amio ṗaṗagena kiena Ninuna Wa, asike amio ita make ga.

Inu na, Pol.

Maki Naña Pol Siria Pa Pan Li Nalelagaena Wa Lala Nae Garu KALESIA Visayuena Na Tusi Nene

Komþasnen suniena plas na tusi nini

Kalesia naga lepas keviu tai naña mēke vatanon Parin Suþe nae Rom, a mēke e purvanua naña nagane kiena kia Teki.

E pogos naña nalogena kiena Yesu la asiaria vena ava alologon kiena lologena wo, yaru la naña pe ape lus nae re Israel poli lala akekaran lologena wo nene paþisi.

Ana yaru laþasa asumãaga, naña e kiela sitomiena lala, asape visae yaru tai sine-nan sape naga imi ve yaru lelaga nalelagaena kiena ne Yesu, naga monar taveve ke navisaluaena marua lala naña sumo na Ntewa mila pa Mosis. Ana Pol pis mārera kawē sitomiena nene, pisawoia sape þelaga nene pe mesmesu re nenaga. Naga pisawal merarava sape visae yaru naña sinenan tolen maliena e Kristo, purþesnen suri nene na sanene, naga monar lelaga ga e Kristo. E ga e þelaga nene, yaru makega akilia aimi amesmesu e marana Ntewa.

Ana e sumãare lala e pulkumali lala nae lepas nae Kalesia, yaru laþasa apimi akawe Pol e visena lala, apian linalelagaena lala asape visae yaru tai sine-nan sape imi mesmesu e marana Ntewa, naga monor taveve ke navisaluaena lala kiena Mosis.

Maki nini, Pol siria pan la naña asumãa ataveve ke vianena nene naña pe po re poli, vena urela awasuþe si aimi e lelagaena na lelaga, a e þelaga la naña mesmesu. E kiena maki, naga siar visena, pisawal sape naga kilia vis vanla sanen-komin naga puarar yumãena sane nalologena kiena Yesu Kristo, a li na lelagaena lala e yo pinuga apisukilia naga sanene. Naga pisa mãaga sape pe yaru la re apisa pania asape imi ve nalologena tai poli, ana Ntewa ke naña pisirlua naga

narui, pio naga vena visawalen lologena wo va yaru la naña pe ape lus nae re Israel poli. A naga pisa luwega visena na kawēna vianena viowa la nene, naga sape lelagaena kiena yaru ga kilia kila yaru mesmesu e marana Ntewa. E maran tusi maro na maki nini, Pol kila meraravan sape þelaga wo naña li nalelagaena la asumãa akila, molue kome þelaga naña yaru sinensi wenlai a vinena, komin nanene nauī naga þelaga po na malien kiena ne la naña amlelaga e Kristo.

Komþasnen tusi la na nini

Visena nasumo 1:1-10

Namāreraena sike e Pol komin naga pe nalologena tai 1:11—2:21

Ntewa sumã miila ita e kiena lemamiēna 3:1—4:31

Li nalelagaena la apimi po, ana kiela yumãena sumãaga 5:1—6:10

Visena maro 6:11-18

Pol siar kiena visena pan la

¹⁻² Inu Pol nesiri maki nini piãasu pan amiu, amiu þegas nen li nalelagaen lala garu laþas nae Kalesia, a inu nemio kieta wolai lala nae e yo nini, imimi mepiun tan amiu mesape sanape amiu asumãa pogaga pona amiu asike sanape? Inu nena nini naña Yesu Kristo, amio Ntewa Arimata, naña naga pisirlua sina ga Yesu e marena, lalua ne na nene lalua amligan inu nepe yaru nalologena, ana in na sanene, pe yaru re naña pio inu poli, a pe yaru re mēna ga naña naga mligan lua inu sanene poli. Ee, amiu na monar ayagogon ya naña nevisawalia.

³ Inu sineun nesape Ntewa Arimata amio Suþe Yesu Kristo, lalua amligan lemamiēna amio sumãare sike e amiu.

⁴ Yesu Kristo, naga kila mesmesu sa naña Ntewa Arimata naga sinenania, naña naga tañan naga mare vena war plan kieta mlamulena viowa lala, vena kilia werelua ita e mlamulena viowa naña tesike ea.

⁵ Vanon sur ne na nene, þisi na ita teyeluar manene kia kiena ne Ntewa nene va metava silaga, vano vano taþatete þisi. Sanene.

Lologena Wo, taaga ga

⁶ Inu nemilan amiu paḡisi, naḡa Ntewa naga pio amiu rui, a Kristo kila po pan amiu paḡisi rui, ana pe e re ga e pogos nene poli ana amiu asuḡa aḡure ke sina ga petan Ntewa, naḡa amiu asuḡa ataveve ke sina ga visena tai naḡa sane lologena wo taḡena tai.

⁷ Ana taḡatete si lologena wo taḡena tai ve sanene, komin naḡa lologena wo taaga ga nene naḡa sike na. Inu nemloge apisa sanini, vanon naḡa yar laḡas naḡa akila ke sinemiu la pilovilopuia, naḡa la sinelan avilopu lologena wo kiena ne Kristo imi ve taḡena.

⁸ Ana visae imimi yaru tai, pona navisi nae peni tai, pona a re ḡena ga, naḡa naga lologon nalologena wo tai, naḡa pe toroki re amio naḡa imimi mepisawal pan amiu sumo rui, ve sanene popon manene naḡa yaru nene akoven vitove e lele na logeen viowa.

⁹ Ee, in na nevisawal ke sina ga nene, van amiu narui, nesape visae yaru ai naḡa pisawal visena na lologena wo taḡena tai pan amiu sumo rui, naḡa pe taḡenan lologena wo nene naḡa amiu amla ḡisi rui, ana ḡisi na yaru nene naga monar ala nakoena viowa vania e kapi.

¹⁰ In na nekilia nesape yaru laḡasia apisa kare inu yam mok rui, apisape in na sineun ga nesape yaru lala aloge wo e kiau visena lala, ana amiu amloge kiau visena ḡarera nene sanape? Pona yoko yaru laḡasia sinela kar inu yo, ana pogaga, komin naḡa ya ne in na sineunia, in na sineun ga nesape Ntewa, naga kekaran kiau visena, komin naḡa visae in nemlologon ga vena yaru la aieluar inu, ve sanene in na pe nepe yar lelaga na yuḡaena kiena ne re si Kristo poli narui.

Pol pisayu naḡa Ntewa pio naga

¹¹ Wolai lala amio vineu lala, popon nevisa meraravan van amiu, sane, lologena wo nene naḡa nepisawal ke ne, naga pe visena re tai naḡa yar la asiar poli.

¹² In na pe nemla re lologena wo nene tan yaru tai poli ana pe yar re tai naḡa

pian inu e poli, peraga. Ana Yesu Kristo naga ga kipian ruru inu e lologena wo nene merarava.

¹³ Nanene na sa naḡa amiu amloge rui, naḡa kiau namalena nanua sumo na sanape, e pogos naḡa in na nesike loyuḡa e lotuena kiamimi imimi le Yu lala. E pogos nene, inu silaga sineu kari luen ga ḡegas nen nalelagaena lala kiena ne Yesu, ana nemene la nekila kare la naḡa pe nesitom la re nena poli, komin naḡa sineun nesape nalelagaena la ne sanene na monar toko ga.

¹⁴ E pogos nene, netaveve ruru ḡelaga na lotuena kiamimi imimi le Yu lala, taulu yaru taḡena lala naḡa imimi na sane teras taaga, a inu nepuarar visena marua lala kiena ne repimimi la ḡarera, naḡa kiamimi apua le Yu lala naḡa asuḡa ataveve pimi tol nanagane.

¹⁵ In na nekila ke sanene pano pano-o, ana inu pe nekilia re naḡa nesape Ntewa naga pisaar inu ḡisi rui, e pogos naḡa in na pe nepaeme re poli wa. Ana e ga e kiena lemamiena, naga pio inu vena neve kiena, a e kiena sitomena wo,

¹⁶ naga kila narina ḡalivin inu vena nevisu kilale naga, vena nevano nelologon Yesu nene van la naḡa pe ape Yu re poli. E pogos nene, ana pe nepa re nepisu yaru taḡena la ḡas poli vena nela nakiliaena laḡas tan la e lepas na lologena wo nene,

¹⁷ a pe nepa re ḡena ma Yerusalem poli vena nevisu nalogena la naḡa la ape nalogena sumon inu vena neviun tan la nevisave “ḡPisi na nelologon ya ne, pona nevisawal visena ve sanape?” Peraga, pe nepa nepiun re sanene poli, komin naḡa Kristo naga kila make sur la nene merarava pan inu ḡisi rui. E pogos nene in na nemligan la vilaga, nepa perina paḡisi e purvanua naḡa Arepia, a siraunia neḡasuḡe ke sina ga nepimi, nepa yalensilau ga nepa garu e pulkumali naḡa Tamaskas.

¹⁸ Siraun naḡa kas telu ḡarovia, ana e pogos ga nene narui in na nepa si ma Yerusalem. Nepa ma Yerusalem nepa

nakaten Pita, ana pe nesu re nemio naga piavi poli, ana nesuṁa nemio tol ga legiena lualima taaga pa lima.

¹⁹ A e pogos nene, in na pe nepisu re ṁena nalologena taṁena laṁas poli, ana nepisu ga kiela nasumonena naga taaga, naṁa Semes naṁa naga wenla kieta Suṁe.

²⁰ Naga nene narui, ya naṁa nepisa ke pan amiu, naga lelaga pe nepisokan re nene poli, Suṁe kilia ṁaga.

²¹ Sanene narui, inu nesike ma Yerusalem pe piavi re nena poli, a siraun nene, inu nepa nemial vivia lepas lua nene naṁa Seria amio Silisia,

²² kila sanene narui e pogos nene, nalelagaena lala nae ma e lepas taṁena naṁa Yutea, amio kana pulkumali keviu nena naṁa Yerusalem, la nene pe akilia ruru inu re poli wa.

²³ La amloge ga ya naṁa yaru la asuṁa apisa ke, naṁa apisape, "Yaru nene nanua sumo naga ṁene kare ita paṁisi, naga suṁa kilali naṁa kila kare kieta nalelagaena, ana nanagane naga suṁa mlologon ke ṁarera e kieta nalelagaena nene paṁisi."

²⁴ A komin suri ne nanene, la asuṁa amieluar Ntewa keviu naṁa naga pilon kiau ṁalena sanene. Ana la asuṁa apisirilua kia kiena ne Suṁe vanon inu.

2

Nalologena taṁena lala apiran ruru amio Pol

¹⁻² Siraun kas lualima taaga pa vari ṁarovia, ana Ntewa pisa pan inu sape monar neva si ma Yerusalem. Nemloge Suṁe pis sanene narui, ana imimi lua Panaṁas, imimi lua mepavini, a nepure ṁena Taetas pimi taveve imimi lua. Metol ma Yerusalem, ana metotano e viorena tai, memio nasumonena lala na suṁare naṁa la ga apimi loyuṁa ea. E viorena nene, nepisawal visena lala naṁa inu nemlologon ke pan yaru la naṁa pe ape le Yu re la poli. Inu nepisayu ruru sur punu ga naṁa nekila pan la, komin naṁa pe sineun re nesape yoko la asitom avisave in na pe nemiyuṁae mesmes re poli, ana pe pon re avisa kare kiau yuṁaena imi

tol pogos nini poli, ana kila sane kiau yuṁaen nanene imi ve sur korena ke sina ga.

³ Sumo in na noṁape pona ṁisi na la aṁareran van inu, vena nevisa nevisave yar la naṁa pe ape le Yu re poli la ṁena ga monar ave ṁaviu. ?Ana viorena nene pisa sur ya? E lepas na kiau erau nene Taetas, naga pe nae re Yu poli, naga yaru nae Kris tai, naṁa naga pe pe ṁaviu re poli, ana la pe apirurua re naga asape naga monar ve ṁaviu poli.

⁴ Ana e viorena, yaru laṁas naṁa sinelan asape Taetas naga monar ve ṁaviu, ana nepisu yaru la nene sa naṁa la apisa apisape ape kieta wolai lala, ana la apisokan ga. La nene la apimi vinau ga loyuṁa e viorena vanon la sinelan ga visu imimiena, naṁa imimi mepian ke mesape imimi mepimi mepe taaga memio Yesu Kristo rui, ana ṁelaga marua la nene pe piar imimi re si poli ana imimi moṁisin rui. Ana la nene pe akekaran re nena kiamimi visena nene po, la sinelan asape akila navisaluaena la nene na lotuena kiena ne le Yu lala monar aviar punu ita ṁaga.

⁵ Ana imimi pe metañan re naṁa la ato metavan imimi poli, vanon naṁa imimi mesitom paṁisi naṁa mouarar ruru visena na lelagaena na lologena wo nene, vena ṁisi na amiu atol ruruia.

⁶ Ana e viorena la ṁasia naṁa yeririna la apisape ape kiela nasumonena la asuṁa, ana inu pe nesitom re nesape la ape yerkawa pona la pe ape yerkawa re poli, nanene na pe pe sur re tai nene poli, vanon Ntewa naga sitom korena ga kia la ne sanene. Ana nasumonena ne la nanene, pe la apian inu re e sur viu tai poli vena nelologonia.

⁷⁻⁸ Peraga, pe sa re nene poli. La apisu kilale ga asape Ntewa, naga e kiena puriukawa, naga mligan inu nepe yaru nalologena tai, vena inu nevisawal lologena wo van la naṁa la pe ape le Yu re poli, sa naṁa e kiena puriukawa ṁena ga, naga mliganar Pita ṁisi rui, vena naga ve nalologena tai vena naga ṁena ga visawal nalologena wo va le Yu lala.

⁹ Ana Semes amio Pita a Yoane, naṁa

yeririna lala la apisa apisape la telu nene la ape kiela nasumonena, la telu nene la apisu kilale naþa Ntewa naga mligan yumãena wo nene e lumãau e kiena lemamiena. Ana la telu nene la apim atalopan imimi lua Panaþas, sa naþa imimi mepe þegas taaga memio la, ana imimi punu ga metamania vena imimi mevion yumãena lala, sa naþa sane imimi lua meva melologon e yo kiena ne yar la naþa la pe ape Yu re poli, a lala na yoko la alologon e yo kiena ne le Yu lala.

¹⁰ A la nene amla ga visena taaga ga pan imimi, asape imimi lua monar mesitoñal kiela yar la naþa pe kiela sur re poli, vena meiila la, ana nanene, naga sur tai naþa e pogos nene in na nekekararan þisi rui vena neyumaen ve sanene.

Pol pis m̃arera pa Pita vena visaluþar naga

¹¹ Siraun na nene, inu nepito ke sina ga nesike garo e pulkumali nene Antiok, ana pogos naþa Pita m̃alivin imimi e yo nene, nesumãalu e marana ne nalelagaena lala, nepisalup̃aria, vanon naþa merarava ruru nena po naþa ya ne naga kila, ana pe mesmesu re poli.

¹² Nanua sumo, Pita kila mesmes ga naþa naga sumo kinana ke ga amio kieta wolai lala naþa la pe ape le Yu re poli, ana siraunia, Semes mligan kiena yeririna la þasia apim gar Yerusalem, ana la apis pa Pita, apisa apisape “La naþa pe ape le Yu re poli, la m̃ena ga monar ave þaviu, ana visae peraga, Ntewa naga taþatete tamalia la.” Visena nene naga pe taveve re nena ya naþa viorena keviu naga pisa þesan poli, ana kila kare sitomena kiena ne Pita kila naga marau, ana naga pe kekararan re si su lele taaga amio nalelagaena la nene naþa la pe ape þaviu re poli.

¹³ A pe Pita re ga naga taaga poli, ana kieta wolai m̃ena la nae e yo nene, naþa la ape le Yu, pimi tol m̃ena ga Panaþas, la nene ataveve m̃ena Pita e sitomena na marauena nene.

¹⁴ Ana pogos naþa nepisu la nene asuñã amial ke e mrapa tai naþa pe

mesmesu re amio ya naþa lologena wo pisa poli, inu nepis m̃arera pa Pita e marala, ne pisa sanini nepisape “Pita, lelaga kemua naþa ko ope le Yu tai, ana po paþisi ana ko osuñã naþa nanua sumo rui, naþa okekararan m̃ena ga þelaga kiena ne yar taþena la rui, naþa ko okinana ga lele taaga amio la þisi rui. ?Ana sanapen nanagane narui, naþa ko osape om̃araran ke sina ga la nene naþa la pe ape le Yu re poli opisape la monar ataveve kieta þelaga ita le Yu lala, naþa opisape la m̃ena ga la monar ave þaviu ve sa ke ga ita?”

Yaru ai naþa piawa e Yesu, Ntewa tamalia naga

¹⁵ A e pogos nene, in na nepisa ruru pan la sanene nepisape, “Ita punu ga na, ita tepe lus kemua kiena ne le Yu lala. Ita na pe tepe yaru taþena re la poli, sane la naþa le Yu la moki asitom asape ape kororaki ga.”

¹⁶ Peraga, ita tepe le Yu kemua lelaga, ana nanagane, ita tekilia rui, sa naþa yaru taþatete mesmesu amio Ntewa, vanon naþa naga sumã taveve ruru ke ga navisaluaena kiena ne Mosis. Yaru ga naþa naga mlelaga e Yesu Kristo, naga ga kilia mesmesu amio Ntewa. Sitomena nena nene narui kila ita le Yu lala ita m̃ena ga monar telelaga ga e Yesu vena ita m̃ena ga temesmesu temio Ntewa. Ana amiu monar akilia ruru visena nene naþa Visena Wa kiena ne Ntewa pisa, naþa pisa pisape pe yaru re tai naþa naga kilia mesmesu amio Ntewa poli vanon naþa naga sumã taveve ruru ke navisaluaena nene.

¹⁷ Ana ita le Yu lala, ita tesitom ke tesape temesmesu temio Ntewa narui, ana pe sa re nene poli. Ana visave lelaga kemua naþa ita tepe le Yu m̃ena ga, ita monar telelaga ga e Yesu Kristo vena ita temesmesu temio Ntewa, in na nesitom nesape pona yaru laþasia amloge piowagan visena nene, pona la apisali naþa apisape visena nene kila sane ita le Yu lala ita tepimi tepe yaru lala na mlamulena viowa maran taaga ga temio la naþa pe ape le Yu re poli. Ana pona

akilali m̄ena ga naḡa apisape ve sanene, nanene naga kana kinasia sane Kristo ke nene narui naga kila ita le Yu lala ita tepimi tepe yaru na mlamulena viowa ga. Ana peraga, pe sa re nena nene poli.

¹⁸ Nanene vanon nanua sumo, in na nesum̄a nekilaroro ke ḡelaga marua lala navisaluaena nene rui, ana visae naganene nevisirlua ke sina ga ḡelaga na taveveen navisaluaena nene, naḡa nesape ita monar teve ḡaviu a ita monar tekila ve sanene vena ita temesmesu temio Ntewa, naga nene kila sane nanua sumo in m̄ena ga nepe yar na kilaroen navisaluaena narui.

¹⁹ Lelaga, Navisaluaena nene naga sine-nan pisape kila inu nemare, vanon naḡa nekilaroro ke navisaluaena lala. Ana nanagane Navisaluaena nene naga sa ga sur mare ga tai e inu, inu neḡisin naga rui. Nemligan Navisaluaena nene rui, vena kiau malena su ga e Ntewa narui. Sa naḡa asuar inu e laki torovia nemio Yesu, nemare nemio naga,

²⁰ a nanagane sa ga naḡa pe in re si naḡa nemal ke ne poli, ana Kristo na mal ke e inu. A kiau malena nanagane, naga komin naḡa nepiawa ke e Narina Ntewa, naḡa naga sitom inu paḡisi, naga tam̄an kiena malena, naga mare wo inu.

²¹ E ḡelaga nene, tepisu naḡa lemamiēna kiena ne Ntewa keviu paḡisi, ana in na taḡatete naḡa nekila kiena lemamiēna imi ve sur korena tai, komin naḡa visae yar tai kilia mesmesu kemua amio Ntewa vanon taveve navisaluaena, nanene sane Kristo mare kemua na pe suri korena ga.

3

Le Kalesia lala akilalu mrapa

¹ In na nepisu amiu le Kalesia lala sa ga naḡa ḡarimiu pe wowe pa rui. ḡPona yaru laḡasia akila male e amiu yo, ana nane amiu apa akila pal mrapa sanene? Inu nepisawal ruru merarava e maramiu ḡisi rui, sanape naḡa Yesu Kristo mare e laki torovia, a nanagane narui amiu apano ape taḡena narui.

3:6 Rom 4:3 3:7 Rom 4:16

² In na sineun nesape neviun navi-unena tai van amiu sumo wa. Naviunena ne sanini, sape “ḡAmiu nene, naḡa amla Ninuna Wa nanua sumo rui, Ntewa mla pan amiu vanon ya? ḡAmiu amlavia komin naḡa amiu amlogear navisaluaena la nene kiena ne Mosis?” Peraga, amiu amlavia komin naḡa amloge nalologena wo, ana asum̄a amlelaga ea.

³ Sumo, amiu asiar malena viu amio Kristo e nam̄areraena na Ninuna ne Ntewa, a nanagane asitom asape aḡisin ga e kiamiu nam̄areraena ga? !Taḡatete ve sanene, peraga! !Amiu asum̄a apa ape wowe la narui!

⁴⁻⁵ E kiamiu namalena viu nene, suri wo la moki naḡa pimi m̄alivi e amiu rui, sa naḡa Ntewa naga mla ke kiena ninuna pan amiu, a naga sum̄a kila ke kile lala e maramiu, ana sanape, pona amiu na pe apisu kilale re poli yo wa sa naḡa sur la nene apimi e amiu komin ya. Amiu monar akilia ruru sa naḡa Ntewa naga kila ke sanene, pe komin re naḡa amiu amlogear ke navisaluaena nene poli, ana komin naḡa amiu amloge ga lologena wo, ana amiu amlelaga ea.

ḡYa ne po? Navisaluaena, pona navi-awaena e Kristo?

⁶ Amiu asitom li yermarua Epraam, naḡa Visena Wa kiena ne Ntewa pisayu naga, pisape

“Vanon naga piawa e Ntewa, ana kila naga mesmesu amio Ntewa.” **Nas 15:6**

⁷ Ana yaru taḡena la naḡa apimi sirau naḡa la aḡasine Ntewa sanene, la ape lus kiena ne yermarua Epraam kemua la lelaga.

⁸ Ita tekilia tevisu e Visena Wa naḡa lologena wo nene naḡa ita tesum̄a temlelaga ke e nanagane, Ntewa naga pisawal nanua sumo sumo la rui, pogos naḡa pisa pa Epraam pisa pisape

“E ko ḡisi na Suḡe kilia visa ruru lus kiena ne yeririna lala na yomarava nini.”

Taveve visena nene, Visena Wa kiena ne Ntewa pisaar m̄ena ga rui pisape ḡisi na Ntewa kilia kila yaru lala naḡa pe ape le Yu re poli a mesmesu amio naga, visave apiawa e naga.

⁹ Ana la naña la apiawa ke e naga sanene, ana kana kinasa sa naña Ntewa naga pisa ruru la ke nanagane, sa naña naga pisa ruru Epraam sumo, komin naña naga piawa e Ntewa.

¹⁰ Ana la naña asitom ke asape yoko akilia atol malena komin naña la asumã akilali ke naña alogear navisaluaena lala, la nene la asike vatanon naliþereen tai rui, komin naña pe yaru re tai naña mlogear make navisaluaena la nene poli, a Visena Wa kiena ne Ntewa pisa pisape, *“Yaru la naña la pe amlogear re sur la punu ga naña asike e tusi navisaluaena poli, la monar atol nakoena.”*

¹¹ Sanene narui ana merarava ruru pan ita naña yaru taþatete imi mesmesu amio Ntewa komin naña naga logear ga navisaluaena nene ana sa naña Visena Wa kiena ne Ntewa naga pisa naña pisa pisape

“Yaru naña naga mesmesu amio Ntewa komin naña naga piawa e Ntewa, naga ga kilia mali.”

¹² Visena ne na nene naga pisayu þelaga naviawaena, a ita tekilia tevisu naña þelaga kiena ne naviawaena nene amio þelaga na nalogearena e navisaluaena, lalua pe maran taaga re nenaga. Nanene komin naña þelaga na logearena Navisaluaena, naga sumãlu se lepas na suri la punu ga naña yaru ga kilia kila sa naña visena wa pisa, naña pisape yaru ga naña kila punu sur la naña navisaluaena pisa, naga kilia tol malena ea.

¹³ Ana komin naña ita na pe yaru re tai naña naga kila punu sur la naña navisaluaena nene pisa poli, ana Navisaluaena nene naga pisaar nakoena amio marena pan ita punu ga. Ana Kristo naga pitomi narui, þurelua ita e naliþereena nene, tamãan naga kus leleta, ana naga pa sike vatanon naliþereena nene, naga nene na sa naña Visena Wa pisa, naña pisape

“Yaru naña apiar naga atelania mon metava e purlaki, vena mare komin naña naga sike vatanon e naliþereena kiena ne Ntewa.”

¹⁴ Kristo tamãan naga sanene, vena la naña pe ape le Yu re poli, la mnea ga akilia atol navisa ruruena la nene naña Ntewa naga pisaar pan Epraam, ana suri nena nene kila sane nanagane ita naña teþiawa m̃arera e Kristo, ita tekilia tela Ninuna Wa nene naña Ntewa pisaaria pisape la van yeririna lala.

Navisaarena pimi sumo, Navisaluaena naga pimi sirau

¹⁵ Wolai lala a vineu lala. Yoko nevisa suniena tai e ga e kieta malena naña kana kinasa pa lavisin ga navisaarena nene kiena ne Ntewa naña pa Epraam. Visae yaru tai visawal maron kiena visena, visave pogos naña nemare, yoko kiau sur lala naga monar ve sa nene ve sa nene, ana naga siriari kiena navisaarena nene sike e m̃aki tai, ana pogos naña visave naga kovio, la taþatete avilopu kiena navisaarena nene.

¹⁶ Pogaga, ana sanene, Ntewa kila kiena navisaarena pa Epraam, a e kiena lusia. Ana e visen nene pe pisa re pisape Ntewa naga kila kiena visaarena e *“Lus kiena ne Epraam la poli,”* naña kana kinasa sane yeririna moki, naga pisa sanini, pisape *“E kiena lus tai,”* naña naga pisa sane yaru taaga ga, a yaru nane, naga Kristo.

¹⁷ Kiau visena e lepas nene kana kinas sanini nanua sumo Ntewa naga pranaria amio Epraam, a Ntewa pisaar pisape uarar kiena naviranarena lalua nene m̃arera. Ana siraunia kas ponotia vari lualima yam telu þarovia þisi rui, ana navisaluaena kiena ne Mosis pimi m̃alivi ana navisaluaena nene naga taþatete kilaro naviranarena nene naña sike pa rui, taþatete si kilia yumulua naviranarena kiena ne Ntewa.

¹⁸ Ana visae ita tekilia tetol navisa ruruena lala kiena ne Ntewa komin naña ita tesumã tetaveve ke ga Navisaluaena nene, naña naga pe sur tai naña pimi ga sirau, nanene naga kana kinasa sa naña navisaarena kiena ne Ntewa nene naña su la nanua sumo rui, naga pimi korena ga. Ana ita tepisu naña Epraam naga tol navisa ruruena lala kiena ne Ntewa nene, komin ga naña naga þuarar ruru

navisaarena kiena ne Ntewa, pe komin re Navisaluaena poli, komin e kiena pogosia, Navisaluaena pe pimi m̄alivi re poli wa.

Navisaluaena naga kiena yum̄aena sum̄a ga

¹⁹ Poga, ana pona kana naviunena toña ga, naña pisa pisape “?Ve sanene, Ntewa mligan Navisaluaena kiena ne Mosis nene pe na ya pona komin ya?” Pogaga, nevisa van amiu narui, sanini, Supe naga mligan ke sina ga Navisaluaena nene to metavan kiena naviranarena, vena iila ita yeririna lala tekilia tevisu kilale kieta mlamulena viowa lala. Ntewa mligan navisaluaena nene vena sum̄alu su m̄aga, vano vano tol pogos naña yar nene naña pe lus kiena ne Epraam, naña Ntewa pisaar pan imimi pimi m̄alivin ita.

Ana ita tepisu naña Navisaluaena naga kiena yum̄aena wo tanea toña ga. Ana ita monar tesitom̄alia sane Navisaluaena nene, pogos naña pimi m̄alivi, kom p̄esan puna ne navisi kiena ne Ntewa lala, siraunia amla pan yaru tai, naña Mosis, ana naga mla pimi mla pan yeririna lala. Ana pogos naña Ntewa naga kila naviranarena nene amio Epraam, nanene na pe sa re nene poli.

²⁰ Ana pogos naña lalua nene apiran ruru ke kiela visena lele taaga, ana pe navisi re poli pona yaru tañena naña sum̄a likan lalua vena la visena, ana Ntewa naga ga taaga naga pisawal kiena navisaarena nene mesmesu e marana ne Epraam.

²¹ A nanene naga pe sa re naña asape Navisaluaena nene kilali naña kalwo navisaarena kiena ne Supe poli, peraga. Komin naña visae Supe naga kilia la si navisaluaena tañena naña visae ita telogear make ga ana kilia kila ita temali, pona naga mligan navisaluaena nene pimi yo rui vena ita tekilia temesmesu temio naga.

²² Ana pe sur tai sa re sanene poli, komin naña Visena Wa pisa p̄isi rui pisape ita punu ga tesike vatanon nam̄areraena na mlamulena viowa, ita tesum̄a tekilaro ke ga navisaluaena lala. Ana navisa

ruruena naña Ntewa pisaar pisape yoko ligan imi, la akilia aimi la am̄alivi e ita komin ga naña ita tepiawa ke e Yesu Kristo.

Pogos na wasineen Kristo pimi m̄alivi rui

²³ Sumo rui, pimi tol nanagane tekilia tepiawa e Kristo, navisaluaena kiena ne Mosis nene piar ita m̄arera pa p̄isi, sa ga naña tesike e yum̄a na koena rui.

²⁴ Navisaluaena nene, naga sane pisuar ita, sa ga kieta navianena tai, pimi tol pogos naña Kristo pimi, vena e pogos nene, ita tekilia teviawa e naga narui ana tekilia temesmesu temio Ntewa.

²⁵ Ana nanagane, Navisaluaena nene tañatete si kilia visuar ita, komin naña pogos na viawaena e Kristo naga pimi m̄alivi p̄isi rui.

Amiu punu ga ave taaga e Kristo narui

²⁶ Ana komin naña amiu apiawa e Kristo Yesu, ana amiu punu ga amio Kristo ape narina ne Ntewa.

²⁷ Akee amiu p̄isi rui, ana amiu apimi ape taaga amio naga, sa naña amiu akus p̄elaga wo kiena ne Kristo lala e amiu, sa naña amiu amien kulsota lala e yepemiu.

²⁸ Nanagane amiu punu ga apimi ape taaga ga e Kristo Yesu, suri ne na nene narui, amiu punu ga atorok ga. Popon ita monar ve teliñere re si yaru lala, tevisave nanene pe Yu, a nanene pe yaru nae ga lele tañena, pona tevisave nanene pe yerkaawa, a nene naga pe yar nayum̄aena ga, pona sane nanene pe yerm̄ene, ana nanene naga pe sira ga. Ana p̄elaga nene monar ve to re si e amiu.

²⁹ A komin naña amiu ape kiena ne Kristo sanene, amiu ke la nanene narui amiu ape lus kiena ne Epraam kemua lelaga, a ve sanene, navisa ruruena lala naña Ntewa naga pisaaria pa lus lala kiena ne Epraam, p̄isi na amiu ke narui amiu akusia.

4

Ita tepe narina ne Ntewa

¹ Ana p̄isi na nevisa re laa e kieta p̄elaga nene sane vena nevisa ruru laa

merarava sane e lepas nen Navisaluaena nene. Visae yaru tai, ana naga mare, p̄isi na narina naga kus kiena suri lala. Ana visave nisisi nene vitokaki ke ga wa, p̄isi na naga taṗatete kilia visuar sur la nene. Naga sa ga yaru na yum̄aena kiena ne ariman ga,

² naṗa p̄isi na naga monar sum̄a ga vatano e liman yaru taṗena ga lala, sane arimana taṗena la nene, vano vano tol mesmesun nena pogos naṗa arimana naga pisawal sumo rui, pisape naga kilia uarar sur la nene e pog nene.

³ E m̄ena ga e ita sanene, naṗa sumo, ita na sa ga nisisi, naṗa ita kieta sitomena lala sike ga vatano e yermare lala na sumo na yomarava nini.

⁴ Ana pimi tol ruru kana pogos nena, Ntewa naga mligan narina pimi, naṗa sira tai naga p̄aria, paeme e yomarava nini, naṗa naga paeme vatano e Navisaluaena kiena ne le Yu lala.

⁵ Naga paeme vatanon Navisaluaena nene, kapur ea, vena naga kilia wereplan imimi la naṗa la asike vatano e Navisaluaena nene rui, vena Ntewa kuslua ita, teimi teve narina lala.

⁶ Ana nanagane, sa naṗa ita tepim tepe narina lala, naga mligan Ninuna kiena ne narina pimi e losineta lala, naṗa kila ita tekilia tevio Ntewa, tevisave "Ata Ata."

⁷ Komin sur ne nanene, amiu na pe sa re si yar na yum̄aena ga la poli, ana amiu na ape narin Ntewa kemua lelaga, naṗa p̄isi na naga la suri wo van amiu sa naṗa naga pisaar pa narina lala pisape p̄isi na la akusia.

Pol sinena mie le Kalesia lala

⁸ Nanua sumo, pogos naṗa amiu pe akilia re Ntewa poli wa, amiu asike ga vatanon nam̄areraena kiena ne yermare la nene naṗa pe ape Ntewa re nenaga,

⁹ ana nanagane, amiu akilia Ntewa p̄isi rui, pona popon nevisa nevisave nanagane, Ntewa kilia amiu rui. Ana inu sineun nesape neviun tan amiu, nesape komin ya ne amiu sinemiun awasuṗe sina ga ava puna ne yermare la nene nanua sumo, naṗa la pe am̄arera re poli,

a naṗa la taṗatete akilia akila wo van amiu pogos tai? ?Vanon ya ne amiu sinemiun asape asu ke sina ga vatanon kiela nam̄areraena?

¹⁰ ?Sanape na amiu asum̄a asitom̄al ke legiena wa lala kiena ne la nene, a kiela kupario wa lala, a kiela pogos wa lala, a kiela kas wa sanene? Asitom asape p̄isi na Suṗe kekaran amiu vanonia?

¹¹ !Aulai, akila inu nemaraun amiu paṗisi! !Pona nemiyum̄ae m̄arera pan amiu paṗisi ana nepisu sane pe sur korena ga!

¹²⁻¹³ Wolai lala a vineu lala, nanua sumo kam na pe asu re vatanon navisaluaena poli, ana pogos naṗa nepim nesike nemio amiu, in na nekila inu m̄ena ga nesa ga amiu. Ana nanagane, nemloge asape amiu sinemiun asape awasuṗe si ava e ṗelaga na navisaluaena nene, a vanon sur ne nanene nepiun m̄areran tan amiu vena amiu na aimi ve sa ga in narui, naṗa in na pe nesu re si vatanon Navisaluaena nene poli. Amiu asitom̄ali pogos naṗa in na nemlologo pan amiu sumo, naṗa kiau maiena ga kila narui nom̄al pulmas naṗa nesike nemio amiu, ana pe sur korena ga naṗa nemai e pogos nene, ana amiu na pe akila re nemloge piowa poli.

¹⁴ Peraga, ana kiau maiena nene kila kare amiu keviu wa, ana amiu pe amloge re piowa e inu poli, a pe asitom re m̄ena piowa e inu poli, peraga. Amiu aṗure inu nepa e m̄amiu yum̄a lala, sa naṗa visave in na neve navisi kiena ne Suṗe tai, pona sa ga in na Yesu Kristo lelaga.

¹⁵ Sumo, amiu akekaran inu paṗisi, naṗa nepisu sa naṗa visave amiu akilia akila, pona amiu akekaran naṗa aurelua kilamaramiu vena aligan te kilamarau, vena iila inu. ?Ana sanape nanagane narui?

¹⁶ Pona nenagane, kiau visena lelaga la nene, akila inu nepimi sane kiamiu erau viowa sina. ?Ana ya ne sanene?

¹⁷ Yaru taṗena la nene naṗa nemloge apisape la asike amio amiu nanagane, ana la nene asuṗa apilonvilon ke lologena wo kiena ne Kristo, la apimi asum̄a veraga amio amiu vena ave erau wo amio amiu,

vena akila amiu asu vatanon la, ana nanene la akila kotalia amiu ga ne. Komin naþa la sinelan asape aure lua amiu ga veþan inu.

¹⁸ Ana pe nepisa re nesape vena in ga taaga ga nekilia nesuþña nemio amiu poli, vena in ga taaga teve erau wo, komin naþa þelaga nene naþa na erau wo amio yaru taþena, naga wo silaga, ana popon sane nakilaen ga yuþñaena wo lala.

¹⁹ Naruu lala, inu na sane sira tai naþa mēþena mlaea vena war sisi, sa naþa nesuþña nemloge piowa paþisi vanon amiu, nesuþña nemiyuþñae mārera pan amiu paþisi vena amiu ala Kristo amio kiena þelaga wo lala e kiamiu malena.

²⁰ Aulai, visae nesuþña nemio amiu nanagane, nanene na kila inu neloge wo paþisi. Visae ve sanene, þisi na nekilia nevilon li laa kiau visena vito tano sane, ana nanagane naþa nesike perinan amiu sanene, inu pe nekilia re si po la rui sane aña sanapen amiu narui.

Suniena kiena Eka amio Serai

²¹ Amiu laþas naþa sinelan asape ita na monar telogear kieta Navisaluaena vena ita ve sa ke Ntewa, inu sineun nesape la avisatame kiau naviunena tai, sape “? Navisaluaena naþa apisayuia, la asuþña amloge kilale ke ya naþa Navisaluaena nene pisa pona pe apisu kilale re poli?”

²² Visena wa nene pisayu ke yermarua Epraam nene, naþa naga narina na yermene lua, naþa tai, sira naþa miyuþñae kiena ne wona naþa Eka naga þaria, a narin taþena tai naga wona ruru napo naþa Sera naga þar maronia.

²³ Naga naþa paeme sirau, kiena kia Aisak, naga paeme komin naþa Ntewa pisaaria, a naþa naga paeme sumo, kiena kia Ismael, naþa sira na yuþñaena nene naga þaria, naga paeme ga sa ga nene.

²⁴⁻²⁵ Ana ita tekilia tela suniena nene sa naþa þakaiwa tai, naþa sira la lua nene, lalua na sa naþa naviranarena lua naþa Ntewa naga kila. Sira naþa Eka naga sa ga naviranarena naþa Ntewa kila e tavie keviu nae Sinae, nanene na e purvanua naþa Arepia, yo ne nanene naþa Ntewa mla Navisaluaena nene pa Mosis ea. Eka

nene, naga pe sira na yuþñaena ga tai, a narina mēna ga lala la ape yaru na yuþñaena ke mēna ga lala. Sanene, Eka mēna ga naga na sa mēna ga pulkumali keviu naþa Yerusalem, naþa kana yaru ne lala apuarar Navisaluaena lala mārera, ana la sa naþa ape yaru na yuþñaena ke mēna ga, komin naþa la asike vatanon navisaluaena nene narui.

²⁶ Ana sira taþena nene, naþa Sera, pe yaru re tai naþa þuarar e yuþñaena poli, naga ga, a naga nene naga sane Yerusalem taþena nene, naþa pe Yerusalem nae ma e peni. A narina ne Sera lala, la mēna ga la pe yaru re tai naþa þuarar la vena ayuþñae poli ana la mēna ga asuþña ga sanene, kila sane Sera nene sane aneta naþa ita tepiawa e Kristo.

²⁷ Visena Wa pisayu li m̃a sur la nene naþa pisa pisape,

“Sira nene, ko naþa sumo na ko ope lum̃alum̃a ga,

naþa mopoma pe mlaeli re pogos tai poli vena waren sisi,

nanagane ko omloge po, ko okekara ko omiau,

komin naþa wom̃a na yermene mligan ko rui ana nanagane naruþña lala apimi ape moki la narui, ataulu la naþa sira naþa wona suþña amio naga silaga naga þar la.” Ais 54:1

²⁸ Visena nene naga sa naþa Ntewa naga pisaaria pisape yoko narina la ve moki, na ve moki a amiu kiau wolai lala a vineu lala, ita ke ga na ita tepe narina ne navisaarena kiena ne Ntewa nene narui, sa ke ga naþa kiena navisaarena nanua sumo naþa kila Sera þar narina naþa Aisak.

²⁹ Ana pogos naþa Aisak paeme sumo, sisi taþena nene naþa Ismael naga paeme sa ga nene, naga suþña mēne nisisi nene naþa Aisak naþa naga paeme e yuþñaena na Ninuna Wa kiena ne Ntewa. Ana pimi tol nanagane, tepisu þelaga sa ke ga nene na wa.

³⁰ ?Ana Visena Wa pisa sanape? Naga pisape Ntewa pisi pa Epraam, pisa pisape “Ko monar okuwanlua sira naþa naga pe sira na yuþñaena ga nene amio narina, komin naþa narina nene, naga pe torokin

re si naþa la sur tai e kionþa sur la poli. Sur la punu ga monar va ga e limana narina naþa sira naþa naga ga naþa womþa naapo.”

³¹ Poga, erau lala, Ntewa pisa sanini, a inu nevisa van amiu nagane nesape ita nini, ita pe tesa re narina ne sira naþa na yumþaena poli, naþa ita tesike vatano e Navisaluaena kiena ne Mosis, ana peraga, ita na sane tepe narina ne sira naþa naga sumþa ga sanene, sa naþa sane ita na temlelaga ga e Yesu. A sur la naþa Ntewa naga pisaar pa narina na lelaga lala, þisi na ita ke ga na yokorena tokus narui.

5

Yesu pure plan pa nalelagaena la rui

¹ Pogosa naþa Kristo þurelua ita, naga kila sanene vena tomolue, naþa ita tomolue lue, ana vena ita ve towasuþe ita re si teva tesumþa vatanon Navisaluaena kiena ne Mosis nene poli. Ve sanene, monar aviawa mþarera, vena ve amþareran amiu re si sa naþa amiu na sa ga yaru na yumþaen lala, naþa Navisaluaena nene piar manene ruru amiu ke sina ga.

² Amiu na ayagogo ruru e visena nene naþa inu Pol nesumþa nepisa ke pan amiu. Visae amiu atamþan la amþareran amiu avisave amiu ave þaviu, þisi na yumþaena nene naþa Kristo naga kila þisi rui taþatete iila amiu.

³ Ee, nepisa ke sina ga visena mþarera nene pan amiu, nepisape visae yaru naþa tamþan naga ve þaviu, naga ga sumþa mligan ke sina ga naga sike vatano e Navisaluaena nene. A yaru naþa sike vatanon Navisaluaena sanene, naga monar visuar ruru naga naþa naga logear sur punu ga naþa Navisaluaena nene naga pisa, visae peraga, yoko naga tol nakoena.

⁴ Amiu la þasia nene naþa asumþa akilali naþa alogear Navisaluaena nene rui, vena amesmesu amio Ntewa vanonia, amiu la nene asumþa ate plan amiu ke e Yesu rui, amiu apilon mþasimiu rui e lemamiena kiena ne Ntewa.

⁵ Ana ita na, ita tesumþa sinetan manene tesape þisi na Suþe kila ita temesmesu

ruru temio naga, komin ga naþa ita tepiaawa ga e naga, a pogosa naþa ita tesumþate ke ga wa, Ninuna Wa naga sumþa miila ita temlelaga mþarera, tesape þisi na Suþe naga monar kila sanene van ita.

⁶ Pogosa naþa ita tepimi tepe taaga temio Kristo Yesu sanene pe sur korena ga naþa yaru naga pe þaviu pona pe pe þaviu re poli, ana sur keviu na e lepas nene nane kieta naviawaena e Kristo naþa naviawaena nene naga kila ita tesitom Suþe, a ita tesitom mþena ga yeririna taþena lala.

⁷⁻⁸ Sumo na nepisu amiu akiriri na po paþisi wa, ana nanagane, pe sa re si nene poli. Suþe naga pio amiu sumo þisi rui, ana sineun neviun nevisave yeririna ai nene naþa naga suwo amiu sina ga, naga kila amiu pe amlelaga re si e visena lelaga poli? !Pe Ntewa re nena poli!

⁹ Navianena viowa nene naþa kila kare kiamiu sitomena naga sa naþa visena pisa pisape “Narin korme ga, ana naga kilia kila kare kilamþiu la melkalka vaþisi.”

¹⁰ Ana sa naþa amiu amio inu, ita tepimi tepe taaga e Ntewa, nesumþa nemlelaga mþarera ke e amiu na wa sa naþa þisi na ita kieta sitomena ve taaga, sa naþa ita ve tomþareran re si li na lelagaena lala naþa la pe ape Yu re poli tevisave la monar ave þaviu. A nemlelaga mþena ga mþarera ke ga wa nesape yeririna nene naþa sumþa kila kare amiu ke sanene pe sur korena ga naþa naga pe yeririna ya, þisi na Suþe naga la nakoena vania.

¹¹ Puruvi lala a vineu lala. Visena laþasia pisa ke pisape inu mþena ga nesumþa nemlologon ke ga wa nesape li nalelagaena mþena ga lala monar ave þaviu vena Ntewa kilia tamalia la, ana visena nene pe pe lelaga re poli. Visae nelologon ve sanene þisi na yeririna la nene naþa asike amio amiu akekarin in ga. Ana amiu apisu ke ne, la asumþa sinela karin ke na wa, komin naþa kiau navisawalena e laki torovia naga sumþa yumulua kiela sitomena lala.

¹² Inu na nesitom ke nesape yar la nene naþa la asumþa apilovilopu amiu ke

sanene, akila ke sinemiu kurkur naþa la sinelan manene asape monar ave þaviu, popon ala playu ana asila ke sina ga, akila kare rurula ke sina ga.

¹³ Ana amiu naþa kiau erau lala, lelaga paþisi naþa Suþe pure lua amiu rui, amiu pe asu re si vatano e Navisaluaena kiena ne Mosis la nene poli. Ana maramþe amiu, avisuar ruru amiu, ve asitom re avisave, "Pogaga nene narui, in na nomolue e navisaluaena nene rui, inu ga taaga narui. Pisi na nekilia nekila sur punu ga naþa kiau sitomena sinenan narui." Amiu ve avisa re sanene, ana þisi na kiamiu sitomen wo naga monar kila amiu akekaran naþa aiila yeririna taþena.

¹⁴ Pelaga na sanene naga taveve ruru visena tai naþa Navisaluaena naga pisa, naþa naga kalo ruru visena taþena lala e Navisaluaena nene, naþa pisa pisape, "Ko ositom nalavis puþa lala, akila wo van la, ve sa ke naþa ko ositom ko mþaga."

¹⁵ Ana visae amiu ave sa suri mali tetan lala, naþa amiu ga agorua amiu, ana amiu ga asuþa akarkare amiu sanene, ana monar avisuar ruru amiu, þisi na þelaga nene naga kila kare punu amiu ke sina ga.

Pelaga kiena ne Ninuna Wa amio þelaga kiena ne yeririna

¹⁶ Inu sineun nesape nevisa visena nene van amiu. Amiu nene na Ninuna Wa naga monar sumon amiu, amiu na ve ataveve re si kiamiu þelaga marua naþa apaeme amio.

¹⁷ Vanon þelaga nene naþa ita tepaeme temio, naga pe sinenan re þelaga kiena ne Ninuna Wa poli, a þelaga kiena ne Ninuna Wa naga pe kekaran re þelaga nene naþa ita tepaeme temio poli. Suri nene naga sa naþa þelaga la lua nene sane la lua ape nasinekar la ga, ana sur ne na nene narui, visae Ninuna Wa suþa sumon amiu, taþatete si amiu akilia akila ga ya naþa kiamiu sitomena sinenania.

¹⁸ Ana amiu monar ve sinemiu þesan re mþena ga naþa visae Ninuna Wa naga suþa sumon amiu, ana amiu ve asu re si vatano e Navisaluaena nene narui.

¹⁹ Yumþaena la na þelaga nene naþa yeririna lala la apaeme amio naga merarava ruru ga. Yumþaena la nene la ne nanene narui sa naþa nataþaen lau, a sur la naþa namawaena, a þelaga namname ga lala,

²⁰ amio nalotunen nono lala, amio nawarena kimi. Amio mþena ga, nagoru-alaena lala, namaraena lala, navielueena lala, nasinekarena lala, napuluvisena lala, naliliþereena lala, nakaween yaru lala,

²¹ a nasinesuniena lala, amio namunen wii keviu, a namþaagena viowa lala, amio mþena sur taþena la sanene. Ana nevisawal sina ga van amiu, sa naþa nepisawal pan amiu sumo rui, nesape amiu avisuaria vanon yaru naþa suþa kila ke þelaga la sa nene, þisi na naga taþatete su e nasuþenena kien Suþe pogos tai.

²² Ana mras naþa Ninuna Wa kila pitovi e malena kiena ne yeririna naga sane: nasitomiena, a nakekarena, a nasuþareena, a namalumena, a nasinewoena, a nawoena, a nayepemþaena,

²³ a navatanoena, a nawanaren sine. Pelaga la nene na po paþisi, a pe visena navisaluaena re tai naþa pisa luþar amiu pisape amiu ve akila re si suri la nene.

²⁴ Ana þelaga naþa ita tepaeme temio, amio kiena nasinenanena viowa la nene, ita tesuaria e laki torovia þisi rui. Nanene, ita naþa tepe kiena Kristo Yesu, ita temligan sur la nene þisi rui.

²⁵ Ana komin naþa ita temali e Ninuna Wa, popon ita teyali mþena ga e kiena þelaga wo lala.

²⁶ Pe pon re towarwar ita poli, pona ita ga tekilaweke ke sina ga naþa sineta mimi, pona ita ga tesuþa tepieluen ita ke sina ga.

6

Amiu punu ga monar aiila amiu

¹ Kiau wolai lala a vineu lala, visae amiu yar tai naga loru e mlamulena viowa, popon amiu naþa Ninuna ne Ntewa teke e amiu, amiu monar aiila naga vena akila ruru ke sina ga naga. Ana amiu

monar avis malumu ga vania, sa naþa amiu sinemiu miye naga, a amiu monar avisuar ruru amiu mēna ga, vena sur naþa amiu akila ruru yaru taþena nene vanonia ve imi kila li amiu re mēna ga.

² Amiu na monar aiila amiu ve sa nene narui vena akuspae ga naurmiena kiena ne amiu taþena lala. Ve sanene sane amiu asumā amlogear ke ya naþa navisaluaena kiena Kristo naga pisa ke narui.

³ Ana taþatete si avilave van amiu, sa naþa yaru tai sumā sitom ke naga pisape “In na yar tai nini.” Visae ve sanene yaru nene naga sumā pisa kotalia ke sina ga naga ne, komin naþa naga pe pisu kilia re sape naga pe pe yaru re tai nene poli.

⁴⁻⁵ Ana amiu punu ga monar amiu veve taaga avisu veve ruruli kiamiu yuṁaena lala naþa akila. Visae sanene, yaru tai taþatete kilali visu veveli sa naþa kiena yuṁaena po taulu yar taþena lala, ana naga monar visu veve kiena yuṁaena naga taaga. A visae kiena yuṁaena nene po, naga kilia kekara narui, komin kiena yuṁaena wo nene. Komin naþa yaru punu ga pe maran taaga re poli, la kiela naurmiena taþena lala peve taaga naþa la akus ke e kiela malena lala.

⁶ Amiu naþa asumā apian amiu ke e visena nalelagaena, pogos naþa visae amiu alual narin sur tai popon amiu avion van amiu amio kiamiu navianena lala.

⁷ Amiu avisuaria, ve avisa kotalia amiu re sina ga. Ko taþatete otoroun Ntewa. Kurus nen ya naþa omapila e kioṁa lokove, naga kana mras ke naþa þisi na ko ga okan narui.

⁸ Yar naþa mapila þelaga naþa naga paeme amio, yoko naga sane kurus nen sur tai e kiena malena, þisi na naga war mras viowa lala e þelaga nene, naþa marena napiowa ga, ana visae naga mapila þelaga kiena Ninuna Wa e kiena malena, þisi na Ninuna Wa naga la kinnanena marua lala naþa po vania, naþa naga pe malena naþa ve uro re.

⁹ Ana þisi na ita tekilia towar kinnanena wo lala e ruru e kana pogos naþa marua, visave ita ve teligan re yuṁaena. Ve

sanene, ita na monar ve sineta maren re naþa tekila þelaga wo lala,

¹⁰ ana ita na monar sineta wo va yaru lala silaga, a monar sineta wo va laa sane va la naþa ita tepe mratava taaga temio la e Kristo.

Visena maro kiena ne Pol

¹¹ Poga, þisi na inu nesiri maron kiau visena la nene e ga e luṁau, nane amiu akilia avisu kana mras nen visena lala kerkeviu sanene.

¹² Inu sineun nesape nevisa sanini, la naþa sinelan asape aṁareran amiu ave þaviu, nanene naga sa naþa la sinelan ga vilaveena komin sur la naþa na kulus nen yaru ga. Ana la sinelan asape akila sanene komin sur taaga ga, naþa la sinela asape la akilia aligan nalologonena na laki torovia kiena ne Kristo naþa kilia tamalia ita. Visena nene la yepel mavinia komin naþa la amaraun asape saþisi la asumā alologon lologena wo na marena kiena ne Yesu naga mesmesu ve sa nene, þisi na yar taþena laþasia aṁene la.

¹³ A la nene naþa la sinelan asape amiu monar ave þaviu, la sinelan mēna ga ve sanene vena þisi na la akilia awarwar lan avisave la ataulu amiu þisi rui, naþa la amligan amiu apito si vatano e Navisaluaena kiena ne le Yu lala. Ana amiu na avisu ruruia, komin naþa la mēna nene la pe asumā amlogear re si sur la punu naþa Navisaluaena nene pisa poli.

¹⁴ Ana e inu, pe sur re tai naþa sineun nesape nowarwar inu e poli, ana e ga e laki torovia kiena ne kieta Suþe Yesu Kristo, in na neþarwar inu ea, komin kiena marena nene kila þelaga lala na yomarava nini la apimi sane sur mare ga e inu, a kila inu mēna ga nepimi sa ga yar mare ga tai e þelaga lala nataþaliena na yomarava nini.

¹⁵ Naþa yar tai imi mesmesu amio Ntewa, ana pe sur korena ga naþa yar nene naga pe þaviu pona pe pe þaviu re poli, ana visae Ntewa naga siṁ ke sina ga yar nene imi ve yar viu sumo wa, ana þisi na yar nene kilia imi mesmesu amio naga.

¹⁶ A naga narui in na nelen wo la naþa þisi na alogear visena la nene, naþa þisi

na aimi ave le Israel kemua lelaga lala kiena ne Ntewa, nesape sumãarena kiena ne Ntewa a kiena nasineyeena sike amio la.

¹⁷ Kiau visena naga loka ga nene. Ana in na pe sineun re si naþa þisi na yar tai kila ke sina viowa van inu sanene poli, komin naþa nesumãa noþar ke piakapila kiena ne Kristo e tasneu rui, sa naþa la akove inu a la amẽ inu.

¹⁸ Wolai lala a vineu lala, nemlen nesape þisi na nasineyeena kiena ne kieta Suþe Yesu Kristo naga sike amio ninumiu la punu ga,
Sanene.

Maki Naþa Pol Siria Pa Pan Li Nalelagaen Wa Lala Nae Garu EPISAS Visayuena Na Tusi Nene

Komþasnen suniena plas na tusi nini

Purþesnen sitomiena naþa Pol pisayuia e maki nini naþa naga siria pan li nalelagaena lala garu Episas, nanini visena tai naþa siria teke marana na keviu taaga na vetokaki lualima [1:10], naþa pisayu na maplarena keviu kiena Ntewa. Pisape Ntewa sinenan sape suri la naþa naga kila, yoko aimi aviranar la lele taaga. Naga sinenan sape suri nae mae peni a nae yomarava yoko asikolia ga amio Kristo, naþa naga pe þarin suri makega. Pupia maplarena kiena Ntewa nene, naga miliganaria sape ve kiena yaru makega na yo punuga aimi aviranar la e þegas ve taaga ga e yomarava nini. Visae alelaga e Yesu Kristo, akilia akila sanene, a naga pisa ruru pa yeririna lala kiena Ntewa vena asiar naþa akila meraravan maplarena nene e kiela maliena.

E komþasnen maki þesa nini, Pol pisayu mrapa naþa Ntewa arimata miyuþae ea vena kilaen yeririna makega aimi ave taaga. Naga pisayu þelaga naþa Ntewa mligan lua kiena yaru lala, a pisayu naþa e Yesu Kristo narina Ntewa, Ntewa piyewo la, a þar plan kiela milamulena viowa ea, kila apimi amesmesu apo. A pisayu mēna naþa Ntewa mila Ninuna Wa pan kiena yeririna lala, vena kila meraravanen naþa yoko naga la sur la van la, sanaþa naga pisaar sape yoko kila. E komþasnen maki na lua, Pol pisa pan la naþa yoko aulo maki nini, sape la monar akila meraravan naþa ave taaga amio Kristo, e þelaga naþa akilia asikol la ruru amio li nalelagaena taþena lala.

Pol pis pan la e þakaiwa lala, vena kila meraravanen þelaga naþa yeririna kiena Ntewa lala asuþa asikol ruru la ke amio Kristo. Naga pisape suþare naga

sane tas tai, naþa Kristo naga pe þarunia, pona sane yuþa tai, naþa Kristo naga pe kemraþe keyowo po na mrapun yuþa nena, pona sane sira tai naþa Kristo naga pe woþa.

Ntewa sinen sii manene yeririna na yomarava la paþisi, a yaru la apisu kilia sinesiena nene pim kome Kristo. Pupia sinesiena nene kiena Ntewa miyuri sitomiena kiena Pol, ana naga pisawal kiena lelagaena e Kristo e maki nini. Maki nini kila meraravan þelaga kiena Kristo naþa sinen sii ita paþisi, mare vena ulplan ita, viyewo ita, suþa iila ita e kiena lemamiena, a kila ita temesmesu ruru nena ga e marana Ntewa.

Komþasnen tusi la na nini

Visena þesa 1:1-2

Kristo a kiena suþare 1:3—3:21

Malena viu e Kristo 4:1—6:20

Visena maro 6:21-24

Pol siar kiena visena pan la

¹ Inu Pol, naþa Ntewa ga naga mligan inu vena neve yaru nalologonen Lologena Wo kiena ne Kristo Yesu, inu nesiri luþaki nini piþasu pan amiu, amiu li nalelagaena lala nae pupia pulkumali naþa Episas, naþa amiu apiawa mārera e Kristo Yesu.

² Inu nemlenwo amiu ke nesape þisi na lemamiena a suþarena kiena ne Ntewa Arimata a amio mēna ga kiena ne Yesu Kristo kieta Suþe, suþa amio amiu.

Ntewa naga visa ruru ita e Kristo

³ Popon naþa ita teyeluar Ntewa, naþa naga Ntewa kiena ne kieta Suþe, Yesu Kristo, a naga pe Arimana mēna ga, vanon naþa ita, naþa tepe taaga temio Kristo, ana Ntewa naga kila po paþisi pan ita e navisa ruruena wo lala nae ma metava.

⁴ Nanene naga sa naþa pogos naþa yomarava nini naga pere wa, ana Ntewa naga pisaar ita þisi rui vena ita teve taaga temio Kristo, vena ita teve kiena, a vena kieta malena ikik ruru wo e marana, naþa pe kororaki re e poli.

⁵ Nanua sumo laa rui, kome pupia kiena sitomena, ana Ntewa naga mliganar ita vena kuslua ita sane narina lala, kome Yesu Kristo. Suri nene, Ntewa naga kila sane mesmesun e ya naþa naga pisu sape po, a naga kekaran mēna ga paþisi naþa naga kila.

⁶ !Teyeluar Ntewa vanon kiena pupia lemamiēna nene a vanon mēna ga nalakorenanena wo nene naþa naga mla korenan ga pan ita, naþa pimi kome narina naþa naga sitom paþisi!

⁷ Tana ne narina nene mlau, ana vanon suri nena nene, ita naþa tepe taaga temio Kristo nene, Ntewa naga pure plan ita, naþa naga piēwo kieta mlamulena viowa lala. !Lelaga þa, lemamiēna kiena ne Ntewa e ita keviu manene paþisi, naga pa re laa na wa!

⁸ Ntewa naga pe manmarua paþisi wa, a naga pisu kilale make suria,

⁹ ana naga kekaran naþa tañan ita tekilia kiena sitomena tai naþa naga sane navisawanena tai pan ita sumo. Naga kila sitomena nene pimi merarava ruru e ita narui, a kiena sitomena nene, nayuñāenen suri wo la ve moki imi mñalivi ga e Kristo.

¹⁰ E sitomena nene narui na, Ntewa naga sikol ruru suri punu ga va lele taaga, naþa naga sii la sike ma e peni, a e mēna ga e yomarava nini, la aimi lele taaga vatanon Kristo, ana Ntewa naga yuñāen ruru make suri punu ga torokin kiena sitomena nene, vano vano kilamake ruru ga e kana pog nena naapo.

¹¹ Ana þisi na suri punu ga monar imi mñalivi mesmesun nena ga naþa Ntewa naga sitom ruru ke pisape kila. Ana vena taveve kiena sitomena nene nanua sumo, naga pisaar imimi le Israel lala vena imimi meve kiena, naþa imimi meve taaga memio Kristo.

¹² Imimi ne nanini, Ntewa naga mliganar imimi vena imimi naþa memligan þesan kiamimi sitomena mñarera e Kristo, a visae sanene, popon imimi monar meieluar Ntewa silaga, komin naga po paþisi.

¹³ Ana amiu yeririna taþena mēna ga lala, naþa pe ape le Yu re la poli, amiu amloge visena lelaga nene þisi rui, nanene Lologena Wo naþa amiu atol kiamiu natalimaliaena e naga, a amiu amlelaga e Kristo þisi rui, ana amiu apimi ape yeririna kiena ne Ntewa þisi rui. A vanon naþa amiu na ape kiena, Ntewa naga mligan kana kile na suri nene tai e amiu, naþa naga mla Ninuna Wa pan amiu, sa naþa naga pisaaria.

¹⁴ A Ninuna Wa nene, naga sane komsusen navisaarena na sumo kiena ne Ntewa e ita, vena ita tekilia ruru tesape metavan Ninuna nene, þisi na ita tokus lalimana punu ga ve kieta, nanene na e pogos naþa Ntewa naga wereplan yeririna lala ava puna, nanene na la ga naþa naga pul plan la þisi rui ana la ape kiena. !Ita teyeluar Ntewa, pe mias naga po paþisi!

Leniena Kiena ne Pol

¹⁵⁻¹⁶ Komin suri ne la nanene, silaga e kiau leniena lala, nesuñā nesitoñā amiu luen ga, a nepisa luen ga potena pan Ntewa vanon amiu. Pelaga nene, nesiar e pogos naþa nemloge naþa amiu apiawa mñarera ke e Yesu, kieta Suþe, a naþa asitom manene mēna ga nalelagaena wa taþena lala, ana pimi tol nanagane, nesuñā nemlen ke sanene.

¹⁷ Sila ga naþa nesuñā ga nemlen ke pa Ntewa, naþa naga pe Ntewa kiena ne Yesu Kristo kieta Suþe, a naþa naga pe Arimata naþa pe naurarena keviu, nesuñā nepiun ke tania vena naga ligan Ninuna na manmaruaena naþa Ninuna na kipianena van amiu, vena akilia Ntewa va ve keviu laa sane.

¹⁸ A nesuñā nepiun ke tania vena naga vike kiamiu sitomena lala, vena avisu kilale kiena yomerarava, vena akilia suri nene naþa Ntewa naga pio amiu vanonia, a naþa kiamiu sitomena monar mñarera vena atol suri nena. Suri la nene, naga lalimana la nene naþa pe kiamiu, sa naþa suri wo la moki naþa Ntewa naga kila ruru sike na, naga pe kiena ne nalelagaena wa lala.

¹⁹ A amio m̄ena ga naga, monar avisu kilalea a monar akilia ruru pupia nam̄areraena kiena ne Ntewa, nāpa naga sūma miyūmae ke e kieta malena lala, nāpa ita temlelaga e naga.

²⁰ Nanene naga nam̄areraena keviu ke ga nene nāpa Ntewa naga miyūmae ea e pogos nāpa naga pisirlua Kristo sūmalu mali sina ga e marena, ana nāpa siraunia, naga p̄ere naga pa mligan naga teke tano e kiena lepas marua ma e peni.

²¹ Nam̄areraena nene, naga pa laa metavan m̄areraena tāpena lala, amio m̄ena ga suri m̄arera tāpena lala, amio yerkawa tāpena lala, amio nasumonena tāpena lala nae ma e peni. Kia kiena ne Kristo naga mon manene laa metavan make kia tāpena lala, pe e re ga e yomarava nini poli, ana e m̄ena ga e yomarava tāpena nene nāpa yoko imi.

²² Ntewa naga mligan suri la punu ga asike vatano e lana ne Kristo rui, a naga mligan lua Kristo pa e kiena sūmare wa, ana naga pe p̄arin suri la punu ga.

²³ A kiena sūmare wa nene, naga sane tasnena ne Kristo, nāpa naga pule ruru e Kristo, a nāpa Kristo ga rui naga pule ruru e suri punu ga e yo punu ga.

2

Nanagane ita temal e Kristo

¹ Nanua sumo, ana sa ga nāpa amiu amare ga, vanon naviowaena lala, a kiamiu mlamulena viowa lala,

² nāpa e pogos nene, amiu amial ga e p̄elaga viowa na yomarava nini. A nanua sumo, ataveve ga sūpe nene na nam̄areraena na yo yau lala, amlogear ga naga narui, nāpa naga ninuna nene nāpa naga sūma kila ke kiena yūmaena e la nāpa pe amlogear re Ntewa poli.

³ Ana nanua sumo, imimi le Israel m̄ena ga lala, imimi na maran taaga ga memio yeririna tāpena lala, nāpa imimi mesūma memialoro metaveve ga nasinenanena na p̄elaga viowa kiena ne yeririna lala. Imimi m̄ena ga mesūma mekila ke ga suri la nāpa kiamimi sitomena la sinemiminia, a suri la nāpa imimi memloge po ea. Komin

suri la nene, imimi na sa ga yeririna tāpena ga la nene, nāpa p̄isi na Ntewa naga sinena kar imimi m̄ena ga, tāpatete kila si suri tai van imimi narui, vano vano p̄isi na naga monar la nakoena van imimi.

⁴ Ana Ntewa, kiena sineyeena a kiena nasitomienna naga keviu pāpisi e ita,

⁵ ana pogos nāpa sane ita na temare p̄isi rui vanon kieta mlamulena viowa lala, ana naga kila ita temali temio Kristo. Nanene na lelaga, Ntewa naga tamalia ita kom ga e kiena lemamienna.

⁶ Ana sa nāpa ita na temali temio Kristo, Ntewa pisirlua ita temio m̄ena ga naga, ana Ntewa naga mligan ita teto tano temio m̄ena ga naga e yo nametava.

⁷ Ntewa naga kila sanene vena e pogos la nāpa apimi ke ne, p̄isi na yeririna lala, la akilia avisu kilale sane kiena lemamienna nene naga keviu manene pāpisi, nāpa naga sitom ita sanene kome Kristo Yesu.

⁸ Ntewa naga tamalia amiu e ga e kiena lemamienna, vanon nāpa apiawa e naga. Suri nene naga pe pimi m̄alivi re e kiamiu yūmaena wo lāpas poli, peraga, Ntewa naga mla korenan ga pan amiu.

⁹ Ana nanene naga pe suri re tai nāpa yaru kilia yūmae vanon poli, komin visae ve sanene, p̄isi na towarwar itan vāpisi, tevis vilavenia, tevisave “O inu, in ga netamalia in e kiau yūmaena.”

¹⁰ Ita na sane suri wo tai nāpa Ntewa miyūmaen ruru po pāpisi, nāpa naga sii ita tepimi tepe yaru viu lala e Kristo Yesu, a Ntewa naga kila sanene vena ita tekila m̄ena ga yūmaena wo lala, nāpa naga mligan ruru sumo rui, vena ita teyūmaenia e kieta malena lala.

Ita na teve taaga e Kristo

¹¹ Amiu na monar asitom̄ali pogos nāpa apaeme, ana amiu na pe ape yeririna kiena ne Ntewa re poli sane le Yu lala, amiu na ape yaru tāpena ga lala. Komin suri ne nanene, le Yu lala, la asitom ke asape la ape yaru wa, komin nāpa la apuarar manene p̄aviu m̄arera, ana la apisa kare amiu apisa “Kulpaona” pan

amiu. Ana þaviu nene naga pe suri korena ga na vanua ga e tas nen yermene ne.

¹² Ana komin nanua sumo, amiu na sa ke nene narui. Amiu ve sinemiu þesan re naþa nanua sumo, amiu asike laa koperinan Kristo paþisi, amiu na asike vanuan þegas nen le Israel lala, amiu na ape wolawa ga, naþa amiu na taþatete akilia atol suri la naþa Ntewa naga pisaar pan kiena yeririna lala. Ana amiu naþa asike e yomarava nini, amiu na peraga ape suri korena ga narui, a amiu na pe akilia re nena Ntewa poli.

¹³ Ana amiu, naþa nanua sumo asike laa perina, nanagane amiu apimi lavisi rui komin tana ne Kristo, nanagane narui amiu na ape taaga amio naga.

¹⁴ Kristo naga pe kieta suñarena, ana naga kila kieta þegas lua nene apimi ape taaga. Nanua sumo, imimi le Yu lala memio amiu yeririna taþena lala, naþa ita sineta kar ita mñaga silaga, sa ga naþa pupia kove tai mliþere ita, ana Kristo naga mñe plan suri nene e kiena marena.

¹⁵ Naga pialuþar navisaluaena kiena ne le Yu lala, amio kana narin visena ne lala, a naga kila sanene naþa kila kieta þegas lua nene lalua aimi ave yaru taaga e naga, sane lalua aimi ave suri viu tai. Visae ve sanene narui, Kristo naga kila suñarena van ita.

¹⁶ E kiena marena e laki torovia, naga kilalua sinemimiena e ita, naga kila kieta þegas lua nene apimi ape yeririna taaga, ana naga pure ita sina ga toþasuþe si puna ne Ntewa, naga kila ita tepe mara wo temio naga.

¹⁷ Pogaga, e þelaga nene narui, Kristo naga pimi, pisawal lologena wo na suñarena nene pa yeririna la punu ga, nanene na amiu naþa pe ape le Yu re poli, naþa amiu asike laa perinan Ntewa, amio imimi mñena ga le Yu lala naþa imimi na mesike lavisin þisi rui.

¹⁸ Ana komin suri ne la nanene naþa Kristo naga kila rui, nanagane ita punu ga kieta mrapa taaga e Ninuna taaga, naþa teimi e marana ne Arimata.

¹⁹ Ve sanene, ana amiu na pe ape wolawa la re si poli narui, a amiu na pe ape yaru re si naþa pe kiela yo re poli, peraga. Nanagane, amiu na sa ga yeririna na yo kiena ne Ntewa, amio li nalelagaena wa taþena lala, a amiu asike loyuma e mñana mratava.

²⁰ Amiu na sane kemraþe lala na yuma tai, naþa li nalologena lala amio li navi-sawalena lala, la sane kemraþe na mrapun yuma lala. E yuma nene, Yesu Kristo naga sane kemraþe wo naþa pe keyowo mñeke lika,

²¹ naþa naga suma þuarar ruru ke kemraþe taþena la nene. Naga puar la, ana la asumalu mñarera, ana yuma nene naga sa naþa suma pimi pe yuma wa mñana ne Ntewa.

²² Ntewa naga miyumaen amiu ke sanene narui, vena e Kristo amiu li nalelagaena lelaga lala, amiu asma apimi ke sane yuma tai, naþa naga kilia va sulueen ga loyuma ea e Ninuna.

3

Pol kila yumaena kiena ne Suþe pan la rui

¹ Ana komin suri la nene naþa nepisa þisi rui, inu Pol, nemlen wo amiu pa Ntewa. Nanagane nesike e yuma na koena, vanon naþa nemiyumaen ke yumaena kiena ne Kristo Yesu pan la naþa pe ape le Yu re poli, sane amiu, a in na nemlen wo amiu ke na wa pa Ntewa.

² ?Pona amiu na apisu kilale mñaga naþa sane nesuma nemiyumaen ke vanon amiu sanene, pona peraga? Kiau yumaena naiila amiuena nene, Ntewa naga mla pan inu e kiena lemamiena,

³ ana naga sane kiena sitomena tai naþa sumo naga mlawania, ana siraunia naga kipian inu ea.

Ana suri nene nesiriyu þisi rui,

⁴ a visae amiu auloia, þisi na amiu atol kiau kiliaena e lepas nen sitomena nene kiena ne Ntewa, naþa nanagane suma pimi ke merarava e Kristo.

⁵ E teras nasumo lala, yeririna lala la pe akilia re suri nene poli sane nanagane,

naþa nanagane Ntewa kipian ke e li nalologena wa lala amio mēna ga kiena navisawalena lala kome Ninuna Wa.

⁶ A visena nene naþa naga pimi merarava, naga sanene narui, naþa pisa sanini pisape, yeririna taþena mēna lala, la amio le Yu lala, la ga luwoka ga la atol navisa ruruena lala kiena ne Ntewa, a naþa la sa ga ape lepas nen tasnela taaga ga, a naþa navisaarena kiena ne Ntewa lala, la ga luwoka kiela. Suri wo la nene la apimi aṁalivi komin lologena wo kiena ne Kristo Yesu.

⁷ Ana Ntewa naga kila inu nepe yaru na yuṁaena kiena ne lologena wo nene tai narui, ana yuṁaena nene naga pe nalaena wo tai naþa Ntewa naga mla pan inu, naþa kiena naṁareraena suṁa miyuṁae ke kome inu.

⁸ Inu neto manene laa tanon nalelagaena wa taþena lala, ana nekekara paþisi naþa e lemamiēna kiena ne Ntewa, naga mligan e luṁau vena nelologon kiena lologena wo van la naþa la pe ape le Yu re poli. Ve sanene narui, nesuṁa nepisawal ke pan la e suri wo kiena ne Kristo lala, naþa aulo þele ga,

⁹ a nekipian la ke mēna ga sanape naþa Ntewa naga suṁa kila ke kiena sitomena nene pimi þarpoyo. Siar e pogos naþa Ntewa naga sii suri punu ga, pimi tol pogos la naþa aþaro pa þisi rui, Ntewa naga mlawan kiena sitomena nene toṁa ga,

¹⁰ ana e kieta pogos nini narui, naga kila navisi lala amio naṁareraena lala e yo na metava ma e peni, la avisu kilale kiena namanmaruaena taþena lala, e suri la naþa naga miyuṁaenia e lotuena kiena ne Kristo.

¹¹ Suri la nene na, la torokin sitomena kiena ne Ntewa, naþa naga sitom ruru kemua sumo rui, pogos naþa yomarava nini na pere wa, ana naga kila suri la nene la apimi aṁalivi rui kome Kristo Yesu, kieta Suþe.

¹² Ana komin naþa ita tepiawa e Kristo, a komin naþa ita tepe taaga temio naga, ana ita tekilia teimi tesuṁalu e marana ne Ntewa narui, naþa kieta sitomena ve yuwawa re, a monar sineta ṁarera e naga

tevisave þisi na naga kekaran ita.

¹³ Komin suri ne nanene, nepiun ṁareran pan amiu, nepisape, awis, amiu na ve ataṁan re sinemiu la aloru pogos tai, naþa ve aloge manene re viowagan inu e pog ṁarera la nene naþa nekus ke vanon amiu e yuṁa nakoena nene, naþa la akilali inu ke paþisi. Suri la nene na, la vena iilaar amiūena vena atol naurarena kiena ne Ntewa.

Leniena kiena ne Pol

¹⁴ Sanene, komin suri ne la nane nepisa ke ne, nekinai, nemlen wo amiu pa Arimata,

¹⁵ naþa naga pe Arimata kemua lelaga, naþa ata taþena lala na mratava lala nae ma e peni amio mēna ga nae yomerava nini, la asuṁa amla ke þelaga wo a kiela kia wo lala, e ga e naga.

¹⁶ Nesuṁa nepiun ke tan Ntewa, nesape sa naþa naga kiena naurarena keviu paþisi, þisi na ligan kiena naṁareraena e losinemiu kome kiena Ninuna, vena sinemiu lala asuṁalu ṁarera asulue.

¹⁷ Inu nesuṁa nemlen ke mēna ga, nesape Kristo naga suṁa pumi silaga e losinemiu lala kome kiamiu naviawaena, a nemlen wo amiu mēna ga vena þelaga nasitomiēna imi sane purþes nen kiamiu malena lala.

¹⁸ Visae ve sanene, þisi na amiu, amio nalelagaena wa taþena lala, akilia u atorokin naþa avisu kilale pupia nasitomiēna kiena ne Kristo, sanape naþa pe lepalepasa, pona piavi, pona pa metava, pona merorol sanape.

¹⁹ Lelaga þa, kiena nasitomiēna nene naga keviu manene paþisi, ita taþatete tevisave tekilia ruru rui. Ana pe suri korena ga, nemlen ga vena þisi na amiu na akilia avisu kiena nasitomiēna nene e kiamiu malena lala, vano vano-o þelaga wo kiena ne Ntewa lala, a kiena malena wo, aule ruru e amiu.

²⁰ Ana nanagane, teyeluar Ntewa, naþa e kiena naṁareraena keviu naþa naga suṁa miyuṁae ke ea e losineta lala, naga kilia yuṁaenia taulu manene ya naþa tekilia teviun tania, pona ya naþa tekilia tesitomia.

²¹ Ana nanagane, nalotena kiena ne Ntewa wetelu miyeluar naga komin Kristo Yesu, nanagane, a e mēna ga e teras lelein lala na pogos la naḡa apimi ke ne, vano vano-o ve uro re, sanene.

4

Ita na sane tepe tasneta taaga e Kristo

¹ Sa naḡa nesike e yuḡa naloge viowaena, komin yuḡaena kiena ne ki-eta Suḡe, neḡareran amiu, nesape ki-amiu malena lala monar mesmesu ruru e ḡelaga nene naḡa Ntewa naga pio amiu vena amiu ayal ea.

² Ve sanene, amiu avatanon amiu, a amoḡau silaga. A kiamiu sitomena lala monar malum ga van amiu, naḡa ve sinemiu mimi koskos re van amiu. ḡelaga na nasitomiēna ne nanene.

³ Amiu na akilayonli naḡa auarar ruru suḡare nene naḡa naga suḡa sikol ruru amiu, ana ve sanene, akilia avisuar ruru navetaagaena naḡa Ninuna Wa naga suḡa mla ke pan amiu.

⁴ Amiu na sa ga ape tasnemiū taaga ga, a Ninuna mēna ga taaga ga sike e amiu, a e ke e ḡelaga nene ana navisaarena taaga ga, naḡa kiamiu sitomena kilia suḡalu mārera se ea, naḡa Ntewa naga pio amiu vanonia.

⁵ Ana Suḡe Yesu naga taaga ga, a kieta nalelagaena taaga ga, a nakeena mēna ga taaga ga,

⁶ a Ntewa mēna ga taaga ga naḡa sike na, naḡa naga pe Arimanane yaru punu ga, a naga pe suḡen suri punu ga, a naga miyumuāen kiena yuḡaena ḡarpoyo e yo punu ga, a naḡa naga sike e malena kiena ne yeririna punu ga.

⁷ Ana e ita punu ga peve taaga, Kristo naga mla nalaena taḡena lala e ki-eta malena lala, naḡa la apowo paḡisi, mesmesu e kiena pupia lemamiēna.

⁸ Nanene na sa naḡa Visena Wa naga pisa nanua sumo rui e Yauena Lala, naḡa pisa pisape

*“Pogos naḡa naga pa metava e yo na metava manenea,
naga ḡere kiena nasinekar lala naḡa naga taulu la rui, ataveve naga,*

a naga mla nalaena pan kiena yeririna lala.”
Yauena 68:18

⁹ ?Ana visena naḡa pisa pisape “Naga pa metava,” naga kana kinasia na ya? Kinas nen visena nene sape nanua sumo, naga pito manene laa tano rui, naḡa naga pitomi tano e yomarava nini, naga pito tano e kana ḡiliḡili merorol ne lala.

¹⁰ A yeririna nene, naḡa sumo naga pitomi tano, naga pe yaru mla ke sina ga nene naḡa sirau naga pa laa metava, metava ma e peni, ana ḡisi na, naga pa ke laa metava na wa, vena naga kilia kokonia yo la punu ga naḡa Ntewa sii la.

¹¹ A naga yaru ke ga naḡa naga mla nalaena pa kiena yeririna la narui, naḡa laḡasia, naga mligan la ape li nalologena lala, laḡasia, naga mligan la ape navi-sawalena lala, laḡasia, naga mligan la ape nayalinen Lologena Wo, a laḡasia, naga mligan la ape yaru na visuaren li nalelagaena lala, ana laḡasia, la ave navian laena mēna ga lala.

¹² Kristo naga kila sanene vena kiena li nalelagaena wa lala akilia akila kiena yuḡaena, vena ḡegas kiena ne li nalelagaena lala e yomarava nini, naḡa sane tasnena, kilia kapuru manenea, a imi mārera laa sane.

¹³ Ve sanene, ḡisi na ita punu ga tekilia teimi teve taaga ga e kieta naviawaena e Narina ne Ntewa, a ita teimi teve taaga mēna ga naḡa tevisu kilale ruru naga e kieta malena lala. Naga ke nanene narui, tekilia teimi teve sa naḡa yaru na marua, vano vano tol naḡa temarua ruru sane Kristo, naḡa ḡisi ita teimi teve yerkawa kemua lelaga sane naga.

¹⁴ Sanene, ḡisi na ita ve teve sa re si sisi, naḡa navianena taḡena kiena ne yaru na visokanena lala aure kieta sitomena lala va ve taḡena, a naḡa kiela navisa kotalia itaena lala la apilovilon ita, sa ga naḡa lagi miyu ita, pona sive suḡa kuakuankare ita tepa sane, tepa sane, peraga.

¹⁵ Ana monar towarar nalelagaena e ḡelaga nasitomiēna, a e kieta mrapa la punu ga, monar tekapuru vena teimi teve yerkawa lala e Kristo, naḡa naga pe ḡarin

þegas nen kiena nalelagaena lala.

¹⁶ A ita na sane kinakinas nen tasnena lala, a naga suña kila ke kinakinas la nene apimi ape tas taaga ga e naga, naþa kiena merpu lala la asuña asikol ruru kana kinakinas la nene van þarina. A pogos naþa kana kinakinas nen tasnena la nene, la ataveve ruru kiela yuñaena lala, a la asuña asitomila, ana tasnena nene naga kilia kapuru, kilia imi m̄arera va laa sane.

Malena viu e Kristo

¹⁷ E kia kiena ne kieta Suþe, nom̄areran amiu ke sina ga, nesape amiu na monar avisuar amiu, þisi na amiu na ve ataveve re si þelaga kiena ne la naþa pe amlelaga re e Ntewa poli. La nene, kiela sitomena lala apiowa rui, ape mias pa rui,

¹⁸ ana asike ga e yemalolo. Ana la asike manene laa perinan malena nene naþa Ntewa naga mligan ke pimi, komin naþa la þarila m̄arera paþisi sa ga kilavaru, la pe amloge kilia re suri poli.

¹⁹ Sinela lala taþatete si amawan kiela naviowaena lala, ana la atam̄an la ga e lau narui, a e þelaga na kororaki lala, naþa la asitom korenan ga.

²⁰ Ana e Kristo, pe apian amiu re ne-naga e þelaga tai ne sanene poli, peraga.

²¹ Ana la apisayu kiena suri wo la moki pan amiu þisi rui, pan amiu naþa ataveve ke naga, a la apian ruru amiu e nalelagaena la nene naþa sike e Yesu.

²² Sanene, ana amiu na monar aligan lua þelaga marua naþa apaeme amio. Pelaga nene naga suña kila ke kiamiu malena na sumo pimi piowa, a sumo, kiamiu nasinenanena viowa na þelaga la nene asuña apisa kotalia amiu, ana asuña akila kare manene kiamiu malena la keviu paþisi.

²³ Ana nanagane, sinemiu lala a kiamiu sitomena lala monar imi ve urviu nenaga,

²⁴ a amiu na monar akus þelaga viu lala na kiamiu malena viu e Yesu nene, naþa Ntewa naga sii e amiu, sa ga kiena, naþa yeririna lala la akilia avisu sa naþa mesmesu ruru kemua, a pe suri wa.

²⁵ ! Sanene narui, visokanena toko! Komin naþa ita tepe kinakinas nen tasnena ne Kristo ga, ana monar teve lelaga lue ga va nalavisin ita la silaga.

²⁶ A visae sinemiu mimi pogos tai, ve akila re naþa nasinemimiena nene were amiu ava e namlamulen viowa, a kiamiu nasinemimiena nene monar vito tano sumo, þisi na mrae vito tano.

²⁷ Amiu na monar ve ala re pulmas tai va Yermare, vena naga imi kila kare amiu, ava aviowa laa sane.

²⁸ Yaru naþa sumo naga pe yaru na vinauena, naga monar þisin vinauena. Naga monar yuñae m̄arera e limana, e þelaga na mesmesu, ana þisi na naga kilia visuar ruru naga, a iila m̄ena ga yaru la naþa limala korena.

²⁹ E kiamiu visena lala, ve avisa re visena kar lala, ana avisa ga visena la naþa naga kilia iilar kiela sitomena lala, naþa la aloge kiamiu visena nene, naþa naga toroki ga, a naþa mesmesu, a naþa kilia iila la.

³⁰ Amiu ve akila re Ninuna Wa memawa, pona loge viowa vanon kiamiu visena viowa la nene, komin naþa Ninuna Wa nene, Ntewa naga mligan e amiu sane kiena kile tai, vena naga visawal visave amiu na ape kiena, a vena visawal m̄ena ga visave þisi na naga wereplan amiu e legiena maro.

³¹ Sanene, popon ve akila re si sinekarena lala, a sinemiu ve uarar re si simimiena, a sinemiu ve melkalka re sina. Amiu aligan þelaga na vilupena a navisviowaena, a aligan þelaga na sinekarena.

³² Ana amiu na awo van amiu, a sinemiu lala malumu ga van amiu, aviewo amiu, sa naþa Ntewa naga piewo amiu rui kome Kristo.

5

Amiu na ayal e yomerarava

¹ Ana komin naþa amiu ape sisi wo kiena ne Ntewa lala, amiu akilali naþa ataveve kiena þelaga.

² Amiu na monar ayal e nasitomiena, sa naþa Kristo naga sitom amiu, naga

tañan kiena malena pan amiu, sane ponotaninu tai naña po pan Ntewa, a sane nakuñañaena tai naña Ntewa kekarania.

³ Komin naña amiu ape nalelagaena wa kiena ne Ntewa, ana pe mesmesun re nenaga naña pogos tai, suri lañasia imi kakate e amiu sane lau, pona suri na memawaena lala, pona ðelaga nasinesuniena suri lala, a suri la nene pe pon re mña ga ava atakorkoron poli.

⁴ A pe pon re naña amiu avisa visena kar la poli, a visena namname lala, a visena na totorouena viowa. Ana popon amiu na asumña avisa ga potena van Ntewa.

⁵ Nesape nevisa meraravan van amiu sanini: la naña la asumña ataña ke lau, a la naña asumña akila ke suri na memawaena, a la naña sinela sun manene suri la silaga, la nene ðisi na akokovio. Yaru na sinenan manene laa suri la silaga, naga maran taaga ga amio yaru naña naga mlotun ke supe taña lala. Amiu na monar alelaga e visena nini silaga, pisape la naña apuarar ke ðelaga viowa la nene, ðisi na la tañatete nenaga akilia ava loyumña e Nasuñenena kiena ne Kristo amio Ntewa.

⁶ Amiu na ve atañan re yaru la aure amiu ava e mrapa taña lala, naña la avisa kotalia amiu ga e kiela visena kiki lala. Suri ne la nanene naga kila Ntewa naga sinena karla rui, sa naña visae la pe amlogear re naga poli, ana ðisi na naga la nakoena van la.

⁷ Pisi na amiu ve ava ave ðegas re nena amio yeririna la ne sanene.

⁸ Nanea sumo na, amiu la nene ape yeririna na yemalolo ga lala, ana nanagane naña amiu asike e kieta Ntewa narui, ana amiu asike mña ga e kiena yomerarava. Ve sanene na, amiu monar ayal silaga ve sa naña amiu na ape yeririna na yomerarava nene narui,

⁹ komin e yomerarava nene, ðisi na kiamiu malena wo, a mesmesu, a ve lelaga, ana ðisi na kilia war mras la naña po ve moki.

¹⁰ Amiu na monar akilayonli naña alual ðelaga ya naña kieta Ntewa naga kekara-

nia.

¹¹ Pisi na amiu na ve amio re yeririna la naña la akila ke suri viowa lala, naña pe yumñaena korena ga lala na yemalolo. Ana popon visae amiu avietavan suri viowa la nene aimi e yomerarava.

¹² Ita na tememawanli mña ga vena tevisayu suri la naña la apa akilawania,

¹³ ana pogos naña Ntewa naga vietavan suri la punu ga nene, aimi e yomerarava, ðisi na yomerarava nene naga kila ðelaga la nene la amolmolue.

¹⁴ A pogos naña yomerarava naga kila suri la punu ga imi molmolue e yometava sanene, suri mña ga la nene ðisi na imi ve sa yomerarava. Nanene na sa ga yauena nene pisa, naña naga pisa, pisape “Ko nene naña omomalio rui, otavilo, osumalu e marena, omal sina, ana ðisi na Kristo naga tegoli ko.”

¹⁵ Komin suri nene, amiu na monar avisuar ruru amiu, sane ðisi na yoko ayal ve sanape. Pisi na amiu na ve ave sa re la naña la pe ðarila re poli, ana amiu na monar akila ðelaga kiena ne yeririna la naña ape manmarua ruru po.

¹⁶ Amiu na monar ava ayuporu e pulmas punu ga naña amiu amalia, vena kilaen yumñaena wo lala ea, komin naña ita tesike e pogos na viowaena.

¹⁷ Pisi na amiu ve ayumñae wowe re, ana monar amiu na akilali akilia suri punu ga la naña kieta Supe naga sinenan sape akila.

¹⁸ Pisi na amiu na monar ve amun re si kuruta na munena vano vano-o akilalu ðarimiu, vanon ðelaga nene, ðisi na naga kilia kila kare make ke sina ga kiamiu malena lala. Ana amiu na monar aule ga e Ninuna Wa.

¹⁹ Popon naña amiu asunyu visena na Tus na Yauena lala, a yauena wa lala, a yauena na yeluarena Ntewa lala van amiu, a amiu monar ayau e yauena wa lala, vena aieluar kieta Supe e sinemiu la wetelu.

²⁰ A vanon suri la punu ga, silaga amiu asumña avisa potena va Arimata Ntewa, e kia kiena kieta Supe, Yesu Kristo.

Pelaga na talopaena

²¹ Amiu li nalelagaena lala, yermēne a sira, monar avatanon amiu, sa ke ga naŋa asumā apatanon ke Kristo.

²² Amiu sira la naŋa atalopa, monar avatanon womiu lala, sa naŋa asumā apatano ke pa kieta Suŋe,

²³ komin naŋa yermēne naga pe ŋarin wona, naga sa naŋa Kristo naga pe ŋarin kiena lotuena, naŋa lotuena nene naga pe tasnena, naŋa naga tamalia.

²⁴ Komin suri nene, sira lala la monar avatanon wola lala e suri punu ga, sa ke naŋa lotuena kiena ne Kristo sumā patanon ke naga.

²⁵ A amiu yermēne la naŋa atalopa, monar asitom manene womiu lala, sa naŋa Kristo naga sitom manene kiena lotuena, ana naga taŋan kiena malena vanonia.

²⁶ Naga kila kiena lotuena mekiki, a naga kevania e wii, a e kiena visena, ana naga miawa pa Ntewa.

²⁷ Kristo naga kila sanene vena kilia were kiena lotuena imi puna, naŋa naga pe wa naŋa pe wa ruru manene laa sike na, sane sira mēe tai, naŋa naga sumāte ke sape talopa, naŋa naga mekik ruru po, a naga pe namname re poli, a sa naŋa amiyowau ruru tanea naga po na po.

²⁸ E ŋelaga mēna nene, yermēne naga monar sitom manene wona, visuar ruruia sa ga naŋa naga pisuar ruru ke ga tasnena. Yermēne naŋa naga sitom manene wona, naga sumā sitom ke sina ga naga.

²⁹ Yaru la ve asumā avisu kare re tasnela lala, pona akila kare la, peraga, ana yeririna la asumā apagan rurula, a la asumā apisuar ruru ke tasnela lala. Naga nene naga sa ke ga naŋa Kristo kila ke pan kiena lotuena,

³⁰ a ita na tekilia ruru suri nene po paŋisi, komin naŋa ita na tepe kinakinas nen tasnena lala.

³¹ Visena Wa naga pisayu mēna ga ŋisi rui, naŋa yermēne amio wona, lalua na aimi ave tasnela ve taaga ga, naŋa naga pisa pisape

“Komin suri ne nanene, yermēne ligan arimana amio anena, vano vilolar

wona na sira, ana lalua aimi sane ave taaga ga narui.”

³² Visena Wa nene, visena urmi tai naga sumā ea, naŋa sumo naga sane navisawana ga tai, ana nanagane, nekilia nesape visena nene naga sumā pisawal ke Kristo amio kiena lotuena ne.

³³ Ana ve asitom re avisave visena nene naga pe pisa amiu re mēna poli, peraga, pisa amiu ke mēna ne. Ee lelaga ŋa, amiu yermēne lala, monar asitom manene womiu lala, sa ga naŋa asitom amiu ke ga, a amiu sira mēna ga lala, monar avatanon womiu lala.

6

ŋelaga kiena ne sisi lala amio arimala lala a anela lala

¹ Sisi lala, amiu na ape sa naŋa li nataveveena Kristo, amiu alogear arimamiu lala a anemiu lala, sur ne nanene na mesmesun naŋa amiu akila.

² Navisaluaena tai e Visena Wa kiena ne Ntewa pisa sanini, naŋa pisape “Amiu na ato ga tano e arimamiu amio anemiu lala,” a naga nene navisaluaena na sumo naŋa kiena navisaarena tai teke metava e a,

³ naŋa naga pisa, pisape visae akila sanene,

“ŋisi na sur na kiamiu malena lala kilia kiriri wo, a vena ŋisi na kiamiu malena e porotano nini naga ve piavi.” *Naw 5:16*

⁴ Amiu arimala lala a anela lala, sine-miu la ve vilul re va narimiu lala silaga, vano vano la sinela kar amiu ke sina ga. Ana amiu na monar akawe ruru la mesmesu, a amiu avian la, a akipian la e mrapa na kieta nalelagaena e Kristo.

ŋelaga kiena ne yaru na yurūaena amio kiela yerkawa lala

⁵ Amiu yaru na yurūaena lala, alogear kiamiu yerkawa lala na yomarava nini, sa naŋa amaraun la, a avatanon la, a amiu monar akila sanene e sinemiu la wetelu, sa naŋa amiyurūae ke kiena ne Kristo.

⁶ Amiu na pe pon re asumā akila ve sanene e pogos ga naŋa la asike amio

amiu poli, vena amiu akilali ga naþa la akekaran amiu, ana monar akila suri la naþa Ntewa naga sinenania silaga, amio kemua sinemiu lelaga, sa naþa amiu na ape yaru na yumãena kiena ne Kristo.

⁷ Amiu na monar akekaran kiamiu yumãena lala, a popon ve akila re si yumãena sa ke naþa amiyumãe ke ga pa yaru, ana akila sa naþa amiyumãe ke pa kieta Suþe.

⁸ Amiu na asitomli sa naþa visae yaru tai naga pe yerkawa tai, pona naga pe yaru na yumãena ga tai, ana pe suri korena ga, þisi na Suþe naga lamaran suri wo vania torokin kiena yumãena wo lala.

⁹ A amiu yerkawa kiena ne yeririna na yumãena lala, amiu mēna ga akila mesmesu va kiamiu yeririna na yumãena lala, a ve avisin re sinekar van la silaga. Amiu na asitoñalia, naþa amiu amio la, amiu punu ga kiamiu Yerkawa taaga ga naþa sike ma e peni, a naga suña kila maran taaga ga pa yeririna la punu ga.

Tekila mara pa yermare

¹⁰ Lavisi ke nekila make kiau visena narui, ana nesitom nesape nevisa van amiu sanini, amiu am̄areran manene li naþa amiu am̄arera e kieta Suþe, amio kiena pupia nam̄areraena.

¹¹ Amiu na ayen kulgota m̄arera na mara lala naþa Ntewa naga mla pan amiu, vena amiu akilia asum̄alu, a akilia asuwo mraai kiena ne Yermare, amio kiena navisokanen viowa lala naþa naga suña kila ke pan amiu.

¹² La naþa ita tesuña tekila ke mara pan la e kieta malena, la pe ape yeririna re poli. Ita tesuña tekila ke mara pa nam̄areraena taþena la ne, amio yerkawa lala kiena ne yermare lala, amio suþe lala kiena ne la naþa nanagane la ape purþes nen yemalolo e yomarava nini, a tesuña tekila ke mēna mara temio kimi viowa la nene, naþa la moki liu, naþa asum̄a ke e yo punu ga.

¹³ Ana popon ayen ruru suri na kilaen mara kiena ne Ntewa la nene narui, ana pogos punu ga a e legiena punu ga, naþa Yermare naga imi vena kila mara van ita,

þisi na ita tekilia tekila mara va nasinekar la nene, vano vano þisi, ana ita tesuñalu m̄arera ke tesike na wa.

¹⁴ Pogos naþa amiu asum̄alun kilaen mara sanene, kiamiu sur m̄arera nakilaen mara lala na sanini narui. Kulka naþa aþereari e mēþemiu, naga sa naþa amiu apuarar þelaga na lelagaena. A kulgota m̄arera na kilawoen yepemiu vanon mraai lala, nanene na sa naþa amiu apuarar ruru þelaga mesmesu suña e kiamiu malena lala wetelu.

¹⁵ Ana pupia kulus nen lamiu na yalena, naga na sa naþa amiu asun ke asape ava avisawal Nalologena Wo na suñarena.

¹⁶ Kulþave nene naþa amiu na apuararia nakilawoen mraai kiena ne Yermare la nene, naþa kapi pivavaga ke e la, nanene naga sane kiamiu naviawaen m̄arera e Ntewa.

¹⁷ A kiamiu kulparimiu na mara, naga sane natamaliaena, naþa Ntewa naga mla pan amiu, a playu na kilaen mara kiena ne Ninuna Wa naþa amiu awaria, naga sane Visena Wa kiena ne Ntewa.

¹⁸ A amio suri la nene, amiu na monar alen mēna ga, monar aviun tan Ntewa vena iila amiu. A silaga monar alen e nam̄areraena kiena ne Ninuna Wa, a þisi na monar asitoñal li nalelagaena wa taþena la silaga e kiamiu leniena lala, naþa maramiu ve kawa re pogos tai.

¹⁹ A naga ke sina ga, amiu na monar alenwo inu mēna ga, vena þisi na Ntewa naga la pulmas na visena tai van inu vena nevis, vena ve nesitom þele re naþa nekilia nelologon Nalologena Wo kiena ne Kristo, naþa sumo naga su tapoloun yeririna lala, ana nanagane, þisi na nem̄areran naþa nevisawal van la.

²⁰ Inu na nepe yaru na lologonen Nalologena Wo nene, ana nesike e yumã nakoena, ana amiu na monar alenwo inu vena ve nesitom þele re naþa nelologon Nalologena Wo nene e nini, sa naþa mesmesun ga naþa netaþa.

Visena maro kiena ne Pol

²¹ Inu sineun nesape vena amiu na akilia kiau suniena lala, ana komin sur ne

nanene yoko neligan kieta erau wo nene, Tikikas, im̃asu pun amiu. Naga na p̃ar yepe m̃aen yuñ̃aena lala kiena ne kieta Suḗe e yo nini,

²² ana p̃isi na naga visawal van amiu visave imimi mesike sanape, vena amiu na akilia aloge wo si e imimi.

²³ Ana sum̃arena, sitomena a navi-awaena la apitom kome Ntewa Arimata, a Yesu Kristo kieta Suḗe, la asuñ̃a amio ita, amio m̃ena li nalelagaena la punu ga.

²⁴ A lemamiena kiena ne Ntewa naga sike e amiu, a e m̃ena ga e ita punu ga naḗa tesuñ̃a tesitom manene laa kieta Suḗe Yesu Kristo, naḗa p̃isi na ita tesitom naga vano vano-o, ve uro re, sanene.

Inu, Pol.

Maki Naþa Pol Siria Pa Pan Li Nalelagaen Wa Lala Nae Garu PILIPAE Visayuena Na Tusi Nene

Komþasnen suniena plas na tusi nini

Pol siri maki nene pa e sumare nae Piliþae naþa la nene ape yaru þesa nae Yurop naþa Pol mlologon þesan lologena wo pani la, ana apimi ape li nalelagaena. Piliþae naga pulkumali keviu tai na lepas ne Masetonia, naþa sike vatanon Parin Suþe keviu nae Rom. Pol siri maki nini e pogos tai naþa meke e yuþa naloge viowaena, a e poglis nene li nalelagaena laþasa asumã akawe naga, a naga miloge piowa menaga e vianena na visokanena naþa sike loyuma e sumare nae Piliþae. Maki nini kila meraravan naþa Pol naga þasine ga Ntewa, a naga kekara na kekara, ana tekilia sane naga sanene komin naþa naga mlelaga marera e Yesu Kristo.

Pol siri maki nini vena visan potena van li nalelagaena lala nae Piliþae naþa amiila naga e ya naþa naga sinenania. La nene amligan kilavaru laþasa pa pania vena iilaen naga, a naga siri maki nini pani la, vena visirluaen kiela sitomiena vena alelaga marera e Yesu Kristo. Naga kila sanene komin naþa visae aloge sane naga meke yuþa naloge viowaena, ana pe aloge viowagan vaþisi.

Naga pisa pan la vena akila kiela sitomena la sumaga tano, sane sitomena kiena Yesu Kristo. Pe pon re avilave poli, a asumã asitom la ga. Naga pisa panila sape kiela maliena viu naþa sike e Yesu Kristo, naga suri naþa Ntewa mla korenan ga sanene pan la e kiena lemamiena, a atol ga e kiela lelagaena lala. Pe atol re kome naþa amlogear navisaluaena kiena lus nae Israel la poli, peraga, atolia komin amlelaga ga e Yesu Kristo.

Pol sinenan sape li nalelagaena lala nae Piliþae monar atol þelaga kiena Yesu

Kristo. Naga sape la naþa asikol la ruru e Yesu, Ntewa mla sumare na lelaga sike e kiela maliena, a kila la asumã akekara luwega.

Pupia suri tai naþa Pol pisayu e maki nini, naga sape li nalelagaena lala monar asikol ruru la amio Kristo, monar akekara, a kiela sitomena lala a kiela lelagaena lala sumal marera e naga silaga. Maki nini kila merarava pan ita naþa Pol naga sinen sii paþisi li nalelagaena na sumare lala nae Piliþae.

Komþasnen tusi la na nini

Visena þesa 1:1-11

Suri la naþa Pol sumã mloge ke piowagania 1:12-26

Malena kiena yaru naþa mlelaga monar taveve maliena kiena Kristo 1:27—2:18

Pol sape vitetalia Timote va gar pun la, a pitetalia Epaprotætas þasuþe si pa uþa 2:19-30

Le Piliþae lala monor avisuar la e kiela sinekar lala 3:1—4:9

Pol amio kiena erau lala nae Piliþae 4:10-20

Visena maro 4:21-23

Visena na sumo

¹ Maki nini, yar na yuþae korenena la lua kiena ne Yesu Kristo, nane imimi lua Pol amio Timote, imimi lua mesiri piþasu pan amiu, naþa asike e pulkumali naþa Piliþae, nane amiu naþa kiamiu malena su ruru ke amio Kristo, sane ape li nalelagaena wa lala, amio kiamiu nasumonena lala amio kiamiu yaru naiilaena lala.

² Imimi lua mekekaran navitawe ami- uena sina ga e maki nini, e kia kiena ne Ntewa arimata a Suþe Yesu Kristo, a imimi lua mepiun tan lalua nene, vena aligan lemamena a sumarena sike amio amiu nanagane.

Pol mlenwo la

³⁻⁴ In na nesitomãl amiu lue ga e kiau leniena, a nekekara lue ga nalenwo ami- uena van kieta Ntewa, a navisaen potena paþisi vania vanon amiu.

⁵ In na nesitomãal ke kiamiu navisuarinena, amio m̃ena kieta nayum̃ae vera-gaena e lologena wo, siar e naþa nesiar kiau yum̃aena e amiu, pimi tol nanagane, ana nepisa potena paþisi vanonia.

⁶ In na nemlelaga sane Yarkeviu, naþa siar kiena yum̃aena wo tai pan amiu rui, naga kilia yum̃aen m̃a vano, vano-o kila ruru punu ga, nane e pog maro e pupia legiena nena kiena Yesu Kristo.

⁷ Vanon sanene, avisu naþa in na nesitom amiu manene laa, nepisu sane nanene na mesmes ga, vanon tepa lele taaga loyum̃a e lemamena kiena ne Ntewa rui, ana amiu amio inu e sur la mok rui, e pog wo a e pog m̃arera. Nanagane, nepuarar ruru amiu asike e loyum̃a e inu, kila sane nanagane pogos naþa nesike e yum̃a na koaena, sa ga naþa ita m̃a nena ga. Pona visae aure inu neva e kumal na visen van inu vanon lologena wo naþa nepisawal ke ne, ana sa ga amiu amio inu ke na wa.

⁸ Nanene pe lelaga ne, ana Ntewa kilia sape sineun m̃ena nesape nevisuli si maramiu wa. Awe, sineu miye amiu paþisi ne, e sinesiena make ga kiena ne Yesu Kristo.

⁹ Nemlenwo amiu sanini, nesape ki-amiu sinesiiena monar kapuru lue ga, a visae na kiliaena wo a namanmaruaena a navisuveve ruruena sike e amiu, kilia iila sinesiiena nene imi ve keviu lue van amiu.

¹⁰ Visae amiu ave sanene, yoko akilia atol make ga þelaga wo lala, a aligan la naþa piowa, ana yoko kiamiu malena la kilia merarava ruruia, taþatete sur tai te amiu e legiena kiena ne Kristo naþa pimi ke ne.

¹¹ A kiamiu malena la yoko kilia war mras nen mesmesuena naþa Yesu tam̃an pimi, ana sane kieta mrapa tai naþa tekilia teyeluar Ntewa vanonia, a Ntewa m̃ena þarwarinia.

Pol sike e yum̃a na loge viowaena a kila ke yum̃aena kiena Suþe

¹² Wolai a vineu lala, nesape nevisawal sur nene van amiu, sane pog m̃arera la naþa pimi pan e inu ke narui, pe akilawo

re kiau yum̃aena poli, peraga. Ana la amiilaar ke lologena wo kilia va manene laa sane e yo taþena la ve moki.

¹³ E lepas nen yo naþa nesike ea, nepisu sane yar na mara lala amloge lologena wo na rui, a pa tol yar na mara e yum̃a m̃ana ne Þarin Suþe Sisa, amio yeririna taþena lala. Nanagane na la apisu kilale rui sane noþar ke sen la nene vanon ga Kristo.

¹⁴ A nekekara m̃ena paþisi navisuen pogos naþa apuarnu e yum̃a na koaena sanene, ana sur nene pe kila re li nalelagaena taþena la e nini amarau poli, kila la asum̃al m̃arera laa sane e Suþe, a aþaryon ke ga navisawalen visena kiena ne Ntewa.

¹⁵ Lala amlologon visena kiena ne Ntewa, pe sur wo tai, ana sur taaga, nekilia sane lala þasia amlologon Navisaarena Kristo e sitomena wo, a þasa amlologon e sitomena na vielueena a e sitomena na vilaveena.

¹⁶ A la naþa amiyum̃ae po, apisuluþar sane nesike e yum̃a na koaena vanon nemiyum̃aen lologena wo, ana sinela piowagan inu, a sinela piowagan la naþa pe amloge re poli wa, þisi na amlologo e sitomena wo.

¹⁷ Ana lala taþena nene, amlologon Kristo ana pe ape lelaga re poli, aþarwar la paþisi, asape akila sa naþa lala towe ava metava. Sitomena viowa na sanene sike e la, ana pogos naþa apisu naþa apiar ruru inu e sen la nene nesike e nini, apisu sane pe kiela pog naþa akilia avisayu kare kiau kia e maran yar lala, ana akila kiela kia la pa metava.

¹⁸ Ana ane kilia, pona pe pe sur re tai poli. Kiela sitomen po yo, po piowa ga, ape lelaga pona apisokan, ana pupia sur keviu, kia kiena ne Kristo monar molue lue ga silaga.

Pol sape mal pona mare, ana sinenan ga Yesu

¹⁹ Sur ne na nene, pogos naþa nemloge asape kiena kia momolue ke pa rui, nekekara paþisi, ana sa pogos tai neloge sane kiena yum̃aena pa po manene laa ke sane, yoko neloge won vaþisi. Nanagane na nepisu sane amligan nu nem̃eke ga

e marena, a pe mrapa re naþa nekilia nemolue si vetan poli, ana pogos naþa nemloge sane kiena yumãena pa ke meta sanene, miilalua si kiau sitomena sane, kila nemlelaga manene laa sane e kiamiu leniena lala, amio naiilaena wo kiena ninuna ne Suþe Yesu Kristo, sane yoko wo van inu na wa.

²⁰ Sanene na, nanagane na nemlelaga ke m̃arera sane akilali ya ne van inu, ana taþatete akila nekila sur tai na pi-owa pona nevisa visena tai naþa yoko nemawan sina e marana ne Ntewa. Visae nemal po nemare, pe pe sur re tai poli, ana sane pogos punu ga, sineun ga nesape nem̃areran ga kilaen kia kiena ne Kristo va manene laa metava wa, e sur ya naþa yoko vim katen inu po e tasneu.

²¹ Sur naþa teke e inu sanini, visae nemali, malena wo kiena Kristo sike amio inu, a visae nemare, neva nesike nemio naga, naþa wo manene laa sane.

²² Visae ve kiau naþa nemal ve piavi re laa sane e yomarava nini, naga nene sane kiau yumãena wo þas sike ga wa nayumãenenena, naþa kilia war mras wo lala. Sanene na, nepisu sane visae nesumã, woga ga, a nepisu m̃ena sane visae nevano, naga m̃ena poga ga. Pisi na nemninue narui, popon netaveve nape narui.

²³ Marera pan inu paþisi navisuveveen mrapa lua nene navisa lologiaena tai, komin e kana lepas tai, sineun manene laa paþisi vena nevetan yomarava nini, neva nesike nemio Kristo, naga po manene laa sane,

²⁴ ana nepisu m̃ena sane popon manene nesu re laa e nini sane, vena neiila amiu re laa ga wa.

²⁵ Sitomena ne sanene m̃arera ruru pan in rui, kila sane nanagane nepisu sane nekilia nevisaar van amiu sane nesike si nemio amiu na wa, vena kila amiu akilia aloge wo e kiamiu viawaena e Kristo Yesu, a vena akilia ava re laa sane amio naga.

²⁶ Ve sanene, yoko visae pogos tai neim nekaten amiu, nemlelaga sane yoko kila amiu akekaran Kristo va laa sane na wa, a yoko wo vaþisi van amiu, kila ne kiamiu

sur la ve moki sina na visaen potena vania a ve nayeluaren naga vanonia.

Monar teyakolkol ita ruruia, teve taaga na kilaen mara van sinekar lala

²⁷ Ana pe tekilia ruru re poli wa sane yoko ve sanapen inu, ana pe sineun re asitomãl in poli, asitomãl amiu ga. Ayal ruru e mrapa na po, mesmas sane ave yar na lologena wo kiena ne Kristo. Pona nekilia neim nakaten amiu, po taþatete neiãasu, ana popon visena tai tol kiligau sane apiawa m̃arera ruruia, naþa ninu-miu ve taaga, kiamiu sitomena taaga ga na sumãlen lele taaga, amiu am̃areran sane nalelagaena e lologena wo monar tauluia.

²⁸ Ana ve amarau re, asitom korenan sur la naþa sane yoko nasinekar la akila van amiu. Pogos naþa neloge sane akila ke sanene, yoko wo na wo, vanon yoko ve kile kiena ne Ntewa van nasinekar lala vena welualaen, a ve kile kiena ne Ntewa van amiu vena kiamiu natamaliaena.

²⁹ Lelaga, yoko monar akila mara amio sinekar la sanene, vanon pogos naþa Kristo þere amiu ape kiena, pe naga re ga naþa aviawa ga e poli, ana yoko akus m̃ena naloge viowaena vanonia.

³⁰ Monar ve sanene, vanon nanagane tokus pae ke pupia mara nene naþa nanua apisu ke nokusia, pona naþa asumã amloge ke asape nokus ke ga wa.

2

Pelaga wo naþa popon tekila van ita

¹ Sineun nesape amiu asitom veveli kieta malena wo temio Kristo. Kiena þelaga miilalua ke kieta sitomena, ne! Kiena sinewoena kila temloge po paþisi, ne! Ninuna kila tesu ruru ke temio ita, ne! A naga kila naþa malumuena a sineyeena pulen ita, ne!

² Ana komin naþa kila po pan ita sanene narui, nesape neiakol visena, neviun van amiu vena ava re laa sanene. Awis, ataãan sane kiamiu þelaga pan amiu, yoko maran ve taaga ga sane kiena þelaga pan amiu. Ana popon sinemiu iyeiye amiu, maran taaga ga sa naþa naga sinen miye amiu, a kiamiu visena a kiamiu

sitomena ve taaga. Visae nevisu akila ve sanene, yoko neloge wo, nekekara na nekekara.

³ Ve sanene na, ve teyumãae re si e þelaga na puluvisena, a ve tekila re si suria e nawarwarena, ana monar temalumu, tekila ita tesu ga tano, tevisu yar taþena la sane apo taulu ita.

⁴ Ve tesitoñal ita re ga, amio ya naþa pe kieta, ana monar tesitoñal ñena yar taþena lala, amio ya naþa pe kiela.

⁵ Popon sitomena wo amio þelaga wo su lue ga e ita, komin naga nene naþa tepisu e Kristo Yesu rui, naþa po na po.

⁶ Naga sa naþa yauena tai naþa pisa, sape

Naga pe nono na Ntewa, sa ga Ntewa, ana pe ñareran re sape naga maran taaga ga sane naga poli.

⁷ Naga mligan kiena naurarena sike ma e peni,

pitomi sane pe sur korena ga tai, paeme e yomarava nini pe yeririna pimi sane yaru na yuñena naþa pe kiena kia re poli.

⁸ Lelaga, yaru nae ma e peni pimi pe yeririna nae yomarava,

kila naga pito tano, sike ga tano vatanon nasinenanena kiena ne Ntewa, pano-o tol marena e laki torovia.

⁹ Mlogear Ntewa, þisi na Ntewa pisirlua naga

kila kiena kia pa metava manene laa taulu kia taþena la punu ga.

¹⁰ La nae peni, a la nae yomarava, a la nae yo tano, yoko la punu ga avatanon kia nene,

yoko akinai vania.

¹¹ Yoko gola la punu ga ayeluar Ata Ntewa, avisawal e marala, asape Yesu Kristo naga taaga ga pe Suþe.

¹² Erau lala, e yo nene tepisu naþa Yesu mlogear arimana, a amiu ñena, nanua nepisu sane amlogear ruru ñena naga po na po. A nanene pe nakilaen re ga e pogos naþa nesike nemio amiu, komin nanagane pe nesu re si nemio amiu poli, pe nepisu re si sane asike sanape, ana sineun nesape asumã akila ña wo va laa sanene.

Amiu atol pa natamaliaena rui, ana piowa naþa atotano korena amio, ana monar aþitom urmi ea. Monar avisuar ruru pupia yuñena wo naþa Ntewa kila, na amiu ñena monar ayuñen lili ñaga yuñen wo lala na malena viu nene naþa naga mla pan amiu.

¹³ Ana nemlelaga sane tekilia tekila, vanon Ntewa ga nene miyuñae ke e kieta malena la ita peve taaga, miila ruru ita naþa kieta sinenanena lala kekaran na kilaen kiena sinenanena, a kila ita ke tetorokin nakilaen suri nene.

¹⁴ Ve sanene, sur ya naþa sike e lumoña na kilaena, okila naþa sane ve ovis mumu re pona ve ovisamaran re sina.

¹⁵ A tesike likan yeririna la naþa akuspal mrapa, kiela sitomena la pe taþena, ana ita monar teyuñen kieta yuñena la wo a mesmes. Ita tepe narina ne Ntewa lala, naþa popon kororaki ve to re e ita, a monar tepe sane kap tego na tegolien mrapa kiena yeririna la na yomarava nini.

¹⁶ Amiu auarar ruru visena ñamalena vanla, vano-o tol pogos naþa pupia legiena naþa Kristo yoko wasuþe sina ga. Sanene yoko nekilia nevisu sane pe nekirir korena re poli, ana nekilia nevilaven amiu, nekekaran amiu sane ape pupia mras nen kiau yuñena tai.

¹⁷ Pona vano-o tol sane kau kuruta monar lau vanon amiu, a visae ve sanene, nepisu sane pogaga. Nepisa sanene vanon nepisu sane amlogear Yesu, akila amiu sane pe kuþaþena tai pan rui, ana popon in ñena nekekaran natañanen kiau malena vanon yuñena kiena Suþe.

¹⁸ Nane nepisa, sane nekekaran ve sanene, a popon amiu ñena akekarania, komin naþa visae Ntewa kekaran sape nekilia netarlu kiau malena vanon yar taþena lala, naga pe sur wo tai naþa naga kila van inu.

Pol sinenan sape vitetalia Timote va pula

¹⁹ Nesape nevisawal ñena van amiu sane e lepas kiena ne wolai nene Timote, kiau sitomena ñarera e Suþe Yesu sane yoko ve ve piavi re, yoko nevitetalia naga iñasu pun amiu. Nekekaran naga paþisi

sane popon sa naga iñas visu amiu, þisi na war kamiu lologena þasia imi si pun inu, naga nene yoko kila neloge wo vaþisi ne.

²⁰ In na nepisu sane pe nekirawal re si yar tai e nini poli sane naga, po torokin naþa nevitetalia iñas pun amiu. Naga kiena sitomena maran taaga ga amio inu, ana nekilia sane visae naga sike amio amiu, neþasine sane yoko naga sitom lue ga nakilaen wo manene laa van amiu.

²¹ Lala taþena la asikena, ana pe asa re naga poli. In na nepisuluþar la rui, sane sur naþa keviu e kiela sitomena, nane sur la naþa pe kiela ga, ana sur kiena ne Yesu Kristo, asitom korenan la ga, pe asitom re urmi e poli.

²² Ana Timote tekilia sane naga po paþisi, akilia rui sanape naþa imimi lua memiyuñae veraga e lologena wo, pano-o nepisu naga sane pe naruu, a naga pionu pe arimana.

²³ Sanene na, nepisu sane pe yar mesmes naþa nevitetalia iñas pun amiu, ana taþatete iñas na wa. Sineun nesape nevisuli sane yoko ve sanape van inu e nini sumo wa, þisi na naga kilia iñas visawal van amiu.

²⁴ Visae yoko imi wo van inu e nini, nekilia sane yoko ve naga taaga re kilia vim katen amiu, ana nemligan ke e kiau leniena, nemlelaga e Suþe sane yoko ve ve piavi re na yoko akilia avisu mēna marau neiñas nakaten amiu.

Pol pisu sane popon Epaprotætas wasuþe si pula

²⁵ Sur taþena si tai na visawalen van amiu, sane kieta puruvi naþa Epaprotætas, naga mai paþisi pano-o nepisu sane popon neligan naga wasuþe si pun amiu sumo wa. Amligan naga pimi sane kiamiu naiilaena tai van inu, þisi na memiyuñae veraga po, mesuñal veraga e mara na po na po.

²⁶ Ana sur taaga ga, maiena nene tolia, kila kare naga paþisi, kila naga sinenan pisape iñas si uña pun amiu. Ana pogos naþa naga mloge sane lologena na kiena maiena nene tol pa pulkiligamiu la rui,

kila naga mloge piowa li mñaga, sinenan pisape visu amiu.

²⁷ Lelaga ga, maiena nene kila naga piowa pano-o mepisu sane yoko taulu naga, þisi na Ntewa sinen miea, pe mare re poli. Ana in na nesitom ke sane Ntewa pe sitom re ga naga poli, a sitom in mēna ga, komin visae naga mare, yoko mārera mēna van inu vaþisi, yoko yakol si pupia naloge viowaena metavan si naloge viowaen taþena la naþa nokus ke pa rui.

²⁸ Ana pogos naþa mai sanene, sike amio in e nini wa, nemloge piowagan naga paþisi. Ana sineun nesape neligan naga wasuþe sina pun amiu sumo wa, a nemlelaga sane amiu mēna akekaran navisuen si marana.

²⁹ Sineun aworworun naga e kia kiena ne Suþe, avisuar ruru naga sa naþa apisuluþar naga amio kiena yuñæna la naþa kila e nini. Yar sur la ne sanene, popon tevisuar ruru la, po tewatanon la,

³⁰ vanon akila yuñæna kiena ne Kristo po paþisi. Epaprotætas naga sanene narui, naþa sitom manene laa yuñæna nene, kila sane pe sitom re nena kiena malena, lavis marena. Naga kila sanene vanon sinenan sape ve masisu e yuñæna naþa amligan e limana. Amiu taþatete aim aiila inu, ana amligan naga kus kiamiu kia, pimi miyuñæ ke amio inu. Naga nene aure si naga, akila wo vania.

3

Sineun nesape nekilia ruru Kristo va laa sane, amio kiena puriu kawaena

¹ Wolai lala a vineu lala, poga ga, nesape nesiar nokotawe kiau visena narui. Visena maro tai na po na visaen van amiu sa nini, amiu akekara silau e malena wo naþa Suþe mla pa pan amiu rui.

Pona visena nene nepisa pa pan amiu yam moki yo rui, ana ve sinemiu kar in re, pe nesitom re sane piowa navisaen sur wo la van amiu yam ve moki poli. Naga poga ga pan inu, a nesitom sane kilia iila amiu mēna ve keviu va laa sane.

² Ana visena viu si tai naþa nesitomñalia navisaen van amiu sanini, sane monar avisuar ruru amiu e la naþa amlologon

manene ke þaviu. Na nene komin naþa aþareran ke asape þaviu nene naga ga pe mrapa naþa yar kilia va loyuma e namratava puna Ntewa, ana na nene na pe lelaga re poli. In na pe nekekan la re nena ga, nepisu la sane amiyuwon polo la asu kar ke ga sa ga lokul tetan lala.

³ Sur naþa tesike ea, naga pe sa re nena nene. Ve tevisu re sur la naþa sike e kulu yepeta, sane sur ne la nene kila ita temerarava e marana ne Ntewa, komin temlotun ke naga e ninuta, a tekekara silaga na sitomaalen Yesu Kristo kila ruru kieta mrapa. !Visae asun avisasa ke asape þaviu ga kila Ntewa kekan yeririna, monar tevisa tesape naga pe na yepela ga. A naþa nalelaga nena, nane ita tesike e ne, naþa tete plan ke þelaga viowa a sitomena viowa vetan kieta malena lala!

⁴ A visae aþareran ke asape Ntewa yoko kekan ita e sur ga la naþa sike e ita, pona nekilia nevisawal kiau sane yoko wo taulu si kiela yo.

⁵ Visae nevisa plan kiau sunena lala, yoko amiu avisu punu ga mesmes ga a po, taveve þelaga mesmes a ya naþa navisaluaena pisa. Sur na sumo, e kiau lus lala, in na nemolue mesmes ga e pupia lus nae Israel, nepe kuruta mal mesmes e lus kiena ne yermarua apua naþa Pensiman. Ata amio auia, lalua ape Yu, kila in maena nepe Yu nena napo. A ta sina, in na nepaeme, tol kana wik taaga ga, nepe þaviu. Sur taþena, e lepas na navisaluaena kiena le Yu la, in na nepim nekeviu nepe kana Varasi tai, nepian ke pan yar taþena lala.

⁶ A nanua sumo, e lepas na iilaaren lotena kiena le Yu la marera, in ke narui naþa netaulu punu la la sane, nekilaþel ke ga li nalelagaena na sumare la paþisi. Ana na maro naþa nekilia nevisa, e lepas na þelaga mesmes, pe visen re nena tai e navisaluaena kiena le Yu lala naþa nekilarovia pona nekila palia.

⁷ Sur la nene, kila apisu sane in na nepo paþisi, amligan inu nemon laa metava paþisi. Ana pogos naþa Kristo pio inu, pe nepisu re si sur la nene sane pe sur wo

la pan inu poli, nepisu la sane pe sur na kokovioena ga, þisi na nemligan punu ga sike na, nesiraun ga naga.

⁸ Lelaga, nekilia nevisave ve sa nene narui, sane nepisu ke sur la punu ga nene pe sur na kokovioena ga, ana sineun ga nesape nekilia Kristo Yesu sane pe Suþe e kiau malena, va re laa sane. Sur taaga ga nene nepisu po, naþa kana napoena po taulu sur taþena la punu ga, ana naga ga nene sineunia. Sineun manenea na tolen naga e kiau malena, ana nekilalu kiau sur taþena la punu ga kominia, ana woga ga, nepisu sur la nene sane pe kororak ga pan inu.

⁹ !Visae kiau malena kilia yakol ruruia e kiena malena yoko wo na wo! Naga nene in ga taaga taþatete neyumaenia, komin naþa sa nelogear navisaluaena, yoko navisaluaena taþatete kila sane netorokin naþa nemesmesu e marana ne Ntewa. Ana kieta mrapa taþena natolen namesmesena suma ga. Na nene, naviawaena e Kristo, a naga pe mrapa namesmesena naþa Ntewa ga pietavan ita ke la naþa temlelaga e narina.

¹⁰ !Visae nekilia naþa nekilia ruru ga naga, amio pupia puriukawaena kiena ne Ntewa naþa kila naga mal sina ga e marena, yoko wo na wo! In na nekekan ga na kuspaeen naloge viowaena la naþa naga kusia, a visae nekilia netorokin naþa nemaren marena ta ne sane kiena marena, yoko nevisu wo manene vaþisi van inu.

¹¹ Sur marera ya na sa nene naþa monar nowaro ea, na woga ga, ana monar nekila ga ya naþa nekilia vena netol malena viu na sumalen sina e marena.

Sur naþa tesuma toþarwaryon ke ne

¹² Nepisayu inu ke sina ga sanene, pe sineun re nesape asitom ke asape in na nesape nepo punu pa rui, pona netol pa kana mak rui. In maena pere ke ga wa, ana komin nekilia sane Kristo Yesu þure inu nepe kiena pa rui, sineun nesape nowaryon lue ga vena netol lele tai naþa naga kilia kekarania.

13 Wolai a vineu lala, monar nevisa ruru van amiu, nepisu in sane pe netol re lele nene poli wa, ana yumãena taaga ga nene teke e kiau sitomena silau, sane in na monar sineu þesan sur ya naþa sike varaun inu, ana monar newaryon natauluen sur ya naþa sike e marau.

14 Sur naþa neþaryon ke ne, naga sanini, sane kiau malena monar yoko wo ruruia amio Kristo Yesu, vano-o yoko in mēna neve yar tai naþa neloge vioena wo kiena ne Ntewa naþa visa van inu, sape “!Pogaga, ko ovam metava osike amio inu narui!” Sur nene sa naþa tropi tai naþa amligan ruru mēke rui, ana tekiririn ke, vena tetaulu ve kieta.

15 Visae ita þasia kieta sitomena la marua ruru þisi, popon teyumãe ve sanene narui, ana visae e sur la þasia, ita þasia kieta sitomena la pe marua ruru re sanene poli wa, nemlelaga sane Ntewa yoko kila sur la nene merarava ruruia van la. Pona e sur la moki pe tepim tepo re e poli wa, ana yoko naga iila ita e na wa.

16 Ana monar towarar ruru naga naþa tepim tepo pa e rui, sane piowa naþa teloru teviepal sina ga vetania.

Ataveve lau

17 Wolai a vineu lala, nepisa awis pan amiu sane monar ayakolkol ruru amiu, ataveve li lelen lau e mrapa na kiau malena. Visae avisu kilale amiu þas sane akila ke po sanene rui, amiu taþena towe lai, ayal ataveve lala lala.

18 Nepisawal visena nene pan amiu yam mok li rui, a nanagane na nepisa ke sina ga naþa nemloge piowagania, amio wamarau mlau. Nanene komin naþa nepisu ke amiu þasia sane aþar ke kia naþa ape li nalelagaena, ana kiela malena þarlologia ga sane ape sinekar amio Kristo, amio kiena lak torovia.

19 Kieta nasinekar la nene, sur naþa amlotunia, naga meþela ga. Kiela naviowaena lala, popon amawania, ana apilaven manene laa. Sur naþa pulen kiela sitomena, sur na yomarava ga la nini, ana luasnela, akovio viowa ga.

20 Ana ita, pe tepe yeririna na yomarava re la nini poli, kieta purvanua napo, nane ma e peni metava. Yar keviu nae e nene, nane Suþe Yesu Kristo, kieta natamaliaena, ana tesike e yomarava nini wa, tesumãate ke naga, tepisusu ke sane yoko ve ve piavi re vitomin ita sina.

21 Ana pogos naþa visae naga vitomi, yoko yumãe amio kiena pupia puriukawaena naþa torokin nakilaen sur punu ga su vatanon kiena nasuþenena, ana yoko vilopu ita. Nanagane, tesike temio yepeta marua la na yomarava nini wa, naþa menununu pororowa ga, na ape sur na marena ga, ana yoko naga la tas viu la van ita naþa po sane tasnena, naþa merarava, tego, mārera, sumã wo sulue ga.

4

1 Ve sanene, wolai lala a vineu lala, popon amiu asumãal mārera sanene e kieta Suþe. Nepisa sanene vanon nesitom amiu, sineun amiu paþisi, amiu akila inu nekekara keviu, noþarwarin amiu paþisi, ana sineun nesape yoko wo van amiu silaga.

Visena kiena yeririna þasia

2 Nemloge piowa komin nepisu sane monar nevis ve tokaki van kieta sira lua nene, Yuotia amio Sintike. Lalue apis vitawa pan la paþisi, ana nepisa pan amiu sane sineun lalue monar akila kiela sitomena vito ga tano, vim ve taaga vatanon kieta Suþe.

3 Sira lua nene, nanua nemiyumãe veraga nemio la po paþisi, amio mēna yaru nene Klemen amio yar taþena lala, naþa moþaryon lologena wo pano-o imimi punu ga kiamimi sitomena taaga ga. Nekilia sane kia kiena ne yeririna nayumãena punu ga nene asiriar sike pa e tus na malena rui, ana pogos naþa amlipere la sina, nemloge piowa paþisi. Ve sanene, kiau naviunena tai van ko ne, kiau erau naþa nanua sumo tepe yar na yumãen veragaena konua rui pimi. Neviun tan ko vena ko na oiila sira lua nene vena aim ave erau wo sina ga.

Visena na iilarena lala

⁴ Ana kiau visena si tai van amiu punu ga, nesape amiu akekara e Suþe, akekaran naga silau.

⁵ Pogos naþa alual pog m̃arera, ava ruru ga, akila sa naþa yar la avisu kilale sane kiamiu sitomena la piayavi ruruia. Akilali naþa asitom̃al lue ga sa naþa ve ve piavi re na, Suþe wasuþe sina.

⁶ Amiu ve akila re sinemiu la pepen sur lala, a e sur ya la naþa imi kate e kiamiu malena, avisa siþa van Ntewa vanonia. Avisawal vania e sur ya naþa apilasinia, aleninia, atagin vania, ana nanene monar akila silau e sitomena na visaen potena.

⁷ Ana pogos naþa aligan sur punu ga e limana sanene, yoko avisu naþa Ntewa yoko ligand kiena sum̃are e amiu, iila amiu. Kiena sum̃are nene keviu paþisi, kilia kila wo vaþisi van ita taulu ya naþa tekilia tesitomia, vano-o kila naþa uarar ruru sineta po kieta sitomena vena m̃arera e Suþe Yesu.

⁸ Wolai lala a vineu lala, lavis nevisa make kiau visena van amiu narui, ana nesape neiilaar amiu vena kiamiu sitomena la ulen ga sur la naþa Ntewa sinenania. Sur ya na pe lelaga, po sur ya na mon metava, po sur mesmes ya, po sur merarava ya, po sur nowo ya, po sur ya navinaiaiena, po sur ya na yeluarena, po sur taþena ya napo, nanene kana sur ne la naþa po asulue ga e kieta sitomena lala.

⁹ Naga nene pe þelaga la naþa noþaryon ke vena neviani amiunia, pona atol tan inu, pona metavana, apisu e kiau malena. Ana visae avisu sane pe lelaga sane þelaga wo laþas nene sike e kiau malena, nemiye awis pan amiu vena amiu m̃ena aligan ruru e kiamiu malena lala. Ana visae akila sanene, nemlelaga sane kieta Ntewa nasum̃areena yoko sike amio amiu, iila amiu.

Potena e nalaena

¹⁰ Nesape nevisa van amiu nesape pupia kekarena pan inu, sane yam piavi li m̃a ga pe nepisu re sur tai poli, þisi na netol ga narin nalaena naþa amligan pimi. Nemlelaga sane asitom in m̃a ga,

ana nekilia sane amiu pe mrapa re ga naþa akilia akila sur imi tol inu e nini poli. Ana pogos naþa nepisu kiamiu nalaena nene, nepisu sane kiamiu sitomena naiilaena kiau yum̃aena mal sina ga, ana nemiyeluar Ntewa vanonia.

¹¹ Nepisa sanene, a pe naga re ga naþa sane nepisape pe kiau sur re poli, vanon sur nene neþarpoyo e rui, sane sur ya na vim katen inu, po nesike sanape, nekekaran ga.

¹² Nesike tano po nesu metava, visokar inu po kau kinanena moki, lum̃au korena po lum̃au pule, in na nokom e sur la punu nene rui. Pog viowa pona pog wo, ana mrapa kien Ntewa navawarpoen ea teke ne, a naga pian inu ea, kila neþarpoyo e sur la nene rui.

¹³ Ve sanene, nanagane na nepisu sane nekilia netaulu sur la punu ga naþa þisina vim e inu, nane e pupia puriukawaena naþa Kristo kila ke nem̃arera ea.

¹⁴ Nesape nevisa sanene, amiu nae Piliþae, asitom na iila inuena e pog m̃arera la ne sanene, amiu ape lemam paþisi ne.

¹⁵ Sa naþa apisuluþar pa rui, pogos naþa nesiar kiau nayalinen lologena wo nene, pogos naþa nepetan Masitonia nepano, pe sum̃are re nena tai naþa miila inu, peraga, amiu ga. In na neþar sur wo la moki pan la paþisi, a pe lala yar re tai naþa sitom sape ligand sur tai vim poli vena iilaen kiau mrapa pona kiau yum̃aena.

¹⁶ Ana amiu apo paþisi, pogos naþa lum̃au plasia amiilala inu, amligan nalaena la pimi pan inu yam mok li m̃aga, pano tol pogos naþa nepa nemiyuñae ke gare gar Tesalonaika.

¹⁷ Nepis ke sanene, pe naga re ga naþa nesape nowar lue nalaena la poli, ana vanon naþa sineun nevisu naiilaena la molue e sum̃are lala na iilaena yum̃aena kiena Suþe. Nanene vanon sane visae akila wo sanene van yar taþena lala, ana kiamiu þelaga wo nene yoko war mrasa, kila sur punu ga wo laa sane van amiu sina ga.

¹⁸ Vanon nagane, nepisa potena pan amiu paþisi e nalaena la naþa apitetalia Epaprotætas þar pimi, netol la punu pa rui. Nalaena la nene pimi, pa taulu ya naþa sineunia, ana nepisu sane nanagane po laa pan inu. Kiamiu naiilaena la nene, sane ponotaninu tai naþa ponos po paþisi, la sane kuþaþaena tai naþa akila pan Ntewa naga pisu po paþisi, kekarania.

¹⁹ Ana nekilia sane visae limamiu plas pogos tai, yoko kiau Ntewa visuvevea lue ga, vanon Yesu Kristo kila pa rui naþa naurarena lala kiena ne Ntewa nae mae peni akeviu paþisi.

²⁰ Sanene, yoko tesuþa teyeluar kia kiena ne arimata Ntewa silau, yoko teyeluar þa naga vano-o ve þisi re pogos tai, sanene.

Visena maro

²¹ Aliganlelein kiau visena nene van li nalelagaena wa lala naþa asike ne, avisawal van la apisape nesitoþal la ke silau. Wolai taþena lala amio vineta taþena lala naþa asike amio inu e nini, lala þena asape avisa pokolulagi po pokolemalo van amiu.

²² Pas si naliganen visena sanene iþasu van amiu, nane li na lelagaena wa la punu ga e nini, amio þena la naþa amiyuþae kiena þarin suþe nene Sisa e þana pupia yuþa nene.

²³ Kiau leniena, sane lemamiena kiena ne Suþe Yesu Kristo sike e ninumi lala, sike likan amiu silaga.

Inu, Pol.

Maki Naþa Pol Siria Pa Pan Li Nalelagaena Wa Lala Nae Garu KOLOSI Visayuena Na Tusi Nene

Komþasnen suniena plas na tusi nini

Kolosi naga pupia pulkumali tai na lepas nae Esia naþa nanua sumo na mēke vatanon Parin Suþe keviu nae Rom. Pulkumali nene sike e purvanua naþa nagane kiena kia Teki. Pulkumali nene mēke yepasnen pulkumali taþena naþa Episas e lepas naþa mrae molue ke komea. A mēaki nini Pol siria pan yaru na sumāre lala nae yo nene. Pol pe siar re sumāre nae Kolosi poli, ana pulkumali nene sike lavisin Episas, naþa pupia pulkumali na lepas nene, naþa Pol miyumaē ke e silaga. Pogos naþa Pol sike garu Episas, naga mligan plan ke kiena yaru lala apa amlologon ke lologena wo e yo lala na lepas nene, a Kolosi naga tai naþa mēke e yo la nene. Ana komin suri ne nanene, Pol pisu sane yumāena na visuaren yo nene Kolosi naga mēna sike e limana.

Pol mloge visena tai asape navianiena lala na sumāre nene, asumā apisa ke asape yaru lala monar alotun ga yerkawa lala a nasumonena kiena yermare lala, vena akilia ruru Ntewa, a vena akilia atol maliena naþa pulen suri makega. A apiyan ke yaru lala, asape monar ataveve navisaluaena marua e lepas na kinaniena, a suri taþena si laþasa, a monar ave þaviu vena atol maliena.

Ana Pol siri mēaki nini vena visaluþaren sitomiena viowa la ne sanene, a pisawal visena lelaga kiena Yesu Kristo pan la. Purþesnen sitomena naþa pisa na sanini, sape Yesu Kristo naga taaga kilia la maliena naþa ulen suri makega van ita, a vianena viowa la nene asumā aþere plan yaru lala aþure matania. Kristo miyumaēn yumāena kiena Ntewa na sien yomarava nini, a naga miyumaē kiena Ntewa vena wereplan si yaru la aimi ea.

Yaru monar sikol naga e Kristo vena kilia tol malena, a pe mrapa taþena re si poli. Pisina siraunia, Pol pisawal panila e suri la naþa akilia atol e kiela maliena komin naþa amlelaga e Yesu, a naþa asikol la ruru amio naga.

Pol mla mēaki nene pan yaru tai kien kia Tikikas vena la va van li nalelagaena la garu Kolosi. Tikikas nene, naga yaru mēa nena naþa lalua Onesimās apano, naga mla Onesimās þasuþe si pa kiena yo. Suniena nene sike e mēaki kiena Pol naþa pitetalia pa puna Pilimon.

Komþasnen tusi la na nini

Visena þesa 1:1-8

Þelaga kiena Kristo, a kiena yumāena
1:9—2:19

Malena viu e Kristo 2:20—4:6

Visena maro 4:7-18

Pol siar kiena visena

¹⁻² Inu Pol, naþa in na yaru nalologena kiena ne Kristo Yesu naþa Ntewa naga mligan inu, a nekekara naþa nevitawe amiu e mēaki nini, naþa nesiria piþasu pan amiu li nalelagaena wa lala nae Kolosi, naþa amiu punu ga ape kiau wolai lala a vineu lala e Kristo, naþa asumā apiawa mārera e naga. In na nemio Timote, naþa naga sike amio inu, imimi lua memlen mesape þisi na lemamiena a sumārena kiena ne Arimata Ntewa sike amio amiu.

Pol pisa potena pan Ntewa vanon la

³ A silaga e kiamimi leniena lala, imimi lua mepisa potena pan Ntewa Arimana ne kieta Suþe, Yesu Kristo, vanon amiu.

⁴ Naga nene vanon naþa imimi lua mekekaran amiu paþisi, naþa visena tol imimi sape kam na asumā apiawa ke mārera e Yesu Kristo, a asumā sinemiu sii manene ke mēna li nalelagaena taþena lala.

⁵ Þelaga wo nene naga sumā molue ke ga e kiamiu malena lala komin naþa sinemiun manene naþa þisi na akilia atol suri wo la naþa Ntewa mligan ruru sike ma e peni vena ve kiamiu. Suri wo la ne sanene, amloge lologena wo pisaar pan amiu þisi rui.

⁶ Visena lelaga nene pimi pun amiu p̄isi rui, a nagane, suṃa pa vanua manene ke ṃena ga e yo taṃena lala e yomarava nini narui. Suṃa pava ke sanene, ana suṃa kapuru a suṃa p̄ar ke ṃena ga mras la naṃa powo, torokin ke naṃa kila pan amiu e ke e pogos naṃa amloge p̄esania, naṃa apisu kilale sane lemamiena kiena ne Ntewa e ita naga keviu a lelaga paṃisi.

⁷ Sur la nene Eṃaṃras naga pian amiu e rui, pogos naṃa naga kus lelemimi imimi lua, ana naga pimi pisawal p̄esan lologena wo nene pan amiu. Naga pe yaru tai naṃa imimi memiyuṃae ke lele taaga, a naga masusun yuṃaena wo lala kiena ne Kristo. Imimi mekekarana naga paṃisi,

⁸ a nanagane, naga p̄asuṃe si pimi pun imimi rui, mla lologena wo tai pan imimi, naṃa pisayu sanape naṃa kiamiu malena lala suṃa pule luen ga e pupia sinesiiena naṃa Ninuna Wa mla pan amiu.

⁹ Komin sur nene, pogos naṃa imimi lua memloge visena nene kiena Eṃaṃras, memlen wo amiu silaga pimi tol nagane, a mesuṃa mepiun ke tan Ntewa mesape p̄isi na Ninuna Wa la manmaruaena a nakiliaena wo lala van amiu, vena akilia ruru nasinenanena wo punu ga kiena ne Ntewa.

¹⁰ Ve sanene, p̄isi na yoko akilia ayal mesmesu e mrapa napo naṃa popon yeririna kiena kieta Suṃe la ayal ea, a p̄isi na akilia akila naṃa naga kilia kekarana make kiamiu p̄elaga punu ga. A yoko mras wo lala kilia imi ṃalivi e kiamiu malena lala a e ṃena ga e kiamiu yuṃaena lala, a p̄isi na kiamiu kiliaena e Ntewa kilia va merorol manenea.

¹¹ Imimi lua memlen mesape p̄isi na pupia puriukawaena kiena ne Ntewa suṃa kila amiu ṃena ga aṃarera, vena akilia asuṃalar amiu e pog ṃarera, a vena kiamiu sitomiena ve piavi, a akekara ga e pog la ne sanene.

¹² Ita na monar tevisa potena va Arimata, naṃa kila ita ṃena ga temio li nalelagaena wa taṃena lala, tekilia tokus lalimana loyuṃa e kiena nasuṃenena na yomerarava nena,

¹³ komin naga p̄urelua ita rui petan ṃareraena na yemalolo, ana naga mlen plan ruru ita tepa e nasuṃenena kiena ne narina nene, naṃa naga kekarana naga paṃisi.

¹⁴ Ore, Ntewa naga p̄erelua ita p̄isi rui, naṃa piewo ita komin kieta mlamulena viowa lala.

Kristo pe p̄arun yo yau wetelu

¹⁵ Narina nene, naga Kristo nene, naṃa naga pe nono tai naṃa tekilia tevisuia, naga kiena ne Ntewa naṃa taṃatete tevisu naga, naṃa naga pe ṃearun make suri la punu ga naṃa Ntewa sii la.

¹⁶ E ga e Kristo nene, Ntewa sii make sur punu ga,
naṃa ma e peni a e yomarava,
naṃa tekilia tevisuia a naṃa taṃatete tekilia tevisuia,
amio sur la naṃa apisuar ke yo yau, sa naṃa p̄arin suṃe lala, naṃareraena lala, yerkawa lala, a navisi lala.

Ntewa sii make suria e Kristo,
a Ntewa sii make suria pe kiena ne Kristo.

¹⁷ Kristo naga sike pa sumon sur taṃena la rui,
a naga mligan ruru make sur la nene, asuṃa amiyuṃae ruru ga e lelela.

¹⁸ Kristo pe purṃes nen malena kiena nalotena,
a naga pe p̄arin lotena nene, sa naṃa lotena nene naga pe tasnena.

Naga sumon p̄es yaru la naṃa amal sina e marena,
ana sanene naga kila sane nanagane naga sike laa metavan make sur taṃena lala.

¹⁹ Kristo to metavan make sur la sanene, komin naṃa Ntewa taṃan kiena naurarena sike e naga, sa naṃa kiena malena wetelu a kiena naṃareraena sike ea.

²⁰ E ke e Kristo nene na wa, Ntewa p̄ar ke sina ga sur nae ma e peni amio yomarava nini awasuṃe ke sina ga vana.

Naga kila yo yau wetelu kilia imi ve mara wo ke sina ga amio naga, nanene e

ga e tana ne Kristo naþa mlau e laki torovia.

Amiu ave marawo ke sina ga amio Ntewa

²¹ Nanua sumo, kam na ape wolawa ga, a asike laa perinan Ntewa, a ape kiena nasinekar ga, komin kiamiu sitomena viowa a kiamiu þelaga viowa lala.

²² Ana nanagane, naþa Kristo pimi pe yaru sane ita, kiena marena kila ita teve mara wo ke sina ga temio Ntewa. Ntewa kila sanene, vena kilia were amiu aimi puna naþa ave yar wa kemua lelaga, a ayekiki ruru wo, a naþa ve sur viowa re nena tai teke e amiu.

²³ Ana nanene na kilia ve sanene, visae asumãlu ga m̃arera ase Kristo, a visae amlelaga ke e naga wa. Popon amiu ve auresun amiun re naþa auarar manene lelagaena e navisaarena lala kiena ne Ntewa, monar alelaga sane yoko naga monar la sur punu ga van amiu naþa amloge rui e nalologena wo nene, naþa yeririna na yomarava la amloge rui, naþa inu Pol in na nepe yaru na lologonena.

Pol miyuãae m̃arera komin li nalelagaena lala

²⁴ Nanagane nemloge piowa e tasneu komin amiu, ana in na nekekara ga ea. Nanene naga sa naþa nesuãa nemiyuãaen sur na loge viowaena make ga e tasneu, naþa Kristo naga mliganar inu vena nowaria, sa naþa naga þar þisi rui, vena neiila þegas nen li nalelagaena lala vena asumãlu m̃arera.

²⁵ Ntewa mligan inu vena neimi ve sa yaru na yuãaena tai na þegas nen li nalelagaena lala, a nagane nekilia neiila amiu e yuãaena nene naþa Ntewa mligan e luãau, nanene vena nevisawal kiena visena va yeririna lala vena akilia make ga.

²⁶ Kiena visena nene sane visena tai naþa nakonua konua rui, tapoloun ga e yermarua lala, naþa la pe akilia re nenaga, ana nanagane Ntewa kila pimi merarava pan kiena li nalelagaena wa lala.

²⁷ Kiena sitomena naga pe na kilaen sanene narui, sane visena nene naþa kiena yeririna la naþa le Yu lala, la pe

amloge kilale re poli, ana þisi na naga visawal kana sur nowo ne lala, naþa po manene laa, va la naþa pe ape le Yu re poli. ?A visen tapolou nene pisa ya? Naga pisa sanini narui, pisape Kristo naga kilia suãa e losinemiu lala, a amiu akilia alelaga asape þisi na Kristo naga kilia kila amiu akilia asikol Ntewa e kiena malena wo nae ma e peni.

²⁸ Imimi lua mesuãa memlologon ke Kristo ne nanene narui pan yeririna lala, mesuãa mepisa ke pan la mepisape la monar avisuar ruru la, a mesuãa mepian la ke e manmaruaena lala. A visae lapasia naþa kiela sitomena lala a kiela lelagaena lala marua ruru wo, la akilia aimi asumãlu amio imimi lua e marana ne Ntewa.

²⁹ Nesuãa nemiyuãae ke m̃arera paþisi komin sur ne nanene, ana silaga nesuãa nemiyuãae ke e pupia namareraena nene naþa Kristo naga kokonia inu ea.

2

Monar amiu alelaga m̃arera e Kristo

¹ Ee, naga sa naþa nepisa ne, naþa nesuãa nemiyuãae m̃arera komin amiu, a komin m̃ena ga la naþa nae Laotisia a amio m̃ena ga yeririna taþena lala naþa la pe apisuli re marau pogos tai poli wa.

² Sineun nesape nekila kiela sitomena suãalu m̃arera suãa ga, a vena kiela sinesiena lala kilia sikol ruru sinela lala la aimi ave taaga. Sineun manene nesape þisi na la atol pupia nakilia wanen suri nene naþa sumo na la pe akilia re poli, naþa naga Kristo ke narui, ana þisi na kiela sitomena lala ve veve lua re sina.

³ Naga nene komin naþa e Kristo, yeririna lala la akilia alual sur la naþa powo na manmaruaena amio na kiliaena kiena ne Ntewa, naþa naga þarwania suãa ga e Kristo.

⁴ Nesuãa nepisa ke visena nene pan amiu, vena taþatete yeririna lala akila gola kiki van amiu vano-o aure kiamiu sitomena lala va ve taþena, e kiela visokanena na manmaruaena lala.

⁵ Nepis sanene pan amiu komin naþa nesitom manene amiu paþisi. Pe sur korena ga naþa tasneu sike laa perinan

amiu, ana silaga kiau sitomena sike amio amiu. Ana nekekaran manene amiu mēna ga, naŕa nemloge asape amiu na pe asu re ga sanene poli, ana asumā amiyumāe mesmesu ruruia, a asumā apa veraga aŕasine ke Kristo mārera.

Kieta malena monar suŕalu se Kristo

⁶ Komin naŕa ita tokus Kristo Yesu naga pe kieta Suŕe rui, silaga monar teyal ga e naga,

⁷ a naga monar ve sa naŕa ŕeligas nen kieta malena, pona yumā na kieta malena monar suŕalu su metava e naga. Ve sanene, kieta naviawaena e naga kilia imi mārera laa sane silaga, sa naŕa apian ita e ŕisi rui. Ana silaga, monar tevisa luen ga potena vania.

⁸ Ana amiu monar avisuar ruruia vena ŕisi na taŕatete yeririna lala aimi aviar amiu e visena la naŕa taveve ga namanmaruaena kiena ne yeririna, pona navianena la naŕa pulen ga nakiliaena na yomarava nini. Visena korena la nene pe navisokanena ga, a la amolue ga kome sitomena marua kiena ne yeririna lala, a la amolue e lepas kiena ne yermare lala amio kimi lala, ana la pe amolue re e Kristo poli.

Kristo naga pe ŕarin sur punu ga

⁹ Ntewa naga mligan kiena malena amio kiena namāreraena make ga sike e tasnena ne yeririna nene naŕa Kristo,

¹⁰ naŕa naga pe ŕarin sur la punu ga, a naga su metavan namāreraena taŕena lala. A e ŕelaga mā nenaga nene, Ntewa mligan kiena sur tanea lala asike e kiamiu malena lala, amiu naŕa asike e Kristo.

¹¹ Ana komin naŕa amiu asike e Kristo, naga te plan ŕelaga viowa lala a sitomena viowa lala vetan amiu, sa naŕa naga kila ŕaviu e amiu, ana pe nepisa re ŕaviu nene naŕa yaru la asumā akila ke poli, nepisa ke ŕaviu taŕena tai naŕa Kristo naga kila, sa naŕa naga ŕar plan napiowaena lala e kiamiu malena.

¹² A pogos naŕa la akee amiu, naga sa naŕa Ntewa sin amiu amio Kristo, a naga kila amiu amal mēna ga amio Kristo,

naga nene komin naŕa amiu aŕasine namāreraena keviu nene kiena ne Ntewa naŕa kila Kristo mali sina ga e marena rui.

¹³ Ana amiu la nene, nanua sumo Ntewa pisu amiu sa ga naŕa kiamiu mlamulena piowa lala kila amiu amare pa rui. Amiu na pe ape ŕaviu re sane le Yu la poli, ana Ntewa pisu amiu sa naŕa kiamiu malena pe pe ŕaviu re mēna ga poli, sa naŕa kiamiu malena pe pilon ruru re poli wa, a ŕelaga viowa lala sike e amiu wa. Ana nagane, naŕa asikol amiu amio Kristo, Ntewa mla malena viu pan amiu ŕisi. Ita tetol malena viu nene komin naŕa Ntewa na piewo ita vanon kieta mlamulena piowa lala,

¹⁴ a naga miyumu plan kieta lapui la rui. Nanua sumo, lapui la nene la asike e tus nene naŕa navisaluaena mārera kiena ne Ntewa sike ea, naŕa la apiar ita paŕisi, ana Ntewa mlalua sur la nene. Amio kana tus ne lala, sa naŕa sane suar make ga e laki torovia amio Kristo, ana pe lapui re si la nene poli.

¹⁵ E laki torovia nene, Kristo taulu sur taŕena la naŕa puriula mārera, a naga kilaro nena namāreraena kiena ne yermare lala, sa naŕa naga taulu la e pupia mara tai, ana naga kila kiena nasinekar la nene aimi ave sur korena ga e marata ita yeririna lala, vena ve tesitom re si tevisave la ato laa metava.

Kristo naga pe ŕarimiu

¹⁶ Visae ve sa nene, amiu na monar ve ataŕan re yaru tai visaluŕar amiu visave ve akan re suri nene, pona ve amun suri re nene. A amiu na monar ve ataŕan re naŕa yaru tai māreran amiu vena ataveve kiela ŕelaga marua lala e lepas na sur sane legiena wa la na kasa, pona e lepas nen ŕaŕagena na kupario viu, pona e lepas na legiena na olua.

¹⁷ Navisaluaena la ne sanene, yeririna lala la apisa vena akilali naŕa alual mrapa naŕa mesmesu, ana la sa ga ninun sur ga naŕa naga pimi ŕarpo re yo poli wa, ana purŕes nen sur lelaga punu ga, naga Kristo ga.

18 Yeririna la p̄asia asum̄a ga naṗa la asitom ke asape la apo manene taulu amiu, komin naṗa la apisu sur la moki e kiela m̄eniena lala, ana la asitom ke asape la akilia manene e lepas nen navisi lala. Ana asitom ke asape la apo, akila kiela sitomena lala sike ga tano yo, taulu yeririna taṗena lala, ana peraga, la nene la sa ga keriko. La asum̄a apilave ga e kiela visena lala, naṗa la apisayu manene laa ke sina ga paṗisi, ana kiela sitomena lala pulen ga vilaveena amio kiela sitomena korena taṗena laṗasia, vano vano-o tol naṗa la asum̄a amieluar la ke sina ga. Ve sanene, amiu ve ataṗan re si la nene aliṗere amiu avisave amiu na pe atol re sur nene poli wa naṗa la asike e ṗisi rui,

19 komin naṗa la nene la amligan Kristo ṗisi rui, la pe apuarar ruru re si naga m̄arera poli sa naṗa naga pe ṗarila. Ana Kristo naga sum̄a ṗuarar ruru ke ga la naṗa la sane komṗas nen tasnena, a naga sum̄a pagan ruru la, sum̄a kawē mesmesun ruru kilamerpu amio kana kowiu lala, ana tasnena naga sum̄a miyum̄ae po a sum̄a kapuru po sa naṗa Ntewa naga sinenania.

Amiu na atol malena viu e Kristo

20 Inu nekilia nesape sa naṗa Kristo naga mare nanua sumo rui, amiu m̄ena ga amare amio naga, kila naṗa e lepas na ṗelaga viowa, amiu amare e ṗisi rui, a pe pon re si ṗelaga viowa imi tol kiamiu malena poli. A Kristo naga ṗurelua amiu m̄ena ga rui e m̄areraena na sitomena nasumo lala na yomarava nini, amio kiena yermare lala. Sanene narui, sineun nesape neviun tan amiu sanini: ?Sanape asum̄a amialoro ke sa naṗa amiu ape yaru na yomarava ke ga wa? ?A komin ya ne amiu asum̄a amlogear ke navisaluaena marua la naṗa apian e sumo, naṗa la apisa apisape:

21 “Amiu ve auarar re sur nene,” pona “Amiu ve amunli re sur nene,” pona “Amiu ve atol re sur nene.”

22-23 Ana pe lelaga naṗa yaru la amloge visena la nene, ana la asitom asape navisaluaena la ne sanene ape manmarua

ruru po, ana navisaluaena la nene la amolue ga kome sitomena kiena ne yar lala, la pe ape lelaga re poli e vianena kiena Kristo. La apisayu ga sur na yomarava la nini, sa naṗa kinanena, pona sur na munena, ana sur la nene taṗatete iila amiu, a la taṗatete m̄ena ga akila kare kiamiu malena, komin naṗa visae olavia pona oyum̄aenia, ṗisi na sur la nene yokorena akokovio.

Pona yaru la apisirilua visaluaena la nene vena akilali yum̄aena wo laṗas yo, naṗa la apisa apisape yaru monar len sanene pona sanene, a pona la apisa apisape yaru monar ligan kiena sitomiena sū ga tano sanene pona sanene, a pona la apisa apisape yaru monar kilali naṗa kawē ruru tasnena sanene pona sanene e sur la naṗa m̄arera pan naga.

Ana nevisa van amiu, sane visaluaena la ne sanene, la pe puriula m̄arera re nena poli vena suwoen sitomena viowa lala a ṗelaga viowa la naṗa sike e los nen yaru.

3

Malena naṗa mekiki ruru po a pe wa ruru nenaga

1 Amiu la nene, Ntewa naga pisirlua amiu amal sina ga e marena amio Kristo, ana sanene na monar aṗionli ga sur la naṗa nae ma e peni, e yo nene naṗa Kristo naga tom̄a tano e lepas nen Ntewa na ṗamarua.

2 Amiu na monar asitomaṗal ga sur lala nae e yo nene, ve asitom re si sur na yomarava la nini,

3 komin naṗa sane amare e ṗisi rui. Nanagane kiamiu malena viu naga tapolou amio Kristo e Ntewa,

4 komin naṗa Kristo pe purṗes nen kieta malena nagane, ana suraunia, e pogos naṗa naga kate e maran yeririna lala, yoko ita m̄ena ga takate temio naga e kiena pupia naurarena.

Kiamiu malena na sumo monar ṗisi

5 Amiu na monar awe plan punu ga ṗelaga lala na yomarava nini e kiamiu malena lala, sane nataṗaena lau, sur

na mawaena lala, nasinenanena viowa lala, nakekaranen mlamulena viowa, a navinavinayaena mēna ga. Pelaga la nene pioyowa ga, a navinavinayaena nene, naga sa naḡa yaru kila sane sur la naḡa naga sinenan manene laa paḡisi apimi sa naḡa kiena ntewa taḡena lala.

⁶ Komin ḡelaga ne la nanene narui, Ntewa sinena mimi paḡisi, ana kiena nalipereena naga sumā pimi ke pan la naḡa la pe amlogear re naga poli.

⁷ Sumo na, kiamiu malena sa ke nene narui, naḡa amiu amiyal ke ga e ḡelaga la nene,

⁸ ana nagane, pogos na liganen ḡelaga la nene, pogos na sur la nene aḡisi e kiamiu malena lala. Ve sanene, amiu taḡatete sinemiu mimi, a taḡatete avis kapuru va yaru taḡena, a taḡatete asumā ave erau viowa van amiu. Pisi na taḡatete avismumun yar taḡena, a ve avisa re visena la naḡa pe kororaki.

⁹ A ve avisa kotalia amiu re mēna ga, nanene komin naḡa amiu na amlalua ḡelaga marua naḡa apaeme amio naga ḡisi rui,

¹⁰ a amiu na amiyen ḡelaga viu tai e amiu, sa naḡa malena viu tai naḡa Ntewa naga siia pe kiamiu. A pogos punu ga, Ntewa naga sumā kila ke malena nene pimi pe urviu ke sina ga, vena kila amiu akilia ruru kemua naga lelaga, a vena kila amiu aimi laa ve sa naḡa ave kiena totou.

¹¹ Komin sur ne la na nene, ita na ve teliḡere re si yaru lala, sa naḡa tevisave laḡasia ape le Yu, ana laḡasia ape li na yo taḡena ga lala, pona laḡasia la ape ḡaviu, ana laḡasia pe ape ḡaviu re poli, pona laḡasia la ape suḡe, ana laḡasia ape li nayumāena kiena ne suḡe ga lala. A ita na ve tevisa re mēna ga tevisave yaru laḡasia la apian ruru la ana akilia suria, a laḡasia ape yer ura ga, pe akilia re sur tai poli. Ana pupia suri taaga ga naḡa tekilia tevisuvisu yaru ea, tevisave naga mlelaga e Kristo pona ve lelaga re, komin Kristo naga sike e sur punu ga a e yar punu ga.

Amiu aligan malena viu nene e amiu

¹² Pogaga, sa naḡa Ntewa naga sinenan manene amiu paḡisi, ana naga ligan amiu vena ave kiena yeririna wa lala, monar ayen ḡelaga viu nene e amiu sa naḡa naga sinenania. Pelaga viu nene naga sa naḡa sur la nene asike e kiamiu malena, sa naḡa nasineyeena yaru, nasinewoena, navatanoena, namomāuena, a namalu-mēna.

¹³ Amiu na monar ve sinemiu kar amiu re vilaga, a visae amiu yar ve lua, sur tai sike likan lalua nene, ḡisi na monar avieviewo lalua. Ana monar amiu avieviewo amiu, e ke e ḡelaga nene naḡa kieta Suḡe naga piewo amiu.

¹⁴ Ana amio ḡelaga wo taḡena la nene naḡa monar ayenia, monar ayen mēna sitomena e amiu, komin sitomena naga kilia sikol ruru ḡelaga wo la nene vena la ayumāe ruru ve raaga, vena la aimi ave taaga.

¹⁵ Pisi na sumāre naḡa Kristo naga mligania naga kilia visuar sinemiu lala, komin naḡa Ntewa naga pioproan amiu vena ave taaga, naḡa amiu punu ga asikol ruru amiu amio naga e ḡegas tai naḡa naga pe ḡarunia, vena silaga sumāre nene kilia su luen ga amio amiu. A silaga avisa potena e sur punu ga.

¹⁶ A visena wo kiena ne Kristo, silaga naga monar imi sa naḡa mali e sinemiu wetelu, komin naḡa kiena visena la nene naga po tanea wa. Amiu monar asumā avian amiu ea, a amiu ga asumā akila ruru amiu ke sina ga e kiena manmaruaena wo lala. A popon asumā ayau va Ntewa e sam lala, a yauena wa lala, a e yauena lala na yeluaren Ntewa, ana e pogos naḡa asumā ayau ke sanene, ḡisi na sinemiu la punu ga ulen visaen potena vania.

¹⁷ Sur punu ga naḡa amiu akila, a visena punu ga naḡa avisa, ana monar akila e kia kiena ne Yesu, naḡa kieta Suḡe, a pogos punu ga na monar avisa potena kome naga va Ntewa Arimata.

Malena viu kiena yaru lala

¹⁸ Amiu sira lala naḡa atalopa rui, monar avatano e womiu lala, sa naḡa

mesmesun naþa sira naþa mlelaga naga kila.

¹⁹ A amiu yermene la naþa atalopa, monar asitom manene womiu lala, a kiamiu þelaga lala monar ve melkalka manene re silaga van la.

²⁰ Amiu sisi lala, monar alogear arimamiu lala amio anemiui lala, komin naþa kieta Suþe naga kekaran þelaga nene paþisi.

²¹ A amiu arimala lala a anela lala, þisi na sinemiui lala ve vilul re va narimiui la silaga, komin naþa visae ve sanene, akila kare la, akila kiela sitomienu lala loloru.

Suþe lala a kiela yar na yuþaena lala

²² Amiu yar punu ga na yuþaenu kienene suþe lala, silaga monar alogear kiamiu yerkaua la nene. Pisi na ve akila re sanene e ga e pogos naþa la asike amio amiu, vena akilali naþa la akekaran amiu, ana silaga monar ayuþae naþa kiamiu sitomena la ve lelaga make ga, sa naþa e yuþaenu nene, asuþa amlogear ke kieta Suþe silaga.

²³ E yuþaenu ya naþa amiu akila, monar akila naþa akekarania, sa ke naþa asuþa amiyuþae kienene ne Suþe, pe kienene yaru re ga la poli.

²⁴ Popon asitoþal sa naþa Suþe ke nene narui þisi na naga la kienene lalimana van amiu, sa naþa naga pul amiu, komin yerkaua ruru napo naþa ayuþae vania, naga Suþe Kristo.

²⁵ Ana yaru naþa suþa kila ke pe mesmesu re poli, þisi na naga kila la maran ke sina ga vanon kienene napiowaenu nene lala, komin Ntewa pisuveve yuþaenu kienene ne yar la punu ga mesmesu ga.

4

¹ Ana yerkaua lala, amiu þenu ga monar akila mesmesu ruru wo va yaru lala e kiamiu yuþaenu lala, komin naþa amiu þenu ga kiamiu Suþe tai sike ma e peni naþa þisi na naga liþere kiamiu þelaga lala.

Pol naga pian la

3:19 Epis 5:25; 1Pit 3:7 **3:20** Epis 6:1 **3:21** Epis 6:4
Epis 5:16 **4:9** Pilimon 1:10-12

² Amiu na monar aþarera e lenienepogos punu ga, a monar alen naþa asitom ruru e sur la naþa avisa e lenienenu, a naþa kiamiu sitomena lala naga suþa pisa ke potenu pan Ntewa.

³ Sineun þenu ga nesape monar alen wo imimi, vena þisi na Ntewa vike kiamimi mrapa mekiliana melologon sur wo nene naþa sumo na tapolou, naþa visenu kienene ne Kristo, naþa nanagane na nesike e lokap vanonia.

⁴ Awis, sineun nesape alen naþa þisi na nekilia nevisi wo, vena kila visenu la nene merarava, sa naþa mesmesun ga naþa yoko monar nekila.

⁵ E þelaga la nene naþa asuþa akila ke e maran yar la naþa la pe amlelaga re e Kristo poli, monar ave manmarua wo vena akilia ataveve kiamiu pulmas lala, vena aurela aimi e Kristo.

⁶ Amiu na monar avis ruru amio la, e ga e visenu lala naþa nasinewo a kiki, ana la aloge visenu la nene aloge wo, a monar akilia mrapa na visataþelaenu visae aviun naviunenena kar ga lala e lepas na kiamiu viawaenu.

Pol mligan yaru la lua apa pula

⁷⁻⁸ Kieta wolai wo nene Tikikas, naþa naga sike amio inu, þisi na neligan naga la þaki nene iþasu pun amiu vena visawal van amiu visave imimi mesike sanape, vena akilia aloge wo. Nekekaran manene kieta wolai nene paþisi, naþa pogos punu ga naga þareran naþa iila inu e yuþaenu kienene ne Suþe.

⁹ A kieta wolai taþenu naþa erau wo nene Onesiþas, naga þenu ga þisi na taveve Tikikas iþasu pun amiu. Onesiþas naga nae ga kiamiu yo, a naga þenu ga suþa mlelaga ke e Kristo. Lala nene þisi na avisawal van amiu, e sur la punu ga naþa kakate ke e yo nini.

Visenu maro kienene ne Pol pan la

¹⁰⁻¹¹ Aristakas naþa naga sike e lokap amio inu, a Mak nene naþa naga wenla Panapas, a Sisas naþa apio naga Sastas, la telu nene apisape asitom amiu paþisi. Mak nene, kana visenu piþasu tol amiu

3:22 Epis 6:5-8 **3:25** Epis 6:9 **4:1** Epis 6:9 **4:5**

pa rui, a pisape visae naga imi kome lepas nen yo na pun amiu, monar akekarania vena aure naga sukol amiu.

E le Israel la naþa amlelaga e Kristo þisi rui, la ga telu nene amio inu, imimi memiyuþaen ke yuþaena nasuþenena kiena ne Ntewa, a la telu nene la amiila inu keviu paþisi rui e pogos m̄arera lala.

¹² Eþaþras nene naþa naga m̄ena ga amiu kiamiu yar tai, naga pe yar wo tai na yuþaena kiena ne Kristo Yesu, a naga m̄ena ga pisa pokolulagi pona pokolemalo pan amiu, pisape silaga naga suþa mlenwo amiu ke m̄arera paþisi, vena akilia asuþalu m̄arera, vena amarua ruruia e Kristo sane keyowo, a vena asuþa aþarera naþa akila ga sur la naþa Ntewa sinenania.

¹³ Sineun nesape nevisa mesmesun van amiu, nevisave yar naþa Eþaþras naga suþa miyuþae m̄arera manene paþisi komin amiu, a komin le Laotisia lala, a le Erapolisi m̄ena ga lala.

¹⁴ Kieta erau wo nene, naþa Tokta Luk, amio kieta wolai taþena nene Timas, la m̄ena lua asikena a lalua apisa apisape lalua na asuþa asitom amiu paþisi.

¹⁵ Sineun nesape aligan kiau visena van kieta wolai lala a vineta lala nae Laotisia, amio sira nene Nemeva amio þegas nen nalelagaena lala naþa asuþa apiora ke e m̄ana yuþa, avisave in na nesuþa nesitom la ke paþisi.

¹⁶ Ana yoko pogos naþa amiu aulo kiau m̄aki nene þisi, awis sineun nesape aligan van le Laotisia lala, vena auloia van þegas nen li nalelagaena lala e yo nene, a monar aulo m̄ena ga kiau m̄aki taþena nene naþa þisi na le Laotisia lala la aligan imi van amiu.

¹⁷ A kiau visena tai naga va Akiþas, nesape “Ko ovisuar ruru yuþaena nene naþa Suþe naga mligan e lumoþa, monar okila make ruru yuþaena nene.”

¹⁸ Ana nanagane, nelalua kilamemego e limana ne yar na sirien m̄aki, ana inu ga Pol, nesiri kiau visena maro nini van amiu e ga e lumau, nevisa pokolulagi pona pokolemalo van amiu. Amiu

ve sinemiu þesan re sen la naþa apiar manene inu ke ne, a lemamiena kiena ne Ntewa sike make e amiu.

Inu, Pol.

**Maki Nasumo Naña Pol Siri
Pa Pan Li Nalelagaena Wa
Lala Nae Garu
TESALONAIKA
Visayuena Na Tusi Nene**

Komþasnen suniena plas na tusi nini

Pulkumali keviu nene Tesalonaika naga pulkumali keviu na provens nene Masetonia, naña mēke vatanon Parin Suþe keviu nae Rom sumo. Pogos naña Pol molue Piliþae, pa ma Tesalonaika mlologon lologena wo e yo nene, ana suñare nene siaria. Ana siraunia pe yam piyavi manene re poli, lus nae Israel laþasa e yo nene apisa karea, la apieluenia komin naña apisu sane yaru moki naña pe ape lus nae re Israel poli, nanua sumo la amloge kiela vianiena lala, ana pogos naña amloge lologena wo naña Pol pisawalia, ana amlelaga e Yesu. Ana lus nae Israel la nene sinela kari Pol, ana amēnelua e yo nene, ana pae pulkumali si tai, Perea. Siraunia, naga pa tol pupia pulkumali naña Koren, naga mloge lologena kiena li nalelagaena lala nae Tesalonaika e kiena erau Timote, naña miyuñae ke amio naga.

Pol siri þesan kiena mñaki nini pa li nalelagaena lala nae Tesalonaika vena visirluaen kiela sitomiena, a vena kila meraravan va li nalelagaena lala nae yo nene sape naga sitom la mñaga, a Ntewa sike amio la. Naga pisa potena pa Ntewa komin naga mloge sape asuñā amlelaga ke mñarera e Ntewa, a sinela sii ke yaru lala, a pisa panila vena la asitomñal si kiena þelaga wo e pogos naña sike amio la, vena atavevea.

A naga pisa tamē kiela viunena lala naña apiyun tania, asape yoko Yesu wasuþe si ve sanape. Sinelan asape akilia meraravan sane visae yaru naña marþan þesa ana Yesu ve vitom re wa, yoko tol malena naña ve uro re, pona peraga. A sinelan akilia naña yoko Yesu wasuþe pogwai. Pol pisaruru panila, sape monar ayuñae ga, naña kiela sitomena

la varuru ga suñaga, a naña aligan kiela sitomena lala suñalu mñarera e Yesu vena asuñātea, vano vano-o tol pogos naña naga wasuþea.

Komþasnen tusi la na nini

Visena þesa 1:1

Pol kekaran la a pisa potena pa Ntewa vanon la 1:2—3:13

Pol piyani la e þelaga kiena yaru naña lelaga 4:1-12

Pol piyani la sape yoko Kristo wasuþe sina 4:13—5:11

Pol kila make kiena vianena lala 5:12-22
Visena maro 5:23-28

Visena na sumo

¹ Inu Pol, nemio Saelas a Timote, imimi telu mekekara paþisi nasirien mñaki nini imi van amiu, þegas nen li na lelagaena lala e suñare na pulkumali naña Tesalonaika. Memlelaga sane kiamiu malena lala asike ruru ga e Arimata Ntewa amio kieta Suþe Yesu Kristo, ana memlen ke sane lemamiena a suñarena sike amio amiu punu ga.

Pol lala akekara komin namasisuena kiena le Tesalonaika lala

² Lelaga, silaga na memlen ke pan Ntewa Armata, monar mevisa potena vania vanon amiu.

³ Mesitomñal amiu ke e kiamimi leniena lala sanini, taþatete sinemimi þesania sanape naña kiamiu naviawaena, amiyuñae mñarera tavevea, a sanape naña kiamiu na sinesiiena pimi plamolue ke e kiamiu þelaga wo lala, a sanape naña kiamiu sitomen piyavi lala kila amiu asuñal mñarera ruru ga po e kieta Suþe Yesu Kristo.

⁴ Erau lala, mepisuluþar sane Ntewa pe sinen sii amiu re ga poli, ana naga kilologia amiu mñena sane ape kiena lelaga,

⁵ komin pogos naña memlologon lologena wo pan amiu, naga sa ga pe visena korena re kiena yaru poli, ana naga pimi pan amiu sane visena urmi tai naña mñarera. Mareraena kiena ne Ninuna Wa sike ea, a naga miyur ruru sinemiu la pano-o amlelaga.

Amiu akilia kiamimi þelaga la pogos naña mesike memio amiu, moþaryon

pařisi na kilaen sur punu ga nařa mekilia mekila na kilaen nařa alelaga,

⁶ řisi na atolia, apimi sa nařa ape kiamimi nataveveena lala, ana pe kiamimi re ga poli, apim ape nataveveena kiena Suře. Pe sur korena ga nařa lala tařena la akila pupia naloge viowaena a akila amiu atol pog m̄arera e pogos la nene, ana aporworun ga lologena wo, ana pupia kekarena kiena ne Ninuna Wa sike e amiu.

⁷ E kiamiu řelaga wo la nene, sane akuspo yom̄arua, asumon vena kipianen mrapa van li nalelagaena tařena lala e lepas na yo la nařa Masitonia amio Kris.

⁸ Lologena wo kiena Suře molue e amiu pa vanua, pe e re ga e yo lua nene poli, a pa m̄ena yo punu ga la ne, kila yeririna la amlogeyu kiamiu nalelagaena e Ntewa řisi rui.

Naga nene po pařisi, ana nanagane sane e yo ya nařa visae meva si ea, pe sur na visaen re si poli, komin visena la punu ga pimi e amiu pa tol la rui!

⁹ Pe mesun re si pan li tařena la nene poli, ana lala asun ke sina ga pan imimi, apisayu sanape nařa amiu le Tesalonaika lala ařure imimi pimi pun amiu, a sanape nařa apilopu amiu, akuwan plan kiamiu nono na marena lala, apim ape yeririna kiena ne Ntewa Mali nařa pe lelaga.

¹⁰ Ana amio naga nene, apisayu ke m̄ena nařa amiu, asum̄al ke m̄arera, asum̄a asum̄ate ke narina ne Ntewa, Yesu. Naga yoko imi m̄alivin ita sina ga, vanon Ntewa pisirlua sina ga naga rui taulu marena, řisi na ligana naga imi m̄alivin ita yam na luania, vena tamalia itaena e pogos na liřereena na pimi ke ne.

2

Pol pisayu kiena yuřaena pogos nařa sike gar Tesalonaika

¹ Erau lala, memloge visena tai asape memiyuřae piowa ga, ana nesitom nesape apisu kilale sane kiamimi nayalin amiuena naga řar mras wo lala moki.

² Nanua susumo, pogos nařa memiyuřae gar Piliřae, apis kar ke

sanene pan imimi rui, a sa nařa amiu akilia pa rui, pogos nařa mem̄alivin amiu, akawe imimi ke sina ga pařisi. Ana mepisu sane Ntewa miila imimi m̄aga, pe memaraun re naloge viowaena poli, mořaryon ga na lologonen lologena wo van amiu.

³ Memlologon pan amiu, ana nekilia nevisa nevisave kana visena lala pe sa re nařa yar lařas apisasa ke ne poli. Pe amolue re ga e kiamimi na kila palen tai poli, pona e kiamimi na sitom viowaena tai, a pe naga re ga nařa metařali na were kare amiuena e poli, peraga.

⁴ Pe sa re nena nene, ana e pogos nene, imimi sane yeririna la nařa Ntewa mligan kiena lologena wo e limamimi, řisi na mepim mepisawal kiena visena nalelaga nene pan amiu. Imimi na pe memiyuřae re nařa yeririna la avisu imimi sanape poli, ana imimi sinemimin ga mesape vena Ntewa kilia kekaran sur ya nařa memiyuřaenia, komin naga ga kilia sur ya nařa sike e losineta peve taaga.

⁵ Amiu akilia ruru po sane pe mepimin re nakuwanen visen kiki pona visen vilave la van amiu poli, a Ntewa kilia ruru m̄ena sane pe sinemimi sun re kiamiu sur tai poli, pona mepimin vena visa kotalia amiuena.

⁶ Ana e pogos m̄ena nene, pe memla re nena sitomena tai vena kilaen nařa sane amiu pona yar tařena lala ayeluar kiamimi kia.

⁷ Pe lelaga nařa mepimi mořalivin amiu sane li nalologena lala kiena ne Kristo, nařa mesmesun sane monar akila sur ve moki vena visuar imimiena, ana pe mesitom̄al re sur nene poli. Imimi mepimi memalum ga, mekila pan amiu sa ga nařa auya tai pagan narina.

⁸ Mekekaran amiu sanene pařisi wa, sinemimin mevisawilwilin lologena wo kiena ne Ntewa van amiu, ana memloge sane mepinaia amiu pařisi, vano-o mesuřa metařan kiamimi malena vena iilaen kiamiu malena.

⁹ Erau lala, nepisa sanene, pe nepisokan re poli, komin akilia asitom̄al sanape nařa imimi memninu e yuřaena urmi

na limamimi e pogos nene. Memiyum̃ae ea legiena a kolemallo, vena kilaen sane pogos naŋa mesike memio amiu memlologon lologena kiena ne Ntewa, pe mekila re urmi pan amiu poli. Imimi ga mepisuar imimi, pe amiu yar re nena tai naŋa pisuar imimi poli, peraga.

¹⁰ Imimi mesitom mesape e maramiu, a e marana ne Ntewa, mekilia mevisawal mesape pogos naŋa mesike likan amiu li nalelagaena lala, kiamimi malena pe sur tai piowa re e poli, mesmes ga, a pe wa ruruia.

¹¹ Pona asitom̃al ke yo wa, naŋa mekila pan amiu sane ata tai naŋa naga kila po paŋisi e naiilaen malena kiena ne narina lala.

¹² Mekila sinemiu la malum ruruia, memla visena na iilaaren la pan amiu, a memiilaar kiamiu sitomena lala vena monar akila kiamiu malena la mesmes ruruia e ŋelaga lala kiena ne kieta Ntewa, naŋa naga ga pio amiu vena aim loyum̃ae e naurarena wo na kiena nasuŋenena.

¹³ Sur taŋena si tai naŋa silaga mepisa ke potena pan Ntewa paŋisi vanonia, nane kiamiu ŋelaga pogos naŋa lologena wo pimi porun amiu. Amiu amlogeyuia, ana pe akovenlua re poli sane pe visen kien yar ga tai, ana apisuia sane pe lelaga, pe visen kiena ne Ntewa lelaga. A amiu naŋa amlelaga ea, apietavan losinemiu pania pano-o sum̃a miyum̃ae ke e kiamiu malena pimi tol nanagane.

¹⁴ Wolai a vineu lala, nekilia sane pogos naŋa amlelaga, pe piavi re poli naŋa yar la nae ke sina ga pun amiu asum̃alun na kilaen viowa van amiu, kila apane pogos m̃arera tai paŋisi. Sanene na piowa ga, ana e lele nene amiu amiyal ke ga e mrapa taaga ga naŋa li nalelagaena kiena Yesu Kristo e sum̃are kiena ne Ntewa e lepas nae Yutea amiyal e nanua susumo rui. La m̃ena, pogos naŋa amlelaga, ana le Yu m̃ena la akila kare la paŋisi!

¹⁵ Ana ŋelaga nene, le Yu la asum̃a akilakila kemua nanua susumo rui pimi. Susumo, pe sinelan re navisawalena la poli, siraunia, lala ke sina naŋa akila

aŋem̃ar kieta Suŋe Yesu mare, a lala ke sina ga naŋa asum̃a aŋene imimi yam mok rui. Sur la naŋa asum̃a akila ke ne, Ntewa pe kekaran la re nena vanonia, komin asum̃a akakawe visena silaga.

¹⁶ Mesum̃a memlologon ke lologena wo pan la ga naŋa pe ape le Yu re la poli, ana pe sur korena ga naŋa pulmas nene na tamaliaen kiela malena, ana le Yu la nene asum̃a apisawo imimi ke ga, pe sinelan re naŋa meva mevisawal van la poli.

Kiela ŋelaga viowa la nene, asum̃a amiyakol ke sina metavan kiela mlamulena viowa la naŋa amiyum̃aen la nanua pimi, kila sane nanagane kiela naviowaena la nene piowa manene laa. Amiyum̃aen sanene pano-o pe asitom re sur tai poli, ana tekilia sane pupia na sinekar kiena ne Ntewa pitomin la ke rui.

Pol naga sitom la paŋisi vena visu la si yam tai

¹⁷ Erau lala, mesape mevisawal van amiu, mesape memligan amiu nanua ga ne, meŋure mepa li ve tokak ga, sinemimi miye amiu ga, sinemimin mesape mevisu si maramiu. Lelaga, tesutetai e tasneta, ana e losineta, tepe taaga ga.

¹⁸ Mesike sanene, mesape mekirawal si mrapa tai na im̃asen pun amiu, ana inu Pol neŋaryon yam moki paŋisi, ana yar viowa naŋa Yermare, naga kila wo ke silaga.

¹⁹ Ana komin ya ne mesape meim mevisu amiu sina? Naga nene komin a sina naŋa mowasine la? A si naŋa kila imimi mekekara? A si naŋa ve kiamimi mras nen yum̃aena wo, naŋa mekilia melogewonia pogos naŋa visae kieta Suŋe Yesu vim sina? Pe yar taŋena re si po, amiu ga narui!

²⁰ Pe lelaga paŋisi, amiu na sane tropi nowo tai naŋa metauluia, apim sane pupia purŋes nen sineyeena na kiamimi malena.

3

Pol pisayu naŋa pitetalia Timote pa katen la nanua rui

¹ Mesitoñal amiu ña sanene pano-o, mepisu sane peraga, imimi yar tai monar imi katen amiu sina. Pisi na mepisa mesape imimi lua Saelas monar mesu Atens sumo wa,

² ana yoko Timote iñasu pun amiu. Wolai nene, memiyumñan yumñana kiena ne Ntewa veraga memio naga, vena kilaen lologena wo kiena ne Kristo va vanua, ana nepisu sane naga pe yar wo tai na katen amiuena. Nekilia naña naga kilia iilaar amiu, kilia iila amiu vena kiamiu naviawaena sumñalu ñarera silaga,

³ vena ve sinemiu la kurkurun kare re pogos naña avane pogos ñarera la naña asumñapimi. Pog ñarera na sanini, tekilia ruruia sane pe lepas na kieta malena tai, naña ita li nalelagaena lala tañatete toure tania.

⁴ Ana visae tesitoñal ke ga wa, tekilia sane pogos naña mesike memio amiu, mesumña mepisawal ke pan amiu, mesape mepisusu ke pa rui sane yoko ve ve piavi re, yoko monar akila viowa van ita. A nanagane, sur nene pimi kate sa ke ga nene rui, naña amiu nena akus ke pañisi.

⁵ Sur ne na nene kila sane in na nemlogge sane pe pon re nesumña sanene poli, ana monar nekila sur tai vena neloge lologena tai sane amiu asike sanape. In na nemarau li ñaga sane yar viowa na tañalien yar nene, sa lual kiena mrapa tai nakila amiu en aloru rui, pisi na nesape nelogelia sanape, asumñal ñarera ke ga wa po sanape, komin piowa ga naña kiamimi yumñana wo lala e amiu imi ve sur korena sina ga. Sanene nepitetalia Timote pimñasu.

Timote ñasuñe si puna ne Pol amio navisaplanena wo e lepas puna ne la nae Tesalonaika

⁶ Timote pimñasu pisu amiu, ana nanagane ga ne naga ñasuñea pimi katen imimi. Pogos naña pimi, ñar lologena wo, pisayu sanape naña kiamiu naviawaena amio ñelaga na sinesiena keviu ga sike na wa, sumña poga ga, pisi na kila sineu kekara keviu. Naga mla kiamiu visena pimi pan imimi, sape asitoñal imimi ke

silaga, ana sinemiu visuen si maramimi pañisi, sa ga naña imimi ñana mesape mevisu si maramiu.

⁷ Ana pe sur korena ga naña mesike memlogge piowa sanene e yo nini komin naviowaena naña akila ke pan imimi, ana pogos naña memlogge lologena na kiamiu masisuena amiu kiamimi erau lala, memlogge sane pisirlua si kiamimi sitomena.

⁸ Memlogge naña asumñalu ke ñarera e Suñe, pisi na kila memlogge sane memal ruru sina.

⁹ Pogos naña memlen wo amiu ke sanene, mepisu sane pe imimi re naña mekila ke sur wo tai pan amiu poli, peraga, ana amiu na akila ke sur wo tai pan imimi, komin amiu akila ke naña mokus pupia kekarena e losinemimi, pano-o pe kiamimi visen re si tai navisaen potena van Ntewa vanon poli.

¹⁰ Naga nene kila sane sinemimin manene pañisi vena melen kolegiena a kolemallo, sane sa mekilia mevisu amiu sina ga, visae narin lele tai naña kiamiu naviawaena tai kulkulul li ñaga, ana yoko mekekaran vañisi naiilaen si naña kilia ñarera ruru sina silaga.

¹¹ Sur ne nanene naña nemlenin ke ñarera nanagane, sane kata Ata Ntewa amio kieta Suñe Yesu, avietavan kiamimi mrapa vena mekilia meim meialiali amiu sina.

¹² Pano tol pogos nene, nemlen ke pa Suñe, nepiun ke sane yoko naga kila kiamimi sinesiena kapuru ke imi sane kokonia ruru kiamiu malena vano-o tataroi va tol si yar tañena lala, imi ve keviu manenea maran taaga ga sa naña kiamimi sinesiena e amiu.

¹³ Ana amio naga nene, nemlen sane naga ligan sitomena wo tai naña ñarera ruruia e amiu, vena akilia auarar ruru kiamiu malena vano-o tol pogos naña kieta Suñe Yesu imi kate sina amio kiena li wa lala, ana e pogos nene akilia asumñalu e marana ne Ata Ntewa naña amerarava po, ape wa ruru ga asumñaga.

Pelaga na malena naþa Ntewa sinenania

¹ Erau lala, pogos naþa mesike memio amiu, mepian ruru amiu sanape naþa amiu akapuru laa sane e þelaga na malena naþa Ntewa sinenania, ana memloge sane akila lili mña rui, naga po paþisi. Ana e kia kiena Suþe Yesu, momareran van amiu sane ve aligan re, awaryon ga kilaen vano.

² Suþe Yesu mligan kiena navianena lala e limamimi na visawalen van amiu, ana akilia ruru la rui. Sanene, popon atavevea.

³ Poga, sur ne laþas nanene naþa Ntewa sinenan kiena yeririna la monar ayumñaenia. Kieta malena monar ve wa ruruia, sane ve tekila re þelaga viowa e lepas na yermene amio sira.

⁴ Ita punu ga monar tetaveve ruru mrapa mesmes na talopaena, vena yermene kilia su amio wona na sira naapo e þelaga naþa merarava ruruia, vena ve akila kare re si kiela kia lalua.

⁵ Sanene, pe pon re yaru talopa koskos poli taveve ga kiena sinenanen sira mñarera, komin nanene pe þelaga ken yaru na yemalolo ga lala, naþa pe akilia ruru re Ntewa poli.

⁶ Visae yar la akila ke ga þelaga wo silaga e nini, yoko wo vaþisi, yoko ve akila kare re si sur nowo naþa pe kiena kiela puruvi taþena lala. Amiu monar avisu ruru yo nene, vanon Ntewa mla ke nakoena silaga pan yeririna la naþa amlor ke e mlamulena viowa kar la ne sanene, sa naþa mepisawal pan amiu rui, mesape maramne amiu.

⁷ Asitomveveli naga nene. Pogos naþa Ntewa pio ita tepim tepe kiena yeririna lala, naga pe kila re vena kieta malena imi ulen si þelaga la naþa pe merarava re poli, a naga kila vena sane kieta malena imi ulen þelaga la naþa ape wa ruruia.

⁸ Sanene na, yar naþa pe kekaran re navianena la nene poli, naga monar visu kilale sane pe pe visen ken yeririna re la naþa naga miaslua poli, ana miaslua ke visena kiena ne Ntewa, naþa mligan

kiena Ninuna e ita naþa sane Ninuna naþa pe wa.

⁹ Sur si tai naþa nesape nesunyu van amiu, naga kieta þelaga ita li nalelagaena lala, naþa monar tekekaran ita tepe namratava taaga. Sur nene amiu akilia ruru þisi rui, pe pon re nesiriyu si van amiu poli, vanon Ntewa kilapian ita make ga rui sane naga nene pe sur wo tai po tanea paþisi.

¹⁰ Nekilia sane amiu akila ke pa sanene rui pan li nalelagaena lala nae Masitonia po paþisi, a nesape nevisa ke sina ga, nesape amiu auarar ruru þelaga wo nene, akila imi ve keviu laa sane likan amiu.

¹¹ Nanagane na nesape nesiri si sur laþasia naþa popon sane awaryon na kilaena. Nasumo, ve oulaula kar re, ana osu ruru ga. Nalua, ve okian re kunuñña va e kove kiena yar taþena lala, ana ovisusu ga kioñña malena. A tai sina ga, ve ove yowen re, ana oyumñae mñarera wo e yumñaena naþa sike e lumoñña, sa naþa mepisawal susumo rui.

¹² Visae okila sanene e kioñña malena legiena punu ga, yoko la naþa pe amlalaga re poli akilia avisu ruru ko, apisuluþar naþa pe yaru taþena re la apisuari ko poli, a ko ga osuñña opisuar ruru ko.

Nawasufeen si kiena ne Suþe

¹³ Ana erau lala, nepisu sane popon amiu akilia lili mña sur la þasa e lepas kiena ne ita þas naþa amomalio rui, sa naþa akovio e yomarava. Yaru la moki naþa pe amlalaga re poli, amaraun marena, asitom asape yar la akovio yoko viowa vaþisi van la, ana kila sane pogos naþa lala tai kovio, atagin paþisi.

¹⁴ Ana ita na sa re nene po, komin temlelaga sane siraun naþa Yesu mare e lak torovia, naga sumal mal sina ga, ana e þelaga mña ne nanene, temlelaga mña sane lala naþa ape taaga amio naga amare, yoko Ntewa kila la ave taaga amio naga amal sina, ana awasuþe aimi sina amio naga.

¹⁵ Nekilia nevisa ve lelaga van amiu, sane taveve visena tai naþa Suþe ga pisa, ita naþa temal ke ga wa tol pogos

naþa nawasuþeena sina, ita taþatete teva metava sumon lala naþa akokovio rui.

¹⁶ Peraga, ana sur naþa kate e pogos nene sanini. Parin navisi nae ma e peni vion manene va metava, a kumasua kiena ne Ntewa yelu, ana kieta Suþe vetan ma e peni vitom tano, yoko li nalelagaena la naþa amarmare asike ne, yoko asuñal si sumo.

¹⁷ Pisi na, ita naþa temal ke ga wa tesike yomarava, naga wereplan ita mñena teva metava temio la, tekom likan lul meta e sinapane, teva tevitawe kieta Suþe meta e yo yau. Teva sanene, ana yoko tesike lue ga temio naga.

¹⁸ Navisaarena nene naga po paþisi, ana popon teiila ita silaga e sitomen wo la nene.

5

Monar tesururuia, tekirava; ve ve piavi re na naga yoko vim

¹ Erau lala, nekilia sane yeririna la moki sinelan asave akilia sur la nene yoko vim kate e legiena ya, pona pogwai. A naga nene pe pe kiau re nene naþa nesiriyu van amiu poli,

² komin akilia pa rui sane sur nene pe kiena re yeririna na kilia poli. Naga þarlologia ga sa naþa yar na vinauena kila kiena yuñæna kolemalo. Naga taþatete visawal þesania pog ya naþa naga imi!

³ Pona naga imi e pogos tai naþa yar la apisa ke pan la, asape “O, nanagane pe pog na sumarena pa rui!” Pona asape “O, nagane tesike e pog wo narui!” Lala aminue ga, ana sur nene naga sa naþa auia tai veraga ga mloge sa naþa kiena sisi vaeme narui. Ana pogos nawasuþeena ve sa ke ga nene, naþa yoko yeririna la aila ga, sane pe asitomål re poli, ana pupia pog viowa imi katen la, naþa sane taþatete nena aur matania.

⁴ Ana amiu erau lala, pe asu re si e pupumalko poli, ana visae pupia legiena nene imi kate, nesitom pule ga sane amiu akilia ailania, sa naþa pe yar na vinauen tai pimin kiamiu sur lala.

⁵ Pe tepe yeririna na yemalolo na kolemalo re si poli, ana tepe yeririna na yomerarava na legiena rui.

⁶ Sanene na, kieta sitomen la monar tavilo ruru silaga, touarar ruru kieta malena, vena ve teve sa re yeririna taþena lala na yemalolo.

⁷ Yuñæna la naþa asuñæ amiyuñænia, la asuñæ amun mña wii pano-o wii mñe la, þisi na asuñæ amomomalion ga,

⁸ ana ita naþa tepe yeririna na yomerarava, monar tekila kana yuñæna mesmes lala. Tekila kieta malena la mesmes ruruia, tekilawo yepeta e þelaga na viawaena amio þelaga na sinesiiena, a monar teyanwo þarita e nalelagaena mårera naþa tesape yoko Ntewa monar tamalia ita.

⁹ Naga nene pe pon re naþa kieta sitomen veve lua poli tesape Ntewa tamalia ita pona ve tamalia ita re, komin naga pe kiena sitomena re naþa sape yoko kiena li nalelagaena lala atol nakoena poli, ana naga pisaaria sape yoko tetol natamaliaena nene naþa Suþe Yesu Kristo tauluia pe kieta.

¹⁰ Naga marewo ita, vena kilaen sane visae wasuþe sina, pe sur korena ga naþa visae tomomalio, sane tokovio pa rui, pona tetavilo, sa ga naþa temal ga tesuñæ ga, ana kieta malena su ruru ga amio naga silaga.

¹¹ Visena ne na nene popon amiu avisasa vena iilaaren kiamiu sitomena, aiila amiu vena yuñænen kiamiu naviawaena imi mårera ruru laa sane, sa naþa nekilia sane amiyuñæen ke pa rui.

Visena maro

¹² Erau lala, nesape neviun mñena van amiu vena avisu kilia ruru li la naþa amiyuñæe mårera ke e yuñæna kiena ne Suþe likan amiu. Nanene komin naþa naga mligan la vena ave suþen amiu, avian amiu. Amiu monar avatanon ruru la,

¹³ aligan la asu metava e kiamiu sitomena lala, akekaran la, vanon yuñæna la naþa amiyuñæen ke ne. A þisi na,

amiu ve akakawe amiu re, ana sinemiu la monar ve lemam van amiu silaga.

¹⁴ Nepiun m̄areran tan amiu puruvi a vineu la, visae amiu p̄as ape yowena, popon avis van la vena yepela m̄ae la sane. Visae amiu p̄as amarau, avis van la vena akilia asum̄alu m̄arera. Visae la p̄as yepela mavi, avis van la vena iila laena. Ana e la punu ga nene akila sane kiamiu sitomen la viayavi ruruia.

¹⁵ Amiu awaryonli sane visae yar tai kila viowa van amiu, ve akilamaran re si viowa vania. Ita monar tekilali sane sineta wo ruru van ita silaga, a sineta wo ruru m̄ena van yar ta p̄ena lala.

¹⁶ Pe sur korena ga e sur ya na p̄a imi katen ita, ana tekekara silaga,

¹⁷ telen silaga,

¹⁸ tevisa potena van Ntewa silaga. Na nene kiena sinenanena na p̄a sape teyum̄aenia, e lepas pun ita na p̄a tepe kiena Yesu Kristo.

¹⁹ Sur si tai, visae kapi kiena ne Ninuna ne Ntewa vivaga ruru ke yo tai, yoko wem̄aren toko,

²⁰ ana visae yar tai sum̄a pisa plan ke navisawalen lala, ve avisalele kare re naga,

²¹ ana asitomveve ruru sur punu ga. Naga na p̄a po, auarar m̄arera,

²² ana naga na p̄a piowa, aligania.

²³ Nanagane nelen sane Ntewa ga, na p̄a pe Ntewa na sum̄arena, kila sinemiu amio kiamiu sitomena a kiamiu malena ve wa na p̄a ve wa ruruia. Sineun manene nesape pogos na p̄a visae kieta Su p̄e Yesu Kristo wasu p̄e sina ga, yoko ninumiu wetelu, losinemiu wetelu, amio tasnemiu wetelu, ve narin kinakinas nen kororak re nena tai se e la.

²⁴ Naga na p̄a piolua amiu naga pe masisu lelaga, a naga yoko yum̄ae m̄aga ve sanene vano.

²⁵ Sur maro, nevisa van amiu erau lala, neviun tan amiu sane ve sinemiu p̄esan imimi re e kiamiu leniena lala.

²⁶ Avisaga pokolulagi po pokolemalo van li nalelagaena wa ta p̄ena lala na p̄a asike ne,

²⁷ a e kia kien Su p̄e, nepisa sane lum̄aki nini, aulolua e marala.

²⁸ Lemamiena kiena ne kieta Su p̄e Yesu Kristo sike amio amiu.
Inu, Pol.

Maki Nalua Naña Pol Siri Pa Pan Li Nalelagaena Wa Lala Nae Garu TESALONAIKA Visayuena Na Tusi Nene

Komþasnen suniena plas na tusi nini

Yaru lala na suñare nae Tesalonaika amloge piowa komin amloge ke visena la mokliu, naña asape Yesu þasupe rui, a amininuwe kare narui aña visena nape naña lelaga. Ana Pol siri kiena maki na lua nini pano pa li nalelagaena la garu Tesalonaika vena visawalen visena na lelaga vani la. Naga pisape yoko Yesu wasupe sina, ana sumonia þelaga viowa lala monar imi viowa manene la vatanon nasuþenena kiena yaru tai naña yoko imi málivi, naña kiena kia “Yaru na kilaroen navisaluaena,” a yoko naga visakare Kristo amio li nelagaena lala.

Pol pisawal meraravania sape yaru la naña aulo maki nini monar asuñalu mārera e kiela lelagaena lala, pe suri korena ga visae avane suri viowa la ve moki, pona aloge viowa manenea vaþisi. A naga sape monar ayuñae ga mārera vena atol suri la naña limala plasania e kiela maliena lala, sanaña naga amio yaru la naña amiyuñae ke amio naga, la asuñia akila kene, a monar akila luwe ga yuñae na wo lala.

Komþasnen tusi la na nini

Visena þesa 1:1-2

Pol pisawal sape kekaran la paþisi 1:3-12

Pol pian la sape Yesu yoko wasupe si ve sanape 2:1-17

Pol pian la e þelaga kiena li nalelagaena lala 3:1-15

Visena maro 3:16-18

Visena na sumo

¹ Pegas na li nalelagaena lala kiena ne Ntewa Arimata a kieta Suþe Yesu Kristo, naña asike e kumali nene Tesalonaika, imimi telu Pol, Saelas a Timote, mekekara

paþisi navitawe amiuena sina e maki nini.

² Lemamiena a suñarena kiena ne Ntewa Arimata amio kieta Suþe Yesu Kristo sike amio amiu.

Pol siar kiena maki e leniena na visaen potena

³ Sur tai naña popon meyuñae silaga, monar mevisa potena van Ntewa vanon amiu kiamimi erau wo lala. A nanagane, mekekaran mesape meyuñae sanini, komin memloge ke kiamiu lologena lala, sane kiamiu naviawaena pam manene laa meta sane silaga, a amiu punu ga akekaran amiu taþena lala pimi keviu manene la.

⁴ Naga nene po paþisi, ana pogos naña mepa metelivi ke puna þegas nen li nalelagaena taþena lala kiena ne Ntewa, memieluar amiu ke paþisi pan la. Mepisa meraravan ke pan la sane amiu aþar ke þelaga mārera kiena li nasinekar lala, ana amiu apa aþarpoyo ke e yo mārera tai naña kila kare amiu paþisi, ana pe akukulul re poli, kiamiu naviawaena pe mlor re nenaga.

⁵ Pogos naña asuñal ke mārera sanene, mepisu sane pogos naña Ntewa kilologia amiu, naga kila mesmes ruru ga, komin naña pisuluþar sane amiu ape yeririna la naña taþatete aloru. Nanagane, naga pisuluþar rui naña aþar ke naloge viowaena lala komin kiena nasuþenena, a siraunia yoko naga visu amiu atorokin vaen loyuñae ea.

⁶ Naga, silaga miyuñae mesmes ga, a yoko kilamaran viowa van la naña akila piowa pan amiu.

⁷ Lala akila amiu akus naloge viowaena paþisi, ana naga yoko kila þisi, naga yoko iila amiu gar ne, a iila imimi mēna e nini naña mepane ke sur laþasia. Pogos naña tevisu pupia kapi tego ma e sinapane, tekilia tesape kila ke mrapa naña Ntewa ligan lua Suþe Yesu ma e peni vitom tano e yomarava, amio kiena navisi mārera lala, naña yoko wereplan ita vetan naloge viowaena lala na yomarava.

⁸ Naga m̄alivi, yoko liṗere la naṗa yepela mavin Ntewa, naṗa yepela mavin logearen lologena wo kiena ne kieta Suṗe Yesu.

⁹ Naloge viowaena kiena ne la naṗa yoko akusia, yoko akokovio lue ga narui, yoko akilawo la taṗatete nena asike amio Suṗe pogos tai e yo nowo naṗa kiena m̄areraena miyuṁaenia mon m̄aga.

¹⁰ E pogos naṗa naga m̄alivi, yoko kiena yar wa lala ayeluar vaṗisi, la naṗa amlelaga ea avisu naga sane po na po paṗisi, ana amiu amio la akilia ataveve naga. Akilia akila sanene komin amlelaga e kiamimi lologena, ana li taṗena la nene, taṗatete nena atavevea.

¹¹ Mesuṁa mesitomveve m̄a sur la nene pano-o, kila imimi moṁarera ruruia na lenwo amiuena silaga. Mepiun ke tan kieta Ntewa naṗa iila amiu vena atorokin malena wa naṗa naga pio amiyunia. Memlen ke sane kiamiu naliganarena wo la naṗa sike e kiamiu sitomena vena taveveena, amio yuṁaena wo la naṗa kiamiu naviawaena kilia kila, yoko Ntewa yuṁae e kiena m̄areraena vena kila awar mrasa.

¹² Memlen ke sanene vena ayeluar kia kiena ne kieta Suṗe Yesu imi ve keviu likan amiu, a vena akapur manenea amio kiena ṗelaga wo lala. Visae akilia akila sanene vano-o maran taaga amio lemamiena wo kiena ne Ntewa kieta Suṗe, nane Yesu Kristo, yoko wo na wo.

2

Yar viowa nene, Nasinekareena Navisaluaena, yoko imi m̄alivi

¹ Nesape nevisayu sina ga nawasuṗeen sina kiena ne kieta Suṗe Yesu Kristo, amio sanape naṗa yoko were ita lele taaga tesike temio naga. Erau lala, e lele nene nesape nevisa sanini,

² sane ve sinemiu pepe re, ve amarau re. Nekilia sane visena tai tetelivi ke sape yar laṗasia apisasawalia pona amologon ke asape nanagane legiena na nawasuṗeen si kiena ne Suṗe naga pimi kate rui, ana la ṗasia apisasa ke asape imimi ke nalologena la narui mepisawal

sur nene e kiamimi luṁaki tai rui. Ana amiu ve alelaga re e visena nene,

³ ve ataṁan re naṗa avisa kotalia amiu sanene. Sur na apisa ke ne, pe sa re nena nene, komin pupia nakawelanen van Ntewa monar va meta sumo. Sir-aunia yoko yar viowa na kovioena, naṗa apio Nasinekareena Navisaluaena, naga m̄ena monar imi kate e yometava.

⁴ Yar nene naga piowa paṗisi, naga pilolon kare make ga sur wo lala, a naga mligan ke naga mon metavan sur make ga naṗa kia kiena ne Ntewa sike ea, amio sur wa taṗena la naṗa yeririna la apatanon ruruia. Yoko naga kila m̄a sanene vano-o, naga ga visirlua si naga sike e lele wa loyuma e Yuṁa Wa m̄ana ne Ntewa, visawal naga sape naga ga pe Ntewa rui. Ana pogos naṗa kila sanene, nanene naga e pogos ke naṗa lavis ke towarpoyo e legiena maro narui.

⁵ Visae amiu asitoṁal ke ga wa, pogos naṗa nesike nemio amiu, nepisasawal ke suri nene pan amiu yam mokli rui.

⁶ Ana taveve ya naṗa nepisa meraravan ke ne, akilia avisu kilale sane yar nene, kan pog memes naṗa vim kate sike ga wa, ana apisawo ke ga wa komin kan pog nena na pere wa.

⁷ Ana pe sur korena ga naṗa Nasineka-reena Navisaluaena pe kate re poli wa, ana kiena m̄areraena suṁa miyuyum̄aen wan ke kiena ṗelaga viowa lala e yomarava nini rui. Taṗatete imi kate e yometava amio kiena pupia m̄areraena na wa, komin Ninuna Wa suwo ke naga, ana pogos naṗa Ninuna Wa ure si vavini,

⁸ yoko naga suṁalu amio kiena m̄areraena make ga. Naga yoko kila mara vano lavis taulu make sur narui, ana yoko Suṗe Yesu vim kate, yoko lagi na kiena visena lelua yar viowa nene veraga ga, pupia yomerarava naṗa pimi amio, m̄enelua yar nene va kovio e pupumalko.

⁹ Pogos naṗa Nasinekareena Navisaluaena nene vim kate, yoko naga yuṁae amio m̄areraena kiena Yermare, ṗisi na naga kila pupia kile lala amio sur na ilanen lala, ana ape navisokanen ga lala.

¹⁰ Naga yoko kila ve sanene komin sinenan werekareen sitomena kien yeririna la naþa ave na kovioena. A yoko kila mēna þelaga viowa lala naþa kilia were kare kiela sitomen la va ve taþena, komin ape yeririna la naþa pe sinelan re akekaran visen lelaga lala kiena ne Ntewa poli, pe asitoñal re nena sane yoko naga kilia tamalia kiela malena poli.

¹¹ Ana pogos naþa Ntewa pisu kiela sitomen la mārera sanene, yoko naga ligana la ga, tamān naþa sane pupia visen navisokanena la kilia taulu la ga sane, yoko alelaga ruru e visokanena la nene.

¹² Ana siraunia, yoko naga liþerela mesmesu nena, sape ape yeririna la naþa yepela mavin lelagaen e kiena visen lelaga, ana sur naþa la akekarania, naga þelaga na kilaen viowa la naþa akilakila ke pa rui.

Asumñal mārera ruru silau

¹³ Sur wo tai naþa popon meyuñāen silaga, monar mevisa potena van Suþe Ntewa vanon amiu kiamimi puruvi a vinemimi lala naþa naga kekaran amiu paþisi. Siar nanua susumo rui, naga kilologia amiu vena kam na ape mras þesia naþa amlelaga e kiena visen nalelaga, a Ninuna myuñāe e kiamiu malena lala ana apim amerarava e marana, þisi na naga kilia tamalia amiu.

¹⁴ Naga pio amiu kome lologena wo naþa mokus pimi, komin naga sinenan pisape amiu mēna ayakol e pupia naurarena vena yeluaren kia kiena ne kieta Suþe Yesu Kristo.

¹⁵ Ve sanene erau lala, pe pon re amiu yar tai kila pal poli. Monar asuñal mārera ruru silaga, a monar auarar ruru nakilapianen la naþa mekila pan amiu rui e kiamimi visena lala pona e maki la nene.

¹⁶ Armata Ntewa kekaran ita paþisi, pe lemam pan ita a miilaar si kieta sitomena e kiena navisaarena wo tai, sane ita na tesu wo lue ga temio vano-o taþatete þisi pogos tai. Ana nemlen pania, sane narina, kieta Suþe Yesu Kristo,

¹⁷ iilaar kiamiu sitomena lala, kila amiu amārera ruruia e visen wo punu ga lala a e kiamiu yuñāena wo punu ga lala.

3

Pol piun vena alenwoia

¹ Erau lala, sumon neþisin kiau visena nesape neviun tan amiu punu ga ve sine-miu þesan imimi re e kiamiu leniena lala, vena mekilia meyuñāe mārera laa sane vena visena kiena ne Suþe kilia momolue vilaga e yo la punu ga. Visae ve sanene, yoko yar taþena mēna la akilia aloge kiena visena nalelaga, akilia avisirlua kiena kia, sa ga naþa amiu amiyuñāenia pogos naþa pimi mālavin amiu sumo ne.

² Ana pogos naþa visae alen, popon asitoñal mēna sane pe amiu punu re amlelaga poli, a yeririna viowa þas asike naþa aþar ke sitomen taþena lala, ana amiu akilia alen vena Ntewa suwo ruru imimi vena taþatete atol imimi.

³ Ita tekilia sane tekilia towasine Suþe silaga, ana pe sur korena naþa Parin Yar Viowa taþali kila ya ne van ita, a nemlelaga sane yoko Suþe kila ita tomārera ruruia, yoko visuar ruru ita vaþisi.

⁴ Kiau sitomena nekiliaar sane naga yoko kekaran naiila amiuen sanene, komin sur la naþa mepisawal pan amiu, nemlelaga sane amiu akila ke pa rui, a nemlelaga sane amiu yoko awaryon nakilaena e legiena la ne pimi ke ne.

⁵ Amiu akila sanene po paþisi, ana kiau leniena sane kieta Suþe Kristo sumon amiu vano tol naþa kiamiu sitomena la viayavi lelaga sane kiena, a losinemiu la va ulemamaga e sinesiena kiena ne Ntewa.

Visena e lepas na yowena a na su korenenaga

⁶ Erau lala, e kia kiena ne Yesu Kristo nesape nevisawal van amiu, sane visae puruvi tai pe miyuñāe ruru re poli po pe taveve ruru re navianena la naþa mepian amiun poli, popon asu perinan li laa ga naga sane. Yowena la ne sanene, ve ava re lavisin la,

⁷ komin pogos naþa mesike likan amiu, pe mesu koren re ga sanene po. Mekila

meraravan mrapa wo pan amiu, ana amiu akilia rurua sane popon asiraunia.

⁸ Pog naþa visae memla kinanena tai, ana monar moul ga, komin memiyuñae legiena a kolemalu natauluen narin kilavaru vanon sur ya naþa sinemiminia. Imimi na memninu sanene sane ve mekila re yuñae keviu van amiu na visuar imimiena.

⁹ Visae amiu avisuar re imimi ve tokaki pona mesmesu yo, ana moþaryon mesape imimi ga mevisuar imimi, vena kilapian amiuen e þelaga wo naþa akilia atavevea.

¹⁰ Pog naþa mesike memio amiu, amloge ke naþa mepisa ke sur nene, sane pe kiamimi navisaluaena tai, ana memla ñena pan amiu, mesape yar na yepen mavin yuñae, naga taþatete kinana.

¹¹ Nepis ke sanene komin narin visena tai pimi tol kiligau sane kiamiu yeririna þasia pe amiyuñae re la poli, asusu korena ga asuñae sane, ana asuñae apisimumu e sur la naþa yar taþena ga la amiyuñae.

¹² Kiamimi visena e yar la ne sanene pa sanini, sape ve asu kare re sanene, akilia ava ruru amiu la sane, ana akila towe li la yuñae na tauluen kamiu kinanena sa naþa amla ke legiena punu ga.

¹³ Ana visena pan amiu punu ga puruvi lala a vineu la, sane ve ita yar re tai naþa loge yepen malumun yuñae wo la naþa sike ne vena teyuñae.

¹⁴ Mepisawal sur la moki e ñaki nene, ana visae yar tai ve kekaran re, popon avisu ruru yar nene. Yoko ve akilali re naþa ayuñae veraga amio naga sumo wa, vena kila naga mawa towe la sane, vena visu kilale kiena viowaena.

¹⁵ Ana ve akila re suri tai vania sane naga ve kiamiu sinekar tai, ana aweþeþe si naga sane imi ve kiamiu puruvi wo ga tai.

Visena maro

¹⁶ Kiau visena maro, nemlen nesape yoko Suþe na suñarena ligan kiena suñarena sike e amiu e kiamiu mrapa la punu ga, nemlen nesape naga sike amio amiu punu ga silaga.

¹⁷ Narin yo na tano yoko ovisu sane in ga nesiri visena la nene e luñau. Sineun

nesape nekila ve sanene e kiau ñaki lala vena akilia avisu kila luñau sane in ke narui nemligan ñaki nene piñasu. Naga kiau nasiriena ga nane teke ne, nesape:

¹⁸ Lemamena kiena kieta Suþe Yesu Kristo sike amio amiu punu ga.

Inu, Pol.

Maki Nasumo Naþa Pol Siria Pa Pan TIMOTE Visayuena Na Tusi Nene

Komþasnen suniena plas na tusi nini

Timote naga pe yaru viu tai nae pupia pulkumali naþa Listra, a naga mlelaga e Yesu Kristo. Anena naga pe lus nae Israel tai a arimana naga yaru nae Kris. Timote na erau kiena Pol tai naþa tavevea apa ke e yo makega vena visawalen lologena wo kiena kieta suþe Yesu Kristo. Pol siri maki nini pa Timoti, e pogos naþa sike garu provens naþa Masetonia, a Timote naga sike Episas.

Pol siri maki nini pan Timote, pisa pania sape visuar naga e vianiena na visokanena lala naþa kilia imi loyuma e suniare. Vianena na visokanena nene molue kome sitomena tai naþa pisape suri makega na yomarava piyoyowaga pona pe namname. Yaru la naþa apian ke yaru la e vianiena na visokanena nene, asape yaru kilia tol malena visae ga viyon sape tol kinasnen kiela vianena la naþa tapolou, a monar lon kinanena laþasa, kan ga kinanena la naþa asitom sape torokin akania, a yoko naga ve talopa re, a taveve kiela þelaga taþena si laþasa.

E maki nini Pol pisayu þelaga wo la naþa li nalelagaena lala akilia atavevea vena akila lotena, a vena visuaren suniare. A naga pisa þelaga wo laþasa naþa nasumonena na suniare lala a li nalelagaena lala monar atavevea. A suri maro naþa Pol pisa, naga pisa pa Timote sape naga monar imi ve yaru wo tai vena kilaen yumæna kiena Yesu Kristo. Naga pisa pania sape kiena þelaga monar ve senape, pogos naþa naga yalin þegasnen li nalelagaena taþena la a naþa vianila.

Komþasnen tusi la na nini

Visena þesa 1:1-2

Vianena e lepas na suniare a nasumonena lala 1:3—3:16

Visena lala na iilaren Timote e kiena yumæna lala 4:1—6:21

Visena na sumo

¹ Naruu Timote, inu navisawalena Pol nesiri mak nini piņasu pan ko, naþa Ntewa kieta natamaliaena amio Yesu Kristo kieta nawasineena amligan inu vena neyuma e lologena wo.

² Nekekara navitawen ko si e nini, vanon nepisu ko sane ko ope naruu wawa loyuma e namratava na kieta naviawaena. Nemlenin ko ke, sane Ntewa arimata, amio kieta Suþe Kristo Yesu yoko aligan lemamiena, sineyeena, amio kiela sunarena sike amio ko.

Okilawoli nakilapianen visokanen lala

³ Nesape nevisawal si van ko sur naþa tepisayu nanua ga ne, pogos naþa nesike nemio ko gar Episas, sumon naþa nemligan ko navaen Masitonia. E pogos nene tepisu ke naþa þar marera laþas asuma ga, naþa tekilia ruru la, ana nesape osuma ga e yo nene wa, vena okilali naþa okilawo la. Sur ne nanene nesape nevisawal si van ko, sane osuma e nene wa, vanon la nene, asun akilapian ke sur la naþa pe mesmes re poli.

⁴ Sila ga kiela sitomena la mlor ke ga e kiela suniena marua ga lala, ana sinelan ke ga navisayuen lus kiena ne kiela li marua la na nanua sumo sumo, ana popon aligan sur la nene sike na. Visena sur la ne sanene kila ke yeririna la kiela sitomena pepe lua paþisi, ana taþatete nena aiila la vena atol malena wo naþa Ntewa sinenania, naþa tekilia tetolia e ga e lelagaena e naga.

⁵ Sanene na, popon tevisawo la, vena kilaen sane yoko kieta yeririna lala, losinela kilia merarava ruruia, kiela sitomena kilia mesmes ruruia, a kiela naviawaena ve lelaga, komin sa ve sanene, yoko þelaga wo na sinesii itaena kilia imi ve keviu sina vaþisi likan ita.

⁶ Ana nanagane piowa ga, komin la þas e neña, aterere akuspal mrapa wo nene, amial na e mrapa naviswween lala.

⁷ La apilave, sinelan asape avim ave navianena na navisaluaena wa, ana asuma

apisawal ke kana visena m̄arera ne lala, pe akilia ruru re sur la naṗa apisa ke poli, taṗatete avisa meraravan ruruia.

Navisaluaena kiena ne Ntewa pe na ya?

⁸ La nene apisin manene navisaluaena kiena ne Ntewa, ana tekilia tesape navisaluaena, visae teyuṁṁae ruru ea, naga pupia kana yuṁṁaena sike ea.

⁹ Ita monar tekilia tesape navisaluaena naga apisirlua pe naiilaen re la naṗa amesmes ruru pa rui, ana naiilaen yar taṗena lala, sane la naṗa akilarovia amio la naṗa yepela mavin logearena. Lala nene, nane la naṗa pe akekaran re Ntewa poli, la naṗa asitom korenan ga sur wa lala, la naṗa ṗar m̄arera ga lala, a la naṗa aṁe arimala lala amio anela lala, po aṁe ṁena yar taṗena lala.

¹⁰ Amio yar la nene, ṗasia naṗa ataṗa kolau, amio naṗa yerm̄ene were si yerm̄ene po sira were si sira, ṗasia apinaun nisisi vena awililinia, lala na visokanena, amio lala na kilawanen kiela naviowaena. Navisaluaena nene pe kien la nene narui, amio la naṗa akila ke ṗelaga taṗena la ne sanene, vanon yepela mavin kieta navianena wo lala.

¹¹ Pe ataveve re nena lologena wo kiena kieta Ntewa wa nowo, naṗa mligan sike e inu vena nevisawal van amiu.

Lemamena kiena Yesu pa Pol

¹² Yuṁṁaena nene sike e luṁṁau vena neyuṁṁaena, ana nesape nevisa potena ve keviu va kieta Suṗe Kristo Yesu. Naga ga naṗa pisuveve ruru kiau malena, pisu sane nekilia nemasusu wo e yuṁṁaena nene, ṗisi na pisirlua inu vena neyuṁṁaena, ana monar nevisawalia nesape naga ga mla ke puriukawaena pan inu silaga vena neyuṁṁaen sa naṗa naga sinenania.

¹³ Nanua sumo, in na nepe yar tai naṗa nepepeyun kare ke kia wa nene naṗa Yesu, ana nekila kare ke naga paṗisi, naṗa nekila piowa manene laa paṗisi pan kiena nalelagaena lala, mesmesun ga naṗa la nakoena van inu vanonia. Ana peraga, pisu sane nemial ke ga e pupumalko, pe nemlelaga re e naga poli, ana pe nekilia

re sur naṗa nemiyuṁṁaen ke poli, ṗisi na naga kila po manenea, sinen miye inu.

¹⁴ Sanene na, nepisu sane kieta Ntewa mligan kiena lemamiena nowo e inu keviu paṗisi, kokonia kiau malena e naviawaena a e sinesiiena naṗa pe kieta ita punu ga naṗa tepe taaga temio Yesu Kristo.

¹⁵ Visena tai toṁa ga, naṗa tekilia towasinea, popon yar punu ala e kiela malena, naṗa pisa sanini, sape

Kristo Yesu pitomi tano e yomarava nini vena tamaliaen malena kiena ne yar ai naṗa taṗa mlamulena viowa.

Ana e la naṗa amiyuṁṁaen mlamulena viowa sanene, nepisu sane in ke nanini naṗa nepe kiela nasumonena, nepiowa manene laa taulu la make ga,

¹⁶ ana potena pan Ntewa naṗa sinen miye inu. Nepisu sane pe pon re naga viewo inu sanene poli, naṗa nepe nasumonena kien yar na mlamulena viowa lala. Ana naga kila pan inu sanene, vena yeririna la akilia avisu kilale sane Yesu Kristo, kiena sitomena naga piavi paṗisi vena sinen ye yar viowa lala. Ana visae la naṗa aim sirau avisu naṗa Ntewa kekaran were inuena sanene, yoko avisu kilale sane la ṁena akilia alelaga ea vena atol malena naṗa pe luas re poli.

¹⁷ Nesitoṁal kiena ṗelaga wo nene, kila nemiyeluar naga, nepisa nesape naga pe ṗarin suṗe na nanua sumo, ana naga mal sulue ga narui. Naga sike e yo punu ga ana yar taṗatete visuia, naga taaga pe Ntewa, pe yaru re si tai poli. Sanene popon tewatanon naga, teyeluar kiena kia vano-o ve ṗisi re pogos tai, sanene.

Osuṁalu m̄arera, ve oloru re

¹⁸ Timote, in na nepio ko ke sane ko na ope naruu, ana nesitoṁal navisawalena la naṗa apisayu ko nanua ne, naṗa akila meraravan ko pan inu. Akila sane nepisu kilia ko sane ko na ope yar tai naṗa nekilia nowasinea. Sanene na, visena urmi la ṗasia pona pupia na vianena ṗasia sike na naṗa sineun nesape neligan e ko. Visena la nene kilia iila ko om̄arera

vařisi e mara wa nařa tesuřa tekila ke ne,

¹⁹ vena yoko aiila ko nauarar ruruen řelaga na nalelagaena a akilia akila ko nařa kiořa sitomena merarava ruruia silaga.

Yar la řasia, sa nařa apilolon ke waa, ana kiela sitomena wo pisawal pan la sape mrapa nanene, ana yepela mavin yagogenena, ana akuspalia, kiela navi-awaena pa tawa ruruia e piamē tai.

²⁰ Pona ko okilia lalua nene Aemeneas amio Alikanta, ana pe sineyeena nařa nesape nevisawalia sane lalua sanene rui. Akila řa piowa pano-o, pe sinelan re si yagogen poli, ana nekuan plan lalua apa si e liman Yermare sumo wa, ana vena lalua avisu kilale si yo, sane popon ve asuřa akila kare re kia wa kiena ne Kristo sa nařa asuřa akilakila ke ne.

2

Nakilapianena řasia e lepas na lotena

¹ Pogaga, nevisawal nakilapia-nena nene narui. Sur nasumo, nemiilaar amiu sane e pog na leniena la, monar avisa potena van Ntewa vanon yar tařena lala, a monar alen wo la řarera, monar aviun řareran tania vena iila la.

² Naga nene monar akila řena e lepas kiena ne yerka wa lala, sa nařa řarin yar wa lala amio nasumonena la nařa asu metavan ita, vanon sa ayuřae ruruia, yoko wo laa van ita. Tekilia tese e malena wo, nařa nawaena amio suřarena sike ea, ana tekilia teyuřaen yuřaena wa kiena ne Ntewa la punu ga, e řelaga wo sa nařa naga sinenania.

³ řelaga la ne sanene apo pařisi, pe řelaga nařa Ntewa natamaliaena kekaran visuena e kilamarana,

⁴ vanon sinenan sape yeririna punu ga atol kiena natamaliaena, sinenan sape yeririna punu ga akilia kiena visena na lelaga.

⁵ Pe mrapa re si tai poli, komin naga taaga pe Ntewa suřa ga, a yar taaga ga nařa kilia kila mara wo temio naga, nane Kristo Yesu,

⁶ nařa pimi pe yeririna, siraunia kus leleta, tařan si kiena malena, pul plan yeririna punu ga na yomarava petan limana ne yar viowa.

Yuřaena nařa Yesu miyuřaena, kila navisaarena lala kiena ne Ntewa na susumo apim ape lelaga, apaeme e kana pog nena napo,

⁷ ana mloru e luřau narui, vena nevisawal van yeririna lala. řas asitom ke asape nepisokan ga yo, ana peraga, nepisa ke pe lelaga narui. Apisirlua inu sane yar tai nawaren visena pona nepe lologena tai, vena nevian yolai lala e řelaga na viawaena a e mrapa na visena nalelaga.

⁸ Vanon sitomena la nene, sineun nesape yeririna la punu ga monar asuřa alen lue ga e yo punu ga, ana sa asuřal vena alen, monar ave wa ruruia, nařa sinekar ve su re e la, a sinemimiena ve su re likan la amio yeririna tařena lala.

řelaga kiena ne sira lala

⁹ E lepas kiena ne sira lala, sineun nesape visae avim loyuřa e yuřa na lotuena, monar la avisu ruru kiela řelaga lala. Popon ayowauia ruru la wo, ana piowa nařa ava laa sane, monar torok ga e yo wa nařa apa ke loyuřa ea. Pe sineun re akila manene vilula la ve tařena ve tařena sanene poli, po atelan manene kol la se yepela lala, a pe pon re avilaven manene kulmrae la nařa apul e pupia kilavaru poli.

¹⁰ Sur taaga nařa kilia yowauia ruru, nane kiela yuřaena wo lala, nařa mesmesun ga malena kiena ne sira nařa mlotun ke Ntewa.

¹¹ Sira la monar atotano ruruia, avarurula na yagogen ruruena navianena la nařa apisa ke pan yeririna lala.

¹² In na pe netařan re sira la avian yermēne la poli, pona ave řarun la, monar avarurula ga.

¹³ Nanene mesmes ga, vanon Ntewa sii řesan yar nene Atam, sirau sira nene Iv,

¹⁴ a pe Atam re nařa Yermare kila kotalia naga poli, ana Iv, naga kilaro řesan navisaluaena.

¹⁵ Yermare kila kotalia Iv, ana Ntewa sinen miye ke sira la na wa, mla yuñäena wo pan la, sane yoko la ke narui awar sisi viu lala aim e yomarava nini. Ana visae sira tai naga viawa mārera, kiena p̄elaga ulen sinesiiena, kiena malena ve wa ruruia, a kiena sitomena to ga tano, yoko Ntewa kekaran tamalia naga.

3

Nasumonena na suñare lala

¹ Visae yar tai, naṗa sitomena tai teke e naga sinenan sape war kia naṗa nasumonena, nanene na po paṗisi ne, komin pe lelaga kemua, naga pe yuñäena wo tai naṗa naga sape yuñäenia. Ana kieta nasumonena lala, yoko nevisawal van la sane lala monar ave yar la ne sanape.

² Sur na sumo, nasumonena naga monar ve sur viowa tai to re e kiena malena.

Naga monar were sira ve taaga a ve lelaga wo van silaga.

Naga monar kawē ruru kiena p̄elaga lala,

monar ve manmarua,

yeririna la monar avatanonia,

monar kekaran na visuaren yeririna la e m̄ana uñä,

a monar kilia ruru p̄elaga nakilapia-nena.

³ Amio sur la nene, naga monar ve ve yaru namun maneneen re wii va ve torog,

naga ve suru re,

kiena sitomena monar viavi

sinena monar malum ga.

Naga monar ve vilup re,

a ve sinenan manene re kilavaru.

⁴ Tai m̄ena ga sanini, monar ve suṗen ruru m̄ana uñä, naṗa narina la vatanon ruru naga e sur la punu ga,

⁵ vanon sane visae yar ta ne sanene ve sumon ruru re m̄ana uñä, ve sanape na kilia visuar ruru suñare kiena ne Ntewa?

⁶ Yar nene monar marua li m̄aga, sane mla Yesu e kiena malena yam piavi li m̄aga, visae pere na yoko p̄arina kilia imi ulen vilaveena, p̄isi na kila naga kila pal mrapa lor vito e p̄iliṗili

m̄a nena naṗa Yermare mlor pito e nanua sumo.

⁷ Na sumonena na suñare lala monar ave yar la naṗa yeririna punu ga, vito tol la naṗa pe amlelaga re poli, avisave lala ape yar mesmesu wo, vanon Yermare kilayon ke paṗisi naṗa kila kotalia la, sinenan sape kila vena yar la asitom asape sur tai piowa teke e la.

⁸ Na nene na sumonena lala, ana naganē neva e lepas kiena ne yaru na visuaren yuñäena lala. Yar naṗa p̄uarar yuñäena na visuaren yuñäena,

kiena sitomena monar su ga tano,

naga ve yar naṗa visa visena la ve lelaga ga, a naga taṗatete purmenena ve lua.

Naga ve mun re kuruta silaga,

monar ve sinenan manene re sur lala,

⁹ ana monar uarar ruru ga p̄elaga na lelagaena e kiena malena, taulu naṗa yaru taṗena la atolia.

¹⁰ Yar naṗa na uararen yuñäena na visuaren suñare, monar avisusu ruru naga, akilali kone naga sumo wa, a visae yuñäe wo, kiena p̄elaga mesmesun yuñäena nene, akilia ala kiena kia, siar yuñäena narui.

¹¹ Wona yaru na visuaren yuñäena, naga m̄ena kiena sitomena la monar varuruia, ve visamumun re yar taṗena lala, monar ve sira tai naṗa kilia warar ruru kiena p̄elaga lala, a monar kila yuñäena punu ga wo.

¹² Yaru na visuaren yuñäena la monar aure sira ve taaga ga,

monar ave yar la naṗa akilia asumon ruru narila lala, akilia avisuar ruru m̄ala uñä.

¹³ Yaru na visuaren yuñäena la naṗa yepela m̄aen ruru kiela yuñäena, p̄isi na avisu sane yeririna la akekaran la vaṗisi, ana aloge naṗa Kristo Yesu miila la ke vena ve amaraun re na suñalen mārera e kiela yuñäena nena.

Pupia visawanena na kieta lelagaena

¹⁴ Timote, nesape neiñasu nevisu ko ve ve viavi re navisaen visena la nene

van ko, ana nepisu sane peraga, monar nesiriwal ko ne ga van ko sumo wa.

¹⁵ Pona sur la ãas auarar inu e nini yo na wa, ana sineun nesape monar otol navianena la nene vilaga, vena okilia ruru ãelaga la naãa mesmesu vena akila e mratava wa ãana Suãe. Namratava wa nene, na ne pe sumãre kiena ne Ntewa mali, naãa monar tarar kiena visena na lelaga silaga, sane ãeren yuãa ãuarar kana kemraãe lala.

¹⁶ Lelaga, ãelaga na kieta lotuena sumãl sike e nalelagaena tai naãa sane pe visawanena tai, naãa pito ruru tano, urmi ruru po. Tepisawal ke kieta nalelagaena nene sanene, tesape

Yesu, naga pe Ntewa naãa paeme e yomarava nini e tas nen yeririna, ãareraena kiena Ninuna miyuãae manene ea, a navisi la asike amio naga,

amlologon naga pa tol yolai taãena lala, kila sane amlelaga e naga telivi e yomarava,

siraunia Ntewa pure naga pa si metava e kiena pupia naurarena ma e peni.

4

Avisuar ruru amiu e navianena na visokanena lala

¹ Ninuna Wa pisawal visena tai merarava paãisi, naãa pisape e pog maro lala, na lala ãas naãa amlelaga sumo rui, yoko ayagogan ninuna na visokanena lala, ana ataveve navianena kiena ne yermare lala, ana kila la aure ava e malena naãa pe po re poli.

² Navianena viowa la nene, yoko amolmolue e yeririna na visokanena lala naãa la asitom ke asape la akilia suria, ana kiela sitomena naga malolo sa ga kilamemego.

³ Sur la ãas naãa yoko avisa sanini, sane yar taãatete talopa, ana avisaluãar manene yeririna lala e kinanena wo lala naãa Ntewa sii la vena tekekarana kanena. Komin ita naãa temlelaga a tekilia sur naãa pe lelaga, tekan ke suri la nene silaga rui, a tesuãa tepisa lue ga potena pania.

⁴ Naga nene vanon sur punu ga naãa Ntewa sii la, pe tepisa re tesape piowa poli, ana tepisu sane po na po paãisi. Pe sur re tai naãa tepisusu ke piowa e poli, ana tekekarana nawaren sur punu ga, tevisa potena van Ntewa vanonia.

⁵ Ana pogos naãa tekila sanene, kila sur la nene pimi pe wa. Visena kiena ne Ntewa amio kieta leniena la kila merarava pa rui.

⁶ Navianena la nene, visae ovisa merarava va li nalelagaena lala, naga sa naãa opisawal ke osape ko na ope yar na viawaruruen e yuãaena kiena Navisaarena Yesu. Pogos naãa apisu ko omiyuãae po sanene, yoko akilia asape ko osuãa opa ruru metava rui sane yar tai naãa marua ruru e visena lelaga na kieta viawaena. Yoko akilia ruru naãa ko ãena osuãa otaveve ruru ke navianena wo ya naãa osuãa opisawal ke pan la, ana yoko akekara vaãisi.

⁷ E lepas na suniena marua wowe la nasusumo, naãa apisayu sur kar ga lala, ana pe kiomã sur tai to re e la poli. Oligan la sike na, ana ko na monar okilarar ruru ko omãrera e malena wa.

⁸ Yar la sinelan ke akilarar tasnela ãarera ruruia, ana naga nene pogaga e lepas ãasia, ana pogos naãa okilarar ruru ko omãrera e malena wa, naga kila po manene laa sane e lepas punu ga. E lepas na malena na nanagane, malena wa naga kilia iila ko, ana e lepas na malena naãa pimi ke sirau wa, yoko malena wa kila kiomã mrapa okilia ova loyuãa puna.

⁹⁻¹⁰ Sur nene, temiyuãaen keviu, toãaryon ke paãisi, vanon temligan kieta sitomena sike e Ntewa mali naga taaga ga, naãa pe natamaliaena kiena ne yeririna punu ga, sane la naãa amlelaga ea. Visena nene pe lelaga paãisi, okilia olelaga ea e sinema wetelu.

¹¹ Kiau visena la nene naãa nepisa ke pan ko, sur ne la nanene monar ovian van yeririna taãena lala, omãraran van la vena alogearia.

¹² Visae yeririna ãasia avisu ko piowa ga vanon ko na ope teras ga tai, ve omarau re, ova ga. Lelaga, sane ope teras ga, ana sa naãa osuãa okila ke rui, monar

ovike mrapa van li nalelagaena taþena lala. Popon naþa ataveve lamã, naþa okila pian ruru la e malena wo, e lepas na visena, e lepas na þelaga wo, e lepas na sinesiiena, naviawaena, a mekikena.

¹³ Vano tol pogos naþa visae neiãmasu nemãlavin ko, ouarar pog na lotena la mãrera. Oulolua visena wa e maran yeririna lala, ologonia, ovian lania.

¹⁴ Ve sineãa þesan re puriukawaena wa naþa Ntewa mla pan ko e pogos naþa þegas nen nasumonena lala apu þaruãa. Visena kiena navisawalena tai e pogos nene pisawal sape puriu kawaena nene naga pe kiomã, ana omãreran oyumãe omio.

¹⁵ Ko na monar okilarar ko e yumãena la nene naþa amlor asike e lumomã, monar owarwaryon nakilaena silaga, ana yoko yeririna punu ga akilia avisu kilale sane ko na opa manene laa ke amio Ntewa e kiomã malena.

¹⁶ Monar ovisuar ruru ko, a ko mēna monar otaveve ruru nakilapianena la naþa omla ke pan yeririna taþena lala. Visae ouarar ruruia, yoko okila sane ko omio la naþa amiyagogon ko ke ne, amiu punu ga akilia atol natamaliaena.

5

Pelaga wo na kilaen van li nalelagaena lala

¹ Timote, visae ovisu yermarua tai naþa kila suri tai pe memes re poli, ve ovisin re sinemimiena vania. Omomãu woga vania, okila vania ve sa ga naþa naga pe arimomã narui. Popon okila mēna sanene van taþena lala. Ovisu teras lala sa ga womla,

² ovisu sira marua lala sa ga anomã, a ovisu sira mēe lala sa ga vineãa. Visae okila ve sanene, yoko kiomã sitomena kilia mekiki ruru silaga.

Letano lala

³ E lepas kiena ne letano lala, ita na sumãre monar sineta iye ruru la, monar tevisuar ruru la naþa asike lala ga, pe ola re tai naþa iila la poli.

⁴ Ana visae letano tai, narina la asumãa ga, pona mapina lala, yoko la nene monar

avisuaria. E mrapa nene, akilia awar maran sina ga vania navisusu warena wo lala a naiilaena naþa naga kila pa pan la e kas lala naþa þaro rui. Lala monar avisu kilale sane naga nene pe yumãena memes tai, po suri wa tai nakilaen van yaru tai na mãla mratava memes, a naga pe þelaga wo tai naþa Ntewa sinenan paþisi.

⁵ Letano naþa pe yar re tai naþa visuar poli, naþa lala amarmare tania pano-o naga taaga ga sike na, naga monar wasine ga Ntewa naga taaga. Naga kilia sitomãl ke Ntewa legiena a lemalo vena len vania vena kirakira visu ga naga e sur ya naþa naga sinenania.

⁶ Ana visae letano tai sitom ke ga naieluaren naga e malena na yomarava nini, naga sa naþa naga mare tan Suþe sa ga naþa namratava la puna amare tania nanua sumo rui.

⁷ Nemloge sane amiu li nalelagaena lala asitom asape akila mrapa tai na iilaen letano lala. Na nene po paþisi, ana nemaraun sa þisi visena ve keviu lawe vanonia, ana sineun laen visena laþas van amiu e lepas nene sumo wa.

⁸ Visena na sumo naga sanini, sape visae li nalelagaena lala tai, ve visuar ruru re la na kiena lusia, a na keviu nena, ve visuar ruru re kiena namratava memes lala, yar nene naga sane pe pe yeririna kiena Kristo re poli. Naga piowa manene laa narui, nepisu sane naga piowa manene laa taulu la naþa pe amlelaga re poli.

⁹ Ana nalua e lepas kiena ne letano lala, na sanene. Pegas kiena ne letano la naþa sumãre visuar la sumã ga, a visae letano tai naþa sinenan sape kiena kia va loyumã, monar naga ga naþa pe sira marua, sa naþa kiena kas siar e lualima yam orai [60] va metava.

Taþena, naga sira ga tai naþa talopa yam taaga, pure woãa taaga ga, a pe lelaga pania silaga.

¹⁰ Yam si tai, monar ve sira tai naþa yeririna la avisu kilia sane pe sira tai naþa miyumãen yumãena wo la paþisi, naþa naga pian ruru narina lala, naga tai naþa

kekaran na visuaren yeririna taþena lala e mana uma. Pogos naþa li nalelagaena wa taþena lala aim analivinia, naga kevan lala lala, a naga miilaar ke la naþa amlolor e naloge viowaena kar lala. Sira marua letano naþa þaryon yumaena wo la naþa sanene, naga ke narui naþa kiena kia kilia va loyuma.

11 Ana visae letano laþas naþa asike ga wa pe ape sira marua re poli wa, popon ve owar re kiela kia. Naga nene komin akilia avisaar va Kristo sane yoko asuma ga sa nene amio naga vano-o tol luas nen kiela malena, ana siraunia, ve ve piavi re, pona sinenanena na talopaena imi marera sina ga, ana þisi na ailan ga, letano nene sumalu were si yar tai.

12 Visae kila sanene avisu viowa e naga, vanon naga kila pal kiena navisaarena, kilaro sina ga.

13 Ana amio naga nene, letano viu la nene akilia ayowo pona yepela mavin kilaruruen yumaena, ana asun atetalivi akakate ke e yuma mana yar lala, ana metavanja asun apisasayu ke lala taþena, akian ke kunula pa e sur la naþa pe pe kiela visena su re loyuma e poli.

14 Ana e kiau navisuena, nepisa nesape letano la naþa ape mee ke ga wa, popon tetaman la ga atalopa sina ga wa, popon awar sisi, avisuar mala uma lala, ana yoko ve sur re naþa yeririna la avis viowa van la vanonia.

15 Nepisa nanene vanon lala þas akuspal pa mrapa rui, ataveve ke mrapa na marena naþa pa puna ne Yermare.

16 Sanene na, visae ita yar tai naþa pe nalelagaena ana letano tai teke e mana mratava, naga ga monar iila ruruia. Visae naga kila, yoko sumare taþatete visuyonia, ana kilia visuveve ga letano taþena lala naþa pe yar naiilalaena re poli.

Kilavaru kiena ne nasumonena lala na sumare

17-18 E lepas na narin nalaena naþa temla ke pan kieta nasumonena lala, neure ita teva si e visena lua na Tusi Wa. Nasumo, pisayu puluk la naþa temligan la amial atalivi metava e þegas nen wit

lala vena avie plan mras lala. Visena nene pisa sanini, sape

“Ve oviar re gon kioma puluk naþa pie plan ke kioma wit lala, otaman naga kan re ma ve tokak ga.” Naw 25:4

A visena na lua pisa sanini, sape

“Yar naþa miyuma, mesmes naþa naga visu sur tai naþa molue e limana vanonia.” Luk 10:7

Sanene na, popon tekila mena van nasumonena na sumare lala. Ana lala naþa amiyuma po, aþaryon nalologonen lologena wo a nakilapianen yeririna lala, popon atol ve keviu li laa sane, va yam ve lua.

19 Visae yar tai imi visawal nasumonena tai, sape naga kila sur tai piowa naþa monar avis van e kumali vanonia, visena kiena yar nene naga taaga pe torokin re naþa akila sanene poli. Visena na sanene, monar yar ve lua po ve telu vena aiilaaria, þisi na akilia aure va kumali.

20 Ana visae nasumonena tai taþa lue ga mlamulena viowa, yoko monar ovisaluþar nena vania e maran þegas nen nalelagaena lala, ana pogos naþa nasumonena taþena la avisuia, marauena tol ruru la, sane lala mena ve alor re sanene.

21 Italua tekilia sane Ntewa amio Kristo Yesu amio kiela navisi wa lala apisu ita maga, ana e marala, nevisa van ko sane ouarar ruru kiau visena la nene. A nepisa mena ga nesape pogos naþa sa oyumaen ke sur la nene, ve ovisu re yar la veve taþena, ana ko na monar okila maran taaga ga van la punu ga.

22 Visena si laþasia naiilaena sanini, ve okoskosin re wuen þarin yaru vena imi ve nasumonena tai, ana ovisu ruruli kiena malena sumo wa. Pe pon re naga kilawan mlamulena viowa naþa suma miyumaenia. A ko na owaryon ruru ga vena losinema merarava, a ve wa silaga.

23 Sa naþa nesuma nemloge ke rui, nekilia sane ko na osuma omai lili maga, ana nesape nevisa van ko ve ovalia re si munen kuruta. Ve osuma omun re ga wii,

a okilia omun narin kuruta pogos ðasia, þisi na pona kilia iila mopoma yo.

²⁴ Ta sina sanini, sane yar ðasia, akila naþa kiela mlamulena viowa sike e marata merarava ga, þisi na tevisu kilia sane yoko atol nakoena vanonia. A yeririna taþena laþasia, akila naþa kiela mlamulena viowa tapolou ruru ga sumã ga, a siraunia, naga mēna yoko vim kate e yo metava sirau.

²⁵ Yumãena wo mēna la ne sanene. Laþasia, asike e marata merarava ruruia, a laþasia, atapolou ruruia, pe tekilia re poli. A naþa tapolou sike ne, taþatete tapolou lue, a naga mēna monar kate e maran yaru lala.

6

Yaru la naþa amiyumãe koren ga kiena yar tai

¹ Nagane nesiri e lepas kiena ne ita ðasia naþa asumã sane pe kiela sur re poli, silaga asike e limana ne yerkawa tai, amiyumãe koren ga pania e mēna umã.

Malena na sanene mārera, sa naþa sur urmi tai mon lue ga e māsila, ana taþatete sinela kar kiela yerkawa, monar avisu naga sane mesmesu ga naþa avatanonia. Visae akila ve sanene, yoko kiela yerkawa taþatete visu viowa e kia kiena ne Ntewa naþa teke e la.

² Nekilia sane yeririna laþas naþa amiyumãe koren sanene, kiela yerkawa mēna la amlelaga. Sanene, yaru na yumãena amio yerkawa, lalua ape wenla ga e Kristo, ana naga nene pe pe naga re ga naþa yar na yumãena kilia kirakirai e yumãena kiena kiena yerkawa. Peraga, monar ayumãe ruru laa sane, monar akekaran ga naiilaen yar naþa amiyumãe kiena, komin naga lala tai e þegas kiena ne li nalelagaena a naga mēna pe lala tai naþa monar sinela siia.

Navianena na visokanena

Naga nene navianena ðasia naþa avisa lelein van lala taþena, naþa monar oiilaar la ea vena ataveve ruruia.

³ Yar naþa kila navianena taveve sitomena taþena, naga tarlu visena nowo lala kiena ne kieta Suþe Yesu Kristo,

kiena visena ve maran taaga re si amio navianena naþa kilia were þelaga kiena ne yeririna imi ve sa þelaga kiena ne Ntewa.

⁴ Yaru naþa taveve kiena sitomena va ve taþena sanene, tepisu naga þarwaria, þarina keviu paþisi, ana pe kilia re nena suria. Naga to lue ga e sinenan manene vilupena, pis liu, ana pe sur wo tai kate re e lele nene poli. Þelaga viowa ga la akakate e naga, sane vielueena, wanka-reen visena, visena mumu amio sitomen viowa lala van yar taþena.

⁵ Yar la naþa amiyumãen nene asumã apilup kare ga, naþa sitomena naþa wo amio visena naþa pe lelaga pe su re nena e la poli. Ana apa apiowa re laa sane wa, vanon asitom ke asape nayakolen sumare naga pe mrapa wo tai natauluen kilavaru.

⁶ Ana pe sa re nene poli, vanon yar naþa kiena þelaga po sane Ntewa, a naga kekaran ga sur ya naþa Ntewa mla pania e kiena malena, yar ke nanene narui naga taulu sur wo tai naþa po rui.

⁷ Pogos naþa tepaeme e yomerava nini, tepe plamome ga tepimi, limata korena ga, ana yoko tevetan sina ga sa m̃a nena ga nene tevano, pe sur re tai naþa tekilia towarar poli.

⁸ A pogos naþa temal ke e yomerava nini wa, visae telual narin kinanena tai, amio narin kulmrae nakalo itaena, nanene naga torok ne, tekilia tekekaran ga, sinetan ke si ya?

⁹ Ana lala naþa sinelan manene laa sur lala, sinelan asape ave yar na sur moki, pona pe apisuluþar re poli yo, naþa asike pa e yo nataþaliena rui, ana Yermare sumã tol la ke rui e kiena nakilakokanena la.

Yoko nasinenanena viowa naþa na kila kareen malena kien yeririna lala vim ve moki e la, vano-o aure la ava viowa laa, akuspal sur punu ga, ava atalilu e lele na kovioena.

¹⁰ Lelaga, þelaga nasitom maneneen kilavaru naga pe purþes nen þelaga viowa kar la punu ga. Nasinenan maneneen waren kilavaru ve moki naga karmo sineta ita ðasia, þere la amial lili m̃a

apano, ana amilan ga naña amolue punu ga petan mrapa na viawaena rui.

Siraunia, akus viowaena moki vanonia, a kila naloge viowaena la tol la, ana asiar ga apisuluþaria, asitom sina ana piowa ga rui.

Pelaga wo

¹¹ A Timote, ko na sane yar kiena ne Ntewa lelaga, monar ovilon masuñña van nataþaliena viowa punu ga na sanene. Sur ya naña monar oligan to vamon ko silaga, naga pe þelaga na mesmesuena, þelaga naña yar imi wo sane Ntewa, þelaga na viawaena, þelaga na sinesiena, þelaga na uarar ruruen yuññaena, a þelaga na moñauena.

¹² Ko monar osuññalu ñarera e kieta mara wa na lelagaena. Ve sinemña þesan re pogos naña osuññalu e marana ne li nalelagaena la moki, naña opisawal kionña navisaarena nanua ne. Ntewa pio ko vena okus malena nene naña ve þisi re, ana mla pan ko e pogos nene, ana ko na monar ouarar ruru vano-o ve lor re sina ga vetan lumomña.

¹³ Ntewa naga pe purþes nen malena na sur make ga, a Yesu Kristo, pogos naña aþure naga aþaro pa puna yaru naña Pontis Paelat, ana naga pe marau re poli, ana ñareran ga pisawal ruru kiena naviawaena, ana sa naña italua tesike e marana lalua Ntewa amio Yesu, sineun nesape nela si pupia visena tai van ko.

¹⁴ Nevisa ve sanini, nevisave nomareran ko nesape monar olarar ruru visena kiena ne Ntewa la nene, naña pe kionña kororaki pona kionña nakila palen re tai poli, vano tol pogos naña kieta Suþe Yesu Kristo wasuþe ea.

¹⁵ Kiena nawasuþeena nene, yoko ñalivin ita e kana pog ne napo, sa naña Parin Suþe wa na mava sinenania, komin Parin Suþe wa nene naga taaga pe suþe kiena suþe la make ga, a pe yerkawa kiena yerkawa la punu ga.

¹⁶ Naga taaga mal lue na sike ne, naña sike loyumña e kiena pupia naurarena naña pisaluþar sape taþatete yar va lavisia, pe yar tai pisuli re pogos tai poli

wa, a taþatete yoko yar tai visu pogos tai. Kieta Ntewa nene, tewatanon naga, a popon navesuþeen sur make ga ve kiena naga taaga, vano-o taþatete þisi pogos tai, sanene.

Nalelagaena la naña kiela sur moki

¹⁷ Pe lelaga naña ita laþasia, kiela kilavaru moki, limala pulen ruru make nena suria. Nanene pogaga, ana monar ovian la ñarera ovisave ve avilave re, ve awarwar lan re sina vanonia. A pe pon re awasine ga kiela kilavaru la nene poli, naña pona pogos tai ailan ga, avisu sane kokovio make nenaga, ana monar awasine ga Ntewa. Naga ga pe purþes nen sur make ga la nene, suñña þar ke nalaena la nene mokliu pimi ñalivin ita, mok paþisi, vena iila ita tekekara e kieta malena lala.

¹⁸ La naña limala pulen kilavaru, kiela malena monar ulen yuññaena wo la naña amiyumñaen ke amio. Ve asitom manene re avisave monar auarar manene kilavaru nene ve kiela ga, ana popon akekaran naña avion va yar taþena naña kiena pe torok re poli.

¹⁹ Visae akian plan va ve sanene, yoko Ntewa kila naña asuñña amiyuwon polo ke kiela navisa rurueña ma e peni, sa naña asuñña apisirlua ke ñala yuñña nowo tai monmate pog na pimi ke ne. E mrapa ne nanene, asuñña apanon ke naña awarpoyon atol malena naña pe lelaga.

Visena maro

²⁰ Ake Timote, olarar visena wo make ga naña nepisa piñasu pan ko, naña nemligan e lumomña vena okian lelein va laa sane.

Ve ova re loyumña e visena la naña taþatete aiila kionña malena amio Ntewa. Yar moki apian la ga e kiliaena na yomarava, ana apisape kieta lelagaena amio visena wa kiena ne Ntewa, sur la naña pe lelaga re poli sike ea. Ana kiela kiliaena nene pe lelaga re nena poli, naga pisokanin ke sina ga kiela sitomena lala.

²¹ Laþas atol ruru manmaruaena na yomarava nini, amlologon ruruia pa e yo

make ga, ana sur taaga, akila pal mrapa
na lelagaena naŋa akila pal ruru nenaga.

Kiau visena ŋisi e nene, ana sane
silaga, nemlen nesape lemamiēna kiena
ne Ntewa sike amio ko.

Inu, Pol.

Maki Nalua Naña Pol Siria Pa Pan TIMOTE Visayuena Na Tusi Nene

Suniena plas na tusi nini

Maki na lua nene naña Pol siri pan Timote, ana pulen visena wo lala na iilaen Timote naña kiena erau viu naña sumña miila naga. Sitomena keviu naña sike e mñaki nini, Pol pisa pan Timote sape sumñalu mñarera vena visawal lologena wo kiena Yesu Kristo. A pisa pania sape naga monar uarar vianiena lelaga na lologena wo, a na Tusi Marua. Naga pisa pan Timote sape monar kila luwe ga yumñaena na vianen yaru lala, a vena kila yumñaena na wereen yaru lala, pe suri korenaga visae yaru la avisakare naga pona avisakare yumñaena na sumñare naña naga sumña kila ke ne.

Pol pisa pan Timote vena ve va sikol re naga e visena wowe lala a visena na veveyuena naña tařatete kila suri wo tai, ana vena kila kareen ga yaru lala.

E mñaki mñenaga nini Pol pisa pan Timote sape taveve řalaga wo la sa naña naga kila ke ne e kiena maliena. Nanene řelaga kiena Pol sa naña mlelaga mñarera, a kiena sitomiena piyavi, a sinen si yaru lala, a kiena řelaga naña pa řarpoyo e pogos mñarera lala naña yaru la akila miloge piowa e tasnena, ana naga pe paruru re poli, sumña pisawal luwen ga lologena wo kiena Yesu Kristo.

Komřasnen tusi la na nini

Visena řesa 1:1-2

Pol mieluar Ntewa vanon Timote ana pian Timote 1:3—2:13

Pol mila visena na iilaen maliena kiena Timote 2:14—4:5

Pol pisayu naga amio kiena yumñaena 4:6-18

Visena maro kiena Pol 4:19-22

Visena řesia

1:2 Yumñaena 16:1 1:5 Yumñaena 16:1

¹ Naruu Timote, in Pol naña nesiri mñak nini pimñasu pan ko, naña nasinenanena kiena ne Ntewa ga naga pisirlua inu nepim nepe nalogena kiena Kristo Yesu. Kristo Yesu naga pe purřes nen malena naña Ntewa pisaar pan la naña amlelaga pania.

² Timote, kiau leniena nesape yoko Ntewa Arimata a kieta Suře Yesu Kristo, lalua aligan pupia lemamiena, sineyeena, a sumñarena su lue ga pun ko.

Visena na potena pa Ntewa

³ Sa naña kau apua lala ataveve nanua rui pimi, in na nomřareran lue ga kilaen yumñaena kiena ne Ntewa, a in na nesumña nořikeyon naña nelotun naga amio losineu wetelu. Ana legiena a lemalo, e pogos na leniena lala, nesitoñal ko mñaga, nesumña nepisa lue ga potena pařisi pania vanon ko.

⁴ Nesumña nesitoñal ke wamaramña lala nalogeen viowa, ana kila narui sineun manene pařisi naña neiñmasu nemñalivin ko sina. Visae nevisu sina ga maramña, yoko neloge wo na neloge wo!

⁵ Nesumña nesitoñal mñena ga kioñña naviawaena lelaga, naña nanua se komña apua naña sira marua Lois, siraunia se komña mñamña naña Yunis, a sa naña nepisu kilale rui, nagane sike e ko.

⁶ Naga ke narui nesumña nesitoñal mñena ga nalaena naña Ntewa mla pan ko, pogos naña nopu řaruñña nemlotuwo ko. Sineun nesape nevisa van ko sanini, ve otamñan re kapi na nalaena nene vito tano, ana monar osuñña okila lue ga vivaga ruru silaga.

⁷ Monar ositoñal Ninuna naña Ntewa mla pan ita, naga pe ninuna re naña na maraunen yaru poli, ana naga pe Ninuna na mñareraena, pe Ninuna na sitomena, a pe Ninuna naña kila yaru kaweruru kiena malena.

⁸ Visae lelaga kemua naña Ninuna ke nanene narui sike e kioñña malena, monar ve omawan re visawalen lologena wo kiena Suře va yar lala, pona monar ve omawan re naña ovisawal va yaru lala ovisave lelaga sane ko na ope kiau erau

wo tai. A amliganin nesike e yuñña naloge viowaena vanon kiena yuññaena, ana pe pon re omawan inu vanon sur nene poli. Kionña suria naña yoko okila, monar okekaran ove ñegas omio inu e naloge viowaena vanon Lologena Wo, vano tol naña ñareraena kiena ne Ntewa kila ko otorokin oyumñaenia.

⁹ Ntewa ke narui, naña naga tamalia ga ita luwoka rui, a pio ita ga luwoka teyaloro e mrapa na kiena malena wa, ana silaga kilia iila ita. Nanene pe vanon re ga naña italua tekila kiena yuññaena wo poli, pona italua tekila ya, ana naga kila ga molue kome kiena sitomena amio kiena lemamienna wo pan ita. Kiena lemamienna nena, naga kila ruruia, mligan ruruia sike amio Kristo Yesu nanua sumo rui, sumon naña siar kieta pogos ita yeririna lala na yomarava.

¹⁰ Ana lemamienna nene sumña sanene pano-o tol nagane towe ga, naña ñalivi mare ga e yomarava naña kate e marata kome kieta natamaliaena Kristo Yesu. Naga pitomi e yomarava, kila make ñareraena na marena pimi pe sur korena ga tai, a kiena nalologena wo kila naña nagane tesike e yomarava nini wa, tekilia telual malena wo. Ana naga kila ñena naña siraunia, yoko tekilia teva loyumña e malena naña tañatete ñisi pogos tai.

¹¹ Lologena wo nena, naga ke narui naña Ntewa pisirlua inunia nepe kana navisawalena nena, nepe kana nalologena nena, nepe kana navianena ñena ga.

¹² Kiau yuññaena nena nane kila nepane ke pogos ñarera lala loyumña e yuñña naloge viowaena nini vanonia, ana pogaga naña, pe pe sur re tai pan inu poli. Pe nemawa re poli, komin nekilia nesape yar naña nemlelaga ea, naga pe lelaga, kiau nalelagaena ea ñarera ruru po pañisi sane ya naña nemligan e limana, yoko uarar ruru ñarera sumña ga vano-o tol Legiena maro.

¹³ Sanini Timote, nesape nevisa van ko sanini, monar otaveve ruru mrapa na visena mesmesu lala naña nemla pan

ko, monar osuñalu ñarera e Yesu Kristo silaga, a monar oligan ruru kiena sine-siena sumña ule e kionña malena.

¹⁴ Ninuna Wa sumña kokonia ruru losineta, ana ve oligan re navisa ruruena la naña naga mligan ruru sike e kionña malena rui, ana oloun ruruia.

Pol pisayu Onesiporas

¹⁵ Nekilia nesape omloge lologena viowa tai rui, naña asape li na lelagaena lala nae pupia lepas naña Esia, apilon ñasila pan inu rui, a la nene amio ñena kieta erau lua naña Paekelus amio Emosenisi.

¹⁶ Ana kieta wolai wo naña Onesiporas, naga kila po pañisi. Pe sur korena ga naña apiar inu e sen lala loyumña e yuñña naloge viowaena nini, ana naga pe mawan re naña imi katen inu poli, ana nemlen pa Suñe vena visa ruru naga ve keviu amio kiena namratava lala.

¹⁷ Naga pimi ñaliv Rom nini, pe yam piavi re nenaga naga ñiyon naña sape lual inu, pano-o pimi tol inu e yo nene.

¹⁸ Naga sumña kila manene ke sina ga suri wo la pañisi pan inu e Rom nini, sa ke ga naña miila ruru inu sumo rui pogos naña nesike gar Episas nanua ne, sa naña kam na akilia ruru rui. Naga po pan inu sanene, nemlelaga nesape yoko Ntewa sinen ye ruru nena naga e legiena maro.

2

Yaru na mara kiena Yesu monar war naloge viowaena

¹ Naruu Timote, nesape nevisa van ko sanini, popon ola lemamienna kiena Kristo Yesu ve keviu e kionña malena, ana yoko okilia omñarera ruru wo vena osuñalu osulue.

² Yam moki rui naña omiagogon kiau visena lala naña nepisawal ke e maran yeririna lala, ana monar olual yar lañasia naña auarar ruru yuññaena, ola visena la nene van la, ana siraunia, la ñena ga akilia avian liluen la vano tol yeririna tañena lala.

³ Ita yar na kilaen mara lala kiena ne Kristo Yesu, yoko ita veve taaga monar

kieta pogos na lualen pog m̄arera la sike ne. Ana visae nagane kioṃa pogos narui, monar ola ga ve sa naṓa kioṃa lepa na yuṃaena tai.

⁴ Ositom ruruli yar na mara lala. Kiela yuṃaena monar akila kare m̄areraen na sinekar kiena ne kiela yerka wa vito tano, ana pe asikol la re amio yuṃaen kar la poli, sa naṓa yar taṓena la asuṃa amiyuṃaen ke ne.

⁵ A monar ositomyuli ṃena yaru viu la naṓa akila kiriena. La aṃareran ke naṓa atauluia, vena atol kiela nalaena tai, ana visae akilaro navisaluaena na kiriena, yoko akila plan la, taṓatete atol sur tai ṓisa.

⁶ A ositoṃal ṃena yaru na yuṃaenen lokove lala. Yar na m̄areran yuṃaenen lokove mapila ve moki, nane yar ne nane popon war kinanena ea.

⁷ Sur la ne nesuṃa nepisa ke ne, visae ositom ruru la, yoko Suṓe iila ko vena otol kiena manmaruaena wo lala a kiena kiliaena lala ea.

Popon yar na lelagaena la asuṃa asitoṃal lue ga Yesu

⁸ Naga naṓa yoko ositom manene laa naga, nane Yesu Kristo. Naga paeme e yomarava molue kome lus kiena yer-marua Parin Suṓe Tepet, a siraunia, aṃeṃar naga, ana naga mal sina sa naṓa Lollogena Wo pisa. Nane Lollogena Wo ne nane nemlogon ke ne,

⁹ a nane Lollogena Wo naṓa netol pupia kana naloge viowaena e yo nene, naṓa kila narui nagane apiar tasneu la wetelu e pototo, sa naṓa in na yar viowa na kilaren navisaluaena. Ana sur tai naṓa yar la taṓatete aviaria, nane visena wa kiena ne Ntewa, komin momolue ke ga wa taṓatete avisaluṓaria.

¹⁰ In na nesuṃa sineu miye manene yeririna la naṓa Ntewa mligan plan la vena nekila la atol malena kome Kristo Yesu. A sitomen ne na nene narui kila sane pog m̄arera ya naṓa nokom ea, ana in na nesuṃa nakawean inun ga vena nekila make suria, vena la ṃena ga

akilia atol naurarena nae ma e peni naṓa taṓatete ṓisi pogos tai.

¹¹ Yauena tai pisayu sur nene, kana visena ne lala lelaga paṓisi, naṓa pisa sanini, sape

“Visae teva e marena temio naga, yoko temal temio naga.

¹² Visae tesuṃal m̄arera e pogos m̄arera, yoko teve suṓen yo temio naga. Visae tevilon ṃasita vania, yoko naga ligan ita,

¹³ ana visae tekila pal naṓa teloru, yoko naga tarar ita m̄arera suṃa ga, komin naga kuslua ita tepe kiena, ana naga taṓatete visokan, taṓatete si kovenlua ita.”

Yaru wo na yuṃaena kiena ne Ntewa monar uarar m̄areran visena lelaga

¹⁴ Nalelagaena la ne asike ne, monar osuṃa ovian la ṃaga vena ve sinela ṓesan re sur la nene. A monar ovis m̄arera van la ovisave e kia kiena ne Ntewa, ve aveveyun la re. Apepeyun ke kinas nen visen la sane asuṃa akila ke ne, pe akila re sur wo tai poli, a pe amiila re nena la taṓena naṓa asuṃa amiagogon ke poli.

¹⁵ Sur wo ya la naṓa okilia okila sane yaru wo tai na yuṃaena kiena ne Ntewa, monar okila make ga vena wo vaṓisi e kiena navisuena. Visae okila wo ve sanene narui, yoko taṓatete omawan mras naṓa kioṃa yuṃaena waria, a okilia oim ove yar na vianen visena lelaga lala kiena ne Ntewa va yaru lala mesmesu a wo.

¹⁶ Ovisuar ruru e visena korena la naṓa yar la asuṃa apisayu kare ke ne. Visena la ne sanene pe nasuen re e sitomena kiena lelagaena la poli, komin naṓa akilia aure la ava manene laa e ṓelaga naṓa Ntewa pe sinenan re poli. Popon ve ova re lavisin yar la naṓa akila ke sanene,

¹⁷ komin visena kien la nene sa naṓa magka wa tai, naṓa kar ke tas nen yaru taṓatete imi wo pogos tai.

Nepisu sane monar nevisa sane lalua nene Aemeneas amio Paelitas, lalua sa towe ṃa nene rui,

18 komin naŭa apur matan mrapa na visen lelaga, asumã amlologon ke kiela lelagaena tai naŭa pe pe lelaga re nenaga. La asumã apisasa ke asape e luas nen yomerava, nasumãlen si e marena na peraga, komin e kiela sitomena, asitom asape Ntewa kila ke rui, nane e pogos naŭa naga miyumaẽ e kieta malena. Ana pogos naŭa amlologon ke kiela visokanena nene, asumã akila kare ke lelagaena kiena yeririna la moki, kila narui kiela sitomena pimi peve lua sina.

19 Ana ko mēna ga monar ve sinema kurkur re, komin yuma naŭa Ntewa suna miyumaenia, miasin namaplarena la nene sumal marera ruru suna ga. Visena lala e siriena wa kiena ne Ntewa sike ne naŭa torokin e lepas nene, a tai pisa sanini, sape

“Ntewa kilia ruru po paŭisi a la naŭa ape kiena yeririna lelaga.”

A nalua nena, pisa sanini, sape

“Yaru naŭa mla kia kiena Suŭe teke e kiena malena, naga monar ligan ŭelaga lala na mrapa nakilaen mlamulena viowa.”

20 Ositomyuli pupia yuma mana yar na sur moki lala. Loyuma e yuma la nene, tekilia tevisu pias nen sur na kinanena lala, naŭa laŭasa, amiyumaen e kol pona selpa, a laŭasa, amiyumaen ga e porotano pona e laki. La naŭa apisu sane po, asumã apio kinanena pa ea, e kiela pupia paŭagena kerkeviu lala, ana laŭasa, asumã akinan kai ga ea.

21 A ita yeririna lala ita maran taaga sa ke ga nene. Yar naŭa kila kiena malena merarava ruru po, a pe wa, a pe kila re yumaena viowa la poli, yoko kiena yerkawa were naga kila kiena yumaena wo la ve moki e maran yar lala.

22 Visae sinoman osape ko ove sanene, monar ovisa luŭar kioã naninuena marera lala a nasinenanena viowa lala naŭa sitomena kiena mee lala kilia ulenia. Monar oŭionli naŭa kioã sitomena ulen nawoena, a viawaena, a sinesiena, a sumarena, ana sanene yoko wo vaŭisi van ko omio taŭena la naŭa kiamiu sitomen taaga, naŭa asumã amlen ke pa Suŭe vanon kiena naiilaena.

23 Yam mokliu, yar la akilia aveveyu vaŭisi van la komin sur wowe lala pona kiela sitomena kar lala, sa naŭa pe akilia re suri tai poli. Pogos tai veveyuen la nene va maga tol naŭa asulania, akilia aliŭerela sina, ana ko na pe pon re ova loyuma e visen la ne sanene poli.

24 Yar nayumaena kiena kieta Suŭe, naga monar ve sinena kar re yar taŭena lala, ana naga monar visuar ruru la, monar kilia ruru mrapa na vian malumunlaena. Naga monar ve sinen mimi re vilaga, ana kiena sitomena ve piavi ruru wo van la.

25 Pona pogos tai laŭas ve aloge re naga yo, yepel mavinia, ana visae kilali naŭa were ruru kiela sitomena, ana naga monar malum ga van la. E mrapa ne nanene pona Ntewa yoko kilia la narin pogos tai van la vena vilonen kiela sitomena, vena atol kiena visena lelaga.

26 La ne sanene, Yermare suna puarar ruru la ke rui, suna mareran la ke vena akila ya naŭa naga sinenania. Ana visae akilia atol maran si kiela kiliaena wo, yoko akilia aure vetan kiena pova a kiena visokanena lala.

3

Pelaga na ŭarmarera lala na legiena maro

1 Timote, monar ve sineta ŭesan re sane e legiena maro la nini, yoko monar pog marera la ve moki aimi amliv.

2 Monar ve sa nene narui, komin naŭa e pogos nene yoko ŭelaga kiena yar lala va viowa manene laa. E pogos nene, yoko ave sanini:

yoko ave yaru na sitomal laen ga,

yoko asitom manene ga kilavaru,

yoko avilave a awarwarla vaŭisi,

yoko ave yar na veveyuena,

yoko taŭatete alogear visena kiena kiela yermarua lala,

yoko taŭatete nena avisa potena e sur tai,

yoko asitom korenan ga sur wa lala,

3 yoko taŭatete awo van yaru taŭena,

yoko ave ŭarmarera vaŭisi,

yoko aviueli a avisa kare sur wo lala,

yoko sinela kar yaru lala, asu la,

yoko yepel mavin sur wo lala,
⁴ yoko avisa kotalia kiela erau lala,
 yoko ve asitom re suri tai,
 yoko asitom asape la ga na apo,
 yoko ve sinela si re Ntewa, ana sinela si
 ga malena wo ya naþa la sinelania,
⁵ a visae akilali naþa auarar towe
 laa narin yuþaena na suþare lala,
 ana na nene e ga e kulusa, komin
 naþa kiela malena pisawal ruru rui
 sape m̄areraena lelaga na lelagaena
 e Ntewa pe to re nena e la poli.

Nane þelaga na malena kiena yaru na
 legiena maro lala, a monar ve osu re
 lavisin la.

⁶ Sineu miye m̄ena sira la nene paþisi
 wa naþa navianena navisokanen lala
 asum̄a ateteliv ke m̄ala uþa lala. Sira
 la nene laþasa asum̄a aþar ke urmiena
 namlamulen viowa rui, a laþasa sitomen
 taþena la sike e la, kila sane visae yar la
 aimi vinau sanene, ana sira la nene ameu
 paþisi, pe puriula re si naþa avisaluþar la
 poli.

⁷ Ya naþa yar la nene apisa, ana amle-
 laga ga narui, akila m̄a sanene pano-o ana
 pe atol ruru re kiliaena napo poli e visen
 lelaga kiena ne Ntewa.

⁸ Yar la ne apivim ke sanene, nepisu la
 sane ape nasinekar kiena ne visena lelaga
 napo, sane e pogos kiena ne yermarua
 Mosis nanua sumo, lalua naþa Sanes amio
 Sampres, apim apian kare sitomena kien
 yar la moki. Yuþaena ne nanene yar la
 nene asum̄a akila ke na wa, naþa kiela
 sitomena la pilolon kare pa piowa, pe
 apuarar re si kieta viawaena poli, ana
 apurmatan apa e taþena.

⁹ Ya naþa la akila naga piowa manene
 laa, ana pogos na warden kana nakoena
 nena yoko imi m̄aliv pogos tai na wa, sa
 naþa m̄alivin lalua na nepisa ga na wa.
 Pogos tai, amilan ga kiela visokanena kate
 ga yometava, ana yar la apisu kilalea.

Pelaga wo lala kiena ne Pol

¹⁰ Timote, tesu lele taaga nakonua rui,
 ana nekilia nesape ko na opisuveve inu
 po paþisi. Okilia inu sanene, naþa

okilia ruru ya naþa nepian ke pan yar
 la ea,
 okilia ruru kiau þelaga,
 okilia ruru ya naþa sineun nesape
 neyumuþaen e kiau malena,
 opisus kiau viawaena e Kristo keviu
 sanape,
 okilia ke osape kiau sitomena piavi,
 opisus ke sinesiena naþa teke e inu pa
 yar taþena keviu,
 okilia ke osape pog m̄arera ya naþa
 pimi pan inu, ana nesumuþalu ga,
¹¹ okilia ruru napiowaena la naþa kiau
 nasinekar la akila pan inu, sane e
 pupia kumali telu nene, Antiok, Aeko-
 niam amio Listra,
 a okilia ke yepe lalaea naþa noþaria e
 limala e pogos la nene.

Naloge viowaena la nene am̄arera
 paþisi, ana nakawean inu ga pano-o
 nom̄al naþa Suþe pimi þerelua inu e
 napiowaena make la nene.

¹² Ee, ita punu ga naþa sinetan Kristo
 Yesu se ita, pona telual malena wo temio,
 monar tekilia tesape yoko towar naloge
 viowaena e yar taþena lala.

¹³ Nanene na pogaga, ana naloge
 viowaena taþena sike ga wa naga piowa
 ga, naþa yaru viowa lala amio yar nav-
 isokanena yoko awaria. Nagane asum̄a
 akila manene ke piowa rui, a yoko akila
 m̄a viowa sanene vano vano-o viowa
 manene la, vano vano viowa naþa viowa.

¹⁴ Ana ko Timote, okila ga omio kiliaena
 wo la naþa otol rui, ana oyumuþae va
 sanene omio lelagaena wo la naþa opiawa
 ruru m̄arera e rui. Ve sinem̄a þesan re
 sane imimi ai naþa mepian ko,

¹⁵ siar e pogos naþa ove tokak ke ga wa
 gar moþa, pimi tol nagane, ana kila sa
 naþa okilia ruru Tusi Wa, naþa kilologia
 mrapa na tamaliaena kiena yar naþa
 mlalaga e Kristo Yesu.

¹⁶ Siriena Wa la nene, Ninuna ne Ntewa
 sike e la, ana akilia aiila ita ve keviu vano-
 o vaþisi. Avian ruru ita, aweþeþe sineta,
 akawe ruru kieta þelaga, a akila kieta
 malena wo nenaga,

17 vano vano-o ita yeririna lala kiena ne Ntewa teim towo a tetorokin nakilaena kiena yum̃aena wo lala.

4

Pol miilaar Timote

1 Timote, sane italuva tesike e marana Ntewa, a e kia kiena Kristo Yesu, nepiun tan ko nesape owarar ruru sur laṗasa naṗa sineun nesape nevisa van ko. Italuva tekilia tesape kieta Suṗe yoko liṗere la naṗa amarmare rui amio la naṗa amali, a italuva tesuṃa tesitom ke urmi paṗisi e kiena nawasuṗeena sina, amio kiena nasuṗenena naṗa yoko naga visirlua, ana monar ologe ruru visena la nene.

2 Ya naṗa yoko okila na ve sanini, monar olologon Visena Wa silaga. Visae pog wo pona pog viowa, ana monar osuṃalu ṃarera vena visawalena, monar oṗion tauluen yeririna lala, monar oure ruru la naṗa akom ke e mrapa taṗena, a monar oiilaar yaru la naṗa amlelaga.

A pogos naṗa okila yum̃aena la nene, silaga kioṃa sitomena monar ve piavi ruruia, a ve sineṃa maren re vian laena.

3 Pogos la ne pimi ke ne yoko yeririna la yepela mavin vianen wo lala, ana yoko kiligala lala vikiraran sitomen kar lala, a yoko asuṃa aure navianena la ve moki naṗa asitom ke asape yoko akilia avisa sur wo lala vena kilaen alogewonia.

4 Yoko aligan logeen visen lelaga, a yoko akila pal mrapa ava ataveve suniena lala naṗa yar ga la akila.

5 Ana ko na ve ove sa re nene, ana okila ga kioṃa sitomena va ruru suṃa ga, okawean ko e pogos ṃarera lala, okila kioṃa yum̃aena na lologonen Lologena Wo, a oyum̃ae taveve ya naṗa Ntewa pio kon sape oyum̃aenia.

Pol pisu sape lavisi aweṃar naga narui

6 E lepas naṗa pun inu, nemloge sane nagane nepim ke lavisin luas narui, nepimi ke e lele tai naṗa yoko monar nokuṗaṗain kiau malena vanon Lologena

Wo narui. Ee, nepisu sane kiau pogos na liganen yo pimi ke lavis narui.

7 Ana pogaga, komin naṗa nekilia sane nekila mara, noṗaryon ṃarera po; nekiriri, nekila make nenaga; a nopuarar lelagaena, pe nemligan li re pogos tai poli.

8 Yar napo lala kiena ne Suṗe yoko atol karo wa na ṗarila, a nesitom sane naga mligan ruru kiau sike ma e peni rui, vena yoko e ga e legiena maro ana la van inu.

E pogos nene, yoko naga liṗere yaru make ga, a yoko naga la nalaena van ita make ga naṗa kieta sitomena ṃareran naṗa tekrakravan kiena nawasuṗeena.

Visena maro

9 Timote, sineun manene nesape owarlion naṗa oyal kawa oim e nini.

10 Sineun ko paṗisi, komin wolai naṗa Timas, sur na yomarava la aṗere kiena sitomena pano-o pure pa garu Tesalon-aika. Kresens ṃena ga pa garu Kalesia rui, a Taetas pe su re si amio inu poli, naga pito ke Telmesia.

11 Erau ga tai sike amio inu nagane, nane Luk. Ana visae okilia olual Mak, yoko oure naga imi amio ko, komin naṗa nepisu naga suṃa miila inu keviu paṗisi e yum̃aena kiena Suṗe naṗa sineun nesape nekila.

12 Taekikas, nepitetalia naga pa garu Episas rui.

13 Yoko nevisa kiau sur laṗasa, sanini pogos naṗa ovam e nini, yoko owarar la avami. Mau kulkota na miava, nemligan ṃeke puna Karṗas pogos naṗa nesike gar Troas, a kiau tus lala amio ṃas nen tus lala, sineun nesape owarar sur la nene imi.

14 Okilia ke yar na yum̃aenen piaki naṗa Alikanta, naga kila visena viowa la mok liu pan inu. Yoko Suṗe ga visuvevea vena kila ya ne vania,

15 ana monar nekila ṃena okilia naṗa naga kawe manene ke kieta Lologena Wo, ana monar ovisuar ruru ko ea.

16 Yer kawa nae Rom lala apis pan inu kumali yam tai rui. E pogos nene, kiau

4:10 Kolosi 4:14; Pilimon 1:24, 2Kor 8:23; Kal 2:3; Taetas 1:4 4:11 Kolosi 4:14; Pilimon 1:24, Yum̃aena 12:12,25, 13:13, 15:37-39; Kolosi 4:10; Pilimon 1:24 4:12 Yum̃aena 20:4; Epis 6:21,22; Kolosi 4:7,8 4:13 Yum̃aena 20:6
4:14 1Tim 1:20, Rom 2:6

erau tañena lala apureure make ga, pe la yar re tai naña pimi e lepasneu poli. Ana nanene na pogaga, popon sane Ntewa ve sinen karla re vanonia.

¹⁷ E poglis nene, Suñe ga naga taaga amio inu, ana nemloge sane naga mla pupia nañareraena pan inu, ana nomñareran visawalen sur make ga na Lologena Wo e maran yeririna lala, kila narui ñegas nen la naña pe amlelaga re e Ntewa poli amloge. E pogos nene, lelaga, nesike pae e logon laion rui, ana naga ñerelua in sina petania.

¹⁸ Nemninue narui añña nelual naviowaena ya ne yoko nevan ea, ana nemligan inu e limana Suñe, nesape yoko naga tamalia inu vena nesike nemio e kiena yo wo ma e peni, a silaga yoko nelasuñe si naurarena la vania, vano vano-o ve uro re, sanene.

¹⁹ Sur si lañasa navisaena, awis ovisa pokolulagi pona pokolemalo va sira nene Prisila amio wona Akwila, a va mña namratava puna ne Onesiporas.

²⁰ Erastas pe pam re si e nini poli, sike ga Koren, a pogos naña mepam, metol yo Maelitas, ana Tropimas mai, nemligan naga sike e yo nene.

²¹ Timote, sineun manene pañisi nesape monar okilayonli ovam e nini vilaga, komin pogos na miava pimi ke lavis narui.

La ne e nini asape nevisawal van ko, la asape asitom ko pañisi, nane Yupulus, Putensa, Linas, Klotia, amio erau tañena lala.

²² Noñisi e nene narui, nesape Suñe sike amio ninuñña, kiena lemamienna sike amio amiu make ga.

Inu, Pol.

Maki Naþa Pol Siria Pan TAETAS Visayuena Na Tusi Nene

Suniena plas na tusi nini

Taetas, naga pe yaru viu naþa naga pe pe lus nae re Israel tai poli, ana naga pimi pe yaru tai naþa mlelaga e Yesu, ana naga suña taveve Pol vena iila naga e yuñæna a na visawalen lologena wo kiena Yesu Kristo. Pol mligan Taetas sike e purvanua naþa Krit vena visuar yuñæna na suñare e yo nene, a naga siri maki nini pania vena visayuen suri telu.

Nasumo, Pol pisa pa Taetas vena sitomål þelaga naþa nasumonena na suñare la monar atavevea. Naga pisa sanene, komin le Krit la moki, kiela þelaga a kiela maliena pe mesmesu re poli.

A na lua, Pol pisawal mrapa pa Taetas naþa monar tavevea vena vianen yaru lala e þegas taþena lala loyuña e suñare. Nane yermarua lala, a sira marua lala, a yaru viu amio yaru na yuñæ korenen lala. A naga sape sira marua lala monar avian ruru sira mæe lala.

A namaro, Pol pisawal pa Taetas e navianena naþa naga monar la van yaru lala, a monar ave erau ruru wo amio la, naþa asuña ve apeveveyu re, a yaru na suñare lala monar ve aliþerela re.

Komþasnen tusi la na nini

Visena þesa 1:1-4

Na sumonena na suñare lala 1:5-16

Yuñæna kiena yaru taþena lala
loyuña e suñare 2:1-15

Visena na vianen yaru lala 3:1-11

Visena maro 3:12-15

Pol porworun Taetas

¹ Kiau erau Taetas,

In na Pol, nekekaran nevitawe ko sina e maki nini, e kia kiena ne Ntewa, naþa in na kiena yar na yuñæna, a e kia kiena

ne Yesu Kristo, naþa in na nepe kiena nalologena.

Nesike e yo nini, nesuña nemiyuñæe ke ga wa, nemio yeririna la naþa Ntewa pisaar la sape ape kiena, komin sineun nesape popon kiela viawaena imi mårera laa ga wa, a kiela nakiliaena e visena lelaga imi ve keviu laa ga wa. Visae ve sa nene, yoko kiela þelaga kilia imi torokin þelaga kiena yar wa taþena lala kiena ne Ntewa,

² a yoko akilia atol malena naþa ve uro re.

Kieta sitomena mårera pa rui sape yoko tetol malena nene, komin Ntewa pisaar na konua konua rui sape yoko monar ve sa nene, a tekilia sane naga pe pisokan li re pogos tai poli.

³ Naga pe kieta Ntewa natamaliaena, ana pogos naþa pisu sane kana pog ruru napo, naga mligan kiena visena imi målivi vena kilaen mrapa na kieta malena, a nagane mligan sike e inu vena neva nelologon va e yo make ga.

⁴ Ana Taetas, nane kiau maki nene pan ko. Nepisu ko sane ope naruu ruru ne-naga naþa ita lua kieta naviawaena taaga, ana kiau leniena pan ko pa sanini, sane lemamiena a suñarena kiena ne Ntewa Arimata a Kristo Yesu kieta natamaliaena sike amio ko.

*Yuñæna kiena Taetas e purvanua
naþa Krit*

⁵ Nesiri piñasu pan ko, sineun iilar koena e yuñæna naþa omiyuñæen ke gar Krit wa. Nanua sumo, ita lua toþar þesan lologena wo pimi målivi e yo nini, ana pogos naþa nepetan ko, pupia yuñæna komþas mæke ga wa, ana nemligan ko osun ke naþa okila ruru ke ne yuñæna la imi wo laa sane wa.

Sa naþa nepisa pan ko e poglis nene, sineun nesape ova oteliv make e kumali lala, owu þarin kiela yaru laþas, aim ave li nasumonena wa lala.

⁶ La nene, la monar ave yaru la naþa pe naviowaena re e kiela malena poli, monar atalopa amio wola ve taaga ga, a narila lala, la mæna monar alelaga e Yesu,

pe pon re tevisu la ave þar m̄arera poli, pona asum̄a apilon ke visena kiena kiela yermarua luwoka.

⁷ Monar ve sa nene komin naþa ape yerkaŵa na sum̄are lala. La ape yar na visuaren yuþaena wa kiena ne Ntewa, ana monar ave yar mesmesu. Ve asitom re asave la na yar tai ne, ve sinela mimi koskos re, monar ve amun manene re wii m̄arera, monar ve ave yar na kilaen re mara, a monar ve asitom manene re sur lala toko.

⁸ Ana visae ve sa nene, yoko nasumona nena naga kiena malena ve sanape? Yoko popon naga kekaran visuaren wolawa lala e m̄ana uþa, amio þelaga wo taþena la ne sanene. Popon naga sumon ruru yuþaena lala, ve manmarua ruruia, kiena sitomena mekik ruruia, a naga kaweruru kiena malena mesmesu.

⁹ Visena lelaga la naþa apian ea, naga monar uarar ruru m̄arera, vena kila sane naga towe kilia vian liluen vano.

Ovisuar lelagaena navisokanena lala

Yeririna la þasa asitom asape kieta lelagaena pe navisokanena ga, ana kieta navianena wo lala kilia kila kiela visena lala taþatete sum̄al ruruia.

¹⁰ Yar la mok liu asike ne naþa yepel mavin loge itaena, ana apis m̄arera paþisi, pona asum̄a akilali ke naþa aure sitomen kien yar la va ve taþena. Garu e nem̄a Krit, ita lua tekekara paþisi pan le Yu la moki naþa tetaulula apim ape yeririna kiena Yesu rui, ana nagane li taþena la nene sinelan asape aure kare la ava aviowa sina.

¹¹ Sa nene, popon sa sur tai mono logola, komin akila kare ke mratava wetelu laþas rui. Asum̄a apian ke sur laþas naþa pe mesmesun re naþa avisayu poli, ana asum̄a am̄areran ga asape akila, pe na sitomen wo re poli, ana komin ga sitomena viowa naþa asape pona ala narin kilavaru la e yo.

¹² Pona le Krit lala, kiela þelaga sa ga nene yo, komin yar nasirien suniena tai nanua sumo, naþa naga pe yar nae nena kiela yo tai, pogos tai pisayu la sape “Le Krit lala, la ape yar na visokanena, apiowa taulu nompui, ape yar na

yowena, ape yar na sitoþalen ga m̄eþela.”

¹³ Yar nene, kiena visena m̄arera li m̄aga, ana in na nepisu sane pona lelaga yo, ana po paþisi naþa ovis m̄arera van la, visae peraga, yoko kiela nalelagaena taþatete imi wo ruru pogos tai.

¹⁴ Nagane asum̄a apuwar ke sunena marua na sumo kiena le Yu lala, asum̄a akekaran ke visen kiena ne yerkaŵa taþena la naþa akoven lua visen lelaga, ana komin ya ne pe sinelan re lelagaen e visen wo kiena ne Ntewa naþa tesum̄a temla ke pan la?

¹⁵ Yar naþa kiena sitomena merarava ruru nena po, sur naþa namname pe torokin re kila kiena sitomena imi namname poli, ana sur make ga merarava ga pania. Ana yar naþa pe mlelaga re poli, naþa kiena sitomena namname, pona sur tai merarava m̄a yo, ana taþatete kilia kila kiena sitomena imi merarava, a pe sur re tai naþa merarava ruru e naga poli. Nanene komin naþa kiena sitomena pona losinena apa apiowa rui.

¹⁶ Yar la naþa nesiriyu la ke ne, asum̄a apisawal ke asape akilia Ntewa, ana kiela yuþaena lala kila meraravan pan ita sape pe akilia re nenaga. Losinela la menun a melkalka, ape þar m̄arera paþisi, pe atorokin re nena kilaen si sur wo ta poli.

2

Navianena wo kila þelaga wo m̄alivi

¹ Ana Taetas, nekilia nesape ko na yoko ve ove sa re nene, ana yoko ko na monar osuþa ovisawal van la visena la naþa torokin navianena la napo.

² Visen laþasa nalaen van yermarua lala naga sanini, sape monar ve aulaula re, avarurula ga, a popon asitom urmi e kiela malena, amio kiela sitomena na manmarua ruruena. E lepas na lelagaena e Yesu, e lepas na sinesien yar taþena, a e lepas na sum̄al ruruen m̄arera e yuþaena, monar aulen þelaga mesmes silaga.

³ Visena na sanene kiena sira marua m̄ena la sum̄a ga, sape monar aulen þelaga na vatanonen Ntewa, ve asum̄a re

ga avis kar viowa va yar taþena lala, a sitomena na laen wii m̄arera ve sukaþara re e la silaga. Yum̄aena naþa popon akila naga sanini, sape monar avian taþena lala e sur ya naþa po vena ayum̄aenia.

⁴ Keviu manene paþisi e lepas na sira m̄ee la naþa atalopa mare ga na wa, monar akipian la ruru e mrapa wo na sinesi ruruen wola lala amio narila lala.

⁵ Sira marua la nene, kiela sitomena la monar manmarua, kiela malena monar ekiki, monar avisuar ruru m̄ala um̄a, ave sinewo lala, a monar avatanon ruru wola lala. Visae akila sur la nene, yoko yar la visu kilalea sane visena kiena ne Ntewa naþa pisawal mrapa wo la nene, naga pe nasiriena wa tai naþa po paþisi.

⁶ E m̄a nenaga e þelaga nene, sineun nesape om̄areran yar viu lala, ovisave la monar akawe ruru kiela malena lala.

⁷ Po paþisi visae pogos naþa avisu ko, alual naþa osuṁa om̄iali osumon la ke e mrapa na malena na po, naþa pulen make yum̄aena wo lala, ana la akilia ayal e lelen lam̄a.

Ya naþa ovian lania, monar sike e kioṁa malena rui, a monar naþa akilia avisu kilale asave ko m̄ena osuṁa ositom ke si urmi ea.

⁸ Ya naþa aloge ovisawalia, monar ve ve visen re tai naþa yoko akilia avis van ko vanonia. Visae ve sa nene, yar la naþa sinela kar ita, yoko akilali naþa asuwo ita, ana yoko akila wowen ga suria, yoko kiela visena tai taþatete si suṁalu.

⁹ E lepas kien la naþa amiyum̄ae korena ga kiena ne yerkawa tai, okila la akilia ruru asape monar avatanonia, a monar aþionli naþa akila sane kilia kekaran yum̄aena naþa akila pania. Monar ve avistaṁe re si vania,

¹⁰ a pe pon re asitom avisave akilia avivinaun kiena narin sur laþasa ve kiela. Monar ave lelaga ruru napo, vena kila naþa kiela yerkawa kilia wasine la e kiena sur make ga. Pogos naþa li nalelagaena la ayum̄ae ruru wo sanene, akilia akila kiela vianena e lepas kiena ne kieta Ntewa natamaliaena va manene metava ve keviu e visuena kien yar taþena lala.

¹¹ Popon sane yar la avisu kilale kieta lelagaena, vanon Ntewa naga pe lemam e yomarava nini, mla natamaliaena pimi m̄alivin þegas nen yeririna make ga peve taaga.

¹² Ana ita naþa tetolia, tepisu kilale naþa Ntewa suṁa kilapian ita ke e kieta malena lala, sape monar teligan þelaga viowa kiena yeririna la naþa pe akilia re naga poli, a monar tevilon m̄asita van nasinenanena viowa lala na yomarava nini. Yomarava ne nane yo naþa temal tesike e ne, ana kieta malena monar moṁau ruru wo, a monar mesmesu, monar torokin nena yeririna lala kiena ne Ntewa.

¹³ Monar tesuṁa ga sane, a monar tesuṁa tesuṁate ga pog wo naþa kieta sitomena sike ea, naþa kieta Ntewa keviu, kieta Natamaliaena Yesu Kristo yoko imi m̄alivi ea, amio kiena pupia naurarena.

¹⁴ Naga ke narui naþa taṁan kana kuruta mlau vanon ita, þere plan ita petan m̄areraena naviowaena, kevan ita temekiki tepim tepe þegas wa na yepe-maenen yum̄aena wo lala sa naþa naga sinenania.

¹⁵ Visena ne naga ke la na nene narui yoko osuṁa ovisawalia. Yar naþa popon aiilaria, oiilaaria, a yar naþa popon avis vania, ovis vania. Pogos make ga oyum̄ae omio naṁareraena amio m̄areraena, a ve otam̄an re avisa kare ko pona asitom korenan ko.

3

Pelaga wo kien yaru naþa mlelaga e Yesu Kristo

¹ Popon ovian li na lelagaena lala vena silaga asitoṁal þelaga wo nakilaena. E lepas na kiela suþe lala, amio kiela yerkawa la naþa asike ne, monar avatanon la, alogear la, a akekaran kilaen yum̄aena wo punu ga.

² A monar okila pian la m̄ena ga, ovisave la nene, ve asuṁa avisa kare la re sina, a pe pon re ava e veveyuen poli. Ana þelaga naþa monar akila va yar taþena ve sanini, sane monar amoṁau, ve akila

re þelaga m̄arera, a monar akila þelaga navatanoena ve keviu silaga.

³ Visena la ne sanene pan ita make ga, komin naþa nanua sumo pe yar taþena re ga la poli, ana, ita m̄ena tesu ga e malena viowa. Tekila wowe pa Ntewa, a tepe þar m̄arera pania. Þelaga viowa þere kare ita pano-o tepim tepe yar na suen vatanon m̄areraena nasinenanena viowa lala amio nakekarena viowa na yomarava. E poglis nene, kata kinanena na kanen e legien punu ga nane sinemimiena amio vielueena lala. Kieta sitomena lala piowa pan yar taþena lala, a metavania, tepiowa ke sina ga pan ita.

⁴ Tesuþa e malena viowa sanene pano-o, ana siraunia, kieta Ntewa natamaliaena, kiena nasinewoena a kiena nasinesiena wo pimi m̄alivin ita,

⁵ naga tamalia ita ruru nenaga. Tamalia ita sanene, pe komin re ga kieta yuþaena wo naþa tekila poli yo, ana vanon ga kiena nasineyeena wa pan ita.

Naga sinena miye ita, ana kevan ita temekiki, ana kiena Ninuna Wa kila tepaeme sina e malena viu,

⁶ e kuruta kana Yesu Kristo kieta nataliaena, naþa mlau kalo ita.

⁷ Naga mrapa ke nene narui naþa e kiena lemamiena, tepim temesmes ruru e marana. A pe naga re ga nene poli, ana metavania, naga kila ita tepim tepe narina lala, naþa yoko towarpae ga kiena lalimana, naþa yoko war van ita, nane malena naþa ve uro re.

⁸ Potena paþisi pania, visena la nene ape lelaga paþisi.

Pol miilaar Taetas

Sineun nesape om̄arera, om̄areran li nalelagaena lala kiena ne Ntewa, sane monar auarar ruru visena la nene, a monar aþilion naþa auarar ruru yuþaena lala naþa po, a naþa akilia aiila m̄ena yarunia.

⁹ Pogos tai asuþa apisasa ke ga visen koren lala naþa taþatete iila malena kien yaru, sa naþa asuþa apeveyu wowe ga e sitomena la naþa pe kana kinas re poli, pona asuþa apeveyu komin sur lala

kiena ne kiela yermarua la naþa apuarar ruru kiela kia la suþa ga. Pogos tai asuþa apiuelinila, pano-o tol naþa kiela sitomena la kilia liþere m̄ena e visena naþa navisaluaena kiena ne Ntewa pisa. Ana popon ovisa va li nalelagaena ovisave la monar ve aviran la re e visena la ne sanene.

¹⁰ Visae yar tai suþa sikolia, kawekapin m̄a visena silaga, akilia avis vania yam tai, sa pere yam ve lua, ana visae sitom korenan ga, suþa kila m̄aga, pe pon re si akilavain sur tai amio naga poli.

¹¹ Tekilia yar la ne sanene rui, sane kiela malena pilon pe taþena, a kiela sitomena pulen ga mlamulen viowa. Pe ita re naþa tesape naga piowa poli, ana kiena yuþaena pisawal kiena napiowaena e marata ita punu ga.

Visena maro lala

¹² Taetas, sineun nesape nevisa van ko sane visae olual neligan lalua nene tai Artemas pona Tikikas im̄asu m̄alivin ko, e pogos nene narui okilia ourmatan yo nam̄a, owaryonli naþa oim ovisu inu gar Nikopolis. Na nene komin naþa ve ve piavi re, yoko neligan e nini, sineun nesape neva nesuþa e yo nene vano-o tol pogos na miava warovia.

¹³ Lalua taþena naþa asike amio ko nagane, yar na navisaluaena nene Sinas, amio Apolos, yoko okilali okila sane lalua akilia ala si kiela mrapa lalua ve ve piavi re, vena ava m̄ena e yo taþena laþasa. Awis, oiila lalua e ya naþa limala plasinia.

¹⁴ Sike m̄ena e ko vena oiilaar kieta yeririna lala sane nepisa ga na wa, la monar awion naþa atarar yuþaena wo lala. Visae ve sa nene, pogos naþa sur na ilanen tai, ana kiela naiilaen la sike rui, a kila m̄ena naþa kiela malena kilia war mras ve moki sa naþa Ntewa sinenania.

¹⁵ La naþa asike amio inu nagane apisa pokolulag pona pokolemalo van ko. A yeririna la naþa asike amio ko naþa asitoþal imimi asape ita punu ga teve taaga temio la e kieta viawaena ve taaga, awis, ovisawal van la sane imimi m̄ena ga mesuþa mesitoþal la m̄aga.

Kiau leniena nesape yoko lemamiena
kiena ne Ntewa sike amio amiu make ga
silaga.

Inu, Pol.

Maki Naþa Pol Siria Pan PILIMON Visayuena Na Tusi Nene

Suniena plas na tusi nini

Pilimon naga pe yaru na lelagaena tai, a naga suþe kiena yaru na yumae korenena tai naþa kiena kia Onesimas. Onesimas pure petan kiena suþe naþa Pilimon, pa sike garu pulkumali keviu naþa Rom, ana e lele nene naga meke loyuma na logeviowaena ea. A e yo nene naga pitawa amio Pol, a pogos naþa sike amio Pol naga pimi pe yaru kiena Yesu. Ana Pol siri maki tai pa Pilimon, piyun tania vena naga monar were Onesimas wasuþe imasu sike amio naga. Pol pisa pa Pilimon, sape nagane Onesimas pimi pe yaru kiena Yesu rui, a popon naga sinena kar re, ana naga viewoia a werear sina vena ve yaru na yumae korenaen sina. Ana yoko naga ve ve yaru na yumaena koren rega, naga imi ve wenla ruru napo komin lalua asikol la amio Yesu Kristo.

Komþasnen tusi la na nini

Viena þesa 1-3

Pol mieluar Pilimon komin kiena yumaena 4-7

Pol piyun mareran pa Pilimon vena were si Onesimas 8-22

Visena maro 23-25

Pol siar kiena visena pa Pilimon

¹ Inu Pol, nesiri ke maki nene pan ko Pilimon. Nanagane nesike e pupia pulkumali nae Rom, a komin naþa nekila ke yumaena kiena ne Yesu Kristo, la amligan inu nesike e yuma naloge viowaena e nini na wa. Kieta wolai naþa, Timote, naga sike amio inu e nini na wa, ana imimi lua mepisa pokolulagi pona pokolemalo pan ko, naþa ita ga teloka temiyumae ke pa Suþe taaga ga,

² a kiamimi visena imimi lua sanene pan ke mena ga vineta nene, Lewia, a yaru na kieta þegasia nene, Akiþas, naþa

naga pe yaru marera na kilaen mara e lepas na yumaena kiena ne Suþe, amio þegas kiena ne li nalelagaena taþena lala naþa asuna apiora ke e mona yuma.

³ Imimi lua memlen mesape Arimata Ntewa, a kieta Suþe Yesu Kristo, lalua aligan kiela lemamiena a sumarena sike amio amiu e yo naþa asike ea.

Sinesiena a naviawaena kiena ne Pilimon naga keviu manene paþisi

⁴ Wolai Pilimon, pogos naþa nesitomal ko e kiau leniena lala, silaga nesuna nepisa ke potena pan Ntewa vanon ko.

⁵ Na nene komin naþa nemloge rui naþa la apisayu kiona þelaga wo, asape kiona naviawaena e kieta Suþe Yesu marera po paþisi, a kiona sinesiena pan nalelagaena lala, keviu manenea.

⁶ Nemlen wo ko ke, nesape pogos naþa ko osuna okianlua ke kiona naviawaena pa yaru taþena lala, þisi na kila la akilia manene laa sane e navisa ruruena nowo la naþa ita kieta, naþa temla Kristo e kieta malena lala.

⁷ Ee, Pilimon, kiona sinesiena wo naga suna kila ke li nalelagaena wa lala, la sinela la amloge po paþisi, a pogos naþa nemloge, suri nene kila nemloge po sina, a kila inu mena nekekara paþisi.

Pol naga piun mareran pa Pilimon vena were si kiena yaru na yumaena nene Onesimas

⁸ Ana Pilimon, sineun nesape neviun suri tai van ko. E pupia yumaena kiena ne Kristo naþa nesuna nekila ke ne, pona mesmesun ruru ga naþa nevisa ruru ga van ko nevisave popon ko okila ve sanene ve sanene,

⁹ ana taveve þelaga na sinesiena, pe sineun re nevis marera ve sanene van ko poli. Nanagane, in na nepimi nepe yermarua ke narui, nesike e yuma nakoena vanon Yesu Kristo, ana sineun nesape neviun ga tan ko, visae ko okekaran naþa otaman suri nene naþa nesape neviun tan ko.

¹⁰ Yaru tai sike e nini, pogos naþa nesike pa e yuma naloge viowaena sanini rui, ana nesumon yaru nene pimi e Kristo, a

nanagane nesuũa nepisu ke yaru nene sa ga naruu tai. Yaru nena Onesimãs, naþa sumo pe kioũa yaru na yuũaena tai, siraunia naga pure petan ko, pimi e yo nini.

¹¹ Ee, yaru nene, kiena kia kana kinasape “kila yuũaena wo,” ana nesitom nesape nanua sumo, naga suũa kila kioũa yuũaena pe po ruru re poli. Ana nanagane, naþa pilon kiena malena rui, nemlelaga nesape naga kilia kila yuũaena wo lala na iila koena, a naga kilia kila mēna ga yuũaena na iila inuena.

¹² Ana, nanagane nesape neligan si Onesimãs wasuþe ke sina ga imãs puũa narui, sa naþa nemlalua ga kiau malena komþasia nane nemligan piũasu puũa ne.

¹³ In na nekekaran nesape popon naga suũa ga amio inu e nini, vena iila inu e pogos mārera nini naþa nemēke e yuũa naloge viowaena vanon lologena wo, a visae naga kila sanene, sa naþa naga kus leleũa, naga kila yuũaena tai pan inu naþa torokin ko okila van inu.

¹⁴ Ana pe pon re nomāreran naga vena naga sike amio inu sanene poli, vanon naþa ko na omninue ga. Sineun nesape visae ko okila kiau yuũaena wo tai sanene van inu, þisi na ve vanon re ga naþa nemāreran kon poli, ana vanon kioũa sinesiena wo a kioũa sinewoena ga. Ya naþa yoko Onesimãs kila, naga pe kioũa naþa ovisawalia.

¹⁵ Lelaga naþa Onesimãs naga pur matan ko, ana ane kilia, pona Ntewa kila naga pur matan ko yam plas ga sanene yo, vena visae wasuþe ke sina ga imi puũa, þisi na naga ve kioũa lue narui, vano vano-o taþatete þisi.

¹⁶ Sanene komin naþa nanagane, þisi na naga wasuþe ke sina ga puũa, naga ve ve sa re si yaru nayuũae kioũaena, ana naga wasuþe puũa sane womla tai e Yesu, naþa sanene na po manenea. Sineu si naga keviu paþisi rui, sa ga wolai tai, a nemlelaga nesape þisi na sinēna si naga vano vano-o vaþisi, komin naga pe kioũa

yaru þisi rui, a metavana, nanagane naga pimi pe womla mēna ga.

¹⁷ Suri ne na nene nesape neviun tan ko. Visae ko opisu inu sa naþa ita lua tepe wolai, a ita lua tepe yaru nakilaen yuũaena taaga ga, sineun nesape oure si Onesimãs wasuþe imãs puũa, sa ke ga naþa visae neiũasu puũa, þisi na ko okekara vaþisi naþa oure inu neiũasu e moma yuũa.

¹⁸ A visae Onesimãs naga pinaun kioũa suri tai, pona kila kare kioũa suri tai, pona ya sina, ana þisi na inu ga nevisuveve suri la nene.

¹⁹ Visena nene inu ke ga Pol narui nesiri ke ga e luũa, sane kiau navisaarena tai van ko, nesape visae sinoũania, þisi na neul plan make kiena lapui vetan ko. Ana pona ko osuũa ositoũa ke naþa ko mēna ga kioũa pupia lapui tai naþa sike e inu, naþa kioũa malena wetelu, komin naþa inu na nekila ko otol malena nene e pogos naþa nemlologon lologena wo pan ko.

²⁰ Ve sanene, sineun nesape okila yuũaena wo nene van inu naþa nesuũa nepiun ke tan ko e kia kiena ne Suþe. Wolai, visae okila ve sanene, þisi na neloge sineu wo sina vaþisi, naþa malena wo kiena ne Kristo naga suũa miyuũae ke sanene e kieta malena lala.

²¹ Pe nemaraun re naþa nesiri visena la ne sanene van ko poli, komin naþa nekilia ruru po rui naþa þisi na ko okila taveve ya naþa nepiun tan ko. Ee, nekilia mēna ga nesape pona þisi na okila mēna ga wo laa sane yo, vano taulu kiau naviunena nene.

²² A nesape neviun ke mēna ga suri taþena tai tan ko, nesape awis, okila ruru m̄au lele na monena tai e moma yuũa, komin naþa nesuũa nekila ke kiau sitomena mārera nesape ve ve piavi re, þisi na Ntewa naga tam̄an inu nowasuþe ke sina ga neimi pun amiũ, sa naþa amiũ asuũa apiun ke tania e kiamiũ leniena lala.

Visena maro kiena ne Pol pa Pilimon

²³ Eþaþras nene, naþa naga mēna ga imimi lua mesike e yuũa nakoena e

nini vanon Yesu Kristo, naga pisa pisape Ntewa visa ruru ko.

²⁴ A yaru tařena la nene, Mak, a Aristakas, a Timas, a Luk, nařa la amiila inu keviu pařisi e yumãena, la mřena ga apisape la asitořnal ko ke e kiela leniena lala.

²⁵ A nanagane, kiau leniena sanini, nesape lemamiena kiena ne Suře Yesu Kristo naga sike e losinemiu la punu ga.

Inu, Pol.

Maki Naña Pa Ke Pan LE YU LALA Naña Amlelaga Visayuena Na Tusi Nene

Suniena plas na tusi nini

Yaru naña siri maki nini, naga siri pano pa pegas tai kiena li nalelagaena lala naña asumã añal ke pog m̃arera lala e kiela maliena, komin yaru la naña pe amlelaga re poli asumã akawela ke amio la. Pelaga naña yaru la akawela manene amio la sanene, kila sane añal m̃arera, a lavis aligan kiela lelagaena e Yesu Kristo. Ana yaru nene pisa panila sape monar asumãlu m̃arera e kiela lelagaena lala. Naga pisa panila sape Yesu Kristo ga pe yaru wo naña pisa meraravan Ntewa pan ita. Ana na visa meraravanen suri nene, naga pisayu suri telu.

Suri na sumo, naga pisayu sape Yesu naga pe narina Ntewa kemua lelaga naña sumã vano vano tařatete řisi pogos tai. Pe lelaga naña naga pe narina Ntewa rui, ana naga m̃ena sumã řikeyon kinasinen řelaga nene na logearen Ntewa, e sur la naña kila naga mloge piowa e tasnena. Ana komin naña naga pe narina Ntewa, naga mon la metavan navisawalena lala, pona navisi lala, pona Mosis m̃enaga.

Suri na lua, Ntewa pisawal rui sape Yesu, naga pe řarin yaru wa naña naga mon manene metava naña sumã vano vano tařatete řisi pogos tai. Naga pe řarin yaru wa naña taulu make řarin yaru wa na sumo lala.

A suri na telu, e yuñena kiena Yesu naña naga pe řarin yaru wa na mon manene metava, naga maren natamali-aen yeririna makega, řarplan kiela milamulena viowa lala, kila la pe amarau re si poli, a mla malena naña ve uro re panila. Na kuřařaena nasumo lala, la ape totou na kuřařaena ga naña Yesu Kristo kila.

E marana na keviu lualima taaga pa taaga, yaru naña siri maki nini naga pisayu yaru lařasa e Tusi Marua naña amlelaga m̃arera e Ntewa. A naga pisa

pa la naña naga siri maki nini panila, sape popon ataveve malena kiena la nene, vena akilia asumãlu m̃arera silaga, vano vano-o tol luwasnen kiela maliena. A silaga, monar akira avisu Yesu, vena akilia ava awarpoyo e pog m̃arera lala, naña asumã atol ke e yaru la naña asumã akila ke m̃arera panila pařisi. A na kilamakeen kiena visena, naga pis ruru pan kiena yaru lala, pisa panila sape monar avisuar ruru kiela maliena lala.

Komřasnen tusi la na nini

Visena řesa. Kristo kila meraravan Ntewa panita 1:1-3

Kristo naga mon laa metavan navisi lala 1:4—2:18

Kristo naga mon laa metavan Mosis amio Yosua 3:1—4:13

Kristo naga mo laa metavan řarin yaru wa lala 4:14—7:28

Naviranarena viu naga mon laa metavan naviranarena marua 8:1—9:28

Kuřařaena naña Kristo kila naga mon laa metavan kuřařaena marua lala 10:1-31

Pelaga na lelagaena naga po pařisi 11:1—12:29

Visena la naña kila yaru la asumãlu m̃arera, a visena maro 13:1-25

Yesu na mon la metavan li navisawalena lala

¹ Kiau erau le Yu lala, nakonua konua la rui Ntewa pisawal kiena visena yam mokliu pa kieta yermarua lala, e mrapa la moki a e řelaga wo la naña peve tařena, pimi molue kome kiena navisawalena lala.

² Ana nanagane, e legiena maro la naña tesike e ne, naga pis mesmes nena pan ita pimi kome Narina Yesu. Narina ne nane nanua sumo, e nasiien yomarava, Ntewa miyuñae kome naga, lalua amliganar make pog a yo lala, a siraunia, Ntewa pisirlua Narina nena, mligan sur punu ga sike e limana, naga pe řarun la.

³ Narina nene, naurarena kiena ne Ntewa tego e kiena malena, sane kus nena marana ne Ntewa veraga, pe totou na řelaga kiena ne Ntewa. A nam̃areraena na kiena visena m̃arera pařisi, naga ga řuarar sur make ga na yomarava nini,

a yo taþena mēna lala su ruru sumāga. A naga ke narui naga tamān naga pimi kilavan make kieta mlamulen viowa lala, a pogos naþa kila make ruru kiena yumāena nene e yomarava nini, þasuþe si pa ma e peni, pa to metava e lepas nen Arimana na þamarua, Þarin Suþe nae ma e peni.

Yesu na mon la metavan navisi lala

⁴ Yesu totano e nene sanene, naga mon manene la metavan navisi la naþa asike ne, komin kia naþa naga þaria vanon kiena yumāena, po manene la taulu kiela kia.

⁵ Visae tevisu e Siriena Wa lala, visena moki naþa sike ea naþa asape Ntewa kila Narina mon manene la metavan navisi lala. E visena la ta nene, Ntewa pis pa kiena Navisaarena nena, sape

“Ko na, nepisu sane þane opim ope naruu nenaga, a nepim nepe Arimoña kemua lelaga.” *Yauena 2:7*

A ta sina pisa mēna sanini, sape

“Yoko in na neim neve Arimana, a yoko naga ve naruu.” *Sam2 7:14*

Visena lua nene, Ntewa pe pisa re nena pa kiena navisi la ta poli, sape pe Narina Wa, ana pisa ga pa Yesu.

⁶ A visen si tai, pisayu pogos naþa Ntewa sinenan sape ligand narina mēaru nene imi e yomarava, ana pisape

“Popon navisi make ga alotunia.” *Naw 32:43*

⁷ E lepas kiena ne navisi lala, la akila yumāena wo la mokliu, ana Visena Wa pisayu la, sape

“Navisi kiena ne Ntewa lala aþar kiena visena, asa ga lagi, amiyuñae kiena ne Ntewa, asa ga kapi.” *Yauena 104:4*

⁸ Ana pogos naþa Visena Wa pisayu Narina ne Ntewa, sape naga mon manene la metavan navisi lala, pisayuia sane naga maran taaga sa ke Ntewa, pio naga Ntewa. Pisayu naga, sape

“O Ntewa, kioña lele wa na totanoena naga mon lue ga na mēke ne. Plaki na kioña nasuþenena, naga þelaga wo ke narui.

⁹ *Ko okekarand manene la þelaga naþa po, ana yepmavin visuen þelaga viowa, ana kioña Ntewa na mava naga mligan ko opa metava, opa manene la metava otaulu kioña erau lala, kila ko okekara keviu sa naþa miyowauia ruru ko e ponotaninu wo tai.”* *Yauena 45:6-7*

¹⁰ A e visen si tai, tepisu naþa Ntewa na mava pio Narina sape Suþe, a pisayu pupia sur kerkeviu la naþa naga sii la, sape

“Suþe, ko ke narui ko opisirlua purþes nen yomarava, lumoña ga miyumuñen sinapane ma metava.”

¹¹ *Ana sur la nene, yoko amenunu makea, akokovio, ana yoko ko na osike osike lue.*

¹² *Sane takue marua tai, yoko osulowar la owar plan la nenaga, a sane moña kulsota marua tai, yoko oyenlua nenaga, ana yoko ko na ove urviu maran ve taaga silaga, a kioña kas la taþatete þisi pogos tai.”* *Yauena 102:25-27*

¹³ A visen kiena ne Ntewa taþena si sike ga wa, naþa pe pisali re pa navisi tai poli wa, ana pisa ga pa Narina naga taaga, sape

“Ototano e lepasneu na þamarua, otoña sanene, vano-o yoko neligan kioña nasinekar lala aim ave takue na vilanvanen lamā ea.” *Yauena 110:1*

¹⁴ Nane visena maro e lepas nene narui, naþa pisayu sanape naþa navisi kiena ne Ntewa lala la na amiyuñae kiena ga, la ape ninuna na waren kiena visena, a ape naiila itaena vena tetol natamaliaena, ana yaru tai sike ga wa naga mon metavan la make ga, nane Narina Wa ne nane Yesu, naþa Ntewa pis maro pan ita ea.

2

Nalologena wo viu kiena ne Yesu mon la metavan navisaluena marua kiena Mosis

¹ Sanene, visena wo lelaga nalologena wo la naþa temloge pa narui, monar tesitom urmi manene e la, monar touarar ruru mārera. Visae peraga, tevisuaria saþisi korur yan plan ita si vetania.

² E lepas nen navisaluaena marua nasumo lala, navisi ga la añar pimi, ana kana visena ne lala amesmes ga, a añarera pañisi. Ana na kilaroen kana visena make ga, a kana nalogeluen make ga, kana nakoena ruru napo sike ãa rui.

³ Ana nanagane, nalogena wo viu pimi tol ita ãa rui, a naga keviu taulu manene navisaluaena marua nasumo. Sanene, visae tesitom korenan mrapa na kieta natamaliaena naña sike ea, yoko tañatete nena toure vetan kana nakoena nena-a ãisa. Kieta Suñe ke narui naga kila ãesan lologena wo pimi mñalivi, a la naña amloge pisawal e kiligala, la apisawal liluen pimi pan ita, akila merarava van ita apisape lelaga.

⁴ A Ntewa mñena miila naga e visena nene, naña naga kila kile lala, a sur nailanen lala, a yumñaena lala na kiena namñareraena, a metavana, naga kiakian plan nalaena lala kiena ne Ninuna Wa pan ita ai naña naga sitom sape la vania. Ana tepisu sur la nene, tekilia tesape lologena wo kiena ne Yesu Kristo naga pe visena tai naña naga po manenea taulu kieta navisaluaena marua ita le Yu lala.

Yesu ve Suñe e yomarava naña yoko imi na wa

⁵ Tekilia tesape Yesu naga mon la metavan navisi lala, komin naña e lepas na yomarava naña pimi ke ne, yoko Ntewa tañatete ligan navisi la ave suñenia, ana mligan sike vatanon Narina.

⁶ Sur nene Tus Marua mñena pisa, e visen tai kiena ne Parin Suñe Tepet naña pisa pa Ntewa, sape

“?Sur wo ya na sike e yaru, naña kila ositom manene naga sanene?

?Pona ya ne kila omñalivi ke e narina ne yeririna?

⁷ *Nanua, omligan naga sike tanon navisi lala, ana nanene na yam plas la ga, a nanagane, opisirlua si naga rui. Omligan naga metava e yo wo tai amio kana pupia naurarena a nawarwarena nena,*

⁸ *ana omligan sur make ga sike vatanon kiena namñareraena.” Yauena 8:4-6*

Ana pogos naña Ntewa kila yaru ve ãarun sur make ga, kila sane pe sur re

nena tai naña naga pe pe suñen re poli. Naga kila sane sape ve sanene, ana pimi tol nanagane, pe tepisu make re sur la e yomarava nini poli wa e kilamarata pa mapin sa naña Ntewa sinenania.

⁹ Sur la pere wa, ana silaga tekira tepisu ga Yesu, naña Ntewa pisirlua naga pa mon manene la metava. Nanua sumo Ntewa sinen miye ita pañisi, ana kila Yesu pito tano yam plas la ga, kila naga patanon navisi lala, a kila naga ãar manene pupia naloge viowaena na namarewoitaena, ana siraunia, pisirlua sina, paia ruruia amio naurarena nae peni.

Yesu pe kieta natamaliaena, pe kieta ãarin yar wa

¹⁰ Pelaga na yumñaena kiena ne Ntewa na tamaliaitaena nene naga mesmesu, komin naga sii sur make ga, a sur make ga pe naga kiena, ana sinenan sape taulu maran si pupia ãegas nen narina la tai vetan yomarava nini, aim si ave kiena. Naga sinenan sape kila sanene, ana nakilaena na mñarera pañisi, ana mñal mrapa taaga ga nakilaena, naga sanini: mrapa naloge viowaena kiena ne Yesu, naña Ntewa kila ga naga pimi pe yeririna, naga pe yar natepoen yomñarua vena taulu kieta natamaliaena.

¹¹ Yesu kilia sumon ita sanene komin naga ke narui naña kila ita temekiki, kila narui naga kekaran naña pisu ita sane tepe mratava taaga ga temio.

¹² Visena telu e lepas nene apisa sanini. Tai sike e tus kiena ne Yauena lala, sane Yesu pis pa Ntewa, sape

“Yoko nevisawal ruru kioña kia va wolai lala, yoko neieluar ko likan yeririna lala.” Yauena 22:22

¹³ Ta sina, pisawal naña Yesu mlelaga e Ntewa sa ke naña temlelaga e naga, visena naña sike e tus kiena ne Navisawalena Aisea, sape

“In ke narui, naña kiau nawasineena, nemligan sike e naga.” Ais 8:17

Namaro, visena si tai kiena ne Aisea, pisayu Yesu amio wenla lala, sape

“Nane in ke nane nesike nini narui, nemio narina ne Ntewa tañena lala naña naga mligan la e lumñau.” Ais 8:18

14 Ana ita narina ne Ntewa la nini, ita make ga tepe yeririna, temio tasneta a kata kuruta, ana naþa Yesu imi ve wenla kemua lelaga e ita, naga pimi e yomarava nini, naga tasnena a kana kuruta sa ke ga ita. Sanene, pogos naþa tañan si naga mare wo ita, ana kiena marena nene m̄elua puryukawaena kiena ne þarin suþe na m̄areraena na marena, nane Yermare.

15 Naga m̄elua m̄areraena kiena ne Yermare, mluþar plan kilika lala naþa aþanaria kararkare ruru ita nenaga, sane maraunen marena naþa temloge viowagania e kieta malena wetelu.

16 Lelaga naþane, yuñnaena wo na iilaena kiena ne Yesu, pe kila re pa navisi nae ma e peni la poli, ana kila ke ga pan ita na yomarava nini. Visena la mokliu apisa visena sanini, asape

“Naga sum̄a miila ruru ke lus kiena ne yermarua Epraam lala.” Ais 41:8-9

17 Nane sitomena kiena ne Ntewa sanene. Naga pisu sane Yesu monar imi sane ita wenla lala e sur make ga, vano-o kilia kilia ruru ita, kilia sinen ye ita. Ana tekilia towasinea, sa naþa yoko naga masisun yuñnaena naþa yoko naga kila va Ntewa komin kieta mlamulen viowa lala, naþa kila kieta marawo temio Ntewa, sane pe kieta Parin Yar Wa.

18 Naga pisu pupia nakilaliena pimi m̄alivin kiena malena, mloge piowagan pano-o tauluia, ana kila naga kilia iila ruru ita sina e pogos naþa nakilaliena imi m̄arera m̄ena ga van ita.

3

Yesu mon la metavan yermarua Mosis

1 Wolai a vineu wa lala, naþa amlogear navioena nae peni rui, nepisa pan amiu rui nesape Yesu kilia iila ruru ita, ana nenagane nom̄areran amiu, sineun nesape popon asitomyu manene naga va laa sane wa, sane naga pe nalologena a naga pe þarin yar wa na kieta nalelagaena.

2 Tevisu veve ruru li Yesu amio yermarua Mosis nanua. Yermarua Mosis nanua sumo, naga masisun kiena yuñnaena la paþisi e mratava m̄ana ne Ntewa, a Yesu m̄ena masisun yuñnaena

la paþisi naþa Ntewa pisirlua naga sape naga yuñnaena.

3 La ga luwoka amasisun yuñnaena, ana Ntewa pisirlua Yesu pa manene la metavan Mosis, komin naþa sane Mosis naga sike ga loyuñna m̄ana ne Ntewa, kila ke kana narin yuñnaena ne lala, ana pupia yuñnaena na visirluaen yuñna nena, Yesu ga kila.

4 Yuñna make ga, monar yar tai naþa yuñnaena, ana Yesu ke narui naga miyuñnaen yuñna m̄ana Ntewa, ana Ntewa naga pe þarun yuñnaena nene.

5 Sanene, Mosis naga pe yar na yuñnaena, masisun ruru kiena yuñnaena make ga loyuñna e mratava m̄ana Ntewa, pano tol naþa naga pe yar na visawalen pupia visen kiena ne Ntewa lala naþa apisawal liluen ke pimi tol nanagane,

6 ana Kristo naga kila pa manene la sane, komin naga masisun visuaren pupia yuñnaena make ga na yuñna nene, sane naga pe m̄earu na pupia kana þar nena.

?A yuñna nene na pisa ke ya ne, pona pisa ke ai? Sum̄a pisa ita ke ga ne, komin visae ve temarau re, a visae tekekaran kiena navisaaren lala, touarar ruru kieta nawasineena e la, ita teve kiena namratava wa ruru nena lala.

Yesu mon la metavan Mosis, a monar telelaga manene va la sane taulu la naþa Mosis sumon la

7 Visena ta teke e Siriena Wa, naþa pe visena kiena ne Ninuna Wa na kilapege itaena, naþa pisa sanini, sape

“Pane, visae aloge pulgon Ntewa,

8 pe pon re si kiamiu sitomena la imi si m̄arera poli, sa naþa kiamiu yermarua la akila rui.

Nanua sumo, e yomema, asike e pog na kilalien tai paþisi, asuñna pano-o asuñnal ke sina ga akila þarila.

9 *Ana Ntewa pisu la, pisa sanini, sape Nayalena kena la nene naþa tol kas lualima yam vari ne, nesike nemio la silaga, apisu kiau naiilaena wo la pan la, ana þelaga kien la nene na kilali in paþisi.*

10 *Kiela þarm̄arera kila sineu pikirara paþisi, ana nepisu sane peraga, la*

nene na, silaga asuñã apa e nene apa e nene amiyepe ke petan kiau mrapa mesmas lala.

11 *Sineu maren la ne sanene narui, sineu kar la pañisi, ana nesuñãlu narui, nepisaar pan la nesape purvanua wo navaruruena naña nekila ruru sumate la nesape ve kiela, yoko ve ava re si loyuma ea.”* *Yauena 95:7-11*

12 Wolai a vineu lala, komin sur ne la nanene, popon kam na avisuar ruru amiu. Pe pon re visae amiu yar tai, sitomen viowa sike e naga, pona sinena ve lelaga re si narui, kila naña naga werelua si naga vetan malena wo kiena ne Ntewa mali.

13 Pe sinetan re ita yar tai loru sanene poli, ana monar tela visena naiilaaren van ita silaga e legiena punu ga, vena ve ita yar re tai naña ðelaga na mlamulen viowa la visa kotalia kare re naga vano-o naga manin nenaga. Visena naña meta ne sape “Pane, visae aloge pulgon Ntewa,” ana naga pe visena nasumo tai, ana sumãl sumã ga, pulgona pio ke na wa, tesike e kana legiena na logearen la na wa.

14 Popon touarar kieta lelagaena ñarera ve sa nena ga naña temlelaga ðesan ea, popon tesuñãl ñarera tesuñã vano-o tol luasa. Ana visae tekila ve sanene, yoko temio Kristo, teve yar na war viraviranan naurarena wo lala kiena ne Ntewa.

15 Lelaga nañane-e, Visena Wa naña metava pisa sanene, sape pe pon re si sinemiu la im ñarera poli, sa naña yer-marua lala akila e pogos na kilaliena lala e yomema, naña asuñãlu akawe visena kiena Mosis.

16 ?Ana la ne akila ðar ñarera sanene, a la nene? La naña akila sanene, la naña akekaran amlogear ðesan pulgona Ntewa, ðis narui apatanon kiela yar keviu yer-kawa Mosis, naga sumon la apetan Isip. Naga sumon la amolue petan yo nene ana pe yam piavi re poli, akawe ke sina naga.

17 ?A la naña akilali Ntewa, amiyuyur sinena e kas lualima yam vari nene e kiela nayalorena, pano-o sinen kar manene la

la, la ke nene na wa? Ee, la naña akila sanene, la ke ga nene na wa, naña naga tamalia la, ana siraunia akila luen ga mlamulena piowa e marana, pano naga kila amarmare ga, puryula la sutetai kar ga sike e yomema.

18 ?A la naña naga pisaar sape yoko la tañatete ava loyuma e kiena purvanua wo tanea navaruruena naña kila ruru sape ve kiela, la ape yeririna la ne sanape? La naña tañatete ava ea, naga la naña akilakila ke ðarila, naña pe amlogear re sur ta poli.

19 ?A ya ne kila narui tañatete ava loyuma e yo wo na varuruena nene? Tañatete avavini vanon pe amlelaga re e Ntewa poli, a pe añasine re naga poli.

4

Navaruruena wa kiena ne yeririna lala kiena ne Ntewa

1 Nanua sumo, Ntewa kila ruru tanea yo na varuruena tai kiena ne kieta yer-marua lala, ana nanagane ñena ga kila ruru si kieta yo wo na varuruen rui. Nasiiena tere nene naga mal ruru ga sike na wa, ana pe pon re teve sa yer-marua la nene poli, naña akilalu kiela navaruruena nene, la moki naña pe apa re loyuma e poli. Peraga, popon ita tevisu ruru ita yo, pe pon re naña vano-o ðisi na ita lañasa, la ñena akilalu kiela pulmas, Ntewa visu veve ruru la sa ðisi ve ava atol re kiela navaruruena.

2 Naga nene komin naña ita maran taaga ga sane yer-marua la nene, naña lologena wo kiena ne Ntewa tol ita, sa naña tol la, ana akila sa naña amloge, ana pe amla re si lelagaena to metavan poli. Pe amla ruru re si kaña visena la nene e kiela malena la poli, ðisi pe ðar re mras e la poli.

3 Ana e lepas kiena ne la nini naña pe amlelaga re sanene poli, Ntewa pis ñarera rui, pisa visena naña nesiri metava yam tai rui. Visena nene, pisape “La nene akila sineu kar la pañisi, ana nepisaar nesape yoko la tañatete ak-
ilia atol kiau navaruruena nene.”
Yauena 95:11

Ana ita naña temlelaga kemua e lelaga, navaruruena nene naga pe kieta naña teva loyuma ea.

Navaruruena kiena ne Ntewa nene, naga kila ruru pe kieta su nakonua rui, komin e pogos nasiiena, naga miyumaen pano-o tol kana legiena orai ana pisi nena ga,

⁴ ana sa naña Visena Wa pisa e yo lañasa, sape e kana legiena olua, naga pa ruru e kiena yumaena ne lala, pe miyumaen re si sur la nene poli.

⁵ Ana sur si tai, visena na metava pisayu naña Ntewa pisape yoko yar lañasa tañatete nena atol kiena navaruruena,

⁶ ana visena nene kila meraravan sape sane monar yar si lañas asike koyo tai naña yoko Ntewa tamān la ava loyuma. La nanua sumo, amloge lologena wo kiena ne Ntewa amio purvanua wo naña pisaar pisape ve kiela, ana pe asumal re mārera poli, pe amlogear re poli, ana akila pal ruru nena ga, pe apa re loyuma e poli.

⁷ Ana kieta navaruruena sike na wa sike ne, a Ntewa pisaar kana legiena na tolēna, komin kas mok p̄aro rui, Parin Supe Tepet pisawal visena la naña sike meta rui, naña pisa sanini sape

“Nanagane visae aloge pulgona, pe pon re kiamiu sitomena la imi mārera si poli.”
Yauena 95:7,8

Popon tevisu kilale sane “nanagane” naña pisa e nini, nane kieta pogos ne nanini narui, naña Ntewa kila ruruia vena tetol natamaliaena.

⁸ Asitomyuli yermarua Yosua nanua. Naga sumon kieta yermarua la kompasa apa loyuma e purvanua wo naña Ntewa pisaaria, ana visae naga ke narui navaruruena kiena ne Ntewa naña akus rui, yoko Ntewa tañatete si visayu pogos tañena tai va Tepet, visave pe legiena na vaen loyuma e kiena navaruruena.

⁹ Ana peraga, naga sumā pisa ke pisape navaruruena wa nowo tai sike ga wa kiena ne kiena yeririna lala,

¹⁰ ana visae a naña va loyuma ea, yoko wo naña wo vana vañisi, yoko naga kilia va ruru e kiena yumaena make ga, sa ke ga naña Ntewa mēna pa ruru e kiena.

¹¹ Visae sanene, popon tomāreran li naña tetol navaruruena wa nowo nene, ana pe pon re mēna ita yar tai ve logear re Ntewa, yoko kilapalia.

Visena kiena ne Ntewa po pañisi

¹² Tesike vatanon visena kiena ne Ntewa, vanon kiena visena naga mali, miyumaen ke mārera pañisi, kilia yur malena kien yaru, mal pañisi taulu playu na mara naña mal lepas luwoka. Visena kiena ne Ntewa kilia va warpoyo va loyuma e losineta, kilia va liṗere sur ya naña teke e kieta sitomena, pona visuveve ya naña teke e ninuta.

¹³ Lelaga, naga naña yoko visuveve kieta malena, kilamarana tol make suria, tañatete ita yar tai tapolounia.

Yesu pe kieta p̄arin yaru wa

¹⁴ Ntewa kilia make sur la ne lepas na e ita, ana potena pania naña narina, pupia p̄arin kieta yaru wa naña Yesu, naga mligan yo nini pa yalen silau ma e kiena yo ma metava e peni, pa kila ruru si mara wo pan Ntewa vanon ita. Ana vanon naña kila ruru ita ke temio Ntewa sanene, popon touarar nalelagaena mārera ea, a popon ve teligan li re si naga pogos tai.

¹⁵ Kieta p̄arin yar wa nene, naga pe yar ta naña pe mninue re kieta ursuen la poli, ana kilia ruru po pañisi naña ita pe tesumal re mārera poli. Naga sinen miye ita, yoko iila ita, komin nanua naga mēna ga, natañaliena lala apim ke e naga mārera pañisi pania e lepas punu ga, sa ke ga naña apim ke e ita. Naga sa ga ita, ana sur ga tai, natañaliena pe p̄ere re nena naga mloru e mlamulena viowa poli.

¹⁶ Visae ve sanene, tepisu sane tomāl kieta mrapa narui vena tekilali naña telen ita teva la lavis pun lele natotanoena wa kiena ne Ntewa, naña pe purṗes nen lemamiēna. Ve temarau re sina, tekekaran naña teim puna Ntewa, ana yoko tekilia tetol kiena sineyeena e kieta malena, yoko tevisu naña kiena nasinewoena iila ita e pog mārera ya naña tesike ea.

5

Yesu pe þarin yar wa na sineyeen yar lala

¹ La naþa apuarar yuþaena na þarin yar wa, apisiriplan la petan li wa taþena lala vena kilaen yuþaena na sanene narui. Yaru naþa pe þarin yaru wa, naga suþalu su likan yeririna lala a Ntewa, vena waren kiela nalaena lala amio nakuþaþaena lala vania, vena naga kilia viewo kiela mlamulena viowa lala.

² Parin yaru wa nene pisu kilale ruru naþa yar la asuþa amiyuþae piowa ga, asuþa amiyepe ga petan mrapa, komin naþa naga mēna pe kumpui ga, naga mēna kilia malum, kila sane sinena kilia ye ruru nena yeririna taþena lala, naga moþau ruru nena pan la.

³ Naga sa ga yeririna taþena lala, ana pogos naþa kila nakuþaþaena lala, monar kila ve vanon re ga mlamulena kiena ne yeririna lala, ana vanon mēna kiena mlamulena viowa lala.

⁴ Komin sur ne nanene, pe pon re yar tai ligandar si naga poli visave popon imi ve þarin yaru wa, ana Ntewa ga kilia ligandar yaru vena war pupia kia na sanene, sa naþa naga mligandar yermarua Eron nanua sumo pe kieta þarin yaru wa þesa.

⁵ A e lepas kiena Kristo, sa ke mēna nene. Naga pe kieta pupia þarin yaru wa, ana naga pe pisirlua re naga pa metava sape naga sanene poli, ana Ntewa ga pisirlua naga. Visena kiena ne Ntewa naþa pisa sanene sike e nasiriena wa na sumo lala, naþa ta pisa sanini, sape

“Ko na nepisu sane þane opim ope naruu nenaga, a in na nepim nepe arimoþa kemua lelaga.” *Yauena 2:7*

⁶ Taþena, pisa sanini, sape

“In na nemligan ko sane yermarua Malkusteke, ko na yaru wa maro e kiena lus, naþa yoko ouarar ma yuþaena nene vano-o ve uro re.” *Yauena 110:4*

⁷ Ntewa mligan yuþaena nene pa Yesu, ana tepisu e pogos na kiena malena e

yomarava nini, naga kila ke pa rui. Sila ga naga sitom manene yomarava nini paþisi, ana tagin pa Ntewa, wamarana mlau vanonia. Naga suþalar mārera sike e Ntewa sape visae kiena malena kovio, yoko Ntewa kila malia sina, ana naga māreran la sane naþa mlenwo itania.

Ana Ntewa pisu þelaga wo na moþauena a navatanoena kiena ne Yesu, ana sinena myea, mloge kiena naviunena lala.

⁸ Lelaga naþa Yesu naga pe narina ne Ntewa rui, ana Ntewa taþan naloge viowaena na pogos mārera lala pimi pania, sape vian Yesu vena tol ruru þelaga na logearena e kiena malena.

⁹⁻¹⁰ Naga patanon make nasinenanena lala kiena ne arimana, pano-o kila make yuþaena la naþa Ntewa mla pania, kila narui pisirlua naga sane yermarua Malkusteke. Sanene, Yesu pimi pe Ntewa kiena þarin yaru wa, pim pe purþes nen malena naþa ve uro re kieta ita punu ga naþa temlogearia.

Popon teimi temarua ruru wo e Kristo

¹¹ Ana kia naþa Malkusteke, kiena suniena marua wo la sike ne, naþa akilia akila meraravan ruru van amiu sanape e yar nene amio kiena yuþaena. Mareran navisayu ruruen merarava van amiu, komin naþa yam tai sa naþa kiligamiu poþe towe la sane. Ana visae kam na asitom asape aloge kilalelia,

¹² yoko wo vaþisi, komin naþa kam na amlelaga nakonua rui, ana atorokin naþa aim ave navianena na visena wa kiena ne Ntewa rui. Ana peraga, asuþa ga sa ga nene, ana monar avian amiu si ea, siar si e kana purþes nen visena ne lala.

!Lelaga naþa, kam na nakanen kinanen mārera la rui, ana sa ga naþa asuþa sinemiun ke amun yu na wa!

¹³ La naþa amun ke yu sanene wa ape sisi ke ga wa, ana taþatete ave manmarua e visena na mrapa lelaga,

¹⁴ ana la naþa akan ke kinanen mārera, la amarua ruru rui. La ne sanene, kiela sitomena la miyuþae ruru pano-o apisu veve ruru make sur punu ga, ana akapur

apimi po tol naþa apisu kilale ruru sur ya naþa po a sur ya naþa piowa.

6

Popon tevisuar ita ve towasuþe re si teva varau

¹ Komin sitomena la nene, popon teligan þelaga na sisi sike na, teva re laa sane wa e navianena m̃arera kiena ne Kristo na atorokin sitomena naþa marua.

Tepilopu ita e kieta yuþaena piowa namarena la rui, tetol naviawaena e Ntewa rui, ana popon ve tesuþa teva re si ea. Naga sa naþa tekilavan lelen yuþa rui, pe pogos na visirluaen narui.

² Apian ita e nakeena rui, apu þarita rui, temlelaga rui tesape yoko tesuþal si e marena, a tekilia rui naliþereena ta sike ne amio kana nakoena nena naþa yar viowa la akus vano-o taþatete þisi pogos tai. Sur la nene toþaro make e rui, ana pe pon re tesuþa teteteliv m̃aga e sur la nene silaga poli, ana popon tesuþa teva re laa sane temio kieta Suþe.

³ Sur nene m̃arera paþisi, ana visae Ntewa tam̃an ga van ita, yoko tekilia teyuþaen wo ga.

⁴ Lelaga, yoko tekilali naþa teva re laa ga wa temio naga silaga, ana sanapen la naþa amloru, apa si varau rui?

La nene, la amial ruru þes e yomerarava asuþa akinan ke e lokove nae ma e peni rui, a Ninuna Wa pimi m̃ena e la, a pogos naþa apa si apiowa sanene, yoko taþatete si avilopu la awasuþe aim e malena.

⁵ Visena Wa kiena ne Ntewa miila la e kiela malena rui, a atol towe m̃a nam̃areraena na suþenena naþa pimi ke ne,

⁶ ana pogos naþa apilopu si m̃asila, akila þarila sanene, yoko aim awo si sanape? Peraga, yoko viowa van la vaþisi, komin naþa akila ke sane asuar ke si Narina ne Ntewa meta e lak torovia, sa naþa asuþa apisirilua ke naga e maran yar lala vena aviuelin kare si kiena kia.

⁷ Asitomyuli na nene. Porotano naþa mun yua naþa mloloru ea, ana þar manene kinanen kan la naþa amiyuþae

ke ea, ana Ntewa kekaran paþisi, kiena navisa ruruena sike ea.

⁸ Ana porotano naþa pe þar re sur wo poli, þar ga viluþini viowa lala, naga sa ga naþa apiain ga maren pania, ana taþatete akila sur wo ta ea, yoko asikap ga narui.

⁹ Erau lala lelaga paþisi, visena la ne sanene am̃arera paþisi, ana e lepas na pun amiu, in na pe nesitom re nesape kam na sanene poli. Peraga, noþasine amiu, sane mras nen malena viu naþa po kapuru ke e amiu na wa.

¹⁰ In na nemlelaga nesape yoko taþatete Ntewa sinen þesan kiamiu yuþaena wo lala, a yoko taþatete sitom korenan vinayaena a sineyeena naþa kam na akila pania, pogos naþa kam na amiila kiena nalelagaena wa taþena lala. Kam na amiyuþae po sanene, ana kila Ntewa kekaran paþisi, yoko naga m̃ena kila ruruia a kila wo van amiu.

¹¹ Sanene, nesape neiilaar amiu sina, vena ve ava re si varau, kam na am̃areran ava re laa ga wa, ava m̃aga atol ga luas rui, vena akilia atol sur punu ga naþa kiamiu sitomena sike ea.

¹² Kam na ve ave yowen re, ve yepemiu malum re, ana monar avesinaia e yuþaena maran ve taaga sa ke kieta yermarua wo la naþa amasusun ruru yuþaena, kiela sitomena la piayavi pano-o atol sur punu ga la naþa Ntewa pisaar þesan pan la.

Visaarena kiena ne Ntewa pe lelaga paþisi

¹³ Navisaarena ta naþa Ntewa kila, naga kila pa yermarua Epraam, pisaar m̃arera pania e lepas na lus la naþa yoko amolue raunia. Pe kia taþena re si naþa Ntewa kilia visa vena kila kiena navisaarena nene m̃arera poli, komin kiena kia naga mon metavan make kia taþena lala, ana Ntewa pisaar ke sina e ga e kiena kia, sape

¹⁴ *“In na Ntewa, yoko nevisa ruru ko ve keviu vaþisi, nekila kioþa lus la aim ave moki vaþisi e yomarava nini.”*

¹⁵ Ana Epraam lavisi sitom þele visena nene, ana pisu naþa Ntewa kila kiena navisaarena nene m̃arera ruru po paþisi,

ana pe sur koren ga naña Epraam tol pogos m̄arera la mok pañisi, ana pe mligan re navisaarena nene poli, p̄uarar ruru m̄a pano-o pisu naña siar tol ya naña Ntewa pisaar pania.

¹⁶ E lepas na p̄elaga nakilaen navisaarena m̄arera, yar la asum̄a apisa kia kiena yar wa tai pona sur wa tai. Ana pogos naña yar tañena la aloge, la monar aelaga ea, tañatete si avisin sinekar vania, komin kia naña apisa kila visena m̄arera.

¹⁷ Ana sanapen Ntewa? Naga m̄ena sinenan sape kila kiena visena van ita m̄arera ruruia, vena telelaga ea, ve tesitom p̄ele re. Ita na sane narina lala na waren kiena lalimana, ana naga sinenan sape tekiliaar ruru tesape kiena sitomena wo naña teke e ita tañatete p̄isi pogos tai, ana kila kiena navisaarena pan ita m̄arera pañisi.

¹⁸ Navisaarena kiena ne Ntewa naña pan ita m̄arera ruru sanene rui, komin naga pe pisokan li re poglis tai poli wa, kiena visena tañatete vilovilopu karea, ana metavan kiena navisaaren nene, pisa si amio kiena kia wa, vena kilaen kiena visena nene m̄arera nenaga. Ana sur lua nene, kiena navisaarena amio kiena kia, lalua amiyum̄ae lele taaga vena kila ita tesum̄al m̄arera tese kiena visena. Ita topur matan yo viowa naña tesu p̄es ea, takalewele ke yo na suvanena, ana navisaarena lala kiena ne Ntewa akila kieta sitomena la piyavi ruru po. Sanene yoko tekilia teva tetol ruru yo wo naña Ntewa kila ruruia a mligan sike e marata woga ga naña.

¹⁹ Kieta nalelagaena m̄arera nene, naña tesape yoko Yesu tamalia ita, naga sitomen ta naña sane kilavaru na tararen waa. Yoko uarar ruru kieta malena, vena ve sur re si ta naña kilia werelua ita, vano-o tol pogos naña teva varaun pupia kulmrae loyum̄a e Yo Wa naña pe Yo Wa pañisi. E yo nene teva tesum̄al nena tese marana ne Ntewa, yoko kieta sitomena lala akilia am̄arera ruru ke na wa asape woga ga van ita.

²⁰ Naga nene komin naña Yesu sumon ita pa e yo wa nene rui, pa kila

kiena yum̄aena sane kieta p̄arin yar wa, vena kila kieta mara wo temio Ntewa.

Sa naña tepisa rui, naga sane pe p̄arin yar wa maro na lus kiena ne yermarua yaru wa Malkusteke, ana naga pul plan kieta mlamulen viowa la rui, a yoko kila m̄a kiena yum̄aena na sanene vanon ita vano-o tañatete p̄isi pogos tai.

7

Malkusteke na sumo naga mon la metavan make p̄arin yar wa tañena lala

¹ ? Ana yermarua Malkusteke nene, naga ai, a kana suniena naga pa sanape? Tus naña Nasiarena pisayuia, pisape naga pe yar na pogos kiena ne Epraam nanua sumo, pe p̄arin suñe na kumali marua wa naña Salem, a naga pe pupia yar wa kiena ne Ntewa na mava. Ana pogos tai, yermarua Epraam pa kila mara pa kiena nasinekar lala, naña p̄arin suñe tañena lala, ana taulu la, p̄asuñe ke si narui, pitawe Malkusteke kinae patanonia, ana Malkusteke pisa ruruia.

² Ana Epraam mla nalaena pania, mlalua lualima petan ponotia na sur make la naña taulu e pogos na mara naña p̄arar ke sape wasuñe si va m̄ana. Pupia yar wa nene naga pe yar tai, sa naña kiena kia ga luwoka apisa. Kiena kia p̄es nena, Malkusteke, kana kinasa pisape “Parin suñe na mesmesu,” a kiena kia na lua pisa sanini, sape “Parin suñe na sum̄are,” komin naga pe p̄arin suñe nae pulkumali naña Salem, naña kana kinasnena na sum̄are.

³ Yar nene, kana suniena nena pe tañena ga, komin naña pe temloge re apisape kiena yermarua lalua na sanape, pona am̄a repina lala la ape lus nae pe wa. La pe apisawal re kiena maliena poli asape am̄a siar sanape, a pe suniena na kiena marena re poli. !Sa naña naga pe mare re nena poli, sum̄a p̄uarar ke kiena yum̄aena na wa! Sanene, naga sa ga narina ga Ntewa narui, naña yoko naga ve kieta yar wa m̄a vano-o tañatete p̄isi pog tai.

⁴ Komin sur la nene, tepisu e visena marua kiena ne Ntewa naña kia na Malkusteke, naga pe kia tai naña pa metava pañisi, pano-o tol repita yermarua Epraam, naña asitom ke asape naga mon la metava rui, naga mēna patanonia, p̄ar nawaren pania e komp̄as nen sur la naña taulu e mara.

⁵ Ana p̄elaga na laen nawarena na sanene, naga p̄elaga ta naña navisaluaena pisape le Israel lala la monar akila luen ga. Kiela yar wa lala na lus kiena ne Livae, la monar avisuar ruru la, awarplan lualima petan ponotia e kiela sur make ga van la, komin la na sa ga namratava taaga, naña ape lus kiena ne Epraam.

⁶ Ana Malkusteke nene, naga pe nae re mratava puna ne yermarua Epraam poli, ana Epraam p̄isu kilalea sape naga yaru wa tai, mliṗere nawarena komp̄as pania. Yermarua Epraam nena naña Ntewa pisaar sur wo la pania, ana naga patanon Malkusteke.

Ana pogos naña Malkusteke tol nalaena nene, kekara, pisa ruru Epraam, a nanene kila meraravan si pan ita sane naga mon manene la metavana,

⁷ komin yar naña torokin visa ruru yar taṗena, naga monar mon laa metavan yar nene.

⁸ Ana Malkusteke amio yar wa taṗena la nene, la make ga atol kiela nalaen la torok ga, ana la ape taṗenan sur tai. Suri nene sanene, sape yaru wa lala aṗar kiela, ana siraunia amarmare, ana Malkusteke mla kiena, asape naga suña pano-o pe mare re poli.

⁹ Ana sanaña Malkusteke mon la metavan yermarua Epraam, naga mon mēna metavan pupia kia taṗena naña Livae. Lelaga kemua, Livae naga p̄esan naña pe repina ne lus kiena ne yaru wa lala, ana naga mēna ga molue kome lus kiena ne Epraam, ana pogos naña Epraam patanon Malkusteke, mla nalaena pania, sa ga naña Livae mēna patanon Malkusteke mla nalaena pania.

¹⁰ Suri nene naga sane pogos naña Epraam m̄alivin Malkusteke, kila pania, Livae pe paeme re e repina nene poli wa, ana sa ga naña naga mēna kila.

Yesu pe molue re e lus kiena ne yaru wa la poli, ana molue ga kome lus viu tai

¹¹ Ana visena la ne ma metava apisawal ke pupia sur ta ne pañisi. Akila meraravan asape Ntewa p̄ere plan lus na yaru wa lala kiena ne Livae, pisirilua lus taṗena tai kiena ne yar wa lala, kus lelana. Yermarua Eron mēna pisirlua yuṁaena na lus kiena ne yar wa lala, ana Mosis p̄ar kiena navisaluaena nene pimi m̄alivi, ana visae Ntewa visu sane sur lua nene torokin kila ita temesmes ruru nena temio, vera na ligam suña ga. Ana peraga, naga pilopuia, mligan si p̄arin yar wa viu tai pimi m̄alivin ita, naña pe lus kiena ne yermarua taṗena nene Malkusteke.

¹² Ana komin Ntewa pisirilua p̄arin yar wa viu nene, mesmesun mēna naña visirlua kana navisaluaena viu tai.

¹³ Monar ve sanene, komin e nene naga pisayu kieta Suṗe, naña naga m̄alivi e lus ta naña pe la re nena ta suñal se wonta ana kila yuṁaena kiena ne yar wa poli.

¹⁴ Lus naña Yesu m̄alivi ea, tekilia tesape naga lus nae Suta, ana pogos naña Mosis pisawal kia kiena ne lus kiena ne yar wa lala, naga pe pisawal re nena kia naña Suta poli.

¹⁵ Ana lus na yar wa taṗena lala suña ga, naña Yesu molue komea, nane lus kiena ne Malkusteke naña tepisasa ke narui. Sur ne nane kila narui tepisu sane Yesu pe sa re yar wa taṗena la poli, ana naga sa nena Malkusteke ne narui.

¹⁶ Taṗena la nene, apim ape yar wa komin ga naña sane ape kana lus na kuruta mal nene, sa naña navisaluaena marua pisa, ana Yesu pimi pe kieta p̄arin yar wa e pupia nam̄areraena na kiena malena naña taṗatete akila karea, naña sike sike lue narui.

¹⁷ Tekilia tesape naga su lue sanene, komin naña visena kiena ne Ntewa pisa rui, naña sape

“In na nemligan ko sane yermarua Malkusteke, ko ope yar wa maro na kiena lusa, naña yoko ouarar yuṁaena vano-o taṗatete p̄isi pogos tai.”

Yauena 110:4

¹⁸ E nene, pimi merarava ruru pan ita sane Ntewa pilopu kiena mrapa na

yum̃aena. Mrapa marua naga navisaluaena kiena Mosis na sumo, naṗa sum̃al sukaṗar paṗisi, ana sa naṗa kiena nam̃areraena naga pe torokin re kila sur wo ta van ita poli.

¹⁹ Naga kila ṗele yon naṗa kila mesmesun ruru ita, ana Ntewa mligan mrapa marua nena sike ga narui, kila si sitomen vii ta pa metava, kus lelana. Mrapa vii nane tekilia telelaga m̃arera tesape naga pe mrapa namalena naṗa pe lelaga, naṗa kilia sumon ita teim lavisin Ntewa.

²⁰ Ana mrapa vii nena, navisaarena kiena ne Ntewa tai kilarar sum̃alar m̃arera su lue na sike ne. Yar wa taṗena na sumo lala, poglis naṗa apuarar ṗarila, amiyawawo la vanon kiela yum̃aena, pe navisaarena re tai sanene poli.

²¹ Ana pogos naṗa Ntewa pisirlua Yesu pimi pe kieta ṗarin yar wa, kila amio kiena navisaarena m̃arera tai. Naga sa naṗa visena tai na Tus na Yauena Wa Lala pisa, naṗa sape

“Ntewa pisaar m̃arera rui, ana taṗatete si vilopu kiena visena nene, visave

‘Ko na yoko ouarar yum̃aena sa naṗa ṗarin yar wa kiena ne kiau yeririna lala, vano-o taṗatete oṗisin pogos tai.’ ” *Yauena 110:4*

²² Ana Yesu ṗuarar ruru kiena yum̃aena nena sanene, pe kile na naviranarena vii kiena ne Ntewa amio ita, naṗa po manene la taulu na sumo, a pe nasiaren suri la naṗa Ntewa pisaaria pan ita, yoko kila make ruru nena van ita sirau.

²³ Nanua sumo na yar wa la moki, komin naṗa ta miyum̃ae pano-o kovio, taṗena kus lelana, miyum̃ae m̃a pano-o, naga m̃ena kovio, la akilakila sanene. La taṗatete asu lue,

²⁴ ana Yesu, naga yoko su lue ga narui, ana yoko naga taaga ga uarar kiena yum̃aena sa naṗa kieta ṗarin yar wa vano-o taṗatete ṗisi pog tai.

²⁵ Sanene, naga sike ga e marana ne Ntewa silaga, mlen lue ga pania vanon ita, ana kila sane ita nanagane, pona ita la naṗa tepim ke rau wa, ana naga ke narui naṗa yoko tamalia make ruru ita punu ga naṗa teva tokom puna teim lavisin Ntewa.

Yesu na pe ṗarin yar wa nena napo

²⁶ Tekekara paṗisi naṗa Ntewa piṣu sane popon ligan ṗarin yar wa ta naṗa po manene sanene imin ita. Naga pe yar ta naṗa pe yar wa paṗisi, pe napiowaena ta to re nena ea ṗisa, merarava paṗisi, kiena ṗelaga pe sa re nena yar na kilaen mlamulen viowa la poli, kiena kia pa manene laa to metavan punu ga sur nae peni.

²⁷ Yar wa taṗena la nene, la monar akila luen ga kuṗaṗaena na ikikena legiena punu ga. Sumo, monar akila vanon si kiela mlamulena viowa lala, a sirau-nia, akilia akila vanon mlamulena viowa kiena ne yeririna taṗena lala, ana Yesu na pe sa re nene poli. Naga kila kuṗaṗaena na ikikinen mlamulena viowa na yomarava wetelu yam taaga, nanene e pogos naṗa kuṗaṗain si tasnena vanon ita.

²⁸ Lelaga kemua naṗa navisaluaena marua pimi sumo, ana kiena ṗarin yar wa pe yar ga, malum ga, ana naviranarena vii naṗa pimi marea, kiena ṗarin yar wa naga mesmes lue ga, nane Yesu narina ne Ntewa.

8

Naviranarena vii: yum̃aena kiena ne kiena ṗarin yar wa naga po manene la

¹ Ana vianen la naṗa meta ne apisa sur mok liu e lepas na ṗarin yar wa lala. Ana pupia purṗes nen visena tai sum̃a ga, naṗa popon tesitom urmi ea, naṗa pisa sape kieta ṗarin yar wa wo tanea ta sike rui. Naga Yesu, naṗa ṗasuṗe si pa ma e peni, ana Yerkawa Keviu na Yo na Ma Metava mligan naga totano teke e lepas nena na ṗamarua.

² Naga sike e yo nene, kila ke kiena yum̃aena wa lala, sa naṗa yar wa la nanua sumo akila lotena e yum̃a kanus wa naṗa e yo mema. Ana lelen kilaen lotena nene, yar ga la amiyum̃aenia, ana kieta ṗarin yar wa Yesu naga miyum̃ae ke loyum̃a e yo na lotena naṗa po, pe lelaga ruruia, naṗa Ntewa ga miyum̃aenia.

³ A ṗarin yar wa taṗena la nene, kiela yum̃aena, silaga apisir plan la

vena waren nalaena va Ntewa, a akila kuṣaṣaena la pania, ana popon teviun tevisave kieta ṣarin yaru wa nene, pona naga mēna mla nalaena pa Ntewa, a kila kuṣaṣaena pania?

⁴ Visae e ga e yomarava nini, yoko taṣatete avisu naga sane yaru wa tai, komin naga pe molue re kome lus kiena ne Livae poli, naṣa navisaluaena pialua pan la sape lala ga akilia awar nalaena va Ntewa. Sanene, kieta ṣarin yaru wa nene suṃa miyumaē ke ga e yo wa na ma e peni.

⁵ Yo wa na yomarava nini, amio yumaena la naṣa akila ea, naga sa ga kana yanen ga, ana naga naṣa ma e peni, naga napo nena ga lelaga. Ntewa mēna pisa sa ke ga, pisa kilale pa Mo-sis, ve sanape naṣa yoko yumaen yuma kanus wa, pisape yoko yumaen taveve kana nono nena torokin naṣa naga pisuia poglis naṣa pa ma e tavie.

⁶ Ana sanene tepisu naṣa Yesu kieta ṣarin yaru wa pe lelaga napo, a kiena yumaena punuga powo la sane. Naga totano likan ita temio Ntewa, miyumaen naviranarena vii tai van ita temio naga po manene la sane, naṣa sike e navisaarena lala kiena ne Ntewa naṣa po laa sane, pano-o tepisu naṣa sike ma e yo wa na peni kila yumaena po manene laa sane.

⁷ Visae naviranarena ṣes nene naga woga ga rui, vera na taṣatete si nalua nena, ana peraga, kila narui nanagane Ntewa pisirlua naviranarena vii amio ita naṣa po manene rui.

Naviranarena vii: Ntewa pisaar nanua rui

⁸ Naviranarena naṣa na sumo, Ntewa pisu sane pe miyumaē po re poli, pe torokin re kiena sitomen poli wa, ana kila naga pisaar sina na urviu tai. Naga pisawal sanene e visena ta naṣa mla pa Navisawalena Seremaēa vena visawalia. E visena nena, Ntewa pisaar sanini, sape

“Ayagogo ruruia. Sineun nesape nevisa van amiu nevisave pogos ta pimi ke ne, naṣa yoko nekila naviranarena vii tai nemio amiu kiau yeririna

lala, kam na lus kiena ne Suta amio lus nae Israel.

⁹ *Yoko naviranarena nena ve maran taaga re amio naṣa nekila nemio kiamiu yermarua la nanua sumo ne. Naviranarena na urmarua nene, naga e pogos naṣa sineu mie la, noṣere plan la e pogos mārera gar Isip, ana siraunia, pe asitoṃal re si naviranarena nene poli, pe amlogear re si poli, kila narui in mēna nepilopu māsuu pan la.*

¹⁰ *Ana nanagane, yoko nevisirilua si naviranarena vii tai nemio si kiamiu lus lala. E naviranarena nene, yoko nekila sanini:*

Yoko neligan ruru kiau navisaluaena lala sike e kiela sitomena lala, yoko nesiri kiau visena la sike e losinela lala, yoko neim neve kiela Ntewa kemua lelaga, a yoko aim ave kiau ṣegas nen yeririna.

¹¹ *E pogos nene, taṣatete si akilali naṣa avian la, sane ta kilali naṣa pisawal van nalavis puna, visave ‘Ke, mrapa nanene,’ pona ta pisawal va wenla, visave ‘Ntewa, naga sanene sanene.’*

Peraga, yoko taṣatete si akila ve sanene, komin yoko la punu ga veve taaga avisu kilale inu e kiela malena, siar e la naṣa pe kiela kia re poli, vano-o tol kiela yerikawa ne lala.

¹² *Nepisaar nesape kiela napiowaena lala, yoko neviewo nena ga, a kiela mlamulen viowa lala, yoko ve nesitoṃal re si na rui.*

Nane kiau naviranarena vii ne nanene narui nemio kiau yeririna lala.” Ser 31:31-34

¹³ Ana e kiena visena nene, Ntewa pisayu naviranarena vii nene, kila ita tepisu kilale sane naga pisu ke kiena naviranarena na sumo nene sane pe urmarua rui. A sitomena ta suṃa ga sane sur naṣa Ntewa pisa ne sape pe urmarua rui, nagane pito la tano narui, ve ve viavi re yoko kovio make nenaga.

9

Naviranarena vii: kiena lele na lotuena naga po manene la

¹ Ana tekilia ruru po naþa sane naviranarena marua, naga kana mrapa lala na kilaen lotena asumã ga, amio mēna kiena lele na kilaen lotena tai, naþa sike ga yomarava nini.

² Lele na kilaen lotena nene, naga kana yumã kanus wa nena, naþa aþere pupia kulmrae ea, akila þerea sane loyumã lua. Lepas tai, naþa apio asape Yo Wa, purþes nen kapi vivaga tai naþa kana koruas olua sike ea, amio varvara tai na kilaparavi lualima yam taaga pa lua, naþa apio kilaparavi na vianen van Ntewa.

³ A varaun kulmrae nene, lepas þas na vano, naga apio asape Yo Wa naþa pe Yo Wa paþisi.

⁴ Loyumã e yo nena, naga kana wonta na ponotaninu nena naþa amiyumãen e kol, amio pias nen navisaluaena. Pias nene amiyumãen kana kulusa e kol, yepas na loyumã a vanua, naþa e kana loyumã nena, amligan ruru sur telu sike ea. Nasumo, naga pialora naþa pe kol, naþa kinakinasnen kinanena na yo mema naþa asape mēna teke ea, a sur na lua, naga plaspai kiena ne yermarua Aron naþa nanua na pitovi, a sur na maro, naga kilavaru lua naþa pe lepalepasa naþa Ntewa siri kiena navisaluaena sike e la.

⁵ A e wos nen pias nen navisaluaena nene, naga pe keplamarana, naþa asape lele na totanoena na sineyeena kiena ne Ntewa. A nono lua na navisi asumãl asike meta ea, naþa akian kupela suvivi yo naþa naurarena kiena ne Ntewa pitom ke tano ea. Ana yo wa na lotena naviranarena marua naga kana sur ne la powo paþisi, ana taþatete si tevisa sur ve moki e lepasnela. Ana sur na visaena taaga, tesape yo na lotena nena, amio kana sur ne lala, naga amiyumãen ga e sur na yomarava la nini, taþatete nena sike sike lue, naga pe po re sane yo na lotena na naviranarena viu poli.

Naviranarena viu: kana nakuþaþaena nena naga po manene la

⁶ Sur la ne sike meta ne, nane sur ke la nene narui naþa amligan ruru sike loyumã e yumã kanus wa na sumo nanua ne, ana poglis naþa yar wa la apa loyumã,

amiyumãe amio la. Ana silaga, apava ke e ga e yo wa naþa mon þesa,

⁷ ana e yo wa na lua naþa pe yo wa manenea, yar wa lala pe apa li re nena loyumã e poli. Yo nene yar taaga kilia va loyumã ea, nane kiela þarin yar wa, a naga pe pa re silaga poli, kilia va ea yam ve taaga ga e kasa. A visae pogos naþa vavini, taþatete va koren ga sanene, ana monar taveve kana mrapa ne lala.

Sumon naþa vavini, monar kila kuþaþaena e sur mal tai, ana monar war piasnen kana kuruta nena va loyumã sane nalaena tai, nanene na e lepas nen kiena mlamulen viowa amio kiena ne yeririna lala.

⁸ Ana pogos naþa akila ke sanene, naga sane pe kile na Ninuna Wa naþa kila meraravan pan ita sape pog naþa visae yumã kanus nene susu mēna ke ga wa, vera na ita yar kar la pe kieta mrapa re nena ta poli naþa teva toworu e yo naþa Ntewa sike ea.

⁹ Kanus na yumã wa naþani, amio kana kulmrae nena naþa telan liþere loyumã, a kana sur ne lala, la na ape sur na konua na þa rui, ana apisa ke pupia sur ta ne pan ita na nagane ne. Akila narui tesumã tepisu kilale tesape nalaena la naþa yaru wa lala amlavia pan Ntewa, amio kuþaþaena la naþa akila ke ne, akila poga ga, ana sur la nene taþatete kilia kila yeririna la aloge sane kiela sitomena la mekiki ruru nenaga e navisuena kiena ne Ntewa.

¹⁰ Akila sur la nene, amio ya la naþa narin navisaluaena la apisa, naga nene e lepas na mrapa na yumãenen kinanena amio namunena, a e þelaga na kevanen sur lala. Ana sur la nene ape na yepas nen yar ga na vanua, ana pe atol re losinena pona kiena sitomena poli. Kieta yermarua la apuarar mēna þelaga marua na sanene pano-o, ana sur la nene na ve nauarar laen ga vano-o tol pogos naþa Ntewa kila kieta mrapa viu, naþa kana naviranarena viu nena naþa pimi mālivi rui.

Tana ne Kristo kevan ita mekiki rui

¹¹ Ana pogos naña Kristo pimi mñalivi, naga pimi sane kieta ðarin yaru wa, naña pe na ðelaga marua re poli, ana pe na mrapa viu, vena kila narui tekilia tetol navisaruruena wa la naña Ntewa mligan ruru sike na. Naga pe pa miyumaen re e yuma wa kanus marua na sumo poli, miyumaen e ta naña po manene la pañisi, pa la metavan nene. Yo wa naña kila ke yumaena ea, pe yar re miyumaen e limana po, a pe su re mña e yomarava nini poli, sike nena e yo merarava e marana ne Ntewa nae peni.

¹² Ana pogos naña Kristo pa loyuma e yo wa nene, naga pano pano-o tol nena kana yo wa naña pe yo wa nena napo, ana pa yam taaga ga, pe navaen re si pogos taña poli. A pogos naña pa loyuma, kuruta naña naga ðaria pe pe kuruta na nane re poli pona kuruta na narin puluk, ana kana kuruta nena napo naña mlau e lak torovia. Ana kurutana sike e marana ne Ntewa sanene, taulu naul luaen kieta mlamulen viowa la, naña tañatete ðis pog tai.

¹³ Monar ve sanene, komin naña e ðelaga marua, visae yar tai kila sur ta viowa, amla narin kuruta na nane pona puluk, amio posnoyavi na narin puluk naña askapia, amla pa e yo wa. Ana e pogos nene asitom asape nalaena na sanene kilia kila yar nene ikiki si e marana ne Ntewa.

¹⁴ Ana visae kuruta na sur mal ga la akila sanene, yoko kuruta kana Kristo naga kilia kila va ve keviu laa sane. Kristo pe yaru wa tai, naga mekiki ruru nena ga, pe kororaki ta to re e poli, ana naga tamñan kiena malena vena Ninuna Wa la va Ntewa sane nalaena tai, ana naga pim pe kieta natamaliaena. Sanene, yoko kuruta kana Kristo kilia kila sineta la ikiki, kilia wereplan ita vetan kieta yumaena na marena lala, pisir plan ita vena tekila yumaena lala kiena ne Ntewa mali.

Tana ne Kristo kila naviranarena viu sumalu marera

¹⁵ Ana komin naña Yesu kila yumaena wo pan ita sanene, tekilia tevisu naga, sane naga pe yar na waren sur wo

lala na viranarena viu imi mñalivi e ita. Nanene naga miyumaen e kiena marena, naña sane marena ta naña pul plan make maliena kiena ne yeririna lala naña akilaro navisaluaena lala na viranarena nasumo. Ana komin naña naga pul plan ita sanene, kila sane visae ita a naña Ntewa vio ita, tekilia tetol kieta lalimana naña yoko tañatete ðis pogos tai.

¹⁶ Visae Yesu ve mare re, tañatete tetol kiena lalimana la nene, ana sa naña sane mare kemua lelaga, navisaarena make ga naña na naviranarena nena apim sane visena maro kiena Yesu, ana sur make ga pimi e limata.

¹⁷ Komin naña visae yar tai visaar maron sur tai sa naña kiena visena maro, ana pogos naña naga mal ke ga wa, apuarar ruru kiena visaarena nene sumña ga, ana pe amiyumaen re poli sumña pano-o tol pogos naña visae naga mare narui, yoko ayumaen ga na wa.

¹⁸ Sa ke mña naviranarena naña Ntewa kila ðesania, naña visae kuruta na kuñañaena lau, ana visena naviranarena sumalu.

¹⁹ Sur nene Mosis mña kila, naña Ntewa kian kiena navisaluaena la pania ma e tavie, ana pitomi tano pisawal make kana visena ne lala pa yeririna lala, ana pogos naña pisawal make pae, mñemoñar nakuñañaena ne lala, vena kila sa naña visena navisaluaena nena amali, a asumalu. Amñe moñar narin puluk lala a nane la nañani ana naga mla kala narin kuruta ne lala, taron narin wii pito amio, ana mla narin laki tai, apio asape isop, piar vilus nen sipsip naña pivaga pa ea, ana puton pito e kuruta nañani, peven ve tokak ga e tus navisaluaena nena, a peven mña e yeririna lala, pisawal pan la, sape

²⁰ “Naga nene kuruta na sur mare naña vena kilaen navisaluaena kiena ne Ntewa mali. Ana monar tevatania a telogearia.”

²¹ A sa naña peven kuruta nene e la, ana peven mña ve torokaki e yuma tapolen nene, amio sur la naña asike loyuma ea, naña asuña akila ke kiela lotena amio la.

²² Mrapa na yumaena la naña na navisaluaena marua nene la sa ke nene narui,

naþa lavis sur make ga naþa amiyuñae ke amio la, monar aveven kuruta ea vena akila aim ave sur wa silaga. Naga nene sane kila meraravan pupia sur ta ne paþisi van ita, sane visae kuruta ve lau re, mlamulen viowa taþatete aviewoia.

Naviranarena viu: kana kuþaþaena þar plan make ga mlamulena viowa lala na yomerava

²³ Sanene, sur la naþa li wa la amiyuñae ke ea, monar akila mekik lue ga taveve kana narin þelaga ne lala. Ana yuñia wa kanus nena, amio kana sur ne lala, la ape sur na yomarava ga nini, ana sanapen yo wa naþa na lelaga, naþa nane Ntewa teke ea ma e peni? ?Naga mēna monar kana kuþaþaena na viewoen tai? Ee sanene, naga mēna monar kuruta lau vena kila make kana sur ne la ve sur wa, amio mēna yeririna la naþa apa ke ea. Ana kuþaþaena na yo wa nae ma e peni, naga pe sa re kuþaþaena na sur mal la naþa akila ke e yo wa na yomarava nini poli, naga pe kuþaþaena tai naþa keviu manene la, a po lue ga.

²⁴ A kuruta na kuþaþaena nene sike e marana ne Ntewa rui, komin kieta þarin yaru wa Kristo þar pa loyuñia e yo wa rui, naþa pe yo wa re ga naþa yar la amiyuñae poli, ana yo wa nene yo wa lelaga napo, nane ma e peni.

²⁵ A pogos naþa kila kiena kuþaþaena nena, naga pe sa re naþa þarin yaru taþena wa la akila ke poli. La akuþaþain ga kuruta na sur mal lala, ana naga kuþaþain ke si na kana kuruta. A silaga apa akila e kana yo wa nena yam taaga e kasa punu ga, la akila luen ga sanene pa ke ne, ana naga kila yam taaga nena ga, pe nakilaen re si pogos tai poli.

²⁶ Visae Yesu monar kila luen ga kiena kuþaþaena nene vanon mlamulen viowa la naþa yeririna la asumñia akila lue ga pa ke na, kana kinasa sane siar e nasiiena na yomarava nini pimi tol nanagane, naga tamalele ga mēke e lak torovia mloge piowagan naþa kana kuruta mlau lue silaga.

Ana e naliganaren naþa Ntewa pisir lua naga pe sa re nene poli. Naga pisu naþa

luas nen pog naþa tesike e nanagane pimi ke lavis narui, ana kila Yesu pimi paemen ita mare ga na wa. Naga pimi mālavin ita, kuþaþain make nena kiena malena, mēne plan þelaga na mlamulen viowa.

²⁷ E lepas naþa ita yeririna lala, Ntewa kila sape temal e yomarava nini, ana yoko tokovio ea þisi na temal sina vena teva e naliþereena,

²⁸ a e lepas kiena ne Kristo, naga mēna sa ke ga. Naga pimi mālivi e yomarava nini, siraunia kuþaþain naga ve na waren kieta nakoena na mlamulen viowa lala, ana yoko naga imi mālivi si yam ta ne, pe na ulen re si mlamulen viowa poli, ana ve na wereplan ita vetan nakoena na kieta mlamulen viowa. Sanene, ita toþasine ke ga naga, tesape monar naga imi tamalia ita.

10

Nakuþaþaena kiena ne Yesu naga po la sane

¹ Tesitomyu li si navisaluaena marua kiena ne Mosis. Naga pisa mña sur wo laþasa, ana pe pisawal make re navisaruruen wo naþa Ntewa sinenan sape Kristo kila imi mālavin ita poli, kila sane navisaluaena nene sane pe kulus ga, ana pe kana kinas re napo poli. Navisaluaena marua nena, naga sumñia kila ke ga kana kinakinas la sanene, kana kinas nene sane kiena kuþaþaena la naþa akila silaga, maran taaga ga e kas punu ga, pe atorokin re poli, taþatete akilavan make la naþa akila ke lotena amio.

² Visae peraga, vera na la naþa akila lotena sanene, aim amekiki ruru make wo þisi, ve aloge re si sane mlamulen viowa sike e la, ve asitom re si kilaen kuþaþaena, ana peraga, akila ke sina ga sanene silaga.

³ Kuþaþaena lala, popon naþa kila naþa aninu sane pe kiela mlamulen viowa re si poli, ana peraga rui, e kas make ga apisu sane kuþaþaena la nene akila sane asitomñal si kiela napiowaena lala, ana amloge sane kororak na kiela mlamulen viowa sike e la wa pano-o pimi piowa manene la.

4 La amninu ke sanene komin naþa kiela sitomena ta sike na, naþa asape kuruta na purwolu puluku pona kuruta na nane kilia yumu plan kiela mlamulen viowa sanape ne? Sur nene, asitom þele paþisi, pano-o apisu sane peraga, aþi þele yonia, kiela mlamulena viowa su ma ga.

5 Ana komin sur ne la nanene, pogos naþa Kristo pitomi malivin ita e yomarava nini, naga pisawal kiena mrapa viu narui. Naga mla visena tai naþa teke e tus na Yauen wa lala, pisa pa Ntewa Arimana, sape

“Ko na pe sinoþan re si kuþaþaena lala amio nalaena lala poli, ana okila ruru tasneu naþa yoko netaþan van ko.

6 *Sur la naþa asikap lele ke ne, opisu apiowa ga, a nalaena la nakilaena mlamulen viowa ikiki, pe sinoþan re nena ga.*

7 *Ana siraunia, nesuþalu nepisawal ruru pan ko, nesape*

‘Ntewa in na nekekaran ga nekila ya naþa ko sinoþania,

sur ne nanene in na nepitominia, sa ga naþa Tus Marua sape yoko nekila.’ ”

Yauena 40:6-8

8 Ana popon tevisu ruru visena naþa Kristo pisa ne. Sur þes naþa pisa, pisa ke kuþaþaena lala amio nalaena taþena la naþa asuþa akilakila ke ne, pe sur korena ga naþa navisaluaena sape monar akila, ana Ntewa pe mloge re nena pon la, a pe sinenan re si sape akila poli.

9 Siraunia, sur na lua naþa Kristo pisa, naga sape taþan naga narui, vena imi kila nasinenanena kiena ne Ntewa.

E nene, tepisu mrapa na sumo na kilaen kuþaþaena komin mlamulen viowa lala, Ntewa koven lua nena ga, ana kom ga e kiena mrapa na lua.

10 E mrapa viu ke nanene narui, Yesu Kristo kila sa naþa nasinenanena kiena ne Ntewa pisa, taþan make tasnena wetelu, nane kila narui tepim temekiki a tepe wa e marana ne Ntewa, sike sanene sulue narui.

Kuþaþaena kiena ne Yesu naga sulue na sike ne

11 Yar wa la naþa asuþa amiyuþae ke e þelaga marua, monar la þas naþa e legiena make ga asike e Yo Wa. La asuþa akila ke narin kuþaþaena la silaga, naþa akila lue ga maran taaga silaga. Kuþaþaena la nene akila ke ne komin mlamulen viowa la naþa yeririna la akilakila ke na, ana pe atorokin re nena naþa akilia awar plan þelaga na mlamulen viowa petan malena ken yar la poli.

12 Ana kieta þarin yaru wa naþa Yesu, kiena kuþaþaena na pe sa re nene poli. Naga kuþaþain sur taaga ga panon mlamulen viowa make ga, a kila yam taaga ga, ana pogos naþa naga kila pae, pa teke metava e yepas nena Ntewa na þamarua.

13 Ntewa pisu Yesu kila ma sanene, na pisawal pisape yoko war nasinekar kiena Yesu lala, ligan la asike vatanonia sane takue tai naþa yoko vilavan lana ea.

14 Pe yuþaena taþena re si ta naþa yoko Yesu monar kila sanene poli, komin naga mla nalaen þisi rui, naþa kana kuruta kila ita temekiki, nanagane tepo rui e marana ne Ntewa, tesu ruru tesu ma sanene vano-o taþatete þisi.

15 Ninuna Wa maena miakol visena pan ita e lele nene, e visena ta pimi kome Navisawalena Sereþaea. E visena nena, Ntewa pisa sanini sape

16 *“Ana nanagane, yoko nevisirlua si naviranarena viu tai nemio kiau yeririna lala.*

Ser 31:33

E naviranarena nena, yoko nekila sanini: neligan ruru kiau navisaluaena lala sike e kiela sitomena, nesiriar kiau visena lala sike e losinela.”

17 Ntewa pisa pa sanene ana sukol si pa la sane, pisa sanini sape

“Yoko kiela mlamulena viowa lala amio kiela napiowaena lala, taþatete si nesitoþalia.”

Ser 31:34

18 Visena nene pisawal ke pupia naviewoena naþa Ntewa kila pan ita rui, ana visae ve sa kemua nene, pe nalaen taþena re si ta naþa tekilia telavia komin naviewoen kieta mlamulen viowa lala pona kieta napiowaena lala, komin naþa Ntewa kila ruru þisi rui.

Ve temaraun re va lavisinen Ntewa

19 Wolai a vineu lala, sa nena naña visena la nene apisa narui, kuruta kana Yesu pike mratavan ita rui, ana pe pon re si temarau poli, popon tokom ea teva loyuma e Yo Wa naña Ntewa sike ea.

20 Sumo na pupia kulmrae nene telan mono kieta mrapa, ana pogos naña tas-nena ne Yesu porovia, kulmrae mena nene purpa lepas lua, pietavan kieta mrapa na vaen loyuma. Nanagane tesike e mrapa wo ne narui, naña pe mrapa viu tai, a pe mrapa na vanonen malena.

21 Ana Yesu kila kieta mrapa navaen loyuma e Yo Wa sanene, naga pimi pe kieta pupia yar wa, naña naga pisuar make ita ga la naña na mratava puna ne Ntewa.

22 Kana kuruta war plan kieta kororak napiowaena la naña sike loyuman ita, kiena wii merarava kevan tasneta imi mekiki nena ga, ana ve temawa re sina, a tekilia teva loyuma. Tekilia teva lavisin Ntewa naña sineta la ve lelaga, teviawa manene marera e naga tesape yoko ve koven lua ita re, yoko naga worworun ita ga.

23 Tekilia telelaga ruru tevisave yoko Ntewa kila wo ve sanene van ita, komin naña silaga, naga sumia kila nena taveve ya naña naga pisaaria. Ve tesitom pele re sina, ana touarar ruru yumaena wo navisawalen va yar tapena lala sur tanea naña naga kila pan ita.

24 Ana e ke sina ga e lepas na pun ita, popon tesitom ruruia, telual mrapa na yuren kieta sitomena lala vena sineta si manene ita la sane, a vena tekilakila ruru yumaena wo la van ita va laa sane.

25 Pe pon re teligan pelaga na viranar ruru itaen poli, sa naña yar lapas akila ke rui, ana popon teiilaar ita silaga. Pelaga wo la nene, monar tekila lue ga van ita, a visae tevisu pogos marera na legiena maro la asike lavisin narui, popon towo lue ga van ita sanene va ma ga.

Ve tesitom korenan re nalipereena kiena ne Ntewa

26 Popon teviun naviunena e lepas na pan ita naña tetol nakiliaen la e visena lelaga rui. Teviunia tesape visae ve

tevisuar ruru ita re, sane tesumalun naña tekila ruru ke mlamulena viowa, yoko ve sanapen ita narui? Navisatameena nena, sanini, mlamulen viowa la ne sanene, pe kana kupapaena re si tai naña yoko war plan poli.

27 Ya ga naña sike pa rui, nane navisaarena kiena ne Ntewa nalaen nakoena marera vanonia, amio pupia lelen kapi naña yoko kekan make nena kiena nasinekar lala. Nanene naga pe sur tai naña monar temaraun vapisi.

28 E navisaluaena marua kiena ne Mosis nanua sumo, visae yar tai kilaro kana visena ne tai, a visae yar ve lua pona ve telu avisave lelaga kemua, pe mrapa na sineyena re si poli, yar nene yoko akilalua kiena malena veraga.

29 Visae akila ve sanene va yar naña kilaro navisaluaena kiena ne Mosis, ana yoko ve sanapen yar naña pilon ke si masina pa Narina ne Ntewa? Yoko naga kiena nakoena ve keviu manene laa na wa, komin naña naga parnena kare kuruta naña naviranarena viu naña kila naga mekik rui e marana ne Ntewa. Yoko Ninuna na lemamienna loge viowagan pelaga nene vapisi, sinen kar li yar naña kila na wa.

30 Yoko monar war nakoena nena, komin Ntewa pisaar sanene pa rui. Kiena Visena Wa tai sike e Tus na Visaluaena, naña pisa sanini, sape
“Nalipereen mlamulen viowa, naga kiau in ga taaga.

Yoko nelamaran si van la marera na marera vanon kiela naviowaena lala.” Nav 32:35 A e ke e lele nene na wa, visena tapena pisa ke mena ga sanini, sape

“Yoko Ntewa na mava lipere kiena yeririna lala.” Nav 32:36

31 Monar tevisuar ruruia, komin yar naña kila mlamulen viowa, pogos naña aligan naga e limana ne Ntewa vena visu vevea, nanene na pe narin sur re nene poli, naga pe sur namarauen ke nene narui.

Viawaena marera navisuen sur naña yoko imi maliv na wa

32 Temninue kare narui ama yoko ve sanapen legiena la ne pimi ke ne wa,

ana popon tesitoñal luen ga mrapa wo la naña Ntewa miila ita ea, e legiena la naña ãaro pa rui. Nanua pogos na tepim toñaliv e yomerarava, pe piavi re nena poli, tepane pogos ñarera la pañisi, naña akila piowa manene la pan ita naña temlelaga ke e Yesu.

³³ Pogos la ãasa, e ga e maran yar lala, akoven visena viowa la pan ita, a pogos tañena lañasa, akilapel ita ga e ãelaga viowa la naña piowa na piowa manene la. Pogos lañasa, pe akila re pan ita poli ana akila pa kieta erau tañena lala, ana tepa tesuñal tesu temio la, temiila la.

³⁴ Ita lañasa, akoven la apa e yuña nakoena, ana sineta miye la pañisi, tepanon tekilali naña teiila la vena towar plan re kiela pupia naloge viowaen naña apisu e yo nene. A pog tañena si lañasa, la naña sinela kar ita apimin kieta sur lala, añar plan kare petan ita naña tekilalu manene la sur lala. Ana e pogos nene, pe sineta kar la re poli, tetamñan ga, komin naña nasinekekaren tai sike e ita, sane sur la naña añar plan pavano lala ape na yomarava ga nini, ana kieta sur nowo la naña apowo manenea asike ga wa, naña tañatete akovio pog tai, yoko ave kieta lue narui.

³⁵ Nane kieta pupia naulua itaena nane nanene narui, naña yoko Ntewa la van ita, ana komin naña nalaena tanea nene sike e marata, pe pon re si tekilapal nakiliaaren ñarera naña sike e ita poli,

³⁶ ana monar tesuñal ruru nena ñarera tese Ntewa. Kieta sitomena la monar ve piavi ruruia vena tesuña tekila ga kiena nasinenanena ne lala, ana tekilia tetol sur la naña naga pisaar pan ita.

³⁷ A pog na tolona, pona ve ve piavi re yo, yoko imi ñalivin ita, sa naña visena kiena ne Ntewa tai naña navisawalena Añakuk pisawalia, sape

“Yam ve plas la sina, ve ve piavi manene re, ana yerkawa naña yoko imi ne, naga tañatete si su laa sane, yoko imi ñalivi nenaga.

³⁸ E pogos nene, kiau yar mesmes lala, yoko amal ruru nenaga, komin naña

amlelaga e inu, ana visae nevisu lala yar tai yepen mavin inu, weresu si naga, yoko tañatete nena nekekarania-a ãisa.” Aña 2:3-4

³⁹ Ana pe ita re nene poli. In na pe nesitom re nesape ita yar sur la ne sanene yoko temaraun Ntewa poli. La naña añeresula sanene, yoko monar ava akovio ga narui, ana ita naviawaen ñarera ea, monar tetol malena.

11

?Naviawaena naga ya ne?

¹ Kieta viawaena nena, yoko tevisave naga sur ya na sanene? Tekilia tevisave naga pe ãelaga na wasine ruruen Ntewa ñarera, naña kilia kila kieta sitomena kapuru ruru wo e ga e naga, a kilia kila kieta lelagaena ñarera, tesape sur la naña pe tepisu re poli, ana pe lelaga naña asuña ga.

² Viawaena naga pe pupia sur tai pañisi e navisuenena kiena ne Ntewa. Siar e repita nasumo lala pimi, mrapa taaga nena nanene naña Ntewa kila sane kilia kekaran yaru.

³ Pelaga naviawaena ne nanene narui kila ita tepisu kilale sane pe lelaga kemua, visena kiena ne Ntewa ga sii make suria, kila kieta yomarava nini pimi ñalivi. Kiena ñareraena ne nane mla sur la naña yar tañatete visuia, miyuñaen make sur la naña tepisu sike ea.

⁴ Popon tesitomyu si repita na sumo lañasa, sanape naña la ñena apiawa e Ntewa ñakonua.

Ta naña naga yermarua Epol. E kiena naviawaena e Ntewa, naga mlotun e nalaena ta naña mesmes pañisi, ana Ntewa kekaranja, naga pisu po manenea taulu nalaena naña wenla naña Ken sinenan sape lavia. Ana Ken sinen mimi, ñemñar wenla nena, ana ãelaga wo naviawaena kiena ne Epol e Ntewa kila Ntewa pisu sane naga pe yar mesmes tai, a suri nene kilia iila ita ke vim tol nagane na wa.

⁵ Tañena sina, nane yermarua Inok. E kiena naviawaena e Ntewa, naga pe tol re marena poli. Naga pe yermarua,

ana Ntewa ga pitomi p̄erelua naga, kovio e yomarava nini pa metava, ana akale pano-o pe aṃal re poli. Ntewa kila sanene pania komin pogos naṓa sike e yomarava nini, naga pe yar tanea tai naṓa Ntewa kekaran paṓisi.

⁶ Lelaga paṓisi, visae naviawaen e Ntewa ve su re e ita, taṓatete tekila naṓa yoko Ntewa kekaran ita. Yar a naṓa sinenan sape kilia Ntewa e kiena malena, sinenan sape imi lavisinia, naga monar viawa manene sanini. Naga monar lelaga sane pe lelaga kemua paṓisi, Ntewa suṃa ga, a monar wasinea sane yoko Ntewa kila wo vaṓisi va la naṓa akale ke naga.

⁷ Yermarua si tai naga Noa. E kiena naviawaena e Ntewa, naga kila ya naṓa pisa pania. Ntewa pisawal pupia womie nene pania, ana pogos naṓa Noa pe pisu re nena kana kile ta poli wa, ana kila ga ya naṓa Ntewa pisa pania, kila kiela pupia waa nena vena namratava puna lala akilia amal ea.

Naviawaena kiena ne Noa nene e Ntewa tamalia la nene, kila ṃena pupia nakoena pimi ṃalivin make yar taṓena lala e yomarava, komin naṓa pe amlelaga re poli. Ana Noa naga pe na p̄egas kiena ne nalelagaena lala tai e Ntewa, ana Ntewa kila amesmes e marana.

⁸ Taṓena si tai, naga yermarua Epraam. E kiena viawaena e Ntewa, naga mlogear ruru paṓisi, molue petan yo naṓa sike ea, pa e yo taṓena tai, naṓa Ntewa pisaar sape taṃan vania. Naga mialin ke sape va ea, mninue kare sape aṃa kope ke na wa, ana komin naṓa Ntewa pio, naga pa ga narui.

⁹ Naga mial ṃa pano-o, pogos naṓa pa ṃalivi ea, sa ga wolawa ga tai, ana purvanua ke naṓa Ntewa pisaar pan narui. Ana p̄ere yuṃa tapolen ṃene yo nena, sike e nene amio na mratava puna lala, sa naṓa narina lala, naṓa Aisak lala amio mapina lala naṓa Sekop lala, naṓa la ṃena akus porotano nene naṓa Ntewa taṃan pan la ve kiela lue.

¹⁰ Ana Epraam tol yo nene, sike ea, ana pe kila re pupia ṃana yuṃa ta poli, ṃeke ga e yuṃa tapolen la naṓane. Naga

nene komin naga kiliar ruru po paṓisi sape pe ṃana uṃa re napo nene poli wa, ana naga sukoko ga e nene na wa, vena yoko va e pupia pulkumali kiena ne Ntewa, naṓa Ntewa pisirlua a miyuṃaen amio kana p̄eren ṃarera naṓa taṓatete si wororowa pogos tai.

¹¹ Ta sina, naga sira marua Sera. E kiena naviawaena e Ntewa, naga ṃeṓenan p̄esan narina naṓa Aisak. Nakonua nena, pe p̄arli re sisi poli wa pano-o pimi pe sira marua, ana suṃal ṃarera sike e naṓa sape yoko navisaarena kiena ne Ntewa ve lelaga vania amio wona yermarua Epraam, sape yoko lalua awar narila.

¹² Yermarua Epraam ṃena ga sa naṓa mrae pito tano rui, ana narina naṓa p̄aria kila namratava puna la apim ape mok paṓisi. Ana siraunia aṓarliluen la apitom sanene, pano-o kiena lus lala apim ape mok sane verue la metava ma e sinapane, taṓatete si aulola, asaga mras nen none la garo losi narui.

¹³ Ana yermarua make la naṓa amlelaga e Ntewa sanene, Ntewa pisaar kiela sur wo lala pan la, ana aṓar ga kana narin kinakinas komṓasa, ana amar tan yomarava nini. Ana akilia asape Ntewa p̄ar ligan ga laṓasa sike ga wa, yoko warpo nakeviu sirau, ana kila apisu kilale asape ape wolawa ga e yo nena.

¹⁴ Yomarava nini naga pe kiela yo re nena poli, ana kiela sitomena sike e ṃala uṃa taṓena naṓa napo.

¹⁵ Ana visae yo naṓa asitom manenea naga purvanua ke naṓa amligan apim, visae la sinelania, akilia avilopu la awasuṓe si ava e wo ga.

¹⁶ Ana peraga, pe kiela sitomena p̄asuṓe re si pa e nanene poli, la asitom ke asape atol yo taṓena naṓa po manene la sane, sinelan ga uṃa nae ma e peni. Ntewa kila ruru make kiela pulkumali wo nene rui, ana naga sinenan paṓisi sape popon loge avisave naga pe kiela Ntewa kemua lelaga, a naṓa avisave ṃana uṃa, naga ve ṃala uṃa lue narui.

¹⁷ Ana e lepas kiena ne yermarua ke la nene na wa, tevisayu si yermarua

Epraam, naña e kiena nakilaliena m̄arera naña naga pisuia. E kiena naviawaena e Ntewa, naga tañan nena narina taaga naña Aisak pania, tañan sape kuṗaṗain ke sina ga vania. Aisak ke naña nanua ne Ntewa pisaar m̄arera pa arimana, sape

18 *“E narum̄a nene, yoko kiom̄a*

lus la aim ave moki.”

Jen 21:12

19 Ana pogos naña Aisak lavis mare, Epraam pe kiena sitomena re poli e navisaarena kiena ne Ntewa nene, ana naga mlelaga ke naña sape visae monar weñar narina nene mare, Ntewa kilia tamalia si wo ga ne. Ana Ntewa pisa naña kiena naviawaena pe lelaga sanene, ana Aisak pe mare re si poli, ana ariman pisa ga naña Ntewa mla maran si malena kiena ne narina nene pania mligan e limana.

20 Ana yermarua tañena si tai, naga narina ne Epraam naña Aisak. E kiena naviawaena e Ntewa, mla kiena visena maro pan narina lua nene Sekop amio Esau, mlelaga m̄arera sane yoko sirau navisa ruruena imi van lalua sa ga naña pisaar pan la.

21 Ana Sekop m̄ena nene sanini, e kiena naviawaena e Ntewa, ṗasine ga naga sane yoko kila wo van kiena lus lelein la naña avim sirau. Naga ṗar narina naña Yosop, ana Yosop ṗar narina la lua. Ana pogos tai, lavis repila marua naña Yosop kovio, sum̄alun kiena plasgai telan ṗarina pito tano vena lotun Ntewa, ṗisi na pisawal navisaarena navisa ruruena pan mapina la punu ga.

22 Arimala marua nene Yosop, naga m̄ena popon sa tesitom̄alia. E kiena naviawaena e Ntewa, naga mlelaga m̄arera sape Ntewa ve ligan re yeririna nae Israel la asulue Isip, ana yoko wereplan la awasuṗe si e kiela purvanua wawa. Naga pisawal sanene, ana pogos naña kiena malena lavis ṗisi, pisa m̄ena sape visae naga mare, ve asin re mon Isip, monar akus vano-o asin m̄ene kiela yo.

23 Tañena sina naga yermarua Mosis, kiena yermarua lua. E kiela naviawaena e Ntewa, pe amaraun re navisaluaena m̄arera kiena ne Parin Suṗe Pero poli,

pogos naña narila nane Mosis paeme, apinaia naga paṗisi, pe atam̄an re am̄em̄ar poli, ana akuswan naga mon mom̄a ga, pano-o tol kupario telu.

24 Ana Mosis nene, naga m̄ena, pogos naña kapuru pa keviu pae na, naga m̄ena pe yar na lelagaena. E kiena naviawaena e Ntewa, pe sitom manene re e kia wo naña amla pania, sa naña Parin Suṗe Pero narina naña sira, narina,

25 ana naga sitom manene la kiena lus tañena lala, yeririna na mratava kiena ne Ntewa. Naga mligan um̄a m̄ana yar keviu, amio ṗelaga la na yomarava nini, naña sane kana kekarena pe na ṗane ga ne, ṗisi na pa miakol amio kiena yeririna lala e malena na pog m̄arera la naña le Isip la akila ke pan la.

26 E pogos nene, naga sum̄a sitom veve ke ga navisaruruena la naña kilia imi m̄alivin naga e pogos la naña pimi sirau. Naga mnunun sape visae kus ke naloge viowaena amio la vanon yum̄aena kiena ne Navisaarena, naga po manene la taulu naña naga kus ke sur wo lala na malena memee ga e um̄a m̄ana ne yar keviu nae Isip.

27 E kiena naviawaena e Ntewa, pe maraun re sur ya naña Parin Suṗe Pero kilia kila vania, ana naga mligan ga Isip sa naña Ntewa pisa pania. Naga pe pisa re marana ne Ntewa poli, ana ṗar yon ga naña logearia sa ga naña pisa nena e kilamarana.

28 Naga ke sina ga, e kiena naviawaena e Ntewa, naga ṗuarar ruru mrapa nataliaena naña Ntewa pisa pania, a naga kila kiena yeririna lala aplan ke kuruta na sipsip e m̄ala pulutava lala, ana pogos naña Ntewa mligan kiena navisi na marena pitomi vena la nakoena va Pero, war ro ga kom metavan m̄ala um̄a lala, pa m̄em̄ar m̄earu na um̄a punu ga nae Isip.

29 Ana siraun nanene, yeririna nae Israel la nene aṗure matan Pero, amial apa atol Sive naña Pivaga. E kiela naviawaena e Ntewa, akusro pupia sive nene apa lepas ṗasia, amial ke apano-o sa ga amial ke ga e porotano. Ana la nae Isip asirau apimin la, ana la m̄ena amial asape akusro sa ke

ga, ana pupia sive nene pimi pranwo la sina, kila talilun make la ga amarmare.

³⁰ Ana pogos naŭa yeririna nae Israel lala amial apa la sane apa atol pupia kumali naŭa Seriko, amio kiena li na mara la naŭa asike loyuma e kana pupia kove naŭa amiyumaen e kilavaru telivi piora. E kiela naviawaena e Ntewa, la nae Israel amial atalivi e kumali nene pano tol legiena orai, pano-o tol legiena na olua, apisu naŭa Ntewa kila kove la nene amloloru veraga.

³¹ Ana loyuma e kumali nene, sira tai suma ga, naŭa nanua sumo pe sira na mrapa, kiena kia Reap. Sumon, yar la lua navisu veveen yo kiena ne le Israel lala, la apa atapolou loyuma Seriko, ana pogos naŭa asike ea, sira nene perewan la e mana yuma, miila la keviu paŭisi. Yaru taŭena la nae kiena yo, pe sinelan re avatanon Ntewa poli, ana e pogos na mara, amarmare, ana e kiena naviawaena e Ntewa, Reap pe mare re poli, atamalia kiena malena.

³² Nane repita marua la pasia naŭa ape purpes nen yar naviawaena nakonua. Ana tekilia teva laa sane, vanon kia moki sike ga wa, sane yermarua la nene Kition, Parak, Samsen, Septa, amio Parin Suŭe Tepet, amio mena Samiuel amio navisawalena taŭena lala, ana nepisu sane torok ga wa, pe aora torokin re poli naŭa nekilia nesiri plan kiela suniena la veve taaga e la punu ga.

³³ Pe lelaga kemua, visae teloge ga sunena la nene na, apo na apo. E kiela naviawaena e Ntewa, kieta yermarua lala akila pupia sur la moki. Yoko tevisu naŭa akila mara ataulu purvanua marera taŭena lala, ana akila naŭa yeririna na yo viowa lala monar ayuma ataveve navisaluaena na po, ana amareran na tolen ya naŭa akilia asape Ntewa pisaar pan la. Yeririna taŭena lala akuwanla apito e pilipili na laion vena akan la, ana pe akan la re poli.

³⁴ Akuan la e pupia kapi, ana taŭatete nena kekan la. Pogos laŭasia apane playu na mara, ana aŭure matan poga ga, a pogos laŭasia li na mara la akila kare la na pano-o pe puriula marera re si poli,

lavis ga ŭisi. Ana siraunia, apisu ga naŭa apa sina metava, amarerera manene paŭisi, akila mara amio kiela li na mara na purvanua taŭena la nene, pano-o ataulu la, amene plan la aŭasuŭe sina.

³⁵ Lala pas amarmare e pog marera la nene, ana ola la atagin la, ana amilan ga Ntewa mla si ninula pan la sina, pisir plan la amal sina.

La sina pasia, nasinekar la akila yepe lalae moki pan la, a akilali la visae la avisave la pe amlelaga re si e Ntewa poli, yoko aligan la awasuŭe la sina. A visae avisave asma amlelaga ke ga e Yesu wa, yoko akila marera la sane van la na wa.

Ana e pogos nene, yeririna lala kiena ne Ntewa asape visae akila marera la ve sanene van la, poga ga, ana taŭatete aligan kiela Suŭe. Asitoŭal ga asape e pogos naŭa visae naga visirplan la sina, la sinelan sumaen se marana naŭa akekara, a ve amawan re sina.

³⁶ Lala pasia apiar la, aŭure la apa ame la e yometava e maran yar la naŭa apisa kare la ke paŭisi. La pasia, pogos naŭa apiar la, nane e sen urmi lala, akuan la pararia e yuma na koaena.

³⁷ Lala pas sina ga, akove moŭar la, la pas apiliro la kompas lua e sowa, pasia atemar la e playu na mara lala. La naŭa visae ve amare re, la mena ga sur marera van la pa ŭisi. Pe kiela sur re poli, limala plas paŭisi, ŭisi na asi plan ga kulus nen nane pona sipsip vena ayenia nakilaen yepela visusun. Sur la punu ga piowa lue ga pan la, a yar taŭena lala pe apisuar la re nena ga, akila kare la keviu ŭisa.

³⁸ Pe mala uma re poli, a pe kiela yo re naŭa ava e poli, ŭisi na asma amialialoro kar ga e yo mema a metava e tavie lala, asu kar ga e pulŭe lala.

Nane yar na viawaena lala na sa nene. Yomarava nini na piowa manene la pan la, sa naŭa tekilia tevisa tesape yomarava nini pe torokin re si yeririna wo la na sanene ase poli, yar la na sanene popon asma ga mala uma metava ma e peni.

³⁹ Tepisu sane la punu ga naŭa tepisayu la pa rui, apane pog marera la mok paŭisi, ana pe amlor re poli, asma marera ga, kila temnunu kilale kiela naviawaena e

Ntewa keviu, a pe lelaga. Ana la ape na pog nane naviranarena marua nanua sumo, ana asumã amloge navisaarena wo lala kiena ne Ntewa, sane yoko naga kila mrapa naña akilia atol malena naña ve uro re, ana pe apisu re mras navisaarena nene molue pula poli.

⁴⁰ Ana Ntewa pisuveve sape popon kila mrapa viu tai van ita. Ana pitetalia Yesu pitom kila pae kiena yumãena, kila sane la nanua sumo ne, amio ita, ita punu ga towar mras na visaarena kiena ne Ntewa nene e mrapa ve taaga ga, a e pogos taaga ga.

12

Kilamarata sumã ga e Yesu, naña naga m̃arera manene pano taulu pogos m̃arera lala

¹ A la punu naña tepisayu la ãaro rui, la na sane ape pupia purp̃es nen viawaena lala, asa ga pupia p̃egas nena naña asumãl asumã apisuveve ita ke ne, asumã apisu ruru ke kieta viawaena, asape yoko tekirir va ve sanape. Sur ya naña suwo ke kieta mrapa, monar teyaslua, a mlamulen viowa la naña sumã piar kare ita ke ne, monar towarplania, ana tom̃areran kiririen e mrapa piavi naña sike e marata, naña sitomiena na liganena ve su re si e ita, kieta sitomen la ve piayavi ga.

² Tekira tevisuar manene Yesu, naña sumãl sike e luas nen mrapa gare. Naga pe purp̃es nen mrapa na viawaena, a pe kana luas m̃ena ga, ana pogos naña tesitonãlia, yoko la m̃areraena van ita. Tekilia tesitomyu si pogos naña naga ãar ke yepe lalaea a naloge viowaena meta e lak torovia, naga sitom korenan ga pogos m̃arera naña naga pana. Naga mligan kiena sitomena m̃arera su ga e pupia kekarena naña sike e marana, kila m̃a pano-o tauluia, ana nanagane teke e lepasnena ne Ntewa na ãamarua, e pupia lelenu wa ma e peni.

³ Popon tesitomyu m̃a Yesu, e pogos naña yeririna viowa la nene akuan make visen viowa la pania, sinela kar manene pañisi, ana naga tam̃an ga naga pano tol

luas. Sanene, ita m̃ena popon ve sineta maren re yumãena vilaga, a tañatete temarau, ve tesitom re urmatanen ya naña monar tekila.

⁴ Pona tesitom ke tesape temloge piowagan kilaen mara temio p̃elaga viowa ana torok yo narui, sineta mare, ana pe tetol re ya naña Yesu kila poli wa, pe tesu wo li re mlamulen viowa poli wa, pano-o kata kuruta mlau e yepeta.

⁵ A popon ve sineta p̃esan re visena na iilaren naña Arimata Ntewa pisa pan ita, sape pio ita sane narina lala, sape

“Naruu, visae nevisu popon sane naloge viowaena tai imi tol ko, ve ositom korenan re,

pona visae yam lañasa nevisu sane monar nela nakoena van ko, kioñã sitomena ve lor re, komin kiau p̃elaga navian koena naga sanene.

⁶ *Visae la naña sineu sii la, yam lañasa monar nekila aloge viowa,*

a la naña nepe Arimala, yam lañasa monar nowela.” **Pakaiwa 3:11-12**

⁷ Sanene, visae pog tai ovisu sane ve sanene van ko, monar om̃arera, otam̃an ga sane mrapa ke tai naña Ntewa sinenan sape vian ko e narui, sinenan sape kila ruru kioñã malena ne. Ita punu naña tepe ata, tesumã tekila ke sanene pa narita lala, ana visae Ntewa pisu ita sane narina lala, naga monar kila m̃ena ve sa ke nene van ita.

⁸ Sur nene naga yoko ita make tetolia, a visae ve kila re van ita tai, naga pisu yaru nena sane pe pe narin ruru re napo poli, naga pe narin yar nae ga koyo tai.

⁹ A nanua sumo, ita make ga, pogos naña arimata la amla ke nakoena pan ita, pe sinetan re poli, ana pe lelaga, nenaga ne tepisu kilale sane amesmes ga, a kila sane tesitom la va la sane. Ve sanene na, popon manene tewatanon Arimata e ninuta, tekekaran ya naña kila pimi m̃alivin ita, vanon naga ke nene narui pe mrapa na malena.

¹⁰ Arimata lala amla ke nakoena pan ita e kas la naña tepe sisi ke ga wa, akila sanene komin asitom asape yoko wo la sane van la ke sina ga, ana pogos naña Ntewa mla nakoena pan ita, kila vena

yoko wo ke sina ga van ita, vena ita mēna ga tekilia tetol kiena malena wa.

¹¹ Nakoarena pe sur tai naḡa e ke e kana pog na kusena, pe kiki re nena ga, melkalka paḡisi. Ana siraunia, visae tetañan naga vian ruru kieta malena, yoko war mras napo lala, sane ḡelaga na moñauena a suñarena, amio ḡelaga na waena a na mesmesuena.

¹² Ve sanene, visae sur ya naḡa avitaweia, amiu akilali sane navisawaliena Aisea pisa sumo, naḡa sape

“Avisir plan limamiu la naḡa tayoi sike ne, akila la akulul sina, a purpur na lamiu la naḡa miyuyuwawa ke ne, akila la añarera sina.” Ais 35:3

¹³ Sanene, amiu mēna ga akila ruru si kiamiu mrapa la amesmes ruru wo, ana kiamiu laulu la naḡa ayaloro atavevea, yoko lala ve viowa manene re la sane, ana yoko imi mārera sina.

Avisuar ruruia ve akila pal re mrapa

¹⁴ Sur lua na waryoen silaga la sanini. Tai, naga ḡelaga na ve erau woena amio yeririna taḡena lala, a ta sina, naga ḡelaga na malena wa naḡa yaru monar se ea visae sinenan sape visu marana ne Ntewa na mava.

¹⁵ Ana monar ayuñae mārera vena ve amiu yar tai naḡa kirir mña pano-o ḡisi ga e mrapa komsusia, naḡa pe tol re lemamiēna kiena ne Ntewa poli wa. Ovisuar ruru mēna ga naḡa ve narin ḡeligas melkalka ve imi tawa re e sinemña. Visae pere, ḡisi na kapuru war mras la ve moki naḡa piowa e kionña malena, a kana kororak ne la ve kila kare re malena wa kiena ne li na lelagaena wa taḡena lala.

¹⁶ Monar ḡelaga viowa na yermēne amio sira ve imi re e amiu, a monar ve ḡelaga nasineḡesan ruruen re Ntewa, sa naḡa Esau kila nanua sumo. Esau nene, Ntewa kilologia naga pe mēaru kiena ne arimana vena kilia war lalimana ve kiena, ana pogos tai naḡa visokaria, mlopon ponos nen pursi wo naḡa wenla na vetokaki Sekop miyumuñena, ana mias lua sitomiēna kiena ne Ntewa e kiena malena, pisa pa wenla, pisape “Ei, ola pursi nene im van inu nagane, a lalimana

ne ata make ga naḡa pe kiau, ana nela vaniko.”

¹⁷ Ana sa naḡa tekilia ḡa rui, sirau-
nia Esau pisa sape yoko war maran
si lalimana ne arimana ve kiena, ana
apisaluḡar ga, vanon naga ḡiliwilin plan
rui. Ana mloge piowagania, tagi pano-o
kila ḡele ga rui. Naga sitom ke sina ga,
sape sa ve kila re ga, ana nagane kilalu
rui.

Tavie naḡa Sinae na yomarava, amio tavie naḡa Saeon nae peni

¹⁸ Ana popon tesitomli si ve tokak ga e
lepas nen navisaluaena na sumo wa, amio
lollogena wo kiena ne Yesu Kristo naḡa
pimi ga na wa. Sur lalua nene pe taḡena
paḡisi, ana sur nene tekilia tevisu kilale e
kala tavie la lua.

Tavie na navisaluaena marua, nane
Tavie Sinae, naḡa na yomarava ga nini.
Kieta li marua le Yu lala akilia apisu e
kilamarala, ana apisu sane pe pupia yo
wa na marauena, naḡa kap mēke ea a
kana pulḡalu ne lala yo malolo ga rui,
amio kan yaku nena naḡa yemalolo kalo
make ga, a lagi tai miyui lue ga ea.

¹⁹ Ana pupia kana kumasua nena miye-
lyelu mñalia, ana amloge pulgo tai pis naḡa
urmi paḡisi, kila sane amarau pano-o,
atag asape ve visa re si sur tai van la.

²⁰ Apisu sane yo nene pe wa paḡisi,
akranwo ruru nena, sane visae sur mal
ya naḡa waro lavisin tavie nene, kus pal
laea, yoko monar akovenñaria.

²¹ Ana yermarua Mosis pisu sur la
nene, naga mēna marau, pisape “Lelaga
naḡane, nemiyuwawan ga marena.”

²² Naga nene tavie wa na navisaluaena
marua na sumo, ana nanagane na pe
tapa re si e poli, tepim e tavie wa viu na
lollogena wo nene na Tavie Saion. Naga
sike ma e peni, naḡa pulkumali kiena ne
Ntewa mali mēke ea, naga pe Yerusalem
viu ne nae yo mava. Naga pulen ga navisi
lala, mok na mok naḡa sane apulopule
ga, naḡa asuvileviles kar ga vena kilaen
yauena na kekarena.

²³ Ana likan la, ita ḡegas na li na
lelagaena wa la tesike lele taaga ea, naḡa
ita tepe sane mēaru lala kiena ne Ntewa

naþa teþar lalimana. A amio ita mēna, ninuna ne kieta yar mare lala asike ea, nane la naþa amesmes ruru pa rui e yomarava, ana pogos naþa amare, aþure plan la apa atol luasnen mrapa natamaliaena, naþa apa asu ruru e yo nene. A yaru nalipereena mēna tai totano teke metava e yo nene, naga pe Ntewa na sur make ga.

²⁴ A amio sur wo taþena la naþa asike e kieta kunus wa nalologena wo nene, tekilia tevisu Yesu, amio kana kuruta naþa mlau, naþa apeven pa e losineta lala vena kila temekiki. Kana kuruta nena, pe sa re kuruta kana ne yermarua Epol nanua poli, naþa asape kuruta na ween yaru, a kuruta na kilamaranen napiowaena, ana kana ne Yesu naga pe kuruta na tamaliaena yaru, a pe kuruta na viewoena. Yesu kila po paþisi wa, naþa suñal su likan Ntewa amio yaru, kila kiela naviranarena viu lalua suñalu ruruia, vena kila lalua ave erau wo sina.

Ayagogon ruru pulgona ne Ntewa

²⁵ Navisaluaena marua, naga sane visena na kilaþegeena ta naþa paeme e yomarava nini, a lologena wo, naga sane visena na kilaþegeena ta naþa pitom ma e peni. Ana la naþa apilon māsila pan navisaluaena marua nene, taþatete nena aurmatan nakoena þisa, ana visae ve sanene, yoko ve sanapen la naþa apilon māsila pan lologena wo? Yoko taþatete nena aur matan ve tokaki. Visae ve sanene, popon teyagogon ruru pulgona ne Ntewa, telogearia.

²⁶ E pogos naþa Ntewa pis pa yermarua nasumo la nene, kiena visena urmi paþisi kila yemninu, ana siraunia, kiena visaaren tai pisa si mon metavanja, sape

“Yoko yam si tai nokululun make yo punu ga, ve yomarava re ga nini, a amio make yo la ne ma metava yam veraga.”

Akai 2:6

²⁷ Visena naþa pisa e nini, naþa sape “Yam si tai,” naga pisa ke sur keviu ta ne. Naga kana kinasa sape Ntewa kululun yo yam tai rui, ana kiena sitomena mārera sike ga wa sape kululun li si yam tai ana visu ruru li make ga suria. E legiena

maro yoko kululun wowa yomarava nini, amio sur make naþa naga sii la sike ea, ana yoko sur naþa taþatete kululun rovia yoko suñal mārera sulue na sike ne.

²⁸ Sur ga tai naga kilia su lue na sike ne sanini, nane nasuþenena kiena ne kieta Ntewa nena, a potena paþisi naþa mligan kieta malena su ruru sike loyuma ea. Popon silaga tekila lotena wo tai vania naþa kilia kekarania, tepisu kilale naþa naga pe na wa paþisi, tewatanonia.

²⁹ Komin kieta Ntewa naga kapi ke nene narui, naþa kilia sikap van make sur punu ga.

13

Pelaga la naþa Ntewa kekarania

¹ Visen si laþas nini vena iila amiuena, naga sanini. Popon asumā akekarani amiu lue ga, sa naþa kam na ape mratava taaga ga amio Kristo.

² Ana ve akekarani amiu re ga, akekarani ke mēna wolawa lala, akekarani naþa avisuar la e māmīu umā lala. Popon akilakila sanene, komin pog laþasa, kam na amninue ga, ana wolawa la naþa apisuar la ke ne, la na navisi kiena ne Ntewa ke la narui.

³ Asitomā la naþa asike e yuma nakoena, awar pae kiela naloge viowaena lala, sa ga naþa akoven amiu mēna apa asike amio la. Kam na ve sinemiu þesan re mēna la naþa yar taþena la asumā akilakila kare la ke silaga, komin ita punu ga tesike e yomarava nini, a monar tokus pae pogos mārera la naþa yoko tevisuia.

⁴ Popon yar make ga avisu kilale þelaga na talopaena naga pe sur wo a pe sur wa mēna ga, a komin sur ne nanene, pe pon re si kororak tai imi kila kare tog naþa aþaenia pe mālala lalua naþa atalopa, komin lalua apisaaria asape yoko ve aure re si taþena. Yoko Ntewa la na lipereena va la naþa amiyalyal kar ga, sane li na talopaena naþa akila kolau, pona yar viu la naþa akila lau.

⁵ Ovisuar ruruia naþa ve oligani re kilavaru imi ve suri na sumo e kioma malena. Popon okila ko okekarani ga

narin ya naŕa teke e lumoña rui, komin navisaarena kiena ne Ntewa naŕa sike pa rui, pisa sanini, sape

“Taŕatete neligan ko yam tai, taŕatete nevilon m̄asuu van ko.” Lev 31:6

⁶ Ana pogos naŕa tesitomyu si naga nene, mla si nam̄areraena pan ita, vena tevisawal visena naŕa sike e Tus na Yauena lala, pimi pe kieta visena, naŕa tevisave

“Yar na iila ruru inena, naga Ntewa na mava ga,

ana ve nemarau re si narui, yoko yar taŕena kilia kila si ya ne viowa van inu ne?” Yauena 118:6

⁷ Sur taŕena, popon asitom̄alar m̄a kiamiu nasumonena lala, naŕa apisawal ŕesan visena kiena ne Ntewa pan amiu. Avisu veve ruru mras naŕa molue kome ŕelaga wo na kiela malena, a akila ga nono na kiela lelagaena m̄arera e kiamiu malena lala.

⁸ La amlelaga ruru po, ana ita m̄ena tekilia telelaga, komin Suŕe Yesu Kristo naga piloulou re pogos tai poli, naga maran taaga sa ke nakoneva, ŕane, a peni, sulue na sike ne.

⁹ Popon tevisa m̄ena tevisave avisuar ruru amiun visena kar taŕena lala amio navian wowenen lala ve aim aure plan amiu re vetan kove wo naŕa kam na asike pae rui. Yar laŕasa asitom manene la e ŕaŕagena wa lala, amio kala kinanena ne lala, ana kinanena la nene taŕatete nena iila kiela malena lala. Sur taaga ga naŕa kilia kila sineta la m̄arera ruruia, nane lemamiena kiena ne Ntewa pimi pan ita.

¹⁰ Kinanen la ne tai ne sanene, naga nane kilam̄iu na kuŕaŕaena lala naŕa yaru wa la akuan ke e wonta. Amlenwoia, akila pa yum̄aena la e narui, ana siraunia akania sa naŕa akinan kala ke narui. Yar wa la nene la amal ga e kinanena na wonta la nene, ana ita naŕa temlelaga e Yesu, ita na pe tekinan re e wonta nene poli, ita na kata wonta taŕena m̄eke na, naŕa temal e kana kuŕaŕaena nena naŕa akuan su ea, naŕa yar wa la pe apisu kilale re poli, a la taŕatete akinana ea.

¹¹ La asum̄a akila ke kiela kuŕaŕaena la nene, ana tai na pe taŕena towe laa

sane, sa naŕa asape kila totou na marena kiena ne Yesu, kuŕaŕaena nena naga naŕa asape na lakorenanena na viewoen mlamulen viowa, ana pogos naŕa ŕarin yar wa kila naga, naga pe kus make re tas nen sur mal pa loyuma naŕa pe yo wa manene poli, ana ŕar ga kana kuruta, pa mligan se wonta. Ana tas nen sur mal nena, akuslua si petan um̄a, akus pa vanua, ana askapia.

¹² Naga sa nenaga naŕa Yesu kila, naŕa akus m̄ena naga pa vanua e purkove na pulkumali, akila mloge m̄a piowa pano-o kana kuruta mlau make nenaga, naŕa pe mlau koren re poli, ana mlaun naŕa kila ita kiena yeririna lala tepim tepe yar wa ruru nena napo lala e marana ne Ntewa.

¹³ Ana komin naŕa Yesu kekaran sape kila ve sa nene vanon ita, ita m̄ena ga monar tekekaran teva tesum̄al tesu temio naga vanua e um̄a, yar la avisu kare ita sa naŕa apisu kare naga, tokus naloge viowaena ve sa ke ga naŕa naga kusa.

¹⁴ Visae viowa ga van ita e yomarava nini sanene, sanene na pogaga ne, komin naŕa pe tesitom re tesape yoko tesike e pulkumali tai e nini ana tesulue poli, ana temligan kieta sitomena sike ga e m̄ata um̄a napo e pulkumali viu naŕa tepanon ke rui.

¹⁵ Popon kemua tesitom̄al lue ga naŕa Yesu kila po manene la pan ita, naga pietavan ita e mrapa rui ana silaga tekilia tevisa potena va Ntewa vanonia. Ve tekila re kuŕaŕaena e sur mal la vania, ana nalaena tai tom̄a ga naŕa tekilia tela luen ga van silaga, naŕa yoko kekaran vaŕisi, naga nalaena na yeluarena. Tesum̄a tepisirlua ke kiena kia sanene, ana visena na gota ne lala sa ga mralak tai naŕa kiki ruru nena po pania.

¹⁶ Visae sanene, ve sineta ŕesan re naŕa tekila yum̄aena wo lala, komin naga sane kuŕaŕaena naŕa tekilia tela va Ntewa. Tai naŕa naga kekaran manene la sane, naga sanini, sape tekila luen ga wo va yar taŕaena lala, tekekaran ga naŕa teviovion kieta sur la temio la.

¹⁷ Sur si laŕasa, sane monar telogear kieta nasumonena lala, monar tekekaran ga naŕa tesu vatanon kiela visena lala.

La aþion ke paþisi naþa avisuar ruru ita, komin naþa pupia yerkawa kerkeviu la naþa asu metavan la asumã apisu veve ke kiela yumãena a kiela þelaga mñena lala. Visae kieta nasumonena lala, kiela sitomena la marmare, ana yoko yumãen make ga va viowa nenaga, ana visae telogear ruru la wo, yoko kila yumãena ve urmi manene re van la, akekarania, ana yoko wo manene mñena van ita, yar na yumãena lala.

¹⁸ Pogaga, lavis ke visena make la þisþis narui, ana sinemimin mesape meviun mñena tan amiu mesape asitomãl imimi e kiamiu leniena lala, vanon yomãrera naþa mesike e nanagane. Pe mepisu re sur tai piowa teke e imimi poli, kiamimi sitomena la merarava ruru ga, a mesumã mesumãlu mãrera lue ga mesike e þelaga wo la naþa mesmesu e maran yar lala.

¹⁹ Ana sineun nesape visena la nene akila ruru vilaga, vena nekilia neviaþa e nini ve ve piavi re nowasuþe si neiãas pun amiu.

²⁰ In na nesumã nemlen wo amiu ke mñena ga, nesape yoko Ntewa iila amiu. Naga pe Ntewa na sumãre, naga pe Ntewa naþa sinena miye ita kiena sipsip lala, ana pitetalia kieta Suþe Yesu pitom e yomarava nini, pitom pe yerkawa na visuaren kieta sipsip lala, kana kuruta mlau vena visirluaen naviranarena viu naþa yoko sike sike nena. Naga pe Ntewa mñena naþa Yesu tamãan kiena malena pania, ana naga þerelua petan marena, pisirlua malia sina,

²¹ ana noþasine naga nesape yoko la sur nowo make ga naþa kam na sinemiun ke nanagane vena kilaen kiena yumãena e yomarava nini sa naþa sinenania. Naga sumã miyumãe ke e kieta malena la pe ve taaga, komin Yesu Kristo sumã miyumãen ke kieta þelaga wo vim ve sa naþa naga sinenania, ana yoko teieluar manene naga vanon vano-o taþatete þisi, Sanene.

²² Na mratava pun inu lala e Kristo, nesiri mñaki nini piãasu pan amiu, pona visae ve ve piavi manene re yo, ana visae avisu ve sanape kam na ve sinemiu karin

re, ana kam na ala kiau visena na iilaen la naþa sike ea.

²³ Sineun nesape nevisawal van amiu aloge kieta wolai naþa Timote, amligan lua si naga molue petan yumã nakoena rui. Visae ve ve piavi re imi kom e nini, yoko imimi lua, meimãas mevisuveve amiu.

²⁴ Sinemimin mesape avisawal va kiamiu nasumonena lala, amio mñena yeririna taþena lala kiena ne Ntewa, avisave mepiun ke mesape la asike sanape, asururuga pona sanape? A le Italia la naþa asike e nini la mñena sinelan asape avisa pokolemalo van amiu.

²⁵ Kiau visena maro nae e nini, nane nesiri van amiu narui, nesape yoko lemamiena wo a sinewo kiena ne Ntewa sike amio amiu make ga.

Maki Naþa SEMES Siriyuia Visayuena Na Tusi Nene

Suniena plas na tusi nini

Maki kiena Semes, naga kiena visena wo lala naþa vena vianen yeririna lala kiena Ntewa naþa asu tetai asike e yo punuga e yomarava nini. Semes naga kila totou la mokliu e kiena visena vena iilaen yaru lala, vena atol sitomena a kiliaena wo lala. E maki nini, naga pisayu suri moki naþa nalelagaena lala monar kiela sitomen tolia a monar akila. Naga sape nalelagaena naþa limana korena, naga monar kekara pogos naþa visae Ntewa visirlua naga va metava, a nalelagaena naþa kiena suri moki, naga monar kekara pogos naþa visae Ntewa ligan naga vito su tano. A pisayu þelaga wo naþa yaru monar kila, a naga sape lelagaena a yuþaena, suri lua nene lalua monar akiriri lele taaga. Pisayu mēna sape yaru naþa kila ke þelaga wo na iilaen yaru taþena, yoko kiena lelagaena mārera.

Semes pisayu suri lala na kilalien yaru lala, a naga sape yaru naþa suri la aimi akilalia, ana naga suþa þuarar ke þelaga mesmesu, naga kilia loge wo. Pisa sape nalelagaena monar ve taþan re gona visa suri viowa, ana monar yeluar ga Ntewa ea. A pisayu manmaruaena naþa Ntewa kiania, amio þelaga taþena leþas naþa po, sane þelaga kiena yaru naþa kila kiena sitomena pito ga tano, pona kila kiena sitomena piyavi. Pisayu mēna þelaga laþas naþa piowa, sane yaru la asuþa apeveyu, apilave paþisi, amila nakoena pa yaru taþena, pona akila kiela sitomena pa metava.

E maki nini Semes pisayu lotena naþa navisatameena sike ea, a suri keviyu si tai, pisawal ruruia naþa lelagaena amio yuþaena wo, suri lua nene monar asike lele taaga e maliena kiena yaru naþa

lelaga, ana nanini naga taveve sitomena kiena Ntewa.

Komþasnen tusi la na nini

Visena þesa 1:1

Pelaga na lelagaena a þelaga na manmarua 1:2-8

La naþa limala korena a yaru na suri moki lala 1:9-11

Suri na kilalien lelagaena kiena yaru 1:12-18

Yaru naga monar loge visena kiena Ntewa a monar kila suri la naþa visena nini pisa 1:19-27

Visena na kila woen yaru pisu suri piowaga e yaru taþena 2:1-13

Lelagaena a yuþaena wo 2:14-26

Li nalelaga monar visuar ruruia e kiena visena 3:1-18

Li nalelagaena a þelaga lala na yomarava 4:1—5:6

Suri taþena la naþa Semes pisa 5:7-20

Visen þesia

¹ Inu Semes inu nepe yaru na yuþaena kiena ne Ntewa, a kiena ne kieta Suþe Yesu Kristo, naþa inu nesiri lumaki nini pimi pan amiu naþa amiu lus nae Israel lala lualima taaga pa lua naþa amiu asutetai asu ke e narin þegas lala e yo punu ga e yomarava nini. Inu nepiun nesape sanapen amiu asu pogaga pona amiu na asike sanape?

Naviawaena amio namanmaruaena

² Puruvi lala a vineu lala, pogos naþa na kilaliena lala imi e amiu, amiu na akilia avisu la sa naþa suri nalogewonena.

³ Nanene na sa naþa amiu akilia, pogos naþa suri nakilaliena naga kilali kiamiu naviawaena lala, ana amiu atauluia, nanene kila kiamiu naviawaena imi mārera manenea vena suþalu sulue.

⁴ A pogos naþa amiu asuþalu mārera sanene, nanene naga kilia kila kiamiu malena mesmesu ruru wo vaþisi marua ruru nenaga a ule ruru e suri wo la punu ga, pe þelaga wo re tai naþa naga pe kiena re poli.

⁵ Ana visae amiu yaru tai naga sitom pisape kiena manmaruaena ve tokaki ga,

naga monar viun tan Ntewa e kiena leniena, ana Ntewa kilia la van naga. Vanon naþa e þelaga kiena ne Ntewa, Ntewa naga taþatete visi viowa va yaru naþa naga viun suri tania, vanon Ntewa naga mlaluen ga nalaena wo silaga e kiena sinewo.

⁶ Ana pogos naþa yaru viun suri sanene e kiena leniena, naga monar lelaga m̄arera, naþa naga ve sitom þele re sina, vanon naþa sitomena kiena ne yaru na sanene naga sane sive naþa lagi miyuia kulkululu, lagi sum̄a supon kare ga pa e yo punu ga.

⁷⁻⁸ Yaru na sanene, kiena sitomena peve lua, a kiena þelaga lala kar ga, ana yaru na sanene taþatete si sitom visave þisi na la suri wo tai e Ntewa.

Yaru la naþa kiela suri re poli, a yaru la naþa kiela suri la moki

⁹ Kieta puruvi laþasia limala korena ga, pe kiela suri re poli, ana la popon awarwar la vaþisi naþa Ntewa pisirlua kiela sitomena pa metava,

¹⁰ a kieta puruvi taþena m̄ena ga lala, naþa la kiela suri moki, ana la m̄ena ga popon awarwar la manene vaþisi, komin naþa Ntewa naga kila kiela sitomena la sike ga tano. Lala akilia akekara sa naþa la apisu kilale asape yaru naþa naga kiena suri moki, naga sa ga naþa meme tai naþa to yam plas ga.

¹¹ Pogos naþa mrae pa metava, naþa yo pisun paþisi, ana mlege meme la nene la apimi ameu, ana akekapili pito tano ana maran meme la nene kokovio. A e þelaga ke nene, e pogos naþa yaru na suri moki lala asum̄a akilapolo ke kiela kilavaru lala wa, ana þisi na la aloru m̄ena ga akokovio.

Nakilaliena lala

¹² Yaru naþa sum̄alu m̄arera e nakilaliena lala naþa aimi e naga, navisa ruruena sike e naga, vanon pogos naþa naga taulu suri la nene þisi, ana Ntewa yowauia ruru naga e nalaena wo tai, naþa naga namalena nene naþa Ntewa naga pisaaria þisi rui pan la naþa la asitom manene naga.

¹³ Visae nakilaliena lala imi e amiu, ana la ataþali amiu, ana amiu na ve avisa re

avisave “O, nataþaliena la nene la amolue e Ntewa.” Amiu taþatete avisa ve sanene, vanon naþa taþatete suri viowa naga kilia taþali Ntewa, a þelaga nakilaliena yaru Ntewa naga pe kiena þelaga re nene poli.

¹⁴ Nataþaliena la nene apimi m̄arera e yaru, e ga e pogos naþa kiena nasinenanena viowa ga naþa kila luþeluþe naga, ana pure naga pano.

¹⁵ Siraunia, ana nasinenanena viowa nene naga pitovi pimi keviu ana naga þar narina, naþa mlamulena viowa, a siraunia, pogos naþa mlamulena viowa nene naga m̄ena ga pitovi pimi keviu, þisi na naga m̄ena ga þar narina, naþa naga marena.

¹⁶ Kiau puruvi wo lala, þisi na amiu avisuar ruru amiu, ve atam̄an re yaru la aimi avisa kotalia amiu, naþa la avisave “Nataþaliena naga pimi e Ntewa.”

¹⁷ Amiu na monar akilia sa naþa suri wo punu ga, a nalaena tanea punu ga, la amolue ma e peni la apitomi e ita. La amolue e Ntewa naþa naga sii suri lala punu ga naþa la apivavaga ke e sinapane, suri vivavaga la nene naþa la akilia avilolou la silaga, ana naga kiena þelaga pe pe taþena re nena pogos tai poli, naþa naga taþatete vilon m̄asina van ita pog tai, vena ligan ita tesum̄a ga e yemalolo.

¹⁸ Nane Ntewa ne nanene naþa sane kiena sitomena ga, naga kila ita tepimi tepe narina, komin naþa ita temlelaga e kiena visena lelaga, vena ita na sa naþa teve mras þesia na yeririna moki lala naþa þisi na lala alelaga mare e Kristo sirau.

Ita monar telogear visena kiena Suþe

¹⁹ Kiau puruvi wo lala, þisi na ve sine-miu þesan re visena nene, naþa apisape yeririna punu ga monar avitaþilin yago-goena, a monar avis male ga. A monar ve avitaþilin re m̄ena ga sinekarena,

²⁰ komin naþa nasinemimiena kiena ne yaru, naga taþatete nenaga kilia kila þelaga namesmesuena kiena ne Suþe imi kate pog tai, peraga.

²¹ Ve sanene, amiu na monar akoven plan þelaga namname lala, a yum̄aena

viowa lala e kiamiu malena la wetelu, a amiu monar aligan kiamiu sitomena sumã vatano e Visena Wa naþa naga kilia tamalia amiu, naþa Ntewa naga mapila e losinemiu lala þisi rui.

²² Amiu monar akila ya naþa Visena Wa nene naga pisa, pe pon re naþa amiu asumã avisa kotalia amiu ga poli, naþa amiu asuã ayagogonia ana amiyagogo korena ga e Visena Wa nene, amiu pe akila re suri la naþa pisa ke poli.

²³ Nanene sa ga naþa yaru tai pisu marana e wii naþa ato e kilika,

²⁴ naþa pogos naþa naga pure petania, pog plas laa ga nene, naga sinena þesan ke sina ga marana pisape mã naga marana sanape wa.

²⁵ Ana yaru naþa naga pisu ruru loyumã e navisaluaena wo nene naþa naga kilia wereplan ita e mlamulena viowa, a naga yagogo ruru ea, naþa naga ve yagogo korena re ga þisi sinena þesania, ana naga logearia a naga yumãenia, yaru ne nanene narui þisi na Ntewa naga visa ruru naga e kiena yumãena punu ga.

²⁶ Visae yaru tai naga sitom ke sape naga pe yaru mesmesu nalelagaena tai, ana naga pe þuarar ruru re purmenena poli, naga sumã pisa kotalia ke sina ga naga, a kiena nalelagaena pe suri korena ga.

²⁷ Ana þelaga na lelagaena naþa mesmesu ruru po, a naþa naga pe lelaga kemua naþa po e marana ne Ntewa, naga sanini: þisi na amiu aialiali ninuyu lala a letano lala, vena aiila la e kiela malena m̃arera lala, a amiu auarar ruru kiamiu malena m̃arera vena þelaga viowa amio kororaki lala na yomarava ve atolkare amiu re.

2

Amiu na ve awaveve re yaru lala

¹ Kiau puruvi lala a vineu lala, sa naþa amiu apiawa e kieta Suþe Yesu Kristo, naþa naga pe Suþe Nawarwarena, þisi na amiu ve awaveve re yaru lala, naþa amiu akila wo van laþasia, a amiu akila viowa van laþasia.

² Sa naþa visae yaru la ve lua, aimi loyumã e kiamiu yumã na leniena, tai naþa kiena suri la moki naþa m̃ana kulsota miyowau ruru po a naga miyen piataliga tai naþa pe kol teke e mrasilmana, a naþa taþena naga pe kiena suri re poli, naga m̃ana kulsota la pororo ga, ana þisi na amiu ve akila re ve taþena van lalua nene.

³ Pe pon re naþa amiu asitom manene yaru naþa naga mien kulsota naþa miyowau ruru po poli, naþa amiu aure naga va e yo naþa po a avisa vania avisave “Paraga lelemã napo nanene, imimi sine-mimi mesape ko ototano e yo nene,” a e yaru taþena nene amiu avisa ga avisave “Þisi na ko osuãalu ga osuã varau e namã, visae peraga oto ga tano e namã.”

⁴ Pogos naþa amiu akila ke þelaga la ne sanene, amiu na asumã apisuvisu yaru laþasia la apo, a yaru laþasia la apiowa ga, nanene na vanon ga suri la naþa la amien ke ne, a kiamiu navisuena na sanene naga pe þarpoyo re nena e sitomena wo nene poli.

⁵ Kiau puruvi lala, amiu aloge inu. Yeririna la naþa na yomarava nini la naþa limala korena ga, Ntewa naga pure plan la nene la ape kiena, vena naga kila sa naþa la kieta suri wo lala e lepas nen kiela nalelagaena lala. A Ntewa kila m̃ena ga ve sanene vena akilia ava ala kiela lalimana lala e nasuþenena kiena, sa naþa naga pisaar þisi rui pan la naþa asitom manene naga.

⁶⁻⁷ Ana amiu na asumã apisuvisu ke yaru la naþa la limala korena la sane ape kororak ga. Ana amiu na asitomyulia: ?A la naþa la asumã am̃ene amiu ke ne naþa la asumã aþure amiu ke apa kumali? ?A li pe m̃ena ga la naþa la asumã apiuelin amiu ke e kia keviu wo nene naþa Ntewa naga mligan e amiu? Nanene na pe yeririna re la naþa limala korena poli, ana nanene na yeririna la naþa kiela suri moki.

⁸ Mrapa mesmesu naþa amiu ataveve e nene naga sa naþa purþes nen navisaluaena kiena ne nasuþenena kiena ne Ntewa pisa naþa naga pisa pisape “Ko na

ositom nalavis puña lala, okila wo van la, ve sa ke ga naña ko na ositom ko mñaga.”

⁹ Ana visae amiu asuña avisuvisu ke yeririna lala awaveve la ke sanene, nanene na amiu asuña amlamula ke piowa nene ne, a navisaluaena kiena ne Ntewa p̄isi na naga liḗpere amiu visae amiu na ape yaru na kilaroen navisaluaena.

¹⁰ Komin yaru naña naga kilaro ga visena kiena ne navisaluaena ve taaga ga, naga kila ke mlamulena viowa ne e marana ne Ntewa, naga sa naña naga kilaroro make visena kiena ne navisaluaena la nene punu ga p̄isi narui.

¹¹ Komin Ntewa nene naña naga pisa pisape “Pisi na amiu ve ataḗa re kolau,” nanene na Ntewa ke ga nene na wa naña naga pisa pisape “Pisi na amiu na ve awem̄ar re yaru.” A visae amiu ve ataḗa re kolau ana amiu awem̄ar ga yaru, p̄isi na amiu na ave yaru na kilaroen ga navisaluaena narui.

¹² E pogos na liḗpereena, p̄isi na Ntewa naga ve la re nakoena van amiu sa naña p̄isi na naga la van yeririna viowa lala, p̄isi na naga ure plan amiu e nakoena nene narui. Komin suri ne nanene, kiamiu visena lala a kiamiu yuññaena lala naga monar ve sa naña amiu na pe akila re suri tai naña mesmesun naña amiu akus nakoena vanon poli.

¹³ Nanene na komin naña Ntewa naga sinena mie amiu, a kiena nasineyeena nene naga p̄isi na yumuvanlua naliḗpereena naña naga mesmesun naña amiu akusia. A pogos naña Ntewa naga p̄isi na liḗpere yeririna la naña la pe sinela mie re yeririna taḗena poli, p̄isi na naga m̄ena ga taḗatete sinena ye la.

Pelaga na viawaena a na yuññaena wo lala

¹⁴ ?Puruvi lala, sanapen naña visae yaru tai naga suña visa ke visave naga piawa ke e Kristo, ana p̄isi na naga pe kila re yuññaena wo la poli? ?Pisi na kiena naviawaena ga nene naga kilia tamalia naga, pona peraga? Nanene na, taḗatete suri wo tai kilia molue kome kiena visokanena naviawaena kiena ne yaru na sanene.

¹⁵ ?A sanapen m̄ena ga naña visae kieta puruvi laḗasia amio vineta laḗasia naña la pe m̄ala kulsota re poli, a la pe kala kinanena re poli?

¹⁶ Visae amiu yaru tai naga visin sineyeena van la visave “Ntewa naga visa ruru amiu, amiu na ve miava tol amiu re, a ve viso kar amiu re,” ana naga pe mla re nena suri tai pan la poli vena iila la, visave ve sanene pogaga ne pona pe po re nene poli? Peraga, kiena visena na sanene ana pe visena korena ga.

¹⁷ A kieta naviawaena na sa ke ga nene narui, naña visae naga suña naga taaga, a ve yuññaena wo lala ve su re amio, ana kieta naviawaena nene pe naviawaen korena ga, mare ga ne.

¹⁸ Ana pona p̄isi na yaru laḗasia la aloge visena nene, ana p̄isi na la akilali naña avisataḗea avisave, “Naga pogaga, ana pe sa re nene poli. Ana naga sa ga naña yaru laḗasia, la ape yaru na viawaena, a yaru laḗasia, la ape yaru na kilaen yuññaena wo lala.”

Ana p̄isi na inu nevisataḗe la nevisave “Visae inu nevisu ko naña ko ovisa ovisave ko na ope yaru na viawaena ga, ana ko na pe yaru na kilaen re yuññaena wo la poli, ana ve sanene p̄isi na taḗatete nevisu kile tai naña sane naviawaena kioñña pe lelaga. Ana visae ko ovisu naña nesuñña nekila ke ḗelaga wo lala, nanene kilia kila merarava van ko sane kiau viawaena naga pe lelaga kemua.”

¹⁹ Ee, inu nekilia m̄aga naña ko omlelaga naña Ntewa taaga ga sike na, nanene na po paḗisi nene. Ana nevisa van ko, yermare m̄ena ga lala la amlelaga sa ke ga, ana la asuñña amiyuwawa paḗisi vanonia.

²⁰ Sa naña nesuñña nepisa ke ne, yaru naña naga pisape naga piawa m̄aga, ana pe kila re ḗelaga wo la poli, kiena naviawaena nene pe suri korena ga, yaru na sanene na pe wowe ga nene. ?Pona amiu sinemiun asape nevisa meraravanli la suri nene sane wa?

²¹ Pogaga, amiu asitomli repita naña Epraam ne. ?Ntewa naga kila Epraam naga mesmesu e marana vanon ya ne? Nanene komin naña Epraam naga ḗere

narina naña Aisak, piar naga e wonta, ana tamān narina nene pisape kila kuḗpañaena ea va Ntewa.

²² Amiu apisu ke ne, e lele nene ita tevisu naña naviawaena kiena ne Epraam a kiena yuḗñaena lala, ana suri la lua nene amiyuḗnae ga lele taaga. Kiena yuḗñaena lala la akila sane kiena naviawaena naga pe lelaga ruru kemua naña lelaga,

²³ a suri nene naga kila Visena Wa pe lelaga kemua, naña pisa pisape, “Epraam naga piawa ke e Ntewa, a pe miasi suri ne nanene, Ntewa naga kila Epraam mesmesu amio naga.” A nanagane ita tesuḗna tepio ke Epraam tesape naga pe erau kiena ne Ntewa.

²⁴ Komin suri ne la na nene, ita tekilia tekirawal sane Ntewa naga kila yaru mesmesu amio naga komin kiena ḗelaga wo na malena ḗna ga, pe komin re ga kiena naviawaena poli.

²⁵ A amiu asitomli Reap nene, nanua sumo naga pe sira na mrapa ga tai. ? Ntewa kila naga mesmesu amio naga vanon ya ne? Nanene vanon naña naga pisuar ruru le Israel la lua nene naña lalua apim vinau ga apisape avisu kilia Seriko. Naga ḗerewan lalua nene e ḗana yuḗna, a ḗisi na naga kipian lalua nene e mrapa taḗena tai vena lalua akilia aure ana awasuḗela si akom ea.

²⁶ Pogaga, ana sa naña tas nen yaru naña naga pe ninuna re poli, naga mare, naviawaena ḗna ga, naña pe ḗelaga wo re laḗas ayuḗnae veraga amio poli, naga ḗna ga mare ga.

3

Ita monar touarar ruru purmeneta

¹ Puruvi lala a vineu lala, pe pon re naña amiu ve moki akilali naña auarar yuḗñaena na vianena e yuḗna na lotuena la poli, vanon naña amiu akilia ḗnaga, e legiena na liḗereena, ḗisi na Ntewa naga kila naliḗereena van imimi navianena lala ana ḗarera laa sane.

² Visae yeririna tai naga pe kila pal re kiena visena pogos tai poli wa, yaru nene naga po na po, naga kilia ḗuarar ruru kiena malena wetelu. Ana peraga, ita

punu ga ita tesuḗna tekila pal luen ga kieta visena lala silaga.

³ Popon ita tesitomli narin pototo nene naña ita temligan pa teke e logon wosi. Pogos naña ita temligania, ita na tekilia tekila wosi nene logear ita, a ita tekilia tevilon pupia tas nen wosi nene naga va e yo naña ita sinetan tesape naga va ea.

⁴ A ita na tesitomli ḗna ga waa lala, naña pe suri korena ga naña aurmi paḗisi, a pona pupia lagi miyuia ana sinenan pisape supon vano, ana narin ḗeligas ga, naga kilia kila pupia waa nene va e yo naña yaru na uararen ḗeligasia naga sinenan pisape va ea.

⁵ Purmeneta lala naga sa ke nene narui, naña la ape narin suri ga tai, ana la akilia avis molmolue ve keviu vaḗisi.

Amiu na asitomli, naña narin ḗau na kapi ga tai, ana naga kilia kekan ga pupia laki lala e pupia yoḗarua tai.

⁶ Ee, lelaga kemua, naña purmeneta naga sane kapi ta ne. Komḗas nen tasneta la moki, ana purmeneta naga ta naña suri viowa punu ga na yomarava nini la apule manene la ea, a kiena naviowaena la nene la asuḗna akila kare make kieta malena wetelu. Purmeneta nene na suḗna mla ke kapi e lele na loge viowaena, a naga suḗna kila ke kapi nene pivaga e kieta mrapa na malena punu ga.

⁷ Ita tekilia tepisu naña yaru naga kilia kila suri tetan lala aimi amoḗau, sane suri mali na yoḗarua lala a manu lala, lomāra lala, a ika lala,

⁸ a pe yaru re tai naña naga kilia kila purmenena moḗau poli. A purmeneta lala la apiowa la, a taḗatete touararia, a kiela visena lala la sa ga mrasuḗapo naña kilia kilamān yaru.

⁹ Ita tesuḗna tepis ke e kieta purmeneta nene vena teieluar Ntewa Wa nene naña naga pe Arimata, ana siraunia, ita tepis ke sina ga ea ana tepiuelin yaru taḗena lala naña ita na pe tesitom re tesape Ntewa naga sii la poli.

¹⁰ E gota taaga ga, ita tesuḗna tepis po ea, a tepis ḗna ga piowa ea. Puruvi lala, suri nene naga piowa manene la.

¹¹ Pe puluwii re ta naña mon ḗnaga ana

e pulusa si amio wii lalua akate veraga e poli.

¹² A sa ke mēna ga naŋa purpik taŋatete kilia war mraolip, a kilkerep taŋatete war mравik. Taŋatete mēna okilia ova ovio wii e pulusive.

Namanmaruaena wo naŋa Ntewa naga mlavia

¹³ Visae amiu yaru laŋasia naŋa ape manmarua paŋisi, la akilia ruru suri po, popon lala akila suri la nene imi merarava ruru wo sa naŋa la kiela malena mesmesu, kiela sitomena lala monar vito ga tano, a kiela ŋelaga lala monar marua ruru wo.

¹⁴ Ana visae amiu asitom sa naŋa amiu ape manmarua, ana kiamiu sitomena lala apulen navielueena amio mēna ga nakalawaena, visae ve sanene amiu na apisokani ke ga ne. Amiu na ve avisvilaven re si vanon kiamiu visokanena na manmaruaena nene, vanon nanene na pe ŋelaga na manmaruaena re nenaga nene poli.

¹⁵ Nanene naga pe manmaruaena nae re ma e sinapane nene poli, ana naga manmaruaena na yomarava ga nini ne, a naga pe kiena ne yeririna viowa ga lala, naga pe manmaruaena naŋa naga molue ruru ga kome Yermare.

¹⁶ Vanon pogos naŋa yaru la naŋa avielue ana la sinelan asape ato kalawa make yeririna taŋena lala, ana suri la punu ga asutetai ga narui, taŋatete si akirir ruru wo.

¹⁷ A visae yaru naŋa naga tol namanmaruaena nae ma e peni, ana kiena ŋelaga ve taŋena. A metava suri taŋena lala, kiena malena ikik ruru wo, a naga ve yaru nasuŋareena mēna ga, naga ve yaru moŋau, naga ve erau ruru wo van yeririna taŋena lala, a naga ve yeririna na sineyeena. A naga ve yeririna mēna ga tai naŋa e kiena malena war mras la naŋa po. A naga ve waveve re yaru lala, a kiena sitomena ve veve lua re.

¹⁸ Yaru na sanene, suri la punu ga e kiena malena naga mesmesu ruru po paŋisi, a ŋisi na ve sa ke mēna ga e yaru la punu ga naŋa la ape yeririna na

suŋare, naŋa la amiyuŋae ke e ŋelaga na suŋarena.

4

Yaru naŋa naga kila erau wo amio yomarava nini

¹ ?Ana visae suŋarena nene ve su ruru re amio amiu, ana amiu asuŋa akila ga mara van amiu, a aveveyun amiu, ana ya ne pe mias nen suri nene? Suri nene naga molue kome kiamiu nasinenanena lala, naŋa la asuŋa akila amiu amiyuŋae mārera paŋisi vena akilali naŋa aloge wo e suri punu ga naŋa sike e yomarava nini.

² Amiu na sinemiun manene la suri la naŋa sike e yomarava nini, ana amiu taŋatete akusla, ana nane kila amiu na sinemiun asape awe yeririna vanonia. A amiu na sinemiun manene la suri kiena ne yeririna taŋena lala, ana taŋatete mēna ga akilia akusla, ana kila amiu apeveyu a aŋe amiu mŋaga vanon suri la nene. Ana amiu pe atol re suri laŋas naŋa amiu sinemiun poli, vanon naŋa pe apiun re tan Ntewa poli.

³ A pogos laŋasia amiu apiun tan Ntewa, ana pe atol re poli, vanon naŋa apiun pal ga. Ana nanene komin naŋa amiu asuŋa apiun ke ga vena kila kiamiu nasinenanena lala akilia awar ya naŋa la sinelania vena aloge wo ea.

⁴ Amiu na sa naŋa yeririna la naŋa la pe ape lelaga re pa wola poli, naŋa amiu pe akekaran manene re si kiamiu Ntewa poli, amiu pe ape lelaga re pan poli. Ana yaru naŋa naga sinenan pisape naga ve erau wo amio yomerava nini a amio mēna ga kiena ŋelaga lala, ana naga sane suŋa kila ke erau viowa amio Ntewa ne, naga sane pe nasinekar kiena ne Ntewa ŋisi narui.

⁵ Visena lelaga tai teke e Visena Wa, naŋa naga pisa pisape

“Ninuta naŋa Ntewa naga mligan teke e ita, naga suŋa sinenan pisape va viowa silaga e kiena nasinenanena viowa lala.”

A nanene naga pe pe visena korena re nene poli,

⁶ a Ntewa naga suŋa miila ita keviu paŋisi e kiena sinewo, vena ita ve tekila

re si ve sanene. Ana naga nene sa naþa Visena Wa naga pisa, naþa naga pisa pisape

“Ntewa naga sumã pialuþar ke yaru naþa naga þarwaria, ana naga pe sinewo pa yaru naþa naga kiena sitomena to ga tano.”

⁷ Vanon suri ne nanene, amiu monar aligan amiu asumã tano, vatano e limana ne Ntewa, a amiu na monar asuwo Yermare Lego, ana þisi na naga ure vetan amiu.

⁸ Amiu na monar aimi manene laa lavisin Ntewa sane wa, a þisi na naga mēna ga imi manene laa lavisin amiu sane. Amiu yeririna viowa lala, amiu monar akevan limamiu lala. A amiu naþa amiu kiamiu sitomena peve lua, amiu monar akila sinemi u lala imi ikik ruru wo.

⁹ Nanagane kana pogos ruru naþa amiu sinemi u viowagan kiamiu mlamulena viowa la narui, amiu aloge viowa vanonia, amiu alokain tagiena. Popon amiu akila kiamiu vitalena imi ve kiamiu tagiena ga, a kiamiu kekarena imi ve kiamiu nasineyeena.

¹⁰ Ana amiu monar akila kiamiu sitomena su ga tano e marana ne Ntewa, naþa naga mon metava a naga þisi na visirlua amiu.

Amiu na ve aliþere re kiamiu puruvi lala

¹¹ Puruvi lala a vineu lala, pe pon re amiu asumã avisa kare amiu poli, a aliþere amiu ke sina ga. Pelaga nene, Navisaluaena kiena ne Ntewa pialuþar þisi rui, ana yaru naþa naga sumã kila ke sanene pan kiena puruvi lala, naga sumã pisa kare ke mēna ga Navisaluaena nene, a naga sumã mliþere ke Navisaluaena nene pisape naga piowa ga. A pogos naþa amiu apisu Navisaluaena nene apisape piowa sanene, amiu asumã amligan amiu apa ke metava e naga, ana amiu pe asu re si vatanon naga poli.

¹² Ntewa nene naga kilia tamalia yaru a naga kilia kila yaru kovio, a mesmesun naþa naga taaga ligan Navisaluaena a naga liþere yaru. ?Ana amiu na asitom

asape amiu ape Ntewa, vena akilia aliþere kiamiu puruvi la sanene?

Amiu avisuar ruru amiu, ve avis vilave re

¹³ Amiu laþasia akilia avisa avisave, “Pane pona peni þisi na imimi meva e pulkumali taþena tai. Ana e yo nene, þisi na imimi mesumã ga tol kas wetelu ve taaga, ana þisi na imimi mekila yurñena na warena kilavaru ve moki.” Ana amiu ayagogon inu.

¹⁴ Amiu na pe akilia re nenaga ya naþa þisi na naga kilia warpoyo e kiamiu malena peni poli. Kiamiu malena naga sa ga m̃au naþa pimi kate e tavie a naga su plas ga ana siraunia kokovio ke sina ga.

¹⁵ Ana visena naþa mesmesun naþa amiu avisa, naga sanini, pisape “Visave Ntewa naþa mon metava naga sinenan ve sanene, þisi na imimi mekilia mesumã memal re la ve plas ga na wa, ana þisi na imimi mekilali ve sanene ve sanene.”

¹⁶ Ana peraga, amiu asumã apisi vilave ga, a amiu aþarwar amiu paþisi wa, ana nanene na piowa nene.

¹⁷ Ana yaru naþa naga kilia ruru þelaga wo lala naþa mesmesu naþa naga kila, ana naga pe kila re poli, nanene naga kiena mlamulena viowa nene.

5

Yeririna na suri moki lala, monar maramē amiu

¹ Li na suri moki lala, popon amiu mēna ga ayagogon inu. Popon amiu na alokain tagiena vanon pogos m̃arera la naþa asumã apimin ke naþa atol amiu.

² E marana ne Ntewa, kiamiu suri wo lala sa ga suri la naþa apililua þisi rui, a m̃amiu kulsota wo mēna ga lala sa ga naþa kirara lala akarwowo þisi rui.

³ A kiamiu suri mēna ga lala naþa sane kilavaru, la sa naþa asumã asiar asape avililua narui, ana þisi na tasnemi u mēna ga lala avililua, sa naþa kapi kekania, a nanene naga kila merarava pisape amiu na amiyum̃ae piowa ga amio kiamiu kilaveru la nene. Ita tesike e legiena maro la ne, ana amiu na asumã apanon

aþarpolo manene ke kiamiu kilavaru la pa laa na wa.

⁴ Li na yumãena lala amiyumãae þisi rui e kiamiu lokove lala, ana amiu na pe apulila re poli wa. Kiela naulena lala naþa amiu apuarar sike na, naga sa naþa sumãa mlokai keviu vena visawal naþa amiu apisokan ga. Li na yumãena mēna ga la nene asumãa atagi, a kiela tagiena nene naga pa tol kiligana ne Ntewa naþa naga pe Ntewa na m̃areraena.

⁵ E yomarava nini, kiamiu malena meme ga, naþa amiu akilia aul ga suri punu ga naþa amiu sinemiunia naþa alogewonia. Amiu na akan ga kinanena wo la silaga, ana inu nevisa van amiu, amiu na sa ga suri mali lala naþa yaru la apagan ruru la po pano-o amlapa ruru po paþisi, nanagane amloge po paþisi, ana legiena na we moñar laena pimi ke lavisi narui, ana suri mali la nene amninue ga.

⁶ Amiu na asumãa apisu ke la naþa limala korena ga la apito ga tano. Amiu amla naliþereena viowa lala pan la, pe suri korena ga naþa la amesmesu ga. Amiu akila kare la m̃aga pano-o amiu am̃emoñar la amare. Suri la nene, amiu akila pan yeririna lala naþa taþatete nenaga la akilia avisaluþar amiu.

Amiu monar amalumu ga

⁷ Puruvi lala, amiu na monar amalumu ga vena asumãate m̃aga kieta Suþe vano vano-o naga wasuþe sina ga. Naga sane yaru na lokove, naþa naga to malumu ga toñã ga toñate pogos wo na yumãenen kiena lokove lala, a vena yua naga imi kepapania, a vena war kinasa naþa marua sike ea.

⁸ Ana amiu na monar amalumu mēna ga sanene narui, vena asumãate kieta Suþe naga wasuþe sina ga imi. A amiu monar kiamiu sitomena lala asumãalu m̃arera, vanon naþa þisi na naga ve ve piavi re ana naga imi ke sina ga.

⁹ Puruvi lala, amiu ve avismumun amiu re silaga, vena þisi na Ntewa naga taþatete liþere amiu vanonia. Vanon naga pe yaru naliþereena, a sa ga naþa naga

sumãa sumãalu ga sike e pulutava narui vena imi loyumuãa.

¹⁰ Puruvi lala, popon ita tesitomli nav-isawalena na sumo lala kiena ne Ntewa. La apian ita e mrapa wo tai, naþa pogos na yeririna lala akila piowa pan la, la amalumu ga a kiela sitomena lala pe mloru re poli.

¹¹ La asumãalu m̃arera asumãa ga pano pano-o, ataulu suri la nene, a komin suri ne nanene, ita tepisuiãa tepisape Ntewa naga pisa ruru la paþisi wa. Yeririna naþa Sop, naga mēna ga tai naþa naga sumãalu m̃arera su piavi e suri m̃arera la ne sanene, a ita tekilia suri wo lala naþa Ntewa naga kila pania sirau þisi. Nene na lelaga, Ntewa naga pe lemam pan yeririna la paþisi, naga sinena mie la paþisi.

Ðelaga na visaena visena naþa lelaga

¹² Kiau puruvi lala a vineu lala, meta-van suri taþena la punu ga, pogos naþa visae amiu apisaar suri tai, pona amiu apisa pupia visena keviu tai, þisi na amiu ve avisa re amio kia kiena ne sinapane, a kia kiena ne yomarava nini, pona kia kiena ne suri taþena tai, vena kila kiamiu visena nene m̃arera. Visae amiu avisa avisave "Lelaga," monar avisa ga "Lelaga." A visae amiu avisa avisave "Peraga," monar avisa ga "Peraga." Visae kiamiu visena ve lelaga ruru kemua sanene, þisi na Ntewa naga taþatete liþere amiu vanonia.

Leniena naþa navisatam̃eena pimi ea

¹³ Visae amiu yaru tai naþa naga mloge piowagan ke suri tai, naga popon len, a visae amiu yaru tai naga kekara, ana naga popon yeluar Ntewa e yauena.

¹⁴ A visae amiu yaru tai mai, nanene naga mesmesun naþa naga vio nasumonenãa na sumãare lala vena aimi avisu naga, ana þisi na lala akilia alenwo naga, a la akilia ataron sirveve va e naga e kia kiena ne kieta Suþe.

¹⁵ Ana komin naþa apiawa m̃arera e Ntewa, ana alen vania, þisi na Ntewa naga tamalia namaiena nene, kila ruru sina ga naga. A visae maiena nene

naþa tol yaru nene naga vanon kiena mlamulena viowa laþasia, a visae yaru nene visa plan kiena mlamulena viowa la nene, þisi na Ntewa naga viewo mñena ga mlamulena viowa nene.

¹⁶ Komin suri ne nanene, ana popon amiu na asuñña avisa plan kiamiu mlamulena viowa lala van amiu, a popon mñena ga amiu asuñña alenwo amiu ana vena þisi na Ntewa naga kila amiu awo sina. Pogos naþa yaru mesmesu naga len mñarera, kiena leniena kilia war mrasa ve moki.

¹⁷ Elaisa naga pe yeririna ga sa naþa ita, ana naga mlen mñarera pisape yua þisi, ana tol kas telu komsusa ana pe yua re nenaga e kiena yo poli.

¹⁸ Ana siraunia naga kila ke sina ga leniena, ana yua kove ke sina ga ana lokove lala ape kinas sina ga.

Amiu na monar aure si yeririna naþa pure wasuþe sina ga imi

¹⁹ Puruvi lala a vineu lala, visae amiu yaru tai molue vetan nalelagaena, ana amiu yaru tai naga vanon ure naga wasuþe sina ga imi, naga nene na yuññaena wo ta nene.

²⁰ Amiu na monar asitoñña, sa naþa visae yaru naþa naga vilon yeririna viowa tai molue e mrapa naþa piowa wasuþe sina ga imi e mrapa naþa mesmesu, naga tamalia yeririna viowa nene narui, ana þisi na taþatete yeririna viowa nene naga kovio. A naga kila sa naþa þisi na Ntewa naga kilia ure plan punu ga mlamulena viowa kiena ne yaru viowa nene.

Maki Nasumo Naña PITA Siriyuia Visayuena Na Tusi Nene

Suniena plas na tusi nini

Maki p̄esa kiena Pita, siria pan la naña amlelaga rui, naña naga pio la sape yeririna lala kiena Ntewa, naña naga ga pisirplan la. La naña asu tetai asike sane wolawa lala e provens makega e yo nene naña nagane tepio sape purvanua naña Teki. Sitomena keviu na m̄aki nini, vena visirluaen sitomena kiena li nalelagaena la naña yaru la asum̄a akila ke m̄arera manene panila paḗisi, kila la aḗal ke m̄arera panila paḗisi komin naña amlelaga e Yesu Kristo. Naga pisa panila sape monar asitom̄al lologena wo nene, naña Yesu Kristo maren ita, a mal sina, a yoko naga wasuḗe si vitomi sina vena were kiena yeririna lala. Sitomena nene kilia iila ita vena tesum̄alu m̄arera, a kieta lelagaena la kilia m̄arera sum̄a e Yesu Kristo.

Komin suri ne nanene, pogos naña atol pog m̄arera, a yaru la akila suri m̄arera la panila, akilia asum̄alu m̄arera, kiela sitomena taḗatete loru, pe suri korena ga naña yaru la akila piowa manene panila. Visae akila sanene, yoko kila meraravan naña la amlelaga kemua e Yesu, a yoko atol suri wo la naña Ntewa mligan ruru sike mae peni, sape ve kiena kiena yeririna lala, e legiena naña yoko Yesu Kristo vitom m̄alivi ea.

Amio visena nene na visirplanen kiela sitomena lala, naga pisi m̄arera m̄enaga panila, sape monar akila kiela maliena la mesmesu ruruia, komin naña ape yaru lala kiena ne Kristo.

Komḗasnen tusi la na nini

Visena p̄esa 1:1-2

Mrapa kiena Ntewa naña tamalia kiena yeririna lala 1:3-12

Maliena kiena li nalelagaena lala monar ve wa 1:13—2:10

Yum̄aena kiena li nalelagaena lala pogos naña asike e nalogeviowaena 2:11—4:19

Sitomena kiena yaru na lelagaena monar vito ga tano 5:1-11

Visena na maro 5:12-14

Visena na sumo

¹ Erau lala, inu Pita nevisa pokolulagi a pokolemalo e kia kiena Yesu Kristo, naña in na nepe kiena nalogena.

Maki nini pim̄asu pan amiu yeririna kiena ne Ntewa lala, naña nanua asike gar kiamiu yo Yerusalem, ana aḗene plan amiu, nagane kam na ape wolawa ga naña asike e pupia lepas la naña, Pontas, Kalesia, Kapatasia, Esia, amio Pitinia.

² Amloge piowagania, ana sineun ne-sape nevisawal van amiu, Ntewa armata naga kilia make mrapa na kiamiu malena nanua nanua rui. Naga mligan plan amiu nanua rui, ana Ninuna miyum̄ae ke e amiu, amlogear Yesu Kristo, amla e kiamiu malena, kana kuruta kevan amiu amekiki, apim ape kiena yar wa lala.

Kiau leniena nesape yoko naga ligan kiena lemamiena a sum̄are vena sum̄a iila amiu silaga.

Natamaliaena naña nalelagaena la atolia

³ Popon tesitom̄al sanape naña Ntewa Armanane kieta Suḗe Yesu Kristo, naga kilali po pan ita wa. Temieluar naga paḗisi, komin sinen miye ita laa, kila ita tepim tepaeme tepe urviu si e mratava puna. Sa naña naga kila narina Yesu Kristo mal si e marena, tekilia naña suri naña sike vamon ita, pe maren re si poli ana malena naña ve uro re.

⁴ Naga sane lalimana ne Ntewa naña po naña yoko tetol sirau. Naga kila ruru rui, mligan sike ma meta e peni, yoko taḗatete menun, a taḗatete viowa, taḗatete si kovio pog tai.

⁵ Sur nene pe tetol re poli wa, ana temlelaga tesape yoko nam̄areraena kiena ne Ntewa suwo ruru ita nenaga, uarar ruru ita sum̄a vano-o tol legiena maro. Ana e pogos nene, yoko naga kilologia natamalia itaena e maran yar taḗena lala.

⁶ Nekilia nesape nanagane, asumã aþar naurmiena na loge viowaena e nakilaliena la naþa asumã atol ke ne. Pona yoko sumã ga sanene yo e pogos laþas naþa pimi ke na wa, ana e sitomen la ne nepisa þisi ne, popon kila amiu akekara, sinemiu la loge wo sina.

⁷ Sur na kilalien la nene, apimin ga naþa kila kiamiu naviawaena sumãal laa sane, imi m̃arera ruruia. Nanene naga sa naþa kol naþa visae sinelan asape ikik ruru wo, monar askap plan kororak la naþa sike ea, pona omlelege kiai okaweruruia imi mesmesu, ana ita m̃ena ga sa ke ga. Nakilaliena la naþa tetol ke ne, sane kap tai naþa kekanvan ke kieta naviawaena vena imi merarava ruruia, a m̃arera ruruia. Visae pogos naþa Yesu Kristo imi sina, naga lual kieta naviawaen ekik ruru sanene, ana yoko ita make ga tekekekara, tekilia tevisu ruru ita, teloge wo vaþisi.

⁸ Nesumã nepisayu ke Yesu sa nene, nesitomãal si nanua sumo nesike nemio naga, nekilia ruru naga, kam na peraga. Lelaga naþa nanua kam na pe amio re naga poli, ana pe sur koren ga, nagane na kam na akekaran paþisi, a pe apisuli re naga e kilamaramiu poli, ana asumã amlelaga ruru ke m̃arera e naga, sinemiu la kekaran e pupia kekarena ta ne keviu paþisi, naþa pe atorokin re avisa meraravan poli.

⁹ Kiamiu kekarena nene, pe kiamiu mras nen nalelagaen wo tai naþa akilia akan nagane, ana pe naga re ga nene poli, komin amio m̃ena, e pogos la ne pimi ke ne, yoko akan tai naþa kiki laa sane, nane natamaliaen kiamiu malena.

¹⁰ Sur nene naþa tepisayuia, sa naþa natamaliaen malena ken yaru, naga sur tai naþa navisawalen nasumo la aþion kiliaen paþisi. Akilia ruru navisaarena kiena ne Ntewa po, naþa sape yoko naga sinen ye kiena yeririna lala, yoko tamalia la, ana asumã apisawal ke sanene.

¹¹ Apisa ke sanene, ana pe akilia meraravan re asape yoko naga kila ve sanape poli, pona yoko kila pogwai. Amloge ga naþa Ninuna Navisaarena sumã kipian la

ke sape yoko akila kare þesan naga, sir- aunia, navisa ruruena lala imi m̃alm̃aliv, ana aminue asape Navisaarena naga yar na sanape, pona naga ai.

¹² Sumo na asitom asape naga yerkawa yar ga tai na kiela pogos ne, ana siraunia, apisu kilale ga na wa asape sur la naþa apisa ke ne, pe e re e kiela pogos poli, a e kieta pogos la ne pimi ke sirau. Ana kam m̃ena apisu kilale asape suri la naþa navisawalena la apisawal nanua sumo, nane apim ape lelaga e visena kiena lologena wo naþa memlologon ke pan amiu e nam̃areraen kiena ne Ninuna Wa nae ma e peni rui.

A pe navisawalen re ga la poli, ana navisi m̃ena lala sinelan asape akilia sur la nene, ana peraga, pe kiela re naþa akilia poli. Sur la nene am̃alivi ga yo metava e kieta pog na wa.

Monar ove yar wa ruruia

¹³ Ana pogos naþa Yesu Kristo pitomi m̃aliv e yomarava e nena e kieta pogosa, ita ke narui monar tekila ruru kieta sitomena vena tom̃areran ruru naþa tekila kiena yumãena. Monar takawe ruru kieta malena, a ve tesitom re yomarava nini, a monar tesitomãal ga navisa ruruena wo naþa yoko towaria pogos naþa yoko Yesu vitom warpo si yo e yomarava nini.

¹⁴ Yoko monar teim teve sa sisi wo la naþa asumã amlogear ruru ke armala, a nasinenanen viowa na wowe lala, pe pon re si tetam̃an ave suþen kieta malena poli, sa nanua sumo e pogos naþa pe tekilia re sur tai poli.

¹⁵ Armata, naga ke narui naga pio ita, ana monar tekilia tesape naga naþa sinenan sape teim lavisinia, naga pe wa paþisi, ana ita m̃ena monar teve wa ruru e mrapa make ga na kieta malena.

¹⁶ Visen kiena ne Ntewa tai teke e kiena navisaluaena marua, pisa sanene rui sape *“In na nepe wa, kam m̃ena monar ave wa.”*

Lev 11:44,45

¹⁷ A sur si tai, yam mokliu naþa tesumã tepio Armata vena iila ita, ana monar tevisu kilale tevisave naga sumã pisuveve ruru yaru lala mesmesu ga e kiela yumãena la peve taaga, ana teyaloro

e yomarava nini monar kieta sitomen vatanonia, temaraunia. Naga mligan ita tesike e yo nini yam plas ga sane ita tepe wolawa ga ea, ana monar tesitom tevisave siraunia, yoko teva tesuñal nena tesu e marana.

¹⁸ Nanua sumo, kieta li marua lala pe akilia re Ntewa poli, ana akiakian lelein ña kiela malena na yemalolo pitomi pitomi tol pogos naña Yesu Kristo pimi ñerelua ita petania. A sa naña akilia, naga kila sanene, pe pul plan ita re e sur na yomerava sane kilavaru poli pona kol pona ya si naña sane yoko kovio pogos tai.

¹⁹ Peraga, naga pul plan ita e kana kuruta nena napo, komin naga tamñan kiena malena kus leleta, naga tamñan naga sane narin sipsip tai naña pe narin maran sur tai pe to re e poli, vena kilaen kuñañaena ea.

²⁰ Ntewa kilalua Yesu vena tamalia itaena sanene nanua rui. Nanua e pogos naña si yomarava, ana ñuarar narina nene sumña amio pano tol pogos naña sinen miye ita keviu, narui kila naga pitomi ñaliv ga na wa e legien maro la nini.

²¹ Naga pitomi ñalivi, naga pike mrapa pan ita na vaen si puna ne Ntewa po pañisi. A pogos naña tomñal naña Ntewa kila malia si naga, mligan sike amio naga ma e kiena naurarena, toñar sitomena naña tesape, Ntewa ne nanene narui, popon telelaga vania, teviawa ea, towasinea.

²² Siar e nene narui, amlalaga e visena lelaga kiena ne Ntewa, a kiamiu malena la mesmes ruru po, a asitom manene laa kiamiu erau tañaena lala. Ana ve akilakila re ga, monar amñareran li naña akekaran amiu e sinemiu lala ve keviu manenea.

²³ Apaeme apim ape urviu sina, atol malena viu rui, ana nanene na pe sa re naña ñamña la añar sisi poli. Kieta malena viu nene naga pimi ñarpo ga yo e visena kiena ne Ntewa, pe visena mali, a visena naña tañatete kovio pogos tai.

²⁴ Malena kien yar tañatete su ve piavi, komin kapur ruru po sane ñaki, kilia imi wo vañisi sane meme, ana siraunia ñak nene kilia mano, ana meme kilia loru.

²⁵ Ana sur taaga naña sike sike lue, nane visena kiena Suñe.

Ana visena ne nane, mesuñña memlologon ke pan amiu siar nanua rui pimi tol ñane.

2

¹ Ana komin naña lologena wo tol amiu rui, monar aligan ñelaga viowa lala. Nasinekareena lala, visokanen lala, namlamulen wanen viowa lala, vielueen lala, a navis viowaena lala, ñelaga la ne sanene monar awar plan vetan kiamiu malena.

² Sa naña sisi tomtom la sinelan manene munen ñala yu vena amal ea, kam ñena monar amñareran naña atol kiamiu kinanena a namunena wo naña kilia kila ninumiu kapur imi marua ruru, torokin ñelaga kien yeririna la naña Ntewa tamalia la.

³ Akan li kinanena kana Suñe rui, a visae akan kiki, popon akan lue ga, ñeñemiu ulen silaga.

Yesu naga pe purñes nen kilavaru na ñeren yuñña naña mali

⁴ Ntewa sinena sape visirlua yuñña wa tai, ana naga pisaar kilavaru na ñeren yuñña tai naña mali, naña pisu po pañisi, nane Yesu. Yar tañaena lañaasa yepel mavinia, akovenlua, ana ita tesitom naga pañisi, tetavevea.

⁵ Ana Ntewa ñere ita, pisirlua ita tesu meta e kilavaru nena, naga pran kolkol ita sane kilavaru mali lala na ñana yuñña nena. Naga pisu ita sane kiena ñegas nen yar wa na yuññaena lala, naña tekilia towar kuñañaena nowo vania naña naga kekaran la, naña towar vania komin ga yuññaena naña Yesu Kristo kila rui.

⁶ Sa ga visena tai naña sike e tus kiena yermarua navisawalen Aisea rui, naña Ntewa sape:

“Apisu kilale rui pona pere wa? In na nepisaar kilavaru wo na ñeren ñau yuñña tai rui, naña nekekaran pañisi. Yoko nevisirlua nena se kiau kumali wa naña Saeon.

Yaru ai naŕa visirlua kien malena se ea, taŕatete nena loru vito viowa pog tai.”

Ais 28:16

⁷ Ana ita naŕa temlelaga e kilavaru nene, tesape kieta visuena po na po, ana laŕasa pe sinelan re poli, akovenlua ga pano. Ana visen taŕena mŕena kiena ne Ntewa e lepas nene sike e Tus na Yauena lala, naŕa sape:

“Pe sur koren naŕa yar na yuŕaenen yuŕa asape kilavaru nene piowa ga, akovenlua,

ana in na nemla kilavaru nena, nekila naga pe kilavaru na ŕeren mŕau yuŕa wa nena napo.”

Ais 8:14

⁸ A e ke sina e Tusi kiena Aisea, visen kiena ne Ntewa tai pisayu ke kilavaru nene wa, pisa sanini, sape:

“Kilavaru nene, yoko yar ve mok naŕa lala tau ea, kila ayal wowe.

Naga pe kilavaru tai naŕa yoko kila yeririna na yomarava nini aloloru.”

Ais 8:14

Visae teviun tevisave ya ne kila amlolor sanene, naga komin ga naŕa pe amlogear re visena lelaga naŕa amloge poli, yoko akekapil make atotano e lele na kovioena naŕa su ruru sike pa rui ve kiela.

⁹ Ana e ita pe sa re nene po, ita tepe ŕegas taaga naŕa Ntewa pisirlua, ita tepe li na ŕarwa lala vena ve suŕenen kiena yo, ita tesike loyuŕa e kiena purvanua wa, ita tepe yeririna na mratava nena puna lala. Ita ke narui tepe yeririna na yeluaren naga vena visawalen kiena sinewo naŕa kila pan ita, naŕa ŕere plan ita petan yemalolo, mligan ita tesike e kiena yomerarava napo.

¹⁰ Nanua sumo ita tepe yeririna kar ga lala, ana nagane tepim tepe ŕegas kiena ne Ntewa taaga. Nanua sumo pe tetol re kiena sineyeena poli, ana nagane kiena sineyeena pulen ga kieta malena.

¹¹ Erau lala, visae ve sanene, popon avisu kilale naŕa yomarava nini pe mŕa uŕa re napo poli. Sa ga tepe yar taŕena ga lala, tepe sane wolawa ga, ana monar teligan ŕelaga nasinenanen naki-laen mlamulen viowa lala na yomerava

nini, komin kiena napiowaena lala ape nasinekar nena na ninuta.

¹² Sila ga tesike likan la naŕa yepel mavin lelagaena, akawe ita silaga, a pogos naŕa tesike e marala, kieta malena monar wo na wo. Visae ve sanene, yoko akilia avisu kilale ya naŕa tesuŕa tekila ke ne naga po na po, ana visae la mŕena alelaga, yoko ita make ga temio la teieluar Ntewa e pogos naŕa yoko imi mŕalivin ita sina.

Pelaga wo kiena li nalelagaena lala pogos naŕa asike e yomarava

¹³ Sa naŕa tepe li nalelagaena kiena Suŕe rui, kieta ŕelaga naŕa tesike e yomarava nini monar torokin ga kiena kia naŕa tesuŕa temlologonia.

Li nalelagaena lala monar avatanon yerkawa la naŕa apisir plan la vena visuaren yeririna lala. Suŕe la yo, pona yerkawa kerkeviu lala,

¹⁴ pona ŕarin suŕe keviu la, ana monar tevisu kilale la sane Ntewa ke narui naga mligan e limala vena liŕereen yar lala, vena laen nakoan va naŕa pe mesmes re poli, a vena yeluaren naŕa kila yuŕaena wo.

¹⁵ Ntewa sinenan sape kiena yeririna la monar ayuŕae wo, komin naŕa visae akila mŕa sanene silaga, yoko yar la naŕa pe akilia re sur po, naŕa asuŕa akoven ke ga visen kar lala kawe ita, yoko taŕatete avisa si sur tai.

¹⁶ E lepas tai, lelaga sane tekilia tekila ga ya naŕa sinetania, a e lepas komŕasa, yar naŕa mlelaga naga pe sitom manene re sanene po. Pona naga sitom ke sape visa ve sa nini yo, visave Ke, sur nene sike ga e in naŕane, nekilia nekila ga suri viowa ya naŕa sineunia. Ana pe sa re nena nene poli ŕisa, komin monar tevisu kilale tevisave ita la naŕa temlelaga tepe yar na yuŕaena kiena ne Ntewa, ana monar tekila ya naŕa naga sinenania.

¹⁷ Li nalelagaena lala monar avatanon yar taŕena lala, monar akekaran manene wenla taŕena lala amio vinela taŕena lala e namratava puna ne Ntewa. Monar amaraun Ntewa, avatanonia, a monar avatanon mŕena kiela suŕe lala.

18 E pegas nen li nalelagaena lala, laṗasa ape kiena ne yerkaŵa lala, naṗa ayuṃṃae korena ga van la. A kiela yerkaŵa lala, laṗasa apowo paṗisi, a laṗasa aṃarera paṗisi, ana pe sur koren ga naṗa yerkaŵa naga po pona piowa ga sanene, ana yar na kiena yuṃṃaena monar vatanon ruruia.

19 Pogos la ṗasa, pona yar na yuṃṃaena miyuṃṃae pogaga yo, ana kiena suṗe kilia sinen karkare vaṗisi, kilia viowa lue ga vania. Yar nene yoko loge viowagan ṗelaga kiena ne kiena suṗe naṗa pe mesmes re poli, ana po paṗisi visae torokin taṃan ga ve sa nene, naṗa e kiena sitomena ṗasine ga Ntewa, ana yoko loge kilale naṗa Ntewa sike amio vena iilaena.

20 Ana visae yar na yuṃṃaena kila sur viowa ve moki, pona yoko kiena yerkaŵa monar visave ala nakoena vania. Ana visae pogos naṗa ala nakoena van yar nene, naga va ruru ga teke na, yoko ve tevisa re tevisave naga pa ruruia komin naga pe yar wo tai, ana tekilia tevisave naga pe pis re poli komin pisu kilale kiena napiowaena.

Ana visae okila ga sur wo la sa naṗa Ntewa sinenania, asuṃṃalu sinela kar ko, ala nakoena ṃarera tai van ko, ana ova ruru ko ga, ṗelaga wo ke narui naṗa Ntewa sinenania.

21 Sur nene naṗa yar wo loge viowa ga naṗa akila piowa pania, naga pe lepas nen kieta malena tai naṗa Kristo pio itania, komin sa kemua nene pan naga sumo rui. Pe kila re sur tai poli, ana akila naga mloge piowa manene laa, ana naga taṃan ga, vanon ita. Ana sa ke ga mrapa naṗa kieta Suṗe mial kome nanua sumo rui, monar teyal ga e lelen lana tetaveve tevano.

22 Visena Wa marua pisayu naga sumo rui, naṗa pisa sanini, sape
*“Naga pe kila re nena mlamulen viowa pogos tai poli,
 visena na visokanena pe kate li re e gona poli.”* Ais 53:9

23 A sa ke ga naṗa tekilia ṃaga, pogos naṗa akuan visen viowa la pania, pe pisamaran re si poli, a pogos naṗa aṃe

kare yepen lala, pe pisa re nena sur tai pan la. Pa ruru ga mon ṃaga, mligan sur make ga sike ga e limana ne Ntewa Ari-mana naṗa kiena naliṗereen lala mesmes make ga.

24 Pogos naṗa Yesu telan ṃeke e lak torovia, nakoena na kieta mlamulen viowa make ga mloru e tasnena, a kiena marena kila naṗa ṗelaga na mlamulen viowa mare petan ita, ana kila ṗelaga na kilaen mesmesu mal suṃṃa e kieta malena. Lelaga, kiena yepe lalaea lala kila kieta yepe lalaea lala pimi po nenaga.

25 Sumo, tesuṃṃa temyal wowe sane sipsip la naṗa akila pal kiela mrapa, ana nagane yar na visuaren sipsip ṃal ita si rui, nagane tepim tesu ruru tesike temio naga naṗa pe yaru navisuarena kieta malena.

3

La naṗa atalopa rui monar avatanon wola lala

1 Sa naṗa ita la naṗa temlelaga monar tewatanon ṗarin suṗe na purvanua, ita naṗa tetalopa monar tewatanon ṃena wota lala.

Nevis ṗesan van amiu kam sira lala, nesape monar avatanon ruru womiu na yermene lala. Pona sira tai, wona na yermene pe mlelaga re e Tus Wa poli, yepen mavin yagogonen wona na sira visayu vania, ana visae wona na sira kila lue ga wo vania, pona yoko kilia were ṃena naga imi lelaga yo.

2 Visen manenea taṗatete taulu yar nene, ana pogos naṗa visuaveve ṗelaga na sitomena wa a ṗelaga na vatanoena kiena wona sira nene, yoko naga kekaran naṗa lelaga.

3 Sira lala, popon avisu kilale naṗa sane kiamiu purṗes nen nawoena pe vanon re naṗa avilovilon vilṗarimiu veve taṗena poli, pona atelan mraṃalela lala, pona ayen kulmrae wo lala.

4 Sur nene, pe komin re naṗa apaia ruru tasnemi la sanene poli, ana ya naṗa yoko kila amiu aim awo ruru napo lelaga nane ṗelaga wo naṗa teke loyuma e amiu. Ee,

lemamiena naþa malumu a sinemiu naþa vito ga tano, naga ke na kiamiu nawoena narui, a naga taþatete imi ve urmarua pog tai, nane þelaga ne nanene Ntewa pisu po paþisi.

⁵ Apua sira marua nasumo lala, la mña kiela þelaga la sa ga nene. La aþasine Ntewa, ana amlelaga asape naga ga kilia iilala aim awo manene e marana a e maran yar taþena lala. A pogos naþa ola na yermene mña lala apisu naþa wola na sira la nene apatanon ruru la sanene, apisu po na po.

⁶ Sira tai naþa kilakila sanene naga sira marua Sera, naþa naga kekaran patanon ruru wona yermarua Epraam, pano pano-pio ke naga sape kiena suþe. Sira marua Sera nene, tepisu ke naga sane aneta sira marua tanea, ana kam sira na nagane lala, visae asuþa akila luen ga wo va womiu lala, sa naþa naga kila, kam na aim ave narina nena napo lala. Pona laþas amaraun asape sa þisi akila ve sa nene va wola na yermene lala yoko ve sanapen la, ana peraga, monar avatanon la ve sa naþa Ntewa sinenania.

⁷ Ana visena van amiu kam yermene lala, sape monar asitom urmi manene e womiu na sira lala. Visae yar tai sike uþa mña amio wona na sira, monar visu kilale sape naga yermene, naga mñarera manenea, ana wona na sira, naga pe mñarera manene re sane naga poli. Monar sitoþal silaga sane Ntewa pe mla re ga malena viu pa yermene naga taaga poli, ana mla ga pan la luoka, yermene amio sira la ga luwoka maran taaga.

Ana visae yermene tai ve mñarera manene re va wona, ana kiena sitomena vito ga tanonia, malum ruru wo vania, yoko lotena kiena lalua nene ve va map re ga mrapa komsusa, ana yalen silau va tol yo e naþa Ntewa sike ea.

Monar avatanon amiu vena kiamiu sitomen la imi ve taaga

⁸ Visen maro tai e lepas nene, nesape popon ala ruru sitomen la ne nepisawal ma meta ne. Kam punu ga, monar aþareranli naþa silaga asu ruru amio

amiu naþa kiamiu sitomen la imi ve taaga ga. Sinemiu ye amiu, akekaran naþa sane kam na ape mratava taaga, awo van amiu, aligan amiu asike sina vatanon amiu.

⁹ Naga naþa kila piowa pan ko, ve okila maran re si viowa vania, a naga naþa viuelin ko, ve oviuelin maran re sina. Visae ya naþa imi van ko, yoko osuþa ola ga navisatameena navisa ruruena wo vano. Pelaga wo la ne sanene Ntewa pio itania, vena tela ve sanene silaga, a visae tela navisa ruruena va yar taþena, yoko Ntewa ligan kiena navisa ruruena sike e kieta malena.

¹⁰ Navisaarena la ne sanene sike e Tusi na Yauena la rui, naþa pisa sanini, sape:

“Yar naþa kekaran sape su ruru suþa wo e yomarava nini, pona sinenan sape kiena malena va wo, ve piavi, monar kilawo visena viowa lala ve molue re kome pulgona, monar visuar ruruia sa naþa ve visokan re.

¹¹ *Monar ligan naviowaena, kila ga wo. Monar mñareran suþare, a monar þiyonli naþa silaga were imi lavisi likan yeririna lala.*

¹² *Suþe suþa pisu manene ruru ke yar naþa kila ke po, ten kiligana pan leniena kien yar wo la ne sanene. Ana la naþa akila ke piowa, maran mñarera pan la, pilon ga mñasina pan la.”* *Yauena 34:12-16*

Pogos naþa akila piowa pa yeririna wo kiena ne Ntewa lala

¹³ Visae toþareranli naþa tekila ruru sur make ga wo na wo, ve tesitom re tevisave yar laþas sinela kar ita vanon poli.

¹⁴ Pona pogos tai avisu naþa tesuþa tekila ke po sa naþa Ntewa sinenania, ana teilan ga asuþalu akila kare ita vanonia. Ana visae ve sanene, monar tevisu sane naviowaena nene pe pe sur re tai poli, naga navisa ruruena ga tai naþa Ntewa mla pan ita. Tekilia tesitoþal visena na tus kiena ne yermarua navisawalena Aisea, naþa pisa sanini, sape:

“Yar kiena ne Ntewa, ve sinemña kurkur re,

ve omaraun re ya naþa yeririna na yomarava la amaraunia.”

¹⁵ Visena nene sape monar ve temarau re, ana ya naþa monar tekila, e losineta, monar teligan Kristo ga su metavan sur make ga, naga taaga pe kieta Suþe. A monar tekila ruru ita silaga, sa naþa visae naviunena tai imi viun sape komin ya ne temlelaga, komin ya ne toþasine Yesu, ana monar tekilia ruru ve sanape naþa yoko tekilia tela navisatameena tai naþa po vano.

¹⁶ A visae navisatameena vano, monar va amio ga þelaga malum, a þelaga navatanonen yaru. La naþa sinelan ke kila kareen la naþa amlelaga e Kristo, akilia akoan visen viowa ve moki vim van amiu, ana avisuar amiu, pe pon re si akuan maran si visen viowa la van la poli. Visae akila ve sa nene, siraunia akilia amawan si kiamiu visena m̄arera la nene vaþisi, a visae amom̄au ga van la, yoko la ga monar amawan si kiela visena m̄arera lala.

¹⁷ Visae Ntewa sinenan sape naloge viowaena kilia vim m̄alivin ita pog tai, pe pon re naloge viowaena nene vim m̄alivi komin ga sur viowa laþas naþa ita ga tekila poli. Ana popon manene laa naþa visae naloge viowaena nene vim m̄alivin ita, komin ga suri wo la naþa temiyum̄aen ke ne.

¹⁸ Asitom̄ali Kristo, naga sanene. Naga pe yar mesmes manene laa, ana naga mloge piowa manene paþisi komin yar viowa lala. Kieta mlamulen viowa ita yeririna na yomarava lala mok liu, ana e kiena marena yam taaga nene kila sur make rui naþa kila sane kieta mrapa sun̄a naþa kilia were ita teva lavisin Armata Ntewa. Akila kare m̄a tasnena Yesu sanene pano-o marþan nenaga, ana po paþisi naþa siraunia, naga mal sina e nam̄areraena kiena Ninuna ne Ntewa.

¹⁹ Ana sumon naþa mal si sanene, naþa m̄eke e lelen marena naþa, nam̄areraen kiena Ninuna ne Ntewa pimi pulemamaga ea, kila naga pa mlologon meraravan pa ninuna taþena la naþa asike e nene, sape nagane Ntewa taulu la narui, ana Yermare naga kila þele nena yonia.

²⁰ Ninuna la nene, nane yeririna sur la naþa yepel mavin Ntewa, sane la nanua e pogos kiena ne yermarua Noa. E pogos nene Ntewa sun̄ate la ke sape avilon la, mla pog piavi pan la. La asum̄a ga sane, Noa miyum̄aen m̄a kiena pupia waa nene, ana pe asitom re nenaga, ana pogos naþa womie pulemamaga la atalilu. La mok naþa akovio e pogos nene, ana yar la lua la ga naþa amal asike e pulu waa, nane Noa ga la orelu nene.

²¹ Ana pupia wii naþa kus la amal e kiela waa nene, naga kana kinasnena ya ne pan ita nagane? Naga kila tesitom̄al si wii taþena, wii na tamalia itaena, nane wii naþa akee ita ea. Wii nakeena na nene, naga pe kila re sa naþa yepeta la mekik poli, ana kiar ruru ita sape Ntewa piewo kieta mlamulen viowa lala, ana ve temawan re sina vania.

Nakeena naga mligan kieta malena tesu ruru tesike temio Ntewa narui, ana popon tesitom̄al m̄ena tesape ane kila kieta mrapa sanene? Yesu Kristo ga kila, pimi kome kiena nasum̄alen si petan marena.

²² A siraun nene, þasuþe si pa ma e peni, pa totano teke amio Ntewa e li mana marua ma metava, naþa navisi lala, a pupia yerkawa lala, amio m̄areraena lala, la make ga asike vatanon kiena navesuþenena.

4

Nasinenanena kiena ne Ntewa naga su þes e kieta malena

¹ Sa naþa nepisa rui, Kristo naga tañan naþa þar naloge viowaena la moki e yepena, ana ita m̄ena ga monar tekila kieta sitomena ve sa ke ga nene. Yar naþa tasnena mloge piowa, ve visa re visave viowa, komin naþa visae naga va warpo yo e naloge viowaen ta sanene, kilia kila naga m̄arera manene laa sane, vena liganen þelaga na mlamulen viowa lala.

² Yar sur na sanene, naga pe pa manene re si e kiena malena na yomarava nini poli, naþa sinenanena viowa na þelaga kiena ne yeririna imi ve keviu manene

e kiena sitomena, ana naga sitom ga sur mesmesu la naþa Ntewa sinenania.

³ Kieta malena, naþa tekila kare komþas keviu pa rui, naþa tesuþa tetelivi ke ga temio erau la naþa pe amlelaga re poli. Ita temio la e malena viowa naþa pule e nakila maneneen þarita, na wereen sira lala, na mun maneneen wii pano tepe wowe, na veveyuena a na kilaen mara, na kilaen mþaagena kar la pano-o yemlagi, nakilaroen navisaluaen lala, amio nalotunen nono lala.

⁴ Nane kieta malena ke na sumo narui, ana nagane, kieta erau nene amninue asape ita na sanape narui. Amþal naþa pe sinetan re si taveve laen poli vena kieta malena talilu e pulmaran kiela sukoþene, ana pe akekaran re nenaga, kila sinela kar ita paþisi.

⁵ Ana ve tesitom re suria, yar sur la ne sanene yoko asuþalu ase marana ne naga naþa yoko liþere yar mal lala amio mþena yar la naþa amarmare rui. Yoko monar avisawal kiela sur la vania, ana e pogos nene narui, yoko avisu kilale kiela napiowaena lala.

⁶ Ana taþatete ve sanene va nalelagaena lala. Pona yar na yomarava la aliþerela ala nakoena na yomarava van tasnela, kilia va tol naþa akilalu kiela malena. Ana pogos naþa asuþalu ase marana ne Ntewa, yoko naga la nalaena na malena van ninula. A malena ne nane pe pupia sur naþa kila tesuþa temlologon ke lologena wo van yaru lala.

Pelaga kiena li nalelagaena lala e pogos naþa legiena maro pimi ke lavis

⁷ Nesape nevisa sanini, sane lavis tetol luas nen sur make narui. E pog na sanene, nalelagaena lala monar asuþal ruruia naþa kiela sitomen la ekik ruru wo, vena ve aursulan re leniena.

⁸ A metavan sur taþena make ga, monar asitom manene la si vaþisi, komin naþa visae tesitom yar tai, kila sa naþa meme ga na viewoen kiena mlamulen viowa lala. Visena tai pisa sanene rui, sape mlamulen viowa mok liu, ana nasinesiena kilia kalo la make ga.

⁹ Sur taþena, li nalelagaena lala la monar akekaran ga naþa avisuar la sina e mþala uþa.

¹⁰ A la make mþena lala monar akilia ruru namareraena amio nakiliaena taþena taþena lala naþa Ninuna mla pan la, monar ayuþae ruru amio vena iilaen kiela erau taþena lala. Visae avisuar ruruia, akilia akila naþa yoko lemamiena wo kiena ne Ntewa imi warpo yo e la.

¹¹ Yar naþa nakiliaena na visena teke ea, naga monar vis ruruia sa ga naþa visen kiena ne Ntewa ga lelaga suþa þar wowo ke e pulgona. Yar naþa nakiliaen naiilaen yuþaena sike ea, naga monar kila wo amio namareraen make ga naþa Ntewa mla pania. Visae silaga tekila make sur wo ve sa nene, yoko yar make akilia aieluar Ntewa vanonia, aieluar naga komin kia kiena ne Yesu Kristo, naþa naurarena make ga a namareraen make ga ape kiena ga vano vano ve uro re.

Naloge viowaena kiena ne li nalelagaena lala

¹² Erau lala, nekilia nesape nagane apane ke pog na loge viowaena tai naþa kila amloge piowa paþisi. Ana sineun nesape nevisa van amiu, sa naþa ve ailan manene re, ve avisu re sur nene sane sur tai naþa asitom ke asape taþatete imi mþalivin amiu pog tai yo.

¹³ Ana ya ga naþa akila, akekaran ga naþa akilia ave þegas amio Kristo e kiena naloge viowaena lala. Visae sanene, yoko siraunia, pupia kekarena vaþisi van amiu, naþa akilia ave þegas si amio e pogos naþa imi mþaliv amio kiena naurarena.

¹⁴ Visae taþena la akilia asape kia kiena Kristo sike e ko, yoko akilia akoven viuelen viowa la imi, ana ve ositom manene re. Yoko pupia navisa ruruena sulue ga e ko, komin naþa Ninuna ne naurarena kiena ne Ntewa nae ma e peni sike e kionþa malena.

¹⁵ Visae ala nakoena tai pona naloge viowaen tai imi van ko, pe pon re akila komin naþa asape ko na yar na weþaren yaru, pona ope yar na vinauena, pona ope yar na kilaroen navisaluaena, pona ope yar na kilaen viowa yo.

16 A visae akila komin ga naþa akilia asape ko na omlelaga ke e Kristo, ve okila re sane omawa, ana monar oyeluar Ntewa naþa pisu ko ke sape ko na otoroki naþa kia kiena ne Yesu Kristo sike e ko.

17 Nagane, pogos na liþereena siar ke rui, a yoko va mña tol þesan mratava mñana ne Ntewa. A tepisu naþa naga kilia tamñan pog mñarera laþasia warpo yo e malena kiena narina lala, ana visae kila ve sa nene va la naþa amlelaga, teminue kare narui amña yoko ve sanapen la naþa pe sinelan re logearen kiena Lologena Wo poli.

18 Nanene na sane visena tai na Tus marua na Visena na Manmaruaena naþa pisa sanini, sape:

“Yar naþa asitom asape naga mesmes rui, pe sur mñarera tai naþa Ntewa kilia tamalia.” *Pakaiwa 11:31*

Ana visae ve sanene, ositomyuli yar la naþa yepel mavin Ntewa, la ape yar na mlamulen viowa ga narui. Yoko ve sanapen la?

19 Pogaga, e nene nevisa narin visen tai van amiu naþa Ntewa tamñan naloge viowaena pimi mñalivin amiu. Nesape asumña akilakila ga wo van yeririna make ga, a asumña aligan kiamiu malena sike e limana Ntewa. Naga pe Ntewa naþa sii make suria, naga pe Ntewa naþa masisun ruru sur make ga, a naga pe Ntewa naþa tekilia towasine ruru naga silaga.

5

Visena pa pa nasumonon lala

1 Pogaga, nagane sineun nesape nevisawal sitomena laþasia van amiu nasumonon lala na sumñare. Nesitom nesape netorokin nevis van amiu sanene, komin naþa in mñena nepe nasumonona, a metavana, in mñena tai naþa nepisu Kristo e kilamarau, pogos naþa kus ke naloge viowaena metava e lak torovia. Ana nekilia ruru nesape in mñena tai naþa yoko nesike loyumña e naurarena la naþa yoko imi sirau, nane nepisu sane popon nekila visen la nene vena iila amiu.

2 Neviun manene tan amiu sanini, nesape monar avisuar ruru þegas nen sip-sip la naþa Ntewa mligan sike vatanon kiamiu navisuarena. Nanene na yumñan tai naþa keviu paþisi, ana lelaga, pe pon re visae akila naþa pe sinemiun re nakilaena poli. Ana popon akila ga amio sitomena naþa kekaren nakilaena, sa naþa Ntewa sinenania. Ana yumñana ya naþa akila, ve akila re ga komin narin nalaen tai naþa yoko alavia, ana akila ga komin naþa narin sitomen tai teke e amiu sape akila vena iilaen yar taþena lala.

3 A la naþa asike e limamiu vena avisuar la, ve akila re naþa akilali awarar manene laa, ana monar asumon ruru la, avian la e mrapa, ana akilia ataveve lelen lamiu.

4 Visae ayumñae mña sanene vano, yoko þar na visuaren sipsip kiena ne Ntewa yoko kekaran amiunia. Pogos naþa imi mñaliv sina, yoko visir plan amiu sane kiena þarin suþe lala, yoko vaia ruru amiu naþa kiena pupia navilavilaena naurarena vila e amiu naþa taþatete si vito tano pog tai.

Visena pa yar taþena lala

5 Nagane visena imi van amiu kam mñee lala. Nepiun manene pan amiu nesape monar akekaran naþa avatanon kiamiu yermarua lala a kiamiu nasumonona lala. Visen la ne sanene kam punu ga monar alavia, komin naþa popon silaga tekila þelaga na vatanoena van ita. Nanene sane visena tai na Tusi na Manmaruaena tai pisa nanua laa rui, naþa sape

“Ntewa pialuþar þelaga na vilaveena, ana miila þelaga na vatanoena.”

Pakaiwa 3:34

6 Sanene, popon tekila kieta sitomena su lue ga vatanon Ntewa. Teligan ita e limana, ana e kiena mñareraena yoko kilia visirlua ita si pogos tai.

7 Teligan kieta naurmiena la sike e mñasina, komin naga sitom ita paþisi, sinenan sape iila ita.

Avisaluþar Yermare

⁸ Nesape nevisa m̄ena visena na wep̄ege amiuena tai, sane monar avisuar ruru amiu, monar avisu kilale towe laa mrapa. Kieta nasinekar naṗa Yermare, naga telivwo ita lue ga, naga sane pupia sur mal tetan tai naṗa sane visokarian manene laa nalelagaena lala, visae sum̄alun la karwowa kare la vitolwowa la vaṗisi.

⁹ Ana ve ataṁan re kila sanene, monar asum̄al m̄arera e kiamiu naviawaena vena avisaluṗar ruru naga. Pe kam re ga naṗa naga sum̄a kilali amiu ke poli, ana akilia rui sane kieta erau taṗena la mok liu teliv e yomarava nini piora, naloge viowaena la pimi m̄alivin la ke m̄ena ga, ana popon ita make ga tesum̄al m̄arera vena Yermare ve taulu re ita yar tai.

¹⁰ Lelaga naṗa asum̄a amloge piowa towe laa e pogos nene, ana kieta Ntewa nalemamiena make ga yoko iila amiu. Naga ke narui naṗa mligan plan amiu rui vena yoko amiu amio Kristo loyuma e kiena pupia naurarena, a naga ke narui yoko ligan ruru amiu sina nagane. Yoko sinemiu ve kurkur re, yoko ve akulul re, ana e kiena nam̄areraena, yoko akilia aviawa ruru sina.

¹¹ Nane, teyeluar kieta Ntewa nene, komin kiena nam̄areraena sum̄a taulu make suria, a yoko sum̄a taulu vano-o taṗatete ṗisi pog tai, sanene narui.

Visena maro

¹² Nesike e nini nemio kieta puruvi wo naṗa Saelas, noṗasine ke naga e sur moki, a naga miila inu sirilua kiamiu m̄aki nene. Nekilia nesape m̄aki nene plas laa ga, nepis ve tokak ga, ana ya naṗa sike ea, nekilia nesape pisawal ruru ṗelaga wo tanea lala na lemamiēna kiena ne Ntewa pe lelaga, naṗa torokin amiu naṗa asike e nagane. Ve sanene, auloia, alavia vena iilaen kiamiu sitomen lala, silaga asum̄alu m̄arera ase ea.

¹³ Lala na sum̄are nae nini Rom, amio m̄ena Mak, naṗa nemla naga sa ga naruu narui, apisa po kolulag pona pokolemalo pan amiu. Mesike e nini, mepisu piowa

towe ga, memloge sane mesike e pupia pulkumali viowa nasumo naṗa asape Papilon. Ana naga pogaga, komin naṗa mekilia mesape Ntewa mligan plan imimi naṗa memio amiu, ita teve kiena.

¹⁴ Nevisa maron sanini, nesape pogos naṗa aim lele taaga, aworworun amiu, amun pipimiu sa naṗa akekaran ruru amiu.

Ana kiau leniena sa naṗa sum̄arena wo kiena ne Yesu Kristo sike make amio amiu naṗa ape kiena.

Inu, Pita.

Maki Nalua Naþa PITA Siriyuia Visayuena Na Tusi Nene

Suniena plas na tusi nini

Maki kiena Pita na lua, Pita siria pan li nalelagaena lala e pogos tai naþa navianiena la asike ne, ana kiela vianiena la pe mesmesu re poli, kila naþa yaru la ataveve la asumã amloru e mlamulena viowa. Ana Pita pisawal pa li nalelagaena la nene vena monar avisuar ruruia vena yaru la nene ve avilovilon kare re kiela sitomena.

Ana na kila woen þelaga viowa la nene, monar yaru kilia ruru Ntewa, a monar tañan Yesu Kristo, naþa kieta Suþe, vimi ve suri na sumo e kiena maliena. Li nalelagaena lala e pogos nene, amloge lologena wo nene e yaru la naþa apisu Yesu e kilamarala, a naþa amloge kiena visena lala, e pogos naþa pian ke yaru lala.

Pita siri maki nini vena visirluaen sitomena kiena li nalelagaena lala, komin naþa e pogos nene, navianena la naþa kiela vianena pe mesmesu re poli, asumã apisawal ke asape yoko Yesu taþatete si wasuþea.

Ana Pita sape Yesu pe þasuþe re polua komin naþa Ntewa pe sinenan re yaru tai kovio poli. Naga sinenan sape yaru makega monar avilon kiela sitomena vetan kiela mlamulena viowa lala (3:9). Ana yoko naga monar ve ve piyavi re, Yesu wasuþe si imi.

Komþasnen tusi la na nini

Visena þesa 1:1-2

Malena kiena li nalelagaena lala 1:3-21
Navianena la naþa kiela vianena pi-
owaga 2:1-22

Yesu yoko wasuþe sina 3:1-18

¹ Mak nini, inu Saemon Pita na nesiria, sa naþa nepe yar na yuñãena kiena ne Yesu Kristo, a nepe kiena nalologena. Nesiri ke piñasu pan amiu, amiu naþa atol naviawaena e naga rui po paþisi sa

ke ga naþa metol sumo. Naga pe Ntewa a pe kieta natamaliaena ita punu ga, naga kila lue ga po pan ita silaga.

² Sanene, nesitoñal amiu, nemlen nesape yoko akilia ruru Ntewa kieta Suþe naþa Yesu va re laa ga wa, vano yoko naga kila kiena lemamiena a sumãarena ulemamaga e kiamiu malena.

Yesu pio ita vena teve kiena

³ Yesu po pan ita paþisi, naþa e m̃areraena na kiena urarena a kiena sinewoena, naga pio ita vena tekilia ruru naga sanene. A pogos naþa tekilia ruru naga, naga ga kila sur punu ga e kiena nam̃areraena wa nene, naþa kila malena kiena ne Ntewa a kiena þelaga wa ule e ita.

⁴ Yesu kila na tetol nalaena wo la nene naþa apowo paþisi, tepisu naþa taveve ruru nena ga kiena navisaarena lala. A e mrapa nene, tepisu naþa naga kila kieta malena pa pranar ke amio malena wa kiena ne Ntewa, a sumã miila ita vena toure matan kororak lala na sinenanena viowa lala na yomarava nini.

⁵ Komin sur ne na nene, monar am̃areran naþa akila kiamiu malena lala imi wo la ve sa nene. E naviawaena naþa teke e amiu rui, popon asikol si sinewoena. E sinewoena nene, popon asikol si kiliaena amio manmaruaena.

⁶ E kiliaena amio manmaruaena nene, popon asikol si nawanar ruruena, a e nawanar ruruena nene, popon asikol si sitomena viavi, a e sitomena viavi nene, popon asikol si þelaga wa.

⁷ E þelaga wa nene, popon asikol si sitomena wo, a e sitomena wo nene, popon asikol si sinesiena.

⁸ Þelaga wo la punu ga nene, visae asike e amiu, a visae asumã akapur ke silaga, yoko kiamiu malena kilia war mras wo la naþa kiki vaþisi. Pona kam na akilia kieta Suþe Yesu Kristo rui, a visae þelaga la nene ve su re e amiu, yoko taþatete nena akila kiena yuñãena tai.

⁹ Yar na sanene pe kilamara þala ga, taþatete visu kilale suria a kiena sitomen plas ga. Naga sinen þesan sape akevan kiena mlamulen marua viowa lala, pe

sitoñal re si sape sike e malena wo tai poli.

¹⁰ Erau lala, pe pon re yar ve sanene poli, ana nomareran amiu ke nesape kam make veve taaga monar aponli naña silaga akila yumaena wo lala vena avisawal ke asape Yesu pio amiu ape kiena, naga pe pe sur na visokanen re nene poli, a pe pe sur na kirakiraen re mēna poli, ana naga pe sur na lelaga.

¹¹ Visae akilakila mā sanene, yoko tařatete aloru pog tai, a pulutava na vaen loyuma e nasuņenena kiena ne Yesu Kristo naña naga pe kieta Suņe a Natamaliaena yoko suwowo ruru nena van amiu. Yoko aworworun ruru amiu vena ava asulue asike amio.

¹² Nekilia nesape visena la nene, pe pe urviu re pan amiu poli, komin naña apuarar ruru yam piavi rui. Ana tařatete neligan naña monar nevisasawal kařaran mā visena lelaga la nene van amiu.

¹³ Naga nene pe yumaena na kiau malena, vena iila amiuena vena ve sine-miu ve řesan re, a nekilia yoko monar nekila mā sanene vano vano-o tol pogos naña kiau malena řisi.

¹⁴ Suņe Yesu Kristo pisawal pan inu rui sape in na ve ve piavi re yoko neligan tasneu nini nevavin,

¹⁵ a sumon nene, sineun nesape nesiri plan sur make su ruru suma ga. Ve sanene, visae nevavin, ana mrapa sike řa rui vena akilia asitoñal visena la nene silaga.

Visena kiena Pita amio nalogena tařena lala pe lelaga

¹⁶ Imimi nalogena lala mepian amiu mesape kieta Suņe Yesu Kristo yoko wasuņe sina amio kiena pupia namareraena. Ana pe pon re lařas avisayu navianena la nene asave nanene na visena na sitomen kien yar ga, pona avisave nanene na sa ga suniena marua ga lala. Mekilia mevisaar van amiu mesape pe sa re nene poli, komin namareraen kiena Yesu Kristo naga pe sur lelaga naña mepisu e kilamaramimi rui.

1:17 Mat 17:1-5; Mak 9:2-7; Luk 9:28-35

¹⁷ Nanua na, mesike memio e pogos naña Ntewa mligan naurarena nae ma e peni sike e naga, a mieluaria, naña kiena visena tai molue kom meta pitomi pisayu naga, sape

“Nanene naga naruu nena napo naña sineu si pařisi, nekekaran nena ga naga.”

¹⁸ Imimi ke narui memloge pulgon nae ma e peni naña pisawal visena nene, naga nene e pogos naña mesike memio Suņe ma e tavie wa nařani.

¹⁹ Ana komin sur la naña mepisuia a memloge, mekilia ruru merarava e kimimi sitomen lala, mesape nanene naga sur lelaga la naña navisawalena nasumo la apisawalia. Kiela visena lala sane kapi vivaga wo tai vena vivagali yemalolo naña tesike ea, ana popon touloyuia ana telavia. Sanene yoko kilologia mrapa van ita vano tol pogos naña legiena viu imi mālavin ita, a verue na kolulag vam metava e kieta sinapane vena tegoli kieta sitomen lala.

²⁰ Ana sineun nesape nevisa si sur tai e lepas na visawalena kiena ne navisawalena marua lala naña asirilua sike e Tus Wa. Naga sanini, sa naña navisawalen lala nene, tařatete yar tai sunalu visave naga taaga kilia ruru kala kinasa.

²¹ Nanene komin naña visawalena la nene, tařatete amolue vetan sitomen ken yaru, ana Ninuna ne Ntewa naga miyuma e la, sumon la vena avisawal visawalena kiena ne Ntewa lala.

2

La naña apian ke visena navisokanena

¹ Ana sa naña tekilia, e pogos kiena ne navisawalena wo la na sumo, pogos lařasia navisokaninen navisawalena mēna amalmalivi ke e marana ne yeririna kiena ne Ntewa lala. A yoko ve sa ke mēna nene van ita nagane, naña pog tai, navianena navisokanena pona aim amaliv yo. Navianena kar la ne sanene, yoko awar vinaun ga navianen lařas naña pe pe lelaga re poli imi, la akilia asape amlelaga e Suņe na mava, asape

naga tamalia la, ana kiela navianen la nene akawe ke sina ga naga. Navianen la nene kilia kila kare naviawaena kiena ne nalelagaena lala, ana navisokaninen vianena la nene pe apisu kilale re asape kiela nakoena pimin la ke vilaga narui.

² La apiowa manene pañisi, a temawan tevisayu ya naña akilakila ke ne. La asape amlelaga, ana akila ke ga naña yeririna tañena la apisu kilale kiela ðelaga, asuñña apisa kare ke kieta mrapa na lelagaena pañisi.

³ Yar na visokanen lala, sinelan manene la sur lala, yoko akuan visena kiki la ve moki van amiu vañisi, yoko akilayon li naña aure amiu e suniena la naña apule e suri la naña pe pe lelaga re poli. Ana pogaga, Ntewa na pe momalio re poli. Naga mliþerela, kila ruru kiela nakoena su ruru sike nakonua rui.

⁴ Popon tevisu kilale ðelaga kiena ne Ntewa naliþereen yaru a natamaliaen yaru nanua sumo. Nañesa, asitomyuli navisi kiena ne Ntewa la nanua sumo, naña lañasa asuññalu asape asu metavana. Naga sape pe sur re tai nene poli, ana suññalu koven plan la veraga, apito tano e puluyo malolo e kapi na loge viowaena, vena asuñña e nene vano tol pupia legiena na liþere maronen yar lala.

⁵ Ana asitomyuli mñena yeririna nasumo la nene, naña e pogos kiena ne yermarua Noa. Pogos naña mlologon ke ðelaga wo kiena ne Ntewa pan la, þarila mñarera pañisi, yepel mavin ga. Ana Ntewa kila pupia womie þere plan la, ana Noa ga amio namratava puna la olua, tamalia la.

⁶ A naga sina, asitomyuli pupia pulkumali keviu lua nene naña Sotom amio Komora. Ntewa mñal kiela napiowaena lala, ana sikap mumu la apim ape posnoyavi nenaga, a naga nene vena visawalen sanape naña yoko kila va la make ga naña asike e malena viowa.

⁷ A nasitomñal maronen la nanua sumo ne, nane yaru naña Lot. Naga pe yar mesmes tai, a naga mloge lue piowagan ðelaga na kororak kiena yar la naña akilaroro ke navisaluaena, naña naga sike likan la.

⁸ Legiena make ga naga suñña pisu ke kiela malena viowa lala, a suñña mloge ke kiela viuelen lala, ana Ntewa kila sanape? Mla nakoena pa yar viowa lala nene, ana tamalia kiena yeririna wo naña Lot.

⁹ Ana visae tesitom ruru e la nene, yoko telual þelaga kiena ne Ntewa tai, naña sanini. Naga kilia ruru ve sanape naña wereplan kiena yeririna wo lala vetan sur na kilalien lala, a naga kilia uarar ruru yeririna viowa lala asuñña awar kiela nakoena lala. Yoko kila la awar malumun mña nagane sumo wa, ana e legiena naliþereena awar make ruru nena napo.

¹⁰ Visena nene tol make yeririna lala, ana tol manene laa naña asuñña ataveve ke nasinenanen viowa lala na ðelaga na mlamulena naña apaeme amio, ana tol mñena la naña pe sinelan re yagogonen poli, ape þar mñarera pañisi. Yar kar la ne sanene, aþarwarlan kiela þar mñarera la ne sanene þisa, ana aplaven mñena kiela napiowaena lala, pano pe amaraun re si sur tai poli, ana apisa kare yerkawa kiena ne Ntewa lala.

¹¹ Navisi nae ma e peni añarera taulu la nene, ana akilia asape asike e marana ne Ntewa nae ma e peni, ana amaraun visa kareen yaru la nene, ana yar la nene na pe sa re nene poli, la asitom korenan ga sur la nene.

¹² Sur la mok liu naña tepisu sane apa laa metava pona ape wa manene laa, ana yar la nene pe apisu kilale re poli, asuñña aþarnena kare ga sur wa la nene. Kiela ðelaga la sanene, kila narui la asaga sur mal tetan ga lala, naña akila ke ga þarila pe akila re suri wo poli. Akila mña wowe sanene pano pano ailan ga sa naña yaru la aligan lokulia la, awe moñar la amare, a yoko ve sa ke mñena nene van la nene, ailan ga alual kiela marena.

¹³ Yar sur la ne sanene, akekarana ga akila þaþagena lala na ve torog kareen ga kolpae, a e pogos na kilaen kamiu kinanena wa lala apim asike loyumña, kiela sitomena pulen ga kekarena na kiela viowaena lala. La na sa ga kurka pona magka la naña akila kare tasnemiwo wo lala, ana pe asitom re nena asape kiela

napiowaena lala yoko kila ke sina ga la aloge viowa manene poli.

¹⁴ Kilamarala pulen ga sira na kilaen kolau, a akan ña mlamulen viowa pano-o pe sinela maren re poli. Kam lañas naña amalum towe ga lala, aþere la narui apa amio la, a ape yar ñena la naña apian ruru la sina e mrapa na vinayaen sur lala. Lelaga nañane, la nene ape þegas tai naña yoko nasinemimiena kiena ne Ntewa yumu plan la make na wa.

¹⁵ Amligan mrapa mesmes rui apa ataveve ke narin mrapa la naña tekilia tesape mrapa kiena yaru naña Palam Peor, naña Visena Wa pisayu naga sane yar tai naña pe navisawalen þesa, ana pano naga kekaran manene kan mras nen napiowaena.

¹⁶ Ana pogos tai, milan ga naña Ntewa kila narin togki tai pis pania vanon kiena napiowaena lala. Togki lala pe akilia re apis poli, ana nanene naga pis sane yaru, þere mesmesun towe laa kiena þelaga viowa lala.

¹⁷ Yar viowa la naña nepisayu la ke ne, nekilia nevisa ñena nesape la sa ga pulus nen wii naña mema rui, yar naña moto karia taþatete lual wii ea. Pona asaga lul malolo tai, tekekarania toñape yua kove, ana peraga, lagi mlelua pano. Ana yar la nene, lelela napo pe yemalolo ga ñeke ga wa, yo ne nanene pe lele na loge viowaena.

¹⁸ Yoko monar awar nakoena na sanene, komin naña gola la pulen ga visokanena amio visvilaveena naña þere manene sitomena kiena yar taþena la paþisi. Yar taþena la nene, aþure matan yomarava nini apimi ga loyuma na wa, ana nagane yar viowa lala nene asuma apisa ke visena la naña pagan nasinena-nena viowa na mlamulen viowa la naña sike e la pimi keviu manene laa narui, ana e mrapa ke nene asuma aþere plan la ke sina ga.

¹⁹ Kiela malena sike vatanon yerkaena na kilaen mlamulen viowa rui, ana sanape naña apisa kotalia ke yar la asape visae atavevela, yoko alual malena wo? Taþatete ve sanene, komin namareraena

ya naña pe suþen kionña malena, ko ope kiena yar na yumaena narui, sane la nene, naña na nagane apim sa ga yar na yumaena na namareraena na mlamulena viowa narui.

²⁰ Visae lelaga naña asape añal kieta Suþe Yesu Kristo Natamaliaena e kiela malena, apisu kilale naña þelaga na yomarava suma kila kare la ga, kila narui aþure matania apim, sanene na po paþisi. A visae yam ve plas ga awasuþe ke sina ava e kiela malena naña aþure matan ga na wa, nanene na yoko va viowa la narui.

²¹ Visae pe akiliali re nena mrapa na þelaga mesmes po, sanene na po towe laa pan la, ana pogos naña akilia ruru po, apa li e ve tokak ga, ana siraunia aþasuþela ke sina apa varau, nanene piowa paþisi. Visena wa kiena ne Ntewa la naña amla pan la, la na akekaran þesan naña ala e kiela malena lala, ana nagane aplon ke sina masila pania.

²² Yar la ne sanene, visen lua naña pisayu la, naña tai, pisa sanini, sape
“Lokul ga kilia va kan ke sina ga kana liluaena,” *Pakaiwa 26:11*
 a nalua, pisa sanini, sape
“Visae okevan ruru kionña nompui, yoko monar yal mesmesun ga sukoþene va kupo ke sina yo ñeke ea.”

3

Legiena keviu kiena ne Suþe naña wasuþe sina

¹ Erau lala, sa naña apisu kilalea, nane kiau ñak na lua pimi pan amiu. Ya naña teke e kiau sitomena vena sirien ñaki la luoka ga nini, sineun visawalen visen wo lañas naña yoko akilia asike lue e kiamiu sitomena la silaga vena iilaen kiamiu malena lala.

² Sineun nesape popon tesitoñal ña visena kiena ne navisawalena wa la na sumo silaga, amio ñena navisaluaena viu la naña kieta Suþe Natamaliaena mla pan imimi kiamiu li na lologena lala, naña mepisawal liluen pimi pan amiu.

³ Sur þes naña sineun nesape nevisa naga sanini, nesape monar akilia sa naña

e legiena maro lala, yoko yar la naþa na visa kareen yumãena kiena ne Ntewa akilia aim añalivi. Pelaga kien la nene, la sinelan ke ga suri ya naþa asitomia, ana asitom korenan ga sitomen kiena yar taþena.

⁴ Sur tai naþa yoko avitalia ita vanonia, naga e lepas na visena kiena kieta Suþe naþa sape yoko wasuþe si imin ita. Yoko asuþa aviuvuunia, avisave “Nawasuþeen kiena kiamiu yerkawa naþa pisaaria pan amiu, nanape? Siar e pogos kiena kata apua la pimi, sur make ga na yomarava nini suþa kiriri pogaga. Imimi na pe mepisu re nena sur tai poli wa, pona kam ga apisu yo?”

⁵ Ana pogos naþa apisa ke visena la nene, la pe asitom re naþa navisaarena kiena ne Ntewa naga pe lelaga silaga, a kana visena nena kana pupia m̃areraena sike ea. Sa naþa e pogos na siiena yomarava, kiena visena ga kila sinapane, a kila yomarava nini amio kana porotano lala a kana si lala.

⁶ A siraun nene, kiena visena kila pupia womie kalo sina yomarava nini, naþa þere plan make nena sur punu ga naþa sike ea e poglis nene.

⁷ A kiena visena nena miyumuþe ke nagane na wa, suþa þuarar ruru ke sinapane a porotano na yomarava vena asuþa vano tol naþa pupia kapi na legiena na liþereen yaru yoko imi kekan plan malena kien yar la naþa pe sinelan re Ntewa e kiela malena poli. Nanene pe m̃areraena kiena ne Ntewa, ana yaru la nene pe sinelan re naþa akilia poli.

⁸ Ana erau lala, e lepas naþa na visaarena na wasuþeen sina kiena ne Suþe nene, popon naþa ve sineta þesa re naþa Ntewa naga pe pulo re legiena amio kas sane ita poli. E kiena visuena, kas manu taaga pona legiena taaga, lalua maran taaga ga.

⁹ Pona yar laþasa asitom asape naga kila malen li sur yo, pe kila re ya naþa naga pisaar poli, ana pe sa re nene poli. Naga pe kila malion re sur poli, suþa kila ke kiena sitomen piavi paþisi, komin

pe sinenan re yar tai kovio poli. Naga sinenan sape la pogos ve piavi sanene vena yar la akilia avilon kiela sitomena.

¹⁰ Ana lelaga, yoko pogos tai pupia legien kiena ne kieta Suþe imi m̃aliv e yomarava. Yoko ve sa yar na vinauena, naþa yomarava ninue sape pimi ke narui, ana yoko iilan ga naþa imi worunia. E pogos nene, yoko sinapane lala akakapuru sane polilu, yoko akokovio nenaga, a yoko kapi kekan make suria vano-o tol naþa yomarava amio sur make ga naþa sike ea, yokorena.

¹¹ Ana komin naþa yoko yomarava imi ve sur koren ga m̃eke na, nesape neviun tan amiu, nesape pogos naþa asike ea wa, popon kam na ave yaru na sanape, a popon ave wa pona akila yumãena kiena ne Ntewa ve sanape?

¹² Monar akekaran legiena nene imi, a visae kam na ave yar wo lala, ayumuþe m̃arera yoko akilia akilia imi m̃alivi vilaga.

Yoko kapi kekan ma e peni, kekan makea, a yoko imi kekan mumu make sur naþa sike e yomarava.

¹³ Ana tesumuþalu m̃arera tese kiena visaarena, naþa sape yoko m̃ata uþa viu tai, naþa peni viu amio yomarava viu, naþa pe purþes nen þelaga mesmesu make ga.

¹⁴ Erau lala, nane tesumuþate ke ne vena imi were ita teva e yo nene, ana pogos naþa pe tetol re poli wa, monar tom̃areran teve yar wa tesuþa ga, teyekiki, a tesuþa e sumare.

¹⁵ Lelaga sane Suþe pimi re poli wa, a ve tesitom re viowa, monar tekekaran naþa mla pogos pan ita vena tevilon ita, mla m̃ena pulmas pa kieta erau lala, vena la m̃ena akilia atol natamaliaena. Sitomena nene, kieta puruvi wo naþa Pol naga m̃ena pisa pan amiu nanua sumo rui e m̃aki tai, naþa siri amio manmaruaena wo la naþa Ntewa mla pania.

¹⁶ A nane visena ke nene naþa suþa kiakian ke e kiena m̃aki taþena lala, pogos naþa pisayu si na wasuþeen si kiena ne Suþe.

Kiena m̃aki la nene po pañisi, ana pogos lañasa kala navianena la urmi towe m̃aga, kila sane visen lañas naña naga siria yaru lañasia pe apulokilale re poli. Ana pogos tai, yaru la naña pe ãarila po re poli, naña pe akilia ruru re sur poli, apuloia apulolon kare kana navianena ne lala pa pe tañena, sa naña asum̃a akila ke yam mok li rui e visen tañena lala e siriena wa lala. Ana pogos naña akila sanene, pe yar tañena re la naña aloge viowagan poli, ana kila la ke ga apa e mrapa na kovioena.

¹⁷ Kiau erau wo lala, komin sur ne la nanene nesitom amiu pañisi. Nekilia nesape akilia ruru sur la nene rui, ana sineun nesape nela si visena m̃arera van amiu, nesape monar avisuar ruru amiu. Ve atam̃an re sitomena navisokanen ken yar la naña pe ataveve re navisaluaena kiena ne Ntewa poli aim aure plan amiu sina. Lelaga, pe pon re si alor vetan yo wo na viawaena m̃arera naña asike pa e rui.

¹⁸ Kiau visena maro, nesape akapuru aim amarua ruru e ãelaga wo na lemamiēna a namanmaruaena kiena ne Yesu Kristo kieta Supe a kieta Natamaliēna. Ana tela maran si naurarena vania, nagane, a e pogos la naña pimi ke ga wa, vano vano-o ve uro re, sanene.

Inu, Pita.

Maki Nasumo Naña YOANE Siriyuia Visayuena Na Tusi Nene

Suniena na plas na tusi nini

Maki ñesa kiena Yoane, naga kiena sitomena keviu lua.

Nasumo, Yoane sinenan sape visirlua sitomena kiena li nalelagaena lala naña aulo ñaki nini, vena silaga monar asikol la ruruia naña kiela sitomena ve taaga ga, a vena asikola ruruia amio Ntewa, amio narina naña Yesu Kristo.

A nalua, naga vena visaen vanilla vena ve ataveve re navianiena la naña kiela vianena pe mesmesu re poli, komin navianena la nene akilia akila kare sumãre e kiela visena na visokanen lala, ana yoko kilia kila naña li nalelagaena la tañatete si asikol ruru la e sitomiena ve taaga.

Navianena la nene asumã apian ke yaru lala, asape ñelaga viowa la apimi añalivi komin yaru la asike e yomarava, a amiyumãe ke ga e suri na yomarava la ne. Amio nanene, asitom sape Yesu, naga narina Ntewa, ana pe pe yaru ruru re sane ita poli. La asumã apisa ke asape visae Ntewa tamalia yaru, yaru nena tañatete sitomali si malena na yomarava nini, a pe pe suri re poli visae yaru na sanene kila milamulena viowa po pe kila re milamulena viowa poli a pe pe suri re ñena poli visae naga sinena si yaru tañena pona ve sinena si re, ana suri la nene maran taaga ga, pe suri na yomarava ga.

Yoane siri ñaki nini, sape kila meraravan naña naga yepen mavin sitomiena la nene pano-o pañisi, a pisawal meraravan naña Yesu Kristo, naga pe yaru nena sane ita. A naga pisaar ñarera sape yaru la naña amlalaga e Yesu, a sinela si Ntewa, monar sinela sisi la ñenaga.

Komñasnen Tusi La Na Nini

Visena ñesa 1:1-4

Legiena a yemalo 1:5—2:29

Narina Ntewa lala a narina Yermare lala 3:1-24

Ninuna naña pe purñesnen visena lelaga a ninuna naña pe purñesnen visena na visokanena 4:1-6

Pelaga kiena yaru naña sinena si yaru 4:7-21

Pelaga na lelagaena naña kilia taulu make suri la silaga 5:1-21

Yar na visawalen malena kiena ne Ntewa van ita, naga pimi e yomarava ñisi rui

¹ Sur tai, nanua sumo e pogos naña yomarava siaria, ana nagane in na nemloge, nepisu e kilamarau, in na nepisu ruru pano-o, netol nena e luñau. Sur nene, kiena kia sanini, sape Navisawalen Malena, po Purñes nen Malena, po Malena Naña Ve Uro Re Pogos Tai, nane in na sineun nesape nesiri van amiu.

² Sur nene, nanua sumo pe tekilia re poli, naga sumã ga amio Ntewa arimata pano-o, nagane na pimi ñarpoyo merarava e marata e yomarava nini narui, ana imimi moki mepisuia, a mepisawal pan yeririna lala.

³ Imimi memloge ruru nena e kiligamimi lala, a mepisu nena e kilamaramimi, ana mesape mevisawal van amiu vena kam ñena ga alelaga ea. Visae kam alelaga ea, yokorena kam ñena aim ave taaga amio imimi, sa naña imimi mepe taaga ga memio arimata Ntewa a narina Yesu Kristo rui.

⁴ Sur nene kila pupia kekarena sike amio imimi silaga, a visae auarar ruru visena la naña nesape nevisa van amiu e ñaki nini, yoko pupia kekarena nene sike ñena amio amiu, ñisi na kila ita punu ga teloge wo vañisi.

Ntewa naga pe purñes nen yomerarava

⁵ Visena naña narina ne Ntewa mla pan imimi, pisape monar mevisawal van yeririna tañena lala, sa nene, naga pisa sape, Ntewa pe purñes nen yomerarava, pe narin yemalolo re nena tai teke puna.

⁶ Ve sanene, visae tepisawal ke tesape tepe taaga temio Ntewa, ana tekila ke ga ñelaga na yemalolo la na wa, nanene

tepisokan ke ga ne, pe tekila re sur na lelaga nene poli.

⁷ Ana visae tesuñña teyal ña e yomerarava naña Ntewa sike e silaga, kila yoko telapran ita ruru wo silaga, ana tevisu tana na narina, Yesu, kilia kevan ita temekiki e kieta mlamulena viowa lala.

Nayalena e yomerarava kiena ne Ntewa: Monar teligan plan ðelaga na mlamulena viowa lala

⁸ Yeririna naña pisawo ke, pisape naga pe naviowaena su re e kiena malena poli, kiena visena nene pe pe lelaga re poli, naga pisa kotalia ke sina ga naga.

⁹ Ana visae tevisa plan ga kieta naviowaena lala, yoko Ntewa viewo ita, ðisi na war plan kieta naviowaena lala vetan ita, kila ita temekiki. Naga ga kila ruru mrapa na kilaen sanene rui, ana ita towasine ga naga sane yoko kila van ita sanena naña pisaaria.

¹⁰ Ana visae tesuñña tevirovia, tevisa ña tesape pe tekila re naviowaena poli na, nanene ita tekila sane Ntewa naga pisokan ga, a ita tekila sane kiena visena nowo na lelagaena, pe tepuarar ruru re nena e kieta malena la poli.

2

¹ Naruu lala, sineun nesape nesiri visena nini van amiu vena iila amiu avisuluþar sane pe pon re si ataþa mlamulena viowa poli. Ana visae pogos tai, amiu yar tai kila viowa, monar tesitoñal silaga Yesu sulue ga sike na, sane pe yar wa tai na waren kieta visena lala. Naga mesmes, a mekiki, naga kilia va suñal mesmes e mara Ntewa, kilia viun tania vena naga sinen ye ita, viewo itania.

² Ana mrapa na kilaen sa naña yoko Ntewa kilia viewo itania sanini, nane Yesu ga ne, komin naga pe kuþaþaena na warplanen kieta mlamulena viowa lala, ita yeririna punu ga na yomerava.

Nayalena e yomerarava kiena ne Ntewa: Monar telogear kiena navisaluaena lala

³ Visae yar tai viun ve sanini, visave: ?In na pe nekilia re poli, nekilia ruru

Ntewa, pona pe nekilia ruru re naga poli? ?In na nepe kiena, pona pe nepe kiena re poli? Ve sanene na, teviun si tania, tevisave, ?Sanape, ko na omlelaga ke e kiena visena lala, pona pe omlelaga re poli?

⁴ Nanene vanon naña visae yar tai visa sape naga kilia ruru sape Ntewa, naga pe kiena, a naga pe kila re sur la naña navisaluaena kiena ne Ntewa pisa ke ne, yar nene naga pe pisa re lelaga ne poli, pisokan ga.

⁵ Ana yar naña mlogear ruru visena kiena ne Ntewa, naga kila meraravan sane naga kekaran kemua lelaga, pimi keviu lue ga. Ana e mrapa na sanene narui tekilia ruru kemua tesape ita tepe kiena ne Ntewa na lelaga.

⁶ Yar naña naga pisa ke sape pe kie Yesu, yoko monar tevisuluþar naña naga mla kemua Yesu pe lelaga e kiena malena.

⁷ Erau lala, e lepas tai na, navisaluaena naña nesiri ke pan amiu, naga pe pe visena viu re tai naña na nanagane poli, naga pe visena tai na susumo, pe visena kiena ne Ntewa ga naña amloge pa na susumo rui.

⁸ Ana e lepas taþena tai na, pe lelaga ñena naña navisaluaena nene, naga sa ga pe urviu si tai pan ita, komin ita tepisu ke sane nagane þere ke yemalolo þaro pano, kila ke yomerarava na lelagaena pimi narui. Naga sane e malena kiena ne Yesu narui, a nanagane pimi ke ñena sanene e kieta malena la narui, ðisi na kila ita tepisu kilale ke visena viu nene pe lelaga kemua.

⁹ Visae yar tai visa sape mial ke pa e yomerarava rui, ana tepisu naga sinen kar ke wenla, kila ke piowa pania, yar nene sike e yemalolo wa.

¹⁰ Ana yar naña kekaran wenla, kila ke po pania, yar nene mial ke pa e yomerarava narui, taþatete sitoñal sape ðisi na yalwowe sina e yemalolo, lolor si pogos tai.

¹¹ Ana naga naña sinen kar ke wenla, naga ve ve sa re nene. Naga sike e yemalolo wa, yemalolo kila sane kil-

amarana þala, mial wowe lue ga e pupumalko, pe pisuluþar re kiena mrapa poli, pisuluþar re lele ne kom ke e poli.

Nayalena e yomerarava kiena ne Ntewa: Ve tekekaran re yomarava nini

¹² Amiu naru lala, amiu kiau nin sisi lala e kieta na lelagaena, in na nesiri ke visena la nene pan amiu komin kam ke narui naþa Ntewa arimata piewo kiamiu mlamulena viowa komin kia kiena Yesu Kristo, ana amiu akilia naga.

¹³ Kiamiu yermarua lala, in na nesiri ke visena la nene pan amiu komin kam ke narui akilia ruru laa naga rui, naþa naga mali sike nanua sumo, sumon na siiena yomarava nini.

¹⁴ Kiamiu yar mee lala, in na nesiri ke visena la nene pan amiu komin kam ke naþa aarera ruru po narui, amligan ruru pa visena kiena ne Ntewa teke e kiamiu malena la rui, ataulu pa Yar Viowa nene rui.

¹⁵ Sineun nesape nevisa ve sanene van amiu, ve akekaran manene re yomarava nini, pona kiena sur lala. Yar na kekaran manene yomarava nini, naga taþatete kekaran ruru arimata.

¹⁶ Nanene komin naþa sur na yomarava lala, pona kiena þelaga lala, ape taþena, pe sa re sur kiena ne arimata Ntewa amio kiena þelaga lala. Sur na yomarava la nene la sanini, lala ape purþes nen nasinenanen sur moki, ape purþes nen nawereen kilamarata, ape purþes nen warwarena e kieta malena.

¹⁷ Yomarava nini, amio kiena sur la naþa yeririna la sinelan manene silaga, naga pimi ke vena kovioena ga, ana yar naþa kila ke mesmes e nasinenanena kiena ne Ntewa, naga yoko sulue ga sike narui.

Nayalen e yomerarava kiena ne Ntewa: Monar tevisuar ruru ita vanon sinekar

¹⁸ Naruu lalo-o, nagane tesike e pog maro narui, sa naþa amloge pa rui, na yar naþa apio asape Nasinekar kiena ne Kristo, yoko kilia vim katenia. Pe tepisu re naga poli wa, ana tepisu pa narin yeririna moki na kila kareen Kristo rui,

ana kila tepisuluþaria sane yoko ve ve piavi re na Legiena Maro malivi.

¹⁹ Sinekar la naþa nepisayu ke ne, kam na akilia ke ne. Nanua, la asu amio ita asu ga likan ita, ana siraunia, asualu narui, amligan ita aþure matan ita sina apano. Nanagane na, tepisuluþar la ruru nenaga, sane pe apimi re veraga ga amio ita poli, vanon visae peraga, yoko la asu ruru ga amio ita.

²⁰ Ana kam naþa asu ruru ke ga wa, yar wa Kristo pisa ruru amiu pa rui, ana apisuluþar kiena visena, yoko taþatete aurtaman si naga.

²¹ Ve asitom re asape in na sineun nesape nevisi van amiu vanon sitomena tai naþa asape amiu na amninue ga suria, vanon pe sa re nene poli. In na nepisu sane akilia aloge ruru kilale visena na lelaga a visena na visokanen þisi rui, amiu akilia pa rui visena navisokanena taþatete molue e visena nalelaga, ana nesape nevis van amiu ve naillaar amiuena.

²² ?Ana visokanen ya ne la nene apisa ke ne? Visena ne nane, apisa sanene, asape Yesu naga pe pe Navisaarena re poli naþa Ntewa mligan pimi tamalia yomarava nini. Visena nene naga pe visena kiena yar la naþa sinela kar ke Yesu, ana yar naþa pisa sanene, naga kawe ke Ntewa arimata, a kawe ke mena narina.

²³ Yar naþa pilopu masina pa narina ne Ntewa, Ntewa taþatete se e naga, a yar naþa pisawal ruruia pisape naga mla narina ne Ntewa e kiena malena, yoko Ntewa mena ga sike amio naga silaga.

²⁴ Lologena wo naþa amloge þesania nanua sumo, naga pe visen wo a pe lelaga, ana popon aligan ruruia e kiamiu malena lala. Visae ve sanene, yoko kiamiu malena naga sua wo e Ntewa amio Narina silaga,

²⁵ nagane akilia atol malena naþa naga pisaaria sape la maran si van ita, naþa ve uro re pogos tai.

²⁶ Naga ga nene nesape nevisa van amiu e lepas kiena ne la naþa apisa kotalia amiu ke ne, asape aure amiu ava ave taþena sina.

²⁷ Kristo na miawawo amiu pa rui, ana Ninuna Wa naña amiu atolia e pogos naña, naga sike amio amiu wa. Naga kilia vian amiu e sur punu ga naña pe lelaga a memes, ana tařatete si akale yar tai naña naga kilia vian amiu sina ga e sur lařasia. Yoko akilali ga sa naña Ninuna Wa pian amiun e řisi rui, naña pisape popon amiu aligan ruru kiamiu malena to ruru lue ga e Kristo.

²⁸ Naga nene, naru lala, visae kieta malena naga su ruru lue ga e Kristo, tařatete teloge viowa pogos naña naga wasuře sina ga pun ita. Ana visae peraga, pupia memawaena, řisi na tesape tokuswan marata pogos naña tevisu naga vim.

²⁹ Tekilia tesape Kristo, kiena řelaga punu ga po a memesu, ana yar naña naga mēna sanene, tekilia tesape yar nene naga mēna pe narina ne Ntewa sane Kristo.

3

Ita tepe narina ne Ntewa lala

¹ Asitomveveli sitomena kiena ne arimata Ntewa e ita yeririna viowa lala. Naga kekaran ita keviu pařisi, pano-o kila pan ita sa ga naña tepisu ita sane narin ga lala. Ana pe ita re ga tepisu ita sa nene poli, naga mēna pisu ita sanene, komin naña pure ita tepa loyuma e namratava puna rui, sane narina wawa lala. Yar tařena lala e yomarava pe akilia ruru re arimata poli, sa naña ita tekilia naga, ana sur nene kila la pe apisu kilale ita re mēna poli, sane ita tepe narina lala.

² Erau lala, ita tekilia tevisa tesape tepe narina ne Ntewa, ana pe tekilia re poli wa, sane řisi na sirau, yoko naga kila ita teim teve ya sina ga. Ana sur tai tekilia ruruia, naña visae Suře Yesu warpoyo sina ga, yoko tevisu ruru nena naga e kilamarata napo, tevisu ruru naga, naga ke narui, ana pogos naña tevisu sanene, yoko teimi teve sa ga naga.

³ Ana yar naña sinenan sape yoko naga mēna imi ve sa Yesu Kristo, naga monar

uarar ruru kiena malena mekiki ruruia a ve wa, sa ga Yesu.

Ita narina ne Ntewa lala: Monar teligan řelaga viowa lala

⁴ Yar naña tařa mlamulena viowa, kilaro ke navisaluaena kiena ne Ntewa, komin purřes nen řelaga viowa, naga pe řelaga na monen logearen navisaluaena.

⁵ Ana pogos naña Yesu pimi e yomerava nini, naga pimi naña pe mlamulena viowa tai to re nene e naga, naga pimin vena war plan kieta mlamulena viowa lala.

⁶ Ana visae sanene, yar naña kiena malena teke ruru e naga, yoko mlamulena viowa ve su re si e naga, naga tařatete si kila naviowaena. Ana yar naña mlamulena viowa teke e kiena malena silaga, naga pe pisu ruru re naga poli wa, naga pe kilia re nena naga.

⁷ Kiau narin sisi lala, piowa naña avisa kotalia amiu. Yar naña kiena malena po, naga pe yar memesu sane Kristo.

⁸ Yar naña kiena malena piowa, naga pe yeririna kiena Yermare, naña naga pe purřes nen mlamulena viowa e yomarava, siaria e nasiiena pimi tol nanagane. řelaga viowa kiena ne Yermare kila narina ne Ntewa pitomi malivi e yomarava nini, vena we plan kiena yumāena viowa lala a kila kiena puriukawaena naga řisi.

⁹ Yar naña sike loyuma e namratava kiena ne Ntewa, naga tařatete si tařa mlamulena viowa, vanon malena kiena ne Ntewa te ea. Naga pe narina ne Ntewa, ana monar kus řelaga wo kiena ne arimana nene, řisi na tařatete si kila viowa.

¹⁰ E mrapa ne la nene ita monar tevisu kilia ruru ga sane ane pe narina ne Ntewa, a ane pe narina ne Yermare. Yar naña pe kila re memes poli, pona yaru naña pe kekaran re namratava puna poli, yar na sanene naga pe pe nin sisi kiena ne re nena Ntewa poli.

Ita narina ne Ntewa lala: Monar telogear navisaluaena nasitomen yeririna tařena lala

11 Lologena naþa amiu amloge siar e purþesia pimi, na sanini, naþa pisa sape: ita monar tekekarana ita silaga.

12 Asitomali yar sa Yermare nanua ne, Ken, naþa pe kekarana re wenla naþa Epol poli, naga mēmoñaria. Piowa naþa tekila sanene, ana popon tesitomvevelia mias ya ne naga kila sanene? Nanene vanon kiena yuñena lala, Ntewa pisu piowa ga, ana kiena ne wenla, naga mesmes ruru po, ana Ntewa kekarana, þisi na kila Ken pieluen wenla panonia, sinen karia, mēmaria.

13 Erau lala, þelaga viowa na sa nene, yeririna la akila ke pimi tol nanagane, ana ve teilan re naþa visae tevisu la avieluen ita mēna ga, avisa kare ita vanon yuñena wo lala kiena ne Ntewa naþa visae teyuñena.

14 Ana ita naþa pe sineta kar re yar la poli, tekekarana ruru na mratava pun ita, nanene pe mrapa na kila meraravanen sane temligan marena, tepim e malena rui. Ana yar naþa sitomena pe to re e naga poli, naga sike e marena na wa.

15 Yar naþa sinen kar na mratava puna tai, naga sane pe yar na wemoñaren yar la narui, ana sa naþa ita tekilia ruru þa rui, yar na wemoñaren yaru, malena naþa ve uro re pe to re e kiena malena poli.

16 Pona ita yar tai piun ke pisape, ana sur naþane sitomena, naga pe sur na sanape? Pogaga, tekilia tesape sitomena naþa pe lelaga, naga sanini: Yesu Kristo tañan kiena malena wetelu panon ita, ana visae sitomena nene teke e ita, þisi na ita mēna tetañan kieta malena vanon kieta wolai lala.

17 Yar tai naga limana pulen sur nowo lala a, wenla tai, limana plas kemua lelaga, pe kiena sur re poli. Þisi na naga pisuluþar wenla nene, ana naga kila sinen mārera laa sane pania, pe miila re poli, yar na sanene sitomena kiena ne Ntewa pe to re nena e poli.

18 Naruu lala, kieta sitomena ve e re ga e kieta visena lala. Sitomena naþa pe

lelaga, naga pe sur re tai na visaen ga poli, pe sur na yuñena a na kilaena.

19 Ana visae kieta sitomena þarlologia ruru marana sanene, nane pe mrapa naþa ita tekilia tesape visena lelaga kiena ne Ntewa þar ke mras e kieta malena. Ana ve sanene na, teloge ga wo vena vaen lavisin Ntewa, ve temaraun re si naga.

20 Pogos laþasia tekilia temaraun naga, vanon naþa yoko kieta sitomena kilia liþere ita sina, kila ita tesitoñal sina tese kieta naviowaena lala, ana Ntewa naga kilia ruru punu pa rui, ana kieta na viewoena na naga keviu manene laa sane, þar plan petan ita.

21 Erau lala, visae losineta naga merarava ruru wo, þisi na naga taþatete liþere ita sina, kila pe temaraun re nena na va suñalen se marana ne Ntewa na viunen sur tania.

22 Visae telelaga mña e naga, tekila mña sur la naþa naga sinenania, þisi na tekilia tetol suria la naþa tepiun ke tania.

23 Navisaluaena kiena ne Ntewa pan ita sanini, pisape: Monar telelaga e kia kiena ne narina, Yesu Kristo, a monar tekekarana ita silaga, sa naþa naga pisa pan ita.

24 Yar naþa mlogear e navisaluaena kiena ne Ntewa, naga sike amio Ntewa. Ntewa teke e kiena malena. ?A yoko ita tekilia tesape naga teke e ita sanape? Sur nene, Ninuna naþa naga mla pan ita naga kilia kila ita teloge kilale sane pe lelaga.

4

Ita narina ne Ntewa: Monar tevisuar ruru vanon sinekar kiena ne Kristo lala amio þelaga na yomarava

1 Erau lala: visae amiu yar tai visa ke sape Ninuna Wa teke e naga, kila ke naga pisawal ke kiena visena, popon sa amiu avisu ruruia aninuluþar ninuna na teke e naga, pe lelaga ninuna kiena ne Ntewa, po pe kiena re Ntewa poli. Ita monar tevisu ruruia komin navisawalena navisokanena lala moki asu make yo la ne e yomarava nini rui.

2 ?Ana tekilia teninu luþar ninuna la nene ve sanape? Ita tekilia tevisu luþar Ninuna Wa kiena ne Ntewa komin naga

pisawal pisape Yesu Kristo pimi pe yeririna, paeme e yomerava,

³ ana visae ninuna tai ve visa re sanene, ninuna nene pe pe kiena ne re Ntewa poli. Ninuna na sanene na molue kome nasinekar kena Kristo, naña amiu amloge pa rui sane pimi ke rui, pona sike pa e yomarava nini rui.

⁴ Ana naru lala, ve amaraun re navisawalena la nene, komin amiu asike e lepas kiena ne Ntewa, akilia ataulu la ga. Lelaga pañisi, naga naña teke e amiu naga m̄arera laa taulu naga naña sike e yomarava.

⁵ Yar na visokanen la ape yeririna na yomarava ga nini, ana visena la naña apisa ke ne molue ga e sitomena na yomarava nini, ana yeririna tañena la na yomarava nini amiyagogan la.

⁶ Ana ita yeririna na lelagaena, ita na pe na yomarava re nini poli, ita tepe kiena ne Ntewa. Yar naña kilia ruru Ntewa, naga kekaran yagogon itaena, a naga naña pe kiena ne Ntewa re poli, mon yagogon itaena. E mrapa ne la nene ita tekilia teninu luñar Ninuna na visena naña lelaga, a ninuna na visokanena.

Pelaga na sinesiena

⁷ Erau lala, popon naña tekekarana ita silaga, komin sinesiena naga pe ãelaga kiena ne Ntewa. Yar naña sinen si yeririna, naga pe narina ne Ntewa, ãarlologia ga ãelaga kiena ne Ntewa, kilia ruru Ntewa e kiena malena.

⁸ Yar naña pe sinen si re yeririna la poli, naga kilia re Ntewa poli, komin Ntewa na pe purães nen nasinesiena.

⁹ ?Ana tepisu pupia nasinesiena kiena ne Ntewa nene pogwai? Tepisu kiena sinesiena nene e pogos naña mligan narina taaga nene pimi e yomarava, vena kila ita tekilia temal.

¹⁰ Nanene nasinesiena naña pe lelaga kemua: pe naga re naña sineta si Ntewa poli, ana naña naga sinena si ita, pano-o tañan narina pitomi pe kuãaãaena pe na kilaruruen marana ne kieta naviowaena lala.

¹¹ Erau lala, komin naña Ntewa sinen si ita keviu sanene, kila po pan ita sanene,

popon ita m̄ena ga sineta sisi ita ve sanene, tekila wo van ita.

¹² Yar taãatete kirawal Ntewa, ana visae ita sineta si manene ita, yoko tevisu sane Ntewa teke e kieta malena, ana ãelaga na kiena sinesiena yoko imi ve keviu manene laa sane e kieta malena.

¹³ Ita tekilia Ntewa teke e kieta malena, a ita tesike ruru ga e losinena, komin naga mla Ninuna mesmes pan ita, pe na kilaen ita telogekilale tesape sur naña pe lelaga.

¹⁴ Tekilia m̄ena ga pe lelaga ga naña Arimata Ntewa mligan narina nene pitomi vena natamaliaena na yomarava, ve sa naña ita tepisu pa e kilamarata rui a naña tepisawal ke e yo punu ga.

¹⁵ Yar naña pisawal ke sape Yesu pe narina ne Ntewa kemua lelaga, Ntewa teke e losinena, a naga m̄ena teke e losinena ne Ntewa.

¹⁶ Tekilia ruru po naña Ntewa sinen si ita, komin naña tekilia teloge kilia e kieta malena lala, ana tekilia telelaga e kiena visena naña pisawal pan ita. Ntewa naga pe purães nen nasinesiena, ana yar naña ãelaga na sinesiena pimi keviu e kiena malena, naga teke e losinena Ntewa, a Ntewa teke e losinena.

¹⁷ Ntewa sinenan sape kila ãelaga na sinesiena vim ve keviu la sane e kieta malena lala, vena kilaen kieta ãelaga lala na yomarava nini ve sa ga ãelaga kiena ne Kristo nanua ne. Ana visae kieta ãelaga lala vim wo ve sa nene, yoko wo van ita vañisi ne, vanon taãatete si temarau po tememawa e legiena na liãereena na pimi ke ne.

¹⁸ Visae yar tai naga marau, nanene vanon naña naga pisu kiena nakoena tai pimi ke rui, a naga mloge kilale re sinesiena kiena ne Ntewa kila ruru kiena malena poli. Ana ãelaga na sinesiena napo naga kilia m̄enelua nena pupia maraüena nene.

¹⁹ Visae sineta si ke yeririna tañena lala, nanene vanon Ntewa naga sinen si ita ãesia.

²⁰ Yar naña pisa sape naga sinen si Ntewa, ana sinen kar ke namratava tai puna, naga pisokan ke ga. Visae namratava puna naña sumãa pisu lue ga ana

naga pe sinen si re poli, naga tařatete sinen si Ntewa nařa naga pe pisu re e kilamarana poli.

²¹ Navisaluaena kiena ne Kristo e kieta malena naga sanini, sape: yar nařa sine-nan sape ve yar nasinesiruruen Ntewa, naga monar sinen si ruru mřena nam-ratava puna lala.

5

¹ Yar nařa mlelaga sape Yesu na pe Navisaarena, yar nene naga pe narina ne Ntewa lelaga. Ana visae narina ne Ntewa nene visa sape naga sinen si Arimana Ntewa, naga monar sinen si mřena narina ne Ntewa tařena lala.

² ?Ana yoko naga kilia sape sinen si ruru la ve sanape? Visae sinen si Ntewa, ana mlogear kiena navisaluaena lala, yoko naga visu nařa sinen si kemua narin Ntewa la pe lelaga ga.

³ Pelaga na sinen si Ntewa naga sanini: touarar ruru kiena visena. Kiena navisaluaena lala pe urmi manene re pan ita nařa teyumaena poli,

⁴ komin ita sisi la nařa tepaeme pu Ntewa, visae tesuřal mřarera e kieta navi-awaena, ita tepe yeririna na tauluen pa yomerava nini rui.

⁵ Neviun si vetan amiu: ?Yar nařa taulu ke yomarava nini naga ai? Naga ga nařa visae suřal mřarera sape Yesu naga pe narina ne Ntewa kemua lelaga.

⁶⁻⁸ ?Ana tekilia ve sanape nařa Yesu naga pe narina ne Ntewa? Yar la telu nařa apisawal visena nene pan ita: tai na Ninuna Wa, tai na wii, a tařena na kuruta, a la telu nene apisawalia sane visena taaga ga. Wii naga pisa sape e řelaga kiena ne Yesu Kristo, nařa paeme e yomarava sanape, naga tol nakeena sanape, ita tekilia tevisuluřar sane naga pe narina ne Ntewa. Ana pe naga re ga nene poli, ana kuruta mřena pisa sape e řelaga kiena ne Yesu mřa ke na wa, nařa naga mare sanape, ita tekilia tevisuluřar sane pe lelaga. Ana metavan si nanene, Ninuna Wa, nařa kiena visena pe lelaga lue ga, pisawal meraravan mřena e maran yeririna la nakonua rui.

⁹ Ana visena la nařa Ninuna Wa kila, la aurumi pařisi, visae ve sanene monar telelaga ga ea, komin nanene pe pe visena kie yeririna re ga la poli, naga pe visena kiena ne Ntewa navisawalen sape naga pisu Narina sanape.

¹⁰ Yar nařa naga mlelaga ruru e narina ne Ntewa ve lelaga, visena la nene tawa ruru ga sike e kiena sitomena, pe sitom řele re si poli, ana yar nařa pe mlelaga re e narina ne Ntewa poli, pe mlelaga re e sur nařa Ntewa pisa meraravan ke e narina poli, naga pisu sane Ntewa pisokan ga.

¹¹ Ana visena la nařa monar tesuřal mřarera e silaga, sa nene, asape: Ntewa mla malena nařa ve uro re pogos tai pan ita, ana purřes nen malena nene na pe Narina ga.

¹² Yar nařa narina ne Ntewa teke e kiena malena, naga tol pa malena rui, ana nařa narina ne Ntewa pe to re e kiena malena poli, naga pe tol re malena poli wa.

Visen maro: Malena nařa pe luas to re e poli

¹³ Nesiri ke mřaki nini pan amiu nařa amlelaga pa e kia kiena ne narina ne Ntewa rui, vena iila amiuena ve kiamiu sitomena ve veve lua re, vena akilia ruru sane atol pa malena nařa ve uro re.

¹⁴ Pogos nařa kieta sitomena ve pepe re, ita tekilia tesuřalu mřarera e naga, řisi na sur ya ne teviun tania mesmesun e kiena nasinenanena, yoko naga loge ita.

¹⁵ Ana visae tekilia ruru sane naga mloge ita pa rui, tekilia ruru mřena sane sur ya nařa tepiun tania, sa nařa tetol pa rui.

¹⁶ Visae tevisu kieta wolai tai naga kila ke naviowaena, nařa naviowaena nene pe keviu re poli, pe torokin re yar mare vanon poli, pona wereplan si yeririna lala vetan Yesu Kristo, ita tekilia telenwoia, řisi na Ntewa kilia tamřan ga naga to loyuma e malena. Ana pe nepisa re ne-sape poga ga amiu alenwo yar nařa kila pupia naviowaena, vanon naviowaena řasia naga na marena ga, ana visae yar

tai naga kila sanene, yoko ita tařatete si tevisa sur tai.

¹⁷ Sur natařaviowaena make ga naga mlamulena viowa nene, ana naviowaena řasia ape na marena, ana řasia pe na marena re poli.

¹⁸ Ana tekilia pa rui sane yar nařa pimi pe narina ne Ntewa, naga ve kila re si viowaena na marena pona viowaena na pe na marena re poli. Yar na sa nene monar visuar ruru naga, vilon memes ruru kiena malena, řisi na yar viowa nene tařatete si kila sur tai vania, tařatete kila kare si naga.

¹⁹ Yomarava wetelu nini sike vatanon puriukawaena kiena ne Yar Viowa nene, ana ita yeririna lala nařa temlelaga, tekilia ita tepe kiena ne Ntewa ga.

²⁰ Ita tekilia sane narina ne Ntewa pitomi, mla pan ita navisu kilaleena vena tekilia Ntewa nařa pe lelaga, ana ita tesike ga e naga ga narui, amio narina nene, Yesu Kristo. Kieta Ntewa nene naga pe lelaga, ana malena nařa mla pan ita naga pe luas re poli.

²¹ Naruu lala: amiu avisuar ruru amiu, amiu alotun Ntewa nene naga taaga ga silau, ve atamřan re nono tařena lala aimi akus lelena e kiamiu sitomen lala.

Maki Nalua Naþa YOANE Siriyuia Visayuena Na Tusi Nene

Suniena plas na tusi nini

E maki kiena Yoane na lua, Yoane pio si naga sape “nasumonena”, a pisa ke sape siria “pa sira tai naþa Ntewa pisirlua naga”, a sape siri mēna “pa narina lala”. Kinashnen visena lalua nene “sira” amio “narina lala”, tesape naga pe pisa re sira tai amio narina lala, ana pisa ke “sumāre” amio “nalelagaena lala”. Maki nini pisa panila vena sinela sisi la mā silaga, a naga pisa panila sape monar avisuar ruru la, vena navianena la naþa kiela vianiena la pe mesmesu re poli ve aimi akila kare la re e kiela vianiena na visokanena lala.

Komþasnen tusi la na nini

Visena þesa 1-3

Li nalelagaena lala monar sinela si yaru lala 4-6

Visena na visaþegeen li nalelagaena lala 7-11

Visena maro 12-13

Visena þesia

¹ Inu nasumonena marua nesiri maki nini pimi pan ko, sane ope sira tai naþa Ntewa pisirlua ko, ana narumā wa mēna lala. Sineu si paþisi na vitawe amiuenta sina e maki nini, nesitom amiu paþisi, ana pe in ga taaga re poli, li na lelagaena taþena mēna lala asitoṃal amiu silau.

² Sineta sisi ita ke sanene vanon visena lelaga kiena ne Ntewa teke e kieta malena la rui, ana toṃa e ita vano ve uro re sina pogos tai.

³ Nemlen wo amiu, sane lemamena, sineyeena, a sumārena, vim kome arimata Ntewa, amio narina Yesu Kristo, sike e ita, kila þelaga na lelagaena a sitomena vim ve keviu manene laa sane e ita silau.

Ataveve þelaga na sinesiena silaga

⁴ Nesape nevisawal van ko, nepisu narumā la þasia e yo nini rui, ana

nekekaran la paþisi naþa nepisu la amial ruru ke e þelaga na visena na lelagaena po paþisi, sa naþa Arimata pisa pan ita.

⁵ Auia, nepisu sur nene, ana nesape neiilaar amiu sina, vena alogear kiena navisaluaena la, naþa ita tetol sumo e purþes rui, sa naþa ve nevisa re sur viu tai van amiu, ana nevisawal ga visena mā nena nene, naþa nesape ita monar sineta sisi ita silau.

⁶ Visae sinetan tesape tekila ve sa nene, naga kana mrapa sa nini: monar telogear visena kiena ne Ntewa. A kiena pupia navisaluaena naþa temloge nanua rui pimi tol nagane pisa sape monar teiali silau e þelaga na sinesiena.

⁷ Yeririna na visokanena lala la mokliu asike pa e yomarava rui, vena vilonen sitomena kiena ne yeririna lala. La apisa ke asape Yesu naga pe yar ga tai maran taaga ga sa ga ita, pe sinelan re asape yar la alelaga e Yesu poli, naþa asape pe Navisaarena pimi kome Ntewa a pe natamalia itaena. Yar la na sa nene, ape yar na taþalien yeririna ga lala, ape nasinekar lala kiena ne Kristo.

⁸ Visae ve sanene, monar avisuar ruru amiu e visena la ne sanene, vena ve akila pal re sina ga malena wo naþa memiyumāen māreren vanon amiu. Monar asumal mārera ga, þisi na akilia atol kiamiu nalaena nowo punu ga sirau.

⁹ Yar naþa sumālu, pula petan kove pa vanua, pe mlelaga re si e na vianena na Kristo, naga pe pe kiena ne re si Ntewa poli. Ana yar naþa sumā ruru ga loyuma e kieta visena na lelaga lala, Ntewa arimata amio narina asike e naga.

¹⁰ Visae akirawal lala tai imi mālivin amiu, ana pe pisa re visena la naþa mesmes sa naþa kieta na kilapianena poli, aligan lua si naga vano. Ve aure re naga va e mamiu yuma lala, ve aurear re naga su amio amiu,

¹¹ visae peraga, amiilaar ke naga pe na kilaen kiena yumaena viowa nene pa ke metava ne.

Visena maro

¹² Visena moki navisaena sike ga wa, ana pe sineun re neligan se e maki nene

poli. Yoko nekilalia nevim nevisu amiu ga, vena tekilia tevisi ruru ga van ita e ga e marata. Visae ve sanene naga po manene laa sane, yoko ita punu ga tekilia teloge wo vaḗisi.

¹³ Lueña taḗena ta nene, naḗa Ntewa pisirlar naga suḗalu sa naḗa ko, narina ḗena ga lala asike e nini, apisa ke asape Ntewa visa ruru amiu.

Nesape naga ga nene yo, naḗa nesape nevisa, visena maro ga e nene.

Maki Na Telu Naþa YOANE Siriyuia Visayuena Na Tusi Nene

Suniena plas na tusi nini

E maki kiena Yoane na telu, naga pio si naga sape "nasumonena", a naga siria pa yaru tai, kien kia Kaias, naþa naga nasumonena tai na sumare. Mieluar Kaias nene, komin naga miila ke li nalelagaena lala, a pisa pania vena naga ve taveve re þelaga kiena yaru viowa tai naþa kiena kia Totriþas.

Komþasnen tusi la na nini

Visena þesa 1-4

Nasumonena mieluar Kaias 5-8

Nasumonena naga pisi kawe visena kiena Totriþas 9-10

Nasumonena kekaran þelaga kiena Timitrias 11-12

Visena maro 13-15

Visena þesia

¹ In na yermarua nasumonena nesiri maki nini piþasu, wolai naþa Kaias. Pona ita laþasia apieluen ko ke yo, ana nesape nevisa van ko nekekara paþisi na nepitawe ko sina e maki nini, komin nesitom ko paþisi, taveve þelaga wo na visena na lelaga kiena Suþe.

² Erau, nekilia sane ko na osuþa ga omloge poga ga silaga komin kioþa malena teke pa e limana ne Ntewa rui, ana nemlenwo ko ke silau, vena kioþa yuþaena la wo lue ga silau, a vena inanena ve kila kare re yepemþa.

³ Nanagane na pe yam piavi re poli, wenlaita þasia apim atol e nini, la asunyu pan inu sanape naþa ko na otaveve ke visena na lelaga kiena ne Suþe, okila ke kiena yuþaena wo lala pano-o yar la apisu sane kioþa malena naga mesmes nenaga. Kiela visawalena kila sineu kekara na kekara paþisi.

⁴ Pe sur re si ta naþa kilia kila neloge wo sanene poli, ana pogos naþa nemloge naruu la asuþalu ke mþarera sanene e visena na lelaga kiena ne Suþe, naga nene na nepisu po paþisi.

Kaias naga pe yar tai naþa akilia awasinea

⁵ Erau, potena van ko e yuþaena la naþa omiyuþaen ke pe na iilaen yar la naþa amial ke amio Lologena Wo, pogos naþa apim atol amiu. La apim sane ape wolawa ga lala, ana amiu þasia amon visuar laena, a ko, ko na okila po pan la paþisi.

⁶ La apim apisawal pan na lelagaena lala e sumare nae e nini rui, asunyu yuþaena wo na kioþa sinesiena. Ana nagane yar taþena si laþasia apim asike amio ko nanagane, ana nepiun tan ko vena ko oiila la mþena ga. A visae akila yuþaena punu þisi, popon akilia avisuvevelia e narin sur tai, vena iila laena e kiela mrapa, sane mesmesun na kilaen van yar naþa miyuþaen ke yuþaena kiena ne Ntewa.

⁷ Lala nene amialin ga sur nene, pogos naþa la apa amlologon ke visena pan yar la naþa pe amlolaga re poli wa, la pe sinelan re asape la nene avisuar la e sur tai poli, komin pe amla re Yesu e kiela malena poli wa.

⁸ Ana ita naþa temla Yesu e kieta malena, teke e ita narui vena iila laena. Popon teiilaar la, teiila la, vena kilaen sane ita mþena ga teyakolkol temio la, ita punu ga na yuþaenen veraga e visena na lelaga kiena ne Suþe.

Totriþas naga pisuar sumare pe po re poli

⁹ Pona ko na okilia pa yo rui naþa in na nesiri maki panon sur nene pan nalelagaena lala e sumare rui, ana Totriþas nene, naga sinenan pisape ve suþen la, naga pe pisu kilale in re poli, naga pe sinenan re yagogonen kiau visena la poli, naga pisawo ke yuþaena kiena Suþe naþa memiyuþaen ke ne.

¹⁰ Naga pis ke paþisi, pisa ke visena viowa lala moki pan imimi, pisa kotalia

kare imimi pařisi. A pe pis viowa re ga poli, ana miyumãae m̃ena piowa ga, vanon nařa yar la nařa akila ke yumãen kiena ne Ntewa aňalivin amiu, pe sinenan la re poli, pisape awasuře la sina. A metavan nene, pogos nařa amiu řasia apisuar la, amiila la e yumãena nařa lala apiminia, a naga sumãalu koven plan amiu m̃ena petan sumãare. Sur la nařa naga kila ke ne pe mesmes re nena poli, pogos nařa sa neviňasu nekaten amiu, yoko ita punu ga teva lele taaga tevisaweke tekila ve sanapenia.

¹¹ Erau, nesape nevisa van ko, yar nene kila piowa pan ko pařisi, a piowa ga nařa ko m̃ena okila si viowa sanene vania. Ve otaveve re řelaga viowa, ko na monar otaveve řelaga napo. Yar nařa kila po pan yeririna tařena lala naga pe yeririna kiena ne Ntewa lelaga, ana yar nařa kila piowa pan yar tařena, naga pe pisu re Ntewa poli wa, sike perina wa.

Timitrias naga pe yar wo tai

¹² Ana Timitrias nene, naga yoko iila ko. Yeririna la akekaran naga, apisa asape naga miyumãae po pařisi, a visena kiena ne Ntewa pisayu ke řelaga la nařa sike e kiena malena, pisape po pařisi. Ana in m̃ena nepisu sane pe yar wo tai, a nekilia sane ko na omlelaga e kiau visena, sane nepisa ke sur lelaga pan ko ne.

Visena maro

¹³ Sur la mokliu navisaen van ko sike ga wa, ana pe sineun re nesiri e m̃aki nini poli.

¹⁴ Ana sineun nesape ve yam ve viavi re na neiňasu nevisu amiu, řisi na tekilia tevis van ita e ga e marata.

¹⁵ Sumãare řike amio ko. Kiomã erau lala nae e nini asape Ntewa visa ruru ko. Ana awis, ovisa van erau la punu ga nařa amiu asike ne, ovisave Ntewa visa ruru amiu m̃ena ga.

Nesape naga ga nene yo nařa nesape nevisa, visena maro e nene.

Maki Naþa SUT Siriyuia Visayuena Na Tusi Nene

Suniena plas na tusi nini

Maki kiena Sut, Sut siri e pogos naþa navisawalena a navianiena la moki asumaga naþa la asape amlelaga e Yesu, ana kiela vianiena la pe mesmesu re poli. Ana komin suri ne nanene naga pisa pan li nalelagaena lala, vena monar avisuar ruruia vena yaru la ne sanene ve akom re varaun la, vena akila la aloru. Maki na plas ga nini, kana sitomiena naga maran taaga amio maki kiena Pita na lua, naþa sape li nalelagaena lala monar atarar þelaga na lelagaena naþa Ntewa mila panila mārera, naþa yoko sike sike luwe vano ve uro re.

Komþasnen tusi la na nini

Visena þesa 1-2

Pelaga a vianena kiena navianena piowa, a kiela nakoena 3-16

Visena na kilapegeen li na lelagaena lala 17-23

Visena maro 23-25

Visena þesia

¹ Inu Sut, naþa nepe yaru na yumāena kiena ne Yesu Kristo, a nepe wenla Semes, nesiri maki nini piñasu. Nemligan pimi pan amiu yeririna la naþa Ntewa arimata pio amiu ape kiena rui, naþa naga sitom amiu paþisi, a naþa asike vatanon navisuar ruruena kiena ne Yesu Kristo.

² Kiau leniena nesape sineyeena, sumārena, a sitomena, la aim aule e amiu, asumā aim ave keviu manene laa silaga.

Maki nini na e lepas kiena ne la naþa apilon kare ke visena kiena ne Ntewa

³ Erau lala, sumo sineun nesape nesiri maki tai van amiu vena visawalen sitomena laþasa e lepas na natamaliaena naþa ita punu tetolia, ana nanagane ga ne visena tai kom pun amiu pimi tol inu, ana

nepisu sane monar nesiriyu suri taþena nene narui.

Nemloge sane suri laþas pe po manene re poli, ana nesape nevisa van amiu aviawa mārera, amāreran naþa atarar ruru kieta nalelagaena. Kieta nalelagaena nene, Ntewa mligan pitomi pan li nalelagaena wa lala nasumo e pogos ta rui, ana pe nakepuen re si poli pona pe naliganen re si taþena mon metavan poli.

⁴ Ana suri naþa nemloge, nepisu sane yaru la naþa apimi aþarpran amiu, la akepu ke kieta nalelagaena rui. La nene, pe mesmesun re awarpran amiu poli, apim vinau ga, pe akom re e pulutava poli, ana nanagane asike pun amiu rui. La nene ape nasinekareen kieta nalotena, la pe sinelan re Yesu Kristo naþa naga taaga pe Yerkawa a pe kieta Suþe. Ntewa pisape sanene, sape e kiena lemamiena, naga kekaran viewoen kieta mlamulena viowa lala, ana la nene apilopu ke sina ga kiena visena, asumā apisa ke asape visae sanene, akilia akila mlamulena viowa ya naþa la sinelania, pe pe sur re tai poli, yokorena Ntewa viewo la wo ga ne. Visena nene piowa paþisi, a la naþa asumā apisa ke sanene, Visena Wa pisaar kiela nakoena nanua sumo rui.

Yeririna viowa la nene yoko monar atol nakoena

⁵ Popon asitomyuli la þas naþa akila piowa sanene, ana Ntewa mla ruru nena nakoena pan la. Suniena la nene apian ruru amiu e rui, pona sinemiu þesan yo rui, ana yoko nevisa si van amiu.

Nasumo, naga le Israel la nanua amiyumāe korena garu Isip. Ntewa tamalia pupia þegas nen yeririna la nene, þere plan la sina ga garu Isip, ana sirau-
nia, la mok liu naþa apilopu māsila pania, ana naga mē plan la amarmare.

⁶ A nalua, naga navisi la naþa asuþes ma e peni. Ntewa mligan la e yo wo tai naþa mon meta rui, ana pe sinelan re poli, sinelan asape akus ke sina ga lelana, ana kila sanene narui naga piar la e sen lala, naþa taþatete akekapil vetan la pogos tai. Naga kila lelela taþena e yemalolo, kuan

plan la apa asike ea asumã vano-o tol pupia nakoena e Legiena Maro.

⁷ A natelu, naga le Sotom lala amio le Komora lala, amio yaru taþena lala na pulkumali la naþa lavisin la. La mña ga sa ke ga navisi la nene, kiela sitomena la pa laa metava. Pe ataveve ruru re þelaga mesmesu naþa Ntewa mligan sike e ita poli, ana asumã akila ke ga naþa yermene pa þere ke sina ga yermene, ana nasinenanena na kororak la ne sanene keviu manene la pu la silaga. Ana monar tesitom ruru ya naþa pimi mñalivin la nene. Pupia kapi kekan la, ana asumã atol ke nakoena nene na wa e kapi taþena naþa ve vito re tano pogos tai.

Yaru viowa la nene la apano-o apiowa manene laa

⁸ Ana yaru viowa la nene naþa apim asike amio amiu, la mña nene akila ke mlamulena piowa sa ke ga. Asumã apisu ke sur viowa lala e kiela mñienena lala, ana ya naþa la apisuia, sinelan asape akila. Akila suri piowa la e tasnela lala, akovenlua ga visena kiena yaru naþa sape visli van la, a asumã apitalia kare ke namareraena wo taþena la naþa taþatete tevisuia.

⁹ Ana namareraena taþena la nene pe nakirakiraen re nena amio poli. Tekilia tevisu naþa Parnavisi Maikel, pogos naþa pepeyu ke amio Yermare, sape lalua nene ane yoko kus tasnena ne Mosis, ana pe pis re piowa pan poli. Pona tesitom ke tesape naga popon visa visena mñarera pona visena na sinekarena lala van yo, ana naga pe pisa re poli, pisa ga pisape "Ntewa Namava yoko vis van ko na wa."

¹⁰ Ana yaru la nene, apis piowa a apisin sinemimienena e suri punu ga. Suri la naþa akilia pona sur naþa pe akilia re poli, ana la apisayu kare pa piowa ga. Kiliaena naþa la atolia, maran taaga ga amio kiliaena kiena ne suri mali, naþa suri ya naþa mloge sape kila, po pona piowa ga, ana kila ga narui. Pelaga piowa la naþa asumã akila ke nene, kila sane kiela vianena lala pe na visokanen ga, pe mesmesu re poli, taþatete nena sumãlu.

Yaru viowa la nene akila kare yumãena na sumãre lala

¹¹ La asumã amlulu ke mrapa namarena nene naþa yaru nene Ken mlilu nanua sumo, komin naþa naga sinen kar wenla. Ana yaru viowa la nene amligan la asike mña e yo viowa nene naþa Navisawalena Pelamã mligan naga se sumo, komin naga pisa visena naþa pe mesmesun re vena tauluen kilavaru e poli, ana kiena visena kila yeririna kiena ne Ntewa lala apa amlotun ntewa taþena. A ta sina, amloru apito akovio e pulus nen porotano naþa Kora nasumo pito kovio ea, na nene e pogos naþa porotano naþa naga sumãlu sike ea purþaia, komin naþa naga kawe visena kiena ne nasumonena naþa Ntewa naga mliganaria.

¹² A pogos naþa aim lele taaga vena kilaen kinanena naviranaren kiamiu sinewo, ana la nene asike sane piamne tai naþa tapolou mñeke vatanon sive, naþa visae waa va la lavisinia yoko va velan ga mñeke ea. Akila kare ga kamiu kinanena la nene, naþa akinan kar ga paþisi, amun wii pano-o akilalu þarila, amãaga paþisi, a pe asitom re yaru taþena poli, pe asitom re sur ta poli.

Yaru la ne sanene sa ga lul naþa lagi kus pa þaro ga, pe mligan ruru re kana yua pitomi kove kata lokove poli. La sa ga laki tai naþa atelua mon mñaga menununu, vanon pe þar re mras poli.

¹³ La sa ga pupia sive naþa þan wowoia kuan kana sirpup amio lakee pe kororaki ga pa sike ura. La sa ga verue naþa mlai e sinapane, naþa asu yam plas ga þisi na akokovio make sina, apa asulue e pupia pupumalo na yemalolo.

Navisawalena Inok nasumo naga pisayu yaru la ne sanene rui

¹⁴ Asitomyuli mña visawalena tai kiena ne yermarua Inok nanua susumo laa rui, naþa naga molue kome lus olua kiena ne Atam. Naga pisayu ke yaru viowa la ne sanene narui, naþa naga pisa sanini, pisape "¡Avisuaria! Yoko Ntewa Namava vitom amio kiena navisi wa la ve tenario,

¹⁵ vena liṭereen yaru viowa na kilaen mlamulena naṗa pe amlogear re naga poli. Yoko naga la nakoena van la komin kiela yuṁaena naviowaena na ṗarnarera, a komin kiela visen viowa na sinekar la naṗa akoven e marana.”

¹⁶ La naṗa apim asike pumi, visena nene torokin la nenaga, vanon la ape yar na vis mumuena, la ape yar na kaween visena e sur punu ga, la ape yar la naṗa sinelan la ga, a la ape yar na vilavenen visaen pupia visena lala. Ana visae sinelan atol sur tai pumi, monar avisuar ruru la, vanon la ape yar na visen kiki a ape yar na visruruena ṁena ga.

Nalologena la ṁena apisayu yaru la ne sanene

¹⁷ Ana amlilu kiau erau lala, popon asuṁa asitomyu ṁena ya naṗa nalologena lala kiena ne Suṗe Yesu Kristo apisape yoko imi ṁalivi na wa.

¹⁸ Asumā apisa ke pan ita apisape “E pogos maro, yoko yar la avitalia lele kare yuṁaena kiena ne Suṗe amio kiena yeririna lala. Yoko akila ṗarila, akila ga ya naṗa kiela nasinenanena viowa la sinelania.”

¹⁹ Yaru la ne sanene la asape kiela ṗegas ga naga po, asape la ga amiyuṁae ke e Ninuna, ana sineun nesape nevisawal van amiu nesape la amiyuṁae ke ga e sitomena na yomarava nini, Ninuna Wa pe su re nena e la nene poli.

Visena na iilaaren li nalelagaena lelaga lala

²⁰ Ana amiu, kiau erau lala, popon kiamiu yuṁaena e kieta lelagaena wa naga suṁa ṁareraṗ lilue va metava. Monar alen silaga e ṁareraena kiena ne Ninuna Wa.

²¹ Aligan ruru amiu asu luen ga vatano e sinesiena kiena ne Ntewa, a ava ruru amiu asuṁa avisu ga Suṗe Yesu Kristo, vano-o naṗa naga, e kiena sineyeena, wereplan amiu ava e malena na pe luas re poli.

²² Yaru naṗa sitom ṗele ga, aiila naga vena kiena sitomena imi ṁarera sina.

²³ La moki na sanene asuṁa e is nen kapi, lavis akekapil avito e narui, ana

avitaṗilin aure plan la, atamalia la. Popon sinemiu ye yaru lala, ana laṗas naṗa apiowa laa sane, amaraun la towe ṁa ga. Kiela mlamulena a kiela namnamena, tol make ga kiela malena a kila kare kiela ṗelaga punu ga, a suṁa e tasnela make ga, a monar ve ave erau manene re amio la, alon la towe ṁaga.

Visena maro: Leniena na yeluaren Ntewa

²⁴ Ana teyeluar Ntewa, naṗa naga kilia tarar ruru ita vena ve telor re, vano-o naga were ita teva tesuṁalu tese e kiena naurarena wa, naṗa kieta malena ikiki ruru wo e marana, a tetol pupia kekarena.

²⁵ Memieluar ko Ntewa na mava, naṗa ko ga taaga ope Natamaliaena. Mepisirilua kioṁa kia, komin ṁareraena a puriukawaena a nasuṗeena naga pe kioṁa ga. Memieluar ko pimi kome Yesu Kristo kiamimi Suṗe, siar e pogos la nakonua rui, pimi tol nanagane, vano-o ve uro re, sanene.

NAKILOGIAENA

Naña Yoane Pisuia

Ana Siriyuia

Visayuena Na Tusi Nene

Suniena plas na tusi nini

E tusi nini, Yoani siriyu suri la naña Yesu Kristo kila meraravan pania. Tusi nene, kiena kia na plas “*Nakilologiaena*”.

Yoane siri tusi nini e pogos naña le Rom lala akila suri m̄arera manene la pañisi pa li nalelagaena lala, a asum̄a am̄em̄om̄ari la ke amarmare, komin naña amlelaga e Yesu Kristo. Yoane siri m̄aki nini vena visirplanen sitomiena kiena la nene, vena asum̄alu m̄arera e pogos m̄arera lala.

E tusi nini, tekilia teulo suri la naña sane m̄eniena naña Yesu kila meraravan pa Yoane, naga pisayu totou na suri lala vena li nalelagaena la e pogos nene akilia alogakilalea kana kinasa. Ana yaru tañena lala tañatete akilia kana kinasa. Sitomien kiena totou lala na tusi nene sanini. Yesu Kristo, naga pe Ntewa namava, a pe kieta Suñe, a e limana, Ntewa yoko kila kare make nena Yermare amio nasinekar tañena lala. Pogos naña kila make yum̄aena nene, yoko naga la nalaena kiena yaru la naña asum̄alu m̄arera e kiela lelagaena lala. Yoko were la ava asike amio naga mae peni vii a e yomarava vii naña naga kila ruru make rui.

Kom̄pasnen tusi la na nini

Visena ãesa 1:1-8

Suri ãesa naña Yoane m̄enia pisuia, ana lum̄aki lala pae sum̄are olua 1:9—3:11

Tusi naña ve yaru vike re, naña suri la olua sike ea 4:1—8:1

Kumasua olua 8:1—11:19

Alkita amio suri mali lua naña la api-owa pañisi 12:1—13:18

Suri na m̄eniena tañena la naña Yoane pisuia 14:1—15:8

Pialora olua naña apulen sinemimiena kiena Ntewa 16:1-21

Ntewa kila kare pulkumali naña P̄apilon a taulu surmali naña piowa, amio navisaluaena kokani, amio Yermare 17:1—20:10

Ntewa la nakoena va yaru lala e legiena maro 20:11-15

Peni vii amio yomarava vii, a Yerusalem vii 21:1—22:5

Visena maro 22:6-21

Navisa meraravanen tus nini

¹ Tus nini naga nakilologiaena na sur ya la naña yoko aim am̄aliv e legiena la naña pimi ke na wa. Ntewa sinenan yar la naña amiyum̄ae kiena ke e yomarava la monar akilia ruru sur la nini, ana naga mla nakiliaena la nene pa Yesu Kristo, yoko Yesu pitetalia kiena navisi tai pimi m̄alivin kiena yar na yum̄aena naña Yoane, kila sur la nene pimi ãarpoyo e kiena m̄enien tai.

² Yoane tol m̄eniena nene, ana pisu kilale sape nanene visena kiena ne Ntewa pe lelaga, pe visena lelaga nena napo naña navisa meraravanen ya naña yoko Yesu Kristo yum̄aen sirau, kila narui siriwal ruru make sur naña naga pisuia, vena nasirau takilia tauloia.

³ Ana yoko yar a naña wolo visena na visawalen la nene, pona yagogonia, ligana ruru teke e sinena, yoko na visaruruena kiena ne Ntewa ve keviu e kiena malena, komin naña pogos na legiena keviu nene pimi ke lavis manene laa narui.

Yoane siar visawalen kiena m̄eniena e visen tai nayeluaren Ntewa

⁴ In na Yoane, nesiri plan visena la nini im̄asu van amiu ãegas na lelagaena la olua naña asike e pulkumali lala e pupia lepas naña tepio tesape Esia. Nekekaran naña nevitawe amiu e kia kien naga naña sike na konua rui, sike nanagane, a yoko sike sike lue. Nemlen wo amiu ke nesape pupia lemamiena a sum̄are sike e kiamiu malena la silaga, naña yoko tol amiu imi kome kieta Ntewa nene amio kiena ninuna olua naña asm̄al asike vamon kiena lele wa na totanoena.

⁵ A kilia imi m̄ena kome Yesu Kristo, naña naga masisu m̄a pano kana kuruta

mlau, siraunia naga ðes naþa mal si petan marena, naþa nagane naga pe þarin suþe kiena ne þarin suþe na yomarava lala.

Ee, Yesu Kristo ke nanene narui naþa naga sinen sii ita paþisi pano-o tamãan kana kuruta mlau vena ul plan ita vetan koaena na kieta mlamulen viowa lala,

⁶ ana naga pisirlua ita teim teve mratava ve taaga na lus kiena ne kiena narin suþe lala, a naga mligan plan ita vena teiila naga sa naþa tepe yar wa na yuãaena kiena ne arimana, nane Ntewa na mava.

Yesu na kila po pan ita sanene wa, ana popon teyeluar kiena kia, tevisirlua naga va manene laa metava, vano vano-o ve þisi re pogos tai, sanene.

⁷ Avisu ruruia! Naga ke narui naþa suãa kupanpo lul la metava mãlavin sape vitom tano! Yoko ita make ga kilamarata visuia, ore, amio mñena la naþa asuar naga e lak torovia, la mñena yoko avisu kilale si naga. Ana yoko pupia sineyeena a tagena molue e yeririna na yomarava lala pogos naþa asitomãal si e ya naþa la akila pan nanua sumo. Yoko ve sa ke nene narui, nevisa "sanene" ea.

⁸ Popon tevatanon Suþe Ntewa, Ntewa na mãreraena nae meta manenea, naga naþa sike kemua rui, sike nagane, a yoko sike sike lue, naþa kiena visena urmi tai pisa sanini, sape "In na nepe purþesa, in na neve luasa."

Yoane pisu totou na Yesu

⁹ Kam erau make lala, in Yoane in na nepe wenla amiu, naþa nevisawal sur make van amiu. Nesape nevisawal van amiu komin naþa ita ke narui naþa tepe kiena ne Yesu, ita ke narui naþa tesike vatanon kiena nasuþenena, ita ke narui naþa tesuãa toþar pae ke nalogeen viowa na pog mãrera nene, a ita ke narui naþa tesuãa takawean ita ke temio sitomena napiayavi.

Pogaga, kiau sunena va sanini, sane nanua sumo, nesuãa nepisawal ke visen kiena ne Ntewa, nemlologon mña Yesu Kristo pano-o, le Rom la amla nakoena pan inu, amligan inu nepim nemiyuãae

korena e narin purvanua nini, kien kia Patmos.

¹⁰ Ana e Legiena Wa tai, nesuãa sane nemloge sane Ninuna pimi e inu, nemloge pulgo tai varaun inu, pulgon keviu sane kumasua mielu, pisa sanini sape

¹¹ "Ya ne yoko ovisu ne, ovisuia osirilua va e tus tai, yoko oligan va teliliv viora e suãare punu ga na lepas nae Esia, vena akilia auloia.

Suãare la nene, la olua, nane Episas, Suãana, Pekaãam, Taeatara, Satis, Pilatelpia, a Laotisia."

¹² Pulgo nene suãa pis pan inu sanene, ana sineun nesape nevisu ane sanene, noþarpu inu sane nepisu lan kantel ga la sike na, la olua naþa amiyuãaen e kol.

¹³ Lan kantel la asmãal ga asike sanene, ana yoko nomãal yar tai suãal sike likan la, naþa naga sanena naþa asape Narina ne Yeririna. Naga miyen kulsota piavi tai, amio kulmrae tai naþa amiyuãaen e kol, atelan þaro e yerena.

¹⁴ Vilþarina, miyuwowo na miyuwowo manene laa, a kilamarana tego sane kap naþa mluamene.

¹⁵ Lana mãrera ruru po, sane pototo naþa mãrera ruru po, pilavila, a pogos naþa naga pis, pulgona mñaaga sane sii naþa þanpo e pianñe.

¹⁶ Naga suãalar suãa ga sa naþa e limana marua, mlarar ke verue olua, a playu na mara naþa mal na mal e lepas luwoka molue ke kome logona. Marana mñena ga, suwala, miyuwowo na miyuwowo, sa naþa mrae tego mãrera kolpae.

¹⁷ Nepisu sanene, lelaga, kila narui nemare nenaga, nemlor nena e mialana. Ana kian limana marua pimi tol inu, pisape

"Ve omarau re, in naþa nepe nasiarena a nepe naluasa.

¹⁸ Naga naþa pe purþes nen malena, inu, komin nemali, þisna nemare, þisna nemal sina, ana nemal lue narui.

In ke narui naþa ki namarena amio ki na pulukapi viowa kiena ne yar na marena lala sike e luãau.

19 Ana marauen toko, osiri plan ga ya naña opisu ke ne, naña lepas nanagane, p̄arar lepas naña na legiena la naña pimi ke na wa.

20 A nevisa sur ta van ko sumo wa, e lepas na verue olua naña opisu e lum̄au, amio purp̄es nen kantel olua naña amiyum̄aen e kol. Sur la nene sane kiliaen tai naña tapolou, ana kala kinasa sanini, verue olua nene, naga navisi la olua vena visuaren sum̄are la olua.”

2

Lum̄aki na sum̄are olua

1 Ana Yesu pisa ke sina pan inu, sape “Nagane yoko nevisawal ya naña okilia osiri va vininua sum̄are olua nañani.”

Mak nasumo, naga va e sum̄are nae Episas, naga sum̄are naña pe sinesiiena su re e poli

“Osiri p̄esan m̄ak va van navisi na sum̄are na pulkumali naña Episas, osiri sanini, ovisave ‘Visena nene pimi pan amiu pimi kome naga naña mlarar ke verue olua e limana marua, sum̄a mialoro teteliv ke likan miasin kantel la olua nañani.

2 “ ‘Naga pisawal pan amiu sanini, sape, “In na nepisu kilale amiu rui. Nepisu kiamiu yum̄aena wo lala, nepisu naña āpio pāpisi, nepisu naña am̄areran amiu amio kiamiu sitomena viayavi lala po pāpisi. Nepisu m̄ena po pāpisi sa naña pe atam̄an re yar viowa la apim akila kare amiu poli, komin naña lāpas, pog naña apim am̄alivin amiu, apisape la ape li na lologena, ana sa naña kam na akilali la, a apisuveve ruru la, ana akirawal rui sane apisokan ga.

3 Komin ga kiau kia naña amla ke rui, kam na apane pog m̄arera lala, a la akila kare amiu, ana nekilia rui kam na pe amligan re poli wa, kam na apuarar ke m̄arera wa, a sitomen naña kam na asape sinemiu male pāpisi, pona amloge sa naña toroki, nanene naga pe to re nena e amiu poli.

4 “ ‘ “Kiamiu p̄elaga la nene na po pāpisi, ana lelaga, sur tai teke naña kam na asum̄a akila ke ne naña in na pe nekekarar re nena ga, a nanene na popon nevisawal mesmesun nena van amiu. Naga sanini, naña sane pupia sinesiiena naña tōp̄esan e amiu, nagane pito laa tano, pe sa re si nanua poli.

5 Akilali naña sinemiu wasūpe si e pupia p̄elaga na sinesiiena wo nanua ne, naña sinemiu sii inu pāpisi, a sinemiu siisii amiu amio yar tāp̄ena lala. E pogos nene na po na po, ana nagane na, pito tano na pito tano. Ana pogaga, monar avilon amiu ga, a monar awasūpe amiu e yo wo naña asu p̄es e sumo. Ana visae ve avilopu amiu re, nekilia nesape yoko neim nom̄alivin amiu, neurelua purp̄es nen kap vivaga naña sum̄al sike ne pivaga ke likan amiu nagane.

6 “ ‘ “Lelaga, naga nene naga kiamiu pupia napiowaena tai ne nepisa ga pan amiu na wa, ana sineun nesape nevisawal m̄ena van amiu sane kam na akila m̄ena pupia sur wo tai, naña nekekarar pāpisi. Nane naña kam na asum̄a akawe amiu ke amio la naña akila ke sur nawowe tāp̄ena lala, naña yar naña Nikolaita mlologon p̄esania. Apiowa ga, in m̄ena ga yepmavin nenaga.

7 “ ‘ “Yar naña kiligan teke ea, popon loge kilale ya naña Ninuna ne Ntewa pisawal ke pa p̄egas nen li na lelagaena lala. Yar naña sum̄al m̄arera sum̄a vano o taulu naviowaena, yoko netam̄an vania vena kilia va su nena loyumā likan lokove nowo kana ne Ntewa, va kan mrasnen lak na malena.” ‘ ‘

Mak na lua, naga pa e sum̄are nae Sum̄ana, naga sum̄are naña yar la sinela karia

8 “Monar osiri m̄ak va va navisi na sum̄are na pulkumali naña Sum̄ana, ovisa sanini, ovisave ‘Visena naña pimi pan amiu, pimi kome naga naña naga p̄esa a naga maro, naña am̄em̄ar mare, ana siraunia mal sina.

9 “ ‘Naga visawal van amiu sanini, sape “In na nekilia ruru pog m̄arera la naña

kam na apisuia, a nekilia nesape limamiu koren ga. A monar akilia naþa pe limamiu koren re poli, ana ape yar na sur moki paþisi! Ee, nekilia sane la naþa asape la ape le Yu, akuan ke visen viowa mok liu pan amiu, ana ve asitom re, pe nepisu re nena nesape la ape kiau le Yu la poli, peraga, la na ape yar na taveveen nena Yermare.

¹⁰ A pe lelaga, pona ve ve piavi re kam laþasa monar awar pupia naloge viowaena la yo, komin naþa amlelaga e inu, ana ve amarau re. Pona Yermare kilia kila naþa yoko akoven amiu laþas ava e yuþa nakoena yo, vena kilali amiu, ana nekilia nevisave naga yoko kila kare amiu vano tol ga legiena ve lualima. Visae sanene, monar asumal mārera vano-o tol naþa alalua kiamiu yalua, ana visae ve alor re e pogos nene, yoko pogos naþa aim amalivin inu, yoko nela pupia nalaena van amiu, nane karo naþarila namaliena naþa pe kol.

¹¹ “ ‘ “Yar naþa kiligan teke ea, popon naga loge kilale ya naþa Ninuna ne Ntewa suþa pisawal ke pa li na lelagaena lala. Yar naþa taulu þelaga viowa na malena nene, yoko naga ve va warpo re yo e marena na lua naþa yoko imi sirau.” ’ ’ ”

Mak na telu, naga pa e suþare nae Pekaþam, naga suþare naþa taþan navianena viowa taþena lala apim loyumuþa

¹² “Yam si tai, monar osiri māk va va navisi na suþare na pulkumali nene Pekaþam, ovisa sanini, ovisave ‘Visena naþa pimi pan amiu ne, pimi kome naga naþa þarar ke playu na mara naþa mal ga lepas luwoka.

¹³ “ ‘Naga pisawal pan amiu sanini, sape “Nekilia ruru sane e naþa kam asike e ne, naga lepas tai naþa likan nena yo naþa Yermare pe suþenia! Naga lelana lala sike ga ko pun amiu ne, ana kam na apuarar ke kiau kia na po paþisi. Nanua loyumuþa e kiamiu pulkumali nene, pona tevisa tevisave pulkumali kiena Yermare, la amēnar kiamiu puruvi naþa Antiþas, ana la amāreran asape kam na monar aluþar kiamiu lelagaena e inu. Ana

peraga, sa naþa naga piawa mña mārera e inu pano tol marena, kam mēna ga yar tai pe purmatan inu re poli.

¹⁴ “ ‘ “Naga nene naga lepas napo ne, ana sur laþasa naþa sineun nesape nevisa mēna van amiu. Sur þesa, loyumuþa e kiamiu þegasa, yeririna laþasa asumna naþa ataveve ke sitomena laþasa sa ke ga Navisawalena Pelanña nanua. Visae asitomal mnga, naga ke narui naþa pisayu mrapa laþasa pa Pelaka, ana pe piavi re poli Pelaka towea mlavia pa pisayu pa le Israel lala, kila sanene pe piavi re poli, la asumna akan kinanena wa la naþa yeririna taþena la akila kuþaþaena ea pa kiela nono lala, a la asumna akila lue ga kolau lala. Akila ke mlamulen piowa la ne sanene, ana taveve visena naþa amloge ne, la asitom asape pogaga.

¹⁵ “ ‘ “A kana na lua nena, laþas si naþa kam na ataþan la asike likan kiamiu li na lelagaena lala. Naga nene la naþa asumna ataveve ke navianena na wowe taþena la nene, naþa yar nene Nikolaita naga mlologon þesania.

¹⁶ “ ‘ “Visae ve sa nene, kam na monar avilopu kiamiu sitomen vetan naviowaena la nene! Visae peraga, yoko ve ve piavi re neim nakate pun amiu, a yoko visen la naþa nevisa e gou van la e pogos nene, yoko ve sa playu na mara naþa te kinekinela, kilapel la vaþisi.

¹⁷ “ ‘ “Yar naþa kiligan teke ea, popon naga loge kilale ya naþa Ninuna ne Ntewa pisawal ke pa þegas nen li na lelagaena lala. Naga naþa taulu napiowaena, yoko naga la kiena nalaena wo tai. Yoko nela kinanena tai vania, kinanena nena sa naþa le Yu la akan e yokorena, ana naga nene na pe kinanena tai naþa pe yar pisu re poli wa. A yoko nela kilavaru yuwowo tai vania, naþa ate kia viu tai sike ea, naþa naga naþa waria, naga ga yoko kilia ruru kana kinasa.” ’ ’ ”

Mak na vari, naga pa e suþare nae Taeatara, naga suþare naþa taþan ga þelaga piowa suþa loyumuþa ea

¹⁸ “Pogos si tai, monar osiri māk va va navisi na suþare na pulkumali nene

Taeatara, ovisa sanini, ovisave 'Visena na pimi pan amiu pimi kome Narina ne Yeririna, naþa kilamarana pila a pivaga sane purmenen kapi, a lana m̃arera sane pototo.

¹⁹ Naga pisawal pan amiu sanini, sape "In na nekilia ruru kiamiu yuṃaena lala, a kiamiu sinesiiena lala amio kiamiu naviawaena, kiamiu yuṃaena m̃arera a sitomena la naþa piayavi, a metavania nekilia nesape nagane kam na akila pa laa narui, taulu naþa akila þesania.

²⁰ " " "Naga nene naga kana lepas napo ne, ana sur si tai monar nevisa meraravan van amiu. Nanene e lepas na sira viowa nene, Sesepele, naþa apisu kilale kiena napiowaena lala, ana ataṃan ga kila ṃa wowe e sur viowa la naþa kilakila ke ne. Naga sape naga pe sira tai naþa pe navisawalena, a pona kam na amlelaga e naga yo, ana naga pisokan ga ne. E kiena navianena lala, naga suṃa þere yar na kiau yuṃaena la apa ape taþena la narui, naþa nagane asike e þelaga na mlamulena na kolauena rui, a asuṃa akan ke kinanena kana nono lala, a la asitom asape þelaga la nene na pogaga ne.

²¹ In na nemla pulmas pania vena sitom ruru sina, vilon naga vetan kororak la nene, ana naga yepen mavin ga.

²² " " "Pogaga, kiau sitomena teke rui sane yoko nekila naga ṃene tog tai na maiena m̃arera lala, a yoko nekila yar la naþa akila kolau amio sira nene, visae ve avilon la re e kiela mlamulena viowa lala, yoko la ṃena aloge viowa vaþisi na vaþisi.

²³ Sira nene, yoko taþatete narina mali, yoko sineu kar la make ga. Ana pogos naþa la na þegas nen li na lelagaena la avisu sur nene, yoko avisu kilale sane in ke narui, kiau navisuvevena telivi pano tol ya naþa teke e sinen yaru, a kilia lual ya naþa teke e kiena sitomena. A yoko avisu kilale ṃena sane in ke narui nesuṃa nekila maran ke pa yar lala torokin ga þelaga na sur la naþa akila ke e kiela malena lala.

²⁴ " " "Ana e lepas na pun amiu kam yar taþena lala nae Taeatara, nekilia nesape kam na pe ataveve re navianena kiena

ne sira nene poli. Naga kilali naþa koven visen kiki la pan amiu, sane yoko naga vike sitomena urmi la naþa tapolou van amiu, ana kam na apisu kilale naþa Yermare ga naga pe purþesnen visena la nene. Yoko ve nevisa re si sur taþena van amiu,

²⁵ ana nevisa ga sane kam na auarar ga visena lelaga la nene m̃arera naþa kam na atol rui, ve aligan re, auarar la ṃa vano-o neim si na.

²⁶ " " "Naga naþa taulu na viowaena, kila ga taveve ya naþa sineunia vano-o tol luas nen pogos nini, yoko nela pupia nalaena vania. Yoko netam̃an vania naga ve suþen purvanua lala,

²⁷ sa ga naþa Tus na Yawena la pisayuia, naþa sape

Naga yoko ve suþen yeririna lala naþa laki naþa mlarar ke e limana, naga pe pototo m̃arera tai,

a la naþa ape þarm̃arera, naga yoko kuan wowa la e porotano ave kinakinasia sane piaki tai naþa amiyuṃaen ga e porotano.

Yauena 2:9

" " "Nam̃areraena na kilaen sanene, Ata taṃan pan in rui, ana yoko netam̃an lein va kiau yaru nene.

²⁸ Ana pe naga re ga nene poli, ana yar nene, yoko neligan verue naþa Melag sike e limana.

²⁹ " " "Yar naþa kiligana teke ea, popon naga loge kilale ya naþa Ninuna ne Ntewa pisawal ke pa þegas nen li nalelagaena lala." " "

3

Mak na lima, naga pa e suṃare nae Satis, naga suṃare naþa momalio ga mon ṃaga

¹ "Monar osiri si ṃak va va navisi na pulkumali na suṃare nae Satis, ovisa sanini, ovisave 'Visena nene naþa pimi pan amiu ne, pimi kome naga naþa pisuar ke ninuna la olua kiena ne Ntewa amio kana verue ne la olua.

" Naga pisa pan amiu sanini, sape "In na nekilia ruru kiamiu yuṃaena lala. Amiyeluar amiu paþisi, asape kam na suṃare tai naþa mal ruru po, ana peraga,

in na nekilia ruru pañisi kam na amare ga aņeke na.

² Nagane pe pogos naņa kam na akirava towe narui. Kiamiu yuņaena lala, in na nomal sane e visuena kiena ne Ntewa, kam na pe akila make ruru re poli, a kam na akila pe po re nenaga. Kiamiu kapi pe kovio make re poli wa, ana naga suņa panon ke naņa lavis mare narui, ana komin sur ne nanene, nepisa ruru pan amiu nesape kam na monar ayuņaen ruruia vena imi wo sina.

³ “ ‘ “Visae ve sanene, kam na monar asitomal si visena wo la naņa amloge, a amla rui. Alogear ruruia, a avilon kiamiu malena wasuņe si na, komin naņa visae ve atavilo re, nekilia nevisa nena van amiu sanini, yoko neim nomalivin amiu sane yar na vinauen tai naņa kam na taņatete akilia.

⁴ “ ‘ “Ana lelaga, nekilia nesape kam nae Satis, kam pe moki re poli naņa asuņa pogaga, naņa pe akila re mla kulsota la namname poli sane laņasia. La ke narui amekiki ruru nenaga, ana yoko ayen sur yuwowo, ayaloro amio inu meva e kiau yo.

⁵ Yar a naņa taulu naviowaena, naga mēna yoko ayowa ruru wo e kulsota yuwowo la ne sanene. Naga, kiena kia taņatete nena neyumulua e tus namalena pogos tai, ana yoko nekilogia naga va Ata amio kiena navisi lala, nevisave yar nene naga pe kiau yar lelaga nena napo.

⁶ “ ‘ “Yar naņa kiligana teke na, popon naga loge kilia ya naņa Ninuna ne Ntewa suņa pisawal ke pa pegas nen li nalelagaena lala.” ‘ ‘

Mak na orai, naga pa e suņare nae Pilatelpia, naga suņare naņa pulmas wo na kilaen yuņaena sike e marana

⁷ “Monar osiri si mak va va navisi na suņare na pulkumali naņa Pilatelpia, ovisa sanini, ovisave ‘Visena naņa pimi pan amiu ne, pimi kome naga naņa pe wa, a pe lelaga, naņa naga ke narui naga ppar ke ki na kiluaen pulutava mēna Parin Suņe Tepet nanua. Ya naņa naga

vietavania, taņatete si yar tai kotawea, a ya naņa naga kotawea, taņatete si yar tai vietavania.

⁸ “ ‘ “Naga pisawal pan amiu sanini, sape “In na nekilia ruru kiamiu yuņaena rui. Ana monar avisu ruruia, in na nevietava e pulutava tai van amiu naņa yar tai taņatete si kotawea. Nekilia mēna naņa kiamiu māreraena ve tokak ga, ana nekekara pañisi naņa apuarar ruru ke kiau visena, a pe akila kare re kiau kia naņa teke e amiu poli.

⁹ “ ‘ “La naņa ataveve ke Yermare, la apa ke lele taaga vena avisirlua kiela pegas, a la apisa ke asape la ape le Yu nena napo, ana pe sa re nene poli, apisokan ga. Ana siraunia yoko nekila la nene aim akinai e lamiu vena avisu kilale sane pe kiau sitomiena su re e la poli, ana sike ga e amiu.

¹⁰ “ ‘ “In na nepisa mēna pan amiu nanua rui nesape monar asuņal mārera amio sitomen la naņa piayavi silaga, ana nepisu sane apuarar ruru kiau visena nene. Komin sur ne nanene narui, nekilia nevisaar van amiu sane visae pupia naloge viowaena yoko imi e yomarava vena kilali la naņa asike ea, ana yoko in na nesuwo amiu ruru nena ga, yoko sur nene taņatete tol amiu.”

¹¹ “ ‘ “Ve ve piavi re, neimin amiu sina. Ya naņa asuņal asike e rui, monar auarar ruru mēna vano-o neim noworun amiu, ana yoko akilia ala kiamiu nalaena, ana taņatete yar taņena kilia warlua kiamiu karo na pparimiu naņa pe kol vetan amiu.

¹² Yar naņa taulu nakilaliena make ga vano-o neimi, yoko noure naga imi sane pupia kemraņe na loyuņa e yuņa wa mēna Ntewa, yoko yar nene sulue sike loyuņa nene narui. Yoko neyowauia naga amio kia la naņa nesiri se ea, sane kia kiena ne kieta Ntewa, a kia kiena ne pupia pulkumali, na Yerusalem viu, naņa mligan ma e peni kiena ne kieta ne Ntewa pitomi, a amio la nene, yoko nesiri mēna kiau kia viu ea.

¹³ “ ‘ “Yar naņa kiligana teke ea, popon naga logekilale ya naņa Ninuna ne Ntewa

suñña pisawal ke pa ðegas nen li nalelagaena lala.” ’ ’ ”

Mak na olua pa e suññare nae Laotisia, naga suññare naña pa piowa rui, ana pe asitom re sur poli

14 “Na maro, monar osiri mñak van navisi na suññare na pulkumali naña Laotisia, ovisa sanini, ovisave ‘Visena naña pimi pan amiu pimi kom pun naga naña pe ðarin sur make ga, naña naga ga kilia visave “Sanene.” Naga masisu pona pe lelaga e Ntewa vano tol naña kana kuruta mlau, a naga pe suñen wetelun yomarava naña Ntewa siia.

15 “ ‘Naga pisawal pan amiu sanini, sape “In na nekilia ruru kiamiu yuññaena lala, a nekilia nevisu kilale sane pe kiamiu sitomena la manin manene re poli, a pe pisun manene ruru re mñena poli. Popon manene la naña visae sinoñan omanini, ko omanin ruruia, pona visae ovisunu, ovisun ruruia, ana naña sinemiu la pepe lua ga sanene, ðelaga nene pe sineun re nenaga.

16 Ana komin naña sinemiun amanini a sinemiun avisun sanene, in na nesape neluelua amiu e logou narui.

17 “ ‘ “Kam na asape amiyuwon polo kiamiu sur wo la mokliu, ana kam na asape taðatete yar tai kilia la sur van amiu, kam na amla ke rui. Ana peraga, e kiau navisuena pe sa re nene poli. Kam na pe apisu kilale amiu re poli, ana pe kiamiu sur wo re nena tai, kam na limamiu koren ga, kilamaramiu ðala, a yepemiu mian ga.

18 Nevisa van amiu, popon awasuñe si aim pun inu, aim awar kol nini naña kap kekan van kana namname rui, vena akilia alarar sur wo tai e limamiu. A popon aim awar kulmrae la naña miyuwowo, vena akalo amiu, vena ve amawa re, a popon aim awar mñaki na vilanen e kilamaramiu, ana vena akilia akirava sina.

19 “ ‘ “Yaru ai naña sineu siia, monar nevis vania vena nakawe ruru kiena malena, ve sanene, monar ala kiau visena lala, ana avilopu amiu.

20 Ayagogo ruruia! In na nesuñal nesuñña nesigariga ke pulutava na kioma malena. Ko naña ologe pulgou pio, ovi-etavan inu, neiñasu loyuñña italua tesun, italua tekinana.

21 “ ‘ “Naga naña suñal mñarera vano o taulu naviowaena lala, netañan vania sane naga topae amio inu e leleu wa na totanoena, sa ke ga naña in mñena netaulu kiau nasinekar, ana siraunia Ata ðere inu netotano ke nemio e lelenu wa na totanoena.

22 “ ‘ “Yar naña kiligana teke ea, popon naga logekilale ya naña Ninuna ne Ntewa pisawal ke pa ðegas nen li nalelagaena lala.” ’ ’ ”

4

Ntewa na lelenu naña meta manene laa ma e peni

1 Pogos naña nepisu pae sur la nene, nomñal ke sina ga pulutava tai navaen loyuñña ma e peni, mñeke ga vamon inu. A nemloge ke sina ga pulgo naña pis pan inu nanua, pis na pulgona miyelu keviu sane kumasua, ana pisa pan inu, sape “Ovam meta e nini sumo wa, vena nekila ovisu sur la naña yoko aim sirau.”

2 Pisa sanene, ana veraga ga, nemloge sane Ninuna ne Ntewa ðerelua ninuu, mligan inu ma e peni, ana nekira pa e pupia lele wa na totanoena tai mñeke ga e marau, naña yerka wa tai totano teke ea.

3 Nepisu sa naña pila, ðar maran kilavaru la naña po na po, a kana kap nena miyervivia sa ga kuperierier.

4 Kana pupia lele na totanoena nena mñeke ga lika, a lele na totanoena mñena lañasa miyervivia, nopuloia tol lualima yam lua pa vari [24]. E la pepe taaga, yar taaga teke e tai kila sane la mñena tol lualima yam lua pa vari [24], la nene ape nasumonena nae ma e peni lala. La nene, mñala kulsota la miyuwowo pañisi, a amien karo na ðarila naña pe kol.

5 Nesuñña nepisu ke sane, nemilan mñena yekarpla ke ga likan yo wa nañani, amio mñaagena na pupia polilu tera ke ea. Vamonía, kap vivaga la olua asuñña

apivavaga, naga nene nane ninuna ne Ntewa olua,

⁶ asmañal asike e yotop tai, naña meri ga mēke na sa ga sive, pilavila a merarava ruru po sa ga kupito.

Ana likan yo nañani, yar mali la vari asuñaga, naña kilamarala la moki liu sike vamon la a varaun la, asuñal lavisi, asuvivi pupia lele wa na totanoena.

⁷ Yar mal pēs nene, sa ga laion, na lua sa ga puluk naña purwolu, na telu naga p̄ar ga maran yaru, na maro na sane pepaũa.

⁸ La nene, la make ga kupela la orai, naña kilamarala la kalo make ruru mēna kupela la nene, pa mēna e pulugala.

La nene kiela yuũaena, legiena a yemalo, la pe aparurula re pog ta poli, la asuñal apisawal lue ga, asape “Ntewa na m̄areraena na mava, naga su p̄esa, naga sike nagane, a naga sike sike nena. Naga pe wa naña pe wa, naga pe wa pañisi.”

⁹ E visena la ne sanene, la asuũa apisirlua ke kia kiena naga naña totano teke lele wa likan la, apatanon ke naga, asuũa apisa ke potena pa naga naña yoko mal lue narui. Pogos naña asuũa apisa m̄aga,

¹⁰ nasumonena mēna la nene apatanonia, amlotun ke naga naña tañatete mare pogos tai. Ana siraunia, añar plan kiela karo na p̄arila naña pe kol, amligan su tano se lana, asape:

¹¹ “Kiamim Supe Ntewa, mesmesun naña naurarena, navatanonena a nam̄areraena make ga, ala van ko, kiom̄a ko ga taaga. Ko ke naña osii make sur narui,
e ga e kiom̄a nasinenanena atol kiela malena rui.”

5

Tus naña apulonaria, amio narin sipsip, naña lalua asike ma e peni

¹ Ana yokorena nepisu si yerkawa nene naña totano teke e lelenu wa, naga mlarar ke sur tai e limana marua, sur nena naga tus tai, naña asiri ga e lepas luwoka, p̄isi

na apulonaria, ana atelan kana lok olua suwoia.

² Ana nemloge pupia navisi tai pion manene pa metava, piunia pisape “Ane torokin kilaroro lok la nene? Yar tai sike ne kilia vae tus nene woga pona peraga?”

³ Mom̄a ga sanene pano-o, peraga, pe yar re tai naña ma e peni pona yomarava, pona vatanon yomarava, naña kilia vae tus nene poli, pe yar re nena tai naña torokin kira va loyuũa e poli.

⁴ Nepisu sanene narui, nemloge piowa, netagi na netagi, naña tañatete yar tai kila.

⁵ Ana nasumonena la tai nene pis pan inu, pisape “E, ve otag re sina! Opisu ke ne, nanene naga laion naña molue kome yeririna la nae Suta, naña apio asape lus kiena ne Tepet, naga taulu make sur la p̄isi rui. Naga ke narui naga kilia kilaro lok la olua nene, naga ke naña yoko vae tus nene narui.”

⁶ Ana nekira pano, pe laion re poli, ana nepisu narin sipsip tai suñal sike likan yar mal la vari a nasumonena lala vamon yo wa nene. Naga pe narin sipsip ga, ana kana lam̄aliu olua amio kilamarana olua asike e p̄arina. Naga suñal sike na, naga apisu sa naña akila kuũaena e rui, ana mal ruru ga suũa ga.

⁷ Naga mial pimi, kuslua tus naña petan limana yerkawa na p̄amarua, metava e pupia lele wa na totanoena.

⁸ Mla pae, ana yar mal la vari nene amio nasumonena la lualima yam lua pa vari [24] nene amloru e lana. La pepe taaga añar kiela yukalele lala a kiela piala la naña amiyuũaen e kol, pulen ga ponotaninu la naña asikapia, ana kala ponos taninu po pañisi naña pa ke metava, nane leniena lala kiena nalelagaena wa lala.

⁹⁻¹⁰ A la amiyaun ke yau viu tai naña sanini,

“Akuũaain ko,

ana e kom̄a kuruta

opul plan yeririna lala ape kiena ne Ntewa,

naña amolue e p̄egas nen yeririna make ga,

e visena kar make ga,

e purvanua kerkeviu make ga,
 a e narin purvanua make mēna ga.
 Ko osikol la apim ape pēgas taaga na-
 vatanonen p̄arin suḗe ve taaga ga,
 aim ave yar wa lala na yum̄aena kiena ne
 Ntewa,
 naḗa yoko ave suḗen yomarava nini.
 Ana komin naḗa okila sanene,
 torokin sane ko ga taaga ola tus nene
 narui,
 owar plan kana lok lala, ovae.”

¹¹ Nesum̄a nepisusu ke sanene, ana
 nemloge navisi la amiyau, la mok na
 moki, am̄a la tenario via na sanene.
 Amiervivi lele na totanoena wa amio yar
 mal lala a nasumonena la nene,

¹² amiyau m̄arera paḗisi, apisa sanini,
 asape,
 “Narin sipsip, naḗa akuḗaḗainia,
 naga taaga po na po.
 Nam̄areraena make ga, nawoena make
 ga,
 manmaruaena make ga, puriu kawaena
 make ga,
 navatanonena make ga, naurarena make
 ga, nayeluarena make ga,
 torokin akila ga van naga taaga.”

¹³ Siraun nanene, nemloge si surmal
 make ga la m̄ena amiyau, surmal la naḗa
 asike ma e peni, amio la naḗa asike e
 yomarava, pona e porotano pona e sive,
 kiela yauena pisa sanini, pisape,
 “Nayeluarena, navatanonena, naurarena,
 a nam̄areraena va va yerkawa
 naḗa totano teke e lele wa, amio
 m̄ena narin sipsip, vano vano ve
 uro re.”

¹⁴ Ana yar mal la vari naḗani api-
 sawalia asape “Sanene” komin visena
 la nene, ana nasumonena lala amloru,
 akinai, amlotun lalua.

6

Lok la olua na tusi naḗa aplonaria

*Lok p̄esia: Yerkaḡa na p̄elaga na kilaen
 mara, naḗa kus wosi yuwowo*

¹ Nepisu manene m̄aga, nepisu narin
 sipsip naḗa kilaro lok na sumo na tus
 nene. Naga kila pae, ana yar mal la vari
 nene tai pio e pulgo tai sa naḗa polilu,
 pisape “Oimi!”

² Ana nom̄al ga wosi tai naḗa miyu-
 wowo sum̄al sike e marau veraga. Nom̄al
 yar tai teke meta ea, p̄ar ke viu lamias,
 ana la amligan karo na p̄arina kiena p̄arin
 suḗe teke e p̄arina, ana kus kiena wosi
 naḗani kirir pano sane yar namara tai
 naḗa vanon vena taulu kiena nasinekar
 lala.

*Lok na lua: Yerkaḡa na p̄elaga na
 weḡaren yaru, naḗa kus wosi pivaga*

³ Yoko narin sipsip kilaro lok na lua.
 Kila pae narui, ana nemloge yar mal na
 lua pio, naga m̄ena sape “Oimi!”

⁴ Ana wosi taḗena ke sina ga pimi
 kate veraga, naḗa pivaga. Yar naḗa
 kusia, ataḡan pania vena va war plan
 sum̄arena naḗa sike e yomarava, vena
 yar la asum̄a awewe mom̄ar la. Amligan
 pupia playu na mara tai e limana, ana
 naga m̄ena kiriri pano.

*Lok na telu: Yerkaḡa na p̄elaga na
 visoena e yomarava, naḗa kus wosi malko*

⁵ Yoko, narin sipsip kilaro lok na telu.
 Kila pae narui, nemloge yar na telu pio,
 naga m̄ena pisape “Oimi!”

Ana nepisu ga wosi si tai naḗa malko
 sum̄al sike e marau veraga. Yar naḗa
 kusa, naga mlarar ke skel tai e limana,
 vena visuveve kinanena lala kana yerir-
 rina na yomarava.

⁶ Ana nemloge visena tai molue ga
 likan yar mal la vari naḗani, asape
 “Ovano, ataḡan pan ko asape okilia okila
 naḗa yo ve plasan kinanena, naḗa yoko
 monar aul narin kinanena ga e kilavaru
 keviu. Ana ve okila kare manene re
 purḗes nen purolip lala naḗa amiyum̄aen
 ke sirveve e mrasnela, a ve okila kare
 manene re purḗes nen killkerep lala naḗa
 amiyum̄aen waen e mrasnela.” Apisa
 sanene narui, a naga m̄ena kiriri pano.

*Lok na vari: Yerkaḡa na p̄elaga na
 marena, naḗa kus wosi na yepen pe yavi*

⁷ Yoko, narin sipsip kilaro lok na vari,
 kila pae ana nemloge yar mal na vari pio,
 naga m̄ena sape “Oimi!”

⁸ Ana nom̄al ga na wosi taḗena naḗa
 yepena pe yavi sum̄al ga sike e marau.
 Yar naḗa kusia, apio kiena kia asape

Marena, a naga, kiena erau tai mial ke amio, naña kiena kia asape Pulukapi. Ana e lalua nene, atañan asape lalua akilia akila viowa va yar ve moki e yomarava, e playu na mara, pona e viso, pona e maiena, pona e surmal tetan lala. Visae ve sanene, yar la vari asike yomarava, la telu akilia asururu ga, ana tañena tai akilia akilapel naga sanene.

Lok na lima: Li na lelagaena la naña ape masisu pano-o añemoñar la

⁹ Yoko, narin sipsip kilaro lok na lima. Kila pae, ana nomal wonta pulen ninuna ne yeririna lala amiyuwon la miyervivi miasina. Nanene la naña añemoñar la komin añarera e logearen visena kiena ne Ntewa, a asumal mārera asape amlelaga e Yesu.

¹⁰ La nene, nomal atag ke pa Ntewa e pupia pulgo keviu, asape “Ake Suñe na sur make ga, ope wa a ope lelaga, awis ovisu kilale kamim kuruta nene. Pogwai naña yoko okila maran va yar viowa la naña akila ke piowa sanene?”

¹¹ Apisa pa sanene narui, ana añar kulsaket yuwowo la pan la amiyenia, ana apisa pan la asape sur naña la apiunia naga pere wa. Asape monar asumate li ga ve plas ga wa, komin naña kiela erau lañasa asike ga wa, amio mēna kiela puruvi tañena lala a vinela lala, naña yoko la mēna monar awe momar la komin naña amlelaga, ana pogos naña la punu ga aimi toroki, yoko Ntewa kila ga ya naña la apiun na wa.

Lok na orai: Legiena maro

¹² Yoko, nepisu naña narin sipsip kilaro lok na orai. Kila narui, yemninu veraga, a pe piavi re poli mrae pimi malko yemalolo nenaga, a kupario pimi pivaga sane kuruta,

¹³ a verue la naña asike ma e sinapane akekapil apitom tano e porotano, sa ga naña mralak mene, pogos naña pupia lagi miyui kululun lasa.

¹⁴ Yoko, avilonar sinapane sa naña api-lonar takue akus pano, a tavie make ga

a purvanua make ga alen plan la vetan lelela lala.

¹⁵ Ana pogos naña yar la avisu sur la nene, pupia marauena naña pupia marauena. Parin suñe na yomarava lala, yerkawa lala, nasumonena kiena ne yar na mara lala, yar na sur moki lala, yar mārera lala, amio mēna kiela yaru na yuñena lala, a yar tañena make ga e yo kar ga lala, la make ga ayalin mesmesun puluve lala pona pulkilavaru, avavinin yo la metava e kunusa, akilayonli naña atapolou ea.

¹⁶ Atol yo la nene, ana marauena pimi keviu manene laa, a apion pa kilavaru lala amio kunus lala, asape “Awis, aloru akalo ruru imimi, vena navisuena kiena ne naga naña teke meta e lele wa ve tol imim re, a vena nasinekar kiena ne narin sipsip ve kila kare imim re.

¹⁷ Pupia legiena na sinekar kien la lua nene pimi rui, a yoko ane kilia suñalu mali e pogos nene? Peraga ne, nagane yoko viowa manene laa van ita make ga.”

7

Ntewa pisaar kiena pupia ñegas nen yeririna tai vena ave kiena

¹ Siraun sur la nene, nepisu navisi la vari asumal asike e mrapun yomarava varoka, asumā akilawo ke lagi vari naña amiyui ke e yomarava, vena lagi la nene ve ayui re si e sive, pona e porotano, pona meta e lak lala.

² Yoko nepisu ke sina navisi tañena, ñar sur na ween totou kiena ne Ntewa mali van kiena yeririna lala, ana naga molue e naña mrae pa meta ea pimi. Naga kilia mā sape navisi vari nene, la añar ke namāreraena naña akilia akila kare porotano a akilia akila kare sive, ana naga pion manene pan la, pisaluñar pan la vena ve akila re si sur tai.

³ Pisa sanini, sape “Ei, toko, ve akila kare re sive pona porotano pona lak lala, vano vano tol naña teligan totou tai te piamenan yar mesmes lala naña ape kiena ne kieta Ntewa.”

4-8 E pogos nene narui nemloge ga na wa naþa apisawal nena maran la naþa amligan totou e la. La nene amolue akom e lus nae Israel la lualima taaga pa lua, naga lus la naþa aþar kia kiena yermarua apua kan la nene, nane Suta, Rupen, Kat, Asa, Naptali, Manasa, Simion, Levi, Isak, Sepulan, Sosep, a Pensiman. Ana e lus make la nene, tai kana manu lala tol lualima taaga pa lua [12,000] amolue komea, kila la punu ga tol sane kana manu ne lala tol ponotia lualima yam vari pa vari [144,000].

Pupia þegas taþena lala naþa amiyen kulsota yuwowo lala

⁹ Ana siraunia, nekira pa vamon inu narui noþal pupia þina na yeririna lala, naþa moki na moki, taþatete auloia, la ke naþa amolue akom e lus taþena la narui. La ke naþa ape yeririna taþena lala na purvanua taþena lala, amio kiela visena taþena lala, apim asumal asike vamon pupia lele na totanoena naþa narin sipsip totano teke ea. La make ga amien kulmrae yuwowo nowo lala, a aþarar mnaþela lala,

¹⁰ a apio manene pa metava, asape “Kieta Ntewa teke e kiena lelena wa, naga ga amio narin sipsip, lalua ape purþes nen kieta natamaliaena.”

¹¹ Ana amio la nene, navisi mna lala asumal amiyervivi yo wa, a amiyervivi mna nasumonena lala amio yar mal la vari naþani, ana la mna akinai aþan þarila pito tano vamon yo wa, amlotun Ntewa,

¹² asape
“Ee, lelaga pa!

Nayeluarena make ga, a naurarena, a namanmaruaena, a navisaen potena, a navisirluaena, a puriukawaena, a namareraena,
la punu ga nene ape kiena ne kieta Ntewa naga taaga, a yoko ve sanene sulue na sike ne.
Yeluaren van Ntewa!”

¹³ Ana e pogos nene, nasumonena la tai piun tan inu, sape “Pupia þina naþa amiyen kulumrae yuwowo la ne, okilia

osape a la nene, a okilia osape la asu pe na apimi?”

¹⁴ Ana nesape “E peraga, ana ko ope yerka wa nae e nini tai, ko okilia mna yo?”

Ana pisatamea sape “Ore, la ke nene narui naþa aþaro e pupia pogos naloge viowaena. Kulsota la ne amiyen ke ne, akevanla e kuruta kana narin sipsip naþani, nane apim amiyuwowo ruru sane opisus ke ne.

¹⁵ La na kiela yumnaena sanini, sane ‘La asike vamon yo wa kiena ne Ntewa, legiena a lemalo amiyumnae kiena ke loyumna e mna yumna wa, a naga naþa totano teke meta ne, naga yoko visuar la,

¹⁶ Yoko taþatete si viso kar la, yoko ve moto karla re si narui, mrae ve kila kare la re sina, a pupia kapi ve visun la re sina,

¹⁷ komin narin sipsip naþa teke likan yo wa meta ne,
naga yoko vagan la,
naga yoko sumon la ava e purþes nen wii na malena,
a yoko Ntewa yumu plan make wamarala.’ ”

8

Lok na olua: Yo pa ruru nenaga

¹ Siraun nene, nepisu narin sipsip kilaro lok na olua. Kila narui, sur make ga nae mae peni aparurula veraga, pe mnaagena re si ta poli, yo mnao nena ga mon mna pano-o tol komsus nen aora taaga.

Kumasua la olua

² A pe yam piavi re nenaga, noþal navisi la olua naþa asumal asike e marana ne Ntewa vena kilaen kiena yumnaena, a amla kumasua olua pan la, tai kus tai, tai kus tai.

Pias nen ponotaninu naþa amiyumnaen e kol

³ Ana siraunia, navisi taþena pimi. Naga kus pias nen ponotaninu tai, naþa amiyumnaen e kol, a naga kus pimi sumal sike e wonta, naþa naga mna amiyumnaen e kol, a naþa sike vamon lele wa na totanoena. Ana aþar ponotaninu

mokliu pania vena sikapia e wonta vena kila ponos wo, a amla mēna leniena lala kiena ne nalelagaena wa lala pania, vena ligan to meta e wonta sane nalaena tai.

⁴ A pogos naṗa kapi nene kekan ke ponotaninu nena, kana ponosa amio leniena kiena ne nalelagaena wa lala, amolue petan limana ne navisi naṗani akaka ava atol marana ne Ntewa.

⁵ Yoko, navisi naṗani ṗar plategkap laṗas naṗa apranar sike e wonta nene, kokonia pito e pias nen ponotaninu nene ana koven pito tano e yomarava. Ana pogos naṗa suri nene tol yomarava, kila polilu kapur kar ga e yo punu ga, amio kana mumuena sa naṗa kapiapo, amio mēna yekarpla, a yemninu.

Kumasua na miyelu ṗesa: yua amio kuruta

⁶ Ana navisi la olua naṗa aṗarar kumasua olua nene, asu ruru ke naṗa asape ayu narui.

⁷ Navisi na sumo miyu kiena kumasua, ana kila narui mrayua la naṗa mārera sane kururu kilavaru, amio kuruta naṗa pisusun sane kapi, aptom akila moṗar sur kar la e yomarava. Amiyuṗaen mā sanene pano-o kapi kekan make yomarava komṗasa amio kana purlaki ne lala, amio sur make naṗa kapur sike ea.

Kumasua na lua miyelu: tavie na kapi

⁸ Ana siraunia, navisi na lua miyu kiena kumasua. Nanene kila pupia tavie kar tai, naṗa kap molue ke komea, akovenlua pito e sive. Pogos na kove sive, ana sive komṗas pimi sane kuruta,

⁹ ana kana sur mal ne lala amarmare, a waa la naṗa asike e pupia lepas nene atalilu.

Kumasua na telu miyelu: verue naṗa kirir ma e sinapane

¹⁰ Yoko navisi na telu miyu kiena kumasua. Nanene kila pupia verue tai, naṗa kapi pivaga ke ea tegoli yo sane kapi vivaga, molue ma e sinapane, miere pitomi miae yomarava. Ana kana kapi nena pa tol wii la naṗa mlau a ṗarin wii lala.

¹¹ Kia kien verue nene, asape Wii Melkalka, ana kila narui wii nae yo la moki pimi melkalka, ana yeririna la amun ṗele ga, moto karla mā pano-o amarmare.

Kumasua na vari miyelu: yemalolo

¹² Yoko navisi na vari miyu kiena kumasua. Nanene kila naṗa mrae komṗas pimi malolo, a kupario komṗas pe tego re si poli, a verue la moki naṗa pe aṗal la re si poli. Kila narui legiena pimi plas manene laa, a pe lepamiema re si poli, kila narui yemalolo paṗisi e yomarava wetelu.

¹³ Nepisu manene ke sane, noṗal pupia pepauma tai ka ke metava, sumā mlolokai kar ke metava na, pisape “Yo piowa rui e, ana na nene naga kulus ke na wa. Navisi la telu asike ga wa, la kiela kumasua miyelu mārera manene laa sane. Kam na yomarava, avisuar amiu, pupia na loge viowaena pimi māliv ke narui!”

9

Kumasua na lima miyelu: pulus naṗa pito manene laa tano, naṗa na ṗesia na loge viowaena mārera na telu

¹ Yoko navisi na lima miyu kiena kumasua. Nanene kila verue taṗena kirir mālia ṗarpoyo ma e sinapane pitomi e yomarava. Verue nene, amla ki tai pania, nanene ki naṗa vietavan pulus naṗa pito tol kap naṗa garo tano.

² Pogos naṗa mlalua keplamaran pulus nene, kapi piu ṗar wowo yo molmolue ke ea, sa naṗa pupia kap tai piu, ana pa kar ga meta e sinapane, kilawo maran mrae, kila yemalo ke sina ga.

³ Ana pogos naṗa kap piu kalo make yo sanene, kelsisi la amolue apitom tano e porotano, ana pe asa re si kelsisi poli ana apim sa naṗa pupia kimi natano.

⁴ Apisaluṗar la asape ve atol re purlaki lala a kinanena lala pona sur la naṗa pitotovi sike e yomarava, ana ataṗan asape akilia akila viowa va yeririna na yomarava lala, la naṗa pe aṗar re totou kiena ne Ntewa naṗa naga mligan sike nena e piamenana ne kiena yeririna lala.

⁵ Kimi na tano la nene, pe atamān la re naṣa akilia awe moṃar yar la poli, ana atamān la ga ayuyur la mā va tol kupario ve lima. Ana pogos naṣa akila mā sanene vano-o, yoko yar la aloge yepela la lalae kar vano vaṣisi.

⁶ E pogos nene, la ve moki na asave popon amarmare ga, yoko akale mrapa la naṣa amare ea, ana yoko marena yepen mavin la, ligan la asumā ga sanene.

⁷ Ana kelsisi la nene, pogos naṣa nepisu ruru la, atorokin wosi la naṣa yar namara la akus ke ne. Amyen karo naṣarila naṣa pe kol suwo ṣarila, a pogos naṣa nepisu ruru marala, nemilan la ga asa ga yaru.

⁸ Aṃe vilṣarila sane sira, ana malueta lala, sane na malueta laion.

⁹ Amyenwo yerela lala e pototo, a pogos naṣa akaka tetai, kupela la kakapur mālia sa naṣa wosi la naṣa aṣere kiela kat lala akiriri ava akila mara.

¹⁰ Kelsisi la nene kesila sike e la, a sur na yuren yaru lala sike e la, naṣa akilia ayur mā yar vano-o tol kupario ve lima.

¹¹ La kiela ṣarin suṣe tai, naga navisi tai, ana pe navisi kiena ne Ntewa re poli, naga navisi naṣa pisuar ke mratava na pulukapi. Yar nene, kiena kia e visena kiena le Epru lala, asikia asape Apatono, a e visena nae Krik, asikia Apoliono, kinas nen kia lua nene asape yar na warnena kareen suria.

¹² Kelsisi ne la nanene, naṣa nasumo e naloge viowaena la telu nena nanene. Noṃal naga ṣaro pa rui, ana lua sike ga wa.

Kumasua na orai miyelu: navisi lala na weṃaren yaru, naṣa nalua na naloge viowaena māarera na telu nene

¹³ Yoko navisi na orai miyu kiena kumasua, nemloge visena tai molue kom e mrapun wonta wa nene varoka naṣa amiyumāen e kol naṣa sike e yo wa vamon Ntewa.

¹⁴ Visena naṣa pisa pa navisi nene sanini, sape “Navisi la vari naṣa apiar la asike e yo naṣa wii mlau ke ea naṣa kiena kia Yupretes, nagane kana pogos naṣa ova okila plan la sina avavano narui.”

¹⁵ Navisi la nene, apuarar la ruru asumā sanene pano-o tol nena kana

aora na kana legiena na kana kupario, naṣa akilia amolue ea vena akila kiela yuṃaena. Ana navisi taṣena pa mluṣar plan la, kila sane amolue apano, apa kar ga e purvanua lala aṃe yar lala lavis tol komṣas nen yeririna na yomarava.

¹⁶ Apa amio kiela yar namara lala naṣa akus wosi namara lala, ana nemloge apisawal kana marana tol tenario tol ponotia lua [200,000,000].

¹⁷ A pogos naṣa nepisu manene wosi la nene amio yar la naṣa akusia, noṃal pototo sur tai naṣa amligan mono ke yerela, amiyowa ruru la apivavaga sane kapi, amemaena sane lowe memaena, amleleru sane mrae. Kiela wosi lala ape taṣena ga, naṣa ṣarila sa ga laion, a pogos naṣa amiyuveve noṃal kapi a māu a posnoyavi na kapiapo mleleru molue petan logola.

¹⁸ Sur la telu ne nanene, sane kapi a māu a posnoyavi na kapiapo kila lavis yeririna na yomarava nini la komṣas akokovio e pogos nene.

¹⁹ Namāareraena kien wosi la nene sike e ya naṣa molue ke kome logola, a sike māna e kesila lala, komin kesila la pilolon sane lomāara, a sur sane ṣarin lomāara māna sike e luas nen kesila naṣa mla ke pupia magka pa yeririna lala.

²⁰ Napiowaena la ne māarera paṣisi sanene, a pupia komṣas nen yeririna lala, nane laṣas naṣa amal ke na wa, pe asitom re poli. Pe apulon la re nena e kiela napiowaena la naṣa akila ke e limala poli, ana asumā akila luen ga lotena pa yermare lala, a asumā akila ke leniena pa nono lala na kiela ntewa lala, naṣa pe akirava re poli, a pe amloge kilale re sur poli, naṣa pe amiyal re poli, naṣa yar ga la amiyumāen e kol, pona selpa, pona pototo, pona kilavaru, pona laki.

²¹ A amio māna nanini, pe apulon la re nenaga e ṣelaga na weṃaren yaru poli, pona kimi lala, pona nakilaen viowa amio sira, pona e kiela vinauena la naṣa asumā akila ke ne.

Navisi tai mlarar narin tus naþa apilonaria

¹ Ana siraunia, nepisu si navisi m̄arera taþena molue ma e peni pitomi tano. Naga mien lul sa naþa m̄ana kulsota, a kuperierier miervivi þarina, marana m̄ena ga sane mrae, ana lana luwoka sane pupia kemraþe ana ape kapi.

² Ana nepisu naga tarar ke narin tus tai, naþa pike þa teke e limana luwoka. Ana piaþereren lana marua piawa ke e sive a lana m̄el piawa ke e porotano.

³ Naga sum̄alar ga sum̄a sanene, ana mligan pupia vioena tai naþa sa ga laion, a pogos naþa naga kila, polilu make kar ga lala apisatan̄e pimi, apis kome kiela mumuena lala.

⁴ Pogos naþa polilu la atera sanene, sineun nesape nesiri plan kiela visena lala, ana lavis nekila narui, visena taþena molue ma e peni pitomi pan inu, sape "Toko, ve osiri re visena kiena ne la nene. Sur la naþa apisa, pe nakilaen re yeririna la akilia poli."

⁵ Visena nene sanini, ana nom̄al ga navisi naþa piawa e sive amio porotano, kian limana marua pa ma e peni.

⁶ Ana pisa kiena visena m̄arera tai, pisaar e kia kien naga naþa mal sulue, naþa sii peni amio ya la naþa asike ea, amio yomarava a ya la naþa asike ea, amio sive a ya la naþa asike ea. Kiena visena pa sanini, sape "Nagane pe pogos na sum̄ateen re si poli!"

⁷ Lavis ke navisi na olua nene yu kiena kumasua narui, a visae kila ga rui, vera na nasitomwanena kiena ne Ntewa la imi m̄alivi rui, vera na sur make ga imi merarava ve sa ga naþa naga pisawal þesan pa navisawalen la naþa amiyum̄ae kiena þesa."

⁸ Pisa pa sanene narui, in m̄ena nemloge visen taþena molue ma e peni pitomi pan inu, sape "Narin tus naþa pike teke e limana ne navisi naþa sum̄al sike e sive a porotano, ova ola ke ne wa."

⁹ Ana nepa lavisin navisi naþani, nepiun narin tus nene tania. Ana tam̄an ga pan inu, sape "Poga, okilia olavia. Visae olavia monar okania. A nesape

nevisa van ko sanini, pogos naþa okania, yoko ologe kiki e logom̄a vaþisi, ana sir-aunia, yoko ologe melkalka e mopom̄a."

¹⁰ Ana nemlavia nakania, ana kiki e gou paþisi. Ana nesinom pae, ana sanena naþa pisa, naþa sur nene melkalka, kila kare m̄eþeu paþisi.

¹¹ Yoko, visena pitomi si pan inu yam tai, sape "Yoko ve sa ga nene narui, komin navisawalena taþena la asike ga wa naþa yoko monar oto ovisawal sina, naþa apisayu þegas nen yolai lala, purvanua punu ga, yaru na visena taþena la punu ga, a þarin suþe la naþa asike e yomarava."

11

Yar la lua na iilaaren visen kiena ne Ntewa

¹ Ana e pogos nene amligan kiai tai te lum̄au, asape neva nela totou na yo la ea. Asape, "Ova e yum̄a wa m̄ana Ntewa, ola ruru kana totounena na keviu pa sanape, a ola totou na wonta naþa sike loyum̄a ea, a oulo m̄ena yeririna la naþa akila ke lotena e yo nene, sane m̄a tol via.

² Ana kana pupia yo naþa m̄eke vanua, naga ve ola re kana totounena, komin yum̄a wa nene komþasa yar la naþa pe ape Yu re poli la yoko akusia. Wolawa la nene yoko aim ataulu pupia kumali wa nene Yerusalem, yoko aim loyum̄a ayalar kar ga ea sa naþa la lelela, ana yoko akila ga va tol kupario ve lualima yam vari va lua [42].

³ A pogos naþa asike e nene, yoko yar lalua naþa asum̄al m̄arera asike e kiau visen lelaga aim am̄alivi. Lalua ayen ga kulupak sa naþa m̄ala kulsota, a yoko avisawal kiau visena e siarena na kupario la nene va tol luasa, naþa kana legiena nena tol manu ve taaga ponotia ve lua lualima yam orai [1260]."

⁴ Yar lalua nene visena wa kiena ne Ntewa pisayu la nakonua rui, naþa pisayu sape purolip lalua asum̄a ga, poña naþa pisayu kemraþe na kantel lua, naþa luoka ga asm̄al asike e marana ne kieta Ntewa naþa naga pe suþen yomarava wetelu.

⁵ A visae yar tai kilali naña kila viowa va lalua nene pogos tai, yoko kapi kilia molue e logola, yoko kilia kilapel ruru nena kiela nasinekar lala. Nane mrapa ne nanene naña visae yar sinenan sape kilamnar la, yoko naga ga kan ke sina kiena marena narui.

⁶ Lalua nene kiela namareraena keviu liu, naña akilia akilawo sinapane metava vena yua tařatete kove e pogos naña apisawal visena kiena ne Ntewa, a akilia akila wii lala imi ve kuruta, a akilia akila naña sur viowa kar ga imi pona pogos marera imi kila kare yomarava e pogos ya naña lalua asitom asape akila.

⁷ Ana lalua nene, lalua ave navisawalen sanene vano tol pogos naña lalua akila yumaena na sanene řisi. E pog nene narui, yoko pupia sur mal viowa naña meke tano e pulukapi molue vamin lalua, a yoko kiena namareraena taulu la luwoka, kilamnar la.

⁸ A yoko akoven tasnela meke likan mrapplepa e pupia pulkumali naña naga pulkumali ma nena naña kiela suře naga mena amemaria meta e lak torovia. E nene, naña e řelaga na visawanen suria, apisa kia na kumali nařani, pogos tai asape kia na kumali marua viowa naña Sotom, pona apio asape Isip.

⁹ Tasnela moňa ga e yepisun sanene yoko řegas nen yeririna lala, pona lus lala, pona visena lala, pona purvanua la aim avisu la, yoko avisaluřar la ve asinla re vano-o tol legien ve telu komsusa.

¹⁰ A pogos naña apisusu ma tasnela yar mare lua nene pano-o yoko apisa karela pařisi a apitalia kare la řisa. Yoko asitoňal naloge viowaena lala naña navisawalena lalua akila pimi pa yar na yomarava lala, ana yoko akekara na akekaran naña lalua nene amare pa rui, yoko akila pupia řařagena a yoko awarwar si nalaena lala van la vanonia.

¹¹ A pogos naña legiena telu nene komsusa řaro pae, pe asin re luwoka poli wa, la amilan ga lagi na malena tai molue kome Ntewa pitomi tol maren lua naña ne, kila si la ga luwoka asuňal

ařanarla asuňal asikena. Pogos naña yar la apisuia, amarau na amarau,

¹² a pe yam piavi re poli, amloge pupia visena la kom ma e peni pitomi, pisa pan lalua, sape "Poga, amlua avam metava narui." Ana la ga luwoka apa metava veraga, akus lul lala apa atol ma e peni, naña kiela nasinekar lala apisu sane asuňalu wowe ga asikena, logola suwowo ga rui apis re si poli.

¹³ A e ke e pogos nene, pupia yemninu, naña kila lepas nen pul kumali nene komřas, yuma make ga akekapil apororowa make nenaga, a yeririna la naña amarmare e yemninu nene tol manu olua. La naña amal ruru ga asuňaga la apisu ke sur nene, amarau kar řan wa, ana apisu sane popon la ayeluar ga Ntewa nae peni komin kiena pupia mareraena naña la apisu kilale ga na wa.

¹⁴ Yemninu nene sur sane pupia naloge viowaena na lua řaro narui, kana yam telu nena pere wa, yoko naga ve ve piavi re na imi.

Kumasua na olua mielu: pogos na liřereena, naña kana naloge viowaena marera maro na teloka nanene

¹⁵ Yoko navisi na telu miyu kiena kumasua. Nanene narui kila pulgo la moki apisasawal ke pupia visena la ma e peni, amieluar Ntewa apisa sanini, asape

"Nagane narui yo punu ga naña sumo sike vatanon suře viowa na yomarava nini, la asike vatanon kieta Suře Ntewa narui, lalua kiena Navisaarena,

a yoko naga ve řarin suřen vano-o tařatete řisi pogos tai."

¹⁶ A nasumonena mena la lualima yam lua pa vari [24] amio la, naña atotano ateke e lelela la naña pa metava, akinai tano vamon Ntewa, amlotunia,

¹⁷ asape
"O Ntewa keviu namareraena na mava, ko naña osu nakonua rui, ko naña osike nagane, ko naña ope na pogos la ne pimi ke ne.

Mepisa potena pan ko pařisi wa, komin naña ořarar kioma pupia

m̄areraena rui, nagane narui osuṁalu m̄arera e kioṁa na-suṁenena.

¹⁸ Purvanua make ga na yomarava nini sumo na sinela kar ko, ana pogos na kilologiaen kioṁa sinekar van la narui.

Nagane kana pogos naṁa yoko oliṁere yar mare lala, a yoko okila kare yeririna la naṁa akila kare kioṁa yomarava.

Ana kioṁa yar na yuṁaena lala, naṁa navisawalena lala, amio kioṁa li nalelagaena wa lala, a la naṁa apatanon ke kioṁa kia, yoko awar kiela nalaena wo la e pogos nene, pe sur koren ga naṁa ape yerkawa lala e kioṁa yuṁaena, pona pe ape yerkawa re poli.”

¹⁹ Ana e pogos nene apietavan yuṁa wa ṁana Ntewa ma e peni e marana yeririna lala, a aṁal pias nen navisaluaena wa mon ṁaga. Amilan ga yo pe taṁena veraga, komin naṁareraena kiena ne Ntewa sike ea, naṁa yekarpla e yo punu ga, amio polilu tera, yo ṁaaga, yemninu, a pupia mras nen yua aes kekapili.

12

Sira nowo amio pupia nopi tai

¹ Nepisu manene ke sur nae peni lala wa, ana nemilan ga pupia kile tai. Naga sira tai, naga kus mrae, mien pe ṁana kulsota, suṁal sike e kupario, a karo na ṁarina, verue lualima taaga pa lua [12] sike ea.

² Sira nene ṁeṁena, ana mloge piowa mlokai na mlokai, komin kiena kupario ṁisi narui, lavis waria.

³ Nepisu manene ṁa sanene, pupia surmali taṁena molue ma e peni, naga pe namarauena manene laa. Naga pupia arman nopi tai, pivaga, ṁarin olua naṁa amien karo na ṁarin suṁe olua sike e la, a laṁaliu ṁena sike e ṁarila, make ga tol lualima.

⁴ Ana noṁal ga sur naṁa kuṁin kesina sane, ku plan verue la mokliu akekapil akowowo yo tano e yomarava. Ana sur

viowa naṁani pimi suṁalar se maran sira nene, naga sitom ruru rui sape sa sira nene war sisi, karm̄ar ke veraga.

⁵ Suṁa sanene pano-o sira naṁa ṁarlua narina, pe yerm̄ene. Ana Ntewa sinenan sape sisi nene imi ve ṁarin suṁe vena uarar pototo e limana vena ve suṁen yeririna na yomarava lala, ana pogos naṁa sur mal viowa nene pe tol re sisi nene poli wa, ana akuslua veraga, akuslua pa ma puna ne Ntewa ṁae kiena pupia lele na totanoena.

⁶ Ana sira nene marau, pure pa tapolou e yomema, e yo tai naṁa Ntewa kila ruru pe lalena, ana pa tapolou e yo nene, apisuar ruru naga e legiena moki, legiena tol manu taaga ponotia lua lualima pa orai [1,260].

⁷ Ana e pogos nene pupia mara tai kapur ma e peni. ṁar navisi nene Maikel amio kiena navisi lala, akila mara amio pupia nopi naṁani, ana naga ṁena ga amio kiena navisi lala akila mara ṁarera paṁisi pan la.

⁸ Akila ṁa mara sanene pano-o, tol naṁa nopi nene, kiena naṁareraena ṁisi, ana amio kiena navisi lala amloru apito tano. Ana akila kare la paṁisi, amla nakoena pan la, aṁar plan lelela ma e peni petan la.

⁹ Ana pupia nopi naṁani, akovenlua nena ma e peni veraga pitomi e yomarava, naga amio kiena navisi lala.

Ana e poglis nene nepisu kilale ga pupia arman nopi nene na wa, naga ke ga naṁa kus maran loṁara nanua sumo narui, naga yar sur naṁa asape Yermare, pona Yermare Lego, naṁa nanagane naga ke na wa, naga ṁere yomarava nini wetelu kuspil ke mrapa silaga.

¹⁰ Ana siraunia, nemloge pulgo tai pio ṁar make yo ma e peni, sape

“Nagane na natamaliaena kiena ne Ntewa suṁalu,

puriukawaena kiena ne Ntewa tauluia, nasuṁenena kiena ne Ntewa pimi ṁalivi, naṁareraena kiena ne kiena Navisaarena pimi ṁalivi, mon metavan make suria.

Yar viowa nene naña suña pisa kare mratava puna Yesu, akovenlua naga rui.

Legiena a lemalo suñal ga sike e marana Ntewa kilali naña visawal mla-mulen viowa kiena ne yeririna lala, ana nagane narui, akovenlua naga rui.

¹¹ Nalelagaena la mokliu naña pe asitom re si kiela malena la poli, pe amaraun re si marena poli, ana la asñal m̄arera m̄a pano-o ataulu yar viowa nañani, a ya naña la apuarar ke e limala vena akila mara amio, naga kuruta kana Narin Sipsip ga, amio visena lala navisawalen kiela lela-gaena e Yesu.

¹² Ataulu yar viowa nene rui, sane nagane ma e peni, amio la make naña asike ea, akilia akekara na akekara, ana la naña asike e yomarava pona sive, amloge piowa a monar amarau, komin Yermare pito tano sike likan la amio sinemimiena naña pule manene laa, komin naga kilia sape kiena pogos plas ga teke na, lavis naga p̄isi narui, ana sirag manene laa.”

¹³ Visena nene yar tai pisawal ma e peni, nemloge pae, p̄isi na noñal nopi nene pisu kilale naña akovenlua naga pito tano e yomarava, ana sinena mimi laa narui, naga pisaar m̄arera sape yoko monar tol sira naña p̄armare ga narina na yermene nene na wa.

¹⁴ Naga pa m̄areran si pa sira nañani, ana milan ga amligan kupen lua pa sira nañani, sa naña kupen pepaun̄a, vena ka va tapolou e yo tai e yomema naña akila ruru pa rui vena avisuar naga ea. Naga pa sanene narui pupia nopi nene tañatete si tol naga e yo nene, asape yoko naga sike e yo nene pogos ve piavi towe m̄aga naña kas tai, siraunia kas ve lua, p̄isi komsus nen kas si tai.

¹⁵ Ana nopi nañani pisu sira ka pano, naga kilia ga sape tañatete si va war po yo, naga sinen mimi laa narui, plamolue mliluan pupia womie tai vena werelua sira nene va talilunia.

¹⁶ Pupia wii nene mlau pano, lavis tol sira nañani, ana amilan ga yomarava sinen miye sira nañani, miila naga naña porotano purpa veraga pikepaia sa naña pupia logona, sinomlaun ga wii naña nopi nene mliluania.

¹⁷ Nopi pisu narui, nagane kiena sine-mimiena pimi piowa laa narui, ana mligan sira naña sike na, sape vanon ga narina tañena lala, nane yeririna la naña asuñā ataveve ke navisaluaena kiena ne Ntewa, sane la naña apuarar ke visena kiena ne Yesu m̄arera.

¹⁸ Pisa pa sanene narui, pano amio kiena pupia sinemimiena, panon kila mara amio tañena la nene.

13

Surmal viowa p̄esa, naña molue e sive, nopi mla nam̄areraena pania

¹ Pupia nopi mialoro pitove, suñal sike yepas nen sive. Ana pe piavi re poli, noñal ga surmal tai molue e sive paminia. Yar nañani naga p̄arina olua, a kana lam̄aliu tol lualima, a e kana lam̄aliu la pepe taaga karo wa na p̄arila kiena ne p̄arin supe lala telan sike ea. A e piamenala la pepe taaga, asiri kia tai sike e la, naña na viuelena nawarnena kareen Ntewa.

² Surmal nene, noñal pe tañena ga, naga sane sape ve sa towe m̄a laion, komin logona sanena laion, ana lana varoka sane lana surmal tañena naña pea. Ana naga pimi suñalu sike e nopi nañani, a nopi mla puriukawa pania, kila naga pe p̄arin supe e kiena lepasa, tam̄an nam̄areraena make ga pania.

³ Ana nepisu veve ruru surmal nañani amio p̄arina lala, noñal p̄arin tai pupia piakapila na magka tai m̄eke ea, keviu pap̄isi. Pogos naña p̄ar magka nene, naga pe na marena ga, ana yar na yomarava la amilan ga naña akila ruru pimi m̄ao sina, ana kila narui apilon kiela sitomena lala apim amlelaga e yar mal nene, ataveve ke naga.

⁴ Sanene, la akekaran manene laa surmali nene, ana pogos naña apisu nopi mla nam̄areraena pania vena imi m̄arera

manene laa, akekaran pañisi, amlotun nopi, a amlotun yar mal nene naña sumã sumon la. Apisa sanini, asape “Ane kilia taulu kieta yar mal na kilaen mara nene pogos tai? Nagane pe yar re si tai naña ñarera manene torokin naga poli.”

⁵ Ana pogos naña yar mali nene pimi ñarera ruru sanene, siar vena kila kiena napiowaena lala. Naga sumã kila ke kiena visena na vilaveena lala, sumã piuel kar ga, a sumã miyumaẽ ke amio kiena ñareraena viowa, a kila ña pano tol kupario lualima yam vari pa lua [42], sane kas telu komsusa.

⁶ E pogos nene, naga sumã ñarnena kare Ntewa, piuelin ke kiena kia, a sumã koven ke visena viowa pan peni amio yar wa la naña asike ea.

⁷ Puriukawa naña amla pania, torokin naga kila mara va va nalelagaena wa lala, vano-o kilia taulu la, a ñareraena naña naga ñar ke na, torokin naña naga ve suñen yolai make ga, yeririna make ga, visena make ga, amio purvanua make ga.

⁸ Naga kilia ve suñe ña sanene vano-o yar make ga na yomarava nini yoko avatanonia, ana lañasa yoko tañatete avatanonia, a naga nene la ga naña siar e nasiiena yomarava pimi, kiela kia asiriar sike loyuma e tus na malena kiena ne narin sipsip naña añañaaria.

⁹ Ko naña visae ologe visena la nene, visae kiligama toña ga, popon ologe kilale ruruia.

¹⁰ Nalelagaena naña vena akusvinaun ga e kiena purvanua vena va yumaẽ kiela, naga yoko monar va ga narui. A naga naña na teluaen kolmekina e playu na kilaen mara, ee, yoko playu na kilaen mara monar te ga kolmekina narui. Visae pogos ñarera tai sanene, yoko li nalelagaena wa lala monar asuñal ñarera amio kiela sitomena viayavi lala, monar amasisu ña vano-o awar ro ea ava atol luasa.

Sur mali viowa na lua, naña molue e porotano

¹¹ Ana siraunia nepisu ke sina ga sur mal viowa tañena tai, naga molue e porotano pam. Naga kana lamaliu na ñarina lua ga, sa ga narin sipsip tai, ana

pogos naña pis, pulgona sa ga nopi naña sumo.

¹² Ana surmal na sumo tamãan na lua nena yumaẽ amio kiena ñareraena ñarera make ga, naga kila ña pano-o yomarava amio kiena yeririna make ga la amlotun surmali na sumo nañani, naña ñar pupia magka na marena ga yoko ñao sina.

¹³ Ana na lua nene asuñal akila ke pupia kile lala amio pupia sur na ilanen lala, pano-o akila tai naña kap molue ke ma e peni pitom e yomarava e maran yar la naña apisu ke ne.

¹⁴ Ana e kile la nene naña naga kila ke ne e kia kiena ne sur mal na sumo, naga sumã pisa kotalia ke yeririna na yomarava lala, ñere la apa ape wowe laa narui.

Naga pisawal pan la sape ate nono kiena ne surmal nene, naña playu sia ana mal si moña ga.

¹⁵ Ana amiyumaẽen pae, amla ñareraena pan surmali na lua vena kila nono nene kilia yuveve, akilia vis, a amla ñareraena pania vena kilia weñar yar ai naña pe kekaran re vatanon naña lotun nono nene poli.

¹⁶ A amio ñena nanini, naga ñareran make la ga vena awe tatu se limala marua, visae peraga, e piamenala. Yaru kar ga lala amio yerkawa lala, a la naña limala korena ga amio la naña limala pule, a yar la naña amiyumaẽ, amio kiela nasumonena lala, la make ga awar tatu nene.

¹⁷ Visae tatu nene ve su re e la, tañatete aul sur tai e yuma na wilwiliena, a tañatete awilwilin sur tai va yar tañena.

Tatu nene naña awe se e la, molue kome kia kiena ne surmali nene, naga marana na kiena kia.

¹⁸ Ko naña oulo tus nini monar omanmarua ruru e yo nene. Visae ovisu kilale make suria, yoko okilia olual marana na kia kiena ne yaru lala, ana apuloviraviran marana na kia na surmali nene, aña tol lualima yam orai pa orai, pona sa naña lañasa asape, orai orai orai [666].

14

Narin Sipsip amio la naña atol manu yam ponotia taaga lualima yam vari pa vari [144,000]

¹ Nekira ke sina pa yam tai, noñal tavie nae Saeon ñeke ga vamon inu, a ma e luasa noñal Narin Sipsip suñal sike ea, naga amio kiena pupia ñina na yeririna tai. La asiri kiena kia amio kia kiena ne arimana Ntewa sike e piamenala, a la moki pañisi, kana marana tol manu yam ponotia taaga lualima yam vari pa vari [144,000].

² Ana pupia ñaagena tai kom ma e peni pitomi, taulu naña sive ñanpo e piame pona polilu tera. Ana nemiagogonia, nemloge ga naña aña kita la amiyelu,

³ a la asumal asike vamon yo wa, e marana ne yar mal la vari nene amio nasumonena lala, amiyaun ke yauena viu tai. La tañena la mokliu naña akekaran yauena nene pañisi, la sinelan ñena asape ayaunia, ana akilayon ñelea. La ga naña akilia ayaunia, nane ñina na manu yam ponotia taaga lualima yam vari pa vari nene, naña apul plan la petan yomarava rui.

⁴ La ke naña pe akilali re piowa amio sira yam tai poli. La apuarar ruru kiela malena mekik ruru po silaga, a ataveve ke Narin Sipsip nene va e yo nape naña naga va ea. Yeririna la mokliu naña asike ne, ana la ke naña apul plan la petan tañena la narui, a la akilala apim sane mras ñesa nalaena va Ntewa amio Narin Sipsip.

⁵ La nene pe visokanen re tai molue kome logola poli, pe sur viowa re nena tai sike e kiela malena poli.

Navisi la telu

⁶ Ana e poglis nene, noñal navisi tai moña kaka ke e yo punu ga ma metava. Amla lologena wo naña ve uro re pania, vena naga kilia va lologon va e yo punu ga va yeririna na yomarava lala, vena va tol purvanua make ga, yolai make ga, a visena make ga.

⁷ Naga pisawal ke pa e yo punu ga amio pulgona naña keviu, sape “Amiu avatanon Ntewa,

avisirlua kiena kia, komin naña kiena aora na liþereen yomarava ñalivi rui.

Alotun naga naña sii sinapane, yomarava, a sive amio purþes nen wii lala.”

⁸ Ana siraun na nene, navisi nalua taveve pimi naña naga piofion ke sape “Pupia pulkumali viowa naña Papiilon naga mlor rui!

Naga pa mla ntewa naña pe pe lelaga re poli, a ñere plan yeririna mokliu naña apa ape wowe amio, la sa ga yar na ve torogen ga lala.

Nanagane, pupia pulkumali nene pimi piowa rui amio kiena nono lala.”

⁹ A yam si tai, navisi na telu taveve la pimi, pisawal manenea sape “Yoko yar la ve moki naña akinai vena alotun yar mali viowa amio kiena nono, a yoko yar la ve moki naña atañan awe kiena tatu se piamenala pona limala.

¹⁰ Ana yar naña kila sanene, yoko naga ñena ga mun e piala naña pulen kuruta namunena naña melkalka na pupia sinemimiena kiena ne Ntewa. Yar na sanene, mapulukupi luamene lege kare tasnena e marana navisi wa lala a e marana Narin Sipsip.

¹¹ Ponoyome na kiela naloge viowaena yoko molue lue e kapi naña tañatete mare pog tai. La naña amlotun ke Sur mal Viowa, apatanon kiena nono, amio la naña añar ke tatu na kiena kia e tasnela, la tañatete atol yo wo na va ruru laena, ana yoko ayuñan ga loge viowaena ko legiena a kolemalu nalue ga narui.”

¹² Nakoena nini naña navisi pisa ñarera pañisi, ana kana kinasa sape ita li nalelagaena wa lala monar tesuñalu ñarera temio kieta sitomena viayavi. Monar telogear navisaluaena lala kiena ne Ntewa, a silaga monar teve lelaga e Yesu.

¹³ Ana nemloge visena tai molue ma e peni, sape “Nanene visena tai naña yoko osirilua, naña sape, siar nagane vano, la

naþa yoko amare, naþa kiela malena su ruru sike e limana Suþe rui, yoko awar pupia navisa ruruena.”

Visena nene þisi, ana nemloge Ninuna tañania, sape “Ee, la nene yoko kiela yuñena wo la avam metava amio la, a nagane yoko taþatete si ayuñae narui, la atol kiela navaruruena wo rui.”

Navisi la telu apito aþar kinanena naþa marua e yomarava nini

¹⁴ Nekira si pano, ana lul yuwowo tai meke ga vamon inu, ana nomal yar tai, sane Narin Yeririna, totano teke e lul nene rui. Totano teke amio karo na þarila kiena ne þarin suþe lala e þarina, naþa amiyuñae e kol, a e limana tarar ke uknaep tai naþa mal paþisi vena teen kras nen kinanena lala.

¹⁵ Ana navisi taþena molue e yuñ wa, pio ke naþa teke tano e wos nen lul nene, sape “Poga, osuñalu, otar kioñ playu ova osiar yuñena. Kinanena la naþa sike e yomarava amarmarua rui, nagane pogos na teen narui.”

¹⁶ Ana naþa teke tano e lul suñalu, silin kiena playu pa e yo kar ga e yomarava, te kinanena la naþa marua sike ea.

¹⁷ Ana navisi taþena molue e yuñ wa ma e peni, naþa naga meña þarar ke kiena playu naþa pe uk, naga meña mal na mal.

¹⁸ Ana navisi ke sina tai pitomi, naga naþa pe navisuaren pulukapi, ana naga þaro e wonta pimi pio taþena naþa mlarar ke playu, sape “Pogaga, ko meña ga, pogos naþa oto okila kioñ narui. Otar kioñ playu oto owar punu kilis nen kerep la nene teliv e yomarava nini viora, ote polo mras la naþa marua telan sike e kilisa.”

¹⁹ Ana navisi naþa mloge, teran kiena playu e yomarava, pito þarpolo mras nen kilkerep e yomarava, koven la e lele na winplanen was nela naþa asike vanua e pulkumali.

²⁰ Ana nasinemimiena kiena ne Ntewa kilapel la ga, pumumu kare la pano-o kuruta mlau þarpoyo, mlau pimi keviu sa ga womie, kokonia make purvanua

wetelu merorol pa tol kolmekin yaru, pano pano kilamarala plasania.

15

Navisi olua amio pog viowa maro olua

¹ Nepisuveve ke sur la ma e peni wa, ana pe yam piavi re poli wa nepisu pupia kile taþena naþa pe pupia sur na ilanena paþisi, nane navisi la olua, naþa la aþar maron pog viowa la olua. La maro sanene komin naþa visae la awar ro pae, nane kila sane pupia nasinemimiena kiena ne Ntewa yoko þisi ruru nenaga.

² Ana nomal pupia yotop tai, meri ga pano meke na sa ga sive, ana naga kap meke ea, ana pila na pila. Ana e lepas nen yo nene, nepisu yar la mokliu asuñal asike ea, a la nene, naga yeririna make la naþa ataulu yar tetan, la ataulu kiena namareraena, a la ataulu puriukawa na marana na tatu naþa ame sike ea, naþa yar nene þaria sane kiena kia nowo tai.

La naþa atauluia, asuñalu asike amio kiela kita lala naþa Ntewa þar pan la,

³ ana asuñ ame ke kita la naþani, la asuñ amiyaun ke kiela yauena tai naþa yauena kiena ne yar na yuñena kiena ne Ntewa naþa Navisawalena Mosis, ana nagane pimi naþa apio asape yauena kiena ne Narin Sipsip. Yauena nene pa sanini, sape

“Akee Ata Ntewa na Mareraena kioñ yuñena la akerkeviu paþisi, apowo paþisi, ko ope Parin Suþe kiena pog make ga, kioñ þelaga la mesmesu a ape lelaga.

⁴ Ko ope Suþe, pe yar re nena tai naþa ve maraun ko re.

Pe yar re nena tai poli naþa ve vatanon re kioñ kia.

Ko ga ope na wa kemua lelaga, ana yolai make ga monar akinai tano alotun ko,

komin nagane, sur mesmes la naþa ko okila, lala amaliv apim amerarava ruru e kilamaran yeririna na yomarava la rui.”

⁵ Pisi na nekira ke sina ga pa loyuñ ma e peni ana nomal pulutava na yuñ

wa lala suwowo ga sike na. Nepisu sane silparpara na tapolen nena nanua sumo akutarar kome yomema pimi, naña amligan ruru navisaluaena kiena ne Ntewa sike ea.

⁶ Apike pae, ana navisi la olua amolue ea. La amiyen kulmrae urmi la naña amekik ruru po, apilavila, a atelan kulka naña amiyuñāen e kol p̄aro e yerela. Ana amial apim, amio pog viowa olua naña añar ke ne.

⁷ La apim asuñal asu narui yar mal la vari tai nene kian piala naña pe kol olua pan la, tai kus tai, tai kus tai, naña apuleng nasinekar kiena ne kieta Ntewa naña sulue na sike ne.

⁸ La akuspae, ana komin pupia nau-rarena na nañareraena kiena ne Ntewa sike e yuñā wa nene, kapiu p̄ar punu yo pañisi, kila yar tañatete va loyuñā. Ana suñā sanene pano-o tol naña pogos viowa olua kiena ne navisi la olua nene p̄isi ruru nenaga.

16

Pias nen nasinekar kiena ne Ntewa olua naña puleule nenaga

¹ Ana nemloge visena ñarera tai molue ma e peni pa pa navisi la olua nene, sape “Nagane, pogos na yuñāe kiamiuena narui. Ataron plan pias nen nasinekar kiena ne kiamiu Ntewa veve taaga vito e yomarava.”

² Pisa pae, ana navisi na sumo pa taron plan kiena piasia pito e porotano, ana kana wii nena mlau pa kila magka wa la molmolue kalo tas nen yeririna la naña añe tatu na sur mal viowa sike e yepela, naña la amlotun ke kiena nono, añar kare magka pano-o p̄isa amloge sinelalaea pano-o pañisi.

³ Yoko navisi na lua towe taron plan kiena piasia pito e sive, ana kana wii mlau pito tol sive kila pimi pe kuruta sane na yar mare, a sur mal la naña sike ea amarmare make nenaga.

⁴ Yoko navisi na telu taron kiena piasia pito e wii lala naña amlau, p̄arar purp̄es nen wii lala, ana kana wii mlau pitove kila la ñena apim ape kuruta veraga.

⁵ Ana nemloge visen tai pitomi e navisi nene naña pe p̄arun ke wii na yomarava lala, naga sape

“Ko na osike ñā na konua rui, a osike nagane, ope Nawa,

kiomñā nakoena la nene añarera manene laa, ana kiomñā naliñereena memes ga.

⁶ Lelaga naña yar na yomarava lala, añemoñar kiomñā yar wa lala, ak-ila kuruta na kiomñā navisawalen la mlau, ana omla maran ke sina pan la pogaga, naña ñāla wii namunena ape kuruta make ga.”

⁷ A visen tañena si molue ñena e wonta, sape

“Ntewa na meta manenea, pe lelaga pañisi, kiomñā naliñereena lala amesmes ruru nenaga, ape lelaga pañisi.”

⁸ Yoko navisi na vari taron plan kiena piasia pito e mrae, ana kana wii kila mrae yo pisun manene laa, kilia lege yeririna na yomarava la sane kapi.

⁹ Ana amloge yepisusun, yepisun kekan la pano-o apiuelin kare kia kiena ne Ntewa pañisi. Akilia ke asape naga mligan ke nakoena la nene pimi, ak-ilia ñā asape naga visae sinenania kilia visaluñaria, ana yepela mavin ga vilon laena, asape tañatete avatanon naga, a tañatete aieluar naga pog tai.

¹⁰ Yoko navisi na lima taron plan kiena piasia pito e pupia lele na totanoena kiena ne sur mal viowa nañani, ana kana wii mlau pito kila lepas wetelu na kiena nasuñenena, yo malolo make nenaga. Yar la amloge piowagan nakoena nene p̄isa, akarar purmenela la pano-o,

¹¹ apiuelin kare Ntewa nae peni komin kiela yepelalaea a kiela magka wa lala, ana apisalup̄ar ga, asape tañatete nenaga avilopu la e kiela naviowaena.

¹² Yoko, navisi na orai taron plan kiena piasia pito e pupia wii naña mlau, kiena kia Yupretes, ana kana wii nena mlau pito p̄artañe wii naña mlau ke ne pimi mema nena ga. Nanene kila narui p̄arin suñe na purvanua make lala na lepas naña mrae p̄arpo yo ke ea, pe kiela mrapa narui,

vena waroen yo ea aimi amio kiela yar na mara lala.

¹³ Ana nomāl ninuna viowa telu naþa sane prok, naþa tai molue e logona pupia arman nopi, tai molue kome logona Surmal Viowa, a tai molue kome logona navisawalena na visokanena.

¹⁴ La telu nene, ninuna ne yermare la telu naþa asumā akila ke kile lala, a asumā aþaro make puna þarin suþe na purvanua lala na yomarava, aþerela apim lele taaga vena akila ruru make suria komin pupia mara naþa yoko kapur e pupia legiena maro naþa Ntewa na mava pisaar rui. Ntewa pisayu legiena nene rui e kiena visena tai, naþa sape

¹⁵ “Avisuar amiu, yoko nomālivin amiu vinau ga, yoko ailan inu sa naþa visae yar na vinauena tai imi.

Yar naþa kon ruru kiena sur lala, naga su ruru ke narui, a tavolo ke ga wa, vena sumāte inu, vena imimi lua mevano, yoko wo van vaþisi.

Ana yoko laþasa ailan sane yepela ve sinas ga akiriri tetai, amawa vaþisi e pogos nene.”

¹⁶ Ana nomāl pog na mara na legiena maro pimi þarpoyo, a ninuna la nene aure þarin suþe na yomarava la ava lele taaga, nane e yo naþa visena na Epru sikia sape Amāketen.

¹⁷ Yoko navisi na olua taron plan kiena piasa, ana taron plan ga pitomi metava e yepesinas na mēke ne. Ana visen tai molue kome yo wa na totanoena loyūma e yumā wa nae ma peni e pogos nene, pion manenea sape

“Nagane pogos na luas nen sur make ga.”

¹⁸ Ana yekarpla siar e yo punu ga veraga, þarar kana polilu ne la naþa atera, a navioena lala a māagena lala. A þarar mēna, pupia yemninu, yemninu mā pano-o pa piowa manene laa sa naþa pe yar tai pisuli re yam tai poli wa, siar e naþa yar mal e yomarava pimi tol nagane.

¹⁹ Ana yemninu nene kilaþa porotano, kila pulkumali lala na purvanua make ga teliv e yomarava nini piora amloloru, a

kila pupia pulkumali naþa Papilon purþa lepas telu.

Ntewa sumā sitoñal ke yo nene, þarar kiena napiowaena lala, ana kila karepel manene paþisi torokin nena kiena þelaga naþa kilakila ke ne, kila naga mun e piala naþa pulemamagan kuruta na munena na māreraena na kiena nasinekar.

²⁰ A þarar yemninu nene, narin purvanua la apureure apano akokovio, a tavie la nanua asmāl asu ne, añal la re si poli.

²¹ Aes yua la meta e sinapanē amloloru sane pupia kilavaru lala, a monar yeririna la naþa asike e yomarava. Amloge manene laa piowagania, apisu naþa sur viowa nene mārera manene laa, pano-o asumā apisalele kare Ntewa.

17

Sira viowa teke tano e surmal viowa

¹⁻² Ana e pogos nene navisi tai pimi, naga na navisi la olua tai naþa akus ke piawi pias olua nene. Naga pimi mesmesun in ga, pisawal sape “Otaveve inu. Yoko nekipian ko e pupia pulkumali viowa naþa Papilon, naþa mēke e naþa pupia wii la mlau ke ea. Pulkumali nene miyūmae piowa ga, sa ga sira na mrapa tai. Naga sa ga þarin suþe na purvanua taþena apa akila ke kolau pania, a sa naþa māna kuruta na munen kila sitomena kien yeririna na yomarava la apa apiowa laa narui. Ana oimi, yoko nekila ko ovisu ya naþa yoko imi mālivia e pogos naþa yoko naga war ruru kiena nakoena napo.”

³ Ana navisi naþani pimi þerelua ninuu, mligan inu nesike e yomema tai. Ana nepisu sira tai totano teke meta e purwolu na puluk tai. Sur mal nene pivaga make ga, naga þarina olua, a kana lamāliu lala tol lualima, a e yepen make ga asiri kia viowa lala navisalelekareen Ntewa.

⁴ A sira naþani, naga miyowau paþisi e kulsota la naþa amemaena a apivaga, a apaia kare yepena lala e mrakotal lala, a e piataliga lala, a e sur la naþa pe kol, a e kilavaru la naþa merarava po naþa

kana kilavaru ne pa metava pañisi, amio sur la naña asike loyuma e mratamelilivi. Naga mlarar ke piala tai naña pe kol, a piala nene pulen ga kiena ðelaga viowa lala amio kiena kolau.

⁵ Asiri visena tai sike e piamenana, pe visen wan ga tai, visena nañani naga sane kia tai, naña pisa sanini, sape “Papilon naña keviu, anenane sira na mrapa lala, purpes nen ðelaga la naña ape kororaki e yomarava.”

⁶ Nepisu manene ma sira nene sanene, nepisu kilale sane mun wii ana maran telivi, a pe komin re naña mun kuruta na munena poli, ana komin naga mun ke kuruta kana li na lelagaena wa lala, nane la naña amemomar la komin naña ataveve Yesu. Nepisu sira naña sanene narui, yepu ðili na ðili!

⁷ Ana navisi pisa pan inu, sape “E, ya ne kila omila manene sanene? Osuwa, yoko nevisa meraravan van ko na wa. Sira nene, þarar purwolu puluk naña teke e wos nena, a þarar þarina olua a kana lamaliu lualima, suri la nene kala kinasia suma ga, a yoko nekila ovisu kilale ne.

⁸ “Purwolu puluk naña opisu ne, naga meke kemua nakonua rui, ana naga pe su re si nagane poli. Ana e pog tai naña pimi ke ga wa, yoko molue si vetan pulus naña meke e nagane, yoko vanon marpanun kiena nakoena. Ana e pogos nene, yoko yeririna na yomarava la naña asike ga wa, yoko avisu purwolu nañane. Nane la naña siar e nasiiena yomarava pimi, kiela kia pe su re e Tus na Malena poli. Pog naña avisuia, ailan vañisi, komin akilia asape naga sike kemua na konua rui, yoko pe su manene re si yam piavi poli, ana siraunia, naga molue sina.

⁹ A yar naña pe manmarua ruru po, yoko naga kilia visu kilale ruru kinas nen sur la naña yoko nevisa.

“Nasumo, þarina la olua. Kana kinas, pisa pulkumali tai naña sira nene pe suþenia, kunus olua sike ea. A kunus la nene, la mena kala kinas suma ga, naña sape pupia þarin suþe la olua asuma ga.

¹⁰ Tol nagane, þarin suþe la lima nene aþis rui, a tai sumal sike nanagane. Tai mena ga pe malivi re poli wa, sike ga wa, a pog naña imi, yoko su towe laa ve piavi na wa.

¹¹ “Ana purwolu puluk mena, naña suþes nanua a nagane pe mon re si poli, nanua sumo naga mena þarin suþe la olua nene tai. Naga la ke tai narui, ana yoko wasuþe sina sane þarin suþe na orely tai. Naga pe yerikawa sanene, ana pe sur koren ga, komin yoko naga mena þisi, va war kiena nakoena marera.

¹² “Sur taþena na vike meraravanena, nane lamaliu la lualima nañani. Nanene kala kinasia nane þarin suþe si lualima. La nene pe asumal re poli wa vena ave suþen kiela lepas lala, ana yoko akila ga kiela yumaen la na wa e pogos na purwolu nene sumalu. Yoko ave suþen pae yomarava nini amio, ana nane naga pe na yam plas ga, sa ga aora taaga.

¹³ “La lualima nañani, la taþatete akila kiela yumaena lala, ana la ape nakilaen ga yumaen kiena purwolu puluk nene, vena kiela namareraena iila naga, vena kila naga imi ve keviu la sane.

¹⁴ Yoko la punu nene aim veraga vena akilali mara amio Narin Sipsip, ana taþatete atauluia. Peraga, ana yoko naga taulu la, komin naga ke narui naga pe suþe kien suþe lala, naga pe þarin suþe kien þarin suþe lala, a kiena yeririna nowo lala, nane la naña naga pio la, naga mligan plan la, a la nane ave lelaga e naga.

¹⁵ “Sur navisa meraravanena taþena, naga wii lala amio sive lala naña opisu sira viowa nene naña towar la ke ne. Kala kinas, naga yeririna la naña asike e yomarava, amio yolai lala, a purvanua lala, a visena lala.

¹⁶ “Ana siraunia, purwolu puluk nene amio kana lamaliu lualima, yoko yepel mavin sira viowa nañani. Yoko asumalu akila imi viowa van vañisi, naña ayen plan mana kulsota lala ve plamoþe e maran yar lala, a yoko akan make kana kilamiu lala ana okoven kana puriu lala vito kapi kekania.

17 “E mrapa ne nanene naþa yoko akila va sira nene, tepisu sane torokin nena nakoena naþa Ntewa pisawal e kiena visen tai nanua sumo rui, sinenan sape sira nene monar waria. Naga ga mligan e kiela sitomena lala amio purwolu puluk nene, vena akila sanene vania.”

18 Ana navisi naþani kila make kiena visena e poglis nene, sape “Nane navisa meraravanen sira nene narui, naþa naga pupia pulkumali naþa pe suþen þarin suþe taþena lala e yomarava.”

18

Pulkumali viowa naþa Papilon mloru

1 Yoko, nepisu navisi taþena molue ma e peni pitomi tano. Naga pe navisi mñarera tai kiena ne Ntewa, pitomi þarar pupia namareraena, a kana nategoliena kila yomarava pilavila.

2 Naga pio e pupia pulgo tai naþa pisawal sape

“Pupia pulkumali viowa naþa Papilon, mloru rui.

Nagane, yo nene pimi pe umã tai mñana yermare lala a pe yo tai naþa nin-una viowa la atapolou ea.

Manu make ga naþa akila ke þelaga na kororak viowa lala, la mña aña mñala ponovi sike ea.

3 Naga pa þere ntewa la naþa pe ape lelaga re poli, a þere yeririna taþena la apa ape wowe amio, la sa ga yar la naþa amun wii þarila telivi. Sa ga naþa naga pa þere þarin suþe na purvanua taþena lala, apa akila kolau amio, a yar la naþa amiyumãen ke kilavaru e yomarava telivi piora, la ataulu kilavaru namname paþisi e yumãena viowa lala na pulkumali nene, pano pano-o apim ape yar na sur moki manene laa.”

4 Navisi pisayu sanene þisi, ana nemloge visen taþena kom ma e peni pitomi, pisa sanini, sape

“Kiau yeririna lala, o! Popon aurmatan yo nini vilaga,

visae peraga, naga warar amiu ava e kiena mlamulena viowa lala,

visae peraga, naga warar amiu mña ava e kiena nakoena lala.

5 Kiena mlamulena viowa lala ponpolo mña pa tol ma e peni, a Ntewa taþatete sinen þesan naþa naga kilaroro kiena navisaluaena yam via.

6 Popon ga naþa alamaran si naloge viowaena vania sa naþa naga kila pa yar taþena lala,

popon aul maran vania va yam ve lua e ya naþa naga kila rui.

Wii melkalka naþa naga kila yar taþena la amunia, popon akokonia ruru mña piala ulemamaga.

7 Nanua, kiena nalogewoena e kiena malena meme ga, naga keviu paþisi, ana yoko vilon imi ve naloge viowaena e yepe lalaea lala amio tagiena lala.

Ana nanene na pere ke na wa, komin naga pilaven ke kiena sitomena na wa, suña pisa ke pania, sape ‘Ke, in na nepe þarin suþe sira sanene, neto ruru na neteke ne. Sur make ga po manene laa pan inu, ana taþatete nena neve sa letano tai naþa pe kiena sur re poli, taþatete nena netagin naloge viowaena pogos tai.’

8 Ana naga, e legiena ta ne pimi ke ne, yoko sur viowa la kila kare ruru naga veraga. Yoko marena, warar tagiena, amio viso, a yoko kapi kekalele kare naga.

Naga pe sitom re sur poli, ana Suþe Ntewa naþa yoko lipere naga, kiena namareraena naga keviu manene laa.”

9 Ana navisi pisa sanini, sape “Parin suþe make ga na yomarava nini telivi piora, la naþa apa amlotun ke ntewa lala na pupia kumali nene, yoko avisu kilale naþa naga mlor rui. La ke narui naþa sane apa akila ke kolau amio, apa amloge po amio naga e kiena malena wo pano-o, pe asitom re nena sur tai.

“Ana pogos naþa mloru, kana kap la naþa kekan ke ne piuyu pa metava, nanene narui yoko sinela viowagan vaþisi, yoko ataginia.

¹⁰ Yoko avisu nakoena la naþa naga sumã þaria, yoko kila la mña asiar ayuyuwawa. Yoko asu la gar perina akira avisusuia, avisave

‘Ake, pupia Páilon, pulkumali namãreraena, sinemimi miye ko paþisi.

Lelaga naþane, osu ruru mña pano-o, ana e aora taaga ga nene omãl kionã luasa, omloru, oþisi nenaga.’ ”

¹¹ A þarar mña, yar na stoa lala e yomarava wetelu yoko atagi a sinela yea, komin naþa pe yar na ulen re si kiela sur la poli.

¹² Nanua sumo, akila kiela waa lala pulen ga tegaki nowo lala, sane sur la naþa amiyumãen e kol þarar selpa, amio kilavaru na kupito naþa pupia kilavaru, amio sur naþa sike e mrakiav, a kulmrae la naþa kala marala la powo, a lak la naþa ponotaninu, a sur la naþa amiyumãen e maluen elepen, pona e lak lala, pona e pototo lala, pona e kilavaru lala, ana nagane, kiela yumãena na tauluen kilavaru la nene apim amlolor make ga.

¹³ A e legien nene, yoko yar la ve aul re si sur na kilaen kinanen lala, sa naþa mñaki lala, þarar mrasil lala, pona yago lala, puluyavi na kilaen kilaparavi amio kona lala, þarar mña sur na munen lala sane kuruta na munena. Yoko yar ve ul re si sur la ne sane ponotaninu a sirveve na mras nen olip, a sur na tauluen kilavaru la ea sa nanua sumo, sane puluk, sipsip, wosi þarar kana sur naþa þerewerea. Laþasa nanua sumo apuliwilin yar lala apim amiyumãe korena ga pan yerka wa la sane, yoko ve akila re si narui, komin pogos naþa pupia pulkumali nene mloru, yoko yumãena toko narui, ana yar taþatete si taulu kilavaru na visuaren kiena malena.

¹⁴ E pogos nene narui, yoko avisayu yo nene, avisave
“Ko sinomãan osape owar mrasnoã la naþa ve kerkeviu ve moki, ana

naga pe marua re poli wa, kekapil make rui.

Nanua, ko na lumomã pule ruru nenaga, kionã sur la punu ga po tanea paþisi wa, ana nagane kokovio make nenaga, taþatete nena yar tai visu si sur wo tai e ko narui.”

¹⁵ A yar na wilwilinen sur la nene, naþa la ataulu kilavaru la mok li e rui, yoko asumãl ga asike perina akira vano, ailania a amaraun nakoena naþa pupia pulkumali nene sumã þaria. Yoko sinela ye vano-o vaþisi,

¹⁶ yoko atagin vaþisi, avisave
“Ake, pupia kiamimi pulkumali, mesitom ko paþisi wa.

Nanua sumo ko na omyowau ruru po paþisi wa, oþar kotal a na kolmekimã la naþa pe kol piataliga la þar punu yepemã lala, ana nagane na ko na peraga narui, kap mare.

¹⁷ Sanapen na kionã pupia sur mok la nene kovio ga e narin aora taaga ga sanene?”

A yar lala na uararen þeligas nen waa la naþa nanua aþarwar ke tegaki lala, þarar kiela yar na yumãena lala, amio la naþa akomkom ke e waa, pona ataulu kilavaru e sive, la mña asumãl ga asike perina apisu manene ke yo naþani.

¹⁸ Pogos naþa kana kap ne la piu, pa ke ma e sinapane, yoko avisasa yo nene avisave

“Lelaga o, pulkumali nene na yo ta nene naþane, e yomerava nini yo tai pe sa re si nene poli.”

¹⁹ La asitom sanene, a amloge piowa, akoven kare posnoyavi e þarila þisa, atagi, asape

“Ake, kiamimi pupia pulkumali, piowa pan ko paþisi wa.

Ko na opulen ga kilavaru, ana memiyumãe e kiamimi waa lala, moþar kionã tegaki lala, pano pano-o imimi mña ga momãl kilavaru naþa miila imimi, ana nagane piowa narui.

E pogos plas ga nene, ana opim ope yo na kovioena ga.”

²⁰ Ana pogos naþa pupia yo viowa nene mloru sanene, visena tai molue kom ma e peni, sape

“Ma e peni, pupia kekarena a logewoena. Amiu nalelagaena wa lala, a nalologena lala a navisawalena kiena ne Ntewa, amiu akilia aieluar naga vaþisi, komin naga mliþere sira viowa nene rui, kila maran si pania komin napiowaena la naþa kila pan amiu nanua.”

²¹ Ana e pogos nene, navisi tai pimi kawelua pupia kilavaru tai, kusyaun pa metavan þarina koven pito kopo sive, talilu pito kovio. Siraunia navisi naþani pisa sanini, sape

“Pupia pulkumali viowa naþa Papilon nanene narui, yoko akoven lua va ve sanene, akila naga loru vena taþatete si kilia sumþalu pog tai.

²² A ko Papilon, visena na van ko sanini, sape

yauena veraga amio yuka lala, yoko taþatete yar tai loge si e ko,

yar na kilaen yumþaena lala, yoko taþatete si tai se ko pogos tai,

a yoko ve mþaagena na vilien re si kinanena lala.

²³ Yomerarava na kapi vivaga lala taþatete si tegoli kioþna yo lala,

a yoko taþatete si ologe visena na kekarena kiena mþee amio sira mþee naþa atalopa mare ga na wa.

Yar na kilaen kioþna kilavaru lala, e yomarava nini pe tai torokin la re poli,

a namþareraena kiena ne kioþna kimi lala a kioþna navisokanena ga lala kila oþere sitomena kiena purvanua taþena lala apa ape wowe.”

²⁴ Nane tepisu naþa Papilon nene, naga pe yo tai naþa pe purþes nen napiowaena manenea. Navisawalena ai pona nalelagaena wa pona yar taþena naþa aþemþar la komin naþa ape kiena ne Ntewa, ana kala kuruta la mlau e porotano na pulkumali nena, naga ke nene narui, naþa kila naliþereena a nakoena kiena ne Ntewa mloru ea mþarera manene paþisi.

19

Pupia kekarena ma metava komin naþa ma e peni taulu make suria

¹ Siraun naga nene, nemloge pupia þina ma e peni apion manenea, asape

“Potena pan kieta Ntewa!

Tamaliaena, urarena a mþareraena naga taaga ga kiena.

² Kiena naliþereena make ga ape lelaga a amesmesu paþisi.

Sira na mrapa la nene anela naga piowa ga,

kiela na kolauena la akila yomarava pimi pe kororaki paþisi, ana Ntewa mliþere naga rui.

Ana naga mla pupia nakoena tai pania komin kuruta kana kiena yar na yumþaena la naþa mlau.”

³ Asumþa amlolokai mþa sanene, ana asikol ke sina ga, asape

“Potena pa Ntewa! Kapi kekan ke kororaki la nene rui, yoko kana kapi nena viu lue ga va metava narui.”

⁴ Ana nasumonena la lualima yam lua pa vari [24] amio sur mali la vari akinai e marana ne Ntewa naþa totano teke meta e kiena yo wa, ana amlotun ke naga. Apionia, asape

“Po paþisi! Potena pan keviu!”

⁵ A visen tai molue mþena e yo wa naþani, pisa sanini sape

“Kam na yar na kilaen yumþaena kiena ne Ntewa,

amiu yerkawa lala a yeririna kar ga lala, kam make ga naþa amlogear naga, nagane kana pog nena napo naieluaarena.”

⁶ Ana nemloge sina pupia þina naþa pio naþa kiela mþaagena sa naþa sive þanpoia mumu, sane polilu. La asape

“Potena pania!

Kieta Suþe Ntewa na Mava, naga taulu make sur rui!

⁷ Teieluar naga,

tevisirlua kiena kia, tekekarania.

Nagane pog wo na kilaen þaþagena na talopaena kiena narin sipsip narui.

Wona na sira paia ruru naga su ruru ga sike na,

⁸ a amiyowauia ruru naga e kulmrae viu wo lala, apowo a amerarava paḡisi.”

Ana kulmrae nowo naḡa miyuwowo ne naḡa wona narin sipsip na sira miyenia, naga kana kinas toḡa ga, kana kinasa sane yuḡaena wo la naḡa nalelagaena wa lala kiena ne Ntewa la akila rui.

⁹ Ana navisi naḡa sike amio inu e pogos nene pis pan inu, sape

“Yoko nevisa kioḡa visena tai vena osirilua e kioḡa tus nene. Visena sanini, sane yar naḡa yoko avio naga vena naga ḡena va e kinanena na ḡaḡagena na talopaena kiena Narin Sipsip, yoko naga loge wo na wo vaḡisi.”

A sikol sina visena nene, sape

“Naga visena lelaga tai kiena ne Ntewa naḡa pe lelaga paḡisi.”

¹⁰ Ana nemloge naga pisa sanene pan inu, nekinai pania, nesape nelotunia, ana naga pialuḡaria. Pisape “Toko, ve okila re sanene van inu! Monar olotun ga Ntewa naga taaga. In na nepe kiena yar na yuḡaena ga, sane ko, a sa ḡena wolai taḡena la naḡa apiawa ḡarera ke e visena lelaga lala kiena ne Yesu. A po paḡisi naḡa amiu asuḡa akila ke sanene, komin naḡa purḡes nen kinas nen navisawalena lelaga make ga naḡa apisawal nanua pimi, naga Yesu ga ne, amio kiena visena lelaga la naḡa apuarar ke ḡarera.”

Yar ḡarera naḡa kus wosi na miyuwowo

¹¹ Ana e pogos nene, ma e peni pietava pan inu, nekira pa loyuḡa, nepisu wosi yuwowo tai naḡa po paḡisi suḡalar ga sike na, a yar ḡarera tai naḡa kusa totano teke ea. Naga ke narui naḡa kila mara suwo napiowaena, pona pogos naḡa kila kiena nalipereena, ana naga miyuḡae nena mesmes paḡisi. Yar nena, apio kiena kia asape Parin Suḡe Lelaga Naviawaena.

¹² Ana kiena kia taḡena ḡena tai asiri sike ea pe yar tai kilia re kana kinas poli, naga taaga manene kilia. Kilamarana pilavila sane kap naḡa pivaga, a e ḡarina

miyen ke karo na ḡarila kiena ne ḡarin suḡe lala.

¹³ Naga miyen ḡena ḡena kulkota viavi tai naḡa aputon pito e kuruta vena kila ve maran la ea, ana naga kiena kia si tai na naḡa asuḡa apio naga ea, naga sanini, asape Visena Wa kiena ne Ntewa.

¹⁴ Ana e pogos nene, ḡegas nen yar na mara lala nae ma e peni, amiyowau ruruia e kulmrae yuwowo a akus kiela wosi yuwowo lala, asuḡa ataveve ke kiela nasumonena nene apano.

¹⁵ Naga ḡere la apano, kiena visena molue ke kome gona sane playu na mara naḡa mal ga lepas luwoka, naḡa yoko te plan purvanua na yomarava la akekapil. A siraun naḡa yoko naga taulu la, yoko naga suḡalu ve suḡen la, a naga ḡuarar ke plaki e limana, pototo tai naḡa urmi. Nakoena ḡarera ya naḡa sinemimiena kiena ne Ntewa na mava ligan va yar la akusia, ana yerkawa ne nanene narui yoko naga war imi ḡalivi.

¹⁶ Ana naga kiena kia taḡena sike ga wa, naḡa asiri e ḡena kulkota a e lana, sape “Parin Suḡe kiena ne ḡarin suḡe lala, Yerkaḡa kiena ne yerkaḡa lala.”

¹⁷ Nepisu navisi tai suḡalar sike na naḡa yepisun tegolia, naga pion pa manu lala naḡa akaka ke metava ne, sape “Ei, kam punu ga aim lele taaga e pupia ḡaḡagena kiena ne Ntewa.

¹⁸ Kam manu na kanen tata lala, yoko ve ve piavi re ayuḡaen kinanena tai torokin amiu nenaga, naḡa tas nen yar mare lala kiena ne nasinekar kiena ne Ntewa. Parin suḡe lala, pupia yerkaḡa na mara lala, yar ḡarera lala, wosi na mara lala, amio la naḡa aḡerela ke ne, amio yeririna kar ga lala la naḡa ape yerkaḡa pona ape yar ve torokaki na yuḡaena ga lala, la make ga asuḡalu vena akila mara va Ntewa, ana naga taulu la kila moḡar la pa ke ne.”

¹⁹ Ana nepisu surmal viowa amio ḡarin suḡe na yomarava amio kiela ḡegas na kilaen mara lala, apim amiyuwon vain la ke lele taaga. A sinelan asape akila mara

amio naþa kus ke wosi yuwowo ne amio kiena yar na kilaen mara lala.

²⁰ Ana asape akila mara narui, ana yar viowa lala amilan ga naþa lepas kiena ne Ntewa asumal veraga apa atarar kiela na sumonen luwoka naþa atarar ruru la nenaga, nane sur mal viowa amio navisawalena naþa pisolokan ga ne na pe yar naiilaena e kimi lala a sur nailanena lala. Sumo, naga miyuþaen sur la nene pisa kotalia ruru nena yar lala naþa þere kiela sitomena pano atamian aþe tatu na sur mal viowa pa e piamenala, apa amlot wowe pa kiena nono.

Ana la atarar ruru nena nasumonena luwoka na þegas viowa nene, ana akuwanpran luwoka pito e pulukapi naþa mumu ke ne.

²¹ Ana taþena la pe akila re mara poli wa, amilan ga playu na mara tai molue kome gona naþa kus ke wosi yuwowo ne, pa sanene, pa sanene, te momar kare la amarmar pa ke ne. Ana taveve ya naþa nepisuia, manu na kanen kilanþiu lala apim atewowa tas nen marena la naþani, akan pano-o meþela la puleule.

20

Apiar Yermare pa tol kas manu taaga [1000]

¹ Ana nepisu navisi tai molue ma e peni pitomi tano, mlarar ke ki tai e limana, ki na pulutava na pulus nen marena naþa pito na pitove pe luas re poli, a amio ki nena, þarar mþena sen mþarera tai.

² Ana naga þere mesmesun pupia nopi nene, naþa pe yermarua lomara naþa Yermare naþa Yermare Lego, pa tarar ruru mþarera, piar ruruia e sen, pisaar sape yoko mon mþa sanene va tol kas manu ve taaga.

³ Ana kutarar naga amio kana sen naþani koven pito e pupia pulus naþa pito manene tano ne, ana kotawea, kiar ruru mþeke ea, vena yar viowa nene ve va re si kilali yeririna lala na purvanua wetelu, va tol naþa kas manu ve taaga nene warovia. A kiena mþareraena taþatete þisi make na wa, komin naþa siraunia, e narin

pogos tai ve plas ga, yoko naga kilia molue vena kila ke sina ga þarina yam tai.

⁴ Ana nepisu yo wa lala, amio la naþa atotano ateke e wos nela, naga la naþa apisir plan la rui vena akilia aliþere yar lala. A nepisu mþena ninun yar la moki naþa asumia ga amio la, nane yar þes la naþa amlologon Yesu amio visena wa kiena ne Ntewa, ana ateroro kolmekilania. La nene pe amlotun re sur mal viowa nene poli, pe akinain re kiena wonta poli, a pe aþar re kiena tatu e piamenala poli, pona e limala, ana Ntewa kekaran la, kila la amal siþa vena akilia asumal amio Kristo vena avisuar yo punu ga va tol luas nen kas manu ve taaga naþani.

⁵ Naþa amal si sanene, naga pogos þesia naþa yeririna lala amal si petan marena, ana la ga nene atolia. Taþena lala naþa amare ga asike na wa e pogos nene, la nene yoko atol ga kiela malena na wa e kana nalua nena, nane e luas nen kas na manu taaga nene.

⁶ Navisa ruruena wo kiena ne Ntewa sike e la naþa amal þes sina vetan marena nene, naþa la na kiela malena pe wa ruruia. Marena na lua taþatete nena tol la, ana yoko la ayumþae sane la ape yar wa kiena ne Ntewa, ape yar wa kiena Kristo, a yoko naga visir plan la avisuar yo amio naga e kas manu ve taaga nene.

Yermare, kana luas

⁷ Ana pogos naþa kas manu ve taaga nene þisi pae, yoko Yermare kilia molue sina e lele nakoena naþa sike ea.

⁸ E pogos nene, yoko naga va kar ga e purvanua punu ga e yomarava nini, visa kotalia si yar lala, a yoko naga werepran pupia þegas lua nene aim ve taaga, nane yer Koko lala amio yer Makoko lala, vena aim si ave taaga vena akila mara va yeririna lala kiena ne Ntewa. A visae þegas lua nene aimi ave taaga, la ave moki na ave moki, sane mras nen none la garo losi.

⁹ Ana apureviraviran ruru la sa naþa li na kilaen mara lala, amial vera ga akusro yomarava apim atol yo Yerusalem, yo naþa Ntewa kekaran paþisi, naþa naga yo kiena ne kiena yeririna la naþa asike ea.

Ana amiervivi ruru nena pupia pulkumali nañani, asape sinelan siaren mara narui. Ana amilan ga pupia kap tai molue veraga kom ma e peni pitomin la, kekan la pano-o kekan make la nena ga.

¹⁰ A Yermare, naña naga pisa kotalia la sumo rui, akoven lua naga pa e pupia pulukapi naña mumu ke ne, nane kapi ña nena naña akoven surmali viowa amio navisawalena navisokanena lalua apa asike e rui. Ana la telu nene yoko akus naloge viowaena e yo nene ko legiena a kolemallo, vano vano-o ve uro re.

Naliñereena maro kiena ne la naña pe amlelaga re poli

¹¹ Ana nepisu pupia yo na liñereen yar lala, naña miyuwowo na miyuwowo, amio suñe keviu naliñereen yar lala totano teke metava ea. Kiena naurarena kokonia ruru make yo nene, kila porotano amio sinapane la luwoka añure apevenin plan la apano akovio.

¹² Ana nepisu pupia ñegas nen yar la tai, naga yar la naña amare nanua rui e yomarava, pupia yerkawa lala a yar kar make ga lala. Ana apim añalivi e nañani vena asuñal ase marana ne suñe keviu naliñereen yaru. Nepisu tus lañas pike ña sumã ga, ana apa akus ke sina tañena, naga asape Tus na Malena, ana naga mēna apike. Ana apisu vevea asape alual ya naña asiriyu sike e tus nene e lepas kiena ne yar mare la nene, ana la peve taaga akus kiela nakoena taveve tus la nene.

¹³ A yar mare la nene, amio mēna la naña amarmare asike e sive, amio mēna la naña amare apa asike e yo nalogeen viowa rui, la make ga aimin si naña aliñerela taveve kiela yuñena lala.

¹⁴ Ana amliñere yar mare la nene pano-o ñisi, asuñalu akus sur lua nene naña marena amio mēna yo nalogeen viowa nene, ana akovenpran ga luwoka veraga vito e pulukapi. Ana marena naña yaru la atol e yo nene, naga asape marena na lua.

¹⁵ A a si naña pe añal re kiena kia sike e Tus na Malena poli, naga ke narui akoven mēna naga vito e pupia pulukapi.

21

Pulkumali viu naña Yerusalem

¹ Ana siraun nene, nepisu peni viu amio yomarava viu añalivi, komin peni nasumo amio yomarava nasumo amio kana porotano lala a kana sive nena, akokovio make nena rui.

² A nepisu pulkumali wa wo nene, Yerusalem viu, molue kom puna ne Ntewa ma e peni pitomi tano e yomarava. Nepisu naña apaia ruru po wa, sane sira tai naña amiyowauia po pañisi imin vena akila talopa amio wona.

³ A e pogos nene nemloge visena wo tai molue ma e peni, pisawal sanini, sape “Nagane, Ntewa sinenan sape sike amio yeririna lala na yomarava, sinenan sape kila mēna uña sike pu la. Yoko aim ave kiena yeririna lala, komin naña yoko naga amio la lue narui, yoko naga imi ve kiela Ntewa lelaga.

⁴ Wamarala make ga, yoko naga yumuplania, yoko marena pona tagena pona yepelalaena pona naloge viowaena, la nene peraga narui, komin naña pogos marua nakonua la ñaro pano pa kovio rui.”

⁵ Visena nene ñisi, ana yar wa naña totano teke metava pisawalia, sape “Ee, lelaga pañisi ñan wa! Yoko in na nekila make sur la imi ve urviu sina!”

A naga sikol ke sina ga pisawal nena pan inu, sape

“Nanini yoko nevisa visen tai van ko naña pe lelaga nena napo, naña okilia owasine ruru nenaga, a popon osirilua.”

⁶ Ana naga pis ña ga, sape “Kiau yuñena make ga, nekila punu ruru nena ga!

In na in ñesia a in maro, in na nasiarena a naluasia.

Yar naña loge moto karia, yoko nevio mēna wii tai e purñes nen wii na

malena, nela vania mun korenan ga sanene.

⁷ Yaru naþa kiena malena þaro e pog m̄arera lala, suñal m̄arera suña vano-o taulu viowaena, yoko naga tol navisa ruruena lala sane kiena lalimana. Yoko nesuñā neve kiena ne Ntewa kemua lelaga, yoko noure naga imi ve naruu.

⁸ Ana yar viowa lala, la m̄ena yoko atol kiela lalimana lala. Nane yar sur la naþa pe apiawa re m̄arera e in poli, naþa pe amlelaga re poli, kiela þelaga piyowa paþisi, am̄em̄ar yar taþena, akila piowa amio sira pona yerm̄ene, aþar kimi, amlotun nono, ape yar navisokanena. La ke nene narui yoko ava atol marena na lua, nane e lelela ke napo narui, nane pulukapi naþa pe ponoyom̄e, naþa m̄ewo þele ga.”

⁹ Visena nene nane þisi ne, ana navisi nasumo la olua nene lala tai, naþa aþar pias nen sur olua na loge viowaena maro la olua na yomerava, pimi pio inu. Sape “Oim ke ne sumo wa, yoko nekila ovisu sira va talopa, nanene wona Narin Sip-sip.”

¹⁰ Ana þerelua inu nepa ga e ninuu, ana imimi lua mepa metol pupia tavie tai metava. Imimi lua mesuñalu mese yo nene narui, kipian inu e pupia pulkumali wa naþa Yerusalem, nepisu sina nom̄al naþa molue ma puna ne Ntewa ma e peni pitomi ke tano.

¹¹ Pitomi ke sanene narui, naurarena kiena ne Ntewa suñā puleule, kila tego paþisi, sa naþa sur tai naþa pilavila ruru po paþisi.

¹² A kana pupia kove nena miyervivi nenaga, pa metava na pa metava, a pupia pulutava lualima yam taaga pa lua [12] sike ea, naþa kana navisi la pepe taaga apisuar ruru la m̄aga. A pulutava la make ga, tai kia sike ea, tai kia sike ea, naþa kia kiena ne lus nae Israel la lualima yam taaga pa lua,

¹³ naþa pulutava telu sike lepas na lagawa, telu sike lepas na lagi pasipurua, telu sike lepas na mrae molue ea, a telu sike lepas na mrae pito tano ea.

¹⁴ A pupia kove nena suñalu sike e kana pupia kemraþe nena tol lualima yam taaga pa lua, asiri kia sike e pepe taaga, naþa kia la nene kiena nalologena la lualima yam taaga pa lua kiena narin sipsip.

¹⁵ Ana navisi naþa imimi lua mesun ke ne, naga kus ke natotou viavi tai naþa kol e limana, vena va lual totou na pulkumali nene keviu sanape, amio kana kove nena a kana mratava lala.

¹⁶ Kove na pulkumali nene, lepas varoka piavi maran taaga, ana navisi pa mla kana totou nena, taulu tasme manu lua [2000]. A mla m̄ena totou na yepasia siar tano pa tol metava, maran taaga ke sina ga e kana lepas la vari nene.

¹⁷ Pisi na pa pisu kana kove, mla totou na kana merorol nena, polo kana merpu ne lala pa taulu nena lualima yam orai [60] veraga.

¹⁸ A kove nene pe amiyum̄aen re e kilavaru kar ga la poli, ana miyum̄aen e kilavaru tai naþa kana marana la po paþisi, a pulkumali yepas make ga lala amiyum̄aen ga e kol, mekiki po na po, pilavila po na po paþisi.

¹⁹ A pupia kana kemraþe na kove nena, la m̄ena ga apaia ruru la amio kilavaru la naþa powo, naþa tai amiyowa e kana kilavaru naþa maran taaga sanene, tai m̄ena amiyowa e kana kilavaru naþa maran taaga sa ke ga, pano pano-o tol make kana kemraþe lualima yam taaga pa lua nene. A kia kiena ne kilavaru lualima yam taaga pa lua la nene, sanini. Nasumo, kiena kia saspā, na lua kiena kia sapaia, na telu, naga kalseton, na vari naga emrol,

²⁰ na lima naga satonik, na orai naga kanelion, na olua naga krisolaet, na orelu naga perol, na ovari naga toþas, na lualima naga krisopres, na lualima yam taaga pa taaga naga sasin, a na maro naþa lualima yam taaga pa lua naga ametis.

²¹ A kana mratava lala, la make pepe taaga ape pupia perel pepe taaga. Ana nepisu m̄ena pupia mrapa na pulkumali nene, naþa naga amiyum̄aen make nena e kol, po na po, pilavila paþisi.

²² Ana sur tai naþa nemilania, nomape yoko nelual pupia yuþa wa tai meke likan pulkumali wa naþani, ana nekira nomal re tai poli. Yo nene na pe yuþa re na sanene poli, komin Ntewa na mava amio narin sipsip, yar la apa amlotun la e yo punu ga silaga.

²³ A nomal naþa e pulkumali nene naga mrae amio kupario pe tego re e poli, komin narin sipsip naga sane kana yomerarava nena, naurarena kiena ne Ntewa kila yo make ga asike ga e yemlagi silaga.

²⁴ Purvanua taþena lala yoko ayal e kana pupia yomerarava nena, a sur wo ya la naþa pupia þarin suþe taþena na purvanua lala aþar mþaga pe kiela, yoko awar van Yerusalem viu nene, sane kiela nalaena lala.

²⁵ Yo nene yemalolo taþatete yoko imi e pogos tai, kila sanene pupia kana mratava ne lala kilia suwowo ga sumþa silaga,

²⁶ a naurarena a sur wo lala na purvanua taþena lala yoko asumþa aim lue ga loyumuþa e silaga.

²⁷ Ana e lepas na sur la naþa pe mekik ruru re nena poli, yoko taþatete nena tai va loyumuþa e nene pogos tai, a yar ai naþa kila yuþaena naþa na mawaena pona na visokanena, yoko naga mþena ga taþatete va loyumuþa ea. La naþa navaen loyumuþa, naga la ga naþa kiela kia, narin sipsip siri sike loyumuþa e kiena Tus na Malena rui.

22

Purþes nen wii na malena

¹ Siraunia, navisi kilologia purþes nen wii na malena pan inu. Nepisu kana wii wo nena, merarava na merarava, mlau siar e yo wa kiena ne Ntewa naþa Narin Sipsip sike ea.

² Kana wii ne mlau pano, kana yo naþa mlau pa ea mlau nena pa likan pupia mrapa na pulkumali viu naþa Yerusalem. Wii na malena nene mlau sanene pano, a purþes nen lak na malena lala asumþal asike lepas luwoka. Laki la nene apo paþisi, komin naþa aþar mrasa e kupario make ga, yam lualima yam taaga pa lua [12] e kas taaga. A mþas mþena

lala, apowo paþisi, komin naþa akilia akila ruru maiena kien yolai na purvanua make ga na yomarava.

³ Sanene, yoko þelaga viowa la kiena ne Yermare na kila kareen sur make ga, yoko e pulkumali nene naga peraga narui. Narin sipsip sike e yo wa kiena ne Ntewa e yo nene, a pulen ga kiena yar lala naþa kiela yuþaena, amlot lue ga e silaga.

⁴ Asike ga lavisinia, a asiri kiena kia sike e piamenala.

⁵ E yo nene, pe yemalolo re si poli, yo merarava make silaga, a pe yomerarava na kap vivaga re tai poli, pona mrae. Peraga, Suþe Ntewa ga pe purþes nen yomerarava naþa tegoli ruru ke yo nene, a naga þere kiena yeririna la naþani, pisir plan la ape þarin suþe na visuaren sur make ga.

Nawasuþeena kiena ne Yesu

⁶ Ana navisi naþa pis pan inu, sape "Sur la naþa opisuia pona omloge, ape lelaga paþisi, a yoko aim ave lelaga make nena napo. Kieta Suþe keviu, naga Ntewa naþa navisawalena na sumo lala amiyumuþae e kiena ninuna, naga pitetalia imimi kiena navisi lala mepim monalivin ko vena mekipian ko e sur la nene. Naga kila sanene komin naþa naga sinenan sape kiena yeririna lala monar akilia sur la naþa yoko ve ve piavi re aim amþalivi."

⁷ A visena kiena ne Yesu e lele nene pa pan kiena yeririna lala sanini, sape "Avisuaria! Ve ve piavi re, neimin nomþalivin amiu sina. Yar naþa tarar visena la nene mþarera, naþa apisawal sike e kiau tus wa nene, yoko wo van vaþisi, yoko naga loge wo vaþisi."

Yoane pis maro

⁸ Inu naþa nepisu sur lala nene, nemloge visena la nene, inu yermarua Yoane. A pogos naþa nepisu make pae, nemloru nekinai e lana navisi naþa naga kipian inunia, nemloge sane sineun nesape nelotunia.

⁹ Ana naga pialuþar inu, sape "Toko, ve okila re sanene. In mþena nepe yar na yuþaena kiena ne Ntewa ga, sanene ko omio womla la naþa navisawalena la

nanua sumo, amio m̃ena yar taṣena la naṣa apuarar ruru ke visena na tus wa la nene. Popon telotun kieta Ntewa naga taaga ga.”

¹⁰ A naga pisa m̃ena visen taṣena pan inu, sape “Ve owarwan re navisawalena lala naṣa sike e tus nene. Pog pimi ke lavis narui, popon yar la akilia ya naṣa asuṃa apisa ke ne.

¹¹ Yar naṣa yepena ma yagogenā, yoko kila kiena ṣelaga viowa va viowa laa sane, yoko kororaki na kiena mlamulen viowa lala va viowa ve keviu manene laa. Ana yar naṣa loge, yoko kiena yuṃaena memes lala aimi awo vaṣisi, yoko kiena ṣelaga wo lala aim ave wa ruru nenaga.”

¹² Visena kiena Yesu e lele nene, naga sanini, sape “Avisuaria! Nepimin ke naṣa ve ve piavi re nenaga nom̃alivin amiu. Neimi nemio kiau nalaen wo lala naṣa powo, naṣa yoko nekian plan va yar lala taveve yuṃaena wo la naṣa akila pan inu.

¹³ Inu ṣesia a inu maro, inu nasumo a inu nasirau, inu nasiarena a inu naluasia na sur make ga.

¹⁴ “Ve ve piavi re, yoko pupia navisa ruruena imi m̃alivin ruru nena kiau yeririna lala. Apuvan ruru m̃ala kulsota lala, amiyowau ruru rui, ana akilia ava awarpo yo e pulutava vena ava loyuṃa e pulkumali wa kiena ne Ntewa, akilia ava atol purlaki na malena.

¹⁵ Ana yar taṣena la mokliu naṣa taṣatete avam loyuṃa. Nane yar la naṣa asuṃa apa kar ga sane lokul lala, amio la naṣa aṣar kimi, amio la naṣa ataṣa kolau amio lau, la naṣa aṃeṃar yaru, la naṣa amlotun nono lala, a la naṣa sinelan asape akila ṣelaga lala na visokanena.

¹⁶ “In na Yesu, nemligan navisi nene pimin vena visawal visena la nene van ko, vena okilia ova ola va kiau suṃare

make ga. Navisaarena naṣa apisaar asape molue kome lus kiena ne yermarua Ṣarin Suṣe Tepet nanua, in ne nanini. In na nepe verue naṣa Melag, naṣa pisawal ke sape lavis yelagi imi warpoyo narui.”

¹⁷ Ninuna ne Ntewa mloge visena nene, pisawal pa Yesu sape “Pogaga, okilia oimi!”

Sira naṣa na talopaena amio, sape “Ee, popon oim narui!”

A yar ai naṣa loge visena la nene, popon naga m̃ena visawalia, visave “Ake Yesu, visae oim ga rui!”

Yar naṣa loge moto karia, avietava vana vena kilia vam loyuṃa. Yar naṣa sinenan imiena, yoko naga kilia tol m̃ana wii na malena, sa naṣa kiena nalaena tai naṣa pimi ga sa ga nene.

¹⁸ Ana nevisa visena m̃arera tai van amiu naṣa yoko aloge visena lala na visawalena lala na tus wa nene. Visae yar tai sukol si visen taṣena tai to metavan naṣa sike pa rui, yoko Ntewa kila naga war naloge viowaena make ga naṣa tus nene pisa ke pa rui.

¹⁹ Pona visae yar tai lalua si visena laṣas naṣa sike pa rui, yoko Ntewa lalua si lalimana vetania naṣa sike e purlaki na malena, yoko naga taṣatete tol sur wo la sa naṣa tus wa nene sape asike loyuṃa e pulkumali wa.

²⁰ Naga naṣa pisawal visena la nene, pisape “Sa ke nene narui. Ve ve piavi re, yoko neim nom̃alivin amiu.”

A sitomena kiena ne yeririna kiena ne Ntewa lala, asape “Visae ve sa nene, wo vaṣisi. Awis Yesu, oim vilaga!”

²¹ A visena maro na lepas na sunena na kiau m̃eniēna, in yermarua Yoane nemlen nesape yoko lemamiēna wo kiena kieta Suṣe Yesu sike amio amiu, kam yeririna lala kiena ne Ntewa.

Sanene.